

Pavitra Polle



Aheri Gondi: Besta Kabur (Bible)

Pavitra Polle
Aheri Gondi: Besta Kabur (Bible)

copyright © 2020-2022 Wycliffe Bible Translators, Inc.

Language: (Aheri Gondi)

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 1 May 2025 from source files dated 1 May 2025
856c9a76-2de1-5675-855a-28be9a349068

Contents

मत्तयाल	1
मरकुस	44
लूकाल	70
योहान	120
प्रेरितुल्लकुना कबाहक	153
रोम	194
1 कुरैति	214
2 कुरैति	230
गलातिया	241
इपीसि	248
पिलिपिया	255
कुलुसि	260
1 तेसलोन	264
2 तेसलोन	268
1 तिमोति	271
2 तिमोति	277
तीतु	281
पिलेमोन	284
इब्रि	286
याकोब	302
1 पत्रु	307
2 पत्रु	312
1 योहान	315
2 योहान	320
3 योहान	321
यहुदा	323
पेन हुपिस्ता पोल्लै	325

मत्तयाल मत्तयाल रासतद बेसता कबुर

इद पुस्तकमता बारेमते गिचचो परिचयम

रासतोना पोरोल: मत्तयाल

रासता कालम: इसवि सन 50-60

इद पुस्तकम रासता मत्तयाल यहुदि मनकल आंदुर. ईर रोमि सरकारनाहाटी कर वसुल कियुंदुर इंचि ईन यहुदि लोकुल्लक हय्साकौंदुर. अय्नागानि येसु सामि केयतस्के ओना पज्जो हौंचि ओना सिस्युड आतोर. यहुदिल्क पूसकियना सवालकुंक जवाब हियनाहाटी मत्तयाल इद पुस्तकमतुन रासतोर. इंका इद पुस्तकमतुन हदुवते, एनकटा कालमते पेनदा कबुरतोर वेहता बविस्यवानिगुडा येसु किरिस्तुना लोप्पो पुरागा आंतां इत्ता संगति मनाकु तेळियंता. अचोने आयका स्वर्ग राज्येम इत्ते बतल, स्वर्ग राज्येमता रहिवासिनलेसी बल्हा पिस्सा परांतोम, अद बल्हा मनंता? इसौटा सवालकुना जवाबगुडा येसु सामि बेस वेसुडिं वेहचि तेळियागोटता बारेमते रासि मंता.

बगा बतल मंता

येसुना पुटमळ आनि बेर्समळ 1:1-2:23

स्वर्ग राज्येमता बारेमते वेहमळ 3:1-7:29

गालिलते येसु सेवा कबळ सुख कींतोर 8:1-10:42

येसुना विरोद कियमळ आनि लोल्लिं आयमळ 11:1-13:52

गालिलते येसुना सेवा कबळ मारमळ 13:53-18:35

किरिस्तु येस्सलेम दांतोर 19:1-25:46

येसुंक तिप्पल्क वासि, हासि मर्ग जीवाते तेदमळ 26:1-28:20

येसु सामिना पेदुदालकुना तंतुल्क

(लूकाल 3:23-38)

1 येसु किरिस्तुना* पेदुदालकुना तंतुल्कां इल्हा मंतां. येसुना एनकटा मातिर-दादाल अब्राहाम आंदुर. अब्राहामुना तंतुनाल दाविद राजाल पुटतोर, दाविदुना तंतुनाले येसु सामि वातोर.

2 अब्राहामुंक इसाक पुटतोर, इसाकुना मर्गि याकोब, याकोबुना मर्क यहुदल आनि ईना दादालोर-तम्मुहक.

3 यहुदाना मर्क पेरेस आनि जेराल, ईरा यावन पोरोल तामरि आंद. पेरेसुना मर्गि हेसरोन, हेसरोनुना मर्गि अराम,

4 अरामुना मर्गि अमिनादाब, अमिनादाबुना मर्गि नहसोन, नहसोनिना मर्गि सलमोन,

5 सलमोनुना मर्गि बोआज, बोआजुना यावन पोरोल राहोबी आंद. बोवाज आनि ओना मुत्तो स्तुंकु ओबेद पुटतोर. ओबेदुना मर्गि यिस्सल,

6 यिस्साना मर्गि दाविद राजाल.

दाविदुना मर्गि सुलेमान, सुलेमानना यावल मोदाला उरियाना मुत्तो मत्ता.

7 सुलेमानुंक रहोबाम पुटतोर. रहोबामुना मर्गि अबियेल, अबियेलुंक आस्यल पुटतोर.

8 आस्यना मर्गि येहोसपात, यहोसपातुना मर्गि योराम, योरामुना तंतुनाल उजियाल पुटतोर.

9 उजियाना मर्गि योताम आनि योतामुना मर्गि अहाज, अहाजना मर्गि हिजकियल.

10 हिजकियन हेंदाल मनसे पुटतोर, मनसेना मर्गि आमोन, आमोनुना मर्गि योसियाल.

11 इस्राएल लोकुल्लुकुन गुलाम कीसि बेबिलोन देसेमते ओयनेके योसियांक येकोनियेल आनि इंका ईना तम्मुहक आतुर.

12 बेबिलोन ओता पजा येकोनियंकु सलितिएल पुटतोर, सलितिएलुन मर्गि जेस्बाबेल.

13 जेस्बाबेलुना मर्गि अबियुद, अबियुदुना मर्गि एलकिमु, एलकिमुंकु अजिरल पुटतोर.

14 अजिरना मर्गि सादोक, सादोकुना मर्गि याकिम, याकिमुंकु एलहुदल पुटतोर.

15 एलहुदुना मर्गि एलियाजर, एलियाजरना मर्गि मत्तन, मत्तानिकु याकोब पुटतोर.

16 याकोबुना मर्गि योसेप, योसेपुन मुत्तो मरियम. मरियम “किरिस्तु” इनना येसु सामिन यावल आंद.

17 ई परकारम अब्राहामुनगटाल दाविदुनदाका पडनालुं तंतुल्क. दाविदुनगटाल बेबिलोनते गुलाम कीसि ओयानदाका पडनालुं तंतुल्क. अल्हे बेबिलोनते यहुदिल्कुकुन गुलाम कीसि ओतागटाल अय्ते येसु किरिस्तु पुट्टनदाका पडनालुं तंतुल्क आतां.

येसुना पुटमळ

(लूकाल 2:1-7)

* 1:1 किरिस्तु इत्ते “अबिसेकम आतोर” इंचि अर्तम. मनकन ओना पापालकुनाल पिसागोटनाहाटी पेन बोन अय्ते अबिसेकम कीसि लोहतनो, ओरे किरिस्तु आंद. † 1:1 तंतुल्क उंदे वंसम, पीळि.

18 येसु किरिस्तुना पुटमळ इल्हा जर्गता. मरियमुन योसेपुंक तल्किस एर्ना बोट्टु कीतुर. योसेप मरियमुन इट्टक मुन्नेने पवित्र आत्माताः हेंदाल मरियमुंकु पीर आता.

19 मरियमुन तल्कता योसेप न्यायमते ताकाना मनकल मत्तोर. अद पीटे मत्ता संगति ओन्क तेळियतस्के दान अंटोरा मुन्ने बदनाम कियामन्नि इन्कुत्तोर. अदुनहाटीं बोर्के तेळियाकोटा मरियमुन होळसना विचारम कीसेक मत्तोर.

20 गानि इल्हा विचारम कीसेक मनानेके पेनदा दूताऽ कलाते वासि, “योसेपु, दाविदुन वंसमतोना, निमे मरियमुन नीवा मुत्तो इंचि ओप्कुनालय वेरियमा. बारित्ते दाना पीटे मनना पिडेम पवित्र आत्माहेंदाल आसि मंता.

21 अद पेडन कनंता, ओर ओना लोकुल्कुन ओरा पापालकुनाल पिसागोटंतोर. अदुनहाटीं ओना पोरोल येसु दोस्सा,” इंचि वेहता.

22 मुन्ने पेनदा कबुरतोर रासता पोल्ले निजम आयनाहाटीं आता. अद पोल्ले इल्हा मंता.

23 “हूळाट, मरिमिं आयवा पेगिडूक पीर आसि, वरोर मरिन कनांता.

ओना पोरोल इम्मानुएल दोस्सानुर.”*☆

इत्ते, “मनातोनि पेन मंता,” इंचि ई पोरोल्क अर्तम.

24 अस्के निद्रताल तेदतारित्ते योसेप पेनदा दूता वेहता परकारम कीतोर. ओर मरियमुन ओना मुत्तो इंचि स्विकारम कीतोर.

25 अयनागानि अद एर पूरानाल ओर दानतोनि मीडा हिल्लोर. ओर पेडन पोरोल येसु इंचि दोसतोर.

2

पंचंगाल्क हूळानोर येसु सामिना काल्क मोळ्कालय वायमळ

1 येसु यहुदिया एरियाता बेतलहेम नाटे पुटतस्के अगा हेरोद इनना राजाल राज्येम कीसेक मत्तोर. अदे कालमते पोळ्द पेयसनाहेंदाल बोरो पंचांगम हूळानोर येस्सलेम सहरते वातुर.

2 वासि राजांक कलियसि, “पूने-पूने पुटता यहुदिल्कुना राजाल बगा मंतोर? पोळ्द पेयसनाहेके ओर पुटताप मोमोट उंदि सुक्कातुन हूळतोम. ओना काल्क मोळ्कालय मोमोट वातोम,” इंचि राजन पूसकीतुर.

3 इद केंजसि हेरोद राजाल आनि येस्सलेम सहरता वेरियकुत्तुर.

4 अस्के हेरोद राजाल येस्सलेम सहरता पेदूदा पेर्मालोर्कुन* आनि अगाटा दर्मसास्त्रम कराहना गुस्कुन अंटोर्कुन केय्सि, “किरिस्तु बगा पुट्टनद मत्तोर?” इंचि पूसकीतोर.

5 अस्के ओर, “यहुदिया एरियाता बेतलहेम नाटेने,” इंचि वेहतुर.

6 एनकटा पेनदा कबुरतोर रासताप,

“ए यहुदिया एरियाता बूमिपोर्नी मंदना बेतलहेम नाटेनोरिता,

मिमेट मीवा नार, सिन्नादे इंचि इनकुन्मट.

बारित्ते नावा इम्नाएल देसेमता लोकुल्कुन कापाळनोर,

आ राजाल मीवा नाटेनेन पुटनद मंता.”*☆

7 अस्के पोळ्द पेयसनाहेंदाल वाता पंचांगम हूळानोर्कुन हेरोद राजाल सपुडदाका कलियसि “सुक्का बद वेलाक दिसता?” इंचि पूस कीसि एरपाट कीकुत्तोर.

8 पजा “मिमेट होंचि आ पुटता पेडन बेस पहकट आनि दिसतारित्ते नाकु वासि वेहट, अस्के ननागुडा होंचि ओना काल्क मोळ्ककन,” इंचि वेहचि ओर्कुन बेतलहेम नार लोहचीतोर.

9 पजा राजाल वेहता पोल्ले केंजसि आ पंचांगम हूळानोर अगटाल पेयस्तुर. मुन्ने बद सुक्का दिस्सि मत्तानो अद सुक्का ओरा मुन्ने-मुन्ने होंचि आ पेडल मत्ता जेगा पोर्नेन आगुता.

10 आ सुक्कातुन हूळसि ओर्कु इरगा आनंदम आता. पंचांगम हूळानोर येसु पुटतगा बेतलहेम नाटे होत्तुर.

11 ओर लोता लोप्पो होंचि आ पेडन तल्लुर मरियमनगा हूळतुर. आ पेडाना काल्कुनपोर्नी अरसि मोळ्कतुर. आयंका ओर जोरानाल बंगारम, गंदकम,† ऊदु इसंटा एक्को दराता वस्तुक तेंडसि ओन्क हीतुर. 12 आयंका “मल्सि हेरोदनाहेके होनमट” इंचि पेन कलाते वेहताहेंका ओर इंकुंदि हरिं पीसि ओरा देसेम पेय्सि होत्तुर.

येसुन पीसि इजिप्त देसेमते होनमळ

13 पंचांगम हूळानोर होत्तारित्ते, योसेपुंक उंदि पेनदा दूता कलाते दिस्सि, “निमे तेदा, पेडन आनि ओना तल्लुन पीसि इजिप्त देसेम पेय्सि होन. हेरोद राजाल पेडन हक्कनाहाटीं पहकांतोर. अदुनहाटीं नना नीकु मरी वेहनदाका अग्गेन मन्नु,” इंचि वेहता.

14 अस्के योसेप अदे नर्का पेडन आनि पेडाना तल्लुन पीकुंचि इजिप्त देसेम्कु पेय्सि होत्तोर.

‡ 1:18 पवित्र आत्मा पेनदा आत्मा, पेनदाहेंदाल दोर्कना आत्मा. § 1:20 पेनदा दूता पेनदा पोल्लेतुन बूमिपोर्नी पीसि वायना पेनदा दासिहक. ☆ 1:23 यसायाह 7:14 * 2:4 पेदूदा पेर्मालोर्क ईर वेल्लेन मंदि मनांतुर. ☆ 2:6 मीका 5:2 † 2:11 गंदकम इद उंदि एक्को दराता वस्तु आंद.

15 हेरोद राजाल हासोननदाका अग्गेन मत्तोर. “नना नावा मरिन इजिप्त देसेमताल केयतन”[☆] इंचि वेल्लेन वर्सा मुन्ने पेनदा कबुरतोर।हेंदाल वेहामळ जर्गता, पोल्ले निजम आयगोम इंचि इदंता जर्गता.

हेरोद राजाल बेतलहेम नाटेना पिलाल्कुन हक्कतोर

16 आ पंचांगम हळना लोकूलक ओन नाडहे कीतद एरपाट कीसि, हेरोद राजांक इरगा होंग वाता. आ पंचांगम हळानोराहेंदाल आ पेडल पुटता वेला एर्का कीकुंचि मत्ताहेका बेतलहेम आनि पकापीसि मत्ता नाटेने मनना रोंडु वर्सानोर, इंका रोंडु वर्साकन्ना सिन्नोर्क अंटोर मांड्सा पिलाल्कुन हक्कट इंचि हेरोद राजाल आदेस हीतोर.

17 ई परकारम यिर्मयाह इनना एनकटा पेनदा कबुरतोर वेहता पेनदा पोल्ले निजम आता. अद पोल्ले इल्हा मत्ता:

18 “रेचेलना पिलाल्क हासि होत्तुर, इंचि रामाह इनना नाटे

दुक्कमते अळाना सप्पुड केजावाता.

अद दाना पिलाल्कुनाहाटीं अळसेके मत्ता,

बोर सम्मत किथिनागानि अद समत आयाहिल्ले.”[☆]

योसेपना कुटुंबम इजिप्त देसेमताल मल्लिस वायमळ

19 कोन्नि रोजकुंक हेरोद राजाल हातोर. अस्के इजिप्तते मनना योसेपुनतोनि कलाते पेनदा दूता वासि,

20 “तेदा, पेडन हक्कालय हळसेक मत्तोर हातोर, अदुनहेके निमे पेडन आनि ओना तल्लुन पीसि इस्नाएल देसेमते मल्लिस होन,” इंचि इत्ता.

21 अस्के योसेपु पेडन आनि पेडाना तल्लुन पीसि इस्नाएल देसेमते मल्लिस होत्तोर.

22 गानि यहुदिया एरियाता हेरोद राजाल हातारित्ते “ओना जेगाते ओना मरि अर्केलाल राजाल आतोर,” इंचि तेळियतारित्ते ओर अगा होनालासि वेरियतोर. आयंका कलाते पेन वेहताहेका ओर गालिल एरियाते होत्तोर.

23 अगा ओर नासरेत इनना नाटे होंचि जेगा पीतोर. इंचि “ओन नासरेततोर इंतुर.” इल्हा पेनदा कबुरतोर मुन्ने वेहचि मत्तद इंदके निजम आता.

3

बापतिस्मा हियना योहान

(मरकुस 1:2-8; लूकाल 3:1-17; योहान 1:6; 1:19-28)

1-2 अदे कालमते, पेनदा पोरोलते एते मुळहाचि बापतिस्मा* हियना योहान यहुदिया एरियाता बय्लि जेगाते वातोर. वासि, “स्वर्ग राज्येम दगर्के एव्ता, मिमेट मनसु मार्सकुंदु,” इंचेके वरगेयसि वेहालय दलगतोर.

3 एनकटा कालमते यसायाहल इनना पेनदा कबुरतोर, ई योहानुना बारेमते इल्हा वळिकसि मत्तोर गदा:

“सामिनाहाटीं हरीं तयार कीम्दु, ओना हरीं सवरगा कीम्दु,

इंचि केडाते केयानद उंदि अल्किर केजावाता.”[☆]

4 आ योहान लोटापेटा बूराते तयार कीता कपडिं केरसि तोल्दा पट्टा नडिक तासकुनुंदुर. ओर गोल्लाबामां† आनि तेने इवे तिडि तिनुंदुर.

5 येस्सलेम सहरताल, यहुदिया राज्येमता अन्नि जेगानाल आनि योर्दन बेरेटा सुट्टु-मट्टुना जेगाता लोकूलक योहानुनगा वातुर.

6 वासि ओरा पापालक ओष्कुंचि ओनहेंदाल योर्दन बेरेटे बापतिस्मा येतकुत्तुर.

7 बापतिस्मा हियना जेगातगा वेल्लेन मंदि परिसिल्लक, †सदुकिर्क‡ वायानद हळसि योहान ओर्कुन, “ए कट्टला तरासनसंतोरिटा, पेनदा होंगुनाल तपिच्छुनालय बापतिस्मा येतट इंचि मीकु बोर वेहतुर?

8 अय्ते मरि, निजमे मीवा मनसु मार्सकुत्तिर इंचि रूजुव कीसि हुप्सट.

9 वट्टिदे, मोमोट अब्राहामुना वंसमतोरम आंदुम, इंचि बस्केने इनकुनमट. नना मीकु निजम वेहांतन, पेन अब्राहामनाहाटीं ई बंडानालगुडा पिलाल्क पुट्टिचि हिया परंता.

10 इंदके मराकुना हिहकुनगा मर्सु इरसि मंता. बव मराकुंक अय्ते बेसता पंडिं हादोंगों, अबुन नर्किसि तडमिते वाटमळ जर्गता.

11 मिमेट मीवा मनसु मार्सकुत्ताहाटीं नना मीकु एते मुळहाचि बापतिस्मा हीसेक मंतन. गानि नाकन्ना सक्तिमंतुड नावा पज्जोटाल वासंतोर. ओना हेरपुहकुन इटाना लायकगुडा नना हिल्लेन. ओर मीकु पवित्र आत्माते आनि तडमिते बापतिस्मा हीतोर.

12 ओना कय्दे हेती मंता. ओर ओना कडातुन बेस साप कीतारित्ते गोहकुन तूरपालक पीसि गुम्मिते दोसंतोर, पोट्टुनबारे बस्केने पिर्वा तडमिते वाटसि बोळसंतोर,” इंचि इत्तोर.

योहान येसुक बापतिस्मा हीतोर

(मरकुस 1:9-11; लूकाल 3:21-22; योहान 1:29-34)

☆ 2:15 होसे 11:1 ☆ 2:18 यिर्मयाह 31:15 * 3:1-2 बापतिस्मा येसुन पोरोलते एर लंगमळ, उंदि दिक्सा, उंदि दंडकम. ☆ 3:3 यसायाह 40:3 † 3:4 गोल्लाबामा उंदि पुडि (बुमिपोरीं पिरकालम पेयसंता). ‡ 3:7 परिसिल्लक परिसिल्लक इत्ते यहुदिल्लुन लोपोटद उंदि जाति आंद, ईर तिरियसि पुटमळतुन नम्मंतुर. § 3:7 सदुकिर्क यहुदिल्लुना लोपोटद उंदि जाति आंद. ईर मूसाना नियमते ताकुंदुर आनि तिरियसि पुटमळतुन नम्माकोंदुर.

- 13 पजा येसु, गालिल एरियाताल योर्दन बेरेटगा, योहानुनाहेंदाल बापतिस्मा एतालय वातोर.
 14 अस्के “नना नीवा कयदाल बापतिस्मा येतकुनगोम, गानि निमे नहगा वासि बापतिस्मा एतकुन्मळा!” इंचि योहान येसुन आपालय हळतोर.
 15 अस्के येसु, “पेनदा इच्चागुडा मनम इल्हेन क्रियाना इंचि मंता. अदुनहाटी ई नीतिता दंडकम इल्हेने जर्गिकांटी,” इंचि इत्तोर. इल्हा योहान येसुंक बापतिस्मा हियालय तयार आतोर.
 16 येसु बापतिस्मा एतसि एताल पलाते पेयस्तस्के मब्बु बय्यारा आता. पेनदा आत्मा उंदि पावरेम पिट्टेतालेसी आसि येसुनपोर्री रेयतद येसु हळतोर.
 17 अस्केन स्वर्गमताल, “ईर ना पावरमगल्ला मर्री आंदुर. ईर इलते नाकु बच्चोनो संबरम,” इंचि उंदि अल्किर केंजावाता.

4

देय्यमताहेंदाल येसुना परिकसा
 (मरकुस 1:12-13; लूकाल 4:1-13)

- 1 पजा पेद्दा देय्यम येसुना पट्टु हळगोम इंचि पेनदा आत्मा ओन बय्लि जेगाते ओता.
 2 अगा येसु नल्पै रोजकु, नल्पै नर्का उपासम मत्तोर. अदुनहाटी येसुंक इरगा कर्वेस्ता.
 3 अस्के आ पट्टु हळानोर येसुनगा वासि, “ओक्कला निमे पेनदा मर्रीन आते ई बंडां हारि आयि इंचि आदेस हीम,” इंचि इत्ता.
 4 अस्के येसु इल्हा जवाब हीतोर,
 “मनकल सिराप वट्टि हारि तिचे पिस्सोर,
 गानि पेनदा तोळदाल पेयसना उंदि-उंदि पोल्लेताहेंदाल पिस्संतोर.
 इल्हा दर्मसास्त्रमते रासि मंता.”✧
 5 पजा आ पेद्दा देय्यम येसुन येस्सलेम इनना पवित्र सहरते ओसि, गुळि पोर्री कोस्सक निल्हाचि इल्हा इत्ता.
 6 “ओक्कला निमे पेनदा मर्रीन आते हिळु दुनका,
 बारित्ते, नीकुन कापाळालय पेन दाना दूतांक आदेस हीता,
 आनि आ दूतां वासि नीवा काल्कुंक देब्बां दलगामान्नि इंचि,
 नीकुन पोर्रीटद पोर्रीन अंदकुंतां,
 इल्हा दर्मसास्त्रमते रासि मंता.”✧
 7 अस्के येसु दान इल्हा इत्तोर,
 “निमे सामि इनना नीवा पेनदा पट्टु हळमा,
 इल्हागुडा दर्मसास्त्रमते रासि मंता.”✧
 8 पजा आ पेद्दा देय्यम येसुन उंदि एतु गुट्टापोर्री ओसि ओन्क दुनियाता आन्नि राज्येल्क, अवुना पेद्दातनाल्क बोत्तिगा हुपिच्चि,
 9 “निमे नावा मुन्ने वंगिसि, नावा काल्क मोळकानय्ते, अवंता बोत्तिगा नीके हीतन,” इंचि इत्ता.
 10 अस्के,
 “ए देय्यमतुना हब्बेर होन, बारित्ते निमे नीवा पेनदुने मोळकना,
 सिराप दानादे सेवा क्रियना, इल्हा दर्मसास्त्रमते रासि मंता.”✧
 इंचि येसु दान इत्तोर.
 11 अल्हा इत्तरित्ते पेद्दा देय्यम ओन होळसि होत्ता. अस्के हुळट! पेनदा दूतां वासि येसुना सेवा कीतां.

येसु गालिल एरियाते सेवा कबळ सुख कीतोर

- 12 योहानुन जेलते वाटतुर इंचि येसुंक तेळियताहेका ओर गालिल एरियाता नासरेत नाटेने होत्तोर.
 13 अगटाल नासरेत नाटेने आगाकोटा कपर्नाहुम इनना सहर होंचि मनालय दल्गतोर. आ सहर गालिल सेरवु पकापीसि मनना नप्तालि आनि जबलुन इनना एरियांक दल्गिसि मंता.
 14 ओर अगा मत्ताहाटी यसायाह इनना पेनदा कबुरतोनतोनि पेन वेहता पोल्ले निजम आता. आ पोल्ले इल्हा मत्ता,
 15 “जबलुन आनि नप्तालि एरियाता सेरवुना हरदाहेंदाल,
 योर्दन बेरेटा हब्बेटा बाजुंक, यहुदि आयवोरा गालिल एरियाते,
 16 बोर अय्ते लोकुल्क हीकटते उदिस मत्तुरो ओर पेद्दा वेलगुन हळतुर.
 आनि बोरपोर्री अय्ते हामुरता नीडा अर्सि मत्तानो,
 ओर अंतोरपोर्री वेल्लु अरता.”✧

17 अस्केटाल येसु इल्हा वेहालय सुख कीतोर, “स्वर्ग राज्येम दग्गेर्क एत्ता इंचि मिमेट मनसु मार्सकुंटु.”

येसु सिस्स्युल्कुन पेरीतोर
(मरकुस 1:16-20)

18 येसु गालिल समुद्रम ओड्डु पीसि होननेके वरोर सिमोनन ओन पन्नुगुडा इन्दुर आनि ओना तम्मुर अंदरियन हळतोर. ओर जिम्मां पिय्यानोर आताहाटी, समुद्रमते ओल्लां वाटसि जिम्मां पीसेक मत्तुर.

19 ओर्कुन हळसि, “नावा पज्जो वट, नना मीकुन मनकालोर्कुन नहगा तायानोर कीतन,” इंचि येसु इत्तोर.

20 अस्के ओर, बिराना ओरा ओल्लां अग्गेन होळसि ओना पज्जो होत्तुर.

21 अगटाल इंचिचो मुन्नेळक होत्तारित्ते येसु इच्चुर दादाल-तम्मुर इत्ते जब्दिना मर्कु याकोब आनि ओना तम्मुर योहानुन हळतोर. ओर ओना बाबोनतोनि डोंगापोरी ओल्लां सवरिचनेके येसु ओर्कुन केयतोर.

22 अस्के ओर, बिराना ओरा बान आनि डोंगातुन होळसि ओना पज्जो होत्तुर.

गालिल एरियाते येसु तिरियसेक कीता कबाहक
(लूकाल 6:17-19)

23 यहुदिलकुना दर्मसास्त्रम कराहना लोतागा* येसु पेनदा पोल्लें कराहतोर. स्वर्ग राज्येम बारेमते बेसता कबुर वेहचेके, लोकुल्कुना अन्नि तीरकुना रोगाल्कुन, कमजोरिन बेस कीसेके गालिल एरियाते पूरा तिरियतोर.

24 येसु कियना कबळ पूरा सिरिया देसेमंता तेळियसि होत्ता. दानहाटी तीरतीराता रोगाल्कुनोर, नोप्पिनोर, देय्याल्क पीतोर, कुंदेल रोगमतोर आनि लकवा बिमारतोर इंसंता लोकुल्कुन ओनगा तत्तुर. येसु ओर अंटोर्कुन बेस कीतोर.

25 गालिल एरिया, देकापोलिस एरिया, येस्सलेम सहर, यहुदिया एरिया आनि योर्दन बैरेटा हब्बेटाल वाता लोकुल्कुना मंदा येसुना पज्जो होनालय दलगुतुर.

5

1 वेल्लेटुर लोकुल्कुना मंदातुन हळसि येसु गुट्टापोरी होंचि उदतोर. उदतस्के सिस्स्युल्क इंका ओना दग्गेरा वातुर.

2 अस्के येसु ओर्क इल्हा कराहलय दलगुतोर.

पेन बोर्क आसिर्वाद हीता?
(लूकाल 6:20-26)

3 “बोर अय्ते आत्माताल गरिब* मंतुर पेन ओर्के आसिर्वाद† हीता, स्वर्ग राज्येम ओरदे आंद.

4 दुक्कमते मत्तोर्कुके पेन आसिर्वाद हीता, अद ओर्क दैरनेम हीता.

5 सादा सिंपल गुनम मत्तोर्कुके पेन आसिर्वाद हीता,

अद ई बूमि ओर्के हीसीता.

6 नीतिताहाटी कर्बु दूपा इनाका कस्टम कियानोर्कुके पेन आसिर्वाद हीता,

पेन ओर्के समादानम हीता.

7 दया कियानोर्कुनपोरी पेन दया कीता,

पेन ओर्के आसिर्वाद हीता.

8 बोर ओना मनसु पेनदापोरी इरतोर, पेन ओन्के आसिर्वाद हीता,

उंद रोजु ओरे पेनदुन हळांतोर.

9 पगातोर्कुन उंदि कियानोर्कुके पेन आसिर्वाद हीता,

ओर्कुने पेनदा पिलाल्क इंचि इंतुर.

10 पेनदा सत्तेमते ताकनाहाटी तकलिप, दुक्कम अरानोर्कुके पेन आसिर्वाद हीता,

अद स्वर्ग राज्येम ओराहाटीगे मंता.”

11 “मिमेट नावा सिस्स्युल्क आताहाटी लोकुल्क मीवा अपमानम कीतुर, तिप्पल्क कीतुर, मीवा विरोदमते बच्चुंगो आबद्दम पोल्लें वेहांतुर, अस्के मीकुगुडा पेन आसिर्वाद हीता.

12 मीकन्ना मुन्नेटा पेनदा कबुरतोर्कुनगुडा लोकुल्क इल्हेने तकलिप कीतुर. अदुनहाटी मिमेट कुसिते मंटु, आनंदमते मंटु. स्वर्गमते मीकु पेद्दा इनाम दोर्कता.”

होव्वोर आनि वेडसि पोरीटाल कराहता पोल्लें
(मरकुस 9:50; लूकाल 14:34-35)

* 4:23 दर्मसास्त्रम कराहना लोतागा यहुदिलक पेनदुन मोळकाना लोन. * 5:3 आत्माताल गरिब बोर अय्ते ओना पिस्वरते ओन्क पेनदा अवसरम वेल्लेन मंता इंचि एरपाट कीतोर ओरे आत्माताल गरिब. † 5:3 आसिर्वाद गावाले मत्तद पेनदुन तल्सकुल्लाहेंका दोर्कते अद पेनदा आसिर्वाद आंद, इंतुर.

13 मिमेट दुनियातोरहाटीं होव्वोरतसंतोर आंदिर. ओक्कला होव्वोर, होव्वोरलेसीं रूसि वायाकोंटे अव्टे मर्ना बल्हा होव्वोर रूसि तरा परांतोम? अस्के अद बता कबळ्ळक ओज्जो. अद पलाते पोहचियना कबळ्ळके ओज्जता, लोकुल्क दान जारसेके दांतुर.

14 गुट्टापोर्रीं मत्ता नार दिसाकोंटा मन्तो. अल्हेने मिमेट दुनियाताहाटीं वेलगु आंदिर.

15 बोरे आयिर वेडसि निरिच्चि, दान गुल्ला हिळ्ळ ईर्र. एत्तुने उंदि दीसोडिपोर्रीं ईर्रतुर. अस्के अद लोतोर अंतोर्कुंक वेलगु हीता.

16 अदुनहाटीं मीवा पिस्वर लोकुल्कुना मुन्ने इल्हा मनना गदा मीवा वेलगुनसोटा बेसता कबाह्कुन ह्ळसि वैरेतोर स्वर्गमता बाबानद कदर कियानुर.

दर्मसास्त्रमता बारेमते येसुना पोल्लें

17 नना मूसाना नियमतुन, पेनदा कबुरतोर रासतदुन रद्द कियालय वातन इनकुनमट्ट. नना दान रद्द कियालय आयो गानि अव्टे नावा बारेमते रासता पोल्लेन पुरागा कियालय वातन.

18 नना मीकु निजम वेहचेके मंतन, बूमि मब्बु नासडेम आयानदाका दर्मसास्त्रमतद उंदि सिन्ना गीता, पोल्लेगुडा रद्द आयो.

19 मिमेट अंतोर आदेस परकारम ताकना. बोरे आयिर पेनदा सिन्ने आदेसतुनगुडा पालन कियार्कोटा, अल्हेने वैरेतोन्कगुडा वेहानय्ते, ओर स्वर्ग राज्येमते सिन्नासि मनंतोर. गानि बोर अय्ते नियम परकारम ताकंतोर आनि इंकावरोंक दाना परकारम ताकालय वेहांतोर ओर स्वर्ग राज्येमते बच्चोने पेद्दा आयानुर.

20 नना मीकु वेहासेक मंतन केंजट. दर्मसास्त्रम कराहना गुस्लकः आनि परिसिल्क ईरकन्ना मिमेट एक्को नीतिमंतुल्क आयवा स्वर्ग राज्येमते नेगा पर्रिट.

होंगुना बारेमते येसु कराहता पोल्लें

21 मिमेट बोन हक्कमट, बोर अय्ते हक्कंतोर ओन्क कोरटताल सिक्सा आंता इंचि मीवा एनकटा पेद्दाल्कुंक पेन वेहतद मिमेट केंजसि मंतिर.

22 गानि नना मीकु वेहंतन गदा, बोर अय्ते ओना दंटातोनापोर्रीं होंग आंतोर ओर पेनदा कोरटता सिक्सालायक आंतोर. अल्हेने बोर अय्ते ओना दंटातोना अपमानम कीतोर, ओर पेद्दाल्कुना कोरटता सिक्सालायक आंतोर. बोरन्ना अरे मुर्का इनानय्ते ओन्क देय्याल्क मनना अग्नि गुंडमता§ सिक्सा आयार.

23 दानहाटीं निमे ओक्कला पेन गद्देतगा उपारम* वाटानेके नीवा दंटातोर नीवा पोर्रीं होंग आसि मंतोर इंचि मति वायानय्ते,

24 निमे आ उपारमतुन अग्नेन होळसिसि मुन्ने दंटातोना होन. दंटातोना समत कीतारित्ते वासि उपारम वाटा.

25 नीवा पगातोर नीकुन कोरटते ओयानेके, निमे बिराना हरदेन ओन दोस्ती कीम. हिलाकोंटे ओर नीकुन ओसि मजिस्टरंक अप्पजेपनुर. मजिस्टर पोलिसुंक अप्पजेपनुर, पोलिस ओसि नीकुन जेलने वाटानुर.

26 नना मीकु निजम वेहांतन, कोत्तक-कोत्ता दोहनदाका निमे अगटाल पेय्सा पर्रिन.

बोगमतनम बारेमते येसु कराहता पोल्लें

27 बोगमतनम† कियमट इंचि एनकटा वेहतद मिमेट केंजसि मंतिर.

28 गानि नना मीकु वेहासेके गदा बोरन्ना आयिर, बदाना मुरतळता हेके पापि नदरते ह्ळानय्ते ओर ओना मनसुने दानतोनि बोगमतनम कीतापे.

29 अदुनहाटीं तिना कळ्ळुगिंटा पापम किया वेहते, दान तेंडसि पोहतेने नीकु बेस मनंता. बारित्ते पूरा मेंदुल नरकमते होनदानकन्ना उंदि कळ्ळु होत्ते होन्नि.

30 अल्हेन ओक्कला नीवा तिना कय नीकुन पापम किया वेहते, दान नर्किसि पोहतेने बेस मनंता. बारित्ते नीवा पूरा मेंदुल नरकमते होनदानकन्ना मेंदुलता उंदि कय होत्ते होन्नि.

31 बोरन्ना ओना मुत्तोन होळसियाना मत्ते, दानकु ओर सोडसिट्टि हीसि होळसियियर, इल्हा मूसाना नियमते वेहचि मंता.☆

32 गानि नना मीकु वेहासेक गदा, बोरन्ना ओना मुत्तोन बोगमतनमता कारनम तप्पा वैरे कारनमते होळसियानय्ते ओर दानतोनि बोगमतनम किया वेहांतोर. होळसीता मुत्तोनतोनि बोरन्ना मरमिं आयानय्ते ओरगुडा बोगमतनम कीतोर.

ओट्टु आनि पगाता बारेमते येसु कराहता पोल्लें

33 ओक्कला निमे ओट्टु तिनाय्ते, दान नेमुहमा, गानि निमे तित्ता ओट्टुन पेनदाहाटीं पूरा कीम इल्हा मूसाना नियमते पेद्दाल्कुंक वेहतद मिमेट केंजतिर.

34 नना मीकु वेहासेक मंतन गदा, निमे ओट्टु तिने तिनमा. स्वर्गम पेनदा राजगद्दे आंद, इंचि निमे दाना ओट्टु तिनमा.

35 अल्हेन बूमि, पेन काल्क ईरना जेगा आंद, अदुनहाटीं बूमि तोड इंचि दानदगुडा ओट्टु तिनमा. आनि येस्सलेम सहर पेद्दा महाराजानद इत्ते पेनदाद आंद, इंचि दानदगुडा ओट्टु तिनमा.

‡ 5:20 दर्मसास्त्रम कराहना गुस्लक दर्मसास्त्रम कराहना गुस्लक अन्नि तीरकुना कराहना कबळ कीतुर. 1 राजा 4:3, 2 राजा 18:18 § 5:22 अग्नि गुंडम बस्केळक बगाबगा पोत्तना पिर्वा तडमि, नरकम. * 5:23 उपारम गद्देपोर्रीं वाटना पलारम. † 5:27 बोगमतनम मुत्तो मुय्दो मननेके, मुय्दो मुत्तो मननेके वैरे मांडसातगा, मुरतळतागा होत्ते, अद बोगमतनम आंद. ☆ 5:31 व्यवस्ताविकरन 24:1

36 नीवा तल्लातद उंदिका केल्लुन तेल्लगा हिलाकोटे नल्लगा किया परिंन, बारित्ते अन्नि पेनदा कय्देन मंता, इंचि तल्लतदगुडा ओट्टु तिनमा.

37 दानहाटी नीवा वळ्ळुकुमळ हो इत्ते हो, हिलाकोटे हिल्ले इत्ते हिल्ले इंचि मन्नि. नीवा पोल्लेतुन निजम कियालय ओट्टु तिनानय्ते अद देय्यमताहेंदाल वाता.

बदला एतुमा
(लूकाल 6:29-30)

38 कळदुक बदला कळ, पलदुक बदला पल्लु तेंडाना इंचि मूसाना नियमते वेहता पोल्लेतुन मिमेट केंजतिर गदा.*

39 गानि नना मीकु वेहासेके मंतन गदा, मिमेट मीवा पगातोरकुंक एदुर तिरियमट्टु. ओक्कला बोरन्ना नीकुन तिना सेंपापोर्रो तते निमे इंकुंदि सेंपागुडा तिरहा.

40 बोरन्ना नीपोर्रो केस कीसि नीवा कोट तेंडकुननय्ते ओन्क नीवा अंगिगुडा हीम.

41 अल्हेन बोरन्नागिंटा नीकुन उंदि कोसेड लक्कु सामान पीसि वांतिना, इंचि बल्मि कियानय्ते, निमे आ मनकनतोनि रोंडु कोसकुना लक्कु होन.

42 बोरन्ना नीकुन बतलन्ना तल्कते अद ओन्क हीम. उदूदेरा तल्किनागानि, हिल्ले इनमा.

अंतोरपोर्रो पावरम कीम्टु!
(लूकाल 6:27-28; 6:32-36)

43 “निमे नीवा दंटातोर्कुन पावरम कीम, पगातोर्कुन बारे हय्स्मा,” इंचि इत्तद मिमेट केंजतिर.*

44 गानि नना मीकु वेहानद बतल इत्ते, मीवा पगातोर्कुन पावरम कीम्टु. मीकुन तकलिप कियानोराहाटी मिमेट पारतना कीम्टु. अस्के मिमेट मीवा स्वर्गमते मनना बाबाना पिलाल्क आंतिर.

45 बारित्ते सेड्डोर्क, बेसतोर्क इव्वुर्किका पोळ्ळुनाहेंदाल वेलगु ओरे हीतोर. अल्हेन पापिल्कुंक नीतिमंतुल्कुंक पिर्गुडा ओरे हीतोर.

46 अयना मीकुन पावरम कियानोर्कुने मिमेट पावरम कीते मीकु पेनदाहेंदाल बता इनाम दोर्कता? कर वसूल कियानोरगुडा‡ अल्हे कीतुर.

47 निमे ओक्कला नीवा दंटातोर्कुनतोने बेस मत्ते, निमे वेरे बतल बेस कीसतिन? यहुदि आयवोरगुडा अल्हे कीतुर.

48 अदुनहाटी स्वर्गमते मंदना मीवा पेनबाबाल बल्हा पुरागा मंतोर अल्हे मिमेटगुडा मंटु.

6

दर्मम कियना बारेमते येसु कराहता पोल्लें

1 उसारते मंटु! मिमेट लोकुल्कुंक हुप्सनाहाटी नीति कबाहक कियमट. अल्हा कीते, स्वर्गमते मनना मीवा पेनबाबानहेंदाल मीकु बतले इनाम दोर्की.

2 अदुनहेंके मिमेट बोनकन्ना दर्मम कियनेके डप हाटमट. बारित्ते अल्हा डोंगि लोकुल्क मिटिंगुल्कुना जेगाते,* हरकुन पीसि ओर्कुन कदर कियगोम इंचि कीतुर. नना निजम वेहंतन, बोर अय्ते अल्हा कीतुरो ओर्कु ओरा इनाम दोर्कुता.

3 मिमेट बोनकन्ना दर्मम कियनेके मीवा तिना कय बतल कीतनो अद रोड्डा कय्दुक बिल्लुकुल तेळियामन्नि.

4 अल्हा कीते मिमेट कियना दर्मम बोनकु तेळियाकाँटा मन्ता, अद बतल आंदो मीवा पेनबाबांक एर्के मंता. अदुन हळसे मीकु इनाम हीतोर.

पारतनाता बारेमते येसु कराहता पोल्लें
(लूकाल 11:2-4)

5 अल्हेने बस्के अय्ते मिमेट पारतना कीतिरो, अस्के डोंगि लोकुल्कुनलेसी कियमट. डोंगि लोकुल्क हरकुना मूलनपोर्रो, पंचादि कियना जेगाने नित्तिसि पारतना कीतुर, अल्हा कीते वेल्ले लोकुल्क ओर्कुन हळंतुर इंचि ओर्कु अनपिचंता. गानि नना मीकु निजम वेहंतन, ओरा इनाम ओर्कु दोर्कुता.

6 गानि मिमेट पारतना कियना वेलाक लोता लोप्पोटा अरति होंचि तल्पु वाटकुंचि बोर्के दिसुवा मीवा पेनबाबांक पारतना कीम्टु. अस्के मीवा पेनबाबाल मीकु अद पारतनाता जवाब हीतोर.

7 वेरे जातितोर‡ पारतना कियनेके उंदे पोल्लेतुन वेल्लेन मल्लां वळकांतुर, अल्हा कीते पेन ओरद केंजंता इंचि ओर्क अनपिचंता.

8 गानि मिमेट ओरा लेहका आयमट. बारित्ते मीकु बतल गावालेनो अद तल्कका मुन्नेन पेनदुक एरपाट मन्ता.

9 अदुनहाटी मिमेट पारतना कियनेके इल्हा पारतना कीम्टु:

“ए स्वर्गमते मनना मावा पेनबाबा, नीवा पोरोलतुन अंतोर कदर कियिरकांटी.

10 निमेन मापोर्रो राज्ये मीम, स्वर्गमते नीवा इच्चा बल्हा पूरा आंतानो,

* 5:38 निर्गमन 21:24 ✨ 5:43 लैव्यवस्ता 19:18 ‡ 5:46 कर वसूल कियानोर कर वसूल इत्ते गरपट्टि वसूल कियमळ, अद जमानाते ई गरपट्टि वसूल कियानोर इरगा बदमास मत्तुर. * 6:2 मिटिंगुल्कुना जेगाते दर्मसास्त्रम कराहना लोह्कुने. † 6:7 वेरे जातितोर वेरे हरदे ताकानोर, वेरे पेनदुक मोळ्ळानोर.

अल्हेन ई बूमिपोरोगुडा आयिकांटी.

11 माकु रोजता तिडि इय्यालागुडा हीम,

12 माकु विरोदमते कीता तप्पुकुन मोमोट बल्हा माप कीतोमो,

निमेगुडा मोमोट कीता तप्पुकुन माप कीम.

13 †माकुन पट्टुने अर्काकोटा कापाळा, सेड्डातनमताल माकुन पिसागोट्टा.

बस्केळक राजाल निमेन आंदिन.

अदुनहाटी ताकत आनि महिमा बस्केळक नीवदे आंद.” आमीन! §

14 मिमेट व्हेतोर तप्पुकुन माप कीते, स्वर्गमते मनना पेनबाबालगुडा मीकुन माप कीतोर.

15 गानि उंदि वेलाते मिमेट मनकालोर तप्पुकु मापि क्रियाकोटे स्वर्गमते मनना मीवा पेनबाबालगुडा मीकुन मापि क्रियोर.

ओक्कापोद्दुना बारेमते येसु कराहता पोल्ले

16 मिमेट बस्के ओक्कापोद्दु* मनंतितो अस्के मिमेट जिब्वरा मोकोम कीसि मनमत. डोंगि लोकुलक अल्हेन कीतुर. ओर्कु अनपिंचंता गदा जिब्वरा मोकोम कीसि मत्ते लोकुलक ओर्कुन ह्ळसि ईर ओक्कापोद्दु मंतुर इंचि इंतुर. गानि नना मीकु निजम वेहंतन, ओर्कु ओरा इनाम दोर्कुता.

17 अदुनहाटी मिमेट बस्के अय्ते ओक्कापोद्दु मनंतितो, अस्के तल्लाक निय होकसि मोकम नोर्राट.

18 अल्हा कीते ओक्कापोद्दु मत्तद बोर्के दिस्सो गानि बोर्के दिसुवा मीवा पेनबाबाल मात्रम ओक्का पोद्दुन ह्ळान्तोर. अदुनहेके मीकु इनाम हीतोर.

दनमता बारेमते येसु कराहता पोल्ले

(लूकाल 12:33-34; 11:34-36; 16:13)

19 मिमेट बूमिपोरों दनम जमा कीते अदुन सेदेल तिचि, सिलुम पीसि नासडेम आंता आनि दोंगालक दोसकुंचि ओतुर. अदुनहाटी ई बूमिते दनम जमा क्रियमत.

20 गानि मिमेट मीवाहाटी स्वर्गमते दनम जमा कीम्ट, अगा अबुन सेदेल तिन्नो, सिलुम पिय्यो, दोंगालकगुडा दोसकुंचि ओयुर.

21 बारिल्ले मीवा दनम बगा मत्ते अग्गेन मीवा मनसु मनंता.

22 मीवा कळु मेंदुलता वेडसि आंदु. अदुनहाटी मीवा कळु बेस मत्ते, मीवा मेंदुलंता वेलगु मनंता.

23 मीवा कळु बेस हिलाकोटे मीवा मेंदुलंता हीकटे मनंता. दानहाटी मिमेटगिंटा पेनदा वेलगुन ह्ळकोटे मीवा पिस्वरंता हीकटे मनंता.

24 अल्हेन वरोर मनकल इब्वुर मालकुलकुनगा सेवा क्रिया परीर. अल्हा सेवा कीते ओर वरोन बेस पावरम कीतोर, इंकावरोन हयसोर. हिलाकोटे वरोना पोल्ले बेस केजंतोर इंकावरोना पोल्ले बारे केजोर. इंचि मिमेट पेनदुन आनि दनमतुन उंदे मल्का सेवा क्रिया परीर.

रंदि क्रियमत

(लूकाल 12:22-32)

25 अदुनहाटी नना मीकु वेहनद बतल इत्ते जीवा तिडिकन्ना मुक्केम, मेंदुल कपडीकन्ना मुक्केम आंदु. इंचि पिस्सनाहाटी तिनकोम बतल, उनकोम बतल, इंका मेंदुलताहेका केर्कोम बतल इंचेके रंदि क्रियमत.

26 आ पिट्टेनहेके ह्ळट, अव वीतो आनि कोय्यो, अचोने आयका गुम्पिने जमागुडा क्रिय्यो, अयनागानि मीवा स्वर्गमते मनना पेनबाबाल अवुंक तिडि हीतोर. मीकु अय्ते पेनदा मुन्ने पिट्टेकन्ना बच्चो नो विलवा मंता इदु मीकु एर्के मंता.

27 अयनागानि रंदि कीसि ओना आवसुन उंदि गंटा एक्को बेरसागोटतोर मीवा नड्डुम बोरन्ना मंतोरा?

28 मरि मिमेट केरना कपडिनहाटी रंदि बारि कीतित? केडाते पूयाना आ पूतनहेके ह्ळट अव बल्हा बेर्ससंतांगो! अव कबळ क्रिय्यो, कपडिं इंका कुट्टो.

29 गानि नना वेहानद बतल इत्ते, सुलेमान राजाल वेल्लेन सिरमंत मंचिगुडा ओना कपडिं आ पूतानाल उंदि पूतातच्चोगुडा सोकु मनाहिल्ले.

30 अरे विस्वासम तक्को लोकिरिटा, जाडि इय्याला मंता, नाडि तडमिते वेसि दांता. अयना पेनबाबाल अवुंक इच्चो बेसता कपडिं हीतोर, अय्ते अवुंकन्ना बेसता कपडिं मीकु हिय्या परीरा?

31 अदुनहाटी बतल तिदकोम, बतल उंडकोम, बतल केर्कोम इंचि रंदि कीसेक मनमत.

32 विस्वासम क्रियवोरगुडा इव गावाले इंचि तनलाळसेक मनांतुर. गानि मीकु इव अन्नि गावाले इंचि स्वर्गमते मनना मीवा पेनबाबांक एर्के मंता.

33 अदुनहाटी मिमेट मुन्ने स्वर्ग राज्यमतुन आनि पेनदा नीतितुन पहकट, अस्के इव अन्निगुडा मीकु दोर्कनुं.

34 बस्केळक बद्दना बद रंदि मनंता. इंचि नाडीता रंदि इयालेन क्रियमत. नाडीता रंदि नाडीताहाटी होळसीम्ट.

‡ 6:13 इद वचनम कोन्नि पांडु लिपिने हिल्ले.

§ 6:13 आमीन इत्ते अल्हेन आयि, सहमत मंतन. इंचि अर्तम.

* 6:16 ओक्कापोद्दु उपासम (12 गंतदका बतले

तिना-उनाकोटा पेनदा बक्विते मनमळ.)

7

वेरेतोरपोर्रो तप्पु दोसना बारेमते येसुना विचाराल्क
(लूकाल 6:37-38; 6:41-42)

- 1 मिमेट वेरेतोरपोर्रो दोसेम दोसमत, अस्के मीपोर्रोगुडा पेन दोसेम दोस्सो.
- 2 मिमेट बल्हा दोसेम दोस्सतिरो, अल्हेने मीपोर्रोगुडा पेन दोसेम दोस्सता. बद कोल्लाते मिमेट हीतिरो, अदे कोल्लाते मीकु हियमळ जर्गता.
- 3 अरे डोंगि मनका, नीवा कळदे अरता सित्कुन तेंडका, नीवा दंटातोना कळदे अरता बुस्सितुन निमे बारि तेंडा हळंतिन?
- 4 नीवा कळदेन सित्कु अर्सि मननेके, “नीवा कळदे अरता बुस्सितुन तेंडाहीम इंचि नीवा दंटातोन बल्हा इना परीतिन?”
- 5 मोदाला नीवा कळदा सित्कुन तेंडा. अस्के नीवा दंटातोना कळदा बुस्सितुन तेंडालय नीकु बेस दिस्सार.
- 6 पवित्र वस्तुक नय्कुन मुन्ने वाटमत, पद्दिना मुन्ने मुच्च्याल्क पोच्चुमत. अल्हा कीते पद्दिं अवन काल्कुने जारांतां, नय्कु बारे मीपोर्रो अर्सि मीकुने कस्कंतां.

मीकु गावाले मत्तद पेनदुक वेहट
(लूकाल 11:9-13)

- 7 पेनदुन तल्कट मीकु हिय्यार, प्हकट मीकु दोर्कार, तल्पुन तनट तल्पु तेंडार.
- 8 बारित्ते बोर अय्ते तल्कंतोर ओन्क हियमळ जर्गता, बोर अय्ते प्हकंतोर ओन्क दोर्कता, बोर अय्ते तल्पुन तनंतोर ओनाहाटीं तल्पु तेंडमळ जर्गता.
- 9 मीलोप्पो बोरन्ना मनकल मंतोरा, ओना मर्रि हारि तल्कते बंडा हियानोर?
- 10 हिलाकोटे जिम्मा तल्कते तरास हियना मनकल मंतोरा? इल्हा बोरे किय्योर.
- 11 अय्ते मिमेट सेडुडोर्क आसिगुडा मीवा पिलाल्कुंक बेसतव हियना इंचि मीकु तेळियतस्के, स्वर्गमते मनना मीवा पेनबाबाल ओन तल्कानोर्कुंक वेल्लेन बेसतव हिय्योरा?
- 12 अदुनहाटीं लोकल्क मीवातोनि बल्हा मनना इंचि मिमेट इनकुंतोरो, अल्हेन मिमेट ओरतोनि मंटु. इदे पोल्ले मूसाना नियम आनि पेनदा कबुरतोर रासतदगुडा वेहंता.

स्वर्गम आनि नरकमकु होनना हर्रि
(लूकाल 13:24)

- 13 नासडेमताहेके होनना हर्रि, तल्पु नेर्वुक नेरवु मंता, आ हरपीसि वेल्ले मंदि दांतुर. अदुनहाटीं इर्कुटोम मत्ता हरपीसि होळियट.
- 14 पिस्वरताहेके होनना हर्रि आनि तल्पु वेल्ले इर्कुटोम मंता. आ हर्रि वेल्ले तक्को मंदिक दोर्कता.

डोंगि कबुरतोरा बारेमते येसु वेहता पोल्ले
(लूकाल 6:43-44; 13:25-27)

- 15 आबदुदम कबुरतोरागटाल उसारते मंटु. ओर मिहगा सादा गोर्रितालेसीं वांतुर गानि ओरा लोप्पो तोडेल्लिता* गुनम मनंता.
- 16 ओर कियाना कबाहकुन हळसे ओर डोंगि कबुरतोर इंचि एरपाट कीतिर. बल्हा अय्ते हाहकुना जप्पिताल अंगुर पडिं हादों, हिलाकोटे ईरामुस्टी† मराकुनाल मरका पडिं हादों,
- 17 अल्हेन बेसता मराकु बेसता पडिं हादंतां, कराब मराकु कराब पडिं हादंतां.
- 18 बेसता मराकु कराब पडिं हादों कराब मराकु बेसता पडिं हादों.
- 19 बव मराकु बेसता पडिं हादों असोटाव अन्नि मराकुन नर्किसि तडमिते वाटंतुर.
- 20 इंचि डोंगि कबुरतोर्कुन मिमेट ओर कियाना कबाहकुन हळसे एरपाट कीकिट.
- 21 नाकुन सामि सामि इनानोर अंतोर स्वर्ग राज्येमते होळयुर. गानि स्वर्गमते मनना नावा पेनबाबाना मनसु मत्ताप बोर अय्ते ताकंतुर ओरे स्वर्ग राज्येमते होळियंतुर.
- 22 नना न्यायम कियाना आकिर रोजुने वेल्लेटुर नहगा वासि, सामि मोमोट नीवा पोरोलते बविस्यवानि‡ कीतोम, नीवा पोरोलते देय्याल्क-बूताल्कुन पेचाहतोम, नीवा पोरोलते बच्चुंगो अद्बूतामाता कबाहक कीतोम, इंचेके इनानुर.
- 23 अस्के ओर्कुन, ए सेडुडा कबाहक कियानोरिता! नना मीकुन एरपाट किय्योन. मिमेट इगेटाल पेय्सि होंटु इंचि इंतन.

तेल्वि मत्तोर आनि तेल्वि हिल्ला मनकल
(लूकाल 6:47-49)

- 24 अदुनहाटीं नावा पोल्ले केंजसि दाना परकारम ताकाना हरेक मनकल, बंडा पुनादिपोर्रो लोन दोहकुता तेल्विता मनकनलेसीं मंतोर.
- 25 पिर्फ वाता, कम्मुड वाता, वळि-दुमारम वासि लोतुक दल्लिगना गानि अद कूला हिल्ले. बारित्ते अद लोता पुनादि बंडातोनि दोहाचि मंता.

* 7:15 तोडेल्लि उंदि केडा जिवरासि पोरोल. † 7:16 ईरामुस्टी इद उंदि सेदु (कयमुल) पडिना मरा आंद. दीना कायां सेदु (कयमुल, ओग्गोर) मनंतां. ‡ 7:22 बविस्यवानि मुन्ने जरगनदुन वेहामळ इत्ते बविस्यवानि हळमळ.

- 26 गानि नावा पोल्लें केंजसि, दाना परकारम ताकवा हरेक मनकल, उस्केते लोन दोहकुता तेल्वि हिल्लासंटोर आंदुर.
 27 पिर्दे वाता, कम्मुड वाता वळि-दुमारम वासि लोतुक दल्लगा अस्के अद लोन पूरा कूल्सि पाड आता, इंचि येसु इत्तोर.
 28 येसु पेनदा पोल्लें कराहमळ महातस्के ओना कराहमळतुन केंजसि लोकुल्लक वेल्ले इचंत्रम आतुर.
 29 बारिल्ले येसु ओर्कु ओरा दर्मासास्त्रम कराहना गुस्कुनलेसीं आयो गानि अदिकारम मत्ताप कराहतोर.

8

येसु वरोन बिमार मनकन बेस कीतोर
 (मरकुस 1:40-45; लूकाल 5:12-16)

- 1 येसु गुट्टा पोर्ताल हिळु रेयतस्के वेल्लेन लोकुल्लक ओना पज्जो-पज्जो वासेक मत्तुर.
 2 हुळट! अस्के वरोर कुस्टरोगम* आता मनकल येसुनगा वासि ओना काल्कुनपोर्ता अर्सि, “सामि, निमे इन्कुल्ले नाकुन बेस किया परीतिन,” इंचि इत्तोर.
 3 अस्के येसु कय मुन्नेळ्ळक कीसि ओन इट्टिस इल्हा इत्तोर, “निमे बेस आयगोम इंचि नावा मनसु मंता, बेस आम” इंचि इत्ता इन्मळे आ कुस्टरोगम आसि मत्ता मनकल बेस आतोर.
 4 पजा, “इगे जर्गतद बोर्के वेहमा. गानि निमे होंचि मीवा पेर्माक† हुप्सा. कुस्टरोगमताल निमे बेस आता गवाइ इंचि मूसाल वेहता मोक्कु हीम. अदुन हळसि निमे बेस आतिन इंचि लोकुल्लुक एरपाट आंता,” इंचि येसु ओन इत्तोर.

दरोगाना गट्टि विस्वासम
 (लूकाल 7:1-10)

- 5 येसु कपर्नाहम सहर होत्तस्के ओनगा वरोर दरोगल‡ वासि,
 6 “सामि, नावा जीतागाड लकवा बिमारते इरगा तकलिपने लोन मंतोर,” इंचि सहायमहाटीं विनंति कीतोर.
 7 अस्के, “नना वासि ओन बेस कीतन,” इंचि येसु दरोगन इत्तोर.
 8-9 गानि आ दरोगल, “सामि, निमे नावा लोन वायानचचो पेद्दातनम नहगा हिल्ले. ननागुडा वरोर अदिकारिना कयदा हिळु कबळ कीतन; नावा कयदा हिळुगुडा सिपाइल्लक मंतुर. नना अब्बेटाल वरोन ‘होन’ इत्ते ओर दांतोर, इंकावरोन ‘वा’ इत्ते ओर वांतोर. अचोने आयका नावा दासुन, ‘इद कीम’ इत्ते ओर कीतोर. अदुनहाटीं निमे सिराप उंदि पोल्ले इन, नावा जीतागाड बेस आंतोर.” इंचि येसुन इत्तोर.
 10 इद केंजसि येसुक वेल्ले इचंत्रम आता. अस्के ओना पज्जो ताकसेक मत्तोर्कुन इल्हा इत्तोर, “नना मीकु निजम वेहांतन, इस्राएल लोकुल्लुकुन लोपोगुडा इचचोन विस्वासम मत्ता मनकल नाकु बग्गेन दोर्का हिल्लोर.
 11 इंका नना मीकु वेहंतन गदा, वेल्लेटुर लोकुल्लक पोळ्द पेयसनाहेंदाल, पोळ्द अरानाहेंदाल वासि, अब्राहाम, इसाक, याकोब§ ईरतोनि स्वर्ग राज्येमते उद्दानुर.
 12 गानि बोर अय्ते, ‘मोमोट पेनदा संतानम आंदुम’ इनकुंतुरो, ओर्कुन मात्रम पेन पलाते हीकटते वाटसीता. अगा सिराप अळमळ, पल्कु कोर्कमळे मनंता,” इंचि वेहतोर.
 13 पजा येसु आ दरोगन, “निमे होन, नीवा विस्वासम बल्हा मंतनो अल्हेन नीकु जर्गता” इंचि इत्ता इनमडे ओना जीतागाड बेस आतोर.

येसु वेल्लेन मंदितुन बेस कीतोर
 (मरकुस 1:29-34; लूकाल 4:38-41)

- 14 पजा येसु पन्ना लोन वातस्के ओना पोरड एळकि वासि मींडसि मत्तद हळतोर.
 15 येसु दाना कयदुन इट्टा इट्टुडे एळकि रेयता. अस्के अद तेदसि येसुना सेवा कियालय दल्लगा.
 16 पजा पोळ्द होंचि लोकुल्लक देय्याल्लक पीतोर्कुन वेल्लेन मंदितुन येसुनगा पीसि वातस्के ओर उंदि पोल्लेते देय्याल्लुकुन गेदमिसि, बिमार मत्ता अंतोर्कुन बेस कीतोर.
 17 अद अल्हा बारि जर्गता इत्ते एनकटा बस्केनो यसायाह इनना पेनदा कबुरतोर वेहता पोल्ले पुरागा आयना इंचि जर्गता. यसायाह इल्हा वेहचि मत्तोर:
 “ओर मना रोगाल्लुकुन तेंडसि पोहतोर मना बादन एतकुल्लोर.”✧

येसुना सिस्सुड आयना विचारम
 (लूकाल 9:57-60)

- 18 येसु ओना सुट्टु वेल्लेन मंदि मत्तद हळसि ओना सिस्सुल्लुकुन मिमेट समुद्रमता हब्बेटा बाजुंक होंट, इंचि आदेस हीतोर.
 19 पजा वरोर दर्मासास्त्रम कराहना गुरु ओनगा वासि, “गुरु, निमे बगा दांतिनो अगा नना नीवा पज्जो वांतन.” इंचि इत्तोर.

* 8:2 कुस्टरोगम इद रोगम आतोर कयक-काल्कुन वेलाक मोंडि-मोंडि आंतां, इदुन मोंडि रोगम इंका इतुर. † 8:4 पेर्माक ईर पेन आनि लोकुल्लुकुन नडुडुम मंचि कबळ कियाना मनकल आनि लोकुल्लुकुनहेंदाल पेनदुक मोक्कु इंका हीतोर. ‡ 8:5 दरोगल 100 मंदि सिपाइल्लुकुनपोर्ता वरोर अदिकारि मनांतोर ओन दरोगल इतुर. § 8:11 अब्राहाम, इसाक, याकोब ईर इस्राएल लोकुल्लुकुना पेद्दाल्लक आंदुर. ✧ 8:17 यसायाह 53:4

20 अस्के येसु ओन इल्हा इत्तोर, “नक्कांक बारे मनालय सॉर्रे मंतां, पिट्टेंक मनालय गूडां मंतां, गानि मनकना रूपमते पुटतोन नाकु मात्रम तल्ला इरालियगुडा जेगा हिल्ले.”

21 अस्के येसुना पज्जो वातोरव्टेताल वरोर, “सामि, नाकुन मोदाला होनाहीम, नावा बाबाल हातास्के ओन गति कीसि वांतन.” इंचि येसुन इत्तोर.

22 गानि, “हिल्ले, निमे इंदकेन नावा पज्जो वा. बोर अय्ते हाताप मंतुरो, ओरे ओरा हातोर गति किय्यिर,”* इंचि येसु ओन इत्तोर.

येसु दुमारमतुन आपंतोर

(मरकुस 4:35-41; लूकाल 8:22-25)

23 पजा येसु डोंगाते एक्कुतंका ओना सिस्स्युल्क इंका ओना पज्जेन एक्कुतुर.

24 अस्के समुद्रमते उंदि पेद्दा दुमारम वाता. आ दुमारम इच्चो पेद्देद मत्ता गदा, एता तळाने डोंगा मुळगालय दल्यता. गानि येसु मात्रम आ डोंगाते मीडसि मत्तोर.

25 अस्के सिस्स्युल्क ओनगा होंचि ओन निद्रताल तेहाचि, “सामि, माकुन कापाळा, मनम नासडेम आसि होंचंतोम,” इंचि इत्तोर.

26 अस्के, “अरे विस्वासम तक्को लोकरिटा, बारि वेरियंतिर?” इंचि येसु ओर्कुन इत्तोर. पजा तेदसि आ वळि-दुमारमतुन आनि समुद्रमतुन गदरिचतोर अय्ते अव सांत आतां.

27 अद हळसि सिस्स्युल्कुंक पेद्दा इचंन्रम आता. अस्के ओर, “अरे ईर बसोंटा मनकल रो, वळि, समुद्रमगुडा ईना पोल्ले केंजंता!” इंचि इत्तोर.

येसु इव्वुर मनकालोर्कुन पीता देय्याल्कुन गेदमंतोर

(मरकुस 5:1-20; लूकाल 8:26-39)

28 पजा ओर समुद्रमता हब्बेटा बाजुंक मनना गदरेकरकुना एरियक एव्वुर. अस्के इव्वुर देय्याल्क पीता मनकालोर तापळन बोळ्ळाताहेंदाला† येसुनगा वातुर. ओर इरगा वेरियनाल मत्तुर इंचि ओर मत्ता हरदाहेके बोर ताकाकौंदुर.

29 ह्ळ्ळाट! ओर इव्वुर येसुनगा वासि, “पेनदा मरिना, मातोनि नीकु बता कबळ? इत्ता वेलाकन्ना मुन्नेन निमे माकु सिक्सा हियालय वातिना?” इंचि मोल्कुत्तुर.

30 ओर नित्तिसि मत्तगटाल इच्चोन लक्कु पद्दिना मंदा मेय्सेके मत्ता.

31 अस्के, “ओक्कला निमे माकुन इराव्टेताल तेंडानय्ते माकुन आ पद्दिना मंदाते होनाहीम,” इंचि आ देय्याल्क येसुन विनंति कीतां.

32 अय्ते ओर आ देय्याल्कुन, “होंट” इंचि इत्तोर, इत्तस्के आ देय्याल्क ओराव्टेताल पेय्सि पद्दिना मंदाते होत्तां. ह्ळ्ळाट! पजा आ पद्दिना मंदा समुद्रम ओड्डुन पोर्रीटाल हिळ्तुक वितसि एते मुळ्ळिसि हासोत्तां.

33 अस्के आ पद्दिं मेहानोर नाटे वित्सि होंचि अगा जर्गतद आनि आ देय्याल्क पीतोरद बतल आता आनि वेहतुर.

34 ह्ळ्ळाट! अस्के पूरा नाटेना लोकुल्क येसुंक कलियालय वातुर. वासि ओर बस्के अय्ते येसुन ह्ळ्तुरो अस्के, “मावा एरियाताल पेय्सि होन,” इंचि ओन विनंति कीतुर. बारित्ते पद्दिं हाताहेंका अद नाटेनोरद वेल्लेन नुकसान आता.

9

वरोर कय्क-काल्क वायवा मनकन येसु बेस कीतोर

(मरकुस 2:1-12; लूकाल 5:17-26)

1 येसु डोंगाते उदिस सेरवु दाटसि ओना सहर मल्सि वातोर.

2 ह्ळ्ळा! अस्के इच्चुर लोकुल्क वरोर लकवा बिमारतोन कटुलते वाटसि येसुनगा तत्तुर. ओरा विस्वासमतुन ह्ळसि येसु लकवा बिमारतोन, “कोको, दैरनेम इर्रा. नीवा पापाल्क मापि आतां,” इंचि इत्तोर.

3 अस्के ह्ळ्ळा, “ई मनकल पेनदा अपमानम कीसंतोर.” इंचि अगा मत्ता दर्मसास्त्रम कराहना गुस्ल्लक ओर-ओरे गुसगुसा इनालय दल्यतुर.

4 ओरा विचाराल्क एरपाट कीसि येसु ओर्कुन इल्हा इत्तोर, “मी मनसुने मिमेट कराब विचाराल्क बारि कीतिर?”

5 बद्द अल्कगा मंता? बिमारतोन, ‘नीवा पापाल्क मापि आतां इंचि इनमळा, हिलाकॉटे तेदिस ताका इनमळा?’

6 गानि मनकना रूपमते पुटतोन नाकु बूमिपोर्रीटा पापाल्कुन माप कियना अदिकारम मंता इंचि मिमेट एरपाट कियमळ गावाले,” इंचि इत्तोर. आ लकवा बिमारतोनगुडा “तेदसि कटुल पीसि लोन होन,” इंचि वेहतोर.

7 ओर तेदसि लोन होत्तोर.

8 अगा मत्ता लोकुल्कुंक अद ह्ळसि वेरियसि इचंन्रम आता. “इच्चोर पेद्दा अदिकारम पेन मनकालोर्कुंक हीता,” इंचि आ पेनदा स्तुति कीतुर.

* 8:22 बोर अय्ते हाताप मंतुरो, ओरे ओरा हातोर गति किय्यिर इद पोल्ले विस्वासम कियवोर्क संबदिस्तद आंद. येसुन विस्वासम कीतोर हासि मर्रा जीवाते तेदतुर इंचि अर्तम. † 8:28 तापळन बोळ्ळा गदरेकर देसेमतोर हातोर्कुन सॉर्रेने इर्रंदुर.

येसु मत्तयाल इनना मनकन केयंतोर
(मरकुस 2:13-17; लूकाल 5:27-32)

9 आयंका येसु अगटाल होननेके मत्तयाल इनना वरोर मनकल कर वसुल कियना नाकातगा उद्दिसि मत्तद हळतोर. ओन नावा पज्जो वा! इंचि इत्तस्के ओर तेदसि ओना पज्जो होत्तोर.

10 पजा येसु मत्तयाला लोन गाटो तिचेके मननेके वेल्लेटुर कर वसुल कियानोर आनि पापि लोकुल्लक वासि येसु आनि ओना सिस्स्युल्लुकुनतोनि गाटो तिनालय उदतुर.

11 अदुन हळसि, “मी गुरु कर वसुल कियानोरतोनि आनि पापि लोकुल्लुकुनतोनि गाटो बारि तितोर?” इंचि परिसिल्लक ओना सिस्स्युल्लुकुन पूसकीतुर.

12-13 अस्के येसु अद केंजसि ओर्कुन इल्हा इत्तोर, “बिमार हिल्लोर्कुंक डाक्टरना अक्सरम मन्नो गानि बिमार मत्तोर्कुंक डाक्टरना अक्सरम मनंता. अदुनहाटीं, मिमेट होंट, होंचि ‘नना कोरानद दया आंद, मोक्कु आयो,’ इंचि दर्मसास्त्रमते रासि मनना पोल्लेता अर्तमतुन तेळियागोटकुट्ट. बारित्ते नना नीतिमंतुल्लुकुन केयालय आयो गानि पापि लोकुल्लुकुन केयालय वातन,” इंचि इत्तोर.

ओक्कापोद्दुना बारेमते येसु कराहता पोल्ले
(मरकुस 2:18-22; लूकाल 5:33-39)

14 आयंका बापतिस्मा हियना योहानुना सिस्स्युल्लक येसुनगा वासि, “गुरु, परिसिल्लक आनि मोमोट ऊके ओक्कापोद्दु मनंतोम गानि नीवा सिस्स्युल्लक बस्केने ओक्कापोद्दु मन्नुर. अल्हा बारि?” इंचि पूसकीतुर.

15 अस्के येसु ओर्क इल्हा वेहतोर, “मरमिन पेडल मरमि वाता हेडमितोरतोनि मननेके, ओर्कु दुक्कम आयाना अक्सरम मनंतना? मन्नो. गानि मरमिन पेडल ओरागटाल लक्कु आयाना रोजकु वायनुं, अस्के ओर ओक्कापोद्दु मनानुर.”

16 पजा येसु ओर्कु रोंडु सिन्ना वेसुडिं वेहतोर. “बोरें आयिर, पडना कप्पिड हर्ते दानकु पूना कप्पिडता गंडा अंटा वाटिस कुट्टोर. अल्हा कुट्टानयते अंटा वाटता कप्पिड गंडा पडना कप्पिडतुन इंकिच्चो हरहंता.

17 अल्हेने पूना अंगुर पानकमतुन पडना तोलपुर्काते बोरें दोस्सुर. ओक्कला दोस्सानयते आ तोलपुर्का पय्पिस पानकम पोंगिस दांता आनि तोलपुर्कागुडा नासडेम आंता. इंचि पूना अंगुर पानकम पूना तोलपुर्कातेन दोसंतुर. अस्के रोंडुगुडा बेस मनंता.” इंचि वेहतोर.

याथिर इनानोना मिय्यड आनि कप्पिड होनना मुरतळ
(मरकुस 5:21-43; लूकाल 8:40-56)

18 इव पोल्ले येसु ओरतोनि वळकसेके मन्नेकेन, दर्मसास्त्रम कराहना लोता वरोर अदिकारि अगा वासि, “नावा मिय्यड इंदकेने हाता गुरु, गानि निमे वासि दानपोर्रो कय इरते, दान्क मर्रा जीवा अर्ता,” इंचि येसुना कालुकुनपोर्रो अर्सि विनंति कीतोर.

19 अस्के येसु तेदसि, ओना सिस्स्युल्लुकुनतोनि आ अदिकारिन पज्जो होत्तोर.

20-21 होननेके पन्नेड वर्सानाल उंदेतीर कप्पिड आयना मुरतळ कलियता. कलियसि, “नना सिराप येसुना कप्पिडतुन इट्टिनागानि बेस आंतन,” इंचि दाना मनसुने इनकुत्ता. आनि पज्जोटाल वासि ओना कप्पिडता अंचुन इट्टा.

22 इट्टारित्ते येसु पज्जो मल्लि हळसि, “दैरनेम इर्रा पेगिटुना, नीवा विस्वासमे नीकुन बेस कीता,” इंचि इत्तोर. अस्केने अद बेस आता.

23 पजा ओर दर्मसास्त्रम कराहना लोता अदिकारिना लोन होत्तस्के, हामुरता डोलकु-बाजें, लोकुल्लक जमा आसि अळानद, मोत्कुनानद हळतोर.

24 अस्के येसु ओर्कुन “पलाते होंट पेगिड हाया हिल्ले, अद अयते मींडसि मंता.” इंचि इत्तोर. अस्के लोकुल्लक येसुन कव्ठुर.

25 अगा मत्ता लोकुल्लक पलाते पेयसतारित्ते, येसु पेगिड मत्ता अर्तते होळियसि दाना कयदुन पीतोर अस्के अद तेदसि उद्दुता.

26 अद पोल्ले पूरा एरिया अंता तेळियसि होत्ता.

येसु इव्वुर गुड्डिर्कुन आनि वरोन मूकन बेस कीतोर

27 येसु अगटाल पेय्पिस होननेके, इव्वुर गुड्डोर्क ओना पज्जो-पज्जो होंचि, “ए दाविद राजाना वंसमतोना! निमे मापोर्रो दया कीम.” इंचि वरगेयतुर.

28 येसु लोता लोप्पो होळियतस्के ओर गुड्डिर ओनगा वातुर. अस्के येसु ओर्कुन, “नना बेस कीतन इंचि मीकु विस्वासम मंताना?” इत्तस्के, “हो सामि,” इंचि ओर इत्तुर.

29 “अल्हा अयते मीवा विस्वासम मत्तापे आयि,” इंचि येसु ओरा कळुकुन इट्टोर.

30 अस्केन ओरा कळुकु दिसालय दलगांता. पजा येसु ओर्कु, “इद पोल्ले बोर्के तेळियामन्नि.” इंचि गट्टिगा हुकुम हीतोर.

31 गानि ओर अगटाल होंचि, ओना बारेमते पूरा एरिया अंता तेळियागोटतुर.

32 ओर इव्वुर अगटाल पेय्पिस होननेके, लोकुल्लक वरोर देय्यम पीता मूकन येसुनगा तत्तुर.

33 येसु देय्यमतुन पेचाहतोर, अस्के मुन्ने वळकुवा मूकल वळकालय दलगतोर. इदुन हळसि अंतोर लोकुल्लक इचंनमते, “इस्माएल देसेमते इल्हा आतद बस्केने हळा हिल्लोम,” इंचि इत्तुर.

34 गानि परिसिल्लक, “ईर अय्ते देय्याल्लकुना मुक्यना बलमते देय्याल्लक तेंडांतोर,” इंचि इत्तुर.

केदनायवा लोकल्लकुन हळसि येसुक पापम अनपिस्ता

35 पजा येसु अगाटा दर्मसास्त्रम कराहना लोतागा पेनदा पोल्लें कराहतोर. स्वर्ग राज्येम बारेमते बेसता कबुर वेहचेके, लोकल्लकुना अन्नि तीरकुना रोगाल्लकुन, कमजोरिन बेस कीसेके अन्नि सहरकुने, नाहकुने तिरियतोर.

36 तिरियनेके येसुन नदर लोकल्लकुनपोरो होत्ता. कोहानोर हिल्ला गोरें बल्ला तकांचि, सिल्लर-सिल्लर आसि मनांतंगो अल्ला आ लोकल्लक आसि मत्तुर, इंचि ओर्कुन हळसि येसुक दया वाता.

37 अस्के ओर ओना सिस्स्युल्लकुन “पंटा वेल्लेने पंडुता, गानि बूतिनोर तक्को मंतुर.

38 अदुनहाटीं पंटाता मालकुंक बूतिनोर्कुन पंटा कोय्यालय लोहा इंचि विनति कीम्टु,” इंचि वेहतोर.

10

येसु ओना सिस्स्युल्लकुन बेसता कबुर वेहालय लोहंतोर
(मरकुस 3:13-19; लूकाल 6:12-16)

1 येसु ओना पन्नेड सिस्स्युल्लकुन दग्गोरा केय्से, ओर्कु देय्याल्लक गेदमना अदिकारम हीतोर. अचोने आयका अन्नि तीरकुना रोगाल्लक, बादन बेस कियना अदिकारमगुडा हीतोर.

2 आ पन्नेडु मंदि प्रेरितुल्लकुना पोरोलीं इल्ला मंतां: मोदाला सिमोन (ओन पन्नुगुडा इत्तुर), ओना तम्मुर अंदरियल, जब्दिना इव्वुर मर्क याकोब, योहान,

3 पिलिप, बरतलमय, तोमल, कर वसुल कियना मत्तयाल, अल्पिना मरिं याकोब, तद्दि,

4 सिमोन कनानि, इस्कारियोत यहुदल (ईर येसुन पीसि हीतोर).

5 ई पन्नेड मंदि सिस्स्युल्लकुंक येसु इसोटा हुकुम हीसि लोहचीतोर: यहुदि आयवोरा नड्डुम होनमट, सामरिया लोकल्लकुना बद्दे नाटेने होळियमट.

6 दानकु बदुलु इस्राएलता तप्सोत्ता आ गोरेंनहेके होंट.

7 मिमेट होनानेके, “स्वर्ग राज्येम दग्गेर्क एव्ता,” इंचि वेहासेक होंट.

8 रोगाल्लकुन बेस कीम्टु, हातोर्कुंक जीवा अरहट, कुस्टरोगम आतोर्कुन बेस कीम्टु, देय्याल्लकुन गेदमिसिम्टु. मीकु ई हक्कु पुक्कटते दोर्कुता इंचि मिमेट इंका इसोटा सेवा पुक्कटते कीम्टु.

9 होननेके मी नडिक बंगारम, एंडि, रागिता कोल्लां इरमट.

10 जोरा ओयमट, एक्कोतव अंगिं, हेरपुहक ओयमट. दुडुगुडा ओयमट. बारित्ते कबळ कियनोंक ओना बूति ओन्क दोर्कमळ गावाले.

11 मिमेट मोदाला बद नाटे, बद सहरते अय्ते दांतिटो, अद नाटे वरोर बेसता मनकना बारेमते जाडा कीम्टु. मिमेट अगटाल पेय्से होननाल ओना लोने मंटु.

12 मिमेट लोते होळियनेके, “सांति मन्निकांटी,” इंचि होळियट.

13 ओक्कला आ लोन बेसतद आते मिमेट हीता सांति अगा मंता. गानि ओक्कला आ लोन बेसतद आयाकोटो मिमेट हीता आ सांति मिहागेन वापस वांता.

14 बोर अय्ते मीकुन लोप्पो वाया हिय्युरो मी पोल्लें केंजुरो अस्के ओना लोतालो मरि नाटेनालो पेय्सनेके मिमेट मी कादा दुब्बा अग्गेन दुल्पिसि* पेय्सट. ☆

15 नना मीकु निजम वेहासेक गदा, पेन न्यायम कियना रोजुने सदोम आनि गमोरा† सहरकुना परिस्तिति आ नाहकुंकन्ना बच्चोरो बेस मंता.☆

वायना कस्टाल्लकुना बारेमते येसु वेहांतोर
(मरकुस 13:9-13; लूकाल 21:12-17)

16 हळ्ळाट, तोडेल्लिन लोप्पो गोरेंन लोहताप नना मीकुन लोहचंतन, इंचि मिमेट तरासुनलेसीं जेगर्ता आनि पावरेम पिट्टेनलेसीं इमानदार मंटु.

17 मनकालोर मीकुन पंचादितोरा कय्दे अप्पजेपनुर आनि दर्मसास्त्रम कराहना लोहकुने ओसि मीकुन पोट्टे देब्बांगुडा तना परांतुर. इंचि मिमेट मनकालोरगटालगुडा जेगर्ता मंटु.

18 नाहेंका मीकुन ओर राज्यपाल आनि राजालोरा मुन्ने ओयानुर अस्के ओरा मुन्ने, विस्वासम कियवोरा मुन्ने नावा बारेमते मिमेट गवाइदार्क आकिट.

19-20 वळकानोर मिमेट आयो मीलोप्पो मनना पेनबाबाना आत्मा आंद. अदुनहाटीं मीकुन बस्के अय्ते ओरा कय्दे अप्पजेपंतुरो अस्के अगा बतल वळकना, बतल वळकानायो इंचि रंदि कियमट. वेलापोरेंन मिमेट बतल वळकुगोमो अद मीकु पेन वेहंता.

21 कासा दादल-तम्महक पगां आसि हळ्कालय अप्पजेपनुर. पिलाल्लक ओरा तल्लुर-बाबोंक अड्डम तिरियसि ओर्कुन हळ्का वेहांतुर.

* 10:14 कादा दुब्बा अग्गेन दुल्पिसि संबंदम नेमाहमळ, पेन मीकुन लक्कु कीता. ☆ 10:14 मरकुस 6:11; लूकाल 9:5 † 10:15 सदोम आनि गमोरा वेल्लेन वर्सा मुन्ने पेन ई सहरकुन नासडेम कीता. बारित्ते आ सहरकु वेल्लेन पापमते निडिस मत्तां. ☆ 10:15 उत्पति 19:24-28

22 नावा पोरोलताहेका अंटोर लोकुल्लक मीकुन हय्सुर. गानि बोर अय्ते आकिरदाका ओर्सकुंचेके ओप्के पीसि मनंतुर, ओर्के मुक्ति दोर्कता.
23 मीकुन उंदि नाटे तकलिप हियानय्ते मिमेट इंकुंदि नाटे पेय्सि होंट. नना निजम वेहासेक मंतन, इझाएलता अन्नि नाहकुने तिरियसि पेनदा बेसता कबुर वेहामळ मारवा मुन्नेने मनकना रूपमते पुटतोन नना वांतन.

पेनदुक वेरियट, लोकुल्लुक आयो!

(लूकाल 12:2-7)

24 गुस्कन्ना सिस्सुड पेद्रुदोड आयोर, अल्हेने मालकुंकन्ना जीतागाड पेद्रुदोड आयोर.

25 सिराप सिस्सुड गुस्नलेसीं, जीतागाड मालकुनालेसीं आयगोम अचोने साल. ओक्कला लोता मालकुन नाकुने बेलजेबुल‡ इनानय्ते, लोते मनना मीवद अंटोरद बद् गति आयार!

26 गानि ओर्कु मिमेट वेरियमट. मुच्चिसि मत्तव अन्नि पोल्लें बय्यर आंता, तेळियाकोटा मत्तव अन्नि वस्तुक पलातुक वांतां.

27 नना मीकु हीकटते वेहतवुन, मिमेट वेलगुने होंचि वेहट. नना मी केव्कुने वेहतवुन मिमेट येनागरापोर्री एक्किसि वेहट.

28 बोर अय्ते मीवा मेंदुल्लुन हक्का परांतुर गानि मी आत्मातुन हक्का पर्र ओर्क मिमेट वेरियमट. गानि बोर अय्ते मेंदुल्लुन आनि आत्मातुन नरकमते वाट्टिस नासडेम क्रिया परांतोर ओन्के वेरियट.

29 रोंडु कोळ्का पिट्टें रोंडु कोत्तांकु अम्मुड दांतां गदा! अय्नागानि पेनबाबाना इच्चा हिल्ला अवुनाल उंदिगुडा बूमिपोर्री अर्री.

30 मीवा तल्लाता उंदि-उंदि केल्लु लेक्किस मंता.

31 अदुनहाटी वेरियमट! पेनदा मुन्ने मिमेट वेल्लेन कोळ्का पिट्टेंकन्ना बच्चोरो विल्ला मत्तोर आंदिर.

32 बोर अय्ते लोकुल्लुकना मुन्ने नाकुन एरपाट कीतन इंचि ओप्कुंतोरो, ओन ननागुडा स्वर्गमते मनना पेनबाबाना मुन्ने नावा सिस्सुड इंचि ओप्कुंतन.

33 गानि बोर अय्ते लोकुल्लुकना मुन्ने नाकुन एरपाट क्रियोन इंतोरो, ननागुडा ओन नावा स्वर्गमते मनना पेनबाबाना मुन्ने एरपाट क्रियोन इंतन.

येसु बारिक वातोर, अद वेहांतोर

(लूकाल 12:51-53; 14:26-27)

34-35 नना इद बूमिपोर्री सांति हियालय वातन इंचि इनकुनमट. मरिनद बाबोनतोन अर्राकोटा, मिय्याटद तल्लुनतोन अर्राकोटा आनि कोळियाटद पोरळतोन अर्राकोटा क्रियालय नना वातन. इंचि नना सांति हियालय आयो गानि ओर्कुन वेरे-वेरे क्रियालय वातन.

36 मनकना पगातोर ओना लोतोर्के आयानुर.

37 बोर अय्ते तल्लुर-बाबोन पोर्री नाकन्ना एक्को पावरम कीतोर, ओर नावा सिस्सुड आयनलायक हिल्लोर. बोर अय्ते मियाहक-मर्कुन पोर्री नाकन्ना एक्को पावरम कीतोर, ओरगुडा नावा सिस्सुड आयनलायक हिल्लोर.

38 बोर अय्ते ओना सतता कूस पीसिस नावा पज्जो वायोन इंतोर, ओरगुडा नावा सिस्सुड आयनलायक हिल्लोर.

39 बोर अय्ते ओना जीवातुन पिसागोटालय ह्ळांतोर, ओर ओना जीवातुन पोगोटकुंतोर. बोर ओना जीवातुन नावाहाटी पोगोटतोर, ओन्क जीवा दोर्कता.

बोनकु इनाम दोर्कता?

(मरकुस 9:41)

40 बोर अय्ते मीकुन दग्गेरा कीतोर, ओर नाकुन दग्गेरा कीतापे. बोर अय्ते नाकुन दग्गेरा कीतोर, ओर नाकुन लोहता पेनदुनगुडा दग्गेरा कीतापे.

41 बोर अय्ते पेनदा कबुरतोन, कबुरतोर इंचि ओप्कुंतोर ओन्क पेनदा कबुरतोंकु दोर्कना इनाम दोर्कता. नीतिमंतुन नीतिमंतुड इंचि बोर ओप्कुंतोर ओन्क नीतिमंतुक दोर्कना इनाम दोर्कता.

42 ओक्कला बोरन्ना, ई सीदा-सादा सिस्सुल्लुकना लोप्पोटाल वरोंकु, नावा सिस्सुड इंचि गिलासमेड सल्लाटेर उनालय हियानय्ते, नना मीक निजम वेहांतन, ओन्क तप्पाकोटा इनाम दोर्कता.

11

येसु आनि बापतिस्मा हियना योहान

1 येसु ओना पन्नेंडु सिस्सुल्लुकंक आदेस हीतारित्ते, अगटाल पेय्सि गालिल एरियाता नाहकुने प्रचार क्रियालय आनि पेनदा पोल्लें कराहलय होत्तोर.

2-3 बापतिस्मा हियना योहान जेलने मत्तस्के किरिस्तुना कबाहकुना बारेमते केंजतोर. अस्के ओर ओना सिस्सुल्लुकंक इल्हा पूसक्रियालय येसुनहेके लोहतोर. “बोर अय्ते पिसागोटनोर वायानद मत्ता ओन निमेन ना? हिलाकोटे मोमोट इकावरोना एदुर ह्ळमळा?”

4 येसु ओर्कु इल्हा जवाब हीतोर. “बतल अय्ते मिमेट केंजसंतोर, ह्ळसंतोर अवुन योहानुनगा होंचि वेहट.

‡ 10:25 बेलजेबुल इद अन्नि देय्याल्लुकन्ना पेद्रु देय्यम पोरोल आंद. इद देय्याल्लुकना मुक्कल आंद.

§ 10:38 सतता कूस पीसि कस्टालक अर्रालय आनि हायालयगुडा तयार

मनमळ.

5 गुड्डोर्क हळसंतुर, कुंटोर्क ताकसंतुर, कुस्टरोगम आतोर बेस आसंतुर, सेव्टोर्क केंजसंतुर, हातोर्कुंक जीवां अरसंतां आनि गरिबोर्कुंक बारे बेसता कबुर एवसंता.

6 बोर अय्ते नावा बारेमते अन्समन्स किय्योर, ओन्के आसिर्वांद दोर्कता,” इंचि इत्तोर.

7 योहानुना सिस्युल्क अगटाल पेय्सि होत्तस्के, योहानुना बारेमते येसु लोकुल्कुंक इल्हा वेहालय दल्लगतोर, “मिमेट बय्लि जेगाते बतल हळालय होत्तिर? वळिक ऊंगना जाडितुना?

8 मिमेट बतल हळालय होंचि मल्लिर? मेत्तटा कपडिं केर्ता मनकन हळालय होत्तिरा? मेत्तटा कपडिं केर्नोर राजवाडाने मनांतुर.

9 अय्ते मरि मिमेट बतल हळालय होत्तिर? पेनदा कबुरतोन हळालय होत्तिरा? हो. नना मीकु वेहासेक मंतन, मिमेट बोन अय्ते हळतिर ओर पेनदा कबुरतोनकन्ना बच्चोरो पेद्दा मंतोर.

10 ओना बारेमते पेन इल्हा वेहचि मत्ता. हळा! नना नीकन्ना मुन्नेने नावा कबुरतोन लोहंतन, ओर नीवाहाटीं हर्रि तयार कीतोर. इंचि दर्मसास्त्रमते रासि मंता.”*

11 नना मीकु निजम वेहासेक मंतन, पुट्टोरावटेताल बापतिस्मा हियना योहानुंकन्ना पेद्दा बोर पुट्टा हिल्लुर. अय्नागानि स्वर्ग राज्येमते सिन्ना मनकलगुडा योहानुंकन्ना पेद्दोडे.

12 बापतिस्मा हियना योहानुना रोजकुनस्केटाल अय्ते इदवेरदाकागुडा लोकुल्क स्वर्गमते जबरदस्तिते होळियसेक मंतुर. गानि बदमास लोकुल्क मात्रम अड्डम तिरियसि आपालय हळसंतुर.

13 बारित्ते योहानुन दाका मूसाल आनि अंतोर पेनदा कबुरतोर स्वर्ग राज्येमता बारेमते बविस्यवानि कीसेक मत्तुर.

14 मिमेटगिंटा अव बविस्यवानिन ओपकुनानय्ते, पेनदा कबुरतोर एलियाल वायनद मंता इंचि इत्तुर, ओर ईर योहान आंदुर.

15 बोर्कु केंजालय केव्क मंतां ओर केंजट.

16 “गानि नना ई पीळिता लोकुल्कुन बोरा लोप्पो कल्पकन? मिमेट अय्ते बजारते उद्दिदिसि, वरोंक-वरोर केय्सि,

17 मोमोट मीहाटीं त्रीला उहकुतोम, गानि मिमेट एगारा हिल्लिर. मोमोट दुक्कमता पाटां पारतोम, गानि मिमेट अळा हिल्लिर, इंचि इनना पिलाल्कुनालेसीं मंतिर.

18 बारित्ते योहान बतल तिनाकोंटा उनाकोंटा वातोर. अयना लोकुल्क मात्रम ओन देय्यम पीता इनुंदुर.

19 अल्हेन मनकना रूपमते पुटतोन नना तिचेके-उंचेके वातन गानि लोकुल्क मात्रम, हुळाट, ईर बच्चोर तितोर, बच्चोर उंतोर? कर वसुल कियानोर आनि पापि लोकुल्क ईना दंटातोर आंदुर, इत्तुर. गानि पेनदा बुद्दि सत्तेमतद आंद इंचि, दाना बुद्दि ते ताकानोर कियाना कबाह्कुन पोर्रोटाल तेळियंता,” इंचि वेहतोर.

विस्वासम कियबोरा पिस्वर बेस मन्ने
(लूकाल 10:13-15)

20 आयंका येसु बव नाह्कुने एक्को अद्बूताल्क कीतोरो, आ नाहकुना लोकुल्क मनसु मार्सकुंचि पेनदाहेके तिरिया हिल्लुर. दानहाटीं येसु आ नाहकुन पोर्रो दोसेम दोसतोर.

21 “ए कोरजिना आनि बेतसेदा नाटेना लोकरिता, मीकु गोसा तप्पो! ओक्कला मिहगा बव अद्बूताल्क आतां, अवे गिंटा सूर, सिदोन नाहकुने आसि मत्ते अगाटा लोकुल्क बिराना बोंतां हुट्सि, मँदुल्क बूळ्दि होकसि, दुक्कमते मनसु मार्सकुंचि मन्नेर.

22 गानि नना मीकु वेहासेक गदा, पेन न्यायम कियना रोजुने सूर आनि सिदोनतुरा परिस्तिति मीकन्ना बच्चोरो बेस मंता.”

23 “ए कपर्नाहुम सहरता लोकरिता, मिमेट स्वर्गमते दांतोम इनकुंचंतिरा? मिमेट नरकमते दांतिर. ओक्कला मिहगा जर्गता अद्बूताल्क सदोम सहरते जर्गिसि मत्ते, अद सहर इदवेरादाका आगवड.

24 गानि नना मीकु वेहासेक गदा, पेन न्यायम कियना रोजुने सदोम सहरता परिस्तिति मीकन्ना बच्चोरो बेस मंता,” इंचि इत्तोर.

येसुन विस्वासम कीतोर्क सुकाल्क दोर्कतां
(लूकाल 10:21,22)

25 आ वेलाते येसु इल्हा इत्तोर: “ए नावा बाबा, बूमि आनि स्वर्गमता सामि, तेल्विगल्लोर्क आनि समजदार लोकुल्कुनगटाल इव पोल्लेँ मक्किचि इरतिन, सादा-सिंपल लोकुल्कुंक बारे इव पोल्लेँ हूपिस्तिन, इंचि नना नीवा स्तुति कीसेक मंतन.

26 हो बाबा! नीकु इदे बेस अनपिस्ताहाटीं निमे इल्हा कीतिन.”

27 मर्रा येसु लोकुल्कुनतोनि इल्हा वळकुतोर. “नावा बाबाल नाकु अन्नि अप्पजेपतोर. बाबान तप्पा मर्रिन बोरे एरपाट किय्युर, मर्रिन तप्पा बाबान बोरे एरपाट किय्युर. मर्रि ओना इस्टमाताप बाबाना बारेमते बोर्क अय्ते तेळियानाल वेहांतोर ओरे बाबान एरपाट कीतुर.”

28 “अरे बर्वु कांजसि नेरबडता लोकुल्कुनिटा! मिमेट अंतोर नाहेके वट, नना मीकु आराम हीतन.

29-30 ना कांडी मिमेट तेहाकुंचि नावातोनि करियट, नना बेस आनि सादा-सिंपल मंतन. इंका नावा कांडी सवरगा मंता* नावा बर्वु अल्कगा मंता. इंचि मी आत्माकु सांति दोर्कता.”

* 11:10 मलाकी 3:1 * 11:29-30 कांडी सवरगा मंता कराहमळ अल्कगा मंता.

12

नोमकेम रोजुना बारेमते येसु कराहता पोल्लें
(मरकुस 2:23-28; लूकाल 6:1-5)

- 1 उंदि नोमकेम रोजुने येसु आनि सिस्युल्क पोलाल्कुनाल होंचेके मत्तुर. अस्के सिस्युल्कुंक कर्वेस्सि मत्ताहेंके हेनकु नल्सि तिचेक मत्तुर.
- 2 परिसिल्क अदुन ह्ळसि, “ह्ळ्हा! नोमकेम रोजुने बद्द कबळ अय्ते कियमळ नियम परकारम ओज्जोनो, अदे कबळ नीवा सिस्युल्क कीसंतुर,” इंचि येसुन इत्तुर.
- 3 अस्के येसु ओर्कुन, “दाविदुंक आनि ओना दंटातोर्कुंक कर्वेस्तस्के ओर बतल कीतोर, मिमेट हदवा हिल्लिरा?”
- 4 ओर पेनदा गुळिते होळियसि, पेनदुक मोळकता हारिन अंतोर तित्तुर. अव हारिं तिनमळ इत्ते दर्मसास्त्रम परकारम विरोदमते मत्ता. अव हारिं सिराप पेर्मालोर्क तप्पा इंका बोरे तिना प्फ़र.
- 5 अचोने आयका पेर्मालोर्क नोमकेमता रोजु गुळिते कबळ कीतुर इत्ता संगति मूसाना नियमते मंता इद मीकु एर्के मंता. अल्हा कियमळ तप्पु आयो.
- 6-8 नना कोरानद दया आंद, मोक्कु आयो, इंचि ✨ दर्मसास्त्रमते रासि मनना पोल्लेना अर्तम मीकु तेळियसि मत्ते ई दोसेम हिल्लोरपोरों मिमेट दोसेम दोस्सा कोन्नेर. नना वेहनद बतल इत्ते, गुळिकन्ना पेद्दोड वरोर इगे मंतोर. बारित्ते मनकना रूपमते पुटतोन नना, नोमकेमता रोजुना मालकगुडा आंदुन.” इंचि इत्तोर.

कय वत्सोत्ता मनकन येसु बेस कीतोर
(मरकुस 3:1-6; लूकाल 6:6-11)

- 9 येसु अगटाल पेय्सि यहूदिल्कुना दर्मसास्त्रम कराहना लोते होत्तोर.
- 10 अगा वरोर कय वत्सोत्ता मनकल मत्तोर. येसुन बल्हा तप्पुने पियना इंचि, “नियम परकारम, नोमकेम रोजुने बोना बेस कियमळ बेसा, बेस आयोना?” इंचि परिसिल्क ओन पूसकीतुर.
- 11 अस्के येसु ओर्कुन इल्हा इत्तोर, “मिहागटाल बोनागन्ना उंदि गोरें मंता इनकुट्टु, अदगिंटा नोमकेम रोजुने पोक्काते अरानय्ते दान तेंडिरा? तेंडातिर!
- 12 इगे अय्ते, गोरेंकन्ना मनकना जीवाक बच्चोरो विलवा मंता! अदुनहाटीं दर्मसास्त्रम परकारम नोमकेम रोजुने बेस किया परांतिर,” इंचि इत्तोर.
- 13 अस्के येसु, “नीवा कय मुन्नेळ्क हहा,” इंचि कय वत्सोत्तोन इत्तोर. ओर कय मुन्नेळ्क हाहतस्के अद कय इंकुंदि कयदालेसी बेस आता.
- 14 पजा परिसिल्क अगटाल पलाते पेय्स्तुर. पेय्सि, येसुन बल्हा हक्कना? इंचि येसुना विरोदमते वळ्क्कुत्तुर.

येसु, पेन पेर्कुत्ता सेवक आंदुर

- 15 ओर वळकानद कन्कुंचि येसु अगटाल पेय्सि होत्तोर. वेल्लेटुर लोकुल्क ओना पज्जो होत्तुर. अस्के येसु ओर्कुन अंटोर्कुन बेस कीतोर.
- 16 पजा, “नावा बारेमते बोर्के बतले वेहमट इंचि अंटोर्क हुकुम हीतोर.”
- 17 इत्ते यसायाह इनना पेनदा कबुरतोर इत्तव पोल्लें पूरा आयना इंचि येसु सामि इल्हा कीतोर.
- 18 यसयाना बविस्यवानि इल्हा मत्ता:
“ईर नावा सेवक आंदुर, ईन नना पेर्कुत्तन.
नना ईन पावरम कीतन ईना बारेमते कूस मंतन.
नना नावा पवित्र आत्मा ईना पोरो ईरतन,
ईर नावा न्यायमतुन अन्नि जातिनोर्क वेहांतोर.
- 19 ईर बोनतोने तेरहानोर आयोर, जोरते वरगेयानोर आयोर,
हरकुन पीसि लोकुल्कुंक ईना अल्किर केंजा वायो.
- 20 नावा न्यायम गेल्सनाजेम ईर दुरसोत्ता बोंगुनगुडा उरहोर,
इंका पिर्ना वेडसितुनगुडा पिरहोर.*
- 21 दानहाटीं अन्नि जातिनोर ईना पोरोलते आसेते मंदनुर.” ✨

येसु आनि देय्याल्कुना मुक्क्यल
(मरकुस 3:20-30; लूकाल 11:14-23)

- 22 पजा वरोर देय्यम पीता गुडिड-मूकन लोकुल्क येसुनगा तत्तुर. येसु ओन बेस कीतोर. अस्के आ मनकल ह्ळालय-वळ्कालय दल्गातोर.
- 23 इदुन ह्ळसि अगाटा अंतोर लोकुल्क इंचंत्रमते, “वरोर दाविद राजाना तंतुने पुट्टनोर मत्तोर, ओर ईर आयोर गदा?” इंचि इत्तुर.

✨ 12:6-8 हेसे 6:6 * 12:20 इद वचनमता अर्तम बतल इत्ते, विस्वासमते कमजोर मत्तोर्कुन आनि परेसानते मत्तोर्कुन येसु होळसोर. गानि ओर्कु सहायम कीतोर. ✨ 12:21 यसायाह 42:1-4

- 24 गानि अगा मत्ता परिसिल्क दीन केंजसि, “ईर अयते बेलजेबुल इनना देय्याल्कुना मुक्यना बलमते देय्याल्क तेंडांतोर” इंचि इत्तुर.
- 25 परिसिल्कुना मनसुना विचाराल्कुन एरपाट कीसि येसु ओर्कुन इल्हा इत्तोर, “बद राज्येम लोप्पो वरोना पोल्ले-वरोक अर्काकोटा आंता, अद राज्येम पाडासि दांता. अल्हेने लोते आयि, नाटे आयि वरोना पोल्ले-वरोक अर्काकोटे बतले नित्तापर्री.
- 26 अल्हेने देय्यम दाना दंटाता देय्याल्कुन पेचाहिचि गेदुमते, अवुना लोप्पेन अर्काकोटा आंता. अस्के अवुना राज्येम बल्हा नित्तंता?
- 27 मिमेट इत्ताप नना ओक्कला बेलजेबुलना सहायमते देय्याल्कुन गेदमंतन इन्कुट्ट. गानि मीवा लोकुल्कगुडा देय्याल्कुन गेदमंतुर, ओरगुडा देय्यमता सहायमतोने गेदमंतुरा? अदुनहाटीं मीवा लोकुल्के मीवा न्यायम कीर्तुर.
- 28 गानि नना ओक्कला पेनदा आत्माता सहायमते देय्याल्कुन गेदमानयते, पेनदा राज्येम मीवा दग्गेर्क एव्ता इंचि एरपाट कीम्टु.
- 29 बोरे आयिर, वरोर ताकतवर मनकना लोते होळियसि ओना सामानतुन दोंगा कियना इत्ते, मोदाला आ ताकतवर मनकन दोहचि वाटतेन, दोंगा किया परांतोर.
- 30 बोरे अयते नावा दंटाते मन्नोर, ओर नावा विरोदमते मंतोर, बोरे अयते नाकु सहायम किय्योर, ओर नाहगटाल पायिचना कबळ कीर्तोर.”
- 31 नना मीकु वेहनद बतल इत्ते, मनकना अन्नि पापाल्कुन, ओर कीता अपमानमतुन पेन मापि किय्यार. गानि पवित्र आत्माता अपमानम कियानोन मात्रम पेन माप किय्यो.
- 32 अल्हेने मनकना रूपमते पुटतोन नाकु विरोदमते बोरे वळ्ळिकना, पेन ओना तप्पुकुन मापि किय्यार. गानि पवित्र आत्माकु विरोदमते वळ्ळिकानोन मात्रम पेन माप किय्यो. इद कालमते आयि, वायना कालमते आयि, बस्केने माप किय्यो.

मरा आनि पंडि
(लूकाल 6:43-45)

- 33 पजा येसु परिसिल्कुनतोनि इल्हा वळ्ळकालय दल्गुतोर. “केंजट, पंडितुन हळसे मिमेट मरातुन एरपाट कीकिर, मरा बेसतद इत्ते दाना कायां इंका बेसतवे. अल्हेने मरा कराबतद इत्ते दाना कायां इंका कराबतवे.
- 34 ए कट्टला तरास पोरिह्कुनसंतोरिटा, मिमेट कराबतोर आसि, मीवा तोळ्दाल बेसतां पोल्लें बल्हा पेय्सनुं? बारित्ते मनसुने मनना पोल्लेंगे तोळ्दाल पलाते पेय्संतां.
- 35 बेसता मनकल ओना मनसुने मनना बेसता पोल्लेंगे पेचहांतोर, अल्हेने कराब मनकल ओना मनसुने मनना कराब पोल्लेंगे पेचहांतोर.
- 36 इंका नना मीकु वेहानद बतल इत्ते, पज्जो-मुन्ने विचारम कियाका मीवा तोळ्दाल पेय्सता उंद-उंदि वट्टि पोल्लेता लेक्का आकिर न्यायम कियना† रोजु पेन मीवाहेंदाल एतार.
- 37 मी पोल्लेना पोर्रीटाले मिमेट दोसेम हिल्वोरा लेक्काते वांतिर, इंका मिमेट वळ्ळता पोल्लेना पोर्रीटाले मीपोर्री दोसेम दोसमळ जर्गता.” इंचि इत्तोर.

यहुदि लोकुल्क येसुना परिक्सा हळंतुर
(मरकुस 8:11,12; लूकाल 11:29-32)

- 38 अस्के इच्चुर परिसिल्क आनि दर्मसास्त्रम कराहना गुर्ल्क येसुनगा वासि, “गुरु, नीवा कयदाल माकु उंदि चिन्ह हळना मंता,” इंचि इत्तुर.
- 39 अस्के येसु ओर्कुन इल्हा इत्तोर, “सेड्डोर्क आनि बोगमतनम कियाना पीळिता लोकुल्क, चिन्ह हुप्सा इत्तुर. गानि योनाल इनना पेनदा कबुरतोना चिन्ह तप्पा ओर्कु इंकुंदि चिन्ह हुपिचमळ जर्गो.
- 40 इत्ते योनाल बल्हा नर्का-पिय्यल मूड रोजकु पेद्दा जिम्माता पीटा लोप्पो मत्तोर, अल्हेने मनकना रूपमते पुटतोन नना, नर्का-पिय्यल मूड रोजकु बूमिता पीटा लोप्पो मनंतन.
- 41 योनाल वेहता कबुर केंजसि निनवे सहरतोर अयते ओरा मनसु मार्सकुत्तुर. गानि हुळाट, योनांकन्ना पेद्दोड इंदके मी मुन्ने नित्तिसि मंतोर. अयनागानि मिमेट मनसु मार्सकुचेके हिल्लिर. अदुनहाटीं आकिर न्यायमता रोजुने निनवे सहरतोर नित्तिसि इद पीळिता लोकुल्कुनपोर्री दोसेम दोस्सनुर.”
- 42 “अल्हेने सिबा देसेमता रानि सुलेमान राजाना तेल्विता पोल्लें केंजालय वेरे देसेमताल अगा वासि मत्ता. हुळाट, सुलेमानुंकन्ना पेद्दोड वरोर मी मुन्ने नित्तिसि मंतोर. अयनागानि मिमेट नावा बुद्दिता पोल्लें केंजसेक हिल्लिर. अदुनहाटीं आकिर न्यायमता रोजुने आ रानि इद पीळिता लोकुल्कुनपोर्री दोसेम दोस्सार.”
- 43 “उंदि देय्यम बस्के अयते वरोर मनकानाल पेय्सि दांता, अस्के अद आराम कियालय एर हिल्वा जेगा पहकंता, गानि दान्क असंटा जेगा दोर्को.
- 44 अस्के अद देय्यम, ‘नना बद लोताल अयते पेय्सि वातानो, अदे लोते मर्रा मल्लिसि दांतन,’ इन्कुता. मर्रा अगा होंचि हळतस्के मुन्नेटा लोन रिक्क आताप, मंचिगा ऊसताप दानकु बेस दिसंता.
- 45 अस्के अद देय्यम तिरियसि होंचि दानकन्ना एक्को सेड्डातव एडुं देय्याल्कुन पीसि वांता. पजा अंतव कलियसि अदे लोते मनालय दल्गंतां. इल्हा आ मनकना परिस्तिता मोदाटा परिस्तिताकन्ना एक्को कराब मनंता. इद कालमता लोकुल्कुना जीवाते पेनदा पोल्लेक जेगा हिलाकोटे इसोंटा गोसे आयार,” इंचि इत्तोर.

† 12:36 आकिर न्यायम दुनिया मुळगनेके मनम कीता कबाह्कुनद आकिरते उंदि न्यायम आंता.

येसुना निजम जीवातोर बोर?

(मरकुस 3:31-35; लूकाल 8:19-21)

- 46 मंदितोनि येसु वळकसेक मननेके ओना यावल, ओना तम्मुहक वासि, ओनतोनि वळकानद मंता इंचि लोता पलाते नित्तिसि मत्तुर.
 47 अस्के, “गुरु, नीवा यावल, नीवा तम्मुहक नीतोनि वळकानद मंता इंचि पलाते नित्तिसि मंतुर,” इंचि बोरो येसुंक वेहतोर.
 48 अस्के, “बद ना यावल, बोर ना तम्मुहक?” इंचि येसु ओन्क वेहता मनकन पूसकीतोर.
 49 पजा ओना सिस्युलुकुनहेके कय हुपिच्चि, “हुळाट, ईर ना यावल, ईर ना तम्मुहक आंदुर.
 50 बोर अय्ते नावा स्वर्गमता बाबाल वेहताप ताकंतोर, ओरे नावा तम्मु, हेलड आनि यावनलेसी दग्गेटोर आंदुर,” इंचि येसु इत्तोर.

13

विज्जा तासानोना वेसुड

(मरकुस 4:1-9; लूकाल 8:4-8)

- 1 अदे रोजु येसु लोताल पेय्सि समुद्रम ओड्डुनगा होंचि उदतोर.
 2 वेल्लेटुर लोकुलक ओनगा जमा आताहेका ओर उंदि डोंगा एक्किस उदतोर. लोकुलक बारे ओना मुन्ने समुद्रम ओड्डुनपोर्रो नित्तिसि मत्तुर.
 3 अस्के ओर वेल्लेन पोल्लें वेसुडिं वेहासेक कराहतोर.
 अक्टेटाल उंदि वेसुडि इल्हा मंता: “केंजट, वरोर कास्तकरि मनकल विज्जां वीतालय पेय्स्तोर.
 4 ओर वीतनेके इच्चुं विज्जां हरदगा अरतां, अस्के अवुन पिट्टें वासि पेर्सि तित्तां.
 5 इच्चुं विज्जां बंडाना गेर्सेपोर्रो अरतां. अगा तोळि एक्को हिलुवादानकु आ विज्जां बिराने मोलियतां.
 6 गानि हिहकु लोप्पोळ्क होनवाहेका पोळ्द पेय्स्तस्के मोल्कां वत्सि हासोत्तां.
 7 इंका इच्चुं विज्जां हाहकुना पोदाने अरतां. हाहकुना पोदां इरगा बेर्सि अव विज्जन बेर्सा हिया हिल्लें.
 8 इच्चुं विज्जां बेसता जेगाते अरतां. बेस पंटा पेय्स्ता. अव उंद-उंदि मोदोल्कु बगा मुप्पै अंताल्क, बगा अरवै अंताल्क, बगा नूर अंताल्कुना पंटा पेय्स्ता.
 9 बोर्कु केंजालय केव्क मंतां ओर केंजट.”

वेसुडिं वेहचि वळकाना उद्देसम

(मरकुस 4:10-12; लूकाल 8:9,10)

- 10 पजा सिस्युल्क ओनगा वासि, “गुरु, निमे लोकुलुकुनतोनि वळकानेके वेसुडिं वेहासेक बारि वळकांतिन?” इंचि पूसकीतुर.
 11 येसु अस्के ओर्कु इल्हा वेहतोर. “मीक अय्ते स्वर्ग राज्येमता बारेमता मर्ममतुन एरपाट कीकुनालय बुद्धि मंता, गानि ओर्कु हिल्ले.
 12 बारित्ते, बोनगा अय्ते मंता, ओन्क पेन इंका हीता, अस्के ओन्क वेल्लेन आंता. गानि बोनगा अय्ते हिल्ले, ओनागटाल मात्रम मत्तदुनगुडा पेन वापस एतकुन्नार.
 13 ओर हळ्ळ अय्ते हळंतुर, गानि ओर्कु अद दिस अर्रो. ओर केंजुड अय्ते केंजांतुर, गानि ओर्कु केंजा वायो, अद ओर्कु तेळियोगुडा अदुनहाटीं नना वेसुडिं वेहासेक ओरतोनि वळकंतन.
 14 यसायाह इनानोर ओरा बारेमते रासतद पेनदा पोल्ले इंदके इल्हा निजम आता:
 “मिमेट केंजतिर निजमे, गानि बस्केने अर्तम कीकुन्निर.
 कळ्कुने हळतिर, गानि अद मीकु तोसो.
 15 ओर कळ्कुने हळसि, केव्कुने केंजसि,
 मनसुनाल अर्तम कीकुचि नाहेके तिरियतस्के ओर्कुन नना बेस कीकन.
 इल्हा बस्केने जर्गामन्नि इंचि ओरा मनसु गट्टि पडता,
 केव्क बारे मंदोम आसि केंजा वायाकोटा आतां, कळ्कुन बारे मुचकुतुर.”
 इद पोल्ले नावां केंजवोरा बारेमते निजम आता.
 16 गानि मीवा कळ्कु हळतां, केव्क केंजतां इंचि मिमेट आसिर्वाद दोर्कतोर आंदिर.
 17 नना मीकु निजम वेहांतन, इय्याला मिमेट बव हळसतिरो, केंजसतिरो, अवुन वेल्लेटुर पेनदा कबुरतोर आनि नीतिमंतुल्क हळालय, केंजालय तन्लाळुंदुर. गानि ओर्क हळालय, केंजालय दोर्काहिल्ले.

विज्जा तासानोना वेसुडिता अर्तम

(मरकुस 4:13-20; लूकाल 8:11-15)

- 18 मिमेट इंदके विज्जां वीतानोना वेसुडिता अर्तम केंजट.

19 स्वर्ग राज्येमता बारेमता कबुरतुन केंजसि बोर दान अर्तम कीकुन्नोर, ओना मनसुने बतल अय्ते वीतिस मत्तनो अदुन देय्यम वासि इग्गिस ओता. आ लोकुल्लक इत्ते विज्जां अरता हर्दा जेगातसंतोर आंदुर.

20 बोर अय्ते पेनदा पोल्लेतुन केंजसि कूस आसि बिराना दान ओप्कुंतोर, ओर इत्ते विज्जां अरता बंडाना गेर्से जेगातसंतोर आंदुर.

21 ओनालोप्पो पेनदा पोल्लेता हिहकु गट्टि पळ्वाहाटी, ओर कोन्नि रोजके अव्टे निल्सि मनांतोर. पजा पेनदा पोल्लेताहाटी तिप्पल्क, कस्टाल्क वातस्के, विस्वासमताल ओर बिराना लक्कु आंतोर.

22 बोर अय्ते पेनदा पोल्लेतुन केंजांतोर गानि सम्सारमता रंदि, दनमता आस्ति, इसोंटा विचाराल्क ओर केंजता पोल्लेतुन ओनालोप्पो बेर्सा हिश्यो. अस्के अद पोल्लेताल बतल पायदा आयो. असंतोर इत्ते, विज्जां अरता हाहकुना पोदाना जेगातसंतोर आंदुर.

23 बोर अय्ते पेनदा पोल्लेतुन केंजसि, ओप्कुंचि तेळियागोटकुंतोर, ओर इत्ते विज्जां अरता बेसता जेगातसंतोर आंदुर. ओर बेस पायदा तरांतोर. बगा मुपै अंताल्क, बगा अरवै अंताल्क, बगा नूर अंताल्क इल्हा पलांचंतोर.

हकोलिना वेसुडि

24 येसु इंकुंदि वेसुडि वेहतोर. बोर मनकल अय्ते ओना पोलमते गोहकुना बेस विज्जां वीततोर, आ मनकन लेहका स्वर्ग राज्येम मंता.

25 गानि अंतोर लोकुल्लक मीडतद हळसि ओना पगातोर वासि गोहकुने हकोलि* वीतिस होत्तोर.

26 पजा गोहकु मोलिथिसि पोट्टाक वासि मियतां, हकोलि इंका दिसतां.

27 अस्के नेदा मालकुनगा जीतागाहक वासि, “मालक, निमे अय्ते नीवा नेदे बेसता विज्जां वीत्सि मत्तिन गदा? मरि अगा हकोलि बेंदाल वातां?” इंचि पूसकीतुर.

28 अस्के “इदु बोरो पगातोर कीता कबळ आंद.” इंचि मालक इत्तोर. “अय्ते निमे बतल इतिन मरि, मोमोट होचि हकोलितुन पीक्सि पोहकोमा?” इंचि जीतागाहक मालकुन पूसकीतुर.

29 अस्के मालक, “मन्नि, हकोलितुन पीकनेके गोहकुनगिंटा पीकिकिट!

30 कोताक वयनदाका अव रोंडुगुडा कलियसे बेर्सिकांटी. पजा कोताक वातस्के कोय्यानोर्कुंक नना, ‘मुन्ने हकोलिन कोय्सि, हेरकी दोहाचि अवुन बोडसि पोहट. पजा नावा गोहकुन जमा कीसि गुम्मिते दोस्सट इंतन,’ इंचि जीतागाहकुंकु वेहतोर.”

आवाल्कुना पेळेता वेसुड

(मरकुस 4:30-32; लूकाल 13:18,19)

31 पजा येसु ओर्कु इंकुंदि वेसुडि वेहतोर. “स्वर्ग राज्येम, आवाल्कुना उंदि पेडेत्सोंटद आंद. आ पेडेतुन बोरो वरोर मनकल ओसि, ओना तोटाते वीततोर.

32 आवाल्कुना पेळे अन्नि पेडेकुंकन्ना सिन्नागा मंता, गानि बेरस्तस्के अद तोटाते मनना अन्नि मराकुंकन्ना पेद्दा मरा आंता. मब्बुने परियना पिट्टें वासि दाना कोम्मांक गूडां दोहंतां.”

33 येसु पजा ओर्कु इंकुंदि वेसुडि वेहतोर. “स्वर्ग राज्येम पुल्लटा पिंडितसोंटद आंद. बदो उंदि मुरतळ पुल्लटा इच्चुर पिंडितुन मूड तव्वना पिंडिते कल्पता. अय्ते मेल्लगा-मेल्लगा आ पूरा पिंडिअंता पुल्लगा आता.”

34 इव अन्नि पोल्लें येसु लोकुल्लकुंक वेसुडिनेन वेहतोर. वेसुडि वेहाका ओर्कु बतले वेहाकोंदुर.

35 बारित्ते पेनदा कबुरतोरहेंदाल मुन्ने वेहचि मत्ता पोल्ले इंदके निजम आता, अद पोल्ले इल्हा मंता: “नना नावा तोळ्दे वेसुडिं वेहंतन.

दुनिया पुटतस्केटाल मक्सि मत्ता पोल्लेन नना वळ्किसि वेहंतन.”*

हकोलिना वेसुडता अर्तम

36 पजा येसु लोकुल्लकुन होळसिसि लोन होत्तोर. अस्के सिस्युल्क ओनगा वासि, “गुरु, पोलमते वीतता हकोलिता वेसुडतुन माकु तेळियागोट्सि वेहा.” इत्तुर.

37 अस्के येसु ओर्कु इल्हा वेहतोर. “केंजट, बेसता विज्जां वीतानोर इत्ते मनकना रूपमते पुटतोन नना आंदुन.

38 पोलम इत्ते ई दुनिया आंदु. आनि बेसता विज्जां इत्ते पेनदुन ‘मावा राजाल’ इंचि विस्वासम कीतोर, हकोलि इत्ते देय्याल्कुन पोल्लें केंजानोर आंदुर.

39 हकोलि वीतुता पगातोर इत्ते, देय्यम आंद. पंटा कोयना वेला इत्ते दुनिया मुंळगना आकिर वेला. कोय्यानोर इत्ते पेनदा दूतां आंद.

40 अस्के बल्हा हकोलितुन कोयसि, जमा कीसि तडमि दोसतुर, अल्हेने इद दुनिया मुंळगना आकिर वेलाते आयार.

41 बारित्ते अद वेलाते मनकना रूपमते पुटतोन नना, नावा दूतन लोहंतन. अव नावा राज्येमते मनना पापिर्कुन आनि पापम किया वेहानोर्कुन अंतोर्कुन पेच्हासि,

42 बस्केने पिरिकोंटा पोत्तना तडमिते वाटसीतां. अगा बस्केळ्क अळमळ, किटुर-किटुर पल्कु कोर्कमळे मंता.

43 अस्के नीतिमंतुल्क बोर अय्ते मंतुरो ओर ओरा पेनबाबाना राज्येमते पोळ्दुन लेहका मेर्सेके मनांतुर. बोर्कु केंजालय केव्क मंतां ओर केंजट.”

* 13:25 हकोलि तोडेंगा, इवुना विज्जा बदन्ना पंटाते अरानय्ते अद पंटातुन पाड कीस पोहंतां. ☆ 13:35 बजन संहिता 78:2

पोलमते मकिस्ता दनमता वेसुड

44 स्वर्ग राज्येम बारेमते इंकुंदि वेसुड वेहंतन केंजट. उंदि पोलमते दनम मक्किचि मत्ता. बोरो वरोर मनकल आ मक्किचि मत्ता दनमतुन हळतोर. आनि मर्रा अग्गेन मक्किचि इरगा कूस आसि लोन होत्तोर. पजा ओर ओना लोन मत्तद-हिलवद अन्नि अमकुंचि वाता कोत्ताने अद पोलमतुन असकुत्तोर.

बेस मुच्च्याल्कुना वेसुड

45 स्वर्ग राज्येम बारेमते इंकुंदि वेसुड वेहासेक केंजट. वरोर व्यापारि बेसता मुच्च्याल्क पहकसेक मत्तोर.

46 अयते ओन्क उंदि वेल्ले दरता मुच्च्येम दिसता, अस्के ओर लोन होचि ओनगा मत्तद-हिलवद अन्नि अमकुंचि वाता कोत्ताने अद मुच्च्येमतुन असकुत्तोर.

ओल्लता वेसुड

47 “स्वर्ग राज्येम बारेमते मर्रा उंदि वेसुड वेहासेक केंजट. उंदि ओल्लता मत्ता. अद ओल्लतातुन बेरेडते इसुरतस्के अन्नि रकाल्कुना मीन्कु अरतां.

48 ओल्लामेड मीन्कु अरतस्के, मीन्कु पिय्यानोर दान ओड्डुंक इग्गुतुर बेसतवुन पेसिं तोल्लिते वाटतुर, अल्हेने कराबतवुन बारे पोहचीतुर.

49 इद दुनिया मुंळगना आकिर वेलातेगुडा अल्हेन आयार. पेनदा दूतां वासि, सेड्डोर्कुन नीतिमंतुल्कुनाल वेरे कीता.

50 कीसि ओर्कुन बस्केने पिरिकोटा पोत्तना तडमिते वाटसीतां. अगा बस्केळ्ळ अळमळ, किटुर-किटुर पल्कु कोर्कमळे मनंता,” इंचि वेहतोर.

51 पजा “इव अन्नि पोल्लें मीकु तेळियतंगा?” इंचि येसु सिस्युल्कुन पूसकीतोर. अस्के “हां गुरु, माकु तेळियतां,” इंचि ओर इत्तुर.

52 अस्के येसु “बोर मनकल अयते ओना कजानाताल पूनद-पळानद सोम्मून पलाते पेच्हांतोर, आ मनकन लेहकने स्वर्ग राज्येमता सिस्युड मत्ता हरेक दर्मसास्त्रम कराहना गुरु मनांतोर, ओर यहुदि लोकुल्कुना पडाना आनि पूना बोदा रौडु इका करहा परांतोर.” इंचि ओर्कु वेहतोर.

येसु वापस ओना नार वांतोर

(मरकुस 6:1-6; लूकाल 4:16-30)

53 पजा इव वेसुडिं वेहमळ महासि येसु अगटाल पेयसतोर.

54 ओना नार वासि अगाटा दर्मसास्त्रम कराहना लोते होचि लोकुल्कुंक पेनदा पोल्लें कराहलय दलगतोर. अस्के अव पोल्लें केंजसि अंटोर लोकुल्क इंचंन्रम आसि, “ईन्कु इच्चोर बुद्धि, अद्बूताल्क कियना ताकत, बगटाल दोर्कता?

55 ईर अयते वडलना मर्रे गदा? ईना तल्लुर अयते मरियमे आंद, इका याकोब, योसेप, सिमोन, यहुदल ईर अयते ईना तम्मुह्के आंदुर.

56 अचोने आयका ईना हेलाहकगुडा मना नड्डुमे मंतां. अयते मरि ईन्कु इवन्नि पोल्लें, कबाहक बोर हीतुर?” इंचि नाटेनोर वळ्ळकुनुंदुर.

57 अदुनहाटीं ओर येसुनपोर्रीं होंग आतुर.

अस्के येसु ओर्कुन इल्हा इत्तोर, “पेनदा कबुरतोँकु ओना नाटे, ओना लोते तप्पा दुनियांता कदर दोर्कता.” इत्तोर.

58 ओर विस्वासम कियवाहाटीं अगा येसु वेल्ले अद्बूतामाता कबाहक किया हिल्लोर.

14

बापतिस्मा हियना योहानुन हक्कंतुर

(मरकुस 6:14-29; लूकाल 9:7-9)

1 अद वेलाते गालिल एरियाता राजाल, हेरोद* इनानोर, येसुना बारेमते केंजतोर.

2 केंजसि “ई येसु इत्ते बापतिस्मा हियना योहान आंदुर. ओर हातोराबेटाल मर्रा तेदतोर. अदुनहाटीं ओर इसंटा अद्बूतामाता कबाहक कीसंतोर.” इंचि ओना सेवाकुल्कुंक वेहतोर.

3-4 बारित्ते हेरोद राजाल ओना तम्मुर पिलिपुना मुत्तो हेरोदियान इरकुंचि मत्तोर अस्के, “नीवा तम्मुना मुत्तोन निमे निहगा इरमळ नियम परकारम बेस आयो,” इंचि योहान हेरोद राजांक वेहचि मत्तोर. अदुनहाटीं हेरोद राजाल योहानुंक बेडीं वाटसि ओन जेलने वाटतोर.

5 अस्केटाल हेरोद राजाल योहानुन हक्कालय कोरसेके मत्तोर, गानि लोकुल्क योहानुन पेनदा कबुरतोर इंचि नम्मुंदुर, अदुनहेंके राजाल लोकुल्कुंक वेरियसि योहानुन हक्काकोंदुर.

6 गानि हेरोद राजाना पुटता रोजु मत्तस्के अगा हेरोदियाना मिथ्यड लोकुल्कुन मुन्ने एगरिसि ओन कूस कीता.

7 अस्के राजाल कूस आसि, “निमे बतल तल्लंतिन अद नीकु हींतन” इंचि ओट्टु तिचि वेहतोर.

8 अस्के अद दाना तल्लुर वेहता परकारम, “बापतिस्मा हियना योहानुना तल्ला उंदि गिन्नेते वाटसि नाकु हीम,” इंचि इत्ता.

9 इद केंजसि राजांक इरगा दुक्कम वाता. गानि अगा मत्ता अंटोर हेडमितोराहाटीं आनि तित्ता ओट्टुहाटीं, अद तल्लकतद दान्क हीम्टु इंचि आदेस हीतोर.

* 14:1 हेरोद गालिल एरियाता ई हेरोद राजाल अघाय मत्तयाल 2:16-18 वचनाल्कुने रासता हेरोद राजाना मर्री आंदुर. आ हेरोद राजाल येसु पुटतस्के हक्कालय हळतोर.

- 10 जेलते मत्ता योहानुन हक्किसि ओना तल्ला कोय्सि तायलय मनकन लोहतोर.
- 11 अस्के योहानुना तल्ला गिन्नेते वाट्सि दान्क हीते अद ओसि दाना यावांक हीता.
- 12 पजा योहानुना सिस्स्युल्क ओना पीनगुन ओसि बोदा दोसतुर. होंचि इद पोल्लेतुन येसुंक वेहतुर.
- 13 इद पोल्ले केंजसि येसु डोंगाते उदिस बदो अलग-सलग जेगाते पेय्सि होतोर.

येसु हेय्युं वेय्कुना मदिक गाटो तासतोर

(मरकुस 6:30-44; लूकाल 9:10-17; योहान 6:1-14)

- 14 ओर होतद एरपाट आतारित्ते लोकुल्क ओरा नाहकुनाल ताकसेक ओना पज्जो पेय्स्तुर. पजा येसु डोंगाताल रेय्तोर अस्के ओन्क अगा वेल्लेने मंदि दिसतुर. अय्ते येसुंक ओरपोर्री दया वासि, ओरा रोगाल्कुनंता बेस कीतोर.
- 15 पोळ्द होनना वेलाक सिस्स्युल्क येसुनगा वासि, “मनम सुनसान जेगाते मंतोम, वेलागुडा बागेन आता. पोळ्द अर्राका मुन्नेन ईर दग्गेटा नाहकुने होंचि ओराहाटीं तिनालय बतलन्ना अस्कुन्निर, ईरकुन लोहा,” इंचि इत्तोर.
- 16 अस्के “ओर्क बेके होनना अक्सरम हिल्ले, मिमेटे ओर्कु बतलन्ना तिनालय हीम्दु,” इंचि येसु इत्तोर.
- 17 अस्के सिस्स्युल्क “महगा अय्ते सिराप हेय्युं हारिं आनि रोंडु जिम्मां मंतां,” इंचि इत्तोर.
- 18 अस्के, “अय्ते अवुन नहगा पीसवटु,” इंचि येसु इत्तोर.
- 19 अगा मत्ता मंदितुन जाडि पोरो उद्दा वेहतोर. हेय्युं हारिं, रोंडु जिम्मां पीसि पोरो हळसि पेनदुक दन्यवाद कीतोर. पजा हारिन तुकडां कीसि आ तुकडन सिस्स्युल्कुंक हीतोर. सिस्स्युल्क बारे लोकुल्कुंक हीतोर.
- 20 अस्के ओर अंतोर पीरनिडा तित्तुर. अंतोर तिननेके मिगुलता हारिना तुकडां ओर जमा कीतुर अय्ते पन्नेड तट्टां पेय्सतां.
- 21 तित्ता मंदिताल हेय्युं वेय्कु मांडसे मत्तुर, इंका मुर्ताह्क, पिलाल्कुनद अय्ते लेक्के हिल्ले!

येसु एतापोर्री ताकतोर

(मरकुस 6:45-52; योहान 6:16-21)

- 22 पजा अस्केन येसु अंतोर लोकुल्कुन साला कियाका मुन्नेन ओना सिस्स्युल्कुन उंदि डोंगाते उपिच्चि ओनकन्ना मुन्नेन सेरवुना हब्बेटा बाजूंक दाटसि होनालय वेहतोर.
- 23 अंतोर लोकुल्कुन साला कीता पजा, येसु वरोरे पारतना कियालय गुट्टापोर्री होतोर. पोळ्द होनिनागानि ओर वरोरे अगा मत्तोर.
- 24 अद वेलाते सिस्स्युल्कुना डोंगा समुद्रम ओड्डुनाल वेल्लेन लक्कु होंचि मत्ता. अस्के ओर्क एदुर वळि वायालय दलग्ताहेंका एता तडांक डोंगा डक्क-डक्क आयालय दलग्ता.
- 25 नर्कटां मूड-नालुं एगनेके येसु एता पोरोटाल ताकसेक ओरहेके वातोर.
- 26 ओर एता पोरोटाल ताकसेक वायानद हळसि, “देय्यम वासंता!” इंचि सिस्स्युल्क वेरियसि वरगेयालय दलगुतुर.
- 27 अस्के येसु बिराने ओर्कुन, “ननाने आंदुन, वेरियमट, दैरनेम ईरटि,” इंचि इत्तोर.
- 28 पजा पत्रु येसुन, “सामि, ओक्कला निमेने आयानय्ते नाकुन नीहेके एता पोरोटाल ताकसेक वायालय वेहा,” इंचि इत्तोर.
- 29 “अय्ते हीके वा,” इंचि येसु इत्तोर. अस्के पत्रु डोंगाताल रेय्सि एता पोरोटाल ताकसेक येसुनहेके होनालय दलगुतोर.
- 30 गानि वळि वायनद हळसि, वेरियसि मुळगालय दलगुतोर. अस्के “सामि, नाकुन पिसागोट्टा,” इंचि मोल्कुत्तोर.
- 31 अस्के बिराना कय हात्सि येसु ओन पीसि, “अरे तक्को विस्वासमतोना, निमे नापोर्री अनमानम बारि कीतिन?” इंचि इत्तोर.
- 32 पजा ओर इव्वुर डोंगा एकतस्के, वळि वायमळ आगुता.
- 33 अस्के, “सामि, निमे निजमे पेनदा मर्रिन” इंचि डोंगाते मत्तोर ओना काल्कुनपोर्री अरतुर.

येसु वेल्लेन बिमारतोरकुन बेस कीतोर

(मरकुस 6:53-56)

- 34 पजा ओर अद समुद्रम दाटसि गेनेसरेत इनना नाटे वातुर.
- 35 अगाटा लोकुल्क येसुन एरपाट कीसि दग्गेर पट्टुकुनव अन्नि नाहकुंक कबुर लोहचि बिमार मत्तोर्कुन अंतोर्कुन पीसि वातुर.
- 36 पजा “सिराप नीवा कपिडता अंचुन इट्टा हीम,” इंचि विनति कियुंदुर. बोर-बोर अय्ते ओना अंचुन इट्टुरो, ओर अंतोर पुरागा बेस आतुर.

15

मनकना रिवाज्कुंकन्ना पेनदा पोल्ले पेद्देदि

(मरकुस 7:1-23)

- 1-2 पजा येस्सलेमताल इच्चुर परिसिल्क आनि दर्मसास्त्रम कराहना गुस्लक येसुनगा वासि, “नीवा सिस्स्युल्क पेद्दाल्कुना रीति-रिवाजुने बारि ताकुर? ओर तिनाका मुन्ने कय्क बारि नोर्स्?” इंचि पूसकीतुर.

- 3 अस्के येसु ओर्क इल्हा जवाब हीतोर. “मिमेट अयते मीवां मुन्नेटा रीति-रिवाजकुन ताकसालय पेनदा आदेसतुन होळसेक मंतिर.
- 4 पेन अयते इत्ते गदा, निमे नीवा तल्लुर-बाबोना कदर कीम. अचोने आयका बोर अयते तल्लुर-बाबोन रांगंतोर, ओन हक्कमळे गावाले इंचिगुडा पेन इत्ता.
- 5 गानि मिमेट अयते, बोरन्ना मनकल ओना तल्लुर-बाबोन, नना मीकु हियानद पूरा पेनदुके हीतन, दानहाटीं मीवा सहायम किया परीन, इल्हा तल्लुर-बाबोना कदर ईरना अक्सरम हिल्ले, इंचि कराहतिर.
- 6 इत्ते मिमेट मीवा रीति-रिवाजकुनाहाटीं पेनदा पोल्लेतुन होळसेक मंतिर.
- 7 अरे डोंगिरिटा, यसायाह इनना पेनदा कबुरतोर मीवसोंटा डोंगिरा बारेमते निजमे वेहतोर, ओर इत्ताप
- 8 ईर लोकुल्लक सिराप तोळ्दने नावा कदर कीतुर, गानि ईरा मनसु मात्रम नहागटाल बच्चोनो लक्कु मनंता.
- 9 ईर अंगडमे नावा आरादना कीसेके मनांतुर. बारित्ते ओराहाटीं मनकालोर तयार कीता रीति-रिवाजके निजमतव, अबुना पालन कियमळे दर्मम इंचि कराहंतुर,”* इल्हा वेहतोर.
- 10 अस्के येसु लोकुल्लकुन दग्गेर्क केय्से इल्हा इत्तोर, “केंजट आनि अर्तम कीकुंटु.
- 11 बतल अयते तोळ्दाल लोप्पो दांतनो अद मनकन हेळ्हो, गानि बद अयते तोळ्दाल पलाते वांता, अदे मनकन हेळ्हंता.” इंचि इत्तोर.
- 12 पजा सिस्युल्लक येसुनगा वासि, “निमे वेहतद केंजसि परिसिल्लक होंग आतुर इद नीकु तेळियतना?” इंचि पूसकीतुर.
- 13 अस्के येसु जवाबुने, “स्वर्गमते मनना नावा बानाहेंदाल वाटुवद बदे मोल्का आयि, दान पीकिस पोहमळ जर्गंता.
- 14 ओरद होन्नि, ओर गुड्डोर्कुक हर्रि हुप्सना गुड्डोर्क आंदुर. ओक्कला वरोर गुड्डिड मनकल इंकावरोर गुड्डिड मनकंक हर्रि हुप्सालय होत्ते इव्वुरगुडा पोक्कातेन अर्तुर,” इत्तोर.
- 15 पजा पत्रु, “निमे वेहता इद वेसुडितद अर्तम बतल माकु वेहा,” इंचि इत्तोर.
- 16 अस्के येसु ओर्कुन इल्हा इत्तोर. “मीकु इंदकेगुडा तेळिया हिल्लेना?
- 17 बतल अयते तोळ्दाल पीटे दांता, अदंता पजा पलाते अर्ता. इद मीकु इंकागुडा तेळियोना?
- 18 गानि बतल अयते तोळ्दाल पलाते पेयसंता, अद मनसुनाल वांता, अदे मनकन हेळ्हंता.
- 19 इत्ते कराब विचाराल्लक, हक्कमळ, बोगमतनम, व्यबिचारम, दोंगातनाल्लक, आबद्दम वळ्कमळ, अपमानम कियमळ इवन्नि पापि कबाहक मनसुनाले पलाते पेयसंतां.
- 20 इवे पोल्ले मनकन हेळ्हंतां. गानि कय नोर्काकोटा तिनानयते मनकल हेळोर.” इंचि वेहतोर.

वेरे जातिता मुरतळकु सहायम कीतोर (मरकुस 7:24-30)

- 21 पजा येसु अगटाल पेय्से सूर, सिदोन एरियाते होत्तोर.
- 22 अस्के ह्ळा! उंदि कनानि मुरतळ* येसुनगा वासि अळसेके, “सामि, दाविद राजाना वंसमतोना, नावा मिय्यटुन देय्यम पीसि वेल्ले तकलिपने मंता, नापोर्री दया कीम” इंचि मोत्कुनालय दल्लगता.
- 23 गानि येसु मात्रम बतले वळ्काकोटा सपुडदाका मत्तोर. अस्के सिस्युल्लक येसुनगा वासि, “आ मुरतळ मना पज्जो मोत्कुंचेके वासंता दान वापस लोहचीम.” इंचि विनति कीतुर.
- 24 अस्के येसु, “गानि नाकुन पेनबाबाल सिराप इस्नाएलता तप्सोत्ता लोकुल्लकुनाहाटीं लोहचीतोर.” इंचि इत्तोर.
- 25 अयना आ मुरतळ मर्रा येसुनगा वासि टोंगरां ऊनसि, “सामि नाकु सहायम कीम,” इंचि इत्ता.
- 26 अस्के येसु, “पिलाल्लकुना हारि तेंडकुंचि अबुन नय्कुंक वाटमळ बेस आयो,” इंचि जवाब हीतोर.
- 27 अस्के आ मुरतळ, “अद निजमे सामि, गानि मालक तिननेके हिळु अरता अंतकुल्लकुन अयते नय्के तितां गदा!” इंचि येसुन इत्ता.
- 28 अस्के “बाई नीवा विस्वासम गट्टिदि. इंचि नीवा इच्चा मत्ताप नीकु जर्गीकांटी,” इंचि येसु इत्तोर. अस्केन दाना मिय्यड बेस आता.

येसु नालुं वेय्कुंकन्ना वेल्ले मंदिक गाटो दोसतोर (मरकुस 8:1-10)

- 29 पजा येसु अगटाल गालिलता सेरबुनहेके होत्तोर अगा उंदि गट्टापोर्री एक्किस उदुतोर.
- 30 अस्के वेल्लेन मंदि लोकुल्लक ओनगा वातुर. वायनेके गुड्डोर्क, गूनोर्क, कुंटोर्क-तोंटोर्क, मूकालोर्क आनि इंका वेरे रोगाल्लकुनोर्कुन पीसि ओनगा थायसि ओना काल्लकुनगा इरतुर. येसु अंतोर्कुन बेस कीतोर.
- 31 अस्के मूकालोर्क वळ्कालय दल्लुतुर, कुंटोर्क ताकालय दल्लुतुर, तोंटोर्क सवरगा आतुर, गुड्डोर्क ह्ळालय दल्लुतुर. इवंता ह्ळसि जमा आता लोकुल्लकुंक इचंत्रम आता, आनि इस्नाएलता पेनदा स्तुति कीतुर.
- 32 पजा येसु ओना सिस्युल्लकुन दग्गेर्क केय्से, “ईर लोकुल्लक नहागा मूड रोजकुनाल मंतुर, ईरगा तिनालय बतल हिल्ले. ईरकुन उपासम लोहड बेस आयो. ओक्कला अल्हे लोहते कर्वेस्सि नड्डुम हरदे बगानना कूलाबडनुर. अदुनहाटीं नाकु ई लोकुल्लकुन ह्ळसि पापम अनपिचंचता,” इंचि इत्तोर.

* 15:9 यसायाह 29:13 * 15:22 कनानि मुरतळ इत्ते अद मुरतळ कनान एरियाते मनुंदु, इंचि दान कनानि मुरतळ इंतुर. इंका अद यहुदि मुरतळ आयो.

- 33 अस्के, “इच्चो वेल्ले लोकुकुकुंक हालानाल तिडि, ई उस्के बूमिमे मनाकु बगा दोकार?” इंचि सिस्युल्क येसुन इत्तुर.
 34 अस्के, “मिहगा बच्चुं हारि मंतां?” इंचि येसु ओर्कुन पूसकीतस्के ओर “एडुं हारि आनि इच्चुं सिन्ने जिम्मां मंतां.” इंचि इत्तुर.
 35 अस्के येसु मंदितुन हिळ बूमिपोर्रो उद्दा वेहतोर.
 36 पजा येसु आ एडुं हारि आनि आ जिम्मान कय्दे पीसि पेनदुक दन्यवाद कीतोर. पजा अबुन तुकडां कीसि सिस्युल्कुना कय्दे हीतस्के सिस्युल्क आ हारि तुकडन अगा मत्ता मंदिकु तूसि हीतुर.
 37 अगा मत्तोर अंटोरगुडा पीरनिंडा तित्तुर. पजा मिगुल्ता हारि तुकडन जमा कीते अव एडुं तट्टां आतां.
 38 अगा तित्तोरव्ते मुर्ताहक, पिलालकुन होळसि नालुं वेय्कुना मंदि मांडसे मत्तुर.
 39 पजा अगा मत्ता मंदितुन होनालय वेहिचि, ओर डोंगाते उद्दिदिसि मगदान इनना एरियाक होत्तोर.

16

यहुदि पेद्दाल्क येसुना परिकसा हळमळ
 (मरकुस 8:11-13; लूकाल 12:54-56)

- 1 परिसिल्क आनि सदुकिर्क येसुनगा वातुर. ओर येसुना पट्टु हळना उद्देसमते “निमे पेनदा अदिकारम पीसि वातिन इंचि नम्मालय, स्वर्गमताल माकु उंदि चिन्ह हुप्सा,” इंचि इत्तुर.
 2 अस्के येसु ओर्कु इल्हा जवाब हीतोर. “पोळ्द होंचि मब्बु एर्गा आयानय्ते मिमेट परिं वायो इतिर,
 3 हक्केर्कु मब्बु एर्गा, गुम्मरा आयानय्ते, इय्याला वळि दुमारम वांता बारे मिमेट इतिर. मीकु मब्बुना रूपाल्कु एरपाट क्रिया वांता, गानि वेलाना चिन्हन हळसि अबुन मिमेट बारि एरपाट कीसेक हिल्लिर.
 4 सेडुडोर्क आनि बोगमतनम कियाना पीळिता लोकुकुलक चिन्ह हुप्सा इत्तुर. गानि योनाल इनना पेनदा कबुरतोना चिन्ह तप्पा ओर्कु इंकुंदि चिन्ह हूपिचमळ जर्गो,” इंचि इत्तोर. आनि ओर्कुन होळसि होत्तोर.

येसु यहुदिल्लुकुना बारेमते वेहांतोर
 (मरकुस 8:14-21)

- 5 सिस्युल्क समुद्रमता हळ्बेर ओड्डुंक एव्तर, गानि ओर हारि ओयालय मरंगतुर.
 6 पजा येसु ओर्कुन इल्हा इत्तोर, “परिसिल्क आनि सदुकिर्कुना पुल्लटा पिंडिता बारेमते जेगर्ता मंटु,” इत्तोर.
 7 अस्के, “मनम हारि तरालय मर्गताहाटी ओर अल्हा इंतोर बारे,” इंचि ओर ओरे वळककुत्तुर.
 8 गानि येसु अदुन एरपाट कीसि, “अरे विस्वासम तक्को लोकुरिटा, मनागा हारि हिल्लें इल्हा विचारम मिमेट बारि कीसेक मंतिट?
 9 इदवेरदाकागुडा मीकु तेळिया हिल्लेना? हेय्युं हारिने, हेय्युं वेय्कुना मंदि तित्तदगुडा मीकु मति हिल्लेना? तित्तारित्ते बच्चुं तट्टाना हारि मिमेट जमा कीतिर मीकु मति हिल्लेना?
 10 अचोने आयाका एडुं हारिनतोनि नालुं वेय्कुना मंदि तित्तस्के, बच्चुं तट्टाना हारि जमा कीतिर मीकु मति हिल्लेना?
 11 नना वळकानद हारिना बारेमते आयो इंचि मीकु बल्हा तेळियसेक हिल्ले? नना बारे परिसिल्क आनि सदुकिर्कुना पुल्लटा पिंडिता बारेमते जेगर्ता मंटु इत्तन,” इंचि इत्तोर.
 12 अस्के ओर्कु, “हारिना होयता पिंडिता बारेमते उसारते मंटु,” इंचि वेहा हिल्लोर गानि परिसिल्क आनि सदुकिर्कुना कर्राहना बारेमते उसारते मनालय वेहतोर इंचि तेळियता.

येसे किरिस्तु आंदुर
 (मरकुस 8:27-30; लूकाल 9:18-21)

- 13 येसु कैसरिया पिलिपिया एरियाते होत्तारित्ते, “मनकना रूपमते पुटतोन नना बोन आंदुन इंचि लोकुकुलक इंतुर?” इल्हा येसु सिस्युल्कुन पूसकीतोर.
 14 अस्के सिस्युल्क इल्हा इत्तुर. “इच्चुर इंतुर निमे बापतिस्मा हियना योहानुन आंदिन, इंका इच्चुर इंतुर निमे एलियाल आंदिन, इंका बोरो इंतुर निमे यिर्मयाहन हिलाकॉटे पेनदा कबुरतोरा लोप्पोटाल बोनो वरोन आंदिन,” इत्तुर.
 15 “अय्ते मरि, मिमेट, नना बोन आंदुन इतिर?” इंचि येसु ओर्कुन पूसकीतोर.
 16 “निमे जीवाते मनना पेनदा मरिन किरिस्तुन आंदिन,” इंचि सिमोन पत्रु इतोर.
 17 अस्के येसु “योनाना मरि सिमोनु! नीकु आसिर्वाद दोर्कुता. बारित्ते, इद पोल्ले नीकु बोर मनकल वेहा हिल्लोर, गानि नावा स्वर्गमता बाबाल नीवा लोप्पोटाल वेहतोर.
 18 इंदके नना नीवा पोरोल पत्रु* इंचि इरसंतन, बारित्ते इदे बंडापोर्रो नना नावा कलिसिया †निलाहंतन. दीन हामुरता ताकतगुडा कूल्हा पर्रो.

* 16:18 पत्रु इत्ते बंडा इंचि अर्तम. † 16:18 कलिसिया संगम, येसु सामिनपोर्रो विस्वासम कियना लोकुकुलकना गुंपु.

19 नना नीकु स्वर्ग राज्यमता तालम कयकः हीसंतन, निमे बूमिपोर्री बदन अय्ते दोहंतिनो, अदुन स्वर्गमतेगुडा दोहमळ जर्गता. निमे बूमिपोर्री बदन अय्ते लेहांतिनो, अदुन स्वर्गमतेगुडा लेहमळ जर्गता.” इंचि इत्तोर.

20 पजा, “ननाने किरिस्तुन आंदुन इंचि मिमेट बोर्के वेहमट,” इंचि येसु ओर्क गट्टिगा हुकुम हीतोर.

येसु ओन्क वायना हामुरतुन वेहांतोर
(मरकुस 8:31-9:1; लूकाल 9:22-27)

21 अस्केटाल येसु ओना सिस्युल्कुंक इल्हा वेहालय दलगतोर. “नाकु येस्सलेम होनापीता. अगा यहुदि पेद्दाल्क, पेद्दा पेर्मांलोर आनि दर्मसास्त्रम कराहना गुस्लुकुनाहेंदाल वेल्ले तिप्पल्क कीसि नाकुन हक्कानुर. मूडोव रोजुने नना मर्रा जीवाते तेदंतन,” इत्तोर.

22 अस्के पत्रु ओन अलग ओसि, “अल्हा वळ्का मन्नि सामि! पेन दीन तपिचगोम. नीकु इल्हा बस्केने आयामन्नि,” इंचि ओन रांगतोर.

23 गानि येसु पत्रुनहेके तिरियसि ह्ळसि, “अरे देय्यम, नावा मुन्नेटाल पेय्सि होन. निमे मनकालोरा तेल्विते वळ्कसंतिन, पेनदा विचारमते वळ्कसेक हिल्लिन. निमे नावाहाटी उंदि आपत आंदिन.” इंचि इत्तोर.

24 अस्के येसु ओना सिस्युल्कुंक इल्हा वेहतोर. “ओक्कला बोर्नना मनकल नावा पज्जो वायना इत्ते, ओर ओना पूरा इस्टाल्क होळसिसि सतता कूस तेहकुंचि नावा पज्जो वायिर.

25 बोरे अय्ते ओना जीवातुन पिसागोटालय ह्ळंतोर, ओना जीवा होन्नार. गानि बोरे अय्ते नावाहाटी जीवा होनागोटंतोर अद ओन्क दोर्कता.

26 ओक्कला मनकल पूरा दुनियातुन संपलिच्चि ओना जीवातुन पोगोटकुत्ते ओन्क बता पायदा आंता? हिलाकोटे मनकल ओना जीवाहाटी बदला बतल हियानुर?

27 मनकना रूपमते पुटतोन नना नावा बाबाना महिमातेऽ दूतनतोनि वांतन, आ वेलाते बोरे मनकल आयिर, ओर कीता कबाह्कुना परकारमे ओर्क इनाम हीतन.

28 नना मीकु निजम वेहांतन, इग्गे नित्तिसि मनानोरा लोप्पोटाल इच्चुर इल्हा मंतुर गदा, मनकना रूपमते पुटतोन नाकुन नावा राज्यमते वायनेके बदवेरदाका अय्ते ह्ळुर, अदवेरदाका ओर्कु हामुर वायो,” इंचि इत्तोर.

17

येसुना रूपम मारियंता
(मरकुस 9:2-13; लूकाल 9:28-36)

1 हांसं रोजकु आतारित्ते येसु पत्रुन, याकोबुन आनि ओना तम्मुर योहानुन पीकुंचि उंदि एत्तु गुट्टापोर्री होत्तोर.

2 अगा ओरा मुन्ने ओना रूपम मारियता. ओना मोकम पोळ्दुनलेसी मेर्सता, ओना कपडिं वेल्युनलेसी तेल्लगा आतां.

3 ह्ळट्ट! मूसाल आनि एलियाल अगा वासि येसुनतोनि वळ्कानद ओर्कु दिसतुर.

4 अस्के पत्रु येसुन, “मनम इग्गे मनमळ बेस मंता सामि! नीवा मनसु मत्ते, उंदि नीहाटी, उंदि मूसानाहाटी, उंदि एलियानाहाटी इल्हा मूड गुडसैं वाटंतन,” इंचि इत्तोर.

5 पत्रु वळ्कसेकेन मत्तोर, अस्केन उंदि तेल्ला मब्बु तेर्पे ओरापोर्री नीडा कीता, आ मब्बुनाल उंदि इसंटा अल्किर केंजावाता, “ईर नावा पावरमगल्ला मारि आंदुर, ईनतोनि नना कूस मंतन, मिमेट ईना पोल्लें केंजट.”

6 आ अल्किर केंजतस्के येसुनतोनि मत्ता सिस्युल्क वेरियसि बूमिपोर्री मुसकिर कुच्चि अरतुर.

7 अस्के येसु ओरा दगोर वासि ओर्कुन इट्टिसि, “वेरियमट, तेदट” इत्तोर.

8 अस्के ओर तेदसि कळ्ळु विच्चि पोर्री ह्ळते, ओर्कु येसुक तप्पा अगा बोरे दिसा हिल्लुर.

9 ओर गुट्टा पोर्रीटाल हिळ्ळ रेय्नेके येसु सिस्युल्कुंक इल्हा आदेस हीतोर गदा, “मनकना रूपमते पुटतोन नना, हामुरताल मर्रा तेदनदाका, गुट्टापोर्री मिमेट बतल अय्ते ह्ळतिरो अद बोर्के वेहमट,” इत्तोर.

10 अस्के सिस्युल्क, “मारि किरिस्तुकन्ना मुन्ने, एलियाले वायमळ गावाले इंचि दर्मसास्त्रम कराहना गुस्लुकु बारी इंतुर?” इंचि पूसकीतुर.

11 अस्के येसु इल्हा जवाब हीतोर. “एलियाल तप्पाकोटा वांतोर, वासि मोदाला बल्हा मत्ता अल्हे अन्निन कीतोर.

12 गानि नना मीकु वेहानद बतल इत्ते, एलियाल वासे मंतोर गानि ओन बोरे एरपाट किया हिल्लुर. अदुनहाटी लोक्कुल ओरा मनसुक वाताप ओनतोनि कीतुर. मनकना रूपमते पुटतोन ननागुडा ओराहेंदाल अल्हेन तकलिप्कु बोगांचना मंता.” इंचि वेहतोर.

13 येसु बापतिस्मा हियना योहानुना बारेमते वेहासेक मंतोर इंचि सिस्युल्कुंक अस्के तेळियता.

येसु देय्यम पीता पेडन बेस कीतोर
(मरकुस 9:14-29; लूकाल 9:37-43)

14 येसु आनि ओना सिस्युल्क लोकुल्कुनगा वातस्के, वरोर मनकल येसुनगा वासि ओना मुन्ने टोंगरां ऊनसि,

15 “सामि! नावा मरिनपोर्री दया कीम. ओन्क कुंदेल रोगम अर्रता. अरतस्के ओर ऊके-ऊके तडमिते आनि एते अर्रतोर, ओन्क इरगा तिप्पलक आसेक मंता.

16 नना ओन नीवा सिस्स्युल्लुकुनगा तत्तन गानि ओर बेस किया पराहिल्लुर,” इंचि इत्तोर.

17 अस्के येसु ओर्कुन, “अरे विस्वासम तक्को आनि हरि तप्ता पीळितोरिटा, नना बदवेरदाका मीतोनि मनकन? बदवेरदाका नना मीकुन सहन कीकन? ओन नाहेके तट्टु.” इंचि इत्तोर.

18 ओन तत्तस्के येसु आ पेडन पीता देय्यमतुन गट्टुदरिच्चि गेट्टुमतोर. अस्केटद अस्केन आ पेडल बेस आतोर.

19 पजा बोर हिल्लुस्के सिस्स्युल्लुकु येसुनगा वासि, “आ देय्यमतुन मोमोट बारि गेट्टुमा परा हिल्लोम?” इंचि पूसकीतुर.

20 अस्के येसु ओर्कु इल्हा वेहतोर. “मीवद पेनदापोर्री गट्टुटिगा विस्वासम हिल्ले. नना मीकु निजम वेहांतन, ओक्कला मीलोप्पो आवाल्कुना पेळेतचो विस्वासम मनिनागानि, ‘ई गुट्टातुन इग्गोटाल अगा हौन’ इंचि मिमेट वेहानय्ते अद हौंदार. अस्के मिमेट अन्नि कबाहक किया परातिर.

21 गानि इंसंटा देय्याल्लक सिराप पारतना आनि ओक्कापोट्टुदूक कीतेने दांतां,” इंचि येसु इत्तोर.*

ओना सतता हामुरता बारेमते वळकांतोर
(मरकुस 9:30-32; लूकाल 9:43-45)

22 ओर गालिलते वासि उंदि जेगाते जमा आतस्के येसु ओर्कुन इल्हा इत्तोर. “मनकना रूपमते पुटतोन नाकुन, लोकुल्लुकुना कय्दे दोर्कापीसि हियानद मंता.

23 ओर नाकु हळ्कानुर गानि, मूडोव रोजुने नाकु मर्रा जीवा अर्रांर,” इत्तोर. इद केंजसि सिस्स्युल्लुकुं इरगा दुक्कम अनपिस्ता.

24 अगटाल येसु कपर्नाहम नाटेंक वातस्के गुळिना कर वसुलि कियानोर पन्ननगा वासि, “मीवा गुरु, गुळिता कर दोहोरा?” इंचि पूसकीतुर.

25 अस्के पत्रु, “आ दोहंतोर!” इंचि इत्तोर. ओर लोता लोप्पो होतोर, हौचि येसुं क वेहाक मुन्नेन येसु, “सिमोनु, नीकु बतल अनपिच्चेक मंता? ई दुनियाते मनना राजुकु जकात आयि कर आयि बोराहेंदाल एतंतुर, ओरा मर्कुन हेंदाला मरि इंका बोरन्ना वैरेतारा हेंदाला?” इंचि पूसकीतुर.

26 अस्के पत्रु, “वैरेतारा हेंदाल,” इंचि इत्तरित्तेन येसु ओन, “अय्ते मर्क पिरि मंतुर मरि!

27 अयना ओर्कुन नाराज कियामन्नि इंचि निमे गालम वाटालय होन्नु आनि मुन्ने अरता जिम्मातुन पीसि दाना तोळ्ळुन पर्हा, पर्हातारित्ते उंदि कल्लदार दोर्कार. अद ओसि नावा आनि नीवा पोरोलते कर दोहासि हीम.” इंचि इत्तोर.

18

स्वर्ग राज्येमते पेहरोर बोर?
(मरकुस 9:33-37,42-48; लूकाल 9:46-48; 17:1-2)

1 आ वेलाते सिस्स्युल्लुकु येसुनगा वासि, “स्वर्ग राज्येमते अटोर्कन्ना पेदूदा बोर?” इंचि पूसकीतुर.

2-3 अस्के येसु वरोर सिन्ना पेडन केय्सि, ओरा नड्डुम निलाहचि इल्हा वेहालय दल्लुगुतोर. “नना निजम वेहांतन, मीवा गुनाल्लुकुन मारसकुंचि मिमेट पेडनलेसी आयवा,* स्वर्ग राज्येमते बस्केने होना परिर.

4 दानहाटी बोर अय्ते ओनाद ओरे ई सिन्ना पेडन लेहका सादा-सिंपल मनांतोर, ओरे स्वर्ग राज्येमते पेहरोर आंदुर.

5 बोर अय्ते नापोर्री विस्वासम कियना ई सिन्ना पेडनसंतोन बेस हळ्ळांतोर, ओर नाकुन बेस हळ्ळातापे.

6 गानि नापोर्री विस्वासम कियना ई सिन्ना पेडनसंतोन बोरन्ना पापमते अरहते, ओना बोळ्ळगेक जोत्ता बंडा दोहाचि ओन समुद्रमते लोतु एते ओसि मुळ्ळहमळे बेस मंता.

7 पापमते अरहना पोल्ले ई दुनियाते वेल्लेन मंतां. अवनहेंदाल दुनिया लोकुल्लुकुन पापमते अरहंता. अदुनहाटी ई दुनियाक बच्चोन गोसा वायार! पापमते अरहना पोल्ले अय्ते वायमळे गावाले, गानि अवन बोनाहेंदाल अय्ते वांतांगो ओन्क बच्चोन गोसा वायार!”

8 ओक्कला नीवा कय आयि काल आयि नीकुन पापम किया वेहते दान नर्किसि पोहा. बारित्ते रौडु कय्क, रौडु काल्क मंचि बस्केळ्ळक पोत्सेके मनना तडमिता नरकमते होननदानकन्ना, अपंग हिलाकोटे कूटाल आसि पिस्वरते होनमळे नीहाटी बेस.

9 अल्हेने, ओक्कला नीवा कळु नीकुन पापम किया वेहते दान तेंडसि पोहा. बारित्ते रौडु कळ्ळक मंचि नरकमता तडमिते होननदानकन्ना गुड्डि आसि पिस्वरते होनमळे नीहाटी बेस मंता.

10 हळ्ळाट, नावापोर्री विस्वासम कीता ई सिन्नोरकुन बोने तेंडसि पोहमट्टु. नना वेहनद बतल इत्ते, ओरा पेनदा दूतां स्वर्गमते मनना नावा पेनबाबांक बस्केळ्ळक कलियसेके मंतां.

11 अचोने आयका मनकना रूपमते पुटतोन नना तप्सोत्तोर्कुन पिसागोटललय वातन.†

12 “ओक्कला वरोर मनकानगा नूर गौर्री मंतां इनकुट्टु. अवनाल उंदि गौर्री तप्पिस होनानय्ते, कळ्ळमता टोबै तोम्मिद गौर्रीन ओर अग्गेन होळसिसि, तप्सोत्ता आ उंदि गौर्रीतुन पहकालय होन्नोरा? दांतोर.

* 17:21 इद वचनम कोन्नि पांडु लिपिने हिल्ले. * 18:2-3 पेडनलेसी आयवा ओनद-ओर सिन्नागासि तिरियमड, सिन्ना पेडांक कदर मन्ने. † 18:11 इद वचनम कोन्नि पांडु लिपिने हिल्ले.

13 नना निजम वेहांतन, ओक्कला ओन्क होत्ता गोर्रे दोर्कानय्ते, आ टोबै तोम्मिद तप्पिस होनवा गोर्रेकन्ना, तप्पोत्ता आ उंदि गोर्रेपोर्रे एक्को आनंदम आयानुर.

14 अल्हेने ई सिन्नोरकुनाल वरोर इंका नासडेम आयामन्नि इंचि स्वर्गमते मनना मीवा बाना मनसु मंता.”

तपसोत्तोर्कुंक बतल वेहना?

15 ओक्कला तम्मुर आयि दादाल आयि नीवा विरोदमते पापम कियानय्ते, निमे वरोने ओनगा होंचि ओर कीता पापम ओन्क तेळियागोट्टिस वेहा. ओर ओक्कला नीवा पोल्ले केंजानय्ते निमे ओना मनसुन गेल्सताप.‡

16 उंदि वेला ओरगिटा नीवा पोल्ले केंजुवस्के, वरोर-इव्वुरकुन नीवा पज्जो पीसि होन. बारित्ते, अगा बतल जर्गतनो अदुन वेहालय ओर गवाइ मनांतुर.

17 ओक्कला ओर ओरा पोल्लेगुडा केंजाकुंटे कलिसियातोर्क वेहा. कलिसियातोर्क वेहतदगुडा केंजाकुंटे, ओर पेनदा मनकल आयोर इंचि इनकुन. हिलाकोट्टे कर वसुल कियानसंतोर इनकुन.

18 “नना मीकु निजम वेहांतन, मिमेट बूमिपोर्रे बदुन अय्ते दोहंतिरो, अदुन स्वर्गमतेगुडा दोहमळ जर्गता, मिमेट बूमिपोर्रे बदुन अय्ते लेहांतिरो, अदुन स्वर्गमतेगुडा लेहामळ जर्गता. §

19 अचोने आयका नना वेहनद निजम बतल इत्ते, ई बूमिपोर्रे मीवा लोप्पोटाल बोरन्ना इव्वुर उंदि आसि मीकु बतल अय्ते गावालेनो अद तल्कानय्ते स्वर्गमते मनना नावा पेनबाबाल तप्पाकोटा हीतोर.

20 बारित्ते बगा अय्ते नावा पोरोलते इव्वुर-मुव्वुर उंदगा जमा आंतुरो, अगा ओरा नड्डुम नना मनांतन,” इंचि येसु इत्तोर.

वरोनद वरोर माप कियना

21 अस्के पत्रु येसुनगा वासि, “सामि, वरोर तम्मुर आयि दादाल आयि नावा विरोदमते पापम कियानय्ते, नना ओन बच्चुं मल्कां मापि कीकन? एडुं मल्कां?” इंचि पूसकीतोर.

22 अस्के येसु ओन्क, “एडुंगे मल्कां आयो, ओर बच्चुं मल्कां तप्पु कियिनागानि ओन निमे माप कीसेक मन्नु,” इंचि वेहतोर.

23 पजा येसु इल्हा वेहालय दल्गुतोर, स्वर्ग राज्येम वरोर राजन लेहका मंता. आ राजाल ओन्क बाकि मत्ता जीतागाहकुना हेंदाल बाकी वसुल कियना इंचि विचारम कीतोर.

24 बस्के अय्ते ओर वसुल कियालय सुख कीतोर, अस्के वरोर लक्सेना बाकि मत्ता जीतागान राजानहेके तत्तुर.

25 आ जीतागानगा ओना मालकुना बाकि दोहालय बतले मनाहिल्ले. अस्के ओर ओन्क आदेस हीतोर गदा, “ओर ओना मुत्तो-पिलाल्क, लोन-दारा अचोने आयका ओनगा बतल अय्ते मंतनो अव अन्नि अम्मिसि, वाता कोत्तानाल बाकि दोहिरकांटी,” इंचि वेहतोर.

26 अस्के आ जीतागाल राजाना काल्कुनपोर्रे अर्सिं बात्मिलाडतोर, “राजा नाकु कोन्नि रोजकुना मुदत हीम, मेल्लगा-मेल्लगा नावा बाकि पुरागा दोहंतन,” इंचि इत्तोर.

27 अस्के आ मालकुंक ओना जीतागानपोर्रे दया वासि ओना बाकि अंता पुरागा माप कीसि होळसीतोर.

28 पजा आ जीतागाल अगटाल पेय्सि होननेके ओन्क नू स्पे बाकि मत्ता ओना दंटाता जीतागाल हरदे कलियतोर. अस्के ई मुन्नेटा जीतागाल आ जीतागाना बोळ्गे पीसि, “नाकु हियना कोत्तां बस्के हीतिन? नाकु इंदकेटद इंदकेन हीम,” इंचि ओन इत्तोर.

29 पजा आ जीतागाल मुन्नेटा ओना दंटाता जीतागाना काल्कुना पोरो अर्सिं विनंति कीसि, “निमे कोन्नि रोजकु ओप्के पीम, नना नीवा बाकी नीकु हीतन,” इंचि इत्तोर.

30 अयना ओर बतले केंजाकोटा, ओर बाकि दोहनाल ओन जेलने वाटसीतोर.

31 अस्के अगा जर्गतद ओना दंटाता जीतागाहक हळतुर ओर्कु वेल्ले दुक्कम आता. ओरा मालकुनगा होंचि जर्गतव अंता वेहतुर.

32 अस्के मालक ओन केय्सि इत्तोर, “अरे तेल्चि तक्को जीतागा, नीकु इच्चोरगुडा दया वाया हिल्लेना? निमे नावा काल्क पीसि विनंति कीतिन अय्ते नना नीवा पूरा बाकितुन माप कीतन.

33 नना बल्हा नीवा पोरो दया कीतनो अल्हेने निमे नीवा दंटाता जीतागाना पोरो दया किय मत्तिन.”

34 इंचि मालक ओनपोर्रे होंग आसि ओन जेलने वाटसीतोर. ओना बाकि नेम्मनजेप ओन जेलनाल होळसा हिल्लोर.

35 इल्हेने मिमेटगुडा मीवा तम्मुर आयि दादान आयि मनसुनाल मापि कियाकोट्टे ई राजाल बल्हा कीतोरो अल्हेने नावा स्वर्गमते मनना बाबालगुडा मीकुन मापि कियोर.

19

सोडसिट्टिता बारेमते येसु कराहता पोल्ले

(मरकुस 10:1-12)

1 इव अन्नि पोल्ले वेहामळ आतारित्ते येसु गालिल एरियाताल पेय्सि योर्दन बैरेडता हब्बेर ओड्डुंक मनना यहुदिया एरियाते होत्तोर.

‡ 18:15 इद वचनमते मनना पोल्ले सिराप विस्वासम कीतोराहाटीं रासतद आंद.

§ 18:18 इद वचनता अर्तम बतल इत्ते, मिमेट बोर्कुनना माप कीते पेन ओर्कुन माप कीता, मिमेट बोर्कुनना माप कियाकोट्टे पेनगुडा ओर्कुन माप कियोर.

- 2 अस्के वेल्लेन मंदि ओना पज्जो होत्तुर. येसु ओर्कुन बिमारकुनाल बेस कीतोर.
- 3 अगा इच्चुर परिसिल्कगुडा वातुर. येसुना पट्टु हळना इंचि, “मूसाना नियम परकारम, बद कारनमताहाटीं अयना मुत्तोन होळसिय्या वच्चा?” इंचि येसुन पूसकीतुर.
- 4 येसु इल्हा जवाब हीतोर, “बस्के अयते पेन मनकन कीतानो, अस्केन ओर्कुन मांडसा मुरतळ इल्हा इंचि कीता. इदु मिमेट हदवा हिल्लिरा?
✧
- 5 दीनाहाटीं मांडसा यावन-बाबान होळसिसि, ओना मुत्तोन पीसि मनांतोर. ओर इव्वुर उंदे मेंदुल आसि मनांतुर.
- 6 अदुनहाटीं ओर इव्वुर उंदे मेंदुल आसि मनांतुर. इल्हा पेने ओर्कुन कल्पताहाटीं, मनकल वैरे कियानायो,” इंचि इत्तोर.
- 7 इदु केंजसि, “अल्हा अयते मरि, मनकल ओना मुत्तोंक सोडसिट्टि हीसि होळसियना आदेस मूसाल बारिक हीतोर?” इंचि परिसिल्क मर्रा पूसकीतुर.
- 8 अस्के येसु ओर्कुन इल्हा इत्तोर. “मीवा मनसु बंडालेसीं मत्ताहाटीं मूसाल मुत्तोहकुन होळसिय्या वच्चु इत्तोर, गानि मुन्नेटाल इसोंटा रिवाज मनाहिल्ले.
- 9 नना मीकु वेहासेक गदा, बोरन्ना ओना मुत्तोन बोगमतनमता कारनम तप्पा वैरे कारनमते होळसिसि इंकुंदानतोनि मरमिं आयानयते, ओर बोगमतनम कीतोर.” इल्हा इत्तोर.
- 10 इदु केंजसि ओना सिस्सुल्क ओन, “अयते मुत्तो मुय्दोन नड्डुम इंसंटा लेक्का मत्ते मरमिं आयाकॉटेन सूटि,” इंचि इत्तुर.
- 11 येसु ओर्कु इल्हा समजास्तोर, “मिमेट इत्ता पोल्लेतुन ओप्कुनमळ अंतोर्क कुदुरो, गानि बोनकु अयते ई पोल्लेन पीसि ताकना ताकत पेन हीतनो ओरे ओप्कुना परांतोर.
- 12 बारित्ते बोरो-बोरो तल्लुहकुना पीटाले आडिगुंलोर्क आसि पुटतोर मंतुर, मनकालोरा कयदालगुडा आडिगुंलोर्क आतुर मंतुर, आनि स्वर्ग राज्यमता हेंका इच्चुर मंदि मरमिं आयाकॉटा मंतुर. इंचि बोर्क अयते ई पोल्ले नच्चंतंगो ओर इदुन ओपकुनिरकांटी.”

येसु पिलाल्कुंक आसिर्वाद हींतोर.

(मरकुस 10:13-16; लूकाल 18:15-17)

- 13 पजा इच्चुर लोकल्लु ओरा पिलाल्कुनपोर्री येसु कय इर्सि पारतना कियाना इंचि ओनगा पीसि वातुर, गानि सिस्सुल्क ओर्कुन रांगतुर.
- 14 गानि येसु, “पिलाल्कुन नाहेके वायाहीम्ट, ओर्कुन आपमट. स्वर्ग राज्येम इंसंतोरदे आंद,” इंचि इत्तोर.
- 15 पजा येसु पिलाल्कुनपोर्री कय इर्सि अगटाल पेय्से होत्तोर.

दनवंतुड येसुन पूसकीतोर

(मरकुस 10:17-31; लूकाल 18:18-30)

- 16 वरोर मनकल येसुनगा वासि, “गुरु, बस्केळ्ळक पिस्सना पिस्वर गावाले मत्ते नना बव बेसता कबाहक कीते सरे?” इंचि पूसकीतोर.
- 17 अस्के येसु ओन इल्हा इत्तोर, “बेस इत्ते बतल, नाकुन बारि पूसकीतिन? बेसतद अयते सिराप पेन उंदे आंद. ओक्कला नीकु बस्केळ्ळक पिस्सना पिस्वर गावाले अनपिस्ते पेनदा आदेसकुना परकारम ताका,” इत्तोर.
- 18 “बव आदेसकु?” इंचि आ मनकल इत्तस्के, “बोने हक्कमा, बोगमतनम कियमा, दोंगातनम कियमा, आबदुदम गवाइ हियमा,
- 19 नीवा तल्लुर-बाबाना कदर कीम. नीवद निमे बच्चोन पावरम कीतिनो, अचोने पावरम इकावरोनगुडा कीम.” इंचि येसु वेहतोर.
- 20 अस्के, “नना अयते इव अन्नि कीसेकेन वातन, इंका नावा लोप्पो बतल तक्को मंता?” इंचि आ लेय्योड येसुन इत्तोर.
- 21 अस्के येसु इत्तोर. “ओक्कला नीकु सत्तेमते पुरागा आयानद मत्ते, होन, निहगा बतल अयते मंता अदुन पूरा अम्मिसि, गरिबोर्कुंक तूसि हीम. अस्के नीकु स्वर्गमते दनम दोर्कार. पजा नहगा वासि ना पज्जो ताका,” इत्तोर.
- 22 गानि ओनगा सोम्मु वेल्लेन मत्ताहाटीं ई पोल्ले केंजसि लेय्योड सिम्मरा आसि पेय्से होत्तोर.
- 23 अस्के येसु ओना सिस्सुल्कुन इल्हा इत्तोर. “नना मीकु निजम वेहांतन, स्वर्ग राज्येमते सिरमंत मनकल होळियमळ इत्ते वेल्लेन कस्टम.
- 24 नना मर्रा वेहांतन, पेनदा राज्येमते सिरमंत मनकल होळियमळकन्ना लोटापेटा सूदि बोंगाताल होनमळ अल्कगा मंता,” इत्तोर.
- 25 इदु केंजसि सिस्सुल्कुंक वेल्लेन इचंत्रम आता. अदुनहाटीं, “अयते मरि मुक्ति बोर्क दोर्का परंता?” इंचि पूसकीतुर.
- 26 अस्के येसु सिस्सुल्कुनहेके हळसि, “मनकालोरतोनि अयते इदु आयापर्री, गानि पेन मात्रम अन्नि किया परंता.” इंचि इत्तोर.
- 27 अस्के पत्रु येसुन इल्हा इत्तोर. “हळा, मोमोट अयते मत्तद-हिल्लवद अन्नि होळसिसि नीवा पज्जो वातोम. अयते माकु बतल दोर्कार?” इत्तोर.
- 28 “नना मीकु निजम वेहांतन, पूना दुनियाते, मनकना रूपमते पुटतोन नना नावा महिमाता राजगदुदेपोर्री उदुदंतन, अस्के नावा पज्जो मनानोर मिमेटगुडा पन्नेड राजगदुदेन पोर्री उदुदिसि, इस्राएलना पन्नेड गोत्राल्कुनोरा न्यायम कीकिर.
- 29 अचोने आयका नावाहाटीं बोर अयते लोन-दारातुन, दादल-तम्मुहकुन, अक्कल-हेलाहकुन, तल्लुर-बाबोन, पिलाल्कुन, इंका बूमिं-जेगान होळसीतुरो ओर्कु आ होळसीतवुंकन्ना नूर अंताल्क एक्को दोर्कार. इंका ओर बस्केळ्ळक पिस्सना पिस्वरता वारसदार आयानुर.
- 30 गानि मुन्ने मत्तोर वेल्लेटुर पज्जो आयानुर. पज्जोटोर मुन्ने आयानुर,” इंचि येसु ओन इत्तोर.

20

वरोर नेदा मालकुना वेसुड

1 येसु मर्रा इल्हा इत्तोर. नना मीकु स्वर्ग राज्येम बारेमते उंदि वेसुड वेहंतन केंजट. वरोर मालक मत्तोर. ओर हक्केरेने तेदसि, ओना अंगुर बगिचाते कबळ कियालय बूतिनोराहाटी पलाते होत्तोर.

2 मनकंकटिकि उंदि रोजुना बूति हीतन इंचि करार कीसि, ओर्कुन अंगुर बगिचाते कबळक लोहत्तोर.

3 जावोव्द पोळ्द आतस्के आ नेदा मालक हाटुमते होंचि हळतोर, अस्के रिक्कम मनानोर इच्चुर मंदि ओन्क दिसतुर.

4 मिमेटगुडा नावा अंगुर बगिचाते कबळ कियालय होंट. मीवा कबळलायक बूति मीकु हीतन, इंचि मालक ओर्क वेहतोर. अल्हा इत्तारित्ते ओरगुडा बगिचाते कबळ कियालय होत्तुर.

5 आ मालक पियाटील आनि पोंटेकु मर्रा हाटुमते होत्तोर. रोंडु मलकां इंका बूतिनोर्कुन तच्चि बगिचाते कबळ कियालय वेहतोर.

6 पोळ्द अर्रालय गंतामेड मत्तस्के आ मालक मर्रा उंदि मलका हाटुमते होत्तोर, अस्के इंका इच्चुर मंदि रिक्कम मत्तोर्कुन हळतोर. “मिमेट इगे पोळ्दमेड वट्टिदे बारि नित्तिसि मंतरि?” इंचि मालक ओर्कुन पूसकीतोर.

7 अस्के, “माकुन बोरे बूतिक केया हिल्लुर, दानहेंके मोमोट नित्तिसि मंतोम दादा!” इंचि ओर इत्तुर. अस्के, “अल्हा अय्ते मिमेट इंका नावा अंगुर बगिचाते कबळ कियालय होंट,” इंचि आ मालक ओर्कुन वेहतोर. अस्के ओर होत्तुर.

8 “पोळ्द होत्तारित्ते अंतोर बूतिनोर्कुन केय्सि, अंतोर्क बूति हीम, आकिर वातोरकुंक मुन्ने हीम, मुन्ने वातोर्कुंक आकिर हीम,” इंचि मालक ओना जीतागानकु वेहतोर.

9 पोळ्दु अर्रालय गंतामेड मत्तस्के बूतिक वातोर, बूति एतालय होत्तुर, अस्के ओर्कु पोळ्दमेटा बूति दोर्कुता.

10 अदुन हळसि “माकु वेल्लेन कोत्तां दोर्कुनुं बारे,” इंचि हक्केरे वाता बूतिनोर इनकुत्तुर. गानि ओर्कु इंका अचोने बूति दोर्कुता.

11-12 आ बूति एततस्के ओर मालकुन इत्तुर, “ईर पज्जो वासि उंदि गंटा कबळ कीतुर, मोमोट अय्ते ईरकन्ना एक्को कस्टमते, एर्रा एदूदिते कबळ कीतोम. गानि निमे माकु ओरा अचोने बूति हीतन, इद माकु नच्चा हिल्ले,” इंचि गुल्गत्तुर.

13 “नना नीकु बतल अन्यायम किया हिल्लेन, नना नीकु उंदि रोजुना बूति हीतन इंचि इत्तस्के निमे ओप्कुतिन गदा?”

14 अदुनहाटी निमे गुल्गाकोंटा नीवा बूति पीसि होन. नीकु नना बच्चोन बूति हीतन, अचोने बूति ईर आकिरते वातोर्क इंका हियना नावा मनसु मंता.

15 नना नावा कोत्तन नावा मनसु मताप कर्स कियना हक्कु नाकु हिल्लेना? नना बेस मनकन मत्ताहाटी निमे नापोर्री बारि अळसंतिन?” इंचि ओरा अव्टेताल वरोन मनकन मालक इत्तोर.

16 इल्हा बोर अय्ते पज्जो मंतुर, ओर मुन्ने आयानुर, मुन्ने मत्तोर पज्जो आयानुर, इंचि वेह्चि, येसु वेसुडि वेहमळ आपतोर.

येसु ओना हायना हामुरतुन मर्रा वेहांतोर

(मरकुस 10:32-34; लूकाल 18:31-34)

17 येसु येस्सलेम होननेके, पन्नेंडु सिस्स्युल्कुन उंदि बाजुंक ओसि,

18 “ह्ळ्हाट, मनम येस्सलेम होंचंतोम, अगा होत्ता पजा मनकना रूपमते पुटतोन नाकुन पेदूदा पेर्मालोर्कुना आनि दर्मसास्त्रम कराहना गुस्कुना कय्दे पीसि हियानुर. ओर नाकु हामुर सिक्साता आदेस हियानुर.

19 पजा यहुदि आयबोरा कय्दे अप्पजेपनुर, ओर नाकुन सिडांचनुर, नापोर्री उस्कानुर, पोदूटेते तन्नानुर, पजा नाकुन कुसुनपोर्री मोल्लां कोह्कानुर. गानि मूडोव रोजुने नना मर्रा जीवाते तेदंतन,* इंचि इत्तोर.

उंदि यावल येसुन विनंति कीता

(मरकुस 10:35-45)

20 अच्चोटेन जब्दिना मुत्तो दाना मर्क याकोब आनि योहानुन पीसि, येसुनगा वासि ओना कालकुनपोर्री अर्सि उंदि विनंति कीता.

21 “नीकु बतल गावाले?” इंचि येसु दान पूसकीतस्के, “निमे नीवा राज्येमते नावा इच्चुर मर्कुन, नीवा तिना बाजुंक वरोन, डेमा बाजुंक वरोन उदूदाना आदेस हीम” इंचि अद इत्ता.

22 जवाबुने, “मिमेट बतल पूसकीसंतिरो, अद मीक तेळियसेक हिल्ले. नना बव कस्टाल्क अय्ते बोगांचना मंता, अवुन मिमेट बोगांचा परकिटा?” इंचि येसु इत्तस्के, “हो, मोमोट तयार मंतोम,” इंचि ओर इत्तुर.

23 पजा येसु ओर्कुन इल्हा इत्तोर, “नना कस्टाल्क बोगांचताप मिमेट बोगांचा परकिट, निजमे! गानि राज्येम कियनेके, नावा तिना बाजुंक आनि नावा डेमा बाजुंक उपिच्चना अदिकार नाक हिल्ले. अव जेगां बोराहाटी ना बाबाल तयार कीतोरो, ओर अगा उदूदंतुर,” इत्तोर.

24 आ दादाल-तम्मुना पोल्ले केंजसि, अगा मत्ता कळमता पदि मंदि सिस्स्युल्क ओरापोर्री होंग आतुर.

25 अस्के येसु सिस्स्युल्कुन ओना दगेरा केय्सि, “यहुदि आयबोरा राजालोर ओरा जीतागाहकुन, ओरा कय्दा हिळ्ळु ईर्रालय हळंतुर, अल्हेने ई दुनियाता पेदूदा मनकालोरगुडा सिन्ना मनकालोरपोर्री अदिकारम ताकसालय हळंतुर, इद मीकु एर्के.

26 गानि मिमेट मात्रम ओरालेसी कियानायो. मी लोपोटाल बोर अय्ते पेदूदा आयालय हळंतोरो, ओर मीवा सेवा कियानोर आयापीता.

* 20:19 मर्रा जीवाते तेदंतन हासि अदे मंदुलते मर्रा जीवा अरमळ.

27 इंका मी लोपपोटाल बोर अयते लीडर आंतन इंतोरो, ओर मीवा दासुड आयापीता.

28 बारित्ते मनकना रूपमते पुटतोन नना, सेवा कियगोटकुनालय वाया हिल्लेन गानि वेरेतोरा सेवा कियालय आनि वेल्लेटोर्कुन पापमताल पेचाहलय, ओराहाटी नावा जीवा हियालय वातन,” इतोर.

येसु इव्वुर गुड्डोर्कुन बेस कीतोर

(मरकुस 10:46-52; लूकाल 18:35-43)

29 येसु आनि ओना सिस्स्युल्क यरिहो सहरताल पेय्से होननेके, ओना पज्जो लोकुकुना पेद्दा मंदा वाता.

30 अस्के हर्दा पक्काते इव्वुर गुड्डोर्क उद्दिसे मत्तुर. मावा मुन्नेटाल येसु होंचंतोर, इंचि ओर्कु एरपाट आतस्के ओर येसुन, “ए सामि, दाविद राजाना वंसमतोना! निमे मापोर्रो दया कीम,” इंचि वरगेयतुर.

31 अस्के, “चुपचाप मंटु” इंचि लोकुल्क आ गुड्डोर्कुन रांगतुर. गानि आ गुड्डोर्क मात्रम, लगांचि, “ए सामि, दाविद राजाना वंसमतोना, मापोर्रो दया कीम,” इंचि मोत्कुनालय दलगुतुर.

32 अस्के येसु आगसि, ओर्कुन केय्से इल्हा इतोर. “नना मीहाटी बतल कियना इंचि मीवा मनसु मंता?” इतोर.

33 अस्के ओर, “माकु दिस्सानाल मावा कळ्कुन बेस कीम सामि!” इंचि येसुन इतुर.

34 येसुंक ओरापोर्रो दया वासि ओरा कळ्कुन इतोर. इट्टा इट्टुडे ओरा कळ्कु बेस आसि, दिसालय दलगातां. अस्के ओरगुडा येसुना पज्जो होत्तुर.

21

येसु येस्सलेमते होळियतोर

(मरकुस 11:1-11; लूकाल 19:28-38; योहान 12:12-19)

1 ओर अंतोर येस्सलेम सहरता दग्गेरा जयतुन मराकुना गुट्टापोर्रो मनना बैतपागे इनना नाटेना दग्गेरा एव्वुर. पजा येसु इव्वुर सिस्स्युल्कुन केय्से,

2 ओर्क इल्हा वेहिचे नाटे लोहतोर. “मी मुन्ने दिस्सना नाटे होंट, अगा एव्वा एव्वुडे मीकु उंदि दोहाचि मत्ता गाडदि आनि दाना पोरी दिसंता. अवुन लेहकुंचि नहगा पीसि वट्टु.

3 ओक्कला अवुन पीसि वायनेके बोरन्ना मीकुन बतलन्ना इत्ते, ‘सामिक इवुना अव्वरम मंता,’ इंचि वेहट. अस्के ओर अवुन बिराना ओम्टु इंचि इंतोर.”

4 एनकटा पेनदा कबुरतोर वेहता पोल्लें निजम आयगोम इंचि इल्हा जर्गता. अद पोल्ले इल्हा मंता:

5 “सियोनुना मिथ्यळ्क* वेहट गदा, हुळाट, मीवा राजाल मीहेके वासंतोर,

ओर सांत बुद्दिदोनि, बर्वु कांजना गाडदि पोरिनपोर्रो उद्दिसे वासंतोर.”*

6 अस्के सिस्स्युल्क होंचि येसु वेहताप कीतुर.

7 सिस्स्युल्क गाडदि आनि गाडदि पोरिन येसुनगा पीसि वातुर. पजा अवुनपोर्रो ओरां कपडिं तारतुर. तारतारित्ते येसु आ गाडदि पोरिनपोर्रो उदुतोर.

8 आ गर्दिते वेल्ले लोकुल्क येसुनहाटी ओर केर्ता कपडिं तेंडसि हर्दे तारतुर. इंकिच्चुर अयते मराकुना कोम्मां नर्किसि हर्दे तारतुर.

9 अचोने आयका,

“दाविद राजाना मर्रिक होसन्ना!† पेनबाबाना अदिकार पीसि वायानोंक,

आसिर्वाद दोर्किकांटी! स्वर्गमता पेनबाबाना स्तुति आयिकांटी.”*

इल्हा वरगेयसेके येसुना पज्जो-मुन्ने लोकुकुना मंदा ताकसेक होनुंदुर.

10 येसु येस्सलेम सहरते होळियतोर, अस्के पूरा सहरअंता उंदे रोद्दा आता. “ईर बोर आंदुर?” इंचि अंतोर पूसकियुंदुर.

11 अस्के, “ईर गालिल एरियाता नासरेत नाटेना पेनदा कबुरतोर येसु आंदुर,” इंचि लोकुल्क वेहुंदुर.

येसु गुळिते दांतोर

(मरकुस 11:15-19; लूकाल 19:45-48; योहान 2:13-22)

12 पजा येसु अगाटा गुळिते होंचि, अगा अम्मनोर्कुन, अस्सानोर्कुन अंटोर्कुन पेच्हाचि गेदुमतोर. अचोने आयका अगा मत्ता कोत्तां अदला-बदला कियानोरा बल्लन पावरेल्क अम्मनोरा कुर्सिन मिड्हाचि वाटतोर.

13 पजा येसु ओर्कुन इल्हा इतोर. “नावा लोतुन, पारतना कियाना लोन इंतुर, इंचि दर्मसास्त्रमते रासि मंता, गानि मिमेट दीन दोंगाल्क मक्कना जेगा कीतिर,” इतोर.

* 21:5 सियोनुना मिथ्यळ्क इत्ते येस्सलेम सहरता रहिवासि. बारित्ते येस्सलेम सहर सियोन इनना गुट्टापोर्रो मत्ता अदुनहाटी येस्सलेम सहरता लोकुकुन सियोनुना मिथ्यड (रहिवासि) इंतुर. * 21:5 जकर्याह 9:9 † 21:9 होसन्ना इद पोल्ले पेनदा स्तुति कियानाहाटी यहुदि लोकुल्क वापर कीतुर. * 21:9 बजन संहिता 118:25-26

14 गुळिते येसुनगा गुड्डोर्क, कुंटोर्क वातुर, ओर्कुन अंटोर्कुन येसु बेस कीतोर.

15 गुळितगा येसु कीता पेद्दा-पेद्दा इचंनमता कबाहक हळसि “दाविद राजाना मर्रिक होसन्ना” इंचि पिलाल्कुना मोत्कुन्मडतुन केंजसि अगा मत्ता पेद्दा पेर्माळोर दर्मसास्त्रम कराहना गुस्लक इरगा होंगुंक वातुर.

16 अस्के ओर येसुन, “पिलाल्क नीकुन बतल इचंतुर, अद निमे केंजतिना?” इंचि पूसकीतुर. अस्के येसु, “हो, केंजसंतन. ए पेनबाबा, निमे सिन्ना पिलाल्कुंक आनि पाल उनना पिलाल्कुंक स्तुति कियमळ कराहतिन, ✨ इंचि दर्मसास्त्रमते रासि मंता. अद मिमेट बस्केने हदवा हिल्लिरा?” इंचि ओर्कुन इत्तोर.

17 पजा येसु ओर्कुन अग्गेन होळसि, सहरता पलाते बेतानि सहर होंचि, अद नर्का अग्गेन मत्तोर.

कायां हादवा अंजिर मराकु येसु सापनेम हीतोर
(मरकुस 11:12-14; 11:20-24)

18 हक्केरे येसु वापस सहरताहेके होननेके ओन्क कर्वेस्ता.

19 अस्के हर्दा पक्काते उंदि अंजिर मरातुन हळसि आ मरातगा होत्तोर. गानि आ मराकु आकि तप्पा बतांगे मनाहिल्लें. अस्के, “इंका नीकु बस्केने कायां हादा मन्नि,” इंचि येसु आ मरातुन इत्तोर. अल्हा इत्ता इन्मळे आ मरा वतसि होत्ता.

20 अल्हा आतद हळसि सिस्युल्कुंक इचंनम आता. अस्के ओर, “अंजिर मरा इच्चोर बिराना बल्हा वतसि होत्ता?” इंचि येसुन इत्तुर.

21 अस्के येसु ओर्कु इल्हा जवाब हीतोर. “नना मीकु निजम वेहांतन, ओक्कला मीकु बतले अनमानम हिलाकोटा पेनदापोर्रो विस्वासम मनानय्ते, नना बल्हा अंजिर मरातुन कीतनो अल्हा मिमेटगुडा किया परातिर. अचोने आयो इद गूट्टातुन, ‘इंगेटाल तेदसि समुद्रमते होंचि अर्रा,’ इंचि इनानय्ते, अद होंचि समुद्रमते अर्रता.

22 मिमेट विस्वासमतोनि पारतनाते बतल तल्किना अद मीकु दोर्कार,” इत्तोर.

पेद्दाल्क येसुना अदिकार तल्कतुर
(मरकुस 11:27-33; लूकाल 20:1-8)

23 पजा येसु गुळिते होळियसि पेनदा पोल्लें कराहसेके मननेके, अगा पेद्दा पेर्माळोर आनि यहुदिल्लकुना पेद्दाल्क ओनगा वातुर. वासि, “निमे ई कबाहक बद अदिकारमते कीसंतिन? नीकु ई अदिकारम बोर हीतोर?” इंचि पूसकीतुर.

24 अस्के येसु ओर्क इल्हा जवाब हीतोर. “ननागुडा मीकुन उंदि सवाल पूसकीतन, मिमेट जवाब हियानय्ते, नना बद अदिकारमते इव कबाहक कीसंतन इत्तद वेहंतन.

25 अय्ते वेहट, योहानुंक बापतिस्मा हियाना अदिकारम बगाटाल दोर्कता? स्वर्गमताला हिलाकोटे मनकालोराहेंदाल दोर्कतना?” इत्तोर.

अस्के ओर ओर इल्हा वळ्ळकुनालय दल्गतुर. “ओक्कला स्वर्गमताल दोर्कता इंचि मनम इनानय्ते, ‘योहानुन बारि विस्वासम कियिर?’ इंचि इनानुर.

26 ओक्कला मनकालोराहेंदाल दोर्कता इनानय्ते, लोकुल्कुना वेंरे! बारित्ते योहान पेनदा कबुरतोर आंदुर इंचि लोकुल्क नम्मंतुर.”

27 अदुनहाटी ओर, “माक एर्का हिल्ले,” इंचि इत्तुर.

अस्के, “अल्हा अय्ते, इव कबाहक बद अदिकारमते कीसंतनो, ननागुडा मीकु वेहोन,” इंचि येसु इत्तोर.

इव्वुर मर्कुना वेसुडि

28 केंजट, नना उंदि सिन्ना वेसुड वेहंतन, दान केंजसि मिमेट बतल इनकुंतिरो वेहट. वरोर मनकंक इव्वुर मर्क मत्तुर. उंदि मल्का आ मनकल ओना पेद्दा मर्रिनगा होंचि, “कोको, निमे इय्याला अंगुर बगिचाते होंचि कबळ कीम,” इंचि वेहतोर.

29 अस्के आ पेद्दा मर्रि “नना होनेन” इत्तोर गानि पज्जो ओर विचारम कीसि बगिचाते होत्तोर.

30 पजा आ मनकल ओना इंकावरोर मर्रिनगा होंचि, “कोको, इय्याला निमे अंगुर बगिचाते होंचि कबळ कीम” इंचि वेहतोर. अस्के आ मर्रि, “सरे दांतन बाबा!” इत्तोर, गानि ओर होनेन हिल्लोर.

31 अय्ते आ इव्वुर मर्कनाल बा मर्रि बाबोना पोल्ले केंजताप? इंचि येसु ओर्कुन पूसकीतोर. अस्के ओर, “पेद्दा मर्रि केंजतोर,” इंचि इत्तुर.

“नना निजम वेहंतन, बोगामोताहक आनि कर वसुल कियानोर मीकन्ना मुन्ने पेनदा राज्येमते दांतुर.

32 योहान मीकु सत्तेमता हर्रि हुप्सालय वातोर, ओन मिमेट नम्मा हिल्लिर. गानि बोगामोताहक, कर वसुल कियानोर बारे ओन नमतुर, इद मीकु एर्के. अय्नागानि मीवा मनसु बदलांचि योहानुन नम्मालय मिमेट तयार आया हिल्लिर,” इंचि येसु इत्तोर.

बटाइतोना वेसुडि

(मरकुस 12:1-12; लूकाल 20:9-19)

33 पजा येसु इल्हा इत्तोर. केंजट, इंकुंदि वेसुडि वेहांतन, वरोर मनकल मत्तोर. ओर उंदि अंगुर तोटा कीतोर. आ तोटा सुट्टु गूरे दोहाचि तोटाता लोपेन अंगुर पंडिना पानकम तेंडालय उंदि पोक्का तव्वि गानगु तयार कीतोर. दाना दग्गेरेने कावेलहाटी उंदि मंडा वाटतोर. पजा तोटातुन वेंरेतोर्क बटाइक हीसि, वेंरे देसेम होत्तोर.

- 34 अंगुर पंडिं कोय्याना वेला वाता, अस्के पालुनाहाटीं ओना दासुल्लुकुन बटाइतोरहेके लोहतोर.
- 35 अस्के बटाइतोर दासुल्लुकुन दोर्कापीसि, वरोन तंतुर, वरोन हक्कतुर, वरोनपोर्रो बारे बंडां हुक्कतुर.
- 36 इद केंजसि बगिचाता मालक इका एक्को दासुल्लुकुन लोहतोर. ओरतोनिगुडा बटाइतोर मोदाला कीतापे कीतुर.
- 37 आकिरते, “नावा मर्रिन बेस कदर कियानुर,” इनकुंचि ओना मर्रिन ओरहेके लोहतोर.
- 38 गानि बटाइतोर, ओना मर्रि वायानद हळसि, “ईर अयते वारसदार आंदुर, दट ओन हक्किसि, ओना जायदाद मनम एतकुनकोम,” इंचि ओर ओरे इनकुल्लुतुर.
- 39 पजा ओन दोर्कापीसि तोटाता पलाते ओसि हक्कतुर.
- 40 अयते आ तोटाता मालक वायानयते, आ बटाइतोर्कुन बतल कियानुर?
- 41 ओर येसुन इत्तुर, “असोटा दुस्तुल्लुकुन तंचि-तंचि हक्कानुर आनि बोर अयते पंटा पेयस्तस्के ओन्क वेलापोर्रो तूस हींतोर, ओन्क बटाइक हिय्यानुर,” इत्तुर.
- 42 पजा येसु ओर्कुन इल्हा इत्तोर. “मिमेट दर्मसास्त्रमते बस्केन हदवा हिल्लिरा? बद बंडातुन अयते मिस्त्रिल्लक कबळक ओज्जो इंचि हयसा हिल्लुर, अदे बंडा सेंकु मूलाता पुनादि बंडाः आता. इद सामि कीता कबळ आंद, इद मना नदरते इचंन्रमाता कबळ आंद,” इत्तोर.✱
- 43 “मिमेट निजम इत्तिर. केंजट, दाना अर्तम इल्हा मंता. पेन मीकु हियना स्वर्ग राज्येमतुन तेंडसि, मीवा जेगाते दाना पोल्लेपोर्रो तिरियना वेरे जाति लोक्कुल्लुकुन हींता.
- 44 बोर अयते इद बंडापोर्रो अर्रतुर, ओर तुकडां-तुकडां आयनुर, गानि अद बंडा बोरपोर्रो अयते अर्रता, ओर पिच्चि-पिच्चि आयानुर,” इंचि इत्तोर.
- 45 पेद्दा पेर्मालोर्क आनि परिसिल्लुकुन येसु वेहता वेसुडिं केंजसि, येसु ओरा बारेमतेन वळकसंतोर इंचि एरपाट कीतुर.
- 46 पजा ओर येसुन दोर्का पियालय हळतुर, गानि लोक्कुल्लुकुन हळसि वेरियतुर. बारित्ते लोक्कुल्लुकुन येसुन पेनदा कबुरतोर आंदुर इंचि नमतुर.

22

मरमिना बोजनम वेसुड (लूकाल 14:15-24)

- 1 येसु मर्रिद मल्ला, लोक्कुल्लुकुन वेसुडि वेहासेक इल्हा वळकालय दलगतोर.
- 2 स्वर्ग राज्येम वरोर राजानलेसी मंता. ओर ओना मर्रिना मर्रिमिकु उंदि कुळ्पु इरतोर.
- 3 आ कुळ्पु कु बोर्कुन अयते केय्सि मत्तोर, ओर्कुन केय्सि थायालय, ओना दासुल्लुकुन लोहतोर. गानि ओर वायोम इंचि इत्तुर.
- 4 वायोम इंचि इत्तारित्ते, मर्रा इच्चुर दासुल्लुकुन राजाल इल्हा वेहट इंचि लोहतोर, “हुळ्हाट, मीहाटीं नना कुळ्पु इरतन, बलसता कुर्रा आनि कौंदा कोयतन, कुसिरगुडा वेसि तयार मंता. अदुनहाटीं मिमेट गाटो तिनालय ताकट इंचि इंटु,” इत्तोर.
- 5-6 राजाल वेहिनागानि, राजाना पोल्लेता कदर कियार्कोटा, इच्चुर ओरा पोलाल्लुकुनहेके होत्तुर, इच्चुर बारे ओरा कबळ दंदानहेके होत्तुर. इच्चुर बारे राजाना दासुल्लुकुन पीसि तंचि हक्किसि पोहतुर.
- 7 अस्के राजांक इरगा होंग वाता. पजा राजाल ओना सिपाइल्लुकुन लोहचि, ओना दासुल्लुकुन हक्कतोर्कु हक्किसि ओरा सहरकु तडमि दोस्सा वेहतोर.
- 8 पजा राजाल ओना दासुल्लुकुन इल्हा वेहतोर. “मरमिना कुळ्पु तयार मंता. गानि केयता मनकालोर बेसटुर आय्युर.
- 9 अदुनहाटीं मिमेट हर्कुन पीसि, गल्लीं, बजारकुन पीसि होंचि दोर्कुतोर अंतोर्कुन गाटो तिनालय केय्सि तटु,” इंचि इत्तोर.
- 10 अस्के दासुल्लुकुन, हर्कु, गल्लीं पीसि होंचि बेसतोर, सेडुडोर अंतोर्कुन जमा कीसि तत्तुर. अस्के मरमिना लोते हेडमितुर निडिस होत्तुर.
- 11 अस्के वाता हेडमितोर्कुन राजाल हळतस्के, मरमिन लोप्पो मरमिन लायक बेसता कपडिं केस्वा* वरोर मनकल ओन्क दिसतोर.
- 12 अस्के राजाल ओन, “निमे मरमिन लोप्पो बेसता कपडिं केस्वा, मरमिना मंडाता† हिळ्ळ बल्हा वातिन?” इंचि ओन पूसकीतोर गानि आ मनकल बतले वळका हिल्लोर.
- 13 अस्के राजाल ओना जीतागाह्कुन केय्सि, “ईना कय्क-काल्क दोहचि, पलाते हीकटते पोहचीम्ट. अगा मनानोर अळसेके, वरगेयसेके, पल्लुकु कोर्कसेक मनांतुर,” इंचि इत्तोर.
- 14 पजा, “केयतोर वेल्लेटुरे मंतुर. गानि पेर्कुत्तोरु मात्रम इच्चुरे मंतुर,” इंचि येसु वेसुड वेहामळ आपतोर.

येसुन तप्पुने दोर्का पियालय परिसिल्लुकुना उपायाल्लुकु (मरकुस 12:13-17; लूकाल 20:20-26)

- 15 पजा परिसिल्लुकुन अगटाल पेय्सि उंदगा जमा आसि, येसुन बल्हा किसन्ना ओर वळकाना पोल्लेतेन ओना तप्पु दोर्का पियाना इंचि उपायम कियालय दलग्गुतुर.

‡ 21:42 पुनादि बंडा लोन दोहकामुने लोन गट्टिगा मननाहाटीं लोतुक बंडातोनि पुनादि दोहांतुर. इगे पुनादि बंडा येसु आंदुर. ✱ 21:42 बजन संहिता 118:22-23 * 22:11 बेसता कपडिं केस्वा आत्मिक रीतिते बेस मनवोर, पडना पिस्वर होळसियवोर. † 22:12 मंडा इत्ते पंदि अंद.

16 परिसिल्क येसुन पसांचना उपायाल्क कीसि, ओरा इच्चुर सिस्युल्कुन हेरोद राजाना मनकालोरतोनि ओनाहेके लोहचीतुर. ओर येसुनगा होचि इल्हा इत्तुर. “गुरु, निमे निजम वळ्कानोन, पेनदा हर्दा बारेमते सत्तेमते करहानोन आदिन इंचि माक एरपाट मंता. बोर बतल इनिनागानि दाना पिकिरगुडा किथ्येन, निमे लोकुल्कुना मोकम हळसि वळ्किन, इदिका माकु एके.‡

17 अय्ते माकु वेहा. नियम परकारम, कैसरS राजांक कर दोहमळ न्यायमेना आयोना? नीवा विचारमते बतल मंता?” इत्तुर.

18 ओरा कौटे उपायाल्क येसुंक मुन्नेटाले एका मत्ताहाटीं ओर ओर्कुन इल्हा इत्तोर. “ए डोंगिरिटा, बारि नावा पट्टु हळ्ळतिर?

19 मिमेट कर दोहना कोत्ता नाकु हुप्सट,” इत्तोर. अस्के आ लोकुल्क ओन्क उंदि एंडि बंडि हूपिस्तुर.

20 हूपिस्तस्के, “इद एंडि बंडिपोर्री बोना पोटुवा आनि पोरोल मंता?” इंचि येसु ओर्कुन पूसकीतस्के,

21 “कैसर राजानद,” इंचि ओर इत्तुर. पजा येसु ओर्कु वेहतोर. “बद कैसर राजानद मंता, अद कैसर राजांक हीम्टु, बद अय्ते पेनदाद मंता, अद पेनदुक हीम्टु.” इत्तोर.

22 येसुना पोल्लें केंजसि, ओर्कु इचंन्रम आता. पजा ओर अगटाल होत्तुर.

इच्चुर सदुकि लोकुल्क येसुन पसांचलय हळंतुर

(मरकुस 12:18-27; लूकाल 20:27-40)

23 अदे रोजु इच्चुर सदुकिर येसुनगा वातुर (ईर हासि मर्रा जीवाते तेदमळतुन ईर नम्मुर.)

24 वासि इल्हा सवाल पूसकीतुर, “गुरु, मूसाना नियम परकारम, वरोर मनकल पिलाल्क आयाका मुन्नेन हायानय्ते ओना मुत्तोनतोनि ओना तम्मुर मरमिं आसि, हातोना वंसम बेसांगोटालय पिलाल्कुन कना परांतोर.

25 अय्ते महगा एडुर दादाल-तम्मुह्क मत्तुर. पेद्दा दादाना मरमिं आतां गानि पिलाल्क आयाका मुन्नेन ओर हातोर. पजा ओना मुत्तोन ओना तम्मुर मरमिं आतोर.

26 आ तम्मुरगुडा पिलाल्क आयाका मुन्नेन हातोर. पजा ओना पज्जोटोर दान मरमिं आतोर ओरगुडा हातोर. इल्हा एडुरगुडा दानतोनि मरमिं आसि पिलाल्क आयाका मुन्नेन हातुर.

27 अंतोर हाता पजा, आ मुरतळगुडा हाता.

28 अय्ते हातोर अंतोर मर्रा जीवाते तेदतस्के, आ एडुर लोप्पोटाल अद बोना मुत्तो आयार? बारित्ते, ओर एडुरगुडा दान मरमिं आसि मत्तुर,” इत्तुर.

29 अस्के येसु ओर्क इल्हा जवाब हीतोर. “मिमेट दर्मसास्त्रमतुन आनि पेनदा ताकततुन एरपाट किय्याका तप्पु अर्तम कीकुंचंतुर.

30 बारित्ते हातोर मर्रा जीवाते तेदानुर अस्के, ओर मरमिं आयुर, मरमिं कीसिगुडा हि्य्युर. गानि ओर स्वर्गमता पेनदा दूतनलेसीं मनांतुर.

31-32 गानि हातोर मर्रा जीवाते तेदानुर इंचि दर्मसास्त्रमते वेहचि मंता, अद बतल इत्ते, ‘नना अब्राहाम, इसाक आनि याकोबुना पेनदुन आंदुन,’* इंचि पेन इत्ता. अदुन हद्विसि दाना अर्तम बस्केने एरपाट किय्या हिल्लिरा? इंचि अद हातोर पेन आयो गानि जीवाते मनानोरा पेन आंद,” इल्हा येसु इत्तोर.

33 येसु इच्चोन वळ्कतारित्ते, अगा मत्ता लोकुल्क ओना पोल्लें केंजसि इचंन्रम आतुर.

अन्निकन्ना पेद्दा पोल्ले बद्दु?

(मरकुस 12:28-34; लूकाल 10:25-28)

34 येसु सदुकिर्कुन वळ्काकौटा कीतोर इंचि परिसिल्कुंक तेळियतारित्ते ओर जमा आसि येसुनहेके वातुर.

35 ओरा लोप्पो मूसाना नियम बेस तेळियतोर वरोर मत्तोर, ओर येसुना पट्टु हळालय,

36 “गुरु, मूसाना नियम लोप्पो अन्निकन्ना पेद्दा आदेस बद आंद?” इंचि येसुन सवाल पूसकीतोर.

37 अस्के, “निमे नीवा सामि आता पेनदुन पूरा मनसुनाल, पूरा आत्माताल, पूरा बुद्धिताल पावरम कीम.

38 इदे अन्निकन्ना पेद्दा आनि मोदोलता आदेस आंद.

39 रौंडो आदेस बतल इत्ते, नीवद निमे बच्चोन पावरम कीतिनो, अचोने पावरम इंकावरोनगुडा कीम.

40 इव रौंडु आदेसकुना आदारम पोरिने मूसाना नियम आनि पेनदा कबुरतोर रासता पुस्तकाल्क मंतां.” इंचि येसु जवाब हीतोर.

येसु परिसिल्कुन सवाल पूसकीतोर

(मरकुस 12:35-37; लूकाल 20:41-44)

41 पजा परिसिल्क उंदगा जमा आसि मत्तस्के, येसु ओर्कुन उंदि सवाल पूसकीतोर.

42 “किरिस्तुना बारेमते मीवद बतल विचारम मंता? ओर बोना मर्रि आंदुर?” अस्के, “ओर दाविदना मर्रि आंदुर,” इंचि परिसिल्क इत्तुर.

43-44 अस्के येसु ओर्कुन इल्हा इत्तोर. “अय्ते, दाविद पवित्र आत्माते निंडसि इल्हा इत्तोर. सामि नावा सामिन इत्तोर, बदवेरदाका अय्ते नीवा पगातोकुन नीवा काल्कुनगा तायोन, अदवेरदाका नावा तिना बाजुंक उद्विसि मन.*

‡ 22:16 इगे रौंडु पारिं मंतां, उंदि परिसिल्कुना पारिं इंकुंदि हेरोद राजाना पारिं. परिसिल्कुंक कैसर राजांक कर दोहमळ न्यायमेना, आयोना? गानि हेरोदना पारिंतोर मात्रम कैसर राजांक कर दोहमळ गावाले इंतुर. § 22:17 कैसर इद राजाना पोरोल आयो. रोम सरकारते अन्टिकन्ना पेद्दा पदवि आंद. * 22:31-32 निर्गमन 3:6 ✧ 22:43-44 बजन संहिता 110:1

45 कुद्दु दाविद ओन सामि इंचि इत्तोर अय्ते ओर दाविदना मरि बल्हा आया परांतोर?" इत्तोर.

46 अस्के ओर बोरे येसुना पोल्लेक जवाब हिया पराहिल्लुर. आ रोजुनाल येसुन बद्दे सवाल पूसकियालय बोर्कु हिम्मत आयाहिल्ले.

23

दर्मसास्त्रम कराहना गुरूक आनि परिसिल्कुना होंग
(मरकुस 12:38-40; लूकाल 11:37-52; 20:45-47)

1 सिस्युल्कुन आनि अगाटा मंदितुन हूळसि येसु इत्तोर गदा,

2 "दर्मसास्त्रम कराहना गुरूक आनि परिसिल्कुंक मूसाना नियम कराहना हक्कु मंता.

3-4 इंचि ओर तेहेते तेदा पर्खा मोता दोह्चि मनकालोरा हट्टनपोर्रो ईरतुर गानि आ मोतातुन कांजसि ओयनेके वेलु दोस्सि आसरागुडा आयुर. अदुनहाटी ओर मीकु बतल-बतल वेहंतुरो अव अन्नि कीसेके ताकटु, गानि ओर कीताप मात्रम कियमट."

5 ओर ओरा कबाहक लोकुल्क हूळना इंचि कीतुर. पेनदा पोल्लेन रासि, तायिल्कुने निहचि पेद्दा-पेद्दा दुम्मे ओरा दंडा कयकुंक, कप्पर्क दोहकुंतुर. ओरा कपडिना कोंगुल्कु जिल्लर-जल्लर होळसीतुर. लोकुल्क ओर्कुन "सादु" इनागोम इंचि इल्हा कीतुर.*

6 अचोने आयाका दर्मसास्त्रम कराहना लोहकुने, कुळपुकुने पेद्दाल्क उद्दाना जेगाते उदमळ इत्ते ओर्क वेल्ले इस्टम.

7 हाटुमकुने जोहार वेहागोटकुनमळ, मनकालोराहेदाल गुरू इंचि केया वेहकुनमळ ओर्कु बेस अनपिच्चंता.

8 गानि मिमेट अंतोर दादालोर-तम्मूहक आंदिर, मीवा अंतोरा गुरू वर्रोरे. अदुनहाटी मिमेट मीकुन "गुरू" इंचि इनागोटकुनमटु.

9 स्वर्गमते मनना पेने मीवा बाबाल आंदुर, अदुनहाटी इद बूमिमे मिमेट बोने "बाबा" इंचि इनमटु.

10 अल्हेने मीकु वर्रोरे सामि मंतोर, ओर किरिस्तु आंदुर. अदुनहाटी मीकुन बोरे "सामि" इंचि केया मन्नि.

11 गानि बोरे अय्ते पेनदा मुन्ने अंतोर्कन्ना पेद्दा आयालय हूळंतोर, ओर अंतोरा सेवा कियानोर आयिर.

12 बोरे अय्ते, ओनद ओरे पेद्दा इनकुनानुर, पेन ओन सिन्ना किय्यार. अल्हेने बोरे अय्ते पेनदाहाटी सिन्ना आसि ताकांतोर, ओन पेन पेद्दा किय्यार.

13 अरे डोंगि परिसिल्क आनि दर्मसास्त्रम कराहना गुरूकुनिटा, मीक गोसा तप्पो. स्वर्ग राज्यमते होनानोरा हरि मिमेट बंद कीतिर. मिमेट अय्ते होन्निर, होनानोर्कुनगुडा होन्ना हि्य्यिर.

14 अरे डोंगि दर्मसास्त्रम कराहना गुरूक आनि परिसिल्कुनिटा, मीकु गोसा तप्पो. मुंडामोस्ता मुर्ताहकुन मुळाहतिर. अल्हेने लोकुल्कुंक हुप्सालय वेल्लेनजेम पारतना कीतिर. मिमेट डोंगिर्क आंदिर! मीकु पेन एक्को सिक्सा हि्य्यार.*

15 अरे डोंगि दर्मसास्त्रम कराहना गुरूक आनि परिसिल्कुनिटा! वरोन मीवा मतमते तायालय मिमेट देसे-देसेम तिरियसि बूमि-मब्बु उंदि कीतिर. ओर मीलोप्पो वातस्के, मिमेट ओन मीकन्ना एक्को पापमते अरहचि नरकमते लोहतिट, दानहाटी मीकु बच्चोर पेद्दा गोसा वायार.

16 अरे, हरि हुप्संतोम इनना गुडिडर्कनिटा! मिमेट इतिर गदा, बोरे अय्ते पेनदा गुळिता ओट्टु तितोर, ओन्क बतल आयो. गानि बोरे अय्ते गुळि लोप्पोटा बंगारमता ओट्टु तितोर, ओन्क मात्रम आ ओट्टु परकारम ताका पीता, इंचि इतिर. दानहाटी मीकु बच्चोर पेद्दा गोसा वायार.

17 अरे गुडिडर! बद पेद्देद, बंगारमा बंगारमतुन पवित्र कियना गुळिआ?

18 इंका इल्हा इतिर गदा, बोरेन्ना पेन गद्देता ओट्टु तिचि दान परकारम ताकाकोटे बतल आयो, गानि पेन गद्देपोर्रो वाटता उपारमता ओट्टु बोरे अय्ते तितोर, ओन्क मात्रम आ ओट्टु परकारम ताका पीता.

19 अरे गुडिडर्कनिटा! पेन गद्दे पेद्देदा मरि पेन गद्दे हेदाल पवित्र आयना दानपोर्रो वाटता उपारम पेद्देदा?

20 अदुनहेके बोरे पेन गद्देता ओट्टु तितोर, ओर पेन गद्देपोर्रो मत्ता अन्निटवुना ओट्टु तित्तापे.

21 अल्हेने बोरे अय्ते गुळिता ओट्टु तितोर, ओर गुळिते मनना पेनदा ओट्टु इंका तितोर.

22 बोरे अय्ते स्वर्गमता ओट्टु तितोर, ओर पेनदा राजगद्दे आनि राजगद्देपोर्रो उदिस मनानोनद इंका ओट्टु तितोर.

23 अरे डोंगि दर्मसास्त्रम कराहना गुरूक आनि परिसिल्कुनिटा, मीक गोसा तप्पो. बारित्ते मिमेट पुदिना, जिल्लरा, सोप इसोटा पंटातालगुडा पदि तूसकुनाल उंदि तूस पेनदुक हीतिर. गानि न्यायमते तिरियमळ, दया कियमळ, पेनदापोर्रो विस्वासम इरमळ इसोटाव दर्मसास्त्रमता बेसता पोल्लेन मिमेट होळसीतिर. पदि तूसकुनाल उंदि तूस पेनदुक हियमळ इद बेसे. गानि इद कीसेक-कीसेक अबुनगुडा होळसाकोटा ताका मत्तिर.

24 हरि हुप्संतोम इनना गुडिडर्कनिटा! मिमेट नुल्लेतुन बारे वडा पीसि उंतिर गानि लोटापेटातुन बारे हूळवा अल्हे मिंगातिर.

25 अरे डोंगि दर्मसास्त्रम कराहना गुरूक आनि परिसिल्कुनिटा, मीकु गोसा तप्पो. बारित्ते, मिमेट गिन्ने-गिलासकु सिराप लोकुल्कुंक दिसालय पलाताल तोमसि साप कीतिर, गानि लोप्पो मात्रम मीवा कराब गुनाल्क, पापाल्क निडिस मंतां.

26 अरे गुडिडर परिसिल्कुनिटा! मुन्ने मीवा गिलासकु-गिन्नेन लोप्पोटाल तोमसि नोर्राटु, अस्के अव पलातालगुडा बेस दिसंता.

27 अरे डोंगि दर्मसास्त्रम कराहना गुरूक आनि परिसिल्कुनिटा, मीकु गोसा तप्पो. बारित्ते मिमेट तेल्लटा सुन्ना होकता गोरिनसंतोर आंदिर. अव पलाताल हूळालय सक्कगा दिसंतां, गानि लोप्पो हूळते, पीनगुना बोक्कां कळियसि होंचि गब्बु पीसि मंतां.

* 23:5 व्यवस्ताविवरन 11:18; गिनति 15:37-41 * 23:14 इद वचनम कोन्नि पांडु लिपिने हिल्ले.

28 अल्हेने मिमेट इंका पलाताल लोकुल्लुकुंक पक्का नीतिमंतुल्लुकुन लेह्का दिसतिर. गानि मीवा पीट लोप्पो नडेह कियना बुद्धि, पापमता कबाहक निडिस मंता.

29 अरे डोगि दर्मसास्त्रम कराहना गुस्लुकु आनि परिसिल्लुकुनिटा, मीकु गोसा तप्पो. बारित्ते, मिमेट पेनदा कबुरतोरहाटी गोरी दोहांतिर आनि नीतिमंतुल्लुकुना गोरिन सोक कीतिट.

30 अल्हा कीसि मिमेट इतिर, मोमोट पेद्दालुकुना कालमते मंचि मत्ते, पेनदा कबुरतोरुकुन हक्कानेंके, ओर्क सायता आया कोन्नेम.

31 इल्हा इंचि, “मोमोट पेनदा कबुरतोरुकुन हक्कतोर वंसमतोरुकुम आंदुम,” इंचि मीवद मिमेटे उल्टा गवाइ वेहकुंतिर.

32 अय्ते मिमेट मीवा पेद्दालुकु सुख कीता पापमतुन पूरा कीम्टु.

33 ए तरासकुनसंतोरिता! आनि नय तरास पोरिह्कुकुनसंतोरिता! मिमेट बल्हा अयना नरकमते होनमळ तप्पो.

34 अदुनहाटी नना मीहेके पेनदा कबुरतोरुकुन, बुद्धिमंतुल्लुकुन आनि दर्मसास्त्रम कराहना गुस्लुकुन लोहांतन. मिमेट ओरावेटाल इच्चुकुंन हक्ककिर, इच्चुकुंन कूसुकु वेलाड वाटकिर, इच्चुकुंन मीवा दर्मसास्त्रम कराहना लोहकुने ओसि पोट्टेते तनकिर, तंचि ओर्कुन नार-नार तिराह्चि तिप्पलुकु कीकिर.

35 दीनहेंदाल, नीतिमंतुड आता आबेलनगटाल अय्ते गुळि आनि गद्दे नड्डुम मिमेट हक्कता बर्काना मरिं जकर्याहनगडुक, बचटुर नीतिमंतुल्लुकुना नेत्तुर अय्ते ई बूमिपोर्री पोंगागोटमळ जर्गता, आ अंतोरा नेत्तुरता दोसेम पूरा मीपोर्री अरारि.

36 नना मीकु निजम वेहांतन, इव अन्नि पोल्ले ई पीळितोरपोरिन अरंतां.

37 ए येस्सलेमतोरिता, ए येस्सलेमतोरिता! मिमेट पेनदा कबुरतोरुकुन हक्कानोर आंदिर, इंका पेन मिहगा लोहचीतोर पोरोर्री मिमेट बंडां हुक्कानोर आंदिर. कोर्क दाना पीसेन रेक्काना हिळु बल्हा जमा कीतनो, अल्हेन ननागुडा मीवा पिलालुकुन जमा कियना इंचि बच्चुंगो मल्लां कोरतन. गानि मिमेट मात्रम कोराहिल्लिर.

38 ह्ळा, इंदके मी लोतुन मीहाटी कुल्ला होळसमळ जर्गता. पूरा लोन बतल हिलाकोटा आंता.

39 नना मीकु वेहानद बतल इत्ते, “सामिना पोरोलते वायानोर आसिर्वाद दोर्कतोर,” इंचि बदवेरदाका अय्ते मिमेट इन्निरो अदवेरदाका नाकुन मर्रा ह्ळिर.

24

गुळि नासडेम आसि दुनिया मुंळगना बारेमते

(मरकुस 13:1-37; लुकाल 17:26-36; 21:5-33)

1 येसु गुळिताल पलाते पेय्सि होननेंके, ओना सिस्स्युलुकु ओन्क गुळिता बंगलां हुप्सालय ओनगा होत्तुर.

2 गानि येसु ओर्कु इल्हा जवाब हीतोर. “मिमेट इवन्नि ह्ळसंतिर गदा! नना मीकु निजम वेहांतन, इव बंडां उंदानपोर्री उंदि मनाकोटा कूल्हाना वेला वायनद मंता,” इत्तोर.

3 आयंका येसु जय्तुन मराकुना गुट्टापोर्री होंचि उदतोर. ओर ओटिगा मत्तद ह्ळसि ओना सिस्स्युलुकु ओनगा होंचि इल्हा इत्तुर, “इवन्नि गटनां बस्के जर्गनुं माक वेहा. इंका निमे वायाना वेला आनि दुनिया मुंळगना आकिर वेला बस्के आंता इंचि मोमोट बव चिन्हां ह्ळसि एरपाट कीकोम?” इत्तुर.

4 अस्के येसु ओर्कु इल्हा जवाब हीतोर. “मीकुन बोर पसांचकोटा मिमेट उसारते मंटु.

5 नावा पोरोल एतसेके बचटुरो लोकुल्लुकु वांतुर. वासि, ‘ननाने किरिस्तुन आंदुन’ इंचि वेल्लेटोरुकुन पसांचंनुर.

6 मिमेट लडाईं आनि लडाईंना पोल्लेना बारेमते केंजसि वेरियमट, अल्हा तप्पाकोटा आयानुंगे. गानि दुनियाता आकिर वेला अस्केने वायो.

7 देसेमपोर्री देसेम, राज्येमपोर्री राज्येम लडाईं आयनुं, वेरे-वेरे जेगाने बूकंपालुकु आयनुं, कर्वु अरारि.

8 गानि इल्हा आयमळ इत्ते एर पूरालय नोप्पि सुख आताप आंद.”

9 “मिमेट नाकुन विस्वासम कीताहाटी लोकुल्लुकु मीकुन तकलिप कियालय अदिकारिल्लुकुंक अप्पजेपंतुर, अस्के ओर मीकुन हक्कंतुर, नावा पोरोलताहेंका दुनियातोर बोरे मीकुन हय्सुर.

10 आ वेलाते बचटुरो विस्वासम कियानोर ओरा विस्वासम होळसंतुर. वरोंक-वरोर पगां आसि वरोंक-वरोर हयसाकोटा आंतुर.

11 बचटुरो आबद्दम कबुरतोर, पेनदा कबुरतोरुकुम इंचेके वांतुर, लोकुल्लुकुंक सेड्डा हरिं हुपसंतुर.

12 पापालुकु एक्को आसि वेल्ले मंदिता पावरम इंका तक्को आसेक दांता.

13 गानि बोर अय्ते पेनदापोर्रीटा विस्वासमते आकिरदाका निल्लिस मनंतोर, ओनके मुक्ति दोर्कार.

14 पेनदा राज्येमता बारेमता बेसता कबुर दुनियाता अन्नि देसेलुकुना लोकुल्लुकुंक उंदि गवाइ इंचि तेळियागोटसि वेहतस्के, इद दुनियाता आकिर आयार.”

15 दानिएल पोरोलता पेनदा कबुरतोर वेहताप, बोरे हयसवसोटा नासडेम कियाना वस्तु, गुळि लोप्पो पवित्र जेगाते नित्तिसि मत्तद मिमेट ह्ळकिर (हद्दवानोर इदुन अर्तम कीकुंटु.)

16 अस्के बोर अय्ते यहुदिया एरियाते मंतुरो, ओर गुट्टनहेके वित्तिर,

17 बोर अय्ते लोतपोर्री मंतोर, सामान पीसि वायालय लोप्पो होळियानायो,

- 18 बोर अयते नेलिने कबळ कीसेक मंतोर, कपडिं पीसि वायालय मल्लिस लोन होनानायो.
 19 अव रोजकुने पीटे मल्ला मुर्ताहकुंक आनि सिन्ने मर्तल्लुहकुंक वेल्लेन तकलिप वांता.
 20 पीनि कालमते अल्लेने नोमकेम रोजुने ई वित्तना वेला वायामन्नि इंचि मिमेट पारतना कीम्टु.
 21 बारित्ते अद वेलाते इसोटा तकलिप वायार गदा, दुनिया पुट्टस्कैटाल अयते इदवेरादाका, बस्केन वाया हिल्ले. मुन्नेगुडा बस्केन वायो.
 22 ओक्कला पेन अव रोजकुन तक्को क्रियाकोटा मंचि मत्ते, बोरे पिसाकोन्नेर. गानि पेर्कुत्ता लोकुल्लुकुनाहाटी पेन अव रोजकुन तक्को कियार.
 23 अद वेलाते ओक्कला बोरन्ना मीकुन किरिस्तु इगे मंतोर, अगा मंतोर इनानयते, मिमेट ओर्कुन नम्मुमट.
 24 बारित्ते अव रोजकुने आबद्दम किरिस्तुल्क, पेनदा आबद्दम कबुरतोर वायानुर. आनि कुदुरते पेन पेर्कुत्ता लोकुल्लुकुन पसांचलय पेद्दा-पेद्दा चिन्हां, इचंन्रमता कबाहक कीसि हुप्सानुर.
 25 हुळाट! नना अयते इव पोल्ले मीक मुन्नेने वेहचीतन.
 26 दानहाटी “किरिस्तु केडाते मंतोर” इंचि मीकु बोरन्ना वेहानयते, मिमेट अगा होनमट. इंका “किरिस्तु लोप्पोटा अरति मंतोर” इंचि मीकु वेहानयते मिमेट ओनापोरो विस्वासम इरमट.
 27 बारित्ते बल्हा अयते पोळ्द पेयसनाहेके मेसति दाना वेलगु पोळ्द अरानगाहक दिसंता, मनकना रूपमते पुटतोन नना वायानस्केगुडा अल्ले आयार.
 28 अल्लेने बगा अयते पीनगु मनंता अग्गेन गद्दलि जमा आंतां.
 29 आ रोजकुना तकलिपकु मारता मारुडे,
 “पोळ्दुंक हीकट मुच्चका वायार, वेळसि वेलगु हियाकोटा आयार,
 मब्बुनाल सुक्कां हिळु अरानुं, मब्बुने मनना अन्नि सक्तिन कदलिचमळ जर्गता.”☆
 30 पजा मनकना रूपमते पुटतोन नना वायना चिन्ह स्वर्गमते दिस्सार, अस्के बूमि पोरोटोर अन्नि जातिना लोकुल्लक वेल्ले दुक्कम क्रियानुर. पजा मनकना रूपमते पुटतोन नना पेद्दा महिमा आनि ताकततोनि मब्बु तेर्पेनपोरो उद्दिदिसि वायानेके लोकुल्लक हळानुर.
 31 अस्के तूताकोमता पेद्दा आवाजुनतोनि, नना नावा दूतन बूमिपोरो लोहांतन. आ दूतां बूमिपोरो नालुं मूलानाल, मब्बुना ई कोस्साताल अयते आ कोस्सादाका नना पेर्कुत्ता लोकुल्लुकुन जमा कींतां.
 32 इंदके अंजिर मराताल उंदि पोल्ले करियट. अंजिर मराता कोम्मांक इग्गुर बस्के अयते वांता, अस्के एद्दि कालम दग्गेरा एळा इंचि मिमेट एरपाट कीतिर.
 33 इल्हा इव अन्नि गटनां जर्गनद हळसि, ओर दग्गेरा मंतोर, गल्मातगेन मंतोर इंचि मिमेट एरपाट कीतिर.
 34 नना मीकु निजम वेहांतन, बदवेरदाका अयते इव अन्नि पोल्ले पुरागा आयोंगो, अदवेरदाका ई पीळि मुळगो.
 35 इद बूमि, मब्बु नासडेम आसि होंदार, गानि नावा पोल्ले बस्केने नासडेम आयों.
 36 अद रोजु, अद गळिया बोर्के तेळियो. स्वर्गमता दूतांक आयि, मनकना रूपमते पुटतोन नाकु आयि बोर्के तेळियो. गानि सिराप पेनबाबांके तेळियंता.
 37 नोहाना रोजकुने बल्हा जर्गतनो, मनकना रूपमते पुटतोन नना वायानस्केगुडा अल्ले जर्गार.
 38 कम्मुड वासि नोहाल डोंगाते नेंगनादाका लोकुल्लक तिंचेके-उंचेके मरमिं कीसेके, आसेके मत्तुर.
 39 कम्मुड वासि ओर्कुन तंचि ओयनदाका ओर्कु तेळिया हिल्ले.
 मनकना रूपमते पुटतोन नना वायानस्केगुडा अल्ले जर्गार.
 40 आ वेलाते नेदे इव्वुर कबळ कीसेके मनानुर, ओराव्टेताल वरोन तेहाकुंचि ओयमळ जर्गता, इंकावरोन अग्गेन होळसमळ जर्गता.
 41 रोंडु मुर्ताहक गट्टका नोरसेक मनंतां, उंदिदितुन ओयमळ जर्गता, इंकुंदिदितुन अग्गेन होळसमळ जर्गता.
 42 बद रोजु मीवा सामि वायानुर अद मीकु एरपाट हिल्ले, अदुनहाटी मिमेट तेल्चिते मंटु.
 43 गानि मिमेट उंदि पोल्ले बेस तेळियागोट्टुकुंटु. अद बतल इत्ते, दोंगल नर्कटा बद वेलाक वांतोर इंचि ओक्कला लोता मालकुंक मुन्नेन तेळियासि मत्ते ओर तेल्चितेन मनांतोर आनि आ दोंगल लोते होळिया हिय्योर.
 44 अल्लेने मिमेट इनकुनवा वेलाते मनकना रूपमते पुटतोन नना वांतन. अदुनहाटी मिमेटगुडा बेस तयारते मंटु.

तेल्चि मल्ला सेवक बोर?
 (लुकाल 12:41-48)

45-46 मालक हिल्वस्के ओनगा कबळ क्रियानोर्कुंक वेलापोरो गाटो-जावा दोस्सालय, वरोर बेस तेल्चिगल्लोड, विस्वासमलायक सेवक मालाकुंक गावाले. अयते असोटा सेवक बोर मंतोर? बोर सेवक अयते, मालक मल्लिस वातस्के वेहता कबळ बरोबर कीसेक मनांतोर, ओरे सेवक बेस आसिर्वाद दोर्कुंतोर आंद.

47 नना मीक निजम वेहांतन, मालक आ सेवाकुन ओना पूरा आस्ति-पास्तिनपोरो अदिकारि इंचि इरंतोर.

48 गानि ओक्कला आ दुस्ट सेवक ओना मनसुने, “नावा मालक वायालय अयते इंका आल्लेमे मंता” इनकुंचि,

- 49 ओना दंटाता सेवाकुल्लुकुन तन्नुड-गुदुदुड कियमळ, इरगा तिचि-उंचि बदमासिं कियमळ सुस्व कीतोर इनकुन!
 50 अस्के आ सेवक विचारमगुडा किय्योर असोटा रोजुने, गळियाते ओना मालक वायानुर.
 51 वासि, आ सेवाकुंक पेद्दा सिक्सा हीसि, ओन डोगि लोक्कुने कल्पानुर. अगा सिराप अळमळ, पल्लु कोर्कमळे मनंता.

25

पदि लेय्यना वेसुड

- 1 येसु मर्रा उंदि वेसुड वेहालय सुस्व कीतोर. ओर इत्तोर, स्वर्ग राज्ये मारेमते नना उंदि वेसुड वेहंतन केंजट. पदि लेय्यां कंदिलि पीसि वरोर मरमिना पेडांक कलियालय होत्तां.
 2 अवनगटाल हेय्युं तेल्वि हिल्वव मत्तां, हेय्युं बारे तेल्वितव मत्तां.
 3 तेल्वि हिल्वा लेय्यां कंदिलि पीसि अय्ते होत्तां, गानि अवुनतोनि निय ओया हिल्लें.
 4 तेल्विता लेय्यां बारे कंदिलिनतोनि डब्बाने निय इंका पीसि होत्तां.
 5 मरमिना पेडल वायालय आलसेम आताहेंके, अव निद्र वासि मीडतां.
 6 नड्डुम नर्का, “मरमिना पेडल वासेक मंतोर, ओन्क कलियालय दट,” इंचि लोल्लि केंजावाता.
 7 अस्केने अव पदि लेय्यां बिराना तेदसि, कंदिलि तयार कीतां.
 8 तेल्वि हिल्वा लेय्यां, तेल्विता लेय्यान, “मिहगटा निय इच्चुर माकु हीम्ट, मावा कंदिलि पिरालय आतां,” इंचि इत्तां.
 9 गानि, “इद निय बोनकु इंचि बोनकु हालंता? इत्ते माकु इंका हालो, मीकु इंका हालो, अल्हा आयो गानि, मिमेट दुकानमते होंचि मीवाहाटीं निय अस्सि तट्टु,” इंचि तेल्विता लेय्यां इत्तां.
 10 अव निय अस्सालय दुकानमते होत्तस्के मरमिन पेडल एवतोर. तयारते मत्तव लेय्यां मरमिन पेडनतोनि मरमिं कु होत्तां, पज्जो तल्पु वाटसीतुर.
 11 गडसेम मत्तारित्ते, दुकानमते होत्तव हेय्युं तेल्वि हिल्वा लेय्यां मरमिना लोन वासि, “सामि-सामि, मोमोट वातोम, तल्पु तेंडा!” इंचि केयालय दल्गतां.
 12 अस्के मरमिन पेडल, “मिमेट बोर आंदिर? नना निजम वेहचंतन, मीकुन बिल्लुकुल एरपाट किय्योन,” इंचि लोपोटाल अवुन इत्तोर.
 13 पजा येसु सिस्सुल्लुकुन इल्हा इत्तोर. “मनकना रूपमते पुटतोन नना वायानदगुडा इल्हे मनंता. अद रोजुन आनि वेलातुन मिमेट बिल्लुकुल एरपाट किय्यिर. अदुनहाटीं मिमेट तेल्विते मंटु,” इत्तोर.

मुव्वुर सेवाकुल्लुकुना वेसुडि (लूकाल 19:11-27)

- 14 पजा येसु इंकुंदि वेसुडि वेहतोर. स्वर्ग राज्ये मारे मनकनलेसीं मंता, बोर अय्ते, पय्नेम होनाका मुन्ने ओना दासुल्लुकुन केय्सि ओनगा मत्ता दनम ओर्कु अप्पजेपतोर.
 15 ओर ओरा उसारतनमतुन हळसि, वरोंक बंगारमते निडसि मत्ता हेय्युं मुल्लें हीतोर, वरोंक रोंडु मुल्लें हीतोर. इंकावरोंक उंदि मुल्ले हीतोर. पजा ओर पय्नेम होत्तोर.
 16 बोनकु अय्ते हेय्युं मुल्लें दोर्कतंगो ओर बिराने अव कोत्तन दंदाते दोस्सि, इंका हेय्युं मुल्लेना कल्दार्क संपलिचतोर.
 17 अल्हेने रोंडु मुल्लें दोर्कतोर इंका दंदा कीसि, रोंडु मुल्लें एक्को संपलिचतोर.
 18 गानि उंदि मुल्ले दोर्कतोर बारे, लोन ओसि पोक्का तव्वि ओना मालक हीता मुल्लेतुन मक्किचि इरतोर.
 19 वेल्लेन रोजकु आतारित्ते आ दासुल्लुकुना मालक मल्लि वासि, ओर हीता दनमता हिसाब तल्कतोर.
 20 अस्के बोनकु हेय्युं मुल्लें दोर्किस मत्तां, ओर इंका एक्को हेय्युं मुल्लें तच्चि, “मालक, निमे नाकु बंगारमते निडसि मत्ता हेय्युं मुल्लें हीसि मत्तिन. हळा, नना अव कोत्तना दंदा कीसि, इंका हेय्युं मुल्लें संपलिचतन,” इंचि इत्तोर.
 21 अस्के मालक कूस आसि, “वा रे वा, निमे बेस विस्वासमलायक दासुन आंदिन. इच्चोटा पोल्लेतगा निमे विस्वासमलायक मत्तिन, अदुनहाटीं नना नीकु वेल्लेटोरपोरों अदिकारम हीतन. निमे लोप्पो होंचि मालकुनतोनि कूळसि कुसिते मन,” इत्तोर.
 22 पजा बोनकु अय्ते रोंडु मुल्लें दोर्किस मत्तां, ओरगुडा मालकनगा वासि, “मालक, निमे नाकु बंगारमते निडसि मत्ता रोंडु मुल्लें हीसि मत्तिन. हळा, अव कोत्तना दंदा कीसि, इंका रोंडु मुल्लें संपलिचतन,” इंचि इत्तोर.
 23 अस्के मालक कूस आसि, “वा रे वा, निमे बेस विस्वासमलायक दासुन आंदिन. इच्चोटा पोल्लेतगा निमे विस्वासमलायक मत्तिन, अदुनहाटीं नना नीकु वेल्लेटोरपोरों अदिकारम हीतन. निमे लोप्पो होंचि मालकुनतोनि कूळसि कुसिते मन,” इत्तोर.
 24 पजा उंदि मुल्ले दोर्कतोर मालकुनगा वासि, “मालक, निमे कळक मनकन आंदिन, निमे वीतवगा कोय्यंतिन, सल्लुवगा जमा कीतिन इंचि नाकु एरपाट.
 25 अदुनहाटीं नना वेरियसि निमे हीता मुल्लेतुन ओसि पोक्का तव्वि मक्किचि इरतन. इदे, नीवा मुल्ले नीकु वापस हीसंतन,” इंचि इत्तोर.
 26 गानि ओना मालक ओन्क इल्हा जवाब हीतोर. “निमे दुस्ट, लंडु दासुन आंदिन. नना वीतवगा कोय्यानोन, सल्लुवगा जमा किय्यानोन इंचि नीकु एरपाटे मत्ता.

- 27 अय्ते निमे नावा दनमतुन बोर्कन्ना वड्डिक हिय्या मल्लिन. नना मल्लिस वातस्के नावा दनमतुन वड्डितोनि एक्कुचि मन्नेन,” इत्तोर.
 28 पजा मालक ओना दासुल्लुकुन केय्सि, “मिमेट ओनागटाल मुल्ले एतसि, पदि मुल्ले मत्तोन्गा हीम्टु.
 29 बारित्ते, बोनगा अय्ते पेनदा पोल्लेन तेल्लिचकुनना बुद्धिदं मंता, पेन ओन्क इका हीता. अस्के ओन्क वेल्लेन आंता. गानि बोनगा पेनदा पोल्लेन तेल्लिचकुनना बुद्धिदं हिल्ले, ओन्गा मत्ता बुद्धिदतुनगुडा पेन वापस एतकुन्नार.
 30 अय्ते ई कबळ्ळक ओज्जुवा दासुन पलाते हीकटते पोहचीम्ट. अगा मननोर अळसेके, वरगोयसेके, किटुर-किटुर पल्लुकु कोर्कसेक मनांतुर,” इंचि मालक वेहतोर.

आकिरता न्यायम

- 31 मर्रा येसु इल्हा वळकालय दल्लुगुतोर. बस्के अय्ते मनकना रूपमते पुटतोन् नना नावा महिमाते राजाल आसि अन्नि दूतनतोनि वांतन, अस्के नावा अदिकारमते राजगदुदेपोर्री उदुदंतन.
 32 पजा नावा मुन्ने दुनियाता अन्नि देसेल्लुकुना लोकुल्लक जमा आयनुर. अस्के गोल्लल एटिनाल गोर्री बल्हा वेरे कीतोर, अल्हेने लोकुल्लुकुन नना वरोन्गाटाल वरोन् वेरे कीतन.
 33 अल्हा कीसि नना गोर्रीन बारे तिना बाजुंक, एटिन बारे डेमा बाजुंक कीतन.
 34 अस्के राजाल तिना बाजुनोर्कुन इनानुर, “वट्टु, ना बाबाना आसिर्वाद मीकु दोर्कुता, मीवाहाटीं दुनिया पुटतस्केटाले राज्येम तयार कीसि मंता, दान एतट.
 35 इद राज्येम मीवादे आंदु, बारित्ते नना कर्बुने मत्तस्के नाकु मिमेट तिनालय हीतिर, नाकु दूपातस्के उनालय एर हीतिर. नना मीकु एरपाट हिलाकुना गानि मीवा लोहकुने मनालय जेगा हीतिर.
 36 नाकु केर्रालय कपडिं हिल्लवस्के मिमेट नाकु कपडिं हीतिर, नना बिमारते मत्तस्के मिमेट नावा सेवा कीतिर. नना जेलने मत्तस्के मिमेट नाकु कलियालय वातिर.”
 37 अस्के तिना बाजुंक मत्ता नीतिमंतुल्लक ओन् इनानुर, “सामि, नीकु कर्वेस्तद हळसि बस्के तिनालय हीतोम? नीकु दूपातद हळसि बस्के एर उनालय हीतोम?
 38 निमे एरपाट हिलाकुना गानि बस्के नीकुन लोन ओसि मनालय जेगा हीतोम? नीकु कपडिं हिल्लवद हळसि बस्के कपडिं केर्रालय हीतोम?
 39 निमे बिमार मत्तस्के, जेलते मत्तस्के बस्के मोमोट नीकु कलियालय वातोम?”
 40 अस्के राजाल, “नना मीकु निजम वेहासेक मंतन, इगे मत्ता नावा कदर हिल्लुवा विस्वासुल्लुकुनाल बोन वरोन् बेस हळिना, नाकुन बेस हळतापे,” इंचि ओर्कुन इनानुर.
 41 पजा ओना डेमा बाजुंक मत्तोर्कुन, “सापनेमते मनानोरिटा, नहागटाल पेय्सि होंट. देय्याल्लुकुना मुक्यानाहाटीं आनि अबुना दूतनहाटीं तयार कीता बस्केळ्ळक पोत्सेके मनना तडमिते होंचि अर्रट.
 42 बारित्ते नना कर्बुने मत्तस्के, नाकु तिनालय तिडि हिय्या हिल्लिर. नाकु दूपातस्के उनालय एर हिय्या हिल्लिर.
 43 नना एरपाट हिल्लवोन लेह्का मत्तस्के नाकु मीवा लोहकुने जेगा हिय्या हिल्लिर. नाकु कपडिं हिल्लवस्के मिमेट केर्रालय कपडिं हिय्या हिल्लिर, नना बिमार मत्तस्के, जेलने मत्तस्के मिमेट नाकु कलियालय इका वाया हिल्लिर, दानहाटीं इदे मीवा सिक्सा आंद,” इंचि सामि इनानुर.
 44 अस्के ओर, “सामि, नीकुन मोमोट, कर्वेस्सि मत्तस्के, दूपातस्के, एरपाट कियवस्के, कपडिं हिल्लवस्के, बिमार मत्तस्के आनि जेलने मत्तस्के हळसि बस्के सेवा किया हिल्लोम?” इंचि इनानुर.
 45 अस्के राजाल ओर्कुन, “नना मीकु निजम वेहासेक मंतन, इगे मत्ता नावा कदर हिल्लुवा विस्वासुल्लुकुनाल बोन वरोन्गुडा बेस हळकोटे, अस्के नाकुनगुडा बेस हळवापे!” इंचि इनानुर.
 46 पजा “ई सेड्डा लोकुल्लुकुंक मारवा सिक्सा आंता. नीतिमंतुल्लुकुंक बारे बस्केळ्ळक पिस्सना पिस्वर दोर्कता,” इंचि येसु इत्तोर.

26

यहुदि पेद्दाल्लक येसुन हळ्ळकाना उपायाल्लक कीतुर

(मरकुस 14:1-2; लूकाल 22:1-2; योहान 11:45-53)

- 1-2 इव अन्नि पोल्ले वेहमळ आतारित्ते येसु सिस्थुल्लुकुन इल्हा इत्तोर. “नाडि आयो मन्ने दाटसि होन्ना पंडुगु* मंता इंचि मीकु एरपाटे. मनकना रूपमते पुटतोन् नाकुन कूसुनपोर्री वेलाड वाटालय, पगातोरा कय्दे पीसि हियमळ जर्गता,” इत्तोर.
 3 अस्के कयपा इनना पेद्दा पेर्माना मिद्देते, पेद्दा पेर्मालोर आनि यहुदिरा पेद्दाल्लक जमा आतुर.
 4 येसुन सप्पुडदाका दोर्कापीसि हळ्ळकोम, इंचि ओर मीटिंगते उपायम कीतुर.
 5 गानि “पंडुगु रोजुकुना लोप्पो हळ्ळक मन्नि, अल्हा कीते लोकुल्लक गडबड किया परांतुर,” इंचि इन्कुत्तुर.

* 26:1-2 दाटसि होन्ना पंडुगु इजिप्त देसेमता गुलामगिरिताल यहुदि लोकुल्लुकुन पेन पेचाहचि तत्ता मतिते, इद पंडुगु कीतुर.

उंदि मुरतळ येसुनपोर्रो अत्तर निय वळियता
(मरकुस 14:3-11; योहान 12:1-8)

6 पजा येसु बेतानिया इनना नाटे होंचि, कुस्टरोगम आसि मत्ता सिमोनिना लोन आगतोर.

7 अस्के उंदि मुरतळ वेल्ले दराता अत्तर निय उंदि गुर्गिते पीसि येसुनगा वाता. ओर गाटो तिनालय उद्दिदिसि मत्तस्के अद मुरतळ आ नियदुन ओना तल्ला पोर्रोटाल वळियता.

8 अदुन हळसि अगा मत्ता सिस्वुल्लुकुंक होंग वासि, “ई अत्तर नियदुन वट्टिदे बारि पोचीतिन?

9 इद अत्तर निय वेल्ले दराते अम्मिसि अव कोत्तां गरिबोर्कुंक हिया वायवड गदा!” इंचि इत्तोर.

10 येसु ओर वळकानदुन एरपाट कीसि इल्हा इत्तोर. “दान बारिक तकलिप कीसतिर? अद नावाहाटी बेसता कबळे कीता.

11 गरिबोर्क अय्ते बस्केळक मिहगा मनांतुर, गानि नना बस्केळक मिहगा मनानोन आयोन.

12 नावा हामुर एत्ता इंचि नावा मेंदुल्लक अत्तर निय होकताप, अद इल्हा कीता.†

13 नना मीक निजम वेहांतन, पूरा दुनियाते, बगा-बगा पेनदा बेसता कबुर वेहमळ जर्गता, अगा ई मुरतटुन, आनि इद कीता कबळतुन मति कियानुर,” इत्तोर.

14 पजा, पन्नेड सिस्वुल्लुकुनाल वरोर इस्कारियोत यहदल मत्तोर. ओर पेद्दा पेर्मांलोरगा होत्तोर.

15 होंचि, “नना मीक येसुन पीसि हीते, मिमेट नाकु बतल हीतिर?” इंचि इत्तोर. अस्के ओर ओन्क मुप्पे एंडि रूपें हीतुर.

16 अस्केटाल ओर येसुन पीसि हियालय मोका हळसेक मत्तोर.

येसुना आकिरता बोजनम

(मरकुस 14:12-26; लूकाल 22:7-23; योहान 13:21-30)

17 पुल्लगा आयवा पिंडिता हारिना पंडुगुना मोदाटा रोजु,‡ सिस्वुल्लुकु येसुनगा वासि, “गुरु, दाटसि होनना पंडुगुना गाटो तिनना तयारि बगा कीकोम इंचि नीवा मनसु मंता?” इंचि इत्तोर.

18 अस्के येसु ओर्कुन इल्हा इत्तोर. “सहरते पलाना मनकानगा होंचि, नावा आकिर वेला दग्गेरा एत्ता. नीवा लोन नना नावा सिस्वुल्लुकुनतोनि दाटसि होनना पंडुगु कियालय वांतन इंचि मावा गुरु वेहतोर इल्हा ओन्क वेहट.” इत्तोर.

19 अस्के येसु वेहतापे सिस्वुल्लुकु होंचि, दाटसि होनना पंडुगुना गाटो तयार कीतुर.

20 पोळ्द होत्तारिते, येसु ओना पन्नेडु सिस्वुल्लुकुनतोनि गाटो तिनालय उदतोर.

21 तिननेके येसु ओर्कुन, “हीके केंजट नना निजम वेहचंतन, मिहगटाल वरोर नाकुन पगातोर कय्दे पीसि हीतोर.” इंचि इत्तोर.

22 इदुन केंजसि ओर्कु वेल्लेन दुक्कम आता. अदुनहाटी, “ओन नना अय्ते आयोन गदा सामि?” इंचि वरोन पज्जो वरोर येसुन पूसकीतुर.

23 अस्के, “नावातोनि गिन्नेते कलियसि तिनानोरे नाकुन पीसि हियनुर. ☆

24 दर्मसास्त्रमते रासि मत्ताप, मनकना रूपमते पुटतोन नना अय्ते दांतने. गानि बोनाहेंदाल अय्ते नाकुन पीसि हियमळ जर्गता, आ मनकल पुट्टाकोटेन बेस आसि मनवळ,” इत्तोर.

25 अस्के येसुन पीसि हियना यहदल, “ओन नना अय्ते आयोन गदा गुरु?” इंचि पूसकीतस्के, “निमे इत्तिन अल्हेने!” इंचि येसु इत्तोर.

26 गडसेम आतारित्ते ओर तिननेके, येसु हारितुन पीसि पेनदुक दन्यवाद कीतोर. पजा हारितुन तुकडां कीसि ओना सिस्वुल्लुकुंक हीसेक. “तिंदु, इद नावा मेंदुल आंद,” इंचि इत्तोर.

27 इंका ओर अंगुर पंडिना पानकमता गिलास कय्दे पीसि, पेनदुक दन्यवाद कीतोर. पजा ओर्कु हीसि, “मिमेट अंतोर दीन उंटु.

28 बारित्ते इद पूना करारता नेत्तुर आंदु, वेल्लेटुर लोक्लुकुना पापालक मापि कियालय पोंगसेक मंता.

29 नना मीक वेहांतन, नावा बाबाना राज्यमते पूना तरिकाते ई अंगुर पानकम उनाना रोजुनदाका, मर्ग बस्केने अंगुर पानकम उन्नोन,” इंचि येसु इत्तोर.

30 पजा ओर, पेनदा स्तुति कियाना उंदि पाटा पारसि, जय्तुन मराकुना गुट्टापोर्रो होत्तुर.

पत्रु तप्पिचुकुनना बारेमते येसु मुन्नेने वेहतोर

(मरकुस 14:27-31; लूकाल 22:31-34; योहान 13:36-38)

31 अस्के येसु ओर्कुन इल्हा इत्तोर. “इय्याला नर्कळक मिमेट अंतोर नाकुन होळसि वित्ततिर, बारित्ते, गौरे कोहानोन नना हक्कंतन, मंदता गौरे बेंदव-हेके पायसि वित्ततां. ☆ इंचि दर्मसास्त्रमते रासि मंता.

32 गानि नना हासि, मर्ग जीवाते तेदतंका, मीकन्ना मुन्ने गालिल एरियाते दांतन,” इत्तोर.

33 अस्के पत्रु, “अंतोर नीकुन होळसि होनिनागानि, नना नीकुन बस्केने होळसि होन्नोन गुरु,” इंचि येसुन इत्तोर.

† 26:12 अद कालमते यहुदि लोक्लुकु बोरन्ना हाते, हातोना पीनगुंकु बेस गब्बु वायना वस्तुकुन पावडर कीसि होकुंदुर. इद ओरा रिवाज मत्ता. ‡ 26:17 पुल्लगा आयवा पिंडिता हारिना पंडुगुना मोदाटा रोजु पुल्लगा आयवा हारिना पंडुगुना मोदाटा रोजु इत्ते दाटसि होनना पंडुगु. अदे रोजु ओर दाटसि होनना पंडुगुना बोजनाल्लुकुनाहाटी तयारि कीतुर. ☆ 26:23 बजन सहिता 41:9 ☆ 26:31 जकर्याह 13:7

34 “नना नीकु निजम वेहचंतन, इय्याला नर्कडकु गोगोड कूसाका मुन्ने निमे मूड मल्कां नाकुन एरपाट किय्योन इंतिन,” इंचि येसु पत्रुन इत्तोर.

35 गानि, “ओक्कला नाकु नीतोनि हामुर वायिना बेसे, नीकुन नना एरपाट किय्योन इंचि बस्केने इन्नोन,” इंचि पत्रु इत्तोर. अंटोर सिस्स्युल्कगुडा अल्हे इत्तुर.

गेतसेमनि जेगातगा येसु पारतना कीतोर
(मरकुस 14:32-42; लूकाल 22:39-46)

36 येसु, ओना सिस्स्युल्कुनतोनि गेतसेमनि इनना जेगातगा एवतस्के, “नना इच्चुर मुन्ने होंचि पारतना कीसि वायनदाका मिमेट इग्गेने उद्दिदिसि मंटु,” इंचि इत्तोर.

37 पजा पत्रुन आनि जब्दिना इच्चुर मर्कुन पीसि ओनतोनि ओतोर. अगा ओर वेल्ले दुक्कमते सिम्मरा आतोर.

38 अस्के ओर्कुन, “नावा जीवा दांता बारे इत्ताप नाक वेल्ले दुक्कम आसेक मंता. मिमेट नातोनि इग्गेने आगसि तेल्विते मंटु,” इंचि इत्तोर.

39 इच्चुर मुन्ने होंचि बोकबोर्ले अर्सि ओर इल्हा पारतना किय्यालय दल्युतोर, “ए बाबा, ओक्कला कुदुरते, नावा इद गोसा तप्पिसि होन्नि, गानि इद नावा विचारम मत्ताप आयो, नीवा विचारम मत्तापे आयि.”

40 पजा सिस्स्युल्कुनगा वासि हळते ओर निद्रा होंचि मत्तुर. अस्के येसु पत्रुन इल्हा इत्तोर. “मिमेट उंदि गंटामेडगुडा नातोनि तेल्विते मंदा पर्रिरा?

41 मिमेट पट्टुने अर्काकोटा मननाहाटी तेल्विते मंचि, पारतना कीसेके मंटु. नना वेहताप किय्यालय मीवा आत्मा तयार मंता, गानि मीवा मेंदुल कमजोर मंता,” इत्तोर.

42 येसु मंसदि मल्का होंचि, “नावा बाबा, नना इदुन उन्ने पीता इनानयते, नीवा विचारमे पूरा आयि,” इंचि पारतना कीतोर.

43 येसु मर्रा वासि हळतस्के, ओर मंचि निद्रते मत्तुर.

44 ओर्कुन अग्गेन होळसि येसु मर्रा पारतना किय्यालय होत्तोर. अस्केगुडा मुन्ने कीतापे पारतना कीतोर.

45 पजा सिस्स्युल्कुनगा वासि ओर्कुन इल्हा इत्तोर. “मिमेट इंदकेगुडा मीडसेक, आराम कीसेके मंतरा? हुळ्ळट, मनकना रूपमते पुटतोनि नाकुन पापिर्कुना कयदे पीसि हियना वेला एव्ता.

46 तेदाट, मनम दाकोम. नाकुन पीसि हियानोर दग्गेरेन एव्तेर,” इत्तोर.

येसुन पीतुर

(मरकुस 14:43-50; लूकाल 22:47-53; योहान 18:3-12)

47 येसु इव पोल्ले इंचेकेने मत्तोर, अच्चोटेन पन्नेडु सिस्स्युल्कुना लोप्पोटोर वरोर यहदल इनानोर अगा वातोर. ओनातोनि पेद्दा पेर्मालोर आनि यहदि पेद्दाल्क लोहता, गुळि कावेल कियानोरा गेंग कसेहक, गुत्पां, पीसि वातुर.

48 येसुन पीसि हियानोर, “नना बोन अयते बुरीतनो, ओरे येसु आंदुर, ओन दोर्का पीटु,” इंचि मुन्नेन ओर्क उंदि चिन्ह वेह्चि मत्तोर.

49 पजा यहदल बिराना येसुनगा होंचि, “जोहार गुरु” इंचि ओन बुरतोर.

50 अस्के येसु, “ना दंटातोना, निमे बद कबळ्ळक वातिन अद कीम,” इंचि इत्तस्के, अगा मत्ता मत्तोर मुन्नेळ्ळक वासि येसुनपोर्री कय वाट्टिसि ओन दोर्का पीतुर.

51 अच्चोटेन येसुनतोनि मत्तोरव्टे वरोनगा कसेर मत्ता, ओर दान तेंडसि पेद्दा पेर्माना वरोर दासुन हळ्ळालय कसेरते हीतोर गानि, अद कसेर सिराप ओना केवदुन नेमाहकुंचि होत्ता.

52 अस्के येसु ओन, “नीवा कसेर नीवा नडिके मन्नि, बारित्ते कसेर पियानोर कसेरतेन हांतोर.

53 नना नावा बाबान तल्किस मत्ते, उंदि गेंगुने वेय्कुना दूतां मनना पन्नेडु गेंगुल्कुंकन्ना बच्चुंगो वेय्कुना पेनदा दूतन नाकुन पिसागोटालय लोहचि मन्नेर, इद नीकु तेळियोना?

54 इल्हा आते दर्मसास्त्रमते नावा बारेमते रासता पोल्ले बल्हा निजम आयनुं? अव्टे इल्हा आयमळ गावाले, इंचि रासतद मंता,” इंचि येसु इत्तोर.

55 अस्के येसु मंदितुन इल्हा इत्तोर. “वरोन दोंगन पिय्यालय वाताप मिमेट कसेहक, गुत्पां पीसि नाकुन पिय्यालय वातिरा? नना अयते रोजे गुळिते कराहसेक मीतोनि मनुंदुन, अस्के नाकुन पिया हिल्लिर.

56 गानि दर्मसास्त्रमते नावा बारेमते पेनदा कबुरतोर रासता पोल्ले पूरा आयाना इंचि इल्हा जर्गता,” इत्तोर. पजा ओना सिस्स्युल्क अंटोर ओन होळसि तेगा विततुर.

पेद्दाल्कुना मुन्ने येसुना जवाब

(मरकुस 14:53-65; लूकाल 22:54-55; 22:63-71; योहान 18:13-14; 18:19-24)

57 लोकुल्क येसुन पीसि कयपा इनना पेद्दा पेर्मानगा ओतुर. अगा दर्मसास्त्रम कराहना गुरुल्क आनि यहदि पेद्दाल्क जमा आसि मत्तुर.

58 गानि पत्रु लक्कुटाले येसुना पज्जो-पज्जो पेद्दा पेर्मांना दारादाका होत्तोर. अगा बतल आयार इंचि ह्ळालय, दाराते होंचि कावेल कियानोरतोनि उदतोर.

59 पेद्दा पेर्मांलोर आनि पंचादितोर अंतोर येसुक हामुरता सिक्सा हियानाहाटी ओना विरोदमते तप्पुड गवाइ पहकतुर.

60-61 गानि बच्चुटुरो वासि ओना विरोदमते आबद्दम गवाइ हिथ्यिना, ओर्कु उंदिगुडा तप्पु दोर्काहिल्ले. आकिरते इव्वुर वासि, “पेनदा गुळितुन कूलाहिचि दान मूड रोजकुने मर्रा दोहा परांतन इंचि ओर इत्तोर,” इसोटा गवाइ हीतुर.

62 अस्के पेद्दा पेर्मल तेदसि, “ईर नीकु विरोदमते बल्हा गवाइ हीसंतुर ह्ळा, निमे बतले जवाब हिथ्यिना?” इंचि येसुन इत्तोर.

63 गानि येसु चुपचाप मत्तोर. अस्के पेद्दा पेर्मल येसुन इल्हा इत्तोर. “जीवाते मनना पेनदा ओट्टु तिचि नीकुन पूसकीसंतन, ओक्कला निमे पेनदा मर्रि, किरिस्तुन आते माक वेहा,” इत्तोर.

64 अस्के येसु ओन इल्हा इत्तोर. “निमे इत्तिन अद निजमे! गानि नना मीकु वेहांतन, इंका मुन्ने मिमेट मनकना रूपमते पुटतोन नाकुन ताकतवर पेनदा तिना बाजूक उद्विदसि मत्तद आनि मब्बु तेर्पेनपोर्रो उद्विदसि वायानेके ह्ळकिर,” इत्तोर.

65 अस्के, पेद्दा पेर्मल होंगुने ओना कपडिं हराहकुंचि, “ईर पेनदा अपमानम कीतोर. मनाकु इंका बतल गवाइ गावाले? ओना पोल्ले मिमेट केंजतिरे गदा!

66 अय्ते मिमेट बतल इतिर?” अस्के यहुदिल्क, “ओर हामुर सिक्सालायक मंतोर,” इंचि इत्तुर.

67 अस्के इच्चुर लोकुल्क येसुना तोड्डि पोरो उस्किसि, ओन तंचि-गुद्विदसि,

68 “ए किरिस्तु, नीकुन बोर तंतुर, माकु बविस्थवानि वेहा,” इंचि इत्तुर.

पत्रु येसुन एरपाट किय्योन इत्तोर

(मरकुस 14:66-72; लूकाल 22:56-62; योहान 18:15-18; 18:25-27)

69 हीके पत्रु पेद्दा पेर्मांना दारातेने उदिस मत्तोर, अस्के उंदि दासि ओनगा वासि, “गालिल एरियाता येसुनतोनि निमे इंका मत्तिन गदा?” इंचि इत्ता.

70 अस्के पत्रु “निमे बतल इंचांतिनो नाकु तेळिया हिल्ले!” इंचि ओर अगा मत्तोर अंतोर मुन्नेन इत्तोर.

71 आयंका ओर दाराताल पेय्मि गलमातगाहकु होत्तोर. अस्के इंकुंदि दासि ओन ह्ळसि, “ईर इंका नासरेत नाटेना येसुनतोनि मत्तोर,” इंचि अगा मत्तोर्कुंक वेहता.

72 अस्के पत्रु मर्रा उंदि मल्का, ओट्टु तिचि, “नना ओन बिल्कुल एरपाट किय्योन,” इंचि इत्तोर.

73 गडसेम मत्तारित्ते, अगा नित्तिसि मत्तोर इच्चुर लोकुल्क पत्रुनगा वासि, “निमे निजम ओना दंटातोने! नीवा वळकुड केंजसि निमे गालिल एरियातोनि इंचि तेळियंता,” इंचि इत्तुर.

74 अस्के पत्रु, “नना ओट्टु तिचि वेहचंतन, नना आबद्दम वळकानय्ते पेन नाकुन तिन्नि, आ मनकन नना बिल्कुल एरपाट किय्योन,” इंचि इत्ता इनुडे गोगोड कूसता.

75 “इय्याला नर्कळक गोगोड कूसाका मुन्ने, निमे नाकुन मूड मल्कां, एरपाट किय्योन इत्तिन” इंचि येसु पत्रुंक मुन्ने वेहचि मत्ता, पोल्ले मति वासि, ओर पलाते होंचि वेल्ले दुक्कमते इरगा अळतोर.

27

रोमि राज्यपाल पिलातुसना मुन्ने येसु

(मरकुस 15:1; लूकाल 23:1-2; योहान 18:28-32)

1 पंग आतारित्ते पेद्दा पेर्मांलोर आनि यहुदि पेद्दाल्क अंतोर येसुन हक्कना निरनायम कीतुर.

2 पजा ओन दोहिचि वाट्सि ओसि, पिलातुस राज्यपालुंक अप्पजेपतुर.

यहुदल उर्रि दोस्सि हांतोर

(प्रिरितुल्कुना कबाहक 1:18-19)

3 येसुक हामुरता सिक्सा दोर्कता इंचि, येसुन पीसि हीता यहुदांकु तेळियतारित्ते वेल्ले पस्तांचतोर. पजा ओर पेद्दा पेर्मांलोर्कुंक, यहुदि पेद्दाल्कुंक आ मुप्यै एंडि कल्दार्क मलाहिचि हीसेक,

4 “नना तप्पु हिल्ला मनकन हक्कालय पीसि हीसि पापम कीतन” इंचि इत्तोर.

अस्के ओर, “माकु बतल कियना मंता? नीवद निमे ह्ळकुन” इंचि इत्तुर.

5 अस्के यहुदल आ एंडि कल्दार्कुन गुळिते विसिरसि, अगटाल पलाते होंचि उर्रि दोसकुत्तोर.

6 पेद्दा पेर्मांलोर्क अव कोत्तन जमा कीसि, “वरोन हक्कालय हीता कोत्तन, मना नियम परकारम दान पेटिते वाटा वायो,” इंचि इत्तुर.

7 दानहाटी ओर अव कोत्तनतोनि, येस्सलेमते बोरन्ना पलाताल वातोर हायानय्ते ओर्कुन बोंदा दोसालय आंता, इंचि वरोर कुम्माना नेलि अस्तुर.

8 इंदके इंका आ नेदुन “नेत्तुर नेलि” इंचि इत्तुर.

- 9 अस्के थिर्मयाह इनना पेनदा कबुरतोर इत्ता पोल्ले निजम आता, अद इल्हा मत्ता:
 “इस्त्राएल लोकुकल ओना दरा, मुप्पै एंडि कल्दार्क कीतुर, अव ओर तेंडकुत्तुर.
 10 पेन नाकु वेहताप, आ मुप्पै एंडि कल्दार्कुनतोनि, कुम्माना नेलि अस्तुर.”*

पिलातुस येसुन पूसकीतोर

(मरकुस 15:2-15; लूकाल 23:3-5; 23:13-25; योहान 18:33-38)

- 11 पजा येसुन पिलातुस राज्यपालना मुन्ने निपिस्तस्के, राज्यपाल ओन, “निमे यहुदिल्कुना राजाना?” इंचि पूसकीतोर. अस्के “निमे इंचेकेने गदा,” इंचि येसु इत्तोर.
 12 पेद्दा पेर्माळोर आनि यहुदि पेद्दाल्क ओनापोर्रो दोसेल्क दोसतुर. गानि येसु बतले जवाब हिया हिल्लोर.
 13 अस्के पिलातुस येसुन, “ईर नीवा पोर्रो बच्चुंगो तप्पुक दोस्सेक मंतुर, नीकु केंजा वासेक हिल्लेना?” इंचि इत्तोर.
 14 गानि ओर उंदि पोल्ले इंका वळका हिल्लोर. अदुनहाटीं पिलातुसुक वेल्ले इंचत्रम आता.
 15 दाटसि होनना पंडुगुना रोजुने, लोकुकुनाहाटीं बोन्नना वरोन कैदिन होळसनद राज्यपालना रिवाज मत्ता.
 16 अद वेलाते अगा जेलने वरोर पोरोल पेय्स्ता “बरब्बल” इनना कैदि मत्तोर.
 17 लोकुकल अगा जमा आतारित्ते पिलातुस ओर्कुन, “नना बोन होळसकन इंचि मीवा मनसु मंता, बरब्बन होळसकना हिलाकोटे किरिस्तु इनना येसुना?” इंचि पूसकीतोर.
 18 येसु तप्पु क्रियाकोन्ना ओना कबाहकुन हळसि कळक पोतताहेंकेन ओन तच्चि नाक अप्पजेपतुर इंचि पिलातुसुक एरपाटे मत्ता.
 19 अचोने आय्का पिलातुस न्यायम क्रियालय बस्के अय्ते गद्देपोर्रो उदतोर अस्के ओना मुत्तोनाहेंदाल उंदि कबुर वाता, अद इल्हा मत्ता, “नाकु उंदि कला वाता, ओर तप्पु हिल्लुवा मनकल आंदुर. ओन निमे बतले क्रियमा. नना ओनाहाटीं इय्याला पोद्दला दुक्कमते मत्तन.”
 20 गानि हीके पेद्दा पेर्माळोर आनि पेद्दाल्क, बरब्बन होळसिसि येसुन हळकना इंचि इनालय लोकुकुकुं एक्किस्तुर.
 21 राज्यपाल ओर्कुन, “नावा मुन्ने बरब्बल आनि येसु इव्वुर मंतुर, नना मीवाहाटीं ईरा इव्वुरा लोप्पोटाल बोन होळसना इंचि मीवा मनसु मंता?” इंचि पूसकीतोर. अस्के ओर, “बरब्बन” होळसना इंचि इत्तुर.
 22 “अय्ते मरि, ‘किरिस्तु’ इनना येसुन बतल क्रियना?” इंचि पिलातुस ओर्कुन पूसकीतोर. अस्के “ओन कृसुनपोर्रो मोल्लां कोहकिस हळ्का,” इंचि इत्तुर.
 23 “बारि, ओर बतल तप्पु कीतोर?” इंचि पिलातुस पूसकीतस्के, “ओन कृसुनपोर्रो मोल्लां कोहकिसि हळ्का” इंचि ओर जोरसे वरगेयतुर.
 24 इच्चो वेल्ले लोकुकुना मुन्ने नावद बतले ताका पर्रो. ओर लोल्लि कीतुर इल्हा पिलातुस इनकुंचि, इच्चुर एर पीसि लोकुकुना मुन्ने कय्क नोर्सि, “ईना हामुटे नावद कय हिल्ले, मिमेटे दीना जबाबदारी मंतिर,” इंचि इत्तोर.
 25 अस्के ओर अंतोर वरगेयसि, “ईना हामुटा जबाबदारी मावा पोर्रो आनि मावा पिलालकुना पोर्रेन मन्निकांटी,” इंचि इत्तुर.
 26 अस्के पिलातुस, बरब्बन होळसिसि, येसुन बारे पोद्देते तंचि, कृसुनपोर्रो मोल्लां कोहकिसि हळ्कालय सिपाइलकुना कय्दे अप्पजेपतोर.

येसुन कृसुनपोर्रो वेलाड वाटंतुर

(मरकुस 15:16-32; लूकाल 23:11; 23:26-43; योहान 19:2-3; 19:17-27)

- 27 पजा सिपाइल्क येसुन पीसि राज्यपालना किल्लाते ओतुर. अगा सिपाइलकुना पूरा गेंगुन केया वेह्चि ओना सुट्टु जमा कीतुर.
 28 ओना कपडिं कुळाह्चि, ओन्क एर्रा रंगुना कोट केराहतुर.
 29 हाहकुना वेलिता किरिटम कीसि ओना तल्लक दोसतुर, ओना तिना कय्दुक उंदि दुरसोत्ता कट्टे हीतुर. सिपाइल्क ओना मुन्ने टोंगरां ऊनसि, “यहुदिल्कुना राजांक बस्केने हामुर हिल्ले,” इंचि ओन इरगा कारेड्डाल्क कीतुर. 30 आयंका ओर ओनपोर्रो उस्कतुर, ओनागटा कट्टे इगकुंचि अदे कट्टेते ओना तल्लापोर्रो तंतुर.
 31 ओन इरगा कारेड्डाल्क कीतारित्ते ओर केर्सि मत्ता कोट तेंडसि, ओना कपडिं ओन्के केराहतुर आनि कृसुनपोर्रो वेलाड वाटालय पलाते पीसि ओतुर.
 32 येसुन पीसि पलाते होननेके, कुरेनि सहरतोर वरोर सिमोन इनना मनकल कलियतोर. सिपाइल्क ओन वेराहचि येसुना कृस कांजा वेहतुर.
 33 आयंका ओर गोलगोता इत्ते, “तला बोरसेम” इनना जेगातगा एवतारित्ते,
 34 अंगुर पंडिना पानकमते कयमुल* कल्पिसि येसुक उनालय हीतुर, ओर दान नाकिसि हळसि, उन्नोन इत्तोर.
 35-37 अस्के ओन कृसुनपोर्रो वेलाड वाटंतुर. वाटतारित्ते, “येसु, यहुदिल्कुना राजाल आंदुर,” इंचि उंदि ओना तप्पु हुप्सना बोर्ड रासि येसुना तल्लापोर्रो वेलाड वाटंतुर. पजा सिपाइल्क सिट्टिं वाट्टिस ओना कपडिन पंचकुत्तुर. आनि ओना कावेल कीसेके अग्गेन उद्दिदेसि मत्तुर.
 38 इंका इव्वुर दौगाल्कनगुडा ओना पक्का पीसि हीके वरोन हेके वरोन कृसुनपोर्रो मोल्लां कोहकतुर.

* 27:10 थिर्मयाह 32:6-9; जकर्याह 11:12-13 * 27:34 कयमुल सेदु इंचि अर्तम.

39-40 हरि पीसि होनानोर-वायानोर तल्लां ऊपसेके, “ओ! गुळितुन कूलाहिचि मूड रोजकुने दोहानोन, ओक्कला निमे पेनदा मरिन आते, कूसताल रेय्शि निमे नीवा जीवातुन पिसागोटकुन,” इंचि कारेड्डाल्क कियुंदुर.

41 अचोने आयका पेद्दा पेर्मालोर, दर्मसास्त्रम कराहना गुस्लक आनि यहूदि पेद्दाल्कगुडा अल्हे कारेड्डाल्क कीतुर.

42 अवेटाल इच्चुर, “ईर अयते इंकावरोन पिसागोटतोर गानि ओनद ओरे पिसागोटकुना परसेके हिल्लोर. ईर इस्राएलतोर राजाल गदा! अयते कूसुनपोर्रीटाल हिळ्ळ रेय्शि वायिरकांटी, अस्केने मोमोट इनपोर्री विस्वासम ईरा परकोम,” इंचि इत्तुर.

43 इंका इच्चुर बारे, “ओन्क अयते पेनदापोर्री बरोसा मंता. इंका ओर, ‘नना पेनदा मरिन आंदुन,’ इंचि इत्तोर. अदुनहाटी इंदके पेनदा मनसु मत्ते ओन पिसागोट्टिट,” इंचि इत्तुर.

44 अल्हेने येसुना पक्काते कूसुंक वेलाड वाट्टिस मत्ता दोंगाल्कगुडा ओना अपमानम कीतुर.

येसुना हामुर

(मरकुस 15:33-41; लूकाल 23:44-49; योहान 19:28-30)

45 पजा पिय्यटा पन्नेड एगानस्केटाल अयते मूड एगनदाका पूरा बूमिअंता हीकट आता.

46 दगोरा-दगोरा मूड एगनेके येसु अळसेके जोरसे वरगेयसि, “एलि, एलि, लमा सबकतनि.” इत्ते, “ना पेनदुना, ना पेनदुना निमे नाकुन बारि होळसीतिन?” इंचि इत्तोर.

47 अस्के अगा नित्तिसि मत्तुर इच्चुर लोकुल्क, “ओर एलियान केयसंतोर बारे” इत्तुर.

48 पजा ओरावेटाल वरोर मनकल वितसि होंचि पुल्लटा अंगुर पंडिना पानकमते मुळाहता स्पंज† तत्तोर आनि दुड्डुना कोस्सक ताससि येसुना तोळदगा नाकालय हीतोर.

49 अस्के कळमतोर, “जेरासेप आगाट, एलियाल ईन पिसागोटालय वांतोरा वायोरा हळकोम,” इंचि इत्तुर.

50 येसु मसंदाम अळसेके जोरसे वरगेयसि जीवा होळस्तोर.

51 हुळाट! अस्केने गुळिता परदा, पोर्रीटाल हिळ्ळदाका हसि रोंडु तुकडां आता, बूमि अदुलता, गुट्टां नैरि हीसि पैतां.

52 पेनदा लोकुल्क बोर अयते हातुर ओरावेटाल वेल्ले मंदि जीवा अरिं बोंदानाल मर्रा तेदतुर.

53 येसु मर्रा जीवाते तेदतस्के, ओर अंतोर बोंदानाल पेय्शि येस्सलेम इनना पवित्र सहरते वेल्लेटुर लोकुल्कुंक दिसतुर.

54 अगा जर्गुता गटनां आनि बूमि अदुलतद हळसि, नूर मंदि सिपाइल्कुना पोर्री मनना अदिकारि आनि येसुनगा कावेल कीसेक मत्ता सिपाइल्क वेल्ले वेरियतुर. वेरियसि, “ईर निजमे पेनदा मरि आंदुर” इंचि इत्तुर.

55 येसुना सेवा कीसेक गालिल एरियाताल वातव वेल्लेने मुर्ताहक अगा लक्कुटाल हळसेक मत्तां.

56 अबुने मरियम मगदलेनि, याकोब आनि योसेप ईरा यावल मरियम आनि जब्दिना मर्कुना यावल, इव अन्नि अगा मत्तां.

येसुना गति कियुड

(मरकुस 15:42-47; लूकाल 23:50-56; योहान 19:38-42)

57 आयंका पोळ्ळु होनना वेलाक अरिमताइ नाटेनाल वरोर योसेप इनना सिरमंत मनकल वातोर. ओर इंका येसुना सिस्सुड मत्तोर.

58 योसेप पिलातुसुनगा होंचि, येसुना पीनगु गावाले इंचि इत्तोर. अस्के पिलातुस, “येसुना पीनगु, योसेपुंक हीम्टु,” इंचि सिपाइल्कुंक आदेस हीतोर.

59 योसेपु आ पीनगुन पूना कपडिते हुटतोर.

60 बंडातुन तुल्हाचि ओनाहाटी तयार कीता पूना बोंदाते, येसुना पीनगुन इरिं, बोंगाकु उंदि पेद्दा बंडातुन अड्डम दोसतोर. पजा अगटाल पेय्शि होत्तोर. 61 गानि मगदलेनि नाटेना मरियम आनि इंकुंदि मरियम इव बोंदा मुन्ने उदिस मत्तां.

येसुना बोंदक कावेल कियमळ

62 नोमकेमता मुन्नेटा रोजुने पेद्दा पेर्मालोर्क आनि परिसिल्क पिलातुसुंक कलियसि,

63 “महाराज, आ बोंकिचचना मनकल जीवाते मननेके, ‘नना हासि मूड रोजकुंक मर्रा जीवाते तेदंतन’ इंचि इत्तोर, अद माकु मते मंता.

64 दानहाटी मूड रोजकुनदाका ओना बोंदातगा कडक कावेल इरानद आदेस हीम. बारित्ते ओना सिस्सुल्क बस्केनना वासि दोंगातनमते ओना पीनगुन ओयानुर आनि ‘येसु मर्रा जीवाते तेदतोर’ इंचि लोकुल्कुन बोंकिचानुर. इल्हा गिंटा आयानयते मुन्नेटकना इंका वेल्ले बेकार आंता,” इंचि वेहतुर.

65 अस्के पिलातुस, “मिमेट सिपाइल्कुन ओम्टु, ओसि ओना बोंदातगा कडक कावेल इरंट,” इंचि वेहतोर.

66 अस्के ओर सिपाइल्कुन ओसि येसुना बोंदातगा कडक कावेल इरतुर. बोंदक अड्डम दोसता बंडाकु सरकार सिक्का वाटसि अगा कावेल कीसेके मत्तुर.

† 27:48 स्पंज गाडी, बसुना सीट लोपो मेत्तगा मनालय स्पंज दोसतुर.

28

येसु जीवाते तेदतोर

(मरकुस 16:1-10; लूकाल 24:1-12; योहान 20:1-10)

1 नोमकेम आतारिल्ले इंकुंदि रोजु अय्यारम पंग आयनेके मगदलेनि नाटेना मरियम आनि दाना दंटातद इंकुंदि मरियम, बोंदातुन ह्वाल्लय होत्तां.

2 अस्के उंदि पेनदा दूता स्वर्गमताल अगा रेयताहाटीं अगा पेद्दा बुकंप आता. पजा आ पेनदा दूता बोंदक अड्डम मत्ता बंडातुन तेंडसि, अदे बंडापोर्रो उद्दुता.

3 दाना रूपम पोळ्दुनालेसीं जगा-जगा मेर्सेक मत्ता, दाना अंगि बारे बर्पलेहका तेल्लगा मत्ता.

4 दान ह्ळसि कावेल कियानोर इरगा वेरियसि, गजा-गजा वनकुसेक, अल्हेने हाताप आतुर.

5 अस्के पेनदा दूता इल्हा इत्ता. “वेरियमट, कूसुनपोर्रो वेलाड वाट्सि हक्कता येसुन मिमेट प्हकसेक मंतिट, इद नाकु एरपाटे मंता.

6 गानि ओर इग्गे हिल्लोर, ओर वेहताप मल्लि जीवाते तेदतोर. वट्ट, ओना पीनगु इरता जेगातुन ह्ळ्ळट.

7 इंका बिराना होंचि ओना सिस्स्युल्लुकुं, ओर हामुरताल जीवाते तेदतोर, ओर मीकन्ना मुन्नेने गालिल एरियाते होंचेक मंतोर, अगा ओर मीकु दिस्सानुर, इंचि वेहट. बतल अय्ये नना मीकु वेहतन, अदुन मति इर्राट,” इंचि आ मुर्ताहकुन इत्ता.

8 अस्के आ मुर्ताहक वेर्रो, वेल्लेन आनंदमते, बोंदातगाटाल जटपेट पेय्सि ओना सिस्स्युल्लुकुं इद कबुर वेहालय विततां.

9 अगटाल पेय्सि होननेके, येसु अवुंक कलियसि अवुन, “बेस पिस्सट,” इंचि इत्तोर. पजा अव ओना दग्गेर होंचि काल्क मोळ्ळतां.

10 अस्के येसु अवुन, “वेरियमट होंट, नावा तम्महकुं गालिल एरियाहेके होनालय वेहट, अग्गेन ओर नाकुन ह्ळ्ळतुर,” इंचि इत्तोर.

कावेल कियानोरा आबद्दम गवाइ

11 अव सिस्स्युल्लुकुं वेहालय होंचेकेन मत्तां, अच्चोटेन बोंदातगा कावेल कीसेक मत्तोर इच्चुर सिपाइल्क सहरते होत्तुर, होंचि अगा जर्गुतदंता पेद्दा पेर्माळ्ळुकुं वेहतुर.

12 अस्के ओर यहुदि पेद्दाल्लुकुं कलियसि उंदि उपायम कीतुर. सिपाइल्क वेल्लेन कोत्तां हीसि वेहतुर गदा,

13 “मोमोट निद्रते मननेके ओना सिस्स्युल्लुकुं नर्का वासि ओना पीनगुन दोंगातनमते ओतुर, इल्हा लोकुल्लुकुं वेहट.

14 ई पोल्ले गिंटा राज्यपालना केव्दे अरानय्ये मोमोट ओन समत कीसि मीकु पोल्ले वायकुंटा कीतोम,” इंचि इत्तुर.

15 अस्के ओर कोत्तां एतसि वेहताप कीतुर, ई पोल्ले यहुदिल्लुकुना लोप्पो इदवेरादाका इंका इल्हे ताकसेक मंता.

येसु सिस्स्युल्लुकुनतोनि वळ्ळकांतोर

(मरकुस 16:14-18; लूकाल 24:36-49; योहान 20:19-23; प्रेरितुल्लुकुना कबाहक 1:6-8)

16 अद आतंका पदाकौंडु मंदि सिस्स्युल्लुकु गालिल एरियाते येसु वेहता गुट्टापोर्रो होत्तुर.

17 अगा येसुन ह्ळसि ओन मोळ्ळतुर. अय्यनागानि इच्चुर सिस्स्युल्लुकुं अनमानम मत्ता.

18 अस्के येसु ओरा दग्गेर होंचि ओर्कुन इल्हा इत्तोर. “स्वर्गमते आनि बूमिपोर्रोटा अदिकारम अंता नाकु हीसि मंता.

19 अदुनहाटीं मिमेट होंचि दुनियाता अन्नि देसेल्लुकुना लोकुल्लुकुन सिस्स्युल्लुकु कीम्टु. ओर्कु बाबाना पोरोल्लते, मरिना पोरोल्लते आनि पवित्र आत्माता पोरोल्लते बापतिस्मा हीम्टु.

20 नना मीकु हीता आदेस परकारम ओर्कु ताकालय करहट, ई दुनिया मुंळगना आकिर वेलादाका नना बस्केळ्ळ मीतोने मनंतन,” इत्तोर.

मरकुस मरकुस रासता बेसता कबुर

इद पुस्तकमता बारेमते गिचचो परिचयम

रासतोना पोरोल: मरकुस

रासता कालम: इसवि सन 60-64

मरकुस येसुना वरोर सिस्सुड मत्तोर. पेनदा मरिं येसु किरिस्तु लोकुकुनाहाटीं बतल-बतल कीतोर, इवुना बारेमते ओर इद पुस्तकमते रासतोर. इद बेसता कबुर, असल अयते सामिन विस्वासम कियवोराहाटीं रासतोर. अदुनहाटीं येसु सामि कराहता पोल्लेकन्ना, ओर कीता इचंन्रमाता कबाहकनपोर्रीं एक्को जोर हीसि रासि मंता.

अस्के येसु सामि देय्याल्क पीसि मत्ता बचटूकुनो ओरवेटाल देय्याल्कन गेदमिसि, ओर्कुन बेस कीतोर. अल्हेने बच्चुटुरो एळिकेने, तकलिपकुने मत्तोरकुन, गुडिडकुन गूनिर्कुन बेस कीतोर. येसु सामि लेक्का हिल्वच्चुं अद्बूतमातव आनि महिमातव कबाहकगुडा कीतोर. हेय्युं वेय्युना मंदिक हेय्युं हारिने पीरमेड गाटो दोसमळ, हातोरकुं जीवा अरहमळ, एतपोर्रीं ताकमळ इल्हा वेल्लेने इचंन्रमाता कबाहक कीतोर.

असल येसु इगे बूमिपोर्रीं बल्हा पिसतोर, बतल-बतल कीतोर, कसुन पोर्रीं मोल्लां कोहिकिसि वेलाड वाटसि हक्कता पजा मूड रोजकुने बल्हा तेदतोर, मर्रा मल्लिस् स्वर्गमते होंचि पेनबाबाना पक्कते उद्दिदिसि दुनियातुन बल्हा ताकिचेके मंतोर, इवन्नि इद पुस्तकम हदविते तेळियंता.

अदुनहाटीं बोर-बोर अयते पेन पोर्रीं विस्वासम कीसि दान मोळकंतुरो ओर्क बस्केळ्क पिस्सना पिस्वर दोर्कता इंचि इद पुस्तकमते रासि मंता. बगा बतल मंता

बेसता कबुर सुख आयमळ 1:1-13

गालिलते लोकुकुना नड्डुम येसु सेवा कबळ कीतोर 1:14-9:50

गालिल एरियाताल येस्सलेमदाका येसुना सेवा कबळ 10:1-52

येस्सलेमते येसुना आकिर वारम 11:1-15:47

येसु हासि मर्रा जीवाते तेदमळ 16:1-8

येसु सिस्सुल्कनतोनि वळिकिसि स्वर्गमते होनमळ 16:9-20

बेसता कबुर सुख आयमळ

(मत्तयाल 3:1-11; लूकाल 3:2-16)

1 पेनदा मरिं, येसु किरिस्तुना बेसता कबुर इल्हा सुख आता.

2 पेनदा कबुरतोर यसायाहना पुस्तकमते, “हळा! नना नीकन्ना मुन्नेने नावा कबुरतोन लोहंतन. ओर नीवाहाटीं हरिं तयार कीतोर.” इंचि रासि मंता.*

3 वरोना अल्किर बय्लि जेगाते, “सामिनाहाटीं हरिं तयार कीम्टु, ओना हरिं सवरगा कीम्टु,” इंचि केंजा वासेक मंता,* इल्हा बापतिस्मा हियना योहानुना बारेमतेन पेन वेहचि मत्ता.

बापतिस्मा हियना योहान

4 पेनदा कबुरतोर रासतापे बापतिस्मा हियना योहान बय्लि जेगाते वासि लोकुकुकुं इल्हा वेहालय दलगतोर, “कीता पापालकुन ओप्कुंचि मनसु मार्सकुंचि बापतिस्मा येतानयते, पेन मीवा पापालकुन मापि कीता.”

5 इद केंजसि पूरा यहुदिया राज्येमते, येस्सलेम सहरते मंदना लोकुकुल ओनगा वातुर, वासि ओरा पापालक ओप्कुंचि, ओनहेंदाल योर्दन बेरेटे बापतिस्मा येतकुत्तुर.

6 योहान लोटापेटा बूराते तयार कीता कपडिं केरसि तोल्दा पट्टा नडिक तासकुनुंदुर. ओर गोल्लाबामां आनि तेने इवे तिडि तिनुंदुर.

7 “नाकन्ना सक्तिमंतुड नावा पज्जोटाल वासंतोर. नना ओना मुन्ने वंगिसि, ओना बूटकुना नोंडेन लेहना लायकगुडा हिल्लेन.

8 नना मीक एतोनि बापतिस्मा हीतन गानि ओर मीक पवित्र आत्माते बापतिस्मा हियानुर,” इंचि योहान वेहुंदुर.

येसु बापतिस्मा येतमळ

(मत्तयाल 3:13-17; लूकाल 3:21-22)

9 अव रोजकुने येसु गालिल एरियाता नासरेत सहरताल वासि, योर्दन बेरेटे योहानुनाहेंदाल बापतिस्मा येतकुत्तोर.

10 येसु बस्के अयते एताल पलाते वातोर, अस्केने मब्बु बैय्यरा आयानद आनि पवित्र आत्मा पावरेम पिट्टेलेसीं ओनपोर्रीं रेयानद हळतोर.

11 अच्चोटेन मब्बुनाल, “निमे नावा पावरमगल्ला मरिंन आदिन. नीहेंदाल नना वेल्लेने कूस मंतन,” इंचि उंदि अल्किर केंजावाता.

पेनदा दूतां येसुना सेवा कियमळ

(मत्तयाल 4:1-11; लूकाल 4:1-13)

12 अद आता पजा पेनदा आत्मा बिराना येसुन बय्लि जेगाताहेके लोहता.

13 अगा नल्पै रोजकु केडा जिवरासिना नड्डुम मननेके, देय्यम येसुनगा वासि, ओना पट्टु हळता. पजा पेनदा दूतां वासि ओना सेवा कीतां.

येसु पेनदा पोल्ले वेहालय सुख कियमळ

(मत्तयाल 4:12-17; लूकाल 4:14-15)

14-15 हेरोद राजाल योहानुन जेलते वाटता पजा, येसु गालिल एरियाते वासि, “पेन इत्ता वेला पुरागा आसि, पेनदा राज्येम दग्गेर्क एत्ता. अदुनहाटीं मिमेट मनसु मार्सकुचि पेनदा बेसता कबुरपोर्रो विस्वासम ईरट,” इंचि वेहालय दलगतोर.

येसुना मोदाटा सिस्युल्कु

(मत्तयाल 4:18-22; लूकाल 5:1-11)

16 येसु गालिल समुद्रम ओड्डु पीसि होननेके सिमोनुन आनि ओना तम्मुर अंदरियन हळतोर. ओर जिम्मां पिय्यानोर आताहाटीं, समुद्रमते ओल्लां वाटसि जिम्मां पीसेक मत्तुर.

17 अस्के, “नावा पज्जो वट, नना मीकुन मनकालोर्कुन नहगा ताथानोर कीतन,” इंचि येसु ओर्कुन इत्तोर.

18 अस्के ओर, बिराना ओरा ओल्लां अग्गेन होळसि ओना पज्जो होत्तुर.

19 येसु इंचिचो मुन्नेळक होत्तारित्ते जब्दिना मर्कु याकोब आनि ओना तम्मुर योहान डोंगाते ओल्लां सवरिचनेके हळतोर.

20 येसु ओर्कुन बिराना केयतस्के, ओर ओरा बाबाल जब्दिन आनि बूतिनोर्कुन अग्गेन डोंगाते होळसि ओना पज्जो होत्तुर.

येसु देय्यम पीतोन बेस कीतोर

(लूकाल 4:31-37)

21 ओर अंतोर कूळसि कपर्नाहुम सहरते होत्तुर. अगा येसु नोमकेम रोजुने दर्मसास्त्रम कराहना लोते होंचि पेनदा पोल्ले कराहलय दलगतोर.

22 येसु पेनदा पोल्ले ओरा दर्मसास्त्रम कराहना गुरूकुनलेसीं आयो गानि अदिकारम मत्ताप कराहतोर. अदुनहाटीं ओना कराहमळतुन केंजसि लोकुल्क वेल्ले इंचंनम आतुर.

23 अदे दर्मसास्त्रम कराहना लोते वरोर देय्यम पीता मनकल मत्तोर.

24 ओर येसुन हळसि, “निमे बोन आदिनो नाक एरपाटे, निमे नासरेत सहरता येसुन, पेनदा पवित्र मनकन आदिन. मातोनि नीकु बाता कबळ? माकुन नासडेम कियालय वातिना?” इंचि वरगेयसि इत्तोर.

25 अद केंजसि, “निमे चुपचाप मन, ओनागटाल पलाते पेयसा,” इंचि येसु जोरसे गदरिचतोर.

26 अस्के आ देय्यम ओन गजा-गजा ऊपसि जोरसे वरगेयसेके ओना लोप्पोटाल पेयसि होत्ता.

27 अदुन हळसि अगा मत्तोर अंतोर इंचंनम आसि, वरोक-वरोर इल्हा वळकालय दलगतुर, “इद बसोंटा पोल्ले, इद अय्ते पूना बोदा आंदु, ईर अदिकारमते देय्याल्कुन ओना लोप्पोटाल पेयसि होंटु इंचि आदेस हीतोर, अव ईना पोल्ले केंजसेक मंतां.”

28 इल्हा येसु अगा कीता गटनना बारेमते पूरा गालिल एरिया आनि सुट्टु-मट्टु मत्ता अन्नि नाहकुने तेळियसि होत्ता.

येसु वेल्लेटोर्कुन बेस कियमळ

(मत्तयाल 8:14-17; लूकाल 4:38-41)

29 येसु आनि ओना सिस्युल्कु सिमोन, अंदरियल, याकोब, योहान दर्मसास्त्रम कराहना लोताल बिराना पलाते पेयसि सिमोन आनि अंदरियना लोन होत्तुर.

30 अगा सिमोनना पोरड एळकि वासि मीडसि मत्ता. इद पोल्ले अगा मत्तोर बोरो येसुंक वेहतुर.

31 येसु होंचि दाना कय पीसि तेहतोर. अस्के दाना एळकि रेयसि, अद ओरा सेवा कियालय दलगता.

32 पजा पोळद होंचि, लोकुल्क बिमारते मत्तोर्कुन, देय्याल्क पीतोर्कुन अंतोर्कुन येसुनगा पीसि वातुर.

33 पूरा सहरतोर येसु मत्ता लोता गलमातगा जमा आतुर.

34 येसु तीरतीरकुना बिमार्क मत्तोर वेल्लेटोर्कुन बेस कीतोर, देय्याल्क पीसि मत्ता वेल्लेटोर्कुना देय्याल्कुन पेचाहिचि गेदुमतोर. अव ओन एरपाट कियुंदु, अदुनहाटीं ओर अबुन वळका हिया हिल्लोर.

येसु वरोरे पारतना कियमळ

(लूकाल 4:42-44)

35 येसु इंकुदि रोज हक्केरेने बय-बय आयानेके तेदसि बोरे हिल्वगा होंचि पारतना कीतोर.

36 सिमोन आनि ओना दंटातुर तेदता पजा येसुन पहकालय दलगतुर.

37 पहिकिसि-पहिकिसि दोर्किचि, “नीकुन अंतोर पहकसेक मंतुर,” इंचि येसुन इत्तुर.

38 अस्के येसु ओर्कुन इल्हा इत्तोर, “मनम पकापीसि मत्ता नाहकुने दाकोम, आ नाहकुने पेनदा पोल्ले वेहमळ गावाले. इद कबळताहाटींगे नना वातन.”

39 अल्हा ओर पूरा गालिल एरियाते तिरियसेके, ओरा दर्मसास्त्रम कराहना लोहकुने होंचि पेनदा पोल्लें वेहचेके, देय्याल्क पीसि मत्तोरगटाल देय्याल्कन पेचाह्चि गेटुमसेके होतोर.

येसु कुस्ट रोगमतोन बेस कियमळ
(मत्तयाल 8:1-4; लूकाल 5:12-16)

40 अल्हा होंचेके मननेके वरोर कुस्टरोगम आता मनकल येसुनगा वासि, ओना काल्कुनपोर्रो अर्सि, “निमे इन्कुत्ते नाकुन बेस किया परीतिन,” इंचि येसुन विनंति कीतोर.

41 येसुंक ओनपोर्रो दया वाताहेका कय मुन्नेळक कीसि ओन इट्सि, “निमे बेस आयगोम इंचि नावा मनसु मंता. निमे बेस आम” इंचि इत्तोर.

42 इत्ता इनुडे ओना कुस्टरोगम होत्ता ओर बेस आतोर.

43-44 अस्के, “ह्ळा! इगे जर्गतद बोर्के वेहमा. गानि निमे होंचि मीवा पेर्माक हुप्सा. कुस्टरोगमताल निमे बेस आता गवाइ इंचि मूसाल वेहता मोक्कु हीम. अदुन ह्ळसि निमे बेस आतिन इंचि लोकुकुंक एरपाट आंता,” इंचि येसु ओन्क गट्टिगा वेहतोर.

45 गानि आ मनकल अगटाल पेय्सि अद पोल्ले अंटोर्क वेहालय दलगतोर. अस्के, “अंटोर्क तेळियता, नाकुन ह्ळसि लोकुकुंक मंदानां-मंदां वांतुर,” इन्कुंचि येसु कळमता नाहकुने होना हिल्लोर. ओर अल्किर हिल्ला जेगाते मत्तोर, अगागुडा लोकुकुंक नालुं-मूलानाल ओना जाडा पीसि होत्तुर.

2

लकवा बिमारतोन बेस कियमळ
(मत्तयाल 9:1-8; लूकाल 5:17-26)

1 कोन्नि रोजकु आतारिते येसु कपर्नाहुम सहरते मल्सि वातोर, ओर लोन मंतोर इंचि लोकुकुंक तेळियसि होत्ता.

2 अस्के लोतागा इच्चोर वेल्ले लोकुकुंक जमा आतुर गदा, गल्माते नित्ताललय जेगागुडा मनाहिल्ले. येसु ओर्कु पेनदा पोल्लें कराहतोर.

3 अद वेलाते नालुर मनकालोर वरोर लकवा बिमारतोन पीसि येसुनगा वातुर.

4 गानि वेल्ले गर्दि मत्ताहाटीं ओर येसुनगा ओया पराहिल्लुर. अय्ते ओर लोतपोर्रो कटुल पियानच्चो बोंगा कीसि लकवा बिमारतोन येसुनगा रेहतुर.

5 येसु ओरा विस्वासमतुन ह्ळसि, आ लकवा बिमारतोन, “कोको, नीवा पापालक मापि आतां,” इंचि इत्तोर.

6-7 अस्के अगा उद्दिदिसि मत्तोराल लोप्पोटाल इच्चुर दर्मसास्त्रम कराहना गुस्लक, “ईर इल्हा बारि वळकसंतोर? ईर पेनदा अपमानम कीतोर. पेन तप्पा इका बोरे पापालकन मापि किया पर्र,” इंचि ओर-ओरे मनसुने विचारम कियालय दलगतुर.

8 ओर-ओरे विचारम कियानद येसु ओना मनसुने बिराना एरपाट कीसि, “मी मनसुने मिमेट इसोंटा विचारम बारि कीतिर?

9 बद्द अल्कगा मंता? लकवा बिमारतोन, “नीवा पापालक मापि आतां इंचि इनमळा हिलाकोटे, नीवा कटुल तेहकुंचि ताका” इनमळ?” इंचि पूसकीतोर.

10 पजा, “गानि मनकना रूपमते पुटतोन नाकु, ई बूमिपोर्रोटा पापालक मापि कियाना अदिकारम मंता इंचि मीक तेळियोना?” इंचि इत्तोर. पजा आ लकवा बिमारतोन,

11 “नना नीकु वेहासेके, तेदसि नीवा कटुल तेहकुंचि लोन होन,” इंचि इत्तोर.

12 इत्ता इनुडे ओर तेदसि कटुल पीसि अंटोर मुन्नेटाल पेय्सि होत्तोर. अदुन ह्ळसि अंटोर इचंन्रम आतुर. “इल्हा मोमोट बस्केने ह्ळा हिल्लोम” इंचि पेनदा स्तुति कियालय दलगतुर.

येसु लेविन केयमळ
(मत्तयाल 9:9-13; लूकाल 5:27-32)

13 येसु मर्रा उंदि मल्का समुद्रम ओड्डुंक होत्तोर. वेल्लेटुर लोकुकुंक ओनगा वातुर अस्के येसु ओर्कु पेनदा पोल्लें कराहलय दलगतोर.

14 कराहमळ आतस्के अगटाल होननेके अल्पिना मर्री लेवि, कर वसुल कियाना नाकातगा उद्दिदिसि मत्तद ह्ळतोर. ह्ळसि ओन, “नावा पज्जो वा,” इंचि इत्तस्के ओर तेदसि ओना पज्जो होत्तोर.

15 पजा येसु लेविना लोन गाटो तिचेके मननेके वेल्लेटुर कर वसुल कियानोर आनि पापि लोकुकुंक वासि येसु आनि ओना सिस्युल्कुनतोनि गाटो तिनालय उदतुर. ओरवटे वेल्लेटुर येसुन विस्वासम कीतोर मत्तुर.

16 कर वसुल कियानोरतोनि आनि पापि लोकुकुनतोनि येसु गाटो तिनाद परिसिल्क आनि दर्मसास्त्रम कराहना गुस्लक ह्ळतुर. ह्ळसि, “कर वसुल कियानोरतोनि आनि पापि लोकुकुनतोनि येसु गाटो बारि तितोर?” इंचि ओर येसुना सिस्युल्कुन पूसकीतुर.

17 अद केंजसि येसु ओर्कुन इल्हा इत्तोर, “बिमार हिल्लोर्कुंक डाक्टरना अक्सरम मन्नो गानि बिमार मत्तोर्कुंक डाक्टरना अक्सरम मंता. नना नीतिमंतुल्कुन केयालय आयो गानि पापि लोकुकुन केयालय वातन,” इंचि इत्तोर.

18 बापतिस्मा हियना योहानुना सिस्युल्क आनि परिसिल्क ओक्कापोद्दु मनुंदुर. अय्ते इच्चुर लोकुकुंक वासि, “योहानुना सिस्युल्क आनि परिसिल्क ओक्कापोद्दु मनुंदुर. गानि नीवा सिस्युल्कु मन्नुर. अल्हा बारि?” इंचि येसुन पूसकीतुर.

19 अस्के येसु ओर्क इल्हा वेहतोर, “मरमिन पेडल मरमिं वाता हेडमितोरतोनि मननेके ओर्कु ओक्कापोद्दुना अक्सरम मनंतना? मन्नो. बदवेरादाका मरमिन पेडल ओरतोनि मनंतोर अदवेरदाका ओर ओक्कापोद्दु मन्नु.

20 गानि मरमिन पेडल ओरागटाल लक्कु आयाना रोजकु वायनुं, अस्के ओर ओक्कापोद्दु मनानुर.”

21 “बोरे आथिर पडना कप्पिड हर्ते, दानकु पूना कप्पिडता गंडा अंटा वाट्सि कुट्टोर. ओक्कला ओर अल्हा कियानय्ते अंटा वाटता पूना कप्पिडता गंडा इगका होंचि पळाना कप्पिडतुन इंकिच्चो हरहंता.

22 अल्हेने पूना अंगुर पानकमतुन पळाना तोलपुर्काते बोरे दोस्सुर, अल्हा दोसते अद अंगुर पानकम, पळाना तोलपुर्कातुन हराह्चि पोंगिस दांता. आनि तोलपुर्कागुडा नासडेम आंता. अदुनहाटीं पूना अंगुर पानकम, पूना तोलपुर्कातेन दोसंतुर,” इंचि येसु इत्तोर.

नोमकेम रोजुना मालक येसु आंदुर

(मत्तयाल 12:1-8; लूकाल 6:1-5)

23 उंदि नोमकेम रोजुने येसु आनि सिस्सुल्क पोलाल्कुनाल होंचेके मत्तुर, होननेके ओना सिस्सुल्क हेनकु नल्सि तिंचेक मत्तुर.

24 परिसिल्क अदुन हळसि, “बद कबळ अय्ते नोमकेम रोजुने कियमळ नियम परकारम ओज्जोनो, अदे कबळ नीवा सिस्सुल्क बारि कीसंतुर?” इंचि येसुन इत्तुर.

25 अस्के येसु ओर्कुन, “दाविदुंक आनि ओना दंटातोर्कुंक कर्वेस्तस्के ओर बतल कीतोर मिमेट हदवा हिल्लिरा?

26 अब्रियातार इनानोर पेद्दा पेर्मल मननेके दाविद पेनदा लोते होळियसि पेनदुक मोळकता हारिन तित्तोर, ओना दंटातोर्कुंकगुडा हीतोर. अव हारिं तिनमळ इत्ते दर्मसास्त्रम परकारम विरोदमते मत्ता. अव हारिं सिराप पेर्मलोर्क तप्पा इंका बोरे तिना पर्र,” इंचि ओर्कुन इत्तोर.

27 मर्रा ओरतोनि, “नोमकेम रोजु मनकनाहाटीं कीसि मंता, मनकल नोमकेम रोजुनाहाटीं आयो.

28 अदुनहाटीं मनकना रूपमते पुटतोन नना, नोमकेमता रोजुना मालकगुडा आंदुन,” इंचि येसु इत्तोर.

3

वतसि होत्ता कयदोन येसु बेस कियमळ

(मत्तयाल 12:9-14; लूकाल 6:6-11)

1 येसु मर्रा उंदि मल्का दर्मसास्त्रम कराहना लोते होत्तोर. अगा वरोर कय वत्सोत्ता मनकल मत्तोर.

2 नोमकेम रोजुने येसु ओन बेस कियानय्ते ओन तप्पुने पीकोम इंचि इच्चुर लोकुल्क हळसेक मत्तुर.

3 “अंटोरा मुन्ने वासि नित्ता,” इंचि येसु, कय वत्सोत्तोन इत्तोर.

4 पजा, “नियम परकारम, नोमकेम रोजुने बेस कियमळ मंचिदा, कराब कियमळ मंचिदा? हिलाकोटे पिसागोटते मंचिदा, हळ्कते मंचिदा?” इंचि पूसकीतोर. गानि ओर चुपचाप मत्तुर.

5 ओर्क बोर्के जीवा नोय्यो इंचि कन्कुचि येसुंक दुक्कम वासि, ओर अंटोरहेके होंगुने हळतोर. पजा, “नीवा कय मुन्नेळ्क हहा,” इंचि आ कय वत्सोत्तोन इत्तोर. ओर कय मुन्नेळ्क हाहतस्के ओना कय बेस आता.

6 पजा परिसिल्क अगटाल पलाते पेय्सि, हेरोद राजाना लोकुल्कुंक होंचि कलियतुर. कलियसि येसुन बल्हा हळ्कना? इंचि येसुना विरोदमते वळ्कुकुत्तुर.

वेल्लेटुर लोकुल्क येसुना पज्जो वांतुर

7-8 येसु ओना सिस्सुल्कुन पीसि अगटाल पेय्सि समुद्रमहेके होत्तोर. येसु कियाना इंचंत्रमता कबाह्क केंजसि गालिल एरिया, यहुदिया एरिया, येस्सलेम सहर, इदुमिया एरिया, सूर, सिदोन इनना सहरकुनाल, योर्दन बेरेटा हब्बेटाल, आनि पकापीसि मत्ता नाहकुनाल वेल्लेटुर लोकुल्क ओनगा वातुर.

9-10 बिमार मत्तोर्कुन वेल्लेटोर्कुन येसु बेस कीतोर. अदुनहाटीं बिमार लोकुल्क येसुन इट्टानाहाटीं वरोंक-वरोर दोब्सेके वासेक मत्तुर. ओरपोर्री अर्राकोटा लक्कु मंदना इंचि, “उंदि सिन्ना डोंगा नाहाटीं तयार कीम्टु,” इंचि येसु ओना सिस्सुल्कुंक वेहतोर.

11 देय्याल्क पीसि मत्ता लोकुल्क येसुन बस्के अय्ते हळ्दुरो अस्के, “निमे पेनदा मर्रिन!” इंचि वरगेयसि ओना मुन्ने हिळ्ळ अर्दुर.

12 गानि येसु मात्रम, “नावा बारेमते बोर्के बतले वेहमट,” इंचि आ देय्याल्कुंक गट्टिगा हुकुम हीतोर.

येसु पन्नेंड मंदितुन सिस्सुल्क इंचि निलाहमळ

(मत्तयाल 10:1-4; लूकाल 6:12-16)

13 पजा येसु गुट्टापोर्री होत्तोर. आ मंदिताल येसु बोर्कुनय्ते कोरतोर, ओर्कुन ओनगा केयकुत्तोर.

14-15 ओर ओनतोनि मनालय, पेनदा बेसता कब्रुर वेहनाहाटीं लोहालय इंचि पन्नेंड मंदितुन पेरतोर. पेरसि ओर्कु प्रेरितुल्क इंचि पोरोल दोसतोर. ओर्क देय्याल्क गेदमना अदिकारम हीसि निलाहतोर.

16 ओरा पोरोलीं इल्हा मंतां: सिमोन, ईनकु येसु पत्रु इंचि पोरोल दोसतोर,

17 जब्दिना मर्क याकोब आनि ओना तम्मुर योहान. ईर इव्कुर्कुन बोनेर्गेस इंचि येसु पोरोल दोसतोर, इत्ते गर्जना कियानोर इंचि अर्तम.

- 18 अंदरियल, पिलिपु, बरतलमय, मत्तयाल, तोमल, अल्पिना मरिं याकोब, तद्दि, सिमोन कनानि,
19 आनि येसुन दोकाते पीसि हियानोर इस्कारियोत नाटेना यहदल.

येसु आनि बेलजाबुल इनना देय्यालकुना मुक्यल
(मत्तयाल 12:22-32; लूकाल 11:14-23)

- 20 पजा येसु उंदि लोन होत्तोर. अगागुडा इचचोर वेल्ले मंदि जमा आतुर गदा, येसुंक, ओना सिस्स्युलकुंक गाटो तिनालयगुडा वेला दोर्काहिल्ले.
21 येसु पिसा-पिसा कीसंतोर इंचि लोकुलकुनहेंदाल ओना लोतोर केंजसि ओन लोन तायालय होत्तुर.
22 येस्सलेमताल वाता दर्मसास्त्रम कराहना गुस्लुकु, येसु देय्यालकुन गेदुमसेके इंचि, “ईना लोप्पो ‘बेलजेबुल’ इनना देय्यालकुना मुक्यल होळियसि मंता, दाना बलमते ओर देय्यालकु तेंडांतोर,” इंचि इत्तुर.
23 अदुनहाटी येसु ओर्कुन दग्गेरा केय्सि ओर्कु वेसुडिते वेहातोर. “देय्यम दाना देय्यालकुन बल्हा तेंडा परांता?
24 ओक्कला, उंदि राज्येमते मनानोरा लोप्पो वरोनद-वरोक अर्काकॉटे अद राज्येम निल्ला परांतना? बस्केने निल्ला परी.
25 अल्हेने उंदि लोता लोप्पो वरोनद-वरोक अर्काकॉटे अद लोन गट्टिगा मन्नो.
26 अदुनहाटी देय्यम दाना दंताता देय्यालकुना विरोदमते नितते, अबुना राज्येम बल्हा नित्तंता? नित्तापर्री, गानि नासडेम आंता.
27 बोरे आयिर! वरोर ताकतवर मनकना लोते होळियसि ओना सामानतुन दोंगा कियना इत्ते, मोदाला आ ताकतवर मनकन दोहचि वाटतेन दोंगा किया परांतोर.
28 नना मीक निजम वेहांतन, मनकालोरा अन्नि पापालकुन, ओर कीता अपमानमतुन पेन मापि किय्यार.
29 गानि पवित्र आत्माता अपमानम कीते, ओर बोरे आयिर, ओन्क बस्केने मापि हिल्ले. असोंटा तप्पु कीता लोकुलुक बस्केळक पापमता दोसेमतेन मनंतुर,” इंचि वेहतोर.
30 अल्हा बारि वेहतोर इत्ते, “ओनालोप्पो देय्यम मंता,” इंचि दर्मसास्त्रम कराहना गुस्लुक ओन इत्तुर.

येसुना यावल आनि तम्मुहक
(मत्तयाल 12:46-50; लूकाल 8:19-21)

- 31 पजा येसुना यावल, ओना तम्मुहक ओर मत्ता लोतगा वातुर. ओर लोता पलाते नित्तिसि येसुन केयट इंचि लोहतुर.
32 लोकुलुक येसुना सुट्टु उद्दिदेसि मत्तुर. अस्के, “नीवा यावल, नीवा तम्मुहक, हेलाहक पलाते एदुर हळसेक मंतुर,” इंचि ओर वेहतुर.
33 अय्ते, “बद नावा यावल, बोर ना तम्मुहक?” इंचि येसु ओर्कुन इत्तोर.
34 अस्के ओना सुट्टु उद्दिदेसि मत्तोरहेके हळसेक, “ईर नावा यावल, ईर ना तम्मुहक आंदुर.
35 बोर अय्ते पेनदा इच्चा परकारम ताकंतुरो ओरे नावा तम्मु, हेलड आनि यावनलेसीं दग्गेटोर आंदुर,” इंचि वेहतोर.

4

विज्जां वीताना कास्तकरि मनकना वेसुडि
(मत्तयाल 13:1-9; लूकाल 8:4-8)

- 1 येसु मरुंदि मल्का गालिल समुद्रम ओड्डुनगा होंचि पेनदा पोल्लें कराहलय दल्गतोर. अस्के ओनगा वेल्लेटुर लोकुलुक जमा आताहेंका ओर उंदि डोंगा एक्किस उदतोर. लोकुलुक बारे बूमिपोर्री नित्तिसि मत्तुर.
2 अस्के ओर वेल्लेन पोल्लें लोकुलुकुंक वेसुडिं वेहासेक कराहतोर. उंदि वेसुडि इल्हा मत्ता.
3 “केंजट, वरोर कास्तकरि मनकल विज्जां वीतालथ पेय्स्तोर.
4 ओर वीतनेके इच्चुं विज्जां हरदगा अरतां, अस्के अबुन पिट्टें वासि पेर्सि तित्तां.
5 इच्चुं विज्जां बंडाना गेर्सपोर्री अरतां. अगा तोळि एक्को हिलुवादानकु आ विज्जां बिराने मोलियतां. गानि हिहकु लोप्पोळक होनवाहेंका पोळ्द पेय्स्तस्के अव वत्सि हासोत्तां.
6 गानि हिहकु लोप्पोळक होनवाहाटीं पोळ्द पेय्सि वेल्ले एद्दि आतस्के अव वतसि कर्विसि होत्तां.
7 इंका इच्चुं विज्जां हाहकुना पोदाने अरतां. हाहकुना पोदां इरगा बेर्सि, अव विज्जन बेर्सा हिया हिल्लें, अदुनहाटीं पंटा पेय्सा हिल्ले.
8 इच्चुं विज्जां बेसता जेगाते अरतां. अव बेस मोलियसि, बेर्सि बेस पंटा पेय्स्ता. बगा मुपै अंतालुक, बगा अरवै अंतालुक, बगा नूर अंतालुकुना पंटा पेय्स्ता,” इंचि वेसुडि महतोर.
9 पजा मर्री ओर्कुन, “बोर्कु केंजालय केळक मंतां ओर केंजट,” इंचि येसु इत्तोर.

वेसुडिं वेह्चि वळकाना कारनम येसु वेहंतोर
(मत्तयाल 13:10-17; लूकाल 8:9-10)

- 10 येसु वर्री मत्तद हळसि अगा मत्तोर लोप्पोटाल इच्चुर लोकुलुक आनि ओना पन्नेड सिस्स्युलुकु ओनगा होंचि “ई वेसुडिता अर्तम वेहा,” इंचि येसुन इत्तुर.

11 येसु ओर्कुन, “मीक अय्ते पेनदा राज्येमता बारेमता मर्ममतुन एरपाट कीकुनालय बुद्धि मंता, गानि पलातोर्कुक बारे इद मर्मम तेळियालय वेसुडिने वेहा पीता.”

12 बारित्ते,

“ओर हळुळ अय्ते हळंतुर, गानि अदुन एरपाट किय्युर.

केंजुड अय्ते केंजांतुर, गानि अद ओर्क तेळियो.

ओक्कला ओर एरपाट कीकुंचि मत्ते, तेळियागोटकुंचि मत्ते,

पेनदागा मल्सि वायेर, पेन ओर्कुन मापि कियवळ,”

इंचि इत्तोर.

कास्तकरि मनकना वेसुडिता अर्तम

(मत्तयाल 13:18-23; लूकाल 8:11-15)

13 मर्रा येसु ओर्कुन इल्हा इत्तोर. “मीक इद वेसुडिता अर्तम तेळिया हिल्लेना? इदे मीक तेळियाकोटे इंका वेरे वेसुडिं मीक बल्हा तेळियानुं?

14 इगे वीतानोर इत्ते पेनदा पोल्लेतुन वेरेतोर्क वेहानोर आंदुर.

15 इच्चुर लोकुल्क विज्जां अरता हर्दा जेगातसंतोर आंदुर. ओर पेनदा पोल्लेतुन केंजांतुर, केंजतारित्ते देय्यम बिराना वासि ओर केंजतवुन तेंडसि पोहंता.

16 विज्जां अरता बंडाना गेर्से जेगातसंतोर बोर इत्ते, बोर अय्ते पेनदा पोल्लेतुन केंजसि कुसिते बिराने ओप्कुंतुर.

17 गानि ओरा मनसुने पेनदा पोल्लेता हिहकु गट्टि पळुवाहाटीं कोन्नि रोजके विस्वासमते मनांतुर. पेनदा पोल्लेताहाटीं तिप्पल्क, कस्टाल्क वाते विस्वासमताल ओर बिराना लक्कु आंतुर.

18 विज्जां अरता हाहकुना पोदाना जेगातसंतोर बोर इत्ते, बोर अय्ते पेनदा पोल्ले केंजांतुर,

19 गानि सम्सारमता रंदि, दनमता आस्ति, दिसतवंता गावाले इत्ता मनसु, इवन्नि मत्ताहाटीं पेनदा पोल्लेतुन ओनालोप्पो बेर्सा हिय्यो. पजा अद पोल्लेहेंदाल ओन्क बतल पायदा आयो.

20 बोर अय्ते पेनदा पोल्लेतुन केंजसि, ओप्कुंचि बेस पायदा तरांतोर, ओर इत्ते, विज्जां अरता बेसता जेगातसंतोर आंदुर ओर मुप्पै अंताल्क, अरवै अंताल्क आनि नूर अंताल्क इल्हा पलांचंतोर,” इंचि इत्तोर.

वेडसिता वेसुडि

(लूकाल 8:16-18)

21 येसु मसंदि वेसुडि वेहतोर. “बोरे आयिर वेडसि निरिच्चि गंजुना हिळु मुच्चोर, कटुल हिळुगुडा इर्रोर. गानि वेल्गु दिसगोम इंचि दान उंदि दीसोडिपोर्रो इर्रंतोर.

22 मक्किस मत्तव अन्नि दिस्सि अर्राकोंटा मन्नों, आनि मर्ममते मत्तव बवे पलाते अर्राकोंटा मन्नों.

23 बोर्कु केंजालय केव्क मंतां ओर केंजट,” इंचि येसु इत्तोर.

24 मर्रा येसु ओर्कुन इल्हा इत्तोर. “मिमेट बेस उसारते केंजट, बद कोल्लाते मिमेट हीतिरो, अदे कोल्लाते मीकु हियमळ जर्गता, इंका दानकन्ना एक्कोगुडा हियमळ जर्गता.

25 बारित्ते, बोनगा अय्ते मंता, ओन्क पेन इंका हीता. गानि बोनगा अय्ते हिल्ले, ओनगा मत्तदुनगुडा पेन वापस एतकुन्नार,” इंचि इत्तोर.

विज्जां बेर्समळ

26 मर्रा येसु इल्हा वेहतोर. “पेनदा राज्येम इल्हा मंता, वरोर मनकल ओना नेलिते विज्जां वीतंतोर.

27 ओर नर्कळ्क मीडंतोर, पोद्दला तेल्चिते मनंतोर. अद विज्जा मोलियसि बेर्सेकेन दांता. अद विज्जा बल्हा मोलियता, बल्हा बेर्सा इत्तद ओनकु तेळियो.

28 बूमि दानद अदे पंटातुन पंडागोटंता. अद बल्हा इत्ते मोदाला मोल्का मोलियता, करे बेर्सा, पोट्टक वांता, हेन्नु पेय्सि पेडेक निडंतां.

29 गानि बस्के अय्ते पेडेक मुदरंतां अस्के नेलिता मालक पंटा कोतक वाता इंचि हेतेळ पीसि कोय्यंतोर.”

पेनदा राज्येम आवाल्कुना पेडेतसोटद

(मत्तयाल 13:31-32,34-35; लूकाल 13:18-19)

30 मर्रा येसु ओर्कु इल्हा वेहतोर, “पेनदा राज्येम बल्हा मंता इंचि वेहकन? बद वेसुडि वेहिचि तेलिचकन?

31 पेनदा राज्येम आवाल्कुना उंदि पेडेतसोटद आंद. अद बूमिपोर्रो वीततस्के, अन्नि पेडेकुंकन्ना सिन्ना पेडे मंता.

32 गानि अद बेर्सातस्के अगा मनना अन्नि कुसिर कायाना मराकुंकन्ना पेद्दा मरा आंता. दाना पंगां पोळ्गुंक-पोळ्गु बेर्सि, पिट्टे इंका नीडाते गूडां किय्या परांतां,” इंचि इत्तोर.

33 येसु इसोर्टव बच्चुंगो वेसुडिं वेहिचि, ओर्क पेनदा पोल्ले तेळियानाल वेहुंदुर.

34 वेसुडि वेहाका येसु ओर्कु बतले वेहाकोंदुर. गानि सिराप ओना सिस्युल्क मत्तस्के अव वेसुडिना अर्तम ओर्क तेळियागोटिस वेहुंदुर.

येसु वळि दुमारमतुन आपंतोर

(मत्तयाल 8:23-27; लूकाल 8:22-25)

35 अद रोज पोळ्द होनना वेलाते, “मनम हब्बेता बाजुंक दाकोम दट,” इंचि येसु ओना सिस्स्युल्लुकुन इत्तोर.

36 ओना सिस्स्युल्लुक अगाटा मंदितुन अग्गेन होळसि, येसु उद्दिस मत्ता डोंगाते उद्दिस होनालय पेयसतुर. ओरा पज्जो इंकिच्चुं डोंगांगुडा पेयसतां.

37 अस्के उंदि पेद्दा वळि-दुमारम वाता. पेद्दा-पेद्दा तळां डोंगाक दल्लिसि एर निडालय दल्लगता.

38 गानि येसु डोंगाता पज्जोटा बाजुंक होंचि मेत्तापोरों मीडसेक मत्तोर. अस्के सिस्स्युल्लुकु येसुन तेहचि, “गुरु! मनम नासडेम आसि होनिनागानि नीकु बतल पिकिर हिल्लेना?” इंचि इत्तुर.

39 अस्के ओर तेदसि, वळि-दुमारमतुन आनि समुद्रमतुन, “आगा, चुपचाप मन” इंचि गदरिचतोर, अस्के वळि-दुमारम मगिसि, अगा पूरा सांत आता.

40 अस्के येसु सिस्स्युल्लुकुन, “मिमेत बारि वेरियंतोर? मीकु गिच्चचोगुडा विस्वासम हिल्लेना?” इंचि इत्तोर.

41 ओर इरगा वेरियसि, “ईर बोर आंदुर? वळि, समुद्रमगुडा ईना पोल्ले केंजता,” इंचेके ओर-ओरे वळ्ळकुकुत्तुर.

5

देय्यम पीतोन बेस कियमळ

(मत्तयाल 8:28-34; लूकाल 8:26-39)

1 अस्के ओर समुद्रमता हब्बेता बाजुंक मनना गिरासेन इनना एरियक एत्तुर.

2 येसु डोंगाताल रेयतस्के वरोर देय्यम पीता मनकल तापळन बोग्ळाताहेंदाल वासि येसुंक कलियतोर.

3-4 ओन बच्चुंगो मल्लां बेडिने, गोल्लसुकुने दोहचि वाटतुर, गानि ओर बेडिन उराहचि पोहतोर, गोल्लसुकुन नेम्हाचि पोहतोर. ओन बोरे आपा पराहिल्लुर. ओर तापळानेन मनुंदुर, ओन बोरे गोल्लसुकुने दोहा पराकोंदुर.

5 ओर नर्का-पिय्यल तापळाने, गुट्टाने तिरियसेक वरगेयसेक मनुंदुर. ओनद ओरे बंडाने कोहकुकुंचि नोप्पि कीकुनुंदुर.

6 ओर लक्कुटाले येसुन हळसि, विच्चि वासि ओना काल्क मोळ्ळकतोर.

7-8 अस्के, “ओनागटाल पलाते पेयसा,” इंचि येसु आ मनकन पीता देय्यमतुन इत्तोर. अदुनहाटीं ओर येसुन, “ए अन्निटकन्ना पेद्दा पेनदा मरिं येसु, नातोनि नीकु बता कबळ? निमे नाकुन तकलिप किय्योन इंचि पेनदा ओट्टु तिचि वेहा,” इंचि जोरसे वरगेयसि इत्तोर.

9 मर्रा, “नीवा पोरोल बतल?” इंचि येसु पूसकीतोर. अस्के ओनालोप्पो मत्ता देय्यम, “मोमोट वेल्लेन मंदा आसि मंतोम, इंचि नावा पोरोल ‘मंदा’ आंद,” इल्हा जवाब हीता.

10 ओनालोप्पो मत्ता देय्याल्लक, “माकुन इद एरियाताल पलाते गेदुममा,” इंचि येसुन बच्चोरो विनंति कीतां.

11 अद वेलाते गुट्टा पक्काते पद्दिना मंदा मेय्येके मत्ता.

12 पजा, “माकुन आ पद्दिना मंदाते होनाहीम,” इंचि आ देय्याल्लक येसुन विनंति कीतां.

13 अस्के येसु अवुन होना वेहतोर अय्ये, आ देय्याल्लक ओनागटाल पेयसि पद्दिना मंदाते होत्तां. अव पद्दिं रोंडु वेयकुनदाका मत्तां. पजा आ पद्दिना मंदा समुद्रम ओड्डुन पोरोलाल हिळतुक वित्ति समुद्रमते मुळ्ळिसि हासोत्तां.

14 अद हळसि पद्दिं मेहानोर वित्ति होंचि, सहरते, पक्का पीसि मत्ता नाहकुने अगा जर्गतद वेहतुर. अस्के आ देय्याल्लक पीतोरद बतल आता इंचि लोकुल्लक हळालय अगा वातुर.

15 येसुनगा वासि हळतुर अय्ये, देय्याल्लक पीसि मत्ता मनकल पुरागा बेस आसि, कपडिं केसिं उद्दिसि मत्तद ओर्क दिसतोर. अल्हा मत्तद हळसि ओर्क वेरिं दल्लगता.

16 येसुना कबाहकुन हळतोर अगा बोर अय्ये मत्तुरो ओर, देय्याल्लक पीसि मत्ता मनकल बल्हा बेस आतोर, पद्दिंक बल्हा-बतल आता इवन्नि पोल्लें लोकुल्लुकुं वेहतुर.

17 इवन्नि पोल्लें केंजसि, “निमे मा एरियाताल पेयसि होन,” इंचि लोकुल्लक येसुन विनंति कियालय दल्लगतुर.

18 अस्के येसु होनालय डोंगाते उदसेके मननेके, देय्याल्लुकुनाल बेस आता मनकल वासि, “नाकुन नीवातोनि वाया हीम,” इंचि येसुन विनंति कीतोर.

19 गानि येसु ओप्कुन्ना हिल्लोर, “सामि नीपोरों दया कीसि नीहाटीं बल्हा बतल कीतोर, लोन होंचि नीवा लोतोर्कुंक वेहा,” इंचि इत्तोर.

20 अय्ये ओर मनकल अगटाल देकापोलिसि एरियाते होंचि, येसु ओनाहाटीं बतल-बतल कीतोर अव अन्नि पोल्लें वेहालय दल्लगतोर. अद केंजसि अंतोर इचंनम आतुर.

उंदि मुरतटुन बेस कियमळ

(मत्तयाल 9:18-26; लूकाल 8:40-56)

- 21 येसु डोंगाते उद्दिदसि समुद्रमता हब्बेता ओड्डुंक मर्रा मल्लिस होत्तोर. ओन हळसि वेल्लेटुर लोकुल्लक ओनगा जमा आतुर. ओर समुद्रम ओड्डुनगा मत्तोर.
- 22 अस्के दर्मसास्त्रम कराहना लोता वरोर याईर पोरोलतोर अदिकारि येसुनगा वातोर. वासि ओना काल्कुनपोर्री अर्सि,
- 23 “नावा सिन्ना मिय्यड बेस हिलाका हायनाल आसि मंता. निमे वासि दानपोर्री कय इरते, अद बेस आसि दाना जीवा पिस्संता,” इंचि विनंति कीतोर.
- 24 येसु आ अदिकारिनतोनि होत्तोर. ओना पज्जो वेल्लेन मंदि पेय्सि ओना सुट्टु वेल्ले गर्दि कीसि पोर्री-पोर्री अर्गलय आयुंदुर.
- 25 आ गर्दिते पन्नेंड वर्सानाल उंदेतीर कप्पिड आयना उंदि मुरतळ मत्ता.
- 26 अद वेल्लेटुर वैदकुल्लुकं हूपिस्ता. दानगा मत्ता कोत्तांता मार्ता गानि दाना बिमार बेस आयाका एक्कोने आसेके होत्ता. इल्हा अद वेल्लेने तकलिप बोगांचेक मत्ता.
- 27-28 अद मुरतळ येसुना बारेमते केंजसि मत्ता. दाना मनसुने, “नना सिराप येसुना कप्पिडतुन इट्टिनागानि बेस आंतन,” इंचि इनकुत्ता. अदुनहाटी गर्दिते येसुना पज्जो वासि ओना कप्पिडतुन इट्टा.
- 29 इट्टा इट्टुडे दाना कप्पिड आयमळ बंद आसि बिमार बेस आता इंचि दानकु अनपिस्ता.
- 30 अदे वेलाते येसुक ओना लोपोटाल ताकत पेयसता इंचि अनपिस्ता. अस्के पज्जो मल्लिस, “नावा कपडितुन बोर इटतुर?” इंचि येसु पूसकीतोर.
- 31 ओना सिस्युल्लुक ओन, “गर्दिते लोकुल्लक वरोनपोर्री-वरोर अर्गनद निमे हळसेक मंचिगुडा, नावा कपडितुन बोर इटतुर? इंचि पूसकीसेके मंतिन,” इंचि इत्तुर.
- 32 गानि, “नाकुन बोरन्ना इटसि मंदगोम,” इंचि येसु अंतोरहेके हळसेक मत्तोर.
- 33 अस्के अद मुरतळकु, बेस आतद तेळियताहाटी, वेंरेक वनकुसेक येसुनगा वासि ओना काल्कुना पोर्री अर्सि अगा जर्गतद सत्तेम-सत्तेम वेहता.
- 34 अस्के येसु आ मुर्ताटुन, “पेगिटुना, नीवा विस्वासमे नीकुन बेस कीता. इसोंटा बिमार मर्रा बस्केने वायो, सांतिते होन,” इंचि इत्तोर.

येसु हाता पेगिटुन जीवा अरहमळ

- 35 येसु अल्हा वळकसेक मननेके, दर्मसास्त्रम कराहना लोता आ अदिकारिना लोताल इच्चुर लोकुल्लक वासि, “नीवा मिय्यड हाता, इंदके गुस्न तकलिप कियमा,” इंचि वेहतुर.
- 36 ओर वळकानदुन केंजवाप कीसि येसु आ दर्मसास्त्रम कराहना लोता अदिकारिनतोनि, “निमे वेरियमा, विस्वासम इर्ग,” इंचि इत्तोर.
- 37 येसु अगटाल पेयसनेके पन्नन, याकोबुन आनि याकोबुना तम्मुर योहानुन ओनतोनि पीकुल्लोर. ओर्क तप्पा बोने ओना पज्जो वाया हिया हिल्लोर.
- 38 ओर दर्मसास्त्रम कराहना लोता अदिकारिना लोन होत्तस्के अगा लोकुल्लक इरगा अळानद, मोत्कुनानद हळतोर.
- 39 अस्के येसु लोपो होळियसि, “मिमेट अडमळ-मोत्कुनमळ बारि कीसेक मंतिर? अद पेगिळ हाया हिल्ले, मीडसि मंता,” इंचि इत्तोर.
- 40 अल्हा इत्तद केंजसि ओर येसुन कव्त्तुर. गानि येसु ओर अंतोर्कुन पलाते लोहतोर. पेगिटा तल्लुर-बाबोन, ओनतोनि बोर अयते मत्तुर ओर्कुन पीकुंचि पेगिड मीडसि मत्ता अरति होत्तोर.
- 41 होंचि अद पेगिटा कयदुन पीसि, “तलिता कुम” इंचि इत्तोर. इत्ते, “पेगिटुना, नना वेहासेक, तेदा!” इंचि अर्तम.
- 42 अल्हा इत्ता इनुडे, आ पन्नेंड वर्साना पेगिड तेदिस ताकालय दलगाता. अदुन हळसि, अगा मत्तोर वेल्लेन इचंन्रम आतुर.
- 43 “इगे जर्गतद बोर्के तेळिया मनि” इंचि ओर्कु गट्टेगा हुकुम हीतोर. पजा “अद पेगिडक बतलन्ना तिनालय हीम्टु,” इंचि वेहतोर.

6

येसुन ओना संतम नाटेनेरे ओप्कुना हिल्लुर
(मत्तयाल 13:53-58; लूकाल 4:16-30)

- 1 येसु अगटाल पेय्सि ओना सहरते होत्तोर, ओना सिस्युल्लकगुडा ओना पज्जो होत्तुर.
- 2 नोमकेम रोजुने दर्मसास्त्रम कराहना लोते होंचि पेनदा पोल्लेँ कराहसेक मत्तोर. वेल्लेटुर लोकुल्लक अव पोल्लेँ केंजसि, “ईर इच्चोर बेस बल्हा वेहासेक मंतोर? इनकु इच्चोर बुद्दिद बगाटाल वाता? ईर अद्बूतामाता कबाहक बल्हा कीसेक मंतोर?”
- 3 ईर अयते मरियमुना मर्री वडलल आंदुर, याकोब, योसेस, सिमोन, यहुदल, ईरा दादल आंदुर. इगे मनानोनि उद्दिदसि मनानव ओना हेलाहके आंदु,” इंचि इनालय दलगतुर. अदुनहाटी ओर येसुन ओप्कुना हिल्लुर.
- 4 अस्के येसु ओर्कुन, “पेनदा कबुरतोंक ओना संतम नाटेने, ओना जीवातोरगा आनि ओना लोन होळसिसि, कळमतव अन्नि जेगाने मान-मर्यादा दोर्कता,” इंचि इत्तोर.
- 5 अगा येसु बतले अद्बूतामाता कबाहक किया हिल्लोर, सिराप बिमार मत्तोर्कुन इच्चुर्कुन इट्टिस बेस कीतोर.
- 6 येसुन ओर विस्वासम कियवाहाटी ओन्क इचंन्रम आता. पजा नार-नार होंचि पेनदा पोल्लेँ कराहसेके तिरियतोर.

येसु पन्नेड सिस्त्र्युल्कुन लोहमळ
(मत्तयाल 10:1,5-15; लूकाल 9:1-6)

7 उंदि रोज येसु पन्नेड मंदि सिस्त्र्युल्कुन दग्गेरा केयतोर. ओर्कुन इव्वुर-इव्वुर दंटा कीसि, ओर्क देय्याल्क गेदमना अदिकारम हीसि सेवा कियालय लोहतोर.

8-9 अदिकारम हीसि ओर्कु इल्हा वेहतोर, “मिमेट होननेके मीतोनि गाटो आयि, जोरा आयि, कोत्ताना सचि आयि, एक्कोतव अंगि आयि ओयमट. सिराप कय्दे दुड्डु, कालकुंक हेरपुहक ओम्टु.

10 मिमेट बद लोन अय्ते दांतिटो, अगटाल पेयसनदाका अदे लोते मंटु.

11 बोर अय्ते मीकुन ओप्कुन्नुर, मीवा पोल्लें केंजुर अगटाल पेयसननेके ओर्क विरोदमते गवाइलेसी मीवा कालकुना दुम्मु दुल्पट. नना मीक निजम वेहासेक मंतन, न्यायमता रोजुने आ नाटुक वाता गोसाकन्ना सदोम, गमोरा सहरकुंक वायाना गोसा बच्चोरो तक्को मंता,” इंचि वेहतोर.

12 अस्के सिस्त्र्युल्कु अगटाल होंचि, “मीवा पापालक ओप्कुंचि, मनसु मार्सकुटु” इंचि लोकुल्कुंक प्रचार कीतुर.

13 देय्याल्क पीतोरगटाल बच्चुंगो देय्याल्कुन गेदुमतुर. बिमारते मत्तोर्कुन निय होकसि बेस कीतुर.

हेरोद राजल येसुन बापतिस्मा हियना योहान इनकुंतोर
(मत्तयाल 14:1-12; लूकाल 9:7-9)

14 येसुना पोरोल अंटोर्क तेळियसि होत्ता. हेरोद राजालगुडा येसुना बोरेमते केंजतोर. अस्के ओर इल्हा इत्तोर, “बापतिस्मा हियना योहान हातोरान्टेटाल मर्रा तेदतोर. अदुनहाटीं ओर इंसंटा अद्बूतामामता कबाहक कीसंतोर.”

15 अल्हेने इच्चुर बारे, “पेनदा कबुरतोर एलियल आंदुर,” इंचिच्चुर बारे, “एनकटा पेनदा कबुरतोर लोप्पोटाल बोरन्ना वरोर मंदनुर,” इंचि इत्तुर.

16 गानि हेरोद राजाल इदुन केंजसि, “बापतिस्मा हियना योहानुना तल्ला नना कोय्यागोटन, ओरे हातोरान्टेटाल मर्रा जीवाते तेदतोर,” इंचि इत्तोर.

17-18 बारित्ते, हेरोद राजाल ओना तम्मुर पिलिपुना मुत्तो हेरोदियान इरकुंचि मत्तोर. अय्ते योहान हेरोद राजानगा होंचि, “नीवा तम्मुना मुत्तोन निमे निहगा इरमळ नियम परकारम बेस आयो,” इंचि वेहुंदुर. अल्हा वेहतादान्कु हेरोदियनहाटीं हेरोद राजाल सिपाइल्कुन लोहचि योहानुन जेलने वाटा वेहतोर.

19-20 अय्नागानि मोका दोर्कते योहानुन हक्कालय हेरोदियल हळुंदु, गानि अद हक्का पराहिल्ले. बारित्ते योहान नीतिमंतुड, पवित्र मनकल इंचि हेरोद राजाल वेरियुंदुर. अदुनहाटीं ओर जेलते मननेके ओन्क बतल आयामन्नि इंचि ओन कापाळसि ईरुंदुर. हेरोद राजाल योहानुना पोल्लें केंजसि परेसान आसिगुडा कुसिते केंजुंदुर.

21 उंदि रोज हेरोदियांक मोका दोर्कता. हेरोद राजाल ओना पुटता रोज मंता इंचि ओनगा मनना पेद्दाल्कुन, सिपाइल्कुना अदिकारिल्कुन आनि गालिल राज्येमता लीडर्कुन बोजनमहाटीं केयतोर.

22 अस्के हेरोदियाना मिश्यड अगा वासि हेरोद राजाल अल्हेने हेळमितोरा मुन्ने एगरिसि ओर्कुन कूस कीता. अस्के राजाल आ पेगिटुन केय्से, “नीकु बतल गावाले नाकुन तल्का, नना अद हीतन,” इंचि इत्तोर.

23 अल्हेने, “नावा सगम राज्येमगुडा नीकु हियालय तयार मंतन,” इंचि ओट्टु तित्तोर.

24 अस्के अद पेगिळ दाना यावानगा पलाते होंचि, “बतल तल्ककन” इंचि पूसकीता. अस्के, “बापतिस्मा हियना योहानुना तल्ला तल्का,” इंचि दाना यावल वेहता.

25 गाबरते आ पेगिड हेरोद राजानगा बिराना लोप्पो होंचि, “बापतिस्मा हियना योहानुना तल्ला उंदि गिन्नेते वाटसि नाकु हीम,” इंचि इत्ता.

26 इद केंजसि राजांक इरगा दुक्कम वाता. गानि अगा मत्ता अंटोर हेडमितोराहाटीं आनि तित्ता ओट्टुहाटीं, दानकु हीतन इत्तद हिय्योन इना पराहिल्लोर.

27 अस्के राजाल, जेलते मत्ता योहानुना तल्ला कोय्से ता इंचि वरोर सिपाइंक बिराना आदेस हीसि लोहतोर.

28 आ सिपाइ जेलते होंचि, योहानुना तल्ला कोय्से, उंदि गिन्नेते वाट्सि तच्चि पेगिड्क हीतोर, अस्के आ पेगिड अदुन दाना यावांक हीता.

29 इद पोल्ले योहानुना सिस्त्र्युल्कुंक तेळियता. अस्के ओर होंचि ओना पीनगुन ओसि बोंदाते इरतुर.

हेय्युं वेय्कुना मंदिक गाटो दोसमळ
(मत्तयाल 14:13-21; लूकाल 9:10-17; योहान 6:1-14)

30 नार-नार होंचि मत्ता येसुना प्रेरितुल्क, येसुनगा मल्सि वातुर. ओर होंचि लोकुल्कुंक बतल-बतल कीतुर, बतल-बतल कराहतुर इवन्नि पोल्लें येसुंक वेहतुर.

31 ओरगा वायानुर-होनानुर लोकुल्क वेल्लेटुर मत्तुर, ओर्क गाटो तिनालयगुडा वेला दोर्काकोंदु. अदुनहाटीं, “मीक अराम किये पीता, बोरे हिल्ला जेगातगा दाकोम दट,” इंचि येसु ओर्कुन इत्तोर.

32 अस्के ओर उंदि डोंगाते उद्दिसेसि बोरे हिल्ला जेगाते होत्तुर.

33 गानि वेल्लेटुर लोकुल्क ओर्कुन होननेके हळसि एरपाट कीतुर. अदुनहाटीं अन्नि सहरकुनाल विच्चि वासि, ओर्कन्ना मुन्नेने अगा जमा आतुर.

34 येसु डोंगाताल रेयसि अद जेगातगा वेल्लेने मंदितुन हळतस्के, कोहानोर हिल्ला गोरें बल्हा मनांतंगो ओर अल्हा आसि मत्तुर. अदुनहाटीं ओनकु ओरपोरें दया वासि ओर ओर्क पेनदा पोल्लें कराहलय सुख कीतोर.

35-36 पोळद होनना वेलाक सिस्सुल्क येसुनगा वासि, “मनम सुनसान जेगाते मंतोम, वेलागुडा बागेन आता. लोकुल्कन लोहचीम, ओर दग्गेटा नाहकुने होंचि, ओराहाटीं तिनालय बतलन्ना अस्कंतुर,” इंचि इत्तुर.

37 गानि, “मिमेटे ओर्क हीम्टु,” इंचि ओर्कुन येसु इत्तोर. अस्के ओर इत्तुर गदा, “रोंडु न्हकुना दिनारकुनतोनि* अंतोराहाटीं तिंडि अस्सि तच्चि हियमळा बतला?” इंचि पूसकीतुर.

38 “मिहगा बच्चुं हारि मंतां, होंचि हुळट,” इंचि येसु इत्तोर. ओर अबुन हळसि, “हेय्युं हारि, रोंडु जिम्मां मंतां,” इंचि वेहतुर.

39 अस्के येसु, “अंतोर लोकुल्कन पच्चाटा जाडि पोरो गूप-गूपुने उप्सट,” इंचि सिस्सुल्कुंक आदेस हीतोर.

40 ओर अंतोर गूप-गूपकुने उदतुर, उंदि गूपुने एबै, नूर इल्हा मत्तुर.

41 अस्के येसु अव हेय्युं हारि, रोंडु जिम्मां कय्दे पीसि, स्वर्गमताहेके हळसि पेनदुक दन्यवाद कीतोर. अबुन तुकडें कीसि, “ओर्क पंचि हीम्टु” इंचि सिस्सुल्कुंक हीसीतोर. अल्हेने अव रोंडु जिम्मानगुडा तुकडां कीसि हीतोर.

42 ओर अंतोर पीरनिंडा तित्तुर.

43 तिनुड आतस्के मिगुल्ता हारिना आनि जिम्माना तुकडां जमा कीते पन्नेड तट्टां निंडतां.

44 हारि तित्तोरव्टे, सिराप मांडसे हेय्युं वेय्कुना मंदि मत्तुर.

येसु एतपोरें ताकमळ

(मत्तयाल 14:22-33; योहान 6:16-21)

45 अद आता पजा येसु बिराना ओना सिस्सुल्कुन डोंगाते उपिच्चि, “मिमेट अंतोर समुद्रमता हब्बेटा बाजुंक मंदना बेतसेदा सहरते नाकन्ना मुन्नेने होंट,” इंचि इत्तोर. अगा मत्ता लोकुल्कन ओरा नाहकुनहेके होनालय साला कीतोर.

46 ओर्कुन साला कीता पजा, येसु पारतना कियालय गुट्टापोरें होत्तोर.

47 पोळद होत्ता पजा सिस्सुल्कुना डोंगा नडुडुम समुद्रमते मत्ता, गानि येसु वरें ओडुडुनपोरें मत्तोर.

48 समुद्रमते वळि-दुमारम डोंगाक एदुर तेदताहाटीं सिस्सुल्कुंक डोंगा ताकसालय तकलिप होंचेके मत्तद येसु हळतोर. हळसि, नर्कटां मूड-नालुं एगाना वेलाते येसु सिस्सुल्कुना डोंगातेके एतपोरें ताकसेक होत्तोर. ओर ओरगटाल मुन्ने पेय्सि होननदे मत्ता,

49-50 गानि येसु एतपोरें ताकानद हळसि देय्यम इंचि मोत्कुत्तुर, बारित्ते अंतोर ओन हळसि वेरियतुर. अस्के येसु, “वेरियमट! ननाने आंदुन. दैरनेमते मंटु!” इंचि इत्तोर.

51 पजा सिस्सुल्कुना डोंगाते येसु एककुता एककुडे वळि-दुमारम बंद आता. अद हळसि ओर्क वेल्ले इचंन्रम आता.

52 बारित्ते मुन्ने हेय्युं वेय्कुना मंदिक गाटो दोसतद हळसि मत्तुर, अय्नागानि येसु सामिना बलमतुन ओर एरपाट किया हिल्लुर. ओरा मनसुक बंडालेसीं आसि होत्तां.

बिमर मत्तोर्कुन येसु बेस कीतोर

(मत्तयाल 14:34-36)

53 पजा ओर अद समुद्रम दाटसि गेनेसरेत इनना नाटे एव्सि, अगा डोंगातुन आपतुर.

54 ओर डोंगाताल रेयनैकेन वेल्लेटुर लोकुल्क हळसि येसुन एरपाट कीतुर.

55 पकापीसि मत्ता नाहकुने विच्चि होंचि बिमर मत्तोर्कुन कटुल्कुने वाटसि येसु बगा मंतोर इंचि तेल्लिचकुंचि, अगा-अगा कांजसेक ओयुंदुर.

56 येसु नाटेने, सहरते, नेलिने बद-बद जेगाते अय्ते होनुंदुरो, अगाटा बिमर मत्तोर्कुन चौकते तच्चि मीडिच्चि, “सिराप नीवा कपिडता अंचुन इट्टा हीम,” इंचि येसुन विनति कियुंदुर. अल्हा बोर-बोर अय्ते ओना अंचुन इट्टुरो, ओर अंतोर पुरागा बेस आतुर.

7

पेदू दाल्कुना रीति-रिवाजता बारेमते कराहमळ

(मत्तयाल 15:1-9)

1 उंदि रोजु येस्सलेमताल इच्चुर परिसिल्क आनि दर्मसास्त्रम कराहना गुस्लक येसुनगा जमा आतुर.

2 येसुना इच्चुर सिस्सुल्कु यहूदि लोकुल्कुना रीति-रिवाज परकारम सुदूद आयाकॉटेन इत्ते, कय्क नोरकिने तिनानद ओर हळतुर.

3 बारित्ते, परिसिल्क आनि यहूदिल्क अंतोर पेदू दाल्कुना रीति-रिवाज मत्ताप कय नोरका तिन्नुर.

4 इंका ओर हाटुम होंचि वायना गानि एर तुंगाका तिन्नुर. अचोने आयका वाटिं, तालि, रागिता बोळिं नोरमळ इसॉटव पेदू दाल्कुनाल ताकसेक वाता रीति-रिवाजकुन नोमंतुर.

* 6:37 दिनार इद कोत्ता आंद. उंदि दिनार इत्ते उंदि रोजुना बूतितचो दाना विलुवा मंता.

5 अय्ते, “नीवा सिस्युल्क, पेद् दाल्कुना रीति-रिवाजुने बारि ताकुर, तिनाका मुन्ने ओर कय्क बारि नोर्र?” इंचि परिसिल्क आनि दर्मसास्त्रम कराहना गुस्लक येसुन पूसकीतुर.

6 अस्के येसु ओर्कुन इल्हा इत्तोर, “यसायाह इनना पेनदा कबुरतोर, मीवसोटा डोंगिरा बारेमते निजमे बविस्यवानि कीतोर: ‘ईर लोकुल्क सिराप तोळ्देने नावा कदर कीतुर, गानि ईरा मनसु मात्रम नहागटाल बच्चोने लक्कु मन्ता.

7 ईर अंगडमे नावा आरादना कीसेके मनांतुर. बारित्ते, ओराहाटी मनकालोर तयार कीता रीति-रिवाजके निजमतव, अबुना पालन कियमळे दर्मम इंचि कराहंतुर, * इल्हा रासि मंता.

8 मिमेट पेन हीता आदेसतुन होळसि, मनकल तयार कीतव रीति-रिवाजकुन पीसि ताकसेक मंतिर,” इंचि इत्तोर.

9 मर्रा ओरतोनि, “मीवा रीति-रिवाजकुन पीसि ताकानाहाटी, पेनदा आदेसतुन लक्कु कियमळ मीक बेस अनपिचंचता,” इंचि इत्तोर.

10 “निमे नीवा तल्लुर-बाबोना कदर कीम, बोर अय्ते तल्लुर-बाबोन रांगंतोर, ओन हक्कमळे गावाले,” इंचि मूसाल इत्तोर.

11-12 गानि, “मिमेट अय्ते, बोरन्ना मनकल ओना तल्लुर-बाबोन, नना मीकु हियानद पेनदुक कोर्बान* इंचि हीतन इनानय्ते, मिमेट ओन ओना तल्लुर-बाबोना सेवा किया हिय्यिर, इंचि कराहंतुर.

13 इल्हा मिमेट तयार कीता, मीवा रीति-रिवाजकुनाहाटी पेनदा पोल्लेतुन होळसेक मंतिर. इल्हा इंका बच्चुंगो कबाहक कीतिर,” इंचि वेहतोर.

मनकन हेळहना पोल्ले

14 मर्रादि मल्का येसु लोकुल्कुन दग्गेर्क केय्सि, “मिमेट अंतोर नना वेहानद केंजट आनि अर्तम कीकुंदु,” इंचि वेहालय सुस्त्र कीतोर.

15-16 “पलाताल मनकना पीटे होनानव ओन हेळहो, गानि मनकना तोळ्दाल पलाते पेय्सना पोल्लेगे ओन हेळहंता,” इंचि वेहतोर. बोर्कु केंजालय केव्क मंतां ओर केंजट.†

17 पजा येसु लोकुल्कुन होळसिसि, सतता लोन होत्तोर. अस्के ओना सिस्युल्कु ओर वेहता वेसुडिता अर्तम पूसकीतुर.

18 अस्के येसु ओर्कुन इल्हा इत्तोर. “पलाताल बतल अय्ते पीटे दांता, अद मनकन हेळहो इंचि मीकु इंकागुडा तेळियोना?

19 पलाताल होनानद ओना मनसुने होन्नो गानि ओना पीटे दांता. पजा पलाते अर्ता,” अल्हा वेहिच, तिनानव अन्नि तिंदि तिनालय बेसतवे इत्तोर.

20 पजा ओर इल्हा वेहतोर, “मनकना लोप्पोटाल बतल अय्ते पलाते पेय्संता अदे मनकन हेळहंता.

21 बारित्ते मनकना मनसुनाल कराब विचाराल्क, बोगमतनम, दोंगातनाल्क, हक्कमळ, व्यबिचारम,

22 आस्ति कियमळ, दुस्ट गुनम, डोंगिगुनम, मेंदुलता आसे, कळ्क पोतमळ, अपमानम कियमळ, गर्रा आनि मुर्का गुनाल्क पलाते पेय्संतां.

23 इव अन्नि सेड्डा पोल्ले मनकना तोळ्दाल पलाते पेय्सि, मनकन हेळहंता,” इंचि वेहतोर.

यहुदि आयवा मुरतटा विस्वासम

(मत्तयाल 15:21-28)

24 पजा येसु अगटाल तेदसि सूर, सिदोन एरियाते होत्तोर. अगा मनानद बोनेके तेळिया मनि इनकुंचि, ओर उंदि लोन होंचि आगतोर. गानि मक्का पर्रा हिल्लोर.

25-26 उंदि युनानि मुरतळ येसुना बारेमते केंजता. अद सिरिया देसेमता पोनिशिया इनना नाटे पुटतद आंदु. दाना सिन्ना मियाटुन देय्यम पीसि मत्ताहाटी अद येसुनगा वासि, ओना काल्कुनपोर्रो अरता. अर्सि “देय्यमतुन पेच्हाचि गेदमा,” इंचि येसुन विनंति कीता.

27 येसु अदुन, “पिलाल्क मोदाला पीरनिंडा तिनिकांटी, पिलाल्कुना हारि तेंडकुंचि नय्कुंक वाटमळ बेस आयो,” इंचि इत्तोर.

28 गानि आ मुरतळ, “निजमे सामि! पिलाल्क तिननेके हिळ् अरता अंतकुल्कुन अय्ते नय्के तितां गदा!” इंचि येसुंक जवाब हीता.

29 अस्के, “निमे इल्हा इत्ताहाटी, नीवा मिय्यटाल देय्यम पेय्सि होत्ता. निमे लोन होन,” इंचि येसु इत्तोर.

30 अद मुरतळ लोन होंचि हळतस्के, दाना मिय्यड कटुलते मीडसि मंता, दानाल देय्यमगुडा पेय्सि होत्ता इंचि अद हळता.

पनकना-सेव्टि मनकन येसु बेस कियमळ

31 अद आता पजा येसु सूर एरियाताल मल्सि सिदोन होत्तोर. अगटाल देकापोलिस एरिया दाटसि गालिल समुद्रमतगा वातोर.

32 अस्के इच्चुर लोकुल्क, वरोर पनकना-सेव्टि मनकन येसुनगा पीसि वासि, “नीवा कय ईना पोर्रो ईरा,” इंचि विनंति कीतुर.

33 येसु आ पनकना-सेव्टि मनकन मांदिताल पक्कक ओसि, ओना केव्कुने सतता वेल्कु दोसतोर, आयंका आ वेल्कुना पोर्रो उस्किसि ओना नाल्केतुन इत्तोर.

34 मब्बुनहेके हळसेक जोरसे नेस्किसि “एप्पता” इत्तोर. इत्ते कुल्ला आम इंचि अर्तम.

35 अस्केने ओना केव्क केंजा वायालय दल्लगां, ओना नाल्केगुडा मेसलिसि ओर साप वळ्कालय दल्लगतोर.

36 इद पोल्ले बोर्के वेहमत इंचि येसु ओर्कु गट्टेगा वेहतोर गानि लोकुल्कुंक ओर वेहतादानकन्ना एक्को वेहासेक होत्तुर.

37 केंजता लोकुल्क अंतोर इंचत्रम आसि, “ओर बतलय्ते कीतोर, बेस कीतोर. सेव्टोर्कुन केंजा वायानाल, म्कालोर्कुन वळ्का वायानाल कीतोर,” इंचि इत्तुर.

* 7:7 यसायाह 29:13 * 7:11-12 कोर्बान पेनदुक मोक्कु हीता वस्तुकुन कोर्बान इंचि इन्दुर. † 7:15-16 इद वचनम कोन्नि पांडु लिपिने हिल्ले.

8

नालुं वेय्कुना मंदिक येसु गाटो दोसंतोर
(मत्तयाल 15:32-39)

- 1 अव रोजकुने मरुंदि मल्का येसुनगा वेल्लेन लोकुल्क जमा आतुर. ओरगा तिनालय बतले मनाहिल्ले. अदुनहाटीं येसु ओना सिस्स्युल्कुन दग्गेर्क केय्से,
- 2 “ईर लोकुल्क नहगा मूड रोजकुनाल मंतुर, ईरगा तिनालय बतल हिल्ले. अदुनहाटीं नाक ई लोकुल्कुन हळसि पापम अनपिच्चंता.
- 3 इच्चुर लोकुल्क वेल्ले लक्कुटाल वातोर मंतुर. ननागिंटा ईर्कुन कर्वुने लोन लोहानय्ते, नड्डुम हर्दे बगानना कूलाबडनुर,” इंचि इत्तोर.
- 4 अस्के, “ई उस्के बूमिंते इच्चो वेल्ले लोकुल्कुंक हालानाल तिंडि बगाटाल तरा परकोम?” इंचि सिस्स्युल्क येसुक जवाब हीतुर.
- 5 अस्के, “मिहगा बच्चुं हारिं मंतां?” इंचि येसु ओर्कुन पूसकीतस्के, ओर, “एडुं हारिं मंतां” इंचि इत्तुर.
- 6 पजा येसु मंदितुन हिळ्ळु बूमिपोर्रो उदूदा वेहतोर. आ एडुं हारिं पीसि पेनदुक दन्यवाद कीतोर. हारिन तुकडां कीसि, “ओर्क तूसि हीम्टु” इंचि सिस्स्युल्कुंक हीतोर. अस्के सिस्स्युल्कु मंदिक तूसि हीतुर.
- 7 ओरगा इच्चुं सिन्ना जिम्मांगुडा मत्तां. येसु अवनहाटींगुडा पेनदुक दन्यवाद कीसि “लोकुल्कुंक तूसि हीम्टु” इंचि सिस्स्युल्कुंक आदेस हीतोर.
- 8 अगा मत्तोर अंतोरगुडा पीरनिंडा तित्तुर. पजा मिगुल्ला हारि तुकडन जमा कीते, अव एडुं तट्टां निंडतां.
- 9-10 अगा तित्तोरव्ठे दग्गेरा-दग्गेरा नालुं वेय्कुना लोकुल्क मत्तुर. ओर अंतोर्कुन साल्वा कीसि, येसु बिराना ओना सिस्स्युल्कुनतोन उंदि डोंगाते उद्दिदिसि दलमनुता एरियाक होत्तोर.

परिसिल्क येसुना पट्टु हळंतुर
(मत्तयाल 16:1-4; लूकाल 11:16,29)

- 11 पजा येसुना पट्टु हळना इंचि, “निमे पेनदा अदिकारम पीसि वातिन इंचि नम्मालय, स्वर्गमताल माकु उंदि चिन्ह हुप्सा,” इंचि परिसिल्क ओन पूसकियालय दलगतुर.
- 12 अस्के येसु आत्माते जोरते नेस्किसि, “इद पीळितोर चिन्ह हुप्सा इंचि बारि इंतुर? नना मीक निजम वेहतन, इद पीळितोर्क बदे चिन्ह हुपिचमळ जर्गो,” इंचि इत्तोर.
- 13 पजा ओर्कुन अगणेन होळसि, डोंगाते उद्दिदिसि समुद्रमता हळ्बेता ओड्डुंक होत्तोर.

यहुदिल्लुकुनाल जेगर्ता मंतु
(मत्तयाल 16:5-12)

- 14 सिस्स्युल्कु हारि ओयालय मसंगतुर. आनि ओरगा डोंगाते उंदे हारि मत्ता.
- 15 अस्के येसु ओर्कुन इल्हा जेगर्ता कीतोर. “परिसिल्क आनि हेरोदना पुल्लटा पिंडिता बारेमते जेगर्ता मंतु,” इत्तोर.
- 16 अद केंजसि, “मनागा अयते हारि हिल्लें,” इल्हा इंचेके सिस्स्युल्कु ओर-ओरे वळ्ळुकुत्तुर.
- 17 येसु अदुन एरपाट कीसि, “हारि हिल्लें इल्हा विचारम मिमेट बारि कीसेक मतिट? इदवेरदाकागुडा मीकु तेळिया हिल्लेना? एरपाट कीसेक हिल्लिरा? मीवा मनसु बंडा आताना?
- 18 मीक कळ्ळुकु मंचिगुडा हळ्वा परसेक हिल्लिरा? केळ्ळुकु मंचिगुडा केंजा परसेक हिल्लिरा? मिमेट मति मर्गतिरा?
- 19 नना हेय्युं वेय्कुना मंदिहाटीं हेय्युं हारि उराहचि दोसतन, अस्के बच्चुं तट्टाना हारि मिमेट जमा कीसि निहतिर?” इंचि पूसकीतोर. अस्के, “पन्नेंड तट्टां” इंचि ओर जवाब हीतुर.
- 20 आनि “अल्हेने, एडुं हारिनतोन नालुं वेय्कुना मंदि तित्तस्के, बच्चुं तट्टाना हारि तुकडां जमा कीतिर?” इंचि येसु पूसकीतोर. अस्के, “एडुं तट्टां” इंचि ओर वेहतुर.
- 21 “अयते मीकु इंकागुडा तेळियसेक हिल्लेना?” इंचि येसु इत्तोर.

येसु बेतसेदा नाटेना गुड्डिड मनकन बेस कीतोर

- 22 ओर बेतसेदा इनना नाटे एव्ता पजा इच्चुर लोकुल्क वरोर गुड्डिडन येसुनगा पीसि वासि, “निमे इन इट्टा,” इंचि विनंति कीतुर.
- 23 येसु आ गुड्डिडना कय पीसि नाटेना पलाते ओतोर. ओसि गुड्डिडना कळ्ळुकुने उस्कतोर. पजा ओनपोर्रो कय इर्सि, “इंदके नीकु बतलन्ना दिस्सेक मंतना?” इंचि पूसकीतोर.
- 24 अस्के आ गुड्डिड मनकल पोरो हळसि, “मनकालोर दिस्सेक मंतुर गानि ओर मराकु ताकताप मागुर-मागुर दिस्सेक मंतुर,” इंचि इत्तोर.
- 25 अस्के येसु मरा उंदि मल्का ओना कय्क, आ गुड्डिडना कळ्ळुकुना पोरो इरतोर. ओर उंदेतीर हळ्ळता पजा नदर वाता. ओन्क अन्नि साप-साप दिसालय दलगातां.
- 26 अस्के, “निमे नाटे होळियाकोटा, सवरगा नीवा लोन होन,” इंचि येसु ओन लोहचीतोर.

येसुन “किरिस्तु” इंचि पत्रु ओपुकुंतोर
(मत्तयाल 16:13-20; लूकाल 9:18-21)

27 येसु, ओना सिस्स्युल्क कैंसरिया पिलिपि सहरता पकापीसि मत्ता नाहकुने होत्तुर. होननेके, “नना बोन आंदुन इंचि लोकुल्क इंतुर?” इंचि येसु सिस्स्युल्कन पूसकीतोर.

28 अस्के सिस्स्युल्क इल्हा वेहतुर. “इच्चुर इंतुर निमे बापतिस्मा हियना योहानुन आंदिन, इंका इच्चुर इंतुर निमे एलियाल आंदिन, इंका बोरो इंतुर निमे पेनदा कबुरतोरा लोप्पोटाल बोनो वरोन आंदिन,” इत्तुर.

29 “अय्ते, नना बोन आंदुन इंचि मिमेट इंचेके मंतिट?” इंचि येसु ओर्कुन पूसकीतस्के, “निमे किरिस्तुन आंदिन,” इंचि पत्रु इत्तोर.

30 अस्के, “नावा बारेमते बोर्के वेहमत,” इंचि येसु ओर्क गट्टेगा वेहतोर.

येसु ओना हामुरता बारेमते वेहंतोर
(मत्तयाल 16:21-28; लूकाल 9:22-27)

31 पजा ओना सिस्स्युल्कुंक इल्हा कराहलय दलगतोर. “यहुदि पेद्दाल्क, पेद्दा पेर्मालोर आनि दर्मसास्त्रम कराहना गुस्लकुनाहेंदाल मनकना रूपमते पुटतोन नाकु तिप्पल्क अर्रापीता. ओर हय्साकोटा आसि नाकुन हक्कानुर. गानि नना हासि मूड रोजकुंक मर्रा जीवाते तेदंतन,” इत्तोर.

32-33 येसु इद पोल्लेतुन कुल्ला-कुल्ला वेहतोर. अय्ते पत्रु येसुन अलग ओसि रांगतोर. गानि येसु सिस्स्युल्कनहेके तिरियसि हळसि पत्रुन, “अरे देय्यम, नावा मुन्नेटाल पेय्से होन. निमे मनकालोरा तेल्विते वळकसंतिन, पेनदा विचारमते वळकसेक हिल्लिन,” इंचि ओन रांगतोर.

34 पजा येसु ओना सिस्स्युल्कन आनि लोकुल्कन ओनहेके केय्से इल्हा वेहालय दलगतोर, “ओक्कला बोरन्ना मनकल नावा पज्जो वायना इत्ते, ओर ओना पूरा इस्टाल्क होळसिसि सतता कूस तेहकुंचि नावा पज्जो वायिर.

35 बारित्ते, बोर अय्ते ओना जीवातुन पिसागोटालय हळंतोर, ओर ओना जीवातुन पोगोटकुंतोर. गानि बोर अय्ते नाहाटीं आनि बेसता कबुरताहाटीं जीवा हींतोर, ओर ओना जीवातुन कापाळकुंतोर.

36 ओक्कला मनकल पूरा दुनियातुन संपलिच्चि, ओना जीवातुन पोगोटकुत्ते ओन्क बता पायदा आंता?

37 हिलाकोटे मनकल ओना जीवाहाटीं बदला बतल हियानुर?

38 बोगमतनमते, पापमते निडिस मत्ता इद पीळितोर नड्डुम बोर अय्ते नाकुन, नावा पोल्लेन वेहालय सिग्गु अरंतोर, मनकना रूपमते पुटतोन नना बस्के अय्ते पवित्र दूतनतोनि, नावा बाबाना महिमाते वाकन, अस्के असोटा मनकन नावोर इनालय ननागुडा सिग्गु अरंतन,” इंचि वेहतोर.

9

1 मर्रा येसु ओर्कुन इल्हा इत्तोर. “नना मीकु निजम वेहांतन, इग्गे नित्तिसि मनानोरा लोप्पोटाल इच्चुर इल्हा मंतुर गदा, पेनदा राज्येमतुन दाना ताकततोनि वातद हळवा, ओर्कु हामुर वायो,” इत्तोर.

येसुना रूपम मारियमळ
(मत्तयाल 17:1-13; लूकाल 9:28-36)

2 हासं रोजकु आतारित्ते येसु पत्रुन, याकोबुन आनि योहानुन पीकुंचि उंदि एत्तु गुट्टापोर्रीं होत्तोर. अगा ओरा मुन्ने ओना रूपम मारियता.

3 ओना कपडिं इच्चोर तेल्लगा मेर्सेक मत्तां गदा, बूमि पोर्रींटोर बोरै साकलल अच्चोर तेल्लगा आयनाल हुक्का पर्रीं.

4 अस्के मूसाल आनि एलियाल* येसुनतोनि वळकानद ओर हळतुर.

5-6 हळसि ओर इरगा वेरियतुर. अदुनहाटीं पत्रु येसुनतोनि बतल वळकना अद तेळियका, “गुरु! मनम इग्गे मनमळ बेस मंता. उंदि नीहाटीं, उंदि एलियानाहाटीं, उंदि मूसानाहाटीं मोमोट मूड गळसैं वांटोम,” इंचि इत्तोर.

7 अस्केने उंदि मब्बु तेर्पे वासि ओर्कुन मुच्ता. आ मब्बुनाल, “ईर नावा पावरमगल्ला मर्रि आंदुर, ईना पोल्लें केंजट,” इंचि ओर्क अल्किर केंजावाता.

8 अस्के अचानक ओर नालुं-मूलां हळतुर गानि येसुक तप्पा अगा बोरै दिसा हिल्लुर.

9 ओर गुट्टा पोर्रींटाल हिळु रेय्नेके, “मनकना रूपमते पुटतोन नना हामुरताल मर्रा तेदनदाका, गुट्टापोर्रीं मिमेट बतल अय्ते हळतिरो अद बोर्के वेहमत,” इंचि येसु ओर्क गट्टेगा वेहतोर.

10 ओर अद पोल्लेतुन ओरा मनसुनेन इरतुर गानि “हातोरा लोप्पोटाल मर्रा जीवाते तेदमळ, इत्ते बतल?” इंचि ओर वरोंक-वरोर वळककुनालय दलगातुर.

11 पजा ओर येसुन, “किरिस्तुंकन्ना मुन्ने, एलियाले वायमळ गावाले इंचि दर्मसास्त्रम कराहना गुस्लक बारि इंतुर?” इंचि पूसकीतुर.

12 अस्के येसु ओर्क इल्हा वेहतोर. “एलियाल तप्पाकोटा मोदाला वांतोर. वासि मोदाला बल्हा मत्ता अल्हे अन्निन कींतोर. गानि मनकना रूपमते पुटतोन नाकु वेल्ले तकलिप बोगांचा पीता, नाकुन हय्सुर इंचि दर्मसास्त्रमते बारि रासि मंता?

13 गानि नना मीकु वेहानद बतल इत्ते, एलियाल वासे मंतोर. ओना बारेमते दर्मसास्त्रमते बल्हा रासि मंता, अल्हेने लोकुल्क ओरा मनसुक वाताप ओनतोनि कीतुर,” इंचि येसु ओर्क वेहतोर.

* 9:4 मूसाल आनि एलियाल मूसाल आनि एलियाल पेनदा कबुरतोर आंदुर.

देय्यम पीता पेडन येसु बेस कीतोर
(मत्तयाल 17:14-20; लूकाल 9:37-43)

14 पजा येसु आनि सिस्स्युल्क, हिळु मत्ता सिस्स्युल्कुनगा वासि हळतस्के, ओरा सुट्टु वेल्लेन लोकुल्क जमा आसि मत्तुर. आनि दर्मसास्त्रम कराहना गुस्लक ओरतोनि लोल्लि कीसेके मत्तुर.

15 अगा मत्ता लोकुल्क येसुन हळसि इचंन्रमते अरतुर, पजा अंतोरगुडा बिराना विच्चि होंचि ओन्क जोहार कीतुर.

16 अस्के येसु, “मिमेट ईरतोनि बारि वदुरकुंचेक मंतिट?” इंचि दर्मसास्त्रम कराहना गुस्लकुन पूसकीतोर.

17 अस्के आ मंदिताल बोरो वरोर येसुन, “गुरु, ना मर्रिक मूका-देय्यम पीता, ओन निहगा पीसि तत्तन.

18 देय्यम ओन बस्के अय्ते पीता, अस्के ओन अग्गेन हिळु हुक्कंता. ओना तोळदाल पोंगुर पेय्संता. ओर कर्रा-कर्रा पल्कु कोर्कसेके अल्हेने गट्टिगा आंतोर. इद देय्यमतुन ओना लोप्पोटाल गेदमट इंचि नीवा सिस्स्युल्कुंक वेहतन गानि ओरतोनि आया पर्राहिल्ले,” इंचि वेहतोर.

19 अस्के येसु ओर्कुन, “अरे विस्वासम तक्को पीळितोरिटा! नना बदवेरदाका मीतोनि मनकन? बदवेरदाका नना मीकुन सहन कीकन? ओन नाहेके पीसि वट,” इंचि इत्तोर.

20 ओर आ पेडन येसुनगा पीसि वातुर. देय्यम येसुन हळता-हळुळे, पेडन तेल्हाचि हिळु अरहता. आ पेडल तोळदाल पोंगुर पेचाहसेके पोर्लालय दल्गतोर.

21-22 अस्के, “नी मर्रिक इल्हा बस्केटाल आसेक मंता?” इंचि येसु पेडाना बाबोन पूसकीतोर. अय्ते ओर, “सिन्सकेटाले इल्हा आसेक मंता. बच्चुंगो मल्कां तळमिटे अरहचि, एते अरहचि हक्कालय हळता गानि निमे मापोर्गे दया वासि, माहाटी बतलन्ना सहायम कियापर्ते कीम,” इंचि इत्तोर.

23 येसु ओन, “कियापर्ते कीम, इत्ते बतल इत्ताप? पेनदापोर्गे विस्वासम कियानोर्क अन्नि आया परांतां,” इंचि इत्तोर.

24 अस्केने पेडाना बाबल कांडेर तेंडसेके, “नना विस्वासम कीतन सामि, नावा विस्वासम गट्टिगा आयालय सहायम कीम” इंचि इत्तोर.

25 वेल्लेटुर लोकुल्क विच्चि वासि गर्दि कियानद हळसि येसु आ देय्यमतुन, “सेव्दि-मूका देय्यमतुना, नना नीकु हुकुम हीतन, ईनगटाल पलाते पेयसा, ईन मर्रा बस्केने पिय्या,” इंचि गदरिचतोर.

26 अस्के आ देय्यम ओन जोरसे तेल्हाचि, वरगेय्सि आ पेडाना लोप्पोटाल पेय्सि होत्ता. अस्के पेडल हातोनलेसी आतोर. वेल्लेटुर लोकुल्क ओन हातोर इत्तुर.

27 गानि येसु ओना कय पीसि तेहातस्के ओर तेदसि निल्लतोर.

28 पजा येसु लोन होतस्के बोरे हिल्वद हळसि सिस्स्युल्क येसुनगा वासि, “आ देय्यमतुन मोमोट बारि गेदमा पर्रा हिल्लोम,” इंचि पूसकीतुर.

29 येसु ओर्कुन, “इसोंटा देय्यमतुन सिराप पारतनातोने गेदमा पर्रांतोम,” इंचि इत्तोर.

येसु ओना हामुरता बारेमते वेहंतोर
(मत्तयाल 17:22-23; लूकाल 9:43-45)

30-31 पजा ओर अगटाल पेय्सि गालिल राज्येमताल होंचेक मत्तुर. ओर होनानद बोर्कन्ना तेळियमळ येसुंक इस्टम मनाहिल्ले. बारित्ते येसु ओना सिस्स्युल्कुंक, “मनकना रूपमते पुटतोन नाकुन, वरोर दोकाते पीसि, लोकुल्कुना कय्दे हीतोर. ओर नाकुन हक्कानुर गानि, मूड रोजकु आतंका नना मर्रा जीवाते तेदंतन,” इंचि कराहचेके मत्तोर.

32 गानि येसु वेहता पोल्ले ओर्क तेळिया हिल्ले. आनि ओन पूस कियालयगुडा ओर वेरियतुर.

अंतोर्कन्ना पेद्दा बोरे इंचि येसु वेहमळ
(मत्तयाल 18:1-5; लूकाल 9:46-48)

33 ओर कपर्नाहमते एवसि उंदि लोते मत्तस्के, “हर्रि पीसि वायानेके मिमेट बतल वळकसेक वातिट?” इंचि येसु सिस्स्युल्कुन पूसकीतोर.

34 गानि “अंतोर्कन्ना पेद्दा बोरे?” इंचि ओर वरोंक वरोर वळकसेक वातुर. अदुनहाटी ओर चुपचाप मत्तुर.

35 अस्के येसु उद्दिदिसि ओना पन्नेंड सिस्स्युल्कुन केय्सि ओर्कुन इल्हा इत्तोर. “बोर अय्ते पेद्दा आंतन इनकुंतोरो, ओर अंतोर्कन्ना सिन्नोड आसि अंतोरा सेवा कियानोर आयापीता,” इंचि ओर्क वेहतोर.

36 वेह्चि, वरोर सिन्ना पेडन ओरा नड्डुम निलाहतोर. पजा ओन दग्गेरा पीकुंचि ओर्कुन इल्हा इत्तोर.

37 “बोर अय्ते ई सिन्ना पेडनलेसी आसि मनानोन नावा पोरोलते ओप्कुंतुर, ओर नाकुनगुडा ओप्कुंतुर. बोर अय्ते नाकुन ओप्कुंतुर ओर सिराप नाकुने आयो गानि नाकुन लोहतोनगुडा ओप्कुंतुर,” इंचि वेहतोर.

मनाकु विरोदमते हिल्वोर मनोरे आंदुर
(लूकाल 9:49-50)

38 अस्के योहान येसुन, “गुरु! वरोर मनकल नीवा पोरोलते देय्याल्कुन पेचाहनेके मोमोट हळतोम, मालेसी ओर नी पज्जो ताकानोर आयोर. अदुनहाटी अल्हा कियमा इंचि मोमोट ओन आपतोम,” इत्तोर.

39 अस्के येसु ओन इल्हा इत्तोर. “बोर अय्ते ना पोरोलते अद्बूतामाता कबाहक कीतोरो, ओर नावा विरोदमते बिराना कराब वळका पर्राँर, अदुनहाटी ओन आपमट.

- 40 बारित्ते बोर अय्ते मनाकु विरोदमते हिल्लोर, ओर मना बाजुनोरे.
 41 नना मीक निजम वेहांतन, मिमेट किरिस्तुना सिस्युल्क इंचि मीक बोरन्ना गिलासमेड एर उनालय हियानय्ते, ओन्क तप्पाकोटा इनाम दोर्कता.
 42 नापोर्रो विस्वासम कियना ई सिन्ना पेडानसंतोन बोरन्ना पापमते अरहते, ओना बोळगेक जोत्ता बंडा दोहचि समुद्रमते दोब्बुतेने बेस मनंता.
 43-44 ओक्कला नीवा कय नीकुन पापम किया वेहते, दान नर्किसि पोहा. बारित्ते रोंडु कय्क मंचि बस्केने पिर्रकोटा बगाबगा पोत्तना तडमि मनना नरकमते होननदानकन्ना, तोंटि कय आसि पिस्वरते होनमळे नीहाटी बेस.†
 45-46 अल्हेने, ओक्कला नीवा काल नीकुन पापम किया वेहते, दान नर्किसि पोहा. बारित्ते रोंडु काल्क मंचि नरकमते होननदानकन्ना, कूटाल आसि पिस्वरते होनमळे नीहाटी बेस मनंता.‡
 47-48 अल्हेने, ओक्कला नीवा कळु नीकुन पापम किया वेहते, दान तेंडसि पोहा. बारित्ते रोंडु कळ्कु मंचि नरकमते होननदानकन्ना, उंदि कळ्दे पेनदा राज्येमते होनमळे नीहाटी बेस मनंता.
 49 बारित्ते हरेक मनकन तळमितोनि होव्वोरलेसी कियमळ जर्गता.
 50 होव्वोर बेसे मनंता गानि होव्वोर, होव्वोरलेसी रसि वायाकोटे अव्टे मर्रा बल्हा होव्वोर रसि तरा परांतोम? अल्हेने मिमेटगुडा होव्वोर रसिते बेस वरोंक-वरोर कलियसि-मेलियसि सांतिते मंदना,” इंचि येसु वेहतोर.

10

सोडसिट्टिता बारेमते परिसिल्क पूसकीतुर

- 1 पजा येसु अगटाल पेय्सि योर्दन बेरेड दाट्टिस यहुदिया एरियाते होत्तोर. अगागुडा लोकुल्क मंदानां मंदां ओनगा जमा आयालय दल्गतुर. अस्के येसु ओना अलवट परकारम ओर्क कराहलय दल्गतुर.
 2 अगा इच्चुर परिसिल्कगुडा वातुर. वासि येसुना पट्टु हळानाहाटी ओन इल्हा पूसकीतुर. “नियम परकारम, वरोर मनकल ओना मुत्तोन होळसिय्या वच्चा?” इत्तुर.
 3 अस्के येसु ओर्कुन, “मूसाल मीक बद आदेस हीतोर?” इंचि पूसकीतोर.
 4 अय्ते, “वरोर मनकल सोडसिट्टि हीसि, मुत्तोन होळसिय्या इंचि मूसाना आदेस मंता,” इंचि ओर येसुन इत्तुर.
 5 अस्के येसु ओर्कुन इल्हा इत्तोर. “मीवा मनसु बंडालेसी मत्ताहाटी मूसाल ई आदेसतुन मीकु रासतोर.
 6 गानि बस्के अय्ते पेन ई दुनियातुन कीतानो, अस्केन ओर्कुन मांडसा मुरतळ इल्हा इंचि कीता.
 7 अदुनहाटीगे मांडसा ओना यावन-बाबन होळसिसि, ओना मुत्तोनतोनि कलियसि मनंतोर.
 8 ओर इव्वुर उंदे मेंदुल आसि मनांतुर. ओर वेरे-वेरे आयुर गानि उंदे मेंदुल आंतुर.
 9 इल्हा पेने ओर्कुन कल्पताहाटी मनकल वेरे कियानायो,” इंचि वेहतोर.
 10 पजा, येसु लोन मत्तस्के इदुना बारेमते सिस्युल्कु मर्रा उंदि मल्का ओन पूसकीतुर.
 11 अस्के येसु ओर्कु इल्हा वेहतोर, “बोरन्ना ओना मुत्तोन बोगमतनम कारनम तप्पा वेरे कारनमते होळसिसि इंकुंदानतोनि मरमिं आयानय्ते, ओर मोदाटा मुत्तोना विरोदमते बोगमतनम कीताप आंतोर.
 12 अल्हेने ओक्कला मुत्तो दाना मुय्दोन होळसिसि इंकावरोनतोनि मरमिं आयानय्ते, अद बोगमतनम कीतद आंता.”

येसु सिन्ना पिलाल्कुंक आसिर्वाद हीतोर

- 13 उंदि रोज लोकुल्क ओरा पिलाल्कुनपोर्रो येसु कय ईसि आसिर्वाद हियना इंचि ओनगा पीसि वातुर, गानि सिस्युल्क ओर्कुन रांगतुर.
 14 गानि येसु ओर रांगानद हळसि ओर्कुन इल्हा इत्तोर. “पिलाल्कुन नाहेके वायाहीम्ट, ओर्कुन आपमट. पेनदा राज्येम इसंतोरदे आंद,
 15 नना मीक निजम वेहंतन, बोरे आयिर पेनदा राज्येमतुन सिन्ना पिलाल्कुनालेसी आसि स्विकार किय्युर, ओर पेनदा राज्येमते बस्केने होळिया पर्र,” इंचि वेहतोर.
 16 पजा आ पिलाल्कुन एक्कुचि, ओरा तल्लापोर्रो कय ईसि आसिर्वाद हीतोर.

सिरमंत मनकल पेनदा राज्येमते होनमळ वेल्ले कस्टम

- 17 येसु अगटाल पेय्सि हर्षि पीसि होननेके, वरोर मनकल विच्चि वासि काल्कुनपोर्रो अर्सि, “गुरु, निमे बेसतोन आंदिन. बस्केळ्क पिस्सना पिस्वरता वारसदार आयानाहाटी नना बतल कीते बेस?” इंचि पूसकीतोर.
 18 अस्के येसु ओन इल्हा इत्तोर, “नाकुन बारि बेसतोर इंतिन? बोरे बेसतोर आयोर, सिराप पेन उंदे बेसतद आंद.
 19 नीकु पेनदा आदेसकु अय्ते एरपाटे मंतां: बोने हक्कुमा, बोगमतनम कियमा, दोंगातनम कियमा, आबद्दम गवाइ हियमा, इंकावरोन पसांचमा, नीवा तल्लुर-बाबोना कदर कीम,” इत्तोर.
 20 अस्के, “गुरु, नना अय्ते इवन्नि सिन्नास्केटाल कीसेकेन वातन,” इंचि ओर येसुन इत्तोर.

† 9:43-44 इद वचनम कोन्नि पांडु लिपिने हिल्ले. ‡ 9:45-46 इद वचनम कोन्नि पांडु लिपिने हिल्ले.

- 21 येसु ओनहेके हळतोर. पावरम अनपिच्चि, ओन इल्हा इत्तोर. “निहगा उंदि पोल्ले तक्को मंता. होन, निहगा बतल अय्ते मंता अदुन पूरा अम्मिसि, गरिबोर्कुंक तूसि हीम. अस्के नीकु स्वर्गमते दनम दोर्कार, पजा नहगा वासि ना पज्जो ताका,” इत्तोर.
- 22 ओनगा सोम्मु वेल्लेन मत्ताहाटी, येसुना पोल्ले केंजसि ओना मोकम सिम्मरा आता. पजा दुक्कमते अगटाल पेय्सि होत्तोर.
- 23 अस्के येसु नालं-मूलां हळसि सिस्स्युल्कुन इल्हा इत्तोर. “सिरमंतुल्क पेनदा राज्येमते होळियमळ इत्ते वेल्लेन कस्टम!” इत्तोर.
- 24-25 ओना पोल्लें केंजसि सिस्स्युल्क इचंत्रम आतुर. गानि येसु मरुंदि मल्का सिस्स्युल्कुन इल्हा इत्तोर, “पिलाल्कुनिटा! वरोर सिरमंत मनकल पेनदा राज्येमते होळियमळकन्ना लोटापेटा सूदि बोंगाताल होनमळ अल्कगा मनंता,” इत्तोर.
- 26 इद केंजसि सिस्स्युल्कुंक वेल्लेन इचंत्रम आता. अस्के ओर-ओर, “अल्हा अय्ते मुक्ति बोर्क दोर्का परंता?” इंचि वळकालय दल्गतुर.
- 27 अस्के येसु ओराहेके हळसि, “मनकालोरतोनि अय्ते इद आयापर्री गानि पेनतोनि आंता. बारित्ते पेन अन्नि क्रिया परंता,” इंचि इत्तोर.
- 28 अस्के पत्रु, “हळा, मोमोट अय्ते मत्तद-हिलवद अन्नि होळसिसि नीवा पज्जो वातोम,” इंचि येसुन इत्तोर.
- 29-30 येसु ओन, “नना निजम वेहांतन. बोरे आयिर नावाहाटी, बेसता कब्रुताहाटी ओना लोन दारातुन, तम्महक-दादालोर्कुन, अक्कल-हेलाहकुन, तल्लुर-बाबोन, पिलाल्कुन, बूमि-जेगातुन होळसीतोर. ओन्क इंदकेने नूर अंताल्क एक्को लोन दारा, तम्महक-दादालोर्क, अक्कल-हेलाहक, तल्लुहक, पिलाल्क, बूमि-जेगा दोर्कार. ओन्क कस्टाल्क वायानुं गानि वायाना कालमते ओन्क बस्केळ्ळक पिस्सना पिस्वर दोर्कका मनो.
- 31 गानि मुन्ने मत्तोर वेल्लेटुर पज्जो आयानुर, पज्जोटोर मुन्ने आयानुर,” इंचि वेहतोर.

येसु ओना हामुरता बारेमते मर्रा उंदि मल्का वेहंतोर

- 32-34 येसु आनि ओनतोनि मत्तोर येस्सलेमतेके होंचेके मत्तुर. येसु अंटोर्कन्ना मुन्ने मत्तोर. ओना सिस्स्युल्क इचंत्रमते मत्तुर, ओना पज्जो ताकानुर वेंरैते मत्तुर. अस्के येसु ओना पन्नेड सिस्स्युल्कुन बाजुंक ओसि, “हळाट, मनम येस्सलेम होंचंतोम, अगा होत्ता पजा मनकना रूपमते पुटतोन नाकुन पेद्दा पेर्मालोर्कुना आनि दर्मसास्त्रम कराहना गुस्कुना कय्दे पीसि हियानुर. ओर नाकु हामुर सिक्साता आदेस हीसि, यहुदि आयवोरा कय्दे अप्पजेपनुर. अस्के ओर नाकुन सिडांचनुर, नापोर्री उस्कानुर, पोर्टेटे तन्नानुर, हक्कानुर. गानि मूड रोजकुंक नना मर्रा जीवाते तेदंतन,” इंचि मुन्ने जर्गना बारेमते सिस्स्युल्कुंक मर्रा वेहतोर.

याकोब, योहान येसुन विनंति कीतुर

- 35 पजा जब्दिना मर्क याकोब आनि योहान येसुनगा वासि, “गुरु, मोमोट बतल अय्ते तल्कंतोम अदुन माहाटी निमे कियमळ गावाले इंचि मा मनसु मंता,” इंचि इत्तुर.
- 36 येसु ओर्कुन इल्हा इत्तोर. “मीहाटी नना बतल कियाना इंचि मीवा मनसु मंता,” इंचि पूसकीतोर.
- 37 अस्के ओर, “निमे नीवा महिमाते राज्येम कियनेके नीवा तिना बाजुंक वरोन, डेमा बाजुंक वरोन उद्दाहीम,” इंचि येसुन इत्तुर.
- 38 गानि येसु ओर्कुन, “मिमेट बतल पूसकीसतिरो अद मीक तेळियसेक हिल्ले. नना बव कस्टाल्क अय्ते बोगांचना मंता, अबुन मिमेट बोगांचा परकिटा? हिलाकोटे नना बद बापतिस्मा एतंतनो, अद मिमेट एता परकिटा?” इंचि पूसकीतोर.
- 39 अस्के “हो, मोमोट तयार मंतोम,” इंचि ओर इत्तुर. अस्के येसु ओर्कुन इल्हा इत्तोर, “नना कस्टाल्क बोगांचताप मिमेट बोगांचा परकिट आनि नना एताना बापतिस्मा मिमेटगुडा एता परकिट.
- 40 गानि नावा तिना बाजुंक आनि नावा डेमा बाजुंक उपिचचना अदिकार नाक हिल्ले. अब जेगां बोराहाटी अय्ते तयार कीसि मंतांगो, ओर अगा उद्दंतुर,” इत्तोर.
- 41 ओर इत्ता पोल्लें केंजसि, अगा मत्ता कळमता पदि मंदि सिस्स्युल्क, याकोब, योहानुना पोर्री होंग आतुर.
- 42 अस्के येसु सिस्स्युल्कुन ओना दगोरा केय्सि, “यहुदि आयवोरा राजालोर ओरा जीतागाहकुन, ओरा कय्दा हिळु इर्ललय हळंतुर, अल्हेने ई दुनियाता पेद्दा मनकालोरगुडा सिन्ना मनकालोरपोर्री अदिकारम ताकसालय हळंतुर, इद मीकु एर्के.
- 43 गानि मिमेट मात्रम ओरालेसी कियानायो. मी लोप्पोटाल बोर अय्ते पेद्दा आयालय हळंतोरो, ओर मीवा सेवा कियानोर आयापीता.
- 44 अल्हेने मी लोप्पोटाल बोर अय्ते लीडर आंतन इंतोरो, ओर मीवा दासुड आयापीता.
- 45 बारित्ते मनकना रूपमते पुटतोन नना सेवा कियागोटकुनालय वाया हिल्लेन गानि वेरैतोरा सेवा कियालय आनि वेल्लेटोर्कुन पापमताल पेचाहलय ओराहाटी नावा जीवा हियालय वातन,” इत्तोर.

गुडिड बरतलमयना कळकुंक नदर वायमळ

- 46 पजा येसु, ओना सिस्स्युल्कु यरिहो सहरते एन्तुर. अगटाल मर्रा पेय्सनेके लोकुल्कुना पेद्दा मंदा ओरतोनि पेय्सता. तिमाउसना मर्री बरतलमय इनानोर गुडिड बिच्चागाड हर्दा पक्काते उद्दिदसि मत्तोर.
- 47 नासरेत सहरता येसु इगोटाल होंचेके मंतोर इंचि ओन्क तेळियतस्के ओर, “येसु, दाविद राजाना वंसमतोना! नापोर्री दया कीम,” इंचि जोरसे वरगेयतोर.
- 48 अस्के वेल्लेटुर लोकुल्क ओन, “चुपचाप मन” इंचि रांगतुर, गानि, “दाविद राजाना वंसमतोना, नापोर्री दया कीम,” इंचि ओर जोरसे मोत्कुनालय दल्गतोर.

49 अस्के येसु आगसि, “ओन केयट,” इंचि इत्तोर. अस्के ओर आ गुड्डिन केय्ति, “दैरनेम इर्ग, येसु नीकुन केयसंतोर तेदा,” इंचि इत्तुर.

50 अस्के ओर मुक्कुंचि मत्ता कपिडतुन तेंडसि पोहचि बिराना तेदसि येसुनगा वातोर.

51 अस्के येसु ओन, “नना नीहाटी बतल कियना इंचि नी मनसु मंता?” इंचि पूसकीतोर. अस्के, “गुरु, नावा कळकुना नदर दिस्सानाल कीम,” इंचि येसुन इत्तोर.

52 अय्ते येसु, “निमे होन, नीवा विस्वासमे नीकुन बेस कीता,” इंचि इत्तोर. अल्हा इत्ता इनुडे ओना कळकुंक नदर वासि ओरगुडा येसुना पज्जो होत्तोर.

11

येसु येस्सलेम होनमळ

1 पजा ओर अंतोर येस्सलेम सहरता दग्गेरा जयतुन मराकुना गुट्टापोर्रो मनना बैतपागे आनि बेतानिया इनना नाहकुना दग्गेरा एव्तर. पजा येसु ओना इव्वुर सिस्स्युल्कुन केय्ति,

2 ओर्क इल्हा वेहचि नाटे लोहतोर. “मी मुन्ने दिस्सना नाटे होंट. अद नाटे होळियता होळयुळे, बस्केने बोरे उदुवद उंदि गाडदि पोरि दोहचि मत्तद मीकु दिसंता, दान लेहकुंचि पीसि वट्टु.

3 ओक्कला अदुन पीसि वायनेके, इल्हा बारि कीसंतरि? इंचि बोरन्ना पूसकीति, सामिक दीना अब्सरम मंता इंचि वेहट. अस्के ओर बिराना अदुन इग्गे लोहानुर,” इत्तोर.

4 येसु वेहताप ओर अद नाटे होत्तुर. अगा हर्दा पक्काते उंदि लोता तल्पुना दग्गेरा गाडदि पोरि दोहचि मत्तद ओर्क दिसता. अस्के अदुन लेहत्तुर.

5 अगा नित्तिसि मत्तुर इच्चुर लोकुल्क हळसि, “मिमेट बतल कीसंतरि? गाडदि पोरिन बारि लेहसंतरि?” इंचि पूसकीतुर.

6 ओर येसु वेहतापे ओर्क वेहतस्के, आ लोकुल्क ओर्कुन होना हीतुर.

7 ओर अद गाडदि पोरिन येसुनगा तच्चि, दानपोर्रो ओरा कपडिं वाटतुर. अस्के येसु दानपोर्रो उदुतोर.

8 वेल्लेटुर लोकुल्क ओर केर्ता कपडिं तेंडसि, येसु होनना हर्दे तारतुर. इंचिच्चुर लोकुल्क अय्ते नेलिने मत्ता मराकुना कोम्मां नर्किसि हर्दे तारतुर.

9-10 येसुना पज्जो-मुन्ने ताकाना लोकुल्क वरगेयसेके इल्हा इनुदुर, “सामिना पोरोलते वायानोंक, पेनदा आसिर्वाद दोर्किकाटीं, होसन्ना! होसन्ना!* दाविदनालेसीं राज्येम कियालय वायानोंक, पेनदा आसिर्वाद दोर्किकाटीं, स्वर्गमते मंदना पेनदुक दन्यवाद,” इंचि इत्तुर.

11 इल्हा येसु येस्सलेम सहरते होळियतोर. पजा गुळितगा होंचि, सुट्टु अन्नि वस्तुकुन तिरियसि हळतोर. पोळ्दु होत्ता इंचि ओना पन्नेड सिस्स्युल्कुन पीसि बेतानिया नाटे होत्तोर.

पंडि हिलुवा अंजिर मरा

12 इंकुंदि रोजु येसु बेतानिया नाटेनाल वायनेके ओन्क कर्वेस्ता.

13 हरदाल इच्चुर लक्कु उंदि पच्चटा अंजिर मरातुन हळसि, दानकु पंडि मंतां बारे इंचि आ मरातगा होत्तोर. गानि आ मराकु आर्कि तप्पा बतांगे मनाहिल्लें. बारित्ते अद पंडिं हादाना वेला आयो.

14 अस्के येसु अद मरातुन, “इंदकेटाल नीवा पंडिं बस्केने बोरे तिन्नु,” इंचि इत्तोर. अद पोल्लेतुन ओना सिस्स्युल्कु केंजतुर.

गुळितगा अम्मनोर्कुन येसु गेदमंतोर

15 ओर येस्सलेम एव्ता पजा येसु गुळिते होत्तोर. अगा गुळिते बोर अय्ते अम्ममळ-अस्सुड कीसेक मत्तुर, ओर्कुन पलाते गेदुमतोर. अल्हेने कोत्तां अदला-बदला कियानोरा बल्लन आनि मोक्कु हियालय पावरेम पिट्टें अम्मनोर्कुना कुर्सिन मिळहाचि वाटतोर.

16 अल्हा कीसि गुळिताल बोने बदे वस्तु पीसि होनुळ-वायुळ किया हिया हिल्लोर.

17 पजा ओर्क इल्हा वेहालय दलगतोर. “नावा लोतुन दुनियाता अंतोर लोकुल्क पारतना कियाना जेगा इनानुर, इंचि दर्मसास्त्रमते रासि हिल्लेना? गानि मिमेट दीन दोंगाल्क मक्कना जेगा कीतिर,” इत्तोर.

18 इल्हा अंतोर लोकुल्क येसु वेहाना पोल्लें केंजसि इंचंत्रम आयुंदुर. अदुनहाटीं पेर्माळोर, दर्मसास्त्रम कराहना गुरुल्क येसुन हक्कालय हळंदुर. गानि ओन अल्हा बतलन्ना कियालय ओर वेरियुंदुर.

19 पजा येसु, ओना सिस्स्युल्कु पोळ्दु होत्तारिते येस्सलेमताल पेय्ति होत्तुर.

वतसि होत्ता अंजिर मरा

20 इंकुंदि रोजु हक्केरेने मर्ग येस्सलेमतेके वायानेंके ओर अद अंजिर मरातुन हळतुर, अस्के अद मरा हिहकुनाल अय्ते कोस्सादाका पूरा वतसि होंचि मत्ता.

* 11:9-10 होसन्ना इत्ते-पेनदुन तलसकुनमळ.

21 येसु अद मरातुन इत्ता पोल्ले पत्रुंक मति वाता. अस्के ओर येसुन, “अद ह्ळा गुरु!† निमे सापनेम हीता अंजिर मरा वतसि होत्ता,” इंचि इत्तोर.

22-23 अस्के येसु ओर्कु इल्हा जवाब हीतोर. “मिमेट पेनदापोर्री विस्वासम इर्गट. नना मीकु निजम वेहांतन, बोरन्ना इद गुट्टातुन, ‘इग्गोटाल तेदसि समुद्रमते होंचि अर्रा’ इंचि बतले अनमानम हिलाकोटा विस्वासमते इनानय्ते, अद होंचि अर्रा.

24 अदुनहाटीं नना मीकु वेहांतन, मिमेट विस्वासमतोनि पारतनाते बतल तल्किना, अद मीकु दोर्कता इंचि विस्वासम कीम्टु, अस्के अद मीवादे आंता.

25 अल्हेने मीवा मनसुनेगिटा बोना पोरोनना पगा मत्ते, मिमेट पारतना कियालय निततस्के मुन्ने ओन मापि कीम्टु. अस्के स्वर्गमते मंदना पेनबाबालगुडा मीवा तप्पुकुन मापि कीतोर.

26 मिमेटगिटा इंकावरोना तप्पुकुन मापि कियाकोटे, स्वर्गमते मंदना पेनबाबालगुडा मीवा तप्पुकुन मापि किय्योर,” इंचि वेहतोर.‡

येसुना अदिकारमता बारेमते पूसकियमळ

27 ओर येस्सलेम सहरते मर्रा वातस्के, येसु गुळिते तिरियसेक मत्तोर. अस्के पेर्मांलोर, दर्मसास्त्रम कराहना गुरूक आनि यहुदि पेद् दाल्क येसुनगा वातुर. वासि,

28 “निमे ई कबाहक बद अदिकारमते कीसंतिन? नीकु ई कबाहक कियालय अदिकारम बोर हीतोर?” इंचि पूसकीतुर.

29 अस्के येसु ओर्कुन इत्तोर. “ननागुडा मीकुन उंदि सवाल पूसकीतन. मिमेट जवाब हियानय्ते, नना बद अदिकारमते इव कबाहक कीसंतन इत्तद वेहंतन.

30 अय्ते जवाब हीम्टु, योहानुंक बापतिस्मा हियाना अदिकारम बगाटाल दोर्कता? स्वर्गमताला हिलाकोटे मनकालोराहेंदाल दोर्कतना?” इत्तोर.

31-32 अस्के, ओर-ओरे इल्हा वळ्ळुकुनालय दल्गतुर, “ओक्कला स्वर्गमताल दोर्कता इंचि मनम इनानय्ते, ‘मिमेट योहानुन बारि नम्मिर’ इंचि इनानुर. ओक्कला मनम मनकालोराहेंदाल दोर्कता इनानय्ते, लोकुल्कुना वेंरे! बारित्ते योहान निजमे पेनदा कबुरतोर इंचि ओर नम्मंतुर,” इत्तुर.

33 अदुनहाटीं ओर, “माक एर्का हिल्ले,” इंचि इत्तुर. अस्के, “अल्हा अय्ते, इव कबाहक बद अदिकारमते कीसंतनो ननागुडा मीकु वेहोन,” इंचि येसु इत्तोर.

12

1 अस्के येसु ओर्कु उंदि वेसुडि वेहमळ सुस्व कीतोर, “वरोर मनकल अंगुर तोटा कीतोर. आ तोटा सुट्टु गूरे दोहाचि तोटाता लोप्पेन अंगुर पंडिना पानकम तेंडालय उंदि पोक्का तव्वि, दाना दग्गेरेने कावेलहाटीं उंदि मंडा वाटतोर. पजा तोटातुन वेंरेतोर्क बटाइक हीसि, वेंरे देसेम होत्तोर.

2 पजा बस्के अय्ते अंगुर पंडिं कोय्याना वेला वाता, अस्के ओरागटाल पंडिना तूस एतालय ओना वरोर दासुन बटाइतोरहेके लोहतोर.

3 गानि बटाइतोर आ दासुन पीसि पक्का तंचि, उत्ता कय्के वापस लोहतुर.

4 पजा मालक इंकावरोन दासुन बटाइतोरहेके लोहतोर. आ बटाइतोर ओना तल्ला पयाहचि ओन कदर हिलाकोटा कीसि लोहतुर.

5 मालक मर्रा इंकावरोन दासुन ओरहेके लोहतोर, ओर ओन हक्कतुर. अस्के मालक इल्हा इंका वेल्लेन दासुल्कुन लोहतोर. गानि बटाइतोर इच्चुर्कुन तंतुर, इच्चुर्कुन बारे हक्कतुर.

6 आकिरते मालकनगा ओना पावरमगल्ला मर्री वरोरे मिगिल्लिस मत्तोर. अस्के मालक, ‘नावा मर्रिन बेस कदर कियानुर’ इनकुंचि ओरहेके लोहतोर.

7 गानि बटाइतोर ओर वायानद ह्ळसि, ‘ईर अय्ते वारसदार आंदुर. दट ओन मनम हक्ककोम, अस्के ओना जायदाद मनाक आयार,’ इंचि वरोक-वरोर इत्तुर.

8 पजा ओन दोर्कापीसि हक्किसि, तोटाता पलाते ओसि पोहचीतुर.

9 इंदके अंगुर तोटाता मालक वासि ओर्कुन बतल कियानुर? ओर वासि बटाइतोर्कुन हक्किसि अद तोटातुन वेंरेतोर्क अप्पजेपनुर,” इत्तोर.

10-11 पजा येसु ओर्कुन इल्हा इत्तोर. “मिमेट दर्मसास्त्रमते बस्केन हदवा हिल्लिरा?

“बद बंडातुन अय्ते मिस्त्रिल्क, कबळ्ळक ओज्जो इंचि हय्सा हिल्लुर,

अदे बंडा, सेंकु मूलाता पुनादि बंडा आता.

इद सामि कीता कबळ आंद, इद मना नदरते इचंत्रमाता कबळ आंद,” इत्तोर.

12 पजा दर्मसास्त्रम कराहना गुरूक आनि पेद् दा पेर्मांलोर्क, येसु वेहता वेसुडिं कैजसि, “ईर मनाकुने इंचंतोर,” इंचि एरपाट कीतुर. अदुनहाटीं ओर येसुन दोर्का पियालय ह्ळतुर. गानि लोकुल्कुना वेंरेक ओन पिय्याकेन होळसि होत्तुर.

कैसर राजांक कर दोहना बारेमते

13 पजा, येसुन ओना पोल्लेन लोप्पेन दोर्का पिय्याना इंचि इच्चुर परिसिल्लुकुन आनि इच्चुर हेरोद राजाना मनकालोर्कुन येसुनगा लोहतुर.

† 11:21 गुरु गुरु, रब्बी उंदि पोल्ले आंदुर. ‡ 11:26 इद वचनम कोन्नि पांडु लिपिने हिल्ले.

14 ओर येसुनगा वासि इल्हा इत्तुर. “गुरु, निमे निजम वळकानोन आंदिन, बोर बतल इनिनागानि दाना पिकिरगुडा किथ्यिन, निमे लोकुकुना मोकम हळसि वळिकन, इंका पेनदा हर्दा बारेमते सत्तेमते कराहंतिन इंचि माक एरपाटे मंता. इंदके माकु वेहा, नियम परकारम, कैसर* राजांक कर दोहमळ न्यायमेना, आयोना?” इत्तुर.

15 येसु ओरा मनसुना कराब पिलान एरपाट कीसि, ओर्कुन इल्हा इत्तोर. “मिमेट बारि नावा पट्टु हळ्यांतिर? नाकु उंदि एंडि बंडि हुप्सट,” इत्तोर.

16 ओर उंदि एंडि बंडि हुपिस्तुर. अस्के येसु ओर्कुन इल्हा इत्तोर. “इद एंडि बंडिपोर्री बोना पोटुवा आनि पोरोल मंता?” इत्तोर. “कैसर राजानद” इंचि ओर इत्तुर.

17 पजा येसु, “बद कैसर राजानद मंता, अद कैसर राजांक हीम्टु. बद अयते पेनदाद मंता, अद पेनदुक हीम्टु,” इंचि ओर्कुन इत्तोर. अस्के ओना पोल्लें केंजसि ओर वेल्लेने इचंत्रम आतुर.

सदुकिर येसुन पसांचालय हळंतुर

18 इच्चुर सदुकिर येसुनगा वातुर (हासि मर्रा जीवाते तेदमळतुन ईर नम्मुर.) वासि इल्हा सवाल पूसकीतुर.

19 “गुरु, मूसाना नियम परकारम, वरोर मनकल पिलाल्क आयाका मुन्नेन हासि होंचि ओना मुत्तो मत्ते, दानतोनि ओना तम्मुर मरमि आसि, हातोना वंसमताहाटीं पिलाल्क कनना इंचि रासि मंता.

20 अयते, एडुर दादाल-तम्मुहक मत्तुर. ओरा लोप्पोटाल पेदूदोड मरमि आतोर, गानि पिलाल्क आयाका मुन्नेन ओर हातोर.

21 हातस्के ओना पज्जोटोर दानतोनि मरमि आतोर, ओरगुडा पिलाल्क आयाका मुन्नेन हातोर. अल्हेने ओना पज्जोटोरगुडा दानतोनि मरमि आतोर, ओरगुडा पिलाल्क आयाका मुन्नेन हातोर.

22 इल्हा ओर एडुरगुडा दानतोनि मरमि आसि पिलाल्क आयाका मुन्नेन हातुर. आकिरते अद मुरतळगुडा हाता.

23 अयते हातोर अंतोर मर्रा जीवाते तेदतस्के, आ एडुर लोप्पोटाल अद बोना मुत्तो आयार? बारित्ते ओर एडुरगुडा दान मरमि आसि मत्तुर,” इत्तुर.

24 अस्के येसु ओर्कुन इल्हा इत्तोर. “मिमेट दर्मसास्त्रमतुन आनि पेनदा ताकततुन एरपाट कियाका दान मिमेट तप्पु अर्तम कीकुंचतिर.

25 बारित्ते ओर हामुरताल जीवाते तेदानुर अस्के, ओर मरमि आयुर, मरमि कीसिगुडा हिथ्युर. गानि ओर स्वर्गमता पेनदा दूनलेसीं मनांतुर.

26 हातुर मर्रा जीवाते तेदाना बारेमते पेन, ‘नना अब्राहामुना पेनदुन, इसाकुना पेनदुन आनि याकोबुना पेनदुन’ इंचि दर्मसास्त्रमतै पोत्तना पोदाता गटना जग्निके मूसांक वेहता, अदुन मिमेट हदवा हिल्लिरा?

27 अद हातुरा पेन आयो गानि जीवाते मत्तुरा पेन आंद. मिमेट वेल्ले तप्पु कीसेक मंतिट,” इंचि इत्तोर.

अन्निकन्ना पेदूदा आदेस

28 ओर वदुरकुंचेक मत्तद केंजसि, अच्चोटेन वरोर दर्मसास्त्रम कराहना गुरु अगा वातोर. येसु ओर्क बेस जवाब हीतद हळसि, “गुरु, पेन हीता आदेसकुनाल मेन आदेस बद आंद?” इंचि पूसकीतोर.

29 अस्के येसु ओन्क इल्हा जवाब हीतोर. “ए इझाएल! इद केंजा, अन्नि आदेसकुनाल इद मेन आदेस आंद: मावा पेने सामि आंदुर.

30 निमे नीवा सामि आता पेनदुन पूरा मनसुनाल, पूरा आत्माताल, पूरा बुद्धिताल, पूरा ताकतताल पावरम कीम.

31 रोंडो आदेस बद इत्ते, नीवद निमे बच्चोन पावरम कीतिनो, अचोने पावरम इंकावरोनगुडा कीम. इव रोंडुन होळसि वेरे पेदूदा आदेस बदूदे हिल्ले,” इत्तोर.

32 अस्के दर्मसास्त्रम कराहना गुरु येसुन, “गुरु, निमे सत्तेम वळकतिन. पेन उंदे आंद, दान्क तपिच्चि इंकुंदि पेन हिल्ले.

33 अदुनहाटीं कमुरबलि कियानदानकन्ना, मोक्कुल्क हियनदानकन्ना पूरा मनसुनाल, पूरा आत्माताल, पूरा बुद्धिताल, पूरा ताकतताल मनम पेनदुन पावरम कियमळे बेस आंद. अल्हेने मनद मनम पावरम कीतच्चोने इंकावरोनगुडा पावरम कियना.” इंचि इत्तोर.

34 अल्हा ओर तेल्चिते वेहतद केंजसि येसु ओन, “निमे पेनदा राज्येमकु वेल्ले लक्कु हिल्लिन,” इंचि इत्तोर. दाना पजा येसुन बदूदे सवाल पूसकियालय बोर्कु हिम्मत आयाहिल्ले.

किरिस्तु बोना मर्रि आंदुर?

35 येसु गुळिते पेनदा पोल्लें कराहनेके ओर्कुन इल्हा इत्तोर. “किरिस्तु दाविदना मर्रि आंदुर, इंचि दर्मसास्त्रम कराहना गुरुल्क बल्हा इना परांतुर?” इत्तोर.

36 इद पोल्लेतुन कुद दाविद पवित्र आत्माते निंडसि इल्हा इत्तोर,

“बदवेरदाका अयते नीवा पगातोर्कुन, नीवा काल्कुनगा तर्रोर्न,

अदवेरदाका नावा तिना बाजुंक उद्दिदिसि मन,

इल्हा सामि, नावा सामिन इत्तोर.”

* 12:14 कैसर इद राजाना पोरोल आयो. रोम सरकारते अन्निटकन्ना पेदूदा पदवि आंद.

37 इल्हा दाविद ओन, सामि इंचि इत्तोर. अय्ते किरिस्तु दाविदना मरि बल्हा आया परांतोर? इत्तोर. अगा मत्ता लोकुल्क येसुना पोल्ले बच्चोरो गम्मते केंजतुर.

दर्मसास्त्रम कराहना गुस्कुनलेसीं किया मनि

38 येसु ओर्क कराहसेके इल्हा इत्तोर. “दर्मसास्त्रम कराहना गुस्कुनाल उसारते मंट. पोरोटाल हिळुदाका पोळ्गु अंगि केसिं तिरियमळ, हाटुमकुने जोहार वेहागोटकुनमळ ओर्क बेस अनपिचंचता.

39 इंका दर्मसास्त्रम कराहना लोहकुने, कुळपुकुने पेद्दाल्क उद्दाना जेगाते उदमळ इत्ते ओर्क वेल्ले इस्टम.

40 ईर मुंडामोस्ता मुर्ताहकुन मुळहंतुर, लोकुल्कुक हुप्सालय वेल्लेनेजेम पारतना कीतुर. गानि ईर्क मात्रम पेन अंतोर्कन्ना एक्को सिक्सा हियार,” इंचि इत्तोर.

मुंडामोस्ता मुरतळ रौंडु कोत्तां वाटमळ

41 येसु गुळिते दान पेटीता मुन्ने उद्दिसि, लोकुल्क दान पेटीते कोत्तां वाटनद हळसेक मत्तोर. वेल्लेटुर सिरमंत लोकुल्क वेल्लेने कोत्तां वाटतुर.

42 पजा मुंडामोस्ता उंदि गरिब मुरतळ वासि रौंडु रागि कोत्तां वाटता. अबुना विलुवा वेल्ले तकको मत्ता.

43-44 अस्के येसु ओना सिस्कुन दगोरा केय्सि इल्हा इत्तोर. “नना मीक निजम वेहांतन, ई मुंडामोस्ता गरिब मुरतळे अंतोर्कन्ना एक्को दानम कीता. बारित्ते इगे सिरमंत लोकुल्क ओरा दनमताल दानम कीतुर, गानि इद गरिब मुंडामोस्ता मुरतटगा रौंडे रागि कोत्तां मत्तां. अद अबुनगुडा इत्ते दाना पिस्वरताहाटीं इरतादानगुडा पेनदुक वाटसीता,” इत्तोर.

13

गुळि नासडेम आयाना बारेमते येसु वेहमळ

1 येसु गुळिताल पलाते पेय्सि वातस्के ओना सिस्कुनाल वरोर सिस्कुड येसुन, “गुरु, हळा! बच्चोर पेद्दा बंडां, बच्चोर बेसता बंगलां,” इंचि इत्तोर.

2 अस्के येसु ओन इल्हा इत्तोर. “बंडाने दोहतव पेद्दा-पेद्दा बंगलां हळसेक मंतिन गदा, अव बंडां उंदानपोरो उंदि मनाकोटा कूल्हाना वेला वायनद मंता,” इत्तोर.

3 येसु अगटाल पेय्सि गुळिकु मुन्ने मंदना जयतुन मराकुना गुट्टापोर्रो होंचि उदतोर. ओर ओटिगा मत्तद हळसि, पन्नु, याकोब, योहान आनि अंदरियल ओनगा होत्तुर.

4 होंचि, “इवनि गटनां बस्के जर्गनुं माक वेहा. इंका इव गटनां जर्गना मंता इन्नेके माकु बतल चिन्ह दिस्सार?” इत्तुर.

5 अस्के येसु ओर्कु इल्हा वेहालय दलगतोर, “मीकुन बोर पसांचकोटा मिमेट उसारते मंट.

6 नावा पोरोल एतसेके बचुटूरो लोकुल्क वातुर. वासि, ‘ओन ननाने आंदुन’ इंचि वेल्लेटोर्कुन पसांचनुर.

7 मिमेट लडाईं आनि लडाईंना पोल्लेना बारेमते केंजसि वेरियमट, अल्हा तप्पाकोटा आयानुगे. गानि दुनियाता आकिर वेला अस्केने वायो.

8 देसेमपोरो देसेम, राज्येमपोरो राज्येम लडाईं आयनुं, वेरे-वेरे जेगाने बूकपालक आयनुं, कर्बु अरार. गानि इल्हा आयमळ इत्ते एर पूरालय नोप्पि सुस्त्र आताप आंद.

9 गानि मिमेट उसारते मंट. बारित्ते मीकुन पंचादितोरा कय्दे अप्पजेपनुर आनि दर्मसास्त्रम कराहना लोहकुने ओसि तनानुर. पजा नावा बारेमते गवाइ वेहालय मीकुन राज्यपाल आनि राजालोरा मुन्ने निलाहनुर.

10 गानि दीनकन्ना मुन्ने अन्नि देसेलकुने तप्पाकोटा पेनदा बेसता कबुर वेहमळ जर्गगोम.

11 अद वेलाते मीकुन पीसि ओसि पूसकियानुर. अस्के अगा बतल वळकना, बतल वळकानायो इंचि मोदाले रंदि कियमट. वळकानोर मिमेट आयो गानि पवित्र आत्मा आंद. अदुनहाटीं मीवा मनसुने बतल वळकागोम इंचि अनपिचंचतनो अदे वळकट.

12 इंका बल्हा जर्गता इत्ते, कासा तादल-तम्महुक पगां आसि हक्कालय अप्पजेपनुर. पिलाल्क ओरा तल्लुर-बाबोर्क अड्डम तिरियसि ओर्कुन हक्का वेहांतुर.

13 नावा पोरोलताहेका अंतोर लोकुल्क मीकुन हय्सुर. गानि बोर अय्ते पेनदापोरोटा विस्वासमते आकिरदाका निल्सि मनंतोर, ओनके मुक्ति दोर्कार.

14 गानि बस्के अय्ते, बोरे हय्सवसोटा नासडेम कियाना वस्तु, गुळि लोप्पो बगा अय्ते मंदनायो अगा नित्तिसि मत्तद मिमेट हळकिर, अस्के बोर अय्ते यहुदिया एरियाते मंतुरो, ओर गुट्टनहेके वित्तिर (हद्वानोर इदुन अर्तम कीकुंटु)

15 बोर अय्ते लोतपोरो मंतोर, बवे वस्तुक पीसि वायालय लोप्पो होळियानायो.

16 बोर अय्ते नेलिने कबळ कीसेक मंतोर, कपडिं पीसि वायालय मल्सि लोन होनानायो.

17 अव रोजकुने पीटे मत्ता मुर्ताहकुंक आनि सिन्ने मर्तल्लुहकुंक वेल्लेने तकलिप वांता.

18 अव तकलिपकु पीनि कालमते वायामन्नि इंचि पारतना कीम्ट.

19 बारित्ते पेन कीता ई दुनिया पुटतस्केटाल अय्ते इदवेरादाका बस्केन वायवसोंटा तकलिप अव रोजकुने वायाना मंता आनि मुन्नेगुडा असोंटा तकलिप बस्केने वायो.

20 ओक्कला सामि अव रोजकुन तक्को कियाकॉटा मंचि मत्ते, बोरे पिसाकोन्नेर. गानि बोर्कुनय्ते पेन पेरता, ओराहाटीं अव रोजकुन तक्को कीता.

21-22 अव रोजकुने आबद्दम किरिस्तुल्क, पेनदा आबद्दम कबुरतोर वायानुर. आनि कुदुरते पेन पेर्कुत्ता लोकुल्कुन पसांचलय चिन्हां, इचंन्रमता कबाहक कीसि हुप्सानुर. अदुनहाटीं ओक्कला बोरन्ना मीकुन, 'हुळाट, किरिस्तु इगे मंतोर, अगा मंतोर' इनानय्ते मिमेट ओर्कुन नम्मुमट.

23 गानि मिमेट उसारते मंटु; इव अन्नि पोल्लें नना मीक मुन्नेने वेहचीतन.

24 गानि अव रोजकुने तकलिपकु मारतस्के पोळ्दुंक हीकट मुच्चका वायार, वेळसि वेल्गु हियाकॉटा आयार.

25 मब्बुनाल सुक्कां हिळु अर्रांनुं, मब्बुने मनना अन्नि सक्किन कदलिचमळ जर्गता.

26 अस्के मनकना रूपमते पुटतोन नना, पेद्दा बलम आनि महिमातोनि मब्बु तेर्पेनपोर्रो उद्दिसि वायानेके लोकुल्क ह्ळानुर.

27 अस्के नना नावा दूतन बूमिपोर्रो लोहांतन. आ दूतां बूमिपोर्रो नालुं मूलानाल, मब्बुना ई कोस्साताल अय्ते आ कोस्सादाका नना पेर्कुत्ता लोकुल्कुन जमा कीतां," इत्तोर.

येसुना मल्सि वायाना बारेमते वेहमळ

28 "अंजिर मराताल उंदि पोल्ले करियट. अंजिर मराता कोम्मांक इग्गुर बस्के अय्ते वांता, अस्के एद्दि कालम दग्गेरा एत्ता इंचि मिमेट एरपाट कीतिर.

29 इल्हा इव अन्नि गटनां जर्गनद ह्ळसि ओर दग्गेरा मंतोर, गल्मातगेन मंतोर इंचि मिमेट एरपाट कीतिर.

30 नना मीकु निजम वेहांतन, बदवेरदाका अय्ते इव अन्नि पोल्लें पुरागा आयोंगो, अदवेरदाका ई पीळि मुळगो.

31 इद बूमि, मब्बु नासडेम आसि होंदार, गानि नावा पोल्लें बस्केने नासडेम आयों.

अद वेला बोनके तेळियो

32 "अद रोजु आयि, अद गळिया आयि बोर्के तेळियो. स्वर्गमता दूतांक आयि, मनकना रूपमते पुटतोन नाकु आयि बोर्के तेळियो. गानि सिरापु पेनबाबांके तेळियंता.

33 अद वेला बस्के वातानो मीक तेळियो. अदुनहाटीं मिमेट तेळिवे, उसारते मंटु.

34 इद वरोर मनकनलेसीं मंता, बोरे अय्ते पर्येन होनाका मुन्ने, ओना जीतागाहकुन केय्सि, बोना कबळ ओनकु अप्पजेपसि, लोतुन कावेल कियानोन 'तेळिवे मन' इंचि आदेस हीतोर.

35 लोता मालक पोळ्द होंचि वांतोरो, नळजाम नर्का वांतोरो, गोगोड कूसानेके वांतोरो, हक्केरे वांतोरो, बस्के वांतोरो मीक एरपाट हिल्ले. अदुनहाटीं मिमेट तेळिवे मंटु.

36 ओर अचानक वासि, मीकुन निद्र होंचि मत्तद ह्ळ्हा मनि इंचि मिमेट तेळिवे मंटु.

37 इद नना मीक वेहतन, अल्हेने अंटोर्कगुडा अदे वेहासेक मंतन. तेळिवे मंटु," इंचि येसु ओर्क वेहतोर.

14

येसुन हक्कना पिलान कीतुर

(मत्तयाल 26:1-5; लूकाल 22:1-2; योहान 11:45-53)

1 रोंडु रोजकुना पजा दाटसि होनना पंडुगु आनि पुल्लगा आयवा पिडिता हारिना पंडुगु आयाना मत्ता. अस्के येसुन सप्पुडदाका दोर्कापीसि हक्ककोम इंचि पेर्मालोर्क, दर्मसास्त्रम कराहना गुस्ल्लक पिलान कीसेक मत्तुर.

2 गानि, "पंडुगु रोजकुना लोप्पो हक्का मन्नि, अल्हा कीते लोकुल्क गडबड किया परांतुर," इंचि ओर इनकुत्तुर.

येसुना तल्लापोर्रो अत्तर निय वळियमळ

(मत्तयाल 26:6-13; योहान 12:1-8)

3 अद वेलाते येसु बेतानिया नाटे, मुन्ने कुस्टरोगम आसि मत्ता सिमोनुना लोते गाटो तिनालय उद्दिसि मत्तस्के, उंदि मुरतळ तेल्लाटा बंडा गुर्गिते जटामासि* मराताल तयार कीतद, वेल्ले दराता पिव्वर अत्तर निय पीसि वाता. अद गुर्गिता बुच्चातुन पयाहचि येसुना तल्लापोर्रो वळियता.

4 अदुन ह्ळसि, अगा मत्तोर्क इच्चुर्कु होंग वासि, "इद अत्तर निय अट्टिदे बारि नासडेम कीतिन?"

5 इदुन अम्मिसि मत्ते मूड न्हकुंनना एक्को एंडि रूपे वायवहकु. अबुन गरिब लोकुल्कुंक हियालय ओज्जुवाहक," इंचि दान तेराहतुर.

6 गानि येसु ओर्कुन इल्हा इत्तोर. "दीन बतल इनमट, मिमेट दीन बारि तकलिप कीसंतरि? इद नावाहाटीं बेसे कीता.

7 गरिब लोकुल्क मीवातोनि बस्केळ्ळक मनंतुर, मिमेट बस्के इनकुत्ते अस्के ओर्क बेस किया परांतरि, गानि नना मीवातोनि बस्केळ्ळक मन्नोन.

8 नावा मेंदुल्लुन बोंदा दोस्साका मुन्नेने अद मुरतळ नाक निय होकता. अद किया परतच्चोन कीता.

* 14:3 जटामासि जटामासि पोरोलता उंदि सेंट मरा.

9 नना मीक निजम वेहांतन. पूरा दुनियाते बगा-बगा पेनदा बेसता कबुर वेहमळ जर्गता, अगा ई मुरतटुन आनि इद कीता कबळतुन मति कियानुर,” इत्तोर.

इस्करियोत यहुदल येसुन पीसि हियालय ह्ळांतोर
(मत्तयाल 26:14-16; लूकाल 22:3-6)

10 पजा, पन्नेड सिस्स्युलकुनाल वरोर इस्कारियोत यहुदल मत्तोर. येसुन पीसि हियालय ओर पेद्दा पेर्मालोरागा होत्तोर.

11 अद केंजसि ओर कूस आसि, ओन्क कोत्तां हीतोम इंचि ओप्कुत्तुर. अदुनहाटीं ओर येसुन पीसि हियालय मोका ह्ळसेक मत्तोर.

सिस्स्युलकु पंडुगुना गाटो तयार कीतुर

(मत्तयाल 26:17-25; लूकाल 22:7-14,21-23; योहान 13:21-30)

12 पुल्लगा आयवा पिंडिता हारिना पंडुगुना मोदाटा रोजु, दाटसि होनना पंडुगुना गोरिं पोरिन मोक्कु हियुंदुर. अदे रोजुने येसुना सिस्स्युलकु, “गुरु, दाटसि होनना पंडुगुना गाटो तिनना तयारि बगा कीकोम इंचि नीवा मनसु मंता?” इंचि ओन इत्तुर.

13 येसु ओना इव्वुर सिस्स्युलकुन केय्पि ओर्क इल्हा वेहिचि लोहतोर. “मिमेट सहरते होंट. अगा वरोर मनकल अळकाते एर पीसि होननेके कलियंतोर, ओना पज्जेन होंट.

14 ओर बद लोन अयते दांतोरो, अद लोता मालकुन, ‘नना नावा सिस्स्युलकुनतोनि कलियसि, दाटसि होनना पंडुगुना गाटो तिननाहाटीं हेळमितोर आगाना अर्रा बगा मंता? इंचि गुरु पूसकीसंतोर,’ इल्हा इंटु.

15 अस्के ओर मीकु मिद्दे पोर्रीटा पेद्दा अर्रा सजांचि तयार कीसि मत्तद हुप्सानुर, अदे अर्रांते पंडुगुना गाटो मनाहाटीं तयार कीम्पु,” इत्तोर.

16 सिस्स्युलकु अगटाल पेय्पि सहरते होत्तस्के, ओर बल्हा वेहतोर अल्हेने अगा मत्ता, पजा ओर अग्गेन दाटसि होनना पंडुगुना गाटो तयार कीतुर.

17 पोळ्द होत्तारिते, येसु ओना पन्नेडु सिस्स्युलकुनतोनि अगा वातोर.

18 ओर गाटो तिचेके मत्तुर अस्के येसु, “नना मीक निजम वेहसेक मंतन, मीवा लोप्पोटाल वरोर नाकुन पीसि हीतोर, ओर नावातोनि उद्दिदसि गाटो तिचेके मंतोर,” इंचि ओर्कुन इत्तोर. 19 अद केंजसि ओर्क वेल्लेन दुक्कम अनपिस्ता, ओर वरोन पज्जो वरोर, “ओन नना अयते आयोन गदा?” इंचि येसुन पूसकियालय दल्गातुर.

20 अस्के येसु, “ओर पन्नेड मंदिताल वरोर आंदुर, ओर नावातोनि गिन्नेते हारि मुळाहिचि तिनानोरे.

21 दर्मसास्त्रमते रासि मत्ताप, मनकना रूपमते पुटतोन नना अयते दांतने. गानि बोनाहेंदाल अयते नाकुन पीसि हियमळ जर्गता, आ मनकल पुट्टाकोटिन बेस आसि मनवळ,” इत्तोर.

सिस्स्युलकुनतोनि आकिर मल्का गाटो तिनमळ

(मत्तयाल 26:26-30; लूकाल 22:14-20; 1 कुरैति 11:23-25)

22 अल्हा ओर तिचेके मनैकेने, येसु हारितुन येत्सि, पेनदुक दन्यवाद कीसि तुकडां कीतोर. अबुन सिस्स्युलकुंक हीसि, “तिट, इद नावा मेंदुल आंद,” इंचि इत्तोर.

23 मर्रा ओर, उंदि तालिते अंगुर पानकम येत्सि, पेनदुक दन्यवाद कीसि ओर्क हीतोर. अदुन ओर अंतोर उट्टुर.

24 पजा, “इद करारता नावा नेत्तुर आंद, इद नेत्तुर वेल्लेटोराहाटीं पोंगागोटमळ जर्गता.

25 नना मीक निजम वेहांतन, पेनदा राज्येमते पूना तरिकाते अंगुर पानकम उनाना रोजुनदाका, मर्रा बस्केने अंगुर पानकम उन्नोन,” इंचि वेहतोर.

26 पजा ओर, पेनदा स्तुति कियाना उंदि पाटा पारसि, जयतुन मराकुना गुट्टापोर्री होत्तुर.

पत्रु आबद्दम वळ्ळंतोर इंचि येसु वेहमळ

27 अस्के येसु ओर्कुन इल्हा इत्तोर. “गोरिं कोहानोन नना हक्कंतन, मंदता गोरिं बेंदव-हेके पायसि वित्तंतां, इंचि दर्मसास्त्रमते रासि मंता. अदुनहाटीं मिमेट अंतोर नाकुन होळसि वितकिर.

28 गानि, नना हासि मर्रा जीवाते तेदतंका, मीकन्ना मुन्ने गालिल एरियाते दांतन,” इत्तोर.

29 अस्के पत्रु, “अंतोर नीकुन होळसि वित्तिना गानि नना नीकुन होळसि वित्तोन,” इंचि येसुन इत्तोर.

30 अस्के येसु, “नना निजम वेहासेक मंतन, इय्याला नर्कळ्ळक रौंडु मल्कां गोगोड कूसाका मुन्ने, निमे नाकुन मूड मल्कां ‘एरपाट किय्योन’ इंचि इनकिन,” इंचि ओन इत्तोर.

31 गानि पत्रु इंचा जोसने, “ओक्कला नाकु नीतोनि हामुर वायिना बेसे, नीकुन नना एरपाट किय्योन इंचि बस्केने इन्नोन,” इंचि इत्तोर. अद केंजसि, कळमतोरगुडा पत्रु इत्तापे इत्तुर.

येसु गेत्सेमनितगा पारतना कियमळ

32 अगटाल ओर गेटसेमनि इनना जेगातगा होल्लुर. अगा एवतस्के, “नना पारतना कियानादाका इग्गेने उद्दिदिसि मंटु,” इंचि ओना सिस्स्युल्लुकुन इत्तोर.

33 पजा पन्नन, याकोबुन, योहानुन ओनतोनो ओतोर. येसु अद वेलाते वेल्ले दुक्कमते, सिम्मरा आतोर.

34 अस्के ओर्कुन, “नावा जीवा दांता बारे इत्ताप नाक वेल्ले दुक्कम आसेक मंता. मिमेट इग्गेने आगसि, तेल्विते मंटु,” इंचि इत्तोर.

35 इच्चुर मुन्ने होंचि बोकबोर्ले अर्सि पारतना कीतोर, “आया परते इद तकलिपता वेला तप्पि होन्नि.

36 बाबा! नावा बाबा, नीतोनि अन्नि आया परांता, इद तकलिपता वाटितुन लक्कु कीम. गानि नावा इच्चा मत्ताप आयो, नीवा इच्चा मत्तापे आयि,” इंचि इत्तोर.

37 पजा सिस्स्युल्लुकुनगा वासि हळते ओर निद्रा होंचि मत्तुर. अस्के येसु सिमोन पन्नन इल्हा इत्तोर. “सिमोनु, मंचिगा मीडसतिरा? उंदि गंतामेडगुडा नातोनि तेल्विते मंदा परिना?

38 मिमेट पट्टुने अर्काकोटा मननाहाटी तेल्विते मंचि पारतना कीसेके मंटु, नना वेहताप कियालय मीवा आत्मा तयार मंता गानि मीवा मेंदुल कमजोर मंता,” इत्तोर.

39 अस्के येसु मसंदि मल्का होंचि, मुन्ने कीतापे मरा पारतना कीतोर.

40 येसु मरा वासि हळतस्के, ओर मंचि निद्रते मत्तुर. येसुक बतल जवाब हियना ओर्क तेळिया हिल्ले.

41 येसु मूडोव मल्का ओरगा होंचि ओर्कुन इल्हा इत्तोर. “मिमेट इंदकेगुडा मीडसेक, आराम कीसेके मंतिरा? इद वेल्लेन आता, मनकना रूपमते पुटतोनि नाकुन पापिर्कुना कयदे पीसि हियना वेला एव्ता.

42 तेदाट, मनम दाकोम. नाकुन पीसि हियानोर दग्गेरेन एव्तोर,” इत्तोर.

येसुन पीसि हियमळ

(मत्तयाल 26:47-56; लूकाल 22:47-53; योहान 18:3-12)

43 येसु वळ्कसेकेन मंतोर, अच्चोटेन पन्नेंड सिस्स्युल्लुकुना लोप्पोटोर वरोर यहदल वातोर. ओनतोनो पेर्मालोर्क, दर्मसास्त्रम कराहना गुस्ल्लक, यहुदि पेद्दाल्क लोहचीता लोकुल्लुकुना पेद्दा मंदा ओर कसेह्क, दुड्डुकु पीसि वातुर.

44 येसुन पीसि हियानोर, “नना बोन अयते बुरांतनो, ओरे येसु आंदुर. ओन दोर्कापीसि जेगर्ताते ओम्टु,” इंचि मुन्नेन ओर्क उंदि चिन्ह वेह्चि मत्तोर.

45 अदुनहाटी ओर वाता वायुडे येसुनगा होंचि, “गुरु!” इंचि ओन बुरतोर.

46 अस्के ओर ओनापोर्रो कय वाट्टिस, ओन दोर्का पीतुर.

47 अच्चोटेन अगा दग्गेरा नित्तिसि मत्तोरगटाल वरोर ओना कसेर तेंडसि, पेद्दा पेर्माना वरोर दासुना केव नेम्मानाल हीतोर.

48 अस्के येसु ओर्कुन, “वरोन दोंगन पिय्यालय वाताप मिमेट कसेह्क, गुत्पां पीसि नाकुन पिय्यालय वातिरा?

49 नना अयते रोजे गुळिते कराहसेक मीतोनि मनुंदुन, अस्के नाकुन पिया हिल्लिर. गानि दर्मसास्त्रमते नावा बारेमते रासता पोर्ल्लें पूरा आयाना इंचि, इल्हा जर्गता,” इत्तोर.

50 पजा ओना सिस्स्युल्लक अंतोर ओन होळसि तेगा विततुर.

51 वरोर लेय्या मनकल ओना मेंदुल्लक सिराप चादर हुटकुचि येसुना पज्जो होंचेके मत्तोर. लोकुल्लक ओनगुडा पीतुर,

52 गानि ओर चादर होळसिसि कुळ्केगे वीततोर.

यहुदि पेद्दाल्कुकुना मुन्ने येसुन निपिचमळ

(मत्तयाल 26:57-68; लूकाल 22:54-55,63-71; योहान 18:13-14,19-24)

53 ओर येसुन पेद्दा पेर्माना लोन ओतुर. अगा अंतोर पेर्मालोर्क, यहुदि पेद्दाल्क, दर्मसास्त्रम कराहना गुस्ल्लक जमा आतुर.

54 गानि पन्न लक्कुटाले येसुना पज्जो-पज्जो पेद्दा पेर्माना दारादाका होत्तोर. अगा सिपाइल्लुकुनतोनि तडमितगा सेका कासेक मत्तोर.

55 अगा पेद्दा पेर्मालोर्क आनि पंचादितोर अंतोर येसुक हामुरता सिक्सा हियानाहाटी, ओना विरोदमते तप्पुड गवाइ पहकतुर, गानि ओर्क उंदिगुडा तप्पुड गवाइ दोर्काहिल्ले.

56 बारित्ते येसुना विरोदमते वेल्लेटोरे आबद्दम गवाइ वेहतुर, गानि ओरा गवाइ वरोनद वरोंक कलिया हिल्ले.

57-58 अस्के इच्चुर लोकुल्लक नित्तिसि, “मनकालोर दोहता गुळितुन कूलाह्चि, मूड रोजकुने मरा दोहंतन, गानि अद मनकालोर दोहतद आयो, इननेके मोमोट केंजतोम,” इंचि येसुना विरोदमते गवाइ हीतुर.

59 गानि इवनेगुडा वरोना गवाइ वरोंक कलिया हिल्ले.

60 अस्के पेद्दा पेर्मा ल नड्डुम नित्तिसि, “ईर नीकु विरोदमते बल्हा गवाइ हीसंतुर हळ्ळा, निमे बतले जवाब हिय्यिना?” इंचि येसुन पूसकीतोर.

61 गानि ओर चुपचाप मत्तोर, बतले जवाब हिया हिल्लोर. अस्के मसंदि मल्का पेद्दा पेर्मा येसुन, “निमे कदरगल्ला पेनदा मरि किरिस्तुन आंदिना?” इंचि पूसकीतोर.

62 अस्के येसु इत्तोर. “हो, ननाने आंदुन. आनि मनकना रूपमते पुटतोन नाकुन ताकतवर पेनदा तिना बाजुंक उद्दिदिसि मत्तद आनि मब्बु तेर्पेनतोन वायानद मिमेट हळकिर,” इत्तोर.

63 अस्के पेद्दा पेर्मल ओना कपडिं हराह्कुंकि, “मनाक इंका बतल गवाइ गावाले?”

64 ईर पेनदा अपमानम कीतद मिमेट केंजतिरे गदा! अयते मिमेट बतल इतिर?” इंचि पेर्मल इत्तस्के, ओर अंटोर, “ओर हामुर सिक्सालायक मंतोर,” इंचि इत्तोर.

65 अस्के इच्चुर लोकुल्क येसुनपोर्रो उस्कतुर, इंका इच्चुर बारे ओना कळकुन मुच्चिसि तंचेके, “निमे बविस्यवानि वेहानोनाते, नीकुन बोर तंतुर वेहा,” इंचि इत्तुर. अल्हेने कावेल कियानोरगुडा ओन सेंपापोर्रो तंतुर.

येसुन एरपाट किय्योन इंचि पत्रु इनमळ

66 अब अन्नि आयानेके पत्रु हिळु दाराते उद्दिदिसि मत्तोर, अस्के पेद्दा पेर्मानगा पासि कबळ कियानद उंदि मुरतळ वाता.

67 वासि, पत्रु तळमि सेका कासेक मत्तद हळसि, “निमेगुडा नासरेत नाटेना येसुनतोन मत्तिन गदा!” इंचि इत्ता.

68 गानि पत्रु अद पोल्लेतुन ओप्कुना हिल्लोर. “निमे बतल इंचंतिनो, नाक तेळियो, नना एरपाट किय्योन,” इंचि पलाता गलमातगा होत्तोर, अच्चोटेन गोगोड कूसता.

69 अद पासि कबळ कियाना मुरतळ पत्रुन हळसि, “ईर तप्पाकोटा ओरा लोप्पोटोरे वरोर आंदुर,” इंचि अद मर्रा उंदि मल्का अगा नित्तिसि मननोरतोन इत्ता.

70 गानि पत्रु मर्रा ओप्कुना हिल्लोर. गडसेम मत्तस्के अगा नित्तिसि मत्तोर पत्रुन, “निजमे, निमे ओरा लोप्पोटोने आंदिन, बारित्ते निमेगुडा गालिलि राज्येमतोन आंदिन,” इंचि इत्तुर.

71 अस्के पत्रु ओर्कुन, “नना ओट्टु तिचि वेहसेक मंतन, नावा पोल्ले आबद्दम आते नाकु सापनेम दल्गि! मिमेट बोना बारेमते वळकसंतिरो, आ मनकन नना निजम एरपाट किय्योन,” इंचि इत्तोर.

72 अल्हा इत्ता इनुडे गोगोड रौंडो मल्का कूसता. येसु पत्रुं मुन्नेने वेहिचि मत्तोर, “गोगोड रौंड मल्कां कूसाका मुन्ने, निमे नाकुन मूड मल्कां एरपाट किय्योन इतिन,” इंचि. आ पोल्ले पत्रुं मति वाता. अस्के वेल्ले दुक्कमते अळतोर.

15

येसुन पिलातुसना कय्दे अप्पजेपमळ

1 बल्हा अयते पंग आता अल्हा पेद्दा पेर्मांलोर, यहुदि पेद्दाल्क, दर्मसास्त्रम कराहना गुरूल्क आनि पूरा पंचादितोर उंदि निरनायम कीसि, येसुन दोहिचि वाट्सि ओसि, पिलातुस राज्यपालुंक अप्पजेपतुर.

2 पजा पिलातुस, “निमे यहुदिल्कुना राजाना?” इंचि येसुन पूसकीतोर. “निमे इत्तापे” इंचि येसु जवाब हीतोर.

3 अस्के पेद्दा पेर्मांलोर ओनापोर्रो वेल्लेन पोल्लेना दोसेल्क दोसतुर.

4 अदुनहाटीं पिलातुस येसुन मर्रा पूसकीतोर, “हळा ओर नीवा पोर्रो बच्चुंगो तप्पुक दोस्सेक मंतुर, निमे बतले जवाब हिच्यिना?” इंचि इत्तोर.

5 गानि येसु बतले जवाब हिया हिल्लोर, इंचि पिलातुस इंचंत्रम आतोर.

येसुं हामुरता सिक्सा हियमळ

6 दाटसि होनना पंडुगुना रोजुने, लोकुल्कुंक इस्टमातोन एटा वरोन जेलनाल होळिसियाना रिवाज मत्ता.

7 बरब्बल इनना वरोर मनकल ओना दंटातोरतोन जेलने मत्तोर. ओर ओना दंटातोरतोन कलियसि, बचुट्टो लोकुल्कुन हळ्किसि मत्तोर.

8 लोकुल्क पिलातुसनागा वासि, “एटा मावाहाटीं बल्हा किथिदिनो अल्हेने कीम,” इंचि इत्तुर.

9-10 पेर्मांलोरुंक येसुनपोर्रो कळक पोतताहेंकेन ओन तच्चि नाक अप्पजेपतुर इंचि पिलातुस एरपाट कीकुत्तोर. अदुनहाटीं पिलातुस ओर्कुन, “मीवा बतल विचारम मंता, यहुदिल्कुना राजान मीहाटीं होळसीकाना?” इंचि पूसकीतोर.

11 गानि पेर्मांलोरुंक, “मावाहाटीं बरब्बने होळसीम इंचि मिमेट इंटु,” इल्हा लोकुल्कुन एक्किस्तुर.

12 मर्रा पिलातुस ओर्कुन, “अयते मिमेट यहुदिल्कुना राजाल इंचि बोनयते इतिर, ओन नना बतल कीकन,” इंचि पूसकीतोर.

13 अस्के, “ओन कूसुनपोर्रो वेलाड वाटा!” इंचि ओर वरगेयतुर.

14 अस्के पिलातुस, “बारि, ईर बतल तप्पु कीतोर?” इंचि ओर्कुन पूसकीतोर. गानि ओर इंका जोरते, “ओन कूसुनपोर्रो वेलाड वाटा!” इंचि वरगेयतुर.

15 पिलातुसुंक लोकुल्कुन कूस कियाना मत्ता इंचि ओराहाटीं बरब्बन होळसिसि येसुन बारे पोट्टे देब्बां तंचि कूसुनपोर्रो वेलाड वाटालय सिपाइल्कुना कय्दे अप्पजेपतोर.

सिपाइल्क येसुन अपमानम कियमळ

(मत्तयाल 27:27-31; योहान 19:2-3)

- 16 पजा सिपाइल्क येसुन पीसि राज्यपालना पिरटोरियम इनना किल्लाते ओतुर. अगा सिपाइल्कुना पूरा गेंगुन केय्से जमा कीतुर.
 17 ओर येसुंक नेडि पंडि रंगुना कोट केराह्चि, हाह्कुना वेलितुन किरिटम कीसि ओना तल्लक दोसतुर.
 18 अस्के ओर, “यहुदिल्कुना राजांक जय!” इंचेके ओन्क जोहार कीतुर.
 19 पजा ओर ओना तल्लापोर्रो दुड्डुने तंतुर, ओनपोर्रो उस्कतुर, ओर ओना मुन्ने वंगिस जोहार कीतुर.
 20 ओन इरगा कारेड्डाल्क कीतारित्ते, ओन्क केराह्ता नेडि पंडि रंगुना कोट तेंडसि, ओना कपडिं ओन्के केराहतुर. अस्के ओन कूसुनपोर्रो वेलाड वाटालय पलाते ओतुर.

येसुन कूसुनपोर्रो वेलाड वाटमळ

(मत्तयाल 27:32-44; लूकाल 23:26-39; योहान 19:17-19)

- 21 सिपाइल्क येसुन पीसि पलाते होननेके, सिकंदर आनि स्पुसना बाबाल सिमोन इनानोर नेलिनाल अदे हर्रि पीसि वासेक मत्तोर. ओर कुरेनि सहरतोर मत्तोर. सिपाइल्क ओन वेराहचि येसुना कूस कांजा वेहतुर.
 22 ओर गोलगोता इनना जागातगा येसुन पीसि वातुर. गोलगोता इत्ते तल्ला बोरसेम इंचि अर्तम.
 23 अगा ओर, मूर्* इनना मत्तु अंगुर पंडिना पानकमते कल्पिसि येसुंक उनालय हीतुर, गानि ओर उना हिल्लोर.
 24 अस्के ओन कूसुनपोर्रो वेलाड वाटतुर. पजा ओना कपडिन बद बोर एताना इंचि सिट्टिं वाट्टिस पंचकुत्तुर.
 25 येसुन कूस पोरो मोल्लाने कोह्किसि वेलाड वाटतस्के हक्केटां तोम्मिद एगिस मत्तां.
 26 ईर “यहुदिल्कुना राजाल” आंदुर इंचि, उंदि बल्लापोर्रो कसूर रासि ओना तल्लातगा कूसुंक तासतुर.
 27 येसुनतोनि इंका इव्वुर दोंगाल्कुन, तिना बाजुंक वरोन, डेमा बाजुंक वरोन कूसकुन पोरो वेलाड वाटतुर.
 28 इदुनहेंदाल दर्मसास्त्रमते रासि मत्ताप, “ओर दोंगाल्कुना लेक्काते वातोर”† इद पोल्ले पूरा आता.†
 29-30 अद हर्रि पीसि होनानोर-वायानोर तल्लां ऊपसेके, “ओ! गुळितुन कूलाह्चि मूड रोजकुने दोहानोन, कूसताल रेय्से निमे नीवा जीवातुन पिसागोटकुन,” इंचि अपमानम कियुंदुर.
 31 अल्हेने पेर्मालोर्क, दर्मसास्त्रम कराहना गुर्ल्लकुगुडा, “ओर इंकावरोन पिसागोटतोर गानि ओनद ओरे पिसागोटकुना परसेके हिल्लोर.
 32 इस्राएलतोर राजाल किरिस्तु कूसुनपोर्रोटाल हिळु रेय्से वायिरकांटी, अस्के मोमोट हळसि, इनपोर्रो विस्वासम ईरा परकोम,” इंचेके ओना कारेड्डाल्क कीतुर. येसुना पक्काते कूसुंक वेलाड वाट्टिस मत्ता दोंगाल्कुगुडा ओना अपमानम कीतुर.

येसुना हामुर

(मत्तयाल 27:45-56; लूकाल 23:44-49; योहान 19:28-30)

- 33 अस्के पिथ्यटा पन्नेड एगानस्केटाल अय्ते, मूड एगनदाका पूरा बूमिअंता हीकट आता.
 34 पिथ्यटा मूड एगनेके येसु अळसेके जोरसे वरगेयसि, “एलि, एलि, लमा सबकतनि?” इंचि इत्तोर. इत्ते, “ना पेनदुना, ना पेनदुना निमे नाकुन बारि होळसीतिन?” इंचि इत्तोर.
 35 अस्के अगा नित्तिसि मत्तुर इच्चुर लोकुल्क, “हुळाट! ओर एलियान केयसंतोर,” इंचि इत्तुर.
 36 ओरा लोप्पोटाल वरोर विच्चि होंचि स्पंजतुन पुल्लाटा अंगुर पानकमते मुळहाचि, दुड्डु कोस्सक तासिसि ओनकु उनालय हीतोर. हीसि, “आगा! एलियाल ओन हिळु रेहालय वांतोरा वायोरा? हळकोम,” इंचि इत्तोर.
 37 अस्के येसु पेद्दा आवाजते वरगेयसि जीवा होळसीतोर.
 38 अस्के गुळिता परदा पोरोटाल हिळुदाका हर्सि रोंडु तुकडां आता.
 39 अस्के नूर मंदि सिपाइल्कुना पोरो मनना अदिकारि येसुना कूसता मुन्नेने नित्तिसि मत्तोर. ओर येसु वरगेयसेके जीवा होळसनद हळतोर, हळसि, “ईर निजमे पेनदा मरि आंदुर,” इंचि इत्तोर.
 40 अगा मगदलेनि नाटेना मरियम, सिन्ना याकोब, योसेसना यावल मरियम, सलोमि इव मुर्ताह्कगुडा लक्कुटाले नित्तिसि हळसेक मत्तां.
 41 येसु गालिल एरियाते मत्तस्के, इव मुर्ताह्क ओना पज्जो होंचि सेवा कियुंदु. इवे आयाका ओना पज्जो येस्सलेमदाका वातव इंका वेल्लेन मुर्ताह्क मत्तां.

येसुन बोंदा दोसमळ

(मत्तयाल 27:57-61; लूकाल 23:50-56; योहान 19:38-42)

- 42 नोमकेन रोजुना मुन्नेटा रोजु येसु हातोर, अद नोमकेमता तयारिता रोजु आंदु. अस्के पोळ्दु होंचि मत्ता.
 43 अरिमताइ नाटेनोर योसेपु इनानोर वरोर मत्तोर. ओर यहुदिल्कुना पंचादिता वरोर मेंबर मत्तोर. लोकुल्क ओन्क कदर हियुंदुर. ओर पेनदा राज्येम बस्के वायार इंचि एदुर हळसेक मनुंदुर. ओर दैरनेमते पिलातुसगगा होंचि, “येसुना पीनगुन नाक हीम,” इंचि तल्लतोर.

* 15:23 मूर् मूर् इत्ते नोपि तक्को कियाना उंदि मत्तु. † 15:28 यसायाह 53:12 † 15:28 इद वचनम कोन्नि पांडु लिपिने हिल्ले.

44 अस्के पिलातुस, “अरे! इच्चोन बिराना हातोर।” इंचि इचंन्रम आतोर. पजा नूर मंदि सिपाइल्कुना पोरो मनना अदिकारिन केय्से, “येसु हातोर?” इंचि पूसकीतोर.

45 येसु हातोर इंचि ओर अदिकारि वेहतस्के, ओना पीनगुन ओया परांतिन इंचि पिलातुस योसेपुन इत्तोर.

46 अस्के योसेपु उंदि पूना कपडि अस्तोर. येसुन कूसतगटाल हिळु रेहचि, अद कपडितुन हुटतोर. हुटसि, बंडातुन तुलाहिचि तयार कीता बोंदाते दोसतोर. पजा दाना बोंगाकु उंदि पेद्दा बंडा अड्डम दोसतोर.‡

47 येसुन बोंदाते दोसता जेगातुन मगदलेनि नाटेना मरियम, योसेसुना यावल मरियम इव हळतां.

16

येसु मर्रा जीवाते तेदमळ

(मत्तयाल 28:1-8; लूकाल 24:1-12; योहान 20:1-10)

1 नोमकेमता रोजु मारतारित्ते, मगदलेनि नाटेना मरियम, याकोबुना यावल मरियम आनि सलोमि इव येसुना पीनगुंक होकालय, गमागमा गब्बु वायानव वस्तुक अस्तां.

2 वारमता मोदाटा रोज अय्तारम हक्केरेने पोळ्दु पेय्सता पेय्सुळे बोंदातगा होत्तां.

3 अव होननेके, “अद बोंदक अड्डम दोसता बंडातुन मनाहाटीं बोर गुळाहनुर?” इंचि अबुनद अवे वळकसेक होत्तां.

4 अगा एवसि हळते, अच्चोन पेद्दा बंडा गळसि मत्तद अवुंक दिसता.

5 अव बोंदाते होळियतस्के वरोर लेय्या मनकल तेल्लाटा कपडिं केर्सि तिना बाजुंक उदिद्स मत्तद हळसि अव वेरियतां.

6 ओर अबुन इल्हा इत्तोर. “वेरियमट, कूसुनपोरो वेल्लाड वाट्सि हक्कता, आ नासरेत नाटेना येसुन मिमेट प्हकसेक मंतिट, ओर इग्गे हिल्लोर, जीवाते तेदतोर. इद हुळाट, ओना पीनगु इरता जेगा.

7 ओर मीक वेहता परकारम, मीकन्ना मुन्नेने गालिल एरियाते होंचेक मंतोर, अदुनहाटीं मिमेट होंचि ओना सिस्सुल्कुंक आनि पवुंक वेहाट, अगा ओर मीकु दिस्सानुर,” इत्तोर.

8 अव मुर्ताहक इग्गा वेरियसि वनकालय दल्गतां. अदुनहाटीं अव बोंदातगाटाल पलाते पेय्सि विच्चि, आ वेंरेक बोर्क बतल वेहा हिल्लें.

मगदलेनि नाटेना मरियमुंक येसु दिसंतोर

9 वारमता मोदाटा रोज इत्ते अय्तारम रोज, येसु हामुरताल जीवाते तेदतोर. तेदता पजा मोट्टा मोदाला मगदलेनि नाटेना मरियमुंक दिसतोर. इदे मरियमुनगटाल एडुं देय्याल्कुन येसु गेदमिस मत्तोर.

10 अद अगटाल पेय्सि, येसुनतोनि मत्ता सिस्सुल्कुनगा होत्ता. ओर वेल्लेने दुक्कमते अळसेके मत्तुर, ओर्क येसुना बारेमते वेहता.

11 येसु जीवाते तेदतोर, अद येसुन हळता इत्ता पोल्लेतुन ओर केंजतुर गानि विस्वासम किया हिल्लुर.

12 अद आता पजा, ओरा लोपोटाल इव्वुर येस्सलेमताल उंदि नार होंचेके मननेके, ओर्क वेरे रूपमते येसु दिसतोर.

13 ओर पज्जो मल्लिसि होंचि, कळमतोर्कुंक इद पोल्ले वेहतुर, गानि ओर ईरा पोल्लेन विस्वासम किया हिल्लुर.

येसु ओना सिस्सुल्कुनतोनि वळकंतोर

(मत्तयाल 28:16-20; लूकाल 24:36-49; योहान 20:19-23; प्रेरितुल्कुना कबाहक 1:6-8)

14 पजा पदाकौंडु मंदि सिस्सुल्कु उदिदिसि गाटो तिचेके मननेके येसु ओर्क दिसतोर. “नना जीवाते तेदतन इंचि वेल्लेटुर मीक वेहिनागानि मिमेट बारि विस्वासम किया हिल्लिर? मीवा मनसुक बंडालेसीं मारियतां,” इंचि तेराहतोर.

15 पजा ओर्कु इल्हा वेहतोर. “मिमेट होंचि दुनियाता अन्नि देसेल्कुना लोकुल्कुंक बेसता कबुर प्रचार कीम्ट.

16 बोर अयते विस्वासम कीसि, बापतिस्मा एतंतोर ओनके मुक्ति दोर्कता, गानि बोर अयते विस्वासम किय्योर, ओनकु पेन सिक्साता आदेस हि्य्यार.

17 नाकुन विस्वासम कियानोनगा इव चिन्हां मनतां, ओर नावा पोरोलते देय्याल्कुन गेदमानुर, वेरे-वेरे बासाने वळकानुर,

18 तरासकुन पियानुर, बदे विसम वस्तु उनिनागानि ओर्क बतल आयो, बिमार्क मत्तुरा पोरो ओरा कय्क इरते, ओर बेस आयानुर,” इंचि वेहतोर.

येसु स्वर्गमते होनमळ

(लूकाल 24:50-53; प्रेरितुल्कुना कबाहक 1:9-11)

19 येसु सामि ओना सिस्सुल्कुनतोनि इव पोल्लें वेहता पजा, पेन ओन स्वर्गमते तेहकुत्ता. अस्के ओर दाना तिना बाजुंक उदुतोर.

20 पजा येसुना सिस्सुल्कु नालुं-मूलां होंचि अन्नि जेगाने ओना बारेमते प्रचार कीतुर. सामि ओरतोनि मंचेके कबळ कियुंदुर. कबळ कियनेके जर्गना चिन्हाना हेंदाल सामि ओना पोल्ले निजम इंचि रूजुव कियुंदुर. आमेन.*

‡ 15:46 अद कालमते गट्टांकु सोंरि तवसि इर्दुर. बोरन्ना हाते अवने ओसि दोसुंदुर.

* 16:20 इद वचनम कोन्नि पांडु लिपिने हिल्ले.

लूकाल लूकाल रासतद बेसता कबुर

इद पुस्तकमता बारेमते गिचचो परिचयम
रासतोना पोरोल: डाक्टर लूका
रासता कालम: इसवि सन 70

इद पुस्तकमतुन रासता लूकाल बेस डाक्टर मत्तोर. येसु तिरियसि स्वर्गमते होतस्के ई लूकाल पौलुसुनतोनि कलियसि वेल्लेन वर्सनदाका येसु सामिना सेवाते मत्तोर. येसु हासि मर्रा जीवाते तेदतंका बच्चोने वर्साकु ई पुस्तकमतुन लूकाल रासतोर. अद कालमते तियपिलुस इननोर वरोर सायाब मत्तोर, ओन्क येसु सामिना बारेमता निजम बेस तेळियना इंचि इद पुस्तकमतुन ओनाहाटी रासतोर. लूकाल रासतद इद पुस्तकम वेसुड आयो. गानि येसु निजमे मनकल आसि इद दुनियाते वातोर इतदुन हृपसंता. इद पुस्तकम रासमळ मारतारित्ते लूकाल पवित्र आत्माता कबाहक इनना इंकुंदि पुस्तकम रासतोर.

लूकाल इद पुस्तकमहेंदाल बतल वेहांतोर इत्ते, लोकुल्लुकुन पेन वेल्लेन पावरम कीता, इंका लोकुल्लुकुन पिसागोटनाहाटी वरोन मिहगा लोहंतन इंचि अद वेल्लेन वर्सा मुन्ने वेहचि मत्ता. दीनाहाटीगे पेनदा मर्रि इत्ते येसु सामि लोकुल्लुकुन पिसागोटनोर आसि, इद दुनियाते वातोर. इचचोने आयका पेन अंटोर्कुन उंदाचचोने पावरम कीता. अव्ते दुनियाता नदरते सिन्ना जातितोर आयिर, मुर्ताहक आयिं, वेरे जातितोर आयिर, बोरन्ना आयिर अंटोरपोर्रो येसु सामि उंदाचचोने पावरम हृपिस्तोर. मिमेट लोकुल्लुकु इद दुनियाते कदर दोर्किचकुनमळतुन होळिसिसि पेनदुन बदवेरदाका अय्ते पहकिरो, अदवेरदाका मीकु पेन हियना पिस्वर दोर्को, मिमेट पेनदा राज्येमते होळियागुडा पर्रिर. बारित्ते बोर मनकल अय्ते सिना पिलाल्लुकुनालेसी सादा-सिपल आयाना मनसु इरीतोर, असंतोनाहाटी पेनदा राज्येम मंता. हार्रि तप्सि होतुंदि पहकालय आनि ओर्कुन पिसागोटलय येसु सामि इद दुनियाते वातोर, इंचि लूकाल इद पुस्तकमते रासतोर.

बगा बतल मंता

जोहार आनि परिचयम 1:1-4
बापतिस्मा हियना योहान आनि येसुना प्टमळ, बेर्समळ 1:5-2:52
येसुना सेवा कबळता तयारि 3:1-4:13
गालिलते येसु सेवा कबळ सुस्व कीतोर 4:14-9:50
गालिल एरियाताल येस्सलेमदाका येसुना सेवा कबळ 9:51-19:27
येस्सलेमते येसुना सेवा कबाहक 19:28-21:38
येसु हासि तेदसि, स्वर्गमते होनमळ 22:1-24:53

लूकाल येसुना बारेमते रासंतोर

1-4 तियपिलुस सायाब,* मावा नड्डुम येसु कीता कबाहकुना बारेमते वेल्लेन लोकुल्लुकु रासालय कोसिस कीतुर. बोर अय्ते जर्गुता आ गटनन कळकुने हळतुर आनि पेनदा बेसता कबुरतुन कराहतुर, ओरे माकु ई पोल्लें एव्विचि हीतुर. माकु एत्ता पोल्लेन ननागुडा बेस हदविसि, परमेरका कीसि तेळियागोटकुत्तन. अदुनहाटी इव अन्नि पोल्लेन बेस उंदान पज्जो उंदि नीकु रासि लोहना इंचि नाकु अनपिस्ता. दीनहेंदाल निमे बतल अय्ते करियतिनो, अदे निजम इत्ता संगति नीकु तेळियंता.

जकरयाल आनि एलिसिबांक संतानम दोर्कना कबुर

5 यहुदिया एरियापोर्रो पेद्दा हेरोद राजाल राज्येम कियना कालमते, जकरयाह पोरोलता यहुदि जातितोर वरोर पेर्माल मत्तोर. ओर आबिया इनना पेर्मालोरा गेंगुना मेंबर मत्तोर.† जकरयाहनलेहका ओना मुत्तो एलिसिबालगुडा हारून‡ इनना पेर्माना वंसमतदे मत्ता.☆

6 ओर इव्वुरगुडा पेनदा नदरते नीतिमंतुल्लुकु मत्तुर आनि सामि वेहता अन्नि नियमकु आनि आदेसकुन पीसि दोसेम हिलाकोटा ताकुंदुर.

7 गानि एलिसिबाल गोडमुरादि मत्ता. अल्हेने ओर इव्वुर वेल्लेन मातरालोर आसि मत्तुर अदुनहाटी ओर्कु पिलाल्लुकु आया हिल्लतुर.

8 बस्के अय्ते जकरयाना गेंगुनोरद येस्सलेम सहरते मनना गुळिते सेवा कियना वेला वाता, अस्के ओर अगा पेर्माल इंचि पेनदा सेवा कीसेक मत्तोर.

9 पेर्मालोरा रिवाज मत्ताप सिट्टिं वाटसि पेनदा गुळिते गुगलेम वाटालय जकरयान पेरतुर.

10 ओर गुगलेम वाटना वेलाते पलाते जमा आता अंटोर लोकुल्लुकु पारतना कीसेक मत्तुर. §

* 1:1-4 तियपिलुस ई वरोर पेद्दे सायाब आंदुर. तियपिलुस कुद्दु इद पुस्तकमतुन रासालय लूकांक वेहतोर. † 1:5 ओर आबिया इनना पेर्मालोरा गेंगुना मेंबर मत्तोर दाविद राजाल इसौतव इरचै नालुं गेंगुल्लुकु तयार कीसि मत्तोर. अव्ते अबियाना गेंग एनमिदोव गेंग मत्ता. उंदि गेंगनोर एडादिक रौडु मल्लां गुळिते वारममेळ कबळ कियुंदुर. 1 इतिहास 24:10 ‡ 1:5 हारून ई मूसाना दादाल आंदुर. अंटोर पेर्मालोर ईना वंसमताल वातुर. ☆ 1:5 निर्गमन 29:9 § 1:10 सिराप पेर्मालोर्कुके गुळिते मनना पवित्र जेगाते होनना अदिकारम मत्ता. कळमातोर अंटोर पलाते पदिरिन हिळु नित्तिसि मनांतुर.

- 11 अच्छोटेन ओन्क उंदि पेनदा दूता, गुगलेम वाटना गद्देता तिना बाजुंक नित्तिसि मत्तद दिसता.
- 12 जकर्याहल पेनदा दूतातुन हळसि उल्किसि अर्सि इरगा वेरियकुत्तोर.
- 13 पजा पेनदा दूता ओन, “जकर्याह, वेरियमा. पेन नीवा पारतनातुन केंजता. नीवा मुत्तो एलिसिबाल नेला तपसि वरोर पेडन कनंता, निमे ओना पोरोल योहान* इंचि इर्ता.
- 14 पेडल पुटताहाटीं नीकु अय्ते वेल्लेन कुसि आंता. अचोने आयका वेल्लेन लोकुकुकुं इका आनंदम आंता.
- 15 बारित्ते आ पेडल सामिना नदरते पेद्दोर आंतोर. ओर अंगुर पंडिना पानकम आयि इका वेरे बदे कल्लु उन्नोर.✱ अचोने आयका यावाना पीटि मननास्केटाले ओर पेनदा पवित्र आत्माते निंडसि मनंतोर.
- 16 मीवा वेल्लेन इझ्राएल लोकुकुकुन ओर मीवा पेनदाहेके तिरहंतोर.
- 17 ओर, बाबुर्कुना मनसुन मर्क-मियाहकुनहेके तिरहंतोर. पेनदा पोल्ले केंजवोर्कुन नीतिमंतलुकुना तेल्वि दोर्किचकुना वेहंतोर. सामि मीवा नड्डुम वायका मुन्ने सामिनाहाटीं लोकुकुकुन तयार कियालय ई पेडल एलियाहनगा† मत्ता गुनम आनि ताकततोनि सामि वायना कबुरतुन सामि वायका मुन्नेन वेहांतोर,” इंचि इत्ता.
- 18 पजा, “नना अय्ते मातरन आतन. इका नावा मुत्तोगुडा वेल्लेन मातरि आता. अय्ते निमे इत्ता पोल्ले निजम आयार इंचि नाकु बल्हा तेळियार?” इंचि जकर्याहल पेनदा दूतातुन पूसकीतोर.
- 19 अस्के पेनदा दूता, “निमे नाकुन बोर इनकुंचंतिन? नना गब्रिएल‡ दूतातुन आंदुन. नना पेनदा मुन्ने नित्तिसि मनानदुन आंदुन. नीवातोनि वळकानाहाटीं, इद बेसता कबुर वेहनाहाटीं पेने नाकुन लोहता.
- 20 नना वेहता पोल्ले अय्ते वेला वातस्के निजम आयानुंगे, अयना निमे नावा पोल्लेपोर्री विस्वासम इर्ता हिल्लिन. अदुनहाटीं नावा पोल्ले निजम आयानदाका नीकु वळका वायो, निमे मूकन आसि मनांतिन,” इंचि वेहता.
- 21 इदंता जर्गनिके पलाते नित्तिसि पारतना कीसेक मत्ता लोकुकुकु इचंनम आसि, जकर्याहल गुळिता लोप्पो इचचोन आलसेम बारि कीसंतोर, इंचेके एदुर हळसेक मत्तुर.
- 22 पजा जकरयाल गुळिताल पलाते वातोर. गानि ओर लोकुकुकुनतोनि वळका पराहिल्लोर. अस्के लोकुकुकु, “गुळिता लोप्पो ईर बतलो दर्सनम हळतोर बारे! अदुनहाटीं वळका परीका सय्यो कीसंतोर,” इंचि इनकुत्तुर.
- 23 इल्हा ओना सेवा कियना रोजकु मारतां, अस्के ओर ओना लोन होत्तोर.
- 24 कोन्नि रोजकु आता पज्जो, ओना मुत्तो एलिसिबाल नेला तपता. नेला तपतस्के अद हेय्युं नेलुकुनदाका लोताल पलाते पेयसाकोटा लोप्पेन मत्ता.
- 25 अस्के अद, “नाकुन गोडमुरद इंचि लोकुकुकु कव्वुंदुर. गानि लोकुकुकुना नड्डुम नावा सिग्गु होनानायो इंचि सामि नाकु इल्हा सहायम कीतोर,” इंचि इत्ता.

येसु पुट्टना कबुर

- 26 एलिसिबाल नेला तप्सि हारुं नेल्क आसंतां. अवे तूकुलुकुने पेन, गब्रिएल इनना दाना दूतातुन गालिल एरियाता नासरेत पोरोलता सहरते मनना,
- 27 उंदि मरमिं आयवा पोरिनगा लोहता, आ पोरिन पोरोल मरियम. आ पोरिनद दाविद राजाना वंसमते पुटता योसेप इनना वरोर मनकनतोनि एर्रा बोट्टु आसि मत्ता. §
- 28 आ गब्रिएल दूता दाना दमगेर्क होंचि दानतोनि, “पेनदा आसिर्वाद दोर्कुता बाई, नीकु जोहार! पेन नीकु तोळ मंता,” इंचि इत्ता.
- 29 पेनदा दूताता पोल्ले केंजसि मरियम वेल्लेन परेसान आता. ई जोहारता अर्तम बतल आयावच्चु, इंचि इचंनमते अरता.
- 30 अस्के पेनदा दूता दान, “मरियम, वेरियमा! पेन नीपोर्री दया कीता.
- 31 केंजा! निमे नेला तप्पतिन आनि वरोर मांडुसा पेडन कनांतिन. निमे ओना पोरोल येसु (इत्ते पेन पिसागोटंता) इंचि दोस्सा.
- 32 ओन अंतोर ‘अन्निटकन्ना पेद्दा पेनदा मर्रि’ इंचि इनानुर, इल्हा ओर पेद्दा पोरोलता मनकल आयानुर. ओना वंसमता पेद्दा मनकल दाविद राजानलेसी पेन ओनगुडा राजाल कीता.
- 33 अचोने आयका ओर इझ्राएल लोकुकुकुनपोर्री* राज्येम कीतोर. इका ओना राज्येम बस्केने मारो,” इंचि इत्ता.
- 34 अस्के मरियम पेनदा दूतातुन, “नावां अय्ते मरमिं इका आया हिल्लें, नाकु मुय्दोगुडा हिल्लोर. अय्ते मरि इद बल्हा निजम आयार?” इंचि पूसकीता.
- 35 अस्के पेनदा दूता इल्हा इत्ता, “पेनदा पवित्र आत्मा नीवा पोर्री वांता आनि अन्निटकन्ना पेद्दा पेनबाबाना ताकतहेंदाल नीवा पोर्री उंदि नीडा अर्ता, अस्के निमे नेला तप्पतिन. दानहाटीं नीकु पुट्टना पेडल पवित्र मनांतोर, ओन ‘पेनदा मर्रि’ इंचि इंतुर.✱

* 1:13 योहान इत्ते पेन दया हुपिस्ता इंचि अर्तम. ✱ 1:15 गिनति 6:1-4 † 1:17 एलियाह ईर वरोर पेनदा कबुरतोर आंदुर. ई एलियाल येसु सामिकन्ना एनमिदि न्हकुना वर्सा मुन्ने मत्तोर. ‡ 1:19 गब्रिएल इद पेनदा उंदि दूता पोरोल आंद. इद दूता हमेसा पेनदा दमगेरा मंता. इद दूताता बारेमते दानिय्येल 8:9 ते मंता. § 1:27 दाविद राजाल हासि वेय वर्सा आतस्के पेनदा दूता, मरियमुनतोनि वळकता. * 1:33 इझ्राएल लोकुकुकु ईर अंतोर लोकुकुकु याकोब इनना पेद्दा मनकना वंसमतोर आंदुर. ✱ 1:35 यसायाह 7:14

36 केंजा! नीवा जीवातद एलिसिबा मातिरगुडा नेला तप्सि मंता. अंटोर लोकुल्लक दान गोडमुरद इंचि इनुंदुर, गानि अद नेला तप्सि हारं नेल्लक आसंता.

37 पेन अन्नि कबाहक किया परंता, अद किया परवद बतले हिल्ले,” इत्ता.

38 अस्के मरियम, “नना अय्ते पेनदा सेवा कियनदुन आंदुन, निमे इत्तापे नाकु जर्गिकांटी,” इंचि इत्ता. पजा पेनदा दूता अगटाल पेय्सि होत्ता.

मरियम जकरयाल आनि एलिसिबानगा दांता

39 पजा अवे रोजकुने मरियम बतल कीता इत्ते, बिराना तयार आसि गाबरते गूट्टान लोप्पो मनना यहुदिया एरियाता उंदि नाटे होत्ता.†

40 नाटे एवतस्के अद जकर्याहना लोन होंचि एलिसिबांक जोहार कीता.

41 मरियम वळकुता पोल्लेतुन केंजसि एलिसिबाना पीटे मत्ता पिंडेम मेसुलता, अस्के एलिसिबाल पवित्र आत्माते निंडिस होत्ता.

42 निंडिस होंचि अद पेद्दा आवाजते, “अन्नि मुरताहकुंकन्ना निमे एक्को आसिर्वाद दोर्कुता मुरताटुन आंदिन मरियम! अल्हेने नीवा पीटे मनना पिंडेमगुडा वेल्लेन आसिर्वाद दोर्कुतद आंद.

43 नावा सामिना यावल नाकु कलियालय वायमळ इत्ते गम्मत पोल्ले आयो. इच्चोर वेल्ले कदर नाकु बगाटाल दोर्कुता?

44 हळा! नीवा अल्किर केंजता केंजुडे नावा पीटे मत्ता पिंडेम कुसिते मेसुलता.

45 इका निमे पेन वेहता पोल्लेतुन निजम आयि इंचि विस्वासम कीतिन, अदुनहाटीं निमे वेल्लेन आसिर्वाद दोर्कुतदुन आंदिन,” इंचि एलिसिबाल इत्ता.

मरियम पेनदुन तल्सकुंता

46 पजा मरियम इल्हा इनालय दल्गता:

“नना नावा मनसुनाल पेनदुन तल्सकुंतन.

47 नाकुन पिसागोटना पेन नावा आत्माकु कुसि हीता.

48 नना दाना उंदि सिन्ना दासिदान आंदुन,

अयना पेन नावापोर्रो दाना दया हुपिस्ता.

हळा! इंदकेटाल पीळि-पीळिना अंटोर लोकुल्लक,

नाकुन, ‘पेनदा आसिर्वाद दोर्कुतद,’ इंचि इनानुर.

49 बारित्ते अन्निटकन्ना पेद्दा पेन नावाहाटीं, पेद्दा-पेद्दा कबाहक कीता.

दानद पोरोल पवित्रमाता पोरोल आंद.

50 दानकु वेरियसि दाना कदर कीसेके ताकानोरपोर्रो,

दाना दया पीळि-पीळिनदाका मनंता.☆

51 अद दाना ताकत हुपिस्ता, गर्रा मत्ता लोकुल्लकुन,

ओरा विचारालकुन पीसि हिके-हेके पायिस्ता.

52 राज्येम कियानोर्कुन, ओरा राजगदूदे पोरोटाल अद हिळु रेहता.

कदर हिलवोर्कुन बारे पेद्दा कीता.

53 हिल्वोंक गावाले मत्तव हीसि समादानम कीता.☆

सिरमंत लोकुल्लकुन बारे उत्ता कय्क लोहता.

54-55 अद मना एनकटा पेद्दालकुंक हीता पोल्ले परकारम,

दाना सेवा कियना इस्त्राएल लोकुल्लकुंक सहायम कीता.

इत्ते अब्राहाम आनि ओना वंसमतोरपोर्रो, बस्केळ्ळक दया कियानदुन मति इरता,”

इंचेके मरियम पाटा पारता.

56 इल्हा मरियम एलिसिबानगा मूड नेलकु मत्ता. पजा दाना लोन अद होत्ता.

बापतिस्मा हियना योहानुना पुटमळ

57 एलिसिबांक नेलां निंडिसि अद पेडन कंता.

58 दानकु मरिं पुटतोर इंचि दाना पक्का पीसि मत्ता लोहकुनोर्क, जीवातोर्क तेळियता अस्के, पेन दानपोर्रो वेल्लेन दया कीता, इंचि दानातोनि अंटोरगुडा वेल्लेन कूस आतुर.

59 आ पेडल एनमिदि रोजकुनोर आतस्के ओना कतना☆ कियनाहाटीं ओर अंटोर वातुर. वासि आ सिन्ना पेडाना पोरोल ओना बाबोना पोरोल पोरोटाल जकर्याह इंचि दोस्सनद मत्ता.

† 1:39 नासरेत नार जकरयाना नाटुक 150 किलोमिटर लक्कु मत्ता. अद कालमते लोकुल्लक गाडदिन पोरो उद्दिसि, ताकसेक होनुंदुर.

☆ 1:50 बजन संहिता 103:17

☆ 1:53 बजन संहिता 107:9 ☆ 1:59 उत्पत्ति 17:9-14

- 60 गानि पेडाना यावल मात्रम, “मन्नि, ई पेडन पोरोल ‘योहान’ इंचि दोसगोम,” इत्ता.
 61 अस्के दान ओर अंटोर, “निजमे गानि, मीवा जीवातोर लोपो ई पोरोलतोर बोरे मनकल हिल्लोर गदा,” इंचि इत्तुर.
 62 पजा ओर ओना बाबान सयों कीसि, “निमे ई पेडन पोरोल बतल इर्रातन इंचि इनकुंचंतिन?” इंचि पूसकीतुर.
 63 अस्के आ पेडाना बाबाल रासालय उंदि पाटि तल्कतोर आनि, “ओना पोरोल योहान आंद” इंचि रासतोर. अस्के रासतदुन हूळसि अंटोर्क इचंन्रम आता.
 64 अस्केन जकरयांक तोड्डि वाता. अस्के ओर वळ्कसेक पेनदा स्तुति कियालय दलगतोर.
 65 अगा पकापीसि मत्तोर अंटोर इरगा वेरियतुर. इद संगति यहुदिया एरियाता गुट्टन पीसि मत्ता नाहकुने तेळियसि होत्ता.
 66 ई संगति केंजता हरेक मनकल विचारम कीसि, “ई पेडल मुन्ने ताकसि बतल आयानुर?” इंचि इनुंदुर. बारित्ते आ पेडन पोरो निजम पेनदा कय मत्ता.

जकरयाल पेनदुन तल्सकुंतोर

- 67 पजा आ पेडाना बाबो जकरयाहल पवित्र आत्माते निडिसि होंचि, इल्हा बविस्यवानि वेहालय दलगतोर.
 68 “मावा इस्राएलतोर पेनदुन नना तल्सकुंतन, बारित्ते अद दाना लोकुल्कुंक,
 सहायम कियालय वासि ओर्कु मुक्ति हीता.
 69-70 पेन दाना पवित्र कबुरतोरहेंदाल वेल्ले वर्साना मुन्ने इत्ताप,
 अद मावाहाटी दाना सेवक दाविदना वंसमताल,
 वरोन वेल्लेन ताकत मत्ता मुक्ति हियानोन लोहचीता.
 71 मावा पगातोरगटाल आनि हयस्वोरगटाल माकु मुक्ति हीता.
 72 मावा एनकटा तादो-बाबुरापोर्री दया कीतन इत्ता.
 ओरतोनि कीता पवित्र करारतुन बस्केने मति मरगोन इंचि इत्ता.
 73 ई करार मावा एनकटा पेद्दा मनकल, अब्राहामुनतोन तित्ता ओट्टु आंदु.
 74-75 अद करार इल्हा मत्ता गदा,
 मिमेट पिसतच्चुं रोजकु नीतिते आनि पवित्र मंचेके,
 वेरियाकोंटा नावा सेवा कियनाहाटी, नना मीकुन मीवा पगातोर कयदाल होळसीतन.
 76 ए नावा सिन्ना पेडा! इंदके नीकुन अन्निटकन्ना पेद्दा पेनदा कबुरतोर इंचि इत्तुर.
 बारित्ते निमे सामिना हरि तयार कियालय, ओना मुन्ने-मुन्ने ताकंतिन.*
 77 मीवा पापालक मापि आतेने मीकु मुक्ति दोर्कता,
 इत्ता संगतितुन निमे ओना लोकुल्कुंक वेहांतिन.
 78 बारित्ते पेन दाना पेद्दा दया मनापोर्री हुप्पिचि, स्वर्गमताल वरोर पोळ्दुनसंटोन लोहंता.
 79 हामुर इनना नीडा आनि पापमता हीकटते मनना मनापोर्री,
 ओर वेल्लु अराहचि, मनाकुन सांतिता हर्दे ताकसंतोर.” इंचि इत्तोर.
 80 इल्हा आ पेडल पेद्दा बेर्सतोर. अल्हे आत्मातेगुडा बेस गट्टिगा आतोर. ओर ओना इस्राएल लोकुल्कुंक पेनदा पोळ्ले वेहना वेला एवनदाका ओर बय्लि जेगाने मत्तोर.

2

येसुना पुट्टमळ

- 1 योहान पुटतस्के, रोम सरकारता राजाल कैसर* अगस्तुस ओना कय हिळु मनना अन्नि देसेल्कुना लोकुल्कुनद सिरगंति कियना इंचि आदेस हीतोर.†
 2 कुरिनियुस इनना पोरोलतोर सिरिया एरियाता राज्यपाल मननेके ई सिरगंति आता. इदे मोट्टा मोदाटा सिरगंति आंद.
 3 अय्ते सिरगंतिता आदेस दोर्कुताहेंके अंटोर लोकुल्क पोरोली रासागोटकुनालय बोना नाटे ओर होत्तुर.
 4 अल्हेन योसेप दाविद राजाना वंसमतोर मत्तोर. अदुनहाटी ओर गालिल एरियाता नासरेत नाटेनाल यहुदिया एरियाता दाविद राजाना पुटता नार बेतलहेम इनना नाटेंक होत्तोर.‡
 5 ओर सिरगंतिहाटी नार होननेके ओनतोनि एर्रा बोट्टु आसि मत्ता मरियमुन पीसि होत्तोर. अस्के अद पीटे मत्ता.
 6 ओर अगा मननेकेन दाना एरपूराना वेला वाता.

* 1:76 मलाकी 3:1 † 2:1 कैसर इद राजाना पोरोल आयो. रोम सरकारते अन्निटकन्ना पेद्दा पदवि आंद. ‡ 2:1 कर वसूल कियनाहाटी राजाल सिरगंति कियालय आदेस हीतोर. § 2:4 मीका 5:2 † 2:4 नासरेत नाटेनाल बेतलहेम नार वेल्लेन एतुने मंता. आनि दग्गेर-दग्गेरा 150 किलोमिटर लक्कु मंता.

7 अद दाना तोल्सूर मरिन कंता. अगा ओर्कु आगालय बेस जेगा दोर्कुवाहेंके मरियम आ पेडन पेगुने हुटता, हुटसि कोळकते कोंदाक कुटार तासाना डालाते वाटसि इरता.

गोर्मे मेहानोरतोनि पेनदा दूताता वळकुमळ

8 अय्ते अदे नर्का इच्चुर गोर्मे मेहानोर नाटेना पलाते नेलिने ओर ओरा गोर्मेना कावेल कीसेक मत्तुर.

9 अस्के अचानक ओरा मुन्ने उंदि पेनदा दूता वासि नितता. अस्के सामिना महिमाता वेल्गु ओरा सुट्टु एल्गता. अदुन हळसि गोर्मे मेहानोर इरगा वेरियकुत्तुर.

10 अस्के पेनदा दूता ओर्कुन, “मिमेट वेरियमट. नना मीवाहाटी उंदि बेस कबुर पीसि वातन. इद कबुर अंटोर लोकुलकुंक बेस आनंदम हींता.

11 इय्याला दाविद राजाना नाटे, मीकुन पिसागोटनोर पुट्तोर, ओर किरिस्तुस सामि आंदुर.

12 ओन मिमेट एरपाट कियना चिन्ह बतल इत्ते, उंदि कोळकते पेगुने हुटसि कोंदांक कुटार तासाना डालाते वरोर सिन्ना पेडल मीकु दिस्सानुर,” इंचि इत्ता.

13 अल्हा इत्ता इन्मळे इंका वेल्लेन पेनदा दूतां वातां. वासि अगा मत्ता पेनदा दूतातोनि कलियसि पेनदुन तल्सकुंचेके,

14 “स्वर्गमते पेनदा कदर आयि, बूमिपोर्रो अद पावरम कीता लोकुलकुंक सांति दोर्किकांटी,”

इंचि इनालय दल्गतां.

15 पजा पेनदा दूतां ओर्कुन होळसिसि स्वर्गमते मल्सि होत्तां. अस्के आ गोर्मे मेहानोर वरोंक-वरोर, “अय्ते ताकट! मनम बेतलहेम नाटे दाकोम. होंचि, सामि मनाकु वेहताप जर्गता गटनातुन हळकोम,” इंचि इनालय दल्गुतुर.

16 पजा ओर अगटाल बिराना होंचि अगा मरियमुन, योसेपुन हळतुर. इंका अगा कोळकते कोंदांक कुटार तासाना डालाते सिन्ना पेडल मत्तदगुडा हळतुर.

17 हळसि, ओर्कु आ पेडाना बारेमते पेनदा दूता बतल वेहतानो, अद पोल्लेतुन आ गोर्मे मेहानोर अंटोर्क वेहतुर.

18 ओर वेहता पोल्लेतुन केंजता हरेक मनकल इंचंनमते अरतोर.

19-20 पजा आ गोर्मे मेहानोर ओर्क पेनदा दूता बतल अय्ते वेहता, अल्हेन जर्गुतदुन केंजसि, हळसि ओर पेनदुन इरगा स्तुति कीसेके मल्सि होत्तुर. गानि मरियम मात्रम अव अन्नि पोल्लेन दाना मनसुने इरकुंचि इदुना अर्तम बतल मरि, इंचेके ऊके विचारम कीसेके मनुंदु.

सामिना कय्दे येसुन अप्पजेपंतुर

21 इल्हा आ पेडल पुटसि एनमिदि रोजकु आतस्के ओनाद कतना रिवाज कीतुर. मरियम नेला तप्पका मुन्नेन पेनदा दूता दानकु वेहता परकारम, आ पेडाना पोरोल “येसु” इंचि इरतुर.

22-24 पजा मूसाना नियम परकारम दाना सुदिदकरन कियाना वेला वातस्के ओर येस्सलेम गुळिते होत्तुर. होंचि “रोंडु पावरेल्क हिलाकोंटे रोंडु गुव्वां अयना मोक्कु हियना.”* इंचि मूसाना नियमते रासि मत्ताप मोक्कु हीतुर. अल्हेने मूसाना नियमते, “तोल्सूर पेडन बस्केळक सामिक हियना.” इंचि वेहचि मंता. अदुनहाटी सामिना कय्दे येसुन अप्पजेपंतुर. इल्हा ओर सामिना नियम परकारम मोक्कु हियालय येस्सलेम होत्तुर.

सिमोन येसुना बारेमते पेनदा पोल्ले वेहांतोर

25 अवे त्कुलकुने येस्सलेमते सिमोन पोरोलतोर वरोर मनकल मनुंदुर. ओर नीतिमंतुड आनि पेनदा पोल्लेपोर्रो ताकानोर मत्तोर. इस्राएलता लोकुलकुंक पेन बस्के सुकम-सांति हीतनो इंचेके ओर एदुर हळसेक मनुंदुर. ओनतोनि पवित्र आत्मा मत्ता.

26 इंका पवित्र आत्मा, “बदवेरदाका अय्ते निमे, ‘पेन लोहना किरिस्तुन’ हळिन, अदवेरदाका नीकु हामुर वायो,” इंचि ओन्क वेहचि मत्ता.

27 पजा पवित्र आत्मा सिमोनुंक वेहताहेंका, योसेप आनि मरियम गुळितगा वाता रोजे ओरगुडा गुळितगा होत्तोर. मूसाना नियम परकारम दंडकालक कियनाहाटी पेडाना तल्लुर-बाबो पेडन अगा पीसि वातुर.

28 सिमोन आ पेडन ओरागटाल तेंडकुंचि एतकुत्तोर, एतकुंचि पेनदुन इल्हा स्तुति कियालय दल्गुतोर:

29 “ए सामि, निमे नाकु हीता पोल्ले परकारम नीवा सेवक आता नना, इंदके सांतिते हाया परांतन.

30 बारित्ते निमे पेरकुत्ता पिसागोटनोन नना नावा कळकुन निंडा हळतन,

31 निमे ओन दुनियाता अंटोर लोकुलकुना मुन्ने पेर्कुत्तिन,

32 वेरे जातिनोर्क बेसता हरि हृप्सना वेल्गु,

नीवा इस्राएल लोकुलकुंक पेनदाहेंदाल दोर्कुता पेदूदातनम ओरे आंदुर.”

33 सिमोन मातरल येसुना बारेमते वळकाना पोल्लें केंजसि, ओना यावल-बाबल इंचंनमते अरतुर.

§ 2:11 किरिस्तु किरिस्तु इत्ते युनानि बासाते निय होकसि निलाहता वरोर मनकल इंचि अर्तम. यहूदि जातिते पेर्मान, राजान निलाहनेके ओर्कु निय होकसि निलाहंतुर. मनकन ओना पापमताल पिसागोटलय पेन बोन अय्ते निलाहचि लोहता ओरे किरिस्तु. * 2:22-24 लैयवस्ता 12:1-8ते वेहताप उंदि मुरतळ मरिन कनानय्ते नल्पै रोजकुनदाका मुट्टुड मंता.

34 पजा सिमोन ओर्क आसिर्वाद हीसि, येसुना यावल मरियमुंक इल्हा वेहतोर: “ह्ळा, इस्राएलते ई पेडनहेंदाल वेल्लेन मंदि लोकुकुकुंक नस्टम जर्गार अल्हेने वेल्लेन मंदि लोकुकुकुंक बेसगुडा जर्गार. ई पेडल इत्ते पेनदाद उंदि चिन्ह आंदुर. ई चिन्हातुन वेल्लेन मंदि पास्कानुर.

35 इदुनहेंदाल वेल्लेन मंदिता मनसुना विचाराल्क पलाते अररनुं. गानि नीकु मात्रम उंदि कसेर नीवा गुडेटाल आरपार पेय्सि होत्ताचोन दुक्कम वायार.”

हन्नाल येसुना बारेमते अंतोर्क वेहंता

36 अगा पेनदा कबुर वेहना उंदि मातिर मनुंदु, दान पोरोल हन्ना. अद अस्सेर वंसमते पुटता पनुएल पोरोलतोना मिय्यड आंद. अद वेल्लेन मातिर आसि मत्ता. मरमिं आता एडुं वसनिन दाना मुय्दो हासोत्तोर.

37 इल्हा अद मुंडामोससि एनबै नालुं वर्सा आतां. अद रोज-रोज गुळिते वासेके मनुंदु. अद बस्केळक ओक्कापोद्दु मंचेके पेनदुक पारतना कियुंदु.

38 सिमोन मातरल योसेप आनि मरियमुनतोनि वळकसेकेन मत्तोर, अस्केन अद ओरा दगोर्क वासि पेनदुक दन्यवाद कीता. पजा बोर लोकुकुकुंक अय्ते, पेन इस्राएल लोकुकुकुंक ओरा तिप्पलुकुनाल बस्के पेचहार इंचेक एदुर ह्ळसेक मत्तुरो, आ अंतोर लोकुकुकुंक आ पेडाना बारेमते अद वेहता.

39 इल्हा सामिना नियम परकारम कियानव अन्नि दंडकाल्क कियमळ मारतारित्ते योसेप आनि मरियम गालिल एरियाते मनना ओरा नासरेत इनना नाटेंक मल्लि होत्तुर.

40 पजा आ पेडल पेद्दा बेसतोर. ओन्क पेन ताकत अल्हेने बुद्दिगुडा बेस हीता. दाना दया ओनपोर्रो मत्ता.

येसु येस्सलेम सहरतेन आगांतोर

41 दाटसि होनना पंडुगुनाहाटी† येसुना यावल-बाबल एटा येस्सलेम सहर होनुंदुर.

42 अय्ते येसु पन्नेड वर्सानोर आतोर, अस्केगुडा एटा होत्ताप येसुन पीसि पंडुगुनाहाटी येस्सलेम होत्तुर.‡

43 पंडुगु मारतंका येसुना यावल-बाबल ओरा नार मल्लि होनालय पेय्सतुर. गानि पेडल येसु मात्रम येस्सलेमतेन आगिसि मत्तोर. अयना इद संगति मात्रम ओना यावल-बाबांक बिल्कुल एरपाट आयाहिल्ले.

44 मनातोनि कलियसि ताकाना मंदितेन मंतोर बारे, इनकुंचि ओर इंकुंदि रोजमेड ताकसेक होत्तुर. पजा ओर ओरा जीवातोरुंन, एरपाटतोरुंन पूसकीसेके पहकालय दल्लुतुर.

45 हीके-हेके पत्किसि ह्ळतुर गानि येसु ओर्कु दिसा हिल्लोर. अदुनहाटी ओर मर्रा ओन पहकसेक-पहकसेक येस्सलेम वापस होत्तुर.

46 मूड रोजकु आतस्के गुळितगा येसु ओर्कु दिसतोर. अगा ओर यहुदि गुस्लुकुनतोनि उद्दिदिसि ओरा पोल्लें केंजसेके इंका ओर्कुन सवाल्लक पूसकीसेके मत्तोर.

47 येसुना उसारतनमतुन आनि जवाब हियानदुन ह्ळसि अगा मत्तोर अंतोर इचंत्रमते अरतुर.

48 ओना यावल-बाबल गुडा ओन ह्ळसि इचंत्रम आतुर. पजा ओना यावल ओन, “निमे मावातोनि इल्हा बारि कीतिन पेडा? नीवा बाबल, नना इरगा परेसान आसि नीकुन बगा-बगा पहकतोम नीकु एरके ना?” इंचि पूसकीता.

49 अस्के येसु ओर्कुन, “मिमेट नाकुन बारिक पहकतित? नना नावा बाबाना लोतेन मनमळ बेस इंचि मीकु तेळियोना?” इंचि इत्तोर.

50 गानि येसु वळकुता पोल्लेना अर्तम मात्रम ओना यावल-बाबांक तेळिया हिल्ले.§

51 पजा येसु ओना यावल-बाबानतोनि कलियसि नासरेत नार होत्तोर. तल्लुर-बाबो वेहता पोल्ले पोर्रेन ताकसेक मनुंदुर. ओना यावल इव अन्नि पोल्लें दाना मनसुने इरसि विचारम कीसेके मनुंदु.

52 इल्हा येसु, बुद्दिदते, ताकतते बेस्सेके होत्तोर. इंका पेन आनि मनकालोरा नदरतेगुडा बेस ताकुंदुर.

3

योहान पेनदा पोल्लेन वेहांतोर

(मत्तयाल 3:1-6; मरकुस 1:1-5; योहान 1:19-28)

1 तिबेरियुस कैसर इनना वरोर राजाल पूरा रोम राज्येमपोर्रो पेद्दा राजाल मत्तोर. ओर राज्येम कियालय दल्लिसि पदिहेन वर्सा पूरा आतां. अवे तूकुल्लुकुने पुंतुस पिलातुस इनानोर यहुदिया एरियाता राज्यपाल मत्तोर. अतिपस हेरोद राजाल गालिल एरियाता राज्यपाल मत्तोर. इंका ओना तम्मुर पिलिप इतुरिया आनि तारकोनितिस इव एरियान पोर्रो राज्यपाल मत्तोर.* लिसानियास इनानोर बारे अबिलेन इनना एरियाता राज्यपाल मत्तोर.

2 अस्के हन्नाल आनि ओना हडे कयपाल इनानोर इव्वुर पेद्दा पेर्मातोर मत्तुर. अवे तूकुल्लुकुने बतल आता इत्ते जकर्याहना मर्रि योहान बय्लि जेगाते मननेके ओनगा पेनदा वचनम एत्ता.

† 2:41 दाटसि होनना पंडुगु इजिप्त देसेमता गुलामगिरिताल यहुदि लोकुकुकुन पेन पेचाहचि तत्ता मतिते, इद पंडुगु कीतुर. गुलामगिरिताल पलाते अरता रोज इजिप्त देसेमता हरेक लोता पेद्दा मर्रिन पेनदा दूता ह्ळकुता. गानि यहुदिलुकुना लोतोरुंनल बोरे हाया हिल्लुर. ‡ 2:42 यहुदि जातितोर वरोर पेडल पन्नेड वर्सानोर आतस्के, ओन्क यहुदि जातितोरा अन्नि रिवाजकु

आनि मसाना नियमकुना पालन किया पीता. § 2:50 स्वर्गमते मनना पेनबाबाना बारेमते येसु वळकुतोर, गानि ओना यावल-बाबांक मात्रम इद संगति तेळिया हिल्ले. * 3:1 अतिपस हेरोद राजाल आनि पिलिप इर इव्वुरगुडा लूकाल 1:5 ने मनना पेद्दा हेरोद राजाना मर्कु मत्तुर.

3 अस्के ओर योर्दन बेरेटा सुट्ट-मट्टना एरियंता इल्हा वेहासेके तिरियुंदुर, “कीता पापाल्कुन ओपकुंचि मनसु मार्सकुंचि बापतिस्मा येतानये, पेन मीवा पापाल्कुन मापि कीता.”

4 इल्हा यसायाह इनना पेनदा कबुरतोर वेल्लेन वर्सा मुन्ने रासतद इंदके निजम आता. अद पोल्ले इल्हा मत्ता:

“बय्लि जेगाते केयानद उंदि अल्किर केंजा वांता,
सामि मीवा मनसुने वायनाहाटी हरि तयार कीम्ट,
इंका ओना हर्कुन सवरगा कीम्ट.

5 इत्ते, अन्नि लोदिं-लौंका निडमळ गावाले,
अन्नि गुट्टां-गट्टुक समानम आयमळ गावाले.

वंकर-डिंकर मत्ता हर्कु अन्नि, सवरगा आयमळ गावाले.
उतार-बोगडा मत्ता हर्कुगुडा, समानम आयमळ गावाले.

6 अस्के अंतोर लोकुल्क पेन मुक्ति हियानदुन हळंतुर.” ✧

योहान लोकुल्कुन तेरहंतोर
(मत्तयाल 3:7-12)

7 योहानुनाहेंदाल बापतिस्मा† येतानाहाटी लोकुल्क पेद्दा मंदानां-मंदां वातुर. अस्के बापतिस्मा हियना योहान ओर्कुन, “ए कट्टला तरासनसंतोरिता! पेनदा होंगुनाल तपिचकुनालय बापतिस्मा येतद इंचि मीकु बोर वेहतुर?”

8 अय्ते मरि, निजमे मीवा मनसु मार्सकुत्तिर इंचि रूजुव कीसि हुप्सट. वट्टिदे, मोमोट अब्राहामुना वंसमतोरम आंदुम, इंचि बस्केने इनकुनमट. नना मीकु निजम वेहांतन, पेन अब्राहामुनाहाटी ई बंडानालगुडा पिलाल्क पुट्टिचि हिया परंता.

9 इंदके मराकुना हिहकुनगा मर्सु इरसि मंता. बव मराकुंक अय्ते बेसता पंडिं हादोंगों, अबुन नर्किसि तडमिते वाटमळ जर्गता,” इंचि इत्तोर.

10 “अय्ते इंदके मोमोट बतल कियना मरि?” इंचि आ लोकुल्क योहानुन पूसकीतुर.

11 अस्के योहान, “बोनगा रौंडु अंगि मंतां, ओर ओनद उंदि अंगि, अंगि हिल्वोक्कु हियना आनि बोनगा अय्ते गाटो मंता, ओरगुडा हिल्वोक्कु तूस कीसि हियना,” इंचि वेहतोर.

12 बापतिस्मा येतनाहाटी अगा कर वसुल कियानोरगुडा वासि मत्तुर. ओर लोकुल्कुन वेल्लेन मुळाहिचि मत्तुर. ओरगुडा, “मोमोट बतल कीकोम गुरूजी?” इंचि पूसकीतुर.

13 अस्के योहान, “सरकार मीकुन बच्चोन जमा कियालय वेहता, अचोने जमा कीम्टु, दानकन्ना एक्को जमा कियमट,” इंचि ओर्कु वेहतोर.

14 अस्के इच्चुर सिपाइल्कगुडा ओनगा वासि, “अय्ते मोमोट बतल कीकोम मरि?” इंचि पूसकीतुर. अस्के योहान ओर्क, “मीकु दोर्केना पगारतेन मिमेट कूस मंट, बोरहेकटाले आयि बेदरिचि हिलाकोंटे आबद्दम तप्पु दोस्सि कोत्तां येतमट,” इंचि वेहतोर.

15 पेन लोहना पिसागोटनोर बिरानेन वायानुर इंचेके लोकुल्क बेस आसेते एदुर हळसेक मत्तुर. अदुनहाटी योहानुन हळसि, वायनद मत्ता किरिस्तु ईर अय्ते आयोर गदा, इल्हा अंतोर ओरद-ओरे मनसुल्कुने इनकुनुंदुर.

16 अस्के योहान ओरा मनसुना विचारमतुन एरपाट कीसि ओर अंतोर्कुन, “नना अय्ते मीकु बापतिस्मा एततोने हीतन. गानि बोर अय्ते वायानोर मंतोर, ओर नाकन्ना एक्को ताकततोर मंतोर. ओर केरसि मत्ता हेरपुहकुन इट्टना विलुवागुडा नाकु हिल्ले. ओर मीकु पवित्र आत्मा आनि तळमितोनि बापतिस्मा हीतोर.

17 ओना कय्दे हेती मंता. ओर ओना कडातुन बेस साप कीतारित्ते गोहकुन तूरपाल्क पीसि गुम्मिते दोसंतोर, पोट्टुनबारे बस्केने पिस्वा तडमिते वाटसि बोळसंतोर,” इंचि इत्तोर.

18 इल्हा योहान वेल्लेन पोल्ले करहासेक, ओर्क बेसता कबुर वेहुंदुर.

योहान येसुंक बापतिस्मा हीतोर
(मत्तयाल 3:13-17; मरकुस 1:9-11)

19-20 पजा बतल आता इत्ते, गालिल एरियाता राजाल हेरोद, ओना तम्मुर पिलिप पिस्सि मननेकेन ओना मुत्तो हेरोदियास इनानदान ओनगा तच्चि इरकुत्तोर. हेरोद राजाल ओना अगेनतोनि कीता पापम, इंका वैरे-वैरे वेल्लेन तप्पु कबाहकुनाहाटी हेरोद राजान योहान तेराहतोर. अदुनहाटी हेरोद राजाल योहानुन जेलने वाटसि, ओना तप्पुकुने इंकुदि तप्पु कल्पकुत्तोर.✧

21 योर्दन बेरेटे योहान वेल्लेन लोकुल्कुंक बापतिस्मा हीसेक मत्तोर. अस्के येसुगुडा अगा वासि योहानुना कय्दे बापतिस्मा एततोर. बापतिस्मा एततंका येसु पारतना कियनेके मब्बु अंता बैय्यरा आता.

22 अस्के पवित्र आत्मा पावरेम पिट्टे रूपमते वासि ओनपोर्रीं रेयतस्के, स्वर्गमताल उंदि अल्किर इल्हा केंजावाता. “निमे नावा पावरमगल्ला मरिन आदिन, नना नीकुन वेल्लेन जीवा कीतन, नीवा लोप्पो नना वेल्लेन आनंदमते मंतन.”

✧ 3:6 यसायाह 40:3-5 † 3:7 योहानुनाहेंदाल बापतिस्मा योहानुना बापतिस्मा इत्ते, नावा पळाना पिस्वरतुन होळसि, पूना पिस्वर पिस्संतन इंचि हुप्सालय एते मुडगिसि तेदमळ.

✧ 3:19-20 मत्तयाल 14:3; मरकुस 6:13

योसेपुना वंसम
(मत्तयाल 1:1-17)

23 येसु सेवा कियना कबळः सुख कीतस्के ओर दग्गेर-दग्गेरा मुपै वर्सानोर मत्तोर. लोकुल्क येसुन, योसेपुना मरिं इनकुनुंदुर. योसेप एलि पोरोलतोना मरिं आंदुर.

24 एलिना बाना पोरोल मत्तातु, मत्तातुना बाना पोरोल लेवि, लेविना बाना पोरोल मल्कि, मल्किना बाना पोरोल यान्ना, यान्नाना बाना पोरोल योसेपु.

25 योसेपुना बाना पोरोल मत्तियाल, मत्तियाना बाना पोरोल आमोस, आमोसुना बाना पोरोल नाहोम, नाहोमुना बाना पोरोल एस्लि, एस्लिना बाना पोरोल नागय्या.

26 नागय्याना बाना पोरोल मयातु, मयातुना बाना पोरोल मत्तियाल, मत्तियाना बाना पोरोल सिमय्या, सिमय्याना बाना पोरोल योसेकु, योसेकुना बाना पोरोल योदाल.

27 योदाना बाना पोरोल योहानन, योहानननुना बाना पोरोल रेसाल, रेसाना बाना पोरोल जेस्बाबेल, जेस्बाबेलना बाना पोरोल सल्लितिएल, सल्लितिएलना बाना पोरोल नेरी.

28 नेरीना बाना पोरोल मल्कि, मल्किना बाना पोरोल अदिदि, अदिदिना बाना पोरोल कोसाम, कोसामुना बाना पोरोल एलमादामु, एलमादामुना बाना पोरोल एराल.

29 एराना बाना पोरोल यहोसु, यहोसुना बाना पोरोल एलियाजर, एलियाजरना बाना पोरोल योरिमु, योरिमुना बाना पोरोल मत्तातु, मत्तातुना बाना पोरोल लेवि.

30 लेविना बाना पोरोल सिमोन, सिमोनना बाना पोरोल यहुदल, यहुदाना बाना पोरोल योसेपु, योसेपुना बाना पोरोल योनामु, योनामुना बाना पोरोल एलकिमु.

31 एलकिमुना बाना पोरोल मल्लयाल, मल्लयाना बाना पोरोल मिन्नाल, मिन्नाना बाना पोरोल मत्तातु, मत्तातुना बाना पोरोल नातानु, नातानुना बाबल दाविद राजाल.

32 दाविद राजाना बाना पोरोल यिस्सल, यिस्साना बाना पोरोल ओबेद, ओबेदुना बाना पोरोल बोआज, बोआजुना बाना पोरोल सलमोन, सलमोनना बाना पोरोल नहसोन.

33 नहसोनना बाना पोरोल अमिनादाब, अमिनादाबुना बाना पोरोल अदमिन, अदमिनना बाना पोरोल अरनि, अरनिना बाना पोरोल हेसरोन, हेसरोनना बाना पोरोल पेरिस, पेरिसना बाना पोरोल यहुदा.

34 यहुदाना बाना पोरोल याकोब, याकोबुना बाना पोरोल इसाक, इसाकुना बाना पोरोल अब्राहाम, अब्राहामुना बाना पोरोल तेराहाल, तेराहाना बाना पोरोल नाहोर.

35 नाहोसुना बाना पोरोल सस्रग, सस्रगुना बाना पोरोल रेऊ, रेऊना बाना पोरोल पेलेग, पेलेगुना बाना पोरोल एबेराल, एबेरालना बाना पोरोल सेलाल.

36 सेलाना बाना पोरोल केनान, केनानुना बाना पोरोल अरपक्सद, अरपक्सदना बाना पोरोल सेमु, सेमुना बाना पोरोल नोहाल, नोहाना बाना पोरोल लामेक.

37 लामेकुना बाना पोरोल मत्सेल, मत्सेलना बाना पोरोल हनोक, हानोकुना बाना पोरोल यारेद, यारेदुना बाना पोरोल महलेल, महलेलना बाना पोरोल केनान.

38 केनानुना बाना पोरोल अनोस, अनोसुना बाना पोरोल सेतु, सेतुना बाना पोरोल आदाम, आदाम पेनदा मरिं मत्तोर.

4

पेद्दा देय्यम येसुना परिकसा येतंता
(मत्तयाल 4:1-11; मरकुस 1:12-13)

1 पजा येसु योर्दन बेरेटाल बापतिस्मा एतसि पवित्र आत्माते निडतस्के, पेनदा आत्मा ओन बय्लि जेगाते पीसि ओता.

2 अगा नल्पै रोजकुनदाका पेद्दा देय्यम ओना पट्टु हळता. अव रोजकुने येसु बतले तिना हिल्लोर. अदुनहार्टी अव रोजकु मारतस्के येसुंक इरगा कर्वेस्ता.

3 अस्के पेद्दा देय्यम ओनगा वासि, “ओक्कला निमे पेनदा मरिं आते ई बंडां हारि आयिं इंचि आदेस हीम,” इंचि ओन इत्ता.

4 इत्तस्के,

“मनकल सिराप वट्टि हारि तिचे पिस्सोर,

गानि पेनदा तोळदाल पेय्सना, उंदि-उंदि पोल्लेताहेंदाल पिस्संतोर.

इल्हा दर्मसास्त्रमते रासि मंता,” ✨ इंचि येसु दान्क जवाब हीतोर.

5 पजा पेद्दा देय्यम येसुन उंदि एत्तु जेगाते पीसि ओसि, उंदि मल्का दुनियाता अन्नि राज्येल्क हुपिस्ता.

6 हुपिच्चि, “इव अन्नि राज्येल्लकुनपोर्रो अदिकारम आनि अबुना पेद्दातनम नीकु हीतन. बारित्ते अव अन्नि राज्येल्लक नाके हियमळ जर्गता. नना इद अदिकारम बोन्क इत्ते ओन्क हिया परांतन.

7 अदुनहाटी, निमे नावा काल्क मोळकानय्ते इव अन्नि नीवांगे आंतां,” इंचि पेद्दा देय्यम इत्ता.

8 अस्के,

“निमे नीवा पेनदुने मोळकना, सिराप दानादे सेवा कियना,☆

इल्हा दर्मसास्त्रमते रासि मंता,”

इंचि येसु दान इत्तोर.

9 आयंका पेद्दा देय्यम येस्सलेमते मनना गुळितगा येसुन ओसि, गुळि पोर्रो कोस्सक निल्लाचि इल्हा इत्ता, ओक्कला निमे पेनदा मर्रिन आते हिळु दुनका.

10 बारित्ते,

“नीकुन कापाळालय पेन दाना दूतांक आदेस हीता,

आनि आ दूतां वासि, नीवा काल्कुंक देब्बां दलगामान्नि इंचि,

नीकुन पोर्रोटद पोर्रेन अंदकुंतां,

11 इल्हा दर्मसास्त्रमते रासि मंता.”☆

12 अस्के येसु दान्क इल्हा जवाब हीतोर.

“निमे सामि इनना नीवा पेनदा पट्टु हळमा, इल्हागुडा वेहतद मंता.”☆

13 इल्हा पेद्दा देय्यम अन्नि तीस्कुने येसुना पट्टु हळतारित्ते, दान्क इंकुदि मोका दोर्कनदाका ओन होळसि होत्ता.

येसु सेवा कबळ सुख कीतोर

(मत्तयाल 4:12-17; मरकुस 1:14-15)

14 पजा येसु पवित्र आत्माता ताकतते निंडसि गालिल एरियाते वापस वातोर, अस्के गालिल एरियाता अन्नि नाहकुनोर ओना बारेमतेन वळकुंदुर.

15 येसु ओरा दर्मसास्त्रम कराहना लोहकुने होंचि पेनदा पोल्लें करहुंदुर. अंतोर ओन बेस कराहतोर इंचि कदर हिय्युंदुर.

येसुन ओना नाटेनोर हयसा हिल्लुर

(मत्तयाल 13:53-58; मरकुस 6:1-6)

16 पजा येसु सिन्नास्केटाल बेसता नार नासरेतते होत्तोर. वारमता नोमकेम रोजुने ओना अलवट परकारम दर्मसास्त्रम कराहना लोते होंचि, दर्मसास्त्रम हदवालय निततोर.

17 अस्के यसायाह इनना पेनदा कबुरतोर रासता पुस्तकम ओन्क हीतुर. ओर आ पुस्तकमते उंदि पोल्ले दोर्किच्चि, इल्हा हदवालय सुख कीतोर:

18 “पेनदा पवित्र सेवक इल्हा वेहचंतोर, पेनदा आत्मा नावापोर्रो वाता.

गरिबोर्कुंक बेसता कबुर वेहालय, पेन नाकुन अबिसेकम कीता.

दोहचि वाटसि ओतोर्कुन, पेन होळसीता इंचि वेहालय,

गुडुडोर्कुन, मिमेट हळतिर इंचि वेहालय,

तकलिपते मनानोर्कुन, तकलिपताल तेंडालय,

19 पेन दया कियना वेला एव्ता, इंचि वेहालय नाकुन लोहता.”☆

इल्हा रासि मत्तदुन हदुवतोर.

20 हदुवमळ आतारित्ते, पुस्तकमतुन बंद कीसि वरोर चपरासिक हीसि कराहलय येसु हिळु उदुतोर. आ दर्मसास्त्रम कराहना लोते मत्ता अंतोरा नदर ओनहेकेन मत्ता.

21 अस्के, “इय्याला मिमेट केंजतव दर्मसास्त्रमता पोल्लें, मीवा मुन्ने नावा कयदाल पूरा आतां,” इंचि येसु ओर्कुन इत्तोर.

22 “ओर बेस वेहतोर, बेस-बेसतां पोल्लें ओना तोळदाल पेय्युंदुं,” इंचेके ओर अंतोर इचंन्रम आतुर. आसि ओर, “ईर अय्ते योसेपुना मर्रे गदा?” इंचि इत्तुर.

23 अस्के येसु ओर्कुन इल्हा इत्तोर, “ ‘मत्तु हियानोना! नीवद निमेने बेस कीस हुप्सा,’ इंचि उंदि सात्रम मत्ताप, मिमेट इंका नाकुन तप्पाकोटा इंचि, इत्ते, ‘कपर्नाहुमते निमे कीता अद्बूताल्कुना बारेमते मोमोट केंजतोम, अव अद्बूताल्क नीवा संतम नाटेनेगुडा कीम,’ इंचि इंचि.

24 नना मीकु निजम वेहांतन, बोर पेनदा कबुरतोंक आयि, ओना नाटेनेन ओन्क कदर मन्नो.

25 अद बल्हा इत्ते, पेनदा कबुरतोर एलियाहना* कालमते बतल जर्गुता मीकु एर्केना? अस्के पूरा देसेमते मूड वर्सा हारं नेल्कुनदाका पिरं वाया हिल्ले, अदुनहाटीं वेल्ले कर्वु अर्सि मत्ता. नना मीकु निजम वेहांतन, अद वेलाते इस्नाएल देसेमते वेल्लेने मुंडामोस्ता मुर्ताहक मत्तां.

26 गानि बदे मुंडामोस्ता मुरतटगा सहायम कियनाहाटीं पेन एलियान लोहा हिल्ले. ओन सिराप सिदोन सहर दग्गेटा सारपत नाटेना वैरे जातिता मुंडामोस्ता मुरतटगा लोहता.☆

27 अल्हेने पेनदा कबुरतोर एलिसाना† कालमते इंका कुस्टरोगम आतोर इस्नाएल देसेमते वेल्लेटुरे मत्तुर. गानि ओराव्टेताल वरोन इंका बेस कियालय पेन एलिसान लोहा हिल्ले. सिराप सिरिया देसेमता नामान इनानोने बेस कीतोर,☆ इल्हा बौरे पेनदा कबुरतोक आयि, ओना नाटेनेन ओन्क कदर मन्नो,” इंचि वेहतोर.

28 इस्नाएल लोकलुकुन होळसि, वैरे देसेमता लोकलुकुन पेन सहायम कीता इंचि येसु वेहतस्के, दर्मसास्त्रम कराहना लोते उदिस मत्तोर अंटोर्क इरगा होंग वाता.

29 होंग वातस्के ओर तेदसि, येसुन ओरा नाटेनाल पलाते गुजिस ओतुर. ओरा नार उंदि गुट्टापोर्री मत्ता. येसुन गुट्टा पोर्रीटाल दोब्बिसि हियालय एत्तु मत्तगा ओतुर.

30 गानि येसु ओरा नड्डुमताल पेय्सि होत्तोर.

देय्यम पीतोन येसु बेस कीतोर
(मरकुस 1:21-28)

31 अगटाल येसु ओना सिस्युल्कुनतोनि गालिल एरियाता कपर्नाहम‡ नाटे होत्तोर. अगा वारमता नोमकेम रोजुननाड पेनदा पोल्लें कराहमळ सुस्व कीतोर.

32 ओर इच्चोन अदिकारमते करहुंदुर गदा, ओना कराहमळतुन कैजसि लोकलुक इचंनम आतुर.

33 अगा दर्मसास्त्रम कराहना लोते वरोर देय्यम पीता मनकल मत्तोर. ओर येसुन हळसि जोरते वरगेयसि केयतोर,

34 “ए नासरेत नाटेना येसु! मातोनि नीकु बाता कबळ? माकुन नासडेम कियालय वातिना? निमे बोन आदिनो नाक एरपाटे, निमे नासरेत सहरता येसुन, पेनदा पवित्र मनकन आदिन,” इत्तोर.

35 अस्के येसु ओनालोप्पो मत्ता देय्यमतुन, “चुपचाप मन! ओनागटाल पलाते पेयसा,” इंचि गदरिचतोर. अस्के, अद ओन हिळ अरहचि, ओन्क बतले नोप्पि कियाकोटा, ओना लोप्पोटाल पेय्सि होत्ता.

36 अगा मत्तोर लोकलुक इचंनम आसि, वरौक-वरोर वळकालय दल्गातुर, “इद बसोंटा पोल्ले आंदु? ओर अदिकारमते, ताकतते देय्यालुकुंक आदेस हीतोर, अव पेय्सि दांतां!” इंचि इत्तुर.

37 इल्हा येसुना पोल्लें सुट्टु-मट्टु मत्ता अन्नि नाहकुने तेळियसि होत्ता.

येसु उंदि बिमार मुरताटुन बेस कीतोर
(मत्तयाल 8:14-15; मरकुस 1:29-31)

38 येसु दर्मसास्त्रम कराहना लोताल पेय्सि सिमोन इननोना लोन होत्तोर. अगा सिमोनना पोरळकु बागा एळकि वासि मत्ता. दाना एडकितुन बेस कियालय ओर येसुन विनंति कीतुर.

39 अस्के येसु दाना दग्गेरा नित्तिसि एडकितुन गदरिचतस्के दाना एळकि रेयता. पजा अद बिराना तेदसि, ओरा सेवा कियालय दल्गाता.

येसुनाहेदाल वेल्लेटुर बेस आतुर
(मत्तयाल 8:16-17; मरकुस 1:32-34)

40 पजा पोळद होनना वेलाक तीरतीरकुना बिमार्क मत्तोर्कुन लोकलुक ओनगा पीसि वातुर. अस्के येसु वरोन-वरोनपोर्री कय इरसि, ओर्कुन बेस कीतोर. §

41 वेल्लेटोर्कुन देय्यालुक पीसि मत्तां. अव देय्यालुकुन येसु गदरिचिचि पेचाहतोर. देय्यालुक ओरागटाल पेय्सनेके, येसु किरिस्तु आंदुर इंचि एरपाट कीसि, “निमे पेनदा मारिन आदिन” इंचेके जोरते वरगेयसेके पेय्सुंदु. गानि येसे किरिस्तु आंदुर इंचि अव एरपाट कियुंदु इंचि येसु अवुन वळका हिया हिल्लोर.

येसु वैरे-वैरे नाहकुने दांतोर
(मरकुस 1:35-39)

42 पंगातस्के येसु, नाटुन होळसि बौरे हिल्वगा ओंटीगा होत्तोर. गानि लोकलुक ओन पत्किसि-पत्किसि दोर्किचिचि, निमे माकुन होळसि होनमा इंचि आपालय हळतुर.

43 गानि येसु ओर्कुन इल्हा इत्तोर. “पेन मनकालोरगा राज्येम कियना बेसता कबुरतुन नाकु वैरे नाहकुने इंका वेहा पीता. इदे कबळताहाटीं पेन नाकुन लोहता,” इत्तोर.

* 4:25 एलियाह एलिया इनना पेनदा कबुरतोर येसुंकनना 850 वर्सा मुन्ने मत्तोर. ☆ 4:26 1 राजा 17 † 4:27 पेनदा कबुरतोर एलिसाना एलियाल होत्तंका ओना जेगाते एलिसा इनना पेनदा कबुरतोर पेनदा कबुर वेहना कबळ कियुंदुर. ☆ 4:27 2 राजा 5:1-14 ‡ 4:31 कपर्नाहम कपर्नाहम नार नासरेत नाटक मुपै किलोमिटर लक्कु मंता. अद गालिल सेरखुना ओड्डुनपोर्री मंता. § 4:40 नोमकेम रोजुने यहुदिलुकु बतले कबळ कियाकोदुर, पय्नेम होनाकोदुर. सनेरम पोळद होतस्के नोमकेम रोज मास्दु, अदुनहाटीं पोळद होंचि बिमारकुनोर्कुन येसुनगा तत्तुर.

44 पजा येसु, यहुदिया एरियाते यहुदिल्कुना दर्मसास्त्रम कराहना लोहकुने होंचि पेनदा पोल्ले वेहुंदुर.

5

पत्रु, याकोब आनि योहान येसुना पज्जो दांतुर
(मत्तयाल 4:18-22; मरकुस 1:16-20)

1 उंदि रोजु येसु गेनेसरेत* इनना समुद्रमतगा नित्तिसि पेनदा पोल्ले वेहासेक मत्तोर. येसु ओड्डुनपोर्रो नित्तिसि पेनदा पोल्ले वेहनेके, आ पोल्ले केंजालय अगा वेल्लेने लोकुल्क ओना सुट्टु जमा आतुर.

2 अस्के येसु समुद्रम ओड्डुनगा रोंडु डोंगान हळतोर. जिम्मां पियानोर डोंगानाल रेय्शि ओरा ओल्लां नोर्सेक मत्तुर.

3 येसु, अब डोंगानाल वरोर सिमोन पत्रु इननोना डोंगाते एकतोर. एकसि, अंतोर्क बेस केंजा वायना इंचि अद डोंगातुन ओड्डुनाल इच्चुर लक्कु ओसि निप्सा इंचि वेहतोर. ओर डोंगातुन लक्कु निपिस्ता पजा, येसु डोंगाते उद्दिदिसि लोकुल्कुंक पेनदा पोल्ले वेहालय दलगतोर.

4 पेनदा पोल्ले वेहमळ आता पजा, “डोंगातुन वेल्ले लोतु मत्तगा ओसि मिमेट ओल्लां मर्रा वाटट,” इंचि येसु सिमोननुन इत्तोर.

5 अस्के, “गुरु! मोमोट नर्का पल्ही तिप्पल्क अरतोम, माकु उंदिंका जिम्मा दोकाहिल्ले, गानि निमे इंचेके मंतिन अदुनहाटीं नना ओल्ला वाटंतन,” इंचि सिमोन इत्तोर.

6 पजा सिमोन आनि ओना दंटातुर येसु वेहताप कीतुर अय्ते वेल्लेने जिम्मां अर्सि ओरा ओल्लां हरालय आतां.

7 ओल्लां हरतां बारे इंचि वरे डोंगाते मत्ता ओरा दंटातोर्कुन आसरा आयालय सय्ये कीसि केयतस्के, ओर वासि रोंडु डोंगाने जिम्मां निहतुर, अस्के ओरां रोंडु डोंगा इका मुळगालय आतां.

8-9 वेल्लेने जिम्मां अरतद हळसि, सिमोन पत्रु आनि ओना दंटातुर वेल्ले इंचत्रम आतुर. अस्के सिमोन येसुना काल्कुना पोरोर अरसि, “सामि, नना पापि मनकन आंदुन, नीवा दग्गेरा मनना लायक हिल्लेने,” इंचि इत्तोर.

10 अल्हेने जब्दि इननोना मर्क याकोब, योहान, ईर सिमोन पत्रुना दंटातोरे आंदुर, इंचत्रम आतुर. अस्के, “निमे वेरिय्या, गानि इंदकेटाल निमे मनकालोर्कुन पीसि वायानोन आकिन,” इंचि येसु सिमोननुन इत्तोर.

11 पजा ओर ओरा डोंगां ओड्डुंजुंक तत्तुर. तच्चि अब अन्नि अग्गेन होळसि ओना पज्जो होत्तुर.

येसु कुस्ट रोगमतोन बेस कीतोर
(मत्तयाल 8:2-4; मरकुस 1:40-44)

12 उंदि रोजु येसु उंदि सहरते मत्तोर. अगा वरोर मनकल कुस्टरोगमते पूरा निंडसि मत्तोर. ओर येसुन हळसि ओना काल्कुनपोरोर अर्सि, “सामि, निमे इन्कुत्ते नाकुन बेस क्रिया परांतिन,” इंचि विनंति कीतोर.

13 अस्के येसु कय मुन्नेळ्क कीसि ओन इट्टिस इल्हा इत्तोर, “निमे बेस आयगोम इंचि मनसु मंता, बेस आम,” इंचि इत्ता इन्मळे ओना कुस्टरोगम पुरागा होत्ता.

14 पजा, “इगे जर्गतद बोनके वेहमा. गानि निमे होंचि मीवा पेमीक हुप्सा. पजा मूसाल वेहता मोक्कु हीम. अस्के निमे बेस आतिन इंचि लोकुल्कुंक एरपाट आंता,” इंचि येसु ओन्क गट्टिगा वेहतोर.

15 निमे बोर्के वेहमा इंचि येसु वेहचि मत्तोर गानि ओना पोल्ले मुन्नेटकन्ना एकको लोकुल्कुंक तेळियसेक होत्ता. अदुनहाटीं वेल्लेने लोकुल्क ओना पोल्ले केंजालय, बिमारकुनाल बेस आयालय ओना पज्जो-पज्जो वायुंदुर.

16 गानि येसु बोरे हिल्वगा अलग-सलग होंचि पारतना कियुंदुर.

येसु लकवा बिमारतोन बेस कीतोर
(मत्तयाल 9:1-8; मरकुस 2:1-12)

17 येसु उंदि रोज वरोन लोन पेनदा पोल्ले वेहनेके, अगा परिसिल्क,† आनि दर्मसास्त्रम कराहना गुस्लक उदिस मत्तुर. ओर गालिल आनि यहुदिया एरियाना अन्नि नाहकुनाल, अल्हेने येस्सलेम सहरताल वासि मत्तुर. पेनदा ताकत येसु सामिनगा मत्ताहेंके बिमारतोर्कुन बेस कियुंदुर.

18 हळा! अस्के इच्चुर लोकुल्क वरोर लकवा बिमारतोन कटुलते वाटसि येसुनगा तत्तुर. तच्चि येसु उद्दिदिसि मत्तगा लोप्पो ओयालय हळतुर.

19 गानि अगा वेल्ले गर्दि मत्ताहाटीं ओर लोता लोप्पो ओया पराहिल्लुर. अस्के ओर बतल कीतुर इत्ते लोतपोरोर एकतुर, कटुल पियानचो बोंगा कीसि येसु लोप्पो बगा अय्ते उदिस मत्तोर ओन्क सवरगा आ लकवा बिमारतोन कटुल्क कटुले ओना मुन्ने रेहतुर. 20 येसु, ओरा विस्वासमतुन हळसि, “कोको, नीवा पापाल्क मापि आतां,” इंचि लकवा बिमारतोन इत्तोर.

21 अस्के दर्मसास्त्रम कराहना गुस्लक आनि परिसिल्क केंजसि, “पेनदा अपमानम कियानोर, ईर बोर आंदुर? पेनदुन होळसि इका बोरे पापाल्कुन मापि क्रिया पर्र,” इंचि ओर-ओरे मनसुने विचारम कियालय दलगतुर.

22 येसु सामि, ओरा मनसुना विचारमतुन एरपाट कीसि, “मी मनसुने इसोटा विचारम बारि कीतिर?

* 5:1 गेनेसरेत दीन गालिल इंचिगुडा इंतुर. ☆ 5:14 लैव्यवस्ता 14:1-32 † 5:17 परिसिल्क इत्ते इगे परिसिल्कुना गेंगनोर मत्तुर.

23 बद अलकगा मंता? ई बिमारतोन, 'नीवा पापालक मापि आतां' इनमळा? हिलाकोटे, 'तेदिस ताका' इनमळा?

24 गानि मनकना रूपमते पुटतोन नाकु, ई बूमिपोर्रोटा पापालकुन मापि कियना अदिकारम मंता इंचि मीकु हुप्संतन," इत्तोर. इंचि, "नना नीकु वेहासेके, निमे तेदसि कटुल पीसि लोन होन," इंचि लकवा बिमार आतोन इत्तोर.

25 अस्के ओर बिराना अंटोरा मुन्ने तेदसि, बद कटुलते अयते ओर मीडसि मत्तोर अद कटुल पीकुंचि, पेनदुन तल्सकुंचेके लोन होत्तोर.

26 अद हळसि, अगा मत्तुर अंटोर वेल्लेन इचंत्रम आसि, पेनदुन तल्सकुनालय दल्गतुर. पजा वेरियसि, "इदवेरादाका मोमोट बस्केने इसोटा इचंत्रम आयना कबाहक हळा हिल्लोम," इंचि इनालय दल्गतुर.

कर वसुल कियना लेवि इनानोन येसु केयतोर
(मत्तयाल 9:9-13; मरकुस 2:14-17)

27 पजा येसु अगटाल होननेके, कर वसुल कियना नाकातगा लेविः पोरोलता वरोर कर वसुल कियानोन हळतोर. हळसि ओन, "नावा पज्जो वा," इंचि इत्तस्के

28 ओर, ओनगा मत्तव अन्नि अग्गेन होळसि ओना पज्जो होत्तोर.

29 पजा लेवि येसुन ओना लोन केय्सि, उंदि पेदूदा बोजनम हीतोर. अगा वेल्लेटुर कर वसुल कियानोर, इंका वेरैतोर लोकुल्क येसुनतोन उद्दिदसि गाटो तिंचेके मत्तुर.

30 अस्के परिसिल्क आनि ओरा दर्मसास्त्रम कराहना गुस्लक येसुना सिस्स्युल्कनगा वासि, "कर वसुल कियानोरतोनिस आनि पापि लोकुल्कनतोन मिमेट तिनूळ-उनुळ बारि तित्तिर," इंचि गुल्गालय दल्गतुर.

31 अस्के येसु ओर्कु इल्हा जवाब हीतोर, "बिमार हिल्वोर्कुंक डाक्टरना अब्सरम मनो गानि बिमार मत्तोर्कुंक डाक्टरना अब्सरम मंता.

32 नना नीतिमंतुल्कन केयालय आयो गानि पापि लोकुल्कन मनसु मार्सकुननाहाटी केयालय वातन," इंचि इत्तोर.

ओक्कापोदूदुना बारेमते येसु कराहता पोल्ले
(मत्तयाल 9:14-17; मरकुस 2:18-22)

33 पजा अगा मत्ता लोकुल्क येसुन इल्हा पूसकीतुर, "योहानुना सिस्स्युल्क अयते ऊके ओक्कापोदूदु मंन्तुर, पारतनागुडा कीतुर. अल्हेने परिसिल्कना सिस्स्युल्कगुडा कीतुर, गानि नीवा सिस्स्युल्क अयते बस्केळक तिंचेक-उंचेके मंन्तुर. अल्हा बारि?"

34 अस्के येसु ओर्क इल्हा वेहतोर, "मरमिन पेडल मरमि वाता हेडमितोरतोन मननेके, ओर्कुन ओक्कापोदूदु मना वेहा परकिटा? वेहा पर्रिर.

35 गानि मरमिन पेडल ओरागटाल लक्कु आयाना रोजकु वायनं, अव रोजकुने ओर ओक्कापोदूदु मनानुर."

36 पजा, येसु ओर्क इंकुंदि वेसुडि वेहतोर. "बोरे आयिर, पूना कप्पिडतुन हराह्चि पळाना कप्पिडक अंटा वाट्सि कुट्टोर. ओक्कला ओर अल्हा कियानयते पूना कप्पिड अयते हेळसि दांते, अल्हेने पूना कप्पिडता तुकडा पळाना कप्पिडक सोकगुडा दिस्सो.

37 अल्हेने पूना अंगुर पानकमतुन, पळाना तोलपुर्काते बोरे दोस्सुर. अल्हा दोसते अद अंगुर पानकम, पळाना तोलपुर्कातुन हराह्चि पोंगिस दांता. पजा आ तोलपुर्कागुडा नासडेम आंता.

38 अल्हा कियवा पूना अंगुर पानकम पूना तोलपुर्कातेन दोसना. अस्के तोलपुर्कातुन हरहो.

39 बोरे आयिर, पळाना अंगुर पानकम उट्टारित्ते, पूना अंगुर पानकम गावाले इन्नोर. ओर पळाना अंगुर पानकमे बेस मंता इंचि वेहांतोर."

6

नोमकेम रोजुना मालक येसु आंदुर
(मत्तयाल 12:1-8; मरकुस 2:23-28)

1 उंदि नोमकेम रोजुने येसु पोलाल्कुनाल होंचेके मत्तोर. होननेके ओना सिस्स्युल्क हेनकु उरहाचि कयदे नल्सि तिंचेके होत्तुर.

2 इचचुर परिसिल्क अदुन हळसि, "नोमकेम रोजुने बद कबळ अयते कियमळ नियम परकारम ओज्जोनो, अदे कबळ मिमेट बारि कीसंतिर?" इंचि येसुन पूसकीतुर.

3 अस्के येसु ओर्कुन, "दाविदुंक आनि ओना दंटातोर्कुंक कर्वेस्तस्के ओर बतल कीतोर, मिमेट हदवा हिल्लिरा?

4 ओर पेनदा लोते होळियसि, पेनदुक मोळकता हारिन तित्तोर, * ओना दंटातोर्कुंकगुडा हीतोर. * अव हारि तिनमळ इत्ते दर्मसास्त्रम परकारम विरोदमते मत्ता. अव हारि सिराप पेर्मालोर्क तप्पा इंका बोरे तिना पर्रिर," इंचि इत्तोर.

5 पजा, "मनकना रूपमते पुटतोन नना, नोमकेमता रोजुना मालकगुडा आंदुन," इंचि येसु ओर्कुन इत्तोर.

नोमकेम रोजुने येसु वरोर मनकन बेस कीतोर
(मत्तयाल 12:9-14; मरकुस 3:1-6)

6 अल्हेने इंकुंदि नोमकेम रोजुने येसु दर्मसास्त्रम कराहना लोन होंचि कराहसेक मत्तोर. अगा वरोर तिना कय वत्सोत्ता मनकल मत्तोर.

‡ 5:27 लेवि लेवि येसुना सिस्स्युड आतोर, पजा इना पोरोल मत्तयाल इंचि अरता. मत्तयाल रासतद बेसता कबुर ईर रासतोर. § 5:30 कर वसुल कियानोर ईर रोम सरकारनाहाटी कर वसुल कियुंदुर. आनि यहुदि लोकुल्क रोम सरकारनाहाटी कबळ कियानोर्कुन हय्साकोंदुर. * 6:4 लैव्यवस्ता 24:9 * 6:4 1 सम्पूल 21:1-6

7 अद लोतगा इच्चूर दर्मसास्त्रम कराहना गुस्लूक आनि परिसिल्क मत्तुर. नोमकेम रोजुने येसु ओन बेस कीतोर किय्योरा? बेस कियानय्ते, नोमकेम रोजुने बल्हा बेस कीतोर इंचि तप्पुने पियालय ह्ळसेक मत्तुर.*

8 गानि येसु मात्रम ओरा विचाराल्कुन एरपाट कीसि, “तेदसि अंटोरा मुन्ने नित्ता,” इंचि कय वत्सोत्तोन इत्तोर, इत्तस्के ओर तेदसि मुन्ने वासि नित्तोर.

9 पजा येसु ओर्कुन इल्हा पूसकीतोर, “नना मीकुन उंदि पोल्ले पूसकीतन वेहाट. नियम परकारम, नोमकेम रोजुने बेस कियमळ मंचिदा, कराब कियमळ मंचिदा? हिलाकोटे उंदि जीवातुन पिसागोटते मंचिदा, नासडेम कियमळ मंचिदा? बद बेस” इत्तोर.

10 येसु अंटोरहेके ह्ळतोर. पजा, “नीवा कय मुन्नेळक हहा,” इंचि आ कय वत्सोत्तोन इत्तोर. ओर कय मुन्नेळक हाहतस्के ओना कय बेस आता.

11 गानि परिसिल्कुंक आनि दर्मसास्त्रम कराहना गुस्लूकुंक होंग वासि, ओर पलाते पेय्स्तुर. पेय्सि, येसुन बतल कीते सरे? इंचि ओर-ओरे विचाराल्क कियालय दल्गतुर.

येसु पन्नेड मंदि प्रेरितुल्कुन पेरतोर
(मत्तयाल 10:1-4; मरकुस 3:13-19)

12 पजा उंदि रोज पारतना कियालय येसु गुट्टापोर्रो होत्तोर. अगा ओर नर्का-पल्हिं पेनदुक पारतना कीतोर.

13 पंगातस्के ओना सिस्स्युल्कुन अंटोर्कुन दग्गेर्क केय्सि ओराव्टेताल पन्नेड मंदिदुन पेरतोर. पेरसि ओर्कु, प्रेरितुल्क इंचि पोरोल दोसतोर. येसु पन्नेड मंदिदुन पेरकुत्तोर ओरे प्रेरितुल्क† इंचि पोरोल दोसतोर.

14 पन्नेड मंदि बोर-बोर इत्ते, सिमोन (ईन पत्रु इंचि येसु पोरोल दोसतोर),* सिमोनना तम्मुर अंदरियल, जब्दिना मर्क याकोब आनि योहान, पिलिप, बरतलमय,

15 मत्तयाल (ईर कर वसुल कियना लेवि आंदुर, ईन मत्तयालगुडा इंतुर), तोमल, अल्पिना मरिं याकोब, सिमोन जिलोति‡

16 तद्दि यहुदल (ईना बाना पोरोल याकोब) आनि इस्कारियोत नाटेना यहुदल (ई यहुदले आकिरते येसुन पगातोर कय्दे पीसि हीतोर).

बिमार मत्तोर्कुन येसु बेस कीतोर
(मरकुस 3:7-12)

17 पजा येसु ओना सिस्स्युल्कुनतोनि गुट्टा पोरोटाल हिळु रेय्सि, सपाट जेगाते वासि नित्तोर. अगा ओना वेल्लेन मंदि सिस्स्युल्क मत्तुर. अचोने आयाका पूरा यहुदिया एरिया, येस्सलेम सहर, समुद्रम ओड्डु पीसि मत्ता सूर, सिदोन इनना सहरकुनाल वेल्लेटुर लोकुल्क ओनगा जमा आसि मत्तुर.

18 ओर अंटोर येसु वेहता पोल्ले केंजालय, बिमारकुनाल बेस आयालय वासि मत्तुर. बोर्कु अय्ते देय्याल्क पीसि मत्तंगो ओरगुडा वासि बेस आतुर.

19 ओनागटाल पेनदा ताकत वासि ओर अंटोर्कुन बेस कियुंदु. अदुनहाटीं आ मंदि अंता ओन इट्टालय ह्ळसेक मत्तुर.

पेन बोर्कुन बेस ह्ळंता?
(मत्तयाल 5:1-12)

20 पजा येसु ओना सिस्स्युल्कुन ह्ळसि इल्हा इत्तोर,
“मिमेट बोर अय्ते गरिब मंतिरो, पेन मीकु आसिर्वाद हींता,
पेनदा राज्येम मी असंटोरदे आंदु.

21 मिमेट बोर अय्ते इंदके कर्वुने मंतिट,
पेन मीकु आसिर्वाद हींता, मीवा करवु सल्लारंता.
बोर अय्ते इंदके अळसेके मंतिट, पेन मीकु आसिर्वाद हींता,
वायना रोजकुने मिमेट कव्सेक मनंतिर.

22 मनकना रूपमते पुटता पेनदा मरिंना सिस्स्युल्क आताहाटीं,
बस्के अय्ते लोकुल्क मीकुन हय्साकोटा आंतुर, गेदमिसीतुर,
अपमानम कीतुर, मिमेट हेळसोत्तिर इंचि, मीवा पोरोल एताकोटा आंतुर,
अस्के मीकु पेन आसिर्वाद हींता.

23 ओरा एनकटा पेद्दाल्कगुडा मीकन्ना मुन्नेटा पेनदा कबुरतोर्कुन,
इल्हेने तकलिप कीतुर. अदुनहाटीं ह्ळ्हाट! मीक तकलिप वातस्के,
मिमेट कुसिते एगरट, स्वर्गमते मीकु पेद्दा इनाम मंता.”
इंचि इत्तोर.

* 6:7 मनकन बेस कियमळ इद इंका उंदि कबळसेसी मंता इंचि परिसिल्क इनुदुर. अदुनहाटीं नोमकेम रोजुने ओर बतले कियकोदुर. गानि पेनदा सास्त्रमते असोटा नियम रासि हिल्ले.

† 6:13 प्रेरित इद पोरोल्क, पेन लोहचीतोर इंचि अर्तम. येसु पन्नेड मंदिदुन पेरकुत्तोर ओरे प्रेरितुल्क आंदुर. ✨ 6:14 योहान 1:42 ‡ 6:15 जिलोति रोम सरकारता विरोद कियना पार्तिंतोर.

- 24 मर्रा येसु इल्हा इत्तोर,
 “ए दनवंतुलकुनिटा! मीकुन पेन बेस हळो,
 बारित्ते, मीकु सिराप इग्गेटा सुकम-सांते दोर्कता.
 25 इंदके पीरनिंडा तिनना लोकरिटा! मीकुन पेन बेस हळो, मुन्ने मिमेट कर्वुने मंदकिर.
 इंदके कव्वानोरिटा! मीकुन पेन बेस हळो, वायना रोजकुने मिमेट दुक्कमते अळकिर.
 26 इंदके अंतोराहेंदाल कदर दोर्किचकुत्तोरिटा! मीकुन पेन बेस हळो,
 बारित्ते बोर अय्ते मीक कदर हीतुर, ओरा एनकटा पेद्दाल्कगुडा,
 मुन्नेटा पेनदा आबद्दम कबुरतोर्क कदर हियुंदुर.
 आ आबद्दम कबुरतोर्क दोर्कताप, मीकुगुडा सिक्सा दोर्कार.”

पगातोर्कुन पावरम कियना
 (मत्तयाल 5:38-48; 7:12)

- 27 इंदके नावा पोल्लें केंजानोरिटा! नना मीक वेहानद बतल इत्ते, मीवा पगातोर्कुन पावरम कीम्टु. मीकुन हय्सवोर्कुन बेस हुळट.
 28 बोर अय्ते मीकु सापनेम हीतोर ओन्क आसिर्वाद हीम्टु. बोर अय्ते मीकुन सिडांचंतोर, ओनाहाटीं पारतना कीम्टु.
 29 बोरन्ना नीवा सेंपापोर्रो तंते ओनाहेके इंकुंदि सेंपागुडा तिरहा. बोरन्ना नीवा कोट तेंडकुत्ते, ओन नीवा अंगिगुडा ओया हीम.
 30 बोरन्ना नीकुन बतलन्ना तल्कते, अद ओन्क हीम. बोरन्ना मिहागटाल बतलन्ना तेंडकुत्ते, अदुन वापस तल्कमट.
 31 लोकुल्क मीवातोनि बल्हा मनना इंचि मिमेट इनकुंतिरो, अल्हेन मिमेट ओरतोनि मंटु.
 32 मीकुन पावरम कियानोर्कुने मिमेट पावरम कीते, मीकु पेनदाहेंदाल बता पायदा दोर्कता? पापिर्कगुडा ओर्कुन पावरम कियानोर्कुन पावरम कीतुर.
 33 मीकुन बेस हळानोर्कुके मिमेट बेसता कबाहक कीसि हीते, मीकु पेनदाहेंदाल बतल पायदा दोर्कता? पापि लोकुल्कगुडा अल्हे कीतुर.
 34 बोर वापस हीतुरो ओर्के बाकिक हीते, मीकु पेनदाहेंदाल बतल पायदा दोर्कता? पापि लोकुल्कगुडा वापस दोर्कतां इत्ता आसेते बाकिक हीतुर.
 35 अल्हा कियार्कोटा मिमेट मीवा पगातोर्कुन पावरम कीसि ओर्कुन बेस हुळट. बाकि वापस दोहंतोर इंचि आसे इर्काकोटा बाकि हीम्टु. अस्के पेन मीकु पेद्दा इनाम हियार, मिमेट अन्टिकन्ना पेद्दा पेनदा मर्क-मियाहक आकिट. बारित्ते, बोर अय्ते पेनदुन मति किय्युर आनि कराब मंतुर असोटा लोकुल्कनपोर्रो इंका पेन दया कीता.
 36 मीवा पेनबाबाल दया कियानोर आंदुर, अदुनहाटीं मिमेटगुडा दया कियानोर आम्टु.

इंकावरोन पोरो तप्पु दोसमट
 (मत्तयाल 7:1-5)

- 37 “मिमेट वैरेतोरपोर्रो दोसेम दोसमट, अस्के मीपोर्रोगुडा पेन दोसेम दोस्सो. मिमेट वैरेतोर्कुन, ‘दोसिल्क,’ इंचि इनमटु, अस्के पेन मीकुनगुडा ‘दोसिल्क,’ इंचि इन्नो. मिमेट वैरेतोर्कुन मापि कीम्टु, अस्के मीकुनगुडा पेन मापि किय्यार.
 38 अक्सरम मत्तोर्कु बीसकेतनम कियार्कोटा हीम्टु, अस्के पेन मीकुगुडा हिय्यार. तव्वाते बेस निहचि, अदमिसि, कुदलिचि, पोंगानाल मीवा ओटिते वाटताप, पेन मीकु हिय्यार. बारित्ते, बद कोल्ताते मिमेट हीतिरो, अदे कोल्ताते मीकु हियमळ जर्गता.✱”
 39 मर्रा येसु ओर्क उंदि वेसुडि वेहतोर: “वरोर गुड्डि मनकल, इंकावरोर गुड्डि मनकंक हर्रि हुप्सा परांतोरा? अल्हा कीते, ओर इव्वुरगुडा पोक्कातेन अरंतुर.✱
 40 सिस्सुड ओना गुस्कन्ना पेद्दा आया परोर, गानि गुस्नां पूरा करियसि ओर गुस्नलेसीं आंतोर.
 41 “नीवा कळ्दे अरता सिल्कुन तेंडका, नीवा दंटातोना कळ्दे अरता बुस्सितुन निमे बारि तेंडा हळंतिन?
 42 नीवा कळ्देन सिल्कु अर्सि मननेके, नीवा कळ्दे अरता बुस्सितुन तेंडाहीम इंचि नीवा दंटातोनि बल्हा इना परीतिन? ए डोंगि मनका! मोदाला नीवा कळ्दा सिल्कुन तेंडा. अस्के नीवा दंटातोना कळ्दा बुस्सितुन तेंडालय नीकु बेस दिस्सार.”

रोंडु तीरकुना पंडिं
 (मत्तयाल 7:16-20; 12:34-35)

- 43-44 “पंडितुन हळसे, मिमेट मरातुन एरपाट कीकिर. बेसता मराकु कराब पंडिं हादों, कराब मराकु बेसता पंडिं हादों. हाहकुना जप्पिताल अंगुर पंडिं हादों हिलाकोटे ईरामुस्ती मराकुनाल मरका पंडिं हादों.
 45 बारित्ते, मनसुने मनना पोल्लेंगे तोळ्दाल पलाते पेयसंतां. अदुनहाटीं बेसता मनकल ओना मनसुने मनना बेसता पोल्लेंगे पेच्हांतोर, अल्हेने कराब मनकल ओना मनसुने मनना कराब पोल्लेंगे पेच्हांतोर.”

रोडु तीरकुना लोकुल्लक
(मल्लतयाल 7:21-29)

- 46 “नना वेहता पोल्लेन कैजिर अय्ते नाकुन सामि सामि इंचि बारि इंतिर?
47 बोरि आयिर नहगा वासि, नावा पोल्लें कैजसि, दाना परकारम ताकाना हरेक मनकल, ओर बसंतोर आंदुर वेहंतन कैजाट.
48 ओर बसंतोर इत्ते, लोन दोहनेके पायवा लोत तव्विसि, बंडातोनि पुनादि दोहचि लोन दोहतोर. बस्के अय्ते कम्मुड वाता, एता तडां वासि लोतुक दलगतां. अय्नागानि अद लोन कूला हिल्ले. बारित्ते, अद लोन गट्टिगा दोहचि मत्ता.
49 गानि नावा पोल्लें कैजसि दाना परकारम ताकवा मनकल बसंतोर इत्ते, लोन दोहनेके पुनादि दोहाकेन बूमिपोरी लोन दोहतोर. बस्के अय्ते एता तडां वासि लोतुक दलगतां. अस्के अद लोन पूरा कूलिसि पाड आता,” इंचि येसु ओकुन इत्तोर.

7

येसु वरोर अदिकारिना सेवाकुन बेस कीतोर
(मल्लतयाल 8:5-13)

- 1 लोकुल्लक वेहना मत्ता अन्नि पोल्लें वेहतारित्ते येसु कपर्नाहम होत्तोर.
2 अगा वरोर रोम सरकारता दरोगाल मत्तोर. ओना वरोर दासुड बिमारते हायनाल आसि मत्तोर. ओन दरोगाल बागा पावरम कियुंदुर.
3 आ दरोगाल येसुना बारेमते बस्के अय्ते कैजतोर, अस्के इच्चुर यहुदि पेदूदालुकुनतोनि, “मिमेट येसुनगा होंचि, ‘दरोगाना दासुड बागा बिमारते मंतोर, ओन बेस कियालय नीकुन वा इंचि वेहालय माकुन लोहतोर,’ इंचि वेहाट,” इत्तोर.
4-5 ओर येसुनगा वासि, “आ दरोगाल बेसतोर आंदुर, ओर मावा यहुदि लोकुल्लक पावरम कीतोर. ओर मावाहाटीं दर्मसास्त्रम कराहना लोनगुडा दोहचीतोर, अदुनहाटीं निमे ओन्क सहायम कीम,” इंचि येसुन बतिमलाडसेके विनंति कीतोर.
6 अस्के येसु ओरतोनि पेयसतोर. ओर दरोगाना लोतुक दगोरा एवतस्के, ओर ओना दंटातोर्कुन येसुनहेके इल्हा वेहालय लोहतोर. “सामि, निमे तकलिप अरमा. निमे नावा लोन वायानचचो पेदूदातनम नहगा हिल्ले.*
7 अचोने आयका नना नीकु कलियाना लायकगुडा हिल्लेन. अदुनहाटीं निमे सिराप उंदि पोल्ले इन, नावा जीतागाड बेस आंतोर.
8 बारित्ते, ननागुडा वरोर अदिकारिना कय्दा हिळ कबळ कीतन. नावा कय्दा हिळगुडा सिपाइलक मंतुर. नना बोनना वरोन ‘होन’ इत्ते ओर दांतोर, इंकावरोन ‘वा’ इत्ते ओर वांतोर. इंका नावा दासुन, ‘इद कीम’ इत्ते ओर कीतोर.”
9 इद कैजसि येसुंके वेल्ले इचंनम आता. अस्के पजोळक तिरियसि, ओना पज्जो वासेक मत्ता मंदितुन इल्हा इत्तोर, “नना वेहानद कैजट, इस्पाएल लोकुल्लक लोप्पोगुडा इचोने विस्वासम मत्ता मनकल नाकु बगेन दोर्का हिल्लोर.”
10 येसु सामिनहेके लोहचीता दंटातोर मल्लिसि दरोगाना लोन वातस्के ओना दासुड बेस आसि दिसतोर.

येसु वरोर हाता मनकन जीवा अरहंतोर

- 11 पजा येसु नाईन इनना नाटेनहेके पेयसतोर. ओनतोनि ओना सिस्युल्लक इंका वेल्लेटुर लोकुल्लक मत्तुर.
12 येसु नाटेने होळियाना गेटुना दगोर्क एवतोर, अचोटेन वरोन हातोन बोंदा दोसालय ओसेके मत्तुर. हातोना यावल मुंडामोसि मत्ता. दानकु ईर वरोरे मरि मत्तोर. नाटेनोर वेल्लेटुर लोकुल्लक दानतोनि पेयसतुर.
13 येसु सामिक दान हळसि दया वाता, अस्के “निमे अळमा बाई,” इंचि,
14 दगोरा होंचि पाडेतुन इत्तोर. अस्के पाडेतुन कांजानोर अगेन आगतुर. अस्के येसु, “पेडा तेदा!” इंचि हातोन इत्तोर. †
15 इत्तस्के, आ हासोत्ता पेडल तेदिस उदिसि वळकालय दलगतोर. पजा येसु ओन ओना यावंक अप्पजेपतोर.
16 अगा मत्तोर अंतोर्क वेरें दलगता, ओर वेरियसि, “पेन दाना लोकुल्लक सहायम कियालय वाता, मना नड्डुम दाना पेदूदा कबुरतोनि लोहचीता,” इल्हा इंचेके पेनदुन तल्लकुनालय दलगतुर.
17 येसुना इद पोल्ले यहुदिया एरिया आनि पक्का पीसि मत्ता अन्नि नाहकुने तेळियसि होत्ता.

योहान ओना सिस्युल्लक येसुनहेके लोहंतोर
(मल्लतयाल 11:2-6)

- 18-19 जर्गतव इव अन्नि पोल्लेना बारेमते, बापतिस्मा हियना योहान जेलने मननेके ओना सिस्युल्लक होंचि ओन्क वेहतुर. अस्के ओर, ओना सिस्युल्लकनाल इवुर्कुन केय्सि, “बोर अय्ते पिसागोटनोर वायानद मत्ता, ओन निमेन ना? हिलाकोटे मोमोट इंकावरोना एदुर हळमळा?” इंचि पूसकियालय ओकुन सामिनगा लोहतोर.
20 अस्के ओर सामिनगा वासि, “गुरु, ‘बोर अय्ते पिसागोटनोर वायानद मत्ता, ओन निमेन ना? हिलाकोटे मोमोट इंकावरोना एदुर हळमळा?’ इंचि नीकुन पूसकियालय, बापतिस्मा हियना योहान माकुन लोहतोर,” इंचि इत्तुर.
21 अस्केने येसु, बिमार मत्तोर्कुन, नोप्पिनोर्कुन, देय्यालक पीसि मत्तोर्कुन इल्हा वेल्लेटोर्कुन बेस कीतोर, वेल्लेटुर गुड्डोर्कुना कळकु दिस्सानाल कीतोर.

* 7:6 यहुदिल्लक वेरें जातितोरा लोहकुने होनाकोदुर. † 7:14 मूसाना नियम परकारम, पाडेतुन इत्ते मुट्टुड इनुंदुर.

22 पजा ओर्कु इल्हा जवाब हीतोर. “इंदके मिमेट बतल अये हळतिर, केंजतिर अद होंचि योहानुक वेहट. गुड्डोर्क हळसंतुर, कुंटोर्क ताकसंतुर, कुस्टरोगम आतोर बेस आसंतुर, सेवटोर्क केंजसंतुर, हातोर्कुंक जीवां अरसंतां आनि गरिबोर्कुंक बारे बेसता कबुर एवसंता.

23 बोर अये नावा बारेमते अन्समन्स किय्योर, ओन्के आसिर्वाद दोर्कता,” इंचि इत्तोर.

येसु योहानुना बारेमते वेहंतोर

(मत्तयाल 11:7-19)

24 योहानुना सिस्युलक अगटाल पेय्सि होत्तस्के, योहानुना बारेमते लोकुकुंक येसु इल्हा वेहालय दलगतोर, “मिमेट बय्लि जेगाते बतल हळालय होत्तिर? वळिक उंगना जाडितुना?

25 हिलाकोटे मिमेट बतल हळालय होंचि मत्तिर? मेत्तटा कपडिं केर्ता मनकन हळालय होत्तिरा? हळ्हाट! मेत्तटा कपडिं केर्तानोर आनि सिरमंतुलक राजवाडाने मनांतुर, बय्लि जेगाते आयो!

26 अये मरि मिमेट बतल हळालय होत्तिर? पेनदा कबुरतोन हळालय होत्तिरा? हो! नना मीकु वेहासेक मंतन, मिमेट बोन अये हळतिर ओर पेनदा कबुरतोनकन्ना बचचोरो पेद्दा मंतोर.

27 ओना बारेमते पेन मुन्नेने इल्हा वेहचि मत्ता.

“हळ्हा! नना नीकन्ना मुन्नेने नावा कबुरतोन लोहंतन,

निमे वायानाहाटीं ओर हरिं तयार कीतोर.”*

इंचि दर्मसास्त्रमते रासि मंता.

28 “नना मीकु वेहानद बतल इत्ते, पुट्तोरावटेताल योहानुकन्ना पेद्दा बोरे हिल्लोर. अयनागानि पेनदा राज्येमते सिन्ना मनकलगुडा योहानुकन्ना पेद्दा दोडे,” इंचि वेहतोर.

29 अस्के वेल्लेटुर लोकुलक आनि कर वसुल कियानोरगुडा येसु वेहता पोल्लेन केंजतुर. केंजसि, पेनदा हरिं नीतिता हरिं, इंचि इत्तुर. ओर्क अंतोर्क योहान मोदालेन पेनदा पोरोलते बापतिस्मा हीसि मत्तोर.

30 गानि परिसिलक आनि मूसाना नियम बेस तेळियतोर बारे योहानुनाहेंदाल पेनदा पोरोलते बापतिस्मा एत्तुवा, पेन ओर्क हुपिस्ता हर्दे ताका हिल्लुर.

31-32 मर्रा येसु इल्हा वळकालय दलगतोर, “ई पीळिता लोकुलक बोरासेसीं मंतुर इंचि, ओर्कुन बोरा लोप्पो कल्पकन? मिमेट अये चौकुने उद्दिदिसि, वरोंक-वरोर केय्सि,

“मोमोट मीहाटीं दुक्कमता पाटां पारतोम, अयना मिमेट अळा हिल्लिर.

मोमोट मीहाटीं तूरीला उह्कुतोम, गानि मिमेट एगरा हिल्लिर,

इंचि इनना पिलालकुनालेसीं मंतिर.”

33 “अल्हेने बापतिस्मा हियना योहान एक्कोते एक्को ओक्कापोद्दु मनुंदुर. अंगुर पंडिना पानकमगुडा उनाकोंदुर, अयना मिमेट ओन, देय्यम पीता इंचि इत्तिर.

34 गानि मनकना रूपमते पुटतोन नना तिचेके-उंचेके वातन. गानि मिमेट मात्रम, ‘हळ्हाट, ओर बचचोर तितोर, बचचोर उंतोर? कर वसुल कियानोर आनि पापि लोकुलक ओना दंटातोर आंदुर,’ इंचि नाकुन इत्तिर.

35 गानि पेनदा बुद्दि नीतितद आंद इंचि, दाना बुद्दिदेते ताकानोर कियाना कबाह्कन पोर्रोटाल तेळियंता.”

पापि मुरतळ येसुना कालकुंक अत्तर निय होकता

36 उंदि मल्का सिमोन इनना वरोर परिसि मनकल ओना लोन गाटो तिनालय येसुन केयतोर. अस्के येसु ओना लोन होंचि गाटो तिनालय उदतोर.

37 हळ्हाट! आ नाटेने उंदि पापि मुरतळ मत्ता. येसु वरोर परिसिन लोन गाटो तिंचंतोर इंचि दान्क तेळियतस्के अद उंदि बंडाता गुर्गिते बेस गमागमा गब्बु वायना अत्तर निय पीसि वाता.

38 वासि येसुना पज्जो नित्तिसि अळसेके दाना कळकुनाल पोंगाना एरतोनि येसुना कालकुन नहालय दलगता. पजा दाना केलकुनतोनि उसुमसेके, ओना कालकुन बुर्सेके अत्तर निय होकुंदु. † 39 अल्हा कियानद हळसि, बोर अये येसुन केयतोर आ परिसि इल्हा इन्कुत्तोर गदा, “इद अये पापि मुरतळ आंदु! ईर निजमे पेनदा कबुरतोर आसि मत्ते, ओन इट्टानद बसोंटा मुरतळ आंद इंचि ओन्क तेळियसि मनवळ. पापि मुरतळ इटते मुट्टुळ इंचि दान इट्टा हियाकोन्नेर,” इंचि ओर इनकुत्तोर.

40 अस्के येसु ओना मनसुन एरपाट कीसि, “सिमोन, नीकुन उंदि पोल्ले पूसकियना मंता,” इंचि इत्तस्के ओर, “वेहा गुरुजी,” इंचि इत्तोर.

41 अस्के येसु उंदि वेसुड वेहतोर, “इव्वुर मनकालोर वरोर सावकारनगटाल बाकि तेंडतुर, वरोर बारे हेय्युं नुह्कु, इंकावरोर बारे एबै एंडि बंडिं.

* 7:27 मलाकी 3:1 † 7:38 यहुदिलक गाटो तिनालय उदतस्के ओर मडगद्दे वाट्सि उद्दुर. टेबलहेके वंगिसि, कालकुन गोडचो पज्जोळक मल्हाचि उद्दंतुर. अदुनहाटीं आ मुरतळ पज्जोटाल वासि येसुना कालकुन बुर्सेके निय वळियापर्ता.

42 गानि ओर बाकि दोहा पराहिल्लुर. अदुनहाटीं सावकार ओरा इव्वुरा बाकितुन मापि कीतोर. अय्ते इंदके ओरा इव्वुरा लोप्पोटाल सावकारुन बोर एक्को पावरम कीतोर, वेहा?" इंचि पूसकीतोर.

43 अस्के, "बोर अय्ते एक्को बाकि मत्तोर, ओरे एक्को पावरम कियानुर बारे," इंचि सिमोन इत्तोर. इत्तस्के, "निमे बरोबर वेहतिन," इंचि येसु ओन इत्तोर.

44 येसु मुरतटहेके तिरियसि सिमोनन इल्हा इत्तोर, "निमे ई मुरताटुन ह्ळा. नना नीवा लोन वातन, निमे नावा काल्क नोर्गलय एरगुडा हिय्या हिल्लिन. गानि इद बारे दाना कांडेहकुनतोनि नावा काल्कन नाहचि, केलकुने उसुमता. S

45 निमे नाकुन बुरिं जोहार किया हिल्लिन, गानि नना लोप्पो होळियतस्केटाल इद नावा काल्कन बुरिंके मंता.

46 निमे नावा तल्लक निय होकसि नाकु कदर हिया हिल्लिन, गानि इद नावा काल्कुंक वेल्लेन दराता अत्तर निय होकता.

47 अदुनहाटीं नना नीकु वेहानद बतल इत्ते, दाना अन्नि पापाल्क मापि आतां इंचि अद वेल्लेन पावरम कीता, गानि बोनद इच्चुने पापम मापि आता, ओर इच्चुने पावरम कीतोर."

48 पजा येसु, "नीवा पापाल्क मापि आतां," इंचि आ मुरतटुन इत्तोर.

49 अस्के, "ईर बोर आंदुर, ओनद ओर पेन इन्कुंचि, पापाल्कन मापि कीतोर?" इल्हा ओनतोनि गाटो तिंचेक उदिस मत्तुर अंतोर ओरद-ओरे वळ्ळकुनालय दल्लुत्तुर.

50 पजा, "निमे नावापोरे विस्वासम कीताहाटीं पेन नीकु मुक्ति हीता, निमे सांतिते होन," इंचि येसु आ मुरतटुन इत्तोर.

8

इच्चुं मुर्ताहक येसुना पज्जो दांतां

1 पजा इल्हा जर्गुता गदा, येसु अन्नि सहरकुने, नाहकुने पेनदा राज्यमता बारेमता बेसता कबुर वेहासेके तिरियालय दल्लगतोर. ओनतोनि पंन्नेड मंदि प्रेरितुल्लक मत्तुर.

2 अगा देय्याल्लकुनाल, बिमारकुनाल बेस आतव इच्चुं मुर्ताहकगुडा ओरतोनि मत्तां. अव मुर्ताहकुनाल उंदि मगदलेनि नाटेनद मरियम पोरोलता मुरतळ मत्ता. येसु दानगटाल एडुं देय्याल्लकुन पेचाह्चि मत्तोर.

3 इंकुंदि मुरतळ योहानि इनानद, हेरोद राजाना दिवांजि कोजा इननोना मुत्तो मत्ता. अल्हेने सुसान्नल आनि वेल्लेन मुर्ताहकगुडा मत्तां. इवन्नि मुर्ताहक येसु आनि ओना सिस्सुल्लकुना सेवाताहाटीं अवुना संतम कोत्तन कर्स कियुंदुं.

विज्जां तासाना वेसुडि

(मत्तयाल 13:2-15; मरकुस 4:1-12)

4 अल्हेने उंदि रोजु वेरे-वेरे नाहकुनाल वेल्लेटुर लोकुल्लक येसुनगा वासि जमा आसेक मत्तुर, अस्के येसु ओर्क उंदि वेसुड वेहतोर. अद इल्हा मत्ता.

5 "वरोर कास्तकरि मनकल विज्जां वीतालय पेय्स्तोर, विज्जां वीतनेके इच्चुं विज्जां हरदगा अरतां. अव विज्जन हरिं पीसि होनानुर-वायानुर जारतुर, पजा अवुन पिट्टे वासि पेर्सि तित्तां.

6 इच्चुं विज्जां बंडाना जेगाते अर्सि अव मोलियतां. गानि अगा पदन दोर्कवाहाटीं वत्सि हासोत्तां.

7 इच्चुं विज्जां हाहकुना पोदाने अरतां. अवुनतोनि हाहकुना पोदांगुडा बेर्सि अव विज्जन बेर्सा हिया हिल्लें.

8 इच्चुं विज्जां बेसता जेगाते अरतां. अव बेस मोलियसि नूर अंताल्लकुना पंटा पेय्स्ता," इंचि वेहचि, "बोर्कु केंजालय केव्व मंतां ओर केंजट," इंचि जोरते इत्तोर.

9 "ई वेसुडिता अर्तम बतल गुरु?" इंचि ओना सिस्सुल्लकु पूसकीतुर.

10 अस्के येसु ओर्कुन इल्हा इत्तोर, "मीक अय्ते पेनदा राज्यमता बारेमता मर्ममतुन एरपाट कीकुनालय बुद्दि मंता. गानि वेरेतोर्कुक बारे वेसुडिने वेहांतन. इल्हा कीते

"ओर नावा कबाहकुन ह्ळांतुर, गानि अव कबाहकुन अर्तम कीकुन्नुर.

ओर केंजांतुर गानि तेळियागोटकुन्नुर."*

विज्जां वीताना वेसुडिता अर्तम

(मत्तयाल 13:18-23; मरकुस 4:13-20)

11 "इद वेसुडिता अर्तम इल्हा मंता, विज्जां इत्ते पेनदा पोल्ले आंदु.

12 बोर अय्ते पेनदा पोल्लेतुन केंजतुर गानि, ओर विस्वासम कीसि ओर्कु मुक्ति दोर्कामन्नि इंचि देय्यम वासि ओर केंजतवुन ओरा मनसुनाल तेंडसि पोहंता. असंतोर इत्ते, विज्जां अरता हर्दा जेगातसंतोर आंदुर.

13 विज्जां अरता बंडाना गेर्से जेगातसंतोर बोर इत्ते, बोर अय्ते पेनदा पोल्लेतुन कुसिते केंजसि दान ओप्कुंतुर. गानि ओरा मनसुने पेनदा पोल्ले गट्टे पळ्ळवाहाटीं, ओर कोन्नि रोजके विस्वासमते मनांतुर. पजा पट्टु ह्ळना वेला वातस्के विस्वासमताल ओर लक्कु आंतुर.

14 विज्जां अरता हाहकुना पोदाना जेगातसंठोर बोर इत्ते, बोर अयते पेनदा पोल्ले केंजांतुर गानि विस्वासमते मननेके सम्सारमता रंदि, दनमता आस्ति, दुनियाता सुकाल्क इव अन्नि ओर्कुन पेनदा पोल्लेन लोप्पो बेर्सा हिय्यो. अदुनहाटी पेनदा पोल्लेनहेंदाल ओर्क बतल पायदा वायो.

15 गानि विज्जां अरता बेसता जेगातसंठोर बोर इत्ते, बोर अयते पेनदा पोल्लेन सत्तेम, बेस मनसुने केंजसि, अव पोल्लेन मनसुने ईरंतुर. पजा ओर्क बच्चोन तकलिप वायना गानि ओप्केते बेसता कबाहक कींतुर, असंठोर इत्ते विज्जां अरता बेसता जेगातसंठोर आंदुर,” इंचि इत्तोर.

पेनदा पोल्ले वेलगु हीता
(मरकुस 4:21-25)

16 “बोर आयिर वेडसि निरिच्चि गंजुना हिळ मुच्चोर, कटुल हिळगुडा ईरोर. गानि लोप्पो होळियानोर्क बेस वेलगु दिसगोम इंचि दान उंदि दीसोडिपोरी ईरंतोर.

17 अल्हेने मक्किस मत्तव अन्नि दिसि अर्राकोटा मन्नों, आनि मर्ममते मत्तव बवे पलाते अर्राकोटा मन्नों.

18 अदुनहाटी बेस मनसु तासि केंजट. बारित्ते, बोनगा अयते पेनदा पोल्लेन तेल्लिचकुनना बुद्धि मंता, पेन ओन्क इंका हीता. गानि बोनगा अयते पेनदा पोल्लेन तेल्लिचकुनना बुद्धि हिलाकोन्ना, मंता इनकुंतोर, अदुनगुडा पेन एतकुन्नार,” इंचि येसु ओर्कु वेहतोर.

येसुना सिस्स्युल्के ओना निजम जीवातोर
(मत्तयाल 12:46-50; मरकुस 3:31-35)

19 अस्के येसुना यावल, ओना तम्महक ओनगा कलियालय वातुर. गानि गर्दि मत्ताहाटी ओर ओनकु कलिया पराहिल्लुर.

20 अदुनहाटी, “नीवा यावल, नीवा तम्महक नीकु कलियालय पलाते नित्तिसि मंतुर,” इंचि बोरो येसुक वेहतोर.

21 अस्के, “बोर अयते पेनदा पोल्ले केंजसि अल्हेने तांकंतुरो, ओर्कुने नावा यावल, नावा तम्मुर इंतन,” इंचि येसु ओर्कुन इत्तोर.

येसु वळि-दुमारमतुन आपंतोर
(मत्तयाल 8:23-27; मरकुस 4:35-41)

22 उंदि रोज येसु ओना सिस्स्युल्कुनतोनि डोंगाते उद्दिस, “मनम समुद्रमता हब्बेटा बाजुंक दाकोम दट,” इंचि इत्तस्के ओर होनालय पेयसतुर.

23 ओर डोंगाते उद्दिस होननेके येसु निद्रा होत्तोर. अस्के समुद्रमते पेद्दा वळि-दुमारम वाता. अदुनहेंदाल डोंगाते एर निंडालय दल्लिसि, ओर वेल्ले दोकाते मत्तुर.

24 अस्के सिस्स्युल्क येसुनगा होंचि, “गुरु, गुरु मनम नासडेम आसि होंचंतोम,” इंचि इत्तुर. अस्के ओर तेदसि वळि-दुमारमतुन, एता तडान गदरिचतोर अयते वळि-दुमारम आगता, तडांगुडा दिसाकोटा आतां.

25 अस्के, “मिमेट नावापोरी विस्वासम बारि ईर्रा हिल्लिर?” इंचि येसु ओर्कुन इत्तोर. गानि ओर इरगा वेरियसि, इंचंनमते, “ईर आदेस हीते ईना पोल्ले वळि, एता तडांगुडा केंजतां, ईर बोर आंदुर?” इंचि ओर ओर वळकुकुत्तुर.

देय्यम पीता मनकन येसु बेस कीतोर
(मत्तयाल 8:28-34; मरकुस 5:1-20)

26 पजा ओर गिरासेन इनना वैरे देसेमते एत्तुर, अद जेगा गालिल समुद्रमता हब्बेटा बाजुंक मत्ता.

27 येसु डोंगाताल बल्हा रेयतोर अल्हेने अद सहरतोर वरोर देय्याल्क पीसि मत्ता मनकल अगा वातोर. ओर वेल्लेने रोजकुनाल कपडिं केर्राकोंदुर, लोन मनाकोंदुर, ओर तापळानेन मनुंदुर.

28-29 देय्यम ओन ऊके-ऊके पिय्युंदु, लोकुल्क ओन गोलसुकुने दोहचि कावेल मनुंदुर. गानि ओर गोलसुकुन नेम्हुंदुर, अस्के देय्यम ओन बोर हिल्वगा ओय्युंदु. येसु अद देय्यमतुन ओनागटाल पेय्शि होनालय आदेस हीतोर. अदुनहाटी ओर येसुन हळसि, “ए अन्निटकन्ना पेद्दा पेनदा मरिं येसु, नातोनि नीकु बता कबळ? नाकु तकलिप हियमा इंचि नीकु विनंति कीतन,” इल्हा जोरसे वरगेयसि ओना मुन्ने अरतोर.

30 “नीवा पोरोल बतल?” इंचि येसु पूसकीतोर. ओनकु वेल्लेने देय्याल्क पीसि मत्ताहाटी, “मोमोट वेल्लेन मंदा आसि मंतोम, इंचि नावा पोरोल मंदा आंद,” इंचि अव येसुन इत्ता.

31 पजा देय्याल्क येसुनतोनि, “माकुन नरकमता लोतु जेगाते होनना आदेस हियमा,” इंचि बच्चोरो विनंति कीतां.

32 अगा गुट्टापोरी पद्दिना उंदि मंदा मेय्सेके मत्ता. “माकुन आ पद्दिना मंदा लोप्पो होनाहीम,” इंचि देय्याल्क येसुन विनंति कीतां, अस्के येसु अवुन पद्दिना मंदा लोप्पो होना हीतोर.

33 अस्के आ देय्याल्क मनकना लोप्पोटाल पेय्शि पद्दिना मंदाते होंचि होळियतां. अस्के आ पूरा मंदा ओड्डुन पोरीटाल हिळतुक वित्ति सेरवुने मुळिसि हासोत्तां.

34 पजा आ पद्दिं मेहानोर इल्हा आतद हळसि वित्ति होंचि अद सहरते अल्हेने पक्का पीसि मत्ता नाहकुने इद पोल्लेतुन वेहातुर.

35 बतल आता इंचि हळालय अगाटा लोकुल्क येसुनगा वातुर. अगा वासि हळतुर अयते, देय्याल्कुनाल इळबळता मनकल ओर बेस आसि, कपडिं केरिं येसुना काल्कुनगा उद्दिसि मत्तोर. अल्हा मत्तद हळसि ओर्क वैरें दल्गता.

36 येसुना कबाहकुन हळतोर अगा बोर अयते मत्तुरो ओर, देय्याल्क पीसि मत्ता मनकल बल्हा बेस आतोर इंचि लोकुल्कुंक वेहतुर.

37 अस्के गिरासेन एरियाता अंटोर लोकुल्क बागा वेरियसि, “निमे महागटाल पेय्सि होन,” इंचि येसुन विनंति कीतुर. अदुनहाटीं येसु, ओना सिस्स्युल्क होनालय डोंगाते उदतुर.

38 उदता पजा, “नाकुन नीवातोनि वाया हीम गुरु,” इंचि देय्याल्कुनाल बेस आता मनकल येसुन विनंति कीतुर. गानि येसु ओन,

39 “निमे लोन होंचि नीवाहाटीं पेन बतल कीता अद वेहा,” इंचि मल्हाचि लोहतोर. अस्के ओर मल्सि होंचि, येसु ओनाहाटीं बतल-बतल कीतोरो अव अन्नि, सहरते अंटोर्क वेहाचेके तिरियतोर.

हासोल्ता पेगिटुन, बिमार मुरतटुन येसु बेस कीतोर
(मत्तयाल 9:18-26; मरकुस 5:21-43)

40 पजा येसु गालिल एरियाते मल्सि वातस्के ओन एदुर हळसेक मत्तोर वेल्लेटुर लोकुल्क कुसिते ओन्क कलियतुर.

41-42 अच्चोट्टेन दर्मसास्त्रम कराहना लोता अदिकारि याईर इननोर अगा वातोर. ओन्क पन्नेंड वर्सानद उंदे मिय्यड मत्ता, अद हायनाल आसि मत्ता. अदुनहाटीं ओर येसुना काल्कुनपोर्री अर्सि, “नावा लोन वा,” इंचि विनंति कीतोर. अस्के येसु आ अदिकारिनतोनि होनालय पेयसतोर. अगा ओना सुट्टु वेल्ले गर्दि मत्ताहेंके लोकुल्क दोब्बे-नूके कीसि येसुन इटसेक मत्तुर.

43 आ गर्दिते उंदि मुरतळ मत्ता, दानकु पन्नेंड वर्सानाल उंदेतीर कप्पिड होनुदु. अद वेल्लेटुर वैदकुल्कुंक हुपिच्चि दाना पूरा कोत्तां महता* गानि दान बोरे बेस किया पराहिल्लुर.

44 अद मुरतळ येसुना पज्जो वासि, सिराप ओना कप्पिडता अंचुन इट्टा अय्ते अस्केटद अस्केने दाना कप्पिड आयमळ बंद आता.

45 अस्के, “नाकुन बोर इटतुर?” इंचि येसु पूसकीतोर. अगा मत्तुर अंटोर, “नना आयोन, नना आयोन,” इंचि इननेके, “अंटोर नीवा सुट्टु आसि दोब्बे-नूके कीसंतुर गुरु, बोरन्ना दल्लिसि मनानुर,” इंचि पत्रु इत्तोर.

46 गानि, “ना लोप्पोटाल ताकत पेयसता इंचि अनपिस्ता. बेस आयानाहाटीं बोरो नाकुन इटतोर,” इंचि येसु इत्तोर.

47 पजा अद मुरतळ, “नना इटतद एरपाट कीतोर,” इनकुंचि वेंरेक वनकुसेक वासि ओना काल्कुना पोर्री अर्सि, अगा अंटोर लोकुल्कुन मुन्ने अद येसुन बारि इट्टा अद बल्हा बिराना बेस आता इंचि वेहता.

48 अस्के, “पेगिटुना! नीवा विस्वासमे नीकुन बेस कीता. सांतिते होन,” इंचि येसु दान इत्तोर.

49 येसु अल्हा वळ्कसेक मननेके दर्मसास्त्रम कराहना लोता आ अदिकारिना लोताल बोरो वरोर वासि, “नीवा मिय्यड हाता, गुरुन लोन ओयालय तकलिप कीसि इका बाता पायदा हिल्ले,” इंचि अदिकारिन इत्तोर.

50 अस्के अदुन केंजसि, “निमे वेरियमा, विस्वासम इर्रा! अद बेस आंता,” इंचि येसु आ अदिकारिक जवाब हीतोर.

51 येसु ओना लोन वातोर, वासि पेगिळ मत्ता अर्राते बोर्कुने होळिया हिया हिल्लोर, सिराप पत्रुन, योहानुन, याकोबुन आनि पेगिटा तल्लुर-बाबोन पीसि लोप्पो होळियतोर.

52 अंटोर पेगिटाहाटीं अळमळ-मोल्कुनमळ कीसेके मत्तुर. गानि येसु ओर्कुन, “अळमट! अद हाया हिल्ले, मीडसि मंता,” इंचि इत्तोर.

53 अद पेगिळ हाता इंचि ओर अंटोर्क एरपाट मत्ता. अदुनहाटीं येसु इत्ता पोल्ले केंजसि ओर कव्तर.

54 पजा येसु आ पेगिटा कय पीसि, “पेगिटुना, तेदा!” इंचि केयतोर.

55 अस्केन दाना जीवा मल्सि वासि, अद बिराना तेदिस उदता. अद पेगिड्क बतलन्ना तिनालय हीम्टु इंचि येसु वेहतोर.

56 अद हळसि, दाना तल्लुर-बाबो इचंन्रम आतुर. गानि, “इगे आता पोल्लेतुन बोर्के वेहमटु,” इंचि येसु ओर्कु गट्टिगा हुकुम हीतोर.

9

येसु ओना पन्नेंड सिस्स्युल्कुन सेवाताहाटीं लोहतोर
(मत्तयाल 10:5-15; मरकुस 6:7-13)

1 येसु ओना पन्नेंड सिस्स्युल्कुन केय्सि ओर्क अन्नि देय्याल्कुन पेचाहनद, बिमार मत्तोर्कुन बेस कियना ताकत, अदिकारम हीतोर.

2 पजा येसु ओर्कुन, पेनदा राज्येम बारेमते बेसता कबुर वेहालय, बिमार मत्तोर्कुन बेस कियालय लोहतोर.

3 ओर्कुन लोहनेके इल्हा इत्तोर, “मिमेट सेवा कियालय होननेके मीवातोनि दुड्डु, जोरा आयि, गाटो आयि, कोत्तां, एक्कोतव अंगिं ओयमट.

4 उंदि नाटे होत्तस्के मिमेट बद लोन अय्ते दांतिटो, अद नार होळसनदाका अदे लोते मंटु.

5 बद नाटेना लोकुल्क मीकुन मना हिय्युरो, अद नाटेनाल पेयसनेके ओर कीता तप्पुन हुप्सालय उंदि गवाइ लेहका मननाहाटीं, मिमेट मीवा काल्कुना दुम्मु दुल्पिसि पेयसट” इंचि वेहतोर.

6 अस्के ओर अगटाल पेय्सि, नार-नार बेसता कबुर वेहासेके, बिमार मत्तोर्कुन बेस कीसेके होत्तुर.

हेरोद राजाल येसुनाहाटीं विचारमते अर्रातोर
(मत्तयाल 14:1-12; मरकुस 6:14-29)

* 8:43 इद वचनम कोन्नि पांडु लिपिने हिल्ले.

7-8 पजा गालिल एरियाता राजाल हेरोद, बस्के अयते येसु कियना कबाहकुना बारेमते केंजतोरु अस्के बतल जर्गसंता ओन्क बतले तेळिया हिल्ले. बारित्ते इच्चुर लोकुल्क, “योहान हातोरारवेटाल मर्रा तेदतोर,” इंचि इनुंदुर. इका इच्चुर लोकुल्क, “पेनदा कबुरतोर एलियाल मर्रा वातोर,” इंचि इनुंदुर आनि इच्चुर लोकुल्क बारे, “एनकटा पेनदा कबुरतोर लोप्पोटाल बोरो वरोर जीवाते तेदतोर,” इंचि इनुंदुर.

9 गानि, “नना अयते योहानुना तल्ला कोय्यागोटतन, इंदके इसोटा पोल्लें केंजसेक मंतन, अयते ईर बोर आंदुर?” इंचि हेरोद राजाल ओन हळना विचारम कीतोर.

येसु हेय्युं वेय्कुना मंदिक गाटो दोसमळ

(मत्तयाल 14:13-21; मरकुस 6:30-44; योहान 6:1-14)

10 पजा प्रेरितुल्क मल्लिस वातस्के ओर बतल-बतल कीतुर अव अन्नि येसुंक वेहतुर. वेहतस्के, येसु ओर्कुन लोकुल्कुनाल अलग कीसि बोर्के तेळियाकोटा बेतसेदा इनना सहर पीसि ओतोर.

11 गानि येसु बगा मंतोर इंचि लोकुल्कुंक तेळियतस्के ओर ओन दोर्काबेटसि ओना पज्जो होत्तुर. अयते येसु कुसिते ओरतोनि कलियसि ओर्कु पेनदा राज्येमता बारेमते वेहतोर. पजा ओरागटाल बोर्क बेस आथानद मत्ता ओर्कुन बेस कीतोर.

12 पोळ्द होनना वेलाक पन्नेडु सिस्सुल्क येसुनगा वासि, “मनम सुनसान जेगाते मंतोम, अदुनहाटी लोकुल्कुन लोहचीम, ओर दग्गेटा नाहकुने, नेलिने होंचि तिनालय गाटो, मीडालय जेगा दोर्किचकुंतुर,” इंचि इत्तुर.

13 अस्के, “मिमेटे बतलन्ना ओर्क तिनालय हीम्ट,” इंचि येसु ओर्कुन इत्तोर. “महगा सिराप हेय्युं हारि, रोंडु जिम्मां मंतां, अवुन तप्पा बतले हिल्ले. मोमोट होंचि ई अंतोर लोकुल्कुनाहाटी गाटो अस्सि तायना इंचि निमे इंचेकेना?” इंचि ओर इत्तुर.

14 अगा दग्गेर-दग्गेरा हेय्युं वेय्कुना मंदि मांडसा मत्तुर. गानि येसु सिस्सुल्कुनतोनि, “ओर्कुन एबै-एबै मंदि कीसि उपसट,” इंचि इत्तोर.

15 येसु वेहताप ओर अंतोर्कुन उपिस्तुर.

16 पजा येसु हेय्युं हारि, रोंडु जिम्मां पीसि, स्वर्गमताहेके हळसि पेनदुक दन्यवाद कीसि अवुन तुकडां कीतोर. कीसि, “इवुन लोकुल्कुंक हीम्ट,” इंचि सिस्सुल्कुंक वेहतोर.

17 लोकुल्कुंक हीतस्के, ओर पीरनिडा तित्तुर. मिगुलता तुकडां जमा कीते अव पन्नेड तट्टां निडतां.

येसुए किरिस्तु आंदुर

(मत्तयाल 16:13-19; मरकुस 8:27-29)

18 उंदि रोज येसु वरोरे पारतना कीसेक मननेके, ओना सिस्सुल्कगुडा ओनतोनि मत्तुर. अयते, “नना बोन आंदुन इंचि लोकुल्क इत्तुर?” इंचि येसु ओर्कुन पूसकीतोर.

19 अस्के ओर इल्हा जवाब हीतुर. “इच्चुर बारे नीकुन बापतिस्मा हियना योहान इत्तुर. गानि इच्चुर बारे निमे एलियाल आंदिन इत्तुर. इंचिचचुर बारे एनकटा पेनदा कबुरतोर लोप्पोटाल बोरो वरोर जीवा अरतोर इत्तुर,” इत्तुर.

20 “गानि मिमेट बतल इंतोर?” इंचि येसु सिस्सुल्कुन मर्रा पूसकीतोर. अस्के, “निमे पेन लोहता पिसागोटनोन किरिस्तुन आंदिन,” इंचि पत्र इत्तोर.

21 गानि, “इद पोल्ले मिमेट बोर्के वेहमट,” इंचि येसु ओर्क गट्टिगा हुकुम हीतोर.

येसु ओना हामुरता बारेमते वेहांतोर

(मत्तयाल 16:20-28; मरकुस 8:30-9:1)

22 पजा ओर्क इल्हा वेहालय दल्गतोर. “यहुदि पेद्दालक, पेद्दा पेर्मालोर आनि दर्मसास्त्रम कराहना गुस्कुनाहेंदाल मनकना रूपमते पुटतोन नाकु तिप्पल्क अर्रापीता. ओर ह्यसाकोटा आसि नाकुन हळ्कानुर. गानि मूडोव रोजुने नना मर्रा जीवाते तेदंतन,” इत्तोर.

23 पजा येसु अंतोर लोकुल्कुन इल्हा इत्तोर. “ओक्कला बोरन्ना मनकल नावा पज्जो वायना इत्ते, ओर ओना पूरा इस्टालक होळसिसि, दररोज सतता कूस तेहकुंचि नावा पज्जो वायिर.

24 बोर ओना जीवातुन पिसागोटालय हळंतोर, ओर ओना जीवातुन पोगोटकुंतोर, ओन्क बस्केळक पिस्सना पिस्वर दोर्को गानि नावाहाटी बोर अयते जीवा हीतोर, ओन्क बस्केळक पिस्सना पिस्वर दोर्कता.

25 ओक्कला मनकल पूरा दुनियातुन संपलिच्चि, जीवा पोगोटकुत्ते हिलाकोटे नासडेम आते, ओन्क बता पायदा आंता?

26 बोर अयते नाकुन, नावा पोल्लेन वेहालय सिग्गु अरंतोर, मनकना रूपमते पुटतोन नना बस्के अयते नावा महिमाते,* नावा बाबाना महिमाते, पवित्र पेनदा दूताना महिमाते वांतन, अस्के असोटा मनकन नावोर इनालय ननागुडा सिग्गु अरंतन.

27 गानि, नना मीकु निजम वेहांतन, इग्गे नित्तिसि मनानोरा लोप्पोटाल इच्चुर इल्हा मंतुर गदा, ओर पेनदा राज्येमतुन हळवा, ओर्कु हामुर वायो.”

मूसाल आनि एलियाल येसुनतोनि दिसमळ

(मत्तयाल 17:1-8; मरकुस 9:2-8)

* 9:26 महिमा इगे महिमाता अर्तम तेल्लगा जगा-जगा मेर्समळ. ई मेर्समळ ओना पेद्दातनमतुन हुप्संता.

28 इव पोल्लेन वेहचि एनमिदि रोजकु आतां बारे! येसु पन्तुन, योहानुन, याकोबुन पीसि येसु गुट्टापोरो पारतना कियालय होतोर.

29 ओर पारतना कियानेकेन ओना रूपम मारियता. ओना कपडिं तेल्लगा मेसालिय दल्गतां.

30-31 हूळट! अचानक येसुनगा मूसाल आनि एलियाल महिमाते वासि, येसुना हामुर येस्सलेमते बल्हा पूरा आंता, इंचि वळकसेक मत्तुर.

32 पन्तु आनि ओना दंटातुर निद्रा होंचि मत्तुर. पजा ओर निद्रताल तेदतस्के येसुना महिमाता वेल्गुन हळतुर. अचोने आयाका ओनतोनि इव्वुर मनकालोर नित्तिसि मत्तदगुडा हळतुर.

33 पजा मूसाल आनि एलियाल येसुनगटाल होननेके, “गुरु, मनम इगो मनमळ बेस मंता. अयते मनम मूड डेरां वाटकोम. उंदि नीहाटी, उंदि मूसानाहाटी उंदि एलियानाहाटी,” इंचि पन्तु येसुन इत्तोर. (ओर ई पोल्लेन वळकानेके विचारम कियार्कोटेन वळकतोर.)

34 ओर ई पोल्लेन वळकसेके मननेकेन उंदि मब्बु तेर्पे वासि ओर्कुन मुच्का होत्ता, अस्के ओर मुव्वुर वेरियतुर.

35 ओर्कु मब्बुनाल, “ईर नावा मरिं आंदुर, ईन नना पेर्कुत्तन, ईनां केंजट,” इंचि पेनदा अल्किर केंजावाता.

36 अद अल्किर मगतस्के ओर्क अगा येसु वरोरे दिसतोर. पजा ओर चुपचाप मत्तुर. अगा हळतद आ रोजकुने ओर बोर्के वेहा हिल्लुर.

देय्यम पीतोन येसु बेस कीतोर

(मत्तयाल 17:14-18; मरकुस 9:14-27)

37 इंकुंदि रोज ओर गुट्टा पोरोटाल हिळु रेयतस्के वेल्लेन लोकुलक येसुंक कलियालय वातुर.

38 अस्के आ मंदिताल वरोर मनकल जोरते वरगेयसि, “गुरु, नना नीवा काल्क मोळकंतन, नावा मरिनपोरो दया कीम, नाकु ओर वरोरे मरिं आंदुर.

39 ओन देय्यम पीतस्के ओर बागा वरगेयंतोर, ओना तोळदाल पोंगुर पेयसानाल ओन तेलहंता, अद ओन बस्केने होळसो, तकलिप कीसेकेने मंता.

40 अदुन गेदमालय नना नीवा सिस्युलकुंक विनंति कीतन, गानि ओरतोनि आया पराहिल्ले,” इंचि इत्तोर.

41 अस्के येसु ओर्कुन, “अरे विस्वासम तक्को आनि हरिं तप्ता पीळितोरिटा, नना बदवेरदाका मीतोनि मनकन? इंका बदवेरदाका नना मीकुन सहन कीकन? नीवा मरिन इगो पीसि वा,” इंचि आ मनकन इत्तोर.

42 आ पेडल येसुनहेके वायानेकेन देय्यम ओन हिळु अरहचि तेलहता. अस्के येसु आ देय्यमतुन गदरिचतोर. पजा पेडन बेस कीसि ओना बाबांक अप्पजेपतोर.

43 अस्के अंतोर लोकुलक पेनदा ताकततुन हळसि इचंन्रम आतुर.

येसु ओना हामुरता बारेमते वेहतोर

(मत्तयाल 17:22-23; मरकुस 9:30-32)

येसु बतल अयते कीतोर अद हळसि अंतोर लोकुलक इचंन्रमते मननेके येसु ओना सिस्युलकुन इल्हा इत्तोर,

44 “इंदके नना मीकु बतलयते वेहांतनो, अब पोल्लेन मिमेट बेस केंजट. मनकना रूपमते पुटतोन नाकुन, लोकुलकुना कय्दे पीसि हियानद मंता.”

45 गानि येसु वेहता पोल्ले ओर्क तेळिया हिल्ले. अद पोल्ले ओर्क तेळियामन्नि इंचि मक्किचि मत्ता. आनि इदुना बारेमते ओन पूस कियालयगुडा ओर वेरियतुर.

अंतोर्कन्ना पेद्दा बोर?

(मत्तयाल 18:1-5; मरकुस 9:33-37)

46 पजा, “मनालोप्पो अंतोर्कन्ना पेद्दा बोर?” इदुना बारेमते सिस्युलकुंक ओर्क-ओर्के पोल्ले आतां.

47 गानि येसु ओरा मनसुना विचारालकुन एरपाट कीसि, वरोर सिन्ना पेडन ओना दग्गेरा निलाहतोर.

48 निल्हाचि, “बोर अयते ई सिना पेडनसंतोन नावा पोरोलते स्विकार कीतोर ओर नाकुन स्विकार कीतापे. अल्हेने बोर अयते नाकुन स्विकार कीतोर ओर नाकुन लोहता पेनदुन इंका स्विकार कीतोर. अदुनहाटी बोर अयते मीलोप्पो अंतोर्कन्ना सिन्ना मंतोर, ओरे अंतोर्कन्ना पेद्दोड आंदुर,” इंचि येसु ओर्कुन इत्तोर.†

मीकु विरोद कियवोर मीवोर आंद

(मरकुस 9:38-40)

49 अस्के, “गुरु, वरोर मनकल नीवा पोरोलते देय्यालकुन पेचाहनेके मोमोट हळतोम. मालेसी ओर नी पज्जो ताकानोर आयोर, अदुनहाटी अल्हा कियमा इंचि मोमोट ओन आपतोम,” इंचि योहान जवाब हीतोर.

50 इत्तस्के, “बोर अयते मीक विरोदमते हिल्लोर, ओर मीवोरे आंदुर, अदुनहाटी ओन आपमट,” इंचि येसु योहानुन वेहतोर.

सामरिया सहरते येसुंक कदर दोर्को

51 येसु स्वर्गमते होनना रोजकु दग्गेरा वासेक मत्तां. अदुनहाटी ओर येस्सलेम होनालय गट्टि निरनायम कीतोर.

† 9:48 पेद्दाल्क वळकानेके सिन्ना पिलाळकुंक इलुवा मन्नो. ई सिन्ना पेडनसंटा इलुवा हिलुवा मनकल पेनदा नदरते पेद्दोड आंद.

- 52 ओर पेयसका मुन्ने ओना कबुरतोरकुन लोहतोर. ओर ओन्क जेगा तयार कियालय सामरिया लोकुकुना उंदि नाटे एव्तर.
 53 गानि येसु येस्सलेम होनालय पेयसतोर इंचि सामरि जातिता लोकुकुल ओन अगा आगा हिया हिल्लुर.‡
 54 ओर्कुन अगा आगा हिया हिल्लुर अय्ते ओना सिस्स्युल्लुकु याकोब आनि योहान इल्हा इत्तुर, “सामि! ओर्कुन हक्कालय, मब्बुनाल तडमि अरिं इंचि मोमोट आदेस हिथ्याना, इंचि नीवा विचारम मंताना?”
 55 अस्के येसु ओरहेके तिरियसि ओर्कुन तेराहतोर.‡
 56 पजा ओर अगटाल वेरे नाटे होत्तुर.

येसुना पज्जो ताकमळ

- 57 ओर हरपीसि होंचेक मननेके बोरो वरोर मनकल येसुनगा वासि, “निमे बगा-बगा दांतिनो, अगा-अगा नना नीवा पज्जो वांतन,” इंचि इत्तोर.
 58 अस्के येसु ओन इल्हा इत्तोर, “नक्कांक बारे मनालय सोर्रे मंतां, पिट्टेक मनालय गूडां मंतां, गानि मनकना रूपमते पुटतोन नाकु मात्रम तल्ला इरालयगुडा जेगा हिल्ले.”
 59 पजा येसु इकावरोर, “नावा पज्जो वा” इत्तोर. गानि, “सामि, नाकुन मोदाला होनाहीम, नावा बाबाल हातास्के ओन गति कीसि वांतन,” इंचि ओर येसुन इत्तोर.
 60 अस्के येसु ओन इत्तोर, “बोर अय्ते हाताप मंतुरो, ओरे ओरा हातोरा गति कियिर. निमे मात्रम होंचि पेनदा राज्येम बारेमता बेसता कबुर वेहा.”
 61 इकावरोर मनकल इत्तोर, “नना नीवा पज्जो वांतन सामि, गानि मुन्ने नना लोन होंचि, नावा लोतोरकुंक वेहचि वांतन.”
 62 अस्के येसु ओन इत्तोर, “पज्जो वांतन इंचि पेयसि, मर्रा पजोळ्क मल्लि ह्ळना मनकल पेनदा राज्येमता सेवा कियनालायक हिल्लोर,” इंचि इत्तोर.

10

येसु डेब्बै रौड सिस्स्युल्लुकुन सेवाहाटी लोहातोर

- 1 अद आता पजा सामि, इका डेब्बै रौड मंदि सिस्स्युल्लुकुन पेरतोर. पेरसि, बव नाहकुने अय्ते ओन्क होनना मत्ता अव नाहकुने ओना सिस्स्युल्लुकुन इव्वुर-इव्वुर्कुन कीसि मुन्ने लोहातोर.
 2 ओर्कुन लोहानेके इल्हा वेहातोर, “पंटा वेल्लेने पंडुता गानि बूतिनोर तक्को मंतुर. अदुनहाटी पंताता मालकुंक बूतिनोरकुन पंटा कोय्यालय लोहा इंचि विनंति कीम्ट.*
 3 मिमेट होंट! हुळाट, तोडेल्लिन लोप्पो गोर्रे पोरिहकुन लोहताप नना मीकुन लोहचंतन.‡
 4 मीवातोनि कोत्ताना संचि, जोरा आयि, हेरपुहक आयिं पियमट. हरिं पीसि होननेके बोर कलियते ओर्कुं जोहारगुडा वेहमट.†
 5 मिमेट बद लोन अय्ते दांतिटो, मोदाला, ‘इद लोतुक सांति दोर्कि’ इंचि इंट.
 6 अद लोते सांति गावाले इनना मनकल मत्ते अद सांति ओनगा दांता, गानि अगा गिंटा सांति गावाले इनना मनकल हिलाकोटे आ सांति मिहागेन वापस वांता.
 7 कबळ कियानोक्कु बूति दोर्कता. अदुनहाटी मिमेट बद लोन अय्ते दांतिटो अद लोतुर बतल हींतुरो अद तिचेक-उंचेके अदे लोते मंटु, अलग-अलग लोहकुने मनमट.
 8 मिमेट बद सहरते दांतिरो, अद सहरतोर मीकु बेस मान-मरयादा कीते, ओर मीक बतल तिनालय हींतुर अदे तिंटु.
 9 अगाटा बिमारतोरकुन बेस कीसि, ‘पेनदा राज्येम दग्गेर्क एव्ता’ इंचि ओर्क वेहाट.
 10-11 गानि मिमेट बदन्ना सहरते होतस्के ओर मीकुन बेस मान-मरयादा कियाकोटे, अगाटा हरकुने होंचि, ‘मिमेट माकु मरयादा कियुवा विरोदमते, मावा कालकुंक अंटता मीवा सहरता दुब्बागुडा मोमोट इगेन दुल्पसंतोम. अय्नागानि इद मतिते ईरंट, पेनदा राज्येम दग्गेर्क एव्ता,’ इंचि ओर्क वेहाट.
 12 नना मीकु वेहासेक गदा, न्यायम कियना रोजुने, ‡ सदोम सहरता परिस्तिती आ नाहकुंकन्ना बच्चोरो बेस मनंता,” इंचि येसु ओर्क वेहतोर.

येसुना पोल्ले केंजवोरा नाहकु (मत्तयाल 11:20-24)

‡ 9:53 यहूदि लोकुकुल सामरि जातितोरकुन इट्टुते मुट्टुळ इनुंदुर. अल्हेने सामरि जातितोर गेरजिम इनना गुट्टातगा मोळकुंदुर, यहूदि जातितोर बारे येस्सलेम गुळितगा मोळकुंदुर. अदुनहाटी सामरि जातितोर ओर्कुन अगा आगा हिया हिल्लुर. § 9:55 कोन्नि युनानि पुस्तकालुकुने इल्हा रासि मंता: येसु ओर्कुन, “मिमेट बद आत्माते मंतिट मीक तेळियोना? मनकंक पुटतोर मनकना आत्मातुन हक्कालय आयो गानि ओनकु मुक्ति हियालय वातोर,” इंचि इत्तोर. * 10:2 इद वचनता अर्तम बतल इत्ते, वेल्लेन लोकुकुल येसु वेहता पोल्ले केंजालय तयार मंतुर, गानि ओर्कुं कराहलय, वेहालय मात्रम लोकुकुल तक्को मंतुर. इगे पंटा इत्ते केंजना लोकुकुल, पंटा मालक इत्ते पेनबाबाल आनि बूतिनोर इत्ते पेनदा पोल्ले कराहनोर. † 10:3 मत्तयाल 10:16 † 10:4 यहूदि जातितोर बेकेनना पय्नेम होननेके नड्डुम हरदे बोरन्ना एरपाटनोर कलियानय्ते वरोंक-वरोर ऊके-ऊके सुक-दुक्कालक वेहकुनुंदुर. अदुनहाटी सेवक होननेके अल्हा कीते अग्गेन वेला आंता इंचि येसु ओर्कुं इल्हा वेहातोर. ‡ 10:12 उत्पत्ति 19:24,25

13 येसु मर्रा इत्तोर, “ए कोरजिना आनि बेतसेदा नाटेना लोकरिटा! मीकु गोसा तप्पो! ओक्कला मिहगा बव अद्बूताल्क आतां, अवे गिंटा सूर, सिदोन नाहकुने आसि मत्ते, अगाटा लोकुल्क बिराना बोंतां हट्टिसि, मेंदुल्क बूळ्दि होकसि उद्दिदसि दुक्कमते मनसु मार्सकुंकि मन्नेर.

14 गानि पेन न्यायम कियना रोजुने सूर आनि सिदोनतुरा परिस्तिती मीकन्ना बच्चोरो बेस मनंता.

15 ए कपर्नाहम सहरता लोकरिटा! मिमेट स्वर्गमते दांतोम इनकुंचंतिरा? मिमेट नरकमते दांतिर.”

16 “सिस्युल्कुनिटा! बोर मीवा पोल्लें कैजंतोरो, ओर नावा पोल्लें कैजंतोर. बोर मीकुन हयसोर ओर नाकुन हयसोर. नाकुन हयसवोर नाकुन लोहता पेनदुनगुडा हयसोर,” इंचि येसु वेहातोर.

येसुना सिस्युल्कु कूस आंतुर

17 पजा, येसु लोहता डेब्बै रौंडु मदि सिस्युल्कु वेल्लेन कुसिते मल्लिस वासि, “सामि, नीवा पोरोल्ले देय्याल्कगुडा मावा पोल्लेतुन कैजतां,” इंचि येसुक वेहतुर.

18 अस्के येसु ओर्कुन इल्हा इत्तोर, “नना पेद्दा देय्यमतुन मब्बुनाल पिळगुनलेसी अरनेके हळतन.

19 कैजट, नना मीकु तरासकु, मिच्चोन जारानद आनि पगातोरा पूरा बलमतुन गेल्लसानद अदिकारम हीतन. मीपोरो बोर अन्यायम किया पर्स.

20 अयना मीवा पोल्ले देय्याल्क कैजतां इंचि कूस आयमट, गानि मीवा पोरोल स्वर्गमते रासि मंता इंचि कूस आम्टु,” इंचि वेहतोर.

येसु पेनबाबांक दन्यवाद कीतोर

(मत्तयाल 11:25-27; 13:16-17)

21 अस्केने येसु पवित्र आत्माते निंडसि कूस आसि इल्हा इत्तोर, “ए नावा बाबा, बूमि आनि स्वर्गमता सामि, तेल्विगल्लोर्क आनि समजदार लोकुल्कनगटाल इव पोल्लें मक्किचि इरतिन, सादा-सिंपल लोकुल्कुंक बारे इव पोल्लें हुपिस्तिन, इंचि नना नीवा स्तुति कीसेक मंतन. हो बाबा! नीकु इदे बेस अनपिस्ताहाटीं निमे इल्हा कीतिन.

22 नावा बाबाल नाकु अन्नि अप्पजेपतोर. बाबान तप्पा मर्रिन बोरे एरपाट क्रिय्युर, मर्रिन तप्पा बाबान बोरे एरपाट क्रिय्युर. मर्रि ओना इस्टमाताप बाबाना बारेमते बोर्क अयेते तेळियानाल वेहांतोर ओरे बाबान एरपाट कीतुर,” इंचि इत्तोर.

23 पजा ओर ओना सिस्युल्कुन पक्कक ओसि ओर्कुन इल्हा इत्तोर, “मिमेट हळानवुन हळना मीवा कळ्कु वेल्लेन आसिर्वाद दोर्कतव आंदुं.

24 बारित्ते नना मीकु वेहांतन, इय्याला मिमेट बव हळसंतोरो, कैजसंतोरो, अवन वेल्लेटुर पेनदा कबुरतोर आनि राजालोर हळालय, कैजालय तन्लाळंदुर. गानि ओर्क हळालय, कैजालय दोर्काहिल्ले,” इंचि इत्तोर.

25 अच्चोटेन मूसाना नियम बेस तेळियतोर वरोर गुरु निततोर. नित्तिसि येसुना पट्टु हळानाहाटीं, “गुरु, बस्केळ्क पिस्सना पिस्वरता वारसदार आयानाहाटीं नना बतल कीते बेस?” इंचि पूसकीतोर.

26 अस्के येसु ओन, “मूसाना नियमते बतल रासि मंता? दानहेंदाल नीकु बतल तेळियता?” इंचि इत्तोर.

27 इत्तस्के आ गुरु, “निमे नीवा सामि आता पेनदुन पूरा मनसुनाल, पूरा आत्माताल, पूरा ताकतताल, पूरा बुद्दिदताल पावरम कीम. अल्हेने नीवद निमे बच्चोन पावरम कीतिनो अचोने पावरम इंकावरोनगुडा कीम. इल्हा रासि मंता,” इंचि जवाब हीतोर.

28 अस्के येसु ओन, “निमे बरोबर वेहतिन, अल्हेन निमेगुडा कीम, अस्के नीकु बस्केळ्क पिस्सना पिस्वर दोर्कता,” इंचि इत्तोर.

29 ओर, नना नीतिमंतुन इंचि हुप्सालय, “नावा पक्कातोर इत्ते बोर आंदुर?” इंचि येसुन पूसकीतोर.

सामरि जातिता मनकना वेसुडि

30 अल्हा पूसकीतस्के येसु ओन्क उंदि वेसुड वेहातोर: “वरोर मनकल येस्सलेम सहरताल यरिहो इनना नार होंचेके मत्तोर. होननेके नड्डुम हरदे ओन दोंगाल्क पीतुर. ओर ओनगा मत्ता सामानतुन इग्गुकुत्तुर, कपडिं तेंडकुत्तुर. पजा ओन पक्का तंचि, डुक-डुक जीवा मननेके होळसि होत्तुर.”

31 “पजा बतल आता इत्ते, अदे हरपीसि वरोर पेर्माल होंचेक मत्तोर. आ पेर्माल हिळु अरसि मत्ता मनकन हळसि होरियसि होत्तोर.

32 ओर होतस्के वरोर लेवि जातिता मनकल अदे हरि पीसि वातोर. ओर इंका हिळु अरसि मत्ता मनकन हळसि होरियसि होत्तोर.

33 ओर होत्ता पजा, अदे हरि पीसि वरोर सामरिया मनकल अगा एवतोर. एवतस्के हिळु अरसि मत्ता मनकन हळसि ओनकु इरगा जीवा नोता.

34 ओर ओनगा वासि ओन्क देब्बां आतगा, अवनपोरो निय, अंगुर पंडिना पानकम* होकसि पट्टे दोहतोर. दोहता पजा, आ सामरि मनकल हिळु अरसि मत्ता मनकन ओना गाड्दिपोरो वाटसि, उंदि लाजुने ओसि ओन बेस हळकुत्तोर.

35 इंकुदि रोज लाजता मालकुंक रौंडु एंडि कोत्तां हीसि, ईन बेस हळ्ळा, ईनाहाटीं एक्को कोत्तां कर्स आयानय्ते, नना मल्लिस वातस्के अव नीकु हीतन इत्तोर.”

36 पजा येसु, “दोंगाल्कन कय्दे देब्बां तित्ता मनकंक मुव्वुर मनकालोर कलियतुर. आ मुव्वुर लोप्पो नीवा विचारमते ओना पक्कातोर बोर आंदुर?” इंचि ओन पूसकीतोर.

‡ 10:32 लेवि जाति लेवि जातिता मनकालोर गुळिते कबळ कीतुर. § 10:33 सामरिया मनकल सामरियाता एरियाता लोकुल्क सिन्ना जातितोर इंचि यहदिल्क ओर्कुन इत्ते मुट्टुळ इन्दुर. * 10:34 इस्राएल लोकुल्क अंगुर पंडिना पानकमतुन उननाहाटीं, देब्बां दल्यतगा होकनाहाटीं कियुंदुर.

37 अस्के आ गुरु, “बोर अय्ते ओन हळसि ओनपोर्रो दया कीतोर ओरे,” इंचि इत्तोर.
अस्के येसु, “होन, ओर कीताप निमेगुडा कीम,” इंचि ओन इत्तोर.

मरियम आनि मार्ता

38 पजा येसु, ओना सिस्स्युल्लुकु हरि पीसि होननेके, उंदि नाटेनगा एवतुर. अगा उंदि मार्ता इनना मुरतळ मत्ता. अद येसुन दाना लोन ओसि बेस हळकुत्ता.

39 दान्क मरियम इनना उंदि हेलड मत्ता. अद सामिना काल्कुनगा उद्दिदेसि ओर वेहना पोल्लें बेस केंजसेक मत्ता.

40 गानि दाना अक्कल मार्ताल सेवा कीसि-कीसि, पूरा मोता दान पोरोने अरताप आता. अदुनहाटीं अद येसुनगा वासि, “सामि, नावा हेलड पूरा कबळ नावा पोरोने वाटसि हीता, इद निमे हळसेक हिल्लिना? नाकु आसर आयालय दानकु वेहा,” इंचि इत्ता.

41 अस्के सामि दानकु इल्हा जवाब हीतोर. “मार्ता, निमे वेल्लेन कबाहकुना बारेमते विचारम कीसि गाबर आतिन.

42 गानि असल उंदे कबळ कियना अवसरम मंता. मरियम आ बेस कबळतुन पेरकुत्ता. अदुनहाटीं दानगटाल अद कबळतुन बोरे इगुकुन्ना पम्प,” इत्तोर.

11

येसु कराहता पारतना

(मत्तयाल 7:7-11)

1 उंदि मल्का येसु उंदि जेगाते पारतना कीसेक मत्तोर. पारतना आतंका ओना सिस्स्युल्लुकुनाल वरोर सिस्स्युड ओन, “सामि, योहान ओना सिस्स्युल्लुकुं बल्हा पारतना कियमळ कराहतोरो, अल्हेन निमे माकुगुडा पारतना बल्हा कियमळो करहा,” इंचि इत्तोर.

2 अस्के येसु ओर्कुन, मिमेट पारतना कियनेके इल्हा इंटु,
“ए मावा पेनबाबा, नीवा पोरोलतुन अंटोर कदर कियिरकांटी.

निमेन मापोर्रो राज्येम कीम.

3 माकु रोजता तिडि इय्यालागुडा हीम.

4 माकु विरोदमते कीता तप्पुकुन मोमोट बल्हा माप कीतोमो,
निमेगुडा मोमोट कीता तप्पुकुन माप कीम, माकुन पट्टुने अर्काकोटा कापाळा.”

तल्कते पेन हीता

(मत्तयाल 6:9-13)

5-6 पजा येसु ओर्कु इल्हा वेहालय दल्गतोर. “मीवाव्टेताल बोरो वरोर, मीवा दंटातोनागा नडजाम नर्का होंचि, अरे दादा, नहगा इंदकेन वरोर दंटागाल वातोर. गानि ओन्क अट्टिस दोसालय नहगा बतले हिल्ले. अदुनहाटीं नाकु इच्चुं परिक बदल हीम, इंचि इत्तोर इनकुटु!

7 अस्के आ दंटागाल लोप्पोटाले, नना नावा पिलाल्कुनतोनि मीडसि मंतन, नना तेदते ओरगुडा तेदांतुर, इंका तल्पुगुडा लोप्पोटाल गट्टिगा वाटतन. अदुनहाटीं नना इंदके तेदिस नीकु बतल हिया परोन. नाकुन वट्टिदे परेसान कियमा, इंचि इंतोर.

8 नना मीकु वेहानद बतल इत्ते, आ दंटागाल ‘नावा दंटागाल वातोर,’ इंचि तेदसि ओन्क परिक हिय्या हिल्लोर. गानि ओना दंटागाल ओन उंदेतीर, हीम-हीम इंचेके बातिमलाडताहाटीं ओर तेदसि ओन्क गावाले मत्ताचोन परिक तप्पाकोटा हीतोर.

9 अदुनहाटीं नना मीकु वेहचंतन पेनदुन तल्कसेक मंटु, मीकु हिय्यार. पह्कसेक मंटु, मीकु दोर्कार. तल्पुन टोक-टोक कीसेक मंटु, मीवाहाटीं तल्पु तेंडार.

10 बारित्ते बोर अय्ते तल्कंतोर ओन्क हियमळ जर्गता. बोर अय्ते पह्कंतोर ओन्क दोर्कता. बोर अय्ते तल्पुन तनंतोर ओनाहाटीं तल्पु तेंडमळ जर्गता.

11-12 मीलोप्पो बोरन्ना बाबो मंतोरा ओना मरि, जिम्मा तल्कते ओन्क तरास हियानोर? * हिलाकोंटे मेंज तल्कते ओन्क मिच्चो हियानोर मीलोप्पो बोरन्ना बाबो मंतोरा? हिल्लोर.

13 अय्ते मिमेट सेड्डोर्के आसिगुडा मीवा पिलाल्कुंक बेसतद हियमळ तेळियतस्के, स्वर्गमते मनना पेनबाबाल, ओन तल्कानोर्कुंक पवित्र आत्मा बच्चोन वेल्ले हियनुर?”

येसुना ताकत पेनदागटाल मंता

(मत्तयाल 12:22-30; मरकुस 3:20-27)

14 वरोर मनकन देय्यम पीताहाटीं ओर मूकल आसि मत्तोर. पजा येसु आ मनकानाल अद देय्यमतुन पेच्हाचि गेटुमतोर, अस्के आ मूकल वळकालय दल्गतोर. इदुन हळसि अगा मत्ता अंटोर लोकुल्लुकुं वेल्लेन इचंत्रम आता.

15 गानि अव्टेताल इच्चुर मंदि, “बेलजेबुल इनना देय्याल्लुकुना मुक्यना बलमते ओर देय्याल्लुकु तेंडांतोर,” इंचि इनालय दल्गतुर.

16 इंका इच्चुर बारे ओना पट्टु हळना इंचि ओनाहेंदाल स्वर्गमताल उंदि चिन्ह हुप्सा इत्तुर.

* 11:11-12 इद वचनम कोन्नि पांडु लिपिने हिल्ले.

17 ओरा मनसुना विचाराल्कुन एरपाट कीसि येसु ओर्कुन इल्हा इत्तोर, “बद राज्येम लोप्पो वरोना पोल्ले-वरोक अर्काकोटा आंता, अद राज्येम पाडासि दांता. अल्हेन उंदि लोते मनानोरा नड्डुम वरोनद वरोक अर्काकोटा मत्ते अद लोनगुडा नासडेम आसि दांता.

18 मिमेट इत्तिर गदा, नना बेलजेबुल इनना देय्यमता सहायमतोनि देय्याल्क गेदुमतन इंचि. अल्हा अय्ते देय्यम दाना दंटाता देय्याल्कुना विरोदमते नितते, अवुना राज्येम बल्हा नित्तंता?

19 सरे! मिमेट इत्ताप, नना बेलजेबुलना सहायमते देय्याल्कुन गेदमंतन इन्कुट. गानि मीवा लोकुल्कगुडा देय्याल्कुन गेदमंतुर, ओरगुडा देय्यमता सहायमतोने गेदमंतुरा? अदुनहाटीं मीवा लोकुल्के मीवा न्यायम कीतुर.

20 गानि नना ओक्कला पेनदा बलमते देय्याल्कुन गेदमानय्ते, पेनदा राज्येम मीवा दग्गेर्क एत्ता इंचि एरपाट कीम्टु.”

21 “वरोर ताकतवर मनकल गोर्का, कसेहक, तुपाकी पीसि ओना लोता कावेल कीतेने, ओना लोता लोप्पो मनना अन्नि सामान बेस सांतिते मनंतां.

22 गानि ओनकन्ना एक्को ताकतवर मनकल वासि ओनतोनि लडाइ कीसि ओन ओळिच्चानय्ते, बव गोर्का, कसेहकुन पोर्गे वेल्लेन वर्सानाल बरोसा इरतोर, अवुन इग्गुकुचि ओनगा मत्ता मालुन दोसकुंतोर. पजा अंटोर्कुंक पंचि हीतोर.”

23 “बोर अय्ते नावा दंटाते मननोर, ओर नावा विरोदमते मंतोर, बोर अय्ते नाकु सहायम किय्योर, ओर नाहगटाल पायिचना कबळ कीतोर.”

24 “उंदि देय्यम बस्के अय्ते वरोर मनकानाल पेय्सि दांता, अस्के अद आराम किय्यालय एर हिल्वा जेगा पहकंता. गानि दान्क असंटा जेगा दोर्को. अस्के अद देय्यम, नना बद लोताल अय्ते पेय्सि वातानो, अदे लोते मर्ग मल्लि दांतन, इन्कुंता.

25 मर्ग अगा होंचि हळतस्के मुन्नेटा लोन रिक्कम आताप, मंचिगा ऊसताप दानकु बेस दिसंता.

26 अस्के अद देय्यम तिरियसि होंचि दानकन्ना एक्को सेड्डातव एडुं देय्याल्कुन पीसि वांता. पजा अंटव कलियसि अदे लोते मनालय दलंगंतां. इल्हा आ मनकना परिस्तिती मोदाटा परिस्तितीकन्ना एक्को कराब मनंता.”

निजम आसिर्वाद

27 पजा बतल आता इत्ते, येसु इव पोल्ले वेहसेकेन मत्तोर, अच्चोटेन अगा मत्ता मंदिताल उंदि मुरतळ लगांचि, “नीकुन कंचि, पाल उहचि, बेरसागोटता आ तल्लुर वेल्लेन आसिर्वाद दोर्कुंतद आंदु,” इंचि इत्ता.

28 अस्के येसु, “गानि बोर अय्ते पेनदा वचनाल्क केंजसि अवुन पीसि ताकंतोरो ओर एक्को आसिर्वाद दोर्कुंतोर आंदु,” इंचि इत्तोर.

लोकुल्क चिन्ह तल्कंतुर

(मत्तयाल 12:38-42; मरकुस 8:12)

29 वेल्लेन लोकुल्क जमा आयानद हळसि येसु इल्हा वळकालय दलगतोर: “इद पीळितोर कराब लोकुल्क आंदुर. अदुनहाटीं चिन्ह हुप्सा इंचि पूस कीसंतुर. गानि योनाल इनना पेनदा कबुरतोना चिन्ह तप्पा ओर्कु इंकुंदि चिन्ह हुपिचमळ जर्गो.†

30 बल्हा योनाल निनवे सहरता लोकुल्कुनाहाटीं चिन्ह आतोर, अल्हेन मनकना रूपमते पुटतोन नना, ई पीळितोरहाटीं चिन्ह आंतन.

31 अल्हेने सिबा देसेमता रानि सुलेमान राजाना तेल्विता पोल्ले केंजालय वेरे देसेमताल अगा वासि मत्ता. हुळाट, सुलेमानुंकन्ना पेदूदोड वरोर मी मुन्ने नित्तिसि मंतोर. अय्नागानि मिमेट नावा बुद्धिदता पोल्ले केंजसेक हिल्लिर. अदुनहाटीं आकिर न्यायमता रोजुने आ रानि इद पीळिता मनकालोरपोर्गे दोसेम दोस्सार.

32 योनाल वेहता कबुर केंजसि निनवे सहरतोर अय्ते ओरा मनसु मार्सकुत्तुर. गानि हुळाट, योनांकन्ना पेदूदोड इंदके मी मुन्ने नित्तिसि मंतोर. अय्नागानि मिमेट मनसु मार्सकुंचेके हिल्लिर. अदुनहाटीं आकिर न्यायमता रोजुने निनवे सहरतोर नित्तिसि इद पीळिता लोकुल्कुनपोर्गे दोसेम दोस्सनुर.”

वेळसि आनि वेल्गु

(मत्तयाल 5:15; 6:22-23)

33 “बोरे आयिर वेडसि निरिच्चि दान गुल्ला हिळु मुच्चोर, साटुंकगुडा इर्रोर. गानि लोप्पो होळियानोर्क बेस वेल्गु दिसगोम इंचि दान उंदि दीसोडिपोर्गे इर्रोर.

34 नीवा कळु नीवा मेंदुल्क वेडसिलेहका आंदु, नीवा कळु बेस मत्ते नीवा मेंदुलंता बेस वेल्गु मनंता. ओक्कला नीवा कळु बेस हिलाकोटे नीवा मेंदुलंता हीकटे मनंता.

35 अदुनहाटीं नीवा लोप्पो मनना वेल्गु पिरसोन्नाकुंटा बेस कापाडकुन.

36 नीवा पूरा मेंदुल पुरागा वेल्गुने मत्ते, अद वेडसि एल्गुताप बेस एल्गुसेके मनंता आनि गिचचो मेंदुलगुडा हीकटते मन्नो.”

येसु परिसिल्कुनपोर्गे होंग आंतोर

(मत्तयाल 23:1-36; मरकुस 12:38-40; लूकाल 20:45-47)

37 इल्हा येसु ओना वळकुमळ मारतस्के वरोर परिसि ओना लोन येसुन गाटो तिनालय केयतोर. अय्ते येसु ओना लोन होंचि लोप्पो होळियसि गाटो तिनालय उदुतोर.

† 11:29 योनाना उदाहरन हीसि येसु ओन्क वायना हामुर, हासि मूड रोजकु बोंदाते मनमळ आनि मूडो रोजुननाड मर्ग जीवाते तेदमळता बारेमते वेहतोर.

- 38 येसु यहुदिल्लकुना रिवाज परकारम तिनाका मुन्ने कय्कु नोरसि गाटो तिनालय उद्दा हिल्लोर. अदुन हूळसि आ परिसिंक इचंन्रम आता.
- 39 अस्के सामि ओन इल्हा इत्तोर, “मिमेट परिसि लोक्कुलक गिन्ने-गिलासकु सिराप लोक्कुलक दिसालय पलाताल तोमसि साप कीतिर, गानि लोप्पो मात्रम मीवा कराब गुनालक, वेल्लेन लालच निंडसि मनंता.
- 40 अरे बुद्धि तक्को लोक्कुरिटा! पलाताल तयार कीता पेने लोप्पोटाल तयार कीता.
- 41 अदुनहाटीं मिहगा बतल अय्ते मंतनो अदुन गरिब लोक्कुलक मनसुनाल हीम्ट. अस्के मीहाटीं अन्नि साप मनंता.
- 42 अरे परिसिल्लकुनिटा! मीकु गोसा तप्पो. बारित्ते मिमेट मीवा तोटाते पुटता पुदिना, इंका वेरे अन्नि पंटाता पदि तूसकुनाल उंदि तूस पेनदुक हीतिर. गानि न्यायमतुन आनि पेनदा पावरमतुन मात्रम मिमेट मति किथ्थिर. पदि तूसकुनाल उंदि तूस पेनदुक हियमळ इद बेसे. गानि इद कीसेक-कीसेक न्यायमतुन आनि पेनदा पावरमतुनगुडा होळसाकोटा ताका मत्तिर.
- 43 परिसिल्लकुनिटा मीकु गोसा तप्पो, दर्मसास्त्रम कराहना लोह्कुने पेद्दालक उद्दाना जेगा मीकु गावाले इनकुंतिर. हाटुमकुने जोहार वेहागोटकुनमळ इत्ते वेल्ले इस्टम.
- 44 मीकु गोसा तप्पो. बारित्ते, अगा बोंदा मंता इंचि तेळियका लोक्कुलक जारसेके दांतुर, मिमेट आ बोंदानसंतोर आंदिर.”

येसु आनि दर्मसास्त्रम कराहना गुस्लक

- 45 अस्के दर्मसास्त्रम बेस तेळियतोर वरोर गुरु वासि येसुन, “गुरु, निमे इसोंटा पोल्लें वळ्किसि मावदगुडा अपमानम कीसतिन,” इंचि इत्तोर.
- 46 अस्के येसु इल्हा इत्तोर. “अरे मूसाना नियम बेस तेळियतोरिटा, मीकु सिक्सा तप्पो. बारित्ते मिमेट लोक्कुलकुनपोर्री, तेहते तेदा पर्खा मोता‡ तासतिट, गानि मिमेट मात्रम अद मोतातुन तेहालय उंदि वेलुगुडा तासिर.
- 47 इंचि मीकु गोसा तप्पो. बारित्ते, मीवा एनकटा पेद्दालक हक्कता पेनदा कबुरतोरहाटीं गोरि दोहातिर.
- 48 इल्हा कीसि, मीवा एनकटा पेद्दालकुने आनि ओर कीता कबाहकुने मिमेट कलियसि मंतिर इत्ताप मिमेटे गवाइ मंतिर. बारित्ते मीवा एनकटा पेद्दालक पेनदा कबुरतोर्कुन हक्कतुर, मिमेट बारे ओरा गोरि दोहचंतिर.
- 49 अचोने आयका पेन दाना बेस बुद्धिदेते मीवा बारेमते इल्हा वेहता, नना पेनदा कबुरतोर्कुन आनि प्रेरितुल्लकुन ओरगा लोहांतन. अस्के ओर, ओरावेटाल इच्चुर्कुन हक्कानुर, इच्चुर्कुन बारे इरगा तिप्पलक कियानुर.”
- 50 “दीनहेंदाल, ई दुनिया पुटतस्केटाल बच्चोन मंदि पेनदा कबुरतोर नेत्तुर अय्ते पोंगागोटमळ जर्गतनो, आ ओरा अंतोरा नेत्तुरता हिसाब ई पीळितोराहेंदाल एतमळ जर्गता.
- 51 इत्ते आबेलनगटाल अय्ते, गुळि आनि गद्दे नड्डुम हक्कता जकर्याहनगड्क. हां, नना मीकु निजम वेहांतन, ईर अंतोरा नेत्तुरता हिसाब ई पीळिता लोक्कुलकुनहेंदाले एतमळ जर्गता.
- 52 अरे मूसाना नियम बेस तेळियतोरिटा, मीक गोसा तप्पो. बारित्ते मिमेट पेनदा तेल्विता तालम कयदुन तेंडकुत्तिर. गानि मिमेट कुद्दु अय्ते होळिया हिल्लिर, होळियानोर्कुनगुडा आपिसि इरतिर.”
- 53 पजा येसु अगटाल होनालय पेयसतोर अस्के, परिसिर्क आनि दर्मसास्त्रम कराहना गुस्लक ओन्क अड्डम तिरियसि, ओन रकारकालकुना सवालक पूस कीसि परेसान कियालय दलगुतुर.
- 54 येसु बतलन्ना वळकते ओर वळकना पोल्लेने ओन दोर्का पियना विचारम ओरा मनसुने मत्ताहाटीं ओर अल्हा कियालय दलगुतुर.

12

परिसिल्लकुनलेसीं आयमटु

- 1 अच्चोटेन अगा वेय्कुना मंदि जमा आसि, इरगा गर्दि आताहेंका वरोंक वरोर जारसेके मत्तुर. अस्के येसु मोट्टा मोदाला ओना सिस्युल्लकुनतोनि इल्हा वळकालय दलगतोर. “परिसिल्लक डोंगिर्क आंदुर, ओरा पुल्लटा पिंडिता* बारेमते जेगर्ता मंटु.
- 2 मुच्चिसि मत्तव अन्नि पोल्लें बय्यर आंता, तेळियाकोटा मत्तव अन्नि वस्तुक पलातुक वांतां.
- 3 अदुनहाटीं मिमेट हीकटते वळकता पोल्लें वेलगुने केंजमळ जर्गता. आनि लोता लोप्पोटा अरति होंचि गुसागुसा वळकता पोल्लें येनागर्गपोर्री एक्किसि वेहमळ जर्गता.”

सिराप पेनदुके वेरियटु!

(मत्तयाल 10:28-31)

- 4 “इंचि नावा दंतातोरिटा, नना मीकु वेहानद बतल इत्ते, बोर अय्ते मीवा मेंदुल्लुन हक्का परांतुर ओर्क मिमेट वेरियमट. ओर दानकन्ना एक्को बतल किया पसर.
- 5 मिमेट बोर्कु वेरियगोमो नना वेहांतन. मीकुन हक्कुतंका नरकमते वाटना अदिकारम बोन्क अय्ते मंतानो, मिमेट ओन्के वेरियट. नना वेहनद इदे.”

‡ 11:46 तेहते तेदा पर्खा मोता इगे, तेहते तेदा पर्खा मोता इत्ते यहुदिल्लकुना वेल्लेन नियमकु आंदु. आ नियमकुना पालन कियमळ वेल्लेन कस्टम. दर्मसास्त्रम कराहना गुस्लक लोक्कुलक वेल्लेन नियमकुना पालन कियालय वेहांतुर गानि लोक्कुलक मात्रम पालन कियालय सहायम किय्युर. * 12:1 पुल्लटा पिंडि इत्ते तोळ इत्ताप, बतल पुल्लगा कियानद मत्ते अच्चे इच्चो पुल्लटा वस्तु वाटा पीता.

6 “हेय्युं कोळ्का पिट्टें रोंडु कोलतांकु अम्मुड दांतां गदा! अयनागानि अक्टेटाल उंदि पिट्टेटुनगुडा पेन मति मर्गो.

7 मीवा तल्लाता उंदि-उंदि केल्लु लोक्किस मंता. अदुनहाटीं वेरियमट! पेनदा मुन्ने मिमेट वेल्लेन कोळ्का पिट्टेंकन्ना बच्चोरो विल्ला मत्तोर आंदिर.”

येसुना पोरोल एतालय सिग्गु अरमट

(मत्तयाल 10:32-33; 12:32; 10:19-20)

8 “नना मीकु वेहांतन, बोर अयते लोक्कुकुना मुन्ने नाकुन एरपाट कीतन इंचि ओप्कुंतोरो, मनकना रूपमते पुटतोन ननागुडा ओन पेनदा दूताना मुन्ने, ‘एरपाट कीतन’ इंचि ओप्कुंतन.

9 गानि बोर अयते लोक्कुकुना मुन्ने नाकुन ‘एरपाट किय्योन’ इंतोरो, ननागुडा ओन पेनदा दूताना मुन्ने ‘एरपाट किय्योन’ इंचि इंतन.

10 मनकना रूपमते पुटतोन नाकु विरोदमते बोर वळ्किना, पेन ओना तप्पुकुन मापि किय्यार. गानि पवित्र आत्माता अपमानम कियानोना तप्पुकुकुं मात्रम मापि हिल्ले.”

11-12 “मीकुन दर्मसास्त्रम कराहना लोहकुने, राज्येम कियानोरा मुन्ने इंका अदिकारिल्लुकुनगा पूसकियालय ओतास्के, अगा मिमेट बतल वळ्कुगोमो अद, पवित्र आत्मा मीकु अस्केन कराहंता. अदुनहाटीं बतल वळ्किना, बतल वळ्कानायो इंचि रंदि कियमट.”

तेल्वि तक्को सिरमंत मनकल

13 आ मंदिताल बोरो वरोर मनकल येसुन, “गुरु, नावा दादल नावा बाबाना अस्तिताल नाकु बतले हीसेक हिल्लोर, नावा पालुंक वायना आस्ति नाकु पंचि हीम इंचि निमे ओन्क वेहा,” इंचि इत्तोर.

14 अस्के येसु ओन, “अरे दादा! मीवा आस्ति पंचि हियालय नाकुन बोरन्ना ‘पेद्दा मनकल हिलाकोटो न्यायम कियानोर’ इंचि इरतोर?” इंचि पूसकीतोर.

15 पजा येसु ओरतोनि, “बेस जेगर्ता मंचि, अन्नि लालचकुनाल मीवद मिमेटे लक्कु मंटु! बारित्ते मनकना पिस्वर वेल्लेन आस्ति मत्तेन बेस मनंता इंचि इनकुन्मट,” इंचि इत्तोर.

16 पजा येसु ओर्कु उंदि वेसुड वेहतोर: “वरोर वेल्लेन सिरमंत मनकल मत्तोर. उंदि मल्का बतल आता इत्ते, ओना नेदे इरगा पंटा पेयस्ता.

17 अस्के मनसुने ओनद ओरे, ‘पंटा अयते वेल्लेन पेयस्ता. गानि दीन इर्गालय मात्रम जेगा हिल्ले, बतल कीकन?’ इन्कुत्तोर.

18 मरा विचारम कीसि, ‘सरे! नना नावा पडना जेगातुन कुल्हाचि पेद्दागा कीतन. कीसि पूरा पंटातुन, सामानतुन अक्टे वाटसि इर्गितन.

19 पजा नना नावा जीवक, नीकु वेल्लेन वर्सानदाका हालानाल रसि आता गाटो दोसतन, तिन्नु, उन्नु आनंदमते मन्नु, रंदि कियमा, इंचि वेहांतन,’ इंचि इत्तोर.

20 गानि पेन ओन, ‘अरे तेलिवि तक्को मनका, इय्याला नर्कळके नीवा जीवा होनानयते निमे संपादिस्तादंता बोन्क आयार?’ इंचि इत्ता.

21 बच्चोर पेद्दा सिरमंत मनकल अयना ओर पेनदा मुन्ने सिरमंतुड आयोर, बारित्ते ओर ओनाहाटीं आस्ति जमा कीतोर इंचि. ई वेसुडिते ई मनकना गति गुडा अल्हेन आता.”

रंदि कियामन्नि

(मत्तयाल 6:25-34)

22 पजा येसु ओना सिस्त्युल्लुकुं इल्हा वेहालय दलगतोर: “नना मीकु वेहनद बतल इत्ते, जीवा तिडिकन्ना मुक्केम, मेंदुल कपडीकन्ना मुक्केम आंदु. इंचि पिस्सनाहाटीं तिनकोम बतल, उनकोम बतल, इंका मेंदुलताहेंका केर्कोम बतल इंचेके रंदि कियमट.

23 बारित्ते तिडिकन्ना पिस्वर मुक्केम, कपडीकन्ना मेंदुल मुक्केम.

24 आ काकाहकुन हुळाट! अव वीतो आनि कोय्यो. अचोने आयका अवुनगा गुम्मिं इंका हिल्लें. अयना पेन अवुन पोस कीसंता. अदुनहाटीं मिमेट अयते आ पिट्टेंकन्ना बच्चोरो विल्ला मत्तोर आंदिर.

25 रंदि कीसि ओना आवसुन उंदि गंटा एक्को बेरसागोटतोर मीवा नड्डुम बोरन्ना मंतोरा? हिल्लोर.

26 इसंटा सिन्ना-सिन्ना कबाहके मिमेट किया परिर. अयते इंका मिगुल्ला कबाहकुना बारेमते मिमेट रंदि बारि कीतिर?”

27 “आ पूतनहेके हुळट अव बल्हा बेर्ससंतांगो! अव कबळ किय्यो, कपडिं इंका कुट्टो. नना वेहानद बतल इत्ते, सुलेमान राजाल वेल्लेन सिरमंत मंचिगुडा ओना कपडिं आ पूतानाल उंदि पूतातचोगुडा सोकु मनाहिल्लें.

28 अयते जाडि इय्याला मंता, नाडि तडमिते वेसि दांता. अयना आ जाडिके पेनबाबाल इच्चोन बेसता कपडिं हीतोर. अयते अवुंकन्ना बेसता कपडिं मीकु हिय्या परोरा रो, विस्वासम तक्को लोक्किरिटा?

29 अदुनहाटीं बतल तिदकोम, बतल उंडकोम इंचेके मिमेट रंदि कियमट. अल्हेने अवुन दोर्किचकुनाहाटीं गाबरगुडा आयमट.

30 दुनियातोर अंतोर लोक्कुकु इवनाहाटीं तनलाळसेक मनांतुर. गानि मीकु इव अन्नि गावाले इंचि मीवा पेनबाबांक एर्के मंता.

31 अदुनहाटीं मिमेट मुन्ने स्वर्ग राज्येमतुन आनि पेनदा नीतितुन पहकट. अस्के इव मीकु दोर्कनुं.”

आस्ति-पास्तिनपोरो विस्वासम इरमट

(मत्तयाल 6:19-21)

32 “अरे नावा सिस्युलकुनिटा, ‘मीवा पेनबाबाल ओना राज्येमतुन मीकु हियालय वेल्लेन कुसिते तयार मंतोर. अदुनहाटीं मोमोट वेल्ले मंदि हिल्लोम’ इंचि वेरियमत.

33 अय्ते मिमेट मिहगा मत्ता आस्तिनअंता अम्मिसि, गरिबोर्कुंक दान-दर्मम कीसि, बस्केने पडन आयाकोटा मनना कोलताना संचितुन दोर्किचकुंट. इंका मिमेट मीवाहाटीं स्वर्गमते दनम जमा कीम्ट.† अगा बोर दोंगलगुडा वायोर, दानकु सेदेलगुडा पिय्यो.

34 बारित्ते मीवा दनम बगा मत्ते अग्गेन मीवा मनसु मनंता.”

बस्केळकु तयार मंटु
(मत्तयाल 24:42-51)

35-36 “मरमिना कुळपुने होंचि वायना मालकुन एदुर हळसेक मनना सेवाकुलकुनलेसीं कबळ कियालय बस्केळक नडिकट्टु दोहचि तयार मंटु. अल्हे मीवा वेडसिन इंका बस्केळक एल्लिचचे इरांट. अल्हा मत्ते बतल आंता इत्ते, मालक वासि तल्पुन तंता तन्मडे तल्पु तेंडालय अल्कगा मनंता.

37 मालक वातस्के एदुर हळसेक तेल्चिते मत्ता सेवाकुलकु वेल्लेन आसिर्वाद दोर्कुंतोर आंदुर. नना मीकु निजम वेहासेक मंतन, मालक वासि अंतोर सेवाकुलकुन बेस उद्दा वेहांतोर. पजा नडिकट्टु दोहकुंचि ओरे सेवाकुलकुना सेवा कियालय तयार आंतोर.

38 मालक बस्के वायिना, इत्ते नडजाम नर्का आयि हिलाकोटें नडजाम नर्का दाटसि होतंका आयि वातस्के, बोर सेवाकुलकु अय्ते तेल्चिते मनांतुरो आ सेवाकुलकु वेल्लेन आसिर्वाद दोर्कुंतोर आंदुर.

39 गानि मिमेट उंदि पोल्ले बेस तेळियागोट्टुकुंट. अद बतल इत्ते, दोंगल बद वेलाक वांतोर इंचि ओक्कला लोता मालकुंक मुन्नेन तेळियसि मत्ते ओर तेल्चितेन मनांतोर आनि आ दोंगन लोते होळिया हिय्योर.

40 अल्हेने मिमेट इनकुनवा वेलाके मनकना रूपमते पुटतोन नना वांतन. अदुनहाटीं मिमेटगुडा बेस तयारते मंटु.”

दोका हिय्युवा सेवाकुनलेहका मंटु
(मत्तयाल 24:45-51)

41 अस्के पत्रु, “सामि, निमे ई वेसुडिं सिराप मावाहाटींगे वेहचंतिना, हिलाकोटें अंतोर हाटींगा?” इंचि पूसकींतोर.

42 अस्के सामि इल्हा इत्तोर: “मालक हिल्वस्के ओनगा कबळ कियानोर्कुंक वेलापोरें गाटो-जावा दोस्सालय, वरोर बेस तेल्विगल्लोड, विस्वासमलायक दिवांजि मालाकुंक गावाले. अय्ते असोंटा सेवक बोर मंतोर?

43 बोर सेवक अय्ते, मालक मल्सि वातस्के वेहता कबळ बरोबर कीसेक मनांतोर, ओरे सेवक बेस आसिर्वाद दोर्कुंतोर आंद.

44 नना मीक निजम वेहांतन. मालक आ सेवाकुन ओना पूरा आस्ति-पास्तिनपोरें अदिकारि इंचि इरंतोर.

45 गानि ओक्कला आ सेवकुडु, ‘नावा मालक वायालय अय्ते आल्सेमे मंता,’ इनकुंचि कळमता दासि मुरतळ, मांडसा सेवाकुलकुन तन्नुड-गुद्दुड कियमळ, इरगा तिंचि-उंचि बदमासिं कियमळ सुस्व कीतोर इनकुन!

46 अस्के आ सेवक विचारमगुडा किय्योर असोंटा रोजुने, गळियाते ओना मालक वायानुर. वासि, आ सेवाकुंक पेद्दा सिक्सा हीसि, ओन अविस्वासुल्क मनना जेगाते वाटसीयनुर.”

47 “बा सेवक अय्ते, ओना मालाकुंक बतल गावालेनो तेळियसिगुडा, मालक वेहताप केंजाकोटा, कियाकोटा मनांतोर, आ सेवक मात्रम वेल्लेन देब्बा तितोर.

48 गानि तेळियका बदो कबळ कीसि देब्बाना पाल आता सेवाकुंक मात्रम तक्को देब्बां आंतां. पेन बोर्कु अय्ते बेसता कबळ कियनाहाटीं वेल्लेन गुनम हीता ओराहेकटाल वेल्लेन लेक्का तल्कंता. अल्हेने बोन्क अय्ते एक्को अप्पजेपता, ओनहेकटाल अप्पजेपता दानकनना एक्कोने तल्कंता.”

येसुना पोल्ले पीसि ताकानोर्क तकलिप वांता
(मत्तयाल 10:34-36)

49 “नना ई बूमिते लोकुलकुनपोरें तळमितसोंटा न्यायम कियालय वातन. अद इंदकेन अंटुकुंचि मत्ते बच्चोनो बेस आयवड इंचि इनकुत्तन.

50 गानि नाकु उंदि कस्टालकुना बापतिस्मा‡ एतानद मंता, अद एतनदाका नाकु तिप्पल्क तप्पो.

51 नना इद बूमिपोरें सांति हियालय वातन इंचि मिमेट इन्कुंचितिरा? हिल्ले. नना अदुनहाटीं वाया हिल्लेन. गानि मीकुन वेरे-वेरे कियालय वातन इंचि नना मीकु वेहासेक मंतन.

52 इंदकेटाल बदन्ना उंदि लोते हेय्युर मत्ते, ओरद ओर्के अर्राका इव्वुर उंदि पक्काक, मुव्वुर इंकुंदि पक्काक आसि वेरे आंतुर.

53 अल्हेने मर्रिनद बाबोनतोनि-बाबोनद मर्रिनतोनि, मिय्याटद तल्लुनतोनि-तल्लुनद मिय्यळतोनि, कोळियाटद पोरळतोनि-पोराटद कोळियळतोनि अर्राकोटा आंता.”

वेलातुन एरपाट कियमळ
(मत्तयाल 16:2-3)

† 12:33 स्वर्गमते दनम जमा कीम्ट इत्ते मीवा दनमतुन पेनदा कबळहाटीं आनि बेस कबळहाटीं कर्स कीम्ट इंचि अर्तम. ‡ 12:50 कस्टालकुना बापतिस्मा इत्ते येसु ओन्क मुन्ने वायना हामुरता बारमते वेहचंतोर. बारित्ते बापतिस्मा येतनेके एते मुळगिसि तेदंतुर, अल्हेने येसुक कस्टालकुने अर्रांनद मंता.

54 पजा ओर मंदिक इल्हा वेहतोर. “मब्बु तेर्पेन पोळ्द अरनहेके ह्ळसि मिमेट, ‘अद हुळट, पिर्न वासेक मंता,’ इंचि वेहकुंतिर. अल्हेन आंतागुडा.

55 इंका होव्वोर वळि वायनद ह्ळसि, ‘इंदके गर्मी अरंता’ इंचि इतिर. अल्हे आंतागुडा.

56 अरे डोंगिरिटा, मीकु बूमि, मब्बुना रूपाल्कु एरपाट किया वांता. गानि इद वेलाते बतल जर्गसंता इदुन मिमेट बारि एरपाट कीसेक हिल्लिर?”

पगातोनतोनि बेस कलियसि मनना
(मत्तयाल 5:25-26)

57 “असल बेस न्यायम बद आंद, अद मीवद मिमेटे बारि निरनायम किया परसाहिल्लिर?

58 निमे नीवा पगातोनतोनि कलियसि कोरटते मजिस्टरनगा होननेके हरदेन ओनतोनि बेस संबंदम कल्पुकुन. अल्हा कियाकोटे नीकुन नीवा पगातोर कोरटते मजिस्टरंक अप्पजेपनुर. मजिस्टर नीकुन पोलिसुल्कुंक अप्पजेपनुर, पोलिसुल्क ओसि नीकुन जेलने वाटानुर.

59 नना नीकु निजम वेहांतन, कोत्तक-कोत्ता दोहनदाका निमे अगटाल पेयसा परिंन,” इंचि वेहतोर.

13

पापमताल मनसु मार्सकुंदु

1 अदे वेलाते अगा मत्ता लोकुकुनाल इच्चुर लोकुल्क वासि येसुकु, “गालिल एरियाता इच्चुर मनकालोर गुळिते मोक्कु हीसेक मननेके पिलातुस ओना सिपाइल्कुन लोहचि ओर्कुन हक्का वेहतोर. आ सिपाइल्क ओर्कुन गुळितेन हक्कतुर. इल्हा पिलातुस ओरा नेत्तुरतुन मनम मोक्कु हियना नेत्तुरते कल्पतोर,” इंचि वेहतुर.

2 अस्के येसु ओर्कु इल्हा जवाब हीतोर, “गालिल एरियाताल वाता ई मनकालोर्कुंक इसंटा हामुर वाता अयते, ई मनकालोर गालिल एरियाता वेरे मनकालोर्कुंकन्ना एक्को पापम कीतुर इंचि मिमेट इन्कुंचतिरा?

3 नना वेहासेक! अल्हा बिलकुले आयो. गानि पापमताल मनसु मार्सकुंचि पेनदाहेके तिरियाकोटे मिमेटगुडा ओरालेसीगे हासि नासडेम आंतिर.

4 सरे इंदके वेहाट! सिलो इनना गोपुरम* कूलसि अरताहेका पद्देनमिदि मंदि मनकालोर हातुर. अयते ई गोपुरम कूलता वेलाते येस्सलेमते मत्ता वेरे मनकालोर्कुंकन्ना हासोत्ता ई पद्देनमिदि मनकालोर एक्को तप्पु कीतुर इंचि इन्कुंचतिरा?

5 हिल्ले. नना मीकु वेहनद बतल इत्ते, पापमताल मनसु मार्सकुनाकुंटे मिमेट अंटोरगुडा ओरालेसीगे हासि नासडेम आंतिर.”

कबळक ओज्जुवा मरा

6 ओर्कु बेस तेळियनाहाटी पजा येसु इंकुंदि वेसुड वेहालय सुख कीतोर. “वरोर मनकल ओना अंगुर तोटाते उंदि अंजिर मरा वाटतोर. उंदि रोज अद मरा कायां हादतना, हादा हिल्लेना, इंचि ह्ळालय होत्तोर, गानि अदुंक कायां हादासि मनाहिल्ले.

7 अस्के आ मनकल ओना तोटाते कबळ कियना जीतागानकु, ह्ळ, ई अंजिर मरा कायां हादता बारे इंचि नना मूड वर्सानाल इगे दीन ह्ळालय वासंतन, गानि दीनकु बस्केने उंदि काया इंका नाकु दिसा हिल्ले. इसंटा मरातुन ईर्सि बता पायदा? नर्किसि पोहा, इंचि वेहतोर.

8 अस्के आ जीतागाड, मालक, ई उंदि वर्सामेड मन्निकांटी. नना दीन सुट्टु तव्बिस बेस एरवु वाटंतन.

9 अस्केनना हादते सरे, हिलाकोटे नर्किसि पोहा वचु,” इंचि इत्तोर.

नोमकेम रोजुननाड येसु उंदि मुरतादुन बेस कीतोर

10 उंदि नोमकेम रोजुननाड येसु उंदि दर्मसास्त्रम कराहना लोते कराहसेक मत्तोर.

11 देय्यम पीताहेका पद्देनमिदि वर्सानाल बिमार अर्सि मत्ता उंदि मुरतळ अगा मत्ता. दाना नळि वंकर आसि गूनि पेय्सि मत्ताहेका दान्क बेस नित्ता वायाकोंदु.

12-13 येसु दान ह्ळसि ओना दग्गेर्क केयतोर. केय्सि, “बाई! निमे नीवा रोगमताल पलाते अरतिन,” इंचि, पजा दाना तल्लापोर्री कय इरतोर. कय इरता इरमळे अद बेस नित्तिसि पेनदुन तल्सकुनालय दल्गता.

14 बिमार मत्ता मुर्तादुन नोमकेम रोजुननाड येसु बेस कीताहेका दर्मसास्त्रम कराहना लोता अदिकारिक इरगा होंगु वाता.† अस्के ओर लोकुकुन, “कबाहक कियालय उंदि वारमते हारं रोजकु मंतां गदा! अयते आ रोजकुने वासि मिमेट मीवा बिमारकुनाल बेस आम्दु, गानि नोमकेम रोजुननाड वासि आयो,” इंचि इत्तोर.

15 अस्के सामि जवाबुने ओर्कुन, “अरे डोंगि लोकुरिटा, नोमकेमनाडु मीवावेटाल हरेक मनकल कोंदातुन आयि गाडदितुन आयि लेहाकुंचि एर उहालय ओयिरा?

16 अयते पद्देनमिदि वर्सानाल पेद्दा देय्यम पीसि मत्ता अब्राहामुना वंसमता ई मुरतादुन, नोमकेम रोजुननाड बेस कीति इव्ठे तप्पु बतल मंता?” इंचि इत्तोर.

* 13:4 गोपुरम इत्ते उंदि एतुंक एतु मत्ता मिद्दे आंद. † 13:14 नोमकेम रोजुननाड बतले कबळ कियमळ हिल्ले. इंका उंदि मुर्तादुन बेस कियमळगुडा ओर्कु उंदि कबळ अनपिस्ता. अदुनहाटी आ अदिकारिक होंग वाता.

17 येसु वळकुता ई पोल्लें केंजसि बोर लोकुलक अय्ते ओना विरोदमते मत्तुरो, ओर्क अंटोर्क सिग्गु वाता. गानि येसु कीता इचंन्रम आयना कबाहकुन हळसि लोकुलक मात्रम इरगा कूस आतुर.

पेनदा राज्येम बल्हा मनंता?

(मत्तयाल 13:31-33; मरकुस 4:30-32)

18 पजा येसु इल्हा वेहतोर. “पेनदा राज्येम बल्हा मनंता? नना दान बदुनलेहका मंता इनकन?

19 पेनदा राज्येम आवाल्कुना उंदि पेडेतसोंटद आंद. आ पेडेतुन बोरो वरोर मनकल ओसि ओना तोटाते वीततोर. अद मोलियसि, बेस्सि पेद्दा मरा आता. अस्के परियना पिट्टें दाना पंगांक गूडां दोहकुत्तां.”‡

20 येसु मरा इल्हा इतोर. “पेनदा राज्येमतुन नना बदुनलेहका मंता इंचि इनकन?

21 अद पुल्लटा पिडितसोंटद आंद. बदो उंदि मुरतळ पुल्लटा इच्चुर पिडितुन मूड तव्वना पिडिते कल्पता. अस्के आ पिडिअंता पुल्लगा आता,” इंचि वेहतोर.

इर्कुटोम हर्रि

(मत्तयाल 7:13-14,21-23)

22 येसु येस्सलेम होननेके वेल्लेन नाहकुने, सहरकुने होंचि अगाटा लोकुलकुंक पेनदा पोल्लें कराहसेक होत्तोर.

23 अस्के बोरो वरोर मनकल येसुन, “सामि, पापमताल मुक्ति इच्चुर मंदिके दोर्कतना?” इंचि पूसकीतोर.

24 अस्के येसु ओन्क इल्हा वेहतोर. “मिमेट बस्केळ्ळ इर्कुटोम मत्ता हरदाल होळियालय इरगा कोसिस कीम्ट. S नना वेहानद बतल इत्ते, आ हरदाल वेल्ले मंदि होळियालय हळांतुर गानि ओर होळिया पस्.

25 लोता मालक तेदसि उंदि मल्का तल्पु वाटानय्ते मिमेट पलाते नित्तिसि तल्पुन टोक-टोक कीसेके, ‘सामि मावाहाटी तल्पु तेंडा,’ इंचि इंदकिर. गानि, ‘मिमेट बगाटाल वातिर? नना मीकुन एरपाट किय्योन,’ इंचि ओर मीकुन इंतोर.

26 अस्के मिमेट, ‘नीवातोन कलियसि मोमोट तित्तोम, उट्टोम. इंका निमे मावा नाटे वासि माकु बजारकुने पेनदा पोल्लें कराहतिन,’ इंचि इंदकिर.

27 गानि ओर मात्रम, ‘नना मीकु वेहासेक मिमेट बगाटाल वातिरो, बोर आंदिरो नना मीकुन एरपाट किय्योन. अरे सेड्डा कबाहक कियानोरिटा, मिमेट इगोटाल पेय्सि होंटु,’ ” इंचि इंतोर.

28 “पेनदा राज्येमते अब्राहाम, इसाक, याकोब अल्हेने पेनदा कबुरतोर अंटोर्कुन मिमेट हळांतिर, गानि मीकुन मात्रम अगटाल, पेन पलाते हीकटते वाटसीता. अगा सिराप अळमळ, पल्कु कोर्कमळे मनंता.

29 अस्के उत्तर-दक्सिनताहेंदाल, पोळ्द पेयसनाहेंदाल, पोळ्द अर्रीनाहेंदाल लोकुलक वासि, पेनदा राज्येमते उद्दानुर.

30 गानि हळाट! मुन्ने मत्तोर इच्चुर पज्जो आयानुर आनि पज्जो मत्तोर इच्चुर मुन्ने आयानुर.”

येस्सलेमते येसुंक हामुर वांता

(मत्तयाल 23:37-39)

31 अच्चोटेन इच्चुर परिसिल्क वासि येसुन, “नीकुन अंतिपस हेरोद राजाल हळ्कालय हळसंतोर, निमे इगोटाल बद्दना वेर जेगाते पेय्सि होन,” इंचि इत्तुर.

32 अस्के येसु ओर्क इल्हा वेहालय दलगतोर. सरे! मिमेट होंचि आ नक्काकु वेहट गदा, इय्याला नाडि नना देय्याल्कुन पेचाहसि गेदमंतन, बेस हिलवोर्कुन बेस कीतन, मन्ने नावा कबाटुन महांतन.

33 अयना येस्सलेम सहरता पलाते वरोर पेनदा कबुरतोंक हामुर वायमळ बेस आयो. अदुनहाटी इय्याला, नाडि, मन्ने नाकु ताकसेकेन मना पीता.

34 ए येस्सलेमतोरिटा, ए येस्सलेमतोरिटा! मिमेट पेनदा कबुरतोंकुन हळ्कानोर आंदिर, इंका पेन मिहगा लोहचीतोर पोरो मिमेट बंडां हुक्कानोर आंदिर. कोर्क दाना पीसेन रेक्काना हिळु बल्हा जमा कीतनो, अल्हेन ननागुडा मीवा पिलाल्कुन जमा कियना इंचि बच्चुंगो मल्कां कोरतन. गानि मिमेट मात्रम कोराहिल्लिर.

35 हळा, मीवा लोन मीहाटी कुल्ला होळ्ळसमळ जर्गता. नना मीकु वेहानद बतल इत्ते, सामिना पोरोलते वायानोर आसिर्वाद दोर्कतोर इंचि बदवेरदाका अय्ते मिमेट इन्निरो अदवेरदाका नाकुन मरा हळिर, इतोर.

14

येसु वरोर परिसिना लोन दांतोर

1 उंदि नोमकेम रोजुननाड येसु परिसि अदिकारिल्कुनाल वरोर अदिकारिना लोन गाटो तिनालय होत्तोर. अगा मत्तोर अंटोर लोकुलक येसुन बदन्ना पोल्लेते दोर्का पियालय ओनहेके बेस हळसेक मत्तुर.

2 अगा येसुना मुन्ने वरोर काल्क-कय्क तोयाना बिमार मत्ता मनकल मत्तोर.

‡ 13:19 इस्राएल देसेमते आवाल्कुना मरा पदि पृटकु एत्तु मनंता. S 13:24 येसु पेनदा राज्येमते होळियाना बारेमते वेहचंतोर. दीना अर्तम बतल इत्ते अगा होळियमळ वेल्लेन कस्टम.

3 अस्के येसु, “नोमकेम रोजुननाड बिमार मत्तोर्कुन बेस कियमळ दर्मसास्त्रम परकारम बेसा, बेस आयोना?” इंचि मूसाना नियम बेस तेळियतोर्कुन आनि परिसिल्कुन पूसकीतोर.

4 गानि ओर बतले वळकाकोटा चुपचाप मत्तुर. पजा येसु आ तोयसि मत्ता मनकनपोर्री कय ताससि ओन बेस कीसि, अगटाल होना वेहतोर.

5 पजा, “मिहागटाल बोनादन्ना गाडदि आयि कोंदा आयि नोमकेम रोजुने कुहिते अरते, अदे रोजुने दान बिराना कुहिताल तेंडिरा?” इंचि येसु ओर्कुन पूसकीतोर.

6 अयना ओर मात्रम येसुंक जवाब हिया पराहिल्लुर.

बस्केळक सिन्नागासि मनना

7 पजा अगा बोजनमहाटी वाता मनकालोर्कु, पेद्दा मनकालोर उद्दाना जेगां पहकिसि उद्दालय हळंदुर. अदुन हळसि येसु ओर्कु इल्हा वेहतोर.

8 “बोरन्ना मीकुन मरमिने गाटो तिनालय केयतस्के मिमेट होंचि पेद्दा मनकालोर उद्दाना जेगाते उदमट. बारित्ते मीकुन बोर मनकल अयते केयतोर ओर मीकन्ना एक्को कदर मत्ता मनकनगुडा केय्से मनानुर.

9 पजा मीकुन इव्वुर्कुन केयता आ मनकल मिहगा वासि, ‘निमे उद्दिदिसि मनना जेगाते ईन उद्दाहीम’ इंचि मीकुन अगटाल तेहानुर. अस्के मीवद सिग्गु होंचि अंतोरा मुन्ने सिन्नाल्क उद्दाना जेगाते होंचि हिळु उद्दा पीता.

10 अदुनहाटी बोरन्ना मीकुन गाटो तिनालय केयंतोर अस्के मिमेट होंचि, सिन्नाल्क उद्दाना जेगाते हिळु उद्दिदिसि मंटु. बस्के अयते मीकुन केयता मनकल वासि मीकुन, ‘दादा, इगटाल तेदसि आ बेसता जेगाते होंचि उद्दा,’ इंचि वेहनुर अस्के मीवातोनि कलियसि गाटो तिनना अंतोर हेडमितोरा मुन्ने मीकु बेस कदर दोकार.

11 बारित्ते, बोर अयते ओनद ओरे ‘नना पेद्दोन’ इंचि वेहकुंतोर, ओन पेन सिन्ना किय्यार आनि बोर अयते ‘नना सिन्नोन’ इंचि वेहकुंतोर, ओन पेन पेद्दा किय्यार.”

मीकु इनाम दोर्कता

12 पजा येसुन बोर अयते केयतोर ओर मनककगुडा येसु उंदि पोल्ले वेहतोर. “निमे नर्का-पिय्यल बस्के बोजनम हिय्यिना आ बोजनमते नीवा दंटागाहकुन, नीवा दादल-तम्मुहकुन, जीवातोर-हेडमितोर्कुन, मीवा पक्का लोहकुना सिरमंत लोकुल्कुन केयुमा. ओर्कुन केयते, निमे ओर्कुन केयताप ओरगुडा नीकुन केयांतुर, इल्हा नीवा बाकि *तीरंता.

13 ओर्कुन केयनदानकन्ना निमे गरिबोर्कुन, गुड्डोर्क-गूनोर्कुन, ताका परवोर्कुन केया.

14 अस्के नीवा बाकि तीरसालय ओर नीकु बतल हिया पर्र. गानि पेनदा नदरते नीतिमंतुल्क मत्तोर हासि मर्रा जीवाते तेदतस्के पेनदाहेंदाल नीकु नीवा इनाम तप्पाकोटा दोर्कता.”

उंदि पेद्दा बोजनमता वेसुड

15 येसु इत्ता आ पोल्लेतुन केंजसि, उद्दिदिसि गाटो तिनानोरावटेताल वरोर मनकल येसुन, “पेनदा राज्यमते उद्दिदिसि बोजनम कियना मनकल आसिर्वाद दोर्कुंतोर आंद,” इंचि इत्तोर.

16 अस्के येसु वेसुडिते इल्हा वळकालय दल्गतोर. वरोर मनकल पेद्दा कुळपु इसि आ कुळपुंकु वेल्लेन मंदितुन केयतोर.

17 कुळपु तयार आतस्के, अन्नि तयारि आतां, बोर्कुन अयते केयतोम आ मनकालोर्कुन केय्से तराहोंटु, इंचि आ मालक ओना दासुन लोहतोर.

18 गानि ओर अंतोर इल्हा विनंति कियालय दल्गतुर. मोदाला कलियतोर, नना उंदि पूना पोलम अस्तन, नाकु दान हळापीता, निमे बतल इनिना बेसे, नना वाया पर्रीन, नाकुन मापि कीम इत्तोर.

19 इंकावरोर, नना हेय्युं जोडिं कोंदां अस्तन, अव बल्हा कबळ कींतगों नाकु अवुन हळापीता. नाकुन मापि कीम, नना वाया पर्रीन, इत्तोर.

20 मर्रा इंकावरोर, नना इंदकेन मरमिं आतन, नना वाया पर्रीन, इत्तोर.

21 अस्के आ दासुड मल्सि वासि जर्गुतद अंता ओना मालकुंक वेहतोर. अस्के मालकुंक इरगा होंग वाता. पजा ओर ओना दासुंक इल्हा वेहतोर. निमे बिराना सहरता हर्कुन पीसि, मूला-मूलाक होंचि गरिबोर्कुन, गुड्डोर्क-गूनोर्कुन, कुंटोर्कुन इगे केयकुंचि वा, इत्तोर.

22 अस्के दासुड मालक वेहतापे कीतोर. पजा मर्रा मल्सि वासि मालकुंक इल्हा वेहतोर. मालक, निमे वेहतापे नना होंचि केय्से तत्तन. अयनागानि इंका वेल्लेन जेगा मिगिल्सि मंता, इत्तोर.

23 अस्के मालक दासुंक इल्हा वेहतोर. “निमे रोडकुन पीसि, हर्कुन पीसि होंचि लोकुल्कुन बतिमलाडसि पीसि वा. नावा लोन पुरागा निंडिसि मनगोम अचोने.

24 नना मीकु निजम वेहचंतन, नना मुन्ने केय्से मत्ता वरोर मनकलगुडा नना हीता बोजनमता रुसि हळा पर्र, इंचि इत्तोर.”†

पिलान परकारम पिस्वर मनना

* 14:12 स्नम बाकि. † 14:24 इद वेसुडिते येसु बोजनम इरता मनकन पेनदालेसी हुप्संतोर. आनि बोजनमतुन बारे पेनदा राज्यमलेहका हुप्संतोर.

25-26 येसुनतोनो वेल्लेन मंदि लोकुलक ताकसि वासेके मत्तुर. अस्के येसु ओराहेके तिरियसि इल्हा वळकालय दलगतोर: “नहगा वांतन इंचि इनकुत्तोर बोरन्ना आयिर, ओर ओना यावन-बाबान, मुत्तो-पिलालकुन, तम्मुर-तादन, अक्कल-हेलाहकुन, इंका ओना जीवातुन एक्को पावरम कीते, ओर नावा सिस्युड आया परोर.

27 अचोने आयका बोर अयते ओना सतता कूस पीसिः नावा पज्जो वायोन इंतोर, ओरगुडा नावा सिस्युड आया परोर.”

28 “मीवावटेताल बोरन्ना आयिर, उंदि एत्तुंक एत्तु मिद्दे दोहंतन इनकुत्ते, ओर मोदाला आरामते उद्दिदसि इद मिद्देतुन दोहालय बच्चोन वेल्ले कर्च वायार? इंका बतल-बतल अयते गावालेनो, अव अन्नि मंतंगां मरि हिल्लेंगां? इवुना बारेमते विचारम किय्योरा? कीतोर.

29-30 ओक्कला अल्हा कियार्कोटे ओर पायवा अयते दोहंतोर गानि मिद्देता कबळ मात्रम पुरागा किया परोर. असोत्स्के अदुन हळतोर अंतोर ओन कारेड्डालक कीसेके, अद हळट रो! ई मनकल मिद्दे दोहालय अयते सुस्व कीतोर गानि पुरागा दोहा पराहिल्लोर, इंचि इंतुर.”

31 “हिलाकोटे, ‘नना पदि वेय्कुना सिपाइलकुन पीसि इरवै वेय्कुना मदि सिपाइलकुन गेल्ला परांतना?’ इंचि गिच्चोगुडा विचारम कियार्कोटा लडाइ कियालय दांतोर! असंतोर बोरन्ना राजाल मंतोरा?

32 ओक्कला अल्हा कीते आ राजाल बोनतोनो अयते लडाइ कियानद मंता, ओना सिपाइलक लक्कु मननेके इच्चुर विस्वासमता सिपाइलकुन एदुर लोहचि सांति-समादानम कियना विचारम कीतोर.

33 इल्हेने मीवावटेताल बोरन्ना आयिर, मिहगा मत्तव अन्नि आस्ति-पास्तिन होळसोन इंतोर, ओर नावा सिस्युड आया परोर.”

रुसि हिलुवा होव्वोर

34 “होव्वोर बेसे मनंता गानि होव्वोर, होव्वोर रुसि वायार्कोटे, अब्बे मर्रा बल्हा होव्वोर रुसि तरा परांतोम?

35 असंटा होव्वोर तोळिते कल्पालयगुडा ओज्जो, एरवुहाटीगुडा ओज्जो. अद सिराप पलाते पोहचियालये ओज्जंता. बोर्कु केंजालय केव्व मंतां ओर केंजट.”

15

तप्सोत्ता गोरेंता वेसुडि

1 उंदि रोज कर वसुल कियानुर आनि पापि लोकुलक येसुना पोल्ले केंजालय ओनगा जमा आतुर.

2 जमा आतद हळसि, परिसिल्लुकु आनि दर्मसास्त्रम कराहना गुस्लक येसुन, “ई मनकल पापि लोकुलकुन दग्गेर्क केय्सि उपसंतोर अल्हेने ओरतोनो कलियसि गाटोगुडा तितोर,” इंचि गुल्गसेक इतुर.

3 ओर इनानद केंजसि येसु ओर्क उंदि वेसुडि वेहतोर.

4 “मी लोप्पोटाल वरोनगा नूर गोरें मंतां इनकुट्ट. अवुनाल उंदि गोरें तप्पिस होनानयते, कळमता टोबै तोम्मिद गोरेंन अग्गेन मंदा वाटसि, तप्सोत्ता आ उंदि गोरें दोर्कनदाका दान पहकालय होन्नोरा?

5 पजा अद गोरें दोर्कतस्के, ओर वेल्लेन कूस आसि दान हट्टापरोर वाटकुंचि पीसि वांतोर.

6 वासि, दंटातोर्कुन, लोता पक्कातोर्कुन केय्सि, ‘नावा तप्सोत्ता गोरें नाक दोर्कुता, नावातोनो कलियसि आनंदम कीम्ट,’ इंचि इंतोर.

7 नना मीक वेहानद बतल इत्ते, बोर्क अयते मनसु मार्सकुनना अब्सरम हिल्ले, असोटा टोबै तोम्मिद मंदि नीतिमंतुलकुना बारेमते आयना आनंदमकन्ना, वरोर पापि मनकल मनसु मार्सकुत्ते ओनाहाटीं स्वर्गमते बच्चोरो आनंदम आंता,” इंचि वेहतोर.

कोत्ताना वेसुडि

8 “मर्रा उंदि वेसुडि वेहांतन केंजाट. उंदि मुरतटगा पदि एंडि कोत्तां मत्तां. आ पदि कोत्तानाल उंदि कोत्ता बगानो अरसि होत्ता. अस्के अद मुरतळ सिमलि निरिच्चि, लोनअंता हेय्सि आ कोत्ता दोर्कनदाका पहकंता.

9 पजा अद कोत्ता दोर्कतस्के, दाना दंटातवुन, लोता दग्गेटवुन केय्सि, ‘नावद बगानो अरसोत्ता कोत्ता दोर्कुता, मिमेट नातोनो कलियसि आनंदम कीम्ट,’ इंचि इंता.

10 नना मीक वेहांतन, इदुनलेसीगे वरोर पापि मनकल ओना पापमताल मनसु मार्सकुत्ते ओनाहाटीं स्वर्गमते पेन दाना दूतानतोनो आनंदम कींता,” इंचि इत्तोर.

लोताल पेय्सि होत्ता मर्रिना वेसुडि

11 येसु इंकुंदि वेसुडि वेहतोर. “वरोर मनकंक इव्वुर मर्क मत्तुर.

12 उंदि रोजु सिन्ना मर्रि ओना बाबोन, बाबा, संपत्तिताल बच्चोन नावा पालु मंता, अद नाकु पंचि हीम, इत्तोर. इत्तस्के ओना बाबो संपत्तितुन इव्वुर मर्कुंक पंचि हीतोर.”

13 “कोन्नि रोजकुना पजा, सिन्ना मर्रि ओना पालुंक वाता संपत्तितुन बोत्तिगा पीकुंचि, बेकेनो लक्कु देसेम पेय्सि होत्तोर. अगा होंचि बोगम कबाहकुने ओना संपत्तितुन नासडेम कीतोर.

14 ओनगा मत्तव अंता मारतस्के आ देसेमते पेद्दा करवु अरता, ओनगा बतले हिलाकोटा आता.

- 15 अदुनहाटीं ओर आ देसेमता वरोर मनकनगा जीतम मत्तोर. आ मनकल ओना पोलाल्कुने पदिदं मेहालय ओन लोहचीतोर.*
- 16 पजा ओर पदिदं मेयाना मेतातुन तिचि पीर निहकन बारे इंचि इनकुंदुर, गानि अद मेता इका ओनकु बोरे हिय्या हिल्लुर.”
- 17 “अस्के ओनकु लोता मति वाता, नावा बाबानगा बच्चुरो जीतागाहक मंतुर, ओर तित्ते मारवच्चोन गाटो अगा मंता, गानि नना बारे इगे कर्वुक हासेके मंतन.
- 18 नना ई देसेम होळसि, नावा बाबानगा मल्सि दांतन. होंचि, ‘बाबा, स्वर्गमता पेन आनि नीकु विरोदमते नना पापम कीतन.
- 19 इंदके नना नीवा मरिन लायक हिल्लेन गानि निहगा नाकुन नीवा जीतागानलेसी ईरकुन इंचि इंतन,’ इल्हा इंतन, इनकुत्तोर.
- 20 पजा ओर अगटाल ओना बाबोनहेके पेयसतोर. पजा ओर ओना बाबाना लोतुक वेल्लेन लक्कु मत्तोर अस्के ओना बाबाल ओन हळतोर. मरिन हळसि बाबोंक वेल्ले पापम अनपिस्ता. अदुनहाटीं ओर एदुर वितसि होंचि ओन चातिक अदमुकुचि बुरतोर.
- 21 अस्के मरि बाबोन, ‘बाबा, स्वर्गमता पेन आनि नीकु विरोदमते नना पापम कीतन. इंदके नना नीवा मरिन लायक हिल्लेन,’ इत्तोर.”
- 22 गानि बाबाल ओन लोन तच्चि, जीतागाहकुनतोनि, बिराना होंचि बेसता कपडिं तच्चि इनकु केरहट, ईना वेल्लुक उंदि मुद्दा दोस्सट, काल्कुंक हेरपुहक केरहट.†
- 23 अल्हेने बेस बल्सता कुरांतुन तच्चि कोय्यट, अदुन तिचि मनम कूस आकोम.
- 24 बारित्ते, नावा मरि नहागटाल वेल्लेन लक्कु होंचि हासोत्ताप मत्तोर, इंदके ओर मल्सि वातोर. तप्सोंचि मत्तोर गानि इंदके दोर्कतोर, इंचि इत्तोर. इल्हा ओर कूस आयालय दलगुतुर.

पेद्दा मरि होंग आंतोर

- 25 “पजा बतल आता इत्ते, ओना पेद्दा मरि नेदहेके होंचि मत्तोर. ओर नेदाल लोन वायानेके लोता दग्गेरा एवतोर अस्के ओन्क पाटां पारानद, एगरानद अल्किर केंजावाता.
- 26 केंजा वातस्के ओर वरोन जीतागान केय्से, लोन बतल जर्गुसंता? इंचि पूसकीतोर.
- 27 अस्के आ जीतागाड, ‘नीवा तम्मुर बेस मल्सि वातोर. अदुनहाटीं नीवा बाबाल, बेस बल्सता कुरांतुन कोय्या वेहातोर,’ इंचि इत्तोर.”
- 28 “इद पोल्ले केंजसि पेद्दा मरिंक इरगा होंग वाता. ओर लोप्पो होळियोन इंचि पलातेन मत्तोर. अस्के ओना बाबाल पलाते वासि, ओन समजांचलय दलगुतोर.
- 29 गानि पेद्दा मरि बाबोन, इच्चुं वर्सानाल नना नीवा सेवा कीसेके वातन, नीवद बद्दे आदेसतुन नना नेम्हा हिल्लेन. गानि नावा दंटातोरतोनि कलियसि कूस आयालय, नाकु निमे बस्केन उंदि एटि पोरिनगुडा हिया हिल्लिन.
- 30 गानि नीवा ई मरि, नीवा संपत्तितुन बोगम कबाहकुने पूरा नासडेम कीतोर, ओनाहाटीं निमे बेस बल्सता कुरांतुन कोय्या वेहतिन, इंचि इत्तोर.”
- 31 “इत्तस्के ओना बाबाल, नावा पेडा, निमे बस्केळकु नावातोनि मनांतिन, नहगा बतल-बतल अयते मंता, अद अंता पूरा नीवादे आंद.
- 32 गानि ईर नीवा तम्मुर वेल्लेन लक्कु होंचि हासोत्ताप मत्तोर, इंदके पिस्सि मल्सि वातोर. तप्सोंचि मत्तोर गानि इंदके दोर्कतोर. अदुनहाटीं मनम कूस आयमळ गावाले इत्तोर.” इल्हा वेहचि येसु वेसुडि वेहमळ महतोर.

16

उसार दिवांजि

- 1 पजा येसु सिस्युल्कुंकगुडा वेहालय दलगुतोर: “वरोर सिरमंत मनकल मत्तोर. ओनगा वरोर दिवांजि मत्तोर. सिरमंत मनकानगा बोरो लोकुल्क वासि, ‘नीवा दिवांजि नीवा दनमतुन नासडेम कीसंतोर,’ इंचि वेहातुर.
- 2 अस्के सिरमंत मनकल दिवांजिन केय्से, ‘नीवा बारेमते इल्हा बारि केंजसेक मंतन? इंदके नीकुन दिवांजि कबळते ईरा परीन, निमे इच्चुं रोजुक कीता कबाटद पूरा इसाब हीम,’ इत्तोर.
- 3 इत्ता पजा आ दिवांजि, ‘इंदके नना बतल कीकन? नावा मालक अयते नाकुन कबळ पोरोटाल तेंडसंतोर. इंदके नहगा कास्तकरि कबळ कियानच्चो बलम हिल्ले आनि बिच्चम तल्कालय नाकु सिग्गु वांता,’ इंचि विचारम कियालय दलगुतोर.
- 4 ‘नाकुन दिवांजिता कबाटाल तेंडिना गानि लोकुल्क ओरा लोहकुने केयमळ गावाले इत्ते नना बतल कियगोमो अद नाकु तेळियता,’ इंचि इनकुत्तोर.
- 5 इनकुचि सिरमंत मनकंक बोर अयते बाकि मत्तुर, ओर्कुन वरोन-वरोन केयतोर, केय्से वरोन पूसकीतोर, ‘निमे मालकुंक बच्चोन बाकि मंतिन?’
- 6 ‘नालुं वेय्कु लीटर्क जयतुन निय बाकि मंतन,’ इंचि इत्तोर. इत्तस्के दिवांजि ओन, ‘इद पीम नीवा काता बुक आनि बिराना दीन रोंड वेय्कु लीटर्क रासा,’ इंचि इत्तोर.

* 15:15 यहूदि लोकुल्क पदिदं मेहमळ इत्ते अंतोर्कनना सिन्नातनम इनकुंदुर. अल्हेने पदिदन इत्ते, अबुना हब्बिन तित्ते मुट्टुळ इनुंदुर. † 15:22 बाबो मरिंकु, ओना अदिकारम आनि कदरतुन मरि हीतोर. इदुन हुप्पालय वेल्लुक मुद्दा दोसतोर, काल्कुंक हेरपुहक केराहतोर.

7 मर्रा इंकावरोन, 'निमे बच्चोन बाकि मंतिन?' इत्तोर. ओर, 'नूर गिद्रुं गोहकु हियना मंतन,' इंचि इत्तोर. इत्तस्के ओन इंका, 'इद पीम नीवा काता बुक! इवने एनबै गिद्रुं रासा,' इंचि इत्तोर.

8 "पजा सेड्डा कबाहक कियाना दिवांजि तेल्विते कीता कबाहकुन आ सिरमंत मनकल हळसि, 'निमे उसार मंतिन' इंचि ओन इत्तोर. इल्हेने पेनदा लोकुकुकुन्ना एकको, पेनदुन एरपाट कियुवा दुनियाता लोकुकल वरोंक-वरोर हियमळ-एतमळते वेल्ले तेल्विते मनांतुर.

9 नना वेहानद बतल इत्ते, इद दुनियाते मिमेट संपलिच्छा दनमतुन कर्च कीसि, दंतातोर्कुन दोर्किचकुंटु, बारित्ते अद दनम बस्के अय्ते मारंता अस्के, बस्केळक मनना लोहकुने मीक जेगा दोर्कता.

10 "सिन्ना पोल्लेतेगुडा बोर अय्ते विस्वासमलायक मंतोर ओर पेद्रुदा पोल्लेतेगुडा विस्वासमलायक मंतोर. अल्हेने बोर अय्ते सिन्ना पोल्लेतेगुडा विस्वासमलायक हिल्लोर ओर पेद्रुदा पोल्लेतेगुडा विस्वासमलायक हिल्लोर.

11 अदुनहाटी ओक्कला मिमेट दुनियाते संपलिच्छा दनमतगा विस्वासमलायक हिलाकोंटे, पेन दाना राज्येमता निजम दनमतुन मीवा कय्दे बल्हा हिय्यार?

12 मनद आयवा दनमता बारेमते मिमेट विस्वासमलायक हिलाकोंटे, बद दनमतुन अय्ते पेन मीक हीतन इंचंता, अद मीक बल्हा दोर्कार?

13 "वरोर जीतागाल इव्वुर मालकुलकुनगा सेवा किया पर्रोर. अल्हा सेवा कीते वरोन बेस पावरम कीतोर, इंकावरोन हयसोर, हिलाकोंटे वरोना पोल्ले केंजंतोर, इंकावरोना पोल्ले बारे केंजोर. अल्हेने मिमेट पेनदुन आनि दनमतुन उंदे मल्का सेवा किया पर्रोर," इंचि वेहतोर.

पेनदा पोल्ले बस्केळक मनंता

(मत्तयाल 5:31-32; 11:12-13; मरकुस 10:11-12)

14 येसु इव पोल्लें वेहनेके, अगा परिसिल्क मत्तुर. ओर कोत्ताना पोर्री बागा जीवा कियुंदुर. अदुनहाटी येसुना पोल्लें केंजसि ओन कारेड्डालक कीतुर.

15 पजा येसु ओर्कुन, "मिमेट लोकुकुकुना मुन्ने, 'मोमोट नीतिमंतुलुकुम' इतिर, गानि पेन मीवा मनसुन एरपाट कीता. बव पोल्लें अय्ते मनकना विचारमते कदरतव मंतां, अब पोल्लेन पेन बिल्लुकुल हय्सो."

16 "बापतिस्मा हिय्यना योहान वायानादाका, लोकुकल मूसाना नियमकु आनि पेनदा कबुरतोर रासता पोल्लेन परकारम ताकुंदुर. दाना पजा, पेनदा राज्येमता बारेमते बेसता कबुर लोकुकुकुं वेहमळ जर्गसेक मंता. वेल्लेटुर लोकुकल पेनदा राज्येमते जबरदस्तिते होळियसेक मंतुर.

17 ओक्कला बूमि, मब्बु नासडेम आसि होना पर्रता गानि दर्मसास्त्रमते रासतद उंदि सिन्ना पोल्लेगुडा नासडेम आयो."

18 "बोरे आयिर, मुन्नेटा मुत्तोन होळसि, इंकुंदानतोनि मरमिं आयानय्ते, ओर बोगमतनम कीतोर. अल्हेने बोरे आयिर, मुय्दोन होळसीता मुर्ताटुन मरमिं आयानय्ते, ओरगुडा बोगमतनम कीतोर."

सिरमंत मनकल आनि गरिब मनकल

19 इंकुंदि पोल्ले केंजाट, वरोर सिरमंत मनकल मत्तोर. ओर, एकको दरता नेडि पंडिना रंगुना मलमल कपडिं केर्सि रोज सुकमते, आनंदमते मनुंदुर.

20 गानि वरोर लाजर इनानोर गरिब मनकल मत्तोर. ओनकु मेंदुलंता पुनकु आसि मत्तां. ओन रोज सिरमंत मनकना गलमातगा बोरो तच्चि, होळसि होनुंदुर.

21 सिरमंत मनकल तिननेके हिळ अरतव मेत्कुलक तिंचि पीर निहंतन इंचि अगा हळसेक मनुंदुर. इंका ओना मेंदुलता पुनकुन नय्कु वासि नाकुंनुं.

22 उंदि रोज बतल आता इत्ते, आ गरिब मनकल हासोत्तोर. अस्के पेनदा दूतां वासि ओना जीवातुन स्वर्गमते पीसि ओसि, अब्राहामुना* पक्काते इरतां. कोन्नि रोजकुना पजा सिरमंत मनकल इंका हातोर. ओन बोदा दोसतुर.

23 सिरमंत मनकना जीवा नरकमते तकलिपने तनलाळसेक मननेके वेल्ले लक्कुने ओनकु अब्राहाम दिसतोर.† ओना पक्काते लाजर मत्तोर.

24 अस्के ओर अब्राहामुन जोरसे केय्सि, "मावा एनकटा मातिर दादा, नावापोर्री दया कीसि लाजरुन नावाहेके लोहचीम. नना तडमिते तनलाळसेक मंतन. ओर वासि ओना वेल्लुन एते मुळाहचि नावा नाल्केतुन सल्लागा कियिरकांटी," इंचि इत्तोर.

25 अस्के अब्राहाम ओन, "हळा पेडा, निमे मति कीम, निमे पिस्सि मननेके नीकु बतल गावाले मत्ता अब अन्नि दोर्कतां, गानि लाजस्क मात्रम अब अन्नि सुकालक दोर्का हिल्लें. इंदके इगे ईनकु बतल तकलिप हिल्ले गानि निमे मात्रम तडमिते तनलाळसेक मंतिन.

26 मर्रा उंदि पोल्ले बतल इत्ते, मीवा-मावा नड्डुम उंदि पेद्रुदा लोदूका मंता. अदुनहाटी मावाहेंदाल मीहेके बोर्नना वाकोम इत्ते वाया पस्स, मिहगटाल बोर्नना मावाहेके वाकोम इनना गानि वाया पस्स, इंचि इत्तोर.

27 अस्के आ सिरमंत मनकल, 'अल्हा अय्ते मातिर दादा, नना नीकु विनंति कीतन, लाजरुन नावा बाना लोन लोहचीम.

28 बारित्ते नाक हेय्युर तादहक-तम्मूहक मंतुर. ईर होचि इव पोल्लें ओर्क वेहते, ओर इसोटा तकलिपना जेगाताल तप्पानुर,' इंचि इत्तोर.

* 16:22 अब्राहामएनकटा इस्राएलतोर वंसमते अब्राहाम इनानोर पेद्रुदा मनकल मत्तोर ओर पेनदा पोल्लेते ताकुंदुर. † 16:23 यहूदिलकुना विचारमते, बोर अय्ते सत्तेमते मंतुर, ओर हासोत्तारिते अब्राहामुना पक्काते दांतुर बोर अय्ते सत्तेमते हिल्लुर ओर तिप्पलक मत्ता जेगाते दांतुर, अब्राहामुना पक्काते मत्तुर, तिप्पलकुना जेगाते मत्तुर ईर आकिर न्यायमदाका अग्गेन मन्तुर.

29 इत्तस्के अब्राहाम, 'ओरगा मूसाल रासता नियमकु, पेनदा कबुरतोर रासता पुस्तकालक मंतां. अबुन हद्विसि, अल्हे केंजिर, अल्हे ताकिर,' इत्तोर.

30 अस्के सिरमंत मनकल, 'अल्हा आयो अब्राहाम दादा, हातोर लोपोटाल बोरन्ना होंचि ओर्क वेहते, ओर पापालकुनाल मनसु मार्सकुंतुर,' इंचि इत्तोर.

31 अस्के अब्राहाम, मूसाल रासता नियमकु, पेनदा कबुरतोर रासता पोल्लेन बोर अयते केंजुर, ओर्कु वेहालय हाता मनकल जीवा अरसि होंचि वेहाना गानि ओर केंजुर," इंचि ओन इत्तोर.

17

माप कियमळ आनि विस्वासमता बारेमते कराहमळ
(मत्तयाल 18:6-7,21-22; मरकुस 9:42)

1 उंदि रोज येसु ओना सिस्युल्कुन इल्हा इत्तोर. "पापमते अरहना पोल्लें वायाका मन्नो, अब अयते वांतगे. गानि अब बोनाहेंदाल वांतांगो, ओन्क बच्चोन गोसा वायार!

2 नापोर्रो विस्वासम कियना ई सिन्ना पेडानसंटोन बोरन्ना पापमते अरहते, ओना बोळगेक जोत्ता बंडा दोहाचि ओन समुद्रमते ओसि वाटतेने ओनाहाटी बेस मनंता.

3 अदुनहाटी मिमेट उसारते मंटु."

"मीवा दंटातोर पापम कीते ओन समजांचट्ट, ओर कीता पापमताल मनसु मार्सकुत्ते, ओन मापि कीम्टु.

4 उंदि रोञ्जे ओर एडुं मल्कां तप्पु कीते, एडुं मल्कांगुडा ओर मिहगा वासि, नना तप्पु कीतन, इंदकेटाल इल्हा किय्योन, इंचि ओप्पुकुत्ते, ओन मापि कीम्टु," इंचि येसु वेहातोर.

5 इल्हा येसु वेहतद केंजसि, "मावा विस्वासमतुन बेसांगोटा सामि," इंचि ओना प्रेरितुल्क इत्तोर.

6 अस्के सामि ओर्कुन इल्हा इत्तोर. "ओक्कला मीलोप्पो आवाल्कुना पेळेतच्चो विस्वासम मनिनागानि, मिमेट इद पेद्दा ताडि मरातुन, 'निमे नीवा हिहकुनतोनि पीकका वासि, समुद्रमते होंचि अर्रा,' इंचि इत्ते अद मरा मीवा पोल्ले केंजंता," इंचि इत्तोर.

जीतागाना जिम्मेदारि

7 येसु मर्रा इल्हा वेहातोर, "मिहगा बोनागाना वरोर जीतागाल मंतोर इनकुंट, ओर नांगेल पूहाचि हिलाकोटे गोर्रे मेहाचि, बस्के अयते ओना कबाटाल लोन वांतोर, अस्के, ओर वाता वायमळे, 'गाटो तिनालय उदा,' इंचि इतिरा? बस्केने इन्निर.

8 गानि, 'नाहाटी गाटो अट्टा, वेरे कपडिं केरसि नाकु गाटो वाटसि हीम, नना तित्ता पजा निमे तिन' इंचि इतिर.

9 निमे वेहता कबळ जीतागाल कीतोर इंचि ओन्क, दन्यवाद इंचि बस्केने हिथ्यिर.

10 अल्हेने मिमेट इंका पेन वेहता कबळ पूरा मारतस्के, 'मोमोट मामुल जीतागाहकुम आंदुम, माक बद कबळ कियाना मत्ता अदे कबळतुन कीतोम' इंचि इंटु," इंचि येसु वेहातोर.

येसु मोंडिरोगमतोर्कुन बेस कीतोर

11 पजा येसु येस्सलेम होनानेके सामरिया आनि गालिल एरियाना नड्डुमताल होंचेके मत्तोर.

12 अस्के बदो उंदि नाटेने होळियनेके कुस्टरोगम आतोर पदि मंदि, हर्दुक इच्चुर लक्कु नित्तिसि मत्तोर.

13 ओर येसुन हळसि, "ए येसु, ए सामि! मावा पोरो दया कीम," इंचि वरगेयतुर.*

14 येसु ओर्कुन हळसि, "मिमेट होंचि, मीवा मेंदुल पेर्मालोर्कुंक हप्सट,"[†] इंचि इत्तोर. इत्तस्के ओर होननेके-होननेकेन बेस आतुर.

15 अस्के ओरागटाल वरोर मनकल नना बेस आतन, इंचि हळसि पेनदुन जोर-जोरसे तल्सकुंचेके येसुनगा मल्सि वातोर.

16 वासि ओना काल्कुनपोरो अरसि ओन्क दन्यवाद कीतोर. ओर सामरिया मनकल मत्तोर, इत्ते सिन्ना जातितोर मत्तोर.

17 अस्के येसु, "पूरा पदि मंदि बेस आया हिल्लिरा? कळमता तोम्मिद मंदि बेके होत्तुर?

18 पेनदुन स्तुति कियालय, ई सामरि जातितोन होळसि, कळमतोर बेस आतोर बोरे वाया हिल्लिरा?" इंचि ओन इत्तोर.

19 मर्रा येसु, "तेदिस होन! निमे विस्वासम कीताहाटी बेस आतिन," इंचि ओन इत्तोर.

पेनदा राज्येम वायमळ

(मत्तयाल 24:23,27,28,37-41)

20 "पेनदा राज्येम बस्के वांता?" इंचि उंदि मल्का परिसिल्कु येसुन पूसकीतुर. अस्के येसु, "पेनदा राज्येम कळकुंक दिस्सेक वायो.

21 पेन मीवा नड्डुम राज्येम कीता. अदुनहाटी पेनदा राज्येम इगे मंता, अगा मंता इंचि लोकुल्क इन्नुर," इंचि वेहातोर.

22 अद वेहता पजा सिस्युल्कुन इल्हा इत्तोर, "मनकना रूपमते पुटतोर वायाना रोजकुनाल उंदि रोजुन हळना विचारम कीतिर, गानि मिमेट हळा परिर इसोटा वेला वायार.

* 17:13 यहूदि लोकुल्क कुस्टरोगम आतोर्कुन इट्टाकोंदुर, ओर्कुन नाटेना पलाते इर्दुर. † 17:14 लैयवस्ता 14:1-32 † 17:14 कुस्टरोगम आतुर बोर अयते बेस आयंदुर, ओर होंचि, मोमोट बेस आतोम, इंचि पेर्मालोर्कुंक हपिचुंदुर. पेर्मालोर्क ओर्कुन मिमेट बेस आतिर इंचि इत्ते, ओर लोकुल्कुने होंचि कलियंदुर.

- 23 अस्के, हुळाट! मनकना रूपमते पुटतोर इगे मंतोर, अगा मंतोर इंचि लोकुल्लक इनानुर, गानि मिमेट अगा होनमट, ओरा पज्जो ताकमट.✱
- 24 बारित्ते मब्बुने उंदि बाजुंक मेरस्ते इंकुंदि बाजुंक बल्हा वेलगु अरंतनो, मनकना रूपमते पुटतोन नना वायानस्केगुडा अल्हे आयार.
- 25 गानि दानकन्ना मुन्ने नाकु बागा तकलिप वायार. इद पीळितोर नाकुन हय्सुर.”
- 26 नोहाना रोजकुने बल्हा जर्गता, अल्हेने मनकना रूपमते पुटतोन नना वायानस्के जर्गार.
- 27 नोहाल डोंगाते नेंगनदाका लोकुल्लक तिचेके-उंचेके मत्तुर, मरमिं कीसेके, आसेके मत्तुर. अस्के पेद्दा कम्मुड वासि अंटोर्कुन मुळाहता.
- 28 लोतुना कालमतेगुडा अल्हेने आता. लोकुल्लक तिनुड, उनुळ, अस्सुड, अम्मुड, वीतुड लोहकु दोहुड कियुंदुर.
- 29 गानि लोतु सदोम सहरताल बस्के अयते पेयसतोर, अस्के मब्बुनाल तडमि डोग्गां अरसि अद नाटेनोर अंटोर्कुन नासडेम कीता.
- 30 अयते मनकना रूपमते पुटतोन नना वायाना रोजुनेगुडा अल्हे आयार.
- 31 अदुनहाटीं अद रोज बोर अयते लोतपोर्रीं मंतोर, लोता लोप्पो मंदना सामानतुन पीसि वायालय हिळु रेयानायो. अल्हेने बोर अयते नेलिने कबळ कीसेक मंतोर, ओर मल्लिस वायानायो.✱
- 32 लोतुना मुत्तो पेनदा पोल्ले केंजवा, सदोम सहरतुन तिरियसि हळतस्के, दानकु बल्हा आता, अदुन मति कीम्ट.✱
- 33 “बोर अयते ओना जीवातुन ई दुनियाते पिसागोटालय हळ्ळांतोर, ओर ओना जीवातुन पोगोटकुंतोर. बोर ओना जीवातुन नावाहाटीं पोगोटकुंतोर, ओन्क बस्केळ्ळक पिस्सना पिस्वर दोर्कता.✱
- 34 नना मीक वेहानद बतल इत्ते, अद नर्का उंदि कटुलते इव्वुर मनानुर. ओरावटेताल वरोन तेहाकुंचि ओयमळ जर्गता, इंकावरोन अग्गेन होळसमळ जर्गता.
- 35 अल्हेने रोंडु मुर्ताहक कूळसि गट्टका नोरसेक मनंतां, उंदितुन ओयमळ जर्गता, इंकुंदितुन अग्गेन होळसमळ जर्गता.
- 36 इव्वुर मनकालोर पोलमते मत्ते, पेन वरोन पीसि ओयार, वरोन बारे अग्गेन होळसिय्यार,” इंचि इत्तोर.‡
- 37 अस्के सिस्स्युल्लकु येसुन, “इव पोल्लें बगा आयानुं सामि?” इंचि पूसकीतुर. अस्के, “बगा अयते पीनगु मनंता, अग्गेन गद्दलि जमा आंतां,” इंचि येसु इत्तोर.

18

पारतना कीसेकेने मंदना

- 1 पजा येसु ओना सिस्स्युल्लकुन, “रोज पारतना कीसेके मंदानां, पारतना कियानाहाटीं बस्केने पजोळ्ळक आयामान्नि,” इल्हा इंचि उंदि वेसुडि वेहातोर.
- 2 “उंदि नाटेने वरोर न्यायम कियाना पेद्दा मनकल मत्तोर. ओर पेनदुक वेरियाकोंदुर, लोकुल्लकुना पर्वा कियाकोंदुर.
- 3 अदे नाटेने उंदि मुंडामोस्ता मुरतळ मत्ता. अद ओनगा रोज वासि, ‘नावापोर्रीं अन्यायम आता, नाकु न्यायम कियमळ गावाले,’ इंचि ओन इत्तुंदु.
- 4 ओर वेल्लेने रोजकुनदाका दाना पोल्लेन केंजाकोंटा मत्तोर. गानि उंदि रोज ओर इल्हा विचारम कीतोर. ‘नना पेनदुक वेरियानोन आयोन, मनकालोर्कुना पर्वा कियानोन आयोन.
- 5 अयनागानि इद मुरतळ रोज वासि नाकुन परेसान कीसेक मंता. अदुनहाटीं इंदके नना दीना न्यायम कीतन. हिलाकोंटे इद बस्केळ्ळे नाकुन परेसान किय्यार,’ इनकुत्तोर.”
- 6 मर्रां सामि इत्तोर, “सेड्डा मजिस्टर बतल इत्तोर, अद पोल्लेतुन मति कीम्ट.
- 7 पेन पेरकुत्ता लोकुल्लक न्यायम आयागोम इंचि नर्का-पल्लिं पेनदुन पारतना कीसेक मनांतुर, पेन ओर्क सहाय्यम कियालय आलसेम किय्यारा?
- 8 नना मीक वेहासेक मंतन, पेन ओरा न्यायम बिराना किय्यार. अयनागानि मनकना रूपमते पुटतोन नना मल्लिस वातस्के, इद बूमिते विस्वासम होळसाकोंटा पारतना कीसेक मनानोर दोर्कानुरा?” इंचि वेहातोर.

मनम पेनदा मुन्ने सिन्नागासि मनमळ गावाले

- 9 बोर अयते लोकुल्लक मोमोटे नीतिमंतुल्लकुम इन्कुंचि सतता पॉरिन बरोसा इर्सि, इंकावरोन सिन्ना हळुंदुर, ओराहाटीं इंका येसु उंदि वेसुडि वेहातोर.
- 10 इव्वुर मनकालोर गुळिते पारतना कियालय होत्तुर. ओरंटे वरोर बारे परिसि मनकल, इंकावरोर बारे कर वसुल कियानोर.
- 11 परिसि वेरे नित्तिसि पारतना कियालय दलगतोर, ए पेनबाबा! नना इंका वरोनलेसीं दोंगन आयोन, इंकावरोन बोंकिचानोन आयोन, बोगम कबाहक कियानोन आयोन, ई कर वसुल कियानोनलेसीं लोकुल्लकुन मुळहानोन आयोन.
- 12 वारमकु रोंडु मल्लां ओक्कापोद्दु मंनंतन, नावा कमयता पदि तूसकुनाल उंदि तूसगुडा नीकु हीतन, इंचि इत्तोर.
- 13 “गानि कर वसुल कियानोर लक्कु निततोर, ओनकु पोर्रीं हळालयगुडा दैरनेम आयाहिल्ले. ओर चातितुन तंचेके पारतना कीतोर, ‘ए पेनबाबा, नना पापि मनकन आंदुन, नावापोर्रीं दया कीम,’ इंचि इत्तोर.

✱ 17:23 मरकुस 13:21 ✱ 17:31 मत्तयाल 24:17-18; मरकुस 13:15-16 ✱ 17:32 उत्पत्ति 19:26 ✱ 17:33 मत्तयाल 10:39 ‡ 17:36 इद वचनम कोन्नि पांडु लिपिने हिल्ले.

14 नना मीक वेहांतन गदा, ओरा इव्वुरा लोप्पोटाल कर वसुल कियानोरे पेनदा मुन्ने नीतिमंतुड आसि लोन होत्तोर. गानि परिसि नीतिमंतुड आयोर. बारित्ते, बोर ओनद ओरे नना पेद्दोन इंचि इनकुंतोर, पेन ओन सिन्नागा कीता. अल्हेने बोर ओनद ओरे नना सिन्नोन इंचि इनकुंतोर, पेन ओन पेद्दा कीता,” इल्हा वेहचि येसु सामि वेसुडितुन महतोर.

येसु सिन्ना पिलालकुंक आसिर्वाद हीतोर
(मत्तयाल 19:13-15; मरकुस 10:13-16)

15 उंदि रोजु लोकुल्क ओरा सिन्ना पिलालकुंक येसु आसिर्वाद हियाणा इंचि पीसि वायालय दल्गतुर. गानि सिस्स्युल्क हळसि ओर्कुन रांगतुर.

16 गानि येसु पिलालकुन केय्शि इत्तोर, “पिलालकुन नाहेके वायाहीम्ट, ओर्कुन आपमट. पेनदा राज्येम इंसंटोरेदे आंद.

17 नना मीक निजम वेहांतन, बोरे आयिर ओरा मनसुने पेनदा राज्येमतुन सिन्ना पिलालकुनालेसी ओप्कुन्नुर, ओर पेनदा राज्येमते होळिया पर्स,” इंचि सिस्स्युल्कुंक वेहातोर.

सिरमंतुल्क आनि पेनदा राज्येम
(मत्तयाल 19:16-29; मरकुस 10:17-30)

18 पजा यहुदिलकुना वरोर लीडर इल्हा इत्तोर, “गुरु, निमे बेसतोन आंदिन. बस्केळक पिस्सना पिस्वरता वारसदार आयानाहाटी नना बतल कीते बेस?” इत्तोर.

19 अस्के येसु ओन इल्हा इत्तोर. “नाकुन बारि बेसतोर इतिन? बोरे बेसतोर आयोर, सिराप पेन उंदे बेसतद आंद.

20 नीकु पेनदा आदेसकु अय्ते एरपाटे मंता: बोगमतनम कियमा, बोने हळकुमा, दोंगातनम कियमा, आबद्दम गवाइ हियमा, तल्लुर-बाबोना कदर कीम,” इत्तोर.

21 अस्के ओर, “नना अय्ते इव अन्नि सिन्नास्केटाल कीसेकेन वातन,” इंचि ओर इत्तोर.

22 ओर इत्तद केंजसि येसु ओन इल्हा इत्तोर. “इंदकेगुडा निहगा उंदि पोल्ले तक्को मंता. निहगा बतल अय्ते मंता, अदुनंता पूरा अम्मिसि, गरिबोर्कुंक त्सि हीम. अस्के नीकु स्वर्गमते दनम दोर्कार, पजा नहगा वासि ना पज्जो ताका,” इत्तोर.

23 गानि येसुना पोल्ले केंजसि, ओन्क इरगा दुक्कम वाता. बारित्ते ओर वेल्लेन सिरमंत मत्तोर.

24 येसु ओर्कुन हळसि इल्हा इत्तोर. “सिरमंतुल्क पेनदा राज्येमते होळियमळ इत्ते वेल्लेन कस्टम.

25 वरोर सिरमंत मनकल पेनदा राज्येमते होळियमळकन्ना लोटापेटा सूदि बोंगाताल होनमळ अल्कगा मनंता,” इत्तोर.

26 अस्के बोरे अय्ते येसुना पोल्ले केंजतुर, ओर, “अल्हा अय्ते मरि मुक्ति बोर्क दोर्का परंता?” इंचि इत्तुर.

27 अस्के, “मनकालोरतोनि आया पर्खा पोल्ले, पेन किया परंता,” इंचि येसु ओर्कुन इत्तोर.

28 अस्के पत्रु, “हळा, मोमोट अय्ते लोन-दारा होळिसिसि नीवा पज्जो वातोम,” इंचि इत्तोर.

29 अस्के येसु इल्हा इत्तोर, “नना मीक निजम वेहांतन. पेनदा राज्येमताहाटी ओना लोन-दारातुन, मुत्तोन, तम्मुहक-दादालोर्कुन, पिलालकुन, तल्लुर-बाबोन होळसीतोर,

30 आ मनकंक इद कालमते होळसीतवुंकन्ना बच्चोरो एक्को संपत्ति, जीवातोर दोर्कानुर, अल्हेने वायाना कालमते बस्केळक पिस्सना पिस्वरगुडा दोर्कार,” इत्तोर.

येसु ओना हामुरता बारेमे वेहांतोर
(मत्तयाल 20:17-19; मरकुस 10:32-34)

31 पजा येसु ओना पन्नेड सिस्स्युल्कुन बाजुंक ओसि इल्हा इत्तोर, “हळाट, मनम येस्सलेम होंचेके मंतोम. मनकना रूपमते पुटतोन, ना बारेमते पेनदा कबुरतोर बतलय्ते रासतुर, अव पूरा आंतां.

32 अगा नाकुन यहुदि आयवोरा कय्दे अप्पजेपनुर, अस्के ओर नाकुन सिडांचनुर, अपमानम कियानुर, नापोर्री उस्कानुर,

33 पोर्टेटे तन्नुड आतस्के हळकानुर. गानि मूडोव रोजुने नना मर्रा जीवाते तेदंतन,” इंचि वेहतोर.

34 गानि ओना सिस्स्युल्कुंक मात्रम ओर वळकता पोल्ले तेळिया हिल्ले. अद पोल्ले ओराहाटी मर्ममते मत्ताहेके, ओर्क बतल अर्तम आयाहिल्ले.

वरोर गुड्डिन येसु बेस कीतोर
(मत्तयाल 20:29-34; मरकुस 10:46-52)

35 पजा येसु यरिहो सहरता दगोरा एव्तोर. अगा हर्दा पक्काते वरोर गुड्डि बिच्चागाड बिच्चम तल्कसेके उद्दिदिसि मत्तोर.

36 ओना पक्काताल लोकुल्कुना मंदा होनना सप्पुड केंजसि, “इगे बतल आसेके मंता,” इंचि पूसकीतोर.

37 अस्के बोरो ओन, “नासरेत नाटेना येसु इग्गोटाल होंचंतोर,” इंचि वेहतुर.

38 वेहतस्के, “येसु, दाविद राजाना वंसमतोना! नापोर्री दया कीम,” इंचि आ गुड्डि वरगेयतोर.

39 अस्के ओना मुन्नेटाल होनानोर अंतोर ओन, “चुपचाप मन,” इंचि रांगतुर. गानि, “दाविद राजाना वंसमतोना, नापोर्री दया कीम,” इंचि जोरसे मोत्कुनालय दल्गतोर.

- 40 अस्के येसु आगसि, “ओन नहगा पीसि वटु,” इंचि हुकुम कीतोर.
 41 पजा ओन येसुनगा तत्तस्के, “नना नीहाटी बतल कियना इंचि नी मनसु मंता?” इंचि येसु ओन पूसकीतोर. अस्के, “सामि, नावा कळकुना नदर दिस्सानाल कीम,” इंचि आ गुड्डि इत्तोर.
 42 पजा येसु ओन, “इंदकेटाल ह्ळालय दलगा, नीवा विस्वासमे नीकुन बेस कीता,” इंचि इत्तोर.
 43 अल्हा इत्ता इनुडे ओना कळकुंक नदर वासि पेनदुन तल्सकुंचेके ओना पज्जो होत्तोर. अगा मत्ता लोकुल्क अल्हा आतद ह्ळसि, ओरगुडा पेनदुन तल्सकुनालय दलगतुर.

19

येसु जकय्याना लोन दांतोर

- 1 अल्हा आता पजा, येसु यरिहो नाटेनाल होंचेके मत्तोर.
 2 अद नाटेने वरोर जकय्या पोरोलतोर कर वसुल कियानोरा पोरो अदिकारि मत्तोर. ओर बागा सिरमंत मत्तोर.
 3 येसु बोर आंदुर ह्ळंतन इंचि ओर इनकुत्तोर, गानि अगा वेल्ले गर्दि मत्ताहाटी ह्ळ्वा परा हिल्लोर. बारित्ते ओर पोटीटिगा मत्तोर.
 4 अदुनहाटी ओर येसु होनना हर्दुक मुन्ने वितसि, ओन ह्ळालय उंदि नेडि मरा पोरो एकतोर. ⁵ येसु अद मरातगा एवतस्के पोरो ह्ळसि, “जकय्या, बिराना हिळ् रेय्या! इय्याला नाकु नीवा लोने आगाना मंता,” इंचि इत्तोर.
 6 इत्तारिते जकय्याल बिराना मराताल रेय्सि, कुसिते येसुन ओना लोन ओतोर.
 7 येसु जकय्याना लोन होत्तद ह्ळसि लोकुल्क, “ईर पापि मनकना लोन हेडमि इंचि होत्तोर,” इल्हा गुल्गालय दलगतुर.
 8 पजा जकय्याल नित्तिसि सामिन, “सामि, नावा सम्सारमताल सगम गरिबोर्कुंक हीतन, नना बोनना मुळाहचि येततद मत्ते, येततादानकन्ना नालुं अंताल्क एक्को मलाहचि हीतन,” इंचि इत्तोर.
 9-10 अस्के येसु, “तप्सि होत्ता पापि लोकुल्कन पहकिसि, ओर्कुन पिसागोटालय मनकना रूपमते पुटतोन नना वातन. अदुनहाटी ईरगुडा अब्राहामुना वंसमते पुटतोर आंदुर इंचि, इय्याला ईना लोतोर पापमताल पिस्तुर,” इंचि वेहतोर.

पदि बंगारम बंडिना वेसुडि (मत्तयाल 25:14-30)

- 11 लोकुल्क ओर वेहाना पोल्लें केंजसेके मत्तुर. अगटाल येस्सलेम सहर दग्गेरेने मत्ता. इंदके येसु येस्सलेमते एवतस्के ओर पेनदा राज्येम निलाहनुर इनकुंचेके मत्तुर. अदुनहाटी येसु ओर्क उंदि वेसुडि वेहतोर.
 12 “वरोर पेद्दा वंसमतोर मनकल मत्तोर, ओर राजाल आसि वायालय लक्कुटा देसेम होत्तोर.
 13 होनाका मुन्ने ओना पदि दासुल्कन केय्सि, मनकंक पदि बंगारम बंडि हीसि, ‘नना मल्लिस वायानादाका इव कोत्ताने मिमेट दंदा कीम्टु,’ इंचि इत्तोर.
 14 “गानि नाटेना लोकुल्क ओन हयसाकोंदुर, अदुनहाटी, ‘ओर मापोरो राज्येम कियमळ माकु इस्टम हिल्ले,’ इंचि पेद्दा राजांक वेहालय पेरतोर्कुन ओना पज्जेन लोहतुर.
 15 पजा आ मनकल राजाल आसि मल्लिस वातोर. ओर बोर्क अय्ते कोत्तां हीसि मत्तोर ओर दंदा कीसि बच्चोन कमय कीतुरो ह्ळानाहाटी आ दासुल्कन केया वेहतोर.
 16 मोदाटा दासुड वासि, ‘मालक, निमे हीता पदि बंडिनतोनि नना इंका पदि बंगारम बंडिं कमय कीतन,’ इंचि इत्तोर.
 17 अस्के राजाल, ‘निमे बेस कबळ कीतिन, निमे बेसता दासुन आदिन, निमे सिन्ना कबळतगागुडा विस्वासमलायक मत्तिन, अदुनहाटी पदि नाह्कुन ताकसालय नीकु अदिकारम हीतन,’ इंचि इत्तोर.
 18 अल्हेने रोंडो दासुडगुडा वासि, ‘सामि! निमे हीता बंडिनतोनि नना इंका हेय्युं बंडिं कमय कीतन,’ इंचि इत्तोर.
 19 अस्के राजाल ओनगुडा, ‘निमे हेय्युं नाह्कुन पोरो अदिकारिन आकिन,’ इंचि इत्तोर.
 20 पजा इंकावरोर दासुड वासि, ‘सामि! इद ह्ळ्वा निमे हीता बंगारमता बंडिं. इदुन नना पेगुने दोहाचि मक्किचि इरतन.
 21 बारित्ते निमे कळक मनकन आदिन, अदुनहाटी नना वेरियतन. निमे बद अय्ते इरा हिल्लिन अदुन तेंडकुंतिन, निमे वीतवगा कोय्यतिन,’ इंचि इत्तोर.
 22 अस्के राजाल ओन इल्हा इत्तोर, ‘अरे निमे लंडु दासुन आदिन! नीवा तोळदाल पेयसता पोल्लेतेन नीवा न्यायम कीतन. नना कळक मनकन, नना बद अय्ते इरा हिल्लेन अदुन तेंडकुंतन, नना वीतवगा कोय्यंतन इंचि नीकु एरपाटे मत्ता.
 23 अय्ते नना हीता कोत्तातुन बेंकते बारि वाटा हिल्लिन? नना मल्लिस वातस्के नावा कोत्तां वड्डितोनि एत्कुंचि मन्नेन,’ इत्तोर.
 24 पजा दग्गेरा नित्तिसि मत्तोर्कुन इल्हा इत्तोर. ‘मिमेट ओनागटाल आ बंगारम बंडितुन एतट. एतसि पदि बंगारम बंडिं मत्तोनागा हीम्टु,’ इत्तोर.
 25 अस्के ओर, ‘अय्ते सामि, ओनगा पदि बंगारम कोत्तां मंता गदा,’ इंचि इत्तुर.

26 नना मीक वेहंतन, बोनगा अय्ते पेनदा पोल्लेन तेल्लिचकुनना बुद्धिद मंता, पेन ओन्क इंका हीता, गानि बोनगा पेनदा पोल्लेन तेल्लिचकुनना बुद्धिद हिल्ले, ओनगा मत्ता बुद्धिदतुनगुडा पेन एतकुन्नार.

27 गानि, 'ईर राज्येम कियामान्नि,' बोर पगातोर अय्ते इत्तुरो, ओर्कुन नावा मुन्ने तच्चि हक्कट, इंचि मालक इत्तोर," इल्हा वेहचि येसु वेसुडितुन महतोर.

येसु सामि येस्सलेमते होळियंतोर

(मत्तयाल 21:1-11; मरकुस 11:1-11; योहान 12:12-19)

28 इव पोल्लें वेहता पजा येसु लोकुल्लकुना मुन्ने-मुन्ने येस्सलेमताहेके ताकसेके पेयसतोर.

29 होननेके जय्तुन मराकुना गुट्टापोर्रो मनना बैतपागे आनि बेतानिया इनना नाहकुना दग्गेरा एव्तोर. पजा येसु ओना इव्वुर सिस्सुल्लुकुन केय्सि,

30 ओर्क इल्हा वेहचि नाटे लोहतोर. "मी मुन्ने दिस्सना नाटे होंट. मिमेट अद नाटे होळियतस्के बस्केने बोरे उद्दुवद उंदि गाडदि पोरि दोह्चि मत्तद मीकू दिसंता, दान लेहकुंचि इग्गे पीसि वट्ट.

31 ओक्कला अदुन पीसि वायनेके, 'दीन बारि लेहचंतिर?' इंचि बोरन्ना पूसकीति, 'सामिक दीना अक्सरम मंता' इंचि वेहट," इत्तोर.

32 बोर्कुन अय्ते लोहमळ जर्गता, ओर नाटे होतस्के येसु वेहतापे ओर्क दिसता.

33 पजा ओर गाडदि पोरिन लेहनेके, दाना मालकुल्लक ह्ळसि, "मिमेट गाडदि पोरिन बारि लेहसंतिर?" इंचि इत्तुर.

34 अस्के ओर, "सामिक दीना अक्सरम मंता," इंचि इत्तुर.

35 पजा गाडदि पोरिन येसुनगा तत्तुर. तच्चि ओरा कपडिं दानपोर्रो तारसि, येसुन दानपोर्रो उपिस्तुर.

36 उद्दिदिसि होननेके ओन्क कदर हियानाहाटीं लोकुल्लक ओर केर्ता कपडिं तेंडसि हर्दे तारतुर.

37 अल्हेने पजा ओर जय्तुन मराकुना गुट्टा पोर्रोटाळ हिळ्ळ रेयनेके ओना पज्जो वायाना ओना अंतोर सिस्सुल्लक ओर ह्ळता अद्बूतामाता कबाहकुनहाटीं वेल्ले कुसिते जोर-जोरते पेनदुन इल्हा तल्सकुनालय दल्गतुर.

38 "पेनदा अदिकारम पीसि वायाना राजाल वेल्लेन आसिर्वाद दोर्कतोर आंद.✱

पेनदाहेंदाल सांति वायि! पोर्रोटा पेद्दा पेनदा कदर आयि!"

इंचेके तल्सकुनालय दल्गतुर.

39 अस्के मंदिताळ इच्चुर परिसिल्लक येसुनगा वासि, "गुरु! नीवा सिस्सुल्लुकुन वरगेयमट इंचि गदरिच्चा," इंचि इत्तुर.

40 पजा येसु ओर्कुन, "नना मीक वेहंतन, ओक्कला ईरगिता चुपचाप मत्ते, इव बंडां वरगेयालय दल्गंतां," इंचि इत्तोर.

येस्सलेमतुन ह्ळसि येसु अळंतोर

41 पजा येस्सलेम सहरता दग्गेरा एव्तस्के, अद सहरतुन ह्ळसि येसु अळंतोर.

42 अळसेके, "सांति दोर्कना पोल्लें इय्याला मीकू तेळियसि मत्ते बेस आसि मनवळ, गानि इंदके अव पोल्लें मीवा कळकुंक दिससों.

43 मीवा पगातोर सुट्टु आसि मीकुन नालुं मूलानाल तकलिप कियानुर, असोटा वेला वायार.

44 मीवा पेन मीकुन पिसागोतालय मिहगा वाता वेलातुन एरपाट किया हिल्लिर. अदुनहाटीं मीवा पगातोर मीकुन, मीवा पिलालुकुन तोळिते कल्पानुर. पजा बंडां उंदानपोर्रो उंदि ईर्शि दोहता गुरेतुन कूलाह्चि समानम कियानुर," इत्तोर.

गुळिते अम्मनोर्कुन येसु गेदमंतोर

(मत्तयाल 21:12-17; मरकुस 11:15-19; योहान 2:13-16)

45 पजा येसु गुळिते होळियतोर, होळियसि अगा अम्मनोर्कुन गेदमालय दल्गतोर.

46 पजा येसु ओर्कुन इल्हा इत्तोर. "नावा लोतुन पारतना कियाना लोन इत्तुर, इंचि दर्मसास्त्रमते रासि मंता.✱ गानि मिमेट दीन दोंगाल्लक मक्कना जेगा कीतिर," इत्तोर.✱

47 इल्हा येसु रोज गुळिते पेनदा पोल्लें करहुंदुर. गानि पेद्दा पेर्मालोर्क, दर्मसास्त्रम कराहना गुरल्लक, पेद्दा मनकालोर्क ओन हक्कालय ह्ळंदुर.

48 गानि अंतोर लोकुल्लक वेल्ले कुसिते येसु वेहाना पोल्लें केंजुंदुर. अदुनहाटीं ओन बल्हा हक्कना ओर्क आटम आयाकोंदु.

20

यहुदि पेद्दाल्लक येसुन पोल्ले पूसकीतुर

(मत्तयाल 21:23-27; मरकुस 11:27-33)

1 उंदि रोजु येसु लोकुल्लकुंक गुळिते कराहसेके, बेसता कबुर वेहासेके मत्तोर. अस्के पेद्दा पेर्मालोर्, दर्मसास्त्रम कराहना गुरल्लक, आनि यहुदि पेद्दाल्लक येसुनगा वातुर.

- 2 वासि, “निमे इव कबाहक बद्द अदिकारमते कीसंतिन?”* इव कबाहक कियालय नीकु अदिकारम बोर हीतोर? माक वेहा,” इंचि इत्तुर.
 3 अस्के येसु ओर्क इल्हा जवाब हीतोर, “ननागुडा मीकुन उंदि सवाल पूसकीतन, अयते वेहाट,
 4 योहानुंक बापतिस्मा हियाना अदिकारम बगाटाल दोर्कता? स्वर्गमताला हिलाकोटे मनकालोराहेंदाल दोर्कतना?” इत्तोर.
 5 अस्के, ओर-ओरे इल्हा वळककुत्तुर. “ओक्कला स्वर्गमताल दोर्कता इंचि मनम इनानयते, ‘मिमेट योहानुन बारि नम्मिर?’ इंचि इनानुर.
 6 ओक्कला मनम मनकालोराहेंदाल इनानयते, अंटोर लोकुल्लक मनापोर्रो बंडा हुक्कानुर, बारित्ते योहानुन पेनदा कबुरतोर इंचि ओर नमतुर,” इत्तुर.
 7 अदुनहाटीं ओर, “ओन्क अदिकारम बगाटाल दोर्कतनो माक एर्का हिल्ले,” इंचि इत्तुर.
 8 “अल्हा अयते, इव कबाहक बद्द अदिकारमते कीसंतनो, ननागुडा मीकु वेहोन,” इंचि येसु इत्तोर.

पेनदा मरिनगुडा हळकतुर

(मत्तयाल 21:33-46; मरकुस 12:1-12)

- 9 पजा येसु लोकुल्लकुक ई वेसुडि वेहालय दलगतोर. “वरोर मनकल उंदि अंगुर तोटा कीतोर. पजा वैरेतोरक बटाइक हीसि वेल्लेन रोजकुनाहाटीं वैरे देसेम होत्तोर.
 10 पजा बस्के अयते अंगुर पंडिं कोय्याना वेला वाता, अस्के ओरागटाल पंडिना तूस एतालय ओना वरोर दासुन बटाइतोरहेके लोहतोर. गानि बटाइतोर आ दासुन पीसि पक्का तंचि उत्ता कयके वापस लोहतुर.
 11 अस्के मालक इकावरोन दासुन बटाइतोरहेके लोहतोर. आ बटाइतोर ओनगुडा पीसि तंचि कदर हिलाकोटा कीसि उत्ता कयके वापस लोहतुर.
 12 पजा मालक मूडोव दासुन लोहतोर. ओनगुडा बटाइतोर नोप्पि आयनाल तंचि तोटाता पलाते दोब्बिसीतुर.
 13 पजा तोटाता मालक, ‘नना बतल कीकन?’ इंचि विचारम कीतोर. ‘सरे, इंदके नावा पावरमगल्ला मरिन लोहंतन, अस्के ओन हळिसन्ना कदर हिय्युरा?’ इनकुंचि ओना मरिन ओरहेके लोहतोर.
 14 गानि बटाइतोर ओर वायानद हळसि, ‘ईर अयते वारसदार आंदुर, दट ओन मनम हळकोम, अस्के ओना जायदाद मनाक आया परता,’ इंचि वरोंक-वरोर इत्तुर.
 15 पजा ओर अगा वातस्के, ओन तोटाता पलाते ओसि हळकतुर.
 “इंदके अंगुर तोटाता मालक वासि ओर्कुन बतल कियानुर?
 16 ओर वासि आ बटाइतोरुं हळकिसि अद तोटातुन वैरेतोरक बटाइक हिय्यानुर,” इत्तोर.
 अद पोल्ले केंजसि, “अल्हा जर्गाकोटा पेन आपिकांटी,” इंचि अगा मत्तोर इत्तुर.
 17 अस्के ओरहेके हळसि येसु ओर्कुन इल्हा इत्तोर. “बद बंडातुन अयते मिस्त्रिल्लक कबळक ओज्जो इंचि हयसा हिल्लुर, अदे बंडा सेंकु मूलाता पुनादि बंडा आता.☆ इल्हा पेनदा पोल्लें रासि मंतां, इवुना अर्तम बतल आंदु?
 18 बोर अयते इद बंडापोर्रो अरतुर, ओर तुकडां-तुकडां आयनुर, गानि अद बंडा बोरपोर्रो अयते अरता, ओर पिच्चि-पिच्चि आयानुर,” इंचि इत्तोर.
 19 येसु वेहता पोल्लें केंजसि, दर्मसास्त्रम कराहना गुरूल्लक आनि पेद्दा पेर्मालोर्क, “ईर मनाकुने इंचंतोर,” इंचि एरपाट कीतुर. अदे वेलाते ओन दोर्का पियालय हळतुर गानि लोकुल्लकन हळसि वेरियतुर.

यहुदि पेद्दा मनकालोरा उपायाल्लक

(मत्तयाल 22:15-22; मरकुस 12:13-17)

- 20 अस्के ओर, येसु बतलन्ना तप्पु वळकते ओन पीसि रोम सरकारता राज्यपालनगा ओकोम इंचि, ओनपोर्रो नदर इरतुर. इच्चुर्कुन नीतिमंतुल्लकुनालेसी मंचि ओना आयडां गुंजालय येसुनगा लोहतुर.
 21 आ आयडां गुंजानोर येसुनगा वासि इल्हा इत्तुर. “गुरु, निमे सत्तेम वळकानोन, निजम करहानोन आंदिन, बोने सिन्ना-पेद्दा हळिन. पेनदा हर्दा बारेमते सत्तेमते कराहंतिन इंचि माक एरपाटे मंता.
 22 अयते नियम परकारम, कैसर राजांक मोमोट कर दोहमळ न्यायमेना, आयोना?†” इत्तुर.
 23 येसु ओरा पिलान एरपाट कीतोर.
 24 कीसि, “नाक उंदि एंडि बंडि हुप्सट, दानपोर्रो बोना पोदुवा आनि पोरोल मंता,” इंचि इत्तोर. अस्के “कैसर राजानद,” इंचि ओर इत्तुर.
 25 अस्के, “कैसस्क दोहना कर कैसस्क दोहाटु, पेनदुक हियानव पेनदुक हीम्टु,” इंचि येसु इत्तोर.
 26 इल्हा लोकुल्लकुना मुन्ने येसुन ओना पोल्लेने ओर पिय्या पराहिल्लुर. गानि ओना पोल्लें केंजसि इंचंत्रम आसि चुपचाप आतुर.

सदुकिर्कुना उपायाल्लक

(मत्तयाल 22:23-33; मरकुस 12:18-27)

* 20:2 लूकाल 19:45,46पुरागा. ☆ 20:17 बजन संहिता 118:22 † 20:22 रोमि लोकुल्लक बोम्मा पूजे कियुंदुर, यहुदि लोकुल्लक बारे बोम्मा पूजे कियाकोदुर. अदुनहाटीं कैसर राजांक कर दोहमळ इत्ते यहुदि लोकुल्लक पेनदा नियमते न्यायम आयो इनुंदुर, कर दोहाकोटे कैसर राजांक विरोद आयुंदुर.

- 27 पजा इच्चुर सदुकि इनना लोकुल्लक येसुनगा वातुर. मनकल हासि मर्रा जीवाते तेदोर इंचि ईर नम्मंतुर.
- 28 वासि इल्हा सवाल पूसकीतुर. “गुरु, मूसाना नियम परकारम, बरोर मनकल पिलाल्क आयाका मुन्नेने हायानय्ते, ओना मुत्तोनतोनि ओना तम्मुर मरमिं आसि, हातोना वंसम बेर्सागोटालय पिलाल्कन कना परांतोर, इंचि मंता.
- 29 अय्ते, एडुर दादाल-तम्मुहक मत्तुर. ओरा लोप्पोटाल पेद्दोड मरमिं आतोर, गानि पिलाल्क आयाका मुन्नेन ओर हातोर.
- 30 हातस्के ओना पज्जोटोर दान मरमिं आतोर, ओरगुडा पिलाल्क आयाका मुन्नेन हातोर.
- 31 ओना पज्जोटोरगुडा दान मरमिं आसि पिलाल्क आयाका मुन्नेन हातोर. इल्हा एडुरगुडा दानतोनि मरमिं आसि, पिलाल्क आयाका मुन्नेन हातुर.
- 32 पजा आ मुरतळगुडा हाता.
- 33 अय्ते, हातोर अंतोर मर्रा जीवाते तेदतस्के, आ एडुर लोप्पोटाल अद बोना मुत्तो आयार? बारित्ते ओर एडुरगुडा दान मरमिं आसि मत्तुर,” इत्तुर.
- 34 अस्के येसु इल्हा वेहतोर, “ई दुनियाता लोकुल्लकने मरमिं आयमळ, मरमिं कीसि हियमळ जर्गता.
- 35 गानि बोर अय्ते हामुरताल मर्रा जीवाते तेदनलायक मनंतुर आनि मर्रा जीवाते तेदमळतुन दोर्किच्चुंतुर, ओर वायाना कालमते बस्केने मरमिं आयुर, मरमिं कीसिगुडा हिय्युर.
- 36 ओर पेनदा दूतनलेसी मनांतुर, बस्केने हायुर. ओर हामुरताल मर्रा जीवाते तेदताहाटीं, ओर पेनदा पिलाल्क आयानुर.
- 37-38 पोत्तना पोदाता बारेमते मूसाल बतल रासतोर मिमेट हदवा हिल्लिरा? अब्राहाम, इसाक, याकोब ईर वेल्लेन मुन्ने हासोत्तुर. अयना मूसाल पेनदुन अब्राहाम, इसाक, याकोब मोळ्ळकाना पेन इंचि इत्तोर. पेन हातोरद आयो गानि जीवाते मनानोरद आंद इंचि मनाकु एरपाट मंता. अद पेनदुन एरपाट कियानोरा अंतोरा जीवां पिसंतां. इल्हा हातोरगुडा जीवा अरंतुर इंचि मूसाल हुपिस्तोर.” इंचि येसु इत्तोर.
- 39 येसु वेहता पोल्लेतुन केंजसि, “गुरु! निमे बेस वेहतिन,” इंचि इच्चुर दर्मसास्त्रम कराहना गुरूक इत्तुर.
- 40 पजा येसुन सवाल पूसकियालय बोर्के हिम्मत आयाहिल्ले.

पेन लोहता पिसागोटनोर

(मत्तयाल 22:41-46; मरकुस 12:35-37)

- 41 पजा येसु ओर्कुन इल्हा इत्तोर. “किरिस्तु दाविदना मरिं आंदुर इंचि दर्मसास्त्रम कराहना गुरूक बल्हा इना परांतुर?
- 42-43 कुद्दु दाविदे ओना बजन संहिता पुस्तकमते इल्हा रासतोर.
- ‘सामि, नावा सामिनः इत्तोर, बदवेरदाका अय्ते नीवा पगातोर्कुन,
नीवा काल्कुनगा तर्रीन, अदवेरदाका नावा तिना बाजुंक उद्दिदिसि मन, इत्तोर.’☆
- 44 इल्हा दाविद ओन, ‘सामि’ इंचि इत्तोर. अय्ते ओर दाविदना मरिं बल्हा आया परांतोर?’”

दर्मसास्त्रम कराहना गुरूकुनलेसी किया मनि

(मत्तयाल 23:1-36; मरकुस 12:38-40)

- 45 अंतोर लोकुल्लक ओना पोल्लेतुन केंजसेके मननेके, येसु ओना सिस्युल्लुकुन इल्हा इत्तोर,
- 46 “दर्मसास्त्रम कराहना गुरूकुनाल उसारते मंट. पोर्पोटाल हिळ्ळदाका पोळ्गु अंगिं केर्सिं तिरियमळ, हाटुमकुने जोहार वेहागोटकुनमळ ओर्क बेस अनपिच्चंता. अल्हेने दर्मसास्त्रम कराहना लोहकुने, कुळ्पुकुने पेद्दाल्क उद्दाना जेगाते उदमळ इत्ते ओर्क वेल्ले इस्टम.
- 47 ईर मुंडामोस्ता मुर्ताहकुन मुळहंतुर, लोकुल्लुकुंक हुप्सालय वेल्लेनजेम पारतना कीतुर. गानि ईर्क मात्रम पेन अंतोर्कन्ना एक्को सिक्सा हियार,” इंचि इत्तोर.

21

पेनदुक नच्चना दानम

(मरकुस 12:41-44)

- 1 पजा येसु इच्चुर लक्कु नदर वाटतोर अस्के सिरमंत लोकुल्लक दान पेटिते पेनदाहाटीं कोत्तां वाटनेके ओन्क दिसतुर.
- 2 अस्के मुंडामोस्ता उंदि गरिब मुरतळगुडा दान पेटिते रौडु रागि कोत्तां वाटनेके येसु हळतोर.
- 3 अस्के येसु इल्हा इत्तोर. “नना निजम वेहांतन, इग्गे दान पेटिते कोत्तां वाटता अंतोर लोकुल्लुकुन्ना ई मुंडामोस्ता गरिब मुरतळे एक्को दानम कीता.
- 4 इल्हा नना बारि वेहासेके इत्ते, अंतोर बारे ओरा दनमताल इच्चुरे दानम कीतुर. गानि इद मुरतळ मात्रम दान्क पिस्सनाहाटीं इरतादानगुडा पेनदुक वाटसीता,” इत्तोर.

गुळि नासडेम आयना बारेमते येसु वळकांतोर

(मत्तयाल 24:1-9; मरकुस 13:1-13)

☆ 20:42-43 सामि इगे सामि इत्ते पेन लोहना पिसागोटना किरिस्तुना बारेमते आंद. ☆ 20:42-43 बजन संहिता 110:1

5 अस्के इच्चुर लोकुलक, “इद गुळिता बंडां हुळट बच्चोन सोक मंतां! इंका पेनदाहाटीं हीता सामानतोनि तयार कीता आ सिंगारम हुळट बच्चोन बेस मंता,” इंचेके वळकसेक मत्तुर.

6 अस्के येसु ओर्कुन, “इदके मिमेट हळना इव बंडां उंदानपोर्रो उंदि मनाकोटा कूल्हाना वेला वायनद मंता,” इंचि इत्तोर.

7 अस्के सिस्सुलक, “गुरु, इव पोल्लें बस्के जर्गनुं? इंका इव गटनां जर्गना मंता इन्नेके माकु बतल चिन्ह दिस्सार?” इंचि येसुन पूसकीतुर.

8 अस्के येसु इल्हा इत्तोर. “मीकुन बोरन्ना पसांचनुर, उसारते मंट. नावा पोरोल एतसेके बच्चुरो लोकुलक वासि, ‘ओन ननाने आंदुन, इत्तुर. इंका अद वेला दग्गेरा एव्ता,’ इंचि इनानुर. असंटोरा पज्जो होनमट.

9 लडाई, जगडालकुना बारेमते केंजसि वेरियमट. इव अयते तप्पाकोटा मोदाला जर्गनुं. गानि अच्चोटेन आकिर वेला वायो.

10 “इंका देसेमपोर्रो देसेम, राज्येमपोर्रो राज्येम लडाई आयनुं.

11 पेद्दा बृकंपालक आयनुं, वेरे-वेरे जेगाने कर्तु अरारि, तीराता रोगालक पुट्टानुं. मब्बुने वेल्लेन वेरियनसोटा गटनां जर्गनुं, पेद्दा-पेद्दा चिन्हां दिस अररानुं.

12 “गानि इवन्नि जर्गाका मुन्ने, मिमेट नावापोर्रो विस्वासम इरताहाटीं यहुदिलकु मीकुन दोर्कापीसि, वेल्लेन तकलिप कीसि मीवा न्यायम कियनाहाटीं दर्मसास्त्रम कराहना लोहकुने ओयानुर, ओसि मीकुन जेलने वाटानुर. पजा मीवा इच्चुर पगातोर मीकुन राजालोरा आनि राज्यपालना मुन्ने ओयानुर.

13 दीनहेंदाल मीकु नावा बारेमते गवाइ वेहालय हरि दोर्कार.

14 इंचि मीवा न्यायम जर्गनिके बतल वळकना इंचेके मोदाले रंदि कियमट.

15 वेला वातस्के नना मीकु इसोटा पोल्लें आनि बुद्दि हीतन गदा, मिमेट वळकानेके मीवा पगातोर केंजसि वळकाकोटा आयनुर, इंका मीवा पोल्लेक अड्डमगुडा वळका परीकोटा आयानुर.

16 अयना मीवा तल्लुर-बाबो, तम्मुहक-दादालोर, जीवातोर-हेळमितोर मीवा दंतातोर मीकुन पीसि पगातोर्कुंक हियानुर. अचोने आयका मीवावेटाल इच्चुर्कुन हळकानुरगुडा.

17 नावा पोरोलताहेंका अंटोर लोकुलक मीकुन हयसुर.

18 इदंता अयनागानि मीकुन बोरे नासडेम किया पररोर.

19 पेनदापोर्रोटा विस्वासमते आकिरदाका निल्सि मत्ते, मिमेट मीवा जीवातुन कापाळकुना परांतरि.

येस्सलेम नासडेम आयमळ

(मत्तयाल 24:15-21; मरकुस 13:14-19)

20 “हुळट! सिपाइलक येस्सलेम सुट्टु आतद मिमेट बस्के अयते हळांतरि, अस्के सहर नासडेम आयना वेला एव्ता इंचि इनकुंट.

21 अस्के बोर अयते यहुदिया एरियाते मंतुरो ओर गुट्टनहेके वित्तट, बोर अयते सहरते मंतुरो ओर सहरता पलाते पेय्सि होनगोम अल्हेने नाटे मनना लोकुलक सहरते होळिया मन्नि.

22 बारित्ते पेनदा पिलान परकारम अव सिक्सा हियना रोजुक आंदु. दर्मसास्त्रमते रासि मत्ता अन्नि पोल्लें पूरा आयना वेला आंदु.

23 अव रोजकुने पीट मत्ता मुर्ताहकुंक आनि सिन्ने मर्तल्लुहकुंक* वेल्लेन तकलिप वांता. बारित्ते इद बूमिपोर्रो वेल्लेन तिप्पलक वायाना मंता. आनि यहुदिलकुनपोर्रो पेन दाना होंगुन हुपिचना मंता.

24 इच्चुर मनकालोर कसेहकुने कोहककुंचि हायानुर, इक्किच्चुर मनकालोर्कुन बारे वेरे देसेमतोर्कुंक दोर्कापीसि हियनुर. पजा यहुदि आयवा लोकरा कालम मारनदाका, ओर येस्सलेमता लोकुलकुन ओरा कादा हिळु जारसि इरानुर.

वेरियाकोटा दैरनेमते मनना

(मत्तयाल 24:29-31; मरकुस 13:24-27)

25 “पोळ्दुनपोर्रो, वेळसिपोर्रो, सुक्कनपोर्रो चिन्हां दिस्सानुं. इंका बूमिपोर्रो समुद्रमता आवाज आनि अव्ते तेदाना पेद्दा तडाना सप्पुड केंजसि देसे-देसेलकुना लोकुलक इरगा वेरियानुर.

26 इरगा वेरियसि, इद दुनियाते वायाना तिप्पलकुना बारेमते विचारम कीसि, लोकुलकुना जीवा पेय्सोत्ताप आयार. बारित्ते मब्बुने मनना अन्नि सक्तिन कदलिचमळ जर्गता.

27 अस्के मनकना रूपमते पुटतोन नना, ताकत आनि पेद्दा महिमातोनि, मब्बु तेर्पेनपोर्रो वायानेके लोकुलक हळानुर.

28 इल्हा जर्गमळ सुख आतस्के मिमेट अंटोर मीवा तल्ला तेहिचि पोरोळ्ळक हुळट. बारित्ते पेन मीकु मुक्ति हियाना वेला दग्गेर्क एवसेकेन मंता.”

येसुना पोल्ले बस्केळक मनंता

(मत्तयाल 24:32-35; मरकुस 13:28-31)

29 पजा येसु ओर्क उंदि वेसुडि वेहतोर. “अद अंजिर मरातुन आनि केडाते मत्तव अन्नि मराकुन हुळट.

30 अवुना आकि रालतद हळसि, एद्दि कालम दग्गेरा एव्ता इंचि मीकु बिराना तेळियसि दांता.†

* 21:23 मर्तल्लुहकुंक इत्ते सिन्ने पेडल मत्ता सुरतळ, पालु उहाना सुरतळ. † 21:30 मोदाटा बाइबलकुने इग्गुर इंचि रासि मंता.

- 31 इल्हा इव अन्नि गटनां जर्गनद ह्ळसि, पेनदा राज्येम दग्गेर्क एव्ता इंचि मिमेट एरपाट कीतिर.
 32 नना मीकु निजम वेहांतन, बदवेरदाका अय्ते इव अन्नि पोल्लें पुरागा आयोंगो, अदवेरदाका ई पीळिः मुळगो.
 33 इद बूमि, मब्बु नासडेम आसि होंदार, गानि नावा पोल्लें बस्केने नासडेम आयों.”

उसारते मंटु

34 “अदुनहाटीं मिमेट पार्टीं किय्युड, कल उनुड इंका इद दुनियाता रंदिनेन मीवा मनसु मनना आयो. गानि नना मरा वायना रोजु अचानक अरना कोम्मालेह्का मीपोरीं वासि अर्राकोटा मीवद मिमेट जेगर्ता मंटु.

35 बारित्ते अद रोजु इद बूमिपोरीं मनना अंटोर लोकुल्कुनपोरीं अल्हेन अर्रानद मंता.

36 अदुनहाटीं वेल्लेन उसारते मंचि, बव अय्ते गटनां जर्गनद मंता, अव अन्नि गटनानाल पिस्सनाहाटीं ताकत दोर्कगोम इंचि बस्केळक परतना कीसेक मंटु. अल्हा मत्तिरित्ते, बस्के अय्ते मनकना रूपमते पुटतोन नना वांतन, अस्के नावा मुन्ने वेरियाकोटा नित्ता परकिट.”

37 इल्हा येसु हरेक रोजु पोद्दाला गुळिते कराहसेक मनुंदुर. गानि नर्कळक मात्रम सहरताल पलाते जय्तुन इनना गुट्टातगा होंचि मनुंदुर.

38 हक्केर-हक्केरा अंटोर लोकुल्क तेदसि ओना पोल्लें केंजानाहाटीं गुळितगा जमा आयुंदुर.

22

येसुन हक्कना पिलान

(मत्तयाल 26:1-5; मरकुस 14:1-2; योहान 11:45-53)

- 1 पुल्लगा आयवा पिंडिता हारिना पंडुगु दग्गेर्क एव्सि मत्ता. इद पंडुगुन दाटसि होनना पंडुगुगुडा इंतुर.*
 2 अस्के पेद्दा पेर्मालोर, दर्मसास्त्रम कराहना गुरूक ईर अंटोर उंदगा कलियसि, येसुन बल्हा हक्कना? येसुन बल्हा सप्पुडदाका दोर्कापीसि हक्कोम, इंचि पिलानकु कियालय दल्युतुर. गानि लोकुल्कुंक येसुनपोरीं मत्ता विस्वासमतुन ह्ळसि ओर वेरियतुर.

यहुदल येसुन दोर्कापीसि हियना आयडा कीतो

(मत्तयाल 26:14-16; मरकुस 14:10-11)

- 3 पजा येसुना पन्नेडु सिस्स्युल्कुनाल वरोर इस्कारियोत नाटेना यहुदाना लोप्पो पेद्दा देय्यम होळियता.†
 4 अस्के ओर पेद्दा पेर्मालोरगा आनि गुळिता कावेल कियना अदिकारिल्लुकुंक होंचि कलियतोर. कलियसि येसुन ओर बल्हा पीसि हिया पर्रातोर इदुना बारेमते, ओरतोनि वळकतोर.
 5 यहुदाना पोल्ले केंजसि पेद्दा पेर्मालोर आनि अदिकारिल्लुकु वेल्लेन कूस आसि ओर, ओन्क कोत्तां हींतोम, इंचि ओप्कुत्तुर.
 6 अदुनहाटीं गर्दि हिल्वद ह्ळसि येसुन ओरा कय्दे पीसि हियालय मोका ह्ळसेक मनुंदुर.

सिस्स्युल्क पंडुगुना तयारि कीतुर

(मत्तयाल 26:17-19; मरकुस 14:12-16)

- 7 पजा दाटसि होनना पंडुगु एव्ता. मूसाना नियम परकारम अद पंडुगुना मोदाटा रोजु उंदि गोर्रि पोरिना मोक्कु हियमळ मत्ता.
 8 अदुनहाटीं येसु, पन्नू आनि योहानुन, “मिमेट मुन्ने होंचि दाटसि होनना पंडुगुना गाटो तयार कीम्टु अस्के मनम तिनकोम,” इंचि ओर्कुन लोहतोर.
 9 अस्के, “मोमोट पंडुगुना गाटो तिनना तयारि बगा कीकोम इंचि नीवा मनसु मंता सामि?” इंचि ओर येसुन इत्तुर.
 10 अस्के येसु ओर्कु इल्हा वेहतोर, “मिमेट सहरते होळियतस्के, मीकु वरोर मनकल अळकाते एर पीसि होननेके कलियतोर. ओर बद लोन अय्ते दांतोरो, अदे लोतागा मिमेटगुडा ओना पज्जो होंटु.
 11 अगा होत्तस्के, आ लोता मालाकुंक, ‘गुरू ओना सिस्स्युल्कुनतोनि कलियसि, दाटसि होनना पंडुगुना गाटो तिननाहाटीं हेळमितोर आगाना अर्रा बगा मंता, इंचि गुरू पूसकीसंतोर,’ इंचि वेहाट.
 12 अस्के ओर मीकु मिद्दे पोर्रोटा उंदि पेद्दा अर्रा सजांचि तयार कीसि मत्तद हुप्सानुर. अदे अर्रांते मिमेट पंडुगुना गाटो तयार कीम्टु,” इत्तोर.
 13 अस्के ओर होंचि ह्ळतुर अय्ते, ओर बल्हा वेहतोर अल्हेने अगा मत्ता. पजा ओर अग्गेन दाटसि होनना पंडुगुना गाटो तयार कीतुर.

येसुना सिस्स्युल्कुनतोनि आकिर बोजनम

(मत्तयाल 26:20-30; मरकुस 14:17-21; 1 कुरेंति 11:23-25)

- 14 दाटसि होनना पंडुगुना गाटो तिनना वेला एवतस्के, येसु ओना प्रेरितुल्कुनतोनि कलियसि गाटो तिनालय उदतोर.

‡ 21:32 ई पीळि इगे दीना अर्तम यहूदि जातिता लोकुल्क इंचिगुडा इनकुनावच्चु. † 22:3 यहुदाना लोप्पो पेद्दा देय्यम होळियता दीना अर्तम यहुदनहेंदाल देय्यम दाना कबळ कियमळ सुख कीता. ओना बुद्धिते, मनसुने देय्यमता विचारालक वायमळ सुख आतां.

* 22:1 यहूदि लोकुल्क बस्केळक पुल्लटा पिंडिता हारि कीतुर. ई वारमता मोदाटा रोजुन दाटसि होनना पंडुगु इंतुर. † 22:3 यहुदाना लोप्पो पेद्दा देय्यम होळियता दीना अर्तम यहुदनहेंदाल देय्यम दाना कबळ कियमळ सुख कीता. ओना बुद्धिते, मनसुने देय्यमता विचारालक वायमळ सुख आतां.

15 उदतस्के येसु ओर्कुन, “नाकु तिप्पल्क वायका मुन्ने मीवातोनि कलियसि ई दाटसि होनना पंडुगुना गाटो तिनना इंचि नाकु वेल्लेन आसे मत्ता.

16 नना मीकु वेहानद बतल इत्ते, इद पंडुगु बद पोल्लेतुन अय्ते ह्पुसंता, अद पोल्ले पेनदा राज्येमते पुरागा आयनदाका नना इद पंडुगुना गाटो तिन्नोन.”

17 पजा ओर अंगुर पंडिना पानकमतोनि निंडिस मत्तद उंदि गिलास पीतोरे आनि पेनदुक दन्यवाद कीसि अदुन ओना सिस्स्युल्कुंक हीतोरे. हीसि, “इदेट, दीन मिमेट पंचकुंचि उंटु.

18 नना मीक वेहांतन, पेनदा राज्येम बदवेरदाका अय्ते वायोनो, अदवेरदाका, इय्याटाल नना अंगुर पानकम उन्नोन,” इंचि येसु इत्तोरे.

19 पजा येसु उंदि हारितुन पीसि, पेनदुक दन्यवाद कीतोरे. पजा आ हारितुन तुकडां कीसि ओना सिस्स्युल्कुंक पंचि हीसेक, “इद हारि इत्ते, मीवाहाटी मोक्कु आयना नावा मेंदुलता चिन्ह आंदु. नाकुन मति कियनाहाटी मिमेट इल्हेन कीसेक मंटु,” इंचि ओर्कु वेहतोरे.

20 पजा अंतोरा तिनमळ आतस्के, अंगुर पंडिना पानकमते निंडिस मत्ता गिलासुन पीसि, “इद पानकम इत्ते मीवातोनि पेन कियना पूना करारता चिन्ह आंदु. नना मीवाहाटी नावा नेत्तुरतुन पोंगागोटंतन, अस्के पेन दाना राज्येमतुन निलाहंता.‡

21 “अयना हिके केंजाट, नाकुन दोकाते पीसि हियानोरगुडा इंदके इगे नातोनि गाटो तिनालय उद्दिदिसि मंतोरे.

22 मनकना रूपमते पुटतोन नना, नावा बारेमते बल्हा अय्ते रासि मंता, अल्हे दांतन. गानि बोनाहेंदाल अय्ते नाकुन पीसि हियमळ जर्गता ओन्क बच्चोर गोसा आयार,” इत्तोरे.

23 येसु वेहतदुन केंजसि सिस्स्युल्क, “अल्हा कियानोर मना नड्डुम बोर मंतोरे मरि?” इंचि ओरद-ओरे वळ्ळुकुनालय दल्गुतुर.

सेवाकुनलेसीं मनना

24 पजा “मना नड्डुम अंतोर्कन्ना पेद्दा बोर मनना?” इत्ता पोल्लेहाटी सिस्स्युल्कुंक ओर्क-ओर्के पोल्ले आतां. §

25 अस्के येसु ओर्कुन इल्हा इत्तोरे. “यहुदि आयवोरा राजालोर लोकुकुनपोरे जबरदस्तिरे राज्येम कीतुर. आनि ओरपोरे अदिकारम ताकसालय ह्ळानोर, ‘मोमोट लोकुकुंक बेस सहायम कियानोरम,’ इंचि वेहकुंतुर.

26 गानि मिमेट ओरालेसीं कियमट. मी लोप्पोटाल बोर अय्ते पेद्दा मंतोरे, ओर अंतोर्कन्ना सिन्नोनलेसीं आयना. अल्हेने बोर मीवा लीडर मंतोरे ओर सेवाकुनलेसीं आयना. ✱

27 असल पेद्दा इत्ते बोर आंद? बोर अय्ते गाटो तिनालय उद्दंतोरे ओरा? मरि उद्दुतोक्कु गाटो वाटांतोरे ओरा? गाटो तिनालय उद्दुतोरे पेद्दोड आंद. गानि नना अय्ते मीवा नड्डुम गाटो वाटाना सेवाकुनलेसीं मंतन.”

28 “मिमेट अय्ते नना तिप्पल्कुने मत्तस्केगुडा नावातोनि मत्तोरे आदिर.

29 अदुनहाटी नावा बाबाल बल्हा नाकु राज्येम कियना अदिकारम हीतोरे, अल्हेन ननागुडा मीकु अदिकारम हीतन.

30 अद अदिकारम बद इत्ते, मिमेटगुडा नावा राज्येमते नावातोनि उद्दिदिसि तिनकिर, उनकिर. इंका राजगद्देन पोरे उद्दिदिसि इस्राएलना पन्नेड गोत्राल्कुनोरा न्यायम कीकिर,” इंचि इत्तोरे.

पत्रु तप्पिचकुंतोरे इंचि येसु वेहांतोरे

(मत्तयाल 26:31-35; मरकुस 14:27-31; योहान 13:36-38)

31 येसु मर्रा सिमोन पत्रुन, “सिमोनु, ए सिमोनु हिके केंजा! मीकुन अंतोर्कुन वंजिन हेचाहताप हेचाहचि मी अंतोरा विस्वासमता पट्टु ह्ळानाहाटी पेद्दा देय्यम पेनदुन अदिकारम तल्कता.

32 गानि निमे विस्वासमताल पजोळ्ळ होनाकोटा मनना इंचि नना नीवाहाटी पारतना कीतन. अयना निमे मर्रा विस्वासमते नाहेके तिरियतस्के नीवा दंटाता विस्वासुल्कुना विस्वासमतुनगुडा गट्टिगा कीम,” इंचि वेहतोरे.

33 गानि सिमोन पत्रु मात्रम, “सामि! नीवातोनि कलियसि जेलुंक होनालय, हायालयगुडा नना तयार मंतन,” इंचि इत्तोरे.

34 अस्के येसु पत्रुन, “पत्रु नना वेहानद केंजा! इय्याला नर्कळ्ळ मोदाटा गोगोड कूसाका मुन्ने निमे, ‘नना येसुन एरपाट किय्योन,’ इंचि मूड मल्कां इनकिन,” इंचि इत्तोरे.

तकलिप अर्रालय तयार मंटु

35 पजा येसु ओना सिस्स्युल्कुन, “उंदि मल्का नना मीकुन कोत्तना पाकिट, जोरा इंका हेरपुह्क हिलाकोटेन लोहचि मत्तन. अस्के मीकु बतलन्ना तक्को होंचि मत्तना?” इंचि पूसकीतोरे. अस्के सिस्स्युल्कु, “हिल्ले, बतले तक्को होना हिल्ले,” इंचि इत्तुर.

36 पजा येसु ओर्कु इल्हा वेहतोरे. “मिहगा बोरागन्ना कोत्तना पाकिट मत्ते, दान पज्जेन पीकुन्निर, इंका जोरागुडा पीकुन्निर. अल्हेने कसेर हिलवोर ओना कपडिं अम्मिसि उंदि कसेर असकुन्निर.

37 बारित्ते, नना वेहानद केंजाट! दर्मसास्त्रमते, ‘ओन तप्पु कीतोरेव्टे कल्पतुर,’ ✱ इंचि नावा बारेमते रासि मत्ता. दर्मसास्त्रमते नावा बारेमते बतल अय्ते रासि मंता, अद इंदके नावातोनि निजम आयमळे गावाले,” इंचि वेहतोरे.

‡ 22:20 मसाना कालमते पेन लोकुकुनतोनि करार कियनेके, जिवरासिना मोक्कु हीसि अबुना नेत्तुर लोकुकुनपोरे सल्लुंदुर. अल्हा कीतस्के अद करार गट्टिगा आयुंदु. (निर्गमन 24:6-8) अदुनहाटी येसु ओना नेत्तुर पोंगागोटसि पूना करार कियानुर. § 22:24 सिस्स्युल्कुना विचारमते येसु बिरानेन येस्सलेमते एक्सि राजाल आंतोरे, इंचि मत्ता. ओना राज्येमते सिन्नोड, पेद्दोड बोर इंचि ओर्क-ओर्के पोल्ले आतां. ✱ 22:26 मत्तयाल 20:25-26 ✱ 22:37 यसायाह 53:12

38 अस्के सिस्युल्क, “इद ह्ळा सामि, इव रौंडु कसेहक मंतां,” इंचि इत्तुर. इत्तस्के येसु, “सरे! आंतां,” इंचि इत्तोर.

जयतुन इनना गुट्टातगा येसु पारतना कियमळ
(मत्तयाल 26:36-46; मरकुस 14:32-42)

39 पजा अद लोताल पेय्सि ओना अलवट परकारम, जयतुन इनना गुट्टापोर्रो होत्तोर. ओना पज्जो ओना सिस्युल्कगुडा होत्तोर.

40 अगा होत्तस्के येसु ओना सिस्युल्कुक, “मिमेट पट्टुने अर्राकौटा मननाहाटी पारतना कीसेके मंटु,” इंचि इत्तोर.

41 पजा येसु ओरागटाल, इच्चोन लक्कु हौचि टोंगरां ऊनसि इल्हा पारतना कियालय दलगतोर:

42 “ए पेनबाबा! ओक्कला नीवा इच्चा मत्ते, नाकु वायाना ई तकलिपतुन नावा पोर्रोताल तप्पिच्चा. अयना नावा इच्चा मत्ताप आयो गानि नीवा इच्चा बल्हा मंता अल्हे जर्गि,” इंचि इत्तोर.

43 अस्के अगा उंदि पेनदा दूता स्वर्गमताल वासि ओन्क ताकत हियालय दलगता.

44 येसु वेल्लेन दुक्कमते निडिसि पेनदुक पारतना कीतोर. ओर अल्हा पारतना कियनेके ओना सेमटा, नेत्तुरलेसीं आसि बोट्टुक-बोट्टुक बूमिपोर्रो अरसेक मत्ता.*

45 पारतना कियमळ मारतस्के, सिस्युल्कुनगा वासि ह्ळते, ओर दुक्कमते तकांचि निद्रा हौचि मत्तुर.

46 अस्के येसु ओर्कुन, “मिमेट बारि निद्रा होत्तिर? तेदट! तेदसि मिमेट पट्टुने अर्राकौटा मननाहाटी पारतना कीसेके मंटु,” इंचि इत्तोर.

यहुदल येसुन पीसि हीतोर
(मत्तयाल 26:47-56; मरकुस 14:43-50; योहान 18:3-11)

47 येसु इव पोल्ले वळकसेकेन मत्तोर. अच्चोटेन अगा उंदि लोकुल्कुना मंदा वाता. अद मंदातुन यहुदल पीसि वातोर (ई यहुदल येसुना पन्नेड सिस्युल्कुनाल वरोर आंद). तच्चि ओर येसुन बुर्रालय ओना दग्गेर्क होत्तोर.

48 अस्के येसु ओन, “यहुदा, उंदि मुद्दु बुर्सि निमे मनकना रूपमते पुटतोन नाकुन दोर्कापीसि हियालय ह्ळसंतिना?” इंचि इत्तोर.

49 येसुन पियानदुन ह्ळसि कळमता सिस्युल्क, “सामि, महगा कसेहक मंतां, मोमोट ईरकुन नक्कीमा?” इंचि पूसकीतुर.

50 अच्चोटेन ओरा लोप्पोटाल वरोर सिस्युड पेर्मालोरा लीडरना वरोर दासुन कसेटे हीतोर अयते ओना तिना केव नेमसोत्ता.

51 अस्के येसु, “मन्नि, अल्हा कियमट,” इत्तोर. इंचि ओना नेमसोत्ता केवदुन इटसि ओन बेस कीतोर.

52 पजा येसु, ओन्क विरोदमते तेदता पेद्दा पेर्मालोर्कुन, गुळिता अदिकारिल्कुन आनि यहुदिल्कुना पेद्दाल्कुन इल्हा इत्तोर. “वरोन दौंगन पिय्यालय वाताप मिमेट कसेहक, गुत्पां पीसि नाकुन पिय्यालय वातिरा?

53 नना अयते रोज गुळितगा मीतोनि मनुंदुन, मिमेट अस्के नाकुन पिया हिल्लिर. अयना इद मीवा वेला आंदु, हीकटता राज्येम कियना वेला आंदु,” इंचि इत्तोर.

येसुन पन्नु एरपाट किय्योन इंतोर
(मत्तयाल 26:57-58; मरकुस 14:53-54,66-72; योहान 18:15-18,25-27)

54 पजा ओर येसुन दोर्कापीसि, अगटाल पेद्दा पेर्माना लोन ओतुर. पन्नुगुडा लक्कुटाले ओना पज्जो-पज्जो हौचेके मत्तोर.

55 पेद्दा पेर्माना दाराते तडमि माससि ओर अंतोर सूट्टु उद्दिसि मत्तुर. पन्नुगुडा ओरतोनि अग्गेन उदतोर.

56 पन्नु तळमितगा उद्दिसि मत्ताहेंके तळमि वेलगु ओनपोर्रो अरसि उंदि दासि पोररिक ओर दिसतोर. अस्के आ दासि पोरि पन्नुनहेके ह्ळसेक, “ई मनकलगुडा येसुनतोने मत्तोर,” इंचि इत्ता.

57 गानि पन्नु, “नना ओन एरपाट किय्योन बाई,” इंचि इत्तोर.

58 जेरासेप आतंका इंकावरोर मनकल पन्नुन ह्ळसि, “निमेगुडा ओराव्हेटाल वरोन आंदिन गदा,” इंचि इत्तोर. अस्के पन्नु, “हिल्ले दादा, नना आयोन,” इंचि इत्तोर.

59 दग्गेर-दग्गेरा उंदि गंटा आता पजा, इंकावरोर मनकल, “ईर गालिल एरियाता मनकनलेसीं वळकसंतोर, अदुनहाटीं निजमे ईर येसुनतोनि मत्तोर,” इंचि इत्तोर.

60 अस्केगुडा पन्नु, “निमे बतल वळकसंतिन दादा! नना ओन असले एरपाट किय्योन,” इंचि इत्तोर. अल्हा इत्ता-इनुडे मोदाटा गोगोड कूसता.

61 अस्के सामि पन्नुनहेके तिरियसि ह्ळतोर. अस्के, “इय्याला नर्कळक गोगोड कूसाका मुन्ने निमे नाकुन मूड मल्कां एरपाट किय्योन इतिन,” इंचि येसु मुन्नेने वेह्चि मत्ता पोल्ले पन्नुक मति वाता.

62 अस्के ओर पलाते हौचि इरगा अळतोर.

येसुन कारेड्डाल्क कीतुर
(मत्तयाल 26:67-68; मरकुस 14:65)

63 येसुन बोर अयते पीसि मत्तुरो ओर कारेड्डाल्क कीसेके इरगा तनालय दलगतुर.

* 22:44 इद वचनम कोन्नि पांडु लिपिने हिल्ले.

- 64 ओना कळकुंक कप्पिड गंडा दोह्चि, “इंदके नीकुन बोर तंतुर? माकु बविस्यवानि वेहा,” इंचि ओन पूसकीतुर.
65 अचोने आयका ओना अपमानम कियानाहाटी वेल्लेन पोल्ले इत्तुर.

येसुन पंचादितगा ओतुर

(मत्तयाल 26:63-65; मरकुस 14:61-64)

- 66 पंगातस्के यहुदि पेद्दाल्क उंदि पंचादि उपिस्तुर, अगा पेद्दा पेर्मांलोर, दर्मसास्त्रम कराहना गुस्ल्लक मत्तुर. अद पंचादिते येसुन पीसि तच्चि ओरा मुन्ने निलाहतुर.
67 पजा ओर येसुन, “ओक्कला निमे किरिस्तुन आते माक वेहा,” इंचि इत्तुर. गानि येसु, “ओक्कला नना वेहिनागानि मिमेट नम्मिर.
68 इंका नना सवाल्लक पूसकिथिनागानि मिमेट जवाबगुडा हिथियर.
69 गानि इंदकेटाल, गडसेम मत्तंका मनकना रूपमते पुटतोन नना ताकतवर पेनदा तिना बाजुंक उद्दंतन,”* इत्तोर.
70 अस्के पंचादिते मत्ता अंतोर लोकुल्क, “अथे निमे पेनदा मरिना?” इंचि इत्तुर. अस्के येसु, “मिमेट इनानद निजमे,” इंचि इत्तोर.
71 अस्के, “कुद्दु ओना तोळ्दाल ओरे वेहतद मनम केंजतोम. अथे मनाक बतल गवाइ गावाले?” इंचि इत्तुर.

23

येसुन पिलातुस राज्यपालना मुन्ने निलाहंतुर

(मत्तयाल 27:1-2,11-14; मरकुस 15:1-5; योहान 18:28-38)

- 1 पजा पंचादिता अंतोर लोकुल्क तेदसि येसुन अगटाल पिलातुस इनना राज्यपालनगा ओतुर.
2 ओसि, “ईर मावा यहुदि लोकुल्कुंक एकरेवुल्क वेहचि ओर्कु तप्पुड हर्रि हुप्सानेके मोमोट हळतोम. इंका कैसर राजांक कर दोहामनि इंचि वेहांतोर. अचोने आयका ओनद ओरे, ‘नना किरिस्तुन, राजुन आंदुन,’ इल्हा वेहकुंतोर,” इंचि दोसेल्क दोसालय दल्गतुर.
3 अस्के पिलातुस येसुन, “निमे यहुदिल्लकुना राजुन आंदिना?” इंचि पूसकीतोर. अथे, “निमेन इंचंतिन गदा,” इंचि येसु इत्तोर.
4 अस्के पिलातुस पेद्दा पेर्मांलोर्कुन आनि लोकुल्कुन, “नाकु ई मनकनगा बतले तप्पु दिस्सेक हिल्ले,” इंचि इत्तोर.
5 गानि लोकुल्क मात्रम पिलातुस राज्यपालना पोल्ले केंजाकोटा, “ईर पुरागा यहुदि लोकुल्कुना देसेमते ओना पोल्ले कराहचि अंतोर लोकुल्कुंक एकरेवुल्क वेहचंतोर. इद कबळ ईर गालिल एरियाते सुस्व कीसि इंदके इग्गेळदाका* एवतोर,” इंचेके इरगा लोल्लि कियालय दल्गतुर.

येसुन हेरोद राजानगा ओतुर

- 6 लोकुल्क इनानदान केंजसि पिलातुस, “बतल, ई मनकल गालिल एरियातोर?” इंचि पूसकीतोर.
7 अव रोजकुने गालिल एरियापोर्री हेरोद अतिपस राजाल राज्येम कीसेके मत्तोर. येसु गालिल एरियातोर इंचि तेळियतस्के, पिलातुस ओन हेरोद राजानहेके लोहचीतोर. आ वेलाते हेरोद राजालगुडा येस्सलेम सहरतेन मत्तोर.
8 हेरोद अतिपस राजाल येसुना बारेमते केंजसि मत्तोर अदुनहाटी वेल्लेन वर्सानाल येसुन हळना आसेते मत्तोर. इंका ओन्क येसुना कयदाल बतलान्ना चिन्ह हळानद मत्ता. अदुनहाटी येसुन हळसि हेरोद राजांक वेल्लेन कुसि आता.
9 अस्के ओर येसुन वेल्लेन सवाल्लक पूसकीतोर. गानि येसु बतले जवाब हिया हिल्लोर.
10 पेद्दा पेर्मांलोर आनि दर्मसास्त्रम कराहना गुस्ल्लक मात्रम येसुनपोर्री ओरा मनसुंक वाताप तप्पुक-दोसेल्क दोस्सेक मत्तुर.
11 पजा हेरोदगुडा ओना सिपाइलकुनतोन कलियसि येसुन कारेड्डाल्क कीसेके कव्तोर. येसुं कु राजालोर केराना कपडिं केराहिच ओर मर्री पिलातुसुनहेके लोहचीतोर.
12 अदे रोजु हेरोद अतिपस राजाल आनि पिलातुस ईर इव्वुर दंतातोर आतुर. दीनकन्ना मुन्ने ओर वरोंक वरोर विरोदमते मनुंदुर.

पिलातुस येसुंक हामुर सिक्सा हीतोर

(मत्तयाल 27:15-26; मरकुस 15:6-15; योहान 18:39-19:16)

- 13 पजा पिलातुस पेर्मांलोर्कुन, राज्येम कियानोर्कुन आनि लोकुल्कुन केयतोर.
14 केथिसे ओर्कुन इल्हा इत्तोर, “लोकुल्कुंक एकरेवुल्क वेहचि ओर्क तप्पुड हर्रि हुपिचंचंतोर इंचि येसुन मिमेट इगे तत्तिर. नना मीवा मुन्नेन ईन बेस परमेरका कीसि पूसकीतन. मिमेट ईनपोर्री दोसता तप्पुक-दोसेल्कुनाल उंदिगुडा नाकु ईना लोप्पो दिसा हिल्लें.
15 इंका हेरोद अतिपस राजांकगुडा ईना लोप्पो तप्पुक-दोसेल्क दोर्का हिल्लें. अदुनहाटी ओर ईन मर्री नाहेकेन तिराहिच लोहतोर. इन्कु हामुर सिक्सा हियनलायक ईर बतल तप्पु किय हिल्लोर.
16 अदुनहाटी नना ईन पोट्टे देब्बां तंचि होळसीतन,” इंचि इत्तोर.
17 इद पंडुगुने एडादिक वरोन यहुदि मनकन जेलनाल होळसा पिय्युंदु. †
18 अस्के अंतोर लोकुल्क कलियसि उंदेतीर, “ई येसुंक हामुर सिक्सा हीम, मावाहाटी बरब्बन होळसीम,” इंचि इरगा वरगेयालय दल्गतुर.

* 22:69 बजन संहिता 110:1 * 23:5 इग्गेळदाका इले येस्सलेमदाका. † 23:17 इद वचनम कोन्नि पांडु लिपिने हिल्ले.

19 (ई बरबल इनानोर सहरता मनकालोर्कुन सरकारता विरोदमते कीसि मत्तोर. इका बचुदूरो लोकलुकुन हक्किसिगुडा मत्तोर. अदुनहाटी ओन जेलने वाटसि मत्तुर.)

20 पिलातुसना मनसुने येसुन होळसियानद मत्ता, अदुनहाटी ओर लोकलुकुक इंकुंदि मल्का विनंति कीतोर.

21 गानि लोकलुक मात्रम, “ओन कूसुनपोर्री मोल्लां कोह्किसि वेलाड वाटट, ओन कूसुनपोर्री वेलाड वाटट,” इंचि इरगा मोत्कुंचेके मत्तुर.

22 अयना पिलातुस मूडो मल्का ओर्कुन, “बारि? ईर बतल तप्पु कीतोर? ईनकु हामुर सिक्सा हियनलायक नाकु बतले तप्पु दोर्काहिल्ले. अदुनहाटी नना ईन पोटे देब्बां तंचि होळसीतन,” इंचि इत्तोर.

23 गानि लोकलुक मात्रम उंदेतीर, “येसुन कूसुनपोर्री वेलाड वाटा,” इंचि इरगा मोत्कुंचेके मत्तुर. ओरा मोत्कुन्मळता मुन्ने पिलातुसनद उंदिका पोल्ले ताका हिल्ले.

24 अदुनहाटी पिलातुस, लोकलुकुना इच्चा परकारमे आयि, इंचि इत्तोर.

25 पजा सरकारता विरोद कीसि, लोकलुकुन हक्किसि जेलुक होंचि मत्ता बरबन लोकलुक तल्कताहेंका ओन होळसिया वेहतोर. येसुन बारे लोकलुकुना इच्चा मत्ताप कीकुन्निर इंचि ओरा कयदुक अप्पजेपतोर.

येसुन कूसुनपोर्री वेलाड वाटमळ

(मत्तयाल 27:32-44; मरकुस 15:21-32; योहान 19:17-19,23-24)

26 सिपाइल्क येसुन पीसि होननेके, अचोटेन कुरेनिः सहरतोर वरोर सिमोन इनना मनकल ओना सहरताल वासेके मत्तोर, ओर्क कलियतोर. अयते सिपाइल्क ओन दोर्कापीसि येसुना कूसुन कांजसेक येसुना पज्जो-पज्जो ताका वेहतुर.

27 अस्के लोकलुकुनद उंदि पेद्दा मंदा येसुना पज्जो होंचेके मत्ता. अद मंदाते इच्चुं मुर्ताहक इका मत्तां, अव येसुनाहाटी वेल्लेन बादाते इरगा अळसेके मत्तां. §

28 अस्के येसु अवुनहेके तिरियसि अवुन इल्हा इत्तोर. “ए येस्सलेम सहरता मुरताहकुनिटा! मिमेट नावाहाटी अळमट, गानि मीवा मर्क-मियाहक, मीवा सतताहाटी अळट.

29 बारित्ते मुन्ने इसोटा तकलिपता रोजकु वायानव मंतां गदा, अव रोजकुने, ‘गोड्होत्ता मुरतळके सुकम मंता, पिलाल्क आयवा मुरतळके सुकम मंता, बस्केने मरतल्लुर आयवा मुरतळके सुकम मंता,’ इंचेके लोकलुक इनानुर.

30 इका ओर, ‘मावा पोर्री वासि अर्दट,’ इंचि गुट्टान इनानुर आनि ‘माकुन पूळसट’ इंचि गुप्पन इनानुर. ✨

31 मरा पच्चगा मननेकेन ईर लोकलुक इल्हा कीसंतुर अयते, वत्सोत्ता मरातुन बल्हा कियनुरो?”* इंचि इत्तोर.

32 पेद्दा तप्पु कीता इका इव्वुर मनकालोर्कुनगुडा हामुर सिक्सा हिय्यालय येसुनतोनि ओसेक मत्तुर.

33 पजा ओर “तला बोरसेम”† इनना जेगातगा एवतुर. एवतस्के येसुन कूसुनपोर्री मोल्लां कोह्किसि वेलाड वाटतुर. अल्हेने पेद्दा तप्पु कीता आ इव्वुर मनकालोर्कुनगुडा येसुनतोनि ओना तिना बाजुंक वरोन, रोड्डा बाजुंक वरोन कूसुनपोर्री वेलाड वाटतुर.

34 अस्के, “पेनबाबा, ईर बतल कीसंतुरो, अद ईरके तेळियो. अदुनहाटी ईर्कुन मापि कीम,” इंचि येसु इत्तोर. ‡ पजा सिपाइल्क सिट्टिं वाट्टिस ओना कपडिन पंचकुत्तुर.

35 अगा जर्गनदुनंता लोकलुक नित्तिसि हळसेक मत्तुर. राज्येम कियानोरगुडा, “ईर अयते इकावरोन पिसागोटतोर. अयते ईर ओक्कला पेन पेस्ता किरिस्तु आयानयते, ओना जीवातुन ओरे पिसागोटकुन्निर,” इंचि कारेड्डाल्क कियुंदुर.

36-37 सिपाइल्कगुडा ओना दग्गेर्क होंचि ओन कारेड्डाल्क कीसेके, पुल्लटा पडिना पानकम उहचेके, “ओक्कला निमे यहुदिल्लुकुना राजान आते, निमे नीवा जीवातुन पिसागोटकुन,” इंचि इत्तुर.

38 इका ओना तल्लातगा पोर्री, “ईर यहुदिल्लुकुना राजाल आंदुर,” इंचि उंदि पाटि पोर्री रासि कूसुंक हिरकिस्तुर.

39 अगा येसुनतोनि वेलाड वाट्टिस मत्ता तप्पु कीता इव्वुर लोप्पोटाल वरोर, “निमे पेन लोहता किरिस्तुने गदा! अयते नीवद निमे पिसागोटकुंचि माकुनगुडा पिसागोटा,” इंचि ओना अपमानम कीतोर.

40 गानि तप्पु कीता इकावरोर मनकल बारे अल्हा इत्ता मनकन गदरिच्चि, “ईन्क दोर्कता सिक्से नीकुगुडा दोर्कता. अयना नीकु पेन इत्ते वें हिल्लेना रो?

41 मनम अयते तप्पु कीतोम इंचि न्यायम परकारम मनाकु सिक्सा दोर्कता. गानि ईर अयते बतले तप्पु किया हिल्लोर,” इंचि इत्तोर.

42 मर्रा येसुन, “येसु, निमे राजाल आतस्के नाकुन मति कीम,” इंचि इत्तोर.

43 अस्के येसु ओन, “नना नीकु निजम वेहचेके, निमे इय्यालेन नावातोनि स्वर्गमते मनकिन,” इंचि इत्तोर.

‡ 23:26 कुरेनि कुरेनि सहर येस्सलेम दग्गेटा उंदि देसेमते मंता. सिमोन पंडुगुनाहाटी येस्सलेम वासि मत्तोर. § 23:27 इद वचनम कोन्नि पांडु लिपिने हिल्ले. ✨ 23:30 होसे

10:8 * 23:31 असलते येसु इनानद बतल इत्ते, नना बतल तप्पु कियाकोन्ना नाकुन इल्हा कीसंतुर अयते मीवसोटा तप्पु कीतोर्कुन बतल कियनुरो? येसु वेहता ई पोल्ले नल्पै वर्साना पज्जो जर्गनद मत्ता. इल्हा रोम सरकारता सिपाइल्क वासि येस्सलेमतुन नासडेम कीतुर. † 23:33 “तला बोरसेम” इद जेगा तला बोरसेमलेहका दिसंता बारे. अदुनहाटी इद जेगाकु इल्हा पोरोल अरता. इदे जेगाते रोम सरकार तप्पु कीतोर्कुंक हामुर सिक्सा इत्ते कूसुंक वेलाड वाटना सिक्सा हियुंदुर. ‡ 23:34 ए पेनबाबा इंचि येसु इत्ता पोल्ले मोदाटा कोन्नि युनानि पुस्तकालुकुने हिल्ले.

येसु जीवा होळसंतोर

(मत्तयाल 27:45-56; मरकुस 15:33-41; योहान 19:28-30)

44 अद वेलाक पिथ्यटा पन्नेड एगानस्केटाल अथे मूड एगनदाका पूरा बूमिअंता हीकट आता.

45 पोळदुना वेल्गुगुडा दिसाकोटा आता. अस्के येस्सलेम सहरते मनना गुळिता लोप्पो पवित्र जेगा आनि अन्नि जेगांकन्ना एक्को पवित्र जेगाता नड्डुम मत्ता परदा, पोरोटाल हिळुदाका हर्सि रौडु तुकडां आता. § 46 अस्के येसु, “ए पेनबाबा! नना नावा आत्मातुन नीवा कथे अप्पजेपंतन,” ☆ इंचि लगांचि वरगेयसि जीवा होळस्तोर.

47 नूर मंदि सिपाइलुकुनपोरो मनना दरोगाल अगा जर्गतद हळसि, “ई मनकल निजमे नीतिमंतुड आंदुर,” इंचेके पेनदुन तल्सकुत्तोर.

48 अगा हळालय जमा आता अंतोर लोकलुक अगा जर्गतदुनंता हळसि ओर ओरा चातिन तनकुंचेके मल्लिसि होत्तुर.

49 गानि येसुन एरपाट कियानोर अंतोर आनि गालिल एरियाताल ओना पज्जो-पज्जो वातव मुर्ताहक इच्चुर लक्कु नित्तिसि अगा जर्गतदुनंता हळसेक मत्तां. ☆

येसुन गति कियमळ

(मत्तयाल 27:57-61; मरकुस 15:42-47; योहान 19:38-42)

50-51 पजा अगा यहुदिया एरियाता अरिमताइ नाटेनोर वरोर योसेप इनना मनकल मत्तोर, ओर यहुदिलुकुना पंचादिता मेबर मत्तोर. अल्हेने ओर बेस नीतिमंतुड मत्तोर. पंचादिते येसुन हळकना बारेमते येतता निरनायम ओन्क इस्टम मनाहिल्ले. इस्राएल देसेमते पेन दाना राज्येम बस्के निलाहंता इंचि ओर एदुर हळसेक मत्तोर.

52 ई योसेप पिलातुसनगा होंचि येसुना पीनगुन गति कियनाहाटीं तल्कतोर.

53 तल्किसि येसुना पीनगुन कूसुनपोरोटाल हिळु रेहतोर. पजा एक्को दराता हामुर कप्पिडते ओना पीनगुन हुटोर. अल्हा कीसि बंडातुन तुल्हाचि तयार कीता बोंदाते ओसि इरतोर. अद बोंदाते दीनकन्ना मुन्ने बोना पीनगुन इर्ना हिल्लुर.

54 आ रोजु नोमकेमताहाटीं तयारि कियना रोज* आंदु. जेरासेप अथे पोळद होंचि नोमकेम रोज होळियानदे मत्ता.

55 पजा येसुनतोनि गालिल एरियाताल वाता मुर्ताहक पीनगुन ओयनेके बोंदातुन हळनाहाटीं योसेपुना पज्जो होत्तां. इका अव येसुना पीनगुन बोंदाते बल्हा इरतुर अदुनगुडा हळतां.

56 आयंका अव मुर्ताहक अगटाल तिरियसि होंचि बेस गमागमा गब्बु वायना वस्तुक आनि अत्तर निय येसुना पीनगुंक होकानाहाटीं तयार कीतां. गानि वारमता नोमकेम रोजु होळियताहाटीं, आदेस परकारम बद्दे कबळ कियामन्नि इंचि लोने मत्तां.

24

येसु मर्मा जीवाते तेदतोर

(मत्तयाल 28:1-10; मरकुस 16:1-8; योहान 20:1-10)

1 पजा वारमता मोदाता रोजु इत्ते अथारम हक्केरेन पोळद पेयसका मुन्नेन, आ मुर्ताहक अव तयार कीता गमागमा गब्बु वायना वस्तुक पीसि येसुन इरता बोंदातगा एवतां.

2 एवतस्के बोंदाता हरदुक अड्डम ताससि मत्ता बंडा पक्काक दोब्बिसि मत्तदुन अव हळतां.

3 अस्के अव मुर्ताहक लोप्पो होळियसि हळतां अथे अवुंक अगा येसु सामिना पीनगु दिसा हिल्ले.

4 अव इदुना बारेमते इल्हा बल्हा आता इंचि विचारमते मननेकेन अचानक इच्चुर मनकालोर जगा-जगा मेर्सना कपडिं केर्सि अवुनगा वासि निलतुर.

5 अस्के अव इरगा वेरियसि तल्ला हिळु वराहचि दंडम दोस्तां. पजा ओर मनकालोर अवुन इल्हा इत्तुर. “जीवाते मनना मनकन हातोरव्ते बारि प्हकसेक मंतिट?”

6-7 ओर इग्गे हिल्लोर, हामुरताल जीवाते तेदतोर. ओर मीवातोनि गालिल एरियाते मननेके मीकु, ‘मनकना रूपमते पुटोतोन नाकुन पापि मनकालोरा कथे पीसि हियमळ जर्गार, पजा ओर नाकुन कूसुनपोरो वेलाड वाट्सि हळकानुर. गानि नना मूड रोजकुने मर्मा जीवाते तेदकन. इवन्नि निजम आयनुंगें,’ इंचि वेहचि मत्तोर. इद मीकु मति हिल्लेना?” इंचि इत्तुर.

8 अस्के अव मुर्ताहकुंक येसु मुन्ने वेहता पोल्लें मति वातां.

9 पजा अव मुर्ताहक बोंदातगा हळता पोल्लेन बोंदातगाटाल मल्लिसि होंचि पदाकोडु प्रेरितुल्कुंक आनि अगा मत्ता कळमता अंतोर सिस्सुल्कुंक वेहतां.

10 अव मुर्ताहकुने, मगदलेनि नाटेना मरियम, योहानि, याकोबुना यावल मरियम, इका अवुनतोनि मत्ता मुर्ताहक. इवे मुर्ताहक अव हळतव, केंजतव अन्नि पोल्लें प्रेरितुल्कुंक वेहतां.

§ 23:45 अद परदा मत्तस्के लोकलुक गुळि लोप्पोटा अन्नि जेगांकन्ना एक्को पवित्र जेगातगा होना पराकोदुर. ☆ 23:46 बजन संहिता 31:5 ☆ 23:49 योहान 19:25

* 23:54 नोमकेमताहाटीं तयारि कियना रोज यहुदिलुकुना रिवाजते नोमकेम रोजुननाड बतले कबळ कियमळ हिल्ले. अट्टळ-बोळसुळ बतले हिल्ले. अदुनहाटीं ओर उंदि रोज मुन्नेन अन्नि तयार कीकुंतुर. ओरा नोमकेम सुकरारम पोळद होंचि होळियसि सनेरम पोळद होंचि मारता.

11 गानि प्रेरितुलकुंक आ मुरताहकुना पोल्ले अट्टिगेन अनपिस्तां. अदुनहाटीं अबुना पोल्लेन ओर नम्मा हिल्लुर.

12 अयना पत्रु अगटाल तेदसि बौदातेके विततोर. अगा लोप्पो होळियसि हळते, सिराप येसुना पीनगुन हुटसि मत्ता कपडिं बल्हा मत्तव अल्हे अरसि मत्तद दिसता. अगा अल्हा हळसि इल्हा बल्हा आता इंचेके ओनद-ओरे मनसुने विचारम कीसेके मल्सि लोन होत्तोर.

इमाउस नार होनना हरदे येसु दिसंतोर
(मरकुस 16:12-13)

13 अदे रोजु येसुना सिस्युलुकुनाल बोरो इव्वुर इमाउस इनना नार होंचेके मत्तुर. अद नार येस्सलेम सहरताल दग्गेर-दग्गेरा पदाकोडु किलोमिटरक लक्कु मंता.*

14 ओर इव्वुर येस्सलेमते जर्गता अन्नि गटनन बारेमते वळकसेक होंचेके मत्तुर.

15 ओर अव पोल्ले वळकसेके होंचेके मननेके येसु अचानक कुद्दु ओरगा वासि ओरतोनि कलियसि ताकालय दलगतोर.

16 गानि ओर बोरो आंदुर इंचि ओर्क इव्वुर्क एरपाट आयाकोटा कियमळ जर्गता.

17 पजा येसु ओर्कुन, “मिमेट बव पोल्लेना बारेमते वळकसेक ताकसंतरि?” इंचि पूसकीतोर. अस्के ओर इव्वुर दुक्कमते अग्गेन निततुर.

18 पजा ओर इव्वुरगटाल वरोर किलयुपास इननोर, “इव रोजकुने येस्सलेमते जर्गता गटनन बारेमते नीकु एरपाट हिल्लेना? पंडुगुंक वातोरवेटाल इव गटनां तेळियवोन निमे वरोने मंतिना?” इंचि जवाब हीतोर.

19 अस्के येसु, “बव पोल्ले आंदु?” इंचि पूसकीतस्के ओर इल्हा वेहालय दलगतुर. “नासरेत नाटेना येसुना बारेमता पोल्ले आंदु दादा. ओर इंसंटा मनकल मत्तोर गदा, ओर बतल वेहिना, बतल कियिना पेनदा ताकततोने कियुंदुर. ओर पेनदा कबुरतोर मत्तोर. लोकुलकगुडा ओन बेसतोर इंचि इनुंदुर.

20 गानि मावा पेद्दा पेर्मांलोर, अदिकारिलक ओन्क हामुर सिक्सा हियमळ गावाले इंचि ओन पीसि पिलातुसना क्यदे हीतुर. पजा लोकुलक ओन कसुनपोर्री मोल्लां कोह्किसि हक्कतुर.

21 गानि इस्नाएल लोकुलकन पगातोर कयदाल ओरे होळसियानुर इंचि मोमोट आसे पळतोम. इव अन्नि गटनां हन्नेट रोजे जर्गतां.”

22 “अचोने आयका मावावेटाल इचुं मुर्ताहकगुडा माकुन इचंत्रमते अरहतां. अव इय्याला हक्केरेन बौदातगा होंचि मत्तां.

23 गानि अगा अवुंक येसुना पीनगु दिसा हिल्ले. अदुनहाटीं अव मल्सि वासि, माकु पेनदा दूतां दिसतां, अव माकु येसु जीवाते तेदतोर, इंचि वेहतां, इंचेके अव मुर्ताहक माकु वेहतां.

24 अबुना पोल्ले केंजसि मातोनि मत्तोर इचचुर बौदातगा होंचि हळतुर. अयते अव मुर्ताहक बल्हा वेहतांगो अल्हेन मत्ता, येसु अगा मनाहिल्लोर,” इंचि वेहतोर.

25 अस्के येसु ओर्कुन, “अरे बुदिद तक्को लोकरिटा, पेनदा कबुरतोर मुन्ने वेहचि मत्ता पोल्लेन मिमेट बस्के नम्मतिर?

26 पेन लोहता पिसागोटना किरिस्तु स्वर्गमता महिमाते होळियका मुन्ने ओर इवन्नि तकलिप बोगांचेपीता,” इंचि इत्तोर.

27 पजा, म्सांना नियमते, अंतोर पेनदा कबुरतोर रासता पोल्लेने, अल्हेने दर्मसास्त्रमते ओना बारेमते बगा-बगा रासि मंतानो अबुनंता येसु ओर्कु बेस तेळियानाल वेहतोर.

28 पजा ओर्क होनना मत्ता नाटुक दग्गेर एवतुर. अस्के येसुंक इकिचो मुन्नेळक होनानद मंता इत्ताप ओर्क अन्पिस्ता.

29 अदुनहाटीं ओर ओन, “इंदके पोळद होत्ता, इय्याला निमे इगेन महगा आगा दादा!” इंचि वेल्लेन विनंति कीतुर. अस्के येसु ओरगा मननाहाटीं ओरतोनि लोप्पो होत्तोर.

30 पजा येसु ओरतोनि कलियसि गाटो तिनालय उदतस्के, हारितुन पीसि पेनदुक दन्यवाद कीतोर. पजा दान तुकडां कीसि ओर्क हियालय दलगुतोर.

31 अल्हा हारि तुकडां हियानेकेन ओरा इव्वुरा कळक जग्गारा आतां आनि ईर येसु आंदुर इंचि एरपाट कीतुर. गानि येसु ओर्क दिसाकोटा मायम आतोर.

32 पजा ओर इव्वुर ओरद-ओरे, “हरपीसि मनातोनि वळकसेके ताकानेके ओर मनाकु दर्मसास्त्रमते रासि मत्ता पोल्लेना निजम अर्तमतुन बेस तेळियानाल वेहतोर. अस्के ओना पोल्ले केंजसि बचचोन बेस अनपिचचेक मत्ता!” इंचेके वळककुत्तुर.

33 पजा ओर अगटाल बिराना तेदसि मर्रा तिरियसि येस्सलेम होत्तुर. होत्तस्के अगा पदाकोडु मंदि प्रेरितुलक अल्हेने कळमता लोकुलक उंदगा जमा आसि मत्तद ओर हळतुर.

34 अस्के आ जमातोर, “हो, इद निजमे! येसु सामि जीवाते तेदतोर. ओर सिमोन पत्रुंक दिसतोर,” इंचि वळकसेके मत्तुर.

35 अस्के ओर इव्वुरगुडा हरपीसि होननेके बतल-बतल जर्गता, इका येसु हारितुन उराहचि ओर्क हियनेके ओर येसुन बल्हा एरपाट कीतुर, इदंता अंतोर्क वेहतुर.

येसु ओना सिस्युलुकुंक दिसंतोर

(मत्तयाल 28:16-20; मरकुस 16:14-18; योहान 20:19-23; प्रेरितुलकुना कबाहक 1:6-8)

* 24:13 इद वचनमते येसुना सिस्युलुकुनाल इत्ते, सिराप ओना पनेड सिस्युलुकुनाल इंचि आयो गानि येसु वेहताप ताकानोरवेटाल बोरो इव्वुर.

- 36 ओर इव्वुर इव पोल्लें अंटोर्क वेहचेकेन मत्तुर, अच्चोटेन येसु ओरा नड्डुम वासि निलतोर. निल्सि, “मीकु अंटोर्क सांति दोर्कि,” इंचि इत्तोर.
- 37 अस्के ओर अंटोर, ‘मोमोट बूतमतुन हळसंतोम,’ इन्कुचि इरगा वेरियतुर.
- 38 गानि येसु ओर्कुन, “मिमेट इच्चोन बारि वेरियतिर? मीवा मनसुने नावा बारेमते अनमानम बारि वाता?
- 39 नावा कय्क-काल्कुन हुळाट! नाकुन इट्टिस हुळाट, ननाने आंदुन! बूतमकु हव्विं-बोक्कां मन्नों गानि नाकु मंतां,” इंचि इत्तोर.
- 40 इल्हा वळकसेके येसु ओना कय्क-काल्कुन ओर्क हुपिस्तोर.
- 41 अस्के ओर वेल्लेन कुसिते, इल्हा बल्हा आता इंचेके इचंत्रम आसि ओर्क पुरागा विस्वासमगुडा आसेके मनाहिल्ले. येसु ओर्कुन अल्हा हळसि, “मिहगा बतलन्ना तिनालय मंतना?” इंचि पूसकीतोर.
- 42 अस्के ओर ओन्क उंदि बोळस्ता जिम्मा तुकडा हीतुर.
- 43 पजा येसु अद तुकडातुन ओरा मुन्नेन तित्तोर.
- 44 तित्तारित्ते येसु ओर्कु, “इव पोल्लें बव इत्ते, नाकुन हव्वका मुन्ने नना मीवातोनि मत्तन, अस्के मीकु वेहतव आंदुं. मूसाना नियमते, पेनदा कबुरतोर पुस्तकाल्कुने आनि बजन संहिताने रासि मत्ता अन्नि पोल्लें निजम आयनदे मत्ता,” इंचि इत्तोर.
- 45 पजा दर्मसास्त्रमते रासि मत्ता पोल्लें तेळियना इंचि येसु ओर्क तेल्वि हीतोर.
- 46 हीसि ओर्कुन इल्हा इत्तोर. “दर्मसास्त्रमते रासि मत्ताप, किरिस्तुंक वेल्लेन तकलिपकु वासि ओर हायानुर, पजा मूड रोजकुने मर्पा जीवाते तेदानुर इद अदे पोल्ले आंद.
- 47 पापाल्क मापि आयनाहाटीं मनसु मार्सकुनुळ अक्सरम मंता. इदे कबुरतुन येस्सलेमतल सुस्व कीसि, दुनियाता अन्नि देसेल्कुना लोकुकुंक किरिस्तुना अदिकारमते वेहमळ जरगार.
- 48 इव अन्नि पोल्लेंक मिमेटे गवाइ मंतिर.
- 49 इंका नावा पेनबाबाल हीतन इंचि पोल्ले हीता आ पवित्र आत्मातुन नना मिहगा लोहांतन. गानि बदवेरदाका अय्ते स्वर्गमतल पवित्र आत्माता ताकत मीपोरो रेयोनो, अदवेरदाका मिमेट इदे येस्सलेम सहरते मंटु,”[☆] इंचि इत्तोर.

येसुना स्वर्गमते तेदसि होनमळ

(मरकुस 16:19-20; प्रेरितुल्कुना कबाहक 1:9-12)

- 50 पजा येसु ओर्कुन येस्सलेम सहर दग्गेरा मनना बेतानि इनना नाटाहेके ओतोर. ओसि ओर ओना कय तेहचि ओर्कु आसिर्वाद हीतोर.
- 51 ओर्क आसिर्वाद हियानेकेन येसु ओरागटाल लक्कु आतोर. पजा ओन पेन स्वर्गमते तेहाचि ओता.
- 52 अस्के ओर अंटोर येसुंक टोंगरां ऊनसि, मोळिकसि अगटाल वेल्लेन कुसिते येस्सलेम सहर मल्सि होत्तुर.
- 53 पजा ओर बस्केळक गुळिते जमा आसि पेनदा स्तुति कीसेके मनुंदुर.

योहान योहान रासता बेसता कबुर

इद पुस्तकमता बारेमते गिचचो परिचयम

रासतोना पोरोल: योहान

रासता कालम: इसवि सन 85-90

ई पुस्तकमते रासता मेन पोल्ले बतल इत्ते, येसुए पेनदा मर्री आंदुर. पेनदा आत्माता ताकततोनि इद दुनियातोरकुन ओरा पापालकुनाल पिसागोटलय, ओरे इद दुनियाते मनकना रूपमते पुटतोर. बोर अयते येसुनपोर्री विस्वासम इरतोर, सिराप ओरे स्वर्गमते दांतोर. इदे ई पुस्तकमता मेन पोल्ले आंद.

ई पोरोटा पोल्लेन रुजुव कियालय, येसु इद दुनियाते मननेके, लेक्का हिलुवा अद्बूतामाता चिन्हे, कबाहक कीसि हुपिस्तोर. अक्टेटाल एतुन अंगुर पानकमते मारियागोटमळ, मुपै एनिमिदि वर्सानाल बिमारते मत्ता मनकन बेस कियमळ, पुटतस्केटाल गुड्डिड मत्तोनि दिस्सानाल कियमळ, हासोचि मुग्गता लाज्जन जीवाते तेहमळ, हेय्युं वेय्कुना मंदिक गाटो तासमळ, समुद्रमता तळाने एतापोर्री ताकमळ, इवन्नि मंतां.

आकिरते येसु उंदि मेन पोल्ले बतल वेहंतोर इत्ते, “मिमेट नावा पोरोल केंजसि विस्वासम कियाकोन्ना, नना कीता कबाहकुन हळसि अयना नावा विस्वासम कीम्ट. अल्हा कीतिरित्ते, मिमेट पेनबाबनतोनि स्वर्गमते मनांतोर,” इंचि वेहतोर. नीकु दोर्कता पिस्वर नीवद आंद. अदुनहाटीं निरनायमगुडा नीवा कयदेन मंता. इंचि इद पुस्तकमतुन बेस हद्विसि निरनायम येता. पेनदा सांति बस्केळक नीवातोनि मन्निकांटी!

बगा बतल मंता

मोदोल पोल्ले 1:1-18

येसु सेवा कबळ सुख कीतोर 1:19-51

लोकुकुना नड्डुम येसु सेवा कबळ सुख कीतोर 2:1-12:50

येस्सलेमते येसुना आकिर वारम 13:1-19:42

सामि मर्री जीवाते तेदमळ आनि अंतोर्क दिसमळ 20:1-31

गालिलते मर्रीदि मल्का सामिना दिसमळ 21:1-25

पेनदा पोल्ले मनकना रूपमते वाता

1 बतले पुट्टका मुन्ने पोल्ले* मत्ता. आ पोल्ले पेनतोनि मत्ता. आ पोल्ले पेन आंद.

2 आ पोल्ले मुन्नेटाले पेनतोनि कलियसि मत्ता.

3 दुनियाते मननव अन्निटवुन, पेन अदुनहेंदाले पुटिस्ता. अदुन होळसि बतले तयार आयाहिल्ले.

4 अदुन लोपपो पिस्वर मत्ता. आ पिस्वरे अंतोर लोकुकुनाहाटीं वेलगु आता.

5 आ वेलगु हीकटते एलंगता. हीकट वेलगुन बस्केने गेल्ला परो.

6 पेन वरोर कबुरतोनि लोहता, ओन पोरोल योहान.†

7 आ वेलगुना बारेमते ओर गवाइ वेहतस्के ओना पोल्ले केंजसि, अंतोर लोकुलक आ वेलगुनपोर्री विस्वासम कियना, इंचि ओर वेहालय वातोर.

8 आ वेलगु योहान आयोर. गानि लोकुकुकुन आ वेलगुना बारेमते गवाइ वेहालय योहान वातोर.

9 हरेक मनकंक निजमाता वेलगु हियानोर, इद दुनियाते वासेक मत्तोर.

10 ओर इद दुनियातेन मत्तोर. ओनाहेंदाले पेन ई दुनियातुन पुटिस्ता. गानि ई दुनिया ओन एरपाट किया हिल्ले.

11 ओर ओना लोकुकुकुनेन वातोर, गानि कुद्दु ओना लोकुलके‡ ओन ओपुकुना हिल्लुर.

12 गानि बोर अयते ओन ओपुकुचि ओना पोरोल पोरीं विस्वासम कीतुरो, ओर्क अंतोर्क पेनदा मर्क-मियाहक आयना अदिकारम ओर हीतोर.

13 पेनदा मर्क-मियाहक आयमळ§ इत्ते मनकना पीटाल, मनकना इच्चा मत्ताप पुटमळ, मुयदोना इच्चा मत्ताप पुटमळ आयो. गानि पेने ओर्कुन दाना संतानम कीकुंता.

14 आ पोल्ले मनकना रूपमते मारियता. अद कुर्पा, सत्तेमतोनि पुरागा निडिस मना नड्डुम जेगा आता. मोमोट महिमातुन हळतोम. अद महिमा बाबाना वरोर मर्रीना महिमालेसी मत्ता.

15 ओना बारेमते योहान, “नावा पज्जोटाल बोर अयते वायनद मत्तोर, ओर ईरे आंदुर. ओर नाकन्ना वेल्लेन मुन्नेटाल मत्तोर इंचि नाकन्ना ओर वेल्लेन पेद्दोड,” इल्हा लोकुकुकुन लगांचि मोत्कुंचेके गवाइ वेहतोर.

* 1:1 पोल्ले इगे किरिस्तु इंचि अर्तम. † 1:6 योहान ईर बापतिस्मा हियना योहान आंदुर. येसुना प्रेरित आयोर. ‡ 1:11 ओना लोकुलके यहुदि लोकुलक. § 1:13 पेनदा मर्क-मियाहक आयमळ पेन बस्के अयते दाना आत्मातुन मनकालोरगा इरता अस्के ओर दाना मर्क-मियाहक आंतुर.

- 16 ओर अग्नि तीरकुने पुरागा मत्ताहेंका, ओनहेंदाल मनाकु अंटोर्क कुर्पाता आसिर्वाद् पोरो आसिर्वाद् दोर्कता.
 17 मूसाल इनानोनेहेंदाल पेन मनाकु नियमाल्क हीता. गानि कुर्पा, सत्तेम मनाकु येसु किरिस्तुनाहेंदाल दोर्कता.
 18 पेनदुन बस्केने बोरे ह्ळा हिल्लुर. गानि पेनबाबाना संकाते मनना ओना वरोरे मरि, ओरे मनाकु ओन* हुपिस्तोर.

येसुना बारेमते योहानुना गवाइ

(मत्तयाल 3:12; मरकुस 1:1-8; लूकाल 3:15-17)

- 19 “निमे बोन आदिन?” इंचि योहानुन पूसकियालय येस्सलेम सहरते मनना यहुदि पेद्दाल्क, इच्चुर पेर्मालोर्कुन आनि लेवि जातितोर्कुन,† ओनगा लोहतस्के योहानुना गवाइ इल्हा मत्ता.
 20 अस्के, “नना किरिस्तुन आयोन,” इंचि योहान पोल्ले मक्साकोटा कबुल कीतोर.
 21 अस्के पेर्मालोर्क आनि लेवि जातितोर, “अय्ते निमे एलियन आदिना?” इंचि पूसकीतस्के, “नना एलियागुडा आयोन,” इंचि योहान इत्तोर. अस्के ओर, “हिलाकोटे निमे पेनदा कबुरतोना?” इंचि इत्तस्के, “नना पेनदा कबुरतोनिंका आयोन,” इंचि योहान इत्तोर.
 22 पजा ओर लोकल्क ओन मरि, “अय्ते मरि निमे बोन आदिन? माकुन लोहतोर्कुंक मोमोट होंचि बतल वेहकोम? अदुनहाटीं नीवा बारेमते निमे बतल वेहकुंतिन, माकु वेहा,” इंचि पूसकीतोर.
 23 अस्के, यसायाह इनना पेनदा कबुरतोर मुन्ने वेहताप, “सामिनाहाटीं सवरटा हरि तयार कीम्ट, इंचि केडाते मोत्कुनानोना अल्किरतुन ननाने आंदुन,” इंचि योहान ओर्क वेहतोर.
 24-25 योहानुन पूसकियालय वाता परिसि लोकल्क, “निमे किरिस्तुन आयिन, एलियन आयिन, पेनदा कबुरतोनगुडा आयिन. असोत्स्के निमे लोकल्कुंक बारि बापतिस्मा हीसंतिन?” इंचि योहानुन पूसकीतोर.
 26 अस्के योहान, “नना अय्ते बापतिस्मा एततोनि हींतिन. गानि इगे मीवा नड्डुम वरोर नित्तिसि मंतोर, ओन मात्रम मिमेट एरपाट किथ्यिर.
 27 नावा पज्जोटाल वायानोना कादा हेरपुमता नोंडे लेहना विलुवागुडा नाकु हिल्ले,” इंचि योहान जवाब हीतोर.
 28 इवन्नि गटनां योर्दन बेरेटा हब्बेर, पोळ्द पेय्सनेके मनना बेतानि इनना नाटे जर्गतां. अगा योहान बापतिस्मा हियुंदुर.

येसु सामिए पेनदा मरि

- 29 इंकुंदि रोजु योहान, येसु ओनाहेके वायनद ह्ळसि, “अद हुळाट, दुनियातुन पापमता सिक्साताल तप्सानाहाटीं मोक्कु आयाना पेनदा गोरि पोरिनसंतोर!
 30 नना दीनकन्ना मुन्ने वेहचि मत्तन गदा, नावा पज्जोटाल वरोर वायाना मंतोर इंचि! अद ईना बारेमतेन आंद. ओर नाकन्ना वेल्लेन मुन्नेटाल मत्तोर, अदुनहाटीं ओर नाकन्ना पेद्दोड आंदुर.
 31 ओर ओर आंदुर कुद्दु नाके तेळियो. गानि इस्राएलता लोकल्कुंक ओर दिसगोम, इंचि नना एततोनि बापतिस्मा हियालय वातन,” इंचि योहान इत्तोर.
 32-33 मरि योहान येसुना बारेमते इल्हा गवाइ वेहालय दल्गतोर, “नना कुद्दु ओन एरपाट कियार्कोदुन. गानि एततोनि बापतिस्मा हियालय नाकुन लोहता पेने नाकु वेहचि मत्ता, ‘पवित्र आत्मा पावरेम पिट्टे लेहका आसि बोनपोरि अय्ते रेयनेके निमे ह्ळंतिन, ओरे लोकल्कुंक पवित्र आत्माते बापतिस्मा हियानोर आंदुर,’ इंचि. पवित्र आत्मा पावरेम पिट्टे लेहका आसि स्वर्गमताल हिळ रेय्शि, ओनपोरि वासि उदतद नना ह्ळतन.
 34 इंदता नना नावा कळ्कुन निंडा ह्ळतन. अदुनहाटीं, ‘ई पेनदा मरि आंदुर,‡’ इंचि नना गवाइ हीसंतन,” इंचि योहान वेहतोर.

येसुना मोदाटा सिस्युल्क

- 35 इंकुंदि रोज योहान ओना सिस्युल्कुनाल इव्वुर सिस्युल्कुनतोनि नित्तिसि मत्तोर.
 36 अस्के येसु ओना दग्गेटाल होननद ह्ळसि, “हुळाट, पेनदा गोरि पोरि,” इंचि इत्तोर.
 37 योहान इत्ता पोल्ले कैजसि ओना इव्वुर सिस्युल्कु येसुना पज्जो होत्तुर.
 38 येसु पज्जोळ्क तिरियसि ह्ळतोर अस्के ओर इव्वुर ओना पज्जो वायनद ह्ळसि ओर्कुन, “मिमेट बतल पहकसंतरि?” इंचि पूसकीतोर. अस्के ओर, “रब्बी!§ निमे बगा मनांतिन?” इंचि इत्तुर.
 39 अस्के येसु ओर्कुन, “वट ह्ळकिर,” इत्तोर. ओर येसुनतोनि होंचि ओर मनना जेगातुन ह्ळतुर. ह्ळसि येसु मनना जेगातगा एवसि ओनतोनि अग्गेन मत्तुर. अस्के नुलपेळतां नालुं एगसेक मत्ता.
 40 योहानुना पोल्ले कैजसि येसुना पज्जो होत्ता इव्वुर सिस्युल्कुनाल वरोन पोरोल अंदरियल. ई आंद्रेयल, सिमोन पत्रु इनानोना तम्मुर आंदुर.
 41 आंद्रेयल अगटाल सवरगा ओना दादल सिमोन पत्रुंक होंचि कलियतोर. कलियसि, “दादा मोमोट मेसय्यांक इत्ते किरिस्तुंक कलियतोम,” इंचि इत्तोर.
 42 पजा आंद्रेयल ओना दादल सिमोन पत्रुन येसुनगा पीसि वातोर. येसु सिमोनन ह्ळसि, “निमे योहानुना मरि सिमोन आदिन. गानि इंदकेटाल नीकुन केपा इत्ते पत्रु इंचि केयानुर,” इंचि इत्तोर.

* 1:18 ओन पेनदुन. † 1:19 लेवि जातितोर्कुन ई लेविना वंसमतोर आंदुर. ‡ लोकल्क पेनदा गुळिते साप-सपाइ, पेर्माल कबाह्क कीसेक मनांतुर. § 1:34 ई पेनदा मरि आंदुर पेन पेरतोर. § 1:38 रब्बी इद पोल्लेक गुरु इंचि अर्तम.

- 43 इंकुंदि रोज येसु गालिलि राज्येमते होनना निरनायम एततोर. अस्के पिलिपुन कलियसि, “निमे ना पज्जो वा,” इंचि इत्तोर.
- 44 पिलिप, अंदरियल आनि पत्रु ईर मुव्वुरगुडा बेतसेदा इनना सहरतोर आंदुर.
- 45 पजा पिलिप होंचि नतेनलुंक कलियतोर. कलियसि, “बोना बारेमते अयते मूसाल दर्मसास्त्रम रासतोर आनि पेनदा कबुरतोरगुडा रासतुर, ओर माकु दोर्कतोर. ओर नासरेत नाटेना योसेप इनानोना मरिं येसु आंदुर,” इंचि वेहतोर.
- 46 अस्के नतेनल, “अल्हाना! नासरेततालगुडा बेसता पोल्ले वाया परंतंगा?” इंचि इत्तोर. अस्के पिलिप, “अयते निमेन वासि हळा!” इंचि इत्तोर.
- 47 येसु नतेनलुन ओनहेके वायनद हळसि ओना बारेमते, “अद हुळाट, निजम इस्राएल मनकल. ओनालोप्पो बतले आबद्दम पोल्ले हिल्ले,” इंचि इत्तोर.
- 48 अद केंजसि नतेनल, “नना बसंटोन, बसंटोन आयोन नीकु बल्हा एर्का?” इंचि येसुन पूसकीतोर. अस्के येसु, “पिलिप नीकुन केयाका मुन्ने, निमे अंजिर मर्रां हिल्ल मत्तिन. अस्केन नना नीकुन हळतन,” इंचि इत्तोर.
- 49 अस्के नतेनल, “रब्बी, निमे पेनदा मर्रिन आदिन, इस्राएलता राजान आदिन,” इंचि इत्तोर.
- 50 अस्के येसु, “नना नीकुन अंजिर मर्रां हिल्ल मन्नेकेन हळतन इंचि वेहताहेंका नाकुन नम्मसतिना? इंका मुन्ने इदुंकन्ना पेद्दे-पेद्दे पोल्ले हळकिन,” इंचि जवाब हीतोर.
- 51 पजा, “हिके केंजट, नना निजम-निजम वेहासेक! स्वर्गम बैय्यरा आयानद हळकिर, पेनदा दूतां मनकना रूपमते पुटतोना पोरो एक्कानदुन-रेयानदुन हळकिर,” इंचि ओर्क वेहतोर.

2

येसु एतुन अंगुर पानकम कीतोर

- 1 इद जर्गुता मडोव रोजुननाड गालिलि राज्येमता काना इनना नाटे मरमिं मत्तां, आ मरमिने येसुना यावलगुडा मत्ता.
- 2 मरमिंकु येसुन, ओना सिस्स्युलुकुनगुडा केय्सि मत्तुर.
- 3 मरमिने अंगुर पानकम मारतस्के, येसुना यावल, “ओरागटा अंगुर पानकम मारसोत्ता कोको,” इंचि येसुन इत्ता.
- 4 अस्के येसु, “यावा! निमे नाकु बारि वेहचंतिन? नना बतलन्ना कियना वेला इंका वाया हिल्ले,” इंचि इत्तोर.
- 5 पजा येसुना यावल अगा मत्ता जीतागाहकुन, “ईर मीकु बतल वेहंतोर, मिमेट अदे कीम्टु,” इंचि इत्ता.
- 6 यहुदिल्लुकुना सुद्दिदकरन कियाना रिवाज कियनाहाटी अगा बंडातोनि तयार कीतव हारुं पेरपुल्क मत्तां. आ उंद-उंदि पेरपु नूर (100) लीटर्कुना एर पियनलायक मत्ता.
- 7 “आ पेरपुल्लुकुने एर निहाट,” इंचि येसु आ जीतागाहकुंक वेहतोर. अस्के ओर आ पेरपुल्क सीगा निंडानाल निहातुर.
- 8 अस्के येसु, “इंदके उंदि पेरपुनाल इच्चुर एर पीसि, ई कुळपु हियना पेद्दा मनकानगा ओम्टु,” इंचि आ जीतागाहकुंक वेहतोर, अस्के ओर ओतुर.
- 9-10 पजा आ पेद्दा मनकल एतुन गिचचो उंचि हळतोर अयते, अद एर पुरागा अंगुर पानकम आसि मत्ता. इद पानकम बोर तत्तोर, बगाटाल वाता इत्तद आ पेद्दा मनकंके तेळिया हिल्ले गानि आ जीतागाहकुंक मात्रम एर्का मत्ता. पजा आ पेद्दा मनकल मरमिना पेडन केय्सि, “अंटोर अयते पिच्चुर अंगुर पानकम मोट्टा मोदाला हीतुर. लोकुल्क पीरनिंडा उट्टारित्ते, पज्जोटाल सप्पटा पानकम हीतुर. गानि निमे अयते पिच्चुर अंगुर पानकम इदवेरदाकागुडा मिगलिचि इरतिन,” इंचि इत्तोर.
- 11 इल्हा येसु गालिलि राज्येमता काना नाटे इचंत्रम आयना कबळ कीसि, ओना महिमातुन हुपिस्तोर. इद ओना मोट्टा मोदाला चिन्ह आंद. अदुनहाटी ओना सिस्स्युल्क ओन नम्मतुर.
- 12 पजा येसु, ओना यावल, ओना तम्महक, ओना सिस्स्युल्क अंटोर कलियसि कपर्नाहुम इनना सहर होत्तुर. ओर अंटोर अग्गेन कोन्नि रोजुक आगतुर.

येसु गुळितगा दांतोर

(मत्तयाल 21:12-13; मरकुस 11:15-17; लूकाल 19:45-46)

- 13 यहुदि लोकुल्कनद दाटसि होनना पंडुगु* दगेर्क एवसि मत्ता. दानहाटीं येसु येस्सलेम होत्तोर.
- 14 अगा होत्तस्के गुळिता लोप्पो, लोकुल्क पेनदुक मोक्कु हियालय कुर्रां, गोर्रां, पावरेम पिट्टें अमसेक दिसतुर. अचोने आयका सरकार कोत्तां पेनदा गुळिते वाटालय कुदरों इंचि, आ कोत्तां बदलांचि यहुदिल्लुकुना कोत्तां हियानोरगुडा अगा उद्दिदस मत्तद येसु हळतोर.
- 15 हळसि, उंदि नोंडे नोटसि पोट्टे तयार कीसि, गुळिताल अंटोर्कुन गेदुमतोर. गोर्रां, कुर्रन गुळिताल पलाते गेदमिसि, कोत्तां बदलांचानोरा बल्लन बोर्ला वाटसि कोत्तानंता लीकतोर.
- 16 पजा पावरेल्क अम्मनोर्कुन, “इवुन इगेटाल पलाते ओम्टु, नावा पेनबाबाना लोतुन हाटुमलेहका कियमट,” इंचि इत्तोर.

* 1:51 उत्पत्ति 28:12 * 2:13 दाटसि होनना पंडुगु इजिप्त देसेमता गुलामगिरिताल यहुदि लोकुल्कन पेन पेचाहचि तत्ता मतिते, इद पंडुगु कीतुर. गुलामगिरिताल पलाते अरता रोजु इजिप्त देसेमता हेक लोता पेद्दा मर्रिन पेनदा दूता हळुकुता. गानि यहुदिल्लुकुना लोतोर्कुनाल बोरे हाया हिल्लुर.

17 अगा जर्गतदुन ह्ळसि, “नीवा लोता बारेमते नावा जीवा बागा तंलाडसंता,”[☆] इंचि दर्मसास्त्रमते दाविद राजाल रासता पोल्ले ओना सिस्युल्कुंक मति वाता.

18 येसु अल्हा कीतदुन ह्ळसि यहुदि पेद्दाल्क ओनगा वासि, “इल्हा कियना अदिकारम नीकु मंता इंचि मोमोट नम्मनाहाटीं निमे माकु बसोंटा चिन्ह हूपसंतिन?” इंचि पूसकीतुर.

19 अस्के येसु, “इद गुळितुन कूल्हाट, नना मूड रोजकुने मर्रा निलाहंतन,” इंचि जवाब हीतोर.

20 अस्के यहुदि पेद्दाल्क, “इदु गुळितुन दोहालय नल्पै हारं वर्सा दलगतां. अय्ते निमे दीन मूड रोजकुने बल्हा निलाहंतिन?” इंचि पूसकीतुर.

21 गानि येसु मात्रम ओना सतता मेंदुलता गुळिता बारेमते वळ्कतोर.

22 येसु हासि मर्रा जीवाते तेदतस्के ओना सिस्युल्कुंक इद पोल्ले मति वाता. अस्के ओर दर्मसास्त्रमते रासि मत्तादुन आनि येसु वेहता पोल्लेन नम्मुर.

23 दाटसि होनना पंडुगुना वेलाते येसु येस्सलेम सहरते मत्ताहाटीं, वेल्लेओर लोकुल्क ओर कीता अद्बूताल्क ह्ळसि, ओनपोर्रो विस्वासम इरतुर.

24-25 गानि अंतोर लोकुल्क बोर-बसंतोर इंचि येसुंक एरपाट मत्ताहेंका, ओरा बारेमते येसुंक बोर गवाइ वेहना अक्सरम हिल्ले. अदुनहाटीं ओर बोरे लोकुल्कन नम्मा हिल्लोर.

3

मर्रा पुट्टुमळ

1 परिसि लोकुल्कनाल* वरोर निकोदेमस इनना मनकल मत्तोर, ओर यहुदिल्कुना लीडर मत्तोर.

2 ओर उंदि रोजु नर्कटा वेलाक येसुंक वासि कलियतोर. कलियसि, “रब्बी,[†] निमे कियना ई अद्बूतामाता कबाह्क पेनदा तोळ हिल्ला बोरे किया परोर. दीनहेंदाल निमे पेनदाहेंदाल वाता गुरुनिचि मोमोट तेलिचकुत्तोम,” इंचि इत्तोर.

3 अस्के येसु ओन, “नना निजम-निजम वेहासेक, बोरे आयिर, पूना रीतुने मर्रा पुट्टुवा, ओर पेनदा राज्येमतुन ह्ळा परोर,” इंचि वेहतोर.

4 अस्के निकोदेमस, “गानि वरोर मातरल आता मनकल मर्रा बल्हा पुट्टा परंतोर? ओर ओना यावाना पीटे होळियसि मर्रा पुट्टा परांतोरा?” इंचि येसुन पूसकीतोर.

5 अस्के येसु ओन्क इल्हा वेहतोर: “नना निजम-निजम वेहासेक, वरोर मनकल एताल आनि पवित्र आत्माहेंदाल पुट्टुवद,[☆] ओर पेनदा राज्येमते होळिया परोर.

6 मना मेंदुल अय्ते तल्लुर-बाबोनहेंदाल पुट्टा परंता, गानि आत्मा मात्रम सिराप पवित्र आत्माहेंदाले पुट्टा परंता.

7 अदुनहाटीं, मीकु मर्रा पुट्टे पीता, इंचि नना मीकु वेहतद केंजसि निमे इचंत्रम आयमा.

8 बल्हा अय्ते वळि दान इस्टमाताप बेके इत्ते हेक्के वित्तंता, दाना सप्पुडगुडा नीकु केंजा वांता, गानि अद बेंदाल वासंता, बेके होंचंता इत्तद मात्रम नीकु तेळियो. अल्हेन पवित्र आत्माहेंदाल पुट्टा हरेक मनकलगुडा मनंतोर,” इंचि येसु वेहतोर.

9 गानि “इद बल्हा आया परंता?” इंचि निकोदेमस येसुन पूसकीतोर.

10 अस्के येसु ओन्क इल्हा जवाब हीतोर, “निमे अय्ते इस्राएल लोकुल्कुंक कराहना पेद्दा गुरून आंदिन. अयना इव पोल्ले नीकु तेळियोंगां?

11 नना निजम-निजम वेहासेक, माकु तेळियता पोल्लेगें मोमोट वेहांतोम, कळ्कुने ह्ळता पोल्लेना गवाइ मोमोट मीकु वेहांतोम. अयना मिमेट मावा गवाइतुन ओप्कुंचेक हिल्लिर.

12 नना मीकु इद दुनियाता पोल्ले वेहतेने मिमेट नमसेक हिल्लिर. अय्ते नना स्वर्गमता बारेमता पोल्ले वेहते मिमेट बल्हा नम्मंतोर?

13 मनकना रूपमते पुट्टोन नना स्वर्गमताल वातन. इंका नाकु तप्पा स्वर्गमते वेंरे बोरे होना हिल्लुर.

14-15 नाकुन बोर अय्ते विस्वासम कीतोर, ओन्क बस्केळ्क पिस्सना पिस्वर दोर्कगोम इत्ते, मूसाल बल्हा बय्लि बूमिते इत्तोळता तरासुन कोय्यापोर्रो वेलाड वाटसि मत्तोर,[☆] अल्हेने मनकना रूपमते पुट्टोन नाकुनगुडा वेलाड वाटमळ जर्गागोम,” इंचि येसु इत्तोर.

16 पेन दुनियातोरकुन इच्चोन पावरम कीता गदा, दाना वरोरे मर्रिनगुडा ई दुनियातोरहाटीं हीता. ओन नम्मना हरेक मनकल नासडेम आयामान्नि गानि ओन्क बस्केळ्क पिस्सना पिस्वर दोर्कना इंचि अद अल्हा कीता.

17 पेन ई दुनियातोरक सिक्सा हिया वेहालय, दाना मर्रिन ई बूमिपोर्रो लोहा हिल्ले, गानि दुनियातोरकुन पिसागोटालय ओन लोहकीता.

18 ओन बोर अय्ते नम्मंतुरो, ओर्क ओर सिक्सा हिया वेहोर. गानि बोर अय्ते ओन नम्मुरो, पेनदा वरोरे मर्रिनपोर्रो विस्वासम कियवाहेंका ओर्क पेन मुन्नेन सिक्सा हीसि इरता.

19 पेन मुन्नेन बारि सिक्सा हीसि इरता इत्ते, पेनदाहेंदाल उंदि वेलगु दुनियाते वाता. गानि दुनियातोर ओरा तप्पुड कबाह्कुनहेंका वेलगुने पिसनद होळसि हीकटते पिसमळतुने मेचुकुत्तुर.

20 तप्पुड हरदे ताकाना बोरे मनकल आयि, ओर वेलगुन मेचुकुन्नोर. ओना तप्पुड कबाह्क बय्यर दिस अरंतां इंचि ओर वेलगुने वायोर.

[☆] 2:17 बजन संहिता 69:9 ^{*} 3:1 परिसि लोकुल्क यहुदिल्कुना उंदि गेंगुना पोरोल आंद. ई गेंगुना लोकुल्क मर्रा पुट्टुमळतुन नम्मंतुर. [†] 3:2 रब्बी इद इब्रानि पोल्ले आंद, गोंडिते दीना अर्तम गुरू आंद. [☆] 3:5 यहजेकल 36:25-28 [☆] 3:14-15 गिनति 21:9

21 गानि सत्तेम हरदे ताकाना मनकल, ओर कियना कबाहक पेनदा सहायमते आसतां इनकुंचि अब अंटोर्क बय्यर दिस्सनाहाटीं ओर वेलगुने वांतोर.

येसु आनि बापतिस्मा हियना योहान

22 ई पोल्लें मारतस्के, येसु, ओना सिस्स्युल्कु अगटाल यहुदिया राज्येमते होत्तुर. होंचि अगाटा लोकुल्कुंक बापतिस्मा हीसेक कोन्नि रोजकु अग्गेन मत्तुर.

23 सल्लिम इनना नाटेंक दग्गेरा मनना एनोन पोरोलता जेगाते वेल्लेन एर मत्ताहेंका, योहानगुडा अगा बापतिस्मा हियुंदुर. लोकुल्क ओना कयदे बापतिस्मा एतालय अगा वायुंदुर.

24 ई गटनां योहानुन जेलने वाटका मुन्नेने जरगतां.

25 अस्के योहानुना सिस्स्युल्क आनि वरोर यहुदि मनकन नड्डुम सुदिदकरन कियाना रिवाजता बारेमते रोंड-रोंड पोल्लें आतां.

26 दानहाटीं योहानुना सिस्स्युल्कु योहानुनगा वासि, “गुरु, निमे योर्दन बैरेटा हब्बेरा मननेके नीवातोनो बोर अयते मत्तोरो, निमे बोना बारेमते अयते गवाइ हीसि मत्तिनो, ओर इंदके लोकुल्कुंक बापतिस्मा हीसंतोर. अंटोर लोकुल्क ओनहेकेन होंचंतुर,” इंचि वेहतुर.

27 अयते योहान ओर्क इल्हा जवाब हीतोर, “स्वर्गमताल पेन हियवद बोनेके बतल दोर्का परो.

28 नना किरिस्तुन आयोन. नना सिराप ओनाहाटीं हारिं तयार कियालय मुन्ने वातोन आंदुन. नना वेहता पोल्लेंक मिमेट गवाइ मतिर!

29 मरमिन पेडल मत्तागेन मरमिन पेगिड मनंता. नना अयते मरमिन पेडाना पक्काते निलसि मनना ओना दंटागानसंतोन आंदुन. मरमिना पेडल बतलन्ना वेहते अद केंजसि आ दंटागाल वेल्लेन कूस आंतोर. ननागुडा अल्हेन, लोकुल्क ओनगा होननद हूळसि नना पुरागा कुसिते निंडसोत्तन.

30 इंदके ओना कदर वेल्लेन बेर्सगोम, नावा कदर वेल्लेन तक्को आयगोम अचोने!” इंचि योहान वेहतोर.

31 बोर अयते पोरोटाल वातोर, ओर अंटोर्कुंकन्ना पेद्दोड. बोर अयते इद दुनियाते पुटतोर, ओर इदे दुनियातोर आंदुर. अदुनहाटीं ओर ई दुनियाते जरगानवुना बारेमतेन वळकंतोर. गानि बोर अयते स्वर्गमताल वातोर ओर अंटोर्कुंकन्ना पेद्दोड आंदुर.

32 ओर अगा बतल अयते हूळतोर, केंजतोर अदुना बारेमतेन गवाइ वेहंतोर, गानि ओना गवाइतुन बोरे नम्मुर.

33 ओर वेहता गवाइतुन बोर अयते नम्मंतुरो, ओर अंटोर पेने सत्तेम इंचि पक्का कबुल कीतुर.

34 बोने अयते पेन लोहचीता, ओने पेन दाना आत्माते पुरागा निहता. अदुनहाटीं ओर सिराप पेनदा पोल्लेंगे वेहांतोर.

35 पेन बाबल ओना मरिर्न इरगा पावरम कीतोर, इंचि मरिर्ना कयदुक अन्नि अप्पजेपतोर.

36 पेनदा मरिर्न बोर अयते नम्मंतुरो, ओर्क बस्केळक पिस्सना पिस्वर दोर्कता. गानि बोर अयते मरिर्ना पोल्ले केंजुरो, ओर्क बस्केळक पिस्सना पिस्वर अयते दोर्केन दोर्को, गानि ओनपोर्रो पेन होंग पीसि मनंता.

4

सामरिया राज्येमता मुरतळ येसुंक कलियता

1 येसु योहानुंकन्ना एक्को मंदिक बापतिस्मा हीसंतोर, योहानुंकन्ना एक्को मंदितुन ओना सिस्स्युल्क कीसंतोर, इंचि परिसिलकुंक तेळियता.

2 (निजम हूळते, येसु कुद्दु बापतिस्मा हियाकोंदुर, ओना सिस्स्युल्क बापतिस्मा हियुंदुर.)

3 इद पोल्ले सामिक तेळियतस्के ओर यहुदिया राज्येमतुन होळसि, मर्रा गालिल राज्येम होनालय पेयसतोर.

4 गानि इंदके ओन्क सामरिया* इनना राज्येमताल होनापीता.

5 इल्हा येसु सामरिया राज्येमते मनना सुकर इनना सहरते एवतोर. ई सुकर सहर, एनकटा यहुदिल्कुना मातिर दादल याकोब ओना मरिर्न योसेपुंक हीता जेगाक दग्गेरा मत्ता.

6 अगा याकोबुना कुहि मत्ता. वेल्लेन लक्कुनाल ताकसि वाताहेंका नेरबळसि येसु, आ कुहिता पक्काते उद्दुतोर. अस्केळक पिश्यल आसि मत्ता.

7-8 अस्के तिननाहाटीं बतलन्ना तरालय येसुना सिस्स्युल्क नाटेंक होंचि मत्तुर. अदे वेलाते उंदि सामरिया मुरतळ† एतुक वाता. अयते येसु, “उनालय नाकु इच्चो एर हीम,” इंचि अद मुरतटुन तल्कतोर.

9 अस्के अद मुरतळ, “निमे यहुदिन आसिगुडा, उंदि सामरिया मुरतटुन, उनालय एर हीम, इंचेके बल्हा तल्कसंतिन?” इंचि इत्ता. (यहुदिल्क सामरिया लोकुल्कुनतोनो बदे संबंदम ईर्कोंदुर. अदुनहाटीं अद अल्हा इत्ता.)

10 अस्के येसु, “ओक्कला निमे, पेनदा वरमतुन आनि उनालय एर हीम इंचि नीकुन तल्कानोर बोर आंदुरो, एरपाट कीसि मत्ते, निमेने कुद्दु नाकुन एर तल्किस मन्नेन, अस्के नना नीकु पिस्वर हियना एर हीसि मन्नेन,” इंचि इत्तोर.

11 अस्के आ मुरतळ, “कुहि अयते वेल्लेन लोतु मंता महाराज. निहगा एर तोरालय बाल्टिगुडा हिल्ले. इसोर्टस्के ई पिस्वर हियना एर नीकु बल्हा दोर्कार?

12 माकु ई कुहि मावा मातिर दादल याकोब हीतोर. ई कुहिता एर ओर कुद्दु उनुंदुर, इका ओना मर्क, एटिं, गोळकु-गोदां उनुंदुं. अयते निमे ओनकन्ना पेद्दोना?” इंचि पूसकीता.

* 4:4 सामरिया इद उंदि राज्येम पोरोल आंदु. इद राज्येमते मनानोर्कुन यहुदि लोकुल्क सिन्नाग हूळतुर, ओरा नीळागुडा यहुदिल्क दादुर. † 4:7-8 सामरिया मुरतळ सामरिया एरियाते मनना मुरतटुन सामरि मुरतळ इत्तुर.

- 13 अय्ते येसु, “ई एतुन उनना हरेक मनकंक मर्रा तप्पाकोटा दूपांता.
- 14 गानि नना हियना एतुन बोर अय्ते उंटोरो, ओन्क मर्रा बस्केने दूपायो. नना हीता एर ओनालोप्पो बस्केळक ऊरसेके मनना ऊटालेसीं मारियसि, ओन्क बस्केळक पिस्सना पिस्वरतुन हिय्यार,” इंचि जवाब हीतोर.
- 15 अय्ते अद मुरतळ, “अल्हा अय्ते अद एर नाकु हीम महाराज! अद एतुन नना उट्टुनित्ते नाकु बस्केने दूपा आयो, नाकु मर्रा बस्केने एर ओयालय इच्चोर लक्कु वायना अक्सरमगुडा मन्नो,” इंचि इत्ता.
- 16 अस्के येसु दान, “होन, होंचि नीवा मुय्दोन केय्सि तरा होन,” इंचि इत्तोर.
- 17 अस्के अद, “नाकु मुय्दो हिल्लोर,” इंचि इत्तस्के येसु, “निमे निजमे वेहतिन! नीकु मुय्दो हिल्लोर,” इंचि इत्तोर.
- 18 पजा येसु, “अद बल्हा इत्ते, नीकु हेय्युर मुय्दुर मत्तुर, निमे इंदके बोनतोनि अय्ते मंचतिनो ओरगुडा नीवा मुय्दो आयोर. अदुनहाटीं निमे निजम वेहतिन,” इंचि इत्तोर.
- 19 अस्के अद मुरतळ, “महाराज, नीवा पोल्लें केंजसि नाक अय्ते, निमे पेनदा कबुरतोन आंदिन इंचि नाकु तेळियता.
- 20 मावा एनकटा पेदू दाल्क इदे गुट्टापोर्रो मोळकुंदुर. गानि मिमेट बारे, मोळकना असल जेगा येस्सलेमे आंदु इतिर,” इंचि अद मुरतळ येसुन इत्ता.
- 21 अस्के येसु दान्क इल्हा वेहतोर: “बाई नाकुन नम्मा! पेनबाबांक मोळकनाहाटीं इद गुट्टातगा हिलाकोटे येस्सलेम सहर होनना अक्सरम हिल्ले, मिमेट बगानना मोळका परंतिट, इसोटा वेला मुन्ने वासेक मंता.
- 22 मिमेट सामरिया राज्यमतोर मीकु तेळियवादान मोळकंतिर. गानि मुक्ति यहुदिल्लुकुनाहेंदाले वासेक मंता. अदुनहाटीं मोमोट यहुदिल्लुक अय्ते माकु तेळियतदुने मोळकंतोम.
- 23 गानि पेनदुन निजम मोळकानोर पेनदा सत्तेमतुन एरपाट कीसि ओर पेनदा आत्माते मोळकना वेला मुन्ने वासेक मंता. आनि अद वेला एव्से मंतां. बारित्ते इल्हा मोळकानोर्कुने पेन मेचकुंता.
- 24 पेन आत्मा रूपमते मंता. अदुनहाटीं दान मोळकानोर अंतोरगुडा आत्माते, सत्तेमते मोळकना,” इंचि वेहतोर.
- 25 पजा अद मुरतळ, “किरिस्तु इनना मेसय्याल वासेक मंतोर इंचि नाकु एरपाटे. ओर वातस्के माकु अंतोर्क अन्नि पोल्लें वेहानुर,” इंचि येसुन इत्ता.
- 26 अस्के, “नीतोनि वळकानोन, ननाने ओन आंदुन,” इंचि येसु इत्तोर.
- 27 अच्चोटेन अगा ओना सिस्स्युल्क वातुर. येसु उंदि मुरतळतोनि वळकानद हळसि ओर्क वेल्ले इचंत्रम आता. अय्नागानि बारे ओन, “नीकु बतल गावाले? दानतोनि निमे बारि वळकसंतिन?” इंचिगुडा इना हिल्लुर.
- 28 अस्के अद मुरतळ अळकातुन अग्गेन होळसि नाटे होंचि लोकुल्लुकुं वेहता.
- 29 “इदवेरादाका नना कीतव अन्निना बारेमते वरोर मनकल वेहतोर. ओरे किरिस्तु बारे, मिमेट वासि हळट!” इंचि नाटेनोर्कुन इत्ता.
- 30 अस्के नाटेनोर नाटुन होळसि येसु मत्ता जेगातगा वातुर.
- 31 अद मुरतळ नाटे होत्तस्के, सिस्स्युल्क, “गिचचो तिन रब्बी!” इंचि येसुन विनंति कीतुर.
- 32 गानि येसु, “नहगा तिनालय इसंटा तिंडि मंता गदा, अद तिंडिता बारेमते मीकु बतले तेळियो,” इंचि सिस्स्युल्कुन इत्तोर.
- 33 अस्के सिस्स्युल्क, “गुस्नाहाटीं बोरन्ना तिनालय बतलन्ना तत्तुरा?” इंचि ओरद-ओरे वळककुनालय दल्गतुर.
- 34 अस्के येसु ओर्क इल्हा वेहतोर: “नाकुन लोहतोना इच्चा मत्ताप ताकमळ, ओर वेहता कबाहकुन पूरा कियमळ, इदे नावा तिंडि आंद.
- 35 वंजि वीतता पजा, इंका नालुं नेल्क अय्ते वंजि कोताक वांता, इंचि मिमेट इतिर. गानि नना वेहनद केंजट, कळक विच्चि पोलमतेके बेस हळट, पंटा कोताक वासि मंता.
- 36 पंटा कोय्यानोर बूति दोर्किचकुंचेक मंतोर आनि बस्केळक पिस्सना पिस्वरताहाटीं पलम जमा कीसेक मंतोर. दीनहेंदाल वीततोर, कोय्यानोर इव्वुरगुडा कुसिते कलियसि मना परांतुर.
- 37 वरोर वीतंतोर, इंकावरोर कोय्यंतोर इनना वेसुड इगे निजम आंता.
- 38 बोरो वेरेतोर कस्टपळसि पंडिस्ता पंटातुन कोय्यालय नना मीकुन लोहतन. मिमेट कस्टपळा हिल्लिर, गानि ओर कीता कस्टमता पायदा मीकु दोर्कसंता,” इंचि येसु वेहतोर.
- 39 “नना कीतव अन्निना बारेमते वरोर मनकल नाकु वेहतोर,” इंचि वेहता, आ मुरतटा गवाइतुन केंजसि, अद नाटेना वेल्लेन मंदि सामरिया लोकुल्क, येसुनपोर्रो विस्वासम इरतुर.
- 40 सामरिया लोकुल्क येसुनगा वासि, “निमे महगा मन्नु,” इंचि विनंति कीताहेंके, येसु रोंड रोजकु अगा आगतोर.
- 41 येसु कराहता पोल्लें केंजसि इंका वेल्लेन लोकुल्क ओन विस्वासम कीतुर.
- 42 “सिराप निमे वेहताहेंकेन मोमोट येसुन नम्मा हिल्लोम. इंदके कुदुदु मोमोटे ओना पोल्ले केंजसि, दुनियातोर्कुन पिसागोटना निजम किरिस्तु ईर आंदुर इंचि मोमोट विस्वासम कीतोम,” इंचि आ लोकुल्क मुरतटुन इत्तुर.

सायाबुना मर्रिन येसु बेस कीतोर
(मत्तयाल 8:5-13; लुकाल 7:1-10)

43 रोंड रोजकु आतंका, येसु अगटाल गालिल राज्यमते होत्तोर.

44 पेनदा कबुरतोक ओना सतता देसेमते कदर दोर्को, इंचेके येसु मुन्नेने वेहचि मत्तोर.

45 दाटसि होनना पंडुगुनाहाटी गालिलि राज्येमता लोकुल्कगुडा येस्सलेम होंचि मत्तुर. अगा येसु कीतव अन्नि कबाहकुन ओर हळतुर. अदुनहाटी येसु गालिलि राज्येमते वातस्के ओर अंतोर येसुन बेस दग्गेरा कीकृत्तुर.

46 बद नाटे अय्ते येसु एतुन अंगुर पानकम कीतोर, अदे काना नाटे ओर मर्रा होत्तोर. गालिलि राज्येमता कपर्नाहूम इनना नाटे, राजाना हिळु कबळ कियाना वरोर सायाबुना मर्रि बिमार अरसि मत्तोर.

47 अय्ते यहुदिया राज्येमताल गालिलि राज्येमते येसु वातोर इंचि ओन्क कबुर तेळियताहेंका ओर येसुंक कलियालय होत्तोर. होंचि येसुना कालुकुनपोर्रो अरसि, “नावा मर्रि इरगा बिमार आसि हायनाल आसि मंतोर, निमे ओन बेस कियालय नातोन ताका,” इंचि विनंति कीतोर.

48 अस्के येसु, “चिन्हां, इचंन्रमता कबाहक हळवद मिमेट नम्मनोर आयिर!” इंचि ओन इत्तोर.

49 आ सायाब, “ना मर्रि हायका मुन्नेन निमे ताका सामि,” इंचि विनंति इत्तोर.

50 अस्के, “नीवा मर्रि पिस्संतोर, निमे होन,” इंचि येसु ओन इत्तस्के, ओना पोल्लेतुन नम्मिसि ओर तिरियसि होत्तोर.

51 ओर हर्रि पीसि होंचेकेन मत्तोर, नड्डुम हरदेने ओना जीतागाहक कलियसि, “सायाब, नीवा मर्रि बेस आतोर,” इंचि वेहातुर.

52 अस्के “नावा मर्रि बद वेलाक बेस आतोर?” इंचि ओर्कुन पूसकीतोर. “निन्ने पिय्यल उंद एगनेके ओना एळ्कि रेय्ता सायाब!” इंचि ओर वेहतुर.

53 अस्के आ सायाब ओर वेहतद केंजसि, बद वेलाते येसु, “नी मर्रि पिस्संतोर,” इंचि इत्तोर, अदे वेलाते ओना मर्रि बेस आतोर, इंचि ओन्क तेळियसोत्ता. अदुनहाटी ओर, ओना लोतोर अंतोर येसुन नम्मुकुत्तुर.

54 यहुदियाताल गालिलिते वासि येसु कीतद इद रोंडो इचंन्रमायना चिन्हे आंद.

5

बेतसेदा सेरवुना ओड्डुंक मत्ता हेय्युं गुडसें

1 पजा येसु यहुदिल्कुना उंदि पंडुगुनाहाटी येस्सलेम सहर होत्तोर.

2 येस्सलेम सहरते गोर्रि दरबाजा इनना जेगातगा उंदि सेरवु मंता, दान इब्रानि बासाते बेतेस्दा इंचि इंतुर. आ सेरवुना ओड्डुंक हेय्युं गुडसें वाटसि मत्ता.

3-4 बटो उंदि वेलाते पेनदा दूता वासि अद एतुन लोपुंदु, अल्हा लोपतस्के, अद एते बोर मनकल अय्ते मुन्ने होळियंतोर ओर मनकल ओना बसोंटा बिमार अयना बेस आयुंदु. अदुनहाटी पेनदा दूता एतुन बस्के लोपार इंचि एदुर हळसेक गुड्डोर्कु, गूनोर्क, कुंटोर्क, लकवा बिमारतोर इल्हा वेल्लेन मंदि आ गुडसेने जेगा पीसि मनुंदुर.*

5 अगा मत्तोरव्टे मुपै एनिमिदि वर्सानाल बिमार मत्ता वरोर मनकल मत्तोर.

6 ओर अगा मींडसि मत्तद येसु हळतोर. हळसि ओर वेल्लेन वर्सानाल कुक्कि पीसि मत्तद एरपाट कीसि ओनगा होत्तोर. होंचि ओन, “नीकु बिमारताल बेस आयानद मंतना?” इंचि पूसकीतोर.

7 अस्के आ मनकल, “नाकु बेस आयगोम इंचि मंता सामि! गानि बतल कीकन? एतुन लोपतस्के नाकुन आ एतगा ओयालय नहगा बोरे हिल्लुर. एतुन लोपतस्के मेल्लगा-मेल्लगा नना होननदाका बोरन्ना वरोर नाकन्ना मुन्नेन होळियंतोर,” इंचि वेहतोर.

8 अस्के येसु ओन, “अय्ते तेदा! तेदसि नीवा कटुल पीसि ताकसेक होन,” इंचि इत्तोर.

9 येसु ओन अल्हा इत्ता इन्मळे आ मनकल बेस आतोर. आसि, ओना कटुल पीसि ताकसेक होत्तोर. इद गटना यहुदिल्कुना नोमकेम रोजुननाड जर्गता.

10 अदुनहाटी बिमारताल बेस आता मनकन, “नोमकेम रोजुने निमे इल्हा कटुल तेहचि ताकमळ मावा दर्मसास्त्रम परकारम न्यायम आयो,” इंचि यहुदि पेद्दाल्क इत्तुर.

11 जवाबुने आ मनकल, “नाकुन बेस कीतोरे, नाकुन नीवा कटुल पीसि ताकसि होन इत्तोर,” इंचि वेहतोर.

12 अस्के “नीकुन कटुल पीसि ताका इंचि वेहतोर, ओर बोर आंदुर?” इंचि यहुदि पेद्दाल्क ओन पूसकीतुर.

13 गानि अगा वेल्लेन मंदि मत्तुर, येसुगुडा अगटाल पेय्सि होत्तोर. अदुनहाटी ओन बेस कीतोर बोर आंदुर इंचि, आ बेस आता मनकंकगुडा तेळिया हिल्ले.

14 इदंता आतंका येसु आ मनकंक गुळिते कलियसि, “हळा, निमे इंदके बेस आतिन! मर्रा पापि कबाहकुना जोलिक होन्मा. होत्तिनित्ते दीनकन्ना एक्को बिमार अर्रतिन,” इंचि वेहतोर.

15 पजा आ मनकल यहुदिल्कुना पेद्दाल्कुक कलियसि, “नाकुन बिमारताल बेस कीतोर, येसु आंदुर,” इंचि वेहतोर.

16 येसु इसोंटा कबाहक नोमकेम रोजुननाड कीतोर इंचि यहुदि पेद्दाल्क येसुन तकलिप कियालय दलगतुर.

17 अस्के येसु ओर्कुन, “ना बाबाल बस्केळक कबळ कीसेकेने मनंतोर. अदुनहाटी ननागुडा कबळ कीसेकेने मनंतन,” इंचि इत्तोर.

* 5:3-4 इद वचनम कोन्नि पांडु लिपिने हिल्ले.

18 येसु इल्हा इत्ताहेंका यहुदि पेद्दाल्क ओन हक्कालय उंदे पट्टु पीतुर. बारित्ते नोमकेम रोजुने कबळ कियानायो इत्ता नियमतुन ओर हेळाहतोर. आनि पोरोटाल, पेनदुन “ना बाबाल,” इंचि वेहचि “नना पेनदुक समानमतोन” इंचि ओनद ओरे वेहकुत्तोर.

येसुनगा पेनदा अदिकारम मंता

19 अस्के येसु ओर्क इल्हा वेहतोर: “नना मीकु निजम-निजम वेहचंतन, मर्री ओनद-ओर बतले किय्योर. गानि बाबो बतल-बतल अय्ते कीतोर, बाबो कियनदुन हळसि मर्री अल्हेन कीतोर.

20 मर्रीनपोरो बाबोक वेल्लेन पावरम मंता, अदुनहाटी ओर कियानव अन्नि कबाहकुन ओना मर्रीक हुपिचंचंतोर. वायना रोजकुने इवुंकन्ना पेद्दा-पेद्दा कबाहक कीसि मर्रीक हुप्सना मंता. अस्के मिमेट हळसि अंतोर इंचंत्रम आकिर.

21 बल्हा अय्ते बाबो हातोर्कुन मर्री जीवाते तेहंतोर, अल्हेन मर्रीगुडा ओन्क इस्टमातोर्कुन मर्री जीवाते तेहंतोर.

22-23 बाबोनद अंतोर कदर कीतुर. अल्हेने मर्रीना कदरगुडा अंतोर लोकुल्क कियना इंचि बाबाल बोन्दे न्यायम कियार्कोटा, न्यायम कियना पूरा अदिकारम मर्रीक हीतोर. मर्रीना कदर बोर किय्युरो, ओर मर्रीन लोहचीता बाबाना कदरगुडा किय्युर.

24 नना निजम-निजम वेहासेक, बोर अय्ते नना वेहना पोल्लेन केंजसि नाकुन लोहतोना पोरो विस्वासम ईरंतोर, ओन्क बस्केळक पिस्सना पिस्वर दोर्कता. पेन ओन्क सिक्साता आदेस हिय्यो, ओर हामुरताल पेय्से पिस्वरतुन संपादिचकुंतोर.

25 नना निजम-निजम वेहासेक, हासोत्तोरगुडा पेनदा मर्रीना अल्किर केंजना वेला वासेक मंता. अद अय्ते वासे मंता. बोर अय्ते अद अल्किरतुन केंजांतुर, ओर्क पिस्वर दोर्कार.

26 बल्हा अय्ते पेनबाबाल कुद्दु पिस्वरता मालक आंदुर, अल्हेन मर्रीनगुडा पिस्वरता मालक कीतोर.

27 इचचोने आयाका, पेनबाबाना मर्री मनकना रूपमते पुटताहाटी ओन्क लोकुल्कुना न्यायम कियना अदिकारम हीतोर.

28 मिमेट इदुन केंजसि इंचंत्रम आयमटु. बारित्ते मुन्ने इसोटा वेला वायनद मंता गदा, हातोर अंतोर पेनदा मर्रीना अल्किर केंजानुर.

29 पजा बोर अय्ते बेस पुन्नेम कबाहक कीतुरो ओर अंतोर बस्केळक पिस्सना पिस्वरहाटी मर्री जीवाते तेदानुर. आनि पापि कबाहक कीतोर बारे सिक्साताहाटी मर्री जीवाते तेदानुर.

30 नावद नना बतले कियार्पेन. पेनबाबानाहेंदाल केंजतापे न्यायम कीतन. नना नावा इच्चातुन पूरा कियालय वाया हिल्लेन, नाकुन लोहचीता पेनबाबाना इच्चातुन पूरा कियालय वातन. अदुनहाटी नना कियना न्यायम सत्तेम मंता.”

येसु गवाइ वेहांतोर

31 “नावा बारेमते ननाने गवाइ वेहकुत्ते, नावा गवाइ निजमतद आयो.

32 गानि नावा बारेमते गवाइ वेहालय इंकावरोर मंतोर. ओर वेहना गवाइ सत्तेम इंचि नाक एरपाट मंता.

33 मिमेट मीवा मनकालोर्कुन योहाननेके लोहातिर. ओर मीकु सत्तेमता गवाइ वेहतुर.

34 मीकु मुक्ति दोर्कगोम, इंचि इव पोल्लें नना मीकु वेहासेक मंतन अचोने. गानि नावा बारेमते लोकुल्कुना गवाइता अक्सरम नाकु हिल्ले.

35 योहान वेडसिलेहका पोत्सि मीकु वेलगु हीतोर. मीकुगुडा गडसेमताहाटी आ वेलगुने कूस मनालय बेस अनपिस्ता.

36 गानि योहानुना गवाइकन्ना पेद्दा गवाइ नहगा मंता. बारित्ते पूरा कियनाहाटी पेनबाबाल नाकु हीता कबाहक आनि नना कियना कबाहक. इवे पेनबाबाल नाकुन लोहतोर इत्तादांकु गवाइ मंतां.

37 नाकुन लोहचीता पेनबाबाल कुद्दु नावा बारेमते गवाइ वेहतोर. गानि मिमेट बस्केने ओना अल्किर केंजा हिल्लिर, बस्केने ओना रूपमतुन हळा हिल्लिर.

38 अचोने आयका ओर लोहतोना पोरो मिमेट विस्वासम ईस्वाहेंका, ओर कराहता पोल्लें मीवा मनसुना लोप्पो मना पर्पो.

39 बस्केळक पिस्सना पिस्वर दर्मसास्त्रमहेंदाल दोर्कता इंचि मिमेट अव्टे पहकट, अदे दर्मसास्त्रम नावा बारेमते गवाइ वेहचंता.

40 अयना, बस्केळक पिस्सना पिस्वरहाटी मिमेट नहगा वायालय हळिर.

41 नना मनकालोराहेंदाल कदर कोरोन.

42 बारित्ते मिमेट बसंतोर आदिरो नाकु एरपाटे. मीलोप्पो पेनदाहाटी पावरम हिल्ले.

43 नना नावा बाबाना पोरोल्ले वातन, गानि मिमेट नाकुन स्विकार कियार् हिल्लिर. गानि बोरन्ना वैरंतोर, ओना पोरोल्ले ओरे वायानय्ते मिमेट ओन स्विकार कीतिर.

44 मीवद मिमेटे कदर कीकुनमळ इत्ते मीकु वेल्लेन इस्टम. गानि पेनदाहेंदाल दोर्कना कदरतुन मात्रम बोरे पहका हळिर. असोत्सके मिमेट नापोरो बल्हा विस्वासम कियार् परांतिर?

45 बाबाना मुन्ने नना मीपोरो तप्पु दोसतन इंचि इनकुन्मट. मिमेट अय्ते मूसाना पोरो आसे पडसि मनतिर, आ मूसाले मीवापोरो तप्पु दोसंतोर.

46 मिमेटगिंटा मूसान पोरो विस्वासम कियानय्ते, नावापोरो इंका विस्वासम कीतिर, बारित्ते मूसाल नावा बारेमते रासतोर.

47 मूसाल रासता पोल्लेन पोरोगुडा मीवा विस्वासम हिल्ले अय्ते, नावा पोल्लेन मिमेट बल्हा नमकिर?” इंचि येसु इत्तोर.

6

येसु हेय्युं वेय्कुना मंदिक गाटो दोसमळ

(मत्तयाल 14:13-21; मरकुस 6:30-44; लूकाल 9:10-17)

- 1 अद आता पजा येसु गालिल इनना समुद्रमतन* दाटसि हब्बेर ओड्डुंक होत्तोर.
- 2 बिमार मत्तोर्कुन बेस कीसि येसु इचंन्रम आयाना कबाहक कीतोर. आ कबाहकुन हळसि, वेल्लेन मंदि ओना पज्जो-पज्जो वासेक मत्तुर.
- 3 पजा येसु गुट्टापोरो एकासि, अगा ओना सिस्स्युल्कुनतोनि उद्तोर.
- 4 अव रोजकुने यहूदिलकुना दाटसि होनना पंडुगु दग्गेर्क एवसि मत्ता.
- 5 पजा येसु अगटाल हळतोरय्ते, वेल्लेन मंदि ओनहेके वायनद ओन्क दिसतुर. अस्के, “ईरकु अंटोर्क तिनालय तिडि मनम बगाटाल अस्सि तरकोम?” इंचि पिलिपुन पूसकीतोर.
- 6 येसुंक अन्नि एर्के मत्ता गानि पिलिपुना परिकसा हळालय, ओन इसोटा सवाल पूसकीतोर.
- 7 अस्के पिलिपु, “ईराहाटी रोंड न्हकु एंडि रूपेना† हारि अस्सि तच्चि तासिना, वरो-वरोक उंद-उंदि मुक्कागुडा एव्वा परो,” इंचि जवाब इत्तोर.
- 8-9 अस्के येसुना सिस्स्युल्कुनाल वरोर सिस्स्युड, सिमोन पन्नना तम्मुर अंदरियल‡ इनानोर, “इगे वरोर सिन्ने पेडानगा हेय्युं जोन्ना हारि, रोंड बोळस्ता जिम्मां मंतां, गानि इच्चा वेल्ले मंदिक इव बगा हालनू?” इंचि येसुन इत्तोर.
- 10 अस्के येसु, “अंटोर लोकुल्कुन उद्दालय वेहाट,” इंचि इत्तोर. अगा वेल्लेन पच्चाटा जाडि मत्ता. अगा उदतोरवेटाल दग्गेर-दग्गेर हेय्युं वेय्कुना मंदि मांडुसे मत्तुर.
- 11 पजा येसु आ हारिन कय्दे पीसि पेनदुक दन्यवाद कीतोर. पजा आ हारिन उद्दतोर अंटोर्क वाटालय ओना सिस्स्युल्कुंक हीतोर. जिम्मानगुडा अल्हेन कीतोर. अंटोर पीरनिंडा तित्तुर.
- 12 ओर अंटोर पीरनिंडा तित्तंका, “बतंगे उततगा पोच्चमन्नि, मिगुलतव अन्नि जमा कीम्पु,” इंचि येसु सिस्स्युल्कुंक वेहतोर.
- 13 तिनालय लोकुल्कुंक हीता हेय्युं हारिनाल मयतव तुकडें जमा कीते, पन्नेड तट्टां निडतां.
- 14 येसु कीता इसोटा अद्बूतामाता चिन्हतुन हळसि लोकुल्क, “निजमे! इद दुनियाते वरोर पेनदा कबुरतोर वायानोर मत्तोर, ओर ईर आंदुर,”✧ इंचि इनालय दल्युतुर.
- 15 पजा लोकुल्क ओन राजाल कियालय बल्हेना बल्मि कीतुर, इंचि ओन्क तेळियता. अदुनहाटी ओर वरोरे मर्ना गुट्टातेके पेय्सि होत्तोर.

येसु एतापोरो ताकंतोर

(मत्तयाल 14:22-27; मरकुस 6:45-52)

- 16 नुलपेटा वेलाक येसुना सिस्स्युल्क गालिल समुद्रमता ओड्डुंक होत्तुर.
- 17 हीकट अय्नागानि येसु वायाहिल्लोर इंचि सिस्स्युल्क उंदि डोंगाते उद्दिस समुद्रमता हब्बेटा बाजुंक मनना कपर्नाहुम इनना सहर होनालय पेय्स्तुर.
- 18 वळि इरगा वासेक मत्ताहेका समुद्रमते पेद्दा-पेद्दा तडां तेदसेक मत्तां.
- 19 ओरा डोंगा हेय्युं-हासं किलोमिटर्क मुन्ने होत्ता बारे, अचानक येसु एतापोरो ताकसेके डोंगा दग्गेरा वायानद ओर हळसि, इरगा वेरियतुर.
- 20 गानि येसु, “ननाने आंदुन! वेरियमट,” इंचि ओर्कुन इत्तोर.
- 21 इत्तारित्ते ओर कूस आसि, येसुन डोंगाते उपिचकुनालय तयार आतुर. अचचोटेन ओर बगा अय्ते होनालय पेय्स्तुर अद जेगातगा ओरा डोंगा एवता.

लोकुल्क येसुन पहकंतुर

- 22-23 येसु सामि पेनदुक दन्यवाद कीसि, अंटोर्क हारि हीता जेगातगा ओन्क कलियालय लोकुल्क इंकुंदि रोजु पंगासि जमा आयालय दल्युतुर. अगा सिराप उंदे डोंगा मत्ता. अद डोंगाते अय्ते सिराप ओना सिस्स्युल्के उद्दिस होत्तुर. येसु ओरतोनि होना हिल्लोर. इंचि आ लोकुल्कुंक एरपाटे मत्ता. गानि पज्जोटाल तिबेरिया नाटेनाल वैरे इच्चुं डोंगां अगा वासि मत्तां.
- 24 पजा आ लोकुल्क येसुन, ओना सिस्स्युल्कुन पहकतुर, गानि ओर्क बोरे दोर्का हिल्लुर. अदुनहाटी ओर लोकुल्क अगा मत्ता डोंगाने उद्दिस येसुन पहकालय कपर्नाहुम होत्तुर.

पिस्वर हियना तिडि येसु आंदुर

- 25 पजा लोकुल्क हब्बेर ओड्डु एवतंका येसुन अगा हळसि, “रब्बी! निमे इगे बस्के वातिन?” इंचि पूसकीतुर.

* 6:1 गालिल इनना समुद्रम इद उंदि पेद्दे सेरु आंद. † 6:7 रोंड न्हकु एंडि रूपे मना कोत्तना लेक्काते, वरोर कृतिगाना एनिमिदि नेल्कुना जीतमतचोचन आंता. ‡ 6:8-9 अंदरियल ईर सिमोन पन्नना तम्मुर आंदुर. ✧ 6:14 व्यवस्ताविवरन 18:15-18

26 अस्के येसु इल्हा वळकालय दलगतोर: “नना निजम-निजम वेहासेक, नना कीता अद्बूतामाता चिन्हन हळसि मिमेट नाकुन पहकसेक हिल्लिर. नना मीकु पीरनिडा तिडि तासतन इंचि नाकुन पहकसंतरि.

27 हवसोननसोंटा तिडि पज्जो मिमेट होनमट. दानकु बदुल, बस्केळक पिस्सना पिस्वर हियानद, बस्केने हव्वाकोंटा मनना तिडितुन पहकट. अदुन हियना अदिकारमता सिक्का पेनबाबाल नापोरो वाटतोर, अदुनहाटी असोंटा तिडि, मनकना रूपमते पुटतोन नना, मीकु हिया परांतन.”

28 अस्के लोकुल्क, “अय्ते पेनदा कबळ कियालय, मोमोट बतल कियना?” इंचि येसुन पूसकीतुर.

29 पूसकीतस्के, “पेन बोन अय्ते लोहतनो, ओनपोरो मिमेट विस्वासम इरंट,” इंचि येसु जवाब हीतोर.

30-31 पजा लोकुल्क, “मावा एनकटा पेद्दाल्क इजिप्त देसेमताल वायनेके बय्लि जेगातगा मन्ना इनना तिडि तित्तर. ओर्क तिनालय तिडि मूसाल स्वर्गमताल हीतोर, ✨ इंचि दर्मसास्त्रमते रासि मत्तापे ओर्क आ तिडि तिनालय दोर्कुता. अय्ते मोमोट नीपोरो विस्वासम इरल्य इंदके निमे माकु बसोंटा चिन्ह हृप्संतिन?” इंचि पूसकीतुर.

32 अस्के येसु, “नना निजम-निजम वेहासेक, स्वर्गमताल तिडितुन मीकु हीतोर मूसाल आयोर, नावा बाबाल हीतोर. इंदके नावा बाबाल स्वर्गमताल वायना आ निजमाता तिडितुन मीकु हीसंतोर.

33 बारित्ते पेनबाबाल स्वर्गमताल लोहतदे, इद दुनियातोरक पिस्वरतुन हीता. पेनबाबाल लोहचीता निजमाता तिडि अदे आंद,” इंचि वेहतोर.

34 अस्के लोकुल्क, “अय्ते अद तिडितुन माकु बस्केळक हीम सामि,” इंचि इत्तुर.

35 अस्के येसु ओर्क इल्हा वेहालय दलगतोर, “पिस्वर हियना तिडि ननाने आंदुन. नहगा बोर अय्ते वांतुर, ओर्क बस्केने करवेस्सो. बोर अय्ते नापोरो विस्वासम इरंतुर, ओर्क बस्केने दूपा आयो.

36 गानि नना मीकु मुन्नेन वेहताप, मिमेट नाकुन हळसिगुडा नावापोरो विस्वासम इरा हिल्लिर.

37 अयना बाबाल बोर-बोर्कुन अय्ते नाकु अप्पजेप्पंतोर, ओरे नहगा वांतुर. नहगा वायानोर्कुन नना बस्केने मलाहचि लोहोन.

38 बारित्ते नना नावा इच्चा पूरा कियालय स्वर्गमताल हिळु रेय्सि वाया हिल्लेन. नाकुन लोहतोना इच्चातुन पूरा कियालय नना वातन.

39 नाकुन लोहतोना इच्चा बतल इत्ते, नाकु अप्पजेपतोरकुन वरोरगुडा तप्सोनाकोंटा हळना आनि आकिरता रोजु ओर्कुन मरा जीवाते तेहना.

40 नावा बाबाना इच्चा बतल मंता इत्ते, मरिनेके हळसि ओनपोरो विस्वासम कियानोर अंतोरक बस्केळक पिस्सना पिस्वर दोर्कना. अल्हा बोर अय्ते विस्वासम इरंतुरो, ओर्कुन नना आकिरता रोजुने मरा जीवाते तेहांतन,” इंचि येसु ओर्क वेहतोर.

41-42 “स्वर्गमताल रेय्ता तिडि ननाने आंदुन,” इंचि येसु इत्तस्के यहूदि पेद्दाल्क ओरद ओरे येसुना बारेमते, “ओरे! इर योसेप इनानोना मरि आयोरा! इना तल्लुर-बाबो मनाकु एरपाट. अय्ते इर, नना स्वर्गमताल वातोनांदुन, इंचि बल्हा इंचंतोर?” इंचेके गुल्गालय दलगतुर.

43 अस्के येसु ओर्कुन इल्हा इत्तोर, “मीवद मिमेटे गुल्गकुनमट.

44 नाकुन लोहचीता बाबाल, बोना मनसुने अय्ते नहगा वायना इच्चातुन पुटसंतोर, ओरे नहगा वांतुर. वेरे बोरे वाया पस्स. आकिर रोजुने नहगा वातोर्कुन ननाने जीवाते तेहांतन.

45 पेनदा कबुरतोर पुस्तकाल्कुने, अंतोर लोकुल्कुंक पेने कराहंता, ✨ इंचि रासि मंता. बोर अय्ते बाबाना पोल्ले केंजांतुर, करियांतुर, ओर अंतोर नहगा वांतुर.

46 पेनबाबान बोरे हळा हिल्लुर. नना अगटाल वातोनांदुन, ननाने हळतन.

47 नना निजम-निजम वेहासेक, नापोरो विस्वासम कीतोन्कु बस्केळक पिस्सना पिस्वर दोर्कते इनकुंट.

48 पिस्वर हियना तिडि ननाने आंद.

49 मीवा एनकटा पेद्दाल्क बय्लि बूमिते पेन अरहता मन्ना इनना तिडि तित्तर गानि हातुर.

50 गानि स्वर्गमताल हिळु वाता तिडितुन तित्तोर, बस्केने हायोर.

51 स्वर्गमताल वाता जीवाते मनना तिडि ननाने आंद. बोर अय्ते ई तिडितुन तित्तुर, ओर बस्केळक जीवातेन मनांतोर. ई तिडि ना मेंदुल आंद, नना इद मेंदुलतुन दुनियातोर पिस्वरताहाटी हीतन,” इंचि इत्तोर.

52 इद केंजसि यहूदिल्क, “ओर मनकल ओना मेंदुलतुन मनाकु तिनालय बल्हा हिया परंतोर आयो?” इंचि ओरद-ओरे वदुरकुनालय दलगतुर.

53 अस्के येसु, “हिके केंजट, निजम नना वेहांतन. मिमेट, मनकना रूपमते पुट्तोना, मेंदुलतुन तिन्वा, ओना नेत्तुरतुन उन्वा, मीकु पिस्वर हिल्ले.

54 गानि बोर अय्ते नावा मेंदुलतुन तित्तुर, नावा नेत्तुरतुन उंटुर, ओर्क बस्केळक पिस्सना पिस्वर दोर्कता. आकिर रोजुने ओर्कुन नना जीवाते तेहांतन.

55 बारित्ते नावा मेंदुल निजमाता तिडि आनि नावा नेत्तुर निजमाता उनानद आंद.

56 बोर अय्ते नावा मेंदुलतुन तित्तुर, नावा नेत्तुरतुन उंटुर, ओर नातोनि, नना ओरतोनि निलसि मनंतन.

57 नाकुन लोहता जीवाते मनना नावा बाबाना ताकततोनि, नना जीवाते मंतन. अल्हेन बोर अय्ते नावा मेंदुलतुन तित्तुर, ओर नाहेंदाल जीवाते मनांतुर.

58 स्वर्गमताल हिळ वाता निजम तिंडि ननाने आंदुन. मीवा एनकटा पेद् दाल्क मन्ना इनना तिंडि तिचिगुडा हातुर, गानि इद तिंडितुन तिनानोर मात्रम बस्केळक जीवाते मनांतुर,” इंचि येसु ओर्क वेहतोर.

59 कपर्नाहम सहरता दर्मासास्त्रम कराहना लोते, कराहनेके येसु इव पोल्लें वेहतोर.

वेल्लेटुर सिस्स्युल्क येसुन होळसींतुर

60 इव पोल्लें केंजसि, येसुना सिस्स्युल्कुनाल वेल्ले मंदि सिस्स्युल्क, “इव पोल्लें तेळियालय वेल्लेन कस्टम मंता, इवुन बोर केंजंतुर?” इंचि इनालय दल्गातुर.

61 सिस्स्युल्क गुल्गकुंचंतुर इंचि येसु एरपाट कीसि ओरतोनि इल्हा वळकालय दल्गतोर, “मीकु इव पोल्लें केंजसि, कस्टमासंतना?

62 अय्ते मनकना रूपमते पुटतोन नना, मुन्ने बगा मत्तन अगा मल्सि होननेके ह्ळानय्ते, अस्के मिमेट बतल इंदकरो मरि?

63 मेंदुल पिस्वर हिया परो, दानकु बतल विल्लुवा हिल्ले. सिराप पेनदा आत्मे पिस्वर हीता. नना वेहना पोल्लेंगे आत्मा आनि पिस्वर आंद.

64 गानि मीलोपुपो इच्चुर नावा पोल्लेन नमवोरगुडा मंतुर,” इंचि इत्तोर. बारित्ते, ओन नम्मनोर बोर, ओन वेंरे लोकुल्कुंक पीसि हियानोर बोर? इत्तद येसुंक मुन्नेटाले एर्का मंता.

65 पजा येसु, “नना मीकु वेहचि मत्तन गदा, बाबाल लोहवद बोर नहगा वाया पस् इंचि. अदुनहाटीगे इव अन्नि पोल्लें नना मीकु वेहतन,” इंचि इत्तोर.

66 अस्केटाल वेल्लेटुर येसुना सिस्स्युल्क येसुन होळसि मल्सि होत्तुर, मरी बस्केने ओना पज्जो होना हिल्लुर.

67 अदुनहाटी येसु पन्नेड सिस्स्युल्कुन, “मिमेटगुडा मल्सि होनालय ह्ळसंतिरा?” इंचि पूसकीतोर.

68 अस्के सिमोन पत्रु, “सामि, मोमोट इंका बोनगा दाकोम? बस्केळक पिस्सना पिस्वर हियना पोल्लें अय्ते निहागेन मंतां!

69 पेन लोहता पवित्रुन निमेन आदिन इंचि मोमोट विस्वासम कीसि एरपाट कीतोम,” इंचि इत्तोर.

70 अस्के येसु, “मीकुन पन्नेड मंदितुन ननाने पेरतन, अय्नागानि मी अव्ते वरोर देय्यम मंतोर,” इंचि सिस्स्युल्कुन इत्तोर.

71 येसु इद पोल्ले इस्कारियोत नाटेना सिमोनना मरि यहुदाना बारेमते वळकतोर. पन्नेड मंदि सिस्स्युल्कुनाल ओर वरोरे येसुन पज्जोटाल दोकाते पीसि हियनोर मत्तोर.

7

येसुन ओना तम्मुहकगुडा नम्मुर

1 इद आता पजा, येसु गालिलतेन नार-नार तिरियसेक मत्तोर. यहुदि पेद् दाल्क ओन हक्कालय पोंचादोस्सि मत्ताहेंका ओर यहुदिया राज्येमते होना ह्ळा हिल्लोर.

2 गानि अद वेलाते यहुदिल्लुकुना डेराना पंडुगु दग्गेर्क एवसि मत्ता,

3 अदुनहाटी येसुना तम्मुहक येसुन, “निमे इगेटाल यहुदिया होन. अस्केन निमे कियना अद्बूतामाता कबाहक नीवा सिस्स्युल्क ह्ळा परांतुर.

4 बोर अय्ते ओना पोरोल दुनियाक तेळियगोम इंचि इंतोरो, ओर बतले कबळ मक्किस् किय्योर. निमे निजमे इसोंटा अद्बूतामाता कबाहक कियानय्ते, दुनियातोर मुन्ने कीसि ह्पसा,” इंचि इत्तुर.

5 ओना तम्मुहकगुडा ओन नम्मा हिल्लुर, अदुनहाटी ओर अल्हा इत्तुर.

6 अस्के येसु, “मीकु अय्ते अन्नि वेलां मंचिये, मिमेट बस्के इत्ते अस्के अगा होना परांतिर. गानि नना अगा होनना वेला इंका एव्वा हिल्ले.

7 दुनियातोर मीकुन ह्यसाकोंटा मना पस्. गानि नना दुनियातोर कबाहक बेसतव आयों इंचि दुनियातोर विरोदमते गवाइ हीतन, अदुनहाटी नाकुन दुनियातोर ह्यसुर.

8 मिमेट पंडुगुंक होंटु. नना वायना वेला इंका एव्वा हिल्ले, अदुनहाटी इद पंडुगुंक नना वासेक हिल्लेन,” इंचि येसु ओर्क वेहतोर.

9 ओर्क इव पोल्लें वेहचि ओर गालिलतेन मत्तोर.

10 गानि ओना तम्मुहक पंडुगुंक होतंका, पज्जोटाल येसुगुडा अटोर्क दिस्सेक आयो, गानि चुपचाप पंडुगुंक होत्तोर.

11 यहुदि पेद् दाल्क पंडुगुनगा, “ओर बगा मंतोर?” इंचेके ओन पहकालय दल्गातुर.

12 अद मंदिताल इच्चुर लोकुल्क बारे येसुना बारेमते, “ओर बेस मनकल आंदुर,” इंचि इनुंदुर. इंचिच्चुर बारे, “हिल्ले रो! ओर लोकुल्कुन गयबेत कीतोर,” इंचि गुसा-गूसा वळककुनुंदुर.

13 गानि यहुदि पेद् दाल्कुना वेंरेकु बोर लोकुल्क येसुना बारेमते कुल्ला-कुल्ला वळकाकोंदुर.

पंडुगु जर्गनेके येसु कराहंतोर

14 पजा पंडुगु सुख आसि सगम पोळ्द आतंका, येसु गुळिते होंचि कराहलय दल्गतोर.

15 ओर कराहनदुन केंजसि यहुदि पेद् दाल्क, “ई मनकल अय्ते बदे इस्कुलते, बोर गुस्नगा होंचि करिया हिल्लोर. अयना ईन्कु इच्चोन वेल्ले तेल्चि बगाटाल वाता?” इंचेके इंचंनमते अरतुर.

16 अस्के येसु ओर्क इल्हा जवाब हीतोर, “नना कराहना पोल्लें नावां आयों, नाकुन लोहचीता पेनदव आंदुं.

17 मीवा लोपपोटाल बोरे आयिर, पेनदा इच्चा मत्ताप ताकंतन इनकुनानयते, नना कराहना पोल्लें नहगटाल वासंतंगा हिलाकोटे पेनदागटाल वासंतंगा, इंचि ओन्क तेळियता.

18 बोर अयते ओना सतता पोल्लें कराहतोरो, ओर ओना पोरोल्लुने पेद्दा कियालय हळांतोर. गानि बोर अयते ओन लोहतोन्कु कदर दोर्कना इंचि इनकुंतोरो, ओर सत्तेम मनकल आंदुर, ओनगा बतले आबद्दम हिल्ले.

19 मूसाल अयते मीकु दर्मसास्त्रमतुन एव्विचि हीतोर. गानि मिहागटाल वरोरगुडा अव्टेटा नियमकुनपोरो ताकसेक हिल्लिर. अयते बारि नाकुन हक्कालय हळसंतरि?" इंचि येसु इत्तोर.

20 अस्के लोकुल्लक, "नीकुन देय्यम पीताना बतला, अल्हा वळकसंतिन! बोर नीकुन हक्कालय हळसंतरि?" इंचि येसुंक जवाब हीतुर.

21 अयते येसु इल्हा वळकालय दलगतोर, "नोमकेम रोजुननाड नना उंदि अद्बूतामाता कबळ कीतदुन हळसि, मिमेट अंतोर वेल्लेन इचत्रमते अरतिर.

22 कतना* कियना इंचि मीकु मूसाल वेहचि मत्तोर. असल निजम हळते, ई कतना रिवाज मूसाल सुख किया हिल्लोर. अद एनकटा पेद्दालकुनगटाल वाता. मिमेट अयते कतना कियना वेला वातस्के, नोमकेम रोजुननाडगुडा मीवा मर्कुना कतना कीतिर.

23 मूसाना नियम तप्पानायो इंचि, नोमकेम रोजुननाड बोनादन्ना कतना कियना वेला वायानयते मिमेट ओना कतना किया वच्चु. गानि अदे नोमकेम रोजुने नना वरोर मनकन पुरागा बेस कीते, मीकु नापोरो होंग बारि वायना?

24 मोकोम हळसि न्यायम कियमट, निजम-निजम न्यायम कीम्ट," इंचि येसु इत्तोर.

येसु बोर आंदुर?

25 अस्के येस्सलेमतोर इच्चुर लोकुल्लक, "यह्दि पेद्दाल्क बोन अयते हक्कालय हळसंतरो, ओर ई अयते आयोर गदा!

26 हुळट, ओर लोकुल्लकुना नड्डुम नित्तिसि बल्हा कुल्लम-कुल्ला वळकसंतरो! अयनागानि ओन बोरे बतल इंचेक हिल्लुर. ईर किरिस्तु इंचि, मना पेद्दाल्कगुडा निजम एरपाट कीतुर बारे!

27 किरिस्तु वायनेके ओर बगाटाल वांतोर, बोनके तेळियो. गानि ईर मनकल बगाटाल वातोर, मनाकु अंतोर्क एरपाटे मंता." इंचि ओर वरोरक-वरोर वळकालय दलगतुर.

28 येसु गुळितगा कराहनेके इल्हा वळकालय दलगतोर, "हो! नना बोन आंदुन, बगाटाल वातन इदंता मीकु एरपाटे मंता. गानि नावद ननेन इगे वाया हिल्लेन. नाकुन लोहतोर सत्तेमंतुड आंदुर, ओर बोर आंदुरो मीकु एरपाट हिल्ले.

29 गानि नना ओन एरपाट कीतन. बारित्ते ओर नाकुन लोहातोर, नना ओनागटाले इगे वातन," इंचि लगांचि वेहतोर.

30 पजा यह्दि पेद्दाल्क येसुन दोर्का पियालय हळतुर. गानि अस्केळ्ळ ओना वेला एव्वका मत्ता. अदुनहाटी वरोरगुडा ओन्क कय दोस्सा पराहिल्लोर.

31 अयना गुळितगा मत्ता मंदिताल वेल्लेटोर येसुन नमतुर. नम्मिसि, "किरिस्तु वातस्के, इनकन्ना एक्को अद्बूतम आयना कबाहक कियनुरा?" इंचि ओर वळकालय दलगतुर.

यह्दि पेद्दाल्क येसुन दोर्का पियालय हळांतुर

32 लोकुल्लक येसुना बारेमते इसोटा पोल्लें गुसा-गुसा वळकानेके परिसिल्क† केंजतुर. केंजसि पेर्मालोर्क आनि परिसिल्क येसुन दोर्का पियानाहाटी गुळितगा कावेल कीसेक मत्ता सिपाइल्लकुन लोहतुर.

33 अस्के येसु ओर्क, "इंका जेरसिप नना मीतोनि मनंतन, पजा नाकुन लोहतोनगा नना तिरियसि दांतन.

34 मिमेट नाकुन पहककिर, गानि मीकु दोर्कोन. इंका नना मनना जेगातगा मिमेट वाया परिर," इंचि वेहतोर.

35 अल्हा वेहाटेलक, यह्दि पेद्दाल्क ओरद-ओरे, "मनम पहकिना गानि दोर्काकोटा ओर बगा दांतोर आयावच्चु? युनानि देसेमते होंचि, सिल्लर-सिल्लर आसि मनना मना लोकुल्लकुंके पेनदा पोल्लें अयते करहोर गदा! हिलाकोटे युनानि लोकुल्लकुनगा दांतोरा?

36 'मिमेट नाकुन पहककिर, गानि मीकु दोर्कोन. इंका नना मनना जेगातगा मिमेट वाया परिर,' इंचि इत्ता पोल्लेंक अर्तम बतल आयावच्चु?" इंचेके वळककुनालय दलगतुर.

येसुन नम्मूतोर्क पेनदा आत्मा दोर्कता

37 अद पंडुगुना आकिरता रोजुंक्कु वेल्लेन विलुवा मनंता. अद रोजुने येसु नित्तिसि, "दूपातोर नहगा वासि उंडावच्चु.

38 दर्मसास्त्रमते रासि मत्ताप, नापोरो विस्वासम कीतोना लोपपोटाल पिस्वर हियना एता बेरेहक पोंगनु," इंचि लगांचि वेहतोर.

39 येसुनपोरो विस्वासम कीतोर्क पेनदा आत्मा दोर्कनद मत्ता. अदे आत्माता बारेमते वेहालय येसु इव पोल्लें वळकतोर. येसु हासि मरी महिमाते तेदानदे मत्तोर. अदुनहाटी पेन अदवेरदाका अद आत्मातुन बोर्के हिय्या हिल्ले.

40 इव पोल्लें केंजतोर इच्चुर लोकुल्लक, "निजमे! बोर पेनदा कबुरतोर अयते वायनद मत्तोरो, ओर ईर आंदुर," इंचि इत्तुर.

* 7:22 कतना यह्दि आनि मुसलमान लोकुल्लकुनद इद उंदि रिवाज आंद. इद रिवाज परकारम उळकानगटा कोस्सा तोलदुन कोय्यांतुर. इयंटा रिवाज कीते पेनदातोनि करार कीताप इंचि ओर नम्मंतुर. † 7:32 परिसिल्क पेनदुन कूस कियनाहाटी यह्दि लोकुल्लकुना अन्नि नियमाल्कुन आनि अन्नि रीति-रिवाजकुन कडक पालन किया पीता, इंचि ईर नम्मंतुर. ईरगुडा यह्दि लोकुल्लकुनाल उंदि मतमतोर आंदुर.

- 41 इंकिच्चुर बारे, “ओर किरिस्तु आंदुर,” इंचि इत्तुर. आनि इंकिच्चुर लोकुल्क, “अरे! गालिल एरियाताल किरिस्तु वांतोरा?
 42 ‘किरिस्तु दाविद राजाना वंसंमते पुट्टिस, दाविद राजाल पुटता बतलहेम नाटेनाले वांतोर,’ इंचि दर्मसास्त्रमते रासि हिल्लेना!” इंचि इत्तुर.
 43 येसुना बारेमते लोकुल्कुंक रकारकाल्कुना विचाराल्क मत्ताहेका, लोकुल्क ओरद ओर्के अर्काकोटा आसि वेरे-वेरे आतुर.
 44 इच्चुर ओन दोर्का पियालय हळतुर, गानि बोर वरोरगुडा ओनपोर्री कय वाटा पराहिल्लुर.

विस्वासम कियुवा यहुदि पेद्दाल्क

- 45 गुळितगा कावेल कियानोर बोर अयते येसुन दोर्का पियालय होतुर, ओर उत्ता कयके मल्सि वातुर. अस्के, “मिमेट ओन बारि पीसि तराहिल्लिर?” इंचि पेद्दा पेर्मांलोर आनि परिसिल्क ओर्कुन पूसकीतुर.
 46 अस्के आ कावेल कियानोर, “ओर वळकताप बोरे मनकल बस्केने वळका हिल्लोर,” इंचि जवाब हीतुर.
 47 पजा परिसिल्क ओर्कु इल्हा जवाब हीतुर. “ओर मीकुनगुडा पसांच्तोरा?
 48 यहुदि पेद्दाल्कुनाल आयि, परिसिल्कुनाल आयि, बोर वरोरन्ना ओन नम्मूतोर मंतोरा? बोरे हिल्लुर.
 49 गानि येसुन बोर अयते नम्मूतुरो ओर्क मूसाना नियमकु तेळियो, ओर्क तप्पाकोटा सापनेम दलंगंता,” इत्तुर.
 50 अगा निकोदेमस पोरोलतोर वरोर मत्तोर, ओर मुन्ने उंदि मल्का येसुंक कलियसि मत्तोर. ओरगुडा आ परिसिल्कुनाल वरोर आंदुर.
 51 अयते ओर, “वरोर मनकंक मनम ओना गवाइ केंजाकोटेने, ओर बतल कीतोर तेल्लिचकुनाकोटेने मना दर्मसास्त्रमता नियमकुना परकारम, न्यायम किया परातोमा?” इंचि ओर्कुन पूसकीतोर.
 52 अयते ओर, “अरेय, निमेगुडा गालिल एरियातोना रो? होन! होंचि दर्मसास्त्रमते बेस पहकिसि हदवा, गालिलताल बोरे पेनदा कबुरतोर वायोर इंचि रासि मंता,” इत्तुर.

बोगमतनम कीता मुरतटुन येसु मापि कीतोर

- 53 पजा ओर अंतोर ओरा-ओरा लोह्कुने होतुर.

8

- 1 गानि येसु जयतुन मराकुना गुट्टतेके होतोर.
 2 हक्केरेन मर्रा गुळितगा वातोर. वेल्लेन लोकुल्क ओनगा जमा आतुर. येसु उद्दिदस ओर्क कराहलय दलगतोर.
 3-4 ओर्क कराहसेके मननेकेन, बोगमतनम कियनेके दोर्कता उंदि मुरतटुन, दर्मसास्त्रम कराहना गुल्क आनि परिसिल्क ओनगा पीसि तच्चि लोकुल्कुना मुन्ने निलाहतुर. निल्हाचि, “गुरु, इद मुरतटुन बोगमतनम कियानेके मोमोट दोर्का पीतोम.
 5 इसंटा मुरतटुन बंडाने तंचि हक्कना इंचि मूसाना नियम मनाकु आदेस हीता. अयते दीना बारेमते निमे बतल इंतिन मरि?” इंचि येसुन पूसकीतुर.
 6 ओर वळकानेके बतलन्ना तप्पु कीते ओन दोर्का पियना उपायमते, ओर असोटा सवाल पूसकीतुर. गानि येसु हिळु वंगिसि बूमिपोर्री बतलो वेलुने रासालय दलगतोर.
 7-8 ओर उंदे हट्टु पीताहाटी, येसु तेदसि ओर्कुन, “सरे! बंडाने तनाटु. गानि मिहगटाल बोर अयते बस्केने पापम किया हिल्लोर, मुन्ने ओरे दीन बंडाते तनना,” इंचि वेहतोर. पजा मर्रा वंगिसि बूमिपोर्री वेलुने रासालय दलगतोर.
 9 दान तत्तोर अंतोर येसु इत्तटुन केंजसि, मोदाला मातरालोर आनि पज्जोटाल अंतोर वरोन पज्जो वरोर अगटाल पेय्सि होतुर. ओर अंतोर अगटाल होतस्के लोकुल्कुना नड्डुम सिराप येसु आनि आ मुरतळे मत्तुर.
 10 पजा येसु इंकुंदि मल्का तेदसि, “बाई, नीकु सिक्साता आदेस हियानोर बेके होतुर? नीकु बोरे सिक्साता आदेस हिय्या हिल्लुरा?” इंचि पूसकीतोर.
 11 अस्के अद मुरतळ, “नाकु बोरे सिक्साता आदेस हिय्या हिल्लुर सामि!” इंचि इत्तस्के येसु, “ननागुडा नीकु सिक्साता आदेस हिय्योन. होन, इंका बस्केने पापम कियमा,” इंचि दान्क वेहतोर.*

येसु दुनियातोरक वेलगु

- 12 पजा येसु, “नना दुनियातोरहाटी वेलगु आंदुन. बोर अयते नावा पज्जो ताकंतोर, ओनगा पिस्वरताहेके ओयना वेळसि मनंता, अदुनहाटी ओर बस्केने हीकटते ताकोर,” इंचि वेहतोर.
 13 अस्के परिसिल्क, “नीवा बारेमते निमेन गवाइ वेहकुंचतिन, अदुनहाटी नीवा गवाइते सत्तेम हिल्ले,” इंचि येसुन इत्तुर.
 14 अयते येसु ओर्क इल्हा जवाब हीतोर, “नावा बारेमते ननाने गवाइ वेहिनागानि, नावा गवाइ मात्रम सत्तेम आंद. बारित्ते, नना बगाटाल वातन, बगा दांतन, इत्तद नाक एरपाट मंता. गानि नना बगा वातन, बगा दांतन मीकु बतले एरपाट हिल्ले.
 15 मिमेट मनकना बुद्दिदेते न्यायम कीतिर, गानि नना बोनदे न्यायम किय्योन.
 16 ओक्कला नना न्यायम कियिनागानि नावा न्यायम निजम मनंता, बारित्ते नना वरोने हिल्लेन, नाकुन लोहचीता ना बाबाल नाक तोळ मंतोर.

* 8:11 इव वचनाल्कु कोन्नि पांडु लिपिने हिल्लें.

- 17 इव्वुरा गवाइ उंदि आते, अद गवाइ निजम मनंता इंचि मीवा मूसाना नियमतेन रासि मंता.
 18 दीन परकारम, नावाहाटीं नना वरोर गवाइ आनि नाकुन लोहचीता ना बाबल इंकावरोर गवाइ,” इंचि येसु इत्तोर.
 19 इद केंजसि ओर, “नीवा बाबाल बगा मंतोर?” इंचि पूसकीतुर. अस्के येसु, “असल नना बोन, नावा बाबाल बोर? मीकु एरपाट हिल्ले. मिमेट नाकुन एरपाट कियानय्ते, ना बाबान इंका एरपाट कीतिर,” इंचि ओर्क वेहतोर.
 20 येसु इव पोल्ले, गुळिता लोप्पो कोत्तां वाटना जेगातगा नित्तिसि कराहनेके वळकतोर. अयनागानि ओन बोरे दोर्का पिया हिल्लुर. बारित्ते ओना वेला एव्वनदे मत्ता.

येसुना पोल्ले यहुदि पेद्दाल्कुंक अर्तमायों

- 21 पजा इंकुंदि मल्का येसु ओर्कुन, “नना अय्ते होंचंतन. मिमेट नाकुन पहककिर. मिमेट मीवा पापाल्क मापि आयका मुन्नेन हाकिर. नना बगा अय्ते होंचंतन अगा मिमेट वाया परिर,” इत्तोर.
 22 अस्के यहुदि पेद्दाल्क ओरद ओरे, “नना बगा अय्ते होंचंतन अगा मिमेट वाया परिर, इंचि बारि इंचंतोर मरि? ओक्कला ओना जीवातुन ओरे पोळगोटकुन्नोर गदा!” इंचि वळकालय दलगतुर.
 23 पजा येसु ओर्कुन, “मिमेट हिळतोर आंदिर, नना पोर्रीटोन आंदुन. मिमेट इद दुनियातोर आंदिर, गानि नना आयोन.
 24 अदुनहाटीगे, मिमेट मीवा पापाल्क मापि आयका मुन्नेन हाकिर, इंचि नना इत्तन. ओन ननाने आंदुन इंचि विस्वासम कियाकोटे, मिमेट मीवा पापाल्क मापि आयका मुन्नेन हाकिर,” इंचि इत्तोर.
 25 अस्के ओर, “अय्ते निमे बोन आंदिन मरि? माकु वेहा,” इंचि पूसकीतस्के येसु, “नना बोन इंचि मीकु मुन्नेटाल वेहचेके वातानो, नना ओने आंदुन.
 26 मीवा बारेमते वळकालय, मीवा न्यायम कियालय, नहगा वेल्लेन पोल्ले मंतां. गानि नाकुन लोहतोर सत्तेमंतुड आंदुर, इंचि नना सिराप ओनागटाल केंजता पोल्लेगें लोकुल्कुंक वेहचंतन,” इंचि इत्तोर.
 27 गानि येसु ओना बाबाना बारेमते वेहतोर इंचि ओर्क इंकागुडा अर्तम आयाहिल्ले.
 28 अदुनहाटीं येसु, “मनकना रूपमते पुटतोन नाकुन, बस्के अय्ते वेलाड वाटमळ जर्गंतनो, अस्के, ओन ननाने आंदुन इंचि, मीकु एरपाट आयार. अचोने आयका, नना सतागा बतले कीसेक हिल्लेन, गानि बव पोल्ले अय्ते बाबाल नाकु कराहतोरो, अवे पोल्ले नना वेहतन.
 29 नाकुन लोहतोर नावा तोळ मंतोर. नना बस्केळ्क ओन्क कुसि हियना कबाह्के कीतन, अदुनहाटीं ओर नाकुन बस्केने ओटिगा होळसोर,” इंचि वेहतोर.
 30 ओना ई पोल्ले केंजतोर, वेल्लेटोरे ओन नम्मतुर.

पापमताल पलाते अर्ना बारेमते येसुना कराहमळ

- 31 पजा येसु, ओनपोर्री विस्वासम कीता यहुदिल्लुकुनतोनि, “मिमेट नना कराहता पोल्ले पीसि ताकानय्ते निजमे नावा सिस्सुल्क आंतिर.
 32 अस्के मिमेट सत्तेमतुन एरपाट कीकिर, आ सत्तेमे मीकुन होळसार,” इंचि इत्तोर.
 33 अस्के ओर, “मोमोट अय्ते अब्राहामुना वंसमतोरम आंदुम, इदवेरदाका मोमोट इद बूमिपोर्री बोनदे कय हिळ् दसुल्क आसि मना हिल्लोम. अय्ते, अद सत्तेम मीकुन होळसार, इंचि निमे बल्हा इंतिन?” इंचि येसुंक जवाब हीतुर.
 34 अस्के येसु ओर्क इल्हा वेहतोर, “नना निजम-निजम वेहासेक, पापम कियना हरेक मनकल पापमता दासुडे.
 35 वरोर दासि मनकल मालकुना लोतोरतोनि बस्केळ्क मन्नेर, गानि मालकुना मरि मात्रम बस्केळ्क मनांतोर.
 36 अदुनहाटीं पेनदा मरि मीकुन पापमताल होळसीतेने, निजमते मिमेट पापमताल पलाते अर्तिर.
 37 मिमेट अब्राहामुना वंसमतोर इंचि नाकु एके. अयनागानि नावा पोल्लेक मीलोप्पो जेगा हिल्लुवाहेका मीवा लोप्पोटाल इच्चुर नाकुन हळकालय हळसतिर.
 38 नना नावा बाबानतोनि मत्तस्के बतल अय्ते हळतनो, अदे मीकु वेहचंतन. आनि मिमेटगुडा मीवा बाबानहेंदाल केंजतद कीसतिर,” इंचि इत्तोर.
 39 अस्के ओर, “अब्राहाम मावा बाबाल आंदुर,” इंचि इत्तुर. पजा येसु, “हिल्ले! मिमेटगिंटा अब्राहामुना पिलाल्क आसि मत्ते, ओर कीतापे मिमेटगुडा कीसि मन्नेर.
 40 गानि नना पेनदागटाल केंजता सत्तेम पोल्ले मीकु वेहते, मिमेट नाकुने हळकालय हळसतिर. अब्राहाम अय्ते अल्हा किया हिल्लोर.
 41 मिमेट मीवा बाबाल कीताप कीसतिर,” इंचि इत्तोर. अस्के ओर, “मोमोट बोगमतनम कीते पुट्टा हिल्लोम! माकु वरोरे बाबाल मंतोर, ओर पेनबाबाले,” इंचि येसुन इत्तुर.
 42 अस्के येसु ओर्कुन इल्हा इत्तोर, “पेन मीवा बाबाल आसि मत्ते मिमेट नाकुन पावरम कीसि मन्नेर. बारित्ते नना पेनदागटाल वातन. इगे नावद ननेन वाया हिल्लेन. पेने नाकुन लोहता.
 43 नना वेहानदुन मिमेट असल केंजिर, अदुनहाटीगे नावा पोल्ले मीकु अर्तम आयों.

44 मिमेट देय्यमता पिलाल्क आंदिर, देय्यमे मीवा बाबाल आंदुर. अदुनहाटीं मीवा बाबाल कियना तप्पुड कबाह्क कियमळ इत्ते मीकु वेल्लेन इस्टम. देय्यम मुन्नेटाले जीवां तिचेके वाता. अद सत्तेमतुन बस्केने हय्यो. दानागा सत्तेम हिल्लेन हिल्ले. आबद्दम वळ्ळकमळे दाना गुनम आंदु, अदुनहाटीं अद बस्केळ्ळक आबद्दमे वळ्ळकंता, आबद्दमतुन पुट्टसंता.

45 अदुनहाटीं नना मीकु सत्तेम वेहिनागानि मिमेट नाकुन नम्मिर.

46 नना बतलन्ना पापम कीतन इंचि मिहागटाल बोरन्ना ह्युप्सा परांतरिा? नना निजम वेहचंतन, अय्ते मिमेट बारि नाकुन नमसेक हिल्लिर?

47 बोर अय्ते पेनदा मनकल, ओर पेनदा पोल्ले केंजंतोर. गानि मिमेट पेनदा मनकालोर आयिर, अदुनहाटीं मिमेट अव पोल्लेन केंजसेक हिल्लिर,” इंचि येसु इत्तोर.

येसु सतता बारेमते आनि अब्राहामुना बारेमते वळ्ळकंतोर

48 अस्के यहुदिल्क, “निमे सामरियातोनं आंदिन, नीकुन देय्यम पीता, इंचि इनानय्ते, मोमोट इनानद निजमे गदा?” इंचि येसुन पूसकीतुर.

49 अस्के येसु ओर्क इल्हा जवाब हीतोर, “नाकुन देय्यम पिया हिल्ले. नना नावा बाबाना कदर कीतन, गानि मिमेट नावा कदर कीसेक हिल्लिर.

50 नाकु कदर दोर्कना इंचि नना बस्केने इनकुनोन, गानि नाकु कदर दोर्कना इंचि इनानोर वरोर मंतोर. ओरे न्यायम कियानोर आंदुर.

51 नना निजम-निजम वेहासेक, बोरे आयिर नना कराहता पोल्लेनपोर्रो ताकानय्ते, ओर बस्केने हामुरतुन हळोर,” इंचि इत्तोर.

52 इदुन केंजसि यहुदिल्क, “नीकु निजमे देय्यम पीता इंचि इंदके माकु एरपाट आता. अब्राहाम आनि पेनदा कबुरतोरगुडा हातुर, आनि निमे, ‘बोर आयिर, नना वेहता पोल्लेनपोर्रो ताकानय्ते, ओर बस्केने हामुरतुन हळोर’ इंचि वेहांतिन.

53 मावा एनकटा पेद्दा मातरल अब्राहामगुडा हातोर, निमे ओनकन्ना पेद्दोना? पेनदा कबुरतोरगुडा हातुर. नीवद निमे बोन आंदिन इंचि इनकुंचतिन?” इंचि येसुन पूसकीतुर.

54 येसु ओर्क इल्हा जवाब हीतोर, “नावद ननाने कदर कीकुत्ते, अद कदरक बतले विल्लुवा मन्ने. गानि बोन अय्ते मिमेट, ‘मावा पेन आंदुर’ इंचि इंतोर, ओरे नावा बाबाल आंदुर, ओरे नाकु कदर हीसंतोर.

55 गानि मिमेट ओन एरपाट कियिर, नना ओन एरपाट कीतन. ननागिता, ‘ओन नना एरपाट किय्योन,’ इंचि इनानय्ते, ननागुडा मीलेसीं आबद्दम वळ्ळकानोन आंतन. गानि नना ओन एरपाट कीतन, ओना पोल्लेनपोर्रो ताकंतन.

56 नना वायना रोजुन हळंतन इत्ता आसेते, मीवा एनकटा पेद्दा मातरल अब्राहाम, कूस मत्तोर. पजा अद रोजुन हळसि ओर वेल्लेन कूस आतोर,” इंचि इत्तोर.

57 पजा यहुदिल्क, “निमे अब्राहामुन हळतिना? नीकु अय्ते एबै वसांगुडा हिल्ले!” इंचि येसुन पूसकीतुर.

58 अस्के येसु, “नना निजम-निजम वेहासेक, अब्राहाम मातरल पुट्टका मुन्नेटाले नना मत्तन,” इंचि इत्तोर.

59 इद पोल्ले पोर्रोटाल, ओन बंडाने तंचि हळ्कना इंचि अंतोर बंडां पेरतुर. गानि येसु ओर्क दिसाकौटा मक्किस गुळिताल पेय्सि होत्तोर.

9

पुटतस्केटाल कळ्ळक दिस्वोंक येसु दिस्सानाल कीतोर

1 हरपीसि होननेके-होननेके येसु, पुटतस्केटाल कळ्ळक दिसवोर वरोर मनकन हळतोर.

2 अस्के सिस्युल्कु, “गुरु, ईर इल्हा गुड्डिगा पुट्टालय कारनम बतल आंद? ईर पापम कीताहेका इल्हा पुट्तोरा मरि ईना तल्लुर-बाबो पापम कीताहेकाना?” इंचि येसुन पूसकीतुर.

3 अस्के येसु ओर्क इल्हा जवाब हीतोर, “ईर पापम कीताहेकानो मरि ईना तल्लुर-बाबो पापम कीताहेकानो ईर गुड्डिगा पुट्टा हिल्लोर. गानि ईनाहेदाल पेनदा ताकत दिस अरना इंचि ईर इल्हा गुड्डिगा पुट्तोर.

4 नाकुन लोहतोना कबाह्कन मनम, पोळ्ळद होनाका मुन्नेन महापीता. बोरे कबळ किये पस् असोटद नर्का वायनद मंता.

5 गानि नना इद दुनियाते मत्तचोनजेम दुनियातोरहाटीं नना वेळ्सी आसि मनंतन,” इंचि वेहतोर.

6 पजा ओर बूमिपोर्रो उस्कतोर, उस्किसि आ उच्चुलतोनि बुर्दा तयार कीसि आ बुर्दातुन आ गुड्डोना कळ्ळकुंक होकतोर. 7 होकसि, “निमे सिलोम सेरवुनगा होंचि कळ्ळकुन नोर्कुन,” इंचि येसु आ गुड्डोन इत्तोर. अस्के ओर गुड्डिड होंचि कळ्ळकुन नोरतस्के, ओना कळ्ळक दिसालय दल्गतां. अस्के ओर मल्लिस वातोर.

8 पजा ओना पका पीसीतोर, मुन्ने ओन बिच्चोम तल्लकनेके हळतोर, इंदके ओन हळसि, “उद्दिस बिच्चोम तल्लकसेक मनुंदुर, ओर ईर मनकल गदा!” इंचि वरोंक-वरोर पूसकियालय दल्गतुर.

9 इच्चुर लोक्कुल, “हो, ईर ओरे आंदुर,” इत्तुर. इक्किच्चुर बारे, “आयोर रो! ओनसंतोर इंकावरोर आंदुर,” इंचि इत्तुर. गानि आ मनकल, “हिल्ले, ओन ननाने आंदुन,” इंचि इत्तोर.

† 8:48 सामरियातोन मुन्नेटा कालमते इच्चुर यहुदिल्क यहुदि आयवोरतोन मरमि आतुर. ईर लोक्कुल यहुदिरां आनि यहुदि आयवोरां इच्चुरा रीति-रिवाजि पीसि ताकुंदुर. ओर ईरकु पुट्तोर अंतोर सामरिया एरियाते मनुंदुर. ईरकुन यहुदिल्क सिन्ना जातितोर इंचि इट्टुर.

10 अस्के ओर लोकुल्लक, “अयते नीवा कळ्ळुकुन बोर दिस्सानाल कीतोर?” इंचि ओन पूसकीतुर.

11 अस्के आ मनकल, “येसु पोरोलतोर वरोर मनकल बुर्दा कीसि, ना कळ्ळुकुंक होकतोर, होकसि, ‘सिलोम सेरवुने कळ्ळुकुन नोर्कुन,’ इंचि इत्तोर. होंचि नोरतन अयते, नावा कळ्ळुकुन दिसालय दलगातां,” इंचि ओर जवाब हीतोर.

12 लोकुल्लक, “आ येसु बगा मंतोर?” इंचि पूसकीतस्के, “नाकु एर्का हिल्ले,” इंचि आ मनकल इत्तोर.

येसु बेस कीता गुड्डिन परिसिल्क चौकसि कीतुर

13 पजा आ लोकुल्लक, मुन्ने गुड्डि मत्ता मनकन परिसिल्कुनेके पीसि ओतुर.

14 येसु बद रोज अयते बुर्दा कीसि, कळ्ळुकुन दिसवोना कळ्ळुकुंक होकसि कळ्ळुकुन दिस्सानाल कीतोर, अद रोज नोमकेम मत्ता.

15 तत्तस्के, आ मनकन, “नीवा दिसवा कळ्ळुकुन बल्हा दिसालय दलगातां?” इंचि परिसिल्कगुडा पूसकीतुर. अस्के आ मनकल, “ओर नावा कळ्ळुकुंक बुर्दा होकतोर, पजा होंचि नोरतस्के, नावा कळ्ळुकुन दिसालय दलगातां,” इंचि इत्तोर.

16 ओर वेहतद केंजसि इच्चुर परिसिल्क, “ओर मनकल नोमकेम रोजुन नोमा हिल्लोर, अदुनहाटी ओर पेनदागटाल वायाहिल्लोर,” इंचि इत्तुर. इंचिच्चुर बोर, “गानि वरोर पापि मनकल इंसंटा अद्बूतामाता चिन्ह बल्हा हुप्सा परंतोर?” इंचि इत्तुर. इल्हा ओरद-ओर्के अर्का ओर रोंड गेंगक आतुर.

17 पजा परिसिल्क आ गुड्डितनमताल बेस आता मनकन, “ओर नीवा कळ्ळुकुन बेस कीतोर, अयते निमे ओना बारेमते बतल इंतिन?” इंचि इंकुंदि मल्का पूसकीतुर. अयते आ मनकल, “ओर वरोर पेनदा कबुरतोर आंदुर,” इंचि इत्तोर.

18-19 आ मनकल गुड्डि मत्तोर, इंदके मर्मा ओना कळ्ळुकुन दिसालय दलगातां, इत्ता पोल्लेतुन यहूदि पेद्दाल्क इदवेरादाका गुडा नम्मा हिल्लुर. अदुनहाटी ओर आ मनकना तल्लुर-बाबोन केयतुर. केय्से, “ईर मी मर्मेना? पुट्स्केटाल गुड्डिगा पुटतोर इंचि मिमेट इतिर? अयते मरि ईर इंदके बल्हा हळा परसंतोर?” इंचि पूसकीतुर.

20 अस्के ओना तल्लुर-बाबो, “ईर मावा मर्मे आंदुर, ईर पुट्नेकेन गुड्डिगा पुटतोर, इद माकु एरपाटे.

21 गानि इंदके ईर बल्हा हळा परसंतोर माकु तेळियो, इंका ईन हळानाल बोर कीतोर माकु तेळियो. इंदके ईर सतता बारेमते वळ्ळुकुनलायक आतोर, मिमेट ओने पूस कीम्टु, ओरे वेहंतोर!” इंचि इत्तुर.

22 यहूदि पेद्दाल्कुकुं वेरियसि ओना तल्लुर-बाबो अल्हा इत्तुर. बारित्ते येसुए किरिस्तु आंदुर इंचि बोर अयते ओप्कुंतोर, ओन दर्मसास्त्रम कराहना लोताल पेचाहमळ जर्गता, इंचि ओर मुन्ने उंदि आसि मत्तुर.

23 अदुनहाटीगे आ तल्लुर-बाबो, “इंदके ईर सतता बारेमते वळ्ळुकुनलायक आतोर, मिमेट ओने पूस कीम्टु,” इंचि इत्तुर.

24 अदुनहाटी परिसिल्क, गुड्डितनमताल दिस्सानाल आता मनकन मरुंदि मल्का केय्से, “ई मनकल पापि इंचि माकु एर्के, अदुनहाटी पेनदुक कदर हीम,” इंचि इत्तुर.

25 अस्के गुड्डितनमताल दिस्सानाल आता आ मनकल, “ओर मनकल पापि आंदुरो, आयोरो नाकु एर्का हिल्ले. गानि मुन्ने नाकु कळ्ळुकुन दिस्साकोंदुं, इंदके दिसंतां, इद मात्रम नाकु एर्का,” इंचि इत्तोर.

26 अयना परिसिल्क मर्मा ओन, “ओर नीकुन बतल कीतोर? ओर नीवा कळ्ळुकुन दिस्सानाल बल्हा कीतोर?” इंचि पूसकीतुर.

27 अयते गुड्डितनमताल दिस्सानाल आता आ मनकल, “दीनकन्ना मुन्ने नना मीकु वेहतन, गानि मिमेट केंजा हिल्लिर. अयते मर्मा-मर्मा बारि पूस कीसंतोर? मीकुगुडा ओना सिस्सुल्क आयानद मंतना?” इंचि इत्तोर.

28 अस्के परिसिल्क, “निमेन ओना सिस्सुन आंदिन, मोमोट मूसाना सिस्सुल्कुम आंदुम.

29 पेन मूसानतोनि वळ्ळुकुता इंचि माकु एरपाट मंता. गानि ई मनकल बगाटाल वातोर? माकु बतले एरपाट हिल्ले,” इंचेके ओन तेराहतुर.

30 पजा आ मनकल इल्हा वळ्ळुकुन दलगातोर, “इद वेल्लेन इचंनम आयना पोल्ले आंद. ओर बगाटाल वातोर मीकु बतले एरपाट हिल्ले. अयनागानि ओर मात्रम नावा दिसुवा कळ्ळुकुन दिस्सानाल कीतोर.

31 पेन पापि मनकालोरा पोल्लेतुन केंजो, गानि बोर अयते दान मोळ्ळुसेक दाना इच्चा परकारम ताकंतोर ओना पोल्लेतुन मात्रम पेन केंजंता, इंचि मनाकु एरपाट मंता.

32 इद दुनिया पुट्स्केटाल अयते इदवेरादाका, वरोर मनकल, पुट्नेकेन गुड्डिगा पुटतोना कळ्ळुकुन दिस्सानाल कीतोर इत्ता पोल्ले मनम बस्केने केंजा हिल्लोम.

33 ईर मनकलगिंटा पेनदागटाल वातोर आयाकोटे, इसोंटव बवे कबाहक किया परा कोन्नेर,” इंचि ओर्के वेहतोर.

34 इव पोल्ले केंजसि परिसिल्क, “निमे अयते पुरागा पापमते पुट्स्-बेरस्तोन आंदिन. निमे माकु कराहंतिना?” इंचेके आ मनकन पेचाहचि गेटुमत्तुर.

निजम गुड्डिर्क बोर?

35 आ मनकन पेचाहचि गेटुमत्तुर इंचि येसु केंजतोर. केंजसि, आ मनकक कलियसि, “निमे मनकना रूपमते पुटतोनि पोरो विस्वासम ईरतिना?” इंचि ओन पूसकीतोर.

36 अयते आ मनकल, “नना ओनापोरो विस्वासम ईरनाहाटी ओर बोर आंदुर, नाकु वेहा सामि!” इंचि येसुन पूसकीतोर.

- 37 अस्के येसु, “निमे ओन हळतिन, ओर नीतोनि इंदके वळकसंतोर,” इंचि वेहतोर.
 38 इद पोल्ले केंजसि, “नना विस्वासम कीतन सामि,” इंचि ओर येसुना काल्क मोळकतोर.
 39 अस्के येसु, “नना इद दुनियाते न्यायम कियालय वातन. गुडिडर्क कळक दिस्सागोटालय आनि बोर अयते, ‘मोमोट अन्नि हळा परंतोम’ इनकुंतुर, ओर्क ओर गुडिडर्क इंचि हुप्सालय नना वातन,”* इंचि इत्तोर.
 40 अगा मंचि ओना इव पोल्ले केंजता इच्चुर परिसिल्क, “अयते मोमोटगुडा गुडिडर्के इतिना मरि?” इंचि पूसकीतुर.
 41 अस्के येसु, “मिमेटगिंटा गुडिडर्क आयानयते मिहगा पापम मना कोनवळ. गानि मिमेट, ‘मोमोट बेस हळा परंतोम’ इतिर. अदुनहाटी मीलोप्पो पापम मय्शि मनंता,” इंचि वेहतोर.

10

बेसता मेहानोर येसे आंद

- 1 येसु इल्हा वळकालय दलगतोर, “नना निजम-निजम वेहासेक, बोर अयते गोर्रेना पोदिते होळियनेके, गलमाताल होळियका गूरे पोर्रोटाल दुनकिसि होळियंतोर, ओर दोंगल आनि दोसकुनानोर आंदुर. 2 गानि बोर अयते गलमाताल होळियंतोर, ओर गोर्रे मेहानोर आंदुर.
 3 गोर्रे मेहानोनहाटी गलमातगा कावेल कीसेक मनानोर गिल्कोम तेंडांतुर. गोर्रे ओना लेंग केंजतां. ओर ओना गोर्रेन उंद-उंदाना पोरोल पीसि केय्शि, अवुन पलाते ओतोर.
 4 अन्नि गोर्रेन पलाते ओसि, ओर अवुना मुन्ने-मुन्ने दांतोर. गोर्रे ओना पज्जो-पज्जो दांता. बारित्ते अव ओना लेंगुन एरपाट कीतां.
 5 गानि एरपाट हिलवोना पज्जो अव होन्नो, ओनागटाल लक्कु वित्तंतां. बारित्ते अव ओना लेंगुन एरपाट किय्यो,” इंचि ओर्क वेहतोर.
 6 येसु इद उदाहरन लोक्कुंक वेहतोर. गानि येसु बरुना बारेमते वळकतोर इत्तद ओर्क अर्तम आयाहिल्ले.
 7 अदुनहाटी येसु मरुंदि मल्का ओर्क इल्हा वेहतोर. “नना निजम वेहासेक केंजट, गोर्रे होळियाना गलमा ननेन आंदुन.
 8 नाकन्ना मुन्ने वातोर अंतोरें दोंगाल्क, दोसकुनानोर आंदुर. गानि गोर्रे ओरा पोल्ले केंजा हिल्ले.
 9 गलमा ननाने आंदुन. बोर अयते नहगटाल लोप्पो नेंगंतोर, ओन नना पिसागोटंतन. ओर लोप्पो-पलाते होनुळ-वायुळ कीतोर, तिनालय ओन्क मेता दोर्कता.
 10 दोंगाल्क सिराप दोंगा कियालय, हळ्कालय, नासडेम कियालये वांतुर. गानि नना नावा गोर्रेकु पिस्वर हियालय वातन. अदगुडा पुरागा पिस्वर हियालय वातन.
 11 बेस मेहानोन ननाने आंदुन. बेस मेहानोर, गोर्रेनाहाटी ओर ओना जीवा हीतोर.
 12 गानि बूतिक मेहालय वातोर, ओर निजम मेहानोर आयोर. मेहनेके ओन्क तोडेल्लिगिंटा दिस्सानयते, गोर्रेन अग्गेन होळसि बेकेनो वित्तंतोर. बारित्ते अव गोर्रे ओनव आयो. अस्के आ तोडेल्लि वासि गोर्रेन पोर्रो अर्ता आनि गोर्रे बारे सिल्लर-सिल्लर आंता.
 13 ओर बूतिक वातोर इंचि अल्हा वित्तंतोर. ओन्क गोर्रेना पिकिर हिल्ले. अदुनहाटी ओर वित्तंतोर.
 14-15 गानि नना बेस मेहानोन आंदुन. बल्हा अयते बाबाल नाकुन एरपाट कीतोर, नना बाबान एरपाट कीतन, अल्हेन नावा गोर्रेन नना एरपाट कीतन, अव नाकुन एरपाट कीतां. नना नावा गोर्रेनाहाटी जीवा हीतन.
 16 इद पोद्दितव आयवा गोर्रेगुडा नहगा मंतां. नाकु अवुनगुडा तरानद मंता, अवगुडा नावा लेंग केंजन्. अस्के अन्नि उंदे मंदा आसि मनंतां आनि अवुना मेहानोरगुडा वरारे मनांतोर.
 17 नना हासि मर्रा जीवाते तेदंतन इंचि नना नावा जीवा हीसंतन, इदुनहाटीगे नावा बाबाल नाकुन वेल्लेन पावरम कीतोर.
 18 नावा जीवातुन नहगटाल बोरे तेंडकुन्नुर, नावा जीवातुन नना कुदूदे हीतन. नावा बाबाल नाकु आदेस हीताहेका नावा जीवातुन हियनद, हीसि मर्रा मल्सि तेंडकुनना अदिकारम नाकु मंता,” इंचि येसु इत्तोर.
 19 इव पोल्लेनहेंदाल मरुंदि मल्का यहुदिल्क वरोनद वरोंक अर्राका वेरे-वेरे आतुर.
 20 ओरावेटाल वेल्लेटोर, “ओन्क देय्यम पीसि ओर पिस्सल आतोर, मिमेट ओना पोल्ले बारि केंजांतिर?” इंचि इत्तुर.
 21 गानि इच्चुर बारे, “इव पोल्ले देय्यम पीतोनां आयो. देय्यम बस्केनना कळक दिसवोना कळकुन दिस्सानाल किया परंतना?” इंचि इत्तुर.

यहुदिल्क येसुना विरोद कीतुर

- 22 पीनि कालम वासि मत्ता. येस्सलेम सहरते गुळिते होळियाना हानुक* इनना पंडुगु मत्ता.
 23 अयते गुळितगा येसु सुलेमान इनना पंदिरतगा तिरियसेक मत्तोर.
 24 अस्के, इच्चुर यहुदि लोक्कुल्क येसुना सट्टु आसि, “निमे इका बच्चुं रोजकु माकुन मर्ममते इर्रतिन? निमे गिंटा किरिस्तुन आयानयते माकु कुल्ला-कुल्ला वेहा,” इंचि पूसकीतुर.

* 9:39 यसायाह 6:9-10 * 10:22 हानुक इत्ते, वेल्गुल्कना पंडुगु इंचि अर्तम. इद पंडुगु बारि कीतुर इत्ते, एनकटा कालमते वेरे-वेरे देसेल्कुनोर अद गुळितुन अपवित्र कीसि मत्तुर. गानि मरुंदि मल्का गुळितुन पवित्र कीसि, किरिस्तु पट्टका मुन्ने 165 वा वसति अद गुळिते पवित्र कबाहकुन सुख कीतुर. इदुने हानुक इंतुर.

- 25 अस्के येसु ओर्क इल्हा जवाब हीतोर, “नना मीकु मुन्नेन वेहतन, गानि मिमेट नम्मा हिल्लिर. नावा बाबाना पोरोल्ले नना कियना कबाह्के नावा बारेमते गवाइ वेहचंतां.
- 26 गानि मिमेट नावा गोर्रेना मंदातोर आयिर. अदुनहाटी मिमेट नापोर्रो विस्वासम कीसेक हिल्लिर.
- 27 नावा गोर्रे नावा लेंगुन केंजंतां. नावा गोर्रेन नना एरपाट कीतन, अव नावा पज्जो-पज्जो वांतां.
- 28 नना अवंक बस्केळक पिस्सना पिस्वर हीतन, अव बस्केने नासडेम आयो, नावा कयदाल अवुन बोरे गुंजकुना पर्रो.
- 29 बारिल्ले अवुन नाकु, नावा बाबाल हीतोर. नावा बाबाल अंटोरकन्ना पेद्दोड आंदुर. अदुनहाटी बाबाना कयदाल अवुन बोरे गुंजकुना परोर.
- 30 बाबल, नना मोमोट इव्वुरोम उंदे आंद,” इंचि इत्तोर.
- 31 अस्के मरुंदि मल्का यहुदिल्लक येसुन हक्कालय बंडां पेरतुर.
- 32 अय्ते येसु, “नावा बाबाल नाकु वेहताप नना वेल्लेन बेसता कबाहक मीकु कीसि हूपिस्तन. अव्टेताल बद कबळहाटी नाकुन बंडाने तनालय हळसंतरि?” इंचि ओर्कुन पूसकीतोर.
- 33 अस्के ओर, “निमे कीता बेसता कबाहकुनाहाटी नीकुन बंडाने तन्नोम. गानि निमे पेनदा अपमानम कीतिन. अचोने आयका निमे मनकन आसिगुडा नीवद निमे पेन इंचि वेहकुंतिन, अदुनहाटी मोमोट नीकुन बंडाने तनंतोम” इत्तुर.
- 34 अस्के येसु ओर्क इल्हा जवाब हीतोर, “मीवा मूसाना नियमते, ‘मिमेट पेनकु आंदिर इंचि नना इतन,’ इंचि इच्चुर लीडकुन पेन इत्तद, रासि हिल्लेना?✧ मंता.
- 35-36 दर्मसास्त्रम बस्केने तप्पु वेहो. ओक्कला, पेन दाना पोल्ले, बोर्क-बोर्क अय्ते दोर्कतनो, ओर्कुन पेनकु इंचि इत्तय्ते, नाकुन बाबाल पेरसि इद दुनियाते लोहचीतस्के, ‘नना पेनदा मर्रिन’ इल्हा इंचि इत्ते, नना पेनदा अपमानम कीतन इंचि मिमेट बल्हा इतिर?
- 37 नावा बाबाल कियना कबाहक नना कियाकोटे, नाकुन नममट.
- 38 गानि नना अव कबाहकुन कीतन इंचि, नाकुन नम्मकोन्ना, नना कियना कबाहकुनपोर्रो अयना विस्वासम इरंट. अस्के, बाबाल ना लोप्पो, नना बाबाना लोप्पो मंतोम इंचि मीकु तेळियार,” इंचि येसु इत्तोर.
- 39 अस्के ओर मरुंदि मल्का येसुन दोर्का पियालय हळतुर, गानि ओर ओरा कयदाल तपिचकुंचि अगटाल होत्तोर.
- 40 येसु मर्रा योर्दन बैरेटा हब्बेरा, बगा अय्ते मुन्ने योहान बापतिस्मा हियुंदुर, अदे जेगाते होंचि अग्गेन मत्तोर.
- 41-42 अस्के ओनगा वेल्लेन मंदि वासि, “बापतिस्मा हियना योहान इचंत्रम आयनव बवे कबाहक किया हिल्लोर. गानि ई मनकना बारेमते ओर बतल अय्ते वेहतोरो, अव अन्नि निजम आतां,” इंचि ओरद-ओरे वळ्कालय दल्गतुर. पजा अगा वेल्लेन मंदि येसुनपोर्रो विस्वासम कीतुर.

11

येसुना दंटगाड लाजर हांतोर

- 1 लाजर पोरोल्लतोर वरोर मनकल बिमार अरिं मत्तोर. ओर ओना मरियम आनि मार्ता इनना अक्काहकुनतोनि बेतानि इनना नाटे मनुंदुर.
- 2 मुन्ने उंदि मल्का उंदि मुरतळ, सामिना काल्कुंक अत्तर निय होकसि दाना केल्लकुने उसुमता, अद इदे मरियम आंद. ई बिमार अरता लाजर दाना तम्मुर आंदुर.
- 3 अदुनहाटी अव रोंड अक्काहक, “सामि, नीवा पावरमगल्लोड वरोर, बिमारते मंतोर,” इंचि येसुक कबुर लोहतां.
- 4 अद कबुर केंजसि येसु, “लाजस्क अद बिमारि ओन हळ्किसि ओयालय वाया हिल्ले, गानि पेनदा पेदातनमतुन हुप्सालय वाता. इदुनहेंदाल पेनदा मर्रिक कदर दोर्कार,” इंचि इत्तोर.
- 5 येसुक मार्ताल, दाना अक्कल आनि लाजर ईर इत्ते पावरम.
- 6 लाजर बिमारते मंतोर इत्ता कबुर तेळियिनागानि येसु बद नाटे अय्ते मत्तोर, अदे नाटे इंका रोंड रोजकु आगतोर.
- 7 पजा येसु, “वट, मनम यहुदिया राज्येम मल्लिस दाकोम,” इंचि ओना सिस्सुल्लुकुन इत्तोर.
- 8 गानि सिस्सुल्लुक, “रब्बी, कोन्नि रोजकु मुन्नेन अगाटा यहुदि पेद्दाल्क नीकुन बंडाने तंचि हक्कालय हळतुर. अयना निमे मर्रा अग्गेन दांतिना?” इंचि येसुन इत्तुर.
- 9 अस्के येसु, “पोद्दाला पन्नेंड गंटां मन्नोंगां? ई वेलाते ताकानोर दुनियाता वेलगुन हळसेक ताकंतोर, इंचि ओना कादुक बतल दल्गो ओर हिळु अर्रो.
- 10 गानि नर्काटा वेलाते ताकानोना लोप्पो वेलगु मन्नो, अदुनहाटी ओना कादुक बतलन्ना दल्गिसि ओर हिळु अर्रा परंतोर,” इंचि ओर्क वेहतोर.
- 11 इव पोल्लें आता पजा मर्रा येसु, “मना दंटगाड लाजर निद्रा होत्तोर, गानि ओन नना निद्रताल तेहालय दांतन,” इंचि सिस्सुल्लुकुन इत्तोर.
- 12 अस्के सिस्सुल्लुक, “सामि, ओक्कला ओर निद्रा होंचि मनानय्ते बेस आंतोर,” इंचि इत्तुर.
- 13 येसु लाजरना हामुरता बारेमते वळ्कतोर. गानि सिस्सुल्लुक अय्ते लाजर निजम निद्रा होंचि आराम कीसंतोर इंचि इनकुत्तुर.
- 14 अदुनहाटी येसु ओर्क, “लाजर हासोत्तोर,” इंचि कुल्ला-कुल्ला वेहतोर.

15 वेहचि, “हासोत्तस्के नना ओनगा मना हिल्लेन. इद मीहाटीगे जर्गता, इंचि नना कूस मंतन. दीनहेंदाल मिमेट नापोर्रो विस्वासम कीकिट. वट! इंदके मनम ओनगा दाकोम,” इंचि इत्तोर.

16 अस्के, “दट! येसुनतोनि हायालय मनमगुडा दाकोम,” इंचि एमडाल्कुनाल वरोर तोमल इनना सिस्युड कळमता सिस्युल्कुन इत्तोर.

हातोर्कुनगुडा जीवा अरहना ताकत येसुनगा मंता

17 बेतानि नाटे एवतस्के, लाजरून बोंदाते ताससि नालुं रोजकु आता, इंचि येसुंक तेळियता.

18 बेतानि नार येस्सलेम सहरताल दग्गेर-दग्गेरा मूड किलो मीटर्क लक्कु मंता.

19 तम्मुर हासोत्ताहेंका वेल्लेन दुक्कमते मनना मार्ता आनि मरियमुंक दैरनेम हियालय वेल्लेदोर यहुदिल्क वासि मत्तुर.

20 येसु वासंतोर इंचि मार्ताकि तेळियतस्के ओन्क कलियालय अद एदुर होत्ता. गानि मरियम मात्रम लोने मत्ता.

21 मार्तालि येसुंक कलियसि, “सामि, निमे गिंटा इगे मंचि मत्ते, नावा तम्मुर हायाकोन्नेर.

22 गानि इंदके अथना बतल आयो. निमे पेनदुन बतल तल्कते अद, नीकु पेन हीता, इंचि नाकु एरपाट,” इंचि इत्ता.

23 अस्के येसु, “नीवा तम्मुंक मर्रा जीवा अरंता,” इंचि इत्तोर.

24 पजा मार्तालि, “हो सामि, हातोर अंटोर्क जीवा अरना आकिरता रोजुने, ओर मर्रा जीवाते तेदानुर इंचि नाकु एरपाट मंता,” इंचि इत्ता.

25 अद केंजसि येसु, “हातोर्कुन तेहानोन आनि पिस्वरतुन ननाने आंदुन. नापोर्रो विस्वासम कीतोर, हायिनागानि मर्रा जीवाते तेदांतुर.

26 जीवाते मननेके नापोर्रो विस्वासम ईरनोर अंटोर्क बस्केने हामुर वायो. इद पोल्लेतुन निमे नम्मंतिना मार्ता?” इंचि दान पूसकीतोर.

27 अस्के अद, “हो सामि, पेनदा मर्रिन निमेन आंदिन, इंचि नना नम्मंतन. इंका इद दुनियाते वायना मत्तोर किरिस्तुनगुडा निमेन आंदिन,” इंचि इत्ता.

28 इच्चोन वळ्किसि अद अगटाल पेय्शि होंचि, दाना अक्कल मरियमुन सपुडदाका पक्कक केयता. केय्शि, “गुरु वातोर, ओर नीकुन केयसंतोर,” इंचि वेहता.

29 मार्ताना पोल्ले केंजता केंजमळे मरियम बिराना तेदसि येसुनगा होत्ता.

30 येसु इंका नाटे होळिया हिल्लोर. मार्तालि ओन्क बगा अय्ते कलियतनो, अदे जेगाते मत्तोर.

31 मरियमुंक दैरनेम हियालय दानतोनि लोते बोेर अय्ते मत्तुरो, आ यहुदिल्क मरियमुन कुस्कुने तेदसि होननेके हळसि, “अद लाजरुना बोंदातागा होंचि अळंता बारे,” इन्कुंचि ओरगुडा दाना पज्जेन होत्तुर.

32 येसु मत्ता जेगातागा मरियम एवसि, ओन हळता. हळसि ओना काल्कुनपोर्रो अरसि, “सामि, निमे इगे मंचि मत्ते ना तम्मुर हायाकोन्नेर,” इंचि इत्ता.

33 मरियम आनि दानतोनि वातोर अंटोर यहुदिल्कुना अळ्ळ हळसि, येसुंक बादा अनपिस्ता. मनसुने ओर वेल्लेन दुक्कमते मत्तोर.

34 पजा येसु, “ओन मिमेट बगा इरतिर?” इंचि पूसकीतस्के, “वासि हळा सामि!” इंचि इत्तुर.

35 हळसि येसु अळतोर.

36 अस्के यहुदिल्क, “हुळट, लाजर इत्ते ओन्क बच्चोन पावरमो!” इंचि इत्तुर.

37 गानि इच्चुर लोकुल्क, “ईर मनकल, वरोर गुडिंडंक कळ्क दिस्सानाल कीतोर अय्ते, लाजरुन हामुरताल कापाळा पराकोन्नेरा?” इंचि इत्तुर.

हासोत्ता लाजस्क येसु जीवा अरहंतोर

38 येसुंक मर्रंदि मल्का मनसुने बादा अनपिस्ता. पजा ओर लाजरुना बोंदातागा होत्तोर. अद बोंदा उंदि पडालेहका मत्ता. दाना सौर्रेक अड्डम उंदि बंडा दोब्बिसि मत्ता.

39 पजा येसु, “अद बंडातुन तेंडट,” इंचि इत्तोर. गानि हासोत्तोना अक्कल मार्तालि, “सामि, ओर हासि नालुं रोजकु आसंता. अदुनहाटी ओना सेत्ता इरगा गब्बु पीसि मंदगोम!” इंचि इत्ता.

40 अस्के येसु, “निमे विस्वासम कियानय्ते पेनदा महिमातुन हळकिन, इंचि नना नीकु वेहा हिल्लेना?” इंचि दान इत्तोर.

41 अदुनहाटी ओर आ बंडातुन तेंडटुर. पजा येसु पोरो हळसेक, “बाबा, निमे ना पारतना केंजताहाटी, नीकु दन्यवाद.

42 निमे बस्केळ्के नावा पारतना केंजतिन इंचि नाकु एरके. गानि नाकुन निमेन लोहतिन इत्तादुन, ना सुट्टु निलसि मत्ता लोकुल्क नम्मगोम इंचि ओराहाटीगे नना ई पोल्ले वळ्कतन,” इंचि इत्तोर.

43 इल्हा वळ्किसि येसु, “ए लाजर, पलातुक पेय्शि वा!” इंचि लगांचि केयतोर.

44 अस्के हासोत्ता लाजर पलाते वातोर, अस्के ओना कय्क-काल्क हामुर कपिडते हट्टिस मत्तां, ओना मोकोमगुडा उंदि सेल्लाते हट्टिस मत्ता. पजा येसु, “ओना कट्टुकु लेह्चि ओन होना हीम्टु,” इंचि इत्तोर.

येसुन हक्कालय यहुदिल्क पिलान कीतुर

(मत्तयाल 26:1-5; मरकुस 14:1-2; लूकाल 22:1-2)

45 येसु कीता अद कबळतुन हळसि, मरियमुनगा वाता यहुदिल्कुनाल वेल्ले मंदि यहुदिल्क, येसुन नम्मुतुर.

46 गानि ओरावेटाल इच्चुर लोकुल्क मात्रम, परिसिल्कुनगा होंचि येसु बतल-बतल कीतोर अदुन वेहतुर.

- 47 अदुनहाटीं पेर्मांलोक, परिसिल्क कलियसि उंदि पेद्दा पंचादि उपिस्तुर. उपिच्चि, “ओर मनकल अय्ते वेल्लेन अद्बूतामाता चिन्हां कीसि हूपिच्चंतोर. अय्ते मनम बतल कीकोम?
- 48 ओर कियानदुंता मनम इल्हेन हळसेक मत्ते, अंतोर ओने नम्मिसि ओन राजाल कीतुर. पजा रोम सरकारता सिपाइल्क वासि मना गुळितुन, मना लोकुल्कुन नासडेम कीसि पोहांतुर,” इंचि वळकतुर.
- 49 ओरव्टे वरोर कयपाल इनानोर मत्तोर. अद वर्सा ओर पेद्दा पेर्मांल मत्तोर. ओर, “मीकु बतले तेळियोना!
- 50 देसेमता अंतोर लोकुल्क नासडेम आयनदानकन्ना, लोकुल्कुनाहाटीं वरोर मनकल हाते, बेस आयोना!” इंचि इत्तोर.
- 51-52 सिराप यहुदि लोकुल्कुना पायदाहाटींगे आयो गानि, पूरा दुनियाते बेके-बेकेनो सिल्लर आसि मत्ता पेनदा लोकुल्कुन उंदि कियालय, येसु ओना जीवातुन हीतोर इत्ता पोल्लेतुन ओर वेहतोर. इद पोल्ले ओर ओना सतता विचारमताल वळका हिल्लोर, गानि अद वर्सा ओर पेद्दा पेर्मांल मत्तोर इंचि बविस्वयानि कीतोर.
- 53 इल्हा अद रोजुनाल येसुन हळ्कालय यहुदि पेद्दाल्क पिलान कीतुर.
- 54 अदुनहाटीं येसु अस्केटाल यहुदिल्कुन नड्डुम अंतोर्क दिस्सेक वेलियाकोंदुर. पजा ओर येस्सलेम सहर होळसिसि बय्लि जेगाक दग्गेर मनना एप्राइम इनना नार होत्तोर. होंचि अगा ओना सिस्स्युल्कुनतोनि मनालय दल्तातोर.
- 55 अस्के यहुदिल्कुना दाटसि होनना पंडुगु दग्गेर्क एवसि मत्ता. अदुनहाटीं ओरा सततुन सुद्द कीकुनना रिवाज कियालय पंडुगुंकांन्ना मुन्नेन वेल्लेन लोकुल्क नाहकुनाल येस्सलेम होत्तुर.
- 56 ओर अंतोर येसुन पहकसेक मत्तुर. गुळिते नित्तिसि, “मीकु बतल अनपिच्चेक, ओर ई पंडुगुनाहाटीं वांतोरा, वायोरा?” इंचि वरोंक-वरोर पूसकियंदुर.
- 57 अचोने आयका पेर्मांलोक, परिसिल्क, येसुन दोर्का पियनाहाटीं, “येसु बगा मंतोर इत्ता संगति बोर्कन्ना तेळियते, माकु वासि वेहाट हळ्हाट!” इंचि आदेस हीसि मत्तुर.

12

बेतानिया नाटे मरियम येसुंक अत्तर निय होकंता

- 1 दाटसि होनना पंडुगुंकांन्ना हास् रोजकु मुन्नेन येसु बेतानिया इनना नाटे एवतोर. येसु बोन अय्ते हामुरताल जीवाते तेहतोरो आ लाजर ई बेतानियातेन मनुंदुर.
- 2 अगा येसुनाहाटीं नर्कटा गाटो तयार कीतुर. मार्ताल गाटो वाटता. लाजरगुडा गाटो तिनानोरतोनि उद्दिदस मत्तोर.
- 3 अस्के मरियम, जटामासि इनना मराता एक्को दराता सगोम लीटर अत्तर निय तच्चि, येसुना काल्कुनपोरों वळियता. वळियसि, दाना केल्लुने ओना काल्कुन उसुमता. अस्के अद नियदा गब्बु लोन्ता विच्चका होत्ता.
- 4-5 गानि ओना सिस्स्युल्कुनाल इस्कारियोत नाटेनोर यहुदल इननोर वरोर मत्तोर. ई यहुदले पज्जो, येसुन दोकाते पीसि हियानोर आंदुर. ओर, “अरेरे! ई अत्तर नियदुन मूड न्हकुना एंडि स्पेक* अम्मिसि, आ स्पेन गरिब लोकुल्कुंक हियानायोना?” इंचि इत्तोर.
- 6 ओन्क गरिब लोकुल्कुना पर्वा मंता इंचि अल्हा इना हिल्लोर. गानि ओना दोंगा बुद्दिहेंदाल, ओनगा कोत्तना संचि मननेके, आ संचिते वाटता कोत्तानाल ओर दोसकुनुंदुर. अदुनहाटींगे ओर अल्हा वळकतोर.
- 7 अस्के येसु, “नना हायना रोजु दग्गेर एवताहाटीं नाकुन तयार कियालय अदुन होळसीम.
- 8 गरिब लोकुल्क बस्केळ्क मीतोने मनांतुर, गानि नना मीतोनि बस्केळ्क मनोन,” इंचि इत्तोर.
- 9 अचोटेन येसु अगा मंतोर इंचि तेळियतस्के, वेल्लेन यहुदि लोकुल्क, सिराप येसुन हळ्हालये आयो गानि, येसु हामुरताल जीवाते तेहता आ लाजरगुडा हळ्हालय अगा होत्तुर.
- 10-11 ई लाजरगुडेंकेन वेल्लेन मंदि यहुदिल्क ओर्कुन होळसि येसुनपोरों विस्वासम इरतुर, अदुनहाटीं पेद्दा पेर्मांलो लोजरगुडा हळ्कना पिलान कीतुर.

येसु वेल्लेन कदरते येस्सलेम सहरते होळियंतोर

(मत्तयाल 21:1-11; मरकुस 11:1-11; लूकाल 19:28-40)

- 12-13 इंकुंदि रोजु, येसु येस्सलेम वासंतोर इंचि, पंडुगुंक वाता लोकुल्कुंक तेळियता अय्ते, वेल्लेन मंदि लोकुल्क कजूर मराकुना कोम्मना-कोम्मां पीसि ओन्क कलियालय एदुर होत्तुर. होंचि, “होसन्ना!† सामिना पोरोल्ले वायना इस्त्राएलता राजाना वेल्लेन दन्यवाद आयि, जय जोहार!” इंचि मोत्कुत्तुर.

14-15 दर्मसास्त्रमते रासि मत्ता पोल्ले पूरा आयगोम इंचि येसु उंदि लेय्या गाडदि पोरोर् उद्दिदस सहरतेके वासेक मत्तोर. दर्मसास्त्रमते रासता पोल्ले इल्हा मंता:

* 12:4-5 एंडि स्पेक उंदि एंडि स्पेता विलुवा, दग्गेर-दग्गेरा उंदि रोजुना कूलितचो मत्ता. इगे मूड न्हकुना रूपे इत्ते, वरोर मनकना एडादिमेळता कूलि आंता. † 12:12-13 होसन्ना दीना असल अर्तम मुन्ने “कापाळा” मत्ता. गानि इंदके ई पोल्लेता वापर पेनदा स्तुति कियालय कीतुर.

“सियोनता लोकुकुनिटाः वेरियमट, हुळाट, मीवा राजाल गाडदि पोरो उद्दिदस वासंतोर.”✱

16 इव गटनां जर्गनिके येसुना सिस्युलकुंक बतले तेळिया हिल्ले. गानि येसु हामुरताल जीवाते तेदसि महिमाते स्वर्गम होतस्के, जर्गता अन्नि गटनां, दर्मसास्त्रमते रासि मत्तापे जर्गतां, लोकुकुलगुडा ओनतोनि अल्हेन कीतुर. इंचि ओर्क अर्तम आता.

17 येसु लाजस्न बोदाताल केय्सी जीवा अरहतदुन हळता लोकुकुलक, ओर हळतदुना बारेमते गवाइ वेहतुर.

18 येसु ई अद्बूतामाता चिन्ह हुपिस्तोर इंचि लोकुकुलक केंजतुर, अदुनहाटी ओर ओन्क कलियालय होतुर.

19 पजा परिसिल्क, “मना पिलानकु बता कबळक ओज्जा हिल्लें. हुळाट, पूरा दुनियंता ओना पज्जो अरसि होंचंता,” इंचि ओरद-ओरे वळकालय दलगतुर.

येसु ओना हामुरता बारेमते वेहांतोर

20 पंडुगुने मोळकालय वाता लोकुकुकुनाल इच्चुर युनानि लोकुकुलकS मत्तुर.

21 ओर गालिलि राज्येमता बेतसेदा नाटेना, पिलिपनगा वासि, “महाराज, माकु येसुन कलियाना मंता,” इंचि इत्तुर.

22 इद पोल्ले पिलिप, अंदरियल इनानोंक वेहतोर. पजा पिलिप आनि अंदरियल इच्चुर कलियसि येसुंक वेहातुर.

23 अस्के येसु इल्हा वेहालय दलगतोर, “मनकना रूपमते पुटतोन नना, इंदके नावा महिमातुन हुप्सना वेला दग्गेर्क एव्ता.

24 नना निजम-निजम वेहासेक, वंजि पेडे बूमिंते अर्सि हासोन्नाकोटे अद उंदे मनंता. गानि अद हासोचि मोल्का वाते मात्रम पेद्दा बेर्सि वेल्लेन पेडेकुन तयार कीता.

25 अल्हेने, बोरे आयिर! इद दुनियाते ओर ओना जीवातुन पावरम कीतोर, ओर ओना जीवातुन पोळगोटकुंतोर. गानि बोरे अय्ते इद दुनियाते ओना जीवाता पर्वा किय्योर, ओर ओना जीवातुन बस्केळक पिस्सना पिस्वरहाटी कापाळसि इरंतोर.

26 बोरे नावा सेवा कीतन इंतोर, ओर नावा पज्जो ताकना. बारित्ते नना बगा मनंतनो, अगा नावा सेवा कियानोरगुडा मना पीता. अल्हेने बोरे नावा सेवा कीतोर, नावा बाबाल ओन्क कदर हीतोर.

27 इंदके नावा जीवा तकलिपते मंता. नना बतल इंदकन? बाबा, इद तकलिपता वेलाताल नाकुन तप्सा, इंचि इंदकना? इनोन. बारित्ते नना इद वेलाहाटीगे वातन.

28 बाबा! नीवा पोरोल्क निमेन कदर हीम,” इंचि येसु इत्तोर. अल्हा इत्तस्के स्वर्गमताल उंदि अल्किर, “नना नावा महिमाता कदरतुन दीनकन्ना मुन्ने हीतन, मरा इंका हीतन,” इंचि केंजावाता.

29 अद अल्किरतुन केंजसि अगा नित्तिसि मत्ता इच्चुर लोकुकुलक, “मब्बु उम्मसंता रो!” इंचि इत्तुर. इंचिच्चुर बोरे, “आयो, पेनदा दूता ओनतोनि वळकता,” इंचि इत्तुर.

30 अस्के येसु, “अद अल्किर नाहाटी आयो, मीवाहाटी वाता.

31 इंदके इद दुनियाता न्यायम कियना वेला एवता. इद दुनियापोरो राज्येम कियना अदिकारिन पलाते पेचाहचि गेदमना वेला इंदके वाता.

32 बस्के अय्ते नाकुन बूमिताल पोरोळक तेहमळ जर्गतनो, अस्के अंटोर्कुन नाहेके इक्कतन,” इंचि इत्तोर.

33 इल्हा वळिकसि येसु, ओन्क बसोटा हामुर वायनद मंता इत्तदुन वेहतोर.

34 अस्के लोकुकुलक, “किरिस्तु बस्केळक जीवातेन मनंतोर, इंचि मोमोट मूसाना नियमते केंजतोम. अय्ते, मनकना रूपमते पुटतोन बूमिताल पोरोळक तेहांतुर, इंचि निमे बल्हा वेहा परंतिन? ई मनकना रूपमते पुटतोर बोरे आंदुर?” इंचि येसुन पूसकीतुर.

35 अस्के येसु, “वेलगु मीतोनि इंका जेरासेप मनंता. हीकट मीकुन मुच्चका मुन्नेन, वेलगुने मिमेट ताकसेके मंटु. बारित्ते हीकटते ताकानोर, ओर बगा दांतोर ओनद ओन्के तेळियो.

36 मीकु इद वेलगुना संतानम आयानद मत्ते, मिहगा वेलगु मननेकेन मिमेट दानपोरो विस्वासम इरंट,” इंचि येसु ओर्क वेहतोर. वेहचि ओर्क दिसाकोटा ओरागटाल होतोर.

यहुदिल्क येसुनपोरो विस्वासम इर्न

37 लोकुकुकुना मुन्ने येसु वेल्लेन अद्बूतामाता चिन्हें कीतोर. अयना ओर लोकुकुलक येसुनपोरो विस्वासम इर्न हिल्लुर.

38 दीनहेंदाल, यसायाह इनना पेनदा कबुरतोर, एनकटा रासता पोल्ले, पुरागा आता. अद पोल्ले इल्हा मत्ता: “सामि! मोमोट वेहता कबुरतुन बोरे नमतुर? पेनदा ताकततुन बोर्क हुपिचमळ जर्गता?”✱

39 ओर विस्वासम इर्न पराहिल्लुर. बारित्ते, यसायाहल इंकुदि जेगाते इल्हा रासतोर:

40 “ओर ओरा कळकुन दिसाकोटा कीतोर आनि ओरा मनसुन बंद कीतोर. अदुनहाटी ओर कळकुने हळा परसेक हिल्लुर, मनसुनाल ओर्क तेळियसेक हिल्ले. दीनहेंदाल ओर नाहेके तिरियुर, नना ओर्कुन बेस किय्योन.”✱

41 यसायाहल येसुना महिमातुन हळताहेंकेन ओना बारेमते ओर इव पोल्लें वेहतोर.

42 अय्नागानि वेल्ले मंदि यहुदि अदिकारिल्क येसुनपोरो विस्वासम इरतुर. अय्ते यहुदि पेद्दाल्कगुडा मत्तुर. गानि परिसिल्कुंक तेळियते, ओर्कुन दर्मसास्त्रम कराहना लोते होळिया हिय्युर इत्ता वेंरेक, ओर कुल्ला-कुल्ला ओप्कुनाकोदुर.

- 43 बारिल्ले, ओराहाटीं पेनदाहेदाल दोर्कना कदरकन्ना, लोकुल्लुकुनहेदाल दोर्कना कदरे ओर्क एक्को पावरम.
- 44 अस्के येसु वरगोय्से, “बोर अय्ते नापोर्रो विस्वासम ईरतोर, ओर सिराप ना पोरेन आयो गानि, नाकुन लोहचीतोन पोरोगुडा विस्वासम ईरतोर.
- 45 अल्हेन बोर अय्ते नाकुन ह्ळांतोर, ओर नाकुन लोहचीतोनगुडा ह्ळांतोर.
- 46 नापोर्रो विस्वासम ईरनोर ओर बोरे आयिर, हीकटते मनानायो, इंचि नना इद दुनियाते वेल्गुनलेह्का वातन.
- 47 बोरे आयिर, ओक्कला नावा पोल्लें केंजसिगुडा अवुन परकारम ताकाकोटे, ओना न्यायम नना किय्योन. बारिल्ले नना इद दुनियाते न्यायम किय्यालय वाया हिल्लेन, गानि इद दुनियातोर्कुन पिसागोटलय वातन.
- 48 बोर अय्ते नाकुन ह्यसाका नावा पोल्लेन पिय्योर, ओना न्यायम किय्यानाहाटीं वेरे उंदि मंता. अद नना मीकु कराहता पोल्ले आंद. आकिर रोजुननाड ओना न्यायम नावा पोल्ले किय्यार.
- 49 बारिल्ले नना नावा मनसुंक वाताप वळका हिल्लेन, गानि नना बतल वळकना, बतल वेहना, इंचि नाकुन लोहचीता बाबाले नाकु आदेस हीतोर.
- 50 ओना आदेस बस्केळक पिस्सना पिस्वरताहेके ओता इंचि, नाकु एका मंता. अदुनहाटीं बाबाल नाकु बल्हा वेहना इंचि वेहतोरो, अल्हेन नना मीकु वेहचंतन,” इंचि ओर्क वेहतोर.

13

येसु ओना सिस्युल्लुकुना काल्क नोरतोर

- 1 इद दुनियातुन होळसि पेनबाबानगा मल्लिस होनना वेला दग्गेर्क एत्ता इंचि, येसुंका दाटसि होनना पंडुगुंका मुन्नेन तेळियता. इद दुनियाते मनना ओना लोकुल्लुकुन ओर वेल्लेन पावरम कीतोर. अचोने आयाका अद पावरमतुन आकिरदाका ओरपोर्रो हुपिचचेकेन मत्तोर.
- 2 येसु, ओना सिस्युल्लुकुन नर्कटा वेलाते गाटो तिनालय उद्दिस मत्तुर. गानि गाटो तिन्नका मुन्नेन देय्यम, इस्कारियोत नाटेना सिमोन इनानोना मर्रि यहुदन लोप्पो वासि, येसुंका दोका हियालय ओन एक्किसता.
- 3 पेनबाबाल अन्नि अदिकाराल्क येसुना कय्दुक हीतोर, इका ओर पेनदागटाल वातोर, पेनदागेन मल्लिस दांतोर इत्तद अन्नि ओन्क एरपाटे मत्ता.
- 4 अदुनहाटीं ओर गाटो तिनालय उद्दिस मत्तागटाल तेदतोर. तेदसि, केरसि मत्ता अंगितुन तेंडतोर. तेंडसि उंदि सेल्लातुन नडिक हुटतोर.
- 5 पजा उंदि गमेलाते एर पीसि सिस्युल्लुकुना काल्क नोरसेके, नडिक हुटसि मत्ता सेल्लाते उस्मालय दल्गतोर. 6 अल्हा कीसेके ओर सिमोन पत्रुनगा वातोर. अस्के पत्रु, “निमे नावा काल्क बारि नोरसतिन सामि?” इंचि येसुन पूसकीतोर.
- 7 अस्के येसु, “नना कियानद नीकु इंदके अर्तमायो, गानि मुन्ने-मुन्ने नीके तेळियार,” इंचि इत्तोर.
- 8 पजा पत्रु, “निमे नावा काल्क बस्केने नोरमा,” इंचि इत्तोर. अस्के येसु, “ननागिटा नीवा काल्क नोरकोटे, निमे नावोन आया परिन,” इंचि वेहतोर.
- 9 अस्के सिमोन पत्रु, “अय्ते सिराप नावा काल्के आयो, नावा कय्कुन, नावा तल्लातुनगुडा नोरा सामि!” इंचि इत्तोर.
- 10 पजा येसु, “बोर अय्ते एर तुंगतोर, ओर बेस साप मनंतोर. ओर सिराप काल्क नोरकुल्ले सालु. अल्हेन मिमेट बेस साप मतिर, गानि मिहागटाल अंतोर बेस साप हिल्लिर,” इंचि वेहतोर.
- 11 ओन्क दोका हियानोर बोर इंचि, ओन्क एरपाट मत्ता. अदुनहाटीं ओर, “मिहागटाल अंतोर बेस साप हिल्लिर,” इंचि इत्तोर.
- 12 ओरां अंतोरा काल्क नोरमळ आता पजा, येसु अंगि केरसि, मुन्ने उद्दिस मत्ता जेगाते होंचि उद्दुतोर. उद्दिस इल्हा वळ्कालय दल्गतोर, “नना मीकु बतल कीतन, मीकु अर्तम आतना?”
- 13-16 मिमेट नाकुन गुरु, सामि इंचि केयंतोर. नना गुरु, सामिन आंदुन, अदुनहाटीं मिमेट इनानद बरोबरे. नना गुरुन, सामिन आसिगुडा मीवा काल्क नोरतन. अय्ते मिमेटगुडा वरोना काल्क वरोर नोरसेके सेवा कियना. नना मीकु निजम-निजम वेहासेक, वरोर दासि मनकल ओना मालकुंका पेद्दा आयोर. अल्हेन वरोर कबुरतोर ओन लोहतोनकन्ना पेद्दा आयोर. नना बल्हा अय्ते कीतनो, अल्हेन मिमेटगुडा कियना इंचि, इद उंदि उदाहरन हुपिस्तन.
- 17 इंदके इव पोल्लें मीकु तेळियतां. अदुनहाटीं मिमेट इवुन पीसि ताकतिरिल्ले, पेन मीकु आसिर्वाद हीता.”

येसु ओन्क दोका हियानोना बारेमते कुद्दु वेहांतोर

(मत्तयाल 26:20-25; मरकुस 14:17-21; लूकाल 22:21-23)

- 18 “नना मी अंतोरा बारेमते वळ्कसेक हिल्लेन. नना बोर्कुन अय्ते पेर्कुत्तन, ओरा बारेमते नाक बेस एरपाट. गानि, ना हारि तित्तोरे नाकु अड्डम आतोर, इल्हा दर्मसास्त्रमते रासि मत्ता पोल्ले पुरागा आयना इंचि इल्हा जर्गपीता.
- 19 इल्हा जर्गतस्के, ओन ननाने आंदुन, इंचि मिमेट विस्वासम किय्यानाहाटीं, इव पोल्लें जर्गका मुन्नेन मीकु वेहासेक मंतन.
- 20 नना निजम-निजम वेहासेक, नना लोहतोन, बोर अय्ते स्विकार कीतोर, ओर नाकुन इका स्विकार कीतोर. नाकुन स्विकार कियानोर, ओर नाकुन लोहचीतोनगुडा स्विकार कीतोर,” इंचि येसु इत्तोर.

- 21 इव पोल्लें वळकुड आतस्के येसुंक मनसुने बादा अनपिस्ता. पजा ओर, “नना निजम-निजम वेहासेक, मीवा लोप्पोटाल वरोर नाकुन दोकाते पीसि हीतोर,” इंचि इत्तोर.
- 22 येसु बोना बारेमते वळकतोरु इंचि तेळियका, सिस्स्युल्क वरोना मोकाम वरोर हळकुत्तुर.
- 23 येसुना सिस्स्युल्कनाल येसु बोन अय्ते पावरम कियुंदुरो, ओर येसुना दग्गेरेन उद्दिदस मत्तोर.
- 24 अय्ते सिमोन पत्र, “येसु बोना बारेमते इंचंतोरु पूस कीम,” इंचि ओन्क कय सय्यो कीतोर.
- 25 अस्के आ सिस्स्युड इंचिचो येसुनेके जर्गिसि येसुना रोमबोच्चेतगा तला इरसि, “ओर ओर आंदुर सामि?” इंचि पूसकीतोर.
- 26 अस्के येसु, “नना ई हारि तुकडातुन कुसिटे मुळहाचि बोनकय्ते हीतन, ओरे आंदुर,” इंचि जवाब हीतोर. पजा हारि तुकडातुन कुसिटे मुळहाचि इस्कारियोत नाटेना सिमोनुना मरिं यहुदांक हीतोर.
- 27 यहुदल हारि तुकडा एतता एतमळे, ओन देय्यम पीता. अस्के येसु यहुदन, “निमे कियनद बतलो, अद बिराना कीम,” इंचि इत्तोर.
- 28 गानि येसु ओन अल्हा बारि इत्तोर इत्ता संगति मात्रम अगा तिनालय उद्दिदस मत्तोरुंक बोर्के अर्तम आयाहिल्ले.
- 29 कोत्तना जोरा यहुदानगेन मनुंदु. अदुनहाटीं पंडुगुंक अक्सरम मत्ता बतलन्ना सामान अस्सि तरालय वेहतोर बारे, इंचि इच्चुर इनकुत्तुर. इंचिचुर बारे, अळेटाल इच्चुं गरिब लोकलुकुंक हीम इंचि वेहतोर आंद, इंचि इनकुत्तुर.
- 30 पजा यहुदल हारि एत्कुंचि, बिराना पलाते होत्तोर. अस्के वेल्लेन नर्का आसि मत्ता.

येसु ओना हामुरता बारेमते वळकंतोर
(मत्तयाल 26:31-35; मरकुस 14:27-31; लुकाल 22:31-34)

- 31 यहुदल पलाते होत्तस्के, येसु इल्हा वेहालय दलगतोर. “मनकना रूपमते पुटतोंक नाकु, महिमा दोर्कना वेला इंदके एव्ता. नाकु जर्गना अन्निटवुनहेंदाल पेनदुक महिमाता कदर दोर्कार.
- 32 नावाहेंदाल पेनदुक महिमाता कदर दोर्कानय्ते, पेन नाकु दाना कदर हिय्यार. अद आल्सेम कियार्कोटा बिरानेन हीता.
- 33 नावा पिलालकनिटा! नना इंका गडसेम मीवातोनि मंनंतन. पजा मिमेट नाकुन पहककिर. यहुदिल्लुकुना पेदूदालुकुंक, नना बगा दांतन, अगा मिमेट वाया परिर, इंचि बल्हा नना वेहतनो, अल्हेन मीकुगुडा वेहचंतन.
- 34 अदुनहाटीं नना मीकु उंदि पूना आदेस हीसंतन, मिमेट वरोंक-वरोर पावरम कीम्टु. नना मीकुन बल्हा पावरम कीतन, अल्हेन मिमेटगुडा वरोंक-वरोर पावरम कीम्टु.
- 35 मीवा वरोनद वरोर पावरम कियमळतुन हळसि, मिमेट नावा सिस्स्युल्क आंदिर, इंचि अंतोर लोकलुकुंक तेळियसि दांता,” इंचि येसु वेहतोर.
- 36 पजा सिमोन पत्र, “निमे बेके दांतिन सामि?” इंचि पूसकीतोर. अय्ते येसु, “नना होनानगा, निमे इंदके वाया परिन. गानि नना होत्तंका पज्जोटाल वाकिन,” इंचि इत्तोर.
- 37 गानि पत्र, “इंदके नना नीतोनि बारि वाया परींन सामि? नीवाहाटीं नना नावा जीवा हियालयगुडा तयार मंतन,” इंचि इत्तोर.
- 38 अस्के येसु, “बतल! निमे नावाहाटीं जीवा हीतिना? नना नीकु निजम-निजम वेहासेक, निमे मूड मल्कां, नाकुन एरपाट किय्योन, इंचि इंदकिन, अस्केन गोगोड कूसार,” इंचि इत्तोर.

14

पेनबाबानहेके होनना हरिं येसुए

- 1 इंका येसु, “मिमेट मीवा मनसुन कस्टमते वाटमट. पेनदापोरों विस्वासम इरंट, इंका ना पोरोंगुडा विस्वासम इरंट.
- 2 नावा बाबाना लोते वेल्लेन अर्रां मंतां. ओक्कला हिलाकोट्टे मंचि मत्ते, मीवाहाटीं जेगा तयार कियालय होंचंतन इंचि, नना मीकु वेहचि मन्नेन.
- 3 नना होंचि अबुन सदुरतंका, मल्सि वासि मीकुन ओतन. अस्के नना मनानगेन, मिमेटगुडा मंदकिट.
- 4 नना होनना हरिं अय्ते मीकु एर्का मंता,” इंचि सिस्स्युल्कुन इत्तोर.
- 5 अस्के तोमल, “निमे बेके होंचंतिनो माकु अय्ते एरपाटे हिल्ले सामि! असोंटस्के, माकु नीवा होनना हरिं बल्हा तेळियंता?” इंचि इत्तोर.
- 6 पजा येसु, “हरिं, सत्तेम, आनि पिस्वर ननाने आंदुन. नाकुन होळसि बाबानगा बोरे एव्वा परोर.
- 7 नना बोन आंदुन, इंचि मिमेट एरपाट कीसि मत्ते, नावा बाबान इंका मिमेट एरपाट कीसि मन्नेर. इंदकेटाल मिमेट ओन एरपाट कीतिर, ओन हळतिरगुडा,” इंचि वेहतोर.
- 8 अस्के पिलिप, “सामि, माकु बाबान हुपिस्ते, अचोने सालु,” इंचि येसुन इत्तोर.
- 9 अस्के येसु ओन्क इल्हा वेहतोर, “नना इच्चुं रोजकुनाल मीवातोने मंतन, अयना निमे नाकुन एरपाट किया हिल्लिना पिलिपु? नाकुन हळतोर, ओर बाबान हळतोर. अयना, माकु बाबान हुप्सा, इंचि निमे बल्हा इंचंतिन?
- 10 नना बाबाना लोप्पो, बाबाल नावा लोप्पो मंतोर. इदुन निमे विस्वासम कीसेक हिल्लिना? नना वेहना पोल्लें ना इच्चटा नना वेहसेक हिल्लेन, गानि नावा लोप्पो मनना नावा बाबाल, ओना कबाहकुन नाहेंदाल कीकुंचंतोर.

11 नना बाबाना लोप्पो, बाबाल नावा लोप्पो मंतोर इत्ता पोल्लेपोर्रो मिमेट विस्वासम इरंट. हिलाकोंटे नना कियना कबाहकुनहेंदाल अयना नाकुन विस्वासम कीम्टु.

12 नना मीकु निजम-निजम वेहासेक, बोर अयते नाकुन नम्मंतुर, ओरगुडा नना कियनसोटा कबाहक कियानुर. अचोने आयका नना कियना कबाहकुंकन्ना पेद्दा-पेद्दा कबाहक कियानुर. बारित्ते नना नावा बाबानाहेके होंचंतन.

13 अदुनहाटी, मिमेट नावा पोरोल्ले बतल तल्किना, नावा बाबांक महिमा वायानाहाटी नना अदुन कीतन.

14 ओक्कला मिमेट ना पोरोल्ले बतल तल्किना, अद नना कीतन.”

पवित्र आत्मा हीतन इंचि येसु पोल्ले हीतोर

15 “मिमेटगिंटा नाकुन पावरम कीते, नना वेहता आदेसकुन पीसि ताकट.

16 अस्के नना बाबांक विनति कीतन. बाबाल मीवाहाटी बस्केळक मीवातोनि मनालय इंकावरोर सहायम कियानोन हीतोर.

17 आ सहायम कियानोर इत्ते, पवित्र आत्मा मीकु सत्तेमतुन हृप्संता. दुनियातोर दानहेके हळसेक हिल्लुर, दान एरपाट कीसेक हिल्लुर. अदुनहाटी अद दुनियातोरक दोर्को. गानि मिमेट दान एरपाट कीतिर. बारित्ते अद मीवातोनि मंता आनि पजा मीवा लोप्पेन मन्नार.

18 नना मीकुन दिक्कु हिलवोरलेहका होळसि होन्नोन, नना मिहगा मल्लिस वांतन.

19 इंका कोन्नि रोजकु आता पज्जो, दुनियातोर नाकुन हळा पसर, गानि मिमेट नाकुन हळा परकिट. बारित्ते नना जीवातेन मनंतन, मिमेट इंका जीवातेन मंदकिर.

20 अल्हा जर्गतस्के, नना बाबाना लोप्पो, मिमेट ना लोप्पो, नना मीलोप्पो मंतन इंचि मीकु तेळियार.

21 बोर अयते नना वेहता आदेसकुन स्विकार कीसि अबुन पीसि ताकंतोर, ओरे नाकुन पावरम कियानोर आंदुर. बोर अयते नाकुन पावरम कीतोर, ओन नावा बाबालगुडा पावरम कीतोर. पजा ननागुडा ओन पावरम कीसि, नना कुद्दु ओन्क दिस अरकन,” इंचि येसु वेहतोर.

22 पजा इस्कारियोत नाटेनोर आयका, इंकावरोर यहदल, “सामि, निमे माके बारि दिस अरकिन? दुनियातोरकुंक बारि दिस्सिन?” इंचि पूसकीतोर.

23 अस्के येसु ओन्क जवाब हीतोर, “नाकुन पावरम कियानोर अंतोर नना वेहता पोल्लेनपोर्रो ताकंतुर, आनि नावा बाबाल ओर्कुन जीवा कीतोर. असंटोनगा मोमोट होंचि ओनालोप्पो जेगा पीतोम.

24 नाकुन पावरम कियवोर, ओर नावा पोल्लेनपोर्रो ताकोर. मिमेट केंजना पोल्लें नावां आयों, गानि नाकुन लोहचीता बाबानव आंदुं.

25 इव पोल्लें नना मीवातोनि मननेकेन वेहतन.

26 अयनागानि, बाबाल नावा पोरोल्ले लोहना सहायम कियानोर, इत्ते पवित्र आत्मा, मीकु अन्नि पोल्लें करहार. अचोने आयका, नना मीकु वेहता अन्नि पोल्लें अद मीकु मति कीसि हिय्यार.

27 नना मीकु सांतितुन हीसि होंचंतन. दुनिया हियानसोटा सांति आयो, गानि नना नावा सांतितुन मीकु हीसंतन. अदुनहाटी मिमेट मीवा मनसुन कस्टमते वाटमट, वेरिया हियमट.

28 नना लक्कु होंचंतन, गानि मर्रा तिरियसि मीहेके वांतन, इंचि नना मीकु वेहचि मत्तन, अदुन मिमेट केंजतिरे गदा! अयते, मिमेट नाकुन निजम पावरम कियानयते, नना बाबानाहेके होंचंतन इंचि वेहतस्के मिमेट कूस आसि मंदकिट. बारित्ते बाबाल नाकुन पेद्दोड आंदुर.

29 इव अन्नि पोल्लें निजम आयनुं अस्के, मिमेट विस्वासम कियगोम इंचि, नना इव पोल्लें जर्गका मुन्नेन वेहतन.

30 इंका मीतोनि एक्को वळकोन. बारित्ते दुनियापोर्रो राज्येम एलाना अदिकारि वासेकेन मंतोर. वासि अयना नावापोर्रो ओन्क बतले अदिकारम हिल्ले.

31 अयना, नना बाबान पावरम कीतन इत्ता पोल्ले, दुनियाक तेळियगोम इंचि, बाबाल नाकु हीता आदेस परकारमे नना कीतन. सरे तेदट! मनम इगेटाल दाकोम,” इंचि येसु इत्तोर.

15

येसु वेलितसंतोर, विस्वासुल्लक पंगांसंतोर

1 येसु इल्हा वेहतोर. “निजम अंगुर वेलितसंतोन ननाने आंदुन. नावा बाबाल बारे अंगुर तोटातुन बेस हळकुनानोर आंदुर. 2 नावा पंगानाल बव पंगांक अयते कायां हादोंगो, अबुन ओर नरकिस पोहांतोर. आनि हादाना पंगान बारे, इंका बेस हादगोम इंचि अबुना कोस्सन कन्निचंतोर.

3 दीनकन्ना मुन्ने नना मीकु वेहता पोल्लेहेंदाल मिमेट साप आतिर.

4 मिमेट नावातोनि बस्केळक कलियसि मंटु, अस्के ननागुडा इंका मीवातोनि बस्केळक कलियसि मनंतन. पंगा वेलिक अंटिस मनाकोंटे दान्क कायां हादों, अल्हेन मिमेटगुडा नावातोनि कलियसि मनाकोंटे बेसता कबाहक किया परिर.”

5 “ननाने अंगुर वेलितसंतोन आंदुन, मिमेट बारे पंगांसंतोर आंदिर. बोर अयते नातोनि कलियसि मनंतुरो, नना बोरतोनि कलियसि मनंतनो, ओर वेल्लेन बेसता कबाहक कीतुर. नाहगटाल वेरे आसि मंचि, मिमेट बतले किया परिर.

6 बोर अयते नावातोनि कलियसि मन्पुरो, ओर्कुन कबळक ओज्जुवा पंगान पोहताप पोहचियमळ जर्गता. पजा अव पंगां वत्तुतस्के, अबुन जमा कीसि तडमिते वाटसि बोळसंतुर.

- 7 मिमेट ना लोप्यो आनि नावा पोल्लें मीलोप्यो मनानय्ते, मीकु गावाले मत्तद बतल तल्किना, अद मीवाहाटीं कियमळ जर्गता.
- 8 मिमेट वेल्लेन बेसता कबाहक कियानय्ते नावा बाबांक वेल्लेन महिमा दोर्कता. दीनहेंदाल मिमेट नावा सिस्स्युल्क इंचि दिस अर्तिर.
- 9 नावा बाबाल नाकुन बल्हा पावरम कीतोर, अल्हेन नना मीकुन पावरम कीतन. मिमेट नावा पावरमते निलसि मंट.
- 10 नना नावा बाबाल वेहता आदेसकुनपोरो ताकसेके, ओना पावरमते निलसि मंतन. अल्हेन मिमेटगुडा नना वेहता आदेसकुनपोरो ताकतिरित्ते, नावा पावरमते निलसि मंतिर.
- 11 नावा कुसि मीलोप्यो मनना, आनि मीवा कुसि पुरागा आयना इंचि, नना मीकु इव पोल्लें वेहतन.”
- 12 “नना मीकुन बल्हा पावरम कीतनो, अल्हेन मिमेटगुडा वरोंक-वरोर पावरम कीकुंट, इदे नावा आदेस आंदु.
- 13 वरोर मनकल ओना दंटागानाहाटीं ओना जीवा हियमळकन्ना पेद्दा पावरम बद्दे आयो.
- 14 नना हियना आदेसकुनपोरो गिंटा मिमेट ताकानय्ते, मिमेट नावा दंटातोर आंदिर.
- 15 इंदकेटाल नना मीकुन दासुल्क इंचि केयोन. बारित्ते मालक बतल कीतोर अद ओना दासुंक बतल तेळियो. गानि नना अय्ते मीकुन दंटातोर इंचि केयंतन. बारित्ते नावा बाबाल नाकु वेहता अन्नि पोल्लें मीकु वेहतन.
- 16 नाकुन मिमेट पेरां हिल्लिर, गानि मीकुन नना पेरतन. पेरसि, मिमेट बेसता कबाहक कीसेक बेस पलम हियगोम, इंचि नना मीकुन निलाहतन. अल्हा कीते, मिमेट नावा पोरोल्ले बाबान बतल तल्किनागानि, अद मीकु दोर्कता.
- 17 मिमेट वरोंक-वरोर पावरम कीकुंट, इद मीकु नावा आदेस आंदु.”

दुनियातोर मीकुन हय्सुर

- 18 “ओक्कला दुनियातोर मीकुन हय्साकोटे, मीकन्ना मुन्ने ओर नाकुन हय्सा हिल्लुर, इंचि मीकु एर्के.
- 19 मिमेट दुनियातोरक नच्चताप मनानय्ते, ओर मीकुन पावरम कीसि मन्नेर. गानि मिमेट दुनियातोरक नच्चताप मंचेके हिल्लिर. नना मीकुन इद दुनियाताल पेरतन. अदुनहाटीं दुनियातोर मीकुन हय्सुर.
- 20 वरोर दासुड ओना मालकुंकन्ना पेद्दोड आयोर, इंचि नना दीनकन्ना मुन्ने वेहता पोल्लेतुन मिमेट मति इर्कुट. ओर नाकुने तकलिप कीतुर अय्ते, मीकुनगुडा तकलिप कीतुर. ओर नावा पोल्ले परकारम ताकानय्ते, मीवा पोल्ले पोरोगुडा ताकंतुर.
- 21 नाकुन लोहचीतोन ओर एरपाट किय्युर, अदुनहाटीं ओर मीकुन नावा पोरोलहाटीं इव अन्नि तकलिष्क कीतुर.”
- 22 “उंदि वेला नना वासि ओरतोनि वळकाकोटा मंचि मत्ते, ओरपोरो पापम मना कोनवळ. गानि इंदके मात्रम ओर्क ओरा पापमताल तपिच्छुकुनालय हरिं हिल्ले.
- 23 नाकुन हय्सवोर, ओर नावा बाबान इका हय्सोर.
- 24 वेरे बोर किया हिल्लोर असोटा, अदूबूतामाता कबाहक नना कियाकोटा मंचि मत्ते, ओरपोरो पापम मना कोनवळ. गानि इंदके ओर नना कीता अदूबूतामाता कबाहकुन हळसिगुडा, नाकुन, नावा बाबान हय्सेक हिल्लुर.
- 25 नाकुन हय्साकोटा मनालय बतले कारनम हिलाकोन्ना ओर नाकुन हय्सुर, इंचि ओरा दर्मसास्त्रमते रासि मंता. अद पोल्ले पुरागा आयानाहाटीं गें इल्हा जर्गता.
- 26 गानि बाबानाहेंदाल नना लोहना सहायम कियानोर, इत्ते बाबानगटाल वायना सत्तेम आत्मा, बस्के अय्ते मिहगा वायार. अद मीकु नावा बारेमते गवाइ वेहता.
- 27 नना सेवा सुख कीतस्केटाल मिमेट नातोनि मत्तिर, अदुनहाटीं मिमेटगुडा नावा बारेमते गवाइ वेहतिर.”

16

- 1 “मिमेट विस्वासमताल पजोळ्क आयामन्नि, इंचि मीकु इव पोल्लें वेहतन.
- 2 विस्वासम कियवा पेद्दाल्क मीकुन दर्मसास्त्रम कराहना लोहकुनाल पेच्हांतुर. इंका मीकुन हळकना हरेक मनकल, नना पेनदा सेवा कीसंतन, इंचि इनकुनना कालम वायाना मंता.
- 3 बाबाल आनि नना बोर आंदुम, ओर्क तेळियो, अदुनहाटीं ओर मीकुन अल्हा कीतुर.
- 4 अद कालम वातस्के, नना वेहता पोल्लें मीकु मति वायाना इंचि, इव पोल्लें नना मीकु वेहचंतन. इव पोल्लें नना मीकु मुन्ने वेहा हिल्लेन, बारित्ते नना मीतोने मत्तन.”

पवित्र आत्माता कबाहक

- 5 “नना अय्ते इंदके नाकुन लोहतोन्गा मल्सि होंचंतन. गानि निमे बगा दांतिन इंचि मीवा लोप्योताल वरोरगुडा नाकुन पूसकीसेक हिल्लिर.
- 6 नना इव पोल्लें मीकु वेहताहेंका, मिमेट वेल्लेन दुक्कमते मंतिर.
- 7 अयना नना मीकु निजम-निजम वेहासेक, नना मिहागटाल होत्ते, मीके पायदा आयार. बारित्ते नना होनाकोटे सहायम कियानोर मिहगा वायोर. नना होनानय्ते ओन मिहगा लोहंतन.
- 8 ओर वातस्के पापम बारेमते, सत्तेम बारेमते आनि न्यायम बारेमते लोकुल्कुन ओप्संतोर.
- 9 ओर नापोरो विस्वासम इर्का पापम कीतुर, इंचि सहायम कियानोर ओर्क हुप्संतोर.

- 10 नना बाबानाहेके होंचंतन, मर्रा मिमेट नाकुन ह्ळा परिर. अदुनहाटीं सहायम क्रियानोर सत्तेमता बारेमते लोकुल्लुकुंक तेळियागोटिस वेहंतोर.
- 11 इंका इद दुनियापोर्री राज्येम एलाना अदिकारिना न्यायम अय्ते मुन्नेन आसि मंता. अदुनहाटीं सहायम क्रियानोर न्यायमता बारेमते लोकुल्लुकुंक तेळियागोटिस वेहंतोर.
- 12 मीकु वेहालय नहगा इंका वेल्लेन पोल्लें मंतां, गानि अबुंता इंदके ओसुकुना परिर.
- 13 गानि सत्तेम आत्मा वातस्के, अद मीकु पूरा सत्तेमतुन ह्पसार. अद दाना मनसुंक वाताप वळको, गानि बतल अय्ते अद बाबानगटाल केंजंता, अदे वेहंता. इंका मुन्ने जर्गना बारेमतेगुडा वेहंता.
- 14 अद नाहगटाल तेंडकुंचि, वासि मीकु वेहंता. अल्हा कीसेके अद नाकु कदर हीता.
- 15 बव अय्ते बाबानवो, अव अन्नि नावां आंदुं. अदुनहाटींगे, अद नाहगटाल तेंडकुंचि, वासि मीकु वेहंता, इंचि नना मीकु वेहतन.
- 16 इंका जेरासेप आते, मिमेट नाकुन ह्ळा परिर, पजा इंका जेरासेपुंक, मिमेट नाकुन मर्रा ह्ळकिर,” इंचि येसु सिस्थुल्लुकुंक वेहतोर.

दुक्कम कुसिते मारियंता

- 17 इद पोल्ले केंजसि, ओना इच्चुर सिस्थुल्लुकुं वरोंक-वरोर पूसकीसेक, “इंका जेरासेप आते, मिमेट नाकुन ह्ळा परिर, पजा इंका जेरासेपुंक, मिमेट नाकुन मर्रा ह्ळकिर, बारित्ते नना बाबानगा दांतन, इल्हा मनाकु येसु बारि वेहचंतोर मरि?
- 18 इंका जेरासेप आते इनना पोल्लेक अर्तम बतल? असल ओर इनानद बतलो मनाकु अर्तमे आसेक हिल्ले,” इंचि वळककुनालय दलगतुर.
- 19 सिस्थुल्लुकुं ओन पूसकीतुर इंचि येसुंक तेळियता. अस्के येसु ओर्क इल्हा वेहतोर, “इंका जेरासेप आते, मिमेट नाकुन ह्ळा परिर, पजा इंका जेरासेपुंक, मिमेट नाकुन मर्रा ह्ळकिर, इत्ता नावा पोल्लेता बारेमते मिमेट वरोंक-वरोर बतां पूस कीकुंचंतिर?
- 20 नना निजम-निजम वेहासेक, मिमेट मोल्लुकुंचि-मोल्लुकुंचि अळकिर, गानि दुनियातोर कुसिते मनानुर. मीकु दुक्कम वासि अळकिर, गानि मीवा दुक्कम कुसिते मारियंता.
- 21 उंदि मुरतळ दाना एरपूराना वेला एवतस्के, नोपि वासि वेल्लेन दुक्कमते मनंता. गानि दान्क पेडालो-पेगिडो पुटतस्के, उंदि जीवा दानहेंदाल इद दुनियाते वाता इत्ता कुसिते, मुन्ने बोगांच्ता तकलिपकु मर्रा दान्क मतिगुडा मन्नों.
- 22 इदगुडा अल्हेन! इंदके दुक्कम वांता, गानि नना मीकु मर्रा कलियंतन अस्के, मिमेट वेल्लेन कूस आकिर. अद कुसितुन मिहागटाल बोरे तेंडकुना पसर.
- 23 अद रोज मिमेट नाकुन बदे तल्किर. गानि नना निजम-निजम वेहासेक, मिमेट नावा पोरोल्ले बाबान बतल तल्किनागानि ओर मीकु अदुन हीतोर.
- 24 इदवेरदाका मिमेट ना पोरोल्ले बतले तल्का हिल्लिर. तल्कट मीकु दोर्कार, अस्के मीवा कुसि पूरा आयार.”
- 25 “इव पोल्लें नना मीकु उदाहरनकु हीसि वेहतन. गानि मुन्ने इंका बस्केने उदाहरनकु हीसि वेहोन. बाबाना बारेमते बल्हा मत्तद अल्हा कुल्ला कीसि वेहना वेला वायनद मंता.
- 26 अद रोज मिमेट नावा पोरोल्ले ओन तल्ककिट. अस्के नना मीवाहाटीं बाबांक विनंति कीतन इंचि मीकु वेहासेक हिल्लेन.
- 27 बारित्ते मिमेट नाकुन पावरम कीतिर, नना पेनदागटाल वातन इत्ता पोल्लेतुन विस्वासम कीतिर, अदुनहाटीं कुद्दु बाबाले मीकुन पावरम कीसंतोर.
- 28 नना बाबानगटाल इद दुनियाते वातन. इंदके मर्रा इद दुनियातुन होळसि बाबानाहेके होंचंतन,” इंचि येसु वेहतोर.
- 29 अस्के सिस्थुल्लुकुं, “ह्ळा! इंदके निमे उदाहरन हीसि वळकसेक हिल्लिन, कुल्ला-कुल्ला वळकसंतिन.
- 30 नीकुन बोरे बतल पूसकियना अक्सरम हिल्ले. नीकु अन्नि तेळियंता इंचि माकु एर्का मंता. दीनहेंदाल, निमे पेनदागटाल वातिन, इंचि मोमोट विस्वासम कीतोम,” इंचि येसुन इत्तुर.
- 31 अस्के येसु, “इंदके अयना मिमेट विस्वासम कीतिरा?
- 32 ह्ळाट, नाकुन वरोने होळसि, मिमेट बेकेटोर हेके आसि बोना लोन ओर होनना वेला वायनद मंता, अद वासे मंता. अयना नना वरोन हिल्लेन, नातोनि बाबाल मंतोर.
- 33 नाहगटाल मीकु सांति दोर्कि, इंचि इव पोल्लें मीकु वेहतन. दुनियाते मीकु तिप्पल्लुकुं-कस्टाल्लुकुं वायनुं, गानि नना दुनियाता ताकततुन गेल्लसतन, अदुनहाटीं मिमेट बेस दैरनेमते मंटु,” इंचि येसु वेहतोर.

17

येसु सतताहाटीं पारतना कीतोर

- 1-4 इव अन्नि पोल्लें वेहमळ आतस्के, येसु पोर्री स्वर्गमताहेके ह्ळसेक इल्हा पारतना क्रियालय दलगतोर. “बाबा, अंतोर लोकुल्लुकुनपोर्री निमे नाकु अदिकारम हीतिन. दीनहेंदाल निमे बोर्कुन अय्ते नाकु हीतिनो, ओर्क अंतोर्क नना बस्केळ्ळक पिस्सना पिस्वर हीकन. निमे वरोने सत्तेम पेनदुन आंदिन, बोर अय्ते नीकुन, निमे लोहता येसु किरिस्तुन एरपाट कीतुरो ओर्के आ बस्केळ्ळक पिस्सना पिस्वर दोर्कता. निमे नाकु बव कबाह्क अय्ते क्रियालय हीतिनो, अबुन पुरागा कीसि, नना बूमिपोर्री नीवा महिमा कीतन. इंदके नावा वेला एत्ता. अदुनहाटीं निमे नाकु कदर हीते, नना नीवा महिमा कीतन.

5 बाबा, दुनिया पुट्टका मुन्ने नना नीतोनि मननेके बसोंटा महिमा मत्तानो, असोंटा महिमा इंदकेगुडा नी मुन्ने हीम.”

येसु ओना सिस्स्युल्कुनाहाटी पारतना कीतोर

6 “ई दुनियाताल निमे नाकु हीता लोकुकुक, नना नीवा पोरोलतुन हुपिस्तन. ओर बस्केळक नीवोर्के आंदुर. ओर्कुन निमे नाकु हीतिन. ओर नीवा पोलेपोरी ताकतुर.

7 निमे बतल अयते नाकु हीतिनो, अव अन्नि निहेंदाले दोर्कतव इंचि इंदके ओर्क तेळियता.

8 बारित्ते बव पोलेले अयते निमे नाकु हीतिनो, अवुन नना ओर्क एविचतन. ओर अवुन ओप्कुत्तुर. नना निजम निहागटाले वातन, नाकुन निमेन लोहतिन इंचि ओर विस्वासम कीतुर.

9 ईराहाटीगे नना पारतना कीसंतन. दुनियाताहाटी आयो. निमे बोर्कुन अयते नाकु हीतिनो, ओर नीवोरे इंचि ओराहाटीगे नना पारतना कीसंतन.

10 नहगा मनना अन्नि पोलेले नीवंगे आंदुं, नीवां अन्नि पोलेले नावां आंदुं. अवुनहेंदाल नाकु महिमा दोर्कता.

11 इंदकेटाल नना इद दुनियाते मनोन. नना निहगा वासंतन. गानि ईर ई दुनियाते मंनंतुर. पवित्र बाबा! इंदके मनम उंदि आसि मत्ताप, ईरगुडा उंदि आसि मनालय, निमे नाकु हीता नीवा पोरोलता ताकतते ईरकुन कापाळा.

12 नना ई दुनियाते ईरतोनि मननेके, निमे नाकु हीता नीवा पोरोलता ताकतते ओर्कुन कापाळतन. सिराप, दर्मसास्त्रमते रासता पोलेले पूरा आयनाहाटी बोर अयते नासडेम आयना मत्ता ओन होळसि, वेरे बोरे नासडेम आया हिल्लुर, नना ओर्कुन कापाळतन.

13 नना इंदके निहगा वासंतन. गानि नावा आनंदम ओरा लोपो पुरागा आयना इंचि, इव पोलेले नना इद दुनियाते मननेकेन वेहंतन.

14 नीवा पोलेले नना ईरकु वेहतन. नना इद दुनियातेन आयोन. अल्हेन ईरगुडा इद दुनियातेन आयुर. अदुनहाटी ई दुनियातेन ईरकुन हयसेक हिल्लुर.

15 निमे ईरकुन इद दुनियाताल ओम इंचि नना पारतना कीसेक हिल्लेन, गानि पेद्दा देय्यमताल* ईरकुन कापाळा इंचि पारतना कीसंतन.

16 नना ई दुनियातेन आयोन, अल्हेन ईरगुडा ई दुनियातेन आयुर.

17 नीवा पोलेले सत्तेम आंद, नीवा सत्तेमते ओर्कुन पवित्र कीम.

18 बल्हा अयते निमे नाकुन ई दुनियाते लोहतिन, अल्हेन नना ईरकुन दुनियाते लोहंतन.

19 नीवा सत्तेमते ओर पवित्र आयगोम इंचि, नावद ननेन उंदि पवित्र मोक्कुनलेहका आतन.”

अंतोर विस्वासुल्कुनाहाटी येसु पारतना कीतोर

20 “नना सिराप ईराहाटीगे पारतना कीसेक हिल्लेन, गानि बोर अयते ईर वेहना पोलेलेतुन केंजसि नापोरी विस्वासम ईरतुर, ओराहाटीगुडा नना पारतना कीसंतन.

21 बाबा! बल्हा अयते निमे नहगा, नना निहगा उंदि आसि मंतोमो, अल्हेन ओरगुडा उंदि आसि मननाहाटी पारतना कीसंतन. नाकुन निमेन लोहतिन, इंचि दुनियातेन विस्वासम कियना इत्ते, ओरगुडा मनाटे उंदि आयापीता.

22-23 निमे ना लोपो मंतिन, नना नी लोपो मंतन. निमे नाकु हीता कदरतुन नना ओर्क हीतिन. मनम इंदके बल्हा उंदि आसि मंतोमो, अल्हेन ओरगुडा उंदि आसि मंदना. अल्हा मत्तेने, नाकुन निमे लोहतिन आनि नाकुन पावरम कीताप ओर्कुनगुडा पावरम कीसंतिन, इंचि दुनियाक एरपाट आयापीता.”

24 “बाबा! बोर्कुन अयते निमे नाकु हीतिनो, ओर निमे नाकु हीता कदरतुन हळानाहाटी, नना बगा मत्ते अगा ओरगुडा मनना इंचि, नना पारतना कीसंतन. बारित्ते इद दुनिया पुट्टका मुन्नेन निमे नाकुन पावरम कीतिन.

25 बाबा! निमेन नीतिमंतुन आदिन. ई दुनिया नीकुन एरपाट किय्यो. गानि नना एरपाट कीतिन. अल्हेन नाकुन निमेन लोहतिन इंचि ई सिस्स्युल्क एरपाट कीतुर.

26 ना पोरीटा नीवा पावरम ओरा लोपो मननाहाटी आनि ननागुडा ओरा लोपो मनना इंचि, नीवा पोरोलतुन ओर्क एरपाट कीसीतन. इंका मुन्नेगुडा एरपाट कीसि हीसेक मंनंतन,” इंचेके येसु पारतना कीतोर.

18

येसुन दोकाते पीसि ओतुर

(मत्तयाल 26:47-56; मरकुस 14:43-50; लूकाल 22:47-53)

1 इव पोलेले वळकमळ आतंका, येसु ओना सिस्स्युल्कुनतोनि, किद्रोन इनना कुरेटा लोदिदि दाटसि हब्बेता बाजुंक होत्तुर. अगा जयतुन मराकुना तोटा मत्ता, आ तोटाते येसु, ओना सिस्स्युल्क होळियतुर.

2 येसु ओना सिस्स्युल्कुनतोनि अद तोटाते वेल्लेन मल्कां वासि मत्तोर. अदुनहाटी ओन्क दोका हियना यहूदांकगुडा अद जेगा एरपाट मत्ता.

3 अयते यहूदल सिपाइल्कुना गेंगुन, पेद्दा पेर्मांलोर, परिसिल्क लोहता गुळितगा कावेल कियानोर्कुन पीसि अगा वातोर. ओरतोनि दिव्टी, कंदिलि, लडाइ कियना विसें मत्तां.

* 17:15 पेद्दा देय्यमताल इत्ते, करेब इनना देय्यमता कय्दाल.

- 4 ओन्क बतल जर्गनद मंता इत्तदुन एरपाट कीसि, येसु मुन्नेळ्क होत्तोर. होंचि, “मिमेट बोन पहकसंतरि?” इंचि ओर्कुन पूसकीतोर.
- 5 अस्के ओर, “नासरेत नाटेना येसुन पहकसंतोम,” इंचि जवाब हीतुर. पजा येसु, “ओन ननाने आंदुन,” इंचि इत्तोर. येसुक दोका हियना यहुदलगुडा ओरतोनि निलसि मत्तोर.
- 6 येसु ओर्कुन, “ओन ननाने आंदुन,” इंचि इत्तस्के, ओर पजोळ्क जरगिसि बूमिपोर्रो अरतुर.
- 7 येसु, “मिमेट बोन पहकसंतरि?” इंचि मर्रा उंदि मल्का पूसकीतोर अयते ओर, “नासरेत नाटेना येसुन पहकसंतोम,” इंचि इत्तुर.
- 8 अस्के येसु, “ओन ननाने आंदुन इंचि वेहतन गदा! ओक्कला मिमेट नाकुन पहकानयते, ईरकुन होना हीम्दु,” इंचि इत्तोर.
- 9 बारित्ते, “निमे नाकु हीतोरव्टेटाल, नना वरोनिका तप्पोना हिय्या हिल्लेन,” इंचि ओर इत्ता पोल्ले पुरागा आयगोम इंचि अल्हा इत्तोर.
- 10 सिमोन पत्रु इनना सिस्सुनगा उंदि पेद्दा कसेर मत्ता. ओर अद कसेटे वरोन हीतोर अयते, पेद्दा पेर्माना वरोर जीतागाना तिना केव नेमसि अरता. आ जीतागान पोरोल मल्कोसि.
- 11 गानि येसु, “नीवा कसेर दाळोतगा* ईर्रा. नावा बाबाल नाकु हीता तिप्पलता वाटिते नना उना मन्निआ?” इंचि पत्रुन इत्तोर.
- 12-13 अस्के अगा वाता सिपाइल्कुना गेंग, ओरा दरोगाल आनि गुळितगा कावेल कियानोर येसुन दोर्कापीसि दोह्चि वाटतुर. दोह्चि वाटसि, मोट्टा मोदाला ओन हन्ना इनानोनाग ओतुर. ई हन्नाल कयपा इनानोना मामाल आंदुर. अद वर्सा ई कयपाल पेद्दा पेर्माल मत्तोर.
- 14 “लोकुल्कुनाहाटी वरोर मनकल हाते बेसे,”* इंचि यहुदि पेद्दाल्कुना मुन्ने वळ्किसि मत्तोर, ओर ईर कयपाल आंदुर.

पत्रु येसुना बारेमते आबद्दम वळ्कंतोर

(मत्तयाल 26:69-70; मरकुस 14:66-68; लूकाल 22:55-57)

- 15 येसुन अल्हा पीसि होननेके सिमोन पत्रु आनि इंकावरोर सिस्सुड, येसुन पज्जो होत्तुर. आ सिस्सुड पेद्दा पेर्माना एर्कातोर मत्ताहेंका, पेद्दा पेर्माना दाराते येसुनतोनि ओरगुडा होत्तोर.
- 16 गानि पत्रु पलाते गलमातगेन नित्तिसि मत्तोर. अदुनहाटी पेद्दा पेर्माक एर्का मत्ता आ सिस्सुड पलाते वासि, गलमातगा देकरेकहाटी मत्ता मुरतटुन पूस कीसि, पत्रुन लोप्पो केय्पि तत्तोर.
- 17 गलमातगा देकरेकते मत्ता आ पासि कबळ कियाना मुरतळ, “निमेगुडा आ मनकना सिस्सुल्कुनाल वरोन आदिन गदा!” इंचि पत्रुन पूसकीता. अयते पत्रु, “नना आयोन,” इंचि इत्तोर.
- 18 अद वेलाते वेल्लेन पीनि मत्ता. अदुनहाटी सेवाकुल्क आनि गुळितगा कावेल कियानोर, तडमि मासि, सेका कासेके मत्तुर. अगा पत्रुगुडा ओरतोनि नित्तिसि आरसेक मत्तोर.

पेद्दा पेर्माल येसुन सवाल पूसकियमळ

(मत्तयाल 26:59-66; मरकुस 14:55-64; लूकाल 22:66-71)

- 19 पजा पेद्दा पेर्माल येसुन, ओना सिस्सुल्कुना बारेमते आनि ओना कराहमळ बारेमते पूसकीतोर.
- 20 अस्के येसु, “नना अंतोरा मुन्ने कुल्ला-कुल्ला वळ्कतन, यहुदिल्क अंतोर जमा आयना दर्मसास्त्रम कराहना लोह्कुने, गुळिने नना बस्केळ्क कराहतन. नना मक्किचि बतले वळ्का हिल्लेन.
- 21 अयना इद सवाल नाकुन बारि पूसकीसतिन? नना वेहतदुन केंजतोर्कुन पूस कीम, ओर्क एरपाटे नना बतल वेहतन,” इंचि जवाब हीतोर.
- 22 येसु अल्हा इत्तस्के, दग्गेरा नित्तिसि मत्ता वरोर गुळितगा कावेल कियानोर, “पेद्दा पेर्माक इल्हेन जवाब हीतिना?” इंचि येसुना सेंपापोर्रो तंतोर.
- 23 अस्के येसु, “नना वळ्कतव्टे बतलन्ना तप्पु मत्ते इगे अंतोर्क वेहाट. गानि नना वळ्कतद निजम आते, नाकुन तनंतरि बारि?” इंचि पूसकीतोर.
- 24 पजा आ हन्नाल, दोह्चि मननेकेन येसुन कयपा इनना पेद्दा पेर्मानेके लोह्चीतोर.

पत्रु आबद्दम वळ्कता वळ्कुळे गोगोड कूसंता

(मत्तयाल 26:71-75; मरकुस 14:69-72; लूकाल 22:58-62)

- 25 सिमोन पत्रु तडमितगा सेका कासेके मत्तस्के, अगा मत्तोर इच्चुर लोकुल्क ओन, “निमेगुडा ओना सिस्सुल्कुनाल वरोन आदिन गदा?” इंचि पूसकीतस्के, “नना आयोन,” इंचि पत्रु आबद्दम वळ्कतोर.
- 26 पत्रु बोना केव्दुन अयते नर्कतोर, ओना जीवातोर वरोर, पेद्दा पेर्मानगा सेवा कीसेक मत्तोर. ओर पत्रुन, “अद रोजु जय्तुन मराकुना तोटाते नीकुन नना, ओनतोनि हळतन,” इंचि इत्तोर.
- 27 मर्रागुडा पत्रु, “नना आयोने आयोन,” इंचि आबद्दम वेहतोर. ओर अल्हा इत्ता इन्मळे, गोगोड कूसता.

पिलातुस इनना राज्यपालना मुन्ने येसुन निलाहंतुर

(मत्तयाल 27:1-2,11-31; मरकुस 15:1-20; लूकाल 23:1-25)

* 18:11 दाळोतगा नडिक उंदि सचि मनंता अन्ते कसेर ईरतुर. इद पोल्ले आदिलाबाद गोंडिताल येततद आंद. ☆ 18:14 योहान 11:50

28 पजा हक्केरेन येसुन ओर कयपानगटाल रोम सरकारता राज्यपालना राजवाडाते ओतुर. अस्के रिवाज परकारम अपवित्र आयाकोटा मनालय आनि दाटसि होनना पंडुगुना गाटो तिनगोम, इंचि ओर राजवाडाते नैगा हिल्लुर.

29 अदुनहाटी रोम सरकारता राज्यपाल पिलातुस, पलाते ओरगा वासि, “ई मनकनपोर्रो मिमेट बद कसूर ताससंतरि?” इंचि ओर्कुन पूसकीतोर.

30 अस्के ओर, “ईर कसूर कियाकोटे मंचि मत्ते, मोमोट ईन नीकु अप्पजेप्पा कोन्नेरम,” इंचि जवाब हीतुर.

31 “अल्हा अयते ओन ओसि, मीवा सतता नियम परकारम मिमेटे ओना न्यायम कीम्टु,” इंचि पिलातुस इत्तोर. अस्के यहुदिल्क, “हामुर सिक्सा हियना अदिकारम सिराप, रोम सरकारास्के मंता,” इंचि इत्तुर.

32 अद अल्हा बारि जर्गता इत्ते, येसुक बसोटा हामुर वायनद मंता इंचि येसु कुद्दु वेहता पोल्ले पुरागा आयनाहाटी अल्हा जर्गता.

33 पजा पिलातुस ओना राजवाडाते होंचि येसुनलोप्पो केया वेहतोर. केय्से, “निमे यहुदिल्कुना राजाना?” इंचि पूसकीतोर.

34 अस्के येसु, “ई पोल्ले नी इच्चटा निमेन इंचतिना? हिलाकोटे नावा बारेमते नीकु बोरन्ना वेहतुरा?” इंचि पिलातुसुन पूसकीतोर.

35 अयते पिलातुस, “नाकुन निमे यहुदि इनकुंचतिना? कुद्दु नीवा लोकुल्क आनि ओरा पेर्मालोर नीकुन नाकु अप्पजेपतुर. निमे बतल कीतिन?” इंचि जवाब हीतोर.

36 अस्के येसु, “नावा राज्येम ई दुनियाक संबदिस्तद आयो. ओक्कला नावा राज्येम ई दुनियाक संबदिस्तद आसि मत्ते, नाकुन यहुदि पेद्दालकुंक अप्पजेपकोटा नावा सेवाकुल्क लडाइ कीसि मन्नेर. गानि इदके नावा राज्येम ई दुनियाक संबदिस्तद आयो,” इंचि जवाब हीतोर.

37 अस्के पिलातुस, “अल्हा अयते निमे राजाना?” इंचि इत्तोर. अयते येसु, “निमेन इंचतिन नाकुन राजाल इंचि! नना अयते सत्तेम बारेमते गवाइ वेहालय पुटतन. इद कारनमहाटीगे नना ई दुनियाते वातन. सत्तेमते ताकाना हरेक मनकल, नावा अल्किरतुन केंजंतोर,” इंचि वेहतोर.

38 अद केंजसि पिलातुस, “सत्तेम इत्ते बतल?” इंचि येसुन पूसकीतोर. अल्हा पूस कीसि, पलाते यहुदिल्कुनगा होत्तोर. होंचि, “नाकु ईना लोप्पो अयते बतले कसूर दिस्सेक हिल्ले.

39 गानि दाटसि होनना पंडुगुना रोजु, एडादिक उंदि मल्का, जेलने मत्तोन वरोन होळसना, इंचि मीवा उंदि रिवाज मंता. अयते मीवाहाटी नना ई यहुदिल्कुना राजान होळसमळ मीकु इस्टमेना?” इंचि ओर्कुन पूसकीतोर.

40 अस्के ओर वरगेयसेके मर्रा, “मन्नि ओन होळसमा, मावाहाटी बरब्बान होळसा,” इंचि इत्तुर. ई बरब्बल इनानोर, पेद्दा दोंगल मत्तोर.

19

येसुक हामुर सिक्सा हीतुर

1 अस्के पिलातुस येसुन दोर्कापीसि पोट्टे देब्बां तना वेहतोर.

2 सिपाइल्क बारे, उंदि हाहकुना वेलितुन किरिटम कीसि, येसुना तल्लक तासतुर. तासि ओन्क नेळि पंडि रंगुना कपडिं केराहतुर.

3 केराहता पजा, “यहुदिल्कुना राजांक जय” इंचेके ओना सेंपापोर्रो तंतुर.

4 पिलातुस मर्रुदि मल्का पलाते पेय्से, “हुळाट, ओन्क सिक्सा हियालय, नाकु ओनालोप्पो बतले कसूर दोर्काहिल्ले, इद मीकु तेळियना इंचि नना ओन मीहेके पलाते तच्चंतन,” इंचि वेहतोर.

5 पजा येसु हाहकुना किरिटम, नेळि पंडि रंगुना कपडिं केरसि पलाते पेय्तोर. अस्के पिलातुस, “हुळाट ई मनकन,” इंचि ओर्कुन इत्तोर.

6 येसुन हळसि, पेद्दा पेर्मालोर आनि गुळितगा कावेल कियानोर, “ओन कसुनपोर्रो वेलाड वाटा, ओन कसुनपोर्रो वेलाड वाटा,” इंचि वरगेयतुर. अस्के पिलातुस ओर्कुन, “ओन ओसि मिमेटे कसुनपोर्रो वेलाड वाटट, नाकु ओनालोप्पो बदे कसूर दोर्काहिल्ले,” इंचि इत्तोर.

7 अद केंजसि यहुदिल्क इल्हा जवाब हीतुर, “माकु उंदि नियम मंता. ओर, नना पेनदा मर्रिन, इंचि इत्तोर. अदुनहाटी मावा नियम परकारम ओर हायमळे गावाले,” इत्तुर.

8 ओर अल्हा इन्मळतुन केंजसि, पिलातुस वेल्लेन वेरियतोर.

9 अस्के पिलातुस येसुन मर्रा राजवाडाते ओसि, “निमे बगाटाल वातिन?” इंचि पूसकीतोर. गानि येसु बतले जवाब हिया हिल्लोर.

10 अदुनहाटी, पिलातुस येसुन, “निमे नातोनि बारि वळ्कसेक हिल्लिन? नीकुन होळसियना आनि कसुनपोर्रो वेलाड वाटना अदिकारम नाके मंता, इंचि नीकु एर्का हिल्लेना?” इंचि पूसकीतोर.

11 अस्के येसु, “पोर्रो मनना पेन आ अदिकारम नीकु हीता, अचोने! हिलाकोटे नीकु नावापोर्रो बतले अदिकारम हिल्ले. अदुनहाटी, नाकुन नीवा कय्दुक अप्पजेपतोरके एक्को पापम दलंगता,” इंचि इत्तोर.

12 अस्केटाल पिलातुस, येसुन होळसालय वेल्लेन कोसिस कीतोर. गानि यहुदिल्क, “ओक्कला निमे ओन होळसियानयते, निमे कैसर* राजाना दंटातोन आयिन. इंका नना राजान इंचि इनना हरेक मनकल, महाराजाना विरोदमते वळ्कतोर आंतोर,” इंचेके वरगेयालय दलगतुर.

13 अव पोल्ले केंजसि, पिलातुस येसुन मर्रा पलाते तत्तोर. तच्चि, न्यायम कियनेके उद्दना कुर्सिते उद्दतोर. अद कुर्सि मनना जेगातुन, इब्रानि बासाते, गब्बाता† इत्तुर.

14 अद रोज, दाटसि होनना पंडुगुना तयारि कियना रोज आंद. अस्केळ्क, पन्नेड एगसि मत्ता. अस्के, “इद हुळाट, मीवा राजाल!” इंचि पिलातुस यहुदिल्कुन इत्तोर.

* 19:12 कैसर इद राजाना पोरोल आयो. रोम सरकारते अन्टिकन्ना पेद्दा पदवि आंद. † 19:13 गब्बाता इत्ते बंडां तारता जेगा इंचि अर्तम.

15 अस्के यहुदिल्क, “ओन लक्कु ओम, ओन लक्कु ओम! ओसि कूसुनपोर्री वेलाड वाटा,” इंचि वरगेयालय दलगतुर. अय्ते पिलातुस, “बतलु! नना मीवा राजान, कूसुनपोर्री वेलाड वाटकना?” इंचि ओर्कुन पूसकीतोर. अस्के पेद्दा पेर्माँलोर, “माकु कैसर राजान होळसिसि वेरे बोरे राजाल हिल्लोर,” इंचि वरगेयतुर.

16 पजा पिलातुस, येसुन कूसुनपोर्री वेलाड वाटालय ओरा कय्दुक अप्पजेपतोर अय्ते, ओर येसुन ओतुर.

येसुन कूसुनपोर्री वेलाड वाटंतुर

(मत्तयाल 27:32-44; मरकुस 15:21-32; लूकाल 23:26-43)

17 येसु ओना कूसुन कांजसेक, “तला बोरसेम” इनना जेगातगा होतोर. इन्नानि बासाते, अद जेगातुन गोलगोता इंतुर.

18 अगा ओना काल्क-कय्कुंक मोल्लां कोह्किसि ओन कूसुंक वेलाड वाटतुर. येसुन नड्डुम इरसि ओना रोंड बाजकुंक इंकिव्कुन कूसुंक वेलाड वाटतुर.

19 अस्के पिलातुस, “नासरेत नाटेना येसु, यहुदिल्कुना राजाल,” इल्हा उंदि बल्लापोर्री कसूर रासि, येसुना कूसुंक कोह्का वेहतोर.

20 येसुन वेलाड वाटता जेगा सहरकु दग्गेरा मत्ता. अद बल्लापोर्री इन्नानि, लटिन आनि युनानि बासाते रासि मत्ता. अदुनहाटीं वेल्लेटोर यहुदिल्क, आ कसूरतुन हदवुंदुर.

21 पजा यहुदि पेद्दा पेर्माँलोर पिलातुसनगा होंचि, “यहुदिल्कुना राजाल इंचि रासमा. दान जेगाते, नना यहुदिल्कुना राजान, इंचि ओर इत्तोर, इल्हा रासा,” इंचि वेहतुर.

22 अस्के पिलातुस, “नना रासतन! रासतन. अचोने!”

23 सिपाइल्क येसुन कूसुनपोर्री वेलाड वाटतंका, ओना कपडिं तेंडकुत्तुर. तेंडकुंचि, वरो-वरोक उंदि-उंदि हिस्सा वायना हिसाबते, नालुं पाल्क कीतुर. ओना अंगितुनगुडा तेंडकुत्तुर. अद अंगि पोर्रीटाल हिळदाका पोळ्गुंक-पोळ्गु कुट्टु वाटाकेन मत्ता.

24 अदुनहाटीं सिपाइल्क, “दीन मनम हराहमन्नि, गानि सिट्टिं वाटकोम. अस्के अद बोर्क दोर्कतनो ह्ळकोम,” इंचि ओर-ओरे इनकुत्तुर. “ओर नावा कपडिन हिस्सां कीसि, नावा अंगिहाटीं सिट्टिं वाटंतुर,”* इंचि दर्मसास्त्रमते रासि मत्ता पोल्ले पुरागा आयनाहाटीं अल्हा जर्गता. सिपाइल्कगुडा अदुनहाटींगे अल्हा कीतुर.

25 येसुन वेलाड वाटता कूसुना दग्गेरा, येसुना यावल, ओना यावाना हेलड, कोल्पाना मुत्तो मरियम, आनि मगदलेनि नाटेना मरियम इव निलसि मत्तां.

26 येसु, ओना यावल आनि ओर बोन अय्ते पावरम कीतोर आ सिस्सुड, ओना दग्गेरा निलसि मत्तद ह्ळसि, येसु ओना यावन, “यावा, ईर ह्ळा नीवा मरिं!” इंचि वेहतोर.

27 पजा आ सिस्सुनहेके ह्ळसि, “इद ह्ळा, नीवा यावल!” इंचि वेहतोर. अस्केटाल आ सिस्सुड दान ओना यावल इंचि लोन ओतोर.

येसु जीवा होळसंतोर

(मत्तयाल 27:45-56; मरकुस 15:33-41; लूकाल 23:44-49)

28 पजा, ओर अद कबळहाटीं वातोर, अद कबळ पूरा आता, इंचि ओर एरपाट कीसि, दर्मसास्त्रमते रासि मत्तद पूरा आयनाहाटीं, “नाकु दूपा आसंता,”* इंचि इत्तोर.

29 अगा उंदि अळका मत्ता, अव्ते मुरगिसि होत्ता अंगुर पंडिना पानकम मत्ता. ओर अद अळकाते दूदि मुळाहतुर आनि हिस्सोप इनना मराता कोम्मक कळाह्चि, येसुना तोळदागा ओतुर.

30 येसु आ मुरगिसोत्ता अंगुर पंडिना पानकमता रुसि ह्ळसि, “पूरा आता,” इंचि इत्तोर. अल्हा इंचि, हिळु तला वराहचि जीवा होळसंतोर.

31 अद नोमकेम आनि दाटसि होनना पंडुगुना तयारि कियना रोज मत्ता. अद रोजुने पीनगुल्कु कूसुनपोर्री वेलाड मनमळ यहुदिल्कुंक इस्टम हिल्ले. अदुनहाटीं यहुदि पेद्दाल्क पिलातुसनगा वासि, “ओरा काल्कुन उराहचि, सेत्तातुन हिळु रेहा वेहा,” इंचि पूसकीतुर.

32 अस्के सिपाइल्क वासि, येसुनतोनि कूसुनपोर्री वेलाड वाटसि मत्ता इव्वुरा काल्कुन उराहतुर.

33 पजा ओर येसुनगा वासि ह्ळतस्के, येसु हासे मत्तोर, इंचि ओना काल्क उराह हिल्लुर.

34 गानि ओराव्टेटाल वरोर सिपाइ येसुना संका हिळु, गोर्कति कोह्कतोर. अय्ते कोह्कता कोह्कुळे नेत्तुर आनि एर पोंगता.

35 अदंता बोर अय्ते ह्ळतोर ओर, मिमेटगुडा विस्वासम कियगोम इंचि ओना गवाइ वेहतोर. ओर वेहता गवाइ निजम आंद. ओर सत्तेम वेहचंतोर इंचि ओन्क एरपाट.

36-37 “ओना बोक्कानाल उंदि बोक्किंका उंरंगो,” इंकुंदि जेगाते, “ओन कोह्कतोनहेके ह्ळानुर”* इंचि दर्मसास्त्रमते रासि मत्ता पोल्ले पुरागा आयगोम इंचि, इल्हा जर्गता.

येसुन बोदाते तासंतुर

(मत्तयाल 27:57-61; मरकुस 15:42-47; लूकाल 23:50-56)

38 अवंता आतंका, अरिमताइ नाटेना योसेप इनानोर, पिलातुसनगा होंचि, “येसुना पीनगुन हीम,” इंचि पूसकीतोर. पिलातुस ओम इत्तस्के ओर येसुना पीनगुन ओतोर.‡

39 उंदि मल्का नर्कटा वेलाक वासि येसुंक कलियता निकोदेमसगुडा योसेपुनतोनि वातोर. ई निकोदेमस, दग्गेर-दग्गेरा मुप्पै (30) किलोना “बोल्म” आनि “अगर” इनना गमागमा गब्बु वायना वस्तुक पीनगुंक होकालय पीसि वातोर.

40 ओर इब्बुर कूळसि, यहुदिल्कुना गति कियना रिवाज परकारम, आ गमागमा वायना वस्तुकुनंता येसुना मेंदुल्क होकतुर. होकसि, येसुना पीनगुन उंदि पूना पोळ्गु कप्पिडते हुटतुर.

41 येसुन कूसुंक वेलाड वाटता जेगाक दग्गेरेन उंदि तोटा मत्ता. आ तोटाते उंदि पूना बोंदा मत्ता, अद बोंदाते अदवेरदाका बस्केने बोनदे पीनगुन इरा हिल्लुर. §

42 अद बोंदा दग्गेरा मत्ता, अचोने आयाका अद यहुदिल्कुना दाटसि होनना पंडुगुना तयारि कियना रोज मत्ता. अदुनहाटीं ओर येसुन अदे बोंदाते इरतुर.

20

येसु जीवाते तेदांतोर

(मत्तयाल 28:1-8; मरकुस 16:1-8; लूकाल 24:1-12)

1 वारमता मोदाटा रोज, इत्ते अयतारमनाडु, मुसामुसा हीकट मननेकेन, मगदलेनि नाटेना मरियम बोंदातगा होत्ता. अगा अद, बोंदा हर्दुक अड्डम इरसि मत्ता बंडा तेंडसि मत्ताप हळता.

2 अदुनहाटीं अद मरियम, सिमोन पत्रुनगा आनि येसु बोन अयते पावरम कियुंदुरो आ सिस्सुनगा विच्चि होंचि, “सामिना पीनगुन बोंदाताल बोरो तेंडसि ओतुर, अदुन बगा इरतुरो, माकु तेळियो,” इंचि वेहता.

3 अद वेहतद केंजसि, पत्रु आनि आ इंकावरोर सिस्सुड बोंदातेके होनालय पेय्स्तुर.

4 ओर इब्बुर वितसेके होननेके, आ इंकावरोर सिस्सुड पत्रुंकन्ना मुन्ने विच्चि, बोंदातगा एवतोर.

5 अगा एवसि, ओर पलाताले माळकिस हळतोर, अयते ओन्क सिराप येसुंक हुटसि मत्ता कपडिं दिसतां. गानि ओर लोप्पो नेगा हिल्लोर.

6-7 पजा सिमोन पत्रुगुडा अगा एवतोर. लोप्पो होळियसि, येसुंक हुटसि मत्ता कपडिन हळतोर. गानि येसुना तल्लक हुटसि मत्ता कप्पिड मडता कीसि, वेरे जेगाते मत्तद ओन्क दिसता.

8 पजा, बोंदातगा मुन्ने एव्ता सिस्सुडगुडा लोप्पो होळियसि, हळसि विस्वासम कीतोर.

9 अदवेरदाकागुडा, “येसु हासि तप्पाकोटा मरी जीवाते तेदांतोर,” इंचि दर्मसास्त्रमते रासि मत्ता पोल्ले ओर्क तेळिया हिल्ले.

10 पजा ओर सिस्सुल्क ओरा लोहकुने मल्लि होत्तुर.

मगदलेनि मरियमुंक येसु दिसंतोर

(मरकुस 16:9-11)

11 मगदलेनि नाटेना मरियम मात्रम बोंदाता पलाते निलसि अळसेके मत्ता. अळसेके-अळसेकेन अद लोप्पो माळकिस हळता.

12 अस्के, तेल्लटा कपडिं केरता रोंड पेनदा दूतां दान्क दिसतां. अव येसुना सेत्तातुन इरतागा उंदि बारे तल्लाताहेके, इंकुंदि बारे काल्कुनहेके उद्विदिस मत्तां.

13 आ दूतां, “बाई, निमे बारि अळसंतिन?” इंचि पूसकीतस्के, “नावा सामिना मेंदुलतुन बोंदाताल बोरो बेकेनो ओसि इरतुर, नाकु एरपाट हिल्ले,” इंचि मरियम इत्ता.

14 अल्हा इंचि अद पजोळ्क तिरियता. अस्के अगा येसु निलसि मत्तद दान्क दिसता. गानि ओर येसु इंचि, अद एरपाट किया हिल्ले.

15 अस्के येसु, “बाई, निमे बारि अळसंतिन? बोर्कुन पहकसंतिन?” इंचि मरियमुन पूसकीतोर. अस्के मरियम ओन, ओर तोटाक कावेल मनानोर बारे इन्कुंचि, “महाराज, निमे गिटा सामिना पीनगुन इगेताल ओयानयते, अदुन बगा इरतिन नाकु वेहा नना होंचि तरकुंतन,” इंचि इत्ता.

16 अयते येसु, “मरियम,” इंचि दान केयतोर. अस्के मरियम ओनहेके तिरियसि हळसि, दाना इन्नानि बासाते, “रबोनि*” इंचि इत्ता.

17 अस्के येसु, “इदवेरदाका नना बाबानगा होना हिल्लेन. निमे नाकुन इट्टुमा, गानि नावा तम्मुहकुनगा होंचि इल्हा वेहा: नना नावा बाबाल आनि मीवा बाबाल, इंका नावा पेन आनि मीवा पेनदागा पोरो होंचंतन, इंचि ओर्क वेहा,” इंचि दानकु वेहतोर.

18 अस्के मगदलेनि नाटेना मरियम सिस्सुल्कुनगा होंचि, “नना सामिन हळतन, ओर मीकु इव पोल्ले वेहा इत्तोर,” इंचि ओर्क येसु वेहता पोल्ले वेहता.

19 अदे रोज इत्ते वारमता मोदाटा रोज, पोळ्द अर्ना वेलाक, सिस्सुल्क अंतोर, यहुदि पेद्दाल्कुना वेंरक, तल्पुंक तालम वाटसि, उंदि अरति जमा आसि मत्तुर. अचानक, येसु ओरा नड्डुम वासि निल्लि, “मीकु सांति दोर्कि,” इंचि इत्तोर.

20 अल्हा वळ्किसि, येसु ओर्क ओना कयकुंक आनि पक्काक मत्ता देब्बां हुपिस्तोर. सामिन हळसि ओर वेल्लेन कुसिते निडिस होत्तुर.

‡ 19:38 ई योसेपगुडा येसुना वरोर सिस्सुडे, गानि ओर यहुदि पेद्दाल्कुंक वेरियसि, लोप्पो-लोप्पो विस्वासम कियुंदुरो. हिल्लुर यहुदिल्क बोर्नना हाते, ओन बूमिंते पोक्का तव्बि बोंदा तासुर. उंदि बंडातुन तुलाह्चि अयते ओना पीनगुन इरतुर.

§ 19:41 अद बोंदाते अदवेरदाका बस्केने बोनदे पीनगुन इरा
* 20:16 रबोनि रबोनि इत्ते इन्नानि बासाते गुरु इंचि अर्तम.

- 21 येसु मर्रा उंदि मल्ला ओर्कुन, “मीकु सांति दोर्कि. बाबाल नाकुन ई दुनियाते लोहताप, ननागुडा मीकुन ई दुनियाते लोहंतन,” इंचि इत्तोर.
 22 अल्हा वेहचि, “पवित्र आत्मा येतट,” इंचि ओरपोर्री उहकुतोर.
 23 उह्किसि, “मिमेट बोना पापाल्क मापि कीतिरो, ओरा पापाल्क मापि आंतां, मिमेट बोरा पापाल्क अयते मापि कियिरो, ओरा पापाल्क मापि आयो,” इंचि ओर्क वेहतोर.

तोमांकु येसु दिसतोर

(मरकुस 16:14-18; लूकाल 24:36-49)

- 24 येसु वासि मत्तोर अस्के, ओना पन्नेड सिस्स्युल्कुनाल वरोर, तोमल ईर एमडाल्कुनाल वरोर आंदुर, ई सिस्स्युड मनाहिल्लोर.
 25 अदुनहाटी सिस्स्युल्क, “मोमोट सामिन हळतोम,” इंचि ओन्क वेहतुर. गानि तोमल, “नना कुद्दु ओना कय्कुंक कोहकता पुनकुन हळसि, आ पुनकुने नना वेलु ईर्वा, इका गोर्कति कोहकता बर्रातगा कय ईर्वा, नना विस्वासम किय्योन,” इंचि इत्तोर.
 26 ओर अल्हा इंचि एनिमिदि रोजुक आता पजा, सिस्स्युल्क मर्रा अदे लोते तल्पुंक तालम वाटसि जमा आसि मत्तुर. ई मल्ला ओरतोनि तोमालगुडा मत्तोर. तल्पुंक तालम वाटसि मननेकेगुडा येसु ओरा नड्डुम वासि निल्लोर. निलसि, “मीकु सांति दोर्कि,” इंचि इत्तोर.
 27 पजा येसु तोमान, “तोमा, नावा कयदा पुनकुने नीवा वेलु ईर्सि हळा. नीवा कय हाह्चि, नावा पक्काक मनना गोर्का बर्राते नीवा कय ईर्वा. निमे अनमानमते मन्मा, विस्वासम कीम,” इंचि वेहतोर.
 28 अस्के तोमल, “ना सामि, ना पेनदुना,” इंचि तोमल येसुंक जवाब हीतोर.
 29 पजा येसु ओन, “निमे नाकुन हळसि विस्वासम कीतिन. गानि ओर नाकुन हळाकोन्ना विस्वासम कीतोर, ओर आसिर्वाद दोर्कतोर आंद,” इत्तोर.

इद पुस्तकम रासता उद्देसम

- 30 सिराप इवे आयका, सिस्स्युल्कुना मुन्ने येसु वेरे इका वेल्लेन अद्बूतामाता चिन्हे कीसि हूपिस्तोर. इवन्नि ई पुस्तकमते रासमळ जर्गाहिल्ले.
 31 गानि येसे किरिस्तु, ओरे पेनदा मर्री, इंचि मिमेट विस्वासम कीसि ओना पोरोलते पिस्वर दोर्किच्छुकननाहाटी, इवन्नि रासमळ जर्गता.

21

गालिल सेरवुनगा येसु वातोर

- 1 इवंता आता पज्जो, येसु मर्रादि मल्ला सिस्स्युल्कुंक तिबेरिया समुद्रमता* ओड्डुंक सिस्स्युल्कुंक दिसतोर. अद इल्हा जर्गता:
 2 अगा सिमोन पत्रु, एमडाल्कुनाल वरोर तोमल, गालिल राज्यमता काना नाटेना नतेनल, जब्दिना मर्क आनि येसुना इका इच्चुर सिस्स्युल्कु जमा आसि मत्तुर.
 3 अस्के सिमोन पत्रु, “नना जिम्मां पियालय दांतन,” इंचि ओर्कुन इत्तस्के ओर, “मोमोटगुडा नीतोनि वांतोम,” इंचि, होंचि डोंगाते उदतुर. गानि अद नर्कामेड ओर्क उंदिका जिम्मा दोर्काहिल्ले.
 4 अद रोजु पंगा आयनेके येसु वासि ओड्डुनगा निलसि मत्तोर. गानि ओना सिस्स्युल्क, ओन येसु आंदुर इंचि एरपाट किया हिल्लुर.
 5 अस्के येसु, “मिहगा इच्चुंगना जिम्मां मंतंगा, पिलाल्कनिटा?” इंचि पूसकीतोर. अयते ओर, “उंदिका हिल्ले,” इंचि इत्तुर.
 6 अस्के येसु ओर्क, “डोंगाता तिना बाजुंक ओल्ला वाटट, अस्के मीकु जिम्मां अर्रांतां,” इंचि वेहतोर. येसु वेहतापे ओर ओल्ला वाटतुर. अस्के हुळाट! ओर ओल्लातुन ओड्डुंक इग्गा पराहिल्लुर, अचोने वेल्ले जिम्मां ओल्लाते अर्रांतां. 7 अस्के येसु बोन अयते पावरम कियुंदुरो आ सिस्स्युड, “ओर सामिए आंदुर,” इंचि पत्रुंक वेहतोर. अयते सिमोन पत्रु, ओर अल्हा वेहतदुन केंजता केंजमळे तेंडसि मत्ता कपडिं केरसि समुद्रमते दुन्कतोर.
 8 ओड्डु वेल्ले लक्कु मनाहिल्ले. दग्गेर-दग्गेरा रोंड न्हकुना कूटां लक्कु मत्ता बारे. अदुनहाटी कळमता सिस्स्युल्कु, जिम्माने निडिस मत्ता ओल्लातुन इग्गिसेक अदे डोंगाते वातुर.
 9 ओर ओड्डुंक एवतस्के, रेय्सि हळते, अगा ओर्क इच्चुं हारि आनि तडमि पोर्री वाटसि, इच्चुं जिम्मां दिसतां.
 10 अस्के येसु, “मिमेट इंद-इंदके पीता जिम्मानाल इच्चुं जिम्मां हीके पीसि वट्टु,” इंचि ओर्कुन इत्तोर.
 11 अदुनहाटी सिमोन पत्रु डोंगाते एक्किसि ओल्लातुन एताल ओड्डुंक इग्गतोर. अद ओल्लाते नूटा एबै मूड पेद्दा-पेद्दा जिम्मां निडिस मत्तां. अचोने वेल्ले जिम्मां निडिस मनिनागानि अद ओल्ला हर्रा हिल्ले.
 12 पजा येसु, “वट्टु, वासि नास्ता कीम्टु,” इंचि ओर्कुन केयतोर. सिस्स्युल्कुंक, ओरे सामि इंचि एरपाट आताहाटी, “निमे बोन आंदिन?” इंचि पूसकियालय बोनके हिम्मत आयाहिल्ले.
 13 अस्के येसु वासि, आ हारिन, जिम्मान येतसि ओर्क हीतोर.
 14 येसु हासि मर्रा जीवाते तेदता पज्जो, इल्हा सिस्स्युल्कुंक ओर दिसमळ, इद मूळोव मल्ला आंदु,

येसु पत्रुंक अदिकारम हीतोर

* 21:1 तिबेरिया समुद्रम ई तिबेरिया समुद्रमतुन गालिल समुद्रम इंचिगुडा इंतुर.

15 अंतोरा तिनूळ आतास्के येसु सिमोन पत्रुन, “योहानुना मरि सिमोनु, ईर अंतोरकन्ना निमे नाकुन एक्को पावरम कीतिना?” इंचि पूसकीतोर. अस्के सिमोन, “हो सामि! नना नीकुन पावरम कीतन इंचि नीकु एके मंता,” इंचि इत्तोर. “अयते निमे नावा गोरि पोरिहकुन मेहा,” इंचि येसु पत्रुंक वेहतोर.

16 रोंडो मल्का, “योहानुना मरि सिमोनु, निमे नाकुन पावरम कीतिना?” इंचि येसु पूसकीतस्के, “हो सामि! नना नीकुन पावरम कीतन इंचि नीकु एके मंता,” इंचि पत्रु इत्तोर. “अयते निमे नावा गोरिन बेस मेहा,” इंचि वेहतोर.

17 येसु मूळोव मल्का पत्रुन, “योहानुना मरि सिमोनु, निमे नाकुन पावरम कीतिना?” इंचि पूसकीतोर. “योहानुना मरि सिमोनु, निमे नाकुन पावरम कीतिना?” इल्हा मूळोव मल्का येसु पूसकीताहाटीं, पत्रुंक दुक्कम वासि, “हो सामि! नीकु अयते अंता एरपाट मंता. नना नीकुन पावरम कीतन इंचिगुडा नीकु एरपाटे मंता,” इंचि पत्रु इत्तोर. अस्के येसु, “अयते निमे नावा गोरि मेहा.

18 नना निजम-निजम वेहासेक, निमे लेयोन मल्लिन अस्के, नीवा कपडिं निमे हदुरकुनिदिन. नी इस्टमाता जेगातगा होनिदिन. गानि नीवा मातिरतनमते, निमे नीवा कयक हाहते, बोरो वेंरेतोर वासि नीवा कपडिं हदुरनुर नीकु इस्टम हिलुवा जेगाते नीकुन पीसि ओयनुर,” इंचि वेहतोर.

19 पत्रु बसोटा हामुर हासि, पेनदुक महिमा हियनुरो, इदुन ओन्क हुप्सालय येसु अल्हा वळकतोर. अल्हा वळकता पजा, “नावा पज्जो ताका,” इंचि ओन्क वेहतोर.

20 पत्रु पज्जोळक मल्लिस हळतस्के, येसु बोन अयते पावरम कियुंदुरो आ सिस्स्युड, बोर अयते पंडुगुना गाटो तिननेके वेल्लेन दग्गेर उद्दिस, सामि, नीकुन बोर दोकाते पीसि हीतोर इंचि, पूसकीता आ सिस्स्युड, ओना पज्जो वायनद ओन्क दिसतोर.

21 ओन हळसि पत्रु, “ईनद बता संगति सामि?” इंचि येसुन पूसकीतोर.

22 अस्के येसु, “नना मल्लिस मरि वायनदाका ओर पिस्सि मनगोम इंचि नाकु इस्टमातस्के, ओना बारेमते नीकु बतल गावाले? निमे नावा पज्जो ताका,” इंचि पत्रुंक वेहतोर.

23 दानहेंदाल, आ सिस्स्युड हायोर इत्ता पोल्ले, कळमता विस्वासुल्लकुना नड्डुम पैलांचि होत्ता. गानि आ सिस्स्युड हायोर इंचि येसु इना हिल्लोर. ओर सिराप “नना मल्लिस मरि वायनदाका ओर पिस्सि मनगोम इंचि नाकु इस्टमातस्के, ओना बारेमते नीकु बतल गावाले?” इंचि इत्तोर.

आकिरता पोल्ले

24 ई सिस्स्युडे इव पोल्लेना बारेमते गवाइ वेहचि, रासतोर. ईना गवाइ निजम आंद इंचि मनाकु एरपाटे मंता.

25 बूमिपोरि येसु कीतव इंका वेल्लेन पोल्ले मंतां. आ उंदुंदि पोल्लेतुन रासते, रासता पुस्तकाल्कुन ईरालय दुनियाते जेगा हाला परी बारे, इंचि नाकु अनपिच्चंता.

प्रेरितुल्लुक प्रेरितुल्लुकना कबाहक

इद पुस्तकमता बारेमते गिचचो परिचयम

रासतोना पोरोल: डाक्टर लूका

रासता कालम: इसवि सन 60-63

प्रेरितुल्लुकना कबाहक इनना ई पुस्तकमतुन लूकाल इनना येसुना वरोर सिस्स्युड रासतोर. प्रेरित इत्ते 'पेन लोहचीता सिस्स्युल्लुक' इंचि अर्तम. दीनकन्ना मुन्ने ईर उंदि पुस्तकम रासतोर, अदुन पोरोल लूकाल रासतद बेसता कबुर. अय्ते मुन्नेटा पुस्तकमते लूकाल येसु सामि हासि तेदसि मर्रा स्वर्गमते तिरियसि होननदाकाटा संगति रासतोर. इद पुस्तकमते बारे येसु सामि स्वर्गमते तिरियसि होत्ता पज्जो पवित्र आत्माताहेंदाल ओना सिस्स्युल्लुक येसुना बारेमता बेसता कबुरतुन येस्सलेम, यहुदिया, सामरिया आनि पूरा दुनियाते तिरियसि बल्हा वेहतुर, वेहाना टाइमते ओर्कु बसंटा कस्टाल्लुक वातां, बता-बता कबाहक कीतुर, ओर बल्हा पिस्तुर, इदुना बारेमते रासतोर. इद पुस्तकम इत्ते, तियपिल्लुस पोरोलता वरोर बेस विस्वासि सायाबुंक रासता सिट्टि आंद.

बगा बतल मंता

गवाइहाटी तयार आयमळ 1:1-26

येस्सलेमते येसुना बारेमते गवाइ 2:1-8:3

यहुदिया आनि सामरिया एरियाने येसुना बारेमता गवाइ 8:4-12:25

पौल्लुसना सेवा कबळ 13:1-28:31

लूकाल रासता इंकुंदि पुस्तकमता परिचयम

1 नावा पावरमगल्ला तियपिल्लुस,* नना मोदाटा पुस्तकमते सुस्वनाल येसु बतल-बतल कीतोर, बतल-बतल कराहतोर अदुना बारेमते रासतन.
2 अचोने आयका येसु पेर्कुल्ला प्रेरितुल्लुकं पवित्र आत्माहेंदाल आदेस हीसि, मर्रा स्वर्गमते तिरियसि होननदाका पूरा पिस्वरता बारेमते नना रासतन.

3 येसु हासोचि तिरियसि तेदतस्के, "नना पिस्सि मंतन," इंचि प्रेरितुल्लुकं गट्टिगा रूजुव कीसि हुपिस्तोर. ओर नल्पै रोजकुनदाका ओर्क दिस्सेक, पेनदा राज्येम बारेमते वेहासेक मत्तोर.

4 उंदि मल्ला ओरतोनि कलियसि मननेके येसु, "येस्सलेम सहर होळसिसि होनमट. नावा पेनबाबाल हीता पोल्लेता बारेमते नना मीकु मुन्नेन वेहचि मत्तन, अद पूरा आयानदाका एदुर हळसेक मंटु.

5 बारित्ते, योहान एतोनि बापतिस्मा हीतोर, गानि मीवा बापतिस्मा कोन्नि रोजकुं पवित्र आत्माताहेंदाल आयार," इंचि ओर्कुन इत्तोर.

पेन येसुन जीवाते मननेकेने स्वर्गमते ओता

6 पजा अंतोर प्रेरितुल्लुक उंदि जेगाते जमा आतुर. अस्के येसुन, "सामि, निमे इदे वेलाते इस्त्राएल देसेमता लोकल्लुकं ओरा राज्येम मर्रा हीतिना?" इंचि पूसकीतुर.

7 अस्के येसु ओर्कुन, "अद सिराप पेनबाबाके तारिक आनि वेलाता निरनायम एतना अदिकारम मंता. दान एरपाट कियमळ मीवा कबळ आयो.

8 गानि पवित्र आत्मा मीपोर्री वातस्के मिमेट येस्सलेम सहर, पूरा यहुदिया एरिया, सामरिया एरिया अल्हेने बूमिता आकिरदाका नावा गवाइ आयना ताकत मीकु वायार," इंचि इत्तोर.

9 येसु इल्हा इत्तस्के, ओर हळसेक मननेकेन ओन स्वर्गमते तेहाचि ओयमळ जर्गुता. ओर्क दिस्साकोटा उंदि मब्बु तेर्पे अड्डम वासि ओन मुच्चुता.

10 ओर पोरोळक तेदिस होननेके अगा मत्ता प्रेरितुल्लुक मब्बुनहेके उंदेतीर हळसेक मत्तुर. अस्केने इच्चुर तेल्ला कपडिं केरतोर ओरगा वासि नित्तिसि,

11 "ए गालिल लोकल्लुकुनिटा, मिमेट इल्हा नित्तिसि मब्बुनहेके उंदेतीर बारि हळसेक मंतिर? येसुन मिहागटाल स्वर्गमते तेहकुंचि ओयमळ जर्गुता गदा! अय्ते बल्हा मिमेट ओन स्वर्गमते होननेके हळतिरो, अल्हेने ओर मर्रा तिरियसि वांतोर," इंचि इत्तुर.

यहुदाना जेगाते इंकावरोन पेरमळ

12 पजा प्रेरितुल्लुक जय्तुन मराकुना गुट्टातगटाल नोमकेम रोजुनचो लक्कु† मत्ता येस्सलेम सहरते मल्लिस वातुर.

* 1:1 तियपिल्लुस ईर वेल्ले कदर मत्ता विस्वासि आंदुर. † 1:12 नोमकेम रोजुनचो लक्कु अद कालमते नोमकेम रोजुने उंदि किलोमिटरकन्ना एक्को तिरियाकोंदुर.

13 ओर अगा वासि, बद मिद्देते मनुंदुरो अदे मिद्देता पोरोटा अरति होत्तुर. अगा पत्रु, योहान, याकोब, अंदरियल, पिल्लिप, तोमल, बरतलमय, मत्तयाल, अल्पिना मरिं याकोब, सिमोन (जिलोति), याकोबुना मरिं यहुदल ईर मत्तुर.

14 ईरतोनि इच्चुंग मुर्ताहक, येसुना यावल मरियम, ओना तम्महक ईर अंतोर उंदे मनसुने पारतना कीसेके मनुंदुर.

15 उंदि रोजु नूटा इरवै (120) विस्वासि दादालोरा नड्डुम पत्रु नित्तिसि,

16 “नावा विस्वासुल्लुकुनिटा! दाविद राजाल पवित्र आत्माहेंदाल दर्मसास्त्रमते रासि मत्ता पोल्लेतुन मुन्नेन इंचि मत्तोर, अद इंदके यहुदाना हेंदाल पूरा आता. ई यहुदाले येसुन पियानोर्कुंक मुन्ने अरतोर.

17 यहुदल मना लोप्पोटोरे वरोर मत्तोर, मनातोनि कलियसि सेवा कियालय आसर आतोर,” इंचि इत्तोर.

18 तप्पु कबळ कीसि कमांच्चा कोत्ताने यहुदल उंदि बूमि अस्तोर. अदे बूमिमे बोकबोर्ले अरताहेंका पीर पय्सि ओना पूरा पोदुहकंता पलाते पेयसतां.

19 इदु येस्सलेम सहरते मत्तोर्कुंक अंतोर्क तेळियता. दानहाटीं ओरा बासाते आ नेदुन हकलदामा, इत्ते नेत्तुरता नेलि* इल्हा पोरोल अरता.

20 पत्रु मर्रा इल्हा इत्तोर,

“ओना लोन पाडासि दांता, अकुने मनालय वरोरगुडा पिस्सोर.

ओना पेद्दातनम, इंकावरोक दांता.”*

इल्हा बजन संहिताते रासि मंता.

21-22 “अदुनहाटीं येसु सामि बच्चुं रोजकु मनातोनि कलियसि होंचेके-वासेके मत्तोरो, इत्ते योहानुना बापतिस्मातगटाल अय्ते येसुन मना नड्डुमताल स्वर्गमते तेहाचि ओयनदाका बोर अय्ते मनातोनि मनुंदुर ओरवेटाल वरोन पेरते बेस मनंता. येसु हासि मर्रा जीवाते तेदतद ओर मनातोनि गवाइ हियमळ गावाले,” इंचि इत्तोर.

23 दानहाटीं इव्वुर मनकालोर्कुन मुन्ने तत्तुर. अवेटाल वरोर योसेप, ईन बरसब्बा इनुंदुर, इंका ईन युसतुस इंचिगुडा एरपाट कियुंदुर. इंकावरोर मत्तिया.

24-25 अस्के प्रेरितुल्लुक पारतनाते, “सामि! निमे अंतोरा मनसुन एरपाट कीतिन, यहुदल अय्ते ओन्क हीता कबळतुन होळसिसि ओर होनना जेगाते होत्तोर. गानि निमे ईर इव्वुरा लोप्पोटाल प्रेरित इंचि नीवा सेवा कियालय बोन पेरकुत्तिन माकु हुप्सा,” इंचि तल्कतुर.

26 अस्के ओर ओराहाटीं सिट्टिं वाटतुर अय्ते सिट्टि मत्तियाना पोरोलते पेयसता. अस्के पदाकोडु मंदि प्रेरितुल्लुकुने आ मत्तियालगुडा कलियतोर.

2

पेनदा आत्मा विस्वासुल्लुकुना पोरो रेयमळ

1 पेंतेकोस्त पंडुगु* रोजुने अंतोर विस्वासुल्लुक उंदि जेगाते जमा आसि मत्तुर.

2 अस्के उंदे मल्का मब्बुनाल पेद्दा वळि-दुमारम लेहका वाता. ओर अंतोर उद्दिदिसि मत्ता लोन दाना सप्पुडतोनि पूरा निंडिस होत्ता.

3 अस्के तळमितालेसीं पोत्तना नाल्के ओर्कु दिसतां, अव अगा मत्तोरा पोरो उंद-उंदि रेयतां.

4 ओर अंतोर पवित्र आत्माते निंडिस होत्तुर, आ आत्मा ओर्कु वळकाना बलम हीता परकारम ओर वेरे-वेरे बासाने वळकमळ सुख कीतुर.

5 अद वेलाते, मब्बुना हिळु मत्ता वेल्लेने देसेल्लुकुना यहुदि विस्वासुल्लुक येस्सलेमते मत्तुर.

6 आ सप्पुड केंजतस्के ओर उंदगा जमा आतुर. ओर अंतोर ओरा संतम बासाते वळकनद केंजसि इंचंनम आतुर.

7 अस्के ओर इंचंनम आसि, “ईर वळकानुर अंतोर गालिल एरियातोरे गदा,

8 अरे मनम अंतोरम मना संतम बासातेन केंजसंतोम गदा! इद बल्हा मरि?

9 मनम पारति, मेदी, एलामि, मेसोपोटामिया, यहुदिया, कप्पुदुकिया, पुंतुस, आसिया

10-11 पुगरिया, पंपुलिया, ई जेगानाल, इजिप्त देसेमताल, कुरेनि सहर दग्गेरा मत्ता लिबिया देसेमताल, रोम सहरताल वाता यहुदिल्लुकुम, यहुदि मतम पीतोरम. क्रेति, अरब देसेमताल वाता अंतोरम पेनदा इंचंनमाता पेद्दा कबाहकून मना-मना संतम बासाने केंजसेके मंतोम,” इंचि इत्तुर.

12 ओर अंतोर इंचंनम आसि, “इद बतल आसंता” इंचि तेळियका वरोक वरोर तल्कतुर.

13 गानि वेरेतोर अय्ते, “ईर अंगुर पंडिना पूना कल्लु उंचि मंतुर,” इंचि ओर्कुन कारेड्डाल्क कीतुर.

लोकुल्लुकुन मुन्ने पत्रुना बासन

14 अस्के पत्रु पदाकोडु मंदितीनि नित्तिसि, लोकुल्लुकुंक अंतोर केंजा होनानाल जोरते वळकालय दल्गतोर. यहुदियाता दादालोरिता, येस्सलेमते मनानोरिता, नना वेहानद मीकु तेळियमळ गावाले. इंचि मिमेट अंतोर नावा पोल्लेतुन बेस केव दोस्सि केंजट.

15 मिमेट इनकुत्ताप ईर कल्लु उंचि रिम्मां आया हिल्लुर. इंदके हक्केटां तोम्मिद एगसंतां.†

16 गानि इय्यला इगे मिमेट हळता गटनना बारेमते योएल इनना पेनदा कबुरतोर इल्हा जर्गीता इंचि मुन्नेने वेहचि मत्तोर, अद इल्हा मंता:

* 1:19 मत्तयाल 27:5-8 ☆ 1:20 बजन संहिता 69:25 * 2:1 पेंतेकोस्त पंडुगु पूना पंटा पेयसतस्के यहुदि लोकुल्लुक इद पंडुगु कीतुर. † 2:15 हक्केटां तोम्मिद एगसंतां अद कालमते यहुदिल्लुकु पदि एगनदाका पेनदा बक्किते मनुंदुर, कल्लु उनाकोदुर.

- 17 पेन इता गदा,
 “आकिर रोजकुने नना अंटोर लोकुल्लुकुनपोर्री, नावा आत्मातुन कुम्मरिचंतन.
 अस्के मीवा मर्क-मियाहक बविस्यवानि कियानुर,
 मीवा लेय्युर्क दर्सनाल्क ह्ळानुर, आनि मात्रालोर कलां ह्ळानुर.
 18 आ रोजकुने नना मुरतळ मांडसा इनाकौटा,
 अंटोर नावा दास-दासिहकुनापोर्री,
 आत्मातुन कुम्मरिचंतन आनि ओर बविस्यवानि कियानुर.
 19 नना मब्बुने इचंमता कबाहक हुप्संतन.
 बूमिपोर्री चिन्हां इत्ते, नेत्तुर, तडमि, मब्बुनसौटा पोया हुप्संतन.
 20 पेनदा आ बच्चोनो पेद्दा, बेसता रोज वायाका मुन्ने,
 पोळद हीकटा, वेडसि बारे नेत्तुरलेहका आंता.
 21 अस्के बोर अय्ते पेनदा पोरोल एतंतुरो,
 ओर्कुन पापाल्लुकुनाल पिसागोटमळ जर्गता.”☆
 22 इस्त्राएल लोकुल्लुकुनिटा, इव पोल्लें केंजट. पेन‡ नासरेत नाटेना येसुनाहेंदाल पेद्द-पेद्दा कबाहक, इचंमता कबाहक आनि चिन्हां मीवा मुन्ने हुपिच्चि, पेन लोहतोर ईर आंदूर इचि रूजुव कीता, इद मीकू एरपाटे.
 23 पेनदा उंदि पिलान आनि तेल्वि परकारमे येसुन मीवा कय्दे हियमळ जर्गता. मिमेट सेड्डा मनकालोर्कुना सायता पीसि ओन कूस पोर्री मोल्लां कोहकिसि ह्ळकतिर.
 24 गानि येसुन पेन हामुटाल अलग कीसि मर्रा जीवाते तेहाता, अदुनहाटीं हामुर ओन इर्रा पराहिल्ले.
 25 ओना बारेमते दाविद राजाल इल्हा इत्तोर,
 “नना पेनदुन बस्केळक, नावा मुन्नेन ह्ळसेक मत्तन,
 नाकुन कस्टालुकुनाल पिसागोटालय अद नावा तिना बाजुंक मंता,
 26 इचि नावा मनसु आनंदमते मंता, नावा तोड्डि कुसिते वळकसेके मंता.
 इचोने आयका नावा मेंदुलगुडा आसेते मनंता.
 27 निमे नावा आत्मातुन नरकमते होळसियिन,
 निमे नीवा पवित्र मनकन, कळियसि होना हिथ्यिन.
 28 निमे नाकु पिस्सना हरिं हुपिस्तिन, नीवा लोप्पो नाकुन आनंदमते इर्रतिन.”☆
 29 अय्ते नावा विस्वासुल्लुकुनिटा! नना मीवा मुन्ने एनकटा मनकल दाविद राजाना बारेमते विस्वासमते वेहा परांतन, ओर हातोर, ओन बौंदा दोस्तुर. ओना बौंदा इदवेरदाकागुडा मना नड्डुम मंता.
 30 ओर पेनदा कबुरतोर मत्तोर. ओना वंसमताल वरोन राजगदूदेपोर्री उप्संतन इचि पेन ओट्टु तिचि पोल्ले हीता, अद ओन्क एरपाटे मत्ता.
 31 दानहाटीं मुन्ने बतल जर्गनद मंता अदुन एरपाट कीसि, ओन नरकमते होळसिया हिल्ले ओना मेंदुल कळियसि होना हिल्ले, इचि वेहचि मत्तोर. इत्ते किरिस्तु हासि मर्रा जीवाते तेदतदुना बारेमते वेहता पोल्ले आंद.
 32 आ येसुन पेने मर्रा जीवा तेहता इचि मोमोट अंटोरम गवाइ मंतोम.
 33 इंदके पेन येसुन दाना तिना बाजुंक उपिस्ता. पवित्र आत्मातुन हीतन इचि पेन पोल्ले हीसि मत्ता अद ओन्क दोर्कता. येसु अदे पवित्र आत्मातुन वळियतोर, अदुन मिमेट ह्ळसेक, केंजसेक मंतिर.
 34-35 बारित्ते दाविद राजाल स्वर्गमते होना हिल्लोर, गानि दीना बारेमते ओर कुद वेहतोर:
 “पेन नावा सामिनतोनि इत्ता गदा, नना नीवा पगातोर्कुन नीवा कालुकुनगा तर्रनदाका,
 निमे नावा तिना बाजुंक उदसि मन.”☆
 36 “अदुनहाटीं इस्त्राएलता अंटोर लोकुल्लुकु बेस एरपाट कीकुनना पोल्ले बतल इत्ते मिमेट बा येसुन अय्ते कूस पोर्री मोल्लां कोहकिसि ह्ळकतिरो, पेन ओन सामि आनि किरिस्तु कीता,” इचि पत्रु वेहतोर.
 37 इव पोल्लें केंजनेके ओरा गुंडें दडेल इत्तां. अस्के ओर, “दादालोरिता, इंदके मोमोट बतल कीकोम?” इचि पत्रुन आनि अगा मत्ता प्रेरितुल्लुकुन पूसकीतुर.
 38 अस्के पत्रु, “मिमेट कीता पापाल्लुकु मापि आयगोम इचि मनसु मार्सकुंचि पेनदाहेके तिरियट, मिमेट अंटोर येसु किरिस्तुना पोरोलते बापतिस्मा एतट. अल्हा कीतिरित्ते मीकू पवित्र आत्माता वरम दोर्कता.
 39 ई पोल्ले मीहाटीं, मीवा पिलालुकुनाहाटीं आनि बोर अय्ते लक्कु मत्तोर्कुन मना सामि आता पेन, दगोरा केयता ओरा अंटोराहाटीं हींता.” इचि ओर्कु वेहतोर.

☆ 2:21 योएल 2:28-32 ‡ 2:22 पेन पेन बाबल, मरि (येसु), पवित्र आत्मा इव मूड इंका उंदे पेन आंद.

☆ 2:28 बजन संहिता 16:8-11 ☆ 2:34-35 बजन संहिता 110:1

- 40 पजा पन्नु, इंका वेल्लेने पोल्लेनेहेंदाल गवाइ हीसि, “ई युगमता कराब लोकुल्लुकनाल मिमेट जेगर्ता मंटु,” इंचि विनंति कीतोर.
 41 अस्के बोर अय्ते ओना पोल्लेने ओप्फुकुत्तुर, ओर अंटोर बापतिस्मा एततुर. इल्हा ओर अंटोर कलियसि मूड वेय्कुना मंदि आतुर.
 42 ओर अंटोर, प्रेरितुल्लुकना कराहमळते, कूळमळते, हारि उरुहमळते Sआनि पारतना कियमळते उंदि आसि मनुंदुर.

विस्वासुल्क कलियसि मनमळ

- 43 प्रेरितुल्क तीराता इंचंत्रमता कबाहक, चिन्हां किय्युंदुर. अदुनहाटीं अंटोर पेनदा कदर कियालय दल्गतुर.
 44 विस्वासुल्क अंटोर उंदासि कलियसि मनुंदुर. बोनगा बतल मनिनागानि दान अंटोर तूसकुनुंदुर.
 45 अचोने आयका ओरा सम्सारमतुन, सामानतुन अम्मिसि अब्सरम मत्तोर्कुंक तूसि हियुंदुर.
 46 रोज गुळिते उंदि मनसुने जमा आयुंदुर. ओर लोन-लोन हारि उराहचि, आनंदमते पीटे बतले अन्समन्स हिलाकोटा अंटोर कलियसि गाटो तिनुंदुर.
 47 ओर रोज पेनदा स्तुति कियुंदुर, अंटोर ओरतोनि कूस मत्तुर. पापमताल मुक्ति दोर्कतोर्कुन, सामि विस्वासुल्कुने कल्पुंदुर.

3

कुंठि बेस आतोर

- 1 उंदि मल्का पिथ्यटा पारतना वेलाक इत्ते मूड एगनेके पन्नु आनि योहान गुळिते होंचेके मत्तुर.
 2 अस्के इच्चुर लोकुल्क पुट्त्स्केटाल कुंठि मत्तोने वरोन तेहकुंचि तत्तुर. गुळिते होना-वाया कियानोर्कुन बिच्चम तल्कागोम इंचि ओन ओर रोज गुळिता सक्कगा इनना गलमातगा उपिच्चि इरुंदुर.
 3 पन्नु आनि योहान गुळिते होळियानद हळसि ओर ओर्कुन बिच्चम तल्कतोर.
 4 अस्के पन्नु योहानुनतोनि ओनाहेके उंदेतीर हळसि, “माहेके हळा” इंचि इत्तोर.
 5 पजा ओराहेंदाल बतलन्ना दोर्कार बारे इंचि आसेते, ओराहेके हळसेक मत्तोर.
 6 अस्के पन्नु, “नना अय्ते एंडि बंगाराल्क मत्तोने आयोन, गानि नहगा बतलयते मंतनो अदे नीकु हीतन, नासरेत नाटेना येसु किरिस्तुना पोरोलता बलमते नित्तिसि ताका,” इंचि इत्तोर.
 7 पजा ओर ओना तिना कय पीसि तेहता तेहामळे ओना काल्कुने, टोंगराने ताकत वाता.
 8 अस्के ओर दुनकिसि तेदसि ताकालय दल्गुतोर, ताकसेके, दुन्किसेके, पेनदा स्तुति कीसेके ओरतोनि गुळिते होत्तोर.
 9 ओर ताकानदुन आनि पेनदा स्तुति कियमळतुन अंटोर लोकुल्क हळतुर.
 10 ईर गुळिता सक्कगा इनना गलमातगा बिच्चम तल्ककुनानोर इंचि लोकुल्क एरपाट कीकतुर. ओर बेस आतद हळसि, इद बल्हा आता इंचि अंटोर वेरियसि इंचंत्रमते अरतुर.

पन्नु पेनदा पोल्लें वेहतोर

- 11 आ कुंठि मनकल पन्नु आनि योहानुन पीसि नित्तिसि मत्तोर. ओर सुलेमान राजाना पंदिरतगा मत्तस्के अंटोर लोकुल्क इंचंत्रम आसि आ जेगातगा विच्चि वातुर.
 12 ओर्कुन हळसि पन्नु इल्हा वळकालय दल्गतोर. “ए इस्राएलता लोकुल्कुनिटा, मिमेट जर्गतदुन हळसि इल्हा बारि इंचंत्रम आसि माहेके हळसेक मंतरि? मोमोट मावा ताकतते, मावा बक्तिते ईन ताकानाल-तिरियानाल किया हिल्लोम.
 13 अब्राहाम, इसाक आनि याकोबुना पेन, इत्ते मना एनकाटोरा पेन, दाना सेवक येसुंक कदर हीता. गानि मिमेट ओन दोर्कापीसि हळकालय हीतिर. अयना पिलातुस ओन होळसियाना विचारम कीतस्के मिमेट ओन होळसियामन्नि इत्तिर.
 14 पवित्र आनि नीतिमंतुड* मत्ता येसुन ओप्फुन्ना हिल्लिर, गानि वेरेतोरा जीवां तेंडाना पापि मनकन गावाले इत्तिर.
 15 मिमेट लोकुल्कुंक बस्केळ्ळक पिस्साना पिस्वरता हारि हुप्सानोन हळकतिर, गानि पेन ओन हातोराव्टेटाल मर्रा जीवा अरहता, दीना मोमोट गवाइ मंतोम.
 16 मोमोट येसुन नम्मुताहाटीं ओना पोरोलतेन ईर कुंठि बेस आतोर. ई मनकन मिमेट हळतिर, एरपाट कीतिर. येसुना पोरोटा विस्वासमतेन ई मनकल पुरागा बेस आतोर. इदंता मी मुन्नेन जर्गुता.”
 17 “नावा दादालोर तम्मुहकनिटा! मिमेट आनि मीवा राज्येम कियानोर बतल कीतिरो अद मीकु तेळियवा हेंकेन कीतिर इंचि नाकु एर्के.
 18 येसु किरिस्तुंक तकलिप अर्रापीता इंचि पेन दाना कबुरतोर्कुना हेंदाल मुन्नेन वेहचि मत्ता, अद इंदके पूरा आता.
 19 दानहाटीं मिमेट मनसु मार्सकुंचि पेनदाहेके तिरियसि वाते, मीवा पापाल्क पाय्सि दांता. अस्के मीकु पेनदा मुन्ने आत्मिक सांतिता वेला वायार.
 20 पेन मुन्नेटाले तयार कीसि इरता येसु किरिस्तुन मीहाटीं लोहार.

S 2:42 हारि उरुहमळ अंटोर कलियसि गाटो तिल्ला पजा, पेन मनाहाटीं हाता इत्ता पोल्लेतुन मति कियानाहाटीं हारि तुकडा कीसि तिनुंदुर. * 3:14 पवित्र आनि नीतिमंतुड पिसागोटनोर (वरोर पिसागोटनोर बायानोर मत्तोर ओना बारेमे ई पोल्ले वेहचि मत्ता ओरे येसु किरिस्तु आंदुर.)

21 गानि पूरा दुनियातुन मोदाटालेसी बेस कीतन, इंचि पेन वेल्ले मुन्नेने पवित्र कबुरतोरारहेदाल वेहचि मत्ता. अद कालम वायनादाका किरिस्तु स्वर्गमतेन मन्तोर.”

22-23 “पेन मीवा लोप्पोटाले वरोन नावसोंटा पेनदा कबुरतोन लोहार, ओर वेहतापे मिमेट ताकाना, बोर अय्ते ओर वेहताप ताकोर, ओर वेहताप ताकानोरवेटाल वेरे आसि नासडेम आंतोर, इंचि मूसाल वेहचि मत्तोर.

24 अचोने आयका, सामवेल आनि ओना पज्जो वाता पेनदा कबुरतोर अंतोर इव रोजकुना बारेमते वळकुतुर.

25 ‘नीवा वंसमतोरारहेदाल बूमि पोर्रोटीर्क अंतोर्क आसिर्वाद दोर्कता’ इंचि पेन अब्राहामुनतोनित्ता. मिमेट अय्ते आ करार कीता एनकाटोरा आनि पेनदा कबुरतोर पिलाल्क आदिर.

26 पेन ओना सेवक येसुन मर्रा जीवा अरहतस्के, मीकुन कराब हरदाल तप्पिचि आसिर्वाद हियनाहाटी मोदाला मीहिके लोहता,” इत्तोर.

4

पन्नुन, योहानुन पंचादिता मुन्ने निलाहमळ

1 पन्नु आनि योहान लोक्कुल्लुकनतोनित्ता वळकसेके मननेके पेर्मालोर्क, गुळिता कावेल कियानोरा दरोगाल आनि सदुकिर ओरगा वातुर.

2 येसु बल्हा अय्ते हातोर लोप्पोटाल मर्रा जीवाते तेदतोर, अल्हेने हातोर मर्रा जीवाते तेदंतुर इंचि पन्नु आनि योहान लोक्कुल्लुकन करामळतुन हळसि ओर्कु इरगा होंग वाता.

3 पजा ओर ओर्कुन पीतुर गानि पोळ्दु होत्ता इंचि इंकुदि रोजुनदाका ओर्कुन जेलने बंद कीसि इरतुर.

4 गानि बोर अय्ते ओरा पोर्ल्लें केंजतुरो, ओरावेटाल वेल्लेन मंदि येसुनपोर्रो विस्वासम कीतुर. विस्वासम कीतोर लोप्पोटाल मांडूसा दगोर-दगोरा हेय्युं वेयकुनदाका आतुर.

5 इंकुदि रोजु यहुदि पेद्दाल्क, राज्येम कियानोर आनि दर्मसास्त्रम कराहना गुस्ल्लक* येस्सलेमते जमा आतुर.

6 इंका पेद्दा पेर्माल हन्नाल ओना जीवातोर कयपाल, योहान, सिंकंदर आनि ओना लोतुर अंतोर अगा मत्तुर.

7 ओर पन्नुन आनि योहानुन ओरा नड्डुम निलाहचि, “मिमेट बद ताकतते, बोना पोरोलते इव कबाहक कीतिर?” इंचि ओर्कुन पूसकीतुर.

8-9 अस्के पन्नु पवित्र आत्माते निंडसि इल्हा वळकालय दल्गतोर. ए लोक्कुल्लुकनपोर्रो राज्येम कियानोरिटा अल्हेने पेद्दाल्कुरिटा! इय्याला वरोन कुंठिन बेस कीताहेंके, ओर बल्हा बेस आतोर, इंचि माकुन तल्कसेक मंतिर.

10 अय्ते मीकु अंतोर्क आनि इस्त्राएलता लोक्कुल्लुक, नासरेत नाटेना येसु किरिस्तुना पोरोलतेन ई मनकल बेस आसि मी मुन्ने नित्तिसि मंतोर इंचि तेळियमळ गावाले. मिमेट, मीवा लोक्कुल्लुक, येसु किरिस्तुन कूस पोर्रो मोल्लां कोहकिसि हळकतिर गानि पेन ओन हातोर लोप्पोटाल मर्रा जीवाते तेहता

11 “मिमेट लोन दोहालय कबळक वायो इंचि पोहता बंडे, इंदके लोतुक अक्सरमाता बंडा आता, इंचि दर्मसास्त्रमते रासि मंता. अदे बंडा ई येसु आंदुर.✧

12 येसुना पोरोल तप्पा मब्बुना हिळु मनानोरा बोना पोरोले मनाकुन पापमताल पिसागोट्टो, इंका बोरे मनाकुन पिसागोट्टोर,” इंचि वेहतोर.

13 ओर पन्नुन आनि योहानुन हळसि इस्कुल करियवोर, सादा मनकालोर आंदुर इनकुतुर, गानि ओरा दैरेनेम हळसि इचंनम आतुर. अस्के ईर येसुनतोनित्ता आंदुर इंचि ओर्कुन एरपाट कीतुर.

14 बेस आता कुंठि ओरतोनित्ता मत्तद हळसि ओर्कु अड्डम बतल वळका पराहिल्लुर.

15 अदुनहाटी ओर पन्नुन आनि योहानुन इगेटाल पलाते होंट इंचि इत्तुर आनि वरोंक-वोर विचारम कियालय दल्गतुर गदा,

16 ई मनकालोर्कुन मनम बतल कीकोम? येस्सलेमते मनानुर अंतोर्क ईर कुंठिन बेस कीता चिन्ह एरपाटे, अदुन मनम निजम आयो इंचि इना परोम.

17 गानि इद पोर्ल्ले एक्को लोक्कुल्लुक तेळियामन्नि इत्ते ओर्कुन मनम, मिमेट येसुना पोरोल इंका बोना मुन्ने एतमट, इंचि वेराहकोम, इत्तुर.

18 अस्के ओर्कुन मर्रा केय्सि, “मिमेट येसुना पोरोलते बतले वळकमट, बतले कराहमट,” इंचि आदेस हीतुर.

19 गानि पन्नु आनि योहान, “पेनदा पोर्ल्ले केंजाका मीवा पोर्ल्ले केंजमळ इद पेनदा मुन्ने न्यायामेना? मिमेटे वेहाट्टु.

20 बदाय्ते मोमोट हळतोम, केंजतोम अदुन वेहाकोंटा मनमळ मावातोनित्ता आया परो,” इंचि इत्तुर.

21 अगा जर्गतदुन हळसि, अंतोर लोक्कुल्लुक पेनदा स्तुति कियालय दल्गतुर. अदुनहाटी लोक्कुल्लुकना वेंर्क ओर्क सिक्सा हियाका, ओर्कुन मर्रा वेराहचि होळसीतुर.

22 बोर मनकल अय्ते चमत्कार आसि बेस आतोर, आ मनकल नल्पै वर्साना पोर्रो मत्तोर.

पन्नु आनि योहान विस्वासुल्लुकनगा मल्लिस वातुर

23 पन्नुन, योहानुन होळसीतस्के ओर ओरा दंटातोरगा वापस वासि, पेद्दा पेर्मालोर्क, यहुदि पेद्दाल्क इत्ता पोर्ल्लें अंता ओर्कु वेहतुर.

24 ओर वेहतद केंजसि, ओर अंतोर कलियसि उंदे पेद्दा आवाजते पेनदुक पारतना कियालय दल्गतुर. “सामि! मब्बु, बूमि, समुद्रम आनि अबुना लोप्पो बतल अय्ते मंता, अबुन निमेन पुटिस्तिन.

* 4:5 दर्मसास्त्रम कराहना गुर् इर दर्म नियमते मनना पोर्ल्लें कराहंतुर. ✧ 4:11 बजन संहिता 118:22

25 नीवा पवित्र आत्माताहेंदाल नीवा सेवक, मावा एनकटा पेद्दा मनकल दाविद राजाना तोळदाल निमे इल्हा वेहतिन गदा, वेरे जाति लोकुल्लुक बारि लोल्लिन कीतुर? लोकुल्लुक वाट्टेदे अक्सरम हिल्वा पिलानकु बारि कीसेके?

26 ई बूमिपोरोटा राजालोर पेनदुक अड्डम लडाइहाटी तयार आतुर. राज्येम कियानोर अंटोर उंदि आसि, पेनदुक आनि दाना किरिस्तुंक अड्डम, आतुर.”*

27 “निजमे, निमे पेरकुंचि लोहचीता नीवा पवित्र सेवक येसुना विरोदमते हेरोद आनि पुंतुस पिलातुसगुडा वेरे जातितोरतोनि, इस्राएल लोकुल्लुकनतोनि कलियसि उंदि आतुर.

28 बारित्ते नीवा ताकत नीवा इच्छाते इल्हा जर्गना इंचि निमे मुन्नेने निरनायम कीतिन. अल्हेने जर्गसि पूरा आता.

29 अदुनहाटी, सामि! इंदके ओर वेराहसेक ह्ळा, नीवा पोल्ले दैरनेमते वेहालय सेवाकुल्लुकुंक बलम हीम.

30 रोगालुक बेस कियालय, नीवा पवित्र सेवक येसुना पोरोलते चिन्हां, इचंनमता कबाहक किये परालय नीवा कय हाहचि बलम हीम,” इंचि पारतना कीतुर.

31 पारतना कीतारित्ते, ओर जमा आसि मत्ता जेगा मेदुलता, ओर अंटोर पवित्र आत्माते निडिसोचि पेनदा पोल्ले वेरियाकोटा वेहालय दल्लुतुर.

विस्वासुल्लुक उंदि आसि मनुंदुर

32 विस्वासुल्लुक अंटोर उंदि मनसु, उंदि जीवा आसि मत्तुर. बोरन्ना आयि बदे सोम्मु, इद नावद इंचि इनाकोंदुर, गानि बोनगन्ना बतलन्ना मत्ते दान तूसकुनुंदुर.

33 येसु सामि हासि मर्रा जीवाते तेदतोर, इंचि ओना पेद्दा ताकतते प्रेरितुल्लुक गवाइ हियुंदुर. इल्हा ओर अंटोरपोरोटे पेनदा कुर्पा मत्ता.

34-35 ओरा लोप्पो बोनके बतल तक्को मनाहिल्ले. बूमि, लोहकु मत्तोर, अबुन अम्मिसि वाता कोत्तन तच्चि प्रेरितुल्लुकुंक हियुंदुर. बोन्क बच्चोर गरज मंता अच्चोर तूसि हियुंदुर.

36 साइप्रस दीबेते पुटता योसेप इनना लेवि वंसमतोर वरोर मत्तोर. ओन्क प्रेरितुल्लुक बरनाबास इंचि पोरोल दोस्तुर. बरनाबास इत्ते “अंटोर्कुन समत कियना मनकल” इंचि अर्तम.

37 ओर ओना नेलितुन अम्मिसि वाता कोत्तन अंता प्रेरितुल्लुकुंक हीतोर.

5

हनन्या आनि सपीरा

1 हनन्या पोरोलतोर वरोर मनकल अल्हेने ओना मुत्तो सपीरा, ईर इव्वुर कूळसि ओरदे इच्चो बूमितुन अमतुर.

2 वाता कोत्तानाल इच्चुं कोत्तां इरकुत्तोर इंचि ओना मुत्तोंक एर्के मत्ता, कडमता कोत्तां ओसि प्रेरितुल्लुकुंक हीतोर.

3 अदुन ह्ळसि पत्रु, “हनन्या! निमे बूमि अमता कोत्तानाल इच्चुं कोत्तां इरकुत्तिन. अयते पवित्र आत्मातोनि आबद्दम वळकालय नीवा मनसुने देय्यम बारि होळियता?

4 आ बूमि अम्मका मुन्ने नीवदे मत्ता गदा! अम्मुतंकागुडा वाता कोत्तन पोरोटे नीवदे अदिकारम मत्ता. अयनागानि पेनदुक इस्टम हिल्लवद कबळ कियालय नीवा मनसुने बल्हा वाता? निमे मनकलोरतोनि आयो गानि पेनतोनि आबद्दम वळकतिन,” इंचि इत्तोर.

5 ई पोल्ले केंजतारित्तेन हनन्याल हिळ अर्सि जीवा होळसतोर. अचोने आयका ई पोल्ले केंजतुर अंटोर्क पेद्दा वेरे दल्लता.

6 अस्के लेय्युर्क तेदसि ओन्क कपडि ह्ळसि* पलाते ओसि बोदा दोस्तुर.

7 दगोर-दगोरा मूड गंटां आतंका ओना मुत्तो लोप्पो वाता. अगा बतल जर्गुता दान्क तेळिया हिल्ले.

8 अस्के पत्रु अद वातद ह्ळसि, “मीवा बूमि इच्चोट्टेके अमतोरा वेहा!” इंचि तल्कतस्के, “आ इच्चोट्टेके अमतोम,” इंचि अद इत्ता.

9 पत्रु दान मर्रा, “मिमेट इव्वुर सामिना आत्माता परिकसा बारि ह्ळालय दल्लतिर? ह्ळा नीवा मुय्दोन बोदा दोस्तोर गलमातगेन एवतुर, ओर नीकुन इंका अल्हेने ओयानुर.” इंचि इत्तोर.

10 ओर अल्हा इत्ता इन्मळे अद ओना कालुकुन मुन्ने अर्सि अल्हेने जीवा होळसीता.† पजा दाना मुय्दोन बोदा दोस्ता लेय्युर्क लोप्पो वासि ह्ळतस्के अद मुरतळ हासि दिसता. ओर दान इंका तेहकुंचि ओसि दाना मुय्दोना पक्काते बोदा दोस्तुर.

11 अस्के येस्सलेमता कलिसियातोर अंटोर, ई पोल्ले बोर अयते केंजतुरो ओर अंटोर बागा वेरियतुर.

प्रेरितुल्लुकना कयदे इचंनमाता कबाहक

12 अल्हेने प्रेरितुल्लुकना कयदाल वेल्ले चिन्हां, इचंनमता कबाहक लोकुल्लुकना मुन्ने आयुंदुं. विस्वासुल्लुक अंटोर गुळिते सुलेमान राजाना पंदिरतगा बस्केळक उंदि मनसुने जमा आयुंदुर.

13 अविस्वासुल्लुक ओरतोनि कलियालय वेरियुंदुर, गानि विस्वासुल्लुकना बेस कदर कियुंदुर.

* 4:26 बजन संहिता 2:1-2 * 5:6 कपडि ह्ळसि अद कालमते हाता मनकन कपडि ह्ळसि बोदा दोसुंदुर. † 5:10 अल्हेने जीवा होळसीता हनन्याल आनि सपिरल बूमि अमता कोत्तां पूरा हीतोम इंचि आबद्दम वळकतुर इंचि सिक्सा दोर्कता.

14 अयना वेल्लेन मंदि मुर्ताहक-मांडसा सामिन विस्वासम कीसि ओरगा वासि कलियुंदुर, इल्हा एक्कोते एक्को मंदि बेरस्सेक होत्तुर.

15 प्रेरितुल्लुकुना कबाहक हळसि लोकुल्लुकु बिमार मत्तोर्कुन कटुल्लुकुने, केत्तिने पन्नु होनना हर्दागा तच्चि ईरुंदुर. पन्नु होननेके ओना नीडायना बिमारतोर पोर्री अरते ओर बेस आयनुर इंचि लोकुल्लुकुना आसे मनुंदु.

16 अचोने आयका येस्सलेम सहरता पक्का पीसि मत्ता नाहकुनाल वेल्लेदुर बिमार मत्तोर्कुन, देय्याल्लुकु पीतोर्कुन अगा पीसि वायुंदुर. ओर अंतोर प्रेरितुल्लुकुना कयदे बेस आयुंदुर.

प्रेरितुल्लुकुन जेलने वाटमळ

17 अस्के पेद्दा पेर्माल, ओनातोनि मत्ता सदुकिर्क, प्रेरितुल्लुकुन हळसि ओरा मनसु मसुलुंदु.

18 अदुनहाटी प्रेरितुल्लुकुन पीसि जेलने वाटतुर.

19 गानि अदे नर्का उंदि पेनदा दूता वासि जेलना तल्पु तेंडसि ओर्कुन पलाते ओता.

20 ओसि, “होंटु, गुळिते नित्तिसि ई पूना पिस्वरता अन्नि पोर्ल्लें अंतोर लोकुल्लुकुं वेहादु,” इंचि ओर्कु वेहता.

21 पेनदा दूता वेहतद केंजसि ओर पोळ्दु पेयसतंका गुळिते होंचि लोकुल्लुकुं कराहलय दलगतुर. हीके, पेद्दा पेर्माल आनि ओना दंटातुर, इस्राएलता अंतोर पेद्दाल्लुकुन पंचादिते केय्सि, प्रेरितुल्लुकुन जेलनाल तायालय लोहतुर.

22 गानि सिपाइल्लुकु जेलने होंचि हळतस्के अगा प्रेरितुल्लुकु मना हिल्लुर, अदुनहेंके ओर मल्लिस वासि,

23 “जेलता तल्पुकुं अयते तालम वाटसि मत्ता. सिपाइल्लुकुगुडा गलमानगा नित्तिसि मत्तद मोमोट हळतोम, गानि तल्पु तेंडसि लोप्पो हळतस्के लोप्पो बोरे मना हिल्लुर,” इंचि वेहतुर.

24 गुळितगा कावेल कियानोरा अदिकारि आनि पेद्दा पेर्मालोर इद केंजसि, “इंदके बतल आयार” इंचि वेल्ले विचारम कियालय दलगुतुर.

25 अस्के बोरो वरोर मनकल वासि, “हळट, मिमेट जेलने वाटतुर गुळितगा नित्तिसि लोकुल्लुकुं येसुना पोर्ल्लें कराहसेक मंतुर.” इंचि वेहतोर.

26 अस्के आ अदिकारि, गुळिता कावेल कियानोर्कुन पीसि गुळितगा होत्तोर. होंचि, लोकुल्लुकु मापोर्री बंडा हुक्सि हक्कानुर इत्ता, वेंरिंते ओर्कुन बतले बल्लिम कियार्कोटा पंचादितगा तत्तोर.

27 ओर्कुन पीसि तच्चि पंचादिता मुन्ने निलाहतोर. अस्के पेद्दा पेर्माल ओर्कुन,

28 “ई येसुना पोरोलते कस्सहमट इंचि मोमोट मीकु कडक आदेस हिच्यिना गानि मिमेट पूरा येस्सलेम अंता ओना पोरोलते कराहतिर. अचोने आयका ओन मोमोटे हळतोम इंचेके मावा पोर्री तपु दोसालय हळसेक मंतिर,” इंचि इत्तोर.

29 अदुनहाटी पन्नु, कळमता प्रेरितुल्लुकु, “माकु मनकालोरा पोर्ल्लें आयो, गानि पेनदा पोर्ल्ले केंजा पीता.

30 मिमेट येसुन कूस पोर्री वेलाड वाटसि हळकतिर गानि मावा पेद्दाल्लुकुना पेन ओन हामुरताल मर्रा तेहता.

31 हामुरताल तेहचि ओने पेन, राजाल आनि पिसागोटनोर इंचि निलाहता. मावा इस्राएलता दादालोर्कुं मनसु मार्सकुनालय, पापाल्लुकुनाल मापि कियालय पेनदा तिना बाजुं ओन कदर हीसि उपिस्ता.

32 इव अन्नि पोर्ल्लेनहाटी मोमोट गवाइ मंतोम. पेनदा पोर्ल्लें केंजसि ताकानोराहाटी पवित्र आत्मागुडा गवाइ मंता,” इंचि इत्तुर.

गमलियेल पेद्दा पंचादिता लोकुल्लुकुन सांत कीतोर

33 ओरा पोर्ल्लें केंजसि, आ पंचादिता पेद्दाल्लुकुं होंग वासि ओर्कुन हळकना विचारम कीतुर.

34 गानि पंचादिता गमलियेल पोरोलतोर वरोर परिसि, ओर मूसाना नियमता गुरुजीगुडा मत्तोर, ओन अंतोर कदर कियुंदुर. ओर तेदसि प्रेरितुल्लुकुन गडसेम पलाते ओयालय वेहतोर.

35 ओर्कुन पलाते ओतस्के, ओर पंचादिता मुन्ने, “मावा इस्राएलता लोकुल्लुकुनिटा! मिमेट ओर्कुन बतल कींतोम इंचंतिरो, बेस विचारम कीसि कीम्पु.

36 बारित्ते कोन्नि रोजकु मुन्ने तियुदास पोरोलतोर वरोर मनकल, ‘नना पेद्दोन’ इंचि वेहकुत्तोर. ओना पज्जो नालुं नुहकुना मंदि इंका मत्तुर. गानि ओन हळकतुर, अस्के ओना पज्जो ताकानोर अंतोर बेंदोर-हेके पायसि होत्तुर.

37 अद आता पज्जो सिरगतिता वेलाते गालिल एरियाता यहदल इनानोर वातोर. ओर इंका वेल्लेने लोकुल्लुकुन ओनाहेके कीकुत्तोर गानि ओन इंका हळकतुर. ओना पज्जो ताकानोर अंतोर बेंदोर-हेके पायसि होत्तुर.

38 अदुनहाटी इंदके इंका नना मीकु वेहसेक मंतन, मिमेट पीतोर्कुन बतले कियमट, ओर्कुन होळसीम्पु. ओरां विचाराल्लुकु, ओरां कबाहक मनकानव मनानयते मायसि दांतां.

39 गानि पेनदाहेंदाल मनानयते दान मिमेट आपा परिर, मिमेट आपालय हळते मात्रम पेनदुक अड्डम आंतिट,” इंचि इत्तोर.

40 अस्के पंचादितोर, गमलियेलना पोर्ल्ले केंजतुर. पजा प्रेरितुल्लुकुन लोप्पो केय्सि ओर्कुन पोर्टेटे तन्ना वेहचि, येसुना पोरोलते बगगेन वेहमटु इंचि वेहचि होळसीतुर.

41 प्रेरितुल्लुकुन होळसीतस्के, येसुना पोरोलताहाटी मोमोट देब्बां तित्तोम, इंचि बेस आनंदमते पंचादिताल पेय्सि होत्तुर.

42 रोज गुळितगा, लोन-लोन होंचि, येसु ईरि किरिस्तु आंदुर इंचि पेनदा बेसता कबुर वेहामळ, कराहमळ होळसा हिल्लुर.

6

एडुरकुन पेरकुनमळ

1 इल्हा विस्वासुल्लुक वेल्लेन बेस्सेक होतुर. अयते अवे रोजकुने युनानि बासा वळकाना यहुदिल्लुकु, इब्रानि बासा वळकाना यहुदिल्लुकुनतोनि, “रोज हिय्यना गाटोता बारेमते मावा मुंडामोस्ता मुरताहकुनहेके बेस हळसेक हिल्लिर,” इंचि जगडम दोस्तुर.

2 अस्के आ पन्नेड मंदि प्रेरितुल्लुक अंतोर विस्वासुल्लुकुन उंदगा केय्से, “पेनदा पोल्लें कराहमळ पक्कक इरसि गाटो पंचि तासेक मनमळ मावाहाटी बेस आयो.

3 अदुनहाटी नावा विस्वासुल्लुकुनिटा! मिमेट मीवळेटाले बेस कदर, बुद्धि आनि पवित्र आत्माते निडिस मत्ता एडुर मांडसातुन पेरकुंट. मोमोट ओर्कुन ई कबळ पोरो इरीतोम.

4 अस्के पारतना, पेनदा पोल्लें कराहना मावा सेवा कबळ आगाकोटा जर्गसेक मनंता.” इंचि वेहतुर.

5 इद पोल्ले अंतोर्कुंक नच्चुताहेंका ओर विस्वासमते, पवित्र आत्माते निडिस मत्ता स्तिपन इनानोन पेरतुर. ओन वरोने आयका पिलिपुस, परकोरस, निकानोर, तिमोन, परमिनास आनि अंताकिया नाटेना निकोलस (ईर ओना जाति होळसि यहुदि जातिते वातोर) पोरोलतोर्कुन पेरतुर.

6 पजा ईर एडुरकुन प्रेरितुल्लुकना मुन्ने निलाहतुर. अस्के प्रेरितुल्लुक ओरपोरो कय इरसि पारतना कीतुर.

7 इल्हा पेनदा पोल्ले वेल्लेन मंदिक एवसेक होत्ता. येस्सलेमते विस्वासुल्लुकगुडा वेल्लेन आतुर. अचोने आयका वेल्लेन मंदि यहुदि पेर्मालोर्कुगुडा विस्वासमते वातुर.

यहुदिल्लुक स्तिपनुन पोरो एकरेवुल्लुक वेहांतुर

8 पेनदा कुपांते, ताकतते निडिस मत्ता स्तिपन लोकुल्लुकुना मुन्ने पेद्दा-पेद्दा इचंनमता कबाहक, चिन्हां कियुंदुर.

9 गानि स्वतंत्रम दोर्कुता यहुदि लोकुल्लुकुना* दर्मसास्त्रम कराहना लोताल इच्चुर लोकुल्लुक वासि स्तिपनुनतोनि जगडम दोसकुत्तुर. आ लोकुल्लुकुने कुरेनि, सिकंदरिया इनना सहरकुने मनना यहुदि लोकुल्लुक आनि किलिकिया, आसिया इनना एरियान पीसि मनना यहुदिल्लुकु मत्तुर.

10 गानि वळकानाहाटी पवित्र आत्मा स्तिपनुंक तेल्चि हीता. अदुनहाटी आ लोकुल्लुक ओना पोल्लेंक अड्डम वळका पराहिल्लुर.

11 पजा आ यहुदि लोकुल्लुक वैरेतोरक तेळियाकोटा इच्चुर लोकुल्लुकुंक लंचम हीसि, स्तिपन, मूसानद आनि पेनदा अपमानम आयना पोल्लें वळकानेंके मोमोट केंजतोम, इल्हा आबद्दम वळकालय वेहतुर.

12 अल्हेने ओर अगाटा लोकुल्लुकुन, यहुदि पेद्दाल्लुकुन, दर्मसास्त्रम कराहना गुल्लुकुनगुडा एक्किस्तुर. अस्के ओर स्तिपनुन दोर्कापीसि यहुदिल्लुकुना पेद्दा पंचादिते तत्तुर.

13 अयते आ पंचादिते लंचम तित्ता गवाइदार्क निलसि, “ई मनकल पवित्रमाता जेगा इत्ते गुळिता बारेमते इंका मूसाल वेहता नियमता बारेमते तप्पुड पोल्लें बस्केळक वळकसेक मनांतोर.

14 बारित्ते, नासरेत नाटेना येसु इद गुळितुन कूलाह्चि नासडेम कियानुर आनि मूसाल वेहता रीति-रिवाजकुन बदलांचनुर, इंचि वेहनेके मोमोट केंजतोम” इल्हा गवाइ हीतुर.

15 अस्के अगा पंचादिते उद्दिदिस मत्ता अंतोर लोकुल्लुक स्तिपनुनहेके बागा हळतुर. अयते ओर्कु स्तिपनुना मोकम पेनदा दूताता मोकमलेहका दिसता.

7

स्तिपनुना बासन

1 पजा पेद्दा पेर्मांल, “ईर वेहना पोल्लें निजमेना?” इंचि स्तिपनुन पूसकींतोर.

2 अस्के स्तिपन ओर्कु इल्हा वेहालय दलगुतोर, “नावा दादालोर आनि बाबानसोटा पेद्दाल्लुकुनिटा! नना वेहनद केंजट. मना एनकटा पेद्दा मनकल अब्राहाम मातरल मेसोपोटामिया देसेमतुन होळसि हारान इनना सहरते हेराका मुन्नेन पेन दाना महिमाते ओन्क दिसता.

3 दिस्सि, निमे नीवा देसेमतुन, नीवा जीवातोर्कुन होळसिसि नना नीकु हुपिचना देसेमते होन, इंचि ओन्क वेहता.

4 अस्के अब्राहाम कसदिल्लुकुना देसेम होळसि हारान एरियाते होंचि मनालय दलगुतोर. ओना बाबाल हासोत्तंका पेन ओन अगटाल इंदके मिमेट मनना ई देसेमते लोहता.

5 अयना पेन इगे ओन्क अळगुमेड बूमिगुडा हिय्या हिल्ले. गानि ओन्क संतानम हिलुवा रोजकुनेगुडा पेन, ई देसेमतुन, ई बूमितुन नीकु हीतन, नीवा पज्जोटाल वायाना नीवा वंसमतोर्कुंक हीतन, इंचि ओन्क पोल्ले हीता.”

6 “अचोने आयका पेन ओनातोनि, नीवा वंसमतोर वैरे देसेमते होंचि मनांतुर, अगाटा लोकुल्लुक नीवा वंसमतोर्कुन नालुं नुहकुना वर्सानदाका गुलामगिरिते इरसि, वेल्ले तकलिप हींतुर.

7 गानि बोर अयते नी वंसमतोर्कुन गुलामगिरिते इरंतुरो ओर्कु नना सिक्सा हीतन, पजा नीवा लोकुल्लुक अगटाल पेय्से वासि इद जेगाते नाकु पूजा कियानुर, इंचि वेहता.”

* 6:9 स्वतंत्रम दोर्कुता यहुदि लोकुल्लुक यहुदिल्लुकुना गुलामगिरिताल पेयसता यहुदि लोकुल्लुक. ईरद वैरे उंदि दर्मसास्त्रम कराहना लोन मत्ता.

8 “पजा पेन अब्राहामुनतोन कतना* इनना उंदि करार कीता, अदुनहाटीं अब्राहामुंक इसहाक पुटतस्के ओर एनमिदि रोजकुनोर मनानेकेन ओना कतना कीतोर. इल्हेन इसाकुंक याकोब पुटतोर. पजा याकोबुंक पन्नेंडु मंदि मर्कु पुटतुर. ईरद अंटोरदगुडा कतना आता. इल्हा ई पन्नेंड मंदि मर्कुनाले मुन्ने इस्राएलता पन्नेंड वंसाळुकु तयार आतां. ईर ई पन्नेंड वंसाळुकुना मोदोल मनकालोर आतुर.”

9 “याकोबुना मर्कु ओराव्टेताल योसेप इनानोन पोर्री अळंदुर. अदुनहाटीं ओर ओन इजिप्त देसेमते गुलामगिरि कियालय अमतुर, गानि ओना पेन ओन्क सायता मत्ता.

10 ओन अन्नि कस्टालुकुनाल दक्किस्ता. इका पेन ओन्क बेस बुद्धि हीता. पेन हीता बुद्धिदोन ओर इजिप्त देसेमता पिरोन राजाना मनसु गेल्सुकुत्तोर. पजा इजिप्त देसेमता पिरोन राजाल ओना देसेमपोर्री, ओना राजवाडानपोर्री अदिकारि इंचि इरतोर.”

11 “अच्चोटेन कनान आनि इजिप्त देसेमते पेद्दा करवु अर्सि लोकुलुकु इरगा कस्टालुकुने अरतुर. इका मना एनकटा पेद्दालुकुंक तिनालय बतल दोर्काकोटा आता.

12 इजिप्त देसेमते गाटो मंता इंचि तेळियतस्के याकोब मना एनकटा पेद्दालुकुन अगा मोट्टा-मोदाटा मल्का लोहचीतोर.

13 ओर रोंडो मल्का होतस्के योसेप ओना बारेमते ओना दादालोर-तम्मुहकुंक वेहतोर. अस्केन पिरोन राजांकगुडा योसेपना कानदानता बारेमते एरपाट आता.

14 अस्के योसेप ओना बाबाल याकोब आनि कानदानता अंटोर्कुन इत्ते पूरा डेब्बै हेय्युर मंदितुन इजिप्तते केया लोहतोर.

15 अस्के याकोब इजिप्त देसेमते होतोर. अग्गेन याकोब आनि मना अंटोर एनकटा पेद्दालुकु इका हातुर.

16 पजा ओरा पीनगुलुकुन इस्राएल देसेमता सेकेम इनना सहर ओसि, अगा हामोर इनना मनकना मर्कुनहेंदाल नगदि कोत्तां हीसि अब्राहाम उंदि बोदा अस्सि मत्तोर, अदे बोदाते ईरदगुडा गति कीतुर.”

17 “अब्राहामुंक पेन हीता पोल्ले पूरा आयना वेला दग्गेर्क एव्ता, अस्के इजिप्त देसेमते मना लोकुलुकु वेल्लेन आतुर.

18 कोन्नि रोजकु आतारित्ते योसेपुन बारेमते बतले एरपाट हिल्लुवा बोरो वरोर दुस्ट मनकल इजिप्त देसेमता राजाल आतोर.

19 ओर राजाल मना लोकुलुकुंक वेल्ले तकलिप हीतोर. मना लोकुलुकुना पिलालुकु पिसा मन्नि इंचि ओर्कुन पलाते पोहचियालय वेहतोर.”

20 “अदे कालमते मूसाल पुटतोर. पेनदा नदरते आ पेडल सक्कगा मत्तोर. आ पेडल मूड नेलुकु ओना बाबाना लोते मत्तोर.

21 पजा बस्के अयते आ पेडन ओना तल्लुर-बाबो पलाते होळसीतुरो अस्के पिरोन राजाना मिय्यड ओन तेहकुंचि ओसि, दाना मर्रिनलेसीं पोस कीता.

22 मूसाल इजिप्त देसेमता बेसता विद्दे कराहमळ जर्गुता. मूसाल पोल्लेने आनि कबळते रोंडुने इका बेस हुसार मत्तोर.”

23 “ओर नल्चै वर्सानोर आतोर अस्के ओना लोकुलुकुंक इत्ते इस्राएलना लोकुलुकुंक होंचि कलियना मनसु आता.

24 पजा अगा होततस्के इस्राएल लोकुलुकुनाल वरोन मनकनपोर्री इजिप्त देसेमता वरोर मनकल अन्यायम कियानद हळतोर. हळसि आ अन्यायम कियना इजिप्त मनकन हळिसि आ इस्राएल मनकन कापाळसि ओना बदला एततोर.

25 इस्राएल लोकुलुकुन पिसागोटनाहाटीं पेन ओन वाळकुंचंता इत्ता संगतितुन ओना लोकुलुकु एरपाट कीतुर इंचि ओर इन्कुत्तोर, गानि अद ओर्क तेळिया हिल्ले.

26 इंकुंदि रोजु ओना लोकुलुकुनाले बोरो इव्वुर मनकालोर उर्रि अर्रनद हळसि ओर्कुन कल्पना उद्देसमते, अरे मिमेट बसंटा मनकालोर आंदिर? दादल-तम्मुहक आसिगुडा, वरोनपोर्री वरोर अन्यायम कीसंतरि! इंचि ओर्कुन इत्तोर.

27 अस्के ओना पक्कातोनापोर्री अन्यायम कीसेके मत्ता मनकल मूसन पक्कक दोब्बिसि, माकुन जगडमताल पापसि, मावा न्यायम कियना अदिकारम नीकु बोर हीतोर?

28 निन्ने आ इजिप्त मनकन हळुकुताप, नाकुनगुडा हळकतन इनकुंचंतिना?” इत्तोर.

29 इद पोल्ले केंजसि मूसाल इजिप्त देसेम होळसिसि मिदान देसेमते पेय्सि होतोर. अगा होंचि वरोर पराय देसेमतोनलेसीं पिसालय दल्लुतोर. अग्गेन मर्रिमि आतोर, अस्के ओन्क इव्वुर मर्कु पुटतुर.

30 इल्हा नल्चै वर्सा आसि होत्तां. अयते उंदि रोजु मूसालु सिनाइ इनना गुट्टा दग्गेरा बय्लि जेगाते पोत्तना पोदाता लोप्पो उंदि पेनदा दूता दिसता.

31 अदुन हळसि मूसाल इचंन्रम आता. दग्गेर्क होंचि बेस हळकोम इंचि मुन्नेळुकु अळगु वाटनपेडकु ओन्क पेनदा अल्लिकर केंजावाता.

32 पेन मूसनतोन, नना नीवा एनकाटोरा तादो-बाबुरा पेनदुन आंदुन, इत्ते नना अब्राहाम, इसाक, याकोबना पेनदुन आंदुन, इंचि वळुकुतोर. अस्के मूसाल इरगा वेरियकुत्तोर. ओन्क तला तेहचि पोर्रीळुकु हळना हिम्मत आयाहिल्ले.

33 अस्के पेन ओन, निमे नित्तिसि मनना जेगा पवित्र जेगा आंदु. नीवा कालुकुना हेरपुहक तेंडा.

34 इजिप्त देसेमते मनना नावा लोकुलुकुना तकलिप नना हळतन, ओरा अळमळ नना केंजतन. इंचि ओर्कुन कस्टालुकुनाल तेंडानहाटीं नना हिळु रेयतन. अयते वा! इंदके नना नीकुन मर्रा इजिप्त देसेमते लोहंतन. इंचि इत्ता.*

35 बा मूसन अयते इस्राएल लोकुलुकु, माकुन जगडमताल पापसि, मावा न्यायम कियना अदिकारम नीकु बोर हीतोर? इंचि हय्साकोटा पकाक दोबसीतुरो, आ मूसाने पेन पोत्ताना पोदाते दिसता पेनदा दूताता हेंदाल ओरा राज्येम कियानोर आनि पिसागोटनोर इंचि लोहता.

* 7:8 कतना इद पद्दत मुसलमान आनि यहूदिलुकु लोकुलुकु कीतुर. ✨ 7:34 निर्गमन 3:2-10

36 इल्हा मूसाल, एर्ग समुद्रम आनि बय्लि जेगाते नल्पै वर्सनदाका इंचत्रमता कबाहक कीसेक, चिन्हां हुप्पिचेक आ लोकुल्लुकन इजिप्त देसेमताल पलातुक पेचाहचि तत्तोर.

37 ईर, ओरे मूसाल आंदुर, बोर अय्ते इस्राएलना लोकुल्लुकन, पेन मीहाटी मीवा लोप्पोटाले वरोन नावसोंटा पेनदा कबुरतोन लोहंता, इंचि इत्तोर.*

38 मना इस्राएल लोकुल्लुक बय्लि जेगाते मत्तस्के ओरतोन कलियसि मत्तोर ईरे मूसाल आंदुर. इंका सिनाइ गुट्टापोर्री पेनदा दूतातोन ईरे मूसाल वळ्ळुत्तोर. अचोने आयका पेन दाना पिस्वर हियना पोल्लेन मनाकु एवसानाहाटी बोन्क अय्ते हीतानो ओर ईरे मूसाल आंदुर.

39 गानि मना एनकटा पेद्दाल्क मात्रम ओर वेहताप ताकालय तयार मना हिल्लुर. मर्रा ओरा मनसु इजिप्त देसेमताहेकेन तिरियता.

40 अस्के आ लोकुल्लुक वरोर हास्न† इनानोनतोन, माकुन इजिप्त देसेमताल पलाते तत्ता आ मूसांक बतल आतानो माकु बतले तेळियसेक हिल्ले. अदुनहाटी मावा मुन्ने ताकालय पेनकु तयार कीम, इंचि इत्तुर.

41 पजा ओर अंतोर कलियसि पेय्यातसंटा उंदि बोम्मा तयार कीसि, आ बोम्मक मोक्कुल्लुक हियालय दल्गुतुर. आ बोम्मातुन ओरे तयार कीता कुसिते दाना मुन्ने पेद्दा पंडुगु कीतुर.

42 दानहाटी पेन ओरा हेकेटाल मोकम तिराहकुंचि, मब्बुने मनना पोडदुन, वेडसितुन, सुक्काना पूजा कियालय ओर्कुन कुल्ला होळसीता. इदुन बारेमते पेनदा कबुरतोर पुस्तकमते,

“ए इस्राएल लोकुरिता, मिमेट नल्पै वर्सनदाका,

बय्लि जेगाते मोक्कुल्लुक, पूजे नावाहाटी कीतिरा? हिल्ले.

43 मिमेट मोलेक इनना पेनदा डेरा आनि

मीवा रिपान‡ इनना सुक्का पेनदा बोम्मातुनगुडा मीवातोन ओतिर.

मिमेट मोळकानाहाटी मिमेटे तयार कीकुत्ता अन्नि बोम्मां ओतिर.

अदुनहाटी नना मीकुन वेल्लेन लक्कु मनना,

बेबिलोन सहरकन्ना हब्बेर लोहांतन.”*†

इंचि रासि मंता.

44 मना एनकटा पेद्दाल्क केडाते मत्तस्के ओरगा उंदि गवाइता डेरा§ मत्ता. अद डेरा मूसाल तयार कीता डेरे आंदु. अद डेरा तयार कियाका मुन्ने पेन मूसांक उंदि डेराता नमुना हुप्पिचि, अद मत्तापे तयार कीम, इंचि आदेस हीता.*

45 मना एनकाटोरा मुन्नेटाल पेन पेचाहचि गेदुमता वेरे जातितोरा बूमितुन मना लोकुल्लुक, जोसुवाल इनना वरोर मनकन मुन्ने अरहचि एतकुत्तुर. अस्केगुडा इद डेरा ओरगा मत्ता. अद डेरा दाविद राजाना कालमदाका ओरगेन मत्ता.

46 दाविद राजांक पेन आसिर्वादि हीता, अदुनहाटी ओर याकोबुना पेनदाहाटी*† उंदि गुळि दोहाना इंचि आसे पडतोर.

47 गानि पेनदाहाटी गुळि अय्ते सुलेमान राजाल दोहतोर.

48 बच्चो बतल अय्नागानि पेन मनकल दोहता गुळिते मन्नो. बारित्ते इदुन बारेमते पेनदा कबुरतोर इल्हा रासतोर.

49 “पेन इत्ता, स्वर्गम नावा राजगद्दे† आंदु, ई बूमि नना काल्क ईरना पीटे आंदु.

अय्ते मिमेट नावाहाटी बसोंटा गुळि दोहा परांतिर?

नावा आराम किय्यना जेगा बल्हा मंदार?

50 इव अन्नि नावा कय्दे कीतवे आयोंगा!”*†

51 अरे पिस्सा लोकुरिता, मीवा मनसु बारे वेरे जातितोरा मनसुन लेहका मंता, मीवा केव्व बारे पेनदा पोल्लें केंजाकोटा डोप्पां अरसोत्तां. मिमेट बस्केळ्ळक पवित्र आत्मातुन पक्काक दोबसेके, इंदके मिमेटगुडा मीवा एनकटा पेद्दाल्लुकुनालेसी कीसतिर.

52 मीवा पेद्दाल्क तकलिप हियाकोटा पेनदा कबुरतोन वरोनगुडा होळसा हिल्लुर. वरोर नीतिमंतुड वायानोर मंतोर, इंचि वेहानोर्कुन मीवा एनकटा पेद्दाल्क हक्कतुर. इंदके मिमेट बारे, ओर बा नीतिमंतुना बारेमते वेहचि मत्तुरो आ नीतिमंतुन दोकाते पीसि हक्कतिर.

53 पेनदा दूतानाहेंदाल मीकु मूसाना नियम अय्ते दोर्कुता, गानि मिमेट दाना परकारम ताका हिल्लिर.

स्टिपनुन हक्कतुर

54 ओना पोल्लें केंजसि पंचादिते मत्ता पेद्दाल्क वेल्ले होंगुंक वासि, ओनाहेके हळसि पटपटा पल्कु कोर्कालय दल्गुतुर.

55 गानि पूरा पवित्र आत्मातोन निडिस मत्ता आ स्टिपन स्वर्गमताहेके हळतोर. अस्के ओर पेनदा महिमाता वेल्लुन आनि पेनदा तिना बाजुंक नित्तिसि मत्ता येसुन हळतोर.

56 हळसि, “हळ्ळाट! स्वर्गम बय्यर आयानद आनि मनकना रूपमते पुटता पेनदा मर्री पेनदा तिना बाजुंक नित्तिसि मत्तद नना हळसंतन,” इंचि ओर इत्तोर.

* 7:37 व्यवस्ताविवरन 18:15 † 7:40 हास्न ईर मूसाना दादाल आंदुर. ‡ 7:43 रिपान इद उंदि पेनदा पोरोल आंद. ✧ 7:43 आमोस 5:25-27 § 7:44 गवाइता डेरा इत्ते इद डेरा ओरतोन मत्ते पेन ओरतोन मंता इंचि ओरा गवाइ. ✨ 7:44 निर्गमन 25:9; 25:40 * 7:46 याकोबुना पेनदाहाटी इद पोल्लेता जेगाते बवो-बवो बायबलकुने “याकोबुना लोकुल्लुकनाहाटी” इंचि मंता. † 7:49 राजगद्दे राजाल उद्दना कुर्सितुन राजगद्दे इत्तुर. ✨ 7:50 यसायाह 66:1-2

- 57 अस्के आ मंदि केव्क मुचकुंकि, जोरसे वरगेयसेके अंतोर उंदेदम ओनपोर्री वासि अरतुर.
 58 ओन इग्गिसेक नाटेन पलाते ओसि बंडाने तनालय दल्गुतुर. इद जर्गनदान हळता गवाइदार्क ओरा कपडिं तेंडसि साऊल इनना वरोर लेय्योना काल्कुन मुन्ने इरतुर.
 59 लोकुल्लक बंडाने तनानेके स्तिपन, “येसु सामि, नावा आत्मातुन निमे एतकुन.” इंचि पारतना कीतोर.
 60 पजा ओर टोंगरां ऊनसि, “हे सामि, ई पापम ईरापोर्री तासुमा,” इंचि जोरसे वरगेयसि, कळ्क मुचतोर. इल्हा साऊलगुडा ओना हामुरते पोत्तु आतोर.

8

विस्वासुल्लुकुंक कस्टाल्क वांता

- 1 अवे रोजकुनाल येस्सलेमता कलिसियातोरपोर्री पेदूदा कस्टाल्क वायालय सुस्व आता. प्रेरितुल्लुकन होळसि कळमातोर अंतोर विस्वासि लोकुल्लक यहूदिया, सामरिया एरियाता नाहकुने बेकेटोर हेके सिल्लर-सल्लर आतुर.
 2 बोरो इच्चुर विस्वासुल्लक स्तिपनुन गति कीसि ओनाहाटीं वेल्ले दुक्कमते मत्तुर.
 3 साऊल बारे कलिसियातोरकुंन तकलिप हियमळ सुस्व कीतोर. ओर लोन-लोन होंचि मुर्ताहक इनाका मांडसा इनाका अंतोरकुंन इग्गिसि ओसि जेलने वाटालय दल्गुतोर.
 4 गानि सिलर-सिलर आसि होत्ता विस्वासि लोकुल्लक मात्रम बगा-बगा अयते होत्तुरो अगा-अगा ओर लोकुल्लुकुंक पेनदा बेसता कबुर वेहुंदुर.

पिलिपुस सामरियाते होंचि येसुना बारेमते वेहांतोर

- 5 पिलिपुस इनना वरोर बक्तुड सामरिया सहरते होंचि अगाटा लोकुल्लुकुंक किरिस्तुना* बारेमते वेहामळ सुस्व कीतोर.
 6 पिलिपुस कीता चिन्हां हळसि लोकुल्लक ओर वेहाना पोल्लेन मनसु ताससि केंजतुर.
 7 वेल्लेन मंदिक देय्याल्लक पीसि मत्तां, आ देय्याल्लक इंका इरगा मोत्कुंचेके पलाते पेय्सि विततां. अचोने आयका अगा वेल्लेन मंदि कुंटोर्क, कय-काल्क अरसोनना रोगमतोरगुडा मत्तुर, ओर अंतोरगुडा बेस आतुर.
 8 अदुनहाटीं अद सहरते आनंदमे आनंदम मत्ता.
 9 अद नाटे सिमोन पोरोलतोर वरोर मनकल मनुंदुर. ओर होदें-मंत्राल्लुकुना बलमते इचंत्रमाता कबाहक कीसि, नाके एक्को तेळियंता, इंचि वेहकुंचेके सामरिया सहरता लोकुल्लुकुन इचंत्रमते अरहुंदुर.
 10 सिन्नाल्लक, पेदूदाल्लक अंतोर, “पेनदा पेदूदा ताकत इत्ते ईर आंदुर,” इनकुंकि, ओना पोल्लें केव ताससि केंजुंदुर.
 11 बारित्ते ओर वेल्ले रोजकुनाल ओना मंत्राल्लुकुना बलमते अंतोर लोकुल्लुकुन इचंत्रमते अरहचि मत्तोर. दानहाटींगे लोकुल्लक ओर बतल वेहिना नम्मंदुर.
 12 गानि पेनदा राज्येम आनि येसु किरिस्तुना पोरोलता बारेमते पिलिपुस वेहता बेसता कबुर केंजसि मुर्ताहक-मांडसा नम्मिसि बापतिस्मागुडा एतुर.
 13 कुद सिमोन इंका नम्मिसि बापतिस्मा एततोर. इल्हा ओर पिलिपुस बेके होत्ते हेके होंचेके ओनतोने मनालय दल्गुतोर. पजा पिलिपुस कियना चिन्हां, अदूबूताल्लक हळसि इचंत्रमते अरहुंदुर.

सामरिया सहरते पत्रु आनि योहान

- 14 सामरिया सहरता लोकुल्लक पेनदा पोल्लेन स्विकार कीतुर इंचि बस्के अयते येस्सलेमते प्रेरितुल्लुकुंक तेळियतनो, अस्के ओर पत्रुन आनि योहानुन सामरिया एरियाक लोहचीतुर.
 15 पजा ओर अगा वासि अगाटोर्कुंक पवित्र आत्मा दोर्कना इंचि पारतना कीतुर.
 16 बारित्ते दीनकन्ना मुन्ने ओरा बोरापोर्रीन पवित्र आत्मा वाया हिल्ले. ओर्कु सिराप येसु सामिन पोरोलते बापतिस्मा दोर्कता अचोने.
 17-18 पजा पत्रु आनि योहान ओरापोर्री कय इरता ईरडे ओर्कु पवित्र आत्मा दोर्कता. इदुन सिमोन हळसि, प्रेरितुल्लुकुनगा होत्तोर.
 19 होंचि, “नना मीकु कोत्तां हीतन, गानि नना बोनपोर्री अयते कय ईरतनो ओन्क पवित्र आत्मा दोर्कागोट्टना ई बलमतुन नाकुगुडा हीम्टु,” इंचि इत्तोर.
 20 अस्के पत्रु ओन, “निमे कोत्ताने पेनदा वरमतुन अस्सा परांतन इंचि इनकुत्तिन. अदुनहाटीं नीवा कोत्तां नीतोने नासडेम आंतां.
 21 पेनदा नदरते नीवा विचारम बेसतद आयो, इंचि ई सेवा कबाहकुने नीकु पोत्तु हिल्ले, पालु हिल्ले.
 22 निमे कराब विचाराल्लक कियमळ होळसिसि मनसु मार्सकुंकि पेनदुक पारतना कीम. अस्के नीवा इसोटा विचाराल्लुकुनहाटीं नीकु मापि दोर्का परार.
 23 नना नीकुन बेस हळसंतन, नीवा लोप्पो वेल्लेन विसम निडिस निमे पुरागा तप्पुड कबाहकुनतोनि दोहाचि मंतिन,” इंचि इत्तोर.
 24 अस्के सिमोन, “मिमेट इत्तद बद्दे पोल्ले नापोर्री वायामन्नि इंचि मिमेट सामिक नाहाटीं पारतना कीम्टु,” इंचि इत्तोर.

* 8:5 किरिस्तु इत्ते अबिसेकम आतोर, इंचि अर्तम.

25 पजा पत्रु आनि योहान सामिना बारेमते बतल अय्ते केंजतुर, ह्ळतुर अदुना गवाइ हीतुर. पजा सामि वेहता पोल्लेन वेहचि येस्सलेम मल्सि होनालय पेय्स्तुर. ओर होननेके सामरिया नाहकुने वेल्लेन जेगाने पेनदा बेसता पोल्लेन वेहचेके होतुर.

पिलिपुस आनि इतोपिया देसेमता मनकल

26 अस्के सामिनद उंदि पेनदा दूता पिलिपुसुंक वेहता गदा, “निमे तयार आसि, येस्सलेमताल बद हर्रि अय्ते गाजा सहरताहेके दांता, अदे हर्रि पीसि दक्खिनतेके होन्नु, आ हर्रि बय्लि जेगाताल दांता.”

27-28 पजा ओर तयार आसि होतोर. होननेके हर्दे ओन्क इतोपिया देसेमतोर वरोर आडिगुंल्ला मनकल कलियतोर. ओर इतोपिया देसेमता रानि कंदाकेनगा कोत्ताना लेक्का ह्ळना पेद्दा अदिकारिनलेहका कबळ कियुंदुर. दाना पूरा कजाना ओना कय्दा हिडे मत्ता. ओर आरादनाहाटी† येस्सलेम वासि, मल्सि होननेके रतमते उदसि यसायाह इनना पेनदा कबुरतोना पुस्तकम हदविसेके मत्तोर.

29 अस्के पेनदा आत्मा, “निमे आ रतम दग्गेर्क होंचि दानतोनि ताका,” इंचि पिलिपुसुंक वेहता.

30 अस्के पिलिपुस वितसि होंचि आ रतमतुन अंदकुत्तोर. रतमते उदिस मनना मनकल यसायाहल रासता पुस्तकम हदवानदुन ह्ळसि, “निमे बतल अय्ते हदविसतिनो अदुना अर्तम नीकु तेळियसेके मंतना?” इंचि ओर आ मनकन पूसकीतोर.

31 “इदुना अर्तम बतलो, बोरन्ना वेहुवद नाकु बल्हा तेळियंता?” इंचि आ मनकल इत्तोर. पिलिपुसुन रतम पोरो एक्किस ओना पक्काते उद्दालय वेहतोर.

32 ओर आ पुस्तकमते बतल अय्ते हदविसेके मत्तोर अद इल्हा मंता:

“हक्कालय ओयना गोरैतालेसी ओन ओतुर,

गोरै दाना मेंदुल्ला बूरातुन कतरिचिनेके बल्हा सपुडदाका मंता,

अल्हेने ओरगुडा सपुडदाका मत्तोर,

ओना तोळ्दाल उंदि पोल्लेगुडा पेय्सा हिल्ले.

33 ओना अपमानम कीसि ओनपोरो अन्यायम कीतुर,

बूमिपोरोटाल ओना पिस्वरतुन तेंडतुर, ओना वंसमतोर बोरे हिल्लुर.”*

इल्हा रासि मत्ता.

34 अस्के, “असल ई कबुरतोर बोना बारेमते वेहचंतोर? ओना सतता बारेमतेना, हिलाकोटे मरि इंका बोरन्ना वैरेतोना बारेमतेना? दया कीसि नाकु तेळियनाल वेहा,” इंचि आ आडिगुंल्लोड पिलिपुसुन इत्तोर.

35 अस्के पिलिपुस, आ मनकल हदबुसेके मत्ता वचनालुकुनाल मोदोल पीसि, येसुना बेसता कबुरदाका अन्नि ओन्क वेहतोर.

आडिगुंल्ला मनकल बापतिस्मा एतंतोर

36 इल्हा हर्रि पीसि होननेके-होननेके ओर उंदि एर मत्ता जेगातगा एवतुर. अस्के एतुन ह्ळसि, “ह्ळा! इगे एर मंता. इंदके नाकु बापतिस्मा एतालय बतलन्ना तकलिप मंतना?” इंचि आ आडिगुंल्ला मनकल इत्तोर.

37 ‡(निमे गिटा मनसुनाल पुरागा विस्वासम कियानय्ते बापतिस्मा एता परांतिन, इंचि पिलिपुस वेहतस्के, ओर हां, येसु सामिए पेनदा मर्रि आंदुर इंचि नना विस्वासम कीतन, इंचि जवाब हीतोर.)

38 अस्के ओर रतमतुन आपालय वेहतोर. पजा पिलिपुस आनि आ आडिगुंल्ला मनकल ईर इव्वुर एते रेयतुर. पिलिपुस आ मनकक बापतिस्मा हीतोर.

39 ओर एताल पलाते पेय्स्तस्के पिलिपुसुन सामिना आत्मा बेकेनो ओता. आ आडिगुंल्लोड ओन मर्रा बस्केने ह्ळा हिल्लोर. अयना आ आडिगुंल्ला मनकल आनंदमते ओना हर्रि पीसि ओर होतोर.

40 इल्हा पिलिपुस अजोतु इनना सहरते दिसतोर. पजा ओर होननेके हर्रि पीसि कलियता नाहकंता पेनदा बेसता कबुर वेहचेके कैसरिया सहरते एवतोर.

9

साऊलना मनसु मारियमळ

1 अदे वेलाते साऊल सामिनपोरो विस्वासम कियानोर्कुन हक्कंतन इंचि बेदरिचेक मत्तोर. ओर पेद्दा पेर्मानगा होतोर.

2 होंचि, “दमिस्क सहरते मनना दर्मसास्त्रम कराहना लोहकुनाल बोरन्ना सामि वेहता हर्रि पीसि ताकाना मुरतळ आयि मांडसा आयि दोर्कुंते, ओर्कुंन दोहाचि येस्सलेमते वापस तायाना अदिकारमता सिट्टि रासि हीम,” इंचि इत्तोर.

3 इल्हा ओर दमिस्क एरियाक दग्गेर एवतोर. अस्के उंदेदम मब्बुनाल ओना सट्टु उंदि वेलगु जग्गरा मेसता.

4 अल्हा आता आयमळ ओर बूमिपोरो अरतोर. पजा ओन्क, “साऊल, साऊल निमे नाकुन बारि तकलिप कीसंतिन?” इंचि इत्ताप उंदि अल्किर केंजावाता.

† 8:27-28 आरादना इत्ते निजम पेनदुक मोळ्कमळ. उदा. पाटां पारमळ, स्तुति कियमळ, पारतना कियमळ, बायबल हदुवमळ ई. * 8:33 यसायाह 53:7-8 ‡ 8:37 इद वचनम कोन्नि पांडु लिपिने हिल्ले.

- 5 अस्के, “सामि! निमे बोन आंदिन?” इंचि साऊल पूसकीतोर. अस्के, “निमे बोन अयते तकलिप कीसंतिनो नना आ येसुन आंदुन.
- 6 निमे इंदके तेदसि सहरतेके होन. बतल कियमळो अद नीकु अगा वेहमळ जर्गता,” इंचि इत्तोर.
- 7 ओनतोनि होंचेके मत्ता मनकालोर्कु अल्किर अयते केंजतुर, गानि ओर्क अगा बोरे दिसा हिल्लुर. अदुनहाटीं ओर मूकालोरलेसीं वळकाकोटा अल्हे नित्तिसि मत्तुर.
- 8 अस्के साऊल बूमिपोर्रीटाल तेदसि कळ्ळक उस्मिसि हळते अगा ओन्क बतले दिसा हिल्ले. पजा ओनतोनि मत्तोर ओना कय पीसि दमिस्कते ताकिच्चेके ओतुर.
- 9 मूड रोजकुनदाका ओर गुड्डोनलेहका आसि मत्तोर. अचोने आयका ओर बतल तिना हिल्लोर, उन्ना हिल्लोर.
- 10 दमिस्कते हनन्याल इनना पोरोलतोर वरोर सिस्स्युड मत्तोर. सामि ओन्क दर्सनम हीसि, “हनन्या!” इंचि केयतोर. अस्के ओर, “हां सामि,” इंचि इत्तस्के,
- 11 सामि ओन, “तेदा, तेदिस ‘सवरगा’ इनना हरदुक होन. अगा यहुदाना लोन मंता. ओना लोन तरसुस सहरताल वाता साऊल इनना वरोर मनकल मंतोर. अगा ओना बारेमते पूस कीम. ओर इंदके पारतना कीसेके मंतोर.
- 12 साऊल दर्सनमते, हनन्याल इनना मनकल ओनगा वासि ओन्क मर्रा कळ्ळक दिसगोम इंचि ओनपोर्रीं कय तासताप हळतोर,” इंचि इत्तोर.
- 13 अस्के हनन्याल, “सामि, ई मनकल येस्सलेमते मनना नीवा पवित्र लोकुलुकुन बच्चोनो तकलिप कीता संगति नना वेल्लेन लोकुलुकुना तोळ्दाल केंजतन.
- 14 इग्गेगुडा नीवा पोरोल एताना हरेक विस्वासिन दोहाचि ओयना अदिकारम, पेद्दा पेर्मालोर्कुन हेंदाल एतकुंचि वातोर,” इंचि वेहतोर.
- 15 अस्के सामि ओन, “नावा पोरोलतुन वेरे जातितोरा नड्डुम, राजालोरा मुन्ने, इस्राएलता लोकुलुकुन मुन्ने वेहनाहाटीं नना ईन नावा विसे इंचि पेर्कुत्तन, अदुनहाटीं निमे होन.
- 16 नावा पोरोल एतानाहाटीं ओन्क बच्चोर कस्टाल्क अर्रा पीतानो नना कुद ओन्क हुप्संतन,” इंचि इत्तोर.
- 17 अस्के हनन्याल अगटाल पेय्सि साऊल बद लोते मत्तोरो अद लोन होत्तोर. होंचि ओनपोर्रीं कय ईसि, “साऊल दादा, निमे हरि पीसि वायानेके नीकु दिसतोर हळा! आ येसु सामिए नीकु मर्रा कळ्ळक दिसगोम, निमे पवित्र आत्माते पुरागा निंडिस होनगोम इंचि नाकुन लोहतोर,” इल्हा वेहतोर.
- 18 अस्केने ओना कळ्ळकुनाल बतलो पोर्नसंतव रालसि, ओर हळालय दल्गुतोर. पजा तेदसि बापतिस्मा एततोर.
- 19 गाटो तित्तस्के ओन्क ताकत वाता. इल्हा ओर कोन्नि रोजकु दमिस्कते मत्ता सिस्स्युलुकुनतोनि अग्गेन मत्तोर.
- साऊल दमिस्कते येसुना बारेमते वेहांतोर**
- 20 पजा ओर आल्सेम कियाकोटा, “येसे पेनदा मर्रि,” इंचेके यहुदि लोकुलुकुना दर्मसास्त्रम कराहना लोहकुने होंचि येसुना बारेमते वेहालय सुख कीतोर.
- 21 अगा ओना पोल्लें केंजतोर अंतोर इंचंत्रमते अर्रि, “येस्सलेमते येसुन नम्मूतोर्कुन दोर्कापीसि ओर्कुन हळ्ळुता मनकल ईर आयोरा? इंका इग्गेगुडा येसुन नम्मूतोर्कुन पीसि दोहाचि वाटसि पेद्दा पेर्मालोरा मुन्ने ओयाना विचारमते वातोर गदा!” इंचि इनालय दल्गुतुर.
- 22 गानि साऊलना कराहना तेल्वि मात्रम रोज-रोज बेरसेकेन होत्ता. अदुनहाटीं दमिस्कते मनना यहुदिल्कुन, येसु सामिए किरिस्तु आंदुर, इंचि रूजुव कीसि ओर्कुन वळकाकोटा कियुंदुर.
- साऊलुन हळ्ळुना पिलान**
- 23 इल्हा वेल्लेने रोजकु आतारित्ते यहुदिल्क साऊलुन हळ्ळुना उपायम कीतुर.
- 24 गानि ओन हळ्ळालय नर्का-पियल सहरता गेटकुनगा यहुदिल्क पोंचादोसि मनना संगति साऊलुंक तेळियसि होत्ता.
- 25 अस्के साऊलना सिस्स्युल्क नर्कटा वेलाते ओन उंदि तट्टाते उपिच्चि सहरता सुट्टु मत्ता गूरे पोर्रीटाल वेलाड वाटसि हिळ्ळु रेहतुर.
- येस्सलेमते साऊल**
- 26 साऊल येस्सलेमते वातंका सिस्स्युलुकुनतोनि कलियसि मनालय हळतोर. गानि सिस्स्युल्क मात्रम ईर निजम सिस्स्युड आंदुरो आयोरो, इंचि विस्वासम हिलाका वेरियुंदुर.
- 27 बरनाबास मात्रम साऊलुन पीसि प्रेरितुलुकुनहेके वातोर. साऊल वायनेके हर्दे येसु सामिन बल्हा हळतोर, येसु सामि ओनतोनि बल्हा वळ्ळुतोर, दमिस्कते ओर येसु सामिना पोरोलता बारेमते बल्हा वेरियाकोटा वेहतोर, इव अन्नि पोल्लें ओर्कु वेहतोर.
- 28 इल्हा साऊल ओरतोनि कलियसि-मेलियसि मनुंदुर आनि वेरियाकोटा येसु सामिना पोरोलता बारेमते वेहसेके येस्सलेमते तिरियुंदुर.
- 29 ओर युनानि बासा वळ्ळकाना यहुदिल्कुनतोनि सामिना बारेमते वळ्ळुंदुर, चर्चा कियुंदुर. गानि ओर मात्रम ओन हळ्ळालय हळतुर.
- 30 बस्के अयते इद संगति दादालोर्कुंक तेळियतनो अस्के ओर ओन मुन्ने कैसरिया ओतुर. पजा अगटाल ओना पुटता सहर तरसुसते लोहचीतुर.
- 31 इल्हा यहुदिया, गालिल, सामरिया एरियाता कलिसियानोर्कुंक कोन्नि रोजकु सांति मत्ता. आ कलिसियानोर सामिकु वेरियसि बेस बक्तितोनि पिसुंदुर, पवित्र आत्मागुडा ओर्कु बेस प्रोत्साहन हियुंदु, अदुनहाटीं ओर बेस ताकतवान आतुर. इल्हा ओर वेल्लेन आसेक होत्तुर.
- 32 पजा पत्रु देसेमंता तिरियसेक-तिरियसेक लुद्दा इनना सहरते मनना पेनदा लोकुलुकुनगा होत्तोर.

33 अगा ओर, लकवा बिमार आसि एनमिदि वर्सानाल कटुल पीसि मत्ता अनियासु पोरोलता वरोर मनकंक कलियतोर.

34 अस्के, “आनियासु, येसु किरिस्तु नीकुन बेस कीतोर, निमे तेदसि नीवा कटुलतुन हद्रा,” इंचि पत्रु ओन इत्तोर. अस्केटद अस्केन आ मनकल तेदतोर.

35 अस्के लुद्दा आनि सारोन सहरकुने मनना वेल्ले लोकुलक अनियासुन ह्ळसि सामिनहेके तिरियतुर.

हासोत्ता मुरतळकु पत्रु जीवा अरहंतोर

36 यापा सहरते उंदि विस्वासि मुरतळ मनुंदु, दाना पोरोल तबिता. तबिता इत्ते युनानि बासाते, दोरकस, इत्ते तल्लुर दुप्पि इंचि अर्तम. अद मुरतळ बस्केळक बेसता कबाहक कीसेके, गरिबोर्कुंक दान-दर्मम कीसेके मनुंदु.

37 पत्रु लुद्दा सहरते मत्ता रोजकुनेन अद बिमार अर्सि हासोत्ता. अस्के दाना पीनगुंकु एर दोस्सि मिद्देता पोरोटा अर्ति इरतुर.

38 लुद्दा नार यापा सहरकु दग्गेरेन मत्ता. अयते पत्रु अगा मंतोर इत्ता संगति सिस्युलुकुंक तेळियतस्के इव्वुर मनकालोर्कुन ओनगा लोहचि, आलसेम क्रियाकोटा ओरहेके वायालय विनति कीतुर.

39 अस्के पत्रु बिराना तयार आसि ओरतोनि होत्तोर. ओर अगा एव्ता-एव्वुडे ओन मिद्दे पोरोटा अर्ति ओतुर. अगा ओर होत्तस्के अगा मत्ता मुंडामोस्ता मुर्ताहक, दोरकस अवुनतोनि मननेके कट्टा अंगिं आनि कपडिं पत्रुंकु ह्पिचचेके ओन सुट्टु आसि अळालय दल्लगां.

40 गानि पत्रु अवुन अंटोर्कुन पलाते लोहचि टोंगरां ऊनसि पारतना कीतोर. पजा पीनगुनहेके तिरियसि, “तबिता, तेदा!” इंचि इत्तोर. अस्के अद पत्रुन ह्ळसि तेदिस उदुता.

41 पजा अद दाना कालुकुनपोरो नित्तालय कय हीसि सहायम कीतोर. पेनदा लोकुलुकुन, मुंडामोस्ता मुर्ताहकुकुन केय्पि जीवाते मत्ता तबितान ओर्कु हुपिस्तोर.

42 ई संगति पूरा यापा सहरअंता तेळियसि, वेल्ले लोकुलक सामिन नम्मुकुत्तुर.

43 आयंका पत्रु यापा सहरतेन सिमोन इनना वरोर तोलुकुन कबळ क्रियानोनागा वेल्लेन रोजकु आगतोर.

10

पत्रु आनि कुरनेलियुस

1 कैसरिया सहरते कुरनेलियुस पोरोलतोर वरोर मनकल मनुंदुर. ओर इटलि इनना पोलिसि दलमते नूर मिल्ट्री पोलिसुलुकुन पोरो दरोगाल मत्तोर.

2 कुरनेलियुस बेस नीतिमंतुड मत्तोर. ओर, ओना लोतोरगुडा पेनदुकु वेरियुंदुर. ओर गरिब लोकुलुकुंक वेल्ले सहायम क्रियुंदुर. बस्केळक पेनदुकु पारतना कीसेके मनुंदुर.

3 ओर उंदि रोज पियल मूड एगना पारतना क्रियनेके दर्सनमते उंदि पेनदा दूता ओनगा निजम वासि, “कुरनेलियुस!” इंचि ओन केयताप ह्ळतोर.

4 अस्के कुरनेलियुस वेर-वेरियसेक पेनदा दूताहेके ह्ळसि, “नीकु बतल गावाले वेहा,” इंचि इत्तोर. अस्के पेनदा दूता, “नीवा पारतनां पेन केजता. गरिबोर्कुंक निमे क्रियना सहायमतुन पेन ह्ळता.

5 निमे इंदके इच्चुर मनकालोर्कुन यापा सहर लोहचि सिमोन पोरोलता मनकन (ईन पत्रुगुडा इंतुर) निहगा केया.

6 ओर सिमोन इनना वरोर तोलुकुन कबळ क्रियानोना लोते मंचंतोर. ओना लोन समुद्रम ओड्डुंक मंता.” इंचि ओन इत्ता.

7 इल्हा ओनतोनि वळकसेके मत्ता पेनदा दूता अगटाल होत्ता होनमळे, कुरनेलियुस ओना लोन कबळ क्रियाना जीतागाहकुनाल इव्वुर जीतागाहकुन आनि पेनदुकु वेरियानोर अल्हेने ओन्क बेस सेवा क्रियना वरोर पोलिसुन, इल्हा मुव्वुर्कुन केयतोर.

8 पजा अगा बतल अयते जसुगतनो, अद पूरा वेहचि ओर्कुन यापा सहरकु लोहचीतोर.

पत्रु पेनदा दर्सनम ह्ळतोर

9 इंकुंदि रोज ओर यापा सहर दग्गेरा एवतस्के पिथ्यटा वेलाकु पारतनाहाटीं पत्रु मिद्देपोरो होत्तोर.

10 अस्के ओन्क कर्वेस्सि मत्ताहेंका बतलन्ना तिनकन बारे इंचि अनपिस्ता. गाटो वेसेकेन मत्ता अचचोटेन ओर उंदि दर्सनम ह्ळतोर.

11 अद दर्सनमते, मब्बु बय्यर आसि, पोरोटाल बतलो उंदि वस्तु हिळु वायनद ओर ह्ळतोर. अद उंदि पेद्दा सेदरलेहका मंता. दाना नालुं मूलां पीसि हिळु रेयताप ओर ह्ळतोर.

12 अव्ते नालुं कालक मत्ता अन्नि तीरकुना जिवरासी, बेंगाना जिवरासी आनि मब्बुने परियना पिट्टें मत्तां.

13 अस्के पत्रुंक उंदि अल्किर, “पत्रु, तेदा! अवुन हक्किस तिन,” इंचि केंजावाता.

14 गानि पत्रु, “मन्नि सामि, नावा पिस्वरते नना बस्केने मूसान नियम परकारम तिनूमा इत्तद, अपवित्रमातद तिंडि तिना हिल्लेन,” इंचि इत्तोर.*

15 पजा अद अल्किर, “पेन सुद्द कीतद बतले वस्तु आयि, दान निमे असुद्द इंचि इनुमा,” इल्हा रोंडो मल्का ओन्क केंजावाता.

16 इल्हा मूड मल्लां जर्गुता. पजा अद सेदरतसोटा वस्तु बिराने पोरोळ्ळक मब्बुनहेके तिरियसि होत्ता.

17-18 पत्रु आ हळता दर्सनमता अर्तम बतल आयावचु इंचि विचारम कीसेके मत्तोर, अद हळा! कुरनेलियुस लोहता मनकालोर सिमोनुना गुयमाकुल्लुकुनगा वासि, “पत्रु इनानोर इदे लोते मंचंतोरा?” इंचि पूसकीतुर.

19 पत्रु इंकागुडा अदे दर्सनमता बारेमते विचारम कीसेके मत्तोर. अचचोटेन पेनदा आत्मा, “हळा, मुव्वुर मनकालोर नीकुन पहकसंतुर.

20 अय्ते तेदा, हिळ रेय्सि मनसुने बतले अनमानम इर्राकोटा ओरतोनि होन्नु. ओर्कुन ननाने लोहतन,” इंचि ओन इत्ता.

21 अस्के पत्रु हिळ रेय्सि ओरगा होंचि, “मिमेट बोन अय्ते पहकसंतुरो ओर ननाने आंदुन. अय्ते मिमेट हीके बारिक वातिर?” इंचि पूसकीतुर.

22 अस्के आ मनकालोर, “माकुन उंदि पोलिस दलमता दरोगाल कुरनेलियुस इनानोर लोहतोर. ओर बेस नीतिमंतुड आनि पेनदुक वेरियसि ताकाना मनकल आंदुर. यहुदि जातिता लोकुल्लुकुने ओर बेस पोरोल होत्तोर. नीकुन ओना लोन केया वेहचि, नीहेंदाल ओन्क पोल्ले वेहालय उंदि पवित्र पेनदा दूता ओन्क वेहता,” इंचि इत्तुर.

23 पजा पत्रु ओर्कुन लोप्पो केय्सि ओर्कुन हेडमितोरलेसी हळकुत्तोर. इल्हा इंकुंदि रोजु तयार आसि ओरतोनि होत्तोर. होननेके यापा सहरता इच्चुर विस्वासुल्लुकुगुडा ओनतोनि होत्तुर.

24 इंकुंदि रोजु ओर अंटोर कैसरिया सहरते एवतुर. अगा कुरनेलियुस ओना जीवातोर्कुन आनि दगोटा दंटातोर्कुन केय्सि ओना एदुर हळसेक मत्तोर.

25 पत्रु लोप्पो होळियतस्के कुरनेलियुस ओना कालुकुनपोरो अर्सि ओना कालुक मोळकतोर.

26 गानि पत्रु ओन तेहचेके, “अरेरे! नित्ता, ननागुडा नीलेसी वरोन मनकने आंदुन,” इंचि इत्तोर.

कुरनेलियुस दरोगान लोन पत्रु

27 पजा पत्रु कुरनेलियुसुनतोनि वळकसेके-वळकसेके लोप्पो होत्तोर. अस्के अगा ओर वेल्लेने मंदि जमा आसि मत्तद हळतोर.

28 हळसि, “मीकु उंदि पोल्ले अय्ते एरपाटे, अद बतल इत्ते, यहुदि मनकल वैरे जातिता मनकनगा होनमळ, ओनतोनि बेसता संबंदम इरमळ यहुदि रीति-रिवाजकुने बेस आयो. गानि पेन मात्रम, नना बोने मनकन पास्कामन्नि, बोने अपवित्र इना मन्नि इंचि नाकु हुपिस्ता.

29 अदुनहाटी नाकुन मिमेट केयतस्के नना बतले विचारम कियकोटा मीतोनि पेय्सि वातन. अय्ते मिमेट नाकुन बारि केयतिर नाकु वेहाट,” इंचि पत्रु ओर्कुन इत्तोर.

30 ओर अल्हा पूसकीताहाटी कुरनेलियुस, “मूड रोजकु मुन्ने* इदे वेलाकु पियल मूड एगानेके नना नावा लोनु पारतना कीसेके मत्तन, अस्के उंदेदम तलातला मेर्सना कपडिने वरोर मनकल नावा मुन्ने वासि निततोर.

31 नित्तिसि, ‘कुरनेलियुस, नीवा पारतना पेन केंजता, गरिबोर्कुक निमे कियना सहायमतुन पेन हळता.

32 अदुनहाटी यापाते बोनना लोहचि पत्रुन केया लोहा. ओर समुद्रम ओड्डुनगा सिमोन इनना तोलकुन कबळ कियानोन लोन आगसि मंतोर,’ इंचि इत्तोर.

33 अदुनहाटी नना बिराना नीकुन केया लोहतन, निमे इगे वासि बच्चोरो बेस आता. इंदके नीकु पेन बतल वेहतनो अव अन्नि केंजालय मोमोट अंटोरम इगे पेनदा मुन्ने जमा आतोम,” इंचि वेहतोर.

पत्रुना बासन

34 अस्के पत्रु वळकमळ सुख कीतोर. ओर इत्तोर, “पेन हरेक मनकन उंदेतीर हळंता इंचि इंदके नाकु निजम तेळियता.

35 दुनियाता अन्नि देसेल्लुकुना लोकुल्लुक ओर बोरन्ना आयिर, ओर पेनदुक वेरियसि नीति कबाहक कियानय्ते पेन ओनपोरो कूस मनंता.

36 येसु किरिस्तु अंटोरा सामि आंदुर. ओनहेंदाल पेन दाना सांतिता बेसता कबुर इस्त्राएलता लोकुल्लुकुंकी हीता, अद कबुर इदे आंदु.

37 बापतिस्माता बारेमते योहान वेहमळ सुख कीता पजा, गालिलते उंदि गटना सुख आता. इद गटनाता बारेमते पूरा यहुदिया एरियंता पैलांचता संगति मीकु एरपाटे मंता.

38 नासरेत नाटेना येसुन पेन पवित्र आत्मातोनि अबिसेकम कीसि† अद्बूतामाता ताकत हीता. पेन ओनतोनि मत्ताहेंका, ओर अंटोराहाटी बेसता कबाहक कियुंदुर, देय्याल्लुकुना मुक्याना कयदा हिळ मत्तोर्कुन बेस कीसेके तिरियुंदुर, इद मीकु एरके.

39 येस्सलेम, यहुदिया देसेमते ओर कीता अन्नि कबाहकुकुन मोमोट प्रेरितुल्लुकुम, कळुकुने हळतोम. इंका ओर ओन कुरसुनपोरो वेलाड वाटसि हळकतुर.

40 गानि पेन मात्रम ओन मूड रोजकुने मर्रा जीवाते तेहाचि दिस्सानाल कीता.

41 अंटोर लोकुल्लुक ओन हळा हिल्लुर. गानि पेन माकुन मुन्नेन गवाइदार्क इंचि पेर्कुत्ता. अदुनहाटी मोमोटे ओन हळतोम. ओर हासि तेदतारित्ते मोमोट ओनतोनि कलियसि तित्तोम, उट्टोम.

42 जीवाते मत्तोर्कुंक, हासोत्तोर्कुंक न्यायम कियानोर इंचि पेन इने पेर्कुत्ता. इदुना बारेमते लोकुल्लुकुंक बेसता पोल्ले कराहना, गवाइ वेहना इंचि ओरे माकु आदेस हीतोर.

* 10:30 मूड रोजकु मुन्ने युनानि लोकुल्लुकुना नालुं रोजकु मना लेक्काते मूड रोजकु आंतां. † 10:38 अबिसेकम कीसि राज्येम ताकसना अदिकारम हीसि ओन्क निय होकमळ.

43 येसुनपोर्रो विस्वासम ईरना हरेक मनकंक येसुना पोरोलते पापालक मापि आंतां, इंचि अंटोर पेनदा कबुरतोरक गवाइ हीसि मत्तुर.”

वेरे जातितोर पोर्रो पवित्र आत्मा रेयता

44 पत्रुना वळकमळ सुख मनकेने पेनदा बेसता पोल्ले केंजसेक मत्तुरा अंटोरपोर्रो पवित्र आत्मा रेयता.

45 पवित्र आत्माता वरम वेरे जातितोर पोर्रो गुडा वळियतदुन हळसि पत्रुनतोनि वाता कतना आता विस्वासुल्लुक इंचंन्रम आता.

46-47 ओर अंटोर्कुन ओर्कु तेळियवा बासाने पेनदा स्तुति कीतद केंजतुर. अस्के, “मनाकु दोर्कताप ईर्कगुडा पवित्र आत्मा दोर्कुता. ईर एते बापतिस्मा एता मन्नि इंचि बोरन्ना अड्डम वळकानोर मंतुरा?” इंचि पत्रु इत्तोर.

48 इल्हा पत्रु, येसु किरिस्तुना पोरोलते ओर्कु बापतिस्मा हियालय आदेस हीतोर. इदंता आता पजा कोन्नि रोजकु पत्रु ओरतोनि मननाहाटीं अंटोर कलियसि पत्रुक विनति कीतुर.

11

पत्रु येस्सलेमते मल्सि वांतोर

1 वेरे जातितोरगुडा पेनदा पोल्लेतुन ओप्कुत्तुर इत्ता संगति, प्रेरितुल्लुक आनि यहुदिया एरियाते मत्ता दादालोर केंजतुर.

2-3 गानि बस्के अयते पत्रु येस्सलेमते वातोर अस्के, इच्चुरकतना आता विस्वासुल्लुक, “निमे वेरे जातितोरा* लोहकुने होंचि ओरतोनि गाटो बारि तित्तिन.” इंचि ओरतोनि जगडम दोस्तुर.

4 अस्के पत्रु बतल अयते जसगतनो अद बल्हा मत्तद अल्हे ओर्कु ई परकारम तेळियागोट्टिस वेहतोर.

5 “नना यापा सहरते पारतना कीसेक मननेके उंदि दर्सनम हळतन. अद दर्सनमते, पेद्दा सेदरतसोंटा उंदि वस्तुन नालुं मूलां पीसि मब्बुनाल हिळु रेहानद हळतन. अद हिळु रेय्से नना मत्तागेन वाता.

6 नना दान लोप्पो बेस हळतस्के नाकु अव्टे बूमिपोर्रो मनना नालुं कालकुना जिवरासीं, केडा जिवरासीं, बेंगना जिवरासीं आनि मब्बुने परियाना पिट्टें दिसतां.

7 अस्के नाकु, पत्रु तेदा, अवुन हळ्किसि तिन, इंचि वेहताप उंदि अल्किर केंजावाता.

8 अस्के, मन्नि सामि, मूसान नियम परकारम तिनुमा इत्तद, अपवित्रमातद नना बस्केने तिना हिल्लेन, इंचि इत्तन.

9 अदे अल्किर मब्बुनाल रोंडो मल्का, पेन सुद्द कीतद बतले वस्तु आयि, निमे दान असुद्द इंचि इनुमा, इंचि केंजावाता.

10 इल्हा मूड मल्कां आता. पजा अदुन मर्रा पोर्रोळ्क तेहाकुंचि मब्बुनहेके ओयमळ जर्गुता.”

11 अस्केने नाकुन केय्से ओयालय कैसरियाताल वाता मुव्वुर मनकालोर नना मत्ता लोतागा वासि निल्लतुर.

12 बतले अनमानम क्रियाकोटा ओरतोनि पेय्से होन. इंचि पेनदा आत्मा नाकु वेहता. ईर हास्स विस्वासा दादालोरगुडा नावातोनि वातुर. मोमोट अंटोरम माकुन केया वेहता मनकना लोते होळियतोम.

13 आ मनकल माकु वेहतद बतल इत्ते, ओर उंदि पेनदा दूतातुन ओना लोते नित्तिसि वळकतदुन हळतोर. आ पेनदा दूता, यापाते मनकालोर्कुन लोहचि पत्रु इनना सिमोनन केयकुन.

14 ओर नीकु, नीवा लोतोर्कगुडा मुक्ति बल्हा दोर्कता, अदुन बारेमते वेहांतोर इंचि वेहता.

15 नना वळकमळ सुख कीतारितते पवित्र आत्मा मुन्ने मनापोर्रो बल्हा रेयतनो अल्हेन ओरापोर्रो इंका रेयता.

16 अस्के, योहान एततोनि बापतिस्मा हीतोर, गानि मीकु पवित्र आत्माते बापतिस्मा हियमळ जर्गता. इंचि सामि इत्ता आ पोल्ले नाकु मति वाता.

17 येसु किरिस्तुन मनम सामि इंचि विस्वासम कीतस्के मनाकु हीता वरमे ओर्कु इंका हीता. अयते पेनदुक अड्डम तिरियानोन नना बोन आंदुन?

18 ई पोल्ले केंजसि ओर अंटोर सपुडदाका आतुर. पेन वेरे जातितोर्कगुडा पिस्वर दोर्किच्छुकननाहाटीं मनसु मार्सकुनना वरम हीता, इंचि पेनदा स्तुति कीतुर.

अंताक्रिया सहरते पेनदा बेसता पोल्ले एवता

19 स्तिपन हासोत्ता पज्जो वेल्लेन कस्टालक वातां, अदुनहाटीं लोकुल्लक सिल्लर आसि हिके-हेके पायसि होत्तुर. आ लोकुल्लक पिनिके, साइप्रस, अंताक्रिया इनना सहरकुने होंचि अगा सिराप यहुदिल्लुकके पेनदा बेसता पोल्ले वेहचेके मत्तुर.

20 ई विस्वासुल्लुकनाले इच्चुर विस्वासुल्लुक साइप्रस आनि कुरेनि इनना सहरतोर मत्तुर. ओर अंताक्रियाक होंचि येसु सामिना बेसता कबुर युनानि लोकुल्लुकगुडा वेहतुर.

21 सामिना ताकत ओरतोनि मत्ता इंचि वेल्लेटुर लोकुल्लक विस्वास कीसि सामिनहेके तिरियतुर.

22 बस्के अयते ई कबुर येस्सलेमता कलिसियातोरक तेळियता, अस्के ओर बरनाबासुन अंताक्रियाक लोहतुर.

23 ओर अगा होंचि अगाटा लोकुल्लुकनपोर्रो पेनदा कुर्पां हळसि इरगा कूस आतोर, सामिनतोनि बस्केळताहाटीं पूरा मनसुनाल बेस विस्वासमते नित्तिसि मनना, इंचि ओर्क अंटोर्क दैरनेम हीतोर.

* 11:2-3 वेरे जाति इत्ते युनानि बासाते कतना आयवा लोकुल्लक. † 11:23 कुर्पा इत्ते उंदि परकारमता आसिर्वाद इत्ताप.

- 24 ओर बेस मनकल मत्तोर, अचोने आयका विस्वासम आनि पवित्र आत्माते निडिस मत्तोर. इल्हा वेल्लेन मंदि सामिन नम्मिसि विस्वासुल्लुक आतुर.
- 25 पजा बरनाबास साऊल्लुन पहकालय तरसुस इनना सहर होत्तोर.
- 26 अगा ओन दोर्किचकुचि अंताकियाक पीसि वातोर. अगा ओर इव्वुर अगाटा कलिसियातार्क कलियसेके, वेल्लेन लोकुल्लुकुंकराहसेके मत्तुर. इल्हा ओर इव्वुर उंदि एडादिमेड अंताकियातेन मत्तुर. अय्ते मोट्टा मोदाला सिस्सुल्लुकुन “किरिस्तुनोर‡” इंचि इन्मळ ई अंताकियातेन जर्गुता.
- 27 अवे तूकुल्लुकुने इच्चुर पेनदा कबुरतोर येस्सलेमताल अंताकियाक वातुर.
- 28 ओरव्टे वरोर अगबुस पोरोलतोर मत्तोर. ओर पवित्र आत्माते निडिस, पूरा दुनियाते उंदि पेद्दा कर्वु अरानद मंता, इंचि वेहतोर. इदु कर्वु कलादियुस इनना राजाना कालमते अर्सि मत्ता.
- 29 अस्के अंताकियाते मत्ता अंतोर सिस्सुल्लुक ओरा-ओरा एलवान परकारम यहुदियाते मनना विस्वासुल्लुकुंकराहसेके सहायमहाटी बतलन्ना लोहना इंचि निरनायम एततुर.
- 30 ओरा निरनायमनुसार सहायमहाटी जमा कीता सोम्मुन ओर बरनाबास आनि साऊल्लुना कय्दे यहुदियाते मनना पेद्दाल्लुकुनहेके लोहचीतुर.

12

हेरोद राजल पन्न जेलने वाटंतोर

- 1 अवे रोजकुने हेरोद अग्रिपा राजाल कलिसियानाल इच्चुर मंदितुन तकलिप कियालय सुस्व कीतोर.
- 2 ओर योहानुना दादल याकोबुना तल्लातुन कसेटे कोय्सि हक्का वेहतोर.
- 3 ओर कियना कबाहक यहुदि लोकुल्लुकुंकराहसेके बेस अनपिस्ता इन्कुचि हेरोद राजाल पन्न इका दोर्का पीतोर. (इद गटना होयवा पिंडिता हारिना पंडुगुना* रोजु जर्गुता.)
- 4 दोर्कापीसि जेलने वाटंतोर. पजा तेपाक नालुर सिपाइल्लुक ओनगा कावेल कियना इंचि, पदाहास सिपाइल्लुकुना कय्दे ओन अप्पजेपतोर. दाटसि होनना पंडुगु† आतारित्ते पन्नाना न्यायम कियालय लोकुल्लुकुना मुन्ने थायाना विचारम हेरोद राजाना मनसुने मत्ता.
- 5 इल्हा पन्न ओर जेलने वाटसि इरतोर. गानि ओनाहाटी कलिसियातोर मात्रम आगाकोटा उंदेतीर पेनदुक पारतना कीसेके मत्तुर.

पन्न जेलनाल पेयसंतोर

- 6 हेरोद राजाल पन्न पलाते पीसि वायना उंदि रोज मुन्ने, नर्काटा वेलाक पन्न इव्वुर सिपाइल्लुकुना नड्डुम निद्रा होंचेके मत्तोर. सिपाइल्लुक ओन रोजु गोलसुकुने बेडी वाटसि इरतुर. पलाते तल्पुनगा कावेल कियानोर जेलता कावेल कीसेके मत्तुर.
- 7 अचानक सामिनद उंदि पेनदा दूता अगा दिसता. आ अरंता पूरा वेल्लुनतोनि निडिस होत्ता. आ पेनदा दूता पन्न मेलाहचि, बिराना तेदा! इंचि ओन तेहाता. ओना कयकुना बेडी लेंगसि हिळ्ळ अरतां.
- 8 अस्के, बिराना तयार आसि हेरपुहक केरी, इंचि पेनदा दूता ओन्क वेहता. अस्के अद वेहतापे ओर कीतोर. पजा पेनदा दूता, नीवा सेदर मुचकुचि नावा पज्जो वा, इंचि इत्ता.
- 9 ओर पेनदा दूता पज्जो-पज्जो होंचि जेलनाल पलाते अय्ते पेयसंतोर, गानि पेनदा दूता बतल अय्ते कीसंतनो अद अंता निजमे जर्गुसंता इंचि ओर इनकुना हिल्लोर. ओर उंदि दर्सनम हळसंतन बारे इत्ताप अनपिस्ता.
- 10 पजा ओर मोदाटोन आनि ओना पज्जोटा कावेल कियानोन दाटसि सहरकु होनना कच्चि तल्पुनगाहकु वातुर. अस्के आ तल्पु ओराहाटी दानद अदे पेयस्ता. अस्के ओर दान दाटसि पलाते पेय्सि होत्तुर. इच्चोन लक्कु होतंका अचानक आ पेनदा दूता ओन होळसि होत्ता.
- 11 पजा पन्नक तेल्वि अरता. अस्के निजमे! सामिए ओना उंदि पेनदा दूतातुन लोहचि नाकुन हेरोद राजाना कय्दाल तप्पिस्तोर. यहुदि पेद्दाल्लुकु नाकुन बतल-बल्हा कियाना इंचि विचारम कीसेक मत्तुरो, अव अन्निटावुनालगुडा सामिए नाकुन पिसागोटतोर, इंचि इन्कुत्तोर.
- 12 इंदंता तेळियता पजा ओर मरियम इनना मुरतटा लोन होत्तोर. ई मरियम योहान (ईन मरकुसगुडा इंतुर) इनानोना यावल आंद. अगा वेल्लेन मंदि उंदागा जमा आसि पारतना कीसेके मत्तुर.
- 13 पन्न पलाताल तल्पुन तंतस्के तल्पु तेंडालय रूदा इनना उंदि दासि पेगिड वाता.
- 14 पन्नाना लेंग एरपाट कीसि अद वेल्ले आनंदमते तल्पु तेंडाकोटेन मल्लिस लोपो वित्सि, “पन्न तल्पुनगा नित्तिसि मंतोर,” इंचि वेहता.
- 15 अस्के, नीकु पिसा पीताना? इंचि अगा मत्तोर इत्तुर. अद वेहनद निजमे इंचि बच्चोनो वेहता. अस्के ओर, अद ओना पेनदा दूता आयावच्चु, इंचि इत्तुर.

16 अयना पन्न तल्पुन अल्हेन तंचेके मत्तोर. पजा तल्पु तेंडतस्के पन्न हळसि ओर्कु इंचंनम आता.

17 अस्के पन्न ओर्कुन सपुडदाका मंटु इंचि कय्दे सयगे कीसि वेहतोर. सामि ओन जेलनाल बल्हा पलाते तत्तोर, इद ओर्कु पूरा समजांचि वेहतोर. पजा, ई संगति याकोबुंकराहसेके (येसुना तम्मुर) आनि कळमता विस्वासुल्लुकुंकराहसेके वेहाट, इंचि वेहचि अगटाल ओर इंकुदि वेरे जेगाते पेय्सि होत्तोर.

‡ 11:26 किरिस्तुनोर येसुनपोर्रो विस्वास कीसि ओर वेहताप ताकाना लोकुल्लुकुन किरिस्तुनोर लोकुल्लुक इंतुर. * 12:3 होयवा पिंडिता हारिना पंडुगु इद यहुदि लोकुल्लुकुन उंदि पेद्दा पंडुगु आंद. † 12:4 दाटसि होनना पंडुगु यहुदि लोकुल्लुकु गुलामगिरिताल पेयसतस्के कीता पंडुगु आंद. इद मार्च-एप्रिल नेलाते कीतुर.

18 पंग आतास्के, पत्र बेके होतोर, बतल आता? इंचि सिपाइल्क पेद्दा गाबर आतुर.

19 हेरोद राजाल ओन पहकतोर. गानि पत्र ओन्क बग्गेन दोर्का हिल्लोर. अस्के ओर कावेल इरता सिपाइल्कून पूस कीसि ओर्कुन हक्कना आदेस हीतोर. हेरोद राजाल यहूदियाताल कैसरियाते वासि मनालय दल्गुतोर.

हेरोदना हामुर

20 हेरोद राजाल सूर आनि सैदा सहरकुना लोकुल्कूनपोर्रो वेल्ले होंग आसि मत्तोर. ओर अंतोर उंदि आसि ओनतोनि वळकालय होत्तुर. राजाना वरोर बेस दग्गेटा सेवक बलासतुस इनानोन मुन्ने अरहचि, माकु सांति गावाले, इंचि ओन्क विनंति कीतुर. बारित्ते ईरा देसेमतोर्कु तिनालय तिडि राजाना देसेमताले दोर्कुदु.

21 निरनायम कीता रोजु हेरोद राजाल, राजाल केराना कपडिं केरसि ओना राजगदूदेपोर्रो उदसि लोकुल्कुक बासन हियालय दल्गुतोर.

22 अस्के लोकुल्क, “इद अयते पेनदा लेंग आंदु, मनकानद आयो,” इंचि वरगेयालय दल्गुतुर.

23 अस्के राजाल पेनदा कदर कियार्कोटा पोंगसोत्तोर. अदुनहाटीं अस्केटद अस्केने सामिनद उंदि पेनदा दूता ओन बिमार अरहता आनि ओर पुळकु अरसि हासि होत्तोर.

24 गानि पेनदा पोल्ले मात्रम पैलांचेके होत्ता. अव पोल्ले केंजसि वेल्लेन लोकुल्क विस्वासमते वातुर.

25 बरनाबास आनि साऊल ओरा सेवा कबळ पूरा कीसि येस्सलेमतल वापस अंताकिया होत्तुर. होननेके मरकुस इनना योहानुनगुडा पज्जो पीकुचि होत्तुर.

पौलुस मोदाटा पय्नेम पेयसंतोर

13

(13:1-14:28)

बरनाबासुन आनि पौलुसुन बेस कबळताहाटीं पेरमळ

1 अंताकिया सहरता कलिसियातोरव्टे इच्चुर पेनदा कबुरतोर आनि कराहनोर मत्तुर. ओर बोर इत्ते, बरनाबास, सिमोन ईन निगर (इत्ते कर्नेटोर) गुडा इनुंदुर, कुरेनि सहरता लुकियुस, साऊल, गालिल एरियाता राजाल हेरोद अंतिपासुनतोनि बेसता मनाहेम ईर आंदुर.

2 उंदि रोज ओर ओक्कापोद्दु मंचि सामिक आरादना कीसेके मननेके पवित्र आत्मा ओर्कुन, “नना बद कबळताहाटीं बरनाबासुन आनि साऊलुन पेरकुत्तनो, अदुन कियानाहाटीं ओर्कुन अलग कीम्टु,” इंचि इत्ता.

3 अस्के ओर ओक्कापोद्दु मंचि पारतना कीसि ओरापोर्रो कय इरसि ओर्कुन लोहचीतुर.

पौलुस आनि बरनाबास साइप्रस दीबेते दांतुर

4 पवित्र आत्माहेंदाल ओर्कुन लोहतारित्ते ओर सिलुकिया सहरते होत्तुर, अगटाल उंदि डोंगाते उदिस साइप्रस दीबेहेके पेयस्तुर.

5 पजा अदे दीबेते मनना सलमीस इनना सहरते एवतारित्ते, यहूदिलुकुना दर्मसास्त्रम कराहना लोहकुने होंचि पेनदा पोल्ले वेहालय दल्गुतुर. योहान (ईन मरकुसगुडा इनुंदुर) ओर्कु सहायम कियालय ओरतोनि मत्तोर.

6 पजा ओर पूरा दीबेतुन तिरियसेक पापूस इनना नाटे एवतुर. अगा ओर्कु वरोर यहूदि जातिता मंत्रगाड आनि पेनदा आबदुदम कबुरतोर कलियतोर. ओन पोरोल बार-येसु.

7 अगा वरोर सिरगु पौलुस इनना तेल्विता अदिकारि मत्तोर, ओनतोने बार-येसु मत्तोर. आ अदिकारि पेनदा पोल्ले केंजंतन इंचि बरनाबासुन आनि साऊलुन ओनगा केयतोर.

8 गानि एलिमल इनना मंत्रालुकुनोर (युनानि बासाते बार-येसुना पोरोल एलिमल मत्ता), बरनाबास आनि साऊलुंक अड्डम आसि आ अदिकारि विस्वासम कियामान्नि इंचि आपालय हळतोर.

9 अस्के साऊल (ईन पौलुस इंका इनुंदुर) पवित्र आत्माते निडिसि, एलिमलनाहेके उंदेतीर हळसेक,

10 “अरे! दोका हियानोना, अन्नि तीरकुना नडेह कियाना बुद्दिं निडिस मत्ता देय्यमता मरिना! अन्नि नीति पोल्लेक अड्डम तिरियना पगातोने आंदिन. सामिना निजम पोल्लेतुन बदवेरदाका आबदुदम वळकसेक मनांतिन?

11 इंदके हळा! सामि नीवा पोरो कय तेहातोर, निमे गुड्डिन आंतिन. कोन्नि रोजकुनदाका पोळ्दुनगुडा हळाकोटा आंतिन,” इंचि इत्तोर. इत्तस्केने एलिमलना कळकु मागुर-मागुर आतां. हिरि हीकट आसि दिसाकोटा आतां, अस्के, नाकुन बोरन्ना कय पीसि ओयगोम, इंचि ओर हीके-हेके पहकालय दल्गुतोर.

12 एलिमलुंक अल्हा आतदुन हळसि, सामिना बारेमते वेहता पोल्ले केंजसि इंचत्रम आसि, आ अदिकारि सामिन विस्वासम कीतोर.

पिसिदिया एरियाता अंताकियाते पेनदा कबुर वेहमळ

13 आयंका पौलुस ओना दंटातोरतोनि पापूस सहरताल डोंगाते उदसि, पंपुलिया एरियाते मनना पिरगा सहरते होत्तुर. अगा होत्तारित्ते योहान ओर्कुन होळसिसि येस्सलेम मल्सि होत्तोर.

14 हेके पौलुस आनि बरनाबास पिरगा सहरताल तिरियसेके पिसिदिया एरियाते मनना अंताकिया सहरते एवतुर. नोमकेम रोजुने यहुदिल्लुकुना दर्मसास्त्रम कराहना लोते होंचि उदतुर.

15 अगा मूसाना नियम आनि पेनदा कबुरतोर रासतव पुस्तकालुकुन हदुवतुर. हदुवतुस्के दर्मसास्त्रम कराहना लोता अदिकारिल्लुकु पौलुसुन आनि बरनाबासुन, “दादालोरिता! लोकुल्लुकुन कराहनाहाटीं मिहगा बदाना प्रोत्साहन कियाना पोल्ले मत्ते करहट,” इंचि पूसकियालय लोहतुर.

पौलुसना बासन

16 अस्के पौलुस नित्तिसि, लोकुल्लुकुन सपुडदाका कियालय कय तेहाचि वळ्ळकालय दलगुतोर, इस्राएलता लोकुरिता आनि पेनदुक वेरियना वें जातितोरिता, केंजट.

17 ई इस्राएल लोकुल्लुकुना पेन, मना एनकटा पेदू दालुकुन पेर्कुत्ता. ओर इजिप्त देसेमतोरा कयदा हिळु बस्के अयते मत्तुरो, अस्के ओर्कुन पेदू दा कीसि, दाना पेदू दा बलमतोने आ देसेमताल पलाते तत्ता.

18 मना पेदू दालुकुन पेनदा पोल्लें केंजाकोदुर, अयनागानि दगोर-दगोरा नल्पै वर्सनदाका पेन ओर्कुन बय्लि जेगाते ओर्सकुत्ता.

19-20 कनान देसेमता एडुं जातिन नासडेम कीसि, अद बूमि इस्राएल लोकुल्लुकुन, इद मीवा बूमि, इंचि हीता. इव अन्नि आयालय नालुं नुहकुना एबै वर्सां दलगां. पजा सामवेल पोरोलता पेनदा कबुरतोर वायानादाका पेन ओर्कु बच्चुरो न्यायम कियानोर्कुन हीता.

21 आयंका वरोर राजाल गावाले इत्ताहाटी, पेन ओर्कु बेंजामिनना वंसमतोर कीस इननोना मरि साऊल्लुन हीता, ओर नल्पै वर्सां राज्येम कीतोर.

22 मर्रा साऊल्लुनगटाल राज्येम तेंडसि दाविदुंक हीता. दाविदुना बारेमते पेन इल्हा गवाइ वेहता, “यिस्सल पोरोलतोना मरि दाविद, नना इनकुत्ताप नाकु दोर्कतोर, नना वेहतव अन्नि ओर पूरा कीतोर,” इंचि वेहता.

23 “पेन हीता पोल्ले परकारम ईना वंसमताले इस्राएल लोकुल्लुकुन मुक्ति हियानोर इंचि येसुन, पेन लोहता.

24 येसु वायाका मुन्ने, बापतिस्मा हियना योहान इस्राएलता अंटोर लोकुल्लुकुन, मनसु मार्सकुंचि बापतिस्मा एतट,” इंचि वेहतोर.

25 योहान ओना कबाटुन पूरा महना वेलाते, “नना बोन इंचि मिमेट इनकुंचितिर? मिमेट बोनयते एदुर हळसंतिर, ओन नना आयोन. ओर नावा पज्जो वायानुर, नना ओना कालुकुना हेर्पुहक तेंडना लायक इंका हिल्लेन,” इंचि इत्तोर.

26 मावा दादालोरिता, अब्राहामुना वंसमतोरिता आनि पेनदुक वेरियना वें जातितोरिता! मुक्ति हियना बेसता कबुरतुन पेन मनागा लोहचीता.

27 येस्सलेमते मनानुर आनि ओरा अदिकारिल्लुकु येसुन एरपाट किया हिल्लुर. वारा-वारम नोमकेम रोजुने पेनदा कबुरतोरा पोल्लें हदुवतुर, गानि अदुन एरपाट कियवा, येसुन हळ्किसि आ पेनदा कबुरतोरा पोल्लेन पूरा कीतुर.

28 हामुर सिक्सा हियनलायक बतले तप्पु येसुनलोप्पो दोर्काकोन्नागानि ओन हळ्कगोम इंचि पिलातुस राज्यपालुंक विनंति कीतुर.

29 येसुन बतल-बतल कियानुर इंचि रासि मत्तानो, अव अन्नि पूरा आतस्के ओन कसुनपोर्रोटाल हिळु रेहचि बोंदा दोस्तुर.*

30 गानि पेन ओन हामुरताल मर्रा तेहता.

31 तेहतारित्ते, गालिल एरियाताल येस्सलेमदाका ओनतोनि होत्तोर्कुंक वेल्लेने रोजकुनदाका ओर दिस्सेक मत्तोर. इंदके लोकुल्लुकुना मुन्ने येसुना गवाइ इंचि ओरे मंतुर.

32 पेन मना पेदू दालुकुन मुन्नेने पोल्ले हीसि मत्ता. अदे पोल्लेता कबुरतुन मोमोट मीक वेहासेक मंतोम.

33 इल्हा पेन येसुन हामुरताल मर्रा तेहाचि, मना पेदू दालुकुन मुन्नेने हीता पोल्ले, इंदके मनाहाटीं निजम आता. इदु, बजन संहिता रोंडो बजनते इल्हा रासि मंता:

“निमे नावा मरिन आदिन, इय्यला नना नीकु बाबोन आतन.” ☆

34 पेन ओन हातोरा लोप्पोटाल तेहता, ओर मर्रा बस्केने कळियसि होन्नोर.

“नना दाविदुंक तप्पाकोटा हीतन इत्ता पवित्रमाता आसिर्वाद नीकु हीतन,” ☆

इंचि इत्ता.

35 अल्हेने इंकुदि बजनते,

“नीवा पवित्र मनकन कळियसि होना हिथ्यिन.” ☆

इंचि इत्तोर.

36 “दाविद पेनदा इच्चा मत्तापे ओन्क हीता सेवा-कबाटुन ओना कालमते महाचि हातोरा. हातस्के ओना पेदू दालुकुन बगा बोंदा दोस्तुरो, अगने ओन इंका बोंदा दोस्तुर ओर कळियसिगुडा होत्तोर.

37 गानि पेन तेहातोर मात्रम कळियसि होना हिल्लोर.”

38 अदुनहाटीं मावा दादालोरिता! मिमेट दीन तेळियागोटकुंटु. येसुनाहेंदाले मीवा पापालुकुन पेन मापि कीता इंचि मोमोट वेहासेक मंतोम.

39 मूसाना नियम हेंदाल मीकु पापालुकुनाल मापि दोर्को, गानि येसुना पोर्रो विस्वास इरानुर अंटोर्क ओरा पापालुकुनाल मापि दोर्कता.

40 अदुनहाटीं पेनदा कबुरतोर रासता पोल्लें मीपोर्रो वायाकोटा उसारते मंटु, इंचि पेन इल्हा इत्ता:

41 “नावा पोल्लेतुन पास्कानोरिता हळ्ळट, इचंत्रम आसि, हासि दांतिट.

* 13:29 बोंदा दोस्तुर अद कालमते गुट्टातुन तुलाहचि सोंरि कीसि, अवनने पीनगु दोसुंदुर. ☆ 13:33 बजन संहिता 2:7 ☆ 13:34 यसायाह 55:3 ☆ 13:35 बजन संहिता 16:10

बारिल्ले, मीवा रोजकुने नना इसोटा कबळ कीतन गदा,
अदुना बारेमते बोर वेहिनागानि मिमेट विस्वासम किय्यिर,”[☆]
इंचि पेन वेहता.

42 पौलुस, बरनाबास दर्मसास्त्रम कराहना लोताल पलाते पेयसतस्के, “इव पोल्लें वायाना नोमकेम रोजुने इंका एक्को माकु वेहाटु,” इंचि लोकुल्लुक ओरतोनि विनंति कीतुर.

43 वेल्लेटुर यहदिल्लुकु अल्हेने यहदि जातिते वाता वेरे जातितोर, पौलुस, बरनाबासुना पज्जो होतुर. ओर, लोकुल्लुकुनतोनि वळकसेके,
“बस्केळक पेनदा कुर्पाते मंटु,” इंचि ओर्कु वेहतुर.

44 इंकुंदि नोमकेम रोजुने सामिना पोल्लें केंजालय, पूरा नाटेनोर इत्ताप जमा आतुर.

45 अच्चो वेल्ले मंदितुन हळसि यहदिल्लुकुना जीवा मसुल्ला, अदुनहाटीं ओर पौलुसना पोल्लेंक विरोद कीसि ओन बदनाम कियालय दलगतुर.

46 गानि पौलुस आनि बरनाबास वेरियाकोटा, मीकु पेनदा पोल्ले मुन्नेने वेहना अब्सरम मत्ता, गानि मिमेट दान हय्सका, बस्केळक पिस्सना पिस्वरकु लक्कु आताप हुपिस्तिर. अदुनहाटीं इंदके मोमोट यहदि आयवोरहेके दांतोम.

47 बारिल्ले पेन माकु इल्हा आदेस हीता:

“सामि लोकुल्लुकुन बल्हा पिसागोटंतोर इदु पोल्ले निमे दुनियंता वेहगोम इंचि,

नना नीकुन वेरे जातितोरहाटीं वेडसि हुप्सानोन कीतन,”[☆]

इंचि इत्तोर.

48 ई पोल्ले केंजसि वेरे जातितोर वेल्ले कूस आसि, सामिना पोल्लेता कदर कियालय दलगतुर. बचटूकुन अयते बस्केळक पिस्सना पिस्वरताहाटीं पेन पेरकुत्तनो, अचटुर येसुनपोर्रो विस्वासम कीतुर.

49 इल्हा सामिना पोल्लें पूरा एरियाता लोकुल्लुकुं क तेळियता.

50 गानि यहदि लोकुल्लुकु मात्रम निजमाता पेनदुन आरादना किय्यानव सहरता कदरगल्ला वेरे जातिता मुर्ताहकुन, पेदूदाल्लुकुन एक्किस्तर. अस्के ओर पौलुस, बरनाबासुन पक्का तकलिप कीसि ओर्कुन आ एरियाताल पलाते पेचाहतुर.

51 ओर इव्वुर ओरा काल्लुकुना दुब्बा अग्गेन दुल्पिसि ओरापोर्रो विरोद हुप्पिचि इकोनिया सहरते पेय्सि होतुर.

52 गानि अंताकियाता विस्वासुल्लुकु पवित्र आत्माते पूरा निडिस आनंदमते मत्तुर.

14

पौलुस आनि बरनाबास इकुनियुम सहरते सेवा कीतुर

1 इल्हा पौलुस आनि बरनाबास इकोनिया सहरते यहदिल्लुकुना दर्मसास्त्रम कराहना लोते होतुर. अगा पेनदा पोल्लें बेस वेहतुर. अदुनहाटीं यहदिल्लुकु आनि युनानि जातितोर वेल्लेटुर लोकुल्लुकु येसुनपोर्रो विस्वासम कीतुर.

2 गानि विस्वासम कियवा यहदिल्लुकु, विस्वासुल्लुकुनतोनि जगडम कियालय वेरे जातितोर्कुन एक्किस्तर.

3 अयनागानि पौलुस आनि बरनाबास अगा वेल्लेने रोजकु आगिसि मत्तुर. सामिना कुर्पाता बारेमते वेरियाकोटा वेहचेके मत्तुर. ओर वेहना पोल्लें निजम इंचि गवाइ हुप्सालय सामि ओरा कय्दाल चिन्हां, इंचंन्रमता कबाहक हुप्सुंदुर.

4 गानि हेके सहरते वरोनद वरोंकु अर्काकोटा आता. इच्चुर यहदिल्लुकुनहेके, इच्चुर बारे प्रेरितुल्लुकुनहेके आतुर.

5 वेरे जातितोर आनि यहदिल्लुकु ओरा अदिकारिल्लुकुनतोनि कलियसि पौलुसुन आनि बरनाबासुना कदर रेहचि बंडां हुक्कालय तयार आतुर.

6-7 इदु पोल्ले पौलुसुं क आनि बरनाबासुं क एर्का आता. अदुनहाटीं ओर लुकावनिया जिल्लाते विततुर. अद जिल्लाता लिसरा, दिरबे सहरते आनि दग्गेटा नाहकुने होंचि पेनदा बेसता कबुर वेहुंदुर.

पौलुस आनि बरनाबास लुञ्जाते सेवा कीतुर

8 लिसराते वरोर कुंटी मनकल उदिस मत्तोर. ओर पुटतगाटाल बस्केने ताका हिल्लोर.

9 पौलुस वेहना पोल्लें ओर केंजसेके मत्तोर. अस्के पौलुस ओन उंदेतीर हळसि, ई कुंटीन लोप्पो बेस आयना विस्वासम मंता, इंचि इनकुत्तोर.

10 अस्के पौलुस ओन, “तेदसि बेस नित्ता,” इंचि लगांचि इत्तस्के, ओर एगरिसि तेदसि ताकालय दलगतुर.

11 लोकुल्लुकु पौलुस कीतदुन हळसि, लुकावनिया बासाते, “पेनकु मनकना रूपमते मनागा रेय्सि वातां,” इंचि लगांचि इत्तुर.

12 ओर बरनाबासुन, जेयस पेन, इत्तुर. *आनि पौलुस वळ्ळकानंटे पेदूदा मत्तोर इंचि ओन, हिरमेस पेन,† इत्तुर.

13 जेयस पेनदा गुळि, नाटुक मुन्ने मत्ता. दाना पेर्मांल, लोकुल्लुकुनतोनि कलियसि, पौलुस आनि बरनाबासुनाहाटीं मोक्कु हियालय कोदां, पुंगाहकुना दुम्में पीकुंचि सहरते नेंगना गलमानगा तत्तोर.

14 गानि ओर इल्हा कीतद केंजसि, प्रेरित बरनाबास आनि पौलुस ओरां कपडिं हराहकुत्तुर.‡ लोकुल्लुकुना लोप्पो वितसि,

☆ 13:41 हबक्कूक 1:5 ☆ 13:47 यसायाह 49:6 * 14:12 जेयस पेन युनानि लोकुल्लुकुना मोदोल पेन. † 14:12 हिरमेस पेन युनानि लोकुल्लुकुना वेरे पेनकुं कबुर हियना पेन. ‡ 14:14 कपडिं हराहकुत्तुर पेनदुक विरोदमते बद्दना पोल्ले केंजते यहदि लोकुल्लुकुं क होंग वासि कपडिं हराहकुंदुर.

15 “ए लोकुरिटा, मिमेट इल्हा बारि कीसंतरि? मोमोटगुडा मीलेसीटा मनकालोरमे. मिमेट वट्टिट पोल्लेन होळसि, जीवाते मनना पेनदाहेके तिरियट. अदे पेन मळ्बुन, बूमितुन, समुद्रमतुन आनि अवटे मत्तव अन्निटवुन पुटिस्ता. इंचि अदे पेनदा बेसता कबुर वेहालय मोमोट वातोम.

16 मुन्नेटा कालमते पेन, अन्नि जातिना लोकुल्लुकुन ओरा इस्टमाताप ओर्कुन मोळका हीता.

17 गानि मीकु मळ्बुनाल पिर्फी हीता, कालमनुसार पंटा पंडिस्ता, तिनालय गाटो हीसि, मीकुन आनंदमते इरसि, ‘ननाने निजम पेनदुन आंदुन’ इंचि दाना बेसता कबाहकुनाहेंदाल मीकु हुपिस्ता,” इंचि वेहतोर.

18 अच्चोन वेहिनागानि वेल्ले तिप्पलते ओर्क मोक्कु हियालय वातोर्कुन आपा परतुर.

19 आयंका पीसिदियाता अंताकिया सहरताल, इकोनिया सहरताल इच्चुर यहुदिल्क वातुर. वासि लोकुल्लुकुन ओरा बाजुंक कीकुंचि, पौलुसुनपोर्रो बंडां हुक्तुर. ओर हातोर इनकुंचि ओन सहरता पलाते इग्गिस ओतुर.

20 पजा सिस्स्युल्लुकु ओनगा वासि सुट्टु निततुर. अस्के पौलुस तेदिस सहरते होत्तोर. मर्रा इंकुंदि रोज बरनाबासुनतोनि दिरबे सहरते होत्तोर.

पय्नेम महाचि पौलुस अंताकिया सहरकु मल्लिस वायमळ

21 पजा पौलुस आनि बरनाबास दिरबे सहरता लोकुल्लुकुंक पेनदा बेसता कबुर वेहचि, वेल्लेटोर्कुन सिस्स्युल्लुकु कीतुर. पजा लिसरा, इकोनिया, पीसिदियाता अंताकिया सहरते मल्लिस होत्तुर.

22 अगा होंचि, “पेनदा राज्येमते होनना इत्ते तिप्पलक वांतां, दानाहाटीं विस्वासमते गट्टिगासि मंटु,” इंचि वेहचि दैरनेम हीतोर.

23 पजा ओर, अगाटा हरेक कलिसियाने पेद्दालुकुन निलाहतुर. ओराहाटीं ओक्कापोद्दु मंचि पारतना कीसि, ओर बा सामिनपोर्रो अय्ते विस्वासम कीतुर, आ सामिक अप्पजेपतुर.

24 आयंका ओर पिसिदियाताल पंपुलिया एरियाते होत्तुर.

25 अगा होंचि, पिरगा सहरते पेनदा बेसता पोल्ले वेहचि अतलिया सहरते होत्तुर.

26 अगटाल डोंगा उदसि सिरियाता अंताकियाते मल्लिस होत्तुर. बद कबळ अय्ते ओर पूरा कीतुरो, अद कबळ पेनदा कुर्पाते अदे जेगाताल सुख कीसि मत्तुर.

27 अगा होत्तरित्ते, ओर कलिसियातोर्कुन जमा कीसि, पेन ओरा कय्दे बल्हा पेद्दा-पेद्दा कबाहक कीता, वेहतुर. वैरे जातितोर्कुनगुडा विस्वासम कियालय पेन बल्हा हर्रि कीता, इंचि वेहतुर.

28 आयंका सिस्स्युल्लुकुनतोनि वेल्लेन रोजकु ओर अगा मत्तुर.

15

येस्सलेमते उंदि पंचादि

1 पजा यहुदियाताल इच्चुर लोकुल्लुकु अंताकियाक वासि, “मूसाना नियम परकारम मीवद कतना आयाकॉटे मीकु मुक्ति दोर्का पर्रो” इंचि अगाटा दादालोर्कुंक कराहलय दल्गुतुर.

2 ओर लोकुल्लुकु कराहता पोल्ले पौलुसुंक, बरनाबासुंक नच्चा हिल्लें. अदुनहाटीं ओरा नड्डुम वेल्लेन लोल्लिं आतां. अय्ते ई लोल्लिं कु समादानम पूस कियनाहाटीं पौलुस, बरनाबास आनि इच्चुर विस्वासुल्लुकु येस्सलेम होंचि अगाटा प्रेरितुल्लुकुंक, पेद्दालुकुंक कलियना इंचि निरनायम कीतुर.

3 पजा अगाटा कलिसियातोर ओर्कुन साली कीतुर. अय्ते ओर पिनिके, सामरिया इनना एरियानाल तिरियसेक येस्सलेम होत्तुर. होननेके वैरे जातितोर ओरा मनसु बल्हा मार्सकुत्तुर, अदुन बारेमते वेहासेक होत्तुर. इल्हा ओर अगाटा दादालोर्कुन इरगा कूस कीतुर.

4 ओर येस्सलेम एवतस्के, अगाटा कलिसियातोर, प्रेरितुल्लुकु, पेद्दालुकु ओर्कु बेस आनंदमते कलियतुर. पजा पौलुस आनि बरनाबास पेन ओरतोनि मंचि बता-बता कबाहक कीता, अदंता वेहतुर.

5 अस्के परिसिल्लुकुनाल इच्चुर विस्वासुल्लुकु तेदसि, “वैरे जातितोर कतना तप्पाकॉटा आये पीता, मूसाल वेहता नियम परकारम ओर ताके पीता,” इंचि इत्तुर.

6 अस्के ई पोल्लेन बारेमते विचारम कियालय प्रेरितुल्लुकु आनि पेद्दालुकु उंदगा जमा आतुर.

7 बच्चोनो जेम विचारम कीतारित्ते पत्रु तेदतोर. तेदसि, “नावा दादालोरिटा, वैरे जातितोर नावा तोळदाले पेनदा बेसता कबुर केंजसि विस्वासमते वायाना इंचि, वेल्लेन रोजकु मुन्ने पेन मना अंटोर नड्डुमताल नाकुन पेर्कुत्ता. इद संगति मीकु अंटोर्क एर्के मंता.

8 मनकालोर्कुना मनसुन एरपाट कियाना पेन, बल्हा मनाकु पवित्र आत्मातुन हीता, अल्हेने ओर्कु इंका हीसि ओरतोनि कलियसि मत्ता संगति मनाकु वेहता.

9 ओर विस्वासम कीताहेका पेन ओरा मनसुकुन इंका बेस कीसि, ओर्कु, मनाकु बतले बेदबावम इर्रा हिल्ले.

10 अय्ते मरि, मनमगुडा मना पेद्दालुकुगुडा कांजा पर्खा कांडितुन मिमेट सिस्स्युल्लुकुना हट्टनपोर्रो ताससि, मीकु पेनदा परिकसा हळानद मंताना?

11 येसु सामिना कुर्पाते मनाकु मुक्ति दोर्कता इंचि मनम नमंमंताम गदा! अल्हेन ओर्कुगुडा मुक्ति दोर्कता इंचि विस्वासम मंता.” इंचि इत्तोर.

12 अस्के बरनाबास आनि पौलस, पेन ओर्कुन वैरे जातितोर लोप्पो लोहचि ओराहेंदाल बसंटा चिन्हां, इचंन्रमता कबाहक कीता, अदुन ओर वेहालय दलगुतुर अय्ते अंटोर लोकुल्लक सपुडदाका आसि ओरा पोल्लें केंजालय दलगुतुर.

13 ओरा वळकुमळ आतारित्ते याकोब इल्हा वळकालय दलगुतोर. नावा दादालोरिता, नना वेहनद केंजट.

14 पेन मोट्टा मोदाला वैरे जातितोर पोर्गे दाना दया हुपिच्चि ओरागटाल इच्चुर्कुन दाना लोकुल्लुकन लेहका बल्हा कीकुत्ता, इदुना बारेमते सिमोन पन्नु मनाकु वेहचि मत्तोर.

15 पेनदा कबुरतोर वेहता पोल्लें इंका इद गटनकु कलियंतां. अव पोल्लें इल्हा रासि मंतां:

16 “नना तिरियसि वासि दाविदना अरसोत्ता राज्येमतुन मर्रा निल्लंतन,
दाना नासडेम आता मुक्का-मुक्कातुन कल्पिसि अद मुन्ने मत्ताप मर्रा कीतन.

17 अस्के पेर्कुत्ता वैरे जातितोर आनि मिगिल्सि मत्ता अन्नि वैरे जातितोर,
पेनदुन पहकानुर, इव पोल्लें पेन वेहता.✱

18 पेन कुद इदुन बारेमते वेल्लेन रोजकु मुन्ने वेहचि मत्ता.”

19 अदुनहाटीं नावा विचारम बतल मंता इत्ते, मनसु मार्सकुचि पेनदाहेके तिरियता आ वैरे जातितोर्कुन मनम तकलिप कियामन्नि.

20 गानि बोम्मांक मोळकतदुन तिनामन्नि, व्यबिचारम कियामन्नि, गोंदके पिसकिसि हक्कता जिवरासिता हव्विं, नेत्तुरतुन तिनामन्नि इंचि ओर्क मनम रासि लोहकोम.

21 बारित्ते ओर एनकाटाल मूसाल वेहता नियमतुन, अन्नि सहरकुने वेहासेक अल्हेन हरेक नोमकेम रोजुननाड दर्मसास्त्रम कराहना लोते हद्विसि वेहासेक मंत्तुर, इत्तोर.

वैरे जाति विस्वासि लोकुल्लुकुं उंदि सिट्टि

22 पजा प्रेरितुल्लुक, पेद्दालुक आनि कलिसियातोर अंटोर कलियसि, अगाटा विस्वासुल्लुकनाल इच्चुर लोकुल्लुकन पेरसि पौलस आनि बरनाबासुनतोनि अंताकियाक लोहना निरनायम कीतुर. पजा बरसब्बान* आनि सिलासुन ईर इव्वुर्कुन पेरतुर. ईर इव्वुरगुडा विस्वासुल्लुकनाल मुक्क्य मनकालोर मत्तुर.

23 ओर होननेके ओरा कय्दे उंदि सिट्टि हीतुर, अद सिट्टिते इल्हा रासि मंता.

अंताकिया, सिरिया, किलिकिया सहरकुने मनना अंटोर वैरे जाति विस्वासुल्लुकुं, येस्सलेमते मनना मीवा पेद्दालुक आनि प्रेरितुल्लुकना हेंदाल जोहार.

24 मावा पावरमगल्ला दादालोरिता, माकुन पूस कियार्कोटेन महागटाल इच्चुर लोकुल्लुक मिहगा वासि ओरा मनसुंक् वाताप वळकिसि मी मनसुने अनमानम पुट्टिचि मीकु तकलिप हीतुर इत्ता संगति मोमोट केंजतोम.

25 अदुनहाटीं मना पावरमगल्ला बरनाबास आनि पौलसुनतोनि, पेर्कुत्ता इच्चुर लोकुल्लुकन मीहेके लोहना इंचि मोमोट अंटोरम कलियसि निरनायम कीतोम.

26 मना अंटोरा किरिस्तु येसु सामिना पोरोलहाटीं बरनाबास आनि पौलस ईर ईरा जीवातुन इंका हियालय तयार आता मनकालोर आंदुर.

27 अय्ते मोमोट सिट्टिते रासता अन्नि पोल्लें यहदल आनि सिलास ओर ओरा तोळदाल मीकु वेहना इंचि ओर्कुन मीहेके लोहसेक मंतोम.

28-29 बोम्मांक मोळकतदुन मिमेट तिनमट, गोंदके पिसकिसि हक्कता जिवरासिता हव्विन, नेत्तुरतुन तिनमट, व्यबिचारमताल लक्कु मंट. इंसंटा अवसरमाता नियमकुंक् तप्पा इंका वैरे बद्दे बर्वु मीपोर्गे वाटा मन्नि इत्ता पोल्ले पवित्र आत्माकु आनि माकु बेस अनपिस्ता. मिमेटगिंटा इव पोल्लेनाल लक्कु मत्ते मीके बेस आयार. मीकु अंटोर्क जोहार.

30 इल्हा रासि ओर्कुन अगाटाल साल्ना कीतंका, ओर पजा अंताकियाक एवतुर. एव्विसि, अंटोर विस्वासुल्लुकन जमा कीसि अद सिट्टितुन ओरा कय्दे हीतुर.

31 सिट्टिते रासि मत्ता प्रोत्साहन हियना पोल्लें हद्विसि ओर्क अंटोर्क वेल्लेन कुसि आता.

32 यहदल आनि सिलास, ईर इव्वुरगुडा पेनदा कबुरतोर आंदुर. अदुनहाटीं अगाटा विस्वासुल्लुकनतोनि वेल्लेनजेम वळकिसि ओर्कुन विस्वासमते गट्टिगा कीसि ओर्कुं प्रोत्साहन हीतुर.

33 इल्हा यहदल आनि सिलास कोन्नि रोजकु अगा मत्तुर. पजा अंटोर विस्वासुल्लुक जमा आसि, ओर्कुन बोर अय्ते अंताकियाक लोहतुरो ओराहेके वापस येस्सलेम होनालय सांतिते साल्ना कीतुर.

34 गानि सिलास अंताकियातेन मनना विचारम कीतोर.†

35 पजा पौलस आनि बरनाबास कोन्नि रोजकु अंताकियातेन आगतुर. अगाटा वेल्लेन लोकुल्लुकनतोनि कलियसि सामिना पोल्लें कराहसेक, बेसता कबुर वेहासेक मत्तुर.

पौलसनद रोंडो पय्नेम

(15:36–18:22)

✱ 15:17 आमोस 9:11-12 * 15:22 बरसब्बा इन यहदल इंचिगुडा इंतुर. † 15:34 इद वचनम कोन्नि पांडु लिपिने हिल्ले.

पौलुस, बरनाबास वेरे-वेरे आंतुर

36 इच्चुं रोजकु आतारित्ते, “मनम सामिना पोल्ले बव-बव सहरकुने वेहतोमो अव अन्नि सहरकुने मर्रा दाकोम. पेनदुन नम्मुकुत्ता पजा अगाटा विस्वासुल्लुकुना पिस्वरकु बल्ला बतल मंतांगो ह्ळसि वाकोम,” इंचि पौलुस बरनाबासुन इत्तोर.

37 अय्ते बरनाबासुंक मरकुसुन (ईन योहानगुडा इंतुर) इंका पज्जेके ओयाना मनसु मत्ता.

38 गानि, पेनदा कबळते आकिरदाका कलियसि मनाकौटा नड्डुमे पंपुलिया एरियाताल होळसि वापस होत्ता मरकुसुन पज्जो ओयमळ पौलुसुंक नच्चा हिल्ले.

39 इल्हा ओर इव्वुर नड्डुम वेल्लेन पोल्ले आसि ओर वेरे-वेरे आतुर. अस्के बरनाबास मरकुसुन पीकुचि डोंगाते उद्दिस साइप्रस इनना दीबेक होत्तोर.

40 पजा पौलुस ओनतोन मननाहाटीं सिलासुन पेरकुचि अगटाल होत्तोर. अय्ते अगाटा विस्वासुल्लुकुना पौलुसुंक आनि सिलासुंक पेनदा कुर्पा दोर्कानाहाटीं पारतना कीसि ओर्कुन पेनदा कय्दे अप्पजेपतुर.

41 अस्के ओर सिरिया, किलिकिया इनना एरियानाल तिरियसेके अगाटा कलिसियानोर्कुंक कलियसि पेनदा विस्वासमते बेस एदगानाहाटीं ओर्कु बेसता पोल्ले वेहासेक होत्तुर.

16

पौलुसुंक तिमोति कलियंतोर

1 पजा पौलुस मर्रा दिरबे इनना सहर होंचि अगटाल लिसरा इनना सहर होत्तोर. ह्ळ्ळा! अगा तिमोति पोरोलतोर वरोर सिस्सुड मत्तोर. ओना तल्लुर यहुदि जातिता उंदि विस्वासि मुरतळ आंद. गानि ओना बाबाल वेरे जातितोर (युनानि जातितोर) मत्तोर.

2 लिसरा, इकोनिया सहरकुने मनना विस्वासुल्लुकु ओन बेस मनकल इनुंदुर.

3 अय्ते पौलुस, तिमोतिन ओना पज्जेके ओयाना विचारम कीतोर. गानि अद एरियाते मनना अंतोर यहुदि लोकुल्लुकुंक, तिमोति वेरे जातितोना (युनानि जातितोना मर्रा) मर्रा इंचि एर्का मत्ता, अदुनहाटीं यहुदिल्लुकुंक समादानम आयना इंचि पौलुस तिमोतिना कतना कियागोटोर.

4 अस्के ओर येस्सलेमता प्रेरितुल्लुकु आनि पेदुदाल्क वेहता पोल्लेन सहर-सहर होंचि वेहचि, अव पोल्लेन परकारम ताकना इंचि वेहासेक होत्तुर.

5 इल्हा अगाटा कलिसियानोरा विस्वासम गट्टिगासि इंका वेल्लेन लोकुल्लुकु विस्वासमते वासि रोज-रोज वेल्लेन मंदि आतुर.

पौलुसुन मेसिडोनिया एरियाते केयमळ

6 ओर्कुन पवित्र आत्मा, ‘आसिया एरियाते पेनदा पोल्ले वेहा मन्नि’ इंचि इत्ताहाटीं ओर अदे एरियाता पुगरिया, गलातिया एरियानाल होत्तुर.

7 पौलुस आनि तिमोति मूसिया एरियाता गेट्टुदाका एवतस्के ओर बिनुनिया एरिया होनना कोसिस कीतुर. गानि येसुना आत्मा अगा इंका होन्ना हिया हिल्ले.

8 अय्ते ओर मूसियाताल त्रोआस सहरते एवतुर.

9 अदे नर्का मेसिडोनिया एरियातोर वरोर मनकल, निमे मेसिडोनियाते वासि, मावा सहायम कीम, इंचेक विनंति कीसेके मंतोर. इल्हा पौलुस दर्सनमते ह्ळत्तोर.

10 ओन्क इल्हा दर्सनम आतारित्ते, आ लोकुल्लुकुंक पेनदा बेसता पोल्ले वेहालय पेन माकुन केयता इल्हा इनकुचि मोमोट अस्केन मेसिडोनिया होनानद विचारम पक्का कीतोम.*

लिदिया मुरताटद मनसु मारियमळ

11 इल्हा मोमोट त्रोआस सहरताल डोंगाते समुद्रम हरि पीसि सवरगा सुमान्राके सहरते एव्वि, इंकुंदि रोजु नियापुलिस इनना सहर होत्तोम.

12 पजा अगटाल पिलिपिया इनना सहर होत्तोम. अद मेसिडोनिया एरियाता मुक्य सहर आंदु. अगा रोमि लोकुल्लुकु मनुंदुर. अद सहरते मोमोट कोन्नि रोजकु मत्तोम.

13 उंदि नोमकेम रोजुने, यहुदिल्लुकुना पारतना कियाना जेगा, सहरता पलाते बेरेड ओड्डुंक मंदार इंचेके मोमोट होत्तोम. अगा पारतनाकु वासि मत्ता मुर्ताह्कुनतोन उद्दिस वळकसेके मत्तोम.

14 अवुन लोप्पो उंदि लिदिया पोरोलता मुरतळ मत्ता. अद तुयतीरा सहरतद आंद. दान्क पेनदापोर्री वेल्लेन विस्वासम मत्ता. अद वेल्लेन दराता नेडि पंडि रंगुना कपडि अम्मुंदु. अद बेस मनसु दोस्सि मावा पोल्ले कैजसेके मत्ता. पौलुस वेहना पोल्लेन बेस कैजालय सामि दाना मनसुन तयार कीतोर.

15 अद आनि दाना लोते मत्तोर अंतोर बापतिस्मा एतारित्ते अद, “मिमेटगिंटा नाकुन पेनदा निजम विस्वासि मुरतळ इंचि इनकुनानय्ते नावा लोन वासि आगट,” इंचि माकुन विनंति कीता. अस्के मोमोट दाना लोन होत्तोम.

पौलुस, सिलास जेलने अरंतुर

* 16:10 इगोटाल ई पुस्तकमतुन रासता लूकलगुडा पौलुसुनतोन कलियतोर.

16 उंदि मल्का मोमोट पारतना कियाना जेगातेके होंचेके मत्तोम, अस्के माकु उंदि दासि पेगिड कलियता, दाना लोप्पो बविस्य वेहाना आत्मा† मत्ता. अद लोकुल्लुकुं ओरा बविस्य वेहचि दाना मालकुल्लुकुं वेल्लेन दनम संपलिच्चि हियुंदु.

17 अद, “ई मनकालोर अन्निकन्ना पेदूदा पेनदा सेवाकुल्लक आंदुर. ईर मीकु मीवा पापमताल मुक्ति दोर्कना हर्दा बारेमते वेहासेक मंतुर,” इंचि वरगेयसेके पौलुस आनि मावा पज्जो वाता.

18 अद वेल्ले रोजकुनाल इल्हेने वेहासेक मत्ता अय्ते पौलुस परेसान आतोर. अदुनहाटीं ओर पजोळ्ळक तिरियसि, “येसु किरिस्तुना पोरोलते नना नीकु आदेस हीसेक मंतन, ई पेगिटाल पेय्सि होन,” इंचि आ आत्मातुन इत्तोर. अस्के आ आत्मा पेगिटाल बिराना पलाते पेय्सता.

19 पजा आ पेगिटा मालकुल्लुकुं दोर्कना दनम दोर्काकोंटा आताहेंके ओर पौलुसुन आनि सिलासुन दोर्कापीसि, इग्गिसेके नड्डुम सहरते अदिकारिल्लुकुना मुन्ने ओतुर.

20 रोमि अदिकारिल्लुकुना मुन्ने ओसि, “ईर यहुदि लोकुल्लक आंदुर. मावा नाटेने वेल्ले तकलिप कीसंतुर.

21 ईर वेहना रीति-रिवाजकुन परकारम ताकमळ मावा रोमि लोकुल्लुकुना नियमकुना विरोदमते मंता,” इंचि इत्तुर.

22 लोकुल्लुकुना मंदागुडा पौलुस आनि सिलासुना विरोदमते तिरियतुर. रोमि अदिकारिल्लक, पौलुस आनि सिलासुना कपडिं हराहचि ओर्कुन दुडुडुकुने तनना आदेस हीतुर.

23 ओर्कुन पक्का तंतारित्ते जेलने वाट्सि, ओरपोरों कडक पहारा ईराना इंचि जेलना अदिकारिक आदेस हीतुर.

24 ओन्क इल्हा आदेस दोर्कतारित्ते ओर्कुन जेलना लोप्पोटा अरति वाट्सि, ओरां काल्कुन उंदि मोट्टुं कु बोल अरहचि दोहतोर.

25 नळजाम नर्काटा वेलाते पौलुस, सिलास पेनदा स्तुति पाटां पारसेके, पारतना कीसेक मत्तुर. जेलने मत्ता वैरेतोर केंजसेके मत्तुर.

26 अस्के उंदेदम बूमि इल्हा कदुलता गदा, जेलना पुनादि कदुलसि जेलनव अन्नि तल्पुक उंदे मल्का कुल्ला आतां. जेलने मत्ता अंटोरा बेडी लेंगसि होलां.

27 जेलना अदिकारि निद्राताल तेदसि हळतस्के जेलना तल्पुक कुल्ला दिसतां. अदुन हळसि, जेलने मत्तोर अंटोर पेय्सि वित्तुर बारे, इनकुंचि, ओनाद ओरे कोहककुंचि हांतन इंचि कसेर तेहतोर.

28 गानि पौलुस, “मोमोट अंटोरम इग्गेने मंतोम, नीवद निमेने नुकसान कीकुनमा,” इंचि जोरते वरगेयतोर.

29 अस्के वरोनतोनि वेडसि ताया वेहचि आ अदिकारि बिराना लोप्पो होत्तोर. वनकुसेक पौलुस, सिलासुना काल्कुनपोरों अरतोर.

30 पजा ओर्कुन पलाते तच्चि, “दादालोरिटा, पापाल्कुनाल मुक्ति दोर्कालय नाकु बतल किया पीता?” इंचि पूसकीतोर.

31 अस्के, “निमे येसु सामिना पोरों विस्वासम ईरां, नीकु, नीवा लोते मत्तोर अंटोर्क मुक्ति दोर्कता,” इंचि ओर इत्तुर.

32 ओर ओन्क, ओना लोते मत्ता अंटोर्क पेनदा पोल्लें वेहतुर.

33 अस्के जेलना अदिकारि अदे नर्का अदे वेलाते ओर्कुन अगटाल ओसि, ओरां पुनकुन नोरतोर. पजा आल्सेम कियाकोंटा ओर, ओना लोते मत्तोर अंटोर बापतिस्मा येततुर.

34 पौलुस, सिलासुन ओर ओना लोन पीसि ओसि ओर्कुं गाटो दोस्तोर. इंदके पेनदापोरों विस्वासम इरताहेंके ओर, ओना लोते मत्तोर अंटोर इरगा कूस आतुर.

35 पंगतारित्ते रोमि अदिकारिल्लक, ओर्कुन होळसीम्टु इंचि जेलना अदिकारिक वेहालय इच्चुर सिपाइल्लुकुन लोहतुर.

36 जेलना अदिकारि, “मीकुन होळसगोम इंचि रोमि अदिकारिल्लक सिपाइल्लुकुन लोहचीतुर, इंदके मिमेट सांतिते पेय्सि होंदु,” इंचि पौलुसुन इत्तोर.

37 अस्के पौलुस, “मोमोट इंका रोम देसेमता रहिवासिल्लके आंदुम. अय्नागानि ओर मावा बतले तप्पु हळाकेने माकुन लोकुल्लुकुना मुन्ने तंतुर, जेलने वाटसीतुर. इंदके सपुडदाका बोर्कु एरपाट हिलाकोंटा माकुन होळसियालय हळसंतुर, गानि इल्हा आयापरों. माकुन होळसानद मत्ते ओर कुद इग्गे वासि होळसियिरकांटी,” इंचि इत्तुर.

38 सिपाइल्लक होंचि रोमि अदिकारिल्लुकुं इद संगति वेहचीतुर. पौलुस, सिलास ईर रोम देसेमता रहिवासिल्लक आंदुर इंचि रोमि अदिकारिल्लुकुं तेळियतारित्ते ओर इरगा वेरियतुर.

39 आयंका रोमि अदिकारिल्लक वासि ओर्कुन मापि तल्लिसि पलाते ओतुर. ओर्क विनंति कीसि इद सहर होळसि होनालय वेहतुर.

40 पौलुस, सिलास जेलनाल पलाते पेय्सि लिदियाना लोन होत्तुर. विस्वासि दादालोर्कुं कलियसि, ओर्कुं प्रोत्साहन हीसि अगटाल पेय्सि होत्तुर.

17

तेसलोनि सहरते पौलुस आनि सिलास

1 पजा ओर अपिपुलि आनि अपुलोनिया सहरकंता तिरियसेके-तिरियसेके तेसलोनि सहरते एवतुर. अगा यहुदिल्लकनद उंदि दर्मसास्त्रम कराहना लोन मत्ता.

† 16:16 बविस्य वेहाना आत्मा इगे मनना आत्मा देय्यमता आत्मा आंद.

2 पौलुस ओना अलवट परकारम यहुदिल्लुकुना दर्मसास्त्रम कराहना लोतागा होतोर. होंचि मूड नोमकेमकुन दाका ओरतोनि दर्मसास्त्रमता बारेमते चर्चा कीतोर.

3 अगा ओर, किरिस्तुना हायमळ आनि हामुरताल तिरियसि तेदमळ बच्चोनी अवसरम मत्ता, इत्ता संगतितुन दर्मसास्त्रमताल हद्विसि ओर्कु बेस तेळियागोटिस वेहतोर. पजा बा येसुना बारेमते अयते नना मीवा मुन्ने वेहसेक मंतनो आ येसे किरिस्तु आंदुर, इंचि ओर्कु वेहतोर.

4 इल्हा इच्चुर लोकुल्लुकुं निजम अनपिच्चि ओर पौलुस, सिलासुनहेके कलियतुर. पेनदुक वेरियना वेल्लेटुर युनानि लोकुल्लुकुगुडा ओरतोनि कलियतुर. अचोने आयका वेल्लेन बेस पोरोल होत्ता मुर्ताहकगुडा ओरतोनि कलियसि मत्तां.

5 गानि यहुदिल्लुकुं मात्रम मंटा अरसेक मत्ता. ओर इच्चुर बदमासुल्लुकुन जमा कीसि सहरते लोल्लिं कीतुर. बल्हा कीसन्ना गानि पौलुस, सिलासुन लोकुल्लुकुना मुन्ने तायागोम इंचि ओर यासोन इनानोना वरोन लोतपोरो होंचि अरतुर.

6 पौलुस, सिलास ओर्कु दोर्का हिल्लुर अयते यासोन आनि इच्चुर दादालोर्कुन सहरता अदिकारिल्लुकुन मुन्ने इग्गिस ओतुर. ओसि, “ईर मनकालोर पूरा दुनियातुने हिळ-पोरो कीतुर, इंदके इग्गेगुडा वातुर.

7 ईरकु यासोन ओना लोन मनालय जेगा हीतोर. ईर अंतोर कैसर* राजाना नियमकुं अड्डम कबळ कीतुर. अचोने आयका ओर, इंकावरोर राजाल मंतोर ओना पोरोल येसु आंद,” इंचि वेहांतुर.

8 इद पोल्लेतुन केंजसि अगा मत्ता लोकुल्लुकुं आनि सहरता अदिकारिल्लुकु इरगा होंगुं वातुर.

9 पजा यासोन हेंदाल आनि कळमातोरहेंदाल दंडगु तेंडकुं चि, रासकुं चि ओर्कुन होळसीतुर.

बिरिया इनना सहरते पौलुस आनि सिलास

10 पजा बिराना नर्काटद-नर्केन दादालोर पौलुस, सिलासुन बिरिया इनना सहर लोहचीतुर. ओर अगा एवतारिल्ले यहुदिल्लुकुना दर्मसास्त्रम कराहना लोते होतुर.

11 तेसलोनि सहरता यहुदिल्लुकुंनना इगेटा यहुदिल्लुकुं बच्चोरो बेस मत्तुर. ईर पौलुस वेहना पोल्लेन बेस मनसु ताससि केंजुंदुर. हरेक रोजु दर्मसास्त्रमतुन हद्विसि पौलुस वेहना पोल्लें निजमेना इंचि बेस अर्तम कीकुनुंदुर.

12 इल्हा वेल्लेन मंदि यहुदिल्लुकुं विस्वासम कीतुर. यहुदिल्लुकुन लेहकने बेस कदर मत्ता युनानि मुर्ताहक-मांडुसागुडा विस्वासम कीतुर.

13 गानि बस्के अयते पौलुस, पेनदा पोल्लें बिरिया सहरतेगुडा होंचि कराहचंतोर इंचि तेसलोनि सहरता यहुदिल्लुकुं तेळियतनो, अस्के ओर अगा वासि लोल्लिं कियमळ, लोकुल्लुकुं एकरेवुल्लुकुं वेहमळ सुम्ब कीतुर.

14 अदुनहाटीं दादालोर पौलुसुन बिराना समुद्रम ओड्डुनहेके लोहचीतुर. गानि सिलास, तिमोति मात्रम अग्गेन आगतुर.

15 पौलुसुनतोनि बोर अयते होत्तुरो ओर पौलुसुन एतेंस इनना सहरदाका अरहतुर. पौलुसुन हेंदाल, सिलास, तिमोति बिराना ओनगा वायागोम, इंचि इत्ता आदेस पीकुं चि ओर अगटाल मल्लिसि बिरिया सहरकु वातुर.

एतेंस सहरते पौलुस

16 पौलुस, एतेंस सहरते सिलास आनि तिमोतिना एदुर हळसेक मत्तस्के, अद सहर बोम्मानतोनि निडिस मत्तद हळसि ओना मनसुने बागा दुक्कम वाता.

17 दानहाटीं ओर रोज-रोज दर्मसास्त्रम कराहना लोहकुने होंचि यहुदिल्लुकुनतोनि आनि पेनदुक वेरियना वेरे जाति लोकुल्लुकुनतोनि चर्चा कियुंदुर. अचोने आयका चौकुल्लुकुने होंचि बोर दोर्कुते ओरतोने चर्चा कियुंदुर.

18 अस्के इच्चुर इपिकुरि आनि स्तोइकि† इनना एक्को तेल्वि मत्ता लोकुल्लुकुं ओनतोनि जगडम दोसकुत्तुर. अटेटाल इच्चुर, “ई पिचुर-पिचुर वळकानोर बतल वेहांतन इंचंतोर?” इंचि इत्तुर. इंचिच्चुर बारे, “ईर अयते वेरे जातितोरा पेनदा बारेमते कराहनोर दिसंतोर” इंचि इत्तुर. पौलुस येसुना बारेमते आनि ओर हासि मर्रा जीवाते तेदतदुन बारेमते कराहुंदुर इंचि ओर अल्हा इत्तुर.

19 आयंका ओन पीसि अरियपगुस‡ इनना पंचादिते ओसि, “निमे कराहना ई पूना पोल्लें बतांगो माकु तेळियानाल वेहा.

20 इंका निमे माकु मोमोट बस्के केंजुवा, तेळियवा पोल्लें वेहचतिन. ई पोल्लेना अर्तम बतलो माकु तेळियागोटिस वेहा.” इंचि विनंति कीतुर.

21 एतेंस सहरता लोकुल्लुकुं आनि वेरेटागटाल वासि अगा मनना पलाता लोकुल्लुकुं, बस्केळक बतलन्ना पूनद केंजालय आनि दाना बारेमते चर्चा कियमळ तप्पा इंका वेरे बतले कबळ कियार्कोदुर.

22 अस्के पौलुस, अरियपगुस इनना पंचादिते नित्तिसि इल्हा वळकालय दलगुतोर. एतेंसता लोकुरिटा! मिमेट अन्नि तीरकुने पेनदा कदर कीसंतोर इत्ता संगति नाकु दिस्संता.

23 नना मीवा सहरअंता तिरियसि मिमेट मोळकना अन्नि वस्तुकुन हळतन. अचोने आयका, “एरपाट हिलवा पेनदाहाटीं” इंचि रासि मत्ता उंदि गदुदेतुन इंका नना हळतन. अयते मीकु एरपाट हिलाकोन्ना मिमेट मोळकना आ पेनदा बारेमतेन नना मीकु वेहंतन.

24 इद दुनियातुन, इद दुनियाते मनना अन्निटवुन पुटिस्ता पेने, बूमि आनि स्वर्गमता सामि आंद. अदुनहाटीं मनकालोर तयार कीता गुळिने अद मन्नो.

* 17:7 कैसर इद राजाना पोरोल आयो. रोम सरकारते अन्निटकन्ना पेदुदा पदवि आंद. † 17:18 इपिकुरि आनि स्तोइकि इद इच्चुर मनकालोरा पोरोल आंद, ईर वेहता हरपीसि ताकानोर्कुन इपिकुरि आनि स्तोइकि इंचि इत्तुर. ‡ 17:19 अरियपगुस इद उंदि पंचादि पोरोल आंद.

25 दानगा बतले तक्को हिल्ले. इंका अदे अंटोर्क ऊपिरि, पिस्वर आनि गावाले मत्तव अन्नि वस्तुक हीता. अय्ते असोटा पेनदुक मनकना कय बतल हिया पर्रता?

26 पेन वरोर मनकन तयार कीता. आ वरोर मनकनतोनि ई दुनियता निडिस मननाहाटीं अन्नि जातिना लोकुल्लुकुन तयार कीता. इंका ओराहाटीं उंदि वेला, ओर मनना जेगांक गेट्टुकु, इल्हा पेने कीता.

27 मनकालोर पेनदुन पहकागोम इंचि दाना मनसु मत्ता. ओक्कला पहकिस-पहकिस दान ओर दोकाबेटकुनानुर. अयना अद मनागटाल बोर्के लक्कु हिल्ले.

28 मनम दानतोने पिस्सेक मंतोम, दानतोने तिरियसेक मंतोम, अद मंता इंचे मनम मंतोम. इचोने आयका, मनम दाना पिलाल्क आंदुम, इंचि मीवा लोप्पोटोरे इच्चुर पाटां रासाना लोकुल्लुकुगुडा वेहातुर.

29 “अय्ते मनम पेनदा मर्कुम आसिगुडा, मनकल ओना तेल्विनसार तयार कीता एंडि, बंगारम आनि बंडाता बोम्मानलेहका पेन मनंता इंचि बस्केने इननायो.

30 मुन्नेटा लोकुल्लुकुना पेनदा बारेमते तेल्वि तक्को लेक्कनहेंका पेन ओर्कुन हळसिगुडा हळवाप कीता. गानि इंदके मात्रम दुनियाता अंटोर लोकुल्लुकु मनसु मार्सकुननाहाटीं आदेस हीसंता.

31 अद पेर्कुत्ता मनकनाहेंदाल, इद दुनियाते मनना हरेक मनकना न्यायम नीतिते क्रियानाहाटीं पेन उंदि रोजुन पिक्स कीता. अचोने आयका अद पेर्कुत्ता मनकन हातोरावेटाल मर्मा जीवा अरहचि अंटोर मनकालोर्कुंक अद हीता पोल्लेतुन रजुव कीता.”

32 बस्के अय्ते लोकुल्लुकु, हातोरावेटाल मर्मा जीवाते तेदतोर इत्ता पोल्ले पौलसुना तोळदाल केंजतुरो, अस्के इच्चुर लोकुल्लुकु ओन कव्तर. गानि इंका इच्चुर मात्रम, “निमे वेहना पोल्ले मर्मा बस्केनना केंजंतोम,” इंचि इत्तुर.

33 अस्के पौलसु पंचादिताल पेय्सि होत्तोर.

34 इच्चुर लोकुल्लुकु विस्वासम कीसि पौलसुं कलियतुर. ओरावेटाल वरोर दियोनुस इनानोर मत्तोर, ओर अरियपगुस पंचादिता मेंबर मत्तोर. अचोने आयका दामेरा इनना पोरोलतद उंदि मुरतळ ओरतोनि मत्ता, इंका वेरे लोकुल्लुकुगुडा मत्तुर.

18

कुरिति इनना सहरते पौलसु

1 पजा पौलसु एतेंस सहर होळसिसि कुरेति सहरते होत्तोर.

2 अगा ओर अकविला इनना पोरोलता यहुदि मनकंक कलियतोर. ई अकविलाल पुंतुस इनना एरियाते पुटतोर. रोम सहरते मनना अंटोर यहुदिल्लुकुन कलादियुस राजाल पेय्सि होंटु इंचि आदेस हीतोर. अदुनहाटीं ओर इटलि एरियाताल ओना मुत्तो पिरिसकिलानतोनि कुरिति वातोर. अय्ते पौलसु ओर्क कलियालय होत्तोर.

3 पौलसुनद आनि अकविलानद इव्वुरद इंका डेरां निलाहना दंदे मत्ता. अदुनहाटीं पौलसु ओरगा वासि आगतोर. ओर अंटोर कलियासि कबळ कियालय दल्युतुर.

4 ओर हरेक नोमकेम रोजुननाड यहुदिल्लुकुना दर्मसास्त्रम कराहना लोहकुने होंचि युनानि, यहुदि लोकुल्लुकुनतोनि चर्चा कीसि ओर्कु बेस तेळियागोट्सि वेहंदुर.

5 सिलास आनि तिमोति मेसिडोनिया एरियाताल वातस्के, पौलसु ओना पूरा वेला पेनदा पोल्लें कराहमळतेन तासुंदुर. इंका यहुदिल्लुकुनतोनि वळकिसि, येसे किरिस्तु आंदुर, इंचि वेहचि गवाइ हियुंदुर.

6 गानि यहुदि लोकुल्लुकु पौलसुन हयसा हिल्लुर. ओना अपमानम कीतुर. अस्के पौलसु ओना कपडिं दुल्पसेके ओर्कुन, “मीवा नेत्तुर मीवा तल्लापोर्री अरि. अव्ते नावद बतल दोसेम हिल्ले. इंदकेटाल नना वेरे जातितोर हेके दांतन,” इंचि इत्तोर.

7 इल्हा पौलसु दर्मसास्त्रम कराहना लोताल पेय्सि दाना बाजुंक मनना तीतु-युसतुस पोरोलता वरोर वेरे जाति बक्तुना लोन होत्तोर.

8 यहुदिल्लुकुना दर्मसास्त्रम कराहना लोतुक अदिकारि मत्ता वरोर क्रिसपुस पोरोलता मनकल, ओना लोतोर अंटोर सामिना पोर्री विस्वासम कीतुर. अचोने आयका कुरेति सहरतोर वेल्लेटुर लोकुल्लुकु पौलसुना पोल्लें केंजसि, सामिनपोर्री विस्वासम इर्सि, बापतिस्मा एततुर.

9 उंदि नर्का सामि दर्सनमते पौलसुं इल्हा वेहतोर, “निमे वेरियाकॉटा वळकसेक होन, सपुडदाका मनमा.

10 इद सहरते नावा वेल्लेन लोकुल्लुकु मंतुर, ननागुडा नीवातोनि मंतन. नीवा पोर्री बोरे कय तेहुर नीकुन बोरे तकलिप किय्युर,” इत्तोर.

11 इल्हा पौलसु एडादि नरादाका अगगेन मंचि ओर्कु पेनदा पोल्लें कराहतोर.

पौलसु गल्लिया इनना राज्यपालुन मुन्ने

12-13 गल्लिया पोरोलतोर वरोर अकाया इनना एरियाक राज्यपाल मत्तोर, अस्के यहुदिल्लुकु अंटोर उंदि आसि, पौलसुं अड्डम तिरियतुर आनि ओन कोरटते पीसि वासि, “ई मनकल नियम परकारम हिल्लुवा पदतकुने पेनदुन आरादना कियालय लोकुल्लुकुं वेहासेक मंतोर,” इंचि इत्तुर.

14 पौलुस वळ्कालय आतोर अचचोटेन गल्लिया राज्यपाल यहुदिल्कुनतोनि, “मिमेट वेहना पोल्ले बदाना तप्पु कीतदुन बारेमते, हिलाकोंटे पेट्टा अन्यायमता बारेमते आसि मत्ते, नना मीवद केंजालय अर्तम मनवड.

15 गानि इद केस, पोल्ले, पोरोल्क आनि मीवा दर्मसास्त्रमता बारेमते मंता. अदुनहाटीं दीन मीवद मिमेटे नेमाहकुंटु. इसोंटा केसकुना न्यायम नना किय्योन,” इंचि इत्तोर.

16 इल्हा इंचि गल्लियाल ओर्कुन कोरटताल पलाते पेचाहतोर.

17 पजा यहुदिल्क, दर्मसास्त्रम कराहना लोतुक अदिकारि मत्ता सोस्तिनेस पोरोलतोन पीसि, कोरटता मुन्नेने तंतुर. अयनागानि गल्लियाल मात्रम जर्गनदाना बारेमते विचारम किया हिल्लोर.

पौलुस सिरिया एरियाता अंताकिया सहरते मल्सि वांतोर

18 पौलुस वेल्लेन रोजकुनदाका अग्गेन कुरेंति सहरते मत्तोर. आयंका अगा मत्ता विस्वासुल्कुन होळसि, मोळ्ककुत्ता परकारम पौलुस किंकिरिया सहर होंचि केल्लक कोरियकुत्तोर. पजा ओनतोनि पिरिसकिला आनि अकविला* ईरकुन पीकुंचि सिरिया एरियाक होनना डोंगाते उद्दिदस इपीसि सहर होत्तोर.

19 इल्हा ओर इपीसि सहरते एवतुर. पजा पौलुस पिरिसकिल्लन आनि अकविलान अग्गेन होळसतोर. ओर वरोरै दर्मसास्त्रम कराहना लोते होंचि यहुदिल्कुनतोनि चर्चा कियालय दलगतोर.

20 आयंका ओर अंतोर, ओन इंका इचुं रोजकु अग्गेन मननाहाटीं विनंति कीतुर गानि ओर, मनोन, इत्तोर.

21 गानि अगटाल पेयसका मुन्ने, “ओक्कला पेनदा मनसु मनानयते नना मिहगा मर्रा वांतन,” इंचि ओर इत्तोर. पजा इपीसिताल डोंगाते उद्दिदस पेयसतोर.

22 पजा ओर कैसरिया सहरते एव्सि, अगटाल येस्सलेम सहर होत्तोर. अगा होंचि अगाटा कलिसियातोर्कुंक कलियसि जोहार कीतोर, पजा अगटाल अंताकिया सहर होत्तोर.

पौलुसुना मूडो पय्नेम

(18:23–21:16)

अप्पुलोस इनानोर इपीसि सहरते

23 अगा इचुं रोजकु मत्तारित्ते मर्रा ओर गलातिया आनि पुगरिया एरियाताल अंतोर सिस्सुल्कुना विस्वासम गट्टिगा कीसेके तिरियतोर.

24 अचचोटेन अप्पुलोस इनानोर वरोर यहुदि मनकल इपीसि सहरते वातोर. ओर सिक्दरिया इनना सहरते पुटतोर. ओर वेल्लेन तेल्वि मत्ता मनकल मत्तोर. ओन्क दर्मसास्त्रम पुरागा तेळियुंदु.

25 ओर सामि वेहता हर्दा बारेमते करियसि मत्तोर. ओर येसुना बारेमते कराहनेके वेल्ले कुसिते बल्हा मत्तद अल्हेन बरोबर कराहुंदुर. गानि बापतिस्माता बारेमते अयते सिराप योहानुना बापतिस्माता बारेमतेन एरपाट मत्ता.

26 अयते ओर यहुदिल्कुना दर्मसास्त्रम कराहना लोते होंचि वेरियाकोटा वळ्कालय सुख कीतोर. उंदि मल्का ओर वळ्कानेके पिरिसकिला आनि अकविला ईर इव्वुर ओना पोल्ले केंजतुर. केंजसि ओन दग्गेर्क केयकुंचि ओन्क पेनदा हर्दा बारेमते इंका बेस तेळियागोट्टिस वेहतुर.

27 अयते अप्पुलोस अकाया इनना एरियाक होनना विचारम कीतोर. अस्के दादालोरगुडा ओन्क बेस दैरनेम हीतुर. अचोने आयका अकाया एरिया पीसि मनना सिस्सुल्कुंक, ईन बेस दग्गेर कीकुट, इंचि उंदि सिट्टि रासतुर. ओर अगा एवतारित्ते, पेनदा कुर्पाहेंदाल विस्वासमते वाता लोकुल्कुंक वेल्ले सहायम कीतोर.

28 बल्हा इत्ते, अंतोर लोकुल्कुना मुन्ने यहुदिल्कुनतोनि जिद्दुने चर्चा कियुंदुर. इंका दर्मसास्त्रमते, येसु सामिए किरिस्तु आंदुर, इंचि ओर्क हुपिचि दान रूजुव कियुंदुर.

19

पौलुस आनि पवित्र आत्मा तेळियवा सिस्सुल्कु

1 अप्पुलोस कुरेंति सहरते मननेके, पौलुस वेरे-वेरे नाहकु तिरियसेके इपीसि सहरते वातोर. अगा ओन्क इचचुर सिस्सुल्क कलियतुर.

2 “मिमेट विस्वासमते वातस्के मीपोर्री पवित्र आत्मा वाताना?” इंचि पौलुस ओर्कुन पूसकीतोर. अस्के, “मोमोट अयते पवित्र आत्मा मंता इंचिगुडा केंजा हिल्लोम,” इंचि आ सिस्सुल्क इत्तुर.

3 पजा, “अयते मरि मिमेट बोना बापतिस्मा एततिर?” इंचि पौलुस पूसकीतस्के, “योहानुना बापतिस्मा एततोम,” इंचि ओर वेहतुर.

4 अस्के, “योहान अयते पापालकुनाल मनसु मार्सकुनना बारेमता बापतिस्मा हियुंदुर. इंका ओर लोकुल्कुंक, ओना पज्जोटाल वरोर वायानोर मंतोर, ओनपोर्री, इत्ते येसुनपोर्री विस्वासम कीम्टु, इंचि वेहुंदुर,” इंचि पौलुस इत्तोर.

5 इद केंजिस ओर येसु सामिना पोरोलते बापतिस्मा एततुर.

* 18:18 पिरिसकिला आनि अकविला ईर इव्वुर मुत्तो-मुय्दो आंदुर.

6 पजा बस्के अयते पौलुस ओरापोर्रो कय इरतोर्रो अस्के ओर अंटोरपोर्रो पवित्र आत्मा रेयता. ओर वैरे-वैरे बासाने वळकालय, बविस्यवानि कियालय दल्गुतुर.

7 ओर अंटोर कलियसि पन्नेडु मंदि मत्तुर.

8 आयंका पौलुस मूड नेल्लुकुनादाका यहुदिल्लुकुना दर्मसास्त्रम कराहना लोते होनुंदुर. वेरियाकॉटा ओरतोनि चर्चा कीसि पेनदा राज्येमता बारेमते ओर्कु तेळियागोट्टिस वेहुंदुर.

9 गानि ओरंटे इच्चुर जिद्दि मनकालोर मत्तुर. ओर विस्वासम किया हिल्लुर. अचोने आयका लोकुल्लुकुना मुन्ने पेन वेहता हर्दा बारेमते रोता-रोता पोल्ले वळकसेक मत्तुर. अदुनहाटी पौलुस, सिस्स्युल्लुकुन ओना पज्जो केयकुत्तोर. आ लोकुल्लुकुन अग्गेन होळसि रोज तरन्नुसना मिटिंग बंगलाते होंचि चर्चा कियुंदुर.

10 रोंडु वर्सनदाका इल्ले ताकसेके मत्ताहाटी आसिया एरिया पीसि मनना अंटोर यहुदि आनि युनानि लोकुल्लुक पेनदा पोल्लेतुन केंजतुर.

इसकिवा पोरोलता पेद्दा पेर्माना मर्कु

11 पौलुसना कयदाल पेन पेद्दा-पेद्दा अद्बूतामाता कबाहक कीसेक मत्ता.

12 इंका लोकुल्लुक पौलुस इट्टा दस्तिगुड्डान, ओना सेल्लान रोगम मत्तोरगा ओते ओरा रोगाल्कंता होनुंदु, देय्याल्क इंका होळसि वित्तुंदु.

13-14 इच्चुर यहुदि लोकुल्लुक, सुट्टु-मट्टु एरियाने देय्याल्क पीसि मत्तोर्कुन मंत्राल्लुकुना बलमते बेस कीसेके तिरियुंदुर. इसकिवा इनना वरोर यहुदि पेद्दा पेर्माक एडुर मर्कु मत्तुर. ओर इल्ले कियुंदुर. अयते उंदि मल्ला ओर सामि येसुना पोरोल येत्सि, “पौलुस बोना बारेमते अयते वेहचंतोरो आ येसुना पोरोलते आदेस हीसंतन, पलाते पेयसा” इंचि देय्याल्कन इत्तुर.

15 अस्के आ देय्यम, “येसु अयते नाकु एरके, इंका पौलुसगुडा नाकु एरके. मरि मिमेट बोर आंदिर?” इंचि ओर्कुन पूसकीता.

16 पजा आ देय्यम पीसि मत्ता मनकल ओरापोर्रो अरसि, ओर्कुन इरगा तंतोर. अदुनहाटी ओर इरगा देब्बां दल्लिसि नेत्तुर पोगनेकेन अद लोताल कपडिं केर्राकॉटेन पेय्सि विततुर.

17 इद संगति इपीसिते मनना अंटोर यहुदिल्लुकुं, युनानि लोकुल्लुकुं तेळियता. अदुनहाटी ओर अंटोर इरगा वेरियतुर. येसु सामिना पोरोलता कदर बेस्सेके होत्ता.

18 इल्ला बोर लोकुल्लुक अयते विस्वासुल्लुक आतुरो, ओर कीता तप्पुकुन अंटोरा मुन्ने ओप्पुकुनालय दल्गुतुर.

19 होदें-मंत्राल्लुकु कियानोर वेल्लेटुर लोकुल्लुक ओरा पुस्तकाल्लुक उंदगा जमा कीसि अवुन अंटोरा मुन्ने बोळस्तुर. पजा आ पुस्तकाल्लुकुना दरा लेक्का कीते एबै वेय्युकुना (50,000) एंडि कोत्तानचचोर मत्ता.

20 इल्ला सामिना पोल्ले बेस मजबुत आसेके नालुं मूलां पैलांचेके होत्ता.*

पौलुस पिलान कीतोर

21 इदंता जर्गुता पज्जो, पौलुस मेसिडोनिया, अकाया इनना एरियानाल येस्सलेम होनना पिलान पवित्र आत्माता सहायमतोनि कीतोर. अगा होत्ता पज्जो, बल्ला कीसि अयना रोम सहरतुन ह्ळापीता, इंचि इत्तोर.

22 दानहाटी ओर तिमोति आनि इरास्तुस पोरोलता इव्वुर सेवाकुल्लुकुन मेसिडोनिया एरियाते लोहचीतोर. ओर कुद बारे इंका इच्चुं रोजकु आसिया एरियातेन आगतोर.

इपीसि सहरते जगडाल्लुक

23 अव रोजकुने पेन वेहता हर्दा बारेमते वेल्लेन लोल्लिं आतां.

24 देमेन्नि पोरोलतोर वरोर कमसालोड मत्तोर. ओर अर्तेमि* इनना पेनदा गुळितालेसीटव एंडिता गुळिं तयार कीसि अम्मुकुनुंदुर. दीनहेंदाल ओनगा कबळ कियानोर्क रिक्कम हिलाकॉटा कबळ दोर्कुंदु.

25 आ कमसालोड, ओनगा कबळ कियानोर्कुन आनि ओनालेसीं कबळ कियाना इंका वैरेतोर्कुन अंटोर्कुन जमा कीसि ओर्कु इल्ला वेहतोर, “दादालोरिता! मीकु अयते एरपाटे गदा, ई दंदाहेंदाल मनाकु बेस कोत्तां दोर्कतां.

26 ई पौलुस इपीसि सहरता आनि दग्गेर-दग्गेरा पूरा आसिया एरियाता लोकुल्लुकुं, ‘मनकल कीता पेनकु निजम पेनकु आय्यो,’ इंचि ओर्क एकरेवुल्लुक वेहसेक ओर्कुन बदलांचतोर. इद संगतितुन मिमेट हळतिर आनि केंजतिर गुडा.

27 दीनहेंदाल मना दंदाक मत्ता बेस पोरोल बदनाम आंता. मना पेद्दा पेन अर्तेमिना गुळिता इलवागुडा दांता. इचोने आयका सिराप आसिया एरियातेन आयो गानि पूरा दुनियाता अंटोर लोकुल्लुक मोळकनसॉटा ई पेनदुक मत्ता पेद्दातनमगुडा हिलाकॉटा आंता,” इंचि इत्तोर.

28 इसॉटा पोल्ले केंजसि ओर इरगा होंगुं वासि, “इपीसितोरा पेन अर्तेमि अन्नि पेनकुं कन्ना पेद्दा पेन आंद,” इंचि वरगेयालय दल्गुतुर.

29 अदुनहाटी सहरते लोल्लि आता. पजा लोकुल्लुक मेसिडोनिया एरियाताल वाता गयुस आनि अरिसतरकुस पोरोलतोर इव्वुर्कुन दोर्का पीतुर. ईर इव्वुरगुडा पौलुसुनतोनि कलियसि पय्नेम कियुंदुर. अयते लोकुल्लुक अंटोर उंदि आसि ओर्कुन पीसि नाटकम बंगलातगा जोरसे इग्गिसेक पीसि विततुर.

* 19:20 व्यवस्ताविवरन 18:10-14 * 19:24 अर्तेमि इद मुरतळ पेन आंद. दीन युनानि लोकुल्लुक मोळकंतुर.

- 30 पौलुस लोकुकुकुना मुन्ने होनना इनकुत्तोर गानि सिस्युलुकु ओन होना हिया हिल्लुर.
- 31 आसिया एरियाता इच्चुर अदिकारिलुकु पौलुसना दंटातोर मत्तुर, ओरगुडा, “निमे नाटकम बंगलाते होंचि दोकाते अरमा,” इंचि कबुर लोहचि ओन्क विनंति कीतुर.
- 32 अस्के बोरो बतलो, बोरो बतलो इल्हा पेद्दा लोल्लि कियालय दलगुतुर. वेल्ले मंदिक अयते ओर अगा बताहाटी जमा आतुर अदगुडा एर्का हिल्ले.
- 33 यहुदि लोकुकुकु सिंकंदर पोरोलतोन वरोर मनकन मंदिताल पेरसि मुन्ने निलाहतुर. सिंकंदर कय ऊपसि-ऊपसि लोकुकुकुकु समजांचलय हळतोर.
- 34 गानि ओरगुडा वरोर यहुदि मनकल आंदुर इंचि तेळियतारित्ते ओर अंतोर रौडु गंटानदाका उंदे आवाजते, “इपीसितोरा पेन अर्तेमि अन्नि पेनकुंकन्ना पेद्दा पेन आंद,” इंचि वरगेयसेके मत्तुर.
- 35 अस्के सहरता अदिकारि मंदिताल सांत कीतोर. सांत कीसि, “अरे इपीसि लोकुरिटा, बेस पोरोल होत्ता अर्तेमि पेनदा गुळितुन आनि स्वर्गमताल अरता दाना पवित्र बंडा बोम्मातुन बेस कापाळना सहर इपीसि सहर आंद, इद पोल्ले दुनियाकंता एरपाटे मंता.
- 36 इद पोल्लेतुन बोरे हिल्ले इन्नोर. अदुनहाटी मिमेट सांत मंटु, विचारम कियाकौंटा गाबर आसि बतले कियमट.
- 37 ईर मनकालोर अयते मना पेनदा गुळिताल बतले दोंगा किया हिल्लुर. मना पेनदा अपमानमगुडा किया हिल्लुर. अयनागानि मिमेट ईरकुन इगे पीसि वातिर.
- 38 ओक्कला देमेत्रिसुकु आनि ओनतोनि कलियसि कबळ कियानोर्कुंक गिंटा बोरादन्ना विरोदमते बतलन्ना वेहनद मनानयते कोरटकुना तल्पुकु कुल्ले मंतां, अगा ओर वरोनपोरी वरोर तप्पुकु-दोसेलुकु वेहकुना परांतुर. ओरां केंजालय अगा अदिकारिलुकुगुडा मंतुर.
- 39 अयना इंका बतलन्ना वैरेतदुन बारेमते वळकानद मनानयते दाना पयसला मना पंचादिते किया वच्चु.
- 40 इय्याला इगे बतल अयते जर्गतनो दीनद पूरा दोसेम मना तल्लापोरिन अर्नलायक मंता. इद जर्गुता गटना बेसताहाटीगे जर्गुता इंचि रूजुव कियालयगुडा मनागा बतले हिल्ले.” इंचि इत्तोर.
- 41 इल्हा इत्ता पजा ओर पंचादि मारता इंचि वेहतोर.

20

पौलुस मेसिडोनिया दांतोर

- 1 लोल्लिंअंता मगता पज्जो पौलुस सिस्युलुकुन केय्पि, ओर्क बेस प्रोत्साहन हीसि ओर्कुन होळसि मेसिडोनिया एरियाक होत्तोर.
- 2 मेसिडोनिया एरियाताल होननेके आ एरिया पीसि मनना विस्वासुलुकुकु प्रोत्साहन हियानसोंटव बच्चोनो पोल्ले ओर्क वेहासेके होत्तोर. पजा ओर अकाया एरियाते* एवतोर.
- 3 अगा पौलुस मूड नेलुकु मत्तोर. अगटाल डोंगाते उद्दिदस सिरिया एरियाते होनना विचारम कीतोर, गानि अच्चोटेन यहुदि लोकुकुकु ओन हळकाना पिलान कीसंतुर इंचि तेळियतस्के ओर मरां मेसिडोनिया एरियाक मल्लि होनना निरनायम कीतोर.
- 4 बिरिया सहरता पिरूस इनानोना मरिं सोपन्नु, तेसलोनि सहरता अरिसतरकुस आनि सेकुंदल, दिरबे सहरताल गयुसु, आसिया एरियाताल तुकिकुस आनि तोरोपिमूस, इंका तिमोति. ईर अंतोर आसिया एरिया एवनाल पौलुसुनतोनि मत्तुर.
- 5 ईर अंतोर मुन्ने होंचि त्रोआस सहरते मावा एदुर हळसेक मत्तुर.
- 6 गानि मोमोट पिलिपिया सहरताल होयवा पिंडिता हारिना पंडगु होत्तारित्ते डोंगाते उदिस पेयसतोम. त्रोआस सहरते ओर्कु होंचि कलियालय माकु हेय्युं रोजकु दलगातां. अगा मोमोट एडुं रोजकु मत्तोम.

वरोर लेय्या पेडांक पौलुस जीवा अरहंतोर

- 7 आयंका मोमोट वारमता मुन्नेटा रोजु† हारि उरहालय उंदगा जमा आतस्के पौलुस लोकुकुकुनतोनि वळकालय दलगुतोर. ओन्क इंकुंदि रोजु पय्नेम होनना मत्ताहाटी ओर नळजाम नर्कादाका वेहतोर.
- 8 मोमोट जमा आसि मत्ता पोरींटा अंतरम पोरीं वेल्लेने वेडसिं मत्तां.
- 9 अगा युतुकुस पोरोलतोर वरोर लेय्या पेडल किडकिते उद्दिदस मत्तोर. पौलुस वेल्लेनजेम वळकसेक मननेके ओन्क इरगा निद्रा वासि मूडोव अंतरमताल डोलसि हिळु अरतोर, ओनगा होंचि तेहतारित्ते ओर हासि मत्तोर.
- 10 पौलुस हिळु रेय्पि ओन रोमबोच्चेक अदमुकुचि, “वेरियमट्टु, इंदके ओनालोप्पो जीवा मंता,” इंचि इत्तोर.
- 11 आयंका पौलुस पोरीं होत्तोर. हारिना तुकडां कीसि तिंचि पंगायनदाका ओरतोनि वळकसेक मत्तोर. पजा अगटाल पेय्पि होत्तोर.
- 12 लोकुकुकु आ लेय्या पेडन जीवाते ओना लोन ओतुर, अदुनहाटी ओर्कु बच्चोरो बेस अनपिस्ता.

त्रोआस सहरताल मितुलेन सहर होनना पय्नेम

* 20:2 अकाया एरिया दीन युनान देसेम इंचिगुडा इंतुर. † 20:7 वारमता मुन्नेटा रोजु यहुदिलुकुना केलेंडरते वारमता मुन्नेटा रोजु सनेम पोळ्द होंचि सुख आंता. अयतारम पोळ्द होंचि मारता.

13 मोमोट पौलसुन अग्गेन होळसि डोंगाते उदसि मुन्नेन अस्सुस सहरतेके होत्तोम. पौलस कुद अस्सुसदाका ताकसि वासि अगा माकु कलियंतन इंचि वेहतोर.

14 ओर अस्सुस सहरते माकु कलियतस्के, ओन डोंगाते एकिचकुंचि मोमोट मितुलेन सहरते होत्तोम.

15 अगटाल पेय्शि इंकुंदि रोजु मोमोट, कियुस इनना दीबिता मुन्नेळक एवतोम. मर्रा इंकुंदि रोजु सामोस इनना दीबेतुन दाटसि होत्तोम. मर्रा इंकुंदि रोजु आतारित्ते मोमोट मिलेतुस इनना सहरते एवतोम.

16 बल्हा कीसन्ना गानि पेंतेकोस्त पंडुगुंक येस्सलेम सहरते मनगोम इंचि पौलसुस गाबर आसेक मत्तोर. अदुनहाटी आसिया एरियाते वेल्ले रोजुकु आगिसि वेला बरबाद कियमळ इस्टम हिलाका, इपीसिते आगाकोटा मुन्नेळक पेय्शि होनना विचारम कीतोर.

पौलसुस इपीसि सहरता पेदुदालुकुन केया वेहांतोर

17 पौलसुस इपीसि सहरता कलिसिया पेदुदालुकुंक कबुर लोहचि ओर्कुन मिलेतुस सहरते ओनगा केयतोर.

18 ओर अंतोर वातारित्ते पौलसुस ओरतोनि इल्हा वळकालय दलगतोर. “नना आसिया एरियाते वातस्के, मोदाटा रोजुनाल मीवातोनि उंदि-उंदि निमसम बल्हा मत्तन, इद मीकु एरपाटे मंता.

19 यहुदिलुकुनाहेंदाल नाकु बच्चोनो कस्टालक वातां. अयना, नना मनसुनाल गरिब आसि अळसेके सामिना सेवा कीतन.

20 मीवा बेसताहाटी अवसरम मत्ता बदे पोल्ले आयि वेहालय नना बस्केने पजोळक आया हिल्लेन. नना अव पोल्लें अंतोर लोकुलुकुना नड्डुम, लोन-लोन होंचि वेरियाकोटा कराहतन, इद संगति मीकु एर्के मंता.

21 पापालुकुनाल मनसु मार्सकुंचि पेनदाहाटी पिस्सट, अल्हेने मना येसु सामिना पोर्रो विस्वासम कीम्टु इंचि नना यहुदिलुकुंक, युनानि लोकुलुकुंक गवाइ हीसि वेहुंदुन.

22 इंदके पवित्र आत्मा वेहाताप कियना इंचि नना येस्सलेम सहर होंचंतन. गानि अगा होत्तारित्ते नावद बतल आंतो नाकु एर्का हिल्ले.

23 उंदि पोल्ले मात्रम नाकु एरपाट मंता. अद बतल इत्ते, अन्नि सहरकुने जेल, कस्टालक नावाहाटी एदुर हूळसंतां इंचि पवित्र आत्मा नाकु वेहासेक मंता.

24 नाकु नावा जीवाता पिकिर हिल्ले. नना अय्ते सिराप येसु सामिनहेंदाल नाकु दोर्कुता आ पंदेमतुन, सेवातुन पूरा कीतन. अद बतल इत्ते, पेनदा कुर्पाता बारेमते बेसता पोल्लेना गवाइ वेहामळ आंद.”

25 नना मी अंतोरतोनि कलियसि मंचि मीकु पेनदा राज्येमता बारेमते कराहसेक तिरियतन. मीवावटेताल बोरेगुडा नाकुन मर्रा बस्केने हूळा पर्रिर इंचि नाकु एर्के.

26 दानहाटी इय्याला नना वेहासेक मंतन गदा, मीवा लोप्पोटाल बोर्नना आयिर, हासोत्ते दान्क जबाबदारी नना आयोन.

27 बारित्ते नना पेनदा पूरा इच्चातुन मीकु वेहालय बस्केने पजोळक होना हिल्लेन.

28 पवित्र आत्मा मीकुन मीवा कलिसियातोरपोर्रो कोहानोन-मेहानोन लेहका पेर्कुत्ता. अद मंदातुन पेन कुदूदु दाना मर्रिना नेत्तुर हीसि असकुत्ता. अदुनहाटी मीवद मिमेट अल्हेने मीवा जिम्मेदारिते मनना मंदातुनगुडा मिमेट बेस कापाळसेके मंटु.

29 नना होत्तारित्ते कतरनाक तोडेल्लिनसंटा मनकालोर मीवा नड्डुम वासि मीकु नुकसान कीतुर इद नाकु एरपाट मंता.

30 अचोने आयका मीवा लोप्पोटाले इच्चुर इंसंटा मनकालोर पेय्संतुर गदा, ओर सिस्सुलुकुन ओरा पज्जो इग्गुकुनालय आबदुदम पोल्लें वळकांतुर.

31 अदुनहाटीगे मिमेट हुसारते मंटु. मूड वर्सनदाका वरो-वरोकु, नर्का-पियल अळसि-अळसि जेगर्ता मननाहाटी वेहमळते नना बस्केने पजोळक होना हिल्लेन इद मति इरट.

32 इंदके नना मीकुन पेनदा कय्दे आनि दाना कुर्पाता कबुरता कय्दे अप्पजेपंतन. मीकुन बेस बेरसागोटना ताकत अद कबुरते मंता. पेन पवित्र कीता अंतोर लोकुलुकुना लोप्पो मीकुनगुडा वारसदार किया पर्रिता.

33 नना बस्केने बोनहेंदाले एंडि-बंगारम हिलाकोटे बेसता कपडि गावाले इंचि आसे पडा हिल्लेन.

34 नना नावा कय्कुनतोने कबळ कीसि नावा अवसरालुकु आनि नातोनि मत्ता नावा दंटागाहकुना अवसरालुकु तीरस्ता संगति मीकु कुद एरपाटे मंता.

35 वेल्लेन कस्टम कीसेके नादान मत्तोर्कुंक मनम बल्हा सहायम कियगोम इत्ता संगतितुन नना मीकु नावा हरेक कबळताल कीसि हुपिस्तन. “एतकुनुळकन्ना हियमळतेन एक्को सुकम मंता,” इंचि कुदूदु येसु सामि इत्ता पोल्लेतुन मतिते इरमळ बच्चोनो अवसरम मंता, इंचि इत्तोर.

36 इल्हा इंचि ओर टोंगरां ऊनसि, अंतोरतोनि कलियसि पारतना कीतोर.

37 अस्के ओर अंतोर इरगा अळसेके बेस पावरमतोनि पौलसुंक कलियसि ओन बुरतुर.

38 मिमेट मर्रा ना मोकम बस्केने हूळा पर्रिर, इंचि पौलसुस इत्ता पोल्लेताहेंदाल ओर अंतोर लोकुलुकुंक बागा दुक्कम वाता. पजा ओर अंतोर, ओन डोंगादाका साला कीतुर.

- 1 ओर माकुन साल्ना कीतस्के मोमोट डोंगा उदसि सवरगा कोस इनना दीबेक होत्तोम. अगटाल इंकुंदि रोजु सदास इनना दीबेक आनि अगटाल पतरा इनना सहर होत्तोम.
- 2 अगा माकु पिनिके इनना एरियाक होनानद उंदि डोंगा दोर्कता अय्ते मोमोट अंटे उदसि पेयसतोम.
- 3-4 बस्के अय्ते माकु साइप्रस दीबे दिसालय दलगाता अस्के मोमोट दान मावा डेमा बाजुंक होळसि सिरिया एरियाहेके तिरियतोम. सूर सहर सिरिया एरियाते मत्ताहेका डोंगाते मत्ता माल सूर सहरते रेहानद मत्ता. पजा मोमोटगुडा अगोन रेयतोम. अगा माकु सिस्युल्क कलियतुर अय्ते ओरतोनि मोमोट एंडु रोजकुनदाका आगतोम. ओर पवित्र आत्माहेदाल, निमे येस्सलेम होनमा, इंचि पौलुसुन इत्तुर.
- 5 वारम आता पज्जो अगटाल मोमोट मावा पय्नेम पेयसतोम. अगाटा विस्वासुल्क ओरा मुत्तोहक, पिलाल्क अंटर सहरता पलाते समुद्रम ओड्डुनदाका मातोनि वातुर. अगा मोमोट टोंगरां ऊनसि पारतना कीतोम.
- 6 ओर माकुन साल्ना कीतंका मोमोट डोंगा एकतोम, ओर ओरा लोहकुने वापस होत्तुर.
- 7 सूर सहरताल डोंगाते उदसि पय्नेम कीसेके मोमोट पोलेमा इनना सहरते वासि रेयतोम. अगाटा विस्वासुल्कुंक कलियसि ओरतोनि मोमोट उंदि रोज मत्तोम.
- 8 *इंकुंदि रोजु मोमोट अगटाल पेय्सि कैसरिया सहर होत्तोम. अगा होंचि मोमोट, पिलिपुस पोरोलता पेनदा सेवाकुना लोन आगतोम. ई पिलिपुस येस्सलेम सहरते गाटो पंचि दोसनाहाटीं पेरता एदुर लोप्पोटाल वरोर मत्तोम.
- 9 ओन्क नालुं मरमिं आयवा मियाहक मत्तां. अय्ते अव नालुंगुडा बविस्वयानि वेहुंदुं.
- 10 मोमोट अगा कोन्नि रोजकु आगसि मत्तोम, अस्के यहुदिया एरियाताल वरोर पेनदा कबुरतोर वातोर ओन पोरोल अगबुस.
- 11 ओर मावा दग्गेर्क वासि पौलुसना नडिता पट्टा तेंडकुंचि, ओना कय्क-काल्कुन दोहकुंचि, “इद पट्टा बोनद अय्ते आंदो ओन येस्सलेम सहरते यहुदि लोकुल्क इल्हेन दोहाचि वेरे जातितोर्कुंक अप्पजेपंतुर, इंचि पवित्र आत्मा वेहासेक मंता,” इत्तोर.
- 12 इद केंजतरित्ते मोमोट आनि अगटा लोकुल्क, निमे येस्सलेम सहर होनमा, इंचि विनंति कीतोम.
- 13 अस्के, “इल्हा अळसि-अळसि नावा मनसुन कमजोर बारि कीसंतिर? नना येस्सलेम सहरते सिराप दोहांतुर इंचि आयो गानि, येसु सामिना पोरोलहाटीं हायालयगुडा तयार मंतन,” इंचि पौलुस इत्तोर.
- 14 मोमोट बच्चोन वेहिनागानि ओर केंजवाहेका, पेनदा इच्चा मत्ताप जर्गिकांटी, इंचि मोमोट सपुडदाका आतोम.
- 15 इल्हा कोन्नि रोजकुन पजा मोमोट मावा तयारिं कीसि येस्सलेम सहर होत्तोम.
- 16 मावातोनि कैसरिया सहरतोर इच्चुर सिस्युल्क इंका वातुर. ओर माकुन साइप्रस दीबेतोर वरोर मनकल मनासोनना लोन ओतुर. मोदोलता विस्वासुल्कुनाल ओर वरोर सिस्युड आंदुर. माकु ओनागेन आगनद मत्ता.

पौलुस याकोबुंक कलियंतोर

- 17 मोमोट येस्सलेम सहर एवतस्के अगाटा विस्वासुल्क वेल्लेन आनंदमते माकुन कल्पुकुत्तुर.
- 18 इंकुंदि रोजु पौलुस माकुन अंटोर्कुन पीसि याकोबुंकु* कलियालय होत्तोर. अगा येस्सलेम सहरतोर अंटर विस्वासि पेद्दाल्क मत्तुर.
- 19 मोदाला पौलुस ओर्क अंटोर्क जोहार कीतोर. पजा पेन ओन दाना सेवाते वाळकुंचि यहुदि आयवोरा लोप्पो बता-बता कबाहक कीता, अव उंदि-उंदि कबळता बारेमते ओर्क वेहतोर.
- 20 पौलुस वेहतद केंजसि पेद्दाल्क अंटर पेनदा स्तुति कीतुर. पजा पौलुसुन, “दादा, बच्चोनो वेय्कुना मंदि यहुदिल्कु इगे विस्वासुल्क आतुर इत्ता संगति निमे हळसेकेन मंतिन. ओर अंटर मूसाना नियमतुन बेस पीसि ताकसेक मंतुर.
- 21 गानि, मूसाना नियमतुन पीसि ताकमट, मर्कुनद कतना कियमट इंका यहुदिल्कुना रीति-रिवाजकुन होळसीम्टु इंचि वेरे जातितोरा नड्डुम मनना यहुदिल्कुंक निमे कराहतिन इंचि बोरो इग्गे वेहतुर.
- 22 अय्ते इंदके बतल कीकोम मरि? निमे इगे वातिन इत्ता संगति ओर्कु बल्हैना तेळियंते.
- 23 अदुनहाटीं निमे मोमोट वेहताप कीम. महगा मोक्कु मोळककुत्तोर नालुर मनकालोर मंतुर.
- 24 निमे ईरकुन नीतोनि ओम. ओरतोनि कलियसि नीवदगुडा सुद्दिदकरन कीकुन. अचोने आयका ओरा तल्ला कोरियनाहाटीं कर्सुंक कोत्तां इंका निमेने हीम. इल्हा कीतिन इत्ते नीवा बारेमते केंजतद अंता वट्टि आबद्दमे. इंका निमे मूसाना नियम परकारमे ताकसतिन इंचि ओर्कु तेळियसि दांता.
- 25 मोमोट अय्ते वेरे जातिता विस्वासुल्कुंक दीनकन्ना मुन्नेन उंदि सिट्टि रासि अब्बे, बोम्मांक मोळकतदुन तिनमट, गोंदके पिसकिसि हक्कता जिवरासिना हळ्विं, नेत्तुर तिनमट, बोगमतनमताल लक्कु मंटु, इल्हा रासि लोहतोम,” इंचि इत्तुर.*
- 26 इल्हा पौलुस आ नालुर्कुन पीसि इंकुंदि रोजु ओरतोनि कलियसि ओरगुडा सुद्दिदकरन कीकुत्तोर. पजा अगटाल येस्सलेमता गुळिते होंचि, पुरागा सुद्दिदकरन आयगोम इत्ते बच्चुं रोजकु एदुर हळसेक मनापीतनो अदुन बारेमते पेर्मालोर्कुंक वेहतोर. अचोने आयका आकिरता रोजकुने ओनतोनि वाता हरेक मनकंक ओना सतताहेदाल मोक्कु हियापींता इंचिगुडा वेहतोर.

* 21:8 प्रेरितुल्लुकुना कबाहक 6:1-6 * 21:18 याकोब ई याकोब येसुना तम्मुर आंदुर. इंका ईर येस्सलेम कलिसियाता पेद्दा मनकल आंदुर. * 21:25 प्रेरितुल्लुकुना कबाहक 15:20

27-28 एडुं रोजकु पूरा आयानवे मत्तां, आसिया एरियाताल वाता इच्चुर यहुदिल्क पौलुसुन गुळिते हळतुर. ओर अंटोर लोकुल्लुकुंक पौलुसना बारेमते एकरेवुल्लक वेहचि ओन पीतुर. पजा वरगेयसि, “इस्त्राएलता लोकुरिटा, मिमेट अंटोर माकु सहायम कीम्टु. ईर मनकल अन्नि एरियाने तिरियसि मना इस्त्राएलता लोकुल्लुकुना विरोदमते, मूसाना नियमता विरोदमते आनि ई गुळिता विरोदमते लोकुल्लुकुंक कराहसेक मंतोर. अचोने आयका इंदके युनानि लोकुल्लुकुन गुळिते केय्सि तच्चि पवित्रामाता गुळितुनगुडा हेळाहतोर,” इंचि इत्तुर.†

29 (तोरोपिमस पोरोलतोर वरोर इपीसिता मनकन पौलुसुनतोनि तिरियनेके लोकुल्लुकु हळसि मत्तुर, ओने पौलुस गुळिते तत्तोर बारे इनकुत्तुर.)

30 अस्के पूरा सहरअंता गजबज आता. लोकुल्लुकु अंटोर विच्चि वासि उंदगा जमा आतुर. पौलुसुन दोर्कापीसि गुळिताल पलाते इग्गिस ओसि, बिराना तल्पुक वाटतुर.

31 लोकुल्लुकु ओन हक्कना विचारम कीसेक मननेकेन रोमि पोलिस दलमता सिपाइल्लुकुना अदिकारिक, पूरा येस्सलेम सहरते लोल्लि आता इंचि कबुर तेळियता.

32 अस्के ओर बिराना इच्चुर सिपाइल्लुकुन आनि दरोगालोर्कुन पीसि पौलुसुन तनना यहुदिल्लुकुनहेके पेयसतोर. सिपाइल्लुकुना अदिकारि, सिपाइल्लुकुन हळतारित्ते यहुदिल्लुकु पौलुसुन तनमळ आपतुर.

33 पजा आ सिपाइल्लुकुना अदिकारि पौलुसनगा होंचि ओन पीसि गोल्लुकुने दोहनाहाटीं आदेस हीतोर. आयंका ओर लोकुल्लुकुन, ईर बोर आंदुर, ईर बतल कीतोर? इल्हा पूसकीतोर.

34 अस्के इच्चुर लोकुल्लुकु उंदीतोर, इकिच्चुर लोकुल्लुकु इंकुंदि तीर वेहालय आतुर. इल्हा वेल्लेन लोल्लि आसि निजम बतल ओन्क तेळिया पारहिल्ले. अदुनहाटीं ओर पौलुसुन किल्लाते ओयालय आदेस हीतोर.

35-36 पौलुस पायरिनगळक एवतस्के वेल्लेन मंदि लोकुल्लुकु, “ओन हक्कट, ओन हक्कट,” इंचेके उंदेतीर मोत्कुंचेके इरगा लोल्लि कियालय दल्लुतुर. अदुनहाटीं सिपाइल्लुकुंक ओन ओरा बुजाल्लुकुन पोरो तेहकुंचि किल्लाता लोप्पो ओया पीता.

37 सिपाइल्लुकु पौलुसुन किल्लाता लोप्पो ओयका मुन्ने, “नना नीतोनि बतलन्ना वळका परांतना?” इंचि पौलुस सिपाइल्लुकुना अदिकारिन पूसकीतोर. अस्के आ सिपाइल्लुकुना अदिकारि, “अब्बा! नीकु युनानि बासागुडा वळका वांताना?”

38 अय्ते मरि कोन्नि रोजकु मुन्ने रोम सरकास्क विरोद कीसि, नालुं वेय्कुना आतंकवादिर्कुन बय्लि जेगाते केय्सि ओता इजिप्त देसेमता मनकन निमेन गदा?” इंचि पौलुसुन पूसकीतोर.

39 अस्के, “नना किलिकिया एरियाता उंदि बेस पोरोल होत्ता तरसुस सहरता यहुदि मनकन आंदुन. नना नीकु विनंति कींतन, ई लोकुल्लुकुनतोनि नाकुन वळका हीम,” इंचि पौलुस इत्तोर.

40 सिपाइल्लुकुना अदिकारिनहेंदाल वळकाना अदिकारम दोर्कतस्के पौलुस पायरिनपोरों नित्तिसि लोकुल्लुकुंक कय हुपिच्चि सपुडदाका मनालय सय्यो कीतोर. लोकुल्लुकु सपुडदाका आतास्के पौलुस इब्रानि बासाते वेहालय दल्लुतोर.

22

पौलुसना बासन

1 “दादालोरिटा आनि पेद्दाल्लुकुनिटा, नाकु मीवा मुन्ने इच्चुर वळकानद मंता अदुन केंजट.” इंचि पौलुस वळकालय दल्लुतोर.

2 ओर इब्रानि बासाते वळकानदुन केंजसि लोकुल्लुकु इंका इच्चो सपुडदाका आतुर.

3 “नना यहुदि मनकन आंदुन. नना किलिकिया एरियाता तरसुस सहरते पुटतन. इदे येस्सलेम सहरते बेसतन. इंका गमलियेल इनानोना कय्दा हिळु मंचेके ओनहेंदाल बेस सदवु करियतन. अचोने आयका मना पेद्दाल्लुकुना नियम्क, रीति-रिवाज्क मत्ताप बेस टेरनिंग दोर्कुता. मिमेट बल्हा अय्ते इय्याला पेनदाहाटीं मीवा बक्तितुन हुपिच्चंतोर, अल्हेन ननागुडा हप्सुंदुन.

4 नना पेनदा हरि पीसि ताकाना लोकुल्लुकुन बच्चोनो तकलिप कीतन, दीनहेंदाल इच्चुर लोकुल्लुकुना जीवां इंका होत्तां. मुरतळ-मांडसा इनाकोटा अंटोर्कुन पीसि जेलने वाटुंदुन.

5 पेद्दा पेर्माल आनि अंटोर यहुदि पेद्दाल्लुकु नावा ई कबळहाटीं गवाइ मंतुर. अचोने आयका दमिस्क सहरते मनना यहुदि दादालोर्कुंक सिट्टिं रासि दमिस्क सहर होनालय पेयसतन. अगा होंचि पेनदा हरि पीसि ताकानोर्कुन दोर्कापीसि येस्सलेमते तच्चि, ओर्कु सिक्सा आयगोम. इदे नावा उद्देसम मत्ता.”

पौलुस ओना मनसु मारियता संगति वेहांतोर

6 इल्हा नना दमिस्क सहर होनालय पेयसतन. नना दमिस्क सहर दग्गेर्क एवतन बारे! अस्के पियल वेलाक मब्बुनाल उंदेदम उंदि पेद्दा वेलगु नावा सुट्टु जग्गरा मेसता.

7 नना अल्हेन बूमिपोरों हिळु अरतन. अस्के उंदि अल्किर, “साऊल, साऊल! निमे नाकुन बारि तकलिप कीसंतिन?” इंचेके नाकुन इत्ता.

8 अस्के, निमे बोन आंदिन सामि? इंचि नना पूसकीतस्के, “निमे बोन अय्ते तकलिप कीसंतिनो आ नासरेत नाटेना येसुन आंदुन,” इंचि आ अल्किर इत्ता.

† 21:27-28 यहुदिल्लुकुना गुळिते वेरे जातितोर्कुन होनमा इत्ता जेगाते होत्ते ओर्कुन हक्कुंदुर.

- 9 नावातोनि मत्तुर ओर अद वेलगुन हूळतुर गानि नावातोनि वळकता अल्किर मात्रम ओर्क केंजा वाया हिल्ले.
- 10 पजा, अय्ते नना बतल कीकन सामि? इंचि पूसकीतस्के, “निमे तेदसि दमिस्क सहरते होन. बव कबाहक अय्ते कियालय नना नीकुन पेरकुत्तनो अव कबाहक अगा नीकु वेहमळ जर्गता.” इंचि सामि नाकु वेहतोर.
- 11 आ जग्गारा वेलगुन हूळसि नावा कळकु दिस्साकोटा आतां. अदुनहाटीं नावा दंटातुर नाकुन कय पीसि दमिस्क सहरते ओतुर.
- 12 अगा हनन्याल पोरोलतोर वरोर मनकल मत्तोर. ओर मूसाना नियम परकारम ताकुंदुर. अगाटा अंतोर यहुदिल्क इंका ओन बेस मनकल इत्तुंदुर.
- 13 ओर नाहेके वासि, नावा दग्गेरा नित्तिसि, “साऊल दादा! नीवा कळकु मर्रा दिस्सीकांटी,” इंचि इत्तोर. ओर अल्हा इत्ता इन्मळे नावा कळकु दिसालय दल्गतां. नना ओन हूळतन.
- 14 पजा ओर नाकुन, “मना एनकटा पेद्दाल्लुकुना पेन दाना इच्चातुन एरपाट कियालय, नीतिमंतुड आता दाना सेवकुन हूळालय, ओना तोळ्दा पोल्लेन केंजालय नीकुन पेर्कुत्ता.
- 15 निमे बतल अय्ते हूळतिन, बतल अय्ते केंजतिन अदुना बारेमते दानाहेंदाल अंतोर लोकुल्लुकुना मुन्ने गवाइदार आंतिन.
- 16 अय्ते इंदके आलसेम बारि कीसंतिन? तेदसि बापतिस्मा एतसि, सामिना पोरोलते पारतना कीम, अस्के ओर नीवा पापालुकुन नोरीतोर,” इंचि इत्तोर.
- 17 आयंका नना येस्सलेम तिरियसि वासि गुळिते पारतना कीसेके मत्तन, अस्के अल्हेन दर्सनम हूळतन.
- 18 दर्सनमते मननेकेन नना सामिन हूळतन, अस्के, “बिराना तेदसि येस्सलेम सहरताल पेय्से होन, नावा बारेमते निमे वेहाना गवाइतुन ओर ओप्कुन्नुर,” इंचि सामि नाकु वेहतोर.
- 19 अस्के नना इत्तन. “सामि! यहुदिल्लुकुना दर्मसास्त्रम कराहना हरेक लोते होंचि नीपोर्रीं विस्वासम कियानोर्कुन दोर्कापीसि ओर्कुन जेलने वाटता संगति आनि तंता संगति आ लोकुल्लुकुन बेस एरपाटे मंता.
- 20 अचोने आयका नीवा गवाइदार स्टिपनुन हक्कानेके, हक्कानटे नावदगुडा कय मत्ता, इंचि हुपिच्चेक, ओन हक्कानोरा कपडिना कावेल कीसेक नना अग्गेन नित्तिसि मत्तन.
- 21 अस्के सामि नाकुन, निमे होन, नना नीकुन वेल्लेन लक्कु वेरे जातितोरा लोप्पो लोहंतन,” इंचि इत्तोर.

पौलुसुन यहुदिल्लुकुना पेद्दा पंचादिता मुन्ने निलाहंतुर

- 22 इद पोल्ले वेहनदाका यहुदि लोकुल्लुकुन पौलुसना बासन केंजतुर, पजा जोरसे वरगेयसि, “ई मनकल जीवाते मनमळ बेस आयो. इंसंटा मनकन ई बूमिपोर्रीं टाल हिलाकोटा कीम्टु,” इंचि इत्तुर.
- 23 ओर जोर-जोरसे वरगेयसेक मत्तुर, अंगिपोर्रीं केर्ता कोटकन तेंडसि विसिरसेके मत्तुर, इंका मब्बुनहेके दुब्बा तेहासेक मत्तुर.
- 24 अस्के सिपाइल्लुकुना अदिकारि पौलुसुन किल्लाते ओयानाहाटीं आदेस हीतोर. “लोकुल्लुकुन ओना विरोदमते इल्हा बारिक वरगेयसंतुर, कारनम बतल आंद तेळियनाहाटीं, ओन पोट्टे देब्बां तंचि-तंचि पूस कीम्टु,” इंचि वेहतोर.
- 25 गानि बस्के अय्ते पौलुसुन पोट्टे देब्बां तनालय दोहचेके मत्तास्के, “तप्पु कीतोर इंचि निरनायम पेय्सका मुन्नेन वरोन रोम रहिवासिन पोट्टे देब्बां तनमळ मीवाहाटीं न्यायामेना?” इंचि अगा नित्तिसि मत्ता वरोर दरोगान पौलुस पूसकीतोर.
- 26 अल्हा इत्तद केंजसि आ दरोगाल सिपाइल्लुकुना अदिकारिनगा होंचि, “मिमेट इद बतल कीसंतिर? ईर रोम रहिवासि अले,” इंचि ओन इत्तोर.
- 27 अस्के आ सिपाइल्लुकुना अदिकारि पौलुसुनगा वासि, “नाकु वेहा, निमे रोम रहिवासिन आंदिना?” इंचि पूसकीतस्के, “आ” इंचि पौलुस इत्तोर.
- 28 पजा, “नना रोम रहिवासि आयानाहाटीं वेल्लेन कोत्तां कर्स कीतन,” इंचि आ सिपाइल्लुकुना अदिकारि इत्तस्के, “नना अय्ते पुट्टस्केटाले रोम रहिवासिन आंदुन,” इंचि पौलुस इत्तोर.
- 29 पजा ओन पूसकियालय हूळसेक मत्ता सिपाइल्लुकुन बिराना पजोळ्क आतुर आनि सिपाइल्लुकुना अदिकारिगुडा, रोम देसेमता वरोन रहिवासिन दोहाचि वाटतोम, इंचि वेल्ले वेरियकुत्तोर.
- 30 यहुदि लोकुल्लुकुन पौलुसुनपोर्रीं बारि दोसेम दोस्तुर. निजम बतलो पलाते अरगोम इंचि सिपाइल्लुकुना अदिकारिना मनसुने मत्ता. अदुनहाटीं सिपाइल्लुकुना अदिकारि इंकुंदि रोजु, पेद्दा पेर्मालोर्कुन आनि यहुदिल्लुकुना पेद्दा पंचादितोर्कुन जमा आयालय आदेस हीतोर. अंतोर जमा आतास्के पौलुसुन पेचाहचि ओरा मुन्ने तच्चि निलाहतोर.

23

- 1 पौलुस पेद्दा पंचादिता जमातोर्कुन उंदेतीर हूळसि, “नावा दादालुरिटा! नना, इय्यालादाका पेनदा मुन्ने बेसता मनसुने पिसतन,” इंचि इत्तोर.
- 2 अस्के हनन्याल इनना पेद्दा पेर्मांल, “ओना तोड्डि पोर्रीं तन्नाटु,” इंचि पौलुसुना पक्काते नित्तिसि मत्तोर्कुं आदेस हीतोर.

3 अस्के पौलुस ओन, “ए चुना होकता गुरेतसंटोना! पेन नीकुन तनंता. बारित्ते, निमे दर्मसास्त्रमता नियम मत्ताप नावा न्यायम क्रियालय उदतिन, गानि दानकु अड्डम नाकुन तनालय आदेस बल्हा हीतिन?” इंचि इत्तोर.

4 अस्के पक्काते नित्तिसि मत्तुर, “निमे पेनदा पेद्दा पेर्माना अपमानम कीसतिना?” इंचि इत्तुर.

5 “दादालुरिटा, ईर पेद्दा पेर्माल आंदुर इंचि नाकु एरपाट मनाहिल्ले. बारित्ते, ‘नीवा अदिकारिनाहाटीं सेड्डा पोल्ले वळका मन्नि,’ ☆ इंचि नियमते रासि मंता,” इल्हा पौलुस इत्तोर.

6 अगा यहुदिल्लुकुना पंचादिते उद्दिदिस मत्ता लोकुल्लुकुने इच्चुर सदुकिर आनि इच्चुर परिसिल्लुकु मंतुर इंचि पौलुसुकु तेळियतस्के, ओरा मुन्ने जोरसे वरगेय्से, “दादालोरिटा! नना परिसिन आंदुन. नावा तादल-बाबोगुडा परिसिल्लुकु आंदुर. हातोर मर्रा जीवाते तेदांतुर इत्ता ओरा आसेतुन नना विस्वासम कीताहाटीं मीवा मुन्ने निल्लिस मंतन,” इंचि इत्तोर.

7 ओर इल्हा इत्तारित्ते परिसिल्लुकु आनि सदुकिर लोप्पो लोल्लि आसि, ओर अलग-अलग आतुर.

8 बारित्ते, हातुर मर्रा जीवाते तेदुर, पेनदा दूतां हिल्लें, आत्मां हिल्लें इल्हा सदुकिर इंतुर. गानि परिसिल्लुकु बारे इव अन्नि मंतां इंचि इंतुर.

9 अगा वेल्ले लोल्लिं आतां. अगा उद्दिदिस मत्ता परिसि दर्मसास्त्रम कराहना गुस्कुनाल इच्चुर तेदिसि, “माकु ईना लोप्पो बतल तप्पु दिस्सेक हिल्ले. ईनतोनि बदाना आत्मा हिलाकोटे बदाना पेनदा दूता वळकिस मंदार,” इंचि इत्तुर.

10 इल्हा ओरा लोप्पो इच्चोर लोल्लिं आतां गदा, पौलुसुन हक्कानुर बारे इंचि सिपाइल्लुकुना अदिकारि वेरियतोर. पजा, “पौलुसुन ओरागटाल अलग कीसि किल्लाते पीसि ओम्ट,” इंचि सिपाइल्लुकुना आदेस हीतोर.

11 अदे नर्का सामि पौलुसुनगा वासि, “पौलुस निमे वेरियमा. बल्हा निमे येस्सलेमते नावा गवाइ हीतिन, अल्हेने रोम सहरते इंका नीकु नावा गवाइ हियनद मंता,” इंचि इत्तोर.

पौलुसुन हक्कना पिलान

12 इंकुंदि रोजु हक्केरे पौलुसुन हक्कालय यहुदिल्लुकु पिलान कीसि, ओन हक्कवा मोमोट तिन्नोम-उन्नोम, इंचि ओट्टु तित्तुर.

13 इल्हा पिलान कीतोरु नल्लै मंदिकन्ना एक्को मत्तुर.

14 ओर पेद्दा पेर्मालोर्कुनगा आनि यहुदि पेद्दाल्लुकुनगा होंचि, “मोमोट बच्चोरदाका पौलुसुन हक्कोम, अच्चोरदाका मोमोट बतले तिन्नोम-उन्नोम इंचि गट्टिगा ओट्टु तित्तोम.

15 अदुनहाटीं इंदके मिमेट आनि यहुदिल्लुकुना पेद्दा पंचादितोर कलियसि सिपाइल्लुकुना अदिकारिनगा होंटु. अगा होंचि, पौलुसुन, इंका बेस पूसकियानद मंता, ओन महगा लोहचीम, इंचि तेडियागोटसि वेहाट. ओर मिहगा एव्का मुन्नेने ओन हक्कालय तयारते मनंतोम,” इंचि इत्तुर.

16 गानि पौलुसुन हक्कालय कोरसंतुर इंचि पौलुसुना हेलटा मर्रि केंजतोर. अस्के ओर किल्लाते होंचि पौलुसुकु पूरा वेहतोर.

17 वेहतारित्ते पौलुस वरोन दरोगान केय्से, “ई लेय्योन सिपाइल्लुकुना अदिकारिनगा ओम, ईर ओन्क बतलो वेहंतोर अले,” इंचि इत्तोर.

18 अस्के दरोगाल सिपाइल्लुकुना अदिकारिनगा ओसि, “जेलने मनना पौलुस ईन मीहेके तायालय नाकुन विनंति कीतोर. ईर नीकु बतलो वेहंतोर अले,” इंचि इत्तोर.

19 पजा आ सिपाइल्लुकुना अदिकारि ओना कय पीसि, बोरे हिल्वगा ओसि, “वेहा, नावातोनि बतल वळकानद मंता?” इंचि पूसकीतोर.

20 अस्के लेय्योड, “यहुदिल्लुकु उंदि आसि, पौलुसुन इंका बेस गट्टिगा पूसकियाना बहानाते नाडि यहुदिल्लुकुना पेद्दा पंचादिते केयागोटनाहाटीं, नीकुन विनंति कीतुर.

21 गानि निमे ओरा पोल्ले केंजमा. बारित्ते, नल्लैकन्ना एक्को लोकुल्लुकु पौलुसुन हक्कवा मोमोट तिन्नोम-उन्नोम इंचि ओट्टु तित्तुर. निमे ‘ओन ओम्टु’ इंचि आदेस हियानद एदुर हळसंतुर,” इंचि वेहतोर.

22 वेहतस्के, आ सिपाइल्लुकुना अदिकारि, “निमे नाकु इव पोल्ले वेहतिन इंचि बोर्के वेहमा,” इंचि आ लेय्योन लोहचीतोर.

पौलुसुन पिलिक्स राज्यपालनगा लोहमळ

23 अस्के आ सिपाइल्लुकुना अदिकारि ओना इव्वुर दरोगालोर्कुन केय्से, “रोंडु नुहकु सिपाइल्लुकु, डेब्बै मंदि गुराल्लुकुनपोर्री उद्दिदिस होनानुर, रोंडु नुहकु गोर्का पियानोर्कुन नर्काटां तोम्मिद एगानेंके कैसरिया सहरते होनालय तयार ईरंट.

24 पौलुसुन ओयालय गुराल्लुकुन तयार ईरंट. ओन बेस कापाळसि पिलिक्स राज्यपालनगा ओम्टु,” इंचि वेहतोर.

25 ओर उंदि इल्हा सिट्टि रासतोर.

26 “महाराज पिलिक्स राज्यपाल नीकु, कलादियुस लुसियाना हेंदाल जोहार.

27 यहुदिल्लुकु ई मनकन पीसि हक्कसेक मत्तुर, गानि ईर रोम रहिवासि इंचि नना केंजतस्के सिपाइल्लुकुन पीसि होंचि ओरागटाल ओन पिसागोटतन.

28 ओना तप्पु बतल आंदु, इदुन एरपाट क्रियालय ओन ओरा पेद्दा पंचादिते ओतन.

29 अगा ओर, ओनपोर्री तप्पुक दोसतव अन्नि ओरा दर्मसास्त्रल्लुकुना हेंदाले मत्तां. अदुनहाटीं ओन हक्कनसोंटा हिलाकोटे ओन जेलने वाटानसोंटा तप्पु ओनगा दिसा हिल्ले.

- 30 गानि ओन बोरो हक्कना मंता इंचि नाकु तेळियतस्के, ओन बिराना नीहेके लोहचीतन. ओनपोरो तप्पु दोस्सानोर बोर अयते मंतुर ओर नीवा मुन्ने वासि ओना तप्पु बतलो नीकु वेहगोम इंचि ओर्क आदेस हीतन,” इंचि सिट्टि रासतोर.
- 31 सिपाइल्लुकुक बल्हा आदेस हीतोर, अल्हेने पौलसुन पीसि नर्कटद-नर्केन अंतिपत्रि सहरते ओतुर.
- 32 इंकुंदि रोजु गुराल्लुकुनपोरो होनानोर्कुन ओनतोनि होनालय होळसि, कळमातोर किल्लाते तिरियसि वातुर.
- 33 ओर कैसरिया सहरते एवतारित्ते राज्यपालंक सिट्टि हीसि पौलसुन ओना मुन्ने निलाहतुर.
- 34 राज्यपाल सिट्टि हद्विसि, “निमे बद एरियातोन,” इंचि पौलसुन पूसकीतोर. ओर किलिकिया एरियातोर इंचि तेळियतारित्ते,
- 35 “नीवा पोरो तप्पु दोस्सानुर इगे वातारित्ते नीवा न्यायम कीतन,” इंचि ओर इत्तोर. पजा पौलसुन, हेरोद राजाना किल्लाते मनना जेलने ईसि, ओना पहारा कीम्ट, इंचि आदेस हीतोर.

24

पिलिक्स राज्यपालना मुन्ने पौलसुन निलाहमळ

- 1 हेय्युं रोजकु आतारित्ते हनन्याल इनना पेद्दा पेर्माल, इच्चुर यहुदि पेद्दाल्लुकुन, तिरतुल्लुस पोरोलतोर वकिलुन पीकुंचि कैसरिया सहरते वासि, राज्यपालना मुन्ने पौलसुन विरोदते केस कीतोर.
- 2 राज्यपाल पिलिक्स, पौलसुन केयतारित्ते, तिरतुल्लुस इनना वकिल पौलसुनपोरो तप्पु दोस्सि इल्हा इनालय दलगतोर, “राज्यपाल सायाब, नीवाहेंदाल मोमोट वेल्ले रोजकुनाल सांतिते मंतोम, नीवा तेल्विहेंदाल मावा देसेम सुदरांचेके मंता.
- 3 दीन मोमोट अन्नि जेगाने, अन्नि तीरकुने, पूरा मनसुने ओष्कुतोम.
- 4 नना नीकु वेल्लेने पोल्लें वेह्चि तिप्पल किय्योन, गानि मावां रोंड पोल्लें केंजा इंचि विनंति कीतन.
- 5 ई मनकल जगडाल्लुकु पुटिच्चानोर, दुनियाते मनना अंतोर यहुदिल्लुकुक होंग वायागोटनोर आनि ईर नासरेत पारिंता* लीडर आंदुर.
- 6 मावा गुळितुनगुडा हेडहासेक मत्तोर, गानि ईन मोमोट दोर्का पीतोम. (मावा नियम मत्ताप ईना न्यायम कीतोम इंचि मोमोट हळतोम,
- 7 गानि सिपाइल्लुकुना अदिकारि लुसियाल वासि जबरदास्तिते ईन महागटाल इग्गिस ओतोर.
- 8 तप्पु दोस्सनुर मीवा मुन्ने वायना इंचि आदेस हीतोर.) मोमोट ईना पोरो बव तप्पुक अयते दोसतोम अव अन्नि निजमा-आबद्दमा निमेने पूस कीसि हळा, पूसकीते नीकु पूरा तेळियसि दांता,” इंचि इत्तोर.
- 9 अस्के यहुदिल्लुकुना ओनाहेके आसि, इवन्नि पोल्लें निजमे, आंदुं इंचि इनालय दलगतुर.
- 10 पजा राज्यपाल, पौलसुन वळकालय सयगे कीतस्के पौलसुन इल्हा वळकालय दलगुतोर. “निमे वेल्लेने वर्सानाल ई देसेमते न्यायम कीसेक मंतिन इंचि तेळियता. अदुनहाटी नीवा मुन्ने नना कुसिते नावा पोल्लें वेहंतन.
- 11 नना येस्सलेमते पेनदुन मोळकालय होंचि पन्नेडु रोजकुंकनना एक्को आयाहिल्ले, इद पोल्ले निजमे इंचि नीकु तेळियार.
- 12 नना गुळिते बोनतोने लोल्लि कीतद ईर हळा हिल्लुर, दर्मसास्त्रम कराहना लोहकुने आयि, सहरते आयि, लोकुल्लुकुनतोनि जगडम पुटिस्तदगुडा ईर हळा हिल्लुर.
- 13 इंदके नीवा मुन्ने, नावापोरो दोस्ता तप्पुकुन ईर निजम कीसि हप्सा पर्र.
- 14 गानि उंदि पोल्लेतुन नीवा मुन्ने नना ओष्कुंतन. नना पेनदा हर्दे ताकसि, मना पेद्दाल्लुकुना पेनदा सेवा कीतन. आ हर्दुन ईर तप्पुड पारिं इंतुर. म्साणा नियमते, पेनदा कबुरतोरा नियमते रासतव अन्नि पोल्लेनपोरो नना विस्वासम कीतन.
- 15 नीतिते ताकानोर, नीतिते ताकवोर इच्चुरगुडा हातोरा लोप्पोटाल मर्जा जीवाते तेदांतुर इंचि ईर आसे इरताप, ननागुडा पेनदापोरो आसे इरंतन.
- 16 अदुनहाटी नना पेनदा मुन्ने आयि, लोकुल्लुकुना मुन्ने आयि, बस्केळक बेस मनसुने ताकालय हळंतन.”
- 17 नना वेल्लेने वर्सानाल येस्सलेमते हिलाका मत्तन, गानि इंदके मावा गरिब लोकुल्लुकुनाहाटी दान-दर्मम एविच्चि हियालय आनि गुळितगा पेनदुक मोक्कु हियालय वासि मत्तन.
- 18 नना गुळितगा सुद्विदकरन कीकुंचि, दंडकालक महानेके नाकुन हळतुर. अस्के अगा वेल्ले मंदि मना हिल्लुर, लोल्लि मनाहिल्ले.
- 19 गानि आसियाताल वातुर इच्चुर यहुदिल्लुकु अगा मत्तुर. नावदगिंटा बतलन्ना तप्पु मंचि मत्ते, ओर नीवा मुन्ने वासि, नापोरो तप्पु दोस्सि मन्ने.
- 20 हिलाकोंटे, नना यहुदि पंचादिते निल्लि मत्तास्के नावद बतल तप्पु दोर्कुतानो, अदन्ना इगे मत्तोर वेहिरकांटी.
- 21 “हातोर मर्जा जीवाते तेदांतुर,” इंचि ओरा मुन्ने नना जोरते इत्तन. इद उंदे पोल्लेताहेंदाल नावा न्यायम मीवा मुन्ने जर्गसेक मंता, इंचि पौलसुन इत्तोर.
- 22 पिलिक्सुक, पेनदा हर्दा बारेमते बेस एरपाट मत्ता. अदुनहाटी न्यायम कियानद आपसि, “सिपाइल्लुकुना अदिकारि लुसियाल वातारित्ते नीवा पोल्लेता पयसला कीतन,” इंचि इत्तोर.
- 23 पजा, “ईन दोहाकोंटा जेलते ईरा, ईना दंटातुर बतलन्ना हियालय वाते ओर्कुन आपमा,” इंचि दरोगांक आदेस हीतोर.

* 24:5 नासरेत पारिं येसु नासरेत नाटेने बेसंतोर, अदुनहेंके येसुनपोरो विस्वासम कियवोर, विस्वासम कीतोर्कुन नासरेत पारिं इंचि सिडांचुंदुर. विस्वासम कीतोर येसे किरिस्तु आंदुर इंचि नम्मुंदुर. † 24:7 इद वचनम कोन्नि पांडु लिपिने हिल्ले.

पिलिक्सुना मुन्ने पौलुस

24 कोन्नि रोजकु आतारित्ते पिलिक्स ओना यहुदि जातिता मुत्तो दुरसिल्लानतोनि अगा वातोर. पजा पिलिक्स पौलुसुन केया लोहतोर. अय्ते, येसु किरिस्तुनपोर्रो विस्वासम इराना बारेमते पौलुस ओर्कु वेहतोर.

25 गानि बस्के अय्ते, सत्तेमते बल्हा ताकाना, बल्हा ओप्केते मनना, पेन दुनियातोरा न्यायम आकिरते बल्हा किय्यार इव पोल्लेना बारेमते पौलुस पिलिक्सुनतोनि चर्चा कीतोर, अस्के पिलिक्स वेरियसि, “इंदके निमे होन, वेला दोर्कतस्के नना नीकुन मर्रा केयंतन,” इंचि पौलुसुन इत्तोर.

26 पौलुस कोत्तां हियानुर बारे इंचि पिलिक्स आसे पळसि ओन ऊके-ऊके केय्ति ओनतोनि वळकुंदुर.

27 रौंडु वर्सा इल्हेने पेय्ति होत्तारित्ते पिलिक्सना जेगाते पुरकियुस पेसतुस पोरोलतोर राज्यपाल आतोर. पिलिक्स होनना वेलाते, यहुदिल्लुकुन कूस कियानाहाटी पौलुसुन जेलतेन इरतोर.

25

पौलुस कैसर राजानगा विनंति कीतोर

1 पेसतुस राज्यपाल कैसरिया सहरते वासि, मूड रोजकु आतारित्ते, अगटाल येस्सलेम सहरते होत्तोर.

2 अगा पेद्दा पेर्मालोर आनि यहुदि पेद्दाल्क वासि पेसतुस राज्यपालना मुन्ने पौलुसुनपोर्रो तप्पु दोस्तुर.

3 पौलुसुन नड्डुम हरदेन हळ्कना विचारम मत्ताहाटी, “मावा पोरो दया कीसि ओन येस्सलेमते लोहचीम इंचि पेसतुस राज्यपालुन ओर विनंति कीतुर.”

4 अस्के पेसतुस इत्तोर, “पौलुस कैसरिया सहरता जेलते मंतोर, नना बिराना अगा दांतन.

5 अदुनहाटी मिहागटाल यहुदि पेद्दाल्कन नावातोनि लोहचीम्टु. आ मनकानद बतलन्ना तप्पु मत्ते, ओना तप्पुन मिमेट हुप्सा परांतिर,” इंचि इत्तोर.

6 पेसतुस राज्यपाल एनमिदि पदि रोजकु ओरतोनि मंचि, कैसरिया सहरते वापस होत्तोर. इंकुंदि रोजु कोरटते न्यायम कियाना जेगातगा उद्दिस पौलुसुन तायालय आदेस हीतोर.

7 पौलुस वातारित्ते, येस्सलेमताल वाता यहुदिल्लुकु ओना सुट्टु निततुर. ओनपोर्रो पेद्दा-पेद्दा तप्पुक दोस्तुर, गानि उंदिका तप्पु निजम कीसि वेहा परांहिल्लुर.

8 अस्के, “नना यहुदिल्लुकुना दर्मसास्त्रमता नियमकुना अड्डम बतले कबळ किया हिल्लेन, गुळितगा बतले तप्पु कबळ किया हिल्लेन, कैसर राजांक अड्डम बतले वळका हिल्लेन,” इंचि पौलुस इत्तोर.

9 पौलुस अल्हा इत्तस्के, यहुदिल्लुकुन कूस कियालय, “इव पोल्लेना न्यायम येस्सलेमते नावा मुन्ने आयागोम इंचि नीवा मनसु मंताना,” इंचि पेसतुस पौलुसुन पूसकीतोर.

10 अस्के पौलुस इल्हा जवाब हीतोर, “इंदके नना कैसरना कोरटतगा नित्तिसि मंतन, इग्गेने नावा न्यायम आयापीता. यहुदिल्लुकुना विरोदमते नना बतल तप्पु किया हिल्लेन इंचि नीकुगुडा बेस एरपाट मंता.

11 ओक्कला नना तप्पु कीतोनि आसि, नावा तप्पु हामुर सिक्सालायक मनानय्ते, नना हायालय तयार मंतन. गानि बव पोल्लेन पोरोटाल अय्ते लोकुल्क नापोर्रो तप्पु दोस्सेक मंतुरो, अव पोल्ले ओक्कला आबद्दम पेयसानय्ते, नाकुन बोरे ओरा कय्दे हिया पर्र. नावा न्यायम इग्गे आयाकोटे, कैसर राजाना मुन्ने आयागोम इंचि कोरसंतन.”

12 जवाबुने पेसतुस ओना पंचादिते उदता पेद्दाल्कनतोनि वळिकसि, “निमे कैसर राजानगा न्यायमताहाटी विनंति कीतिन अय्ते ओनागेन दाकिन,” इंचि इत्तोर.

पौलुसुन अग्रिपा राजाना मुन्ने केयमळ

13 कोन्नि रोजकु आतारित्ते, अग्रिपा राजाल* आनि ओना हेलड बर्निका, पेसतुस राज्यपालुंक कलियालय कैसरिया सहरते वातुर.

14 ओर इव्वुर वेल्लेने रोजकु अगा मत्तुर. मत्तस्के, पेसतुस राज्यपाल पौलुसुना न्यायमता बारेमते अग्रिपा राजांक इल्हा वेहतोर. मुन्नेटा पिलिक्स राज्यपाल, वरोर मनकन इग्गेने जेलने इरसि होत्तोर.

15 नना येस्सलेमते मत्तास्के, पेर्मालोर्क आनि यहुदि पेद्दाल्क ओनपोर्रो तप्पु दोस्सि, ओन्क सिक्सता आदेस हियालय नाकुन इत्तुर.

16 अस्के नना ओर्कुन इल्हा इत्तन, “बदवेरदाका अय्ते तप्पु कीता मनकल, तप्पु दोस्तोरा मुन्ने नित्तिसि, ओना तप्पुना बारेमते वळकोरो, अदवेरदाका ओन्क सिक्सा हियना रोमि लोकुल्कना रिवाज हिल्ले,” इत्तन.

17 अल्हा इत्तस्के, ओर लोकुल्क नावातोनि इग्गे वातुर. नना आल्सेम कियाका, इंकुंदि रोजु न्यायम कियाना जेगातगा उद्दिस, आ मनकन तायालय आदेस हीतन.

* 25:13 अग्रिपा राजाल प्रेरितुल्लुकुना कबाहक 12:1 वचनमते मनना हेरोद राजाना मर्रि, ई अग्रिपाल आंदुर.

- 18 ओनपोर्रो तप्पु दोस्सानुर नित्तिसि ओना तप्पुक वेहतुर, गानि नना इनकुत्ताप बदे तप्पु ओनपोर्रो वेहा हिल्लुर.
- 19 सिराप ओर ओरा दर्मता बारेमते आनि येसु पोरोलता वरोर हासोत्ता मनकना बारेमते ओरा लोल्लि मत्ता. गानि पौलुस मात्रम हासोत्ता येसु जीवाते मंतोर इंचि इंतोर.
- 20 इसोटा पोल्लेन बल्हा न्यायम कीकन इंचि नाकु तेळियाकोदु. अदुनहाटीं नना, “इव पोल्लेना पयसला क्रियालय येस्सलेम दांतिना?” इंचि ओन पूसकीतन.
- 21 अस्के पौलुस इत्तोर, “नावा न्यायम कैसर राजानगा आयागोम, अदवेरदाका इग्गेने जेलते मनंतन,” इंचि विनंति कीतोर. अदुनहाटीं नना ओन कैसरनगा लोहनदाका ओर इग्गेने मन्नि, इंचि आदेस हीतन.
- 22 अस्के अग्रिपा राजाल, “आ मनकल इनना पोल्लें नाकु केंजना मनसु मंता,” इंचि पेसतुसुनतोनि इत्तोर. “अल्हा अयते, ओना पोल्लें नाडि केंजकिन,” इंचि पेसतुस इत्तोर.
- 23 इंकुदि रोजु अग्रिपा राजाल आनि बर्निका बेस सोक आसि वातुर. सिपाइलुकुना अदिकारिल्लक, सहरता पेदूदा मनकालोर्कुनतोनि कूळसि पंचादि क्रियाना जेगाते ओर होत्तुर. अस्के, पौलुसुन पीसि वट्टु, इंचि पेसतुस आदेस हीतारित्ते, पौलुसुन तत्तुर.
- 24 अस्के पेसतुस राज्यपाल इत्तोर, “अग्रिपा राजाल आनि इगे जमा आता लोकुरिता! ई मनकन मिमेट हूळसंतिर, येस्सलेमतोर आनि इग्गेटुर वेल्लेटोरगुडा यहुदिल्लक नहगा वासि, ईन जीवाते इरमळ बेस आयो, इंचि वरगेयसेक विनंति कीतुर.
- 25 गानि ईर हामुटा सिक्सालायक बतले तप्पु क्रियवाप नाकु दिसता. ओर कुद कैसर राजाना मुन्ने न्यायम आयागोम इंचि विनंति कीतोर, अदुनहाटीं ईन कैसर राजानहेके रोमते लोहना विचारम कीसेक मंतन.
- 26 गानि ईना बारेमते कैसर राजांक बतल रासाना नाकु तेळिया हिल्ले. अदुनहाटीं ईना पोल्लें केंजता पजा, बदन्ना पोल्ले नाकु रासालय दोर्कार बारे इंचि मीवा मुन्ने ईन तत्तन, कास कीसि अग्रिपा राजाना मुन्ने तत्तन.
- 27 जेलते मत्ता मनकना बारेमते ओना तप्पु बतले वेहवा, उंदे मल्का ओन कैसर राजानगा लोहमळ नाकु बेस दिस्सो,” इंचि इत्तोर.

26

पौलुस अग्रिपा राजाना मुन्ने गवाइ वेहांतोर

- 1 “इंदके नीवा पोल्लें वेहा परांतिन,” इंचि अग्रिपा राजाल पौलुसुन इत्तोर. अस्के पौलुस, नना वळकंतन, इंचि वेहालय ओना कय तेहचि वळकुमळ सुख कीतोर.
- 2 अग्रिपा राजा! यहुदिल्लक नावापोर्रो बव पोल्लेना बारेमते अयते तप्पु दोस्तुरो, अव अन्नि पोल्लेन नीवा मुन्ने वेहालय नाकु मोका दोर्कता इंचि नना कूस आसेक मंतन.
- 3 कास कीसि, यहुदिरा रीति-रिवाजकु, ओरा विचारालुकुना बारेमते नीकु बेस एरपाट मंता. अदुनहाटीं दया कीसि नावा नना वळकाना पोल्लेन बेस केंजा इंचि विनंति कीतन.
- 4 नना सिन्ना मत्तस्केटाल नावा लोकुलुकुनतोनि येस्सलेमते मत्तन. अदुनहाटीं नावा ताकमळ, नावा पिस्वर बल्हा मत्ता अंतोर यहुदिल्लुकुन एरपाटे मंता.
- 5 (यहुदिल्लक मोदोटाले नाकुन एरपाट कीतुर. अदुनहाटीं नावा बारेमते गवाइ वेहाना ओरा मनसु मत्ते, मावा दर्मता रीति-रिवाजकुन अंतोर्कन्ना एक्को नोमानोन ननाने इंचि ओर वेहा परांतुर) मावा दर्मतां रीति-रिवाजकुन, परिसिल्लुकु अंतोर्कन्ना एक्को नोमुंदुर, अवने नना वरोन परिसिन आंदुन. इदुन यहुदिल्लुकु बेस एरपाट कीतुर. ओर इनकुत्ते इद पोल्लेता गवाइगुडा हिया परांतुर.
- 6 पेन मावा एनकटा पेदूदाल्लुकु पोल्ले हीसि मत्ता, अदे पोल्ले निजम इंचि नना आसे पडतन. अदुनहाटींगे, इंदके नावा न्यायम आयना मंता.
- 7 अदे पोल्ले पूरा आंता इत्ता आसेते, मावा पन्नेडु गोत्रालुकुना इस्त्राएल लोकुल्लक पूरा मनसुने नर्का-पिय्यल उंदेतीर पेनदा सेवा कीसंतुर. इदे बरोसा इरताहाटीं राजा, यहुदिल्लक नावापोर्रो दोसेम दोस्तुर.
- 8 अयना, पेन हातोर्कुन मर्ग तेहंता इत्ता पोल्लेपोर्रो मीवा लोप्पोटाल बोनके विस्वासम बारि हिल्ले?
- 9 मुन्ने ननागुडा, नासरेत नाटेना येसुना पोरोलता विरोदमते वेल्लेने कबाहक क्रियाना इंचि विचारम कीसि मत्तन.
- 10 येस्सलेमते नना अल्हा कीतनगुडा. पेर्मालोरकुनाहेंदाल अदिकारम दोर्किचुकुचि, वेल्लेटुर पेनदा लोकुलुकुन नना जेलने वाटतन. पेनदा लोकुलुकुन हक्कानेके, हक्कट इंचि नना ओप्कुनुंदुन.
- 11 हरेक दर्मसास्त्रम कराहना लोते, ओर येसुना अपमानम क्रियानादाका, ओर्कुन नना तिप्पल्लक क्रिया वेहुंदुन. ओरापोर्रो नाकु इच्चोर होंग वायुंदु गदा, ओर्कुन तकलिप क्रियालय नना पलाते सहरकुनेगुडा होनुंदुन.

पौलुस ओर हूळता दर्सनम बारेमते वेहांतोर

- 12 अल्हेने उंदे मल्का नना पेर्मालोरकुनाहेंदाल अदिकारम एल्लुकुचि दमिस्क सहर होंचेके मत्तन.
- 13 होननेके पिय्यल आता नना हर्देने मत्तन, अस्के मब्बुनाल उंदे पोळ्ळुंक्कन्ना एक्को वेलगु नावा आनि नातोनि मत्तोर सुट्टु मेर्सता.

14 मेसतस्के मोमोट अंटोरम हिळु अरतोम. अस्के नाकु उंदि अल्किर केंजावाता, अद इब्रानि बासाते नाकुन इल्हा इत्ता, “साऊल, ए साऊल, नाकुन निमे बारि तकलिप कीसंतिन? मुल्कि पोरो क्वादे तंते नीके कस्टम,” इंचि केंजावाता.

15 अस्के, “सामि निमे बोन आंदिन?” इंचि नना पूसकीतन. सामि इत्तोर, “निमे बा येसुनय्ते तकलिप कीसंतिन ओने नना आंदुन.

16 गानि इंदके निमे तेदसि, काल्कुनपोरो नित्ता. नावा बारेमते निमे हळता पोल्लेन अल्हेन नना नीकु हुप्सना पोल्लेन लोकुलुकुंक गवाइ वेहालय, नावा सेवक इंचि नीकुन निलाहंतन.

17 नना नीकुन नीवा यहुदिल्कुनगा आनि यहुदि आयवोरगा लोहांतन, अल्हेन ओरागटाल नीकु कापाळंतन.

18 ओर्कुन हीकटताल वेल्गुनहेके, देय्यमता अदिकारमताल पेनदाहेके तिरियना हरि हुप्सालय नीकुन लोहसेक मंतन. ओर अल्हा तिरियते, ओरा पापालक मापि आंतां, अल्हेने नापोरो बोर अय्ते विस्वासम कीसि पवित्र आतुरो, ओरतोनि ओर्कु वारसाहक्क दोर्कार,” इंचि येसु नाकु वेहतोर.

19 अदुनहाटी अग्रिपा राजा! पोरोटाल नाक हुपिस्ता दर्सनम हळसि, अद आदेस परकारम ताकतन.

20 आयंका, मुन्ने दमिस्क सहरतोरुंक, पजा येस्सलेमते मनानोरुंक, यहुदियाता पूरा एरियाते मनानोरुंक आनि वेरे जातितोरुंकगुडा मनसु मार्सकुंचि पेनदागा वट. वासि, मनसु मार्सकुलतोर लायकता बेसता कबाहक कीसि हुप्सट, इंचि वेहतन.

21 इदे कारनमहेदाल यहुदिल्क नाकुन गुळिते पीसि हळकालय हळसेक मत्तुर.

22 गानि इदवेरदाका पेन नाकुन सहायम कीता. अदुनहाटी नना इग्गे नित्तिसि सिन्नाल्क, पेदुदाल्क अंटोर मुन्ने गवाइ हीसेक मंतन. बव पोल्ले अय्ते आयानव मंतां इंचि पेनदा कबुरतोर आनि मूसाल मुन्नेन वेहतुर, अव पोल्ले तप्पा नना वेरे बतले वेहोन.

23 अव पोल्ले बव इत्ते, किरिस्तुकु तकलिष्कु बोगांचा पीता आनि हातोर लोपोटाल ओरे मोदाला मरी जीवाते तेदसि, यहुदिल्कुंक, यहुदि आयवोरुंक वेलगुना बारेमता पोल्ले वेहंतोर, इंचि पौलुस इत्तोर.

पौलुस अग्रिपा राजाना मनसुन तिराहलय हळतोर

24 इल्हा ओर वेहासेक मननेके पेसतुस वरगेयसि, “पौलुस निमे पागल आतिन. एक्को करियतदे नीकुन पागल कीसंता,” इंचि इत्तोर.

25 अस्के पौलुस इल्हा इत्तोर, “पेसतुस महाराज, नना पागल आया हिल्लेन, निजमतुन नना बेस बुद्दिदे वेहासेक मंतन.

26 ई पोल्ले मूलाते मक्किसि कीतव आयो. इवन्नि पोल्ले अग्रिपा राजांक बेस तेळियसे मंतां, इंचि नाकु विस्वासम मंता. अदुनहाटी वेरियाकोटा ओना मुन्ने वळकसेक मंतन.

27 अग्रिपा राजा! पेनदा कबुरतोर रासतवुन विस्वासम कीतिना, कियिना? निमे विस्वासम कीतिन नाकु एरपाटे,” इत्तोर.

28 अस्के, “बिरानेन नाकुन किरिस्तुनोन कियालय हळसंतिना?” इंचि अग्रिपाल पौलुसुन इत्तोर.

29 अस्के “बिरानेन आयि, आल्सेमते आयि, सिराप निमेने आयो, इय्याला इग्गे केंजानोर अंटोर, इव बेडी होळसि, कळमता अन्नि पोल्लेने नावालेसी आयना इंचि पेनदुक पारतना कीसेक मंतन,” इंचि पौलुस इत्तोर.

30 अल्हा इत्तस्के, अग्रिपा राजाल, ओना हेलड बर्निका, राज्यपाल आनि ओरतोनि उद्दिस मत्तुर अंटोर तेदतुर.

31 अगटाल पलाते पेय्से ओर-ओरे इल्हा वळकालय दल्गुतुर, “हामुर सिक्सालायक हिलाकोटे जेल सिक्सालायक ईर बतले तप्पु किया हिल्लोर,” इंचि इत्तुर.

32 पजा, “कैसर राजाना मुन्ने नावा न्यायम आयगोम इंचि, ईर इनाकोटा मंचि मत्ते, ईन होळसालय कुदुरवळ,” इंचि अग्रिपा राजल पेसतुसुन इत्तोर.

27

पौलुसुन इटलि एरियाता रोम सहरते लोहमळ

1 आयंका माकुन डोंगाते उद्दिस, इटलि एरियाते लोहाना निरनायम कीतुर. कीसि, पौलुसुनतोनि इच्चुर जेलने मत्तुर्कुन, अगस्तुस* दलमता युलियुस पोरोलता दरोगाना कय्दे अप्पजेपतुर.

2 अद्रमुतियुम सहरता डोंगाते मोमोट उदतोम, अद डोंगा आसिया एरियाता ओड्डु पीसि मत्ता नाहकुनाल पेय्सता. मेसिडोनिया एरियाता तेसलोनि सहरतोर अरिसतरकुसगुडा मावातोनि मत्तोर.

3 इंकुंदि रोजु मोमोट सिदोन सहरतगा एवतोम. अगा एवतस्के युलियुस दरोगानकु पौलुसुनपोरो दया वाता. अदुनहाटी पौलुसुना दंटागाहक ओन अवरिचगोम इंचि, “निमे होंचि नीवा दंटागाहकुंक कलियसि वा,” इंचि दरोगाल पौलुसुन इत्तोर.

4 अगटाल मोमोट पेयसनहेके वळि माकु एदुर मत्ताहाटी साइप्रस दीबेता वळि वायवा बाजुनाल पेय्सतोम.

5 मरी मोमोट किलिकिया आनि पंपुलिया एरिया दग्गेटा समुद्रम दाटसि, लुकिया एरियाता मरा इनना सहरतगा रेयतोम.

6 अगा सिंकंदरिया सहरताल इटलि एरियाक होनालय डोंगा तयार मत्ता. माकुन ओयना दरोगाल अद डोंगाते उपिस्तोर.

* 27:1 अगस्तुस ईर वरोर पेदुदा राजल मत्तोर, ओना पोरोलतेन दलमता पोरोल वाता. ☆ 27:2 कुलुसि 4:10; पिलेमोन 1:24

7 वळि माक एदुर मत्ताहाटी, मेल्लगा-मेल्लगा बच्चुंगो रोजकुनदाका वेल्ले कस्टमते कनिदुस सहरकु दगोरा एवतोम. एदुर वळि माकुन मुन्ने होना हियुवाहाटी, मोमोट क्रेति दीबेता ओड्डु साटने, सलमोने इनना जेगा पक्का पीसि दाटतोम.

8 अदुन दाटसि, समुद्रमता ओड्डुनाल वेल्ले तकलिपने डोंगातुन मुन्नेळ्क जर्पुसेके, डोंगा नित्तना बेसता जेगा, इनना जेगातगा एवतोम. अगटाल लसया सहर दगोरेने मत्ता.

9 पय्नेमते वेल्ले रोजकु आसि ओक्कापोद्दुना रोजगुडा† पेय्से होत्ता. वातावरनम कराब मत्ताहाटी डोंगातुन मुन्ने ओयालयगुडा वेरि मत्ता. अदुनहाटी,

10 “दादालोरिता! मनम इगेटाल पेय्सते वेल्ले तकलिप आंता इंचि नाकु अनपिच्चेक मंता. डोंगा आनि अकुने मत्ता सामानय्ते मुळगारे गानि मना जीवां इंका होना परांतां,” इंचि पौलुस डोंगाते मत्तोर्कुन इत्तोर.

11 गानि पौलुसना पोल्लेतुन दरोगाल केंजाका, डोंगा ताकिचनोर आनि डोंगा मालकुना पोल्लेतुन एक्को विस्वासम कीतोर.

12 अद जेगा पीनि कालमते (इगमते) मनालय बेस मनाहिल्ले, अदुनहेंके वेल्लेटुर लोकुल्क, “बच्चोन बिराना आया परते अच्चोन बिराना क्रेति दीबेता पिनिक्स सहरतगा होंचि आगते बेस मंता,” इंचि इत्तुर. बारित्ते पिनिक्स सहरतगा डोंगां आगना उंदि जेगा इल्हा मंता: दक्खिन-पस्चिम आनि उत्तर-पस्चिमता हेंदाल होळिया वांता. पीनि कालमते अद जेगाते वळि दल्गो.

समुद्रमते तुपान तेदमळ

13 पजा दक्खिन बाजुनाल वळि मेल्लगा-मेल्लगा वासेके मत्तय्ते ओर इंदके मनम पिनिक्स सहरते एव्वा परांतोम इंचि इनकुत्तुर. अस्के ओर अगटाल लंगर‡ तेहकुंचि क्रेति दीबेता ओड्डु साटने डोंगातुन होना हीतुर.

14 गानि गळसेम मत्तारित्ते दीबेता हेंदाल उंदि पेद्दा वळि दुमारम तेदता. दानु उत्तर-पूर्वीं तुपान इत्तुर.

15 मोमोट मत्ता डोंगा तुपान लोप्पो दोर्कता. आ तुपानता वळि एदुर मत्ताहाटी डोंगा मुन्नेळ्क होना पराहिल्ले. अस्के मोमोट वळि दोब्बुतेके डोंगा होन्निकांटी इंचि दान अल्हेने होळसीतोम.

16 अल्हा मोमोट कौदा इनना सिन्ना दीबे साटने होननेके, डोंगाता पज्जो दोहचि इगिसि ओयना पडवन§ वेल्लेन तकलिपने डोंगापोरिं एक्किस्तोम.

17 पडवां पोरो एक्किसतारित्ते, डोंगाते कबळ कियानोर बच्चुंगो उपायाल्क कीसि डोंगातुन नोंडेने, सुट्टु इगिसि दोहतुर. सुरतिस इनना उस्के जेगाते डोंगा दिगाबडार इंचि आ वेरिं कु डोंगाता परदातुन रेह्चि, डोंगातुन वळिते होळसीतुर.

18 अस्के इंकुंदि रोजु वळि दुमारमते पक्का तकलिप आताहेंके ओर माल पोहचियालय दल्गुतुर.

19 मूडो रोजुने डोंगाता कबळ्क ओज्जना सामानगुडा ओरा कय्कुनेन पोहचीतुर.

20 पजा वेल्लेने रोजकु माकु पोळ्दु, सुक्कां दिसा हिल्लें. तुपानते पक्का वळि वायुंदु, मोमोट पिस्सोम इंचि आसे होळसतोम.

21 वेल्ले रोजकुनाल बोरे बतल तिना हिल्लुर. अस्के पौलुस ओरा नड्डुम नित्तिसि इल्हा इत्तोर. दादालोरिता! नावा पोल्लें केंजसि क्रेति दीबेताल पेय्सका मंचि मत्ते, मनाकु ई तिप्पल वायाकोनवड, नुकसानगुडा आयाकोनवड.

22 अल्हा आयिनागानि मीकु विनंति कीतन, मिमेट दैरनेम इर्राट. मीवा लोप्पोटाल बोनदे जीवा होन्नो गानि डोंगाता मात्रम नुकसान आंता.

23-24 बारित्ते, बद अय्ते नावा पेन, नना अदे पेनदा सेवा कीतन दाना दूता निन्ने नर्का वासि, “पौलुस निमे वेरियमा, नीकु कैसर राजाना मुन्ने तप्पकोटा नित्तना मंता, हळा! नीतोनि डोंगाते मत्तुर अंतोर्कुनगुडा पेन पिसागोटंता,” इंचि इत्ता.

25 अदुनहाटी दादालोरिता! दैरनेम इर्राट. पेन नाकु बल्हा वेहता अल्हेने आयार, इंचि नाकु विस्वासम मंता.

26 गानि बल्हा अयना मनम बदन्ना दीबेता उस्केते होंचि हिरकंतोम, इंचि इत्तोर.

27 पडनालुं रोजकु आयिना, मोमोट अद्रिया समुद्रमता एते हीके-हेके वळिक तिरियसेक मत्तोम. तिरियसेक मननेके नळजाम नर्काटा वेलाकु मनम बदन्ना ओड्डुंकु एवतोम बारे इत्ताप डोंगा ताकसानोर्कुंक अनपिस्ता.

28 ओर समुद्रमता लोतु कहतुर अय्ते अगा नूटा इर्रवै पूटकु मत्ता. इंका इच्चुर लक्कु होत्ता पजा मर्रा कहतुर अय्ते अस्के टोबै पूटकु मत्ता.

29 अस्के, बंडाना लोप्पो डोंगा हिरकार बारे इंचि वेरियसि, ओर डोंगाता पज्जोटा बाजुंक नालुं लंगकुं वाटसि बस्के पंगांता इंचि हळसेक मत्तुर.

30 डोंगा ताकसानोर्कुं अगटाल वित्ताना मत्ताहाटी, “डोंगाता मुन्नेटा बाजुंक लंगकुं वाटंतोम,” इंचि बोकिच्चि पडवां रेहतुर.

31 अस्के पौलुस, “इर्रांटा डोंगाते मनाकोटे मिमेट इंका पीस्सिर,” इंचि सिपाइल्कुना अदिकारिन आनि सिपाइल्कुन इत्तोर.

32 अस्के सिपाइल्क, पडवां दोहता नोंडेन नेमाहचि पडवन एते अरहतुर.

33 पंगायना वेलाते पौलुस अंतोर्कुन गाटो तिननाहाटी विनंति कीसि इल्हा इत्तोर, “तुपान मग्ंता इंचि मिमेट एदुर हळ-हळसि, इय्यळ्क पडनालुं रोजकु आसंता. उपासम मंतिर, बतले तिना हिल्लिर.

† 27:9 ओक्कापोद्दुना रोज इद रोजुने पेद्दा पेर्मांल एडादिक उंदि मल्का गुळिते होंचि ओनाहाटी आनि अंतोरा पापालुकुंक मापि दोर्कनाहाटीं मोक्कु हियुंदुर. अद कालमते एते पय्नेमताहाटी वातावरनम कराब मंता. ‡ 27:13 लंगर डोंगा आगतगा बेके जर्गाकोटा मनालय आनि पय्नेम कियनेके मेल्लगा-मेल्लगा ताकालय कच्चितद उंदि कोंका मंता दाने लंगर इत्तुर. § 27:16 इगिसि ओयना पडवन वेल्लेटुर उदसि होनानद पेद्दा डोंगा मत्ता, डोंगा मुळगानय्ते पलाते पेय्सालय पडवा मनुंदु. अद पडवा डोंगाता पज्जो दोहचि मनुंदु.

34 अदुनहाटीं मिमेट गाटो तिटु इंचि विनति कीसेक मंतन. तित्तेने मिमेट जीवाते मनांतिर. मीवा लोप्पोटाल वरोनदगुडा तल्लाता उंदि केल्ददगुडा नुकसान आयो,” इंचि इत्तोर.

35 अल्हा वेह्चि, अंटोरा मुन्ने ओर हारि पीतोर. पेनदुक दन्यवाद कीसि, हारितुन तुकडां कीसि तिनालय दल्गुतोर.

36 ओन ह्ळसि, अंटोर्क हिम्मत वाता, ओरगुडा तिनालय दल्गुतोर.

37 डोंगाते मोमोट अंटोरम रोंडु नुहकुना डेब्बै हास् (276) मंदि मत्तोम.

38 ओर पीरनिडा गाटो तित्तारित्ते, डोंगाते मत्तव गोह्कुन समुद्रमते पोहचि डोंगातुन अल्कगा कीतुर.

डोंगा पय्मळ

39 पंगातारित्ते ओर्कु समुद्रमता ओड्डु दिसता, गानि अद बद देसेम इंचि एरपाट किया हिल्लुर. कुदुरते डोंगातुन इदे ओड्डुंक दल्गिच्चि इरकोम इंचि विचारम कीतुर.

40 ओर लंगर्कुना नोंडें नेमाहचि, अकुन समुद्रमते होळसि, अस्केने पतवारकुंक* दोहाचि मत्ता नोंडेंगुडा ओदोल कीतुर. ओदोल कीसि डोंगातुन वळि मुन्नेळ्ळक ओयि इंचि परदां एक्किचि डोंगातुन ओड्डुनहेके ओयालय दल्गुतुर.

41 गानि बगा अय्ते रोंड समुद्राल्क कलियंतां, असोंटा जेगातगा डोंगा होत्ता. अगा डोंगाता मुन्नेटा बाजु उस्केकु दल्गिसि, मुन्नेळ्ळक जर्गाकोटा दिगाबळता. पज्जोटा बाजु बारे जोरते वायाना तडां दल्गिसि डोंगा पय्यालय आता.

42 अस्के कैदिल्कु बारे ईतार्सि वित्ता मन्नि इंचि सिपाइल्क ओर्कुन हक्कना विचारम कीतुर.

43 गानि दरोगांक पौलसुन पीसागोटनद मत्ता, अदुनहाटीं ओरा पिलानतुन आपिसि ओर्कु इल्हा आदेस हीतोर, “बोर्क अय्ते ईता वांता, ओर मुन्नेने डेयसि ओड्डुंक पेयसट.

44 कळमातोर बारे बल्लां आनि डोंगाता उरंगाता तुकडनपोरों उद्विदस पेयसट,” इंचि इत्तोर. इल्हा बोर्क बतल आयाकोटा अंटोर ओड्डुंक पेयसतुर.

28

माल्टा दीबेते पौलस

1 इल्हा मोमोट ओड्डुंक पेयसतारित्ते, अद माल्टा इनना दीबे इंचि माकु तेळियता.

2 आ दीबेते मनना लोकुल्क मावा पोरों वेल्ले दया हुपिस्तुर. पिर्र, इरगा पीनि मत्ताहेंके, तडमि माससि माकुन बेस दगोरा केयकुत्तुर.

3 पौलस जमा कीता कट्टेना हेरकितुन तडमिते वाटसेके मत्तोर. अस्के उंदि नय तरासु तळमि सेकाकु हेरकिताल पेयसि ओना कय्दुक हुटकुत्ता.

4 तरासु कय्दुक वेलाड अरसि मत्तद ह्ळसि दीबेता लोकुल्क वरोंक-वरोर इल्हा इत्तुर, “निजमे, ईर तप्पाकोटा बोनो गानि हक्कतोर. ईर समुद्रमताल अय्ते पिस्सि पेयसतोर गानि न्यायम मात्रम ईन पिस्सा हियानाल हिल्ले,” इंचि इत्तुर.

5 गानि पौलस आ तरासुन तळमितेन दुल्पिसि वाटतोर. ओन्कुगुडा बतल आयाहिल्ले.

6 ओना मेंदुल तोयार हिलाकोटे ओर उंदे मल्का हिळ्ळ अरसि हायानुर इंचि लोकुल्क ह्ळसेक मत्तुर. वेल्लेनजेम आयिनागानि ओन्क बतले आयाहिल्ले. अस्के ओरा मनसु मार्सकुंचि, “ईर अय्ते बदो पेन आंदुर,” इंचि इत्तुर.

7 आ दीबेता पेद्दा अदिकारि पबलियुस इनानोना बूमि दगोरेने मत्तां. ओर माकुन केयसि ओसि मूड रोजकुनदाका हेडमितोर्कुन ह्ळकुत्ताप बेस ह्ळकुत्तोर.

8 पबलियुसुना बानकु एडकि वासेके मत्ता. अल्हेने नेत्तुर बयलि दोस्सि, कटुलते मीडसि मत्तोर. पौलस ओनगा लोप्पो होंचि पारतना कीसि, ओनपोरों कय इरसि बेस कीतोर.

9 अल्हा आतद ह्ळसि आ दीबेते बिमार अर्सि मत्ता कळमतोरगुडा अगा वासि बेस आतुर.

10 ओर माकुन वेल्ले कदर कीतुर. मोमोट अगटाल पेयसनेके माकु बतल-बतल गावाले मत्ता अवन्नि डोंगाते तच्चि इरतुर.

पौलस माल्टा दीबेताल रोम सहरताहेके होनमळ

11 मूड नेल्क आतारित्ते सिक्दरिया सहरताल वाता डोंगाते मोमोट पेयसतोम. आ डोंगा पीनि कालम पेयसनदाका माल्टा दीबेतागा आगसि मत्ता. डोंगाता मुन्नेटा बाजुंक एमडाल्कुना पेनकुना बोम्मा रेहचि मत्ता.

12 मोमोट सरकुस सहरते एव्सि, अगा मूड रोजकु मत्तोम.

13 अगटाल मोमोट तिरियसि रेगियुम सहरते एवतोम. इंकुंदि रोजु दक्किन बाजुनाल वळि तेदता. अस्के मर्रा उंदि रोजु अगटाल पेयसि पुतियुलि सहरते वातोम.

14 अगा माकु इच्चुर विस्वासुल्क कलियतुर. ओर माकुन ओरतोनि एडुं रोजकु मंटु इंचि इत्तुर. इल्हा मोमोट रोम सहरते एवतोम.

* 27:40 पतवार डोंगा ताकसेक मनानेके दान हीके-हेके तिराहनाहाटीं स्टेरिगतुन मेलाहते पतवार मेसलिसि डोंगा बरोबर दांता. पतवार डोंगाता हिळ्ळ एते मंता.

15 बस्के अयते रोम सहरता विस्वासुल्लुकुंक मोमोट वासेक इंचि तेळियता, अस्के ओर माकु कलियालय अप्पियुस हाटुमदाका वातुर. इंका आगाना मूड जेगा इनना नारदाका वातुर. ओर्कुन हळसि, पौलुस पेनदुक दन्यवाद कीतोर, ओना दैरनेम बेरस्ता.

16 मोमोट रोम एवतारित्ते वरोर सिपाइना पहाराते पौलुसुंक मनालय अलग उंदि लोन दोर्कता.

पौलुस रोम सहरता यहुदिल्लुकुंक कलियंतोर

17 मूड रोजकु आता पजा पौलुस अगाटा यहुदि पेदू दाल्लुकुन केयतोर. ओर उंदगा जमा आतारित्ते पौलुस ओरतोनि इल्हा वळकालय दल्गुतोर, “दादालोरिता, मना लोकुल्लुकुन आयि मना एनकटा पेदू दाल्लुकुना रीति-रिवाजकुन आयि नना बतले किया हिल्लेन गानि नाकुन येस्सलेमते रोम लोकुल्लुकुना कयदे यहुदिल्लुकु पीसि हीतुर.

18 रोमि अदिकारिल्लुकु नावा चौकसि कीतारित्ते नाहेके हामुर सिक्सातसोंटा बतले तप्पु मनाहिल्ले. अदुनहाटीं ओर नाकुन होळसीतोम इत्तुर.

19 गानि, ‘ईन होळसियामन्नि’ इंचि यहुदिल्लुकु इत्तुर. अदुनहाटीं, ‘कैसर राजानगा नावा न्यायम आयागोम,’ इंचि नना विनंति कीतन, अचोने. इगे नना नावा लोकुल्लुकुनपोर्रो दोसेम दोसालय वाया हिल्लेन.

20 ई पोल्लेन मीतोनि कलियासि वळकालय मीकुन केयतन. वरोर वायाना मंतोर इत्ता आसेते, इस्राएल लोकुल्लुकु बोनद एदुर हळसेक मत्तुर, ओर वातोर इंचि नना विस्वासम कीताहाटींगे नाक बेडीं अरतां,” इंचि पौलुस इत्तोर.

21 अस्के यहुदि पेदू दाल्लुकु पौलुसुन इल्हा इत्तुर, “नीवा बारेमते यहुदिया एरियाताल बतले सिट्टि दोर्काहिल्ले. अगटाल वायाना दादालोरगुडा नीवा बारेमते बतल वेहा हिल्लुर, नीवा बारेमते बदे कराब पोल्लेगुडा इना हिल्लुर.

22 गानि अन्नि जेगाने नासरेत पारिटोरा विरोदतेन वळकानद माकु एर्का मंता. अयना नीवा विचारम बतल मंता, इद मोमोट नीवाहेंदाले केंजंतोम,” इंचि इत्तुर.

23 अस्के ओनतोनि कलियालय उंदि रोजु पक्का कीतुर. पक्का कीता रोजुने ओर आगसि मत्ता लोतगा यहुदिल्लुकु वेल्लेटुर जमा आतुर. पौलुस हक्केटाल अयते पोळद होननदाका पेनदा राज्येम बारेमते ओर्कु गवाइ वेहतोर. अल्हेने मूसाना नियमताल आनि पेनदा कबुरतोर रासता पुस्तकाल्लुकुनाल येसुना बारेमते ओर्कु तेळियागोट्टिसि वेहतोर.

24 ओर वेहता पोल्लें इच्चुर्कु नच्चुतां, इच्चुर्कु नच्चुवा ओर विस्वासम किया हिल्लुर.

25 पजा ओरद-ओर्के वरोन पोल्लें वरोंक अर्काका, अगटाल तेदसि होनालय आयानेंके पौलुस इंकुंदि पोल्ले इत्तोर, पवित्र आत्मा यसायाह इनना पेनदा कबुरतोनाहेंदाल, मीवा एनकटा पेदू दाल्लुकुनतोनि वेहता पोल्ले निजमे आंदु, अद इल्हा मंता:

26 “निमे लोकुल्लुकुनगा होंचि इल्हा वेहा,

मिमेट बस्केळक केंजसेके मनंतोर, गानि अर्तम कीकुन्निर.

मिमेट बस्केळक हळसेक मनंतोर, गानि एरपाट किथ्यिर.

27 बारित्ते ई लोकुल्लुकुना मनसु गट्टिगा आता,

ओर केवुकुने तक्को केंजांतुर, ओर ओरा कळक मुचुकुत्तुर.

अल्हा कियाकोट्टे ओर कळुकुने हळसि मन्नेर,

केवुकुने केंजसि मन्नेर, मनसुने एरपाट कीसि मन्नेर,

नावाहेके तिरियसि मन्नेर, नना ओर्कुन बेस कीसि मन्नेन.”*✠

28 अदुनहाटीं, मुक्ति हियना कबुरतुन पेन वैरे जातितोरगा लोहता. ओर अदुन केंजंतुर, इंचि मिमेट एरपाट कियगोम.

29 पौलुस इव पोल्लें इत्तारित्ते यहुदिल्लुकु वरोंकु वरोर वरगेयसेके अगटाल पेय्सि होत्तुर.

30 अगा किरायता लोते पौलुस पूरा रोंड वर्सनदाका मत्तोर. बोर कलियालय वायिनागानि ओर्कुन बेस हळुंदुर.

31 वेरियाकोटा, आगाकोटा पेनदा राज्येम बारेमते वेहुंदुर, येसु किरिस्तुना बारेमते कराहुंदुर.

रोम रोमि विस्वासुल्कुनाहाटी पौलुसना सिट्टि

इद सिट्टिता बारेमते गिचचो परिचयम

रासतोना पोरोलः पौलुस

रासता कालमः इसवि सन 58

पौलुस इद सिट्टि रासाका मुन्ने रोम सहरते होना हिल्लोर. अदुनहाटी इद सिट्टि रासि अगाटा विस्वासुल्कुंक ओर ओना सतता परिचयम वेहचंतोर. अयना अगाटा विस्वासुल्कुनाल इच्चुर विस्वासुल्क ओन्क एरपाट मत्तुर. अयते पौलुसुंक ओरगा होचि कोन्नि रोजकु ओरतोनि मंचि, ओर्क येसु किरिस्तुना बारेमता बेसता कबुर वेहचि पजा अगटाल इसपानिया इनना देसेम होनना पिलान मत्ता.

दुनियाते मनना अन्नि जातिना लोकुल्क उंदचोने पापम कीसि मंतुर. पेनदा मुन्ने नित्तना इत्ते अंटोरगुडा नीतिमंतुल्क आयापीता, अस्केन पेनदा मुन्ने नित्ता परांतुर. बोर अयते येसु किरिस्तुनपोर्री विस्वासम इरंतुर पेन ओर्कुन नीतिमंतुल्क कीसि, पूना पिस्वर हीता. बच्चोन तकलिष्क-कस्टाल्क वायिनागानि ओप्के पीसि मनालय येसु किरिस्तु ओना पवित्र आत्माहेंदाल ताकत हीतोर.

इद सिट्टिता आकिर-आकिरते, मना पिस्वर पेनदा सेवाहाटीगे मंदना, विस्वासुल्क अंटोर पावरमते बेस कलियसि मंदना, मना दंटाता विस्वासुल्क हरि तप्सि होनाकोंटा ओर्कुन बेस हळकुनना. इल्हा अंटोर विस्वासुल्क कलियसि पिस्ते वेल्लेन सांति-समादानम दोर्कता. इसोंटा पोल्लें पौलुस रासतोर.

बगा बतल मंता

परिचयम आनि मुक्य उद्देसम 1:1-17

यहुदिर्क, यहुदि आयवोर्क इव्वुर्कगुडा मुक्ति अवसरमे 1:18-3:20

यहुदिर्क, यहुदि आयवोर्क इव्वुराहाटी पेनदा मुक्तिता हरि 3:21-4:25

किरिस्तुना लोप्पो पूना पिस्वर 5:1-8:39

पेनदा पिलानते इस्राएल लोकुल्क 9:1-11:36

किरिस्तुन विस्वासम कीतोर बल्हा पिसगोम 12:1-15:13

मुन्नेटाहाटी पिलानकु आनि जोहार 15:14-16:27

पौलुस रोमि विस्वासुल्कुंक सतता परिचयम कीतोर

1 नना पौलुस, येसु किरिस्तुना दासुन* आंदुन. नना मीकु इद सिट्टि रासेक मंतन. येसु किरिस्तुना कबाहक कियालय पेन नाकुन प्रेरित† इचि पेरता. पेरसि दाना बेसता कबुर वेहालय लोहता.

2 पेनबाबाल हीतन इत्ता इदे बेसता कबुरता बारेमते पेनदा कबुरतोर मुन्नेने पवित्र दर्मसास्त्रमते रासि इरतुर.

3 इद बेसता कबुर, मनकना रूपमते पुटसि वाता पेनदा मरिना बारेमते मंता. ओर दाविद राजाना वंसंमते पुटतोर.

4 गानि मना सामि येसु किरिस्ते पेनदा मरि आंदुर इचि हुप्सालय पेन दाना पवित्र आत्माता ताकतहेंदाल ओन हातोर लोप्पोटाल मर्रा जीवाते तेहता.

5 अंटोर लोकुल्क ओन विस्वासम कियना, ओर वेहताप ताकना इचि पेन नावापोर्री कुर्पा हुपिच्चि नाकुन येसुनहेंदाल प्रेरित इचि निलाहता.

6 येसु किरिस्तुना लोकुल्क आयनाहाटी केयतोरव्टे मिमेटगुडा मंतरि.

7 रोम सहरते मनना मीकु अंटोर्क ई सिट्टि रासि नना बतल वेहासेक इत्ते, पेनदुक मिमेट इत्ते वेल्लेन पावरम. इका अद मीकुन दाना पवित्र लोकुल्क आयालय केयता. मना पेनबाबाल आनि येसु किरिस्तु सामिनहेंदाल मीकु कुर्पा, सांति दोर्कि.

पौलुस पेनदुक पारतना कीतोर

8 मोदाला नना मीकु वेहानद बतल इत्ते, मीवा विस्वासम बारेमते पूरा दुनियाक तेळियसि होत्ता. इदुन मति कीसेक मीवा अंटोराहाटी येसु किरिस्तुनहेंदाल पेनदुक दन्यवाद कीतन.

9 पेनदा मरिना बारेमता बेसता कबुरतुन वेहासेक, नावा पूरा मनसुनाल नना पेनदा सेवा कीसेक मंतन.

10 नना पारतना कियानस्के बस्केळ्क मीकुन मति कीतन. दीनकु आ पेने गवाइ मंता. पेनदा इच्चा मत्ते, ई मल्का अयना मिहगा वायना हरि दोर्कि इचि इल्हागुडा नना पेनदुक पारतना कीसेक मंतन.

* 1:1 दासु इनकु कूलि, बूति, वेला बतल मन्ने, बस्केळ्क मालकुना सेवा कीसेके मनांतोर. † 1:1 प्रेरित इच्चुर्कुन पेरसि किरिस्तुना बारेमते वेहालय लोहचीतोर्कुन प्रेरितुल्क इचि इंतुर.

- 11 सामिनाहेंदाल नाकु दोर्कता आत्माता वराल्कुन मीतोनि पंचकुनना इंचि नावा इच्चा मंता. दीनहेंदाल मिमेट पेनदा बक्तिते गट्टिगा बेर्सकिर, अदुनहाटीं नना मिहगा वायालय हळसंतन.
- 12 इत्ते, मीकु-नाकु मनालोप्पो मत्ता विस्वासमताहेंदाल मनम वरोंक-वरोर प्रोत्साहन कीकुनना इंचि नावा मनसु मंता.
- 13 विस्वासुल्कुनिटा! नना मीकु वेहानद बतल इत्ते, यहुदि आयवा लोकुल्कुंक बेसता कबुर वेह्चि ओर्क सहायम कीतन, अस्के ओर ओरा विस्वासमता पिस्वरते बेस बेर्सतुर. अल्हेन मिमेटगुडा मीवा विस्वासमता पिस्वरते बेस बेर्सना इंचि नना ऊके-ऊके मिहगा वायालय हळंदुन, गानि इदवेरादाका बतलन्ना-बतल अड्डम वासेक मत्ता, इद पोल्ले मीकु तेळियना इंचि नना वेहासेके मंतन.
- 14 युनानि बासा, युनानि रीति-रिवाजकु तेळियतोर, तेळियवोर लोकुल्कुंक आनि करियतोरक, करियवोर्क इल्हा अंतोर्के पेनदा पोल्ले वेहना जिम्मेदारि नावा पोर्रिन मंता.
- 15 अदुनहाटीं रोम सहरते मनना मीकगुडा नना बेसता कबुर वेहालय तयार मंतन.
- 16 विस्वासम कियना अंतोर्कुंक, इत्ते मुन्ने यहुदिल्कुंक पजा युनानि लोकुल्कुंक मुक्ति हियालय ई बेसता कबुरते पेनदा ताकत मंता. अदुनहाटीं नना पेनदा बेसता कबुर वेहालय सिग्गु अर्रोन.
- 17 बारित्ते पेनदा मुन्ने मनकल नीतिमंतुड बल्हा आंतोर इत्ता पोल्ले बेसता कबुर मनाकु वेहंता. सुस्वनाल आकिरदाका विस्वासमतेन इद आया परंता. “नीतिमंतुल्क विस्वासमतोनि पिस्संतुर,” इंचि दर्मसास्त्रमते रासि मंता.

अंतोर पापम कीतोरें आंदुर

- 18 बेसता कबुर अंतोर लोकुल्कुंक एविच्चना अक्सरम बारि मंता इत्ते, सत्तेम हर्दे ताकवा लोकुल्क कराब कबाहक कीसि सत्तेमतुन दबांचि इरतुर. निजम पेन हिल्ले इत्ताप ताकसि, तप्पुड कबाहक कीतुर. अदुनहाटीं पेन ओरपोर्रीं स्वर्गमताल दाना होंगुन हुप्संता.
- 19 निजमाता पेन दाना गुनाल्कुन अंतोर लोकुल्कुना मुन्ने हुपिस्ताहाटीं इव अन्नि पोल्ले ओर्क एर्के मंतां.
- 20 बल्हा इत्ते, इद दुनिया पुटतस्केटाल पेन तयार कीता दुनियातुन हळते, दाना बस्केने दिसुवा गुनम, बस्केळक मनना ताकत मनाकु दिसंता. अदुनहाटीं पेनदुन एरपाट किय्योम इंचि मनकालोर इना पसर.
- 21 ओर पेनदुन अय्ते एरपाट कीतुरे, गानि पेनदुन बल्हा अय्ते तल्सकुनागोम अल्हा तल्सकुन्नुर इंका दाना कदरगुडा किय्युर. अल्हा किय्यका ओर अट्टि विचाराल्क कीसि ओरा मनसुने हीकटा कीकुत्तुर.
- 22 “मोमोट तेल्विगल्लोरम,” इंचि वेहकुंचि ओर बुद्धि हिल्वोरलेसी आतुर.
- 23 बस्केळक नासडेम आयाकॉटा मंदना महिमागल्ला पेनदुन ओर मोळकका, दाना जेगाते नासडेम आयना मनकानव, पिट्टेनव, जिवरासिनव आनि तरासुनलेहका बेंगना जिवरासिना बोम्मां कीसि मोळकालय दल्गतुर.
- 24 अदुनहाटीं ओरा मनसुने मत्ता बोगम विचाराल्कुन पूरा कीकुनालय पेन ओर्कुन होळसीता. अस्के ओर वरोना मेंदुल वरोंक कदर हिलाकॉटा बोगमतनाल्क कीतुर.
- 25 पेनदा बारेमता सत्तेम पोल्ले आबदुदम आंद, इल्हा इन्कुंचि ओर्कुन तयार कीता पेनदुन मोळकका, अद तयार कीतवुन पेन इंचि मोळकालय दल्गतुर. गानि अबुन तयार कीता पेने बस्केळताहाटीं तल्सकुननालायक मंता, आमीन.
- 26 अदुनहाटीं पेन ओर्कुन ओरा मनसुंक वाता सिग्गु हिल्वा कबाहक कियालय होळसीता. अस्के मुर्ताहक मुय्दुरतोनि मीडानद होळसि, मुर्ताहकुनतोनि मुर्ताहके मीडसि बस्केने ओप्वा कबाहक कियालय दल्गतां.
- 27 अल्हेने मांड्सागुडा ओरा मुत्तोहकुनतोनि मीडानद होळसि, मांड्सातोनि मांड्सा मुत्तो-मुय्दोनलेहका मीडसि बोगमतनम कियालय दल्गतुर. इसॉटा बोगमतनम कीताहाटीं ओर्क ओरा पिस्वरते रोगाल्क-तकलिप वासि सिक्सागुडा दोर्कता.
- 28 पेनदा सत्तेमता पोल्लेतुन ओर एरपाट कियालय हळा हिल्लुर. अय्ते ओर बद कबळ कियमळ बेस आयो, अदे कबळ कियालय पेन ओर्कुन होळसीता.
- 29 ओरा लोप्पो अन्नि तीरकुना कराब कबाहक, पगा, आस्ति, सीडातनम निडिस होत्ता. चुगलीं कियमळ, कळक पोतमळ, हक्कमळ, जगडाल्क कियमळ, विरोद कियमळ, नळेह कियमळ इसॉटा गुनम निडिस ओर इंकावरोना बारेमते कराब विचारम कियानोर आतुर.
- 30 इंकावरोन तेंडसि पोहानोर, पेनदुन हय्सवोर, गर्रा कियानोर, पोंगुळ वळकानोर, कराब पोल्ले पुटिच्चनोर, तल्लुर-बाबोना पोल्ले केंजवोर;
- 31 बुद्धि हिल्वोर, हीता पोल्लेपोर्रीं ताकवोर, जीवा नोयवोर, दया हिल्वोर आतुर.
- 32 इसॉटा मनकालोर्कुंक पेनदाहेंदाल हामुरता सिक्सा तप्पो इंचि ओर्क एरपाट मंचिगुडा ओर इल्हे ताकंतुर. अचोने आयका अल्हा ताकानोर्कुन “बेस ताकसेक मंतिट,” इंचि मेच्चकुंतुर.

2

मिमेटगुडा पापि लोकुल्क आंदिर

- 1 अरे तप्पु दोसना लोक्किरिटा, मिमेट बोरन्ना आम्टु! मिमेटगुडा अदे तप्पु कियानोर आंदिर. अदुनहाटीं इंकावरोन पोर्रीं मिमेट तप्पु दोसमत. इल्हा वेरेंतोरपोर्रीं तप्पु दोस्सि, मीवद मिमेटे “दोसिर्क” इंचि हुपिच्चुंतिर. दानहाटीं वेरेंतोरपोर्रीं तप्पु दोस्सि मिमेट तपिच्चुना परिर.

2 इसौटा तप्पु कबाहक कियानोरद पेन सत्तेमते न्यायम कीसि, ओर्क दगता सिक्सा हीता, इंचि मनाकु एरपाटे.

3 अय्ते मिमेटे वेहाट! बव कबाहकुनहेका मिमेट वेरतोरपोर्रो तप्पु दोस्संतियो, अवे कबाहक मिमेट कीसि, पेनदा सिक्साताल तपिचकुंतोम इन्कुंचंतिरा?

4 हिलाकोटे दाना दया, ओपके आनि मापितुन गम्मत इन्कुंचंतिरा? निजम बतले इत्ते, मिमेट मनसु मार्सकुनना इंचि पेने मीवापोर्रो दया हुपिस्ता, इद मीकु तेळियोना?

5 गानि गट्टि मनसु, हेडुतनमहेका बस्केने मिमेट मनसु मार्सा हळिर. इल्हा कीसि मीवा सिक्सातुन मिमेटे बेरसागोटसंतरि. बस्के अय्ते पेन दाना होंगुन मीपोर्रो हुपिचि, मीकु सिक्सा हिय्यार अस्के लोकुलक दाना सत्तेमता न्यायमतुन हळानुर.

6 आ रोजुने पेन हरेक मनकना न्यायम ओर कीता कबाहकुन हळसि कीता.

7 बोर अय्ते बस्केळक बेसता कबाहक कीसेके, पेनदाहेदाल कदर, दोसेम हिल्ला पिस्वरतुन दोर्किचकुनालय हळानुरो पेन ओर्क बस्केळक पिस्सना पिस्वर हीता.

8 गानि बोर अय्ते सत्तेमते ताकाकोटा तप्पुड कबाहक कीसेके सतताहाटी पिस्संतुर, ओरपोर्रो पेन होंग आसि सिक्सा हीता.

9 तप्पुड कबाहक कियना हरेक मनकंक तिप्पलक, दुक्कालक वांतां. अवटे मोदाला यहुदिल्लुक, पजा युनानिकुंक.

10 गानि अवे रोजकुने बेसता कबाहक कीसेके ताकानोर्कुके पेदुदातनम, कदर, सांति दोर्कार. अवटे मोदाला यहुदिल्लुक पजा युनानिकुंक.

11 बारिल्ले पेन मोकम हळसि कबळ किय्यो.

12 मूसाना नियम एरपाट हिल्लोर पापम कीते, मूसाना नियम परकारम सिक्सा आयाकोन्ना गानि सिक्सा अय्ते तप्पो. बोर अय्ते मूसाना नियम एरपाट मंचि पापम कीतुर, ओर्क मूसाना नियम परकारमे सिक्सा आंता.

13 बारिल्ले, सिराप मूसाना नियम केजानोर पेनदा मुन्ने नीतिमंतुलक आयुर, गानि मूसाना नियम केजसि दान परकारम ताकानोरे पेनदा मुन्ने नीतिमंतुलक आंतुर.

14 यहुदि आयवोर्कुंक मूसाना नियम तेळियो. गानि ओक्कला ओरा मनसु मूसाना नियमते वेहताप मनानय्ते, ओर्क मूसाना नियम तेळियाकोन्ना गानि मूसाना नियम परकारम ताकतापे आंता.

15 मूसाना नियमकु ओरा मनसुने रासि मंतां इंचि ओर कियना कबाहके हुप्संतां. दीनकु ओरा पिस्वरगुडा गवाइ मंता. बारिल्ले ओर तप्पुड कबळ कियनेके ओरा मनसे “इद तप्पु” इंचि दोसेम दोसंता. अल्हेने बेस कबळ कियनेके ओरा मनसे ओर्क “इद बेस” इंचि वेहंता.

16 नना वेहना बेसता कबुर परकारम, बोर्क तेळियाकोटा मनकालोर्क कीता कबाहकुन पोर्रोटाल, अद रोजुने पेन येसु किरिस्तुनाहेदाल लोकुलकुना न्यायम किय्यार.

यहुदिल्लक आनि ओरा नियम

17 अय्ते इंदके मीवद मिमेट, “मोमोट यहुदिल्लक” इंचि वेहकुंतुर, मूसाना नियमपोर्रो विस्वासम इरंतुर, “मोमोट पेनदुक वेल्ले दग्गेटोर्कुम” इंचि पेदुदातनम वेहकुंतुर,

18 मिमेट मूसाना नियम करियसि मंतरि इंचि पेनदा इच्चा बल्हा मंता आनि बेस हरि बद्दु इंचि मीकु तेळियता.

19 मिमेट इल्हा इंतरि गदा, “गुडिडर्कुनलेसी मनानोर्कुंक हरि हुप्संतोम, हीकटा पिस्वर पिसानोर्कुंक वेल्लुनलेसी मनंतोम.”

20 मूसाना नियमते रासि मत्ता पोल्लेगे सत्तेम आनि तेल्चि हियानव इंचि मीकु तेळियताहाटी, “मुर्कालोर्कुंक बुदि वेहानोरम, पिलाल्लुकुंक कराहनोरम,” इंचि मिमेट इनकुंतुर.

21 अय्ते मरि वेरतोर्कुंक कराहना पोल्ले मीवद मिमेटे बारि कराहकुनिट? “दोंगातनम कियमट” इंचि कराहचि मिमेटे दोंगातनम कींतुर.

22 बोगमतनम कियामन्नि इंचि कराहचि, मिमेटे बोगमतनम कींतुर. बोम्मांक मोळका मन्नि इंचि कराहंतुर, गुळिते होंचि दोसकुंतुर.

23 महगा मूसाना नियम मंता इंचि पेदुदातनम वेहकुंतुर गानि नियमते ताकका पेनदा कदरगुडा किय्यिर.

24 “मीवा इसौटा कबाहकुनहेका यहुदि आयवोरा नड्डुम पेनदा अपमानम आंता,” इंचि इंचि दर्मसास्त्रमते रासिगुडा मंता.

25 मिमेट मूसाना नियम परकारम ताकानय्ते, कतना* कीतद मीकु पाय्दा आंता. गानि मिमेटगिटा मूसाना नियम परकारम ताकाकोटे मिमेट कतना कीसिगुडा बतल पाय्दा हिल्ले.

26 बोरन्ना कतना कियवोर गिटा मूसाना नियम परकारम ताकते, ओर कतना कियाकोन्नागानि पेनदा नदरते कतना कीतोना लेक्कातेन वांतोर.

27 मूसाना नियम मिहगा मंचि दाना परकारम कतना आसिगुडा मिमेट नियम परकारम ताकसेक हिल्लिर. अदुनहाटी बोरद अय्ते कतना आयाहिल्ले, यहुदि आयवोर, मूसाना नियम मत्ताप ताकानोर मीपोर्रो दोसेम दोस्सनुर.

28 सिराप यहुदि जातिते पुटोर, पलाताल कतना आतोर ईर निजम यहुदि मनकालोर आयुर.

29 बोर अय्ते पेनदा इच्चा मत्ताप ताकंतुर ओर निजम यहुदिल्लक आंदुर. मूसाना नियम परकारम पलाताल आतदे कतना आयो, गानि पेनदा आत्माहेदाल मनसु मारियता मनकालोरे निजम कतना आता यहुदिल्लक आंदुर. इंसंटा मनकालोर लोकुलकुना कदरतुन आयो गानि पेनदा कदरतुन पहकंतुर.

* 2:24 यसायाह 52:5 * 2:25 कतना यहुदि आनि मुसलमान लोकुलकुनद उंदि रिवाज आंद. इद रिवाज परकारम उळकानगटा कोस्सा तोलदुन कोय्यांतुर. इंसंटा रिवाज कीते पेनदातोनि करार कीताप इंचि ओर नम्मंतुर.

3

हीता पोल्लेताल पेन पजोळ्क होन्नो

- 1 इद केंजसि, “अय्ते यहुदि आसि बतले पायदा हिल्लेना? कतनाकु इच्चोगुडा विलवा हिल्लेना?” इंचि मिमेट इनकुंतिर बारे.
- 2 विलवा अय्ते वेल्लेने मंता. अद बल्हा इत्ते, पेन दाना पोल्लेन* मोट्टा मोदाला यहुदिल्लुकुंके हीता.
- 3 यहुदिल्लुकुना लोप्पो पेनदा पोल्ले केंजवोर इच्चुर मत्तुर. ओर अल्हा मत्तुर इंचि पेन विस्वासमतद आयो इनकुंचतिरा?
- 4 अल्हा आयापर्रो. लोकुल्लक अंटोर आबद्दम वळकानोर आयिना, पेन मात्रम बस्केळ्क निजम मनंता. बारित्ते दर्मसास्त्रमते, “निमे वळकते नीवा पोल्ले निजम इंचि दिस अरंता, निमे न्यायम कियनेके नीवा पोल्ले गेल्संता,” इंचि रासि मंता.☆

5 मना तप्पुड कबाह्कुन ह्ळसि पेन बच्चोरो नीतिमंतुड इंचि एर्का आंता. इल्हा आतास्के पेन मनाकु सिक्सा हीसि अन्यायम कीसंता इंचि मनम इनकुना परंतोम. (इद नना मनकना विचारम मत्ताप वळकसंतन.)

- 6 गानि अल्हा इनकुनमळ तप्पु आंद, अल्हा गिंटा पेन कीति, अद दुनियातोर न्यायम बल्हा किय्यार?
- 7 अचोने आयका, “मावा तप्पुड कबाह्कुनहेंदाल पेने सत्तेमतद इंचि तेळियसि दाना कदरगुडा वेल्लेन आसेके अय्ते, पेन माकुन पापिर्क बल्हा इना परंता?” इंचिगुडा इच्चुर लोकुल्लक लोल्लि कीतुर.
- 8 इल्हा कियानोर, “पापम कीते बेस जर्गसेक गदा! अय्ते दट पापम कीकोम,” इंचिगुडा इंतुर. इंका इल्हा मोमोटे कराहतोम इंचि इच्चुर लोकुल्लक मापोर्रो दोसेमगुडा दोसंतुर. गानि अल्हा कियानोर अंटोर्कुंक, पेन दगता सिक्सा हीता.

पापम हिलाकोटा बोरे हिल्लुर

9 सरे! अय्ते मनम यहुदिल्लुकुम, यहुदि आयवोरकन्ना बेसतोर्कुमा? असले आयोम. बारित्ते यहुदिल्लुकु आयिर, युनानिर्क आयिर. अंटोर पापम कीतोरे इंचि नना मीकु मुन्नेन वेहचि मत्तन.

10 दर्मसास्त्रमतेगुडा इदुना बारेमते इल्हा रासि मंता गदा:

“बोरे नीतिमंतुड हिल्लोर, वरोरगुडा हिल्लोर.

11 निजम तेळियतोर बोरे हिल्लुर, वरोरगुडा हिल्लोर. पेनदुन पहकानोर बोरे हिल्लुर.

12 अंटोर पेनदा निजम हरदाल तप्पि तप्पुड हर्दुकु होत्तुर.

कबळ्क ओज्जनलायक बोरे हिल्लुर,

बेसता कबळ कियानोर बोरे हिल्लुर, वरोरगुडा हिल्लोर.☆

13 ओरा तोळदाल पेय्सना पोल्लें,

बोदा कुल्ला मत्ते पीनगुना गब्बु बल्हा वांता अल्हा मंतां.

ओरा तोळदाल पेय्सना पोल्लें, इंकावरोन मुळाहनव आंदुं.☆

तरासुना विसम वरोन बल्हा हक्कंता,

अल्हेन ओरा पेदविनाल पेय्सना पोल्लें तकलिप कियानव आंदुं.☆

14 ओरा पोल्लें सापनेम आनि कयमुलतोनि निडिस मंतां.☆

15 ओर बस्केळ्क इंकावरोन हक्कालय ह्ळसेक मनांतुर.

16 ओर बगा अय्ते दांतुर अगा नासडेम कीसि दुक्कमतुन हीसि दांतुर.

17 सांति बगा दोर्कता अद हरि ओर्क एरपाट हिल्ले.☆

18 ओरा कळ्कुना मुन्ने पेनदा वेंरे हिल्ले.”☆

19 मूसाना नियम परकारम बोर अय्ते ताकंतुर ओराहाटीगे मूसाना नियम मंता, इद मनाकु एरपाटे. अयना पेन न्यायम कियनेके दुनियातोर अंटोर, इत्ते यहुदिल्लुकु आयिर यहुदि आयवोर आयिर, अंटोर पेनदुकु लेक्का हियमळे, बोरे तपिचकुना पस्स.

20 मूसाना नियमता कबळताहेंदाल मनम अंटोरम पापिर्के इंचि तेळियंता अचोने. गानि अब्ते वेहचि मत्ताप ताकसि पेनदा मुन्ने बोरे नीतिमंतुल्लक आयुर.

पेन मनकालोर्कुन नीतिमंतुल्लक कीता

21 गानि इंदके मूसाना नियमते रासि मत्ता पोल्लेंगे कियवा मनकालोर्कुन नीतिमंतुल्लक कियनाहाटी पेन इंकुंदि हरि तयार कीता. अद हरदा बारेमते, मूसाल आनि पेनदा कबुरतोर पोल्ले हीसि मुन्नेन दर्मसास्त्रमते रासि इरतुर.

* 3:2 पोल्ले मूसाना नियमते मनना अन्नि पोल्लें इत्ते दर्मसास्त्रमते मत्तव अन्नि पोल्लें. ☆ 3:4 बजन संहिता 51:4 ☆ 3:12 बजन संहिता 14:1-3 ☆ 3:13 बजन संहिता 5:9 ☆ 3:13 बजन संहिता 140:3 ☆ 3:14 बजन संहिता 10:7 ☆ 3:17 यसायाह 59:7-8 ☆ 3:18 बजन संहिता 36:1

22 अद हर्रि बतल इत्ते, बोरे आयिर येसु किरिस्तुनपोर्रो विस्वासम इरते पेन ओर्कुन नीतिमंतुल्क कीता. इव्ते कुलम, जाति इल्हा बतल हिल्ले.

23 बारित्ते अंतोर लोकुल्क पापम कीसि, पेनदाहेंदाल दोर्कना कदरताल लक्कु आतुर.

24 गानि येसु किरिस्तु लोकुल्कन पापालकुनाल इळबळिस्तोर. इल्हा पेन दाना कुर्पाते येसु किरिस्तुन विस्वासम कियानोर्कुन अंतोर्कुन नीतिमंतुल्क कीता. दीनाहाटी मनम पेनदुक बतल हियना अक्सरम हिल्ले.

25-26 मना पापालकुना सिक्सातगा मोक्कु आयालय पेन येसुन लोहता. येसु किरिस्तु मना पापालकुनाहाटी मोक्कु आतोर इंचि मनम विस्वासम कीसि ओप्कुनगोम. दीनहेंदाल येसुनपोर्रो विस्वासम कीतोर्कुन पेन नीतिमंतुल्क कीता. इदवेरदाका बोरे अयते पापम कीतुरो, ओर्क सिक्सा हियाकोटा पेन ओप्के पीसि मत्ता. इल्हा अद नीतिमंतुड इंचि हुपिस्ता.

27 अदुनहाटी मनम पेदिदुरकेम कियामन्नि. मनम पुन्नेम कबाहक कीतोम इंचि पेन मनाकुन नीतिमंतुल्क कीतना? हिलाकोटे मूसाना नियमपोर्रो ताकताहेंकेना? विस्वासम कीताहेंकेन मनम नीतिमंतुल्क आतोम.

28 मूसाना नियमते मत्ताप ताकताहाटी पेन मनाकुन नीतिमंतुल्क इना हिल्ले, गानि येसु किरिस्तु सामिनपोर्रो विस्वासम कीताहेंकेन नीतिमंतुल्क इत्ता.

29 अयते दीना अर्तम मिमेटे विचारम कीसि वेहाट. पेन सिराप यहुदिल्लुकनदेना? यहुदि आयवोर्कुनद आयोना? पेन यहुदि आनि यहुदि आयवोर, इव्वुरदगुडा आंद.

30 अद बल्हा इत्ते, पेन उंदे आंद. कतना आतोर आयिर, कतना आयवोर आयिर, इव्वुर्कुनगुडा पेन ओरा विस्वासमहेंदाले नीतिमंतुल्क कीता.

31 “अल्हा अयते, विस्वासम कीताहेंका मनाकु मूसाना नियमता अक्केर हिल्ले, इनकुंचितिरा?” अल्हा आयो. विस्वासमहेंदाले मूसाना नियमते मनम बेस ताका परंतोम.

4

अब्राहामुना विस्वासम

1 इंदके मना एनकटा पेद्दा मनकल अब्राहामुना बारेमते मनम बतल इनकोम? ओर नीतिमंतुड बल्हा आतोर?

2 ओक्कला अब्राहाम कीता बेसता कबाहकुनहेंका पेन ओन नीतिमंतुड इंचि मत्ते, गर्रा कियालय ओनगा बतलन्ना कारनम मंचि मनवळ, गानि पेनदा मुन्ने ओर अल्हा किया परोर.

3 दर्मसास्त्रम बतल वेहांता इत्ते, “अब्राहाम पेनदुन विस्वासम कीतोर, ओना विस्वासमतुन हळसि पेन ओन ‘नीतिमंतुड’ इंचि वेहता.”☆

4 कबळ कियानोर्क दोर्कनद कूलि आंद, दान इनाम इन्नुर. ओर कबळ कीतोर, इंचि अद ओन्क दोर्कता.

5 गानि पेनदा मुन्ने बोरे मनकल बेसता कबाहक कीसि नीतिमंतुड आयोर. पापिकुनगुडा मापि कियना पेनदापोर्रो विस्वासम इरतेने, अद ओन नीतिमंतुड कीता.

6 कबाहक कियाकोन्नागानि, पेन बोर्कुन अयते नीतिमंतुल्क इता, ओर आसिर्वाद दोर्कतोर आंदुर इंचि दाविदगुडा इंतोर. अद इल्हा मंता:

7 “बोरा तप्पु कबाहकुन पेन मापि कीता, बोरा पापालकुन मुच्चुता, ओर पेनदा आसिर्वाद दोर्कतोर आंदुर.

8 बोरा पापालकुना लेक्का पेन पिय्यो, ओर आसिर्वाद दोर्कतोर आंदुर.”

9 अयते, इसोटा आसिर्वाद सिराप कतना आतोर्कुनाहाटीगेना मरि कतना आयवोरहाटीगुडा मंताना? हो, इव्वुराहाटीगुडा मंता. बारित्ते मना एनकटा पेद्दा मनकल अब्राहामुन पेन ओना विस्वासमतुन हळसि नीतिमंतुड इंचि ओप्कुत्ता, इल्हा मनमे वेहांतोम गदा!

10 अयते पेन अब्राहामुन बस्के नीतिमंतुड इंचि इत्ता? कतना आतारित्तेना, कतना आयाका मुन्नेन्ना? कतना आयाका मुन्नेन ओन नीतिमंतुड इंचि इत्ता.

11 अब्राहामुना कतना आयाका मुन्नेन ओर पेनदुन विस्वासम कीतोर. अदुनहाटी पेन ओन नीतिमंतुड इत्ता. नीतिमंतुना एरपाटता चिन्ह इंचि अब्राहामुं कतना किया पीता. अदुनहाटी विस्वासम कियानोर अंतोर कतना आयाकोन्नागुडा नीतिमंतुल्क आसि मंतुर. अदुनहाटी ओर, अंतोर विस्वासुल्कुना बाबोनलेसी मंतोर.

12 कतना आतोर्क अंतोर्कगुडा अब्राहाम मातिर दादले. गानि सिराप कतना आता इंचि ओर्क अब्राहाम मातिर दादल आया हिल्लोर. अब्राहामुना कतना आयाका मुन्ने ओना विस्वासम बल्हा मत्ता, अल्हेन ओर्कगुडा विस्वासम मत्ता इंचि अब्राहाम ओर्क मातिर दादल आतोर.

13 “मीकुन ई दुनियाता वारसदार्क कीतन,” इंचि पेन अब्राहाम आनि ओना वंसंतोर्क पोल्ले हीसि मत्ता. अब्राहाम मूसाना नियमते वेहताप ताकतोर इंचि पेन ओन्क पोल्ले हिया हिल्ले. गानि पेनदापोर्रो ओर विस्वासम कीसि नीतिमंतुड आतोर इंचि पेन ओन्क ई पोल्ले हीता.

14 ओक्कला मूसाना नियम परकारम ताकतोरे, पेन हीता पोल्ले परकारम वारसदार्क आयानयते, विस्वासम इन्ना पोल्लेक बतले विलवा मन्नो, पेन हीता पोल्लेकगुडा अर्तम मन्नो.

15 पेन नियमकु हीतस्के अबुन पीसि ताका पीता. ताकाकोटे पेन सिक्सा हीता. गानि नियमकु हिलाकोटे अबुन नेम्हना सवालगुडा वायो.

16 अदुनहाटीं पेन अब्राहामुना वंसंमर्तोर्क अंतोर्क हीता पोल्ले विस्वासम कीतोर्कुंक दाना कुर्पाताहेंदाले दोर्कता. इद सिराप मूसाना नियम परकारम ताकानोर्कुके आयो गानि अब्राहामुनलेसीं विस्वासमते ताकानोर अंतोराहाटीं मंता. ओर मना अंतोरा बाबल आंदुर.

17 “नना नीकुन वेल्ले लोकुकुना बाबो कीतन,”* इंचि पेन अब्राहामुना बारेमते इत्ता पोल्ले दर्मसास्त्रमते रासि मंता. पेनदा मुन्ने अब्राहाम मना अंतोर्क बाबोनलेसींगे मंतोर. हातोर्कुन पेन मर्रा जीवाते तेहंता. हिल्वदुनगुडा पुट्टींचंता असोटा पेनदुन अब्राहाम विस्वासम कीतोर.

18 अब्राहामुंक पिलाल्क आयना आसे हिलाकोन्ना, ओर पेनदापोर्रो विस्वासम कीतोर. अदुनहाटीं पेन ओन वेल्ले लोकुकुना बाबो कीता. “नीवा वंसंमताहेंदाल लेक्का हिल्वा लोकुल्क आंतुर,” इंचि पेन वेहता परकारमे जर्गता.*

19 अस्के अब्राहामुना वयम नूर वर्सा मन्ताहाटीं ओना मेंदुल कमजोर आसि मत्ता. अल्हेने ओना मुत्तो सारांकु पिलाल्क आयाना वयम दाटसि होत्ता. इवन्नि एरपाट मनिनागानि ओर विस्वासमते कमजोर आयाकोटा गट्टिगा मत्तोर.

20 अब्राहाम पेन हीता पोल्लेपोर्रो बस्केने अनमानम किया हिल्लोर, गानि पेनदा विस्वासमते गट्टिगा आसि दाना महिमा कीतोर.

21 पेन ओन्क हीता पोल्ले, अद पूरा किया परांता इंचि अब्राहामुंक पुरागा बरोसा मत्ता.

22 इद पोल्लेताहाटींगे, “पेन ओन नीतिमंतुड इत्ता.”*

23 विस्वासमहेंदाल नीतिमंतुड कीता पोल्ले सिराप ओनाहाटींगे हिल्ले.

24 गानि अद मनाहाटींगुडा मंता. हातोरवेटाल येसु सामिन मर्रा जीवाते तेहता पेनदुन मनम विस्वासम कीतोम, इंचि अद मनाकुनगुडा नीतिमंतुल्क इंता.

25 मना पापाल्कुनाहाटीं हायालय, पेन येसुन वेरैतोर कय्दे अप्पजेपता, आनि मनम पेनदा मुन्ने नीतिमंतुल्क आयालय ओन मर्रा हातोर लोप्पोटाल जीवाते तेहाता.

5

पेनतोनि सत्तेमते मनमळ

- 1 इल्हा, मना विस्वासमहेंदाल पेन मनाकुन नीतिमंतुल्क कीता. अदुनहाटीं सामि येसु किरिस्तुनाहेंदाल, पेनतोनि मनक सांति मंता.
- 2 इंदके मनम पेनतोनि कलियसि पिस्सना पिस्वरगुडा पेनदा कुर्पातेन दोर्कतद आंद. अचोने आयाका पेनदा महिमाता वेलगुने मनम उंदि रोज मनांतोम इत्ता आसेते वेल्लेन कूस मंतोम.
- 3 इच्चोने आयाका, विस्वासम कीताहेंका मनाकु तिप्पल्क वायिनागानि वेल्ले कुसिते मनंतोम. बारित्ते तिप्पल्क वातेने ओप्के पुट्टंता.
- 4 इल्हा ओप्के पीसि मत्ते मनालोप्पो बेसता गुनम वांता. बेसता गुनम मनाकु मुक्ति हियाना आसे पुट्टिचंता.
- 5 इद आसे मनाकुन नाराज किय्यो, बारित्ते पेन दाना पवित्र आत्मातुन मना पिस्वरते हीसि, अद मनाकुन वेल्लेन पावरम कीता इंचि हुपिस्ता.
- 6 बस्के अय्ते मनद मनम पिसागोटकुना पराकोटा आतोम, असोटा वेलाते मना पापि लोकुकुनाहाटीं किरिस्तु ओना जीवा हीतोर.
- 7 वरोर नीतिमंतुनाहाटीं बोर्न्ना जीवा हिय्यालय तयार मनमळ वेल्लेने कस्टम, गानि वरोर बेसता मनकनाहाटीं बोर्न्ना जीवा हिय्यालय तयार आया परांतुर आयावच्चु.
- 8 गानि मनम इंका पापमतेन मत्तोम, अस्केने किरिस्तु मनाहाटीं जीवा हीतोर. इदुना हेंदाल पेन मनापोर्रो बच्चोन पावरम कीता इंचि दिसंता.
- 9 येसु सामिना नेत्तुरहेंदाल पेन मनाकुन नीतिमंतुल्क कीता. अदुनहाटीं पेनदा होंगुनाल मनाकुन तप्पाकोटा ओनाहेंदाले पिसागोटमळ जर्गता.
- 10 उंदास्के मनम अंतोरम पेनदा पगातोरमे मत्तोम. अल्हा मननैकेगुडा अद दाना मर्रिना जीवातुन हीसि मनाकुन दाना दगोर्क कीकुत्ता. इंदके अय्ते मनम पेनतोनि कलियसि मंतोम. अदुनहाटीं किरिस्तुना पिस्वरताहेंदाल अद मनाकुन आकिर सिक्साताल तप्पाकोटा कापाळंता.
- 11 सिराप इच्चोने आयो गानि मना सामि येसु किरिस्तुनाहेंदाल मनम पेनतोनि मर्रा कलियतोम, अदुनहाटीं मनम वेल्लेन कुसिते मंतोम.

आदाम आनि येसु

12 इद दुनियाते पापम आदामुनाहेंदाल वाता. पापमताहेंदाल हामुर वाता. दुनियाता अंतोर लोकुल्कगुडा पापम कीतुर, अदुनहाटीं अंतोर्क हामुर वाता.

13 मूसाना नियम वायका मुन्नेन इद दुनियाते पापम मत्ता. गानि अस्के मूसाना नियमकु मनवाहेंका पापमतुन पेन लेक्का किया हिल्ले.

14 अय्नागानि आदामुनस्केटाल अय्ते मूसाना कालमदाका मनकालोरपोर्रो हामुर राज्येन कीसिकेन मत्ता. आदाम पेनदा पोल्लेपोर्रो ताका हिल्लोर. लोकुल्क पेनदा पोल्लेपोर्रो ताकका ओनालेसीं पापम किया हिल्लुर, अय्नागानि लोकुल्क हायुंदुर. ईर आदाम इत्ते मुन्ने वायाना किरिस्तुना चिन्हालेसीं मंतोर.

15 गानि पेनदा वरम आनि आदामुना पापम, इव रोंड पोल्लेन नड्डुम मात्रम वेल्लेन परक मंता. वरोर कीता पापमहेंदाल वेल्लेन मंदिक हामुर वाता. गानि दानकन्ना एक्को पेनदा वरम* आनि कुर्पा मंता. ई कुर्पा येसु किरिस्तुनाहेंदाल वेल्लेन मंदिक दोर्कता.

16 पेन हीता वरम आनि आदाम कीता पापमता पलम, इव रोंड पोल्ले उंदेतीर हिल्लें. बारित्ते आदामुना पापम अंतोरपोर्रो सिक्सातुन तत्ता. गानि मनम वेल्लेन पापाल्क कीसिगुडा पेन हीता वरमनाहेंदाल नीतिमंतुल्क आतोम.

* 4:17 उत्पत्ति 17:5 * 4:18 उत्पत्ति 15:5 * 4:22 उत्पत्ति 15:6 * 5:15 पेनदा वरम मना पापाल्क मापि आतां. इत्ते पेन मनाकु उंदि पेद्दा इनाम हीता.

17 आदाम कीता पापमताहेंदाल अंटोर हामुरता कय हिळु मंतुर. गानि इंकावरोर इत्ते येसु किरिस्तुनहेंदाल बोर्क अय्ते पेनदा वरम आनि कुर्पा दोर्कता, ओर्क अंटोर्क पेनदुक नच्चना नीति पिस्वर दोर्कता.

18 इल्हा आदाम कीता पापमताहेंदाल अंटोर लोकुल्लुक सिक्सा दोर्कता. अल्हेने इंकावरोर इत्ते येसु किरिस्तु कीता बेस कबाटाहेंदाल, पेन अंटोर्क नीतिमंतुल्लुक आयालय उंदि हरि तयार कीसि ओर्क बस्केळ्ळक पिस्सना पिस्वर हीता.

19 वरोर आदाम पेनदा पोल्ले केंजवाहेंका वेल्लेन लोकुल्लुक पापिक आतुर. अल्हेने इंकावरोर मनकल इत्ते येसु किरिस्तु पेनदा पोल्ले केंजताहेंका, वेल्लेन लोकुल्लुक नीतिमंतुल्लुक आंतुर.

20 लोकुल्लुक बल्हा इरगा पापम कीसेक होंचंतुर अदुन ओर्क हुप्सनाहाटी मूसाना नियम वाता. गानि लोकुल्लुक बच्चोन वेल्ले पापम कीसेक होत्तुर अचोने वेल्ले कुर्पा पेन कीसेक होत्ता.

21 इल्हा बारि आता इत्ते, बल्हा पापम हामुरताहेंदाल राज्येम कीसेक मत्ता, अल्हेने पेनदा कुर्पागुडा सत्तेमतोनि मना सामि येसु किरिस्तुनहेंदाल बस्केळ्ळक पिस्सना पिस्वरताहाटी राज्येम कीता.

6

पापमहेंदाल हामुर आनि किरिस्तुनहेंदाल पिस्वर

1 अय्ते मरि बतल इनकोम! पेन मनापोर्रो वेल्लेने कुर्पा कियाना इंचि पापम कीसेकेन दाकोमा?

2 बस्केने कियामन्नि. पापि गुनाल्लुकुनाल उंदि मल्का मनम बस्केळ्ळाहाटी वैरे आसि हासोत्ताप आतोम. मर्रा असोटा पापि गुनाल्लुकुने बल्हा पिसकोम?

3 मनम अंटोरम येसु किरिस्तुनतोनि कलियतोम इंचि हुप्सालय बापतिस्मा एततोम. अस्केने मनम ओनतोनि हाताप आतोम. इद संगति मीकु तेळियोना?

4 बापतिस्माहेंदाल मनम येसु सामिनतोनि हासि बोदा दोसताप आतोम. बल्हा अय्ते पेनबाबाना महिमाता ताकतते किरिस्तु हामुरताल मर्रा जीवाते तेदतोर, अल्हेने मनमगुडा बापतिस्मा एतसि पूना पिस्वरते ताका परांतोम.

5 बारित्ते मनमगिटा ओना हामुरते ओनतोनि उंदि आते, ओना मर्रा जीवाते तेदमळतेगुडा मनम ओनतोनि तप्पाकोटा उंदि आंतोम.

6 मना पडना पिस्वर येसुनतोनि क्लसुनपोर्रो हाता, अदुनहाटी पापमतोनि निडिस मत्ता मना गुनम नासडेम आसि होत्ता. इंदके मनम पापमता अदिकारमते हिल्लोम इद मनाकु एरपाटे.

7 बोरे अय्ते पडना पिस्वरतुन हाताप होळसीतोरो, ओर ओना पापाल्लुकुनाल मुक्ति दोर्किसि नीतिमंतुड आतोर.

8 ओक्कला मनम किरिस्तुनतोनि हायानय्ते ओनतोने मनम पिसंतोम इंचि मनाकु विस्वासम मंता.

9 किरिस्तु हामुरताल मर्रा जीवाते तेदतोर, ओर मर्रा बस्केने हायोर. अचोने आयका हामुरता ताकत ओन बस्केने बतल किया पर्रो, इद मनाकु एरपाटे.

10 पापमता अदिकारमतुन ओळिच्चनाहाटी ओर उंदे मल्का हातोर. गानि ओर इंदके पिस्सना पिस्वर मात्रम पेनदाहाटी पिस्सेक मंतोर.

11 इल्हा मिमेटगुडा पापमताहाटी हातोरलेहका मंचि, पेनदाहाटी येसु किरिस्तुने जीवाते मंतोम इनकुंट.

12 अदुनहाटी रोंड रोजकु पिस्सना मीवा पिस्वरते पापमता राज्येम वायाकोटा जेगर्ता मंट. इंका दाना सेड्डा आसेनाल लक्कु मंट.

13 मीवा मेंदुलतुन सेड्डा कबाहक कियालय पापमता कय्दुक हियमट. अल्हा कियाकोटा, “मनम हामुरताल जीवाते तेदतोरम,” इद पोल्लेतुन मति कीसि, मीपोर्रो पेनदुक अदिकारम हीम्टु आनि मीवा मेंदुलतुन नीति कबाहक कियनाहाटी पेनदुक अप्पजेप्पट.

14 अस्के मिमेट मूसाना नियमता कय्दा हिळु हिल्लिर गानि पेनदा कुपाते पिस्सेक मंतरि इंचि मीपोर्रो पापम दाना अदिकारम ताकसो.

सत्तेमता सेवा कियना

15 इंदके पेनदा कुर्पा मनाकु दोर्कताहाटी मनम मूसाना नियमता कय्दा हिळु हिल्लोम, अय्ते इंदके मनम पापम कीकोमा मरि? अल्हा बस्केने कियामन्नि.

16 सेवा कीतन इंचि मीवद मिमेट ओप्कुत्ते मिमेट बा मालकुनगा अय्ते सेवा कीसंतोरो, ओन्क मिमेट निजमे दासुल्लुक आंतोर. इद पोल्ले मीकु तेळियोना? मिमेट पापमता दासुल्लुक आते अद मीकु हामुरता हरि हुप्संता. गानि मिमेट पेनदा पोल्ले केंजते अद मीकुन नीतिमंतुल्लुक कीता.

17 मुन्ने मिमेट पापमता दासुल्लुके मत्तिर, गानि मीकु एव्ता पेनदा पोल्लेन मिमेट बेस केंजसि, करियसि इंदके अवुन पीसि ताकसंतोर. इंचि पेनदुक नना दन्यवाद कीतन.

18 इंदके पेन मीकुन पापमता कय्दाल होळसीता इंचि मिमेट सत्तेमता कबाहक कियालय पेनदा दासुल्लुक आंतोर.

19 इव पोल्लेन अर्तम कीकुनना ताकत मीकु हिल्ले इंचि नना उंदि उदाहरन हीसि मीकु वेहासेके. दीनकन्ना मुन्ने मिमेट मीवा मेंदुलतुन रोता कबाहक, तप्पुड कबाहक कियालय अप्पजेपसि मत्तिर. दानहेंदाल वेल्लेन पापम आता. अल्हेने इंदके मिमेट मीवा मेंदुलतुन सत्तेमता कबाहक कियालय अप्पजेप्पट, अस्के मिमेट पेनदा पवित्र लोकुल्लुक आकिट.

20 मिमेट बस्के अय्ते पापमकु दासुल्लुक आसि मत्तिर अस्के मीपोर्रो नीतिता कबाहक कियालय दबाव मनाहिल्ले.

21 अयना मिमेट कीता कबाहकुनाहाटी इंदके मीकु सिग्गु वासंता. मिमेट अव कीतस्के मीकु बतल इनाम दोर्कता? अव कबाहकुनाहेंदाल सिराप हामुरे दोर्कुदु.

22 गानि इंदके पेन मीकुन पापमता कयदाल होळसीताहेंका मिमेट दाना दासुल्लक आतिर. अदुनहाटीं इंदके मीकु दोर्कना इनाम बतल इत्ते, पेन मीकुन दाना पवित्र हर्दे ताक्किचि, आकिरते बस्केळक पिस्सना पिस्वरताहेके ओता.

23 पापि कबाहकुना कूलि इंचि मनाकु हामुर दोर्कता. गानि पेन मनाकु मना सामि येसु किरिस्तुनहेंदाल वरम इंचि बस्केळक पिस्सना पिस्वर हीता.

7

मरमिना उदाहरन

1 विस्वासुल्लकुनिटा, नना मूसाना नियम तेळियसि मत्तोरतोनि वळकसेक मंतन. वरोर मनकल जीवाते मत्ताचुं रोजके ओनपोरों मूसाना नियमता अदिकारम मनंता इंचि मीकु तेळियोना?

2 सरे, उंदि उदाहरन वेहांतन. मूसाना नियम परकारम उंदि मुरतळ दाना मुय्दो पिस्सि मत्ताचुं रोजके अद ओना मुत्तो आसि मनंता. गानि दाना मुय्दो हासोत्ते, मूसाना नियम परकारम अद मुरतळ मुय्दोक संबंदिस्ता नियमताल इळबळंता.

3 दाना मुय्दो जीवाते मननेकेन अद वैरे बोनतोनना मरमि आते, दान बोगमतनम कीता मुरतळ इंतुर. गानि दाना मुय्दो हासोनयते मात्रम आ नियमताल अद पलाते अरंता. अद वैरे मरमिं अय्नागानि दान बोगमतनम कीता इंचि इन्नुर.

4 अय्ते विस्वासुल्लकुनिटा, इल्हेन मिमेटगुडा बस्के अय्ते किरिस्तुनतोनि हातिर अस्के मूसाना नियमताल इळबळतिर. इंदके बोर अय्ते हातोरवेटाल मर्रा जीवाते तेदतोर आ किरिस्तुनतोनि मिमेट कलिया परंतिर. दीनहेंदाल मनम पेनदा सेवाताहाटीं बेसता कबाहक किया परांतोम.

5 मुन्ने मनम मना इस्ट परकारम ताकुंदुम अस्के मना मेंदुलतुन मनालोप्पो मत्ता पापि आसें वाळकुनुंदुं, मूसाना नियम मनाकु तेळियतस्के आ आसें इंका बेरस्सेक होत्तां. दीनहेंदाल मनाकु हामुर दोर्कता.

6 मनम बद नियमते अय्ते दोहिचि वाटताप मत्तोमो, आ मूसाना नियमताहाटीं इंदके मनम हासि, अवेटाल पलाते अरतोम. दानहाटीं मनम आ रासि मत्ता पडना नियम परकारम इंदके पिस्सेक हिल्लोम. गानि पेनदा आत्मा हुपिस्ता पूना हर्दुन एरपाट कीसि अद वेहताप ताकसेके दाना सेवा कीसंतोम.

मूसाना नियम आनि पापम

7 अय्ते मूसाना नियम तप्पु इंचि नना वेहसेक इन्कुंचतिरा? अल्हा असले आयो. ओक्कला मूसाना नियम हिलाकोटा मंचि मत्ते, असल तप्पु बतलो नाकु बस्केने तेळियाकोनवळ. ओक्कला मूसाना नियम, “वैरेतोर दानपोरों आसे पळमा,” इंचि वेहाकोटा मंचि मत्ते, आसे पळमळ तप्पु इंचि नाकु तेळियाकोनवळ.

8 गानि पापम, मूसाना नियमते मत्ता आदेसकुन वाळकुंचि नावा लोप्पो अन्नि तीरकुना तप्पुड आसें पुटिस्ता. मूसाना नियम हिलाकोटे पापमकु जीवा हिलवापे.

9 दीनकन्ना मुन्ने मूसाना नियमतुन एरपाट कियाकोटेन पिस्सेक मत्तन. गानि बस्के अय्ते मूसाना नियमते मत्तव अन्नि आदेसकु* नाकु तेळियतां, अस्के नावा लोप्पो पापम कबळ कियालय दल्लिसि, नना पेनदा मुन्ने हासोत्ताप आतन.

10 बद आदेस अय्ते नाकु पिस्वर हियानद मत्ता, अदे आदेस नाकु हामुर हीता.

11 पापम मोका हळसि आदेसतुन वाळकुत्ता, नाकु दोका कीता. पजा अदे पापम नावा पिस्वरतुन नासडेम कीता.

12 गानि मूसाना नियम पवित्रमातद आंद. अवटे रासि मनना आदेसाल्लकुगुडा पवित्र, नीतितव आनि बेसतव आंद.

13 अल्हा अय्ते आ पवित्रमाता बेस आदेसकुनाहेंदाले नाकु हामुर वाता इंचतिरा? अल्हा असले आयो. आ पवित्रमाता आदेसकुन वाळकुंचि पापम नाकु हामुरतुन हीता. अल्हा कीसि अद दाना असल रूपमतुन हुपिस्ता. पापम इत्ते बच्चोन कतरनाक आंद इंचि आ आदेसकुनाहेंदाल नाकु पुरागा तेळियनाहाटीं अल्हा आता.

मनकना परिस्तिति

14 बारित्ते मूसाना नियम पेनदागटद आंद इंचि मनाकु एरपाट मंता. गानि नना पापि आसेने निडिस मत्ताहेंका पापमता सेवा कियनाहाटीं अम्मूळ होत्तोतन आंदुन.

15 नना बतल कीसंतनो नाके तेळियसेक हिल्ले. नना बतल अय्ते कियगोमो, अद बारे कीसेक हिल्लेन आनि बद अय्ते कियमन्नो, अदुन बारे कीसंतन.

16 नना बतल अय्ते कियमन्नो अदुने नना कियानय्ते, मूसाना नियम बेसतद इंचि नना ओप्कुंतन.

17 गानि कियामन्नि इत्ता कबाहकुन कियानोन नना आयोन, नाकुन अल्हा किया वेहानद नावा लोप्पो मनना पापम आंद.

18 नावा लोप्पो बदे बेसता पोल्ले हिल्ले इंचि नाकु एरपाटे मंता. बद अय्ते बेसतदो अदे कियना इच्चा नाकगुडा मंता, गानि अल्हा किया परसेक हिल्लेन.

19 बव अय्ते बेसता कबाहको अवे नना कियना इनकुंतन, गानि अव नना कियोन. बव तप्पुड कबाहक अय्ते कियना आयो इंचि इनकुंतनो, अवे तप्पुड कबाहक नना कीतन.

☆ 7:7 निर्गमन 20:17 * 7:9 आदेस आदेस इत्ते सिनाइ गुट्टापोरों मूसांक पेन हीता पदि पोल्लें आंद.

20 गानि नना बव कबाहक अय्ते कियानायो अवे कबाहक कियानय्ते, आ कबाहक कियानोन नना आयोन गानि नावा लोप्पो मनना पापम आंदु नाकुन किया वेहानद.

21 अदुनहाटीं नना बस्के अय्ते बेसता कबाहक कियालय हळंतन, अस्के नावा लोप्पो मनना कराब गुनाल्क अल्हा कियालय नाकुन आपंतां.

22 पेन हीता नियमते नावा मनसु वेल्लेन कूस मंता.

23 गानि नावा मेंदुलपोर्री मात्रम इंकुंदि बंदो वेंरे नियम अदिकारम ताकिस्ताप नाक दिस्सेक मंता. आ नियम, नावा बुद्दिदेते मनना मूसाना नियमतोनि लडाइ कीसि नाकुन पापमता कय्दे अप्पजेपसंता.

24 अय्यो, नना बच्चोन गोसाते मंतन! हामुरता कय्दा हिळु मनना नावा ई पापि मेंदुलताल नाकुन बोर होळसा परंतोर?

25 मना सामि येसु किरिस्ते नाकुन होळसा परंतोर, नना पेनदुक दन्यवाद कीतन. नना मनसुनाल अय्ते पेनदा नियमतेन ताकाना इनकुंचंतन, गानि नावा मेंदुलते मनना कराब गुनाल्क नाकुन पापि कबाहक किया वेहचंतां.

8

पेनदा आत्माता ताकतते पिसमळ

1 अदुनहाटीं बोर अय्ते येसुन नम्मिसि ओनतोनि कलियतुर, ओर्क पेन सिक्सा हिय्यो. बारित्ते येसुन विस्वासम कीतोर, ओर ओरा बुद्दिदे मत्ताप आयो गानि आत्मा वेहताप ताकंतुर.*

2 बारित्ते पेनदा आत्माता नियम येसु किरिस्तुनाहेंदाल मनाकु पूना पिस्वर हीता. मनाकुन पापम आनि हामुरता नियमताल तपिस्ता.

3 मनकालोरा बुद्दिदे पापमता कय्दा हिळु मत्ताहेंका मनम मूसाना नियमतुन केंजाकौटा मत्तोम. अदुनहाटीं अद नियम मनाकुन पिसागोटा पराहिल्ले, अदुन पेने पिसागोटा परता. अद बल्हा इत्ते, पेन दाना मर्रिन इद बूमिते लोहचीता. ओर मनकालोरा पापालकुन तेंडसि पोहनाहाटीं, मनकाना मेंदुलते मारियतोर. अदे मेंदुलते ओर मना पापालकुना सिक्सातुन ओनपोर्री एतकुत्तोर.

4 अल्हा बारि इत्ते, मूसाना नियमते रासि मत्ता आदेसकु मनाहेंदाल पूरा आयना इंचि. दीनहेंदाल इंदके मनम मना मनसुक वाताप पिस्सेक हिल्लोम गानि पवित्र आत्मा वेहताप पिस्सेक मंतोम.

5 पापि गुनाल्कुना मनकल, पापि विचाराल्के कीसेक मनंतोर, गानि पेनदा आत्मा वेहताप ताकाना मनकल आत्माकु गावाले मत्ता विचाराल्के कीसेक मनंतोर.

6 इंका बोर मनकल अय्ते पापि गुनाल्कुने पिस्सेक मनंतोरो, ओना हामुर तप्पो. बोर मनकल अय्ते आत्मा वेहताप कींतोरो, ओन्क पिस्वर, सांति दोर्कता.

7 बल्हा इत्ते, पापि गुनमता मनकल पेनदुक पगातोर आंदुर. इसौटा मनकल पेनदा नियमते ताका हिल्लोर, आनि ताकोरगुडा.

8 पापि गुनाल्कुने पिस्सना मनकल पेनदुन कूस किया पर्रोर.

9 गानि मीवा लोप्पोगिंटा पेनदा आत्मा मत्ते, मिमेट पापि गुनाल्कुने पिस्सेक हिल्लिर गानि आत्मा वेहताप पिस्संतोर. बोना पिस्वरते अय्ते किरिस्तुना आत्मा हिल्ले, ओर किरिस्तुना मनकल आयोर.

10 मीवा लोप्पोगिंटा किरिस्तु मनानय्ते, मीवा मेंदुल पापम कीताहाटीं हासि होत्ता, गानि पेन मीकुन सत्तेमतोर कीताहाटीं, मीवा आत्मा बस्केळक पिस्सि मंता.

11 येसु किरिस्तुन हातोरवेटाल मर्रा जीवाते तेहता पेनदा आत्मा ओक्कला मीलोप्पो मनानय्ते, मीवा नासडेम आसि होनना मेंदुलतुनगुडा, मीलोप्पो मनना दाना आत्माहेंदाल जीवाते इरंता.

12 अदुनहाटीं विस्वासुल्कुनिटा, मनम मना पापि गुनाल्कुंक बाकि मत्ताप, अव वेहताप पिस्सना अक्केर हिल्ले.

13 बारित्ते मिमेट पापि गुनाल्कुने पिसानय्ते तप्पाकौटा हांतोर. गानि आत्माता सहायमतोनि मीवा पापि गुनाल्कुन हक्कानय्ते मिमेट पिस्संतोर.

14 बोर अय्ते पेनदा आत्मा वेहताप ताकंतोर, ओर अंतोर पेनदा मर्क-मियाहक आंदुर.

15 पेन मीकुन मर्रा दासुल्क कीसि वेराहलय दाना आत्मातुन हिया हिल्ले. गानि अद मीकुन दाना मर्क-मियाहक इनालय तयार कीता. दानहेंदाल मनम पेनदुन, “बाबाल,” इंचि केया परंतोम.

16 इंका पेनदा आत्मा मना आत्मातोनि कलियसि, मनम पेनदा मर्क-मियाहकुम इंचि गवाइ हीसेक मंता.

17 मनम पेनदा मर्क-मियाहक आताहाटीं वारसदारकगुडा आंदुम. पेनदा वारसदारक आताहेंका किरिस्तुनतोनिगुडा मनम वारसदारक. मनम ओनतोनि कलियसि ओना महिमाते पोत्तु आंतोम इनकुनानय्ते, ओना तकलिपतेगुडा पोत्तु आयापीता.

मनाकु पेनदा महिमाता वेलगु दोर्कता

18 नना मीकु इद बारि वेहचंतन इत्ते, मनाकु इंदके तकलिपकु, दुक्काल्क वांतंगे, गानि वायाना कालमते पेन दाना महिमाता वेलगुन हीसि बच्चोन मनाकु कदर हिय्यार, दाना मति कीते इंदकेटा तकलिपकु बग्गेन दलगौं इंचि नना इनकुंचंतन.

19 पेन दाना मर्क-मियाहकुंक हीता कदरतुन बस्के हुप्सार इंचि अद पुट्टिस्तव अन्निटवे वेल्लेन आसेते एदुर हळसेक मंतां.

* 8:1 इद वचनम कोन्नि पांडु लिपिने हिल्ले.

- 20 बारित्ते पेन पुट्टिस्तव अन्निटव अबुना इच्चा परकारम बत्तक ओज्जाकोटा आया हिल्ले, गानि पेने दाना इच्चा परकारम अबुन बतक ओज्जाकोटा कीता.
- 21 इंचि पेन पुट्टिस्तव अन्निटव नासडेम आयालय मंतां. अदुनहाटीं आ नासडेमताल तप्पिसि, पेनदा मर्क-मियाहकुनतोनि कलियसि पेनदा महिमा आयाना स्वतंत्रमतन दोर्किच्कुनालय पूरा दुनियंता आसेते एदुर हळसेक मंता.
- 22 उंदि मुरतळ एरपूराना वेलाते नोप्पि तेदसि बल्हा तनलाळंता, अल्हेने इद दुनियंता इदवेरादाका तनलाळसेक मंता, इद मनाकु एरपाटे.
- 23 पेन पुट्टिस्तवे आयाका, पेनदाहेंदाल मोदाटा पलम इंचि आत्मा दोर्कतोरम मनमगुडा, दाना मर्क-मियाहक आयालय मना कराब मेंदुलतुन होळसिसि पूना मेंदुल बस्के दोर्कार इंचि तनलाळसेक मंतोम.
- 24 मुक्ति दोर्कता इंचि इसौंटा आसेते मनम मना परंतोम. गानि मनम बद आसेते अय्ते मंतोम, अद आसेतुन मनम मना कळकुने हळसेक मननेके, अद आसे बल्हा आया परंता? बतल अय्ते मनाकु दोर्कता, अदुन एदुर हळसेक बोरन्ना मनांतुरा? मन्नु.
- 25 गानि बतल अय्ते मनाकु दोर्काहिल्ले, अदुना आसे पळानय्ते मात्रम मनम वेल्लेने ओप्केते, विस्वासमते एदुर हळसेक मनांतोम.
- 26 पारतना बल्हा कियमळो तेळियवस्के पवित्र आत्मा मनाकु सहायम कीता. मनाकु इनावायो असौंटा पोल्लेन पवित्र आत्मा मनाहाटीं पेनदागा तनलाळसेक विनंति कीसेक मंता.
- 27 मना मनसुने मत्ता विचाराल्कुन पेन बेस एरपाट कीता. अल्हेन आत्माता विचाराल्क बतल दानकु बेस एरपाट. अदुनहाटीं पेनदा लोकुल्कुंक गावाले मत्तदुनहाटीं पवित्र आत्मा विनंति कियनेके पेनदा विचारम मत्तापे कीता.
- 28 बोर अय्ते पेनदुन पावरम कीतुर, बोर्कुन अय्ते पेन दाना पिलान मत्ताप केयता, ओर्क बसौंटा परिस्तिती वायिना, पेन आ परिस्तिती ओरा बेसताहाटींगे कीता इत्ता पोल्ले मनाकु एरपाटे.
- 29 बारित्ते “बोर-बोर नापोरौं विस्वासम कीतुर” इंचि पेन मुन्नेटाले एरपाट कीसि मत्ता. दाना मरिं येसु, ओर अंतोरा दादाल आयगोम इंचि पेन ओर्कुन येसुनसंतोर आयानाहाटीं पेरता.
- 30 बोर-बोर्कुन अय्ते पेन पेरता ओर्कुन दाना हर्दे ताकालय केयता. इका बोर-बोर्कुन दाना हर्दे ताकालय केयता ओर्कुन नीतिमंतुल्क कीता. इल्हा नीतिमंतुल्क कीतोर्कुंक वेल्लेन कदरगुडा हीता.
- 31 इव अन्नि पोल्ले केंजतंका मनाकु उंदि विचारम तप्पाकोटा वांता, अद बतल इत्ते, पेने मना सायतक मत्तस्के मनाकु अड्डम तिरियनाहाटीं पगातोर बोर मनांतोर?
- 32 पेन दानकु मत्ता वरोर मरिनगुडा मनाहाटीं हीता. वरोर मरिं इंचि पज्जो-मुन्ने किया हिल्ले, अच्चोन बेस पेन आंदु. असौंटस्के दाना मरिनतोनि कळमातव अन्निगुडा मनाकु हिय्योना? तप्पाकोटा हीता.
- 33 कुद्दु पेने मनाकुन पेरसि नीतिमंतुल्क कीता. अय्ते मनापोरौं दोसेम दोस्सानोर बोर आंदुर?
- 34 अय्ते मरि मनाकु सिक्सा तप्पो इंचि बोर इना परांतुर? सिराप पेने इना परंता. गानि येसु किरिस्तु मनाहाटीं हातोर अस्के पेने ओन मर्रा जीवाते तेहाचि दाना तिना बाजुंक उपिस्ता. इंदके ओर अगा मनाहाटीं पेनतोनि विनंति कीसंतोर.
- 35 अय्ते मनाकु बदे तिप्पल आयि, लोकुल्कुना विरोद, दुक्कम, कर्वु, कपडिं दोर्काकोटा आयमळ, दोकाता जेगाते मनमळ आयि, कसेहक-गोर्काने हक्कनसौंटा वेला वायिनागानि इवन्नि येसु किरिस्तुना पावरमताल मनाकुन लक्कु किया पर्रीं.
- 36 बारित्ते, “मोमोट नीवोर्के आताहाटीं रोज-रोज लोकुल्क माकुन हक्कालय हळांतुर, मोक्कु हियालय मोळकुता गोरिनलेसीं मावा पिस्वर मंता,”* इंचि दर्मसास्त्रमते रासि मंता.
- 37 इवन्नि तकलिप वायिनागानि, मनाकुन पावरम कियना किरिस्तु मनातोनि मत्ताहेंका मनमे गेल्लसंतोम.
- 38 बारित्ते नाकु इंदके पुरागा तेळियसोत्ता. अद हामुर आयि, पिस्वरे आयि, पेनदा दूतांगें आयिं, देय्याल्क-बूताल्क आयिं, इद कालम आयि, वायना कालम आयि, बवे सक्तिं आयिं,
- 39 बूमिता लोप्पोटव आयिं, बूमि पोरोटव आयिं. पेन पुट्टिस्तव बवे आयिं मना सामि येसु किरिस्तुनाहेंदाल मनापोरौं मत्ता पेनदा पावरमताल लक्कु किया पर्रीं.

9

यहुदिल्कुनपोरौं पौलस होंग आंतोर

1-3 नावा यहुदि लोकुल्क पेनदाल बल्हा लक्कु आसि मंतुर मरि? ओर अल्हा आताहाटीं मनसुने नाकु वेल्लेन दुक्कम, बादा अनपिच्चंता. नना किरिस्तुना मनकन इंचि इदु पोल्ले निजम वेहचंतन, आबदुदम आयो. नावा लोप्पो मनना पवित्र आत्मागुडा इद निजम इंचि गवाइ हीसंता. पेन नाकु सापनेम हीसि, नाकुन किरिस्तुनाल लक्कु कियिना बेसे! नावा मनसु मात्रम नावा इस्राएल लोकुल्क पिसगोम इंचि मंता.

4 पेनदा मर्क-मियाहक आयाना हक्क इस्राएलना वंसंमते पुटतोरदे* आंद. पजा बय्लि बूमिने मत्तस्के पेनदा महिमा पेद्दा वेल्गासि इस्राएलना वंसंमतोर्के दिसता. करार्क ओरतोने कीता, मूसाना नियम्कुगुडा ओर्के हीता, मोळकाना बेस रिवाजकु हीता, अचोने आयका ओर्के पोल्लेगुडा हीता.

* 8:36 बजन संहिता 44:22 * 9:4 वंसंमते पुटतोरदे यहुदि लोकुल्क.

5 एनकटा पेद्रुदाल्क अब्राहाम, इसाक आनि याकोब ईरगुडा ईरोरे आंदुर. अचोने आयका येसु किरिस्तुगुडा मनकन रूपमते ईरा वंसंमतेन पुटतोर. अन्निन ताकसना अदिकारम मत्ता पेने ई येसु किरिस्तु आंदुर. अव अन्नि बस्केळ्क ओने तल्सकुन्नि. आमीन.

6 पेन इस्राएलना वंसंमतोर्क हीता पोल्ले तपता इंचि नना इंचेक हिल्लेन, गानि इस्राएल देसेमते पुटतोर अंतोर इस्राएलना वंसंमतोर आयुर इंचि नना वेहचंतन.

7 अचोने आयका अब्राहामुना वंसंमतोर अंतोरगुडा ओना निजम पिलाल्क इंचि मनम इनानायो. बारित्ते इदुना बारेमते दर्मसास्त्रमते, “सिराप इसाकुना वंसंमतोरे नीवा वंसंमतोर इंचि लेक्का कियमळ जर्गता,” ✧ इल्हा रासि मंता.

8 दीना अर्तम बतल इत्ते अब्राहामुना वंसंमते पुटतोर अंतोर पेनदा मर्क-मियाह्क आया पस्स. गानि पेन हीता पोल्ले परकारम बोर अय्ते पुटतुर ओरे अब्राहामुना निजम मर्क-मियाह्कुना लेक्काते वांतुर.

9 अब्राहामुंके पेन हीता पोल्ले इल्हा मत्ता, “इत्ता वेलाक नना मर्रा मल्सि वांतन, साराल† वरोर मर्रिन कनंता.” ✧

10 आ मर्रि इत्ते मना एनकटा पेद्रुदा मनकल इसाक आंदुर. ओर रेबेका इनानदानतोनि मर्रिं आतोर अस्के अद नेला तप्सि एमडाल्कुकन कंता.

11-12 गानि आ पिलाल्क पुट्टका मुन्नेन, ओर बद्दे मंचि-सेड्डा किय्यका मुन्नेन पेन रेबेकांकु, “मुन्ने पुट्टना पेडल पज्जो पुट्टनोना सेवा कियानुर,” ✧ इंचि वेहचि मत्ता. पेन मनकालोर्कुन ओर कीता कबाह्कुकन पोर्रोटाल केयो, गानि दाना इच्चा मत्ताप ओर्कुन केयंता, इंचि मनाकु दीनहेंदाल तेळियता.

13 दीना बारेमते दर्मसास्त्रमते, “नना याकोबुन कीतच्चोन पावरम, एसावुन किया हिल्लेन,” ✧ इंचि रासि मंता.

14 इदुन केंजसि मनम बतल इंदकोम मर्रि? पेन अन्यायम कीता इंदकोमा? असले आयो.

15 बारित्ते, “नना बोनपोर्रो दया हुपिच्चन, बोनपोर्रो दया कीकन, बोनपोर्रो दया हुपिच्चन, बोनपोर्रो दया कीकन, अद नावा इस्टम मत्ताप नना कीतन,” ✧ इंचि पेन मूसांक वेहचि मत्ता.

16 इल्हा बोनपोर्रो दया किय्यना इंचि पेने निरनायम कीता. इद मनकना कय्दे हिल्ले. दान दोर्किच्चुकुननाहाटीं मनम बच्चोन कस्टम किय्यिना एर्तमे.

17 पेन पिरोन‡ राजानतोनि इत्ता पोल्ले दर्मसास्त्रमते इल्हा रासि मंता: “नावा ताकततुन नीवाहेंदाल हुप्संतन अस्के नावा पोरोल पूरा दुनियामेळ तेळियसि होन्नार. इदुनहाटीगे नना नीकुन राजाल इंचि निलाहतन.” ✧

18 दीनहेंदाल मनाकु बतल तेळियंता इत्ते, पेन अद इनकुत्तोन पोर्रो दया कीता, अल्हेने अद इनकुत्तोन कटकेलमरि कीता.

19 इसोर्टस्के, “पेन अय्ते अद इनकुत्तापे ई दुनियाते किया गोर्टंता. अयना मावा पोर्रोन बारि दोसेम दोसंता?” इंचि मिमेट नाकुन इनकिर.

20 गानि मनका, पेनदुन मल्सि पूसकियानोन निमे बोन आदिन? “निमे नाकुन इल्हा बारि तयार कीतिन?” इंचि अळका बस्केनना कुम्मन पूस कीतना?

21 उंदे तोळि मुद्रुदाताल सगोम बेस सिंगारम अळकां, इका सगोमताल सादा अळकां तयार कियना अदिकारम वरोर कुम्मांकु हिल्लेना? तप्पाकोटा मंता.

22 अल्हेने पेनद्रुगुडा अद इनकुत्ताप कियना अदिकारम मंता. गानि नासडेम आसि होनानोर्कुन नासडेम कीसि पोहका ओप्के पीसि मत्ता.

23 पेन अल्हा ओप्के पीसि बारि मत्ता इत्ते, पेन दाना महिमा आनि दया बच्चोन बेसतद इंचि बोर लोकुल्कुंक अय्ते हुप्सना मत्ता, अद ओर्कुन मुन्नेन पेरता.

24 मनम अंतोरम पेन पेरता लोकुल्के. गानि पेन सिराप मना यहुदिल्लुकुनाले पेर्रा हिल्ले, यहुदि आयवोर लोप्पोटालगुडा पेरता.

25 यहुदि आयवोरा बारेमते पेन होसे पोरोलता पेनदा कबुरतोना पुस्तकमते इल्हा वेहता:

“मुन्ने नना बोर लोकुल्कुन अय्ते नावा लोकुल्क इंचि इना हिल्लेन,

इंदके ओर्कुन नना नावा लोकुल्क इंचि केयकन.

इका दीनकन्ना मुन्ने बोर्कुन अय्ते नना पावरम किया हिल्लेन,

ओर्कुन नना पावरम कीकन.”

इल्हा पेनबाबाल रासा वेहतोर. अचोने आयका,

26 “मिमेट नावा लोकुल्क आयिर इंचि नना बगा अय्ते इत्तनो,

अग्गेन मिमेट जीवाते मनना पेनदा मर्क-मियाह्क आतिट इंचि इनानुर,” ✧

इल्हा रासि मंता.

27 इका यसायाह इनना पेनदा कबुरतोरगुडा इस्राएल लोकुल्कुना बारेमते बतल इत्तोर इत्ते,

“इस्राएल लोकुल्क समुद्रमते मनना उस्केलेसीं लेक्का परवच्चुर मंतुर.

अयना पेन हियना सिक्साताल इच्चुरे पिस्संतुर.

28 बारित्ते ई दुनियाते मनना

✧ 9:7 उत्पत्ति 21:12 † 9:9 साराल इद अब्राहामुना मुत्तो आंदु. इद गोडमुरादि मत्ता. ✧ 9:9 उत्पत्ति 18:10-14 ✧ 9:11-12 उत्पत्ति 25:23 ✧ 9:13 मलाकी 1:2-3 ✧ 9:15 निर्गमन 33:19 ‡ 9:17 पिरोन पिरोन राजाल इरगा कटकेलमरि मत्तोर, इंचि पेन ओन इका कटकेलमरि कीता. कटकेलमरि मत्तोने पेन कटकेलमरि कीता अंतोर्कुन आयो. ✧ 9:17 निर्गमन 9:16 ✧ 9:26 होसे 1:10

अंतोर लोकुल्लुकुन पेन बिरानेन सिक्सा कियानद मंता, अद पुरागा कीता,”*
इंचि वेहतोर.

29 अचोने आयका,

“अन्निकन्ना ताकतवार पेन ओक्कला मनाहाटी,
मना वंसमतोरवेटाल इच्चुर्कुन होळसाकोटा मंचि मत्ते,
मनम सदोम, गमोरा नहकुना लोकुल्लुकुनालेसी नासडेम आसि मन्नेरम,”*
इल्हागुडा यसायाहल मुन्नेन वेहचि मत्तोर.

बेसता कबुर आनि यहुदिल्क

30 अय्ते मनम इंदके बतल इनकोम? यहुदि आयवोर पेनदा मुन्ने नीतिमंतुल्क आयालय ह्ळा हिल्लुर गानि येसु ओराहाटी कीतदुन ओर विस्वासम कीतुर इंचि पेन ओर्कुन नीतिमंतुल्क कीता.

31 इस्राएल लोकुल्क बारे मूसाना नियमते वेहताप ताकसि नीतिमंतुल्क आंतोम इंचि इनकुत्तुर. गानि ओर अल्हा नीतिमंतुल्क आया हिल्लुर.

32 बारित्ते ओर किरिस्तुन विस्वासम किय्यका बेसता कबाहक कीसि नीतिमंतुल्क आयालय ह्ळतुर. इंचि येसु किरिस्तु इस्राएल लोकुल्लुकुनाहाटी ओरा हरदे, दल्गिसि हिळु अरहना बंडालेसी^S मंतोर.

33 इदुना बारेमते दर्मसास्त्रमतेगुडा इल्हा रासि मंता:

“ह्ळाट, सियोनते* नना उंदि बंडातुन इरसतन,
अद बंडा इच्चुर्क दलंगंता, इंचिचुचुर बारे दान्क दल्गिसि हिळु अरंतुर.
बोर अय्ते दानपोरो विस्वासम इरंतुरो, ओरद बस्केने सिन्नातनम आयो.”*
इंचि रासि मंता.

10

1 विस्वासुल्लुकुनिटा! नावा इस्राएल लोकुल्लुकुं पेन मुक्ति हिथ्यि इंचि नावा वेल्लेन मनसु मंता. अदुनहाटी नना पेनदुक पारतना कीसेकेन मंचंतन.

2 पेनदा सेवा कियना इंचि ओर्क वेल्लेन जिद्दु मंता, इदुन नना कुद्दु ह्ळतन. गानि पेनदा सेवा कियना निजम हर्रि ओर्क तेळियो.

3 बारित्ते पेने लोकुल्लुकुन नीतिमंतुल्क कीता इत्ता संगति ओर्क तेळियका, सतता नियमताहेंदाल नीतिमंतुल्क आंतोम इंचि ओर इनकुत्तुर. इल्हा ओर पेन हूपिस्ता हर्दुन ओप्कुना हिल्लुर.

4 गानि येसुनपोरो विस्वासम कियानोर अंतोर नीतिमंतुल्क आयानाहाटी किरिस्तु मूसाना नियमता आकिरि आंदुर.

पेन अंतोर्कुन पिसागोटंता

5 दर्मसास्त्रमते मूसाल बतल रासतोर इत्ते, “बोर अय्ते दर्मसास्त्रमते मत्ताप ताकसि नीतिमंतुड आयालय ह्ळंतुर, ओर उंदि नियमगुडा तप्पाकोटा ताका पीता, अस्केन ओर अबुनहेंदाल नीतिमंतुड आंतोर.”*

6-8 मिमेट, “माकु पेनदा पोल्ले कराहलासि स्वर्गमते होंचि किरिस्तुन इदु बूमिपोरो बोर तरा परांतोर, हिलाकोटे हातोरवेटाल किरिस्तुन जीवाते तेहचि तरालय बोर दांतोर?” इंचि इनकुनमट. गानि विस्वासम कीसि नीतिमंतुड आयनोरा बारेमते दर्मसास्त्रम बतल वेहंता इत्ते, “पेनदा पोल्ले निहागेन मंता, नीवा मनसुना लोप्पो आनि नीवा तोळदेन मंता.” मोमोट मीकु वेहता पोल्ले इचे आंदु.

9 अद बल्हा इत्ते, नीवा पिस्वरते, येसुए नावा सामि इंचि निमे तोळदाल ओप्कुचि, ‘ओन पेन हातोरवेटाल मरी जीवाते तेहता,’ इंचि निमे नीवा मनसुनाल विस्वासम कीते, पेन नीकु मुक्ति हीता.

10 बारित्ते मनम मनसुनाल विस्वासम कीतोम इंचि मनाकुन पेन नीतिमंतुल्क कीता. तोळदाल ओप्कुत्तोम इंचि मनाकु पेन मुक्ति हीता.

11 दर्मसास्त्रमतेगुडा इल्हा रासि मंता: “ओनपोरो विस्वासम कियानोर बोरे आयिर, पेनदा मुन्ने ओनद बस्केने सिन्नातनम आयो.”*

12 पेनदापोरो विस्वासम इरनोर बोरे आयिर, ओर यहुदि आयिर, युनानिर आयिर अंतोर उंदे, अंतोर्कुंक ओर वरोरे सामि आंदुर. ओना पोरोल एतसि पारतना कियना अंतोर्कुंक ओर वेल्लेन आसिर्वाद हीतोर.

13 “सामिना पोरोल एतसि पारतना कियनोर ओर बोर्नना आयिर पेन ओन पिसागोटंता,”* इंचि दर्मसास्त्रमते रासतद मंता.

14 बोर अय्ते किरिस्तुनपोरो विस्वासम किया हिल्लुर, ओर ओना पोरोल बारि एतनुर? बोर अय्ते ओना बारेमते केंजा हिल्लुर ओर बल्हा विस्वासम कियानुर? बोर अय्ते ओर्क वेहानोर हिल्लुर, ओर बल्हा केंजानुर.

15 अल्हेने पेन बोर्कुने लोहाकोटे ओरगा होंचि ओर बल्हा वेहा परांतोर? असले वेहा परोर. दीना बारेमते दर्मसास्त्रमते इल्हा रासतद मंता: “बेसता कबुरतुन पीसि वायना लोकुल्लुकुन ह्ळते बच्चोना कुसि आंता!”* इंचि रासि मंता.

* 9:28 यसायाह 10:22-23 * 9:29 यसायाह 1:9 § 9:32 हिळु अरहना बंडाइद वचनमते हिळु अरहना बंडाता अर्तम येसु सामि आंदुर. * 9:33 सियोन इद येस्सलेम सहरता पडना पोरोल आंद. * 9:33 यसायाह 8:14; 28:16 * 10:5 लैयवस्ता 18:5 * 10:11 यसायाह 28:16 * 10:13 योएल 2:32 * 10:15 यसायाह 52:7

16 गानि इस्राएल लोकुलक अद बेसता कबुरतुन केंजसिगुडा अंटोर विस्वासम किया हिल्लुर. बारित्ते, “ए सामि! मोमोट वेहता कबुरतुन बोर नम्मुर?”* इंचि दीना बारेमते दर्मसास्त्रमते यसायाहल रासतोर.

17 इल्हा किरिस्तुना बारेमता बेसता कबुरतुन बोरन्ना वेहतेने केंजांतुर, केंजतेने विस्वासम किया परांतुर.

18 अयना नना उंदि पोल्ले पूसकीतन, इस्राएलतोर इद कबुरतुन केंजा हिल्लुरा? तप्पाकोटा केंजतुर. इदुना बारेमते इल्हा रासतद मंता: “ओरा लेंग दुनियाता केंजा होत्ता, ओरा पोल्ले दुनियाता मूला-मूलादाका एव्ता,”* इंचि दर्मसास्त्रमते रासि मंता.

19 अयना इंकुंदि पोल्ले पूसकीतन, इस्राएल लोकुलक कबुर केंजतस्के अद ओर्क तेळियतना तेळिया हिल्लेना? तप्पाकोटा तेळियता. मूसाना नियमते मुन्नेन रासि मत्ताप,

“विलवा हिल्लुवा यहुदि आयवोर्कुन नना पावरम कीसि,
मीकु कळक पोत्तानाल कीतन.

अल्हा कीसि नाकुन एरपाट कियवा यहुदि आयवोरहेंदाल,
मीकु होंगु वायनाल कीतन,”* इंचि पेन इस्राएल लोकुलकुन इत्ता.

20 पजा

“नाकुन पहकवोर नाकुन दोर्किचकुत्तुर.
नाकुन पूसकियवोर्कुक ननाने कुद्दु दिसतन,”* इल्हा पेन वेहता पोल्लेतुन दैरनेम कीसि यसायाहलगुडा रासतोर.

21 गानि इस्राएल लोकुलकुना बारेमते पेन बतल इत्ता इत्ते,
“ना पोल्ले केंजाकोटा मर्लाबळता लोकुलकुनाहाटीं,
नना दिन्नम एदुर हळसेक मत्तन,”* इंचि पेन वेहता पोल्लेतुन यसायाहल रासतोर.

इंचि पेन वेहता पोल्लेतुन यसायाहल रासतोर.

11

पेन दाना लोकुलकुन होळसो

1 अयते मरि, पेन दाना इस्राएल लोकुलकुन होळसीता इत्तापा? हिल्ले. बारित्ते ननागुडा इस्राएल मनकने आंदुन. नना अब्राहामुना वंसंम आनि बेंजामिन* गोत्रमतोन आंदुन.

2-3 पेनदुक मोदोलताले तेळियसि मत्ता. दाना इस्राएल लोकुलकुन अद होळसा हिल्ले. एलिया इनना पेनदा कबुरतोना बारेमते दर्मसास्त्रमते बतल रासि मंता मीकु तेळियोना? ओर इस्राएल लोकुलकुनपोरो तप्पुक दोस्सेके इल्हा इत्तोर, “ए सामि, ई लोकुलक अयते नीवा कबुरतोर्कुन हळकतुर, नीकु मोक्कु हिय्यना गद्देनंता कूलाहतुर. नना वरोने पिस्सि मंतन. इंदके नाकुनगुडा हळकालय हळसंतुर,”* इंचि इत्तोर.

4 गानि पेन ओन्क बसोटा जवाब हीता मीकु मति मंतना? “अल्हा इनकुनमा! बाला इनना पेनदुक बस्केने मोळकवसोटा एडुं वेयकुना मंदितुन नावाहाटीं नना वेरे कीसि इरतन,”* इंचि पेन ओन्क वेहता.

5 अल्हेने इंदकेगुडा पेनदा कुर्पाहेंदाल इच्चुर लोकुलकुन दानाहाटीं वेरे कीसि इरता.

6 ओरा बेसता कबाहकुन हळसि पेन ओर्कुन पेरा हिल्ले, गानि अद दाना कुर्पाहेंदाले ओर्कुन पेरता. ओक्कला अल्हा जर्गकोटा मंचि मत्ते, दाना कुर्पा निजम कुर्पा मनाकोनवड.

7 इल्हा इस्राएल लोकुलक बदन अयते मनसु तासि प्हकसेक मत्तुरो, अद ओर्क दोर्काहिल्ले. गानि पेन पेरकुत्तोर्कुक मात्रम अद दोर्कता. कळमतोर बोर अयते मत्तुर, ओर पेनदा पोल्ले केंजाकोटा ओरा मनसुन गळसु कीता.

8 दर्मसास्त्रमतेगुडा इल्हेन रासि मंता:

“पेन ओर्कुन निद्रा मत्ताते वाटसीता,* कळक मंचिगुडा हिलवाप कीता.

केव्क मंचिगुडा हिलवाप कीता, इदवेरदाकागुडा ओरा गति इल्हे मंता.”* इदुना बारेमते दाविद राजालगुडा दर्मसास्त्रमते इल्हा इत्तोर,

“ओर तिनुळ-उनुळ कियना वेलाते, उंदि गत्तरा वाताप ओर्क तकलिप वायि.

तकलिप वासि ओर हिळ्ळ अरिर, ओरा पापालकुना सिक्सा ओरे बोगांचिर.

10 ओरा कळकुंक हीकट वाताप आसि, निजम बतलो ओर्क दिसाकोटा आयि.

ओरा नडिं कस्टालकुना मोता कांजा पराका, बस्केळताहाटीं गूनि आसि होन्नि,”* इंचि पेन वेहता पोल्लेतुन यसायाहल रासतोर.

* 10:16 यसायाह 53:1; योहान 12:38 * 10:18 बजन संहिता 19:4 * 10:19 व्यवस्ताविवरन 32:21 * 10:20 यसायाह 65:1 * 10:21 यसायाह 65:2 * 11:1 बेंजामिन इस्राएलतोर पन्नेड गोत्रालकुनाल उंदि गोत्रम आंद. * 11:2-3 1 राजा 19:10-14 * 11:4 1 राजा 19:18 * 11:8 यसायाह 29:10 * 11:8 व्यवस्ताविवरन 29:4 * 11:10 बजन संहिता 69:22-23

इंचि इत्तेर.

11 अय्ते नना इंकुंदि पोल्ले पूसकींतन. इस्राएल लोकुल्लक पुरागा तेदा पराकोटा हिळु अरतुरा? अर्रा हिल्लुर. गानि ओर पापम कीतुर इंचि ओर्क दोर्कना मुक्ति, यहुदि आयवोर्क दोर्कता. दीन हळसि यहुदि लोकुल्लकुना कळक पोत्तागोम इंचि पेन अल्हा कीता.

12 यहुदि लोकुल्लक किरिस्तुन हय्सका पापम कीतुर अय्ते दुनियाते मनना वेरे जातितोर्क पेन वेल्लेन आसिर्वाद हीता. यहुदि लोकुल्लकुंक नुकसान आताहेका यहुदि आयवोर्क पायदा आता. इल्हा यहुदि लोकुल्लकुंक नुकसान आताहेकेन अंतोर्क पायदा आता अय्ते, मिमेटे विचारम कीम्ट, ओक्कला ओरगिंटा किरिस्तुनहेके पुरागा तिरियानय्ते दुनियाते मनना वेरे जातितोर्क बच्चोन वेल्ले आसिर्वाद दोर्कार!

यहुदिल्लक विस्वासमते वांतुर इत्ता पौलुस आसे

13 इंदके यहुदि आयवोरव्टेटाल मिमेट बोर अय्ते विस्वासमते वातिर, मीक वेहानद बतल इत्ते, पेन नाकुन प्रेरित इंचि मीवाहाटीं पेरता. अदुनहाटीं नना कियना सेवा बच्चोनो बेसतद इंचि वेल्लेन कूस मंतन.

14 इल्हा कीतेनना मीकु आता पायदातुन हळसि नावा यहुदि लोकुल्लकुना कळक पोत्सि ओराव्टेटाल गिच्चचुरन्ना विस्वासमते वायानुर इंचि नावा आसे.

15 अद बल्हा इत्ते, इस्राएल लोकुल्लक पेनदाल लक्कु आताहेका दुनियातोर पेनदुक दगोरा आतुर. इसोत्स्के इस्राएल लोकुल्लकगुडा पेनदुक दगोरा आंतुर इनकुंत, अस्के इद पोल्ले वरोर हातोंक मर्रा जीवा अरतापे आयोना!

16 ओक्कला अब्राहाम आनि एनकटा पेद्दाल्क पवित्रमातोर आते, ओरा पिलाल्कगुडा पवित्रमातोरें आंदुर. ओक्कला मराता हिहकुगिंटा पवित्रमातव आते, मराता कोम्मांगुडा पवित्रमातवे आंदुं.

17 यहुदिल्लक इत्ते पेन पोस कीता जय्तुन मराता कोम्मनसंतोर आंदुर. मिमेट यहुदि आयवोर इत्ते केडाते पुटसि-बेर्सता जय्तुन मराता कोम्मनसंतोर आंदिर. पेन पोस कीता मराताल सगोम कोम्मन रेब्बिस पोहताप पेन दान नम्मुवा यहुदिल्लकुन पोहचीता. पोहचि, केडाते पुट्सि-बेर्सता जय्तुन मराता कोम्मन तच्चि रेब्बिस पोहता कोम्मना जेगाते अंटा वाटताप मीकुन ओरव्टे कल्पता. अल्हासि पेन पोस कीता मराता हिहकुनाल मीकु ताकत दोर्कसंता.

18 बस्केळ्क आयि, हिहकुनाले कोम्मांक ताकत दोर्कता, कोम्मानाल हिहकुंक आयो इदुन मति ईरट. अदुनहाटीं “रेब्बिस पोहता कोम्मांकन्ना मोमोटे बेसतोरम” इंचि पोंगमत.

19 इद केंजसि, “माकुन अंटा वाटालये कोम्मन रेब्बिस पोहता,” इंचि मिमेट इंदके इनकुंचतिर बारे!

20 मिमेट इनानद निजमे! गानि उंदि पोल्ले मति ईरट, ओर पेन पोर्गे विस्वासम कियवाहेका पेन ओर्कुन कोम्मन नर्किसि पोहताप पोहचीता. मिमेट बारे किरिस्तुनपोर्गे विस्वासम कीतिर इंचि पेनतोनि कलियसि मंतिट. अदुनहाटीं वट्टिदे पोंगसेके तिरियाकोटा पेनदुक वेरियसि मंतु.

21 बारित्ते पेन सतागा पोस कीता मराता कोम्मनसोटा यहुदिल्लकुने रेब्बिस पोहता अय्ते, मिमेट अय्ते केडाते पुटसि-बेर्सता मराता कोम्मनसंतोर, विस्वासमते कमजोर आते मीकुन असले होळसो.

22 नना वेहानद बेस केंजट. मिमेट पेनदा दयातुन, दाना होंगुन बेस एरपाट कीम्ट. बोर अय्ते विस्वासमताल पजोळ्क आतुर, ओरापोर्गे पेन होंग हुपिस्ता. गानि मिमेट विस्वासमते ताकसेकेन मंतिर इंचि मीवापोर्गे पेनदा दया मंता. हिलाकोटे मीकुनगुडा कोम्मन नर्किसि पोहताप तेंडसि पोहंता.

23 नर्किसि पोहता कोम्मनसोटा यहुदि लोकुल्लक ओक्कला मर्रा पेनदापोर्गे विस्वासम कीते, नर्किस पोहता कोम्मन मर्रा अंटा वाटताप पेन ओर्कुन मर्रा दानतोनि कल्पकुंता. बारित्ते पेन अल्हा कियि परंता.

24 मिमेट अय्ते केडाते पुटसि-बेर्सता जय्तुन मराता कोम्मनसंतोर आंदिर. यहुदिल्लक बारे पेन पोस कीता जय्तुन मराता कोम्मनसंतोर आंदुर. अयना मीकुन पेन दाना लोकुल्लकुने कल्पकुंता अय्ते, यहुदिल्लक पेनदागा मर्रा मल्लिस वायानय्ते अद ओर्कुन मर्रा अल्कगा कल्पकुना परंता.

पेन इस्राएल लोकुल्लकुन पिसागोटंता

25 विस्वासुल्लकुनिटा, “मोमोटे तेल्विगल्लोरम” इंचि मिमेट पोंगामन्नि. अदुनहाटीं इस्राएलतोर बारेमता उंदि मर्मम मीकु वेहना इनकुत्तन. अद बतल इत्ते, पेनदा विचारम परकारम, यहुदि आयवोर बचदुर लोकुल्लक अय्ते विस्वासमते वायनद मंता ओर अंतोर किरिस्तुनपोर्गे विस्वासम कियनदाका इस्राएलता इच्चुर लोकुल्लक पेनदा पोल्ले केंजाकोटा गळसु आसि मनानुर.

26 गानि दाना पजा अंतोर इस्राएल लोकुल्लकुन पेन पिसागोट्टार. इदुना बारेमते इल्हा रासि मंता:

“पिसागोटनोर सियोनताल वायानुर,

ओर याकोब वंसंमतोर्कुन तप्पुड हरदाल तिराहचि बेसता हर्दुक तरांतोर,

27 नना ओरा पापाल्कुन मापि कीसि, ओरतोनि कीता करारतुन पूरा कीतन,”✧

इंचि पेन इत्ता पोल्ले दर्मसास्त्रमते रासि मंता.

28 वेल्लेटोर इझाएल लोकुल्क किरिस्तुना बारेमता बेसता कबुरतुन नम्मुवाहेंका इंदके ओर्कुन पेन बेसता कबुरता पगातोर इता. दीनहेंदाल मीकु मात्रम पायदा आता. गानि अब्राहाम, इसाक, याकोब ई एनकटा पेद्दालकुंक हीता पोल्ले परकारम यहुदिल्क इंदकेगुडा पेनदा पावरमगल्ला लोकुल्के आंदुर.†

29 बारित्ते वरम हियमळता बारेमते आयि, दग्गेर्क केयकुनना बारेमते आयि, पेन बस्केने पजोळक आयो.

30 यहुदि आयवोर मिमेट, मुन्ने पेनदा पोल्ले केंजाकोदिर. गानि इंदके यहुदिल्क पेनदा पोल्लेतुन केंजवाहेंका पेन मीकुन दग्गेरा कीसि मीवापोर्रो दया कीता.

31 अल्हेने इंदके यहुदिल्क पेनदा पोल्ले केंजसेक हिल्लुर. अदुनहाटी पेन मीवापोर्रो दया कीता. इदे कुर्पाहेंदाल उंदि रोजु ओरपोर्रोगुडा पेन दया कीता.

32 बारित्ते, पेनदुक अंतोर लोकुल्कनपोर्रो दया कियानद मंता. अदुनहाटी पेन यहुदिल्कन, यहुदि आयवोर्कुन अंतोर्कुन दाना पोल्ले केंजाकोटा, गळसु कीसि इरता.

33 ओहो, मावा पेनदा दनम, बुद्दि आनि तेल्वि बच्चोन पेद्देद आंद! अद बल्हा न्यायम कीता, बस्के कीता, इदुन बोरे एरपाट किया पर्रो. दाना हरि बोर्के तेळियो.

34 दर्मसास्त्रमते इल्हा रासि मंता:

“पेनदा विचाराल्कन बोर एरपाट किया परंतोर? पेनदुक बोरन्ना बुद्दि वेहा परांतोरा?☆

35 हिलाकोटे बोरन्ना पेनदुक बाकिंक हीतोर मंतोरा, दान मर्रा तिरियसि तल्कालय?☆ हिल्ले.”

36 दुनियाते मनानव अन्नि पेनदागटाले वातां, अन्निन अदे पुटिस्ता, दुनियाते मनानव अन्नि दानाहाटीगे मंतां. युगा-युगाल्कनदाका दानदे महिमा आयि, आमीन.

12

मीवा पिस्वरतुन पेनदुक अप्पजेप्पट

1 अर्ये विस्वासुल्कुनिटा! पेन मनापोर्रो कीता दयातुन मति कीसि, नना मीकुन बतिमलाडसि विनंति कियानद बतल इत्ते, मिमेट मीवा पिस्वरतुन पवित्र इरसि, पेनदुक नच्चनसोंटा मोक्कु हीताप मी पिस्वरतुन जीवाते मननेकेन अप्पजेप्पट. इल्हा कीतेन मिमेट पेनदा निजम सेवा कीसि तलस्कुत्ताप आंता.

2 मिमेट इद दुनियातोर पिसताप पिस्सामान्नि गानि मिमेट मीवा मनसु मार्सकुंचि पेनदुक नच्चना पिस्वर पिस्सट. अस्के पेनदा इच्चा बतलो एरपाट कीतिर. एरपाट कीसि, “अद इच्चा वेल्लेन बेसतद, कुसि हियानद, बतले तप्पु हिलवद,” इंचि मीकु तेळियंता.

3 पेन दाना कुर्पाते नाकुन सेवक इंचि निलाहता, दानहाटी नना मीकु वरोर-वरोक बतल वेहसेक इत्ते, पेन मीक तूसि हीता विस्वासमता लेक्का परकारमे वळकना अचोने, दानकन्ना एक्को विचारम कियमट.

4 मना मेंदुल उंदे गानि दान्क कय्क, काल्क, कळ्क, केव्क, तोड्डि, मोसोर तल्ला इवन्नि मंतां. इवन्नि उंदे कबळ किय्यका, वेरे-वेरे कबाहक कीतां.

5 अल्हेन मनमगुडा वेल्लेन मंदि अयनागानि किरिस्तुनतोनि कलियसि उंदे मेंदुललेहका मंतोम. इंचि मनम कय्क-काल्कनलेहका उंदे मेंदुल्क अंटिस मंचि वरोक-वरोर बेस कलियसि मंतोम.

6 पेन मनापोर्रो कुर्पा हुप्पिचि मनाकु वरोर-वरोक उंद-उंदि वरम हीता. आ वरमतुन एरपाट कीसि मनम पेनदा सेवा किय्युळ गावाले. ओक्कला बोनकन्ना पेनदाहेंदाल कबुर तच्चि वेहना वरम दोर्कते, ओर ओना विस्वासमता लेक्कातेन अद कबळ कियगोम.

7 सेवा कियना वरम दोर्कतोर ओर विस्वासमते सेवा कियगोम, पेनदा पोल्लें कराहना वरम दोर्कतोर ओर विस्वासमते पेनदा पोल्लें कराहना कबळ कियगोम.

8 कराहचि दैरनेम हियना वरम दोर्कतोर कराहचेके दैरनेम हीसेक होनना, दानम किया परानोर ओर पूरा मनसुनाल दानम कियगोम, लीडर आसि लोकुल्कन ताकसना वरम दोर्कतोर जिम्मेदारिते ओर्कुन ताकिचगोम आनि दया कियना वरम दोर्कतोर ओर कुसिते दया कियगोम.

9 लोकुल्कुंक हुप्सना इंचि पावरम कियमट, निजम पावरम कीम्टु. तप्पु कबाहकन हयसमट, बस्केळ्क बेस कबाहक कीसेक मंटु.

10 उंदि कुटुंबतोरलेसी वरोक-वरोर बेस पावरम कीकुटु, वरोक-वरोर कदर हियनेके, मनाकन्ना एक्को इंकावरोक कदर हीम्टु.

11 कबळते बस्केने लंडु कियमट, पेनदा सेवा कियनाहाटी मीवा जीवा बस्केळ्क उसार इरंट.

12 पेन हीता आसेते मिमेट बस्केळ्क कूस मंटु. तिप्पल्क वायिनागानि पजोळ्क होनाकोटा ओर्सकुटु. बस्केळ्क पारतना कीसेके मंटु.

13 पेनदा लोकुल्कुंक अवसरम अरतस्के मिहगा मत्तद ओर्क हीसि सहायम कीम्टु, बोरन्ना विस्वासुल्क मी लोन वातस्के ओरा सेवा कियालय बस्केळ्क तयार मंटु.

14 मीकु तकलिप हियानोर्कुंक आसिवांद हीम्टु. आसिवांद हीम्टु गानि सापनेम हियमट.

15 कुसिते मननोरतोनि मिमेटगुडा कुसिते मंटु, अळानोरतोनि मिमेटगुडा अळट.

† 11:28 पेन पेद्दालकुंक हीता पोल्ले उत्पत्ति 12:2-3 वचनाल्कुने रासि मंता. ☆ 11:34 यसायाह 40:13 ☆ 11:35 अय्युब 41:11

- 16 अंतोरतोनि बेस कलियसि मंटु, पोमाडेंगि वेहकुन्मटु. कदर हिल्ला लोकुलकुनतोनि बेस कूळसि मंटु, मोमोटे तेल्विगल्लोरम इनकुनमटु.
 17 बोरन्ना मीकु तकलिप हीते, मिमेट ओर्क तकलिप हीसि बदला येतमट. अंतोरा नदरते बद बेसो, अदे कियना विचारमते बस्केळक मंटु.
 18 कुदुरतच्चोन अंतोरतोनि बेस कलियसि सांतिते मनना कोसिस कीम्टु.
 19 “बदला येतना कबळ नावद आंद, मिमेट बदला येतमट,”* इंचि पेन वेहता पोल्ले पुस्तकमते रासि मंता. अदुनहाटीं नावा पावरमगल्ला विस्वासुल्लुकिनिटा, मिमेट बदला येतमट, ओरा बदला पेन येतंता, ओर्कुन पेनदुक होळसीम्टु.
 20 अल्हा पगा येतनदानकन्ना
 “मीवा पगातोर कर्वुने मत्तस्के ओर्क गाटो दोस्सट,
 दूपाते मत्तस्के एर हीम्ट.
 अल्हा कीते, अय्यो! मोमोट बच्चोन पेद्दा तप्पु कीतोम,
 इनकुंचि ओरद-ओर्के सिग्गु वांता.”*
 21 मीवा क्यदाल सेड्डा कबाहक आयाकौटा उसारते मंटु, बेसता कबाहक कीसि सेड्डा कबाहकुन ओळिचचट.

13

अदिकारिना क्यदा हिळु मंदना

- 1 इदु दुनियापोर्रो मननव अन्नि अदिकाराल्क पेनदाहेंदाले वातव आंदु, इंदके राज्येम कियनोर्कगुडा पेने अदिकारम हीता. अदुनहाटीं राज्येम कियनोर वेहाताप अंतोर बेस केंजिस ताका पीता.
 2 बारित्ते, अदिकारि वेहाताप ताकवोर, पेन निलाहता पद्दतकुंक विरोद कीताप आंता. अल्हा ताकवोर ओनद-ओरे सिक्सा दोर्किचकुंतोर.
 3 बेसता कबाहक कियानोर्कु अदिकारिना वेंरे मन्नो, तप्पु कबळ कियानोर्क अदिकारिना वेंरे मनंता. अदुनहाटीं अदिकारिक वेरियाकौटा मंदना इत्ते, मिमेट सल्लेमते ताकट. अस्के ओर मीकुन मेच्चुकुंतोर.
 4 मीवा बेसताहाटींगे अदिकारिल्लक पेनदा सेवाकुल्लुकुनलेसी कबळ कीसेक मंतुर. ओक्कला मिमेटगिंटा बतलन्ना तप्पु कीते ओर मीकु सिक्सा हींतुरे, इंचि मिमेट ओर्क वेरियसि मना पीता. तप्पु कबळ कियानोर्कुंक सिक्सा हियनाहाटींगे पेन ओर्कुन निलाहता.
 5 अदुनहाटीं मिमेट सिक्साताल सिराप तपिचकुनालय आयो गानि, मना आत्मातुन कूस ईरलय ओर वेहाताप ताका पीता.
 6 देसेमतुन ताकसना अदिकारिल्लक पेनदा सेवकुल्ले आंदुर. अदुनहाटीं मिमेट ओर्क कर दोहसेक मंतर.
 7 सरकासक बतल्यते हियना मंतांगो अव हीसीम्टु, कर दोहनद दोहट्ट, तासिल दोहनद दोहट्ट, अदिकारिल्लकुंक वेरियसि मनना इत्ते ओर्क वेरियट, बोर्क कदर हियना मंता ओर्क कदर हीम्टु.
 8 मिमेट इंकावरोन पावरम कीम्टु, पावरम कियमळ तप्पा बोर्के आयि बदे पोल्लेता बाकि मनमट. अल्हा मत्तोर मूसाना नियमतुन पालन कीताप आंतोर.
 9 अदुनहाटीं, “बोगमतनम कियमट, बोर्कुन हळ्कमट, दोंगातनम कियमट, इंका वरोनदुनपोर्रो आस्ति कियमट,”* इंचि आदेसकुने रासि मंता. इंका बवन्ना वेंरे नियमकु मत्ते, अव अन्निगुडा उंदे पोल्लेते कलियंतां, अद बद पोल्ले इत्ते, “नीवद निमे बच्चोन पावरम कीकुंतिनो अचोने वेंरेतोर्कुनगुडा पावरम कीम.”*
 10 वेंरेतोरपोर्रो पावरम हपिचनोर, ओरा नुकसान किय्योर. अदुनहाटीं पावरमता पोल्लेने, दर्मसास्त्रमता पोल्लेने निजम आंतां.
 11 मिमेट इवन्नि तप्पाकौटा कियना. मनाहाटीं दुनियाताल मुक्ति हियना पेनदा वेला वेल्लेन दग्गेरा एव्ता. मनम सामिन विस्वासम कीता आ वेलाकन्ना, इंदके मना मुक्ति दग्गेरा मंता. अदुनहाटीं मिमेट निद्रताल तेदाना वेला वाता. तेदसि वेलातुन एरपाट कीसि ताकट.
 12 इंदके हीकट मारालय आसि, पोळ्द पेयसालय आता. अदुनहाटीं हीकटते कियानसौटव कराब कबाहकुन होळसिसि वेलगुने कियानसौटा बेसता कबाहकुन मना जीवाते एतकुनकोम.
 13 पोद्दला ओप्पनालायक मनम ताकाना. अदुनहाटीं लावारिस तिरिया मनि, कराब पार्ति कियामन्नि, रिम्मा वायानव उनामन्नि, बोगम कबाहक कियामन्नि, जगडाल्क कियामन्नि, इंकावरोन पोरो कळ्क पोत्ता मन्नि, गानि मनम बेसता हर्दे ताकाना.
 14 इत्ते, सामि येसु किरिस्तुना पोल्लेन मना जीवाते, मना मनसुनाल एतकुनना. मना मनसुने कराब गुनालकुंक हरि हियमटु.

14

इंकावरोना कदर कीम्टु

- 1 बोर अय्ये विस्वासमते कमजोर मंतोर, ओन्क बेस कदर हीसि मीलोप्पो कल्पट. गानि ओनतोनि बद बेसतद, बद बेसतद आयो इंचि वळ्कसेक मनमट.
 2 तिनमळ बारेमते केंजट. विस्वासमते मनानोरवेटाल इच्चुर बारे, “तिननव बवय्ये मंतांगो, अन्नि तिनावच्चु,” इंचि इंतुर, गानि विस्वासमते पूने वातोर इच्चुर बारे, “हव्वि तिनामन्नि, सादा कुसिर तिनमळे बेस,” इंचि इंतुर.

3 हव्विं तिनानोर आयि, तिनवोर आयि, ओर इव्वुर्कुन पेन दाना मनकालोर इंचि पेर्कुत्ता. अदुनहाटीं हव्विं तिनानोर तिनवोन पास्कमनि, हव्विं तिनवोर तिनानोनपोर्रो तप्पु दोस्सामन्नि.

4 इंकावरोना जीतागान हळसि, “निमे बेस कबळ कीसंतिना हिल्लेना” इंचि वेहानद मीकु अब्बरम हिल्ले. अद कबटा लेक्का ओना मालके हळंतोर. पेन दाना मनकालोर्कुन गट्टिगा निल्हा परांता, अदुनहाटीं असोटा विस्वासुल्क गट्टिगेन निल्लंतुर.

5 बोरो-बोरो बदाना उंदि रोजुन अन्नि रोजकुंकन्ना बेसता रोजु इंतुर. इंका बोरो बारे अन्नि रोजुक उंदेतीर समानमे इंचि इंतुर. बोरे आयिर मी मनसुने बद बेसतद इंचि अनपिस्ते अल्हेन कीम्टु.

6 बोरेन्ना बदाना उंदि रोजुन अन्नि रोजकुंकन्ना बेसता रोज इंचि नोमते, सामिनाहाटीगे नोमंतोर. अन्नि तिनानोरगुडा सामिनाहाटीं तितोर आनि पेनदुक दन्यवाद कीतोर. बोरे अय्ते तिन्नोर ओरगुडा सामिनाहाटीं तिनाकोटा मंचि पेनदुक दन्यवाद कीसेके मनांतोर.

7-8 मनालोप्पो बोरे आयिर, संतम ओनाहाटीगे इंचि पिसोर, सामिनाहाटीं पिस्संतोर. हायिनागानि सामिनाहाटीगे हांतोर. इल्हा मनम हायिना, पिस्सिना सामिना लोकुल्कुमे आंदुम.

9 जीवाते मत्तोर आयि, हासोत्तोर आयि, अंतोर्कुंक सामि आसि मनना इंचि किरिस्तु हासि मर्रा जीवाते तेदतोर.

10 अदुनहाटीं विस्वासमते गट्टिगा हिल्लुवा विस्वासिर आयिर, विस्वासमते गट्टिगा मत्ता विस्वासिर आयिर, निमे ओरापोर्रो तप्पु बारि दोस्सतिन? ओर्कुन बारि पास्कंतिन? बारित्ते मनद अंतोरद उंदि रोज पेनदा राजगदूदेता मुन्ने न्यायम आयना मंता.

11 दीना बारेमते पेनदा पुस्तकमते इल्हा रासि मंता:

“नना ओट्टु तिचि वेहासेक मंतन, अंतोर लोकुल्क नावा मुन्ने टोंगरां ऊनसि,

ननाने पेन इंचि एरपाट कियानुर.”✧

इंचि मंता.

12 अदुनहाटीं मनम अंतोरम पेनदा मुन्ने नित्तिसि मना लेक्का हियापींता.

इंकावरोन पापमते अरहमट

13 इंदकेटाल मनम वरोना पोरो वरोर तप्पु दोस्सामन्नि. इच्चोरे आयाका, दंताता विस्वासिन विस्वासमताल तप्पिच्चना कबाहक, पापमते अरहना कबाहक मिमेट कियमट, दीन मति ईरट.

14 नना येसु सामिनतोनि कलियसि मंतन इंचि अन्नि तिडिं नाकु ओज्जंतां, इदु नना एरपाट कीकुत्तन. गानि बोर्क अय्ते बदाना तिडि ओज्जाकोटे, ओर अदुन तिनाकोटा मत्तेने बेस मंता.

15 निमे तिनानवुन हळसि, पूना विस्वासुल्कुना मनसु नाराज आसि पेनदुन होळसीते, नीवा लोप्पो पेनदा पावरम हिल्ले इत्तापे. असल ओराहाटींगुडा किरिस्तु हातोर, गानि निमे नी गाटोताहेंदाल ओर्कुन नासडेम कियमा.

16 इत्ते, “नना बेस कीसंतन, बिल्कुल तप्पा हिल्लेन इनकुंतिन,” गानि इंकावरोना नदरते निमे तप्पतिन. दीनहेंदाल नीवदे बदनाम आंता. इंचि तिनुळ-उनुळते जेगर्ता मन्नु.

17 पेनदा राज्येम, इत्ते मना पिस्वर पोरो किरिस्ते राज्येम कियना. दाना राज्येम इत्ते तिनमळ-उनमळता पोल्लेंगे अचोने इंचि इनकुनमट गानि पेनदा मुन्ने सत्तेमते पिसमळ, पवित्र आत्माहेंदाल दोर्कना सांति, आनंदमते मनमळ आंद.

18 इल्हा किरिस्तुना सेवा कीतोन पेन मेच्चुकुंता, लोकुल्कुना नड्डुमगुडा ओनकु कदर दोर्कता.

19 अदुनहाटीं मनम बस्केळक सांति दोर्कानव आनि विस्वासमते बेर्सना कबाहक कीकोम.

20 तिडिहाटीं पेनदा कबळतुन नासडेम कियमट. अन्नि तिडिं बेसतवे गानि बदाना तिडि बोनकन्ना इस्टम हिलाकोटे, दान मनम तिचि ओन विस्वासमताल हिळ अरहमळ मनद तप्पे आंदु.

21 हव्विं तिनमळ आयि, अंगुर कल्लु उनमळ आयि, इंका बतलन्ना आयि पूना विस्वासुल्कुंक इस्टम हिलाकोटे, निमे इव अन्निनाल लक्कु मत्तेने बेस मंता.

22 इवुना बारेमते मीवा विस्वासम बल्हा मंतानो, अद मीकु आनि पेनदुके एरपाट मनगोम. बोरे मनकल अय्ते ओना विस्वासमतुन पीसि “तप्तन-हेळतन” इंचेके अनमानम कियाकोटा मनांतोर, ओर वेल्लेन आसिर्वाद दोर्कतोर आंदुर.

23 गानि अनमानम कीसेक तिनानोर, पेनदा मुन्ने तप्पु कीतोना लेक्कातेने वांतोर. बारित्ते ओर पेन पोरो विस्वासम कियाका तिचेके मंतोर. पेन पोरो विस्वासम कियवा कबाहक, ओन पापमते अरहंतां.

15

विस्वासमते कमजोर मत्तोर्कुंक सहायम कियना

1 अदुनहाटीं, विस्वासमते गट्टिगा मत्तोरम मनम सिराप मनाकु सुकम हियना कबाहके कियाकोटा विस्वासमते कमजोर मत्तोर्कुना कबाहकुन हळसि ओप्के पीसि मंदगोम.

2 मना दंतातोर्कुना बेसताहाटीं ओरा विस्वासम बेर्सना इंचि ओर्कुन कूस ईर्ना लायक मनम मनमळ गावाले.

3 किरिस्तु इद बूमिपोर्रो वातस्के ओनद ओरे कूस कीकुनालय वायाहिल्लोर. गानि, “पेनबाबा, नीकुन अपमानम कीतोरा अपमानम नाक आया पीता.”✠ इंचि किरिस्तुना बारेमते दर्मसास्त्रमते रासि मत्ताप जर्गता.

4 दर्मसास्त्रमते मुन्नेटाले रासि मत्तद उंदि-उंदि पोल्ले मनाकु कराहनाहाटीगे मंता. अदुन करियते मनम ओप्के पीसि दैरनेमते पिस्सा परांतोम इत्ता आसे दोर्कता.

5 अदुनहाटी मिमेट येसु किरिस्तुना विचारम मत्ताप, अंतोर कूळसि मंदालय पेन मीकु दैरनेम, ओप्के हियिकांटी.

6 इल्हा मिमेट अंतोर उंदे मनसु, उंदे लेंग आसि मना सामि येसु किरिस्तुना पेनबाबन तल्सकुना परांतरि.

7 किरिस्तु मीकुन बल्हा ओप्कुत्तोर, अल्हेने मिमेटगुडा विस्वासमते कमजोर मत्तोरकुन पेनदुक महिमा दोर्कना इंचि ओप्कुंदु.

8 नना वेहानद बतल इत्ते, एनकटा यहुदि पेदू दाल्कुंक पेन पोल्ले हीसि मत्ता, अद पोल्ले निजम आयाना इंचि, कतना आतोरा लोप्पो किरिस्तु सेवक आसि वातोर. इद पोल्लेतुन मर्गमट.

9 अचोने आयाका यहुदि आयवोरगुडा पेन ओरापोर्रो कीता दयाताहाटी दान तल्सकुनना इंचि किरिस्तु वातोर. बजन संहिताते इल्हा मंता:

“नना यहुदि आयवोरतोनि कलियसि, नीकुन तल्सकुंतन.”✠

10 इंका इल्हागुडा रासि मंता.

“ए यहुदि आयवोरिता, पेनदा लोकुल्कुनतोनि मिमेटगुडा कूस आम्टु.”

11 मर्रा इल्हागुडा रासि मंता:

“ए यहुदि आयवा लोकुरिता, मिमेट सामिन तल्सकुंदु, पूरा देसेमतोर ओन तल्सकुंदु.”✠

12 मर्रा यसायाहल रासतोर:

“यिस्साना वंसंमताल वरोर पुट्टानुर, ओर अन्नि जातिनोरपोर्रो राज्येम कियानुर,

इंका अंतोर ओनपोर्रो आसे ईरनुर.”✠

13 मिमेट विस्वासम कीताहाटी, मीकु आसे हियना पेन अन्नि तीरकुना कुसि, सांति हियिकांटी. इल्हा पवित्र आत्माता ताकतहेंदाल मीवा आसे बेरस्सेक होंदार.

14 विस्वासुल्कुनिटा! मीलोप्पो वेल्ले बेसतनम आनि तेल्वि मंता. अदुनहाटी मिमेट वरोंक-वरोर बुद्धि वेहकुना परांतरि इंचि नाक पुरागा बरोसा मंता.

15-16 पेनदा कुर्पाहेंदाल यहुदि आयवोरा नड्डुम येसु किरिस्तुना सेवक आसि पेर्मनालेसी बेसता कबुर वेहालय नाकु अदिकारम दोर्कता. अदुनहाटी कोन्नि पोल्लें मीकु मति कीसि हियना इंचि मीकु दैरनेमते रासतन. ना मनसुने बतल मंता इत्ते, यहुदि आयवोर पवित्र आत्माहेंदाल पवित्र आयाना आनि पेन ओर्कुन ओप्कुननालायक कियना.

17 येसु किरिस्तुना लोप्पो कलियसि मंचि, इल्हा पेनदा सेवा कीसेके इंचि नना वेल्लेन कुसिते मंतन.

18-19 यहुदि आयवोर नना वेहता पोल्लेन केंजतुर, नना कीतव चिन्हां आनि इचंन्रमता कबाहकुन हळतुर. केंजसि, हळसि ओर किरिस्तुनपोर्रो विस्वासम इरतुर. इल्हा नना पवित्र आत्माता बलमते येस्सलेम सहरताल इत्तुरिकुम एरिया एवनदाका किरिस्तुना बेसता कबुरतुन वेहतन. अदुनहाटी किरिस्तुनाहेंदाल कीता पोल्लेंगें नना दैरनेमते वेहंतन. इचुंक तप्पा वेरे बवे पोल्लें वेहोन.

20 किरिस्तुना पोरोल बगा अय्ते केंजा हिल्लुर अगा होंचि नना बेसता कबुर वेहना इंचि नावा मनसु तनलाळसेक मंता. गानि इंकावरोर दोहता पुनादिपोर्रो लोन दोहमळ इस्टम हिल्लाहेंका, इंकावरोर वेहता नाहकुने होंचि वेहमळ नाकु इस्टम हिल्ले.

21 गानि दर्मसास्त्रमते इल्हा रासि मंता:

“ओना बारेमते बेसता कबुर एरपाट हिल्वोर ओन हळानुर.

ओना बारेमते केंजवोर, ओर्क तेळियार.”✠

पौलुस रोम सहरते होत्तोर

22 इल्हा बेसता कबुर एववगा नना होनगोम इत्ता विचारमतेन मनुंदुन, अदुनहाटी नना मिहगा वाया पराहिल्लेन.

23 गानि इंदके, हींदा एरियाने येसु किरिस्तुना बेसता कबुर वेहना कबळतुन महतन, इगे बतल कबळ हिल्ले. अल्हेने वेल्लेने वर्सानाल मिहगा वांतन इंचि नावा जीवा तनलाळसेक मंता.

24 अदुनहाटी नना स्पेन देसेम होननेके मिहगा वांतन इंचि आसे पळसंतन. मीवातोनि कोन्नि रोजकु मंचि नावा मनसु निंडता पजा नाकुन अगटाल मुन्नेटा पय्नेमताहाटी साल्हा कीम्टु.

25 गानि इंदके नना पेनदा लोकुल्कुंक सेवा कियालय येस्सलेम दांतन.

26 बारित्ते मेसिडोनिया, अकाया एरियातोर विस्वासुल्क संदा वाटसि, येस्सलेम सहरते मत्ता पेनदा लोकुल्कुनाल बोर अय्ते गरिब मंतुरो ओर्क सहायम कियना इंचि विचारम कीसि नाक हीतुर.

27 ओर इल्हा कीसि कूस मत्तुर, इल्हा कियमळे गावाले. बारित्ते यहुदि आयवोर्क पेनदा लोप्पो कलियालय आसिर्वाद दोर्कता, ओर यहुदि लोकुल्कुंक अक्सरम मत्तवुना सेवा कियमळ गावाले.

28 अदुनहाटीं जमा कीता कोत्तन नना बेस ओसि ओर्क अप्पजेपंतन, पजा अगटाल होननेके मीकु कलियसि स्पेन देसेम दांतन.

29 नना मिहगा वातस्के मनम अंटरम किरिस्तुना आसिर्वादते निंडांतोम इंचि नाकु एरपाटे.

30-31 विस्वासुल्कुनिटा! मना येसु किरिस्तु सामिनाहेंदाल आनि पवित्र आत्माता पावरमहेंदाल मीकु बतल विनंति कीसेक इत्ते, यहुदिया एरियाते मनना अविस्वासि लोकुल्कुना कयदाल नना पिस्सना आनि येस्सलेमते नना कियना सेवातुन पेनदा लोकुल्क ओप्कुनना, इंचि मिमेट नावाहाटीं उंदि मनसुने पेनदुक पारतना कीम्टु.

32 मनम पारतना कीताप पेनदुक इस्टम मत्ते, नना मिहगा वासि कोन्नि रोजकु मीवातोनि कुसिते मनंतन.

33 सांति हिय्यना पेन मीवा अंटरतोनि मन्निकांटी. आमीन.

16

विस्वासुल्कुंक पौलुस जोहार वेहतोर

1 मना विस्वासि अक्कल पीबे इनानद बच्चोरो बेसतद आंद. अद किंकिरया नाटेना कलिसियाते सेवा कीसेक मंता.

2 अद वेल्लेटोर्क सहायम कीता, अल्हेने नाकगुडा सहायम कीता. अद मिहगा वायानय्ते, पेनदा लोकुल्क ओप्पनालायक मिमेट दान बेस हळकुंटु. अल्हेने दान्क बतलन्ना अक्सरम मत्ते सहायम कीम्टु.

3 पिरिसकिला आनि दाना मुय्दो अकविलांक नावाहेंदाल जोहार वेहाटु. ओर नावातोनि येसु किरिस्तुना सेवा कियानोर आंदुर.

4 ओर नाकुन पिसागोटनाहाटीं ओरा जीवातुन हियालयगुडा तयार मत्तुर. नना ओर्क दन्यवाद कीतन. सिराप ननाने आयो गानि यहुदि आयवोरा अन्नि कलिसियानोरगुडा दन्यवाद कीतुर.

5 ओरा लोतगा जमा आयाना कलिसियातोर्कगुडा नावाहेंदाल जोहार वेहाटु. आसिया एरियाते अंटोर्कन्ना मुन्ने किरिस्तुन विस्वासम कीतोर ना दंटागाल इपेनितुस इननोँक, नावा जोहार वेहाटु.

6 मीवाहाटीं वेल्ले कस्टपळतद मरियमुंक नावा जोहार वेहाटु.

7 अंदरिनिकुस आनि युनियस ओर नावा जीवातोर आंदुर, ओर नातोनि जेलने मत्तुर, ओर प्रेरितुल्कुना लोप्पो पोरोल पेयसतोर इंचि अंटर ओर्कुन एरपाट कीतुर, ओर नाकन्ना मुन्नेने किरिस्तुन विस्वासम कीतुर, ओर्क नावा जोहार वेहाटु.

8 सामिन लोप्पो ना पावरमगल्ला अंपलितुसुंक जोहार.

9 मावातोनि कलियसि किरिस्तुना सेवा कियानोर उरबानुसुंक नावा जोहार, अल्हेने नावा पावरमगल्ला इस्तुकुसुंकगुडा नावा जोहार वेहाट.

10 किरिस्तुनलोप्पो तकलिप वायिनागानि होळसाकोँटा इमानदारते मत्ता अपिलेस इननोँक नावा जोहार. अरिस्तुबुलुसना लोतोर्कुंकगुडा जोहार वेहाट.

11 नावा जीवातोर हेरोदियोँकु जोहार वेहाट. नरकियुसुना लोतोर बोअर अय्ते सामिन विस्वासम कीतुर ओर्क जोहार वेहाट.

12 तिरुपेना आनि तिरुपोसा इनना अक्काहक सामिनाहाटीं कस्टपळतां, अवुंक जोहार वेहाट. नावा पावरमगल्ला परसिस इनना अक्कलगुडा सामिनाहाटीं वेल्ले कस्टपळता, दान्क जोहार वेहाट.

13 बोअरयेते पेन पेरकुत्ता, आ स्पुस इनानोँक आनि ओना यावल इत्ते नावा यावानसोँटद, ओर्क नावाहेंदाल जोहार वेहाट.

14 असुकिरितुसुंक, पिलगोर्निक, हिरमेसुंक, पत्रुबासुंक आनि हिर्माँसुंक जोहार वेहाट, ओरतोनि मनना विस्वासुल्कुंकगुडा जोहार.

15 पिलोलोगुसुंक, युलियुंक, नेरयुसुंक आनि ओना हेलडुक जोहार वेहाट, उलुम्पासुंक आनि ओरतोनि मनना पेनदा लोकुल्कुंक जोहार.

16 मिमेट वरोंक वरोर कलियतस्के पवित्र पावरमते जोहार कीम्टु. किरिस्तुना अन्नि कलिसियानाहेंदाल मीकु जोहार.

17 विस्वासुल्कुनिटा! इच्चुर लोकुल्क मिमेट करियता पोल्लेन हेळाहलय ई पोल्लेँक विरोदमते वैरे पोल्लेँ वेहचि मीलोप्पो वरोनद-वरोंक अर्काकोँटा कीतुर. असंटरतोनि उसारते मंचि, ओर्क लक्कु मंटु इंचि नना मीकु विनंति कीसेक मंतन.

18 असंटर मना सामि किरिस्तुना सेवा किय्युर, गानि ओरा पीटाहाटीं सेवा कीतुर. ओरा तिय्यटा पोल्लेनाहेंदाल सीदा-सादा लोकुल्कुन मुळहंतुर.

19 बेसता कबुरता पोल्लेँ मत्ताप मिमेट ताकसेक इंचि अंटर केंजतुर, अदुनहाटीं नना वेल्ले कुसिते मंतन. मिमेट बेसता पोल्लेनहाटीं बुद्दितोर आसि मंटु, सेड्डा पोल्लेनहाटीं लक्कु मंटु इंचि नना मीकु वेहासेक मंतन.

20 मनाकु सांति हिय्यना पेन बिराने देय्यमतुन मीवा काल्कुनगा तच्चि जारसि पोहंता. मना सामि येसु किरिस्तुनद मीवापोरों कुर्पा मन्निकांटी, आमेन.

21 नावातोनि कलियसि किरिस्तुना सेवा कियानोर तिमतानाहेंदाल मीकु जोहार. नावा जीवातोर लुकियुस, यासोन आनि सोसिपत्रु इराहेंदाल मीकु जोहार.

22 पौलुस वेहताप इद सिट्टितुन नना तेरतियुस इननोन रासतन, सामिना लोप्पो मीकु अंटोर्क जोहार.

23-24 नाकुन, कलिसियातोर्कुन हेडमितोरलेसीं बेस हळना गयुसनाहेंदाल मीकु जोहार. इद नाटेना कोत्तना व्यवहार कियानोर, इरास्तुसना हेंदाल मीकु जोहार. अल्हेने कवारतुस दादानाहेंदाल मीकु जोहार.

25-27 येसु किरिस्तुना बारेमते नना वेहता बेसता कबुर परकारम, पेन मीकुन विस्वासमते इंका गट्टिगा क्रिया परांता. इद बेसता कबुर एनकटा कालमताल मर्ममते मत्ता. गानि इंदके पेनदा कबुरतोर रासता पुस्तकाल्कुना हेंदाल मर्ममते मत्ता बेसता कबुरतुन बय्यारा क्रियालय माकु वेहता.

अंतोर लोकलुक इद कबुरतुन विस्वासम कीसि, पेनदा पोल्लेने ताकाना इंचि पेन आदेस हीता. आ बस्केळक मनना उंदे तेल्विगल्ला पेनदुन, मनम येसु किरिस्तुनाहेंदाल बस्केळक महिमा कीकोम. आमीन.

1 कुरेंति कुरेंति विस्वासुल्लुकुंक पौलुसना मोदाटा सिट्टि

इद सिट्टिता बारेमते गिचचो परिचयम

रासतोना पोरोलः पौलुस

रासता कालमः इसवि सन 56

कुरेंति सहरता विस्वासुल्लुकुनाहाटी इपीसि सहरताल प्रेरित पौलुस इद सिट्टि रासतोर. किरिस्तुना बेसता कबुर वेहालय रोंडो मल्का वातस्के, ई कुरेंति सहरते कलिसिया सुस्व कीतोर. अगा कोन्नि रोजकु मंचि अगटाल होत्ता पजा, अद कलिसियाते वेल्लेने समस्यां तयार आतां. अव समस्यांकु समादान वेहालय कुरेंति सहरता विस्वासुल्लुकुंक इद मोदाटा सिट्टि रासतोर. आ कलिसियातोरुकुंक वरोनद-वरोक अर्काकोटा आयमळ, पापम कबळ कियमळ इल्हा जर्गसेक मत्ता. इवन्निटवुंक समादानम बेसता कबुरता हेंदाले दोर्का परंता इंचि पौलुस रासतोर.

मनम किरिस्तुना मनकालोरुकुंक इंचि वट्टिदे मनानायो, गानि किरिस्तुनलेसी ताकाना, पवित्र मनमळते बेस्सेके होंदना, वरोक-वरोर पावरम कियमळे पेद्दा पोल्ले आंद, इंचि रासतोर.

बगा बतल मंता

जोहार आनि परिचयम 1:1-9

कलिसियाते वरोनद वरोक अर्काकोटा आयमळ 1:10-4:21

कुटुंबते कलियसि पिसमळ 5:1-7:40

किरिस्तुनोर आनि बोम्मांक मोळकानोर 8:1-11:1

कलिसियाते कलियसि पिसमळ आनि आरादना 11:2-14:40

किरिस्तु आनि ओना विस्वासुल्लुकु मर्रा जीवाते तेदमळ 15:1-58

यहुदियाता विस्वासुल्लुकुनाहाटी चंदा जमा कियमळ 16:1-4

सतता बारेमते आनि आकिर बोदा 16:5-24

जोहर

1 नना पौलुसुन, किरिस्तु येसुना प्रेरित आयालय पेन नाकुन दाना मनसुनाल केयता. नावा आनि सोस्तिनेस दादानाहेंदाल जोहर.*

2 कुरेंति सहरते मनानोर किरिस्तु येसुनलोपो पवित्र आता पेनदा कलिसियातोरुकुंक, आनि वेरे-वेरे जेगाने मना सामि इत्ते, ओरा आनि मना येसु किरिस्तुना पोरोलते आरादना कियाना अंतोर बक्तुल्लुकुंक रासता सिट्टि,

3 मना पेनबाबाल आनि सामि येसु किरिस्तुनाहेंदाल कुर्पा, सांति दोर्कसेक मन्निकांटी.

पौलुस पेनदुन दन्यवाद कीतोर

4 किरिस्तु येसुनलोपो मीक पेन हीता कुर्पाताहाटी, नना पेनदुन बस्केळक दन्यवाद कीतन.

5-6 किरिस्तुना गवाइ मीलोपो गट्टिगा मत्ता इंचि, मिमेट अन्नि तीस्कुने वळ्ळुकुमळते आनि बुद्दिदेते निंडिस होत्तिर.

7 अदुनहाटी मिमेट पेनदा बद्दे आत्माता वरमते तक्को हिल्लिर, मिमेट मना सामि येसु किरिस्तु मर्रा वायानद एदुर हळसेक मंतिर.

8 सामि येसु किरिस्तु मर्रा वायाना रोजुने मिमेट दोसेम हिलाकोटा मंदना इंचि पेन मीकुन आकिरदाका गट्टिगा ईरंता.

9 पेन विस्वासम लायकतद आंद. अद दाना मर्रि मना सामि येसु किरिस्तुनतोनि कूळसि मनालय मीकुन केयता.

विस्वासुल्लुकुंक वरोनद-वरोक अर्काकोटा आयमळ

10-11 विस्वासुल्लुकुनिटा! मीलोपो जगडाल्क आसेक मंतां इंचि क्लोयेना लोतोर नाक वेहतुर. अदुनहाटी मिमेट अंतोर उंदे पोल्लेते ताकाटु, मीलोपो वरोनद-वरोक अर्काकोटा मनमट, गानि मिमेट उंदे मनसुने, उंदे विचारमते कलियसि मंटु इंचि नना मीक मना सामि येसु किरिस्तुना पोरोलते विनंति कीसेक मंतन.

12 नना वेहना पोल्ले इदे गदा, मीव्छेटाल वरोर, “नना पौलुसनोन आंदुन,” इंकावरोर, “नना अप्पुलोसनोन आंदुन,” इंकावरोर, “नना केपानोन आंदुन,” इंकावरोर, “नना किरिस्तुनोन आंदुन,” इंचि इंतिर.

13 बतल, किरिस्तुन त्सुक कीतिरा? पौलुस कूसुनपोर्री मीवाहाटी जीवा हीतोर? हिलाकोटे पौलुसुना पोरोलते मिमेट बापतिस्मा एततिरा?

14 नना मिहागटाल क्रिसपुसुकुं आनि गयुसुकुं बापतिस्मा हीतन, बेस आता ओर्क आयाका बोनके हिया हिल्लेन, पेनदुकु दन्यवाद कीतन.

15 हिलाकोटे नावा पोरोलतेन बापतिस्मा एततिर इंचि बोर्नना इंचि मन्नेर.

16 नना स्टिपनसना लोतोरुगुडा बापतिस्मा हीतन, ईर आयाका इंका बोर्कन्ना नना हीतना, नाक एर्का हिल्ले.

* 1:1 इद सिट्टि पौलुस रासतोर, गानि सोस्तिनेस सिराप जोहर वेहतोर.

17 बारित्ते किरिस्तु नाकुन बापतिस्मा हियालय लोहा हिल्लोर, गानि बेसता कबुरतुन वेहालय लोहतोर. अदगुडा मनकना बुद्धि मत्ताप आयो, अल्हा वेहानयते किरिस्तु कूसुनपोर्रो हाता ताकततद अर्तम मन्नो.

पेनदा ताकत आनि तेल्वि किरिस्तु आंदुर

18 कूसता पोल्ले वेहमळ इत्ते नासडेम आयानोराहाटीं मुर्कतनम आंदु, गानि पेन मनाकुन पिसागोटता, अदुनहाटीं पेनदा पोल्ले मनाकु बलम आंदु.

19 इदुना बारेमते, दर्मसास्त्रमते इल्हा रासि मंता,

“तेल्विगल्लोर्कुना तेल्वितुन नासडेम कीतन,

उसारगल्लोर्कुना उसारतनमतुन पास्कंतन.” ✨

20 अय्ते, बगा मंतोर तेल्विगल्लोड? बगा मंतुर दर्मसास्त्रम कराहना गुस्लक? ई दुनियाता वाद-विवाद कियानोर बगा मंतुर? इद दुनियातोर तेल्वि पेनदा मुन्ने मुर्कतनम आंद.

21 बारित्ते, पेनदा तेल्वितुन, दुनियाता लोकुलक ओरा सतता तेल्विते पेनदुन एरपाट किया हिल्लुर. मोमोट बदाय्ते मुर्कतनमता कबुर वेहंतोमो, अदुना हेंदाल विस्वासम कीतोर्क मुक्ति दोर्कना, इदे पेनदुक बेस अनपिचचंता.

22 बारित्ते यहुदिल्क अय्ते चिन्हां गावाले इंतुर, युनानि लोकुलक बारे तेल्वि पहकंतुर.

23 गानि मोमोट अय्ते कूसुनपोर्रो हाता किरिस्तुना पोल्लें वेहंतोम. इद यहुदिल्कुक विस्वासम किया परवसोंटा पोल्ले आंद. आनि यहुदि आयवोर्कुक मुर्कतनमतसोंटा पोल्ले आंद.

24 गानि पेन बोर्कुन अय्ते केयता, ओर यहुदिल्क आयिर, युनानि आयिर, ओराहाटीं पेनदा ताकत, पेनदा तेल्वि किरिस्तु आंदुर.

25 बारित्ते पेनदा मुर्कतनम इत्ते, मनकालोर्कुना तेल्विकन्ना वेल्ले तेल्वितद आंद, पेनदा ताकत कमजोर इत्ते, मनकालोर्कुकन्ना वेल्ले बलमतद आंद.

26 विस्वासुल्कुनिटा! विचारम कीम्टु, दुनियाता लेक्काते मिमेट तेल्वितोर आयिर, एक्को बलमतोर आयिर, पेद्दा लोतोर आयिर, अय्नागानि पेन मीकुन केयता.

27 बुद्धि मत्तोर्कुक सिग्गु वायालय दुनियाते बुद्धि हिल्वोर्कुन पेन पेरता. बलमता मनकालोर्कुक सिग्गु वायालय, दुनियाते बलम हिल्वोर्कुन पेन पेरता.

28-29 पेनदा मुन्ने बोरे मनकल पेद्दिर्केम कियामन्नि इंचि दुनियाते बतले हिल्वोर्कुन, हय्सवोर्कुन, बतले कबळक ओज्जुवोर्कुन, पेन पेरता.

30 पेनदाहेंदाले येसु किरिस्तुनलोप्पो मीवा पिस्वर मंता, किरिस्तुनाहेंदाल मनाकु तेल्वि, नीति, पवित्र आतोम आनि पापमता सिक्साताल पिसतोम.

31 अदुनहाटीं, “पेद्दिर्केम कियानोर बोरे आयिर, सामि ओनाहाटीं बतलयते कीतोरो, अव्ते ओर पेद्दिर्केम कियागोम,” इंचि दर्मसास्त्रमते रासि मंता.

2

कूसुनपोर्रोटा किरिस्तुना बारेमते बेसता कबुर

1 विस्वासुल्कुनिटा! नना मिहगा वातस्के, नावा पेद्दा पोल्लेने हिलाकोटे पेद्दा तेल्विते पेनदा बारेमते गवाइ वेहा हिल्लेन.

2 गानि नना मीवा नडुडुम मननेके कूसुंक वेलाड वाटता येसु किरिस्तु आयाका इंका वैरे बद्दे पोल्ले वळ्कोन इंचि निरनायम कीसि मत्तन.

3 नना मिहगा मननेके मेंदुल्ले कमजोर आसि मत्तन. वेल्ले वैरेते वनुकसेके मत्तन.

4 नावा वळ्कमळ आनि नना वेहता कबुर, नावा तेल्विता पोल्लेने मनाहिल्ले, गानि पेनदा आत्मा आनि ताकतते निंडसि मत्ता.

5 अदुनहाटीं मीवा विस्वासम मनकालोर्कुना तेल्वि परकारम आयो गानि पेनदा ताकत परकारम मनागोम.

पेनदा तेल्वि

6 मोमोट इद दुनियाता हिलाकोटे इद दुनियाते नासडेम आयाना अदिकारिल्लुकुना तेल्वि वेहोम, गानि विस्वासमते गट्टिगा मत्तोर्कुके तेल्वि वेहंतोम.

7 मोमोट मर्ममते मक्किचि मत्ता पेनदा तेल्वितुन वेहंतोम, अद बूमि पुट्टका मुन्नेने मावा पेद्दातनमहाटीं पेन तयार कीसि इरता.

8 ई तेल्विता बारेमते दुनियाता अदिकारिल्लुकुं बोरके तेळिया हिल्ले, ओर्क गिंटा तेळियसि मत्ते, महिमागल्ला सामि येसु किरिस्तुन कूसुनपोर्रो मोल्लां कोहका कोन्नेर.

9 गानि दर्मसास्त्रमते,

“कळ्कुने बोरे हळवव, केक्कुने बोरे केंजवव,

बोरा मनसुने वायवव पोल्लें, दानपोर्रो पावरम कियानोराहाटीं पेन तयार कीसि इर्ता,”

इंचि रासि मंता.☆

10 गानि पेन दाना आत्माताहेंदाल अबुन मनाकु हुपिस्ता. बारित्ते अद आत्माकु अन्नि एरपाटे, पेनदा मर्ममगुडा एरपाटे.

11 वरोर मनकना विचाराल्क मनकना आत्मा आयाका इंका बोर एरपाट कीतोर? अल्हेने पेनदा विचाराल्क पेनदा आत्मा आयाका इंका बोर एरपाट किय्योर.

12 इंदके मनाकु दुनियाता आत्मा दोर्काहिल्ले, पेन हीता पोल्लें तेळियालय पेनदा आत्मा मनाकु दोर्कता.

13 माक इव पोल्लें मनकना तेल्चिते कराहतव आयों गानि पेनदा आत्माते कराहतव आंदुं. अवे पोल्लेन मीक तेळियागोटिसि वेहंतोम.

14 बोनगा अय्ते पेनदा आत्मा हिल्ले ओर पेनदा आत्माता पोल्लेन ओण्कुन्नोर. ओनकु अव मुर्क पोल्लें अनपिच्चंतां. बारित्ते अव पोल्लें पेनदा आत्मातेने तेळिया परांतां, अदुनहाटीं ओनकु तेळिया परीं.

15 बोनगा अय्ते पेनदा आत्मा मंता, ओर अन्नि अर्तम क्रिया परांतोर, गानि ओना बारेमते वेंरे मनकल बोर अर्तम क्रिया परीं.

16 इदुन बारेमते,

“सामिना मनसु बोनकु तेळियंता, ओनकु बोर करहा परांतुर?

गानि किरिस्तुना मनसु मनागा मंता,

इंचि दर्मसास्त्रमते रासि मंता.”☆

3

पेनदा दासुल्कुना विचारम अलग-अलग मंदनायो

1 विस्वासुल्कुनिटा! पेनदा आत्मा मत्तोर्कुनतोनि वळकताप मीवातोनि वळका परींहिल्लेन. पेनदा आत्मा हिल्ला दुनियातोरलेसीं आनि किरिस्तुनलोपो इंदकेगुडा पिलाल्कुनसंतोर इंचि मीवातोनि वळकतन.

2 नना मीक पाल उहतन, गाटो तिहा हिल्लेन; बारित्ते मिमेट गाटो तिना पराकोदिर, गानि इंदकेगुडा मिमेट गाटो तिना परानालायक हिल्लिर.

3 बारित्ते इंदकेगुडा मिमेट मेंदुल्ला इच्चा मत्तापे ताकसेक मंतिट. इंकावरोना पोरों कळक पोत्तना, जगडाल्क कियाना गुनम मंता. अय्ते मिमेट मनकना इच्चाते ताकानोर आयिरा? दुनियाता लोकुल्कुनालेसीं ताकसेक हिल्लिरा?

4 मिहगटाल वरोर, “नना पौलुसनोन आंदुन”, इंकावरोर, “नना अप्पुलोसनोन आंदुन” इंचि इंतिर. इल्हा मिमेट दुनियातोरलेसीं पेनदुन एरपाट कियवोर आतिरा बतला?

5 अप्पुलोस बोर आंदुर? नना पौलुसुन बोन आंदुन? मोमोट इव्वुरमगुडा पेनदा सेवाकुल्कुमे. पेन माक बतल अय्ते कबळ अप्पजेपता, अदुन वेहतोम, मिमेट विस्वासम कीतिर.

6 नना पेळे वाटतन, अप्पुलोस एर दोस्तोर, गानि दान बेसांगोटनद पेने आंदु.

7 इत्ते, पेळे वाटनोर आयिर, एर दोस्सानोर आयिर ईर पेदूदोर आयुर, गानि दान बेसांगोटनद पेने पेदूदेदि आंदु.

8 वरोर वाटतोर, वरोर एर दोस्तोर, इल्हा ओरा-ओरा कबळता इसाबते ओर्क बूति दोर्कार.

9 मोमोट पेनतोनि कलियसि कबळ कियानोर्कुम आंदुम, मिमेट पेनदा नेलितसंतोर, पेनदा लोतसंतोर आंदिर.

10 नाक पेन हीता कुर्पाहेंदाल, वरोर बेसता मिस्त्रिनलेसीं पुनादि दोहतन, दानपोरीं इंकावरोर रदूदा दोस्सेक मंतोर, इल्हा वरोर-वरोर दानपोरीं दोस्सानोर बल्हा रदूदा दोस्सेक मंतोर, ओर बेस हळसि दोसना.

11 येसु किरिस्ते पुनादि आंदुर. ओर दोहता पुनादि आयाका, इंका बोरें वेंरे पुनादि दोहा पर्र.

12 बोरन्नागिंटा बंगारम, एंडि, एक्को दराता बंडां, कट्टे, जाडि, बुस्सिते पुनादि दोहना मत्ते,

13 किरिस्तु मर्रा वायाना रोजुने अंतोरा कबळ दिसंता. बारित्ते अद रोज ओर तळमितोनि वांतोर, बोर बतल कबळ कीतोर इंचि तळमिते परिकसा कियमळ जर्गता.

14 अद पुनादिपोरीं दोहता कबळ निल्लिस मनानय्ते, ओनकु इनाम दोर्कता.

15 बोनदन्ना गिंटा ओर कीता कबळ वेसि होत्ते, ओनकु नुकसान आंता. ओर अय्ते पिस्संतोर गानि तळमिताल पेयसताप पिस्संतोर.

16 मिमेट पेनदा गुळि आंदिर, पेनदा आत्मा मीलोप्पो मनंता, इद मीक तेळियोना?

17 बोरन्नागिंटा पेनदा गुळितुन नासडेम कियानय्ते, पेन ओन नासडेम किय्यार. पेनदा गुळि पवित्र मनंता, अद मिमेटे आंदिर.

18 बोरें आयिर ओनद-ओरे पसांचकुनामन्नि. बोरन्नागिंटा मिहगटाल ई दुनियाते नना तेल्चितोन इनकुनानय्ते, पेनदा नदरते तेल्चितोर आयालय, मोदाला मुर्कनलेसीं आयापीता.

19 दुनियाता तेल्चि पेनदा मुन्ने मुर्कतनमतद आंद. बारित्ते, “पेन तेल्चितोर्कुन ओरा उस्सारतनमता लोप्पो पसांचंता,”☆ इंचि दर्मसास्त्रमते रासि मंता.

20 आनि मर्रा, “तेल्चितोर्कुना विचाराल्क एर्तम आंदुं इंचि पेनदुक एरपाटे,”☆ इंचिगुडा दर्मसास्त्रमते रासि मंता.

21 अदुनहाटीं नना ईना हेंदोन, नना ओना हेंदोन इंचि मनकालोर्कुना पोरों पेदूदिरकेम कियामन्नि, अन्नि मीवंगे आंदुं.

22 पौलुस आयिर, अप्पुलोस आयिर, केपाल आयिर, दुनिया आयि, पिस्वर आयि, हामुर आयि, ताकाना कालमता पोल्लें आयि, वायाना कालमता पोल्लें आयि, अन्नि मीवंगे आंदुं.

23 मिमेट किरिस्तुनोर आंदिर, किरिस्तु पेनदोड आंदुर.

4

पेनदा मर्ममता देकरेक क्रियानोर

- 1 अदुनहाटीं मोमोट किरिस्तुना सेवाकुलुकुम आनि पेनदा मर्ममता देकरेक क्रियानोरम आंदुम इंचि मीक तेळियमळ गावाले.
- 2 अल्हेने पेनदा मर्ममता देकरेक क्रियानोर विस्वासम क्रियानालायक मनमळ गावाले.
- 3 गानि नाकुन मीवाहेंदाल आयि हिलाकोटे लोकुकुना पंचायतता हेंदाल आयि, विस्वासमते मंतोरा हिल्लोरा इंचि परिक्षा कीसि हळमळ गावाले इद नावाहाटीं सिन्ना पोल्ले आंद. नावद ननाने न्यायमगुडा किय्योन.
- 4 नहगा बतले दोसेम दिस्सेक हिल्ले, गानि नना दोसेम हिल्लेवोन आयोन. पेने नाकुन परिक्षा कीसि हळंता.
- 5 अदुनहाटीं न्यायम क्रियाना वेला वायाका मुन्ने बोने न्यायम कियमट, सामि वायानाल एदुर हुळाट. ओर हीकटते मक्किस मत्ता पोल्लेन वेल्गुने तरंतोर, मनसुने मत्तवुन पलाते अरहंतोर. अस्के पेन अंतोर्कुन मिमेट बेस कीतिट इंचि मेच्चुकुंता.
- 6 विस्वासुल्कुनिटा! नना मीवाहाटीं अप्पुलोसना आनि नावा उदाहरन हीसि वेहतन. बारित्ते “दर्मसास्त्रमते रासता पोल्लेक हब्बेर होनमट” इंचि मंता. इदुन पोर्रीटाल मिमेट वरोन बेसतनमते, इकावरोन विरोदमते पेद्दिदरकेम कियमट.
- 7 बारित्ते नीकुन आनि इकावरोन बोर अलग हळंतुर? निहगा मत्तव अन्नि पेन हीतवे गदा, अयते इवन्नि नावांगे बोरे हिया हिल्लुर इत्ताप बारि पेद्दिदरकेम कीतिन?
- 8 ओहो! मीक गावाले मत्तव अन्नि पूरा आतां, मिमेट अयते सिरमंत आसि होत्तिर, मोमोट हिलाकुना मिमेट राजुलुकु आतिट. गानि मिमेट निजमे राजुलुकु आसि मत्ते मोमोटगुडा मीवातोनि राज्येम किय्येम.
- 9 गानि बोर्क अयते हामुर सिक्साता आदेस हियमळ जर्गता, असंतोरालेसीं, प्रेरितुलक आता मनाकुन पेन अंतोर्कुंनना आकिरते इरता, इंचि नाकु अनपिच्चंता. बारित्ते, मनम पेनदा दूतानाहाटीं, दुनियाताहाटीं, मनकालोराहाटीं सिराप तमासा हृप्सानोर आसि मंतोम.
- 10 मोमोट किरिस्तुनाहाटीं मुर्कालोरम आंदुम, गानि मिमेट किरिस्तुना लोप्पो तेल्वितोर आंदिर. मोमोट बलम हिल्लोरम आंदुम, गानि मिमेट बलम मत्तोर आंदिर. मिमेट कदर मत्तोर आंदिर, गानि मोमोट कदर हिल्लोरम आंदुम.
- 11 इदवेरादाका मोमोट कर्जुने-दूपाते मंतोम, केर्नालय कपळिं हिल्लें, देब्बां तिचेके मंतोम, लोन-दारा हिलाका मंतोम.
- 12 मावद मोमोटे कबळ कीसेक मंतोम. माकुन तेराहनोर्कुन, आसिर्वाद हीतोम. ओर माकुन तकलिप कीतुर, गानि मोमोट सहन कीतोम.
- 13 ओर मावा अपमानम कीतुर, मोमोट दयाते वळकंतोम. इदवेरादाकागुडा दुनियाता नदरते मोमोट कचरालेसीं, मैलालेसीं मंतोम.
- 14 नना मीक सिग्गु वायागोम इंचि इव पोल्ले रासेक हिल्लेन, गानि नावा पावरमगल्ला पिलालुकुनसंतोर इंचि तेळियागोट्टिस वेहासेक मंतन.
- 15 मिहगा किरिस्तुना बारेमते कराहनोर पदि वेय्कुना गुस्लक मंदानुर, गानि मिहगा वेल्लेदुर बाबुर हिल्लुर. बारित्ते मुन्ने ननाने किरिस्तु येसुना बेसता कबुर तत्तन, अदुन मिमेट विस्वासम कीतिर इंचि ननाने मीवा बाबोनसंतोन आंदुन.
- 16 अदुनहाटीं मिमेट नावालेसीं ताकट इंचि विनंति कीसेक मंतन.
- 17 इदे पोल्ले वेहनाहाटीं नना पावरम क्रियानोर आनि सामिना लोप्पो नावा विस्वासमगल्ला मरिनसंतोर तिमोतिन मिहगा लोहतन. नना किरिस्तु येसुना बक्तिते बल्हा ताकसेक मंतानो, अल्हेने अन्नि जेगाना कलिसियाने नना कराहना बोदाता बारेमते ओर मीक मति कीसि हीतोर.
- 18 नना मिहगा वासेक हिल्लेन इंचि इच्चुर लोकुलक पेद्दिदरकेम कीसेक मंतुर.
- 19 गानि सामिना मनसु मनानयते नना बिराने मिहगा वांतन, अस्के पेद्दिदरकेम क्रियानोरा पोल्लेन आयो गानि ओर्क बच्चोर ताकत मंतनो हळंतन.
- 20 बारित्ते पेनदा राज्येम पोल्लेने आयो गानि दाना ताकतते मनंता.
- 21 मीक बतल गावाले? नना मिहगा कट्टे पीसि वाकाना, हिलाकोटे पावरमते, मेत्ताटा आत्माते वाकाना?

5

विस्वासुल्क बोगमतनम क्रियामान्नि

- 1 मीवा नड्डुम वरोर बोगमतनम कीतोर इंचि नाक केंजावाता. ओर ओना बाबोना मुत्तो इत्ते सिन्ना यावान इरकुत्तोर अले! इसोंटा तप्पुड कबळ अविस्वासुल्कगुडा किय्युर.
- 2 इदुनाहाटीं मीक दुक्कम आया मत्ता, गानि मिमेट पेद्दिदरकेम कीसेक मंतिर. असंतोन मीवा लोप्पोटाल पेचाहचि गेटुमगोम.
- 3 नना मिहागटाल मेंदुल्ले लक्कु मंतन, गानि आत्माते मीवातोनि मंतन. आत्माते मीवातोनि मत्ताहाटीं ओनद नना मुन्नेने न्यायम कीतिन.
- 4 बस्के अयते मिमेट येसु सामिना पोरोलते उंदगा जमा आसि उदंतिर, अस्के आत्माते अगा मनंतन, अल्हेने मना सामि येसुना ताकत मीवातोनि मनंता.

5 असोटा तप्पुड कबळ कियानोना मेंदुलतुन नासडेम कियालय पेद्दा देख्यमता कयदे अप्पजेप्पना. बारित्ते, ओक्कला ओर पस्चातापम कियानय्ते, सामि वायाना रोजुने ओना आत्मा पिस्सार.

6 मिमेट पेद्दिरकेम कियमळ बेस आयो, इच्चूर पुल्लाटा पिडि वेल्लेन पिडिते कल्पते, पूरा पिडितुन पुल्लगा कीता अद मीक एरपाटे मंता.

7 पळाना पुल्लाटा पिडितसंतोन तेंडसि पोहाचि मिमेट पूना पिडि मुद्दा आया परांतरि, बारित्ते मिमेट निजमे पुल्लाटोर आयवाहाटी, येसु किरिस्तु मना दाटसि होनना पंडुगुना गोर्रे पोरिनलेसी मोक्कु आतोर.

8 अदुनहाटी मनम पळाना पुल्लाटा पिडितसोटा कराब कबाहकुने, दुस्ट गुनालकुने आयो गानि इमानदारता, सत्तेमता पुल्लगा आयवा हारिनसोटा पंडुगु कियमळ गावाले.

9 नना मुन्ने रासि लोहता सिट्टिते, बोगमतनम कियानोरतोनि कलियसि मनमट इंचि रासि मत्तन.

10 इदुना अर्तम बोगमतनम कियानोरतोनि, आस्ति कियानोरतोनि, दोंगा कीसि तिनानोर्कुनतोनि, बोम्मांक मोळ्कानोर्कुनतोनि कलियसि मनमन्नि इत्ताप आयो. इल्हा इनानय्ते मरि दुनियातुने होळ्सा पीता.

11 नना इनना पोल्ले बतल इत्ते, मीवा लोप्पोटाल बोरन्ना ओनद ओर विस्वासिन इतोर, गानि ओर बोगमतनम कियमळ, आस्ति कियमळ, बोम्मान मोळ्कमळ, अपमानम कियमळ, रिम्मा आयमळ, दोंगा कीसि तिनमळ इसोटा गुनम ओनालोप्पो मनानय्ते ओनतोनि कलियसि मनमट, ओनतोनि गाटो तिनमट इंचि रासि मत्तन.

12 विस्वासम कियवोरा न्यायम नना बारि कीकन? बोर अय्ते विस्वासमते मंतुर, ओरा न्यायम मिमेट किय्यिरा?

13 विस्वासम कियवोरा न्यायम पेने कीता. अदुनहाटी आ बोगमतनमतोन पेचाहचि गेदमट.

6

विस्वासुल्लकुना नड्डुम जर्गना न्यायाल्लक

1 बस्के अय्ते मीलोप्पो जगडम आंता, आ जगडमता न्यायम कियालय मिमेट पेनदा लोक्कुल्लकुनगा होनाका विस्वासम कियवोरगा होंचि न्यायम कियाना हिम्मत बारि कीतिर?

2 पेनदा लोक्कुल्लक आकिर वेलाते दुनियाता न्यायम कीतुर, इद मीक एरपाट हिल्लेना? मिमेट पूरा दुनियाता न्यायम कीतिर अय्ते, इव सिन्ना-सिन्ना पोल्लेना न्यायम कियानालायक हिल्लिरा?

3 मिमेट पेनदा दूतनगुडा न्यायम कीतिर इंचि मीक एरपाटे मंता. अय्ते रोजता पिस्वरते जर्गानव सिन्ना-सिन्ना पोल्लेन न्यायम मिमेट किया परिरा?

4 मीवा लोप्पोगिंटा इल्हा जगडाल्लक मनानय्ते, बोर अय्ते कलिसियाता पोल्लें बतले तेळियवोर मंतुर, असंतोरगा न्यायम किया वेहालय बारि दांतिर?

5 मी विस्वासुल्लकुना नड्डुम न्यायम कियानालायक तेल्विगल्लोड वरोरगुडा हिल्लोरा? मीक सिग्गु वायगोम इंचि इल्हा इंचेके मंतन.

6 वरोर विस्वासि इंकावरोर विस्वासिंक अड्डम न्यायम कियालय पंचादितगा दांतोर, अदगुडा विस्वास कियवोरा मुन्ने.

7 निजम इत्ते मीलोप्पो लोल्लिं कियमळे तप्पु आंद. दानकन्ना अन्यायम ओर्सकुनमळ बेस आयोना? नुकसानतुन ओप्कुनमळ बेस आयोना?

8 अल्हा कियवा, मिमेट तप्पु कबळ कीतिर, अन्यायम कीतिर, अदगुडा मीवा दंटा विस्वासुल्लकुंके कीतिर.

9-10 अन्यायम कियाना लोक्कुल्लक पेनदा राज्येमते वारसदार आयुर इंचि मीक तेळियोना? मिमेट दोकाते अरमट. व्यबिचारम कियानोर, बोम्मांक मोळ्कानोर, बोगमतनम कियानोर, मांडसा मांडसातोनि बोगमतनम कियानोर, मुरतळ मुरतळतोनि बोगमतनम कियानद, दोंगातनम कियानोर, आस्ति कियानोर, कल्लु उनानोर, तेराहनोर, इंकावरोन मुळाहनोर पेनदा राज्येमता वारसदार आयोर.

11 मुन्ने मीवा नड्डुम इच्चूर इल्हे मल्लिर. गानि मिमेट येसु किरिस्तुना पोरोलते आनि पेनदा आत्माते नोर्कुंचि, पवित्र आसि नीतिमंतुल्लक आतिर.

मेंदुल्लतुन पेनदा महिमाताहाटी वाळ्कुंट

12 नना बतलन्ना किया वच्चु, गानि अव अन्नि पायदातव आयो. नना बतलन्ना किया वच्चु, गानि नना अवुना कयदा हिळ्ळु मन्नोन.

13 गाटो पीटाहाटी, पीर गाटोताहाटी मंता इंचि मिमेट इतिर, गानि पेन इव रोंडुन इंका नासडेम कीता. मेंदुल्ल बोगमतनम कियालय आयो सामिनाहाटी मंता, सामि मना मेंदुल्लताहाटी मंतोर.

14 पेन दाना ताकततोनि सामिन हामुरताल जीवाते तेहता, अल्हेने मनाकुनगुडा हामुरताल जीवाते तेहंता.

15 मीवा मेंदुल्लक किरिस्तुना मेंदुल्लता उंदि बागाल्लक आंदुं इंचि मीक एरपाट मंता गदा! एरपाट मत्तस्के नना अवुन ओसि बोगमदाना मेंदुल्लेसी कीकाना? बस्केने किय्योन.

16 बोर अय्ते बोगमदानतोनि मीडंतोर, ओर दानतोनि उंदि मेंदुल्ल आंतोर. “ओर इच्चूर उंदि मेंदुल्ल आंतुर” इंचि दर्मसास्त्रमते रासि मंता.✱

17 गानि बोर अय्ते सामिनतोनि उंदि आंतोर, ओर ओनतोनि आत्माते उंदि आंतोर.

18 व्यबिचारमताल लक्कु मंटु. मेंदुल्लता पलाताल वायना पापाल्लक अच्चोर बतल किय्यो, गानि बोर अय्ते व्यबिचारम कीतोर, ओर ओनादे मेंदुल्लक अड्डम पापम कीतोर.

- 19 मीवा मेंदुल पवित्र आत्माता गुळि आंद, अद पेनदाहेंदाल मीलोप्यो वासि मनंता, ई मेंदुल मीवद आयो, इंचि मीक तेळियोना?
20 बारित्ते पेन मीकुन दरा दोस्सि अस्कुत्ता, अदुनहाटीं मिमेट मीवा मेंदुलताहेंदाल दाना महिमा कीम्टु.

7

मर्मिना बारेमते

- 1 अव पोल्लेने बारेमते मिमेट नाक रासि मत्तिर. नना मीक वेहासेके, मांडसा बदन्ना मुरतटुन इट्टाकोटेन ओनाहाटीं बेस मनंता.
2 गानि व्यबिचारम जर्गामन्नि इंचि हरेक मांडसक मुत्तो गावाले, हरेक मुरतळक मुय्दो गावाले.
3 मुय्दो ओना मुत्तोना हक्कु पूरा कियमळ गावाले, मुत्तो दाना मुय्दोना हक्कु पूरा कियमळ गावाले.
4 मुत्तोक दाना मेंदुलपोर्री अदिकार हिल्ले गानि दाना मुय्दोक अदिकार मंता, अल्हेने मुय्दोक ओना मेंदुलपोर्री अदिकार हिल्ले गानि मुत्तोक मंता.
5 अदुनहाटीं मिमेट वरोक-वरोर अलग मनमट. गानि कोन्नि रोजकु पारतना कियालय अलग मनकोम इंचि मिमेट इव्वुर इनकुत्ते, अलग मंटु. दाना पजा मर्रा कलियसि मंटु. बारित्ते, कुदता मनसुन आपकुना परवस्के देय्यम मीकुन पट्टुने अरहालय हळंता.
6 नना वेहानद आदेस आयो, गानि अल्हा कीते मीके बेस मनंता.
7 अंतोर लोकुल्क नावालेसीं मनागोम इंचि नाक अनपिच्चंता. गानि हरेक मनकंक पेनदाहेंदाल अलग-अलग वरम दोर्किस मंता, बोनको बदो तीरनद, इंका बोनको इंकुंदि तीरनद वरम दोर्किस मंता.
8 मरमिं आयवोर्कुंक आनि मुंडा मोस्तवुंक नना वेहसेक मंतन, ओर नावालेसीं मरमिं आयाकुंटा मत्तेने ओराहाटीं बेस.
9 गानि ओरगिंटा कुदता मनसुन आपा पराकोटे मरमिं आयिर. बारित्ते मेंदुलता इच्चा आसि तनलाळसेक मनना दानकन्ना मरमिं आयमळ बेस.
10 गानि बोरां अय्ते मरमिं आतां, ओर्क नावद आयो, सामिना आदेस मंता, मुत्तो दाना मुय्दोन होळसा मनि.
11 अदगिंटा होळसानय्ते, अद इंकावरोनतोनि मरमिं आयाकोटेन मंदना, हिलाकोटे दाना मुय्दोनतोनि मर्रा सांतिते कलियसि मंदना. मुय्दो ओना मुत्तोन होळसिया मनि.
12 इंदके कळमतोराहाटीं नना वेहसेक मंतन, पेन आयो. बोनदन्ना विस्वासि दादाना मुत्तो पेनदुन विस्वासम किय्यो, गानि दानकु ओनातोनि मनालय पसंद मत्ते, ओर दान होळसा मनि.
13 अल्हेने ओक्कला बदन्ना विस्वासि अक्कना मुय्दो विस्वासम किय्योर, गानि ओर दानतोनि कूस मंतोर, अय्ते अद ओन होळसा मनि.
14 बारित्ते अविस्वासि मुय्दो, विस्वासम कीता ओना मुत्तोनतोनि मंचि पवित्र आतोर. अल्हेने विस्वासम कियवा मुत्तो, विस्वासम कीता दाना मुय्दोनतोनि मंचि पवित्र आसि दांता. अल्हा आयाकुंटा मंचि मते मीवा पिलाल्क पवित्र आयाकोन्नेर, गानि ओर इंदके पवित्र मंतुर.
15 अय्नागानि अविस्वासि मुत्तो आयि मुय्दो आयि ओक्कला ओर होळसंतन इनानय्ते होळसिरकाटी. इद पोल्लेतुन विस्वासम कियाना दादल आयि अक्कल आयि आपामन्नि. बारित्ते, पेन मनाकुन सांतिते पिसालय केयता.
16 ए मुरतटुना,* नीवा विस्वासम कियवा मुय्दोन पिसागोटंतिन इंचि नीकु बतल एरपाट? ए मांडसातुना,† नीवा विस्वासम कियवा मुत्तोन पिसागोटंतिन इंचि नीकु बतल एरपाट?

पेन बारि केयतनो अदुनहाटींगे पिस्सट

- 17 गानि बल्हा अय्ते मीकुन सामि निलाहतोर, बल्हा अय्ते मीकुन पेन केयता, अल्हेने मिमेट मंटु. इद अन्नि कलिसियाने नावा नियम आंद.
18 अद बल्हा इत्ते, पेनदुन विस्वासम कियाका मुन्ने कतना कीसि मनानय्ते, अदुन मकिच्चा मनि. पेनदुन विस्वासम कियाका मुन्ने कतना कियाकोटा मत्ते, ओर कतना कीकुन्ना मनि.
19 कतना कियाना, कियाकुन्ना बतल आयो, गानि पेनदा आदेसते ताकमळे पेद्दा पोल्ले आंद.
20 हरेक मनकन ओर बल्हा मननेके पेन ओन केयतनो, अल्हेने ओर मनागोम.
21 निमे गिंटा दास आसि मत्तस्के पेन केयते, निमे अदुना पिक्किर कियमा. गानि अव्टेटाल इळबळाना मोका वाते, दाना पायदा एता.
22 बारित्ते, दास आसि मत्तस्के निमे सामिन विस्वासम कीतिन, अव्टेटाल इळबळतिन. इळबळतस्के सामिन विस्वासम कीतिन अय्ते किरिस्तुना दास आतिन.
23 पेन मीकुन दरा दोस्सि अस्कुत्ता, दानहाटीं मनकालोरा दास आयमटु.
24 विस्वासुल्कुनिता! पेन मीकुन केयतस्के बल्हा मत्तिरो, अल्हेने दानतोनि कलियसि मंटु.
25 मरमिं आयववुना बारेमते सामि नाकु बतले आदेस हिया हिल्लोर, गानि नावा मनसुना पोल्ले मीक वेहसेक मंतन. सामिना दयाहेंदाल, नना दान बरोसा कीतिन.
26 इंदकेटा तकलिपकुनाहाटीं मनकल बल्हा मंतोर अल्हेने मत्ते बेस इंचि नना इनकुंचेके मंतन.
27 नीकु मुत्तो मत्ते अदुन होळसना कोसिस कियमा, मुत्तो हिलाकोटे मरमिं आयना विचारम कियमा.

* 7:16 ए मुरतटुना इगे दीना अर्तम, विस्वासम कीता मुत्तो. † 7:16 ए मांडसातुना इगे दीना विस्वासम कीता मुय्दो.

- 28 निमे मरमि कीकुलते बतल पापम आयो, लेय्या पेगिळ मरमि कीकुलते अदगुडा बतल पापम आयो. अयनागानि बोर अयते मरमि आंतुर, ओरा पिस्वरते तकलिपकु वांतां. असोंटा तकलिपकुने अर्रांनयो इंचि नना कोरसंतन.
- 29 विस्वासुल्लुकुनिटा! नना वेहानद बतल इत्ते, वेला तक्को मंता. अदुनहाटीं इंदकेटाल मुन्ने बोन्क मुत्तो मंता, ओर मुत्तो हिल्लावप मंदना.
- 30 अळानोर मत्ते, अळवोर लेहका मंदना, आनंदमते मत्तोर आनंदमते हिल्लावप मंदना, सामानकु अस्सानोर बतले हिल्लावप मंदना.
- 31 इद दुनियाते मनम बतलयते कीतोम दाना लोप्पेन मंदनायो. बारित्ते दुनियातव अन्नि नासडेम आयानव आंदुं.
- 32 मिमेट बदे पोल्लेते पिक्किर क्रिया मनि इंचि नना इनकुंचेके मंतन. मरमि आयवोर पेनदुन बल्हा कूस इर्रांन इंचि पेनदा पोल्लेना पिकरते मनंतोर.
- 33 गानि मरमि आता मनकल ओना मुत्तोन बल्हा कूस इर्रांन इंचि दुनियाता पोल्लेने पिकरते मनंतोर.
- 34 अदुनहाटीं ओरा मनसु रोंडु तीस्कुने कबळ कीता. अल्हेने मरमि आयवा मुरतळ पेनदुन बल्हा कूस क्रियाना इंचि मेंदुल्ले आनि आत्माते पवित्र मंचि पेनदा पोल्लेना पिकरते मनंता. गानि मरमि आता मुरतळ मुय्दोन बल्हा कूस इर्रांन इंचि दुनियाता पिकरते मनंता.
- 35 नना मीवा पायदाताहाटीं गे इद पोल्ले वेहासेक मंतन, मीकुन पसांचालय आयो. गानि मिमेट सत्तेमते ताकसि, उंदि मनसुने पेनदा सेवाते मंदुं.
- 36 बोरन्नागिंटा, “मना मिथ्यटाः लेय्यातनम होंचेके मंता, दाना अपमानम आयाका मुन्ने मरमि क्रियमळ गावाले,” इंचि इनकुनानयते मरमि कीसि हिथ्यिरकांटी, अद पापम आयो.
- 37 गानि ओर ओक्कला मरमि कीसि हियमळ अव्वसरम हिल्ले इंचि मनसुनाल निरनायम क्रियानयते, अद दाना इच्चान आपापर्ते दान्क मरमि क्रियवा बेसे कीतोर.
- 38 बोर अयते ओना मिथ्यटा मरमि कीतोर, ओर बेसे कीतोर. अल्हेने बोर अयते ओना मिथ्यटा मरमि क्रिया हिल्लोर ओर इंका बेसे कीतोर.
- 39 मुय्दो पिस्सि मत्तच्चोरजेम मुत्तो मुय्दोनतोनि होळसाकोंटा मनंता, गानि ओरगिंटा हायानयते अद बोनतोनना सामिन विस्वासम कीतोनतोनि मरमि आया परांता.
- 40 गानि अद इंकावरोनतोनि मरमि आयाकोंटा मत्तेने बेस इंचि नना इनकुंचेके मंतन, अल्हेने नावा लोप्पो मनना पेनदा आत्माता हेंदाले नना मीक वेहासेक इंचि इनकुंचेके मंतन.

8

मोळकता उपारम

- 1 इंदके, बोम्मनगा मोळकता उपारमता बारेमते वेहंतन, मनम अंटोरम तेल्वितोर्कुम इंचि मनाकु एरपाटे मंता. तेल्विता हेंदाल गरां वांता, गानि पावरम बक्तितुन बेसांगोटंता.
- 2 बोरन्नागिंटा नाक पूरा तेळियंता इंचि इनकुनानयते, ओन्क बतलयते तेळियमळ गावाले, अद इंदकेगुडा तेळिया हिल्ले.
- 3 गानि बोरन्नागिंटा पेनदुन पावरम कीते, पेनदुक ओर एरपाटे.
- 4 अदुनहाटीं बोम्मनगा मोळकता उपारमतुन तिनना बारेमते नना मीक वेहंतन, दुनियाते मनना बोम्मने पेन हिल्ले. पेन उंदे मंता, अद आयाका इंका वेरे पेन हिल्ले.
- 5-6 अयनागानि स्वर्गमते आयि, बूमिपोरीं आयि पेनकु, सामि इंचि इनानव वेल्लेने मंतां. गानि मनाकु उंदे पेन, औरे मना बाबो आंदुर. ओनाहेंदाले इवन्नि तयार आतां, मनम ओनाहाटीं गे मंतोम. अल्हेने सामि वरोंरे आंदुर. ओर येसु किरिस्तु आंदुर. पेन, ओनाहेंदाले इवन्नि तयार कीता, मनमगुडा ओनाहेंदाले पिस्सि मंतोम.
- 7 गानि अंटोर विस्वासुल्लुकुं ई तेल्वि हिल्ले. इच्चुर मोदाटाले बोम्मन मोळिकसि मत्ताहाटीं, अगा मोळकता उपारमतुन तितुर. अदुनहाटीं ओरा कमजोर मनसु कराब आसि दांता.
- 8 गाटो मनाकुन पेनदा दग्गेर्क ओयो. मनम तिनाकुन्ना मनद नुकसान आयो, तिनना बतल पायदा आयो.
- 9 मिमेट बदन्ना उपारम तितिर आयावच्चु गानि उंदि पोल्ले मति इर्राट, मीवाहेंदाल विस्वासमते कमजोर मत्तोर पापमते अर्रांनयो.
- 10 बारित्ते निमे तेल्विता मनकन, निमेने गुळिते* बोम्मनगा मोळकता उपारमतुन तिनानयते, वरोर कमजोर विस्वासि अदुन हळतस्के, गुळिते मोळकतवुन तिनालय ओना मनसु आयोना?
- 11 ओनाहाटीं गुडा किरिस्तु हातोर, इल्हा नीवा तेल्विहेंदाल, विस्वासमते कमजोर मत्ता विस्वासि पेनदागटाल लक्कु आंतोर.
- 12 इल्हा निमे नीवा दंटाता विस्वासुल्लुकुना विरोदमते पापम कीसि, कमजोर विस्वासिना मनसुन नोप्पिचि, किरिस्तुना विरोदमते तप्पु कीतिन.
- 13 अदुनहाटीं ओक्कला उपारमताहेंदाल नना नावा दंटाता विस्वासुल्लुकुन पापमते अरहानयते, नना बस्केने हळ्वि तिन्नोन. नावाहेंदाल ओर बस्केने पापमते अर्रां मनि.

9

प्रेरितुल्लुकुना अदिकाराल्क

‡ 7:36 मिथ्यटा एरां बोदुट आता मिथ्यड. * 8:10 गुळिते पेनकु मनना गुळि.

- 1 नना दासतनमताल इळबळसि हिल्लेना? नना प्रेरितुन आयोना? मना सामि येसुन नना ह्ळा हिल्लेना? सामिना लोप्पो नावा कबळता पलम मिमेट आयिरा?
- 2 नना वेरे लोकुकुनाहाटीं प्रेरित आयाकोन्ना गानि मीवाहाटीं अयते प्रेरितुने आंदुन. नना सामिन लोप्पो प्रेरितुन इंचि मिमेटे सिक्कालेसीं निसान आंदिट.
- 3 बोर अयते नावातोनि वाद-विवाद कियालय ह्ळांतुर, ओराहाटीं इद नावा जवाब आंद.
- 4 माकु तिनना-उनना अदिकारम हिल्लेना?
- 5 कळमता प्रेरितुल्क, सामिना तम्मुहक आनि केपल (पत्रु) ईर ओरा मुत्तोहकुन पीकुंचि तिरियताप मोमोटगुडा विस्वासि मुरतळतोनि मरमि आसि पज्जेके पीकुंचि तिरियना अदिकारम माक हिल्लेना?
- 6 हिलाकोंटे पिस्वरहाटीं कबळ कियाकोंटा मनालय सिराप बरनाबास आनि नाके अदिकारम हिल्लेना?
- 7 बोर ओना संतम कोत्तां कर्स कीसि सिपाइना नौकरि कीतोर? बोर अंगुरता बगिचा कीसि अंगुर पंडिं तिनाका मनंतोर? आनि बोर गोळ्कु-गोरे पोसकीसि अवुना पाल उनाका मनंतोर? बोरे मन्नोर.
- 8 नना मनकना रीतिते इल्हा इंचेके मंताना? हिल्ले.
- 9 “कळाते बंति तिराहनेके कौदांक मूस्का बुट्टे दोहा मनि.” इद पोल्ले सिराप कौदानाहाटींगे पेन वेहा हिल्ले, मूसाना नियमतेगुडा इल्हे रासि मंता.
- 10 मनाहाटींगुडा वेहता. बारित्ते ऊडानोर आसेतेन ऊडंतोर आनि बंति तिरहानोरगुडा पंटाते पाल गावाले इत्ता आसेतेन बंति तिरहंतोर.*
- 11 मोमोट मीलोप्पो बेस आत्माता विज्जां वीततोम. अयते माक अक्सरम मत्तवुन मिमेट हीते, अवुन एतमळ बतल तप्पु आंदा? तप्पु आयो.
- 12 वेरेतोरक गिटा मीपोरें अदिकारम मत्ते, दानकन्ना एक्को माक अदिकारम मंता. गानि किरिस्तुना बेसता कबुरतुन वेहनेके मावाहेंदाल बतले अड्डम वायामान्नि इंचि मोमोट आ अदिकारम एताका अन्नि सहन कीसेक मंतोम.
- 13 मीक अयते एरपाटे मंता, गुळितगा सेवा कियानोर्कुंक गुळितगटाले गाटो दोर्कता. गदूदेतगा सेवा कियानोर्कुंक अगा अरतवुनाल तूस दोर्कता.☆
- 14 अल्हेने किरिस्तुना बेसता कबुर वेहानोर्कुंक, बोर अयते अद कबुर केंजसि विस्वास कीतुर, ओरा हेंदाले पिस्वर दोर्कागोम इंचि सामि हुकुम हीतोर.
- 15 गानि बोरन्ना नावा पेद्रिकेम एर्तम कियानादानकन्ना नाक हायमळे बेस अनपिच्चंता. अदुनहाटीं नना बोनाहेंदाले पिस्वरता पायदा एता हिल्लेन, मिमेट नावाहाटीं इल्हा कीम्टु इंचिगुडा रासेक हिल्लेन.
- 16 नना बेसता कबुर वेहचि बतल पेद्रिकेम कीसेक हिल्लेन. बारित्ते इद नावा जिम्मेदारि आंद, नाक बेसता कबुर वेहमळे गावाले. ओक्कला वेहाकोंटे नना बूळ्दि आकन.
- 17 नना ओक्कला नावा इच्चाताल इदुन कीते नाक इनाम दोर्कता. ना इच्चाताल कियाकोन्नागानि दाना जिम्मेदारि पेन नाक अप्पजेपता.
- 18 अयते नावा इनाम बतल? नना बेसता कबुर वेहनेके नाक दोर्कना अदिकारम एताका बेसता कबुर पुक्कटते वेहमळ, इदे नावा इनाम आंद.
- 19 बारित्ते, नना बोना कयदा हिळ् हिल्लेन, अयनागानि वेल्लेटोर्कुन किरिस्तुनगा पीसि वायाना इंचि नावद-नना अंतोरा दासुन आतन.
- 20 यहुदिल्कुन किरिस्तुनगा तरालय नना यहुदिल्कुनालेसीं आतन. मूसाना नियमते ताकानोर्कुन किरिस्तुनगा तरालय मूसाना नियमते ताकाना अक्सरम हिलाकोन्ना गानि नियम पीसि ताकतन.
- 21 मूसाना नियम पीसि ताकवोर्कुन किरिस्तुनगा तरालय नियम हिल्लेलेसीं आतन. इत्ते पेनदा नियमतुन पास्कंतन इंचि आयो, गानि किरिस्तुना नियम पीसि ताकानोन आंदुन.
- 22 विस्वासमते कमजोर मत्तोर्कुन किरिस्तुनगा तरालय, नना ओरालेसीं आतन. बल्हैना आयि इच्चुरन्ना पिसागोम इंचि, बोर बल्हा मंतुर, ननागुडा ओरालेसीं आतन.
- 23 ओरतोनि बेसता कबुरता आसिर्वादते नाकगुडा तूस दोर्कना इंचि इवन्नि कीसेक मंतन.
- 24 पंदेम वाटसि वितनेके अंतोरे वित्तंतुर, गानि इनाम वरोंके दोर्कता इंचि मीक एरपाटे मंता. मिमेटगुडा वितनेके इनाम दोर्कनालेसीं वित्तट.
- 25 कर्सानोर अंतोर बेस करियसि ओरद-ओर तयारते मंतुर, अदगुडा नासडेम आयाना किरिटम दोर्किच्चुकुनालय इवन्नि कीतुर. गानि मनम अयते बस्केने नासडेम आयवा किरिटम दोर्किच्चुकुनालय कीतोम.
- 26 अदुनहाटीं नना बद जेगातगळ्क अयते वित्तना, अगळ्क बेस वित्तंतन, ननागुडा पिळ्किलते गुदूसेक लडांचंतन, वळिते लडांचताप आयो.
- 27 नना ना मेंदुलतुन आपकुंचि इरंतन. नना वेरेतोरकुंक बेसता कबुर वेहचि, नावा लोप्पेने तक्को मत्ते नना बाता कबळतोन आयोन.

10

बोम्मना पूजा कियमट

* 9:10 किरिस्तुना सेवा कियानोर बोरगा सेवा कीतोर ओरागेन तिदना. ☆ 9:13 लैव्यवस्ता 6:16,26; व्यवस्ताविवरन 18:1-3

1 विस्वासुल्लुकुनिटा! इद पोल्ले मीक तेळियका मनमळ नाक इस्टम हिल्ले. अद बतल इत्ते, मना एनकटा तादो-बाबुर अंटोर मब्बु तेर्पेता हिळु मंचि समुद्रमता नड्डुमताल ताकतुर.

2 इल्हा ओर मब्बु तेर्पे हिळु, समुद्रमता नड्डुम मत्ताहेंदाल ओर अंटोर मूसाना बापतिस्मा एततालेसी आता

3-4 ओर अंटोर उंदे आत्माता गाटो तित्तुर, उंदे आत्माता एर उट्टुर. पेन ओर्क बंडाताल एर हीता. अद बंडा इत्तेने किरिस्तु आंदुर, ओरे ओरतोनि ताकुंदुर.

5 गानि पेन ओरवेटाल वेल्लेटुर लोकुल्लुकुनपोर्रो कूस मनाहिल्ले. अदुनहाटी ओर अदे बय्लि जेगाते हातुर.

6 बल्हा अय्ते मना तादो-बाबुर पेनदुक इस्टम हिल्ला पोल्लेने ताकतुर, अल्हा मनम ताका मनि इंचि इव पोल्लें मनाकु उदाहरनलेसी वेहंतां.

7 ओरागटाल इच्चुर बोम्मां कीसि मोळकतुर, अल्हा मिमेट बोम्मांक मोळकाना आयो. ओरा बारेमते, “लोकुल्लक तिनालय, उनालय उदतुर आनि तेदसि एगरालय दल्यातुर,” इंचि दर्मसास्त्रमते रासि मंता.

8 ओरागटाल इच्चुर बोगमतनम कियुंदुर. अदुनहाटी ओरावेटाल उंदे रोजते इरवै मूड वेय्कुना मंदितुन हक्कमळ जर्गता. मनम ओरालेसी बोगमतनम कियामन्नि.

9 ओरागटाल इच्चुर पेनदा पट्टु हळुंदुर, ओर तरासकु कस्किसि हातुर. मनम ओरालेसी किरिस्तुना पट्टु हळा मन्नि.

10 ओरागटाल इच्चुर गुल्युंदुर, नासडेम कियाना दूता हेंदाल ओर नासडेम आतुर. ओरालेसी मिमेट गुल्यामट.

11 मना तादो-बाबुर्क जर्गता पोल्लें उंदि उदाहरनलेसी मंचि, मनम आकिर युगमते एवताहाटी मनाकु तेळियागोम इंचि रासमळ जर्गता.

12 बोर अय्ते नना विस्वासमते गट्टिगा नित्तिसि मंतन इंचि विचारम कीतोरो, ओर विस्वासमताल अरामन्नि इंचि कापाळकुनना.

13 अंटोर्क वायानसोंटवे परिकसां मीक वातां, दानकन्ना एक्को परिकसां मीक वाया हिल्लें. गानि पेन विस्वासमगल्लद आंद. अद मीतोनि आया परवसोंटा एक्को परिकसाने अरं हिय्यो, परिकसां वाते मिमेट सहन कियोगोम इंचि अवेटाल पेयसना हरिगुडा पेन कीता.

सामिना उपारम आनि बोम्माना उपारम

14 अदुनहाटी नावा पावरमगल्ला विस्वासुल्लुकुनिटा! बोम्मना पूजेनाल लक्कु मंतु.

15 मिमेट बुद्धिमंतुल्लुकु आंदिर इंचि नना वेहसेक मंतन. नना वेहाना पोल्लेन मिमेट कुद निरनायम एतट.

16 मनम दन्यवाद कीसि, उंदे गिलासते अंगुर पानकम उट्टस्के, किरिस्तुना नेत्तुर मना अंटोराहाटी हीतोर इंचि हुपिच्चेक मंतोम. मनम उंदे हारितुन तुकडां कीसि तित्तस्के किरिस्तुना मेंदुल मना अंटोराहाटी हीतोर इंचि हुपिच्चेक मंतोम.

17 मनम अंटोरम उंदे हारिता तुकडां तित्ताहाटी, मनम वेल्लेटुर मंचिगुडा उंदे मेंदुललेसी मंतोम.

18 इस्राएल लोकुल्लुकुनहेके हळाट! गदूदेपोर्रो मोक्कु हीतवुन तित्तस्के, गदूदेपोर्रोटा मोक्कु मावा अंटोराहाटी इंचि हुपिच्चेक मंतुर.

19 नना बतल वेहसेक इत्ते, बोम्मांक मोळकता गाटोक बतल हिल्ले, बोम्मन लोप्पोगुडा बतल हिल्ले.

20 इच्चोरे गदा, बोम्मांक मोळकानोर, देय्याल्लुकुंक मोळकसेक गानि पेनदुक आयो. अदुनहाटी मिमेट देय्याल्लुकुनतोनि पोत्तु आयमळ नाक इस्टम हिल्ले.

21 मिमेट सामिना गिलासतद आनि देय्यमता गिलासतद इल्हा रोंडुनद उन्ना पर्रिर, अल्हेने सामिना उपारम आनि देय्यमता उपारम रोंडुने पोत्तु आया पर्रिर.

22 इल्हा कीसि मनम सामिक होंग वायानाल कीतोम. मनम पेनदुकन्ना बलवंतुल्लुकुमा? आयोम.

23 अन्नि मनाहाटी बेसे आंदुं, गानि अन्नि कबळतव आयो. अन्नि मनाहाटी बेसे आंदुं, गानि अन्नि बक्तिते एदुनाहाटी बेस आयो.

24 बोरै आयिर ओना पायदातुने हळा मनि, इंकावरोना पायदातुनगुडा हळना.

25 हाटुमताल बवन्ना हळ्विं अस्सि तिनावच्चु. तिनकना, तिना मन्निआ इंचेके मीवा मनसुन सवाल कियमट.

26 बारित्ते, “बूमि, बूमि पोरोटव अन्नि सामिनवे आंदुं” इंचि दर्मसास्त्रमते रासि मंता.

27 बोरन्ना विस्वासम कियवोर मीकून गाटोक केयानय्ते, मीक होनना मनसु आते, होंट. अगा होत्ता पजा, बतलय्ते मीक तिनालय हीतोर अदुन मनसुने बतले सवाल कियका तिंटु.

28 गानि मीकून बोरन्ना, “इद बोम्मनगा मोळकतद आंद,” इंचि इनानय्ते, वेहतोनाहाटी आनि बेस बुद्धिदताहाटी तिनमट.

29 इत्ते, “बेस बुद्धिद” मीवद आयो गानि मुन्नेटोना बेस बुद्धिदता बारेमते इंचेके मंतन. मीवाहाटी इंकावरोन बारि वेहा हिय्यना.

30 नना दन्यवाद कीसि गाटो तितन अय्ते, दन्यवाद कीताहाटी बदनाम बारि आयाना?

31 अदुनहाटी मिमेट उनमळ, तिनमळ बतल कियाना गानि पेनदा महिमाताहाटीगे कियाना.

32 यहूदि लोकुल्लुकुंक, युनानि लोकुल्लुकुंक आनि कलिसियातोरुंक अड्डम आयाना लायक मनमट.

33 ननागुडा ओर पिसागोम इंचि, नावा पायदा हळाका, वेल्लेटुर लोकुल्लुकुना पायदाताहाटी, अन्नि पोल्लेने अंटोर्कून कूस इरंतन. बारित्ते ओर्क मुक्ति दोर्कगोम.

- 1 नना किरिस्तुनलेसीं ताकतन, मिमेटगुडा नावालेसीं ताकट.
- 2 अन्नि पोल्लेने नाकुन मिमेट मति कीसेक मतिट, नना मीक कराहचि अप्पजेपता पोल्लेने ताकसेके मतिट, इंचि नना मीकुन तलसकुंचेके मंतन.
- 3 गानि मीक इद पोल्ले तेळियमळ गावाले, किरिस्तु, मांडसाता तल्लातालेसीं आंदुर, मांडसा मुरताहकुना तल्लातालेसीं आंदुर, पेन किरिस्तुना तल्लातालेसीं आंदु.
- 4 बोरन्ना मांडसा पारतना कियानेके, हिलाकोटे बविस्यवानि कियानेके तल्लातुन मुचुकुनानयते ओर तल्लातुन* अपमानम कीतोर.
- 5 गानि बदन्ना मुरतळ पारतना कियानेके हिलाकोटे बविस्यवानि कियानेके दाना तला मुचुकुनाकोटे, अद दाना तल्लाता अपमानम कीताप आनि गुंडु कीताप आंद.
- 6 बदन्ना मुरतळ ओक्कला तल्लातुन मुचुकुनाकुंटे दाना केल्लुकुन कतरिचकुनना. अद केल्लुकुन कतरिचकुनमळ, हिलाकोटे गुंडु कीकुनमळ इद सिग्गु पोल्ले आंद इंचि अनपिस्ते, अद तल्लातुन मुचुकुनना.
- 7 मांडसा ओना तल्लातुन मुचमळ बेस आयो, ओर पेनदा रूपम आनि महिमा आंदुर, गानि मुरतळ अयते मांडसाता कदर आंद.
- 8 बारित्ते, मांडसा मुरतटाल वायाहिल्लोर, गानि मुरतळ मांडसाताल वाता.
- 9 मांडसा मुरतटाहाटीं तयार कियमळ जर्गीहिल्ले, गानि मुरतळ मांडसाताहाटीं तयार कियमळ जर्गता.
- 10 अदुनहाटीं पारतना कियानेके पेनदा दूतां हळसेक इंचि मुरतळ, मांडसाता अदिकारमता कयदा हिळु मंतन इंचि हुप्सालय दाना तला मुचुकुनमळ गावाले.
- 11 अय्नागानि पेनदा लोप्पो मांडसा हिल्ला मुरतळ मंदा परीं, मुरतळ हिल्ला मांडसा मंदा परीं.
- 12 बारित्ते, मुरतळ मांडसाताल तयार आता, अल्हेने मांडसा मुरतटाल पुटसेक मंतोर, गानि इवन्नि पेनदाले तयार आसेक मंता.
- 13 अयते, मिमेटे विचारम कीम्प्ट, मुरतळ तला मुचुकुनवा पेनदा पारतना कियमळ बेसे ना?
- 14 मांडसा तल्लाता केल्लक बेसांगोटकुनमळ ओनाहाटीं सिग्गु होनना पोल्ले आंद, इद मीक एरपाटे मंता.
- 15 गानि मुरतळ दाना केल्लक पोळगु बेसांगोटकुल्ले दानकु कदर आंद. दाना तल्लातुन मुचुकुनालय पेन दानकु केल्लक हीता.
- 16 इदुना बारेमते बोरन्ना लोल्लि कियानयते, ओनकु तेळियाना गदा, मावा इसोटा रीति आयो, कलिसियातोरदगुडा इसोटा रीति आयो.

पेनदा उपारम

- 17 मिमेट कलिसियाने जमा आयमळ पायदा आयो गानि नुकसाने आंता. अदुनहाटीं नना मीवा पेदूदातनम कीसेक हिल्लेन.
- 18 बस्के अयते मिमेट कलिसियाते जमा आंतिर, अस्के मीक वरोनद-वरोक अर्काका अलग आसेक मतिट इंचि नना मोदाला कैजतन, इदुन नना नम्मंतनगुडा.
- 19 मीलोप्पो अलग आयमळ बेसे. बारित्ते बोर निजमते पिस्संतोर, ओर दिस्सि अरंतोर.
- 20 मिमेट सामिना उपारम तिनालय जमा आंतिर, गानि अदुन सामिना उपारम इन्नु.
- 21 बारित्ते मिमेट तिनानस्के वरोक मुन्ने वरोर, बोनद ओर तिंतिर. अदुनहेंदाल बोरो कर्वुने मनंतुर, बोरो रिम्मांतुर.
- 22 मीक तिनालय-उनालय लोन हिल्लेना? हिलाकोटे पेनदा कलिसियातोर्कुन हयसाकुंटा आनि गरिबोर्कुना इज्जत पोगोटालय आतिरा? इंदके मीकुन नना बतल इनकन? इदुनाहाटीं मिमेट बेस कीतिर इनकना? बस्केने इन्नोन.
- 23 बारित्ते, सामिनाहेंदाल इव पोल्ले नाक दोर्कतां, अवुन नना मीक अप्पजेपतन. येसु सामिन बद रोज अयते पीसि हिथ्याना मत्ता अद नर्का उंदि हारि एततोर,
- 24 पेनदुक दन्यवाद कीसि, हारितुन उराहतोर, उराहचि ओर्क हीसेक, “इद मीवाहाटीं नावा मेंदुल आंद, नावा मतिताहाटीं इल्हेने कीम्प्ट,” इंचि वेहतोर.
- 25 इल्हा अद तित्ता पजा, अंगुर पानकमता गिलास एतसि, “इद पानकम नावा नेत्तुरते पूना करार आंद, इदुन बस्के अयते उंतिर अस्के नावा मति कियाना,” इंचि वेहतोर.
- 26 बारित्ते, मिमेट बस्के-बस्के अयते इद हारितुन तिंतिर, अंगुर पानकम उंतिर, अस्के सामिना हामुरतुन ओर मल्लिस वायानादाका वेहंतोर.
- 27 अदुनहाटीं बोर अयते सामिक इस्टम हिल्ला रीतुने ताकसि, हारितुन तिंतोर, अंगुर पानकम उंटीर, ओर सामिना मेंदुल आनि नेत्तुरता दोस्सि आंतोर.
- 28 इंचि हरेक मनकल कुद बल्हा मंतोर इंचि ओनद ओर परिकसा कीसि हळकुत्ता पजाने हारितुन तिनमळ गावाले आनि अंगुर पानकम उनमळ गावाले.
- 29 बारित्ते सामिना मेंदुल बारेमते तेल्लिचकुनाका तिनमळ-उनमळ कीति, ओर ओना पोर्गेने सिक्सा तरकुंतोर.
- 30 अदुनहाटीं मीलोप्पो वेल्लेटुर कमजोर आतुर, बिमार्क आतुर, वेल्लेटुर हासिगुडा होत्तुर.
- 31 गानि मनम कुद बल्हा मंतोर इंचि परिकसा कीसि हळते, पेन मनाकु सिक्सा हिथ्यो.
- 32 गानि मनाकु दुनियातोरतोनि सिक्सा आयामन्नि इंचि सामि मनाकुन बेस पोल्ले वेहचि सुदरांचतोर.
- 33 अदुनहाटीं विस्वासुल्लुकुनिटा! सामिना उपारम तिनालय जमा आतस्के अंतोर वायानाल एदुर हळसि, कूळसि तिंटु.

* 11:4 तल्लातुन तल्लातुन इत्ते किरिस्तुन.

34 बोरन्नागिंटा कर्वुने मत्ते लोने तिचि वाथिर. इल्हा कलियमळता हेँदाल सिक्सा तपंता. कळमता पोल्लेन बारेमते नना वातस्के वेहंतन.

12

पवित्र आत्मा हिय्यना वरमकु

- 1 विस्वासुल्लकुनिटा! आत्माता वराल्लकुना बारेमते मीक तेळियका मनमळ नाक इस्टम हिल्ले.
- 2 मिमेट पेनदुन विस्वासम कियाका मुन्ने, वळकवा बोम्मान मोळकानाहाटी मीक बल्हा वेहते, मिमेट अल्हे तार्किदिर.
- 3 अदुनहाटी पेनदा आत्माते वळकानोर बोरे आयिर, “येसु सापनेम दलगतोर आंदुर,” इंचि इन्नुर. अल्हेने पवित्र आत्माते ताकवोर बोरे आयिर, “येसु सामि आंदुर,” इंचि इन्नुर.
- 4 वरमकु वेरे-वेरे मनना गानि पवित्र आत्मा उंदे आंद.
- 5 सेवागुडा वेरे-वेरे तीरकुना मनना गानि सामि वरोरे आंदुर.
- 6 वेरे-वेरे तीरकुना अदूबूतामाता कबाहक मनना गानि ओरा लोप्पो कबाहक कियालय दैरनेम हियना पेन उंदे आंद.
- 7 अंतोर विस्वासुल्लकुंक पाय्दा आयागोम इंचि मा अव्हेटाल हरेक मनकानगा पेनदा आत्मा हियमळ जर्गता.
- 8 बल्हा इत्ते, अदे आत्माताहेँदाल वरोर बुद्धिदाता पोल्ले वेहंतोर, अदे आत्माताहेँदाल इंकावरोर तेल्विता पोल्ले वेहंतोर.
- 9 अदे आत्माताहेँदाल वरोर विस्वासमते गट्टिगा मनंतोर, अदे आत्माताहेँदाल इंकावरोरक बिमार्क बेस कियाना वरम हियमळ जर्गता.
- 10 अद आत्मा बोर्को-बोर्को अदूबूतामाता कबाहक कियानद ताकत, बोर्को बविस्यवानि कियानद, बोर्को आत्मान लोप्पो तेडा बतल ह्ळानद, बोर्को वेरे-वेरे बासां वळकानद आनि इंका बोर्को बासाना अर्तम वेहना वरम हीता.
- 11 गानि इवन्नि अद उंदे आत्मा दाना इस्टम वाताप वरोरक-वरोरक तूसि हीसि कबाहकुन पूरा कीता.

मेंदुल उंदि, दाना बागाल्क वेल्लेने

- 12 मना मेंदुल उंदे गानि अवने बागाल्क वेरे-वेरे मंतां. अवन्नि बागाल्क वेल्लेने मनना गानि उंदे मेंदुलतव आंद, अल्हेने किरिस्तुगुडा मेंदुललेसी मंतोर.
- 13 बारित्ते, मनम अंतोरम यहूदिल्क आयिना, युनानि आयिना, दासुल्क आयिना, दासुल्क आयाकोन्ना उंदे आत्माहेँदाल, उंदे मेंदुल आयालय बापतिस्मा एततोम, मना अंतोर्क उंदे आत्मा उहमळ जर्गता.
- 14 अदुनहाटी मेंदुल्ले सिराप उंदे बागम हिल्ले गानि वेल्लेने बागाल्क मंतां.
- 15 ओक्कला, काल गिंटा, “नना कय आयोन, अदुनहाटी मेंदुल्ला बागम आयोन,” इंचि इनकुनिना गानि अद मेंदुल्ला बागामे आंद.
- 16 अल्हेने केव गिंटा, “नना कळ आयोन, अदुनहाटी मेंदुल्ला बागम आयोन,” इंचि इनकुनिना गानि अद मेंदुल्ला बागामे आंद.
- 17 ओक्कला, पूरा मेंदुल कळे आसि मत्ते, बगाटाल केंजसि मन्नेम? पूरा मेंदुल केव्वे आसि मत्ते, बगाटाल मूस्किसि मन्नेम?
- 18 अदुनहाटी पेन दाना इच्चा मत्ताप, हरेक बागमतुन मेंदुल्ले बगा-बगा इरानो अगा इर्ता.
- 19 अव अन्नि गिंटा उंदे बागम मंचि मत्ते, मेंदुल बगा मनवळ?
- 20 अदुनहाटी बागाल्क वेल्लेने मंतां, गानि मेंदुल उंदे आंद.
- 21 इंदके कळ कय्दुन, “नीवातोनि नाक कबळ हिल्ले,” इंचि इना पर्री. आनि तला काल्कुन, “नीवातोनि नाक कबळ हिल्ले,” इंचि इना पर्री.
- 22 गानि मेंदुल्ले कमजोर मत्ताप दिस्सानव बागाल्के मनाकु वेल्ले अवसरमतव आंद.
- 23 मना मेंदुल्ले बव बागाल्कुनयते तक्को कदरतव इनकुंतोमो अवुने मनम एक्को कदर कीतोम, अव बव अयते सिंगारम हिल्लव अव इंका एक्को सिंगारम आंतां.
- 24-25 गानि मुन्नेटाले सिंगारम मत्ता बागाल्कुन सिंगारम कियाना अवसरम हिल्ले, गानि बवयते बागाल्क कदर हिल्लेगो अवंक एक्को कदर दोर्कमळ गावाले. अव बागाल्क सिन्ना-पेदूदा बतल इनाका उंदांक-उंदि रंदि कियमळ गावाले, इंचि पेन इल्हा मेंदुल तयार कीता.
- 26 अदुनहाटी ओक्कला मेंदुल्लतद उंदि बागम नोते, दानतोनि अव अन्नि बागाल्कुंक नोता. ओक्कला उंदि बागमकु कदर दोर्कते, अव अन्नि बागाल्क कूस आंतां.
- 27 अल्हेने मिमेट अंतोर कलियसि किरिस्तुना मेंदुल आंदिर, हरेक मनकल आ मेंदुल्ला बागाल्क आंदिर.
- 28 कलिसियाता लोप्पो पेन मोदाला प्रेरितुल्लकुन, ओरा पज्जो पेनदा कबुरतोर्कुन, ओरा पज्जो पेनदा पोल्ले कराहनोर्कुन, ओरा पज्जो अदूबूतामाता कबाहक कियानोर्कुन, ओरा पज्जो बिमार्कुन बेस कियानोर्कुन, ओरा पज्जो सहायम कियानोर्कुन, राज्येम ताकसानोर्कुन आनि वेरे-वेरे बासां वळकानोर्कुन निलाहता.
- 29 इत्ते, अंतोर प्रेरितुल्लक आयुर, अंतोर पेनदा कबुरतोर आयुर, अंतोर पेनदा पोल्ले कराहनोर आयुर, अंतोर अदूबूतामाता कबाहक कियानोर आयुर,
- 30 अंतोर्क बिमार्क बेस कियाना वरम दोर्काहिल्ले, अंतोर वेरे-वेरे बासां वळकानोर आयुर, अंतोर अव पोल्लेना अर्तम वेहा पर्र,

31 मिमेट पेद्दा-पेद्दा वराल्कुना आसेते मंटु, इवे आयाका इवुंकन्ना बेसता हरि वेहंतन.

13

पावरम कियमळ अन्निकन्ना बेस पोल्ले आंद

- 1 नना मनकालोर्क आनि पेनदा दूतां वळकना बासां वळकतेगुडा, नावा लोप्पो पावरम हिलाकोटे, नना टंग-टंग इनना इत्तोळतसंटोन हिलाकोटे गल-गल इनना गज्जेनसंटोन आंदुन.
- 2 नाक गिंटा बविस्यवानि वेहना वरम मनना, अन्नि मर्माल्कु आनि तेल्विता पोल्ले तेळियना, गुट्टान जर्पनचो पूरा विस्वासम मनना गानि नावा लोप्पो पावरम हिलाकोटे नना बतले कबळतोन आयोन.
- 3 नावा पूरा दनमतुन गिंटा गरिबोर्कुंक तूसि हिथ्यिना, बेसता कबुर वेहनाहाटी नावा मेंदुल बोळसालय हिथ्यिना, नावा लोप्पो पावरम हिलाकोटे बतल पायदा मनो.
- 4 पावरमते ओप्के मंता, दया मंता. पावरम इंकावरोन पोरो कळक पोत्ता हिथ्यो, पावरम पोमाडेंगि किया हिथ्यो, पेद्दिदरकेम किया हिथ्यो.
- 5 रीति हिल्ला कबाहक किया हिथ्यो, नाके पायदा गावाले इंचि इना हिथ्यो, सिडांचा हिथ्यो, बोरेन्ना तकलिपकु कियाना अदुन मनसुने इर् हाथ्यो.
- 6 कराब कबाहकुने कूस आया हिथ्यो, गानि सत्तेमते कूस आंता.
- 7 पावरम अन्नि पोल्ले सहन किया वेहंता, अन्नि पोल्लेनपोरो विस्वासम किया वेहंता. अन्नि पोल्लेनपोरो आसे इर् वेहंता, अन्नि पोल्लेने ओप्केते इर्ता.
- 8 पावरम बस्केने मारो. गानि बविस्यवानि वेहना वरम मारंता, वेरे-वेरे बासां वळकना वरम आगसि दांता, मर्मम तेल्विचकुनना तेल्वि मत्ते अदगुडा कबळ किय्यो.
- 9 बारित्ते मना तेल्वि पुरागा हिल्ले अल्हेने बविस्यवानि वेहना वरम पुरागा हिल्ले.
- 10 गानि बस्के अयते अन्निन पुरागा कियाना पोल्ले वायार, अस्के पुरागा हिल्लेद मायसि दांता.
- 11 नना सिन्ना-पेडन मत्तस्के, सिन्ना-पेडनलेसी वळकुंदुन, सिन्ना-पेडनलेसी विचारम कियुंदुन, सिन्ना-पेडनलेसी मनसु मत्ता, गानि पेद्दागा आतारिते सिन्ना-पेडनलेसी वळकना पोल्ले होळसीतन.
- 12 इंदके मनाकु अदुदमते हळताप मागुर-मागुर दिस्सेक मंता, गानि आयंका ओना मुन्ने नित्तिसि हळंतोम. इंदके नाक पुरागा तेळियो, नावा बारेमते पेनदुक पुरागा तेळियंता. ओर वाता पजा, नाकगुडा पुरागा तेळियंता.
- 13 इंदके विस्वासम, आसे, पावरम इव मूड पोल्ले बस्केळक मनानवे आंदुं, गानि इवेटाल पावरम अन्निकन्ना पेद्दा पोल्ले आंद.

14

वेरे-वेरे बासां आनि बविस्यवानि

- 1 पावरम इद मीवा लक्से मन्निकांटी. आत्माता वराल्कुन पहकाटु, बविस्यवानि वेहना वरम पहकसेकेन मंटु.
- 2 बारित्ते, तेळियवा बासाते वळकानोर, ओर मनकालोर्कुनतोनि आयो गानि पेनतोनि वळकंतोर. ओर मर्ममता पोल्ले पेनदा आत्माताल वळकंतोर, अव पोल्ले मनकालोर्कुंक तेळियो.
- 3 गानि बविस्यवानि वेहानोर, मनकालोर्कुना बक्तितुन बेर्सागोटालय, दैरेनेम हियालय, सांतिते मनालय वेहंतोर.
- 4 वेरे-वेरे बासाते वळकानोर, ओनदे बक्तितुन बेर्सागोटंतोर. गानि बविस्यवानि वेहानोर, कलिसियातोरा बक्तितुन बेर्सागोटंतोर.
- 5 मिमेट अंतोर वेरे-वेरे बासाते वळकगोम इंचि नना इनकुंतन. गानि दीनकन्ना एक्को बविस्यवानि वेहमळे बेस इंचि इनकुंतन. बारित्ते वेरे-वेरे बासाते वेहानोर, कलिसियातोर्कुन बक्तिते बेर्सागोटालय ओरा बासाते वेहाकोटे बतल पायदा हिल्ले. अदुनहाटी वेरे-वेरे बासाने वेहानदाकन्ना बविस्यवानि वेहमळे एक्को पायदातद आंद.
- 6 विस्वासुल्कुनिटा! नना मिहगा वासि पेन नाक हीता पोल्लेन वेहकन, तेल्विता पोल्लेन वेहकन, बविस्यवानि वेहकन, कराहकन अस्के मीक पायदा आयार. अवुन होळसिसि वेरे-वेरे बासाते वेहते मीक बतल पायदा आयार?
- 7 अल्हेने तूरीला आनि तरास बुरति जीवा हिल्ले. अयनागानि अवुन बरोबर नेकिचाकोटे, बतल नेकसेक मंता इंचि बल्हा तेळियंता?
- 8 तूताकोमता आवाज बरोबर पेयसाकोटे लडाइ कियालय बोर तयार आंतुर?
- 9 अल्हेने मिमेटगुडा वेरेतोर्क तेळियना पोल्लेते वेहाकोटे, मीवा पोल्ले ओर्क बल्हा तेळियार? मिमेट वळिते वळकताप आंता.
- 10 दुनियाते बच्चुंगो तीरकुना बासां मंतां, गानि अर्तम हिल्लेद बदे बासा हिल्ले.
- 11 अदुनहाटी अद बासाता अर्तम नाक तेळियाकोटे, नना वळकानोनतोनि वेरे देसेमतोन आंतन, ओर नावाहाटी वेरे देसेमतोर आंतोर.
- 12 अल्हेने मिमेटगुडा पेनदा आत्माता वराल्कुने निंडिस मंतिट, अवुनाहेंदाल कलिसियातोर्कुना बक्ति बेर्सना कोसिस कीम्टु.
- 13 अदुनहाटी वेरे-वेरे बासाते वळकानोर, दाना अर्तम वेहाना ताकत हीम इंचि पारतना कियाना.
- 14 बारित्ते, ननागिंटा वेरे-वेरे बासाते पारतना कीते, नावा आत्मा पारतना कीता गानि नावा बुद्दि कबळ किय्यो.

15 अय्ते नाक बतल कियमळ गावाले? नना नावा आत्माते पारतना कीतन, नना नावा बुद्दितेगुडा पारतना कीतन. नना नावा आत्माते पाटा पारंतन, नना नावा बुद्दितेगुडा पाटा पारंतन.

16 ओक्कला निमे सिराप आत्माते दन्यवाद कियानय्ते, नीवा पोल्ले तेळियवोर अगा उद्दुता मनकल आमीन इंचि बल्हा इनानुर? निमे बतल वळकतिन ओनकु तेळिया हिल्ले.

17 निमे अय्ते पेनदुक बेस दन्यवाद कीतिन, गानि इंकावरोना बक्ति बेसालय अद कबळ किय्यो.

18 मी अंटोर्कन्ना एक्को वेरे-वेरे बासाने वळकना वरम नाक मंता, अदुनहाटीं नना पेनदुक दन्यवाद कीतन.

19 गानि कलिसियातोर्कुनतोनि वेरे-वेरे बासाते पदि वेय्कुना पोल्लें वळकनदानकन्ना, ओर्क करालय तेळियना बासाते हेय्युं पोल्लें ना बुद्दिते वेहामळे नाक बेस.

20 विस्वासुल्कुनिटा! मिमेट तेळिवेते सिन्ना-पिलाल्कुनालेसीं मनमट, गानि पेद्दा मनकालोर्कुनालेसीं मंट. कराब पोल्लेने सिन्ना-पिलाल्कुनलेसीं तेळियवाप मंट. विचारम कियमळते पेद्दोरालेसीं मंट.

21 दर्मसास्त्रमते, “नना तेळियवा बासाने वळकानोर्कुना हेंदाल, पराया लोकुल्कुना तोळदाल, ईरतोनि वळकंतन, अय्नागानि ईर नावां केंजुर,” इंचि पेन वेहंता.

22 अदुनहाटीं तेळियवा बासाते वळकमळ, विस्वासुल्कुनाहाटीं आयो, गानि विस्वासम कियवोराहाटीं चिन्ह आंद. बविस्वयानि वेहमळ विस्वासम कियवोराहाटीं आयो, गानि विस्वासम कीतोराहाटीं चिन्ह आंद.

23 ओक्कला कलिसियातोर उंदगा जमा आतस्के, अंटोर तेळियवा बासाते वळकालय दलगते, मीलोप्पो बासा तेळियवोर, अविस्वासि वायानय्ते, ओर मीकुन पागल आतुर इंचि इतुर.

24 गानि मिमेटगिंटा तेळियना बासाते बविस्वयानि वेहते, बोरन्ना विस्वासम कियवोर हिलाकोटे तेळियवोर मनकल मिहगा वासि केंजते, ओना तप्पुक ओन्क तेळियसि, ओर पापमतुन एरपाट कीकुंतोर.

25 ओना मनसुने मक्किस् मत्तव पूरा दिसंतां. अदुनहाटीं ओर बोकबोर्ले अर्सि पेनदुन मोळकंतोर आनि “निजमे पेन मीलोप्पो मंता,” इंचि ओप्कुंतोर.

आरादना कियाना तरिका

26 विस्वासुल्कुनिटा! इंदके बतल कियाना? बस्के अय्ते मिमेट जमा आंतिर, अस्के वरोर पाटा पारालय, वरोर करालय, वरोर पेनदा पोल्ले बैय्यरा कीसि वेहालय, वरोर वेरे बासाते वळकालय, वरोर वेरे बासाता अर्तम वेहालय तयार मनंतुर. इवन्नि कलिसियातोर्कुना बक्ति बेर्सनाहाटीं आयमळ गावाले.

27 वेरे-वेरे बासाते वळकना मते, इव्वुर हिलाकोटे एक्कोते-एक्को मुव्वुर वरोन पजा वरोर वळिकर आनि वरोर दाना अर्तम तेळियागोट्टिसि वेहिर.

28 गानि अर्तम तेळियागोट्टिसि वेहानोर गिंटा हिलाकोटे, वेरे बासाते वळकना मनकल कलिसियाते चुपचाप मंचि ओना मनसुने पेनतोनि वळकना.

29 पेनदा कबुरतोर इव्वुर हिलाकोटे मुव्वुरे वेहिर, कळमतोर वेहता पोल्लेन परिकसा कीसि हळिर.

30 गानि उद्दिदिस मत्तोरवेटाल बोर्कन्ना अदे वेलाते पेनदा पोल्ले दोर्कसि अदुन वेहंतन इनकुनानय्ते, मुन्नेटाल वेहासेक मत्तोर चुपचाप उद्दना.

31 मिमेट अंटोर करियना, अंटोर सांतिते मंदना इंचि वरोर-वरोर बविस्वयानि वेहा परांतिट.

32 पेनदा कबुरतोर ओरा आत्मातुन ओर इनकुत्ताप तिरहा परांतुर.

33 बारित्ते पेन गळबळ कियानद आयो, सांति हियना पेन आंद. अन्नि कलिसियाना पेनदा लोकुल्क इल्हे मनंतुर.

34 कलिसियातोर जमा आतस्के मुर्ताहक चुपचाप मंदना, बारित्ते अवुंक वळकना अदिकार हिल्ले. गानि कय हिळु मंदना आदेस मंता. इल्हा दर्मसास्त्रमतेगुडा रासि मंता.

35 अवुंक बतलन्ना करियना इच्चा मत्ते, लोन होत्ता पजा अव अवुना मुय्दुर्कुन पूसकियाना. बारित्ते कलिसियाते मुरतळ पूसकियमळ इत्ते सिग्गु होनना पोल्ले आंद.

36 बतल! पेनदा पोल्ले मिहगाटाले पेयसतना? सिराप मिहागळके वाताना?

37 बोरन्नागिंटा, “नना पेनदा कबुरतोन” हिलाकोटे, “नना पेनदा आत्मा मत्तोन” इंचि इनकुनानय्ते, नना मीक रासता पोल्लें सामिना आदेसाल्क आंद इंचि ओन्क तेळियाना.

38 गानि बोरन्नागिंटा इदुन ओप्कुनाकोटे, ओनगुडा ओप्कुनमट.

39 अदुनहाटीं विस्वासुल्कुनिटा! बविस्वयानि वेहालय तयार मंट, वेरे बासाते वेहते ओन आपमट.

40 गानि अन्नि पोल्लें बेस उंदान पज्जो उंदि जर्गिकांटी.

- 1 विस्वासुल्कुनिटा! नना मीक वेहता बेसता कबुरतुन मर्रा उंदि मल्का मति कीसि हीसेक मंतन. अद बेसता कबुरतुन ओप्कुत्तिर, अवने गट्टिगा निल्सिगुडा मंतरि.
- 2 नना वेहता बेसता कबुरतुन मिमेट होळसाकोटा पीसि मत्ते पेन मीकुन पिसागोटंता. हिलाकोटे मीवा विस्वासम कियमळ एर्तम आंता.
- 3 अदुनहाटीं अन्निकन्ना मुन्ने नहगा एवता पोल्लेतुने मिहगा एविस्तन. अद बतल इत्ते, दर्मसास्त्रमता पोल्ले मत्ताप, किरिस्तु मना पापाल्कुनाहाटीं हातोर,
- 4 बौदा दोस्तुर, दर्मसास्त्रमते रासताप मूडो रोजुने जीवातेगुडा तेदतोर.*
- 5 जीवाते तेदतस्के केपांक* दिसतोर, पजा पन्नेंडु प्रेरितुल्कुंक दिसतोर.
- 6 अद आता पजा, हेय्युं नुहकुंकन्ना एक्को विस्वासुल्कुंक उंदे मल्का दिसतोर. ओरागटाल वेल्लेटुर इदवेरादाकागुडा जीवाते मंतुर, गानि इच्चुर हातुर.
- 7 मर्रा याकोबुंक दिसतोर, दाना पजा अंतोर प्रेरितुल्कुंक दिसतोर.
- 8 नना नेलां निडका मुन्नेन पुट्टोनलेसीं अंतोर्कन्ना आकिरते नाकुगुडा दिसतोर.
- 9 बारित्ते, नना अंतोर प्रेरितुल्कुन लोप्पो सिन्नोन आंदुन, नना पेनदा कलिसियातोर्कुन तिप्पल्क कीतोन आंदुन. अदुनहाटीं प्रेरित इनना लायकगुडा हिल्लेन.
- 10 गानि इंदके बतलय्ते मंतानो, पेनदा कुर्पाहेंदाले मंतन. अद कुर्पा नाक एर्तम आयाहिल्ले. नना कळमता प्रेरितुल्कुंकन्ना एक्को कस्टम कीतन. अयनागानि निजम इत्ते नना किया हिल्लेन, पेनदा कुर्पा नावातोनि मत्ता, अदे कीता.
- 11 अदुनहाटीं नना पेनदा पोल्ले वेहना, ओर वेहना मोमोट अंतोरम उंदे पोल्ले वेहंतोम. अदुन मिमेट विस्वासम कीतिर.

मनम जीवाते तेदमळ

- 12 किरिस्तु हातोरा लोप्पोटाल जीवाते तेदतोर इंचि मोमोट गिटा कबुर वेहानय्ते, हातोर मर्रा जीवाते तेदुर इंचि मीवा लोप्पोटोर इच्चुर इंतुर. अल्हा बारि इंतुर?
- 13 हातोर मर्रा जीवाते तेदाकोटे, किरिस्तुगुडा हासि जीवाते तेदा हिल्लोर.
- 14 किरिस्तु गिटा जीवाते तेदाकोटे, मोमोट वेहाना बेसता कबुर एर्तमे, मीवा विस्वासमगुडा एर्तमे आंद.
- 15 अचोने आयाका, किरिस्तु हातोरा लोप्पोटाल जीवाते तेदतोर इंचि मोमोट मीक वेहंतोम. हातोर गिटा जीवाते तेदाकोटे, पेन किरिस्तुनगुडा जीवाते तेहा हिल्ले इंचि तेळियंता. अदुना हेंदाल मोमोट पेनदा बारेमते आबद्दम गवाइ वेहताप आंता.
- 16 अल्हेने हातोर गिटा जीवाते तेदाकोटे, किरिस्तुगुडा जीवाते तेदा हिल्लोर.
- 17 किरिस्तु गिटा जीवाते तेदाकोटे, मीवा विस्वासम एर्तम आंद आनि मिमेट इदवेरादाका पापमतेन पसांचि मंतरि.
- 18 अल्हा अय्ते, किरिस्तुन विस्वासम कीसि हातोरगुडा नासडेमताल पिसा पर्राहिल्लुर.
- 19 सिराप इद बूमिपोर्रींटा पिस्वरहाटींगे किरिस्तुनपोर्रीं मना आसे इरते, मना गति अंतोर मनकालोर्कुंकन्ना एक्को गोसातद आयार.
- 20 गानि निजम बतल इत्ते, किरिस्तु हामुरताल जीवाते तेदतोर. बोर अय्ते विस्वासुल्क हासि होत्तुर, ओरव्टेटाल जीवाते तेदतोर ओर मुन्नेटोर आंदुर.
- 21 बल्हा अय्ते वरोर मनकनहेंदाल हामुर वाता, अल्हेने वरोर मनकनहेंदाल हातोर मर्रा जीवाते तेदमळगुडा वाता.
- 22 बारित्ते, आदामुन लोप्पो अंतोर हासि दांतुर, किरिस्तुनलोप्पो अंतोर जीवाते तेहमळ जर्गार.
- 23 हरेक मनकल वरोन पजा वरोर, मोदाला किरिस्तु जीवाते तेदतोर, किरिस्तु मर्रा वाता पजा ओना लोकुल्क जीवाते तेदांतुर.
- 24 अदुन पजा, पूरा सरकार, पूरा अदिकार आनि ताकत इव अन्निक किरिस्तु नासडेम कीसि पेनबाबाना कय्दे राज्येम अप्पजेप्पंतोर. अस्के बूमिता आकिर आयार.*
- 25 बारित्ते, किरिस्तु ओना पगातोर्कुन काल्कुना हिळु तायनादाका, ओर राज्येम कियमळ गावाले.
- 26 हामुर अन्निकन्ना आकिर पगातद आंद, अदुनगुडा नासडेम कीतोर.
- 27 बारित्ते, पेन अन्निक किरिस्तुना काल्कुना हिळु इरता. अन्निक इंचि इत्ते, पेनदुन होळसिसि अन्निक इंचि बरोबर एर्का आंता.
- 28 अन्निक ओना अदिकारमते इरता पजा, पेन अन्निक ताकिचगोम इंचि मर्रा कुद दाना अदिकारमते आंतोर. बारित्ते पेने अन्निक ताकिचंता.
- 29 मर्रा जीवाते तेदाकोटे, हातोराहाटीं येसुना पोरोलते बापतिस्मा एततुर, ओर बतल कियानुर? हातोर गिटा जीवाते तेदाकोटे ओराहाटीं बापतिस्मा बारि एताना?
- 30 बस्केळक मना जीवातुन बारि डेंजरते इर्राना?
- 31 विस्वासुल्कुनिटा! मिमेट मना सामि येसु किरिस्तुना लोप्पो विस्वासमते गट्टिगा मत्ताहाटीं, नना मीवा बारेमते पेदुदिरकेम वेहकुंचेके मंतन. अदुनहाटींगे नावा हामुरतुन रोज हळसेक मंतन.
- 32 इपीसि सहरतगा, नना केडा जिवरासिनसौंटा मनकालोर्कुना रीतिते लडांचतन, अय्ते बतल पाय्दा आता? हातोर गिटा तेदाकोटे, दर्मसास्त्रमते रासि मत्ताप, “नाळि अय्ते हायानदे मंता, अदुनहाटीं तिनकोम-उनकोम,” इंचि मन्नेम.*

33 गानि हातोर मर्रा जीवाते अर्स इंचि इनानोरा हेंदाल दोकाते अरमट. “कराब लोकुल्कुना दंटा, बेस ताकानोर्कुन हेडहंता.”

34 अदुनहाटी नीतिते ताकसि उसारते मंट, पापम कियमट. मीलोपो बच्चुदुरो पेनदुन एरपाट कियवोरगुडा मंतुर, मीक सिग्गु वायागोम इंचि इद पोल्ले वेहसेक मंतन.

जीवाते तेदता मेंदुल

35 गानि बोरन्ना, “हातोर जीवाते बल्हा तेदंतोर? जीवा अरता पजा मेंदुल बल्हा मनंता?” इंचि पूसकिया परांतुर.

36 ए बुद्धि हिल्वोना! निमे बूमिते एदता पेळे, मुन्ने हासि, पजाटाल मोलियंता.

37 निमे एदतद, मोल्का आयो, पेळे आंद. अद गोहकुना पेळे आयावच्चु, इंका बदाना पेळे आयावच्चु.

38 गानि पेन दाना इच्चातीर दान्क रूपम हीता. वेरे-वेरे पेडेक, वेरे-वेरे रूपम हीता.

39 गानि अन्नि मेंदुल्क उदेतीर मन्नों, मनकना मेंदुल वेरे, जिबरासिना मेंदुल वेरे, पिट्टेना मेंदुल वेरे, जिम्माना मेंदुल वेरे मंता.

40 स्वर्गमते मनानोर्क मेंदुल मनंता अल्हेने बूमिपोर्रो मनानोर्कगुडा मेंदुल मनंता. गानि स्वर्गमतोरा मेंदुल्ला वेल्लु वेरे, बूमि पोरोटोरा मेंदुल्ला वेल्लु वेरे मनंता.

41 पोळ्दुना वेल्लु वेरे, वेळिसता वेल्लु वेरे, सुक्काना वेल्लु वेरे. सुक्काना वेल्लु उंदानद-उंदांक परक मनंता.

42 हातोर मर्रा जीवाते तेदमळगुडा इल्हे मंता. कळियसि होनना मेंदुल्लतुन बूमिते दोसंतोम, गानि बस्केने कळियसि होनना मेंदुल मर्रा जीवाते तेदंता.

43 मेंदुल बूमिते दोस्सनेके दाना कदर मन्नो, गानि अद मर्रा जीवाते तेदानेके दानकु वेरेने कदर दोर्कता. मेंदुल बूमिते दोस्सनेके दानकु ताकत मन्नो, गानि अद मर्रा जीवाते तेदानेके वेल्लेने ताकतते तेदंता.

44 बूमिते दोसतद मना दिस्सना मेंदुल आंदु, मर्रा जीवाते तेदानद आत्माता मेंदुल आंदु, अल्हेने दिस्सना मेंदुल मंता, आत्माता मेंदुलगुडा मंता.

45 दर्मसास्त्रमते इदुना बारेमते, “मोट्टा मोदाटा जीवाता मनकल आदाम आतोर” इंचि रासि मंता. आकिर आदाम, इत्ते किरिस्तु, पिस्वर हियना आत्मा आतोर.

46 गानि आत्माता मेंदुल मोदाटद आयो, दिस्सना मेंदुले मोदाटद आंद. दाना पजाने आत्माता मेंदुल वांता.

47 मोदाटा मनकल बूमिता तोळिते तयार आतोर, गानि पजाटाल वायाना मनकल स्वर्गमताल वातोर.*

48 तोळिताल तयार आतुर अंतोर मनकालोर्क, तोळिता मनकनलेसीगे आतुर. स्वर्गमता मनकालोर्क, स्वर्गमतालेसीगे मंतुर.

49 मनम बल्हा अयते तोळिते तयार आतोना रूपम एततोम, अल्हेने स्वर्गमताल वायानोना रूपमगुडा एतंतोम.

50 विस्वासुल्कुनिटा! नना वेहानद बतल इत्ते, हळ्वि, नेत्तुरता मेंदुल्क पेनदा राज्येम दोर्का पर्रो, आनि कळियना मेंदुल्क, कळियवा मेंदुल्लतगा अदिकार दोर्का पर्रो.

51 केंजाट, नना मीक मर्ममता पोल्ले वेहसेक मंतन. अद बतल इत्ते, मनम अंतोरम हायोम, गानि मना रूपम मारियंता.

52 इदंता, उंदि सेकंदतेन, कळु रेप्पा तंतचोरजेमनेन जर्गता. आकिरता तूताकोम उहकुता उहकुळे, हातोर अंतोर बस्केने नासडेम आयाकोटा मननाहाटी मर्रा जीवाते तेदानुर आनि मना रूपम बारे मारियंता.

53 बारिल्ले, कळियसि होनना मेंदुल बस्केने कळियसि होनना मेंदुललेसी, आनि हायना मेंदुल बस्केने हायाकोटा मनना मेंदुललेसी मारिया पीता.

54 बस्के अयते कळियसि होनना मेंदुल, कळियसि होनना मेंदुल्ले मारियंता आनि हायना मेंदुल हायवा मेंदुल्ले मारियंता, अस्के दर्मसास्त्रमते रासि मत्ताप, “पेन हामुरतुन मिंगसि वाटता” इंचि रासि मत्ता पोल्ले पूरा आंता.

55 “ए हामुरतुना! निमे माकुन बगा गेल्लितन? ए हामुरतुना, नीवा कस्कना कौडि बगा मंता?” इंचि रासि मंता.

56 हामुरता कौडि पापम आंद, पापमता ताकत मूसाना नियम आंद.

57 मना सामि येसु किरिस्तुनाहेंदाल पेन मनाकुन गेल्लागोटंता. अदुनहाटी पेनदुक दन्यवाद.

58 नावा पावरमगल्ला विस्वासुल्कुनिटा! सामिना लोपो मीवा कस्टम एतम होन्नो इंचि मीक एरपाटे मंता. अदुनहाटी मिमेट विस्वासमते हीके-हेके आयाकुंटा, गट्टिगा निल्लि मंट, सामिना कबळते इंका एक्को बेस्सेके होंट.

16

येस्सलेमता कलिसियातोराहाटी चंदा

1 येस्सलेमता पेनदा लोकुल्कुनाहाटी चंदा जमा कियाना बारेमते, बल्हा अयते गलातिया एरियाता कलिसियातोर्क वेहतानो, अल्हेने मिमेटगुडा कियाना.

2 नना वाता पजाने चंदा जमा कियमट, गानि मीवट्टेताल हेरेक मनकल ओना कमाइता इसाबते वारमता मोदाटा रोज* इच्चुक कोत्तां जमा कीसि ईट.

* 15:47 योहान 3:31 * 16:2 वारमता मोदाटा रोज इगे वारमता मोदाटा रोज इत्ते, अथारम.

3 नना वाता पजा, मिमेट बोर्कुनय्ते इद कबळताहाटीं पेरीतिरो, ओर्क नना सिट्टिं हीसि, ओरा कय्देने मिमेट जमा कीता चंदा येस्सलेम लोहचीतन.

4 ओक्कला नना होनमळ कुदुरते, ओर नावातोनि वांतुर.

पौलुसना पय्नेम होनना विचारम

5 नाक मेसिडोनिया एरियाते होनना मंता, मेसिडोनियाताल पजा मिहगा वांतन.

6 मिहगा वासि, आया परते कोन्नि रोजकु हिलाकोटे पूरा पीनि कालम मीवातोनि मनंतन. दाना पजा नाक बेके होनना मंता, हेके साल्ता कीम्ट.

7 बारित्ते, मेसिडोनियाते होनानेके नड्डुम आगसि मीक कलियमळ नाक इस्टम हिल्ले. सामिना इच्चा मते, मीवातोनि कोन्नि रोजकु मंदना इंचि नावा आसे मंता.

8 गानि इंदके, पेंतेकोस्त पंडुगुनदाका इपीसि सहरतेन मनंतन.

9 बारित्ते, इगे बेसता कबळ कियालय, नाक उंदि पेद्दा मोका दोर्कता, इंका विरोद कियानोरगुडा वेल्लेटुरे मंतुर.

10 तिमोति मिहगा वातस्के ओर मीवा नड्डुम दैरनेमते मननाल हुळट. ओरगुडा नावालेसीं सामिना सेवा कीसेक मंतोर.

11 अदुनहाटीं ओन बोरे सिन्नगा हूळा मन्नि, ओन सांतिते नहगा लोहट. मिहगाटा विस्वासुल्लुकुनतोनि ओर वायानुर इंचि नना एदुर हूळसेक मंतन.

12 अप्पुलोस दादान, विस्वासि दादालोर्कुनतोनि होन इंचि नना बच्चुंगो मल्लकां बतिमलाडसि वेहतन, गानि इंदके मिहगा वायाना विचारम ओनद हिल्ले, पजा मोका दोर्कतस्के वायानुर.

13 इंदके मिमेट उसारते मंटु, विस्वासमते गट्टिगा मंटु, दैरनेमते मंटु, बलमगल्लोर्क आसि मंटु.

14 मिमेट कियाना कबाहक अन्नि पावरमतेन कीम्ट.

15 विस्वासुल्लुकुनिटा! स्टिपनसना लोतोर्कुना बारेमते मीक एरपाटे मंता, ओर अकाया एरियाते मोदाला विस्वासम कीतुर. ओर पेनदा लोक्कुल्लुकुना सेवा कियालय ओरद-ओर अप्पजेपकुत्तुर.

16 मिमेटगुडा असंतोरा आनि ओरालेसीं सेवा कियानोरा पोल्ले केंजसि ताकट इंचि बतिमलाडसंतन.

17 मिहागटाल मिमेट वायाकोन्ना गानि स्टिपनस, पुरतुनातुस, अकयकुस नहगा वातुर. ओर वाताहाटीं मिमेट वाताप आता. इंचि नना वेल्ले कूस आतन.

18 ओर वातुर इंचि नावा जीवक आनि मीवा जीवक सांति दोर्कता. अदुनहाटीं इसंतोर्कुन कदर हीम्ट.

आकिरता जोहर

19 आसिया राज्येमते मनना कलिसियातोेर मीक जोहर वेहतुर. अकविला, ओना मुत्तो पिरिसकिला आनि ओरा लोतागा जमा आयाना कलिसियातोेरगुडा सामिना पोरोलते मीक जोहर वेहतुर.

20 इग्गेटा अंतोर विस्वासुल्लुकु मीकुन जोहर कीसेक मंतुर. मिमेट वरोंक-वरोर पवित्र पावरमते कलियसि जोहार वेहकुंट.

21 नना पौलुसुन, नावा कय्दे जोहर इंचि मीक रासेक मंतन.

22 बोर्न्नागिंटा सामिन पावरम कियाकोंटा मत्ते, ओन्क सापनेम दल्लिग. “मारानाता” इत्ते, मा सामि वा.

23 सामि येसुना कुर्पा मी तोळ मन्निकांटी.

24 येसु किरिस्तुना लोप्पोटा नावा पावरम मीवा अंतोरतोनि मंदना. आमैन.

2 कुरेंति कुरेंति विस्वासुल्कुंक पौलुसना रोंडो सिट्टि

इद सिट्टिता बारेमते गिचचो परिचयम

रासतोना पोरोल: पौलुस

रासता कालम: इसवि सन 57

कुरेंति कलिसियातोरक पौलुस रासतद इद रोंडो सिट्टि आंदु. आबद्दम करहानोरा इच्चुर गुस्कुनाहेंदाल पौलुस आनि कुरेंति कलिसियातोरा नड्डुम समस्या तयार आता. इच्चुर विस्वासुल्कुंकगुडा पौलुसुना पोल्लें केंजाकोटा आतुर इंचि पौलुसुंक तेळियता.

अदुनहाटीं पौलुस इद सिट्टि मेसिडोनिया सहरताल रासतोर. कलिसियाते बच्चोर तकलिप वायिना विस्वासुल्क किरिस्तुनलोप्पो गट्टिगा निल्लिस मननाहाटीं दैरनेम हियालय रासतोर. निजम पेनदा सेवा क्रियानोर बल्हा मनागोम इंचि तेडियागोटसि वेहालय रासतोर. अल्हेने इच्चुर विस्वासुल्क आबद्दम करहानोरा पोल्लें केंजसि पौलुसुन विरोद कियुंदुर, अदुनहाटीं पौलुस ओना सतता अदिकारमतुन पीसि ओर्क इस सिट्टि रासतोर.

बगा बतल मंता

जोहार आनि परिचयम 1:1-11

कुरेंतिते पौलुस आनि कलिसिया 1:12-7:16

यहुदियाता विस्वासुल्कुनाहाटीं चंदा जमा कियमळ 8:1-9:15

पौलुस प्रेरित आंदुर इंचि रूजुव कीसि हुप्संतोर 10:1-13:10

आकिरता बोदां 13:11-13

जोहर

1 पेनदा इच्चाताहेंदाल किरिस्तु येसुना प्रेरित आतोन नना पौलुसुन आनि मना तम्मुर तिमोति ओक्कला कुरेंति सहरते मंदना कलिसियातोरक अल्हेने अकाया एरियाता अंतोर पवित्र लोकुल्कुंक सिट्टि रासेक मंतोम.*

2 मना पेनबाबाल आनि सामि येसु किरिस्तुनाहेंदाल मीक कुर्पा, सांति दोर्कसेके मनि.

पौलुस पेनदुन दन्यवाद कींतोर

3 मना सामि येसु किरिस्तुना पेनबाबाल दयागल्लोड अल्हेने अन्नि तीरकुना सांति हियाना पेन आंदुर, अदुनहाटीं ओन्क दन्यवाद आयि.

4 मनम इंकावरोंक सांति हियागोम इंचि पेन मनाकु अन्नि तकलिपकुने सांति हीसेक मंता. बोर अयते तकलिपते मंतुर, पेन मनाकु हीता सांतितुने मनम ओर्क हिया परगोम इंचि दाना इच्चा मंता.

5 बारित्ते मनम किरिस्तुनाहाटीं बच्चोर एक्को तकलिप अरंतोम, अच्चोर एक्को किरिस्तुनहेंदाल मनाकु सांतिगुडा बेस्सेके दांता.

6 मीक सांति आनि मुक्ति दोर्कागोम इंचे मोमोट तकलिप बोगांचेके मंतोम. माक सांति दोर्कता इत्ते, अद मीवा सांतिताहाटींगे आंद. इदुनहेंदाल बद तकलिपतुन अयते मोमोट ओर्सकुत्तोम, मिमेटगुडा अदे तकलिपतुन ओप्केते ओर्सकुना परांतरि.

7 मावा तकलिपते मिमेट बल्हा कलियसि मंतिरो अल्हेने मावा सांतितेगुडा मिमेट कलियसि मंतिर. अदुनहाटीं मीवा बारेमते मावा आसे गट्टिगा मंता.

8 विस्वासुल्कुनिटा! आसिया एरियाते† माक वेल्लेने तकलिप वाता, अद तकलिप मोमोट आपकुना परवच्चो मत्ता, मोमोट पिसंतोम इंचिगुडा इनकुना हिल्लोम. अद पोल्ले मीक तेळियसि मनागोम इंचि वेहासेक मंतोम.

9 निजमे, माक हामुरता सिक्सा दोर्कता इंचि इनकुंचेके मत्तोम, गानि कुद मनापोर्री मनम बरोसा इरामिन्नि, हातोर्कुन तेहाना पेन पोर्री बरोसा इरमळ गावाले इंचि इल्हा जर्गता.

10 पेने माकुन इच्चोर पेद्दा हामुरता गंडेमताल पिसागोटता, पिसागोटसेक मंता, मुन्नेगुडा माकुन पिसागोटसेक मनंता इंचि माक अदुन पोर्री आसे मंता.

11 वेल्लेटोरा पारतनाहेंदाल पेन मापोर्री दया हुपिच्चि माकुन पिसागोटता, अदुनहाटीं वेल्लेटुर लोकुल्क माहेंदाल पेनदुक दन्यवाद कीसेक मंतुर. अयते मिमेटगुडा अंतोर कूळसि माहाटीं पारतना कीसि माक सहायम कीम्दु.

पौलुसना पय्नेमता पिलान बदलांचमळ

* 1:1 इद सिट्टितुन पौलुस वरेंरे रासतोर, सिलवानुस आनि तिमोति ओनतोन जोहर इंचि वेहतर. † 1:8 आसिया एरिया अस्केटा आसिया एरिया इत्ते, इंदकेटा तुर्कि देसेम आंद.

12 मोमोट दुनियाते मननेके कास कीसि मीवा नड्डुम मननेके, पेनदुक इस्टामाताप पवित्र आनि सत्तेमते मत्तोम, अद मनकना तेल्चिते आयो गानि पेनदा कुर्पातोनि मत्तोम इंचि मावा मनसु गवाइ वेहासेक मंता. इद मावाहाटी पेद्रिकेमता पोल्ले आंद.

13-14 मिमेट हदविते मीक, तेळियाना पोल्लेंगे मोमोट रासेक मंतोम, अव आयाका वेरे बवे पोल्लें मीक रासेक हिल्लोम. आनि आकिरदाका मिमेट अबुन कबुल कीतिर इंचि नाक आसे मंता. अचोने आयाका सामि येसु वायाना रोजुने मोमोट मीपोर्रो पेद्रिकेम कीताप, मिमेटगुडा मापोर्रो पेद्रिकेम कीकित.

15-16 इद बरोसाता हेंदाले नना मोदाला मिहगा आगिसि, मिहागटाल मेसिडोनिया दांतन. मर्रा मेसिडोनियाताल मल्सि वायानेकेगुडा मीकु रोंडु पायदां आयगोम इंचि मिहगा आगंतन. पजा अगटाल मिमेट नाकुन यहुदिया एरियाताहाटी सालां किया परातिर इंचि इनकुंचेके मंतन.

17 नना इव पिलानकु बतले विचारम कियाकेने कीतिर इंचेके मतिरा? दुनियाता लोकुकुनालेसी उंदि मल्का “हो” इंचि इंकुंदि मल्का “हिल्ले” इंचि इनानोन आयोन.

18 पेन विस्वासमगल्लद आंद. अल्हेन मोमोटगुडा “हो” आनि “हिल्ले” इल्हा रोंडु पोल्लें वळकोम.

19 बारित्ते, नना, सिल्वानुस आनि तिमोति मोमोट मीवा नड्डुम पेनदा मर्री येसु किरिस्तु आंदुर इंचि वेहतोम. येसु किरिस्तु “हो, हिल्ले” इल्हा रोंडु पोल्लें वळकोर गानि ओर बस्केळक “हो” इंचे इंतोर.

20 पेनदा अन्नि पोल्लें येसुनगा पूरा आतां. अदुनहाटी मनम आमीन इंचि पेनदा महिमा कीतोम.

21 मीवातोनि अबिसेकम कीसि, किरिस्तुनलोपो गट्टिगा निलाहनोर पेने आंद.

22 पेन मनापोर्रो सिक्का वाटता अल्हेने गेरंटितालेसी मनालोपो दाना पवित्र आत्मातुन इरता.

23 मीकुन इंका नोप्पिचमळ नाक इस्टम हिल्ले, अदुनहाटी नना इदवेरादाका मिहगा कुरैति सहर वाया हिल्लेन. इद पोल्ले निजम इंचि ना मनसुन हळना पेने गवाइ मंता.

24 मीवा विस्वासम पोरो अदिकारम हुप्सना इंचि मोमोट वेहासेक हिल्लोम, मिमेट विस्वासमते गट्टिगा निल्सि मंतिट, मीवा आनंदमते मोमोटगुडा मीवा तोळ मनंतोम.

2

1 नना मिहगा वासि मीक मर्रा दुक्कम वायागोटोन इंचि मनसुने इनकुत्तन.

2 बारित्ते नना मीकुन दुक्कम कीते, नाकुन बोर आनंदम कियानुर? मीक तप्पा बोरे किय्युर!

3 नना अगा वातस्के नाक बोराहेंदाल अयते कुसि आयाना मंता, ओरा अंटोराहेंदाल नाक दुक्कम आयामन्नि इंचि नना मुन्ने अद सिट्टि* रासि लोहतन. नाक मी बारेमते विस्वासम मंता, नावा कुसि मीवा अंटोरदगुडा कुसि आंद.

4 नना नावा मनसुनाल वेल्ले दुक्कमते, बादाते अळसेके अद सिट्टि रासि मीक लोहतन. नना मीक दुक्कम कियालय आयो गानि मीवापोर्रो नावा पावरम बच्चो वेल्ले मंता, अद मीक तेळियगोम इंचि नना रासि मत्तन.

तप्पु कीतोम मापि कियाना

5 बोरन्नागिंटा दुक्कम हियानयते, ओर सिराप नाकुने दुक्कम हीतोर इत्ताप आयो, तक्को-एक्को मीक अंटोर्कगुडा हीतोर. इदुना बारेमते नना दीनकन्ना एक्को बतल वेहोन.

6 असंटोनाहाटी मिमेट वेल्लेटुर हीता सिक्सा साल आंता.

7 अदुनहाटी ओन्क इंका सिक्सा हियाका, मापि कीसि, समजांचटु. अल्हा कियाकोंटे ओर इंका एक्को रंदि कीसेक मनंतोर.

8 अदुनहाटी मिमेट ओनपोर्रो एक्को पावरमतुन हुप्सट इंचि मीक विनंति कीसेक मंतन.

9 मिमेट नना वेहता अन्नि पोल्लेने ताकतिरा, ताकिरा इंचि मीकुन परिकसा कीसि हळालयगुडा अद सिट्टि रासतन.

10 मिमेट बोन्नना मापि कीते ओन ननागुडा मापि कीतन, नना बतलयते मापि कीतानो किरिस्तुना मुन्ने मीवाहाटी मापि कीतन.

11 मापि कियाकोंटे देख्यम बस्केनना तकलिप हिय्या परांता. बारित्ते दाना गुनम बसोटदो मनक एरपाटे मंता.

पूना करारता सेवाकुल्क

12 नना बस्के अयते किरिस्तुना बारेमता बेसता कबुर वेहालय त्रोआस सहरते होत्तनो, अस्के सामिनाहेंदाल नाकु हरी पुटता.

13 ना तम्मुर तीतु अगा कलिया हिल्लोर, अयते ना मनसुंक सांति दोर्काहिल्ले. अदुनहाटी दांतन इंचि ओर्कु वेहचि, मेसिडोनिया एरियाते पेय्शि होत्तन.

14 पेनदुक दन्यवाद आयि! अद किरिस्तुनलोपो मनाकुन बस्केळक गेलसागोटसेक ओंता आनि गमा-गमा गब्बुनसोंटा दाना तेल्चितुन मनाहेंदाल अन्नि जेगाने पैलांचंता.

15 बारित्ते मुक्ति दोर्कानोरा लोपो आनि नासडेम आयानोरा लोपो मनम पेनदाहाटी किरिस्तुना बेसता गब्बु आंदुम.

* 2:3 पौलस कुरैति कलिसियातोक मूड सिट्टि रासतोर, रोंडो सिट्टि दोर्काहिल्ले, अद सिट्टि इत्तेने गायब आता सिट्टि आंद.

16 नासडेम आयानोराहाटीं हामुर गब्बुलेसीं मंतोम आनि मुक्ति दोर्कानोराहाटीं पिस्वरता बेसता गब्बुलेसीं मंतोम. इसोटा कबळ कियानालायक बोर मंतुर?

17 बोर अय्ते पेनदा पोल्लें वेहाचि सतता पायदा कीकुंतुर, असंटा वेल्लेटोरव्टेताल मोमोट हिल्लोम. गानि मोमोट सत्तेम मनसुने, किरिस्तुना अदिकारमते पेनदा पोल्लें वेहासेक मंतोम. माकुन लोहता पेन माकुन हळसेक मंता इंचि माक एरपाट मंता.

3

पूना करारता सेवाकुलक

1 मावद मोमोटे मर्रा पेद्दातनम वेहकुंचेके मंतोम इनकुंचतिरा? हिलाकॉटे वेरेतोरुंकु अक्सरम मत्ताप माकगुडा मीवाहाटीं सिपारिस सिट्टिं मिहगा तरमळ, मिहागटाल एतमळ अक्सरमा?

2 मावा सिट्टिं अय्ते मिमेटे आंदिर, अद मावा मनसुने रासि मंता, अदुन अंतोर एरपाट कीतुर, हदवंतुर.

3 निजमे, मिमेटे माहेंदाल हीता किरिस्तुना सिट्टिं आंदिर इंचि अंतोर्क दिस्सेक मंतिट. अद साइते आयो गानि जीवाते मंदना पेनदा आत्माते रासि मंता, अद पर्पु बंडनपोर्रीं आयो गानि मनकना मनसुनपोर्रीं रासि मंता.

4 किरिस्तुनाहेंदाल माकु पेनदापोर्रीं इसोटा बरोसे मंता.

5 मावद मोमोटे बदाना पोल्लेता विचारम कियानालायक हिल्लोम, गानि इवुन कियाना बलम पेने माकु हीसेक मंता.

6 पेन माकुन पूना करारता सेवक आयाना लायकगुडा कीता. अद करार मूसाना नियमते रासि मत्ताप आयो गानि, पेनदा आत्माताहेंदाल मंता. मूसाना नियम हामुरतेके ओता गानि पवित्र आत्मा पिस्वरताहेके ओता.

पूना करारता महिमा

7-8 पर्पु बंडनपोर्रीं पेन दाना नियमकुन रासि मूसान्क हीता, अस्के अवुन ओर इस्राएल लोकुकुंक हियनेके ओना मोकम पेनदा महिमाता वेल्लुने निंडिसि मत्ता. गानि अद वेल्लु तक्को आयानेकेगुडा ओर ओना मोकमतुन हळा पर्राहिल्लुर. इल्हा हामुरताहेके ओयाना मूसाना नियमता महिमाता वेल्लु इच्चोर मत्ता अय्ते, पेनदा आत्माता महिमाता वेल्लु इंका बच्चोर पेद्दा मनंता.

9 बारित्ते सिक्साहेके ओयाना मूसाना नियमे अच्चोर महिमाता वेल्लुने मत्ता, अय्ते मनकालोर्कुन नीतिमंतुलक कियाना नियमते दानकन्ना इंका बच्चोर महिमाता वेल्लु मंदार.

10 इंदकेटा महिमाता वेल्लु, मुन्नेटा महिमाता वेल्लुंकन्ना बच्चोरो एक्को मंचि अद हिल्ले इत्ताप आता.

11 तक्को आसेके होनानदुना महिमाता वेल्लु इच्चोन मत्ते, इंका बस्केळक मनानदुना महिमाता वेल्लु बच्चोन वेल्ले मंदार!

12 अदुनहाटीं इदे आसेता हेंदाल मनम बच्चोरो दैरेमते वळकंतोम.

13 इस्राएल लोकुलक तक्को आयाना महिमाता वेल्लुन हळा मनि इंचि मूसाल ओना मोकमपोर्रीं मुस्कु वाटकुनुंदुर, गानि मनम ओरालेसीं मुस्कु वाटकुन्नोम.

14 इस्राएल लोकुलकुना मनसुक गट्टिगा आसि होत्तां. इव रोजकुनेगुडा बस्के अय्ते ओर पळाना नियम हदवंतुर, अस्के अदे मुस्कु ओरा मनसुन मुच्चंता. सिराप किरिस्तुनपोर्रीं विस्वासम इरते, किरिस्तुए ओरा मुस्कुन तेंडा परांतोर.

15 निजमे, इंदकेगुडा मूसाना पुस्तकम हदवंतुर अय्ते मुस्कु वाटताप अव पोल्लेना अर्तम तेळियो.

16 गानि बस्के अय्ते ओरा मनसु सामिनहेके तिरियार, अस्के सामि ओरा मुस्कु तेंडसि ओर्क तेळियाना बुद्धि हिथ्यानुर.

17 सामि अय्ते आत्मा आंदुर. बगा अय्ते सामिना आत्मा मंता, अगा बोना कय्दा हिळ हिल्लोम.

18 मनम अंतोरम अद मुस्कुन तेंडसि पोहतोम, इंदके अद्दमते हळताप सामिना महिमाता वेल्लुन हळसेक मंतोम. ओना आत्मा मनालोप्पो मत्ताहाटीं ओनालेसीगे मनम मारियसेके मंतोम.

4

पौलुसना सेवाता बारेमते

1 पेन मापोर्रीं दया कीसि, दाना पोल्ले वेहाना इद सेवा माक हीता, अदुनहाटीं मोमोट दैरेमते वेहांतोम.

2 सिग्गु होनानव आनि मक्किस कियाना कबाह्कुन मोमोट होळसीतोम. इंकावरोन दोका हियमळ आयि, पेनदा पोल्लेतुन उल्टा-पल्टा कीसि वेहमळ आयि इसोटा कबाह्क किय्योम. गानि पेनदा मुन्ने सत्तेम पोल्लेतुन वेहाना हेंदाल, मोमोट बसंतोरम इंचि हरेक मनकंक ओरा मनसुने तेळियंता.

3 मना बेसता कबुरगिंटा मुस्कु वाटताप मनानय्ते, अद नासडेम आयानोराहाटींगे मंता.

4 किरिस्तु पेनदा रूपम आंदुर, ओना महिमाता बेसता कबुरता वेल्लुन हळा मनि इंचि ई दुनियातोर पन विस्वासम कियवोरा मनसुन हीकट कीसि पोहता.

5 अदुनहाटीं येसु किरिस्तु सामि आंदुर, ओनाहेंदाले मोमोट मी सेवाकुलकुम आंदुम इंचि प्रचार कीतोम, गानि मावा बारेमते मोमोट प्रचार कीकुन्नोम.

6 बारित्ते, “हीकटताल वेल्लु आयि” इंचि पेने इत्ता. मनम येसु किरिस्तुना मोकमते दिस्सना पेनदा महिमाता तेल्चितुन एरपाट कियागोम इंचि मनाकुन इदे वेल्लुने मना मनसुने मेर्सागोटता.

7 मनालोप्पो मंदना इद वेल्लु पेदूदा दनमलेसी* मंता. गानि ई दनमतुन तोळिता अळकातसोंटा मना मेंदुल्लुकुने पेने इरता. इदुनहेंदाल ई वेहा परवच्चो ताकत मनद आयो गानि पेनदाहेंदाल मंता इंचि माकु तेळियंता.

8 माकु नालुं मूलानाल आपत्ति अय्ते वांतां, गानि आपत्तिते अर्सिं होन्नोम, वेल्लेने मल्कां गाबर आंतोम, गानि आसे हिल्लाप मन्नोम.

9 लोकुल्लक तकलिप अय्ते कीतुर गानि पेन माकुन होळसो. पगातोर हिळु अरहंतुर गानि नासडेम आयोम.

10 येसुना पिस्वर मावा मेंदुल्ले दिस्सागोम इंचि येसुना हामुटुन बस्केळ्ळक मा मेंदुल्ले पीसि तिरियंतोम.

11 येसुना पिस्वर मावा हायाना मेंदुल्ले दिस्सागोम इंचि मोमोट पिस्सि मंचिगुडा बस्केळ्ळक येसुनाहाटीं हामुरता कय्दे मनंतोम.

12 अदुनहाटीं मावा लोप्पो हामुर, मीलोप्पो पिस्वर कबळ कीता.

13 दर्मसास्त्रमते, “नना विस्वासम कीतन, अदुनहाटीं वळकतन” इंचि रासि मत्ताप मोमोट विस्वासम कीतोम, अदे विस्वासमता आत्मा मावा लोप्पो मंता इंचि मोमोट वळकतोम. बारित्ते अदे विस्वासमता आत्मा मावा लोप्पो मंता.

14 बारित्ते, सामि येसुन जीवाते तेहता पेने मोमोट येसुना लोप्पो कलियसि मत्ताहाटीं माकुनगुडा जीवाते तेहता आनि मीवातोनि माकुनगुडा दाना मुन्ने निप्संता इंचि माक एरपाटे मंता.

15 पेनदा कुर्पा वेल्लेटुर लोकुल्लुकुनगा एवसि, दाना महिमा कियालय एक्कोते-एक्को दन्यवादाळ्ळक वेहाना पारतनां बेर्सागोम इंचि इवन्नि मीवाहाटीं मंतां.

16 अदुनहाटीं मोमोट दैरेनेम होळसोम. मावा मेंदुल पलाताल जिगि हिलाकोटा आसेके मंता, गानि लोप्पो मंदना आत्मा मात्रम रोज पूनगा आसेके मंता.

17 बारित्ते, माकु गळसेमताहाटीं वायाना तकलिपकु, मावाहाटीं मोमोट विचारम किय्योम अच्चोर अक्सरम आतव आनि बस्केळ्ळक मंदना महिमातुन तयार कीतां.

18 अय्ते इंदके मोमोट दिस्साना वस्तुकुन पोर्रो आयो, गानि दिस्सुवा वस्तुकुन पोर्रो नदर वाटंतोम. दिस्सना वस्तुकु गळसेम मनंतां, दिस्सुवा वस्तुकु बारे बस्केळ्ळक मनंतां.

5

मावा स्वर्गमता लोन

1 बूमिपोर्रो मंदना लोतालेसीं मावा मेंदुल मंता. अद लोन नासडेम आतस्के माकु मनालय स्वर्गमते लोन मंता, अद बस्केळ्ळक मंदना लोन मनकल तयार कीतद आयो, गानि पेने कीता इंचि माकु एरपाटे मंता.

2 इंदकेटा लोतसोंटा मेंदुल्ले मोमोट नेर्बळतोम, अदुनहाटीं स्वर्गमता लोतुन केर्नाहाटीं वेल्ले तनलाळंतोम.

3 बारित्ते इदुन केर्तस्के मोमोट कुळ्ळकें दिस्सोम.

4 मोमोट इद बूमिपोर्रोटा मेंदुल्ले मत्तच्चोरजेम बर्वुने तन्लाळसेक मनंतोम, इद मेंदुल्लुन होळसीयगोम इंचि आयो, गानि हायाना मेंदुल्ल बस्केळ्ळक पिस्साना मेंदुल्ले मारियागोम इंचि मोमोट कोरसेक मंतोम.

5 इदे मेंदुल्लताहाटीं पेन माकुन तयार कीता. इद गेरांति इंचि मावा लोप्पो पवित्र आत्मातुन हीता.

6 अदुनहाटीं बस्केळ्ळक दैरेनेमते मनंतोम. मोमोट मेंदुल्ले मत्तच्चोरजेम सामिनगटाल लक्कु मंतोम इंचि माकु एरपाटे मंता.

7 बारित्ते मोमोट हळसि आयो गानि सामिनपोर्रो विस्वासम कीसि ताकंतोम.

8 मोमोट दैरेनेमते मनंतोम, मेंदुल्लुन होळसिसि सामिनतोनि मनमळे बेस इनकुंतोम.

9 अदुनहाटीं मोमोट इद मेंदुल्ले मनना, मनाकोन्ना, सामिक इस्टाम वाताप ताकमळे मावा उदूदेसम.

10 बारित्ते मनक अंटोर्क किरिस्तुना न्यायम कियाना राजगदूदे मुन्ने नित्ताना मंता. मनागटाल हरेक मनकंक मनम कीता बेसता कबाहक आयि, कराब कबाहक आयि अवनुना हिसाबते इनाम हिलाकोटे सिक्सा दोर्कता.

मोमोट किरिस्तुना राजदूतकुम

11 पेनदुक वेरियसि बल्हा पिस्सना इद माक तेळियंता, अदुनहाटीं इदुन मोमोट लोकुल्लुकुं वेहांतोम. मोमोट बसंतोरम इंचि मावा बारेमते पेनदुक पूरा एरपाटे. इव पोल्ले मीवा मनसुना लोप्पोगुडा एरपाट आता इंचि नावा आसे मंता.

12 मोमोट बेसतोकुंम इंचि मरी मी मुन्ने वेहकुंचेके हिल्लोम, गानि इच्चुर लोकुल्लक मनसुने मत्ता पोल्ले आयाका पलाताल दिस्साना पोल्लेना बारेमते पेदिदकेम कीतुर, ओराहाटीं मावा बारेमते वेहालय मीक जवाब गावाले इंचि वेहासेक मंतोम.

13 माकुन गिंटा बोरन्ना पिस्सालोर इंचि इत्ते, पेनदाहाटींगे आतोम. बोरन्नागिंटा माकुन बेसता बुद्दिदतोर इंचि इत्ते मीवाहाटींगे आतोम.

* 4:7 दनम इगो दनम इत्ते पेनदा तेल्चि. विस्वासुल्लुकुं अप्पजेपता बेसता कबुर.

14 किरिस्तु अंतोराहाटीं हातोर इंचि मोमोट विस्वासम कीतोम. इंका मावा अंतोरा पळाना पिस्वरगुडा हाता इंचि विस्वासम कीतोम. अदुनहाटीं किरिस्तुना पावरम माकुन ओप्केते इरसेक मंता.

15 अद बल्हा इत्ते, इंदकेटाल पूना पिस्वर पिसानोर ओर सतताहाटीं आयो गानि ओराहाटीं बोर अय्ते हासि जीवाते तेदतोर ओनाहाटीं पिसागोम, अदुनहाटींगे ओर अंतोराहाटीं हातोर.

16 अदुनहाटीं इंदके मोमोट मनकना विचारम मत्ताप हळना आयो. मोमोट किरिस्तुनगुडा मनकना विचारम मत्ताप हळसि मत्तोम, गानि इंदके ओन अलग नदरते हळान्तोम.

17 बल्हा इत्ते, इंदके बोर अय्ते किरिस्तुने मंतोर, ओर पूना मनकल आतोर. पळाना पिस्वर होत्ता, पूना पिस्वर सुस्व आता.

18 इवन्नि पोल्लें पेनदाहेंदाले मंतां. पेने मनाकुन किरिस्तुनाहेंदाल दानतोनि कल्पिसि माकु कल्पना सेवा अप्पजेपता.

19 अद बल्हा इत्ते, लोकुलकुना पापालक लेक्का पिय्याकेन, ओर्कुन किरिस्तुना हामुरताहेंदाल दानतोनि कल्पता. इल्हा कल्पना पोल्लेतुन लोकुलकुनगा ओयालय माकुन निल्हाता.

20 अदुनहाटीं मोमोट किरिस्तुना राजदूतकुम आंदुम. मावाहेंदाल पेन मीक वेहासेक मंता इनकुंदु. मिमेट पेनतोनि कलियसि मंदना इंचि किरिस्तुनाहेंदाल मोमोट मीक विनंति कीसेक मंतोम.

21 मनम किरिस्तुनाहेंदाल पेनदा लोप्पो नीतिमंतुलक आयागोम इंचि मना बदलाते मना पापालकुनाहाटीं पापम कियवा किरिस्तु मोक्कु आतोर.

6

1 मोमोट पेनतोनि कलियसि कबळ कियानोर्कुम आताहाटीं मीक विनंति कीसेक मंतोम, मीक दोर्कता पेनदा कुर्पातुन एर्तम आया हियमट्ट.

2 बारित्ते पेनदा दर्मसास्त्रमते, “बेसता वेलाते नना नीवा पोल्ले केंजतन, मुक्किता रोजुने नना नीकु सहाय्यम कीतन,” इंचि रासि मंता. हुळ्याट, बेसता वेला इदे आंद, इदे मुक्किता रोजु आंदु.

3 मावा सेवाते बतले तप्पु जर्गामान्नि इंचि, बदे पोल्लेते इंकावरोंक अडुडम ताकोम.

4 गानि अन्नि पोल्लेने मोमोट पेनदा बेसता सेवाकुलकुम आंदुम इंचि हुपिच्चेक मंतोम. ओप्केते, बादाने, कस्टालकुने, तकलिपकुने,

5 देब्बां तिनमळते, जेलते होनमळते, मावा विरोदमते लोल्लिं आयमळते, कस्टम कियमळते, निद्र हायमळते, उपासमते,

6 पवित्र मनमळते, तेल्विते, ओर्सकुनमळते, दयाते, पवित्र आत्माते, कपटम इर्का पावरम कियमळते,

7 सत्तेम पोल्लेते, पेनदा ताकतते, नीतिता आयदार्क तिना कय्दे, रोड्डा कय्दे पीसि,

8 इंकावरोर माकुन कदर हिथ्यिना-हिथ्याकोन्ना, बेसतोर इन्निना-इन्नाकोन्ना, माकुन नळेह कियानोर इंचि इंतुर गानि मोमोट सत्तेमतोर्कुम आंदुम.

9 एरपाट कियवोरालेसीं मनना, अंतोर एरपाट कीतुर. हायानोरालेसीं मनना, जीवाते मंतोम. माकु सिक्सा हियाना गानि मोमोट हाया हिल्लोम.

10 मोमोट दुक्कमतेगुडा बस्केळ्ळक आनंदमते मनंतोम, मोमोट गरिब मनिनागानि वेल्लेटोर्कुन पेनदा लोप्पो सिरमंतुलक कीतोम. महगा बतल हिलाकोन्ना गानि अन्नि मत्तापे मंतोम.

11 कुरेंति सहरतोरिता! मोमोट अन्नि पोल्लें मीक कुल्लम-कुल्ला वेहतोम, मीहाटीं मावा मनसु कुल्ला मंता.

12 मोमोट मीकुन लक्कु इरसेक हिल्लोम, गानि मिमेटे मावा दग्गेरा वायालय हळसेक हिल्लिर.

13 मोमोट कीतापे मिमेटगुडा मीवा मनसुन कुल्ला कीमट्ट. इद नना मीकुन नावा पिलालक इंचि वेहासेक मंतन.

विस्वासुलक, अविस्वासुलक उंदि आया पर्र

14 विस्वासम कियवोरतोनि मिमेट जोडि आयमट्ट. बारित्ते नीतितद आनि नीति हिल्वद इव बल्हा कलिया परांतां? वेल्गु आनि हीकट बल्हा दंटा आया पर्रता? आया पर्रो.

15 किरिस्तु आनि देय्यम उंदि बल्हा आया परांतुर? विस्वासिक अविस्वासिनतोनि बता पोत्तु?

16 बोम्मांक, पेनदा गुळिकु बाता संबंदम? बारित्ते मनम अय्ते जीवाते मनना पेनदा गुळि आंदुम. पेनदा दर्मसास्त्रमते, “नना ओरा लोप्पो मनंतन, ओरतोनि तिरियंतन, नना ओरा पेन आसि मनंतन, ओर नावा लोकुलक आयानुर,” इंचि रासि मंता.

17 पेन इल्हागुडा इंता गदा, “विस्वासम कियवोरगटाल पेय्सट, अलग आम्ट, सापसुतरा हिल्वा वस्तुकुन इटमट, अस्के नना मीकुन ओप्कुंतन.

18 नना मीवा बाबान आकन, मिमेट नावा मर्क-मियाहक आकिट इल्हा पेदूदा सक्तिमंतुड पेन इंता,” इंचिगुडा रासि मंता.

7

1 पावरमगल्लोरिता! पेन हीता इव पोल्लें मनकगुडा दोर्किसे मंतां, अदुनहाटीं मनम मना मेंदुलक, आत्माक अंटिस मत्ता मुर्किंतुन नोर्सि साप कीकोम, पेनदुक वेरियसि पूरा पवित्र आसेके दाकोम.

2 मीवा मनसुने मावाहाटीं जेगा हीमट्ट. मोमोट बोनतोने अन्यायम किया हिल्लोम, बोने बोंकिच्चा हिल्लोम, बोनाहेंदाल गलत पायदा एता हिल्लोम.

3 नना इल्हा इंचि बतल मीवापोर्रीं तप्पु दोस्सेक हिल्लेन. मिमेट मावा मनसुने मंतिट, मोमोट हाथिना, पिस्सिना मीवातोने मनंतोम इंचि नना मुन्नेने वेहतन.

4 नना मीवातोनि बतले मक्किचाकोटा वेहासेक मंतन, नाक मीपोर्रो एक्को पेद्दिदकेम मंता. नना सांतिते निडतन. मावा अन्नि तकलिपकुनेगुडा नना वेल्ले कुसिते मंतन.

पौलुस कूस आयमळ

5 मोमोट मेसिडोनिया एरियाते वातस्केगुडा मावा मेंदुलुकु सुकम दोर्काहिल्ले, गानि नालुं मूलानाल तकलिपके-तकलिपकु मनुंदु, पलाताल जगडालक आनि लोप्पोटाल वेंरेंते निडिसि मत्तोम.

6 अयना गानि कमजोर मत्तोर्कुंक दैरनेम हिथ्याना पेन तीतुन महगा लोहचि माक दैरनेम हीता.

7 सिराप ओर वाताहेंकेन आयो गानि मीहेंदाल ओनकु दोर्कता आ दैरनेमता हेंदालगुडा. ओर नावापोर्रो मत्ता मीवा इच्छाना बारेमते, दुक्कमता बारेमते, जोसता बारेमते वेहतोर. अदुनहाटी नना इंका एक्को आनंदमते मंतन.

8 नना सिट्टि रासि मीकुन दुक्कमते अरहतन. मुन्ने ननागुडा दुक्कमते मत्तन गानि इंदके हिल्लेन, अद दुक्कम गळसेमताहाटीगे मत्ता.

9 इंदके नना आनंदमते मंतन, मीकुन दुक्कमते अरहतन इंचि आयो, गानि मीवा दुक्कमता हेंदाल मिमेट मनसु मार्सकुत्तिर इंचि. इवन्नि पेनदा इच्छा मत्तापे आतां इंचि मीक माहेंदाल बतले नुकसान आयाहिल्ले.

10 बारित्ते पेनदाहेंदाल वायाना दुक्कम, मनसु मार्सकुनागोटसि मुक्तिताहेके ओता, ई दुक्कमते नाराज हिल्ले. गानि ई दुनियाता दुक्कम हामुरताहेके ओता.

11 निजम हळते, पेनदाहेंदाल वाता दुक्कम बक्तिते मनालय मीकुन बच्चोनो बदलांचता. मीलोप्पो बच्चोनो जोस, सत्तेमतोरम इंचि हुपुसमळ, अन्यायमता विरोद कियमळ, वेंरेंते मनमळ, नाकु कलियानाहाटी मीवा जीवा बागाने तन्लाळमळ, सेवाता इच्छा, तप्पु कीतोन सिक्सा कियमळ. इवन्नि पोल्लेने मीलोप्पो तप्पु हिल्ले इंचि मिमेट निजम कीसि हुपिस्तिर.

12 नना मुन्ने लोहता सिट्टिते, बोर तप्पु कीतोर? बोन्क अन्यायम जर्गता? इंचि ईराहाटी रासा हिल्लेन. गानि पेनदा मुन्ने मिमेट माकुन बच्चोन बेस हळकुत्तिर इद मीक तेळियागोम इंचि रासि मत्तन.

13 अदुनहाटी माक सांति दोर्कता. मीवा अंटोराहेंदाल तीतुना जीवा कूस आसि आनंदम आतोर. ओना आनंदम हळसि मोमोटगुडा वेल्लेने आनंदम आतोम.

14 नना ओनतोनि मीवा बारेमते पेद्दिदकेम वेहकुत्तन. मोमोट मीक वेहतव अन्नि पोल्लें निजमे आंदुं, अदुनहाटी तीतुना मुन्ने नावा पेद्दिदकेम निजम कीसि हुपिस्तिर, नाकुन सिग्गु होननाल किया हिल्लिर.

15 मिमेट अंटोर तीतु वेहताप नावा आदेसतुन केंजतिर, वेंरेंते, कदर हीसि ओनकु कलियतिर. इद मति वातस्के मुन्नेटकन्ना इंका एक्को ओना पावरम मीवाहाटी बेसता.

16 अन्नि पोल्लेने मीपोर्रो नाक बरोसा मंता, इद नावाहाटी कुसिता पोल्ले आंद.

8

गरिब विस्वासुलक एक्को दानम कियमळ

1 विस्वासुलकुनिटा! मेसिडोनिया एरियाता कलिसियातोर्कुंक पेन कीता कुर्पाता बारेमते मीक वेहसेक मंतोम.

2 अद बल्हा इत्ते, ओरापोर्रो वेल्लेने तकलिपकुना परिकसां वातां, ओर वेल्लेने कूस आनि गरिब आसि मत्तुर. अयना गानि लोकुलकुंक हिथ्याना सहायम वेल्लेन बेसता.

3 ओरा बारेमते ना गवाइ इदे गदा, ओर बच्चोर हिथ्या पर्तुर अचोने आयो गानि, दानकन्ना एक्को कुसिते हीतुर.

4 पेनदा लोकुलकुन सहायम कियाना सेवाते माकुनगुडा कलियालय दया कीम्टु इंचि ओर मावातोनि ऊके-ऊके वेल्ले विनंति कीतुर.

5 मोमोट आसे पळसि मत्ता दानकन्ना एक्को ओर कीतुर. ओरा पिस्वरंता पेनदाहाटी हीतुर, आनि पेनदा इच्छा मत्ताप मावाहाटीगुडा हीतुर.

6 इल्हा सहायम कियमळ मुन्ने तीतुए मीलोप्पो सुस्व कीतोर, अयते अदुन महना कबळगुडा किथ्यिर इंचि ओन विनंति कीतोम.

7 मिमेट विस्वासमते, पोल्लेने, तेल्चिते, अन्नि तीस्कुने कोसिस कियमळते आनि मावा पोरो मिमेट कियाना पावरमते बेसक मंतिट. अल्हेने दानम कियाना कबळतेगुडा बेसक होंदना.

8 नना मीक आदेस हीसेक हिल्लेन, गानि कळमता विस्वासुलक इद कबळते उसारते मंतुर, ओराच्चोन मिमेटगुडा निजम पावरम कीसेक मंतिरा इंचि परिकसा कीसि हळसेक मंतन.

9 मना सामि येसु किरिस्तुना कुर्पा बच्चोर पेद्दादि मीक एरपाटे मंता. ओनगा अन्नि मंचिगुडा मीवाहाटी गरिब आतोर. ओना गरिबतनमताहेंदाल मिमेट दनवंतुलक आयना इंचि ओर अल्हा आतोर.

10-11 इगे नना वेहाना पोल्ले इदे गदा, नीरिटाल कोत्तां जमा कीसि हियमळ मोदाला मिमेटे सुस्व कीतिर, अद कबाटुन महमळ मीक बेस मनंता. बारित्ते, कोत्तां जमा कियाना इंचि बल्हा अयते मीवा इच्छा मत्ता, अल्हा मिमेट हिथ्या पर्तचो जमा कीसि अद कबाटुन पूरा कीम्टु.

12 कोत्तां हिथ्याना इंचि मीवा इच्छा मत्ते, मिमेट बच्चोन हीतिट, अद पोल्ले आयो गानि, मिमेट पूरा मनसुनाल हीते पेन अदुन ओप्कुंता.

13 इंकावरोना बर्वुन अल्लकगा कियानाहाटी मिमेट बर्वु कांजना इंचि नना इंचेक हिल्लेन गानि इव्वुर समानम मंदना.

14 इंदकेटा वेलाते मिहगा अन्नि मंता, अयते हिल्वोरा अक्सराल्कुने कबळक वायमळ गावाले. पजा उंदि वेला मिहगा हिल्वस्के ओर मीवा अक्सराल्कुने कबळक वायमळ गावाले, इल्हा इव्वुरगुडा समानम आतिर.

15 इदुना बारेमते दर्मसास्त्रमते,

“वेल्ले जमा कीतोनगा, वेल्ले मिग्ला हिल्लें,
तक्को जमा कीतोनगा, तक्को होन्ना हिल्लें,”

इंचि रासि मंता.

तीतु आनि ओना दंटातुर

16 मी बारेमते ना मनसुने मत्ता इच्चातुन, पेन तीतुना मनसुनेगुडा पुटिस्ता. अदुनहाटीं पेनदुक नना दन्यवाद कीतन.

17 मोमोट तीतुन मीहेके लोहालय विनंति कीतस्के ओर अद पोल्लेतुन ओप्कुचि कुद कुसिते मिहगा वायालय तयार आतोर.

18 अल्हेने तीतुनतोनि अन्नि कलिसियाने बेसता कबुरतुन वेहालय पोरोल पेयसतोर वरोर दादनगुडा लोहसेक मंतोम.

19 अचोने आयाका, इद चंदातुन मोमोट येस्सलेम ओयानेके ओन मातोनि लोहना इंचि कलिसियातोर पेरतुर. मोमोट सामिना महिमाताहाटीं आनि मावा सहायम कियाना जिद दिस्सनाहाटीं इद चंदा ओसेक मंतोम.

20 ई जमा कीता चंदाता जिम्मेदारि मावा पोरो मत्ताहाटीं, माकुन बोरे तप्पु इनामन्नि इंचि उसारते ताकसेक मंतोम.

21 सिराप पेनदा मुन्नेने तप्पु हिल्वाप आयो, गानि मनकालोरा मुन्नेगुडा तप्पु हिल्वाप मंतोम.

22 अल्हेने ओरतोनि मोमोट इंकावरोन मना दादन लोहासेक मंतोम. आ दादन मोमोट बच्चुंगो मल्कां परिक्सा कीसि हळतोम, ओर वेल्लेने पोल्लेने बेस मंतोर. ओर मीवापोरो वेल्लेने बरोसा कीताहाटीं, मीक इंका वेल्लेने सहाय्यम कियाना ओना इच्चा मंता.

23 ओक्कला बोरेन्ना तीतु बोरे आंदुर? इंचि पूसकीते, ओर नावा दंटातोर, नावातोनि कलियसि मीवा सेवा कियानोर आंदुर, इंचि वेहट. इंका विस्वासि दादालोरा बारेमते पूसकीते, ओर कलिसियातोर लोहचीतोर आनि किरिस्तुना कदरगल्लोर आंदुर, इंचि वेहट.

24 अदुनहाटीं मिमेट ओर्कुन बच्चोन पावरम कीतिट इंचि कलिसियाता मुन्ने हुप्सट, अल्हेने मीवा बारेमते मोमोट पेद्दिरकेम वेहकुत्तद निजम कीसि ओर्कु हुप्सट.

9

कुसिते दानम हियाना इंचि पौलुस वेहमळ

1 इंदके यहुदिया राज्येमता पेनदा लोकुल्लकुनाहाटीं कियाना ई सेवाता बारेमते मीक रासाना अक्सरम हिल्ले.

2 बारित्ते सहाय्यम कियालय मिमेट बस्केळक तयार मनंतरि नाक एरपाटे मंता. नना मीवा बारेमते, अकाया एरियाता लोकुल्लक उंदि वर्साताल चंदा हियालय तयार मंतुर इंचि मेसिडोनियाता लोकुल्लकुंके पेद्दिरकेमते वेहुंदुन. इद केंजसि वेल्लेटुर लोकुल्लक चंदा हियालय तयार आतुर.

3 नना मीवा बारेमते पेद्दिरकेम वेहता पोल्लें एर्तम आयामन्नि इंचि ई दादालोर्कुन लोहसेक मंतन, नना वेहतापे मिमेट चंदा तयार कीसि इर्ट.

4 मिमेट अल्हा तयार कीसि इर्कोटे, मेसिडोनियातोर बोरेन्ना नावातोनि वासि तयार हिल्वद हळते, मीवापोरो बरोसा कीताहाटीं मावा सिग्गु होनना वेला वायार. मीवदगुडा सिग्गु दांता इनमळ अक्सरम हिल्ले.

5 अदुनहाटीं मिमेट चंदा हीतोम इंचि मोदाले पोल्ले हीसि मत्तिर. अयते आ चंदा मिमेट तयार कीसि इर्गट इंचि बतिमलाडालय ई दादालोर्कुन मुन्नेने मिहगा लोहमळ नना अक्सरम इनकुत्तन. ओर वाता पजा जबरदस्तिते आयो गानि, मीवा मनसुनाल हियमळ गावाले.

6 इद पोल्ले मति इर्गट: इच्चुन वीततोर इच्चुने पंटा कोय्यंतोर, वेल्ले वीततोर वेल्लेने पंटा कोय्यंतोर.

7 अदुनहाटीं गुल्गामन्नि, जबरदस्ति कियामन्नि हरेक मनकल बल्हा हीतन इंचि विचारम कीतोरो, अल्हेने हिथ्याना. अल्हा आनंदमते हियानोन पेन पावरम कीता.

8 मिमेट अन्नि बेसता कबाहक कियालय, मीक अक्सरम मत्तव अन्नि मिहगा बस्केळक मंदालय, पेन दाना दयाते अव अन्निन हिया परांता.

9 इदुना बारेमते दर्मसास्त्रमते,

“ओर गरिबोर्कुंक अन्समन्स कियाका हीतोर,
ओना नीति बस्केळक निल्सि मनंता,”✧

इंचि रासि मंता.

10 अदुनहाटीं वीतानोंकु पेन विज्जां हीता, तिनालय तिंडि हीता. अद मीक वेल्ले विज्जां हीतस्के मीवा नीतिता पलम बेरसंता.

11 मिमेट बस्केळक अन्समन्स कियाकोटा हियालय पेन मीकुन अन्निटकुने गट्टेगा कीता. अल्हेने मिमेट मावा कयदे चंदा लोहतित इंचि वेल्लेटुर पेनदुक दन्यवाद कियानुर.

12 मिमेट कियाना सहायमता सेवाहेंदाल पेनदा लोकुल्लकुना अक्सराल्क पूरा आंतां, अचोने आयाका ओराहेंदाल पेनदुक वेल्ले दन्यवाद आसेक मनंता.

13 बारित्ते मिमेट इद सेवा कीसि, किरिस्तुना बेसता कबुरतुन ओप्कुचि अद मत्ताप ताकसेक मंतिर. अचोने आयाका पेनदा लोकुल्लकुंक, वेरे अंतोर्कुंक मीवा मनसुनाल सहायम कीसेक मंतिट. इदुन हळसि ओर पेनदा महिमा कीतुर.

- 14 मीवापोर्रो पेनदा कुर्पा वेल्लेने मंता, अदुनहाटीं ओर मीकुन हळना इंचि तनलाळसेके ओर मीवाहाटीं वेल्लेने पावरमते पारतना कीतुर.
15 पेन हीता वेहा परवच्चो वरमताहाटीं दानकु दन्यवाद आयि.

10

पौलुस ओना सेवाता बारेमते वेहमळ

- 1 नना पौलुसुन, मीवातोनि मननेके सिन्नागासि मनंतन, गानि लक्कु मननेके वेंरे हिलाकोटा मनंतन इंचि इच्चुर इंतुर. नना मीकु किरिस्तुना सादा-सिपल आनि मेत्तटा गुनमता हेंदाल विनंति कीसेक मंतन,
2 नना वातारिते बोर अयते माकुन, “दुनियातोरालेसीं ताकसेक मंतुर” इंचि इनकुंतुर, ओरतोनि नाक कडक वळकाना वेला वायामान्नि इंचि विनंति कीसेक मंतन.
3 निजमे, मोमोट दुनियातोरालेसीं मंतोम, गानि दुनियातोरालेसीं लडाइ किय्योम.
4 मोमोट लडाइ कियाना विसें दुनियातोरसंतव आयो, गानि किल्लान कूलाहनाहाटीं पेनदाहेंदाल ताकततव आंदुं.
5 इवुनाहेंदाल मोमोट पेनदुन एरपाट कियालय बतां अयते आपंतां, अवुन अन्नि नासडेम कीतोम, ओरां अन्नि विचारालकुन मिळाहचि किरिस्तुना इच्चा मत्ताप ताकानाल कीतोम.
6 मिमेट किरिस्तुना पोल्लेते पुरागा ताकालय आतस्के, किरिस्तुना पोल्लेते केंजवोर अंतोर्कुन मोमोट सिक्सा हियालय तयार मंतोम.
7 मिमेट सिराप मुन्ने मत्तवुन मीवा कळकुने हळसेक मंतिट. मीक गिंगा बोर्कन्ना ओनद-ओन्क नना किरिस्तुनोन आंदुन इंचि बरोसा मनानयते बल्हा ओर किरिस्तुनोर आंदुर, अल्हेने मोमोटगुडा किरिस्तुनोर्कुम आंदुम इंचि ओन्क तेळियगोम
8 मीकुन नासडेम कियालय आयो गानि, मीकुन बेर्सागोटालय सामि माक अदिकारम हीतोर इंचि नना इंकागुडा पेद्दिदरेकम वेहकुनिना नाक सिग्गु हिल्ले.
9 नना बारि वेहसेक इत्ते, नावा सिट्टिना हेंदाल नना मीकुन वेराहसेक मंतन इंचि मीक अनपिच्चमन्नि.
10 बारित्ते, “ओर सिट्टिने अयते मजबुत आनि कडक पोल्लें रासंतोर, गानि मेंदुलते कमजोर मंतोर, पोल्लेंगुडा बेस पेय्सो,” इंचि इच्चुर इंतुर.
11 अल्हा इनानोर्क इद पोल्लेते तेळियि: मोमोट हिल्वस्के सिट्टिने बल्हा रासि वळकंतोमो अल्हेने मोमोट मीवातोनि मत्तस्के ताकंतोमगुडा.
12 बोर-बोर अयते ओरद-ओरे पेद्दातनम वेहकुंतुर, गानि मोमोट ओरालेसीं वेहकुन्नोम, ओरा लोप्पो तुलना किय्योम. ओर वरोनद वरोर कहकुंचेके मंतुर, वरोनद-वरोर तुलना कीकुंचेके मंतुर. इद पेद्दा मुर्कतनम आंद.
13 मोमोट अयते मावा अदिकारता पलाते बस्केने होन्नोम, गानि पेन माक हीता गेट्टुना लोप्पोने मंचि मोमोट पेद्दिदरेकम कीतोम. इदे गेट्टुन लोप्पो मिमेट मंतिर.
14 मोमोटे मोदाला मिहगा किरिस्तुना बेसता कबुर तत्तोम. अदुनहाटीं मोमोट पेन हीता सेवातुन गेट्टुना लोप्पोने मंचि पेद्दिदरेकम कीतोम.
15 वेंरेतोर कीता कबळतुन मोमोटे कीतोम इंचि पेद्दिदरेकम किय्योम. बल्हा-बल्हा मीवा विस्वासम बेर्सेके दांता, अल्हा-अल्हा मावा सेवा मना गेट्टुना लोप्पोने मीवाहाटीं पैलांचेके दांता इंचि आसे मंता.
16 इंकावरोर कबळ कीता एरियाते होंचि पेद्दिदरेकम कियाका, मोमोट बोरे होनवा एरियाते होंचि बेसता कबुर वेहंतोम.
17 गानि दर्मसास्त्रमते, “बोर अयते पेद्दिदरेकम कीतोर, ओर सामि कीता कबळतुन पीसे पेद्दिदरेकम किय्यिर,”* इंचि रासि मंता.
18 बोर अयते ओनद-ओरे मेचकुंतोर ओर कबळतोर आयोर, गानि सामि बोनयते मेचकुंतोर ओर कबळतोर आंदुर.

11

पौलुस आनि आबद्दम वेहाना प्रेरितुल्क

- 1 नना इच्चुर बुद्दि हिल्वोनलेसीं वळिकना गानि नाकुन ओर्सकुंतुर, अल्हेने मिमेट नाकुन ओर्सकुंचेकेन मंतिट.
2 मीवा बारेमते नना आसेते मंतन, इद आसे नावा लोप्पो पेनदाहेंदाले मंता. बारित्ते ओना वरोरे मंदना मांडसाता कय्दे हियालय, मरमिं आयवा पवित्र लेय्याटालेसीं मीकुन किरिस्तुना कय्दे अप्पजेप्पना इंचि नाक मंता.
3 गानि तरास चालाकिते हव्वान पसांचतापे, किरिस्तुनोनि इमानदार, पवित्र मंदना मीवा मनसुनगुडा लक्कु किय्यार इंचि नना वेरियंतन.
4 बारित्ते बोरन्नागिंगा मिहगा वासि, मोमोट वेहवासोंटा वेंरे येसुना पोल्ले मीक वेहते, हिलाकोटें बदन्ना मुन्ने मिहगा हिल्वसोंटा आत्मा दोर्कते, हिलाकोटें इंका बदन्ना मुन्ने मिमेट ओप्कुन्वसोंटा बेसता कबुर वाते, अदुन मिमेट कुसिते ओप्कुंतुर.
5 नना पेद्दा-पेद्दा प्रेरितुल्कुकन्ना सिन्नोन इंचि इनकुंचेक हिल्लेन.
6 नना वळकमळते कमजोर मनिनागानि तेल्विते हिल्लेन. इदुन मोमोट अन्नि पोल्लेने, अन्नि तीस्कुने मीक हुपिस्तोम.
7 मीक पेनदा बेसता कबुर पुक्कटते वेहतन, मीक पेद्दातनम वायागोम इंचि, नावद नना सिन्नातनम कीकुत्तन, इद बतल पापम कीताना?
8 मीवा सेवा कियालय नना वेंरे कलिसियानाहेंदाल मदत एतसि ओर्कुन लुटांचतन.

* 10:17 यिर्मयाह 9:24; 1 कुरेंति 1:31

9 नना मिहगा मत्तस्के, नावा अब्सराल्कुन पूरा कियालय बोनपोर्रो बर्वु आसि मना हिल्लेन. मेसिडोनिया एरियाताल वाता विस्वासि दादालोर नावा अब्सराल्कुन पूरा कीतुर. इदवेरादाका नना बदे पोल्लेते मीपोर्रो बर्वु आया हिल्लेन, इंका मुन्नेगुडा आयोन.

10 किरिस्तुना सत्तेम नावा लोप्पो मंता, अदुनहाटी अकाया एरियातोर बोरे नावा इद पेद्दिरकेमतुन विरोद किया पर्स्.

11 नना मिहगाटाल मदत एता हिल्लेन इत्ते, मीपोर्रो नाक पावरम हिल्ले इत्तापा बतल? असले आयो! मीकुन नना बच्चोन पावरम कीतन अद पेनदुक एपाट.

12 ओर बतल्यते कीसेक मंतुर अदे कबळ मोमोट कीसेक मंतोम इंचि बोर अयते पेद्दिरकेम वेहकुंचेके मंतुर, ओर्कुन कमजोर कियानाहाटी नना बतल्यते कीतन, अदे कीसेक मंतन.

13 बारित्ते इसोटा लोकुल्क आबद्दम प्रेरितुल्क आंदुर. ओर आबद्दम वळकंतुर, ओर इंकावरोन पसांचना कबळ कीतुर, ओर किरिस्तुना प्रेरितुल्कुनालेसी मंतन.

14 इवने इंचंत्रम बतल हिल्ले, देय्यमगुडा वेल्गु हिय्याना पेनदा दूतालेसी आंता.

15 अदुनहाटी देय्यमता सेवाकुल्कगुडा सत्तेमते ताकाना सेवाकुल्कुनलेसी मारियते इद पेद्दा पोल्ले आयो, गानि आकिरते ओर कियाना कबळता इसाबते सिक्सा आयार.

पौलुस किरिस्तुना प्रेरित आताहाटी तकलिप अरमळ

16 नना मर्रा वेहसेक मंतन, नाकुन बोरे मूर्कुड इनकुनमट्ट, मिमेटगिंटा नाकुन मूर्कुडे इनकुनानयते बतल आयो, अल्हेने ओप्कुंट्ट, इदुनहेंदाल नाकगुडा इच्चुर पेद्दिरकेम कियालय दोकार.

17 नना इंदके वेहना पोल्ले सामिना विचारम मत्ताप आयो, गानि वरोर मूर्कुड वेहताप वेहासेक मंतन.

18 वेल्लेदुर लोकुल्क ओर कीता पोल्लेन पोरोटाल पेद्दिरकेम वेहकुंतुर, ननागुडा अल्हेने वेहकुंतन.

19 मिमेट अयते बुद्दि मत्तोर आंदिर, अदुनहाटीगे बुद्दि हिल्वोरा पोल्लेन कुसिते ओर्सकुंचेके मंतर.

20 अचोने आयाका, ओर मीकुन गुलाम कियिना, लुटांचना, मीवा पायदा येताना, ओरद-ओरे पेद्दा कीकुन्निना, मीकुन सेंपापोर्रो तनिना इवन्नि मिमेट ओर्सकुंचेके मंतर.

21 नाक सिग्गु वायाना पोल्ले बतल इत्ते, ओर कीताप मोमोट किया हिल्लोम. गानि बोरे आयिर पेद्दिरकेम कियालय दैरनेम कीते, ननागुडा मूर्कुनालेसी दैरनेमते पेद्दिरकेम कीतन.

22 ओरद-ओर इब्रि जातितोर्कुम इंचि इंतुर, ननागुडा इब्रि जातितोने. ओर इस्राएल मनकालोर्कुम इंतुर, ननागुडा इस्राएल मनकने. ओर अब्राहामुना वंसमतोर्कुम इंतुर, ननागुडा अब्राहामुना वंसमतोने.

23 ओर किरिस्तुना सेवाकुल्क आंदुरा? नना ओर्कन्ना एक्को किरिस्तुना सेवा कियानोन आंदुन इंचि पिस्सनलेसी इंचेके मंतन. ओर्कन्ना एक्को कस्टम कीतन, ऊके-ऊके जेलुंक होनुंदुन, देब्बां तिनुंदुन, बच्चुंगो मल्कां हायाना वेला वासि मत्ता.

24 नना हेय्युं मल्कां यहुदिल्लकुना कय्दे मुप्पे तोम्मिद पोट्टे देब्बां तित्तन.

25 मूड मल्कां नाकुन दुड्डुने तंतुर, उंदि मल्का बंडाने तंतुर, मूड मल्कां नावा पय्येमते डोंगां पैतां, उंदि मल्का नर्का-पल्लिंहं पिय्यल-पोळ्दु समुद्रमते मत्तन.

26 ऊके-ऊके पय्येमते होनुंदुन. बेरहकुना दोका, दोंगाल्कुना दोका, नावा लोकुल्कुनाहेंदाल दोका, वेरे जातितोरहेंदाल दोका, सहरते दोका, बय्लि जेगाते दोका, समुद्रमते दोका, विस्वासुल्कुम इंचि नळेह कियाना मनकालोर्कुना हेंदालगुडा नाक दोका मत्ता.

27 नना मेहनतते, कस्टमते मत्तन. बच्चुंगो मल्कां निद्र हिलाकोटा मनमळते, कर्वुने-दूपाते, उपासम, पीनिते मत्तन, कपडिंह हिलाका मत्तन.

28 इच्चोरे आयाका, अन्नि कलिसियाना पिकिर नाकुन रोज परेसान कीसेक मनुंदु.

29 बोर्न्ना विस्वासि विस्वासमते कमजोर आते, ननागुडा कमजोर आताप नाक अनपिच्चोना? बोर्न्ना मनकल इंकावरोन विस्वासमताल अरहानयते नाक होंग वायोना?

30 नाकु गिंटा पेद्दिरकेम कियाना मत्ते, नना किया पर्स्वा कबाहकुना बारेमते पेद्दिरकेम कीतन.

31 नना वळकानद आबद्दम आयो इंचि सामि येसुना पेनबाबांकर एपाटे मंता. ओन्क बस्केळक दन्यवाद आयि.

32 नना दमिस्क सहरते मत्तस्के, अरितास राजाना हेंदाल ओना राज्यपाल नाकुन पियालय सहरते पहारा कीसेक मत्तोर.

33 गानि अस्के नाकुन इच्चुर उंदि तट्टाते उप्पिचि गूरेता किळकिताल हब्बेर रेहतुर. इल्हा नना ओना कय्दाल पिस्तन.

12

पौलुसना दर्सनाल्क

1 नना पेद्दिरकेम कीते नाक बतल पायदा दोर्को, गानि पेद्दिरकेम किया पीसेक मंता. सामि नाक हीता दर्सनम आनि हुपिस्ता मर्ममता पोल्लेन बारेमते वेहंतन.

2 किरिस्तुन विस्वासम कीतोर वरोर मनकल नाक एरपाट. पडनालुं वर्साना मुन्ने पेन ओन मूडो स्वर्गमदाका पीसि ओता. अस्के ओर मेंदुल्ले मत्तोर, मना हिल्लोरा नाक तेळियो. पेनदुके तेळियंता.

3-4 आ मनकल मेंदुल्ले मत्तोर, मना हिल्लोरा? अद नाक तेळियो, पेनदुके तेळियंता. गानि इच्चोर एरपाट गदा, ओन पेन सुकमता जेगाते ओता. मनकंक वेहालय अदिकारम हिल्वसोटव पोल्लें अगा ओर केंजतोर.

5 इसोटा मनकना बारेमते नना पेदिदरकेम वेहकुंतन. गानि ना बारेमते नावा कमजोरिन तप्पा, इंका बवे पोल्लेन बारेमते पेदिदरकेम वेहोन.

6 नना पेदिदरकेम वेहतेगुडा, निजम वेहताहाटीं नाकुन मूर्कुड इनावायो. गानि नना अल्हा वेहोन. बारित्ते नना कीता कबाहकुन हळता दानकन्ना आनि वेहता पोल्लेन केंजता दानकन्ना एक्को मान नाक हिथ्यामन्नि.

7 नाक हृपिस्ता मर्ममता पोल्लें वेल्लेने मत्ताहाटीं नावा लोप्पो पेदिदरकेम वायामन्नि इंचि पेन नावा मेंदुल्ले उंदि हापु इरता. अद नाकुन दबांचि इरालय देय्यमता दूतालेसीं कोहकसेके मंनता.

8 अद हापु नहागटाल तैडा इंचि, मूड मल्कां सामिन विनंति कीतन.

9 गानि सामि नाकुन, “नावा कुर्पा नीकु सालांता, बारित्ते निमे कमजोर मत्तस्केन नावा ताकत कबळ कीता,” इंचि जवाब हीतोर. अदुनहाटीं नना कमजोर मत्तस्के किरिस्तुना ताकत नाकु तोळ आयागोम इंचि वेल्लेने कुसिते पेदिदरकेम कीसेक मंतन.

10 नना कमजोर आतस्केने, किरिस्तुना लोप्पो गट्टिगा मंनंतन. अदुनहाटीं कमजोर आयिना, अपमानम आयिना, कस्टम आयिना, सताव आयिना आनि आपत्ति वायिना नना कुसिते मंनंतन.

कुरैतिता कलिसियाताहाटीं पौलुसना पिक्किर

11 मीवा बल्मितेन नना मुर्कनलेसीं पेदिदरकेम कीसेक मंतन. नना कदरलायक हिल्लेन आयावच्चु, गानि पेद्दा-पेद्दा प्रेरितुल्लुकुंकेनना बदे पोल्लेते तक्को हिल्लेन, अदुनहाटीं मिमेट नावा पेदिदरकेम क्रिया मत्तिर.

12 मीवा नड्डुम नना ओप्केते मत्तन, नावाहेंदाल चिन्हां, इंचंनमता कबाहक, पेनदा पेद्दा-पेद्दा कबाहक जर्गताहाटीं ननागुडा निजम प्रेरितुने इंचि दिसंता.

13 वेरे कलिसियांकन्ना मिमेट बद पोल्लेते तक्को मत्तिट? सिराप इदे गदा, नना मीपोर्रो बर्बु आसि मना हिल्लेन, इदे नावा तप्पु, नावा तप्पुन मापि कीम्ट.

14 इंदके नना मूडो मल्का मिहगा वायालय तयार मंतन, इंदकेगुडा नना मीपोर्रो बर्बु अरहोन. बारित्ते पिलाल्क तल्लुर-बाबोनहाटीं दनम संपालिच्चुर गानि, तल्लुर-बाबो पिलाल्कुनाहाटीं दनम संपालिच्चंतुर. अदुनहाटीं नाक मीहेंदाल बतल मन्नि, मिमेटे गावाले.

15 नना मीवा आत्माता पायदाताहाटीं नना इरगा कुसिते कर्स कीतन, अवसरम अरते नना कुद्दु कर्स आंतन. नना मीकुन वेल्ले पावरम कीतन इंचि मिमेट नाकुन तक्को पावरम कीतिरा?

16 नना अयते मीपोर्रो बर्बु वाटा हिल्लेन गानि, “पिलान कीसि माकुन बोकिचतोर” इंचि मिमेट नाकुन इना वच्चु.

17 नना मिहगा लोहता लोक्कुल्लुनाल बोरा हेंदालन्ना कपटमते नना पायदा एततना?

18 नना तीतुन मिहगा होन इंचि विनंति कीसि, ओनतोनि वरोर दादानगुडा लोहतन. तीतु कपटमते मीहेंदाल बतलन्ना पायदा एततोर? अल्हा एतोर. नना आनि तीतु इच्चुरोम उंदे आत्माते, उंदे रीतुने ताकंतोम.

19 महगा तप्पु हिल्ले इंचि हृप्सालय इवन्नि मोमोट मीक वेहसेक मंतोम इंचि मिमेट इनकुंचतिर आयावच्चु, गानि आयो. मोमोट अयते पेनदा मुन्ने किरिस्तुना अदिकारमते वळकंतोम. पावरमगल्लोरिता! इवन्नि पोल्लें मीवा विस्वासम बेर्सनाहाटींगे वेहसेक मंतोम.

20 बारित्ते नना मिहगा वातास्के, मिमेट इनकुत्ताप नना मीक दोर्का पर्रीन आयावच्चु इंका नना इनकुत्ताप मिमेट मंदक होननिर. बोर्क एरपाट, मीलोप्पो जगडाल्क, कळक पोतमळ, होंग, सतता पायदा, अपमानम, पेदिदरकेम, चुगलीं, लोल्लिं इसोटावगुडा दिस अरानुं इंचि नना वेरियसेक मंतन.

21 अल्हेने नना मर्रा वाता पजा, इच्चुर विस्वासुल्क कराब कबाहक, बोगमतनम, लंजेतनम इसोटा पापाल्कुनाल मनसु मार्सकुनाकुंटे नाक वेल्ले दुक्कम आथार. अचोने आयाका पेनदा मुन्ने नावा सिग्गु होनना वेला वायारो बतल इंचिगुडा वेरियतन.

13

पौलुसना आकिरता पोल्लें

1-2 नना रोंडो मल्का मिहगा वासि मत्तस्के, पापम क्रियमट इंचि वेहचि मत्तन. इंदके नना मिहागटाल लक्कु मंतन गानि, मर्रा उंदि मल्का अदे पोल्लेतुन नना वायाका मुन्ने मीक वेहसेक मंतन. नना मूडो मल्का वातस्के, बोर अयते मुन्ने पापम कीतुर, इंदकेगुडा कीसेकेने मंतुर ओर्कु, अल्हेने कळमतोर अंतोर्क सिक्सा तप्पो. बारित्ते दर्मसास्त्रमते, “हरेक पोल्लेतुन निजम क्रियालय इच्चुर हिलाकोटे मुच्चुर गवाइदार्कुना अवसरम मंनता,✱” इंचि रासि मंता.

3 किरिस्तुनाहेंदाल वळकंतोर इत्तदुना बारेमते, मिमेट आनवल बतल इंचि पूसकीतिर. किरिस्तु मीहाटीं कमजोरि आयो गानि मीलोप्पो ताकत आसि मंतोर.

✱ 13:1-2 व्यस्ताविवरन 19:15

4 बारित्ते, किरिस्तु कमजोर आसि मत्तस्के ओन क्कुसुनपोर्रो मोल्लां कोहिकिसि वेलाळ वाटतुर, अयना गानि पेनदा ताकतते ओर मर्रा तेदसि जीवाते मंतोर. मोमोटगुडा ओनालेसीगे कमजोर मंतोम, गानि मोमोट मीवाहाटी पेनदा ताकतते किरिस्तुनतोनि जीवाते मनंतोम.

5 मिमेट नाकुन परिक्सा कीसि ह्ळना दानकन्ना, मिमेट विस्वासमते मंतरा हिल्लिरा, मीवद-मिमेट परिक्सा कीसि हुळाट. अस्के येसु किरिस्तु मीलोप्पो मंतोर इंचि अनपिच्चोना? अल्हा अनपिच्चाकोटे मिमेट ओना लोकुल्क आयिर इनकुंटु.

6 नावा आसे मंता, मिमेट परिक्सा कीसि ह्ळते, मोमोट निजमे किरिस्तुना प्रेरितुल्कुम इंचि मीक अनपिच्चंता.

7 ओक्काला मोमोट निजम प्रेरितुल्कुनालेसी मीक दिस्साकोन्नागुडा, बतल सत्तेम मंता अदे कियाना इंचि मीहाटी पेनदुक पारतना कीसेक मंतोम.

8 मिमेट सत्तेमते ताकते दानकु विरोद मोमोट किय्योम, गानि सत्तेमताहाटीगे सहायम कीतोम.

9 मोमोट कमजोर मत्तोरालेसी दिस्साना गानि बतल आयो, मिमेट ताकतते मत्ते माक आनंदम आंता. इल्हा मिमेट ताकतते बेसेक होंदना इंचि, मोमोट पारतना कीसेक मंतोम.

10 अदुनहाटी सामि मीकुन नासडेम कियालय आयो गानि, गट्टिगा निलाहलय नाक अदिकारम हीतोर. नना मिहगा वातस्के नावा अदिकारमते मीतोनि कडक वळकना वेला वायामान्नि इंचि, मिहागटाल लक्कु मनेकेने इव पोल्लें रासेक मंतन.

11 विस्वासुल्कुनिटा! नना आकिरते वेहानद इदे गदा, कुसिते मंट. मीवा गुनम बेस इर्राट, वरोंक-वरोर दैरनेम हीम्ट, उंदि मनसुने मंट, सांतिते मंट, अस्के पावरम आनि सांति हियाना पेन मीवातोनि मनंता.

12 मिमेट वरोंक-वरोर कलियतस्के पवित्र पावरमते जोहार कीम्टु.

13 इगोटा पवित्र लोकुल्क अंटोर मीकु जोहर वेहासेक मंतुर.

14 सामि येसु किरिस्तुना कुर्पा, पेनदा पावरम आनि पवित्र आत्माता तोळ मी अंटोरतोनि मन्निकांटी.

गलातिया गलातिया विस्वासुल्लुकुक पौलसना सिट्टि

इद सिट्टिता बारेमते गिचचो परिचयम

रासतोना पोरोल: पौलस

रासता कालम: इसवि सन 48-55

इद सिट्टि गलातिया इनना एरियाते मनना विस्वासुल्लुकुक पौलस रासतोर. इद एरिया दक्खिन आसियाते वांता. इद सिट्टि पौलस गलातियाते मनना विस्वासुल्लुकुक बारि रासतोर इत्ते, अगाटा विस्वासुल्लुकुक तप्पुड बोदां केंजसि निजम विस्वासमताल लक्कु आतुर. ओर्कुन मर्रा निजम विस्वासमते तरानाहाटी पौलस इद सिट्टि रासतोर.

पौलसुन प्रेरित इंचि बोर मनकालोर पेरा हिल्लुर गानि कुद्दु पेने ओन येसु किरिस्तुना कबळहाटीं पेरता. पौलसना उद्देसमगुडा यहुदि आयवोर लोप्पो होंचि किरिस्तुना बारेमता बेसता कबुर वेहनद मत्ता.

इद सिट्टिते पौलस इंका इल्हा रासतोर गदा, दुनियातोर अंतोर पापम कीसि पेनदा पावरमताल लक्कु आतुर. गानि येसु किरिस्तुनपोरो विस्वासम कीसि मर्रा पेनदुक दग्गेरा आयावच्चु. येसु किरिस्तुन पोरोटा विस्वासमहेंदाल पेनदा पावरम मनकंक दोर्कता. दीनहेंदाल ओरा कबाहकगुडा बेस जर्गतां.

बगा बतल मंता

जोहार आनि परिचयम 1:1-10

पौलस प्रेरित आंदुर इंचि रूजुव कीसि हुप्संतोर 1:11-2:21

पेनदा कुर्पाता बारेमता बेसता कबुर 3:1-4:31

विस्वासुल्लुकुना जिम्मेदारि 5:1-6:10

आकिरता बोदां 6:11-18

गलातियाता विस्वासुल्लुकुक पौलसुनहेंदाल जोहार

1 नना येसु किरिस्तुना वरोर प्रेरितुन* आंदुन, नावा पोरोल पौलस. नना प्रेरित इंचि मनकालोराहेंदालो हिलाकोटे बोरो वरोर मनकल नाकुन कीताहेका आया हिल्लेन, गानि कुद्दु येसु किरिस्तु आनि ओन हामुरताल मर्रा जीवाते तेहता आ पेनबाबाले नाकुन केयतोर.

2 इद सिट्टि गलातिया इनना एरियाते मनना कलिसियानोर्क, इत्ते मीवाहाटीगे नना नावातोनि मनना दादालोराहेंदाल रासतन.

3 मना पेनबाबाल आनि मना सामि येसु किरिस्तुनहेंदाल मीकु कुर्पा, सांति दोर्कि.

4 मनम मनना ई पापि दुनियाताल मनाकुन पिसागोटना इंचि मना पेनबाबाना इच्चा मत्ता. अदुनहाटीं येसु किरिस्तु मनाहाटीं ओना जीवा हीसि पेनबाबाना इच्चातुन पूरा कीतोर.

5 दुनियाता लोकुल्लुक युगा-युगाल्लुकुनदाका ओनदे कदर किथ्यिर, आमीन.

निजमाता बेसता कबुर उंदे आंदु

6 बद पेन अय्ते येसु किरिस्तुना कुर्पाहेंदाल मीकुन दग्गेरा कीकुत्ता, असोटा पेनदुन इच्चोन बिराना होळसिसि, बदो वेरे बेसता कबुरतेके तिरियतिर. इदुन केंजसि नाकु वेल्लेन इचंत्रम आसंता.

7 असल निजम बतल इत्ते, वेरे बदे बेसता कबुर हिल्ले. गानि इच्चुर लोकुल्लुक मंतुर ओर मीकुन गयबेत कीसि किरिस्तुना बारेमता बेसता कबुरतुन बदलांचलय हळसंतुर.

8 ओक्कला मोमोट आयि स्वर्गमताल वाता पेनदा दूता आयि, मोमोट मीकु वेहता बेसता कबुर तप्पा इंका वेरे कबुर वेहानय्ते, असंटोर्कुन पेन नासडेम कीसि पोहि.

9 मोमोट मीकु मुन्ने वेहता पोल्लेतुन इंकुदि मल्ला वेहचंतोम बेस केंजट. बोरे आयिर, मिमेट मुन्ने नम्मुता बेसता कबुर तप्पा वेरे कबुरगिंटा वेहानय्ते पेन ओन नासडेम किथ्यि.

10 अय्ते नना इंदके लोकुल्लुक नाकुन मेच्चुकुनगोम इंचि हळसंतना मरि पेनदा आसिर्वाद दोर्कगोम इंचि हळसंतना? हिलाकोटे लोकुल्लुकुन कूस कियानसंटोना? ओक्कला नना लोकुल्लुकुन कूस कियानसंटोन आसि मत्ते किरिस्तुना सेवाकुन आयाकोन्नेन.

पौलस वेहना बेसता कबुर पेनदागटाल वाता

11 विस्वासुल्लुकुनिटा, नावा पोल्ले बेस केंजट! नना वेहता बेसता कबुर मनकनहेंदाल आयो, इद मिमेट मतिते तासकुंदु.

* 1:1 प्रेरित इद पोरोल्लुक "पेन लोहचीतोर" इंचि अर्तम. येसु पन्नेड मंदितुन पेरकुत्तोर ओरे प्रेरितुल्लुक आंदुर.

12 इका इद नाकु बोर मनकालोरहेंदालगुडा दोर्काहिल्ले आनि बोर मनकल नाकु कराह हिल्लोर. इदु नाकु कुद्दु येसु किरिस्ते कुल्ला कीसि वेहतोर.

13 नना यहुदि रिवाजते पिसनेके नावा पिस्वर बल्हा मत्ता मीकु एरपाटे. अस्के नना पेनदा कलिसियातुन इरगा तकलिप कीतन, ओर्कुन नासडेम कियालय बस्केळक ओरा पज्जो अरसि मनुंदुन.

14 यहुदिल्लकुना रीति-रिवाजकुने ताकमळते नना नावा वय्सुनोर्कन्ना उंद अळ्गु मुन्नेन मनुंदुन. नावा तादो-बाबुरहेंदाल दोर्कता रीति-रिवाजकुन पोरो ताकमळ नाकु वेल्लेन इस्टम मत्ता.

15 गानि पेन मात्रम नना यावाना पीटे मननेकेन नाकुन पेरता. पजा दाना कुपांते नाकुन केय्से, दाना मरिं येसु किरिस्तुना बारेमते तेळियागोट्से वेहता.

16 अदुनहाटीं नना यहुदि आयवा लोकुल्लकुन लोप्पो होंचि दाना मरिंना बारेमता बेसता कबुरतुन वेहा परतन. इल्हा जर्गतस्के नना बोरे मनकंक होंचि कलिया हिल्लेन बोने बतल पूसकिया हिल्लेन.

17 नाकन्ना मुन्ने आता प्रेरितुल्लकुं कलियना इंचि येस्सलेमगुडा होना हिल्लेन. दाना बदुल, अस्केटद अस्केन नना अरब इनना देसेम होंचि, पजा दमिस्क सहरतेन मल्लि वातन.

18 पजा मूड वर्सा आतंका नना केपांक† कलियालय येस्सलेम होंचि, ओनतोन पदहेन रोजकु मत्तन.

19 गानि याकोब इनना सामिना तम्मुक तप्पा इका बोरे प्रेरितुं कलिया हिल्लेन.

20 नना पेनदा मुन्ने निल्लि वेहचंतन, बतल अय्ते नना मीकु रासेक मंतन, अव्ते गिचचोगुडा आबद्दम हिल्ले.

21 पजा नना सिरिया, किलिकिया इनना एरियाने होतन.

22 गानि यहुदिया एरियाते मनना कलिसियानोर अय्ते नाकुन बस्केने ह्ळा हिल्लुर.

23 ओर नाकुन एरपाट कियाकोन्ना, “बोर मनकल अय्ते मना लोकुल्लकुन मुन्नेटा कालमते तकलिप कीसि नासडेम कियालय ह्ळुंदुर, ओरे इंदके किरिस्तुना बारेमता बेसता कबुरतुन वेहचंतोर,” इंचि वैरेतोर वळकानेके मात्रम कैजतुर.

24 इल्हा इंचेके ओर नावाहेंदाल पेनदुन तल्सकुनुंदुर.

2

पौलुसना पोल्लेन प्रेरितुल्ल ओप्कुंतुर

1 पजा पडनालुं वर्सा आतंका नना मरिं येस्सलेम होतन. अस्के नातोन बरनाबास मत्तोर. मोमोट होननेके नातोन तीतु इनानोनगुडा पीसि ओतन.*

2 नाकु अगा तप्पाकोटा होनापीता इंचि पेन वेहचि हूपिस्ताहाटीं नना होतन. पेनदाहाटीं नना कीता कस्टम एर्तम आयानायो इंचि यहुदि आयवोर्क नना वेहता बेसता कबुरतुन अगटा लीडर्कुन बाजुंक केय्से ओर्क वेहतन.

3 नातोन मत्ता तीतु युनानि मनकल आंदुर. अयना ओना कतना कियनाहाटीं ओर लीडर्क जबरदस्ति किया हिल्लुर.

4 गानि मावा लोप्पो इचचुर लोकुल्लक विस्वास्लुकुनलेसीं आसि मक्किंस होळियतुर. येसु किरिस्तु माकुन यहुदिल्लकुना नियमाल्लकुना गुलामगिरिताल पलाते पेचाहतदुन चुपचाप ह्ळसि, माकुन मरिं गुलामगिरिते अरहचि नासडेम कियना उद्देसमते ओर वातुर.

5 गानि येसु सामिना बेसता कबुरता सत्तेम बस्केळक मीलोप्पो मनना इंचि मोमोट मात्रम ओरा पोल्लेन असले नम्मा हिल्लोम.

6 अगा मत्ता लीडर्क, नना वेहतव्ते बवे पोल्लें कल्पा हिल्लुर. पेनदा मुन्ने अंतोर समानमे. अदुनहाटीं ओर लोकुल्लक बच्चोर पेद्दोर्क अयना बेसे, नाकु बतल पिकिर हिल्ले.

7-9 गानि कतना आतोर्कुंक बेसता कबुर वेहना जिम्मेदारि पेन पत्रुंक हीतापे, कतना आयवोर्कुंक बेसता कबुर वेहना जिम्मेदारि पेन नाकु हीता, इंचि याकोब, केपाल* आनि योहान ई पोरोल होत्ता पेद्दा मनकालोर तेलपिचकुत्तुर. यहुदिल्लकुनाहाटीं प्रेरित इंचि पेन पत्रुन पेरसि ओन्क बेस हिम्मत हीता. अल्हेन नाकगुडा अदे पेन यहुदि आयवा लोकुल्लकुनाहाटीं प्रेरित इंचि सेवा कियालय हिम्मत हीता. पेन नाकु हीता आसिर्वादतुन मतिते इरसि ओर नाकुन, बरनाबासुन ओप्कुत्तुर. पजा ओर बारे यहुदिल्लकुनगा मोमोट बारे यहुदि आयवा लोकुल्लकुनगा होनना इंचि ओर निरनायम कीतुर.

10 ओर माकु उंदे पोल्ले वेहतुर, अद बतल इत्ते मोमोट अगा होत्तस्के गरिब लोकुल्लकुंक सहायम कियना इंचि. नाकगुडा अदे कबळ कियना आसे मत्ता.

पौलुस पत्रुंक विरोद कीतोर

11 कोन्नि रोजकुंक केपल अंताकिया सहरते वातोर. अगा वातस्के ओर उंदि तप्पु कीतोर. अदुनहाटीं ओर कीतद तप्पु इंचि ओन्क मोकोम मुन्नेन वेहतन.

† 1:18 केपा पत्रुन केपा इंचिगुडा केयुंदुर. * 2:11 प्रेरितुल्लकुना कबाहक 15:2 * 2:7-9 केपाल ई पत्रु आंदुर.

12 असल बतल आता इत्ते, याकोबनगटाल इच्चुर यहुदि विस्वासुल्क केपानगा (पत्रु) वातुर. आ लोकुल्क वायनदाका केपल यहुदि आयवा विस्वासुल्कनुतोन कलियसि तिनुड-उनुळ कियुंदुर. गानि बस्के अयते ओर वातुर, अस्केटाल मात्रम कतना आता लोकुल्कुक वेरियसि, केपल यहुदि आयवा विस्वासुल्कनुनाल लक्कु आतोर.

13 इका ओर कियनद हळसि वेरे यहुदि विस्वासुल्कगुडा अल्हे कियालय दल्गतुर. अचोने आयका बरनाबासगुडा ओरवटेन कलियतोर.

14 पजा ओर बेसता कबुरता सत्तेमतुन एरपाट कीसि ताकसेक हिल्लुर इंचि नाकु तेळियतस्के नना केपन, “निमे यहुदि जातितोन आसिगुडा यहुदिल्कुना रीति-रिवाजकुन पीसि ताकसेक हिल्लिन. असोर्टस्के यहुदि आयवोर्कुन यहुदिल्कुना रीति-रिवाजकुन पीसि ताकालय बारि जबरदास्ति कीसंतिन?” इंचि अंतोर मुन्नेन पूसकीतन.

15 बोर्कुन अयते मना यहुदिल्क पापिर्क इंचि इंतुर आ जातिते मनम पुट्टा हिल्लोम, मनम पुटतस्केटाल यहुदिल्कुमे.

16 अयना मूसाना नियमतुन पीसि ताकते आयो, गानि येसु किरिस्तुन विस्वासम कीतेन वरोर मनकल नीतिमंतुड आंतोर इंचि इंदके मनाकु एरपाट मंता. अदुनहाटीं येसु किरिस्तुन विस्वासम कीताहेका नीतिमंतुल्क आयगोम इत्ता उद्देसमते मनम यहुदिल्क येसुनपोर्रीं विस्वासम कीतोम. बारित्ते मूसाना नियमतुन पीसि ताकतोर बोरे मनकल नीतिमंतुड आयोर.

17 नीतिमंतुल्क आयनाहाटीं नियमाल्कुन पीसि ताकका, मनम किरिस्तुन विस्वासम कीतोम. इंचि इच्चुर यहुदिल्क मनाकुन पापिर्क इंचि इनकुंतुर. इत्ते बतल किरिस्तु पापम क्रिया वेहालय वातोर? अल्हा असले आयो.

18 यहुदिल्कुना बव नियमकुन अयते नना होळसीतनो, अवे नियमकुनपोर्रीं मर्रां ताकानयते नना मूसाना नियमाल्क तपतोने आंतन.

19 इत्ते मुन्ने नना मूसाना नियम परकारम ताकसेके पिसालय हळुंदुन, गानि बस्केळ्ळ अवनुन पीसि ताका पराकोंदुन. इंदके पेनदाहाटीं पिससना इंचि अबुंता होळस्तन. दीना अर्तम बतल इत्ते यहुदिल्कुना रीति-रिवाजकुनाहाटीं नना हाताप आतन.

20 नाकुन किरिस्तुनतोन कूसुनपोर्रीं वेलाड वाटमळ जर्गता इत्ते, इंदके नावा पळाना पिस्वर हासोत्ता. गानि नावा लोप्पो किरिस्तु जीवाते मंतोर. इंदके नावा ई मैंदुलते मनना जीवा, नाकुन बच्चोनी पावरम कीसि नावाहाटीं ओना जीवातुन हीता पेनदा मरिनपोर्रीं नना विस्वासम कीताहेका दोर्कतद आंद.

21 पेनदा कुर्यातुन नना विलवा हिल्ले इंचेक हिल्लेन. गानि मूसाना नियम परकारम ताकसि मनकालोर नीतिमंतुल्क आयानयते मनाहाटीं येसु किरिस्तु हायना अब्सरम मनाहिल्ले मरि.

3

विस्वासम कियानोंके पेनदा आसिर्वाद दोर्कता

1 ए गलातिया एरियाता लोकरिटा, मिमेट निजमे बुद्दि हिल्लोर आंदिर. येसु किरिस्तुन कूसुनपोर्रीं बारि वेलाळ वाटतुर? दाना अर्तम बतल? इंदता नना मीकु बेस तेळियानाल वेहचि मत्तन. असल मीकुन तप्पुड हर्दुक तिराहतोर बोरे?

2 इंदके मिमेटे वेहाट, मूसाना नियम परकारम ताकताहेका मीकु पवित्र आत्मा दोर्कतना मरि किरिस्तुना बारेमता बेसता कबुरपोर्रीं विस्वासम इरताहेकाना?

3 पवित्र आत्माता सहायमतोनि सुख कीता मीवा पूना पिस्वरतुन मिमेट मीवा बलमतेन पुरागा कियालय हळसंतिरा? मीकु गिचचोगुडा बुद्दि हिल्लेना?

4 बेसता कबुरताहेका मिमेट वेल्लेन तिप्पल्क अरतिर, अदंता एर्तमेना? नना मात्रम ओप्कुन्नोन.

5 पेन मीकु दाना पवित्र आत्मातुन हीसि मीवा नड्डुम पेद्दा-पेद्दा अद्बूताल्क कीता. अद बल्हा? मिमेट मूसाना नियम परकारम पिस्संतिट इंचा? हिल्ले. मिमेट किरिस्तुना बारेमता बेसता कबुर केंजसि दानपोर्रीं विस्वासम कीतिर इंचि अल्हा कीता.

6 दर्मसास्त्रमते वेहताप, अब्राहाम पेनदा पोल्ले केंजसि विस्वासम कीतोर, * इंचि पेन ओन नीतिमंतुड इत्ता. इदगुडा अल्हेन आंद.

7 अदुनहाटीं बोरे अयते पेनदापोर्रीं विस्वासम इरंतोर, ओरे अब्राहामुना निजमाता वंसमतोर आंदुर, इद मीकु तेळियगोम.

8 यहुदि आयवोर अंतोर्कुन पेन ओरा विस्वासमतुन हळसि नीतिमंतुल्क कीता इंचि दर्मसास्त्रमते रासि मंता. इदुना बारेमते पेन अब्राहामुंक, “अन्नि जातिनोर्कुंक नीवाहेंदाले आसिर्वाद दोर्कता,” * इंचि मुन्नेन वेहचि मत्ता.

9 इंचि अब्राहामुनलेसीं पेनदा पोल्लेपोर्रीं बोरे अयते विस्वासम इरंतोर, ओन्के अब्राहामुंक दोर्कताप पेनदाहेंदाल आसिर्वाद दोर्कता.

10 गानि बोरे अयते मूसाना नियमतुन नम्मिसि मनंतोर, ओन्के सिराप सापनेमे दोर्कता. बारित्ते, “मूसाना नियमते रासि मत्ता अन्नि नियमकुन अन्नि वेलाते बरोबर पीसि ताकवोर अंतोर्क पेनदा सापनेम दल्गंता, *” इंचि दर्मसास्त्रमते रासतद मंता.

11 दीनहेंदाल इंदके मनाकु तेळियता गदा, मूसाना नियमतुन पीसि ताकानोर बोरे पेनदा मुन्ने नीतिमंतुड आयोर. बारित्ते, “पेनदुन विस्वासम कीसि नीतिमंतुड आतोर पिसनुर, ” * इंचि दर्मसास्त्रमते रासि मंता. *

12 इगे मूसाना नियम आनि विस्वासमकु बतले संबंदम हिल्ले. बारित्ते, “बोरे अयते अवनुन पीसि ताकंतोर, ओर अवनुनतोने पिसंतोर, ” * इंचि दर्मसास्त्रमते रासि मंता.

* 3:6 उत्पत्ति 15:6 * 3:8 उत्पत्ति 12:3 * 3:10 व्यवस्ताविवरन 27:26 * 3:11 पेनदुन विस्वासम कीसि नीतिमंतुड आतोर पिसनुर पेनदापोर्रीं विस्वासम इरसि बोरे अयते नीतिमंतुड आंतोर, ओन्के बस्केळ्ळ पिससना पिस्वर दोर्कार. * 3:11 हबक्कूक 2:4 * 3:12 लैव्यवस्ता 18:5

13 “मराकु वेलाड वाटता हरेक मनकल सापनेम दलगतोर,”* इंचि दर्मसास्त्रमते रासतद मंता. अदुनहाटीं मूसाना नियमहेका मनाकु दलगता सापनेमतुन किरिस्तु कुद्दु येतकुत्तोर. इल्हा किरिस्तु सापनेम दलगतोर आसि मनाकुन आ सापनेमताल कापाळतोर.

14 अब्राहामुंक पेन हीता आसिर्वाद येसु किरिस्तुनहेदाल यहुदि आयवोर्कगुडा दोर्कना इंचि किरिस्तु मनाकुन पिसागोटतोर. दीनहेदाल मनम ओनपोर्रो विस्वासम कीसि पेन हीता पोल्ले परकारम पवित्र आत्मातुन दोर्किचकुना परंतोम.

मूसाना नियम आनि पेनदा पोल्ले

15 अय्ते विस्वासुल्कुनिटा! मना रोजता पिस्वरताल उंदि पोल्ले नना मीकु वेहांतन. अद बतल इत्ते, मनकालोरा नड्डुम आता करारतुनगुडा, “इद करार ताको, हिलाकोटे इदुन बदलांचा पीता,” इंचि मनम इना परोम.

16 अल्हेन अब्राहाम आनि ओना वंसमतोनतोनि पेन कीता करारता बारेमते मंता. गानि दर्मसास्त्रमते, “वंसमतोर्क” इंचि रासि हिल्ले. अगा अल्हा रासि मंचि मत्ते वेल्लेन मंदिताहाटीं आसि मनवळ. गानि अल्हा रासाकोटा वरोनाहाटीं इत्ताप, “नीवा वंसमतोन्क” इंचि रासि मंता. आ वरोर इत्ते किरिस्तु आंदुर.

17 इंदके इदुन बेस केंजाट! नालुं नुहकुना मुप्यै वर्साना पज्जो वाता मूसाना नियम, पेन मुन्नेन कीसि मत्ता करारतुन बल्हा बदलांचा परंता? बदलांचा परो. अदुनहाटीं अद इंदकेगुडा ताकसंता.

18 ओक्कला वारसान हक्क गिंटा मूसाना नियमतुन पीसि ताकताहेका दोर्कता इनानय्ते, अद पेन हीता पोल्ले परकारम दोर्कतद आयो. गानि अब्राहामुंक अय्ते अद पेन हीता पोल्ले परकारमे दोर्कता.

19 अय्ते मरि पेन मूसाना नियमकु बारि हीता इतिर? पेन अब्राहामुनतोनि उंदि करार कीता. अद करार परकारम ओना वंसमताल वरोर वायनद मत्ता. ओर वायनजेम पापम इत्ते बतल मनाकु तेळियनाहाटीं पेन अव नियमकु हीता अचोने. पेन ई नियमकुन दाना दूतानहेदाल मूसाना कय्दुक हीता. बारित्ते मूसाल पेन आनि लोकुल्कुनाहाटीं नड्डुम मनकल मत्तोर.

20 इव्वुर्कन कल्पालय नड्डुमतोना अब्सरम मनंता. गानि इगे पेन सीदा अब्राहामुनतोनि करार कीता.

मूसाना नियमते पिस्वर हिल्ले

21 अय्ते मरि मूसाना नियमकु पेन हीता पोल्लेना विरोदमते मंतंगा? असले हिल्लें. ओक्कला मूसाना नियमकु पिस्वर हियानव अय्ते, मनम अबुनतोने नीतिमंतुल्क आसि मन्नेरम.

22 गानि दर्मसास्त्रम अय्ते, “पूरा दुनिया पापमते दोह्चि मंता,” इंचि वेहंता. अल्हा बारि आता इत्ते, हीता पोल्ले परकारम दोर्कना आसिर्वाद, येसु किरिस्तुनपोर्रो विस्वासम कीतोर्के दोर्कना इंचि.

23 गानि येसु किरिस्तुनपोर्रो विस्वासम कियना कालम वायका मुन्ने मनम मूसाना नियमकुने दोह्चि वाटताप मत्तोम. इंदके बोर मनकल अय्ते अव नियमकुने दोह्चि वाटताप मंतोरो, ओर येसु किरिस्तुनपोर्रो विस्वासम कीसि अव नियमकुनाल पलाते अर्रा परंतोर इंचि पेन मनाकु हुपिस्ता.

24 इत्ते मनम किरिस्तुनपोर्रो विस्वासम कीसे नीतिमंतुल्क आयना इंचि, ओर वायनदाका मूसाना नियमकु मनाहाटीं वरोर बेस ऊळगेम कियानोन लेह्का मनाकुन किरिस्तुंक दग्गेरा कियना कबळ कीसेक मत्तां.

25 इंदके किरिस्तुन विस्वासम कियना कालम वाता, अदुनहाटीं मनाकु मूसाना नियमता कय्दा हिळु मनना अब्सरम हिल्ले.

26 येसु किरिस्तुनपोर्रो विस्वासम कीताहेका मिमेट अंतोर इंदके पेनदा पिलाल्क आतिर.

27 अद बल्हा इत्ते, बोर अय्ते किरिस्तुना पोरोल्ते बापतिस्मा येतंतुरो, ओर अंतोर किरिस्तुने कलियसोत्तुर.

28 इंदके यहुदि, युनानि, जीतागाड, मालक, मांड्सा, मुरतळ इल्हा बतले परक हिल्ले. किरिस्तुने मिमेट अंतोर उंदे.

29 मिमेट किरिस्तुना लोकुल्क आतिर, इत्ते अब्राहामुना वंसमतोर आंदिर. दीनहेदाल पेन अब्राहामुंक हीता पोल्ले परकारम, पेन ओन्क हियना आसिर्वादता वारसदार्कगुडा आंदिर.

4

मनम दासुल्क आयोम पेनदा मर्कुम

1 नना वेहानद बतल इत्ते, वारसदार बदवेरादाका सिन्ना पेडल मनंतोर, अदवेरदाका ओर लोता मालक आसिगुडा जीतागानलेसीं मनंतोर.

2 इत्ते, बाबो निरनायम कीता वेला एवनदाका ओर ओन कापाळनोरा आनि दनमता देकरेक कियानोरा कय्दा हिळु मनंतोर.

3 अल्हेने मनमगुडा सिन्ना पेडनलेसीं तेळियवोर्कुम मत्तस्के, दुनियाता नियमकुने दोह्चि वाटताप अबुना दासुल्क आसि मत्तोम.

4 गानि बस्के अय्ते पेन निरनायम कीता वेला एवता, अस्के दाना मर्रिन ई दुनियाते लोहता. ओर मूसाना नियम परकारम ताकानोरा लोप्पो उंदि मुरतटा पीटि पुटतोर.

5 बारित्ते, मनम पेनदा पिलाल्क आयना इंचि, मूसाना नियमकुने दोह्चि वाटताप मत्ता मनाकुन लेहलाये पेनदा मर्रि वातोर.

6 मनम पेनदा पिलाल्क आताहाटीं अद मनालोप्पो दाना मर्रिना आत्मातुन लोहता. अद आत्मा मनालोप्पो मंचि पेनदुन, “बाबा! बाबा!” इंचेके केयसेक मनंता.

7 अदुनहाटीं मिमेट इंदके दासुल्क आयिर, गानि पेनदा मर्क आंदिर. मिमेट मर्क आताहाटीं पेन मीकुन दाना वारसदार्कगुडा कीता.

पेनदुन एरपाट कीसि ताकाना

8 दीनकन्ना मुन्ने मिमेट निजम पेनदुन एरपाट किया हिल्लिर, अदुनहाटीं अट्टि पेनकुना कयदा हिळु मत्तिर.

9 गानि इंदके पेनदुन एरपाट कीतिर. निजम हळते पेने मीकुन एरपाट कीता. अदुनहाटीं मिमेट दुनियातां अंगळमतव रीति-रिवाजकुने पजोळ्क बारि होंचंतिर? मर्रा मीकु अवुना कयदा हिळे मनना मंताना?

10 मिमेट रोजकु, नेलां, कालाल्क, वर्सा इवुन नोमसेक मंतिर.

11 नना मीवाहाटीं कीता कस्टम वट्टिदे आंता बारे इंचि नाकु मीवा बारेमते वें वस्सेक मंता.

12 विस्वासुल्कुनिटा, नना मीलेसीं नियमकुन नोमवोन आतन, मिमेटगुडा नावालेसीं आम्टु, इंचि मीकुन विनंति कीसेक मंतन. इदवेरादाका मिमेट नापोरो बतले अन्यायम किया हिल्लिर.

13 मुन्नेटा मल्का नना वातस्के, ना जीवा बेस मनाहिल्ले, अस्के मीकु किरिस्तुना बेसता कबुर वेहतन. अद मीकु एरपाटे.

14 ना जीवा बेस हिल्वका मीकु कस्टम आयिनागानि मिमेट नाकुन सिन्ना ह्ळा हिल्लिर, बेस ह्ळतिर. नाकुन पेनदा दूतालेसीं, येसु किरिस्तुनलेसीं बेस ह्ळतिर.

15 नना निजम वेहतन, अद वेलाते ना सेवाहाटीं नाक कळदा अक्सरम मंचि मत्ते, कळ इंका तेंडसि हियालय मिमेट तयार मत्तिर. अच्चोन नावापोरो पावरम कियिदिर इंचि नना वेहा परांतन, अयते अद कुसि इंदके बेके होला?

16 नना मीवातोनि निजम वळकताहाटीं मीकु पगातोन आताना?

17 आबद्दम पोल्लें कराहनोर मीकुन ओरा पट्टुने अरहालय वेल्लेन कोसिस कीसेक मंतुर. ओरा अद कोसिस मीवा बेसताहाटीं आयो गानि मिमेट ओरा लोप्पो कलियसि मंचि मावाहेंदाल अलग आयना इंचि ओरा विचारम मंता.

18 नना मिहगा मनिना, हिलाकुना गानि बस्केळ्क बोरन्ना बेसता पोल्लें कराहते वेल्लेने कुसिते ओना पज्जो होनना.

19 ना पिलाल्कनिटा, मीकु बदवेरादाका किरिस्तुनलेसीं गुनम वायोनो अदवेरदाका, एरपूरनेके बल्हा नोप्पि वांतंगो अल्हेने नना मीवाहाटीं मर्रा उंदि मल्का तकलिप अरसेक मंतन.

20 मीवा बारेमते नना बतल कीकन नाक तोससेक हिल्ले. अदुनहाटीं इंदके नना मिहगा वासि, मीतोनि वेरे तरिकाते वळकना इंचि नावा आसे मंता.

21 मूसाना नियमते ताकंतोम इनोर्कुन नना पूसकीतन, अवने बतल रासि मंता मीकु एरपाट मंताना?

22 अब्राहामुंक इवुर मर्क मत्तुर, वरोर दासिदानकु पुटतोर, इंकावरोर बारे ओना मरमिना मुत्तोंक पुटतोर, इंचि दर्मसास्त्रमते रासि मंता.

23 दासिदानकु पुटता पेडल इस्माइल, मनकना विचारमताल पुटतोर. आनि मरमिना मुत्तोंक पुटता पेडल इसाक बारे पेन हीता पोल्ले परकारम पुटतोर.

24 इव पोल्लें उंदि उदाहरनलेसीं मंतां. इव रोंड मुत्तोह्कु इत्ते, पेन लोकुल्कुनतोनि कीता रोंड करारकुनालेसीं मंतां. उंदि करार इत्ते सिनाइ गुट्टाता* करार आंदु. ई करारता हेंदाल पुटता पिलाल्क, हाजिरानालेसीं दासुल्क आतुर.

25 हाजिरा अरब देसेमता सिनाइ गुट्टालेसीं मंता इनकुंट, हाजिरा आनि दाना मर्कगुडा सिनाय गुट्टातगा हीता आ नियमकुना कयदा हिळे मंतुर, अदुनहाटीं हाजिरा इत्ते इंदकेटा येस्सलेमतोरलेसीं आंद.

26 गानि स्वर्गमता येस्सलेम बारे मरमिना मुत्तो सारानालेसीं मंता, अद मना विस्वासुल्कुना तल्लुर आंदु.

27 दर्मसास्त्रमते इल्हा रासि मंता:

“गोड्डुमुरा मुरतटुना! निमे बोर्कुन कना हिल्लिन, निमे कूस आम.

एरपूराना तकलिप आयवादाना, निमे कुसिते केया.

बारित्ते मुय्दो मत्ता मुरतळकन्ना, मुय्दो होळसीता मुरतळके वेल्लेटुर पिलाल्क मंतुर.”*

28 अदुनहाटीं विस्वासुल्कुनिटा, मनम मनकल विचारम कीताप आयो गानि पेन करार कीताप इसाकुनालेसीं दाना मर्क आतोम.

29 अस्के मनकना विचारमते पुटतोर, पेन करार कीता परकारम पुटतोन बल्हा तकलिप कियुंदुगे अल्हेने इंदकेगुडा जर्गसेक मंता.

30 गानि दर्मसास्त्रमते बतल रासि मंता? “दासिदानकु पुटता मर्रिक, मरमिना मुत्तोंक पुटता मर्रिनतोनि वारसान हक्क दोर्का परो. अदुनहाटीं दासिदान दाना मर्रिन पलाते पेचहट!” इल्हा रासि मंता.

31 अदुनहाटीं विस्वासुल्कुनिटा, मनम दासिदानोर्कुम आयोम गानि मरमिना मुत्तोना पिलाल्कुम आंदुम.

5

यहुदि आयवोर्क कतनाता अक्सरम हिल्ले

1 मनम नियमकुना लोप्पो दासुनलेसीं मनामन्नि इंचि किरिस्तु मनाकुन अवेटाल इळबळिस्तोर. अदुनहाटीं विस्वासमते गट्टिगा मंटु, मिमेट नियमकुना बर्वु दासुल्कुनलेसीं मर्रा कांजमटु.

* 4:24 सिनाइ गुट्टा इदे गुट्टातगा इस्राएल लोकुकुक पेन पदि पोल्लें हीता. ☆ 4:27 यसायाह 54:1

2 केंजाट, नना पौलसुन मीकु वेहासेक मंतन, मिमेट कतना कीसि दर्मसास्त्रमता नियम मत्ताप ताकंतोम इनानयते, मीकु किरिस्तुनाहेंदाल बतल पायदा आयो.

3 सिराप कतना कीकुत्तेने पेनदा मुन्ने नीतिमंतुड आंतन इंचि इनकुंचि कतना कीतोर मूसाना पूरा नियमकु मत्ताप ताका पीता, इंचि नना मीकु मरी उंदि मल्का वेहासेक मंतन.

4 मी लोप्पोटाल बोर अयते मूसाना नियम मत्ताप ताकसि नीतिमंतुल्क आंतोम इंचि इनकुंचेके मंतिर, मिमेट किरिस्तुनाल अलग आतिर, ओना कुर्पाताल लक्कु आतिर.

5 बारित्ते मनम विस्वासमताहेंदाल पेनदा मुन्ने नीतिमंतुल्क आतोम इंचि आसे इरतोम. अदे आसेताहाटीं आत्मा बलमते दाना एदुर हळसेक मंतोम.

6 येसु किरिस्तुनलोप्पो कतना कियिना, कतना कियाकोन्ना अद बाता कबळतद आयो, गानि पावरमते कबळ कियना विस्वासमे कबळतद आंद.

7 मिमेट मुन्ने बरोसाते बेस बेरस्सेक मत्तिर. गानि इंदके मीकुन बोरो आपसेक मंतुर, इंचि सत्तेम हर्दे ताकसेक हिल्लिर.

8 इद आपाना कबळ मीकुन केयता पेनदद आयो.

9 वेल्लेने बेस पिडिते इच्चुर पुल्लाटा पिडि वाटते, पूरा पिडितुन पुल्लागा कीसि पोहंता इद मनाकु एरपाटे.

10 नना कराहता निजम पोल्लें मत्ताप मिमेट ताकंतिर इंचि नाकु सामिनाहेंदाल पूरा बरोसा मंता. मीवा विस्वासमतुन तप्सानोर बोरन्ना आयिर ओर्क तप्पाकौटा सिक्सा दोर्कता.

11 विस्वासुल्कुनिटा! ननागिंटा कतना कियना इंचि वेहासेक तिरियसि मत्ते, नाकुन यहुदिल्क वेल्लेन तकलिप कियाकोन्नेर, येसु सामि कुसुनपोर्री हीता मोक्कुता हेंदाले बस्केळक पिस्सना पिस्वर मंता इंचि वेहताहेंकेन ओर्क होंग वाता.

12 मीकुन कतना कियागोम इंचि तिप्पल्क कियानोर, कुद आडिगुनलोरलेसीं आते बेस मंता.

पेनदा आत्मा वेहताप ताकाना

13 गानि विस्वासुल्कुनिटा! पेन मीकुन नियमकुना लोप्पोटाल इळबळिस्ता. अदुनहाटीं नना वेहासेक मंतन, मिमेट मीवा पापि विचाराल्कुन पूरा कियालय मीकु विचारम वाताप ताकानायो गानि पावरमते वरोंक-वरोर सहायम कीसेक मंदना.

14 बारित्ते मूसाना अन्नि नियमकु उंदे आदेसते कलियसि मंतां. अद बतल इत्ते, “मीवाद मिमेट बच्चोन पावरम कीकुंतिर, अचोने पावरम इंकावरोनगुडा कीम्टु.”

15 गानि मिमेटगिंटा नय्कु बल्हा उंदांक-उंदि कस्कसेक, इग्गिस तिंचेके मनंतगो अल्हा मनानयते उसारते मंतु! उंदि रोज मिमेट वरोनहेंदाल वरोर नासडेम आया परांतिर.

16 नना वेहानद बतल इत्ते, पेनदा आत्मा मीकुन ताकिस्ताप ताकट, अल्हा ताकते मीवा मनसुना पापि विचाराल्कुनाल लक्कु मनांतिर.

17 बल्हा इत्ते, मनकना पापि विचाराल्क, पेनदा आत्माता विचाराल्कुंक अड्डम मनंतां अल्हेन पेनदा आत्माता विचाराल्क मनकना पापि विचाराल्कुंक अड्डम मनंतां. इव रौंडुना विचाराल्क बस्केने कलियों. अदुनहाटीं मिमेट बतल अयते कीतोम इंतिर, अद किया परिर.

18 गानि मिमेट पेनदा आत्मा ताकिस्ताप ताकते, मिमेट मूसाना नियमकुना कयदा हिळु हिल्लिर.

19-21 मनकना पापि कबाहक मनाकु एरपाटे मंतां. अव इव आंदुं: बोगमतनम, अपवित्र कबाहक, सिग्गु हिल्ला कबाहक, बोम्मा पूजे, होदें, वरोंक-वरोर हय्साकौटा मनमळ, जगडाल्क, कळक पोत्तमळ, होंग, नाके गावाले इनमळ, लोकुल्कुना नड्डुम पुटपाट कियमळ, वैरे गेंग तयार कियमळ, कल्लु उनमळ, विद्रुदुरतनम इसोंटव इंका वेल्लेन पोल्लें मंतां. इसोंटा कबाहक कियानोर पेनदा राज्येमते वारसदार आया पस्स. इद पोल्ले नना मीकु मुन्नेने वेहतन, अल्हेने इंदकेगुडा वेहासेक मंतन.

22 पेनदा आत्माता कबाहक इल्हा मंतां: पावरम कियमळ, कुसिते मनमळ, सांतिते मनमळ, ओप्के पीसि मनमळ, दया कियमळ, मंचितनम, इमानदारते मनमळ, मेत्तगा मनमळ, बसोंटा परिक्सा वायिनागानि अब्ते अर्राकौटा सततुन आपकुनमळ.

23 इल्हा ताकते इवुक अड्डम बदे नियम हिल्ले.

24 बोर अयते येसु किरिस्तुन विस्वासम कीतोर मंतुर, ओर ओरा पापि विचाराल्कुन, पापि आसेन कुसुनपोर्री वेलाड वाटताप अवुंक लक्कु आतुर.

25 मनमगिंटा पेनदा आत्माते पिसानयते, आत्मा वेहतापे ताककोम.

26 इंकावरोर होंगुक वायाकौटा, गरी कियाकौटा, कळक पोत्तकौटा मनम मंदकोम.

6

वरोंक वरोर सहायम कीम्टु

1 गानि विस्वासुल्कुनिटा! मीलोप्पो बोरन्ना पापम कीते, पेनदा आत्माते ताकानोर मिमेट होंगुक वायाकौटा ओनगा होंचि ओन बेस समजांचि, सत्तेम हर्दे तट्ट. अल्हेने मिमेटगुडा असोंटा परिक्साते अर्रांमन्नि इंचि, उसारते मंतु.

2 मिमेट तकलिपते वरोंक-वरोर सहायम कीम्टु, अल्हा कीतिने किरिस्तु हीता नियमतुन पूरा किया परांतिर.

3 बारित्ते, बोरे आयिर पेद्दातनम हिलाकुना गानि पेद्दातनम हुप्संतुर, असंतोर ओरद-ओरे पसांचकुंचेके मंतुर.

- 4 हरेक मनकल ओना सतता कबाहकुन कुद्दु परिक्सा कीसि ह्ळना, वैरेतोना कबाहक बल्हा मंता इंचि ह्ळना आयो. अस्के ओना कबाहक बेस मत्ते ओर सतता कबाहकुन ह्ळसि कूस आयावच्चु.
- 5 बारित्ते बोरे आयिर, ओना जिम्मेदारि ओरे एतमळ गावाले.
- 6 बोरे अय्ते पेनदा पोल्ले करियतुर, ओर अन्नि बेसता वस्तुक ओन्क कराहतोंक पंचि हियमळ गावाले.
- 7 पेनदुक बतल तेळियो इंचि नाळेम कीसि पसांचमट्ट, मिमेट बवयते वीतकिर, अवने कोयकिर.
- 8 बोरे अय्ते ओना पापि गुनम वेहताप वीतंतोर, ओर नासडेमता पंटा कोय्यंतोर. गानि बोरे अय्ते आत्मा वेहताप वीतंतोर, ओर आत्माताहेंदाल बस्केळक पिस्सना पिस्वरता पंटा कोय्यंतोर.
- 9 मनम उंदेतीर बेसता कबळ कीते, पेन निरनायम कीता वेला एवतस्के मनाकु दाना पाय्दा दोर्कता. अदुनहाटीं मनम नेरबळाकोंटा बेस कबळ कियाना.
- 10 अय्ते मरि, मनाकु बल्हा मोका दोर्कते अल्हा अंटोराहाटीं, एक्कोते-एक्को मना विस्वासुल्कुनाहाटीं बेस सहायम कीकोम.
- सिट्टिता आकिर पोल्लें
- 11 हुळाट, इद सिट्टि पेद्दा-पेद्दा अक्सराल्कुने नावा कय्दे मीकु रास्संतन.*
- 12 नालुरा मुन्ने नना बेसतोन इंचि हुप्सानोर, ओरे मीकुन कतना कियागोम इंचि बल्मि कीतुर. इल्हा बारि कीतुर इत्ते, किरिस्तुना कूसताहेंका वायाना तकलिपताल तपिचकुननाहाटीं ओर इल्हा कीतुर.
- 13 बोरे अय्ते कतना कीसि मंतुर, ओरगुडा मूसाना नियमते ताकुर. गानि ओर वेहताप मिमेट कतना कीते ओर्क पेद्दातनम दोर्कता इंचि, ओर मीकु इल्हा वेहांतुर.
- 14 गानि नना अय्ते, मना सामि येसु किरिस्तु कूसुनपोरों हातोर इंचि विस्वासम कीतन, दीन पोरिने नाकु पूरा विस्वासम मंता. आ कूसुनहाटींगे दुनियाता पोल्लें नाक कलियों, नावा पोल्लें ओर्क कलियों.
- 15 बारित्ते कतना किथियेना, कतना कियाकोन्ना बतल पाय्दा हिल्ले. पेन मनालोप्पो पूना पिस्वर हीता अदे पाय्दातद आंदु.
- 16 अदुनहाटीं, बचुदुर अय्ते ई नियमते ताकंतुर अचट्टुर्कुक आनि पेनदुन विस्वासम कीता अंटोर इस्नाएल लोकुल्कुंक सांति, दया दोर्किकांटी.
- 17 इंदकेटाल आबद्दम कराहना पोल्लें केंजसि मिमेट नाक मर्रा तकलिप हियमट्ट. येसु सामिना पोल्लें वेहताहाटींगे नना नावा मेंदुलपोरों देब्बाना बर्रा पीसि तिरियसेक मंतन.
- 18 विस्वासुल्कुनिटा! मना सामि येसु किरिस्तुना कुर्पा मी अंटोरतोनि मन्निकांटी. आमीन.

* 6:11 पौलुस सिट्टि रासानेके कुद रासाकोंदुर गानि इकावरोनतोनि रासा वेहुंदुर. अद सिट्टि ओरे रासतोर इत्ताप मनना इंचि आकिर पोल्लें मात्रम ओर कुद रासुंदुर. इल्हा ओनद उंदि रिवाज मत्ता.

इपीसि इपीसि विस्वासुल्लुकुंक पौलुसना सिट्टि

इद सिट्टिता बारेमते गिचचो परिचयम

रासतोना पोरोल: पौलुस

रासता कालम: इसवि सन 60

पौलुस इद सिट्टितुन जेलने मत्तास्के रासतोर. पौलुस येसुना बारेमता बेसता कबुर वेहालय रोंडो मल्का पय्नेम होत्तास्के ओर ई इपीसि सहरतेगुडा होंचि मत्तोर. ओर ई सहरते मोदाला होत्तस्के वेल्ले रोजकु मनाहिल्लोर गानि ओना मूडोव मल्का पय्नेम होत्तस्के अगा कोन्नि वर्सनदाका मत्ताप प्रेरितुल्लुकुना कबाहक पुस्तकमते मनाकु तेळियसि दांता.

पेनदा लोप्पो अंतोर विस्वासुल्लुकु उंदासि पेनदा उद्देसमतुन एरपाट कीसि पिसागोम, अल्हेने कलिसिया इत्ते उंदि मेंदुललेसीं मंता. दान्क किरिस्तु तल्लालेसीं मंतोर. अय्ते मनम विस्वासुल्लुकुम आ मेंदुल्ला बागाल्लुकुम आंदुम. मेंदुल्ला बागाल्लुकु बल्हा उंदान्क-उंदि बेस कलियसि मनंतंगो अल्हेन मनमगुडा मत्ते, पेन दाना उद्देसम परकारम मनाकु पिस्वरतुन हीता. पेनदा पोल्लेतुन इपीसि सहरता विस्वासुल्लुकुंक वेहनाहाटीं पौलुस इद सिट्टि रासतोर. अचोने आयाका वरोर विस्वासि किरिस्तुना लोप्पो बल्हा मनना, मुत्तो-मुय्दो, मालक-दासुड, तल्लुर-बाबो मर्क-मियाहक बल्हा मनना इवन्नि अवसरमाता पोल्लेगुडा पौलुस इद सिट्टिते रासतोर.

बगा बतल मंता

जोहार आनि परिचयम 1:1-2

किरिस्तु आनि कलिसिया 1:3-3:21

किरिस्तुन विस्वासम कीसि दुनियाते पूना पिस्वर पिसमळ 4:1-6:20

आकिरता बोदां 6:21-24

जोहार

1 नना पौलुसुन, पेनदा इच्चा परकारम, किरिस्तु येसुना प्रेरितुन आतन. इपीसि सहरते मनना किरिस्तु येसुन विस्वासम कियाना पेनदा लोकुल्लुकुंक नना इद सिट्टि रासेक मंतन.

2 मना पेनबाबानहेंदाल आनि सामि येसु किरिस्तुनाहेंदाल मीकु कुर्पा, सांति दोर्किकांटी.

किरिस्तुनहेंदाल दोर्काना आसिर्वादाल्क

3 मना सामि येसु किरिस्तुना पेनबाबांक दन्यवाद. ओर किरिस्तुनाहेंदाल, मना बक्तिकु संबदिस्तव स्वर्गमते मनना अन्नि आसिर्वादाल्क मनाकु हीसीतोर.

4 अद बल्हा इत्ते, मनम पेनदा नदरते पवित्र आनि दोसेम हिलाकोटा मंदना इंचि, पेन ई दुनियातुन पुट्सकामुन्नेन अद मनाकुन किरिस्तुना लोप्पो पेरकुत्ता.

5 पेनदा पावरमता पिलान परकारम, येसु किरिस्तुनाहेंदाल मनम दाना पिलाल्क आयाना इंचि अद मनाकुन मुन्नेन पेरता. ई पिलान पेनदा इच्चा परकारम मत्ता इंचि पेनदुक इल्हा कियमळते कुसि दोर्कता.

6 दाना पावरमगल्ला मरि मनाहाटीं कीतदुन पीसि, अद मनापोर्री लेक्का परवच्चोन कुर्पातुन पुक्कटते कुम्मरिच्चा. अदुनहाटीं मनम पेनदा महिमाता स्तुति कीकोम.

7 किरिस्तु ओना सतता नेत्तुरतुन पोंगागोटताहेंका मना पापाल्क मापि आसि मनाकु मुक्ति दोर्कता. इल्हा पेन दाना वेल्लेन कुर्पातुन मनापोर्री कुम्मरिच्चा.

8 अद मना बुद्दिदक, तेल्लिक हालानाल दाना दया हियमळ जर्गता.

9 पेन मुन्नेने निरनायम कीता, दाना इच्चा परकारम मत्ता मर्ममता पिलानतुन, मनाकु किरिस्तुनाहेंदाल कुल्ला कीसि वेहता.

10 अद बतल इत्ते, पेन दाना पिलान परकारम इन्कुत्ता वेला एवतस्के, स्वर्गमते मत्तव, बूमिपोर्री मत्तव अन्निगुडा उंदगा कीसि अवुन किरिस्तुना अदिकारम हिळु हियमळ गावाले.

11 पेन अन्निटवुन दाना इच्चा मत्ताप पिलान कीसि ताकसंता. अदे पिलान परकारम मनाकुन पेनदा लोकुल्लुकु इंचि मुन्नेने किरिस्तुना लोप्पो पेरमळ जर्गता.

12 मनम बोर अय्ते मुन्नेटाले किरिस्तुनपोर्री आसे इरतोम, दाना महिमातुन तल्सकुनागोम इंचि दाना विचारम मंता.

13 मीकु मुक्ति हीता बेसता कबुर सत्तेम आंद अदुन मिमेटगुडा केंजतिर. केंजसि किरिस्तुना लोकुल्लुकु आयानाहाटीं ओनपोर्री विस्वासम इर्तिट. अस्के पेन हीता पोल्ले परकारम पवित्र आत्माता सिक्का मीपोर्री वाटमळ जर्गता.

14 पेन बोर्कुन अय्ते अस्कुत्ता ओरा मुक्तिहाटी, दाना पवित्र आत्मातुन वारसान हक्कता उंदि इसारालेसी मनागा इरता. अदुनहाटी लोकुल्क दाना महिमातुन तल्सकुंतुर.

इपीसि विस्वासुल्कुनाहाटी पौलसना पारतना

15-16 अदुनहाटी बस्केटाल अय्ते नना, सामि येसुना पोरोटा मीवा विस्वासम बारेमते आनि पवित्र लोकुल्कुन मिमेट बेस पावरमते ह्ळांतिर इत्तदुना बारेमते केंजतन, अस्केटाल नना नावा पारतनाते मीकुन मति कीसेके, मीवाहाटी पेनदुक बस्केळ्क दन्यवाद वेहासेक मनंतन.

17 अचोने आयाका मना सामि येसु किरिस्तुना पेन, इत्ते महिमाते निडिस मत्ता पेन बाबल, ओना बारेमते मिमेट इंका बेस एरपाट कियानाहाटी ओना पवित्र आत्माहेंदाल मीकु बुदिदे आनि बेस तेल्लिचकुननाहाटी तेल्लि हिथ्यिर इंचि पारतना कीसेक मंतन.

18 अल्हेने, पेन मीकुन बद आसेताहाटी केयता? दाना पवित्र लोकुल्कुंक अद हिथ्याना वारसानहक्कताल दोर्काना महिमाता दनम बल्हा मंता? इदुना बारेमते तेळियानाहाटी मीवा मनसुना वेळसि एल्गागोट्टि.

19-20 अचोने आयाका किरिस्तुन हामुरताल मरी जीवाते तेहाचि स्वर्गमते दाना तिना बाजूंक उपिचनेके पेन दाना पेद्दा ताकततुन हूपिस्ता. अय्ते मनम किरिस्तुन विस्वासम कियानोरम उंदि आयालयगुडा अदे पेद्दा ताकत दानागा मंता. पेनदा ताकत बस्केन मारो, इदुन पेन मीकु तेळियागोट्टि इंचि नना विनंति कीसेके मंतन.

21 इद कालमतेन आयो गानि, मुन्ने वायाना कालमतेगुडा किरिस्तुनलेसी कदर आनि अदिकारम मत्तोर बोरे मन्नोर. इल्हा किरिस्तु दुनियाते मनना राज्ये कियाना अदिकारिल्क, वेरे अदिकाराल्क, कळ्कुंक दिस्सुवव अन्नि ताकतकु आनि इंका अन्निटवुंकन्ना पेद्दोड आंदुर.

22 पेन इव अन्निटवुन किरिस्तुना काल्कुना हिळु कीसि, इव अन्निटवुनपोरो ओन्क अदिकारम हीता. हीसि ओरे अन्निटवुना मुख्यल आयागोम इंचि ओन कलिसियाकु हीसीता.

23 कलिसियातोर इत्ते किरिस्तुना मेंदुल आंदुर. ओना मेंदुलतुन ओर अन्नि तीरकुने, अन्नि पोल्लेने पुरागा निह्चि अन्निटतुन पुरागा कियानोरगुडा ओरे आंदुर.

2

पेनदा दयातेन मुक्ति दोर्कता

1 मुन्ने मिमेट तप्पु कबाहक कीसि, पापाल्क कीसि आत्माते हासि मत्तिर. गानि मीकुनगुडा किरिस्तु जीवाते तेहातोर.

2 मिमेट मुन्ने इद दुनियातोर ताकाना रीति-रिवाजकुन पीसि ताकिंदिर. पोरो वळिते तिरियना देय्याल्कुना मुख्यल बल्हा ताकिस्ते अल्हा ताकिंदिर. इंदकेळ्कगुडा पेनदा पोल्ले परकारम ताकवोर लोप्पो अद आत्मा कबळ कीसेके मंता.

3 मनम अंतोरमगुडा मुन्ने मना मेंदुलता आसेन परकारम पिस्सुंदुम, मेंदुल आनि मनसुना इच्छां पुरागा कियानाहाटी कराब विचाराल्क कीसेके, ओरा नड्डुम ओरालेसी ताकतोरमे आंदुम. पेनदुन बरोसा कियवोरा गुनम मत्ताप मना गुनमगुडा मत्ताहेंका, मनम पेनदुक होंग वायाना पिस्वर पिस्सेक मत्तोम.

4 गानि पेन बच्चोने दयागल्लद आंद, अद दाना पेद्दा पावरमते मनाकुन पावरम कीता.

5 मनम तप्पु कबाहक कीसि हासि मत्तास्के मनाकुन अद किरिस्तुनतोनि जीवाते तेहाता. पेन कुर्पा कीताहेंकेन मीकु मुक्ति दोर्कता.

6 अचोने आयाका किरिस्तु येसुनतोनि मनाकुन जीवाते तेहाचि, स्वर्गमते ओनतोनि मनाकुनगुडा उपिस्ता.

7 इंका किरिस्तु येसुन मनाहाटी लोहचि मनाकुन वेल्लेन पावरम कीता. इल्हा पेन मनापोरो लेक्का हिल्वच्चोन कुर्पा कीता, इदुन वायाना कालमते अंतोर्क हूपसानाहाटी पेन अल्हा कीता.

8 पेन कुर्पा कीताहेंकेन मिमेट किरिस्तुनपोरो विस्वासम कीतिर. मीवा विस्वासमतुन पीसि मीकु मुक्ति दोर्कता. इदंता मीवा कयदाल जर्गतद आयो गानि पेन हीता वरम आंदु.

9 इद कबाहकुनाहेंदाल दोर्कतद आयो, अदुनहाटी बोरे पोंगुडतनम वेह्कुना मन्नि.

10 बारित्ते, पेने मनाकुन पुट्टिस्ता. मनम किरिस्तु येसुनलोप्पो बेसता कबाहक कियाना इंचि अद मनाकुन पुट्टिस्ता. अव बेसता कबाहक बव आंदुंगो अकुन पेन मुन्नेने तयार कीसि इरता.

येसुना लोप्पो मनम अंतोरम उंदे आंदुम

11 मिमेट यहूदि आयवोर इंचि मीवा कतना आयाहिल्ले. गानि बोरेद अय्ते कतना मनकानाहेंदाल आतानो, ओर मोमोट कतना आतोरम, इंचि वेह्कुंतुर. मीकुन बारे, कतना आयवोर, इंचि कारेड्डाल्क कीतुर. अदुनहाटी मिमेट बल्हा मनिदिरो अदुन मति कीम्ट.

12 अद कालमते मिमेट किरिस्तुनलोप्पो कलियका मत्तिर, मिमेट इस्राएल लोकुल्क आयवाहेंका मीकु पेनदा नियमाल्क दोर्का हिल्लें, करार्क कियाना बारेमते पेन हीता पोल्लेताल मीकुन लक्कु इरमळ जर्गता. मिमेट इद दुनियाते बदे आसे हिल्लुवा, पेन हिल्लुवा पिस्वर पिस्सेक मत्तिटि.

13 मुन्ने मिमेट पेनदागटाल लक्कु मत्तिर. गानि किरिस्तुना नेत्तुरहेंदाल इंदके मिमेट किरिस्तु येसुना लोप्पो पेनदुक दगुरा आतिर.

14 बारित्ते, यहूदिल्लक आनि यहूदि आयवा मना नड्डुम मनाकुन वेरे कियानाहाटी पगातद उंदि गुरे मत्ता, अदुन कूलाहिचि मनाकुन इव्वुर्कुन कल्पतोर किरिस्ते आंदुर. ओनाहेंदाले मनाकु सांति दोर्कता.

15 यहूदिकुन आनि यहूदि आयवोर्कुन इव्वुर्कुनगुडा उंदगा कल्पिसि वरोर पूना मनकन पुट्टिस्ताप, अंटोर्कुन उंदि कीतोer. इल्हा वेरे-वेरे आसि पिसानोर्कुन कल्पतोer. इल्हा ओर्कुन कल्पानाहाटीं ओर ओना मेंदुलतुन हीसि आदेसाल्कुना बव अय्ते यहूदिल्कुना नियमाल्क मत्तांगो, अवुन नासडेम कीतोer. आनि मनाकु सांतितुन हीतोer.

16 पजा ओर ओना जीवा कूसुनपोरो हीसि मना नड्डुम मत्ता पगातुन नासडेम कीतोer. इल्हा वेरे-वेरे आसि मत्ता मनाकुन उंदि मेंदुल कीसि पेनदा लोप्पो कल्पतोer.

17 किरिस्तु इद दुनियाते वासि, पेनदागटाल लक्कु आसि मत्ता मीकु आनि दगोरा मत्ता ओर्कु सांतिता बेसता कबुरतुन वेहातोer.

18 बारित्ते ओनाहेंदाले मनम इव्वुर्मगुडा उंदे पवित्र आत्माते पेनबाबानगा होना परांतोम.

19 अदुनहाटीं मिमेट इंदके परायतोer, वेरे देसेमतोर आयिर, गानि पवित्र लोकुल्कुनतोनि दंताते कूळसि मननोर आनि पेनदा लोता लोकुल्क आंदिर.

20 अचोने आयाका प्रेरितुल्क आनि पेनदा कबुरतोरा पुनादिपोरो येसु किरिस्तुन मूला बंडालेसीं इर्सि दोहता लोहकु मिमेटे आंदिर.

21 पूरा लोन ओनाहेंदाले तयार आंता आनि सामिना लोप्पो उंदि पवित्र गुळि आयालय बेरसेकेन होंचंता.

22 अव्ते मिमेटगुडा पेनदा आत्माहेंदाल पेनदुक मनालय उंदि आसि जेगा तयार कीसेक मंतरि.

3

मर्ममते मत्तव पेनदा पोल्लें पलाते अरमळ

1 मिमेट यहूदिल्क आयिर. अयनागानि मीकु किरिस्तु येसुना बारेमता बेसता कबुर वेहताहाटीं नना पौलुस, जेलने बंद मंतन.

2 पेन दाना कुर्पाता बारेमते मीकु वेहना जिम्मेदारि नाकु हीता इंचि मिमेट केंजसे मंदकिट.

3 पेनदा सत्तेम मोदाला मर्ममते मत्ता, गानि अदुन इंदके पेन नाकु बैय्यरा कीसि हूपिस्ता. इदुना बारेमते मीकु नना मुन्ने गिचचो रासि मत्तन.

4 अदुन मिमेट हदुवकिर अस्के किरिस्तुना बारेमता आ मर्ममता पोल्लें नाक बल्हा तेळियतां इंचि मिमेट एरपाट कीकिट.

5 आ मर्ममता सत्तेमतुन पवित्र आत्माहेंदाल पेन दाना प्रेरितुल्कुंक आनि दाना कबुरतोर्कुंक इंदके बल्हा वेहतानो, अल्हा अस्केटा कालमता लोकुल्कुंक वेहमळ जर्गाहिल्ले.

6 आ मर्ममता पोल्ले बतल इत्ते, यहूदि आयवोर लोकुल्क बेसता कबुर केंजसि किरिस्तु येसुनपोरो विस्वासम इरतुर, अदुनहेंदाल ओरगुडा यहूदि विस्वासुल्कुनतोनि कलियसि येसुनगा दोर्काना हक्कुने वारसदार्क आतुर. इल्हा ओर उंदि मेंदुलतोer आनि पेन हीता पोल्लेते हिस्सादार्क आतुर.

7 पेन दाना कुर्पाता वरम परकारम अद नाकु हीता ताकतहेंदाले नना ई बेसता कबुर वेहाना सेवाकुन आतन.

8 पवित्र लोकुल्कुना लोप्पो नना अंटोर्कुन्ना सिन्नोन आंदुन. अयना पेन नापोरो कुर्पा कीता. अद बतल इत्ते, किरिस्तुनगा लेक्का हिलुवा आसिर्वाद्दाल्क मंतां, अदुना बारेमते यहूदि आयवोरगा होंचि वेहना वरम पेन नाकु हीता.

9 अन्निटतुन पुट्टिस्ता पेन, मोदोलताल मर्ममते इर्सि मत्ता दाना पिलानतुन बल्हा पुरागा कीता, इत्तदुना बारेमते हरेक मनकंक कुल्ला-कुल्ला कीसि वेहनाहाटीं नाकुन पेरता.

10 इंदके पोरो वळिते राज्येम कियाना सक्तिंक आनि अदिकारम ताकिचानवुंक पेन दाना बच्चुंगो तीरकुना तेळितुन कलिसियाहेंदाल हुप्संता.

11 मुन्नेटाले पेन इल्हा कियाना विचारमते मत्ता. इंदके मना सामि किरिस्तु येसुनाहेंदाल पुरागा कीता.

12 किरिस्तुनपोरो विस्वासम इरताहाटीं, इंदके वेरियाकौटा दैरनेमते पेनदा दगोरा होना परांतोम.

13 मीहाटीं नाकु आयाना तकलिपकुन हळसि मिमेट पजोळ्क आयमट इंचि मीकु विनंति कीसेक मंतन. नना अर्ना तकलिपकुनाहेंदाल मीके कदर दोर्कता.

मनसुने किरिस्तु मननाहाटीं पौलुसना पारतना

14 इदुनाहाटीं नना पेनबाबाना मुन्ने टोंगरां ऊनसि पारतना कीसेके मंतन.

15 सिराप ओनाहेंदाले स्वर्गमते आनि बूमिपोरो मनना हरेक कुटुंबकु पोरोल इरमळ जर्गता.

16 पेनबाबाल ओना वेल्लेन कदरगल्ला महिमाता दनमतुन पीसि, ओना आत्मातोनि मीवा पिस्वरतुन लोप्पोटाल इरगा गट्टिगा किट्यिर इंचि पारतना कीसंतन.

17 दीनहेंदाल मीवा विस्वासम परकारम किरिस्तु मीवा मनसुने जेगा पीसि मंतोर. अस्के मरा हिहकु बल्हा बूमिते लोप्पोळ्क होंचि मरातुन गट्टिगा पीसि मंतंगो, अल्हेन मिमेटगुडा पेनदा पावरमता पुनादिपोरो हिहकुनलेसीं गट्टिगा निल्सि मंदकिट.

18 पेनदा लोकुल्कुनतोनि मीकुगुडा किरिस्तुना पावरमता नेरवुन, पोड्गुन, एत्तुन आनि लोतुन तेलिचकुनना ताकत दोर्कि.

19 अचोने आयाका, मना तेल्वितोनि मनम तेलिचकुना परीम, असौटा किरिस्तुना पावरमतुन तेलिचकुंचि, पेनदा गुनमते पुरागा निंडिसि होंटु, इंचि पारतना कीसेके मंतन.

20 इंदके पेन मना पिस्वरता लोप्पो दाना ताकत परकारम कबळ कीसेकेन मंता. इचोने आयो, मनम तल्कानदुंकन्ना, मनम विचारम कियानादानकन्ना एक्को, अद मनालोप्पो कबळ किय्या परता.

21 कलिसियाते किरिस्तु येसुनाहेंदाल बस्केळ्ळक पीळि-पीळिनदाका पेनदुके कदर दोर्कि, आमीन.

4

येसु सामिना लोप्पो अंटोर कलियसि मनना

1 मीकून पेन दाना लोकुल्क आयानाहाटीं केयता, अयते दाना लोकुल्क बल्हा अयते पिसानो अल्हा मिमेट पिस्सट इंचि, सामिनाहाटीं जेलुंक होत्तोन नना मीकु विनंति कीसंतन.

2 दीना अर्तम बतल इत्ते, मिमेट सादा सिंपल मनना, बोर बतल इनिनागानि ओप्के पीसि मनना, वरोंक-वरोर ओर्सकुंचेके पावरमते पिस्सट.

3 पेनदा पवित्र आत्मा मीकून सांतिते उंदि कीता. अयते आ सांतिता एकतातुन मिमेट बेस कापाळसि इराना कोसिसते मंदु.

4 अंटोर विस्वासुल्कुनद उंदे मेंदुल आंद. अव्ते मनना पवित्र आत्मागुडा उंदे आंद. अल्हे अंटोर विस्वासुल्कुनगुडा पेन उंदे आसेते पिस्सालय केयता.

5 मना अंटोरा सामि वरोंरे, मनम अंटोरम उंदे विस्वासम कीतोम आनि बापतिस्मागुडा उंदे बापतिस्मा एततोम.

6 मनाकु अंटोर्क वरोंरे पेनबाबाल मंतोर, ओरे मना अंटोरा पोरो मंतोर, ओर मना नड्डुम मंतोर, अंटोरा नड्डुम ओरे मंतोर.

पेन हियाना वराल्क

7 गानि किरिस्तु, वेरे-वेरे कबाहक कियानाहाटीं, मनावेटाल वरो-वरोंक ओना पूरा मनसुनाल उंद-उंदि विसेस कुर्पाता वरम हीतोर.

8 अदुनहाटींगे ओना बारेमते दर्मसास्त्रमते इल्हा रासि मंता:

“ओर पोरो एत्तु एक्किसि होत्तोर, जेलने मत्तोरुन दोहचि ओतोर,

मनकालोर्कुंक वराल्क हीतोर.”✧

इंचि रासि मंता.

9 ओर, “पोरो एक्किसि होत्तोर” इत्ता पोल्लेता अर्तम बतल? दीना अर्तम, ओर बूमिता हिळुदाकागुडा रेय्सि वातोर इत्तापे गदा!

10 बोर अयते हिळु रेय्सि वातोर, ओरे बतले तक्को मनाकोटा अन्निततुन पुरागा कियानाहाटीं अन्नि मब्बुकुंकन्ना एत्तु जेगाते एक्किसि होत्तोर.

11-12 ओर, पेनदा सेवाहाटीं पवित्र लोकुल्कुन तयार कियालय आनि किरिस्तुना मेंदुललेसीं मनना कलिसियातोर्कुन बेस बक्तिते, बरोसाते बेसांगोतनाहाटीं, इच्चुर्कुन प्रेरितुल्क, इच्चुर्कुन पेनदा कबुरतोर, इच्चुर्कुन बेसता कबुर वेहानोर आनि इंचिच्चुर्कुन बारे पास्टर आनि कराहनोर इंचि पेर्सि ओर्कु वराल्क हीतोर.

13 दीनहेंदाल मनम अंटोरम पेनदा मरिना पोरोटा विस्वासम आनि ओना बारेमता जानकारिते उंदासि मनंतोम. इंका बद्दे पोल्लेते आयि किरिस्तु बल्हा अयते बतले तक्को हिलाकोटा मत्तोर, अल्हेने मनमगुडा मना परंतोम.

14 इल्हा मत्ते बतल आंता इत्ते, बोर अयते आबद्दम, तप्पुड बोदां कराहचि मनाकुन विस्वासमता हरदाल तप्सालय ह्ळंतुरो, असंटोरा पोल्लेने अर्काकोटा, वळिकु हीके-हेके आयाकोटा मनंतोम. इल्हा मुन्ने मनम सिना पिलाकुनलेहका आयोम.

15 इंका पावरमते निजम वळकसेक, मना तल्लालेसीं मनना किरिस्तुना बेसतनम मनालोप्पो बेर्सि, मनम हरेक पोल्लेते ओनालेसीं आयागोम.

16 मेंदुल्ले मनना कील्कु-नराल्कु मेंदुल्ला वेरे-वेरे बागाल्कुन बल्हा अयते उंदांनु-उंदि अंटिच्चि इरान्तो, अल्हे किरिस्तुना मेंदुल आसि मत्तोरुन ओरे अंटिच्चि इरंतोर. मेंदुल्ला हरेक बागम, मेंदुलतोनि कलियसि अवुना कबाहक अव बरोबर कीतेने मेंदुल बेस बरोबर मनंता. अल्हेने कलिसियातोरगुडा वरोन-वरोर पावरमते ह्ळसेक, ओर्क पेन हीता कबाहकुन बरोबर कीते, ओर पेनदापोरोटा बरोसाते बेस बेर्संतुर.

पेन हियाना पूना गुनाल्कुने बेस एदगट

17 अदुनहाटीं सामिना पोरोलते नना मीकु विनंति कीसि वेहानद बतल इत्ते, यहुदि आयवोर बल्हा ओरा बत्तक ओज्जुवा विचाराल्कुन परकारम ताकंतुरो, अल्हा मिमेट इंदकेटाल मर्रा ताकमट.

18 ओरा विचाराल्क बत्ताके ओज्जाकोटा आतां. ओर्कु तेल्चि तक्को मत्ताहाटीं ओरा मनसु बंडालेसीं गट्टिपळसोत्ता. अदुनहाटीं ओर पेनदुन तेल्चिचकुना हिल्लुर. इल्हा पेन हियाना पूना पिस्वरताल ओर्कुन लक्कु कियमळ जर्गता.

19 ओर्कु सिग्गु इत्तद बतले हिल्लुवाहेंका अन्नि तीरकुना कराब कबाहक कियाना लालचतेन ओर कूस मनंतुर.

20 गानि मिमेट किरिस्तुना बारेमते करियतस्के इसोटा पोल्लें करिया हिल्लिर.

21 मिमेट निजमे किरिस्तुना बारेमता पोल्लें केंजतिर. अचोने आयाका येसुना बारेमता सत्तेमतुन, बल्हा मत्तद अल्हे करियतिर.

22 अयते मीवा पडाना पिस्वरते मत्ता गुनाल्कुन इंदके तेंडसि पोहाट. अव गुनाल्क मीलोप्पो कराब कबाहक कियाना आसे पुट्टिचि मीकुन पाडगीसि पोहंतां.

23 मिमेट बतल अयते करियतिरो अदुन पीसि, मीवा आत्माते पूना गुनाल्क वासि मिमेट बेस एदगट.

24 पूना गुनाल्कुन पेन दानालेहका सत्तेमते तयार कीता, पवित्र कीता. अदुनहाटीं मीवा पडाना गुनाल्कुन होळसिसि पेन हियाना पूना गुनाल्कुने ताकट.

पेनदा आत्माकु दुक्कम हियमट

25 मनम अंतोरम उदे मेंदुल्ला वेरे-वेरे बागाल्क आताहाटी, इंदकेटाल वरोनतोनि-वरोर आबदुदम वळ्कमळ होळसिसि, हरेक मनकल सत्तेमे वळ्कगोम.✧

26 होंग आम्टु गानि, पापम कियमट. पोळ्द अर्का मुन्नेन मीवा होंग सल्लारगोम.✧

27 मीवा पिस्वरते देय्यमतुन होळिया हियमट.

28 बोर अय्ते मुन्ने दोंगातनाल्क कियुंदुर, ओर इंदके अदुन होळसियना. सतता कय्कुने कस्टम कीसि, बेस तरिकाते कमांचना. अस्केन, अक्सरम मत्तोरक ओर सहायम किया परंतोर.

29 मीवा तोळ्दाल बस्केन कराब पोल्ले पेयसानायो. केंजानोर्कु क कुर्पा दोर्किसि, ओरा बक्तिते पायदा वायाना बेसता पोल्लेगे पेयसगोम. ओरा अक्सरमतुन पीसि मिमेट वळ्काना.

30 मुक्तिता रोजुनदाका, “ईर ना लोकुल्क” इंचि पेन मीपोर्री उंदि सिक्का तंचि इर्ता. अदुनहाटी मिमेट दाना पवित्र आत्माकु दुक्कम वायाकोटा पिस्सट.

31 मिहगा मनना हेळाहना गुनम, पगा, होंग, वरगेयना बुद्धि, अपमानम कियाना बुद्धि इसोंटा अन्नि कराब गुनाल्क-पोल्लेन मिहागटाल लक्कु कीम्टु.

32 वरोनपोर्री वरोक जीवा नोसि बेस दया हूपिच्चेक, पेन बल्हा किरिस्तुनाहेंदाल मीवा तप्पुकुन मापि कीता, अल्हेन मिमेटगुडा वरोना तप्पुकु वरोर मापि कीम्टु.

5

पावरमते पिस्सट

1 मिमेट पेनदा पावरमगल्ला पिलाल्क आंदिर, अदुनहाटी पेन कीताप मिमेटगुडा कीम्टु.

2 किरिस्तु मनाकुन पावरम कीसि मनाहाटी पेनदा मुन्ने मोक्कु आसि, पेनदुक नच्चना गुगलेमलेसी ओनद ओर बलि आतोर. अदे पावरमते मिमेटगुडा ताकट.

3 मीवा नड्डुम बोगमतनमता बारेमते, अन्नि तीरकुना अपवित्र पोल्लेना बारेमते इंका आस्तिक संबंदिस्ता पोल्लेना बारेमते आयि, बस्केने उदुदुलि जर्गानायो. बारित्ते पवित्र लोकुल्क इसोंटवुना बारेमते उदुदुलिगुडा किय्युर.

4 अचोने आयका रोता पोल्ले, तेल्वि तक्को पोल्ले, कराब कारेड्डाल्क मिमेट कियानायो, मीकु अव सोबांचो. मीवा तोळ्दाल सिराप पेनदुक दन्यवाद इनना पोल्लेगे पेयसगोम.

5 बारित्ते, बोगमतनम कियानोर, अपवित्र मनकल हिलाकोटे लालचि मनकल (लालच कियमळ इत्ते, बोम्माना पूजे कीतापे आंता) ईरकु बोर्के आयि, किरिस्तुना आनि पेनदा राज्यमते वारसाहक्क हिल्ले, इंचि मीकु तेळियसे मंता.

6 उत्तुता पोल्ले वळ्किसि मीकुन बोरन्ना पोक्कते अरहानायो हुळाट. बारित्ते इसोंटा कबाहकुनहेंकेन पेन दाना आदेस परकारम ताकवोरपोर्री होंग हूपसंता.

7 अदुनहाटी मिमेट इसोंटा लोकुल्कुनतोनि पोत्तु कियमट.

वेलगुने पिस्सट

8 उंदास्के मिमेट हीकटते पिस्सेक मत्तिर. गानि सामिनपोर्री बरोसा इरताहाटी इंदके मीकु पेनदा वेलगु दोर्कता. अदुनहाटी वेलगुने पिस्सानोरा संतानमलेहका ताकट.

9 वेलगुने पिसते सिराप अन्नि तीरकुना बेसतनम, नीतितनम आनि निजम इवे दिसंतां.

10 इंका बतल कीते सामिं कुसि दोर्कार, इंचि सामिन कूस कियाना विचारमतेन बस्केळ्क मंटु.

11 अचोने आयका, बताके ओज्जुवा हीकटता कबाहकुने मिमेट पोत्तु आयमट. गानि असोंटा कबाहकुन पलाते अरहट.

12 बारित्ते मक्किस कियना ओरा कबाहकुना बारेमते वळ्कमळगुडा पेदुदा सिगलसेटे आंदु.

13 गानि इसोंटा पलाते अरता अन्नि कबाहक वेलगुने दिस अर्तां. अन्निटवुन दिस्सानाल कियानद वेलगु आंद.

14 अदुनहाटीगे मरि,

“अरे निद्राते मनानोना, हातोरारवेटाल तेदसि उदुदा.

किरिस्तुना वेलगु नीपोर्री मेर्सता,”✧

इंचि रासि मंता.

बुद्धिदेते ताकट

15 अदुनहाटी मिमेट बल्हा ताकंतिर? परमेर्का कीसि हुळाट. बुद्धि हिल्वोनलेसी ताकमट, बुद्धि मत्तोनलेसी ताकट.

16 इव रोजकु बेसतव आयो, इंचि दोर्कता हरेक मोकातुन बेसताहाटी वाळकुंटु.

- 17 अदुनहाटीं सामिना इच्चा बतल मंतानो, बेस एरपाट कीसि ताकट, बुद्धिद हिल्वोरलेसीं मनमट.
 18 इगा कल उंचि उंगसेके मनमट, कल रिम्माते मीहेंदाल पापम जर्गी परंता. कल उंचेके मनानदानकन्ना पवित्र आत्माते निडिसि मंटु.✱
 19 इकावरोनतोन वरोर बस्केळक बक्ति पाटां, पेनदुन तल्सकुनना पाटां, पेनदा पाटां पारसेके, सामिन मीवा मनसुने बस्केळक मति कीसेके मंटु.✱
 20 अन्नि पोल्लेनाहाटीं, मना सामि येसु किरिस्तुना पोरोलते मना पेनबाबांक बस्केळक दन्यवाद कीसेके मंटु.
 21 मनसुने किरिस्तुना वें ईर्षी वरोंक-वरोर लोंगिस मंटु.

मुत्तो-मुय्दोंक कोन्नि आदेसाल्क

- 22 मरमि आता मुरताहकुनिटा, बल्हा अय्ते मिमेट सामिकु लोंगिस मंतिटो, अल्हेन मिमेट मीवा मुय्दुकुंकगुडा लोंगिस मंटु.✱
 23 बारित्ते, किरिस्तु बल्हा कलिसियाता तल्लालेसीं मंचेके कलिसियातुन ताकसंतोर, अल्हेन मीवा मुय्दो मीकु तल्लालेसीं मंतोर. कलिसियातुन पिसागोटनोरगुडा किरिस्ते आंदुर.
 24 कलिसियातोर अंतोर बल्हा किरिस्तुंक लोंगिस मनांतुर, अल्हेने, मुत्तोहकगुडा अन्नि पोल्लेने अबुना मुय्दुकुंक लोंगिस मनागोम.
 25 अय्ते ए मरमि आता मांडसुरिटा! किरिस्तु बल्हा कलिसियातुन पावरम कीसि, दानाहाटीं ओना सतता जीवातुन हीतोर, अल्हेन मिमेटगुडा मीवा मुत्तोहकुन पावरम कीम्टु.
 26 अस्के दान किरिस्तु, पेनदा पोल्लेतोनि* सक्कगा साप नोर्षि पवित्र कींतोर.
 27 अस्के अद पवित्र आनि दोसेम हिलाकोटा आंता. पजा दान बदे कसुरता डाग हिलुवा, पापमता मच्चा हिलुवा इका बदे तप्पु हिलुवा जगाजगा मेर्सना कलिसिया कीसि, ओना दग्गेरा निल्हाकुंतोर.
 28 अल्हेने मुय्दुकुंकगुडा ओर ओरा मेंदुलतुन बल्हा पावरम कींतुर, अल्हेन ओर ओरा मुत्तोहकुन पावरम कियगोम. सतता मुत्तोन पावरम कियानोर, सतातुनगुडा पावरम कींतोर.
 29-30 बोर मनकल बस्केने ओना सतता मेंदुलतुन हय्साकोटा मनाहिल्लोर. दान्क बदुल ओर दान बेस ऊळगेम कींतोर. अल्हेन कलिसियातोर मनम अंतोरम किरिस्तुना मेंदुला वेरे-वेरे बागाल्क आंदुम. अदुनहाटीं किरिस्तु ओना कलिसियातुन बेस हळकुंतोर.
 31 इदुना बारेमते दर्मसास्त्रमतेगुडा,
 “इदुनहाटींगे वरोर मांडसा ओना तल्लुर-बाबोन होळसि,
 ओना मुत्तोनतोन कलियसि मनांतोर, ओर इक्वुर उंदे मेंदुल आसि पिस्संतुर,”
 इंचि रासि मंता.✱
 32 इद अय्ते उंदि पेद्दा मर्मम आंद. अयना नना अय्ते किरिस्तु आनि कलिसियाता बारेमते वेहचंतन.
 33 बल्हैना बेसे! मीवावेटाल हरेक मांडसा, मीवद मिमेट सतातुन बच्चोन पावरम कींतोर, अचोने मीवा मुत्तोनगुडा पावरम कीम्टु. अल्हेने मुत्तोगुडा मुय्दोना कदर कियगोम.

6

पिलाल्क, तल्लुर बाबो बल्हा मनना?

- 1 पिलाल्कुनिटा, सामिना पोल्ले परकारम, मिमेट मीवा तल्लुर-बाबो वेहताप ताकट, इदे मीवाहाटीं बेस.
 2-3 बारित्ते, “मिमेट मीवा तल्लुर-बाबोना कदर कीम्टु, अस्के मीकु अन्नि बेसे जर्गीता आनि बूमिपोर्रीं मीवा आव्सुगुडा बेरसंता,” इल्हा दर्मसास्त्रमते रासि मंता. पेन हियाना पोल्ले कलियसि मनना मोदाटा आदेस इदे आंद.✱
 4 बाबालोरिटा! मिमेट मीवा पिलाल्कुंक होंग वाया हियमट. दान्क बदुल सामि वेहता हरदुन, पोल्लेन ओर्क कराहसेके ओर्कुन बेस पोस कीम्टु.✱

मालक आनि दासुड बल्हा मनना?

- 5 दासुल्कुरिटा! इद बूमिपोर्रींटा मीवा मालकुल्कुना पोल्लेपोर्रीं मंटु. मिमेट किरिस्तुना कदर कीताप, ओरदगुडा कपटम हिलुवा मनसुनाल कदर कीसेके ओर्कु वेरियसि ताकट.
 6 सिराप लोकुल्क कूस आयगोम इंचि हुप्सालय सेवा कियानोरलेसीं मिमेट कियमट. दानकु बदुल, पेनदा इच्चा परकारम किरिस्तुना सेवा कियाना दासुल्कुनलेसीं मनसु तासि कबळ कीम्टु.
 7 मिमेट कियना सेवा मनकानद आयो गानि सामिना सेवा आंद इन्कुंचि कुसिते कीम्टु.
 8 कबळ कियानोर दासुडे आयिर, दासुड आयवोर आयिर! ओर कियाना बेस कबळतुन पीसि ओन्क सामिनाहेंदाल इनाम दोर्कता, इद मिमेट मति इर्षीट.

✱ 5:18 नीतिवचन 23:31-32; गलातिया 5:21-25 ✱ 5:19 कुलुसि 3:16 ✱ 5:22 कुलुसि 3:18; 1 पत्र 3:1; उत्पत्ति 3:16 * 5:26 पोल्लेतोनि इग्गे पेनदा पोल्ले उंदि एतसोटद इंचि अर्तम कीकुनना. ✱ 5:31 उत्पत्ति 2:24 ✱ 6:2-3 निर्गमन 20:12; व्यवस्ताविवरन 5:16 ✱ 6:4 व्यवस्ताविवरन 6:7; नीतिवचन 3:11-12; नीतिवचन 19:18; नीतिवचन 22:6

9 मालकुरिता! मिमेट मीवा दासुल्कुन वेरहुळ-बेदरिच्चुळ कियमत, ओर्कुन बेस हळकुंटु. मीवा इव्वुरागुडा मालक स्वर्गमते मंतोर. ओर सिन्ना-पेद्दा हळोर, इद मति इर्कुटु.✱

पेन हीता आयुदाल्कुन वाळकुंटु

10 आकिरते नना वेहानद बतल इत्ते, सामिनतोनि ओना पेद्दा ताकतते उंदासि मंटु.

11 देय्यमता ताकतता मुन्ने वेरियाकौटा नित्तालय मिमेट पेन हीता अन्नि आयुदाल्कुन* वाळकुंटु.

12 मना लडाइ मनकालोरा विरोदमते आयका, हीकट राज्यमतुन ताकसानोरा विरोदमते, हीकट राज्यमता अदिकारिल्लकुना विरोदमते, हीकट राज्यमते मनना सक्तिना विरोदमते आनि मब्बुने दिस्सना दुस्ट सक्तिना विरोदमते मंता.

13 इंचि आ सेड्डा रोजक्क वातस्के वेरियाकौटा नित्तालय मिमेट पेन हीता अन्नि आयुदाल्कुन पीकुंटु. अस्के मिमेट कियानद अन्नि पुरागा कीसि आकिरदाकागुडा नित्तिसि मना परकिट.

14 अदुनहाटी मिमेट सत्तेमतुन नडि पट्टालेहका दोह्चि, नीतितुन इनुम अंगिलेहका† मेंदुल्क केरसि,✱

15 सांति हियना बेसता कबुरतुन वेहना तयारिता हेरपुह्कुन कालकुंक केरसि तयारते मंटु.✱

16 इव अन्निकन्ना मुक्केमातद बतल इत्ते, लडाइ कियनेके मिहगा डालुनलेहका‡ विस्वासम मनगोम. अस्के देय्यमताहेंदाल पोतसेके वायना अन्नि बानाल्कुन मिमेट आपा परकिट.

17 इंका मुक्तितुन हेल्मेटलेहका§ तल्लक कळाह्चि, आत्माता कसेर इत्ते पेनदा पोल्लेतुन कसेरलेहका कय्दे पीकुंटु.✱

18 अन्नि वेलाने पवित्र आत्माते बस्केळ्ळक पारतनां, विनंति कीसेके मंटु. इंका अंतोर विस्वासुल्कुनाहाटीं आगाकौटा बस्केळ्ळक पारतना कीसेके मंटु.

19 इंका नना बस्के-बस्के अय्ते पेनदा पोल्लें कराहलय तोड्डि तेहांतन, अस्के-अस्के नाकुंदि बेसता कबुर दोर्कालय नावाहाटींगुडा पारतना कीम्टु. दीनहेंदाल नना पेनदा बेसता कबुरते मत्ता मर्ममतुन वेरियाकौटा वैरैतोक वेहा परकन.

20 दीनाहाटीगे नना कयकुंक बेडीं वाटसि मत्ता पेनदा कबुरतोन आतन. दीनहेंदाल नना बल्हा अय्ते वळ्ळागोमो अल्हा वळ्ळकालय नाकु दैरनेम दोर्कानाहाटीं पारतना कीम्टु.

21 तुकिक्कुस इनना वरोर पावरमगल्ला दादाल मंतोर. ओर सामिना वरोर बेस विस्वासमगल्ला सेवक आंदुर. नना इगे बल्हा-बतल मंतन इंचि अन्नि पोल्लें मीक्कु वेहानुर.

22 मावा परिस्तिति बल्हा मंता इद मीक्कु तेळियागोम आनि मी अंतोरा जीवांक दैरनेम, सांति दोर्कगोम, इंचि नना ओन मिहगा लोहतन.

23 अंतोर विस्वासुल्कुंक पेनबाबाल आनि सामि येसु किरिस्तुनहेंदाल, सांति आनि विस्वासमतोनि पावरम दोर्कि.

24 मना सामि येसु किरिस्तुन बोर अय्ते आगाकौटा पावरम कीतुर, ओर अंतोरतोनि पेनदा कुर्पा हमेसा मन्निकांटी.

✱ 6:9 व्यवस्ताविवरन 10:17; 2 इतिहास 19:7 * 6:11 आयुदाल्क विसरें. † 6:14 इनुम अंगि इत्ते लडाइ कियनेके मेंदुल्क कसेटे कोहकतस्के कसेर होळियाकौटा केरनद उंदि इनुमता अंगि. ✱ 6:14 यसायाह 11:5; यसायाह 59:17 ✱ 6:15 यसायाह 52:7; नहम 1:15 ‡ 6:16 डाल लडाइ कियनेके मुन्नेटा सिपाइ कसेटे तंतस्के ओना कसेटुन आपालय कय्दे पियानद उंदि वस्तु. § 6:17 हेल्मेट तल्लक देब्बा दलगाकौटा तासकुनना उंदि वस्तु. इद कालमते लोकुल्क मोटोर सायकलते होननेके तासकुंतुर. ✱ 6:17 यसायाह 49:2; इब्रि 4:12

पिलिपिया पिलिपिया विस्वासुल्कुंक पौलुसना सिट्टि

इद सिट्टिता बारेमते गिचचो परिचयम

रासतोना पोरोल: पौलुस

रासता कालम: इसवि सन 60

पौलुस इद सिट्टितुन जेलने मत्तास्के पिलिपिया कलिसियातोरक रासतोर. जेलनाल पेय्सि बेसता कबुर वेहना कबळतुन मरा सुस्व कियना इंचि ओना आसे. इका पौलुस इल्हा रासतोर गदा, “येसु किरिस्तु बोगांचतसोंटा तकलिपकु आनि इंदके नना बोगांचनसोंटा तकलिपकु, येसु किरिस्तुनपोरों विस्वासम इरताहाटी मीकगुडा वायावच्चु. असोंटस्के किरिस्तुनपोरों विस्वासम इरताहाटी दोर्कता तकलिपकुन पेनदा आसिर्वाद इनकुंदु,” इंचि रासतोर.

पौलुस इद सिट्टि रासता इंकुंदि कारनम बतल इत्ते, पिलिपियाते, “मूसाना नियमकु वेहताप ताकट, हिलाकोटे मीकु मुक्ति दोर्को,” इंचि तप्पुड बोदां कराहनोर मत्तूर. ओरा कराहमळ पौलुसुंक इस्टम हिलाका, “नय्कुनलेहका मुचहनोरगटाल हुसारते मंदु,” इंचि वेहालय पौलुस इद सिट्टि रासतोर. अचोने आयका कस्टाल्क, दुक्काल्क वायिनागानि किरिस्तु हुपिस्ता हरदेने अंटोर विस्वासुल्क कलियसि कुसिते ताकना इंचिगुडा पौलुस रासतोर.

बगा बतल मंता

जोहार आनि परिचयम 1:1-11

पौलुसना सतता परिस्तिति 1:12-26

किरिस्तुनतोनि पिस्सना पिस्वर 1:27-2:18

तिमोति आनि इपपरदिसुनाहाटी पिलानकु 2:19-30

पगातोरगटाल जेगर्ता मनना बारेमते 3:1-4:9

पौलुस आनि पिलिपियाता ओना दंटागाहक 4:10-20

आकिरता बोदां 4:21-23

पिलिपिया कलिसियातोरक पौलुसना जोहार

1 पिलिपिया सहरते येसु किरिस्तुना लोप्पो मनना पेनदा अंटोर पवित्र लोकुल्कुंक, पेदू दाल्कुंक आनि अदिकारिल्कुनाहाटी नना पौलुस, नावा दंटातोर तिमोति, मोमोट येसु किरिस्तुना सेवाकुल्कुम इद सिट्टि रासेक मंतोम.

2 मना पेनबाबानाहेंदाल, मना सामि येसु किरिस्तुनहेंदाल मीकु कुर्पा, सांति दोर्कि.

पौलुसना पारतना

3 मीकुन नना बस्के-बस्के अयते मति कीतन, अस्के-अस्के पेनदुक दन्यवाद कीतन.

4-5 बेसता कबुर केंजसि विस्वासम कीता रोजुनाल अयते इदवेरदाकागुडा बेसता कबुरतुन वेहना नावा कबळते मिमेट नाकु तोळ मंतिर. अदुनहाटी नना बस्के-बस्के अयते पारतना कीतन अस्के-अस्के वेल्लेन कुसिते मीवाहाटी पारतना कीतन.

6 मीवा नड्डुम इच्चोचोने बेसता कबळतुन पेने सुस्व कीता. इद कबळ पुरागा आयनदाका, इत्ते येसु किरिस्तु मरा तिरियसि वायना रोजुनदाका पेने इद कबाटुन ताकिच्चेक इरता इंचि नाकु पुरागा बरोसा मंता.

7 नना मीवा बारेमते इल्हा विचारम कियमळ बेसे आंद. बारित्ते, नना जेलने मत्तस्के आयि, बेसता कबुर वेहचि अवटे मत्ता निजमतुन हुपिच्चि कापाळसेके तिरियतस्के आयि, इव अन्निटवुने पेनदाहेंदाल कुर्पा दोर्कता, अवुने नावातोनि मिमेटगुडा तोळ मंतिर. अदुनहाटी मिमेट इत्ते नाकु वेल्लेन पावरम!

8 किरिस्तु येसुनलेसी ननागुडा मीकुन पावरम कीतन, इंचि नावा जीवा मीकुन हळानाहाटी बस्केळक तनलाळता. दीनकु कुदूदु पेने गवाइ मंता.

9 मीवा पावरम बेस बेरस्सेक मनना, पेनदाहेंदाल मीकु बुद्धि, मंचि-सेड्डातुन एरपाट कियना तेल्वि बेरसना इंचि नना बस्केळक पेनदुक पारतना कीसेक मन्तन.

10 दीनहेंदाल मिमेट मंचि-सेड्डातुन एरपाट कीसि बेस पिस्वर पिसकिट. अस्के किरिस्तु वातस्के मिमेट अंटोरगुडा ओना मुन्ने नीतिमंतुल्क आनि दोसेम हिलवोर आसि निलकिट.

11 मीवा पिस्वरते येसु किरिस्तु मत्ताहाटी, मिमेट बस्केळक नीति कबाह्के कीसेक मंदना. दीनहेंदाल पेनदा पोरोल, कदर वेल्लेन बेरस्सेक दांता.

बेसता कबुर बेसताहाटीं पौलुसना कुसि

12 नावा विस्वासुल्कुनिटा! मिमेट उंदि पोल्ले अर्तम कीकुंठु, नावा पिस्वरते जर्गता अन्नि गटनां किरिस्तुना बारेमता बेसता कबुर बेरसालये सहायम आतां.

13 इल्हा जर्गताहेकेन, किरिस्तुनाहाटींगे नाकुन जेलने वाटतुर इंचि राजवाडाते कावेल कियना अंटोर सिपाइल्कुंक आनि अगा मत्ता अंटोर लोकुल्कुंक तेळियसोत्ता.

14 इचोने आयका, नना जेलने मत्ताहेका सामिनाहाटीं वेल्लेन मंदि विस्वासुल्कुंक दैरनेम दोर्कता. ओर बोर्के वेरियाकॉटा वेल्लेन दैरनेमते किरिस्तुना बारेमता पोल्लेतुन वेहालय तयार आतुर.

15 अब्देटाल इच्चुर कळक पोत्सि, नावा पोर्रोटा पगा तीरिचकुनालय किरिस्तुना बारेमते वेहचंतुर, इंका इच्चुर बारे बेस उद्देसमते वेहचंतुर.

16 बेस उद्देसमते वेहानोर, नावा पोर्रोटा पावरमहेका अल्हा कीतुर. बारित्ते येसु किरिस्तुना बारेमता बेसता कबुर सत्तेम आंद इंचि हुप्सालये नना इगे मंतन इंचि ओर्क एरपाट मंता.

17 गानि नापोर्रो कळक पोत्सि, किरिस्तुना बारेमता पोल्लेतुन वेहना लोकुल्क मात्रम नना जेलने मननेके नाकु इरगा तकलिप आयागोम इंचि, ओरा सतता पायदाहाटीं अल्हा कीसंतुर.

18 अयना बतल आयो. बेस उद्देसमते आयि, कराब उद्देसमते आयि, अद बल्हे आयि! किरिस्तुना बारेमतेन वेहमळ जर्गसंता इंचि नाकु वेल्लेन कुसि आसंता. आनि नना इल्हेन कुसिते मनंतन.

19 बारित्ते मीवा पारतनां अल्हेन येसु किरिस्तुना आत्माता सहायमतोनि नाकु वायना ई कस्टाल्के नाकुन तप्पाकॉटा पलाते पेचहांतां इंचि नाकु एरपाट मंता.

20 नाकु बसॉटा परिस्तिति वायिना सिग्गु अरॉन, नना इदवेरादाका दैरनेमते किरिस्तुना सेवा कीतन, अल्हेने इंदकेगुडा कीसेक मंतन. नना हायिना-पिस्सिना नावा पिस्वरताहेंदाल किरिस्तुना पोरोल्लुन अंटोर कदर कियगोम इंचि नना वेल्लेन आसेते एदुर हळसेक मंतन.

21 बारित्ते नना पिस्संतन इत्ते किरिस्तुनाहाटींगे. नना हायिनागानि किरिस्तुनगेन दांतन इंचि हामुरगुडा नावा पायदातदे आंद.

22-23 इव रौंडुन नड्डुम नना इरगा अचाहताप आतन. नना पिस्सि मत्ते पेनदाहेंदाल इनाम दोर्कनलायक बेस कबळ किय परंतन. इल्हा नना हामुरतुन पेरकाना मरि पिस्वरतुन पेरकाना नाकु बतले तेळियसेक हिल्ले. नाक अयते इद मेंदुल्लतुन होळसि किरिस्तुनगेन होंचि मंदकन बारे अनपिचंचता. बारित्ते इदे बच्चोनी बेस.

24 गानि नना मीवाहाटीं, पिस्सि मनमळ वेल्लेन अब्सरम.

25 नना पिस्सि मंचि, मिमेट विस्वासमते बेस गट्टि पळना इंका मीवा पिस्वरते मीकु बेस कुसि दोर्कनाहाटीं सहायम कीसेके मीवातोने मनंतन इंचि नाकु पूरा बरोसा मंता.

26 इल्हा नना बस्के अयते मर्रा मिहगा वांतनो, अस्के सामि नावाहेंदाल बतल-बतल अयते कीतोर अबुन केंजसि मिमेट येसु किरिस्तुन वेल्ले कदर हीकिट.

बेसता कबुरते वेहताप पिसालय पौलुसना विनंति

27 बद बतले आयि, मीवा पिस्वर मात्रम किरिस्तुना बेसता कबुरते मत्ताप मनना. अस्के बतल आंता इत्ते, नना मिहगा वायिना, वायाकोन्ना मिमेट अंटोर उंदे आत्माते गट्टिगा बेस मंतरि आनि बेसता कबुरहाटीं अंटोर कलियसि पिस्सेक मंतरि इंचि वैरैतोर हेंदाल नना केंजना.

28 बदे पोल्लेक आयि, बेसता कबुर वेहते तकलिप कियानोर्कुंक मिमेट वेरियमट, दैरनेमते मंडु. मीवा दैरनेमतुन हळसि, मोमोट नासडेम आंतोम, पेन ओर्कुन कापाळंता इंचि तकलिप कियानोर्कुंक तेळियंता. इद पेनदा कबळे आंद.

29 सिराप किरिस्तुन विस्वासम कियालये आयो गानि ओनाहाटीं तिप्पल्क अर्रालयगुडा पेन किरिस्तुनहेंदाल मीकु आसिर्वाद हीता.

30 नना अरता तिप्पल्कुन मिमेट हळतिर, इंदके केंजसंतरि आनि मिमेटगुडा अदे तिप्पल्कुने मंतरि.

2

वरोंक-वरोर बेस हळना

1 किरिस्तुनतोनि कलियसि मीवा दैरनेम बेसता, ओना पावरमहेंदाल मीकु समादानम दोर्कता, मिमेट ओना आत्माते उंदि आतिर, इंका ओना दया मीतोनि मंता.

2 इव अन्नि पोल्लें निजमे गदा! अयते मीवा अंटोरा विचाराल्क बस्केळक उंदे मन्निकांटी, मिमेट वरोंक-वरोर उंदचोने पावरम कीम्पु, मीवा अंटोरद उंदे मनसु, उंदे उद्देसम मनना. इल्हा पिसतिरित्ते नना निजमते पुरागा कूस मनंतन.

3 सतता पायदाताहाटीं आयि, पेद्दातनम हुप्सालय आयि बदे कबळ कियमट. गानि वैरैतोर कदर कीसेके मनम कुद्दु ओरा मुन्ने सिन्नोड आसि मनना.

4 बोरै आयिर, सिराप सतता इस्टाल्कुना बारेमतेन आयो, गानि वैरैतोर बारेमतेगुडा विचारम कियगोम.

येसु सामिनलेसीं सिन्नागासि पिस्सना

5 येसु किरिस्तुना गुनम मत्तापे मीवा गुनमगुडा मनना.

- 6 ओर अयते कुद्दु पेने आंदुर, अयना पेनदालेसी मनना विचारमगुडा किया हिल्लोर.
 7 दान्क बदुल ओर ओनगा मत्ता अदिकाराल्कुन होळसीतोर. होळसिसि वरोर दासुनलेसी आसि मनकन रूपमते इद बूमिपोर्रो पुटतोर.
 8 इल्हा मनकना रूपमते पुटसि ओनद ओर सिन्नगा कीकुत्तोर. इच्चोने आयका पेनबाबाना इच्चातुन पूरा कियालासि कृसनपोर्रो जीवातुनगुडा हीतोर.*
 9 अदुनहाटीं पेन ओन अन्निटव्कन्ना पेद्दु दोड कीसि ओना पोरोल्लतुन अन्नि पोरोलीकन्ना पेद्दु दा कीता.
 10 बारित्ते, मब्बुन पोरोटव, बूमि पोरोटव, बूमि हिळतव अन्नि येसुना मुन्ने टोंगरां ऊनसि ओन्के मोळकाना.
 11 इंका “येसु किरिस्ते सामि आंदुर,” इंचि हरेक नाल्के ओप्कुनगोम. इल्हा पेनबाबांक कदर दोर्कना इंचि अल्हा कीता.

इद बूमिपोर्रो वेडसीलेसी पिस्सट

12-13 अदुनहाटीं नावा पावरमगल्ला विस्वासुल्कुनिटा! नना मीकु वेहनद बतल इत्ते, नना मीवातोनि मत्तस्के बस्केळक मिमेट नना वेहतापे ताकतित. इंदके नना मीवातोनि हिलाकोन्ना गानि अस्केटदानकन्ना एक्को जेगतीं सामिना आदेसकुन पीसि ताकट. पेनदा इच्चा परकारम बतलन्ना कीकुनगोम इंचि मीवा मनसुने वाता इत्ते, अद इच्चा पेने मीवा मनसुने वाटता. अदुन पूरा कियालय गावाले मत्ता ताकतगुडा मीकु पेने हीता. इंचि पेनदुन बेस कदर कीसेके, वेर्रे कोदुदिगा पेन हीता मुक्ति परकारम मत्ता कबाहक कीसेके पिस्सट.

14 बद कबळ कियिनागानि गुल्गाकोटा, जगडम कियाकोटा कीम्टु.

15 अस्के मिमेट बतले दोसेम हिलवा बेस लोकुल्क आकिट. तप्पुड कबाहक किय्याना ई दुनियाता लोकुल्कुना नड्डुम आनि पापि लोकुल्कुना नड्डुम मिमेट बतले दोसेम हिलवोर आसि पेनदा मर्क-मियाह्कुनलेसी मंदकिट. इंका मिमेट हीकटते पिस्वर पिस्सना लोकुल्कुना नड्डुम पोत्तना वेडसीलेसी दिसकिट.

16 पिस्वर हियना पेनदा पोल्लेतुन गट्टिगा पीसि ताकट. इदुना हेंदाल किरिस्तु वायाना रोजुने, मीवाहाटीं नना कीता कस्टम, वितलाटा एर्तम आयाहिल्ले इंचि कुसिते वेहंतन.

17 पेनदा सेवा कियनाहाटीं मिमेट उंदि मोक्कुनलेहका आसि वेल्लेन तिप्पल्क अरसंतरि. इंदता मीकु पेनदापोर्रो वेल्लेन विस्वासम मत्ताहेंका आसंता. अदुनहाटीं इषोटा मीवा मोक्कुनतोनि नावा जीवा हीसि नेत्तुर वारागिच्चालयगुडा नना पजोळ्क होन्नोन, गानि वेल्लेन कूस मनंतन.

18 इल्हा मिमेट इरगा कूस मंटु, मीवातोनि ननागुडा कूस मनंतन.

तिमोति आनि इपपरदिस ईर बेस सेवाकुल्क आंदुर

19 तिमोतिन मिहगा बिरानेन लोहकन इंचि नना सामि येसुनाहेंदाल आसे पळसंतन. ओर मीवा बारेमता कबुर नाकु वासि वेहनुर, अस्के नाकु इरगा कुसि आयार.

20 मीवा बेसताहाटीं मनसुनाल चिंता कियानोर नहगा ओन्क तप्पा वेरे बोरे हिल्लोर.

21 अंतोर ओर-ओरा कबाह्कुने मुळ्गिसि मंतुर, येसु किरिस्तुना बारेमते विचारम कियानोर बोरे हिल्लुर.

22 गानि तिमोति असंतोर आयोर. वरोर मर्रि बाबनतोनि कलियसि कबळ कीताप, ओर बेसता कबुर वेहना सेवाते नावातोनि इमानदारिते कस्टपळतोर. ओना गुनम बसंतदो मीकु बेस एरपाट.

23 जेलनाल नाकुन होळसीतुरो, होळसुरो इद पोल्ले तेळियतारित्ते ओन नना मीहेके लोहकन इंचि आसे पळसंतन.

24 ननागुडा बिरानेन मिहगा वांतन, इंचि सामिनपोर्रो नाकु पुरागा बरोसा मंता.

25-26 नाकु अब्सरम अरतस्के सहायम कियनाहाटीं मिमेट इपपरदिसुन नाहेके लोहतिर. बेसता कबुर वेहनेके वरोर सिपाइन लेहका ओर नावा तोळ मत्तोर आंदुर, ओर नावा तम्मनसंतोर आंदुर. गानि ओन मर्रा मीहेके लोहना इंचि नावा मनसु मंता. मीकुन ह्ळालय ओर इरगा गाबर आसंतोर. ओर बिमार अरता संगति मिमेट केंजतिर इंचि ओन्क तेळियतस्के ओर वेल्लेन नाराज आतोर.

27 ओर बिमार अरिं हायानाल आसि मत्तोर इद निजमे! गानि पेनदा दया ओनपोर्रो मत्ताहेंका ओन्क बतल आयाहिल्ले. ओर बिमारताल बेस आयाकोटा मंचि मत्ते, नावा दुक्कम इंका बेरसि मनवळ इंचि पेन नावा पोरोगुडा दया हुपिच्चि ओन बेस कीता.

28 अयते ओन मिहगा बल्हैना लोहना इंचि नना विचारम कीतन. ओर मिहगा वाते मिमेट ओन ह्ळसि कूस आकिट, अस्के नावा चिंतागुडा तक्को आंता.

29-30 मिमेट नावाहाटीं किया पर्वा सेवातुन ओर ओना जीवाक तेगिचि पूरा कीतोर. किरिस्तुना कबळतुन पूरा कियनाहाटीं ओर हायालय आसि मत्तोर. अदुनहाटीं ओर मिहगा वातस्के मावा दंटाता विस्वासि इंचि सामिना पोरोलते मिमेट ओन बेस कल्पकुंटु. ओनालेसी सेवा कियना हरेक मनकना बेस कदर कीम्टु.

3

विस्वासमतेन नीतिमंतुल्क आया परांतुर

* 2:8 पेद्दा-पेद्दा तप्पुक कीतोरुके ई कृसता सिक्सा हीतुर.

1 विस्वासुल्कुनिटा! आकिरते नना इंकुंदि मल्का वेहांतन, पेनदापोर्रोटा मीवा विस्वासमते मिमेट कूस मंटु. रासता पोल्लेगें ऊके-ऊके रासालय नाक बतल तकलिप आयो. बारित्ते इव पोल्ले मीकुन तप्पुड बोदानाल कापाळंतां.

2 अदुनहाटीं तप्पुड कबाहक कियना नयकस्केल गुनमतोरगटाल जेगर्ता मंटु. कतना* रिवाज कीतेन नीतिमंतुल्क आंतुर इंचि ओर कराहंतुर.

3 गानि मनकालोरा कबाहकुनपोर्रो बरोसा इरताहेंका मनाकु मुक्ति दोर्कता इंचि आयो. येसु सामि मनाकुन पिसागोटतोर इंचि ओन्क मनम बस्केळक कदर हीतोम. अदुनहाटीं पेनदा आत्मा वेहताप दान मोळकानोरम मनमे निजम कतना आतोरम आंद, ओर आयुर.

4 बोरन्नागिंटा सतता कबाहकुनपोर्रो बरोसा इरसि पोंगसेके तिरियानयते, नावा कबाहकुनपोर्रो बरोसा इरसि पोंगालय ओनकन्ना एक्को कारनाल्क नहगा मंतां.

5 अद बल्हा इत्ते, नना पुट्टा एनिमिदि रोजकुंके नावा कतना आता, नना इस्राएल देसेमते पुट्टा पिच्चर यहूदि जातितोन, बेंजामिनना गोत्रमतोन आंदुन, मूसाना नियमकुन उंदि पोल्लेगुडा तप्पाकोटा पीसि ताकाना परिसिल्लकुना गुंपुनोन आंदुन, इब्रानि कुंटुबते पुट्टा इब्रानि मनकन आंदुन.

6 जोसने वासि, नना कलिसियातुन वेल्लेन तकलिप कियुंदुन. इंका मूसाना नियम परकारम नीतिते ताकमळते अयते नना बदे तप्पु किया हिल्लेन.

7 इव अन्नि पोल्ले नाकु वेल्लेन पायदातव इंचि नना मुन्ने इनकुनुंदुन. गानि इंदके किरिस्तु नावाहाटीं कीतदुन मुन्ने, अव अन्नि एर्तेम इंचि नाक तेळियसोत्ता.

8 अचोने आयाका, नावा सामि येसु किरिस्तुन एरपाट कीतदे पेद्दा पोल्ले आंद. कळमतव अन्नि अट्टि पोल्लेगें, येसु किरिस्तुन दोर्किचकुनालय अव अन्निन नना लेक्का किय्योन कचरा इनकुंतन.

9 इंका किरिस्तुनतोनि उंदि आसि मनमळे नावा उद्देसम. मूसाना नियमपोर्रो बरोसा कीसि नीतिमंतुड आया पराहिल्लेन, गानि किरिस्तुनपोर्रो विस्वासम कीताहाटीं पेनदा नदरते नीतिमंतुड आतन.

10-11 येसु किरिस्तुन आनि ओर हासि मर्रा जीवाते तेदता ताकततुन तेलपिचकुनना इंचि नाकु मंता. ओर बोगांच्ता तकलिपकु आनि हामुरतुनगुडा बोगांचि, ओनलेह्केन नाकु आयगोम. बल्हा अयनागानि उंदि रोजु पेन नाकुन हामुरताल जीवाते तेहंता इंचि नावा आसे.

पेनदा इनामतुन दोर्किचकुनालय वित्सेक मनना

12 पोरो बव पोल्ले अयते रासतन, अव नावा पिस्वरते पूरा आतां इंचि वेहोन. अगा एवतन इंचि इनोन, गानि बगा एवाल्य अयते किरिस्तु नाकुन पीतोर, अगा एवाल्य नना वित्सेक मंतन.

13 विस्वासुल्कुनिटा! नना अगा एवतन इंचि विचारम किय्योन, गानि इद कबळ कीतन. पज्जो जर्गता पोल्लेन मति मरंग्गि, मुन्ने जर्गना पोल्लेन अंदकुनालय वित्सेक मंतन.

14 स्वर्गमतगा एवानोर्कुंक पेन बद इनाम हीतन इंचि केयता, अद इनामतुन येसु किरिस्तुनाहेंदाल दोर्किचकुनालय नना वित्सेक मंतन.

15 अदुनहाटीं मना लोप्पोटाल विस्वासमते बेस बेर्सतोरम मनम अंतोरम, इव अन्नि पोल्लेना बारेमते उंदासि मंदकोम. ओक्कला बद्दना पोल्ले बारेमते मीवद वैरे बतलन्ना विचारम मत्ते, अदुनगुडा पेन मीकु समजांचि वेहंता.

16 अयनागानि मनम मात्रम पेन मनाकु इदवेरादाका हुपिस्ता सत्तेमतुन पीसे ताकसेक मनना.

17 विस्वासुल्कुनिटा! मिमेट अंतोर उंदासि, नना ताकतापे ताकट. इंका मोमोट वेहताप बोर अयते ताकसंतुरो, ओर्कुन हळसि मिमेट करियट.

18 बारित्ते वेल्लेटुर लोकुल्क किरिस्तु कूसुनपोर्रो हातोर इत्ता पोल्लेक विरोदमते ताकसेक मंतुर. ओर किरिस्तुना कूसता पगातोर आंदुर. ओरा बारेमते नना मीकु बच्चुंगो मल्कां वेहतन, इंदकेगुडा अळसेके वेहासेक मंतन.

19 आकिरते ओर नासडेम† आयानुर, ओरा पिस्वर पीटाहाटींगे. सिग्गु होनना कबाहक कीसेके ओर पेद्दातनम वेहकुंतुर. दुनियाता पोल्लेन पोरेन ओरा मनसु मंतां.

20 गानि मनम अयते ई दुनियाता लोकुल्कुम आयोम, मनम स्वर्गमता लोकुल्कुम आंदुम. अगाटाले मनाकुन पिसागोटानोर सामि येसु किरिस्तु वांतोर इंचि मनम ओना एदुर हळसेक मंतोम.

21 अन्निटवुन ओना कयदा हिळु इरना ताकत ओनगा मंता. ओर वातस्के आ ताकततोने मना नासडेम आयाना इद मेंदुलतुन बदलांचि ओर हासि तेदतस्के ओन्क दोर्कतसोंटा महिमाता मेंदुललेसीं कियानुर.

4

बस्केळक कुसिते मनना बारेमते पौलस कराहंतोर

1 अदुनहाटीं विस्वासुल्कुनिटा! मिमेट सामिना विस्वासमते गट्टिगा मंटु. मीकुन हळगोम इंचि नावा जीवा बच्चोरो तनलाळसेक मंता. नावा पावरमतोर मिमेटे आंदिर. किरिस्तु वातस्के, नना नावा कबळ महतन इंचि हुप्सानोर मिमेटे आंदिर.

2 युवादिया, सुंतुके अक्काहकुनिटा मिमेट येसु किरिस्तुनोर आंदिर, अदुनहाटीं मिमेट जगडाल्क होळसि सामिना लोप्पो उंदि मनसुने मनना इंचि नना विनंति कीसंतन.

* 3:2 कतना यहूदि आनि मुसलमान लोकुल्कुनद उंदि रिवाज आंद. इद रिवाज परकारम उळकानगटा कोस्सा तोलदुन कोय्यांतुर. इंसंटा रिवाज कीते पेनतोनि करार कीताप इंचि ओर नमंतुर. † 3:19 नासडेम नासडेम इत्ते, नरकमते बस्केळक पोत्तना तळमिते मंचि तनलाळसेक मनमळ.

3 नावा दंटातोना! अव रौंड मुर्ताहक जगडालक होळसि उंदासि मनालय निमे सहायम कीम इंचि नीकु विनांति कीसेक मंतन. बारित्ते किलेमेन्स आनि नावातोनि कबळ कियानोरतोनि कलियसि अव रौंड मुर्ताहक बेसता कबुर वेहालय वेल्ले कस्टपळतां. अल्हा कबळ कियानोरा पोरोलक पेनदागा मनना बस्केळक पिस्सना पिस्वरता पुस्तकमते रासि मंता.

4 मिमेट सामिना लोप्पो बस्केळक कुसिते मंडु, नना मरा इंदे पोल्ले वेहासेक मंतन मिमेट बेस कुसिते मंडु.

5 मिमेट सादा-सिंपलतोर इंचि अंतोर्क तेळियनाल पिस्सट, बारित्ते सामि वायाना वेला दगोरा मंता.

6 बदे पोल्लेक पिकिर कियमट, गानि अन्नि पोल्लेनहाटीं पेनदुक पारतना कीसि मीवा अक्सरमतुन वेहाट्ट, दन्यवाद कीसि दान तल्कट.

7 अस्के बोरे अर्तम किया परवसोंटा सांतितुन पेन मीकु हीता. मिमेट येसुनोर आताहाटीं अद सांति मीवा मनसुन, विचाराल्कुन बेस कापाळसि इरता.

8 विस्वासुल्कुनिटा! आकिरते इंकुदि पोल्ले वेहानद मंता. अद बतल इत्ते, बव पोल्लें अय्ते सत्तेम, तल्सकुननालायक मंतां, अव पोल्लेना बारेमतेन विचारम कीसेक मंडु. इत्ते, बरोसालायक पोल्लें, कदरलायक पोल्लें, नीतिता पोल्लें, पवित्र पोल्लें, कुसिता पोल्लें, सोबांचना पोल्लें इवे पोल्लेना बारेमते विचारम कीसेके मंडु.

9 मिमेट नावाहेंदाल करियसि दोर्किचकुत्ता पोल्लें, केंजता पोल्लें, आनि हळता कबाहक इव मत्ताप ताकट. अस्के सांति हियना पेन मीकुन कापाळता.

पिलिपिया कलिसियातोरक पौलसना जोहार

10 मिमेट मरा उंदि मल्का नावा बारेमते विचारम कीसि नाक सहायम कीतिर. अदुनहाटीं नना सामिना लोप्पो वेल्लेन कूस मंतन. इल्हा सहायम कियना इंचि मिमेट मुन्नेन विचारम कीसि मत्तिर, गानि मीकु मोका दोर्काहिल्ले.

11 नाकु बदनदो अक्सरम मंता इंचि नना इल्हा इंचेक हिल्लेन. बारित्ते बसोंटा परिस्तिती वायिनागानि कुसितेन पिसमळ नना करियतन.

12 बतले हिलवस्के बल्हा पिस्सना, मत्तस्के बल्हा पिस्सना इद इंका नाक तेळियता. बसोंटा वेला वायिना, बसोंटा परिस्तिती वायिना, कर्वेस्सि मनिना, पीर निडिस मनिना, वेल्ले मत्तस्के बल्हा मनना, तक्को मत्तस्के बल्हा मनना इव अन्नि नना करियतन.

13 किरिस्तु नाक ताकत हीसेक इंचि, बसोंटा परिस्तिती वायिनागानि नना अन्नि किया परांतन.

14 बतलन्ना आयि, मिमेट नावा तकलिपते सहायम कीतिर, बेस कीतिर.

15 नना सुस्वुने बेसता कबुर वेहचि मेसिडोनिया इनना मीवा एरियाताल होत्तन. अस्के मिमेट पिलिपियाता विस्वासुल्क तप्पा, वेरे बदे कलिसियातोर नाक सहायम किया हिल्लुर. इद पोल्ले मीकु एपाटे.

16 इल्हेने नना बस्के अय्ते तेसलोनि सहरते मत्तन, अस्केगुडा अक्सरम मत्तस्के नाक मिमेट वेल्लेन मल्कां सहायम कीतिर.

17 नाक मीहेंदाल सहायम गावाले इंचि आयो, गानि मिमेट कियना बेसता कबाहकुनहेंका मीकु पेनदाहेंदाल आसिर्वाद दोर्कसेकेन मनना इंचि नावा विचारम मंता.

18 नहगा अन्नि मंतां, नाक बच्चोर अय्ते गावाले दानकन्ना एक्को मंतां. मिमेट इपपरदिसुनतोनि लोहता सहायम नाक दोर्कता. अवुनतोनि नावा अक्सराल्क अन्नि तीरतां. बल्हा अय्ते मोक्कु हीतारित्ते पेन दाना गब्बु एतंता, अल्हेने मिमेट लोहतवुन पेन कुसिते एतकुंता.

19 नना सेवा कियना पेनदागा मनाकु गावाले मत्तादुंकन्ना एक्को संपत्ति मंता. अदुनहाटीं मनाकु बतल अक्सरम मनिनागानि, मनम किरिस्तु येसुना लोकुल्क आताहाटीं पेने दाना महिमाहेंदाल अदुन पूरा कीता.

20 मना पेनबाबान युगा-युगाल्कुनदाका स्तुति कीकोम. आमीन.

21 येसु किरिस्तुन विस्वासम कीतोर अंतोर पेनदा लोकुल्क नावा जोहार. इगे नावातोनि मत्तोर विस्वासुल्कगुडा मीकु जोहार वेहसेक मंतुर.

22 इगोटा पेनदा लोकुल्क अंतोर, कास कैसर राजांक सेवा कियानोर विस्वासुल्क मीकु जोहार वेहसेक मंतुर.

23 मना किरिस्तु येसु सामिना कुर्पा मीवा आत्मातोनि मन्निकांटी.

कुलसि कुलसि विस्वासुल्लुकुंक पौलुसना सिट्टि

इद सिट्टिता बारेमते गिचचो परिचयम

रासतोना पोरोलः पौलुस

रासता कालमः इसवि सन 60

इद सिट्टि कुलसि सहरता विस्वासुल्लुकुनाहाटीं येसुना प्रेरित पौलुस रासतोर. इद कुलसि सहर आसिया एरियाते बांता. इगेटा विस्वासुल्लुकु पौलुसुनाहेंदाल आयो, गानि कुलसि सहरतोरै वरोर इपप्रास इनानोना हेंदाल विस्वास कीतुर.

अगाटा कलिसियाते इच्चुर लोकुल्लुकु आबद्दम कराहनोर मंतुर इंचि इपप्रासुनाहेंदाल पौलुसुंक तेळियता. ओर तप्पुड बोदा वेहुंदुर आनि रीति रिवाजकु, पद्दतकु मन्ताप ताकतेने मुक्ति दोर्कता इंचि करहुंदुर.

अदुनहाटीं पायदा हिल्लव दुनियाता रीति रिवाजकु, पद्दतकु कराहानोरा पोल्लें केंजमत इंचि वेहालय पौलुस इद सिट्टि रासि विस्वासुल्लुकुनागा लोहतोर. अल्हेने मिमेट वरोंक-वरोर पावरम कीम्टु, विस्वासमते गट्टिगा मंटु, किरिस्तुना पोल्लेते बेस्सेके होंट इंचिगुडा वेहतोर.

बगा बतल मंता

जोहार आनि परिचयम 1:1-8

किरिस्तुना स्वभावम आनि कबळ 1:9-2:19

किरिस्तुनतोन पिस्सना पूना पिस्वर 2:20-4:6

आकिरता बोदां 4:7-18

जोहार

1-2 पेनदा इच्चाताल किरिस्तु येसुना प्रेरित आतोन नना पौलुसुन आनि तम्मुर तिमोतिनाहेंदाल, कुलसि सहरते मंदना पवित्र अल्हेन किरिस्तुनलोपो विस्वासमलायक कलिसियाता लोकुल्लुकुंक इद सिट्टि रासेक मंतन. मना पेनबाबानाहेंदाल मीक कुर्पा, सांति दोर्किकांटी.

दन्यवादता पारतना

3 मोमोटा मीवाहाटीं बस्केळक पारतना कीसेके, मना सामि येसु किरिस्तुना पेनबाबांक दन्यवाद कीसेके मंतोम.

4 बारित्ते, किरिस्तु येसुना पोरोंटा मीवा विस्वासम आनि अंतोर पेनदा लोकुल्लुकुन मिमेट कियाना मीवा पावरमता बारेमते केंजतोम.

5 मीवाहाटीं स्वर्गमते उंदि आसे इर्सि मंता इंचि, अदुना बारेमते मिमेट मुन्नेने बेसता कबुरता सत्तेम पोल्लेते केंजतिर.

6 अदे बेसता कबुर मिहगा वासि, पूरा दुनियाते पैलांचि लोकुल्लुकुना पिस्वरतुन बदलांचेके मंता. अल्हेने बस्के अयते अदुन मिमेट केंजतिर, केंजसि पेनदा निजम कुर्पातुन एरपाट कीसि स्विकार कीतिर, अस्केटाल अद मीवा पिस्वरतुनगुडा बदलांचेके मंता.

7 आ बेसता कबुर मावा पावरमगल्ला इपप्रासुनाहेंदाल मिमेट करियतिर. ओर मावातोन कलियसि कबळ कियानोर आनि मीवाहाटीं किरिस्तुना विस्वासमलायक सेवक आंदुर.

8 पवित्र आत्माते मत्ता मीवा पावरमता बारेमते ओरे माक वेहतोर.

9 अदुनहाटीं मोमोट अव पोल्लें केंजतस्केटाल, मिमेट पूरा आत्माता तेल्विते, बुद्धिते दाना इच्चा मत्ताप निडागोम इंचि बस्केळक पारतना कीसेके मंतोम.

10 इदुनहेंदाल, मिमेट अन्नि तीस्कुने सामिन कूस कियालय मीवा पिस्वर दानकु इस्टमाताप मनंता, मीक हरेक बेसता कबळते पलम दोर्किसि, पेनदा तेल्विते बेस्सेके दांतिट.

11 दाना महिमाता अन्नि तीरकुना बलमतोन मीकुन गट्टिगा कींता, अदुनहाटीं अन्नि तीरकुना ओप्के, ओर्सकुनमळ इद मीक आनंदमतोन दोर्कता.

12-13 अदुनहाटीं पेनबाबांक मिमेट दन्यवाद कीम्टु. ओर मनाकुन वेलगुने मंदना पेनदा लोकुल्लुकुना वारसानहक्कुते तूस एताना लायक कीतोर. मनाकुन हीकटता क्यदाल इळबळिच्चि ओना पावरमगल्ला मरिंन राज्येमते होळाहतोर.

14 ओना मरिंनहेंदाले मनाकु मुक्ति दोर्कता, इत्ते ओनाहेंदाल पापाल्लुकुनाल मापि दोर्कता.

किरिस्तुंक अन्निनपोरों अदिकारम मंता

15 ओर दिस्सवसोंटा पेनदा रूपम आंदुर, ओर दुनिया पुट्टका मुन्नेटाले मत्ताहाटीं, दुनियाते पुटतकुने अन्निनपोरों पेद्दुदोड आंदुर.

16 बारित्ते, स्वर्गमते आयि, बूमिपोरों आयि, दिस्सानव आयि, दिस्सुवव आयि, राजगद्दें आयिं, सरकार आयि, पेद्दाल्लक आयिर, आदिकारिल्लक आयिर इव अन्निन ओनतोन, ओनाहेंदाल आनि ओनाहाटीं पुट्टिचमळ जर्गता.

17 पुट्टिस्ता अन्निने ओरे मोदाटोर, ओनाहेंदाले अन्नि नित्तिसि मंतां.

- 18 मेंदुललेसी मंदना कलिसियाकु ओर तल्ला आंदुर. अन्नि पोल्लेने पेदूदोड आयागोम इंचि हातौरा लोप्पोटाल मोट्टा मोदाला तेदतोर ओरि आंदुर. ओरि मोदोल आंदुर.
- 19 बारित्ते ओनालोप्पो पेनदा गुनम पूरा निडसि मत्तेने बाबो कूस मनंतोर.
- 20 कूसुनपोर्रो किरिस्तु पोंगागोटता नेत्तुरताहेंदाल, बूमिपोर्रो आनि स्वर्गमते मंदना अन्नि वस्तुकुन ओनतौनि कल्पिसि ओरा नड्डुम सांति मनागोम इंचि पेनदा इच्चा.
- 21 दीनकन्ना मुन्ने मिमेट पेनदागटाल लक्कु मत्तिर, कराब कबाहकुनाहेंदाल दाना पगातोर आसि मत्तिर.
- 22 इंदके मीकून पेनदा मुन्ने पवित्र, डाग हिलाकोटा, दोसेम हिलाकोटा निल्हागोम इंचि ओर ओना हामुरहेंदाल मीवा मेंदुल्ला हव्वितुन ओना मेंदुल्ले कल्पकुत्तोर.
- 23 गानि मिमेट विस्वासमते हीके-हेके आयाकुंटा गट्टिगा निल्सि मंटु, मिमेट केंजता बेसता कबुरता आसेतुन होळसमट. अद बेसता कबुर मब्बुन हिळता अंतोर लोकुकुकुंक वेहमळ जर्गसेक मंता. अदे सेवा कियानाहाटीं नना, इत्ते पौलसुन पेनदा सेवक आतन.

कलिसिया बेर्सानाहाटीं पौलस तकलिप अरमळ

- 24 किरिस्तुना मेंदुलतसोंटा कलिसियाताहाटीं बवयते बादां तक्को मत्तां. अव बादन नावा मेंदुलताहेंदाल पूरा कीसेके मंतन, अदुनहाटीं इंदके मीवाहाटीं बवयते नावा दुक्काल्क मंतां अबुने नना आनंदमते मंतन.
- 25-26 पेनदा पोल्लेतुन मीकु पूरा वेहानाहाटीं पेन नाक अप्पजेपता जिम्मेदारिहेंदाल नना कलिसियाता सेवकुन आतन. अद पोल्ले वेल्लेन कालाल्कुनाल, पीळि-पीळिनाल मर्ममते मत्ता, गानि इंदके दाना पवित्र लोकुकुकुंक तेळियागोटता.
- 27 यहुदि आयवोरा लोप्पो इद मर्ममता महिमाता विलुवा बतल आंद मना लोकुकुकुंक तेळियाना इंचि पेन इनकुत्ता. मीवालोप्पो महिमाता आसे आसि मनना किरिस्ते आ मर्मम आंद.
- 28 हरेक मनकन किरिस्तुनलोप्पो पूरा कीसि पेनदा मुन्ने निल्हागोम इंचि, मोमोट किरिस्तुना बारेमते हरेक मनकंक कडकते वेहांतोम, हरेक मनकंक पूरा तेल्विते करहंतोम.
- 29 इदुनहाटीं किरिस्तुना पूरा ताकत नावा लोप्पो गट्टिगा कबळ कीसेके मंता, दानाहेंदाल नना मनसु दोस्सि बागा कस्टम कीसेके मंतन.

2

- 1 मिमेट नाकुन हळ्ळाकोन्ना गानि मीवाहाटीं, लोदिकिया सहरते मंदना विस्वासुल्कुनाहाटीं आनि कळमता अंतोर विस्वासुल्कुनाहाटीं नना वेल्लेन कस्टम कीसेके मंतन, इद मीक तेळियाना इंचि नावा इच्चा मंता.
- 2-3 इद कस्टम बारि कीसेके इत्ते, मिमेट मीवा विस्वासमते दैरनेमते मनना, मिमेट पावरमते वरोंक-वरोर कलियसि मंदना, मीक पूरा बुद्धिता पूरा दनम दोर्कना, पेनबाबाना मर्मम इत्ते किरिस्तुना लोप्पो मक्किस मत्ता बुद्धि, तेल्विता कजानातुन एरपाट कियाना.
- 4 बोरन्ना तिय्यटा पोल्लेनतौनि मीकून पसांचामन्नि इंचि नना इद वेहासेक मंतन.
- 5 नना मेंदुल्ले मिहागटाल लक्कु मंतन, गानि आत्माते मिहागेन मंतन. मीवा रोजता पिस्वर आनि किरिस्तुनलोप्पो मंदना मीवा गट्टि विस्वासम हळ्ळसि नाक वेल्लेन कुसि आसेक मंता.

किरिस्तुनलोप्पो निडसि मंतिर

- 6 इंदके मिमेट किरिस्तु येसुन सामि इंचि स्विकार कीतिर, अयते ओर बल्हा वेहतोर अल्हेने ताकाटु.
- 7 मराता हिह्कुनलेसी मिमेट किरिस्तुनलोप्पो होळियसि होंटु, बेस्सेके होंटु. मीक कराहतालेसी विस्वासमते गट्टिगा आसेके होंटु, बस्केळ्ळ पेनदुक दन्यवाद कीसेके मंटु.
- 8 मिमेट जेगर्ताते मंटु! बोरन्ना वासि मीकून दुनियाता तेल्वि पोल्लें, एर्तम दोका हिय्यना पोल्लें वेहिचि पसांचा परांतुर, अव पोल्लें मनकालोर्कुना रीतिरिवाजकुनालेसी, दुनियाते एनकटा कराहता पोल्लेनलेसी मंतां गानि किरिस्तुना पोल्लेनलेसी हिल्लें.
- 9 बारित्ते पेनदाव अन्नि गुनाल्क किरिस्तुना मेंदुल्ले मनंतां.
- 10 अंतोर राज्येम कियानोर्कुनपोर्रो, अदिकारकुनपोर्रो किरिस्तु तल्लालेसीं मंतोर, ओनालोप्पो मिमेट पूरा आतिर.
- 11 मीवा मेंदुल्ला पापाल्क पायताहाटीं ओनालोप्पो मीकून कतना कियमळ जर्गता. अद कतना कयदे कीतद आयो गानि किरिस्तुनलोप्पो कीतद आंद.
- 12 अचोने आयाका, मिमेट बापतिस्मा एतताहेंका किरिस्तुनतौनि बोंदा दोस्ताप आतिट. हातोरवेटाल ओन जीवाते तेहाता पेनदा सक्ति पोरो मिमेट विस्वासम इरताहाटीं ओनतौनि जीवातेगुडा तेदतिट.
- 13 मिमेट तप्पु कबाहक कीतिर, यहुदि आयवोर मत्तिर, अदुनहाटीं आत्माते हासि मत्तिर. गानि पेन मना अन्नि पापाल्कुन मापि कीसि किरिस्तुनतौनि मीकून जीवाते तेहाता.
- 14 नियमकुना पुस्तकम मनाकु विरोदमते मत्ता, गानि पेन किरिस्तुन कूसुनपोर्रो मोल्लां कोह्किसि अद पुस्तकमताल मनाकु विरोदमते मत्ता पोल्लें तेंडसि पोहाता.

15 इल्हा राज्येम कियानोर्कुंक आनि अदिकारकुंक पेन ताकत हिलाकोटा कीता. कीसि किरिस्तु कृसनपोर्रो जीवा हीसि गेलसताहाटीं ओरा अंटोरा मुन्ने तमासा आसि सिग्गु हिलाकोटा आता.

16 अदुनहाटीं मीवा तिनना-उनना बारेमते आयि, पंडुगुना बारेमते आयि, अमासा हिलाकोटे नोमकेम रोजुना बारेमते आयि बोर्कुने मीवा न्यायम किया हियमटु.

17 इवन्निगुडा मुन्ने वायाना निजम पोल्लेना नीडा आंदु, आ निजम पोल्ले किरिस्तु आंदुर.

18 बोरेन्ना सतागा सिन्नातनम हुपिचुकुनानोर, दूताना पूजा कियानोर, हळता पोल्लेनपोर्रो, ओना मनसुना पालतु पोल्लेनपोर्रो पेद्दिरकेम कियानोना हेंदाल मीवा पेनदा इनामतुन तपिचुकुना हियमटु.

19 असोटा मनकल पूरा मेंदुलता कीलुकुन, नरालुकुन उंदि कीसि, पेनदाहेंदाल मेंदुलतुन बेसांगोटा तल्ला, इत्ते किरिस्तुन पीसि मन्नोर.

20-21 गानि इंदके मिमेट दुनियाता पोल्लेनाल किरिस्तुनतोनि हासि होत्तिर, अय्ते “अद इटमट, अदुन तिनमट, अदुन पियमट” इंचि दुनियातोरालेसीं नियमकुने बारि ताकसेक मंतिट?

22 इवन्नि पोल्लें वाळकुत्तारित्ते नासडेम आसि होनना वस्तुकुनलेसीं मंतां, बारित्ते अव सिराप मनकना नियमाल्क आनि कराहमळ्क संबंदिस्तव आंदु.

23 इव नियमकुने मना मनसुनाल तयार कीता बक्ति कियालय, सिन्नातनम हुपिचुकुनालय, मना मेंदुलतुन तीराता कस्टम कीकुनालय बुद्दि अय्ते मंता, गानि मना मेंदुलता कराब इच्चान आपालय इव बतल कबळ्क ओज्जो.

3

1 मिमेट किरिस्तुनतोनि जीवाते तेदसि मंतिट, किरिस्तु स्वर्गमते पेनदा तिना बाजुंक उदसि मंतोर, अय्ते अगाटा पोल्लेन दोर्किचुकुनना कोसिस कीम्टु.

2-3 इंदके मीवा पडाना पिस्वर हासि होला आनि मीवा पूना पिस्वर किरिस्तुनतोनि पेनदा लोप्पो मक्किचि मंता. अदुनहाटीं मिमेट बूमिपोर्रोटा पोल्लेने आयो गानि स्वर्गमता पोल्लेने मनसु इरंट.

4 मनाकु पिस्वर हीता किरिस्तु बस्के अय्ते मर्रा दिस्सानुर, अस्के मिमेटगुडा ओनतोनि ओना महिमाते दिस्किर.

पळाना पिस्वर आनि पूना पिस्वर

5 अदुनहाटीं बूमि पोरोटव मना कराब गुनाल्क इत्ते बोगमतनम, कराब विचाराल्क, जोसते मनमळ, इंकावरोनद आसे पडमळ, आस्ति कियमळ इद अय्ते बोम्मांक मोळ्कता लेक्कतेन वांता. इव अन्निन हक्किस पोहाट.

6 इवुनाहाटीगे पेनदा होंग दाना पोल्ले केंजवोरा पोरो वांता.

7 मिमेटगुडा मुन्ने आ पिस्वरते पिसानस्के, ओरालेसींगे ताकिदिर.

8 गानि इंदके मिमेट होंग आयमळ, गुल्गामळ, पगा पियमळ, अपमानम कियमळ, तोळ्दाल कराब पोल्लें वळ्कमळ इवन्निन होळ्सीम्टु.

9 मिमेट वरोक-वरोर आबद्दम वळ्कमटु, बारित्ते मीवा पडाना गुनमतुन आनि दाना कबाह्कन तेंडसि पोहितिर.

10 इंदके पूना पिस्वर पिसमळ सुस्व कीतिर, मनाकुन पुटिस्ता पेनदा गुनम मत्ताप, मिमेट तेल्वि दोर्किचुकुनालय पूनगा तयार आसेक मंतिट.

11 इवने युनानि आयिर, यहुदि आयिर, कतना कीतोर आयिर, कतना कियवोर आयिर, केडाते मनानोर आयिर, स्कूति जातितोर्क आयिर, दासुड आयिर, दासुड आयवोर आयिर ईरा लोप्पो बतल तेडा हिल्ले. किरिस्तु अन्निने, अंटोर लोप्पो मनंतोर.

12 पेन मीकुन पवित्र आनि पावरमगल्ला लोकुकुनलेसीं पेर्कुत्ता. अदुनहाटीं दया कियमळते, पायदा कियमळते, सिन्नागासि मनमळते, सादा-सिपल मनमळते ओप्के पीसि ताकट.

13 सामि मीवा तप्पुकुन मापि कीतोर, अय्ते मिमेटगुडा वरोना तप्पुकु वरोर मापि कीम्टु. मीलोप्पो बोनकन्ना इंकावरोन पोरो बतलन्ना तप्पु दोस्साना मत्ते, ओर ओप्केते वरोनद वरोर तप्पुकुन मापि कीकुंटु.

14 अचोने आयाका मिमेट अंटोर उंदासि पावरमते दोहताप मंटु.

15 मीवा मनसुने किरिस्तुना सांतिता राज्येम ताकिकांटी, इदुनहाटीगे मीकुन उंदि मेंदुल आसि केयमळ जर्गता. पेनदुक बस्केळ्क दन्यवाद कीम्टु.

16 किरिस्तुना पोल्ले मीलोप्पो निंडिसि मन्निकांटी, मिमेट पूरा तेल्विते वरोक-वरोर करहट, तेळियागोटिस वेहाटु, पेनदुक दन्यवाद कीसेके मना मनसुनाल बजनकु, कीर्तनकु, पाटां पारसेके होंटु.

17 अचोने आयाका, पोल्ले आयि, कबळ आयि बतल किथिना मिमेट सामि येसुना पोरोलतेन कीम्टु. ओनाहेंदाले पेनबाबांक दन्यवाद कीम्टु.

पूना पिस्वरते मनमळ

18 मरमि आता मुरताह्कुनिटा! मिमेट पेनदुक नच्चानालायक मीवा मुय्दुर्कुना पोल्लेपोर्रो ताकट.

19 मुय्दुर्कुनिटा! मीवा मुत्तोह्कन पावरम कीम्टु, अवुनतोनि कडकते मनमट.

20 पिलाल्कुनिटा! मिमेट अन्नि पोल्लेने मीवा यावल-बाबाल वेहताप ताकट, इल्हा ताकते सामिक आनंदम आंता.

21 बाबोरिता! मिमेट मीवा पिलाल्कुन चिड-चिड कियमट, अल्हा कीते, ओर निरास आंतुर.

22 दासुल्कुनिटा! मिमेट अन्नि पोल्लें ई दुनियाते मनना मीवा मालकुल्क वेहताप कीम्टु. मिमेट कियानद मनकालोर्कुन कूस कियाना दासुनलेसी हूपसालय आयो गानि बेस मनसुने, पेनदा वेंते कीम्टु.

23-24 मिमेट बतलयते कीतिर मीवा मनसुनाल कीम्टु, मिमेट मनकालोर्कुनाहाटीं आयो गानि सामिनाहाटीं कीसेके मंतिट. मिमेट सामि किरिस्तुना सेवा कीसेके मंतिट. अदुनहाटीं ओनाहेंदाल मीकु वारसानता इनाम दोर्कता, इद मीकु एरपाटे मंता.

25 पेन बोने मोकम हूळसि न्यायम किय्यो, बोर अयते तप्पु कीतोर, दाना सिक्सा ओनकु दोर्कता.

4

1 मालाकुल्कुनिटा! स्वर्गमते मीकुगुडा वरोर मालक मंतोर, इदुन मति इरिं मिमेट मीवा दासुल्कुनतोनि न्यायमते, बेदबाव हिलाकोंटा ताकट.

पारतना क्रियालय वेहमळ

2 मिमेट बस्केळक पेनदुक पारतना कीसेके मंटु. दानकु दन्यवाद कीसेके जेगतांते मंटु.

3 नना किरिस्तुना मर्ममता पोल्ले वेहताहाटीं जेलते मंतन, इदे पोल्लेतुन मोमोट अंतोर्क वेहानाहाटीं पेन माकु मोका हिच्यि इंचि मावाहाटीं गुडा पारतना कीम्टु.

4 नाकु बल्हा वेहाना मंता अल्हेने नना इद कबुरतुन बेस तेळियागोटिस वेहानाहाटीं पारतना कीम्टु.

5 विस्वासम कियवोरतोनि बेस तेळिते ताकट, मोका दोर्कतस्के ओर्क बेसता कबुर वेहाना पायदा तप्पाकोंटा एतट.

6 हरेक मनकंक बेस जवाब हिया वायमळ गावाले इंचि मीवा पोल्ले बस्केळक कुपांते आनि होव्वोर वाटते रुसि मत्ताप मना पीता.

आकिरता पोल्लें

7 पावरमगल्ला तुकिकुस दादल विस्वासमलायक सेवक आंदुर. ओर नावा बारेमते अन्नि पोल्लें मीक वेहांतोर, ओर नावातोनि कलियसि सामिन लोप्पो सेवा कियानोर आंदुर.

8 ओर मावा बारेमते अन्नि पोल्लें मीक तेळियागोटिस मीवा मनसुकुंक दैरेम हियाना उदूदेसमते नना ओन मीहेके लोहतन.

9 नना ओनतोनि मीवा लोप्पोटोरे विस्वासमलायक, पावरमगल्ला उनेसिम दादानगुडा लोहतन, ओर इग्गेटव अन्नि पोल्लें मीक वेहानुर.

10 नावातोनि जेलने मनना अरिसतरकुस पोरोलतोर दादल मीक जोहार वेहासेक मंतोर, अल्हेने बरनाबासुना दग्गेटा दादल मरकुस इनानोरगुडा मीक जोहार वेहासेक मंतोर. (नना मीक मुन्नेने वेहताप, मरकुस मिहगा वाते ओन बेस हूळ्हाट.)

11 युसतुस इनना येसुगुडा मीक जोहार वेहासेक मंतोर, कतना आतोरवेटाल सिराप ईर मुव्वुरे पेनदा राज्यमताहाटीं नावातोनि कबळ कीसेक मंतुर, ईराहेंदाल नावा जीवाक सांति दोर्कसेक मंता.

12 किरिस्तु येसुना दासुड इप्रास ईर मीवा लोप्पोटोरे आंदुर, मीक जोहार वेहासेक मंतोर. मिमेट पेनदा इच्चा मत्ताप पुरागा आसि, विस्वासमते गट्टिगा निल्सि मनागोम इंचि ओर बस्केळक मीवाहाटीं जोर हीसि पारतना कीसेके मंतोर.

13 मीवाहाटीं, लोदिकिया आनि हियरापोलि सहरता विस्वासुल्कुनाहाटीं ओर वेल्लेने मेहनत कीसेके मंतोर इंचि, इद पोल्लेक नना ओना गवाइ मंतन.

14 पावरमगल्ला डाक्टर लूकाल आनि देमास ईर मीक जोहार वेहासेक मंतुर.

15 लोदिकियाता विस्वासुल्कुंक आनि नुंपा अक्कांक अल्हेने दाना लोतागा जमा आयाना कलिसियातोर्कुंक नावा जोहार वेहाट.

16 इद सिट्टिटुन मिमेट हदुव्ता पजा, इदुन लोदिकिया सहरता कलिसियातोर्क लोहचि, अगागुडा हदवा वेहाट आनि लोदिकियाताल वाता सिट्टिटुन मिमेटगुडा मीवा कलिसियाते हद्विसि वेहाट.

17 अल्हेने अरकिपुसुंक, “सामि नीकु अप्पजेपता सेवातुन तप्पाकोंटा पूरा कीम,” इंचि वेहाट.

18 नना पौलुसुन, नावा कय्देन रासि मीकु जोहार वेहासेक मंतन, नना जेलते मंतन इंचि पारतनाते मति कीम्टु. पेनदा कुर्पा मीवातोनि मन्निकांटी. आमैन.

1 तेसलोनि

तेसलोनि विस्वासुल्कुंक पौलसना मोदाटा सिट्टि

इद सिट्टिता बारेमते गिचचो परिचयम

रासतोना पोरोल: पौलस

रासता कालम: इसवि सन 50-54

तेसलोनि सहर मेसिडोनिया एरियाता राजदानि मत्ता. अगा यहुदि आयवोर मनुंदुर, गानि ओर यहुदि मतमतुन नम्मंदुर. पौलसनाहेंदाल अगागुडा विस्वासुल्क तयार आतुर. पौलस वेहता बेसता कबुरतुन लोक्कुल्कु विस्वासम कीसंतुर इंचि यहुदिल्क पौलसुन विरोद क्रियालय दल्गतुर. अदुनहाटीं पौलस तेसलोनि सहर होळसि एतेंस सहरते होळतोर. अगटाल विस्वासुल्कुना परिस्तिति कन्कुनालय तिमोतिन मर्रा तेसलोनि सहरते लोहतोर. ओर वापस वासि अगाटा विस्वासुल्कुना परिस्तिति पौलसुंक वेहतोर.

पौलस अगाटा परिस्तिति केंजसि कूस आतोर. पजा तेसलोनि सहरता विस्वासुल्क, दैरनेमते आनि विस्वासमते गट्टिगा मंडालय ओर्क इद मोदाटा सिट्टि रासि लोहतोर.

अल्हेने किरिस्तु बस्के मल्सि वायानुर, ओर वायाका मुन्ने हाता विस्वासुल्कुनद बतल आंता? इसोटा पोल्लें इद सिट्टिते रासि मंतां.

बगा बतल मंता

जोहार आनि परिचयम 1:1

दन्यवाद आनि स्तुति कियमळ 1:2-3:13

किरिस्तु वेहताप पिस्साना बारेमता बोदां 4:1-12

किरिस्तु मर्रा वायना बारेमते समजांचि वेहामळ 4:13-5:11

आकिरता पोल्लें 5:12-22

आकिरता बोदां 5:23-28

जोहार

1 नना पौलस, सिल्वानुस* आनि तिमोति मोमोट इद सिट्टि मीक तेसलोनि सहरते मंदना कलिसियातोरहाटीं रासेके मंतोम.† मिमेट पेनबाबाल आनि सामि येसु किरिस्तुनतोनि कलियसि मंतिट इंचि मीक पेनदाहेंदाल कुर्पा, सांति दोर्किकांटी.

तेसलोनि कलिसियातोर विस्वासम

2 मोमोट पारतनाने मीवा मति कीसेके, मी अंतोराहाटीं पेनदुक बस्केळ्ळक दन्यवाद कीतोम.

3 मिमेट विस्वासमते कियाना कबाटुन, पावरमते कियाना मीवा कस्टमतुन अल्हेने सामि येसु किरिस्तुनापोर्रोटा आसेते ओप्के पीसि मत्तादुन मोमोट मना पेनबाबाना मुन्ने बस्केळ्ळक मति कीसेके मंतोम.

4 विस्वासुल्कुनिटा! पेन मीकुन पावरम कीसि पेर्ता इंचि माक एरपाटे मंता.

5 बारित्ते, मोमोट वेहता बेसता कबुर सिराप पोल्लेनतोने आयो गानि ताकतते, पवित्र आत्माते आनि पूरा गट्टि विस्वासमते मिहगा वाता. मोमोट मीवा नड्डुम मंचेके बल्हा ताकतोम मीक एरपाटे मंता.

6 मिमेट वेल्ले दुक्कमते मत्तस्केगुडा पवित्र आत्मा हियना कुसिते बेसता कबुरतुन केंजतिर. मिमेट मावालेसीं, सामिनलेसीं ताकालय सुख कीतिर.

7 इल्हा मिमेट अकाया आनि मेसिडोनिया राज्येमता विस्वासुल्क मीकुन हळसि ताकालय, मिमेट ओर्क उंदि उदाहरनलेसीं आतिर.

8 बारित्ते मीहेंदाल सामिना पोल्ले सिराप मेसिडोनिया आनि अकाया राज्येमतेन एवता इंचि आयो गानि पेनदापोर्रोटा मीवा विस्वासमता बारेमते अन्नि जेगाने तेळियसि होत्ता. अदुनहाटीं मोमोट मीक वेहाना बतल अक्सरम हिल्ले.

9 बारित्ते मोमोट मिहगा वातस्के, मिमेट माकुन दग्गेरा कीसि बल्हा बेस हळतिर, ओरे मावा बारेमते वेहासेक मंतुर. अल्हेने मिमेट बोम्माना पेनकुन होळसिसि, जीवाते मनना निजम पेनदा सेवा क्रियालय बल्हा मलतिर इंचि वेहासेक मंतुर.

10 पेन येसुन हातोरवेटाल तेहता. इंदके स्वर्गमताल दाना मर्री येसु मल्सि वायानदुन एदुर हळसेक मंतिर, इंचि इव पोल्लें अंतोर्क वेहासेक मंतुर. वायाना पेनदा होंगुनाल ओरे येसु मनाकुन पिसागोटंतोर.

2

तेसलोनि सहरते पौलसना सेवा

* 1:1 सिल्वानुस सिल्वानुस इत्ते सिलास आंदुर, ओन्क रोंडु पोरोलीं मत्तां. † 1:1 इद सिट्टि पौलस रासतोर, सिल्वानुस आनि तिमोति ओनतोनि जोहार वेहतुर.

- 1 विस्वासुल्कुनिटा! मोमोट मिहगा वातद एर्तम आयाहिल्ले इंचि मीक एरपाटे मंता.
- 2 गानि दीनकन्ना मुन्ने पिलिपिया सहरते माकुन बदनाम कीसि वेल्लेन दुक्कम हीतुर. लोकुल्क माकुन बागाने विरोद कीतुर. विरोद किथिनागानि पेनदा बेसता कबुर मीक वेहालय पेन दैरनेम हीता, इदगुडा मीकु एरपाटे मंता.
- 3 बारित्ते मावा बोदा गलतितेनो, कराब विचाराल्कुनेनो, पसांचना उद्देसमते वेहतद आयो.
- 4 गानि पेन माकुन दाना बेसता कबुरता लायक कीसि, बेसता कबुरतुन वेहालय माक अप्पजेपता. अदुनहाटीं मावा मनसुन परिक्सा कीसि हळना पेनदुन कूस कियालय वेहंतोम गानि मनकालोर्कुन कूस कियालय पेनदा पोल्ले वेहोम.
- 5 बारित्ते मोमोट मीकुन बस्केने बुद्दगिच्चना पोल्लें वळ्का हिल्लोम. अल्हेने मावा आस्तिताहाटीं मीकुन नळेह क्रिया हिल्लोम, दीनकु पेने गवाइ मंता, इंचि मीक एरपाटे मंता.
- 6 इच्चोरे आयाका, मोमोट अथे किरिस्तुना प्रेरितुल्कुम इंचि मीपोर्रीं मावा अदिकारम ह्पिस्तोमे, गानि मिमेट आयि, वेरेटोर आयि, इंका बोनाहेंदाले आयि पेद्दातनम दोर्किच्चुनालय मोमोट हळा हिल्लोम.
- 7 तल्लुर दाना पिलाल्कुन बल्हा अवरिकुंतनो, अल्हे मोमोटगुडा मीकुन बेस हळकुत्तोम.
- 8 अदुनहाटीं मीपोर्रीं इच्चोर पावरम मंता गदा, मोमोट मीक सिराप पेनदा बेसता कबुरे आयो, मावा जीवागुडा हियालय तयार मत्तोम. मिमेट अच्चोर पावरमतोर आसि मत्तिट.
- 9 विस्वासुल्कुनिटा! मावा कस्टम, तकलिप मीक मते मंदार. मोमोट मीक बोनके बर्वु आयामन्नि इंचि नर्का-पिय्यल कबळ कीतोम. अल्हा कीसेके पेनदा बेसता कबुर मीक वेहचि मत्तोम.
- 10 मी विस्वासुल्कुना नड्डुम मोमोट बल्हा पवित्रते, सत्तेमते, दोसेम हिलाकोटा मत्तोम, इदुना मिमेटे गवाइ मंतिट, पेनगुडा गवाइ मंता.
- 11-12 पेन मीकुन दाना राज्येमते आनि दाना पेद्दातनमते कलियालय केयता, अदुनहाटीं दानकु नच्चनालायक मिमेट ताकट इंचि वेहतोम. बाबाल बल्हा ओना पिलाल्कुन अवरिकुंतोर अल्हेने, मोमोट मीक हरेक मनकंक तेळियागोट्टिस वेहासेके, दैरनेम हीसेक, विनति कीसेके मत्तोम, इद मीक एरपाटे.
- 13 बस्के अथे पेनदा पोल्ले मावाहेंदाल मिहगा एव्ता, अस्के अद मनकालोराहेंदाल वातद आयो, गानि पेनदाहेंदाल वाता निजम पोल्ले आंद इंचि मिमेट केंजसि ओप्कुत्तिर. अदुनहाटीं मोमोट पेनदुक बस्केळ्ळ दन्यवाद कीतोम. मीवा विस्वासुल्कुना नड्डुम पेनदा पोल्लेगुडा कबळ कीसेके मंता.
- 14 अद बल्हा इत्ते, विस्वासुल्कुनिटा! यहुदिया राज्येमते येसु किरिस्तुनलोप्पो मत्ता पेनदा कलिसियातोरलेसीं मिमेट ताकसेक मत्तिट. बारित्ते बल्हा मिमेट मीवा देसेमतोराहेंदाल तकलिप बोगांच्तिरो, अल्हेने ओर ओरा यहुदिल्कुनाहेंदाले तकलिप बोगांच्तुर.
- 15 ओरे सामि येसुन आनि पेनदा कबुरतोर्कुन हक्कतुर. ओर माकुन पलाते दोबतुर. पेन ओरतोनि कूस हिल्ले. ओर अंतोर लोकुल्कुना विरोदमते मंतुर.
- 16 पेनदा पिसागोटमळ बारेमते यहुदि आयवोर्कुनतोनि वळ्कते, ओर माकुन आपंतुर. इल्हा कीसि बस्केळ्ळ ओरा पापाल्कुन निहकुंतुर. गानि आकिरते पेनदा होंग ओरपोर्रीं रेयंता.

पौलुस ओर्क मर्रा कलियंतन इनकुनमळ

- 17 विस्वासुल्कुनिटा! गडसेमताहाटीं मोमोट मिहागटाल लक्कु आतोम, गानि मनसुनाल लक्कु आया हिल्लोम. मर्रा मोमोट वेल्लेने आसेते मीवा मोकम हळना इंचि बच्चोरो कोसिस कीतोम.
- 18 बारित्ते माक मिहगा वायागोम इंचि मंता. नना पौलुस, बच्चुंगो मल्कां कोसिसगुडा कीतन, गानि देय्यम माक अड्डम आयुंद.
- 19 मावा आसे आयि, मावा कुसि आयि, मना येसु सामि मर्रा वायानस्के ओना मुन्ने मावा पेद्दातनमता किरिटम आयि! बतल आंद? मिमेट आयिरा?
- 20 हो, मावा पेद्दातनम, मावा कुसि मिमेटे आदिर.

3

तिमोतिन लोहमळ

- 1 अदुनहाटीं, इंका सहन कियमळ मातोनि आया पर्राका, एत्सेस सहरते होंचि ओटिगा मंदना विचारम कीतोम.
- 2-3 किरिस्तुना बेसता कबुरतुन मावातोनि कलियसि वेहानोर पेनदा दासुड तिमोति तम्मुन मिहगा लोहतोम. मीक बसोंटा तकलिप वायिनागानि पजोळ्ळ-मुन्नेळ्ळ आयाकोटा विस्वासमते गट्टिगा मंदना इंचि ओर मीकु समजाचि वेहतोर. बारित्ते इसोंटा तकलिपकु बोगांचालये पेन मनाकुन निलाहता इंचि मीक एरपाटे.
- 4 मोमोट मीवातोनि मत्तस्के, इसोंटा तकलिपकु वांतां इंचि मुन्नेने वेहतोम. अल्हेने जर्गता, अद मीक एरपाटे.
- 5 अदुनहाटीं नना आगा पर्राहिल्लेन. पट्टु हळानोर मीवा पट्टु हळतोरा बतला, मोमोट कीता कस्टम एर्तम आताना बतला इंचि, मीवा विस्वासमतुन कन्कुनालय नना तिमोतिन लोहतन.

- 6 गानि तिभोति इंदके मिहागटाल महगा, मीवा विस्वासम आनि पावरमता बारेमते बेसता कबुर पीसि वातोर. मोमोट बल्हा मीकुन ह्ळालय बागा तनलाळंतोम, अल्हेने माकुन ह्ळालय मिमेटगुडा मावा बस्केळक मति कीतिट इंचि वेहतोर.
- 7 अदुनहाटीं विस्वासुल्कुनिटा! मोमोट तकलिपते, दुक्कमते मनिनागानि मीवा विस्वासमताहेंदाल, मीवा बारेमते माकु सांति दोर्कता.
- 8 बारित्ते मिमेट सामिन लोप्पो गट्टिगा निल्सि मत्ते, मोमोट जीवाते मत्तापे.
- 9 मीवाहेंदाल मोमोट मना पेनदा मुन्ने वेल्ले कुसिते मंतोम. अदुना बारेमते मीवाहाटीं मोमोट पेनदुक वेल्लेने दन्यवाद कीतोम.
- 10 मोमोट मीकुन ह्ळसि, मीवा विस्वासमते तक्को मत्तदुन पूरा कियाना इंचि नर्का-पियल पेनदुक पारतना कीसेके मंतोम.
- 11 इंदके मना पेनबाबाल आनि मना येसु सामि, मोमोट मिहगा वायालय हरिं तयार कियिरकांटी.
- 12 मोमोट मीकुन पावरम कीताप, मिमेटगुडा मीलोप्पो वरोंक-वरोर पावरम कियालय, अंतोर लोकुल्कुनतोनि पावरम बेसालय सामि मीक सहायम कियिरकांटी.
- 13 बस्के अय्ते मना सामि येसु ओना अंतोर पवित्र लोकुल्कुनतोनि वांतोरो, अस्के मनम पेनबाबाना मुन्ने पवित्रते दोसेम हिलाकॉटा मनालय मना मनसुकुन गट्टिगा कियिरकांटी, आमीन.

4

पेनदुन कूस कियाना पिस्वर

- 1 विस्वासुल्कुनिटा! बल्हा पिसते पेनदुन कूस ईरा परांतोम इंचि मिमेट मावाहेंदाल करियतिर, अल्हेने मिमेट पिस्सेकगुडा मंतिट, इंकागुडा मुन्ने अल्हेने पिस्सेक हॉट इंचि विनंति कीसेके मंतोम आनि येसु सामिना लोप्पो तेल्लिचि वेहासेक मंतोम.
- 2 मोमोट येसु सामिनाहेंदाल बव-बव आदेसकु हीसि मत्तोम, अव मीक एरपाटे.
- 3 बारित्ते मिमेट बोगमतनमताल लक्कु मत्ते पवित्र मनंतिर, इंदे पेनदा इच्चा आंद.
- 4 मीवा लोप्पोटाल हरेक मनकल ओना मेंदुल्लुन* ओप्के पीसि, पवित्र, कदर कियानालायक मनमळ गावाले.
- 5 लालचते मनानोर पेनदुन एरपाट किय्युर, असंतोरतोनि इल्हा मनमळ आयापरों.
- 6 दीना बारेमते बोरे आयिर दंताता विस्वासिन पसांचामन्नि, पसांचते सामि ओर्क सिक्सा हीतोर इंचि मोमोट मीक मुन्नेने गट्टिगा वेहतोम.
- 7 बारित्ते पेन मनाकुन पवित्र मनालय केयता, कराब मनालय आयो.
- 8 अदुनहाटीं बोर अय्ते इद पोल्लेतुन पास्कंतोर, ओर मनकन पास्कोर गानि मीक पवित्र आत्मा हियना पेनदुन पास्कंतोर.
- 9 इंदके वरोंक-वरोर पावरम कियमळ मिमेट पेनदाहेंदाले करियतिर. अदुनहाटीं दादाल-तम्मह्कुनालेसीं मिमेट वरोंक-वरोर पावरम कीम्टु इंचि रासनद अब्सरम हिल्ले.
- 10 मिमेट मेसिडोनिया राज्येमते मनना अंतोर विस्वासुल्कुन पावरम कीसेके मंतिट. गानि विस्वासुल्कुनिटा! मिमेट इंका एक्को पावरम कीम्टु इंचि मोमोट विनंति कीसेके मंतोम.
- 11 मोमोट मीक आदेस हीताप, सांतिते पिस्सना, बोना कबाहक ओरे कियाना, बोना कयकुने ओरे कबळ कियाना कोसिस कीम्टु.
- 12 इल्हा मत्ते मिमेट विस्वासम कियवोरा मुन्नेगुडा कदरलायक मनंतिर, बोना पोरोने बर्वु आयिर.

सामिना मर्रा वायमळ

- 13 विस्वासुल्कुनिटा! हातोर बारेमते मीक तेळियाकॉटा मनमळ माक इस्टम हिल्ले. बदे आसे हिल्वोर दुक्कमते मनंतुर, गानि ओरालेसीं मिमेट मनमट.
- 14 बारित्ते येसु हासि मर्रा जीवाते तेदतोर इंचि मनम विस्वासम कीतोम, अल्हेने बोर अय्ते येसुन विस्वासम कीसि हातुर, ओर्कुन पेन येसुनतोनि पीसि वायार.
- 15 सामिना पोल्ले परकारम मोमोट मीक वेहानद बतल इत्ते, सामि मर्रा वायानस्के मनम पिस्सि मनिनागानि, हाता विस्वासुल्कुंकन्ना मुन्ने सामिनगा होना परीम.
- 16 बारित्ते सामि स्वर्गमताल हिळु रेयानुर अस्के पेद्दा आवाजते आदेस हियमळ, पेद्दा दूताता पोल्लेते आनि पेनदा तूताकोमता आवाज कियमळ जर्गता. अस्के बोर अय्ते किरिस्तुनलोप्पो हातुर, ओर मुन्ने जीवाते तेदानुर.
- 17 पजा ओरतोनि पिस्सि मत्ता मनाकुनगुडा, मब्बु तेर्पेनपोरो वळिते किरिस्तुनतोनि कलियालय तेहकुंचि ओयमळ जर्गता. इल्हा मनम बस्केळक सामिनतोनि मनंतोम.
- 18 अदुनहाटीं इव पोल्लेनाल वरोंक-वरोर दैरनेम हीसेक मंटु.

5

सामि वायानाहाटीं तयारते मंटु

- 1 विस्वासुल्कुनिटा! अव गटनां जर्गना वेला, कालमता बारेमते मोमोट मीक रासाना अब्सरम हिल्ले.
- 2 बारित्ते नर्कटा वेलाते दोंगल बल्हा अचानक वांतोर, अल्हेने सामि वायाना रोजुगुडा मनंता इंचि मीकु एरपाटे.

* 4:4 मेंदुल्लुन इग्गे मेंदुल्लुन इत्ते मुल्लोनि इंचि अर्तम.

3 बस्के अयते लोकुलक, “मोमोट सांतिते मंतोम, माक वर्रे हिल्ले,” इंचि वेहासेक मनंतुर, अस्केने पीटे मंदना मुरतळकु बल्हा नोपि तेदंतां अल्हा, पीळा ओरापोर्रो अचानक वांता. ओर बल्हा किथियेनागानि पिस्सुर.

4 गानि विस्वासुल्कुनिटा! अद रोजु दोंगानलेसीं अचानक मीपोर्रो वायालय मिमेट बारे हीकटते हिल्लिर.

5 मिमेट अंतोर वेल्लु आनि पोद्दलता पिलालक आंदिर, मनम नर्का आनि हीकटतोरम आयोम.

6 अदुनहाटीं मनम वेरैतोरालेसीं मीडसि मनमळ आयो गानि तेल्विते, उसारते मंदकोम.

7 मीडानोर नर्कळक मीडंतुर, रिम्मा आयानोर नर्कळके रिम्मा आंतुर.

8 गानि मनम पोद्दलतोरम आताहाटीं सांतिते मंदकोम. मना चातितुन कापाळना कच्चिता अंगिलेसीं विस्वासम आनि पावरमते ताककोम. मना तल्लक टोपिलेसीं मुक्कित्ता आसे इकोम.

9 बारित्ते पेन मनापोर्रो होंग हुप्सालय आयो, गानि मना येसु किरिस्तु सामिनाहेंदाल मुक्कित्ता दोर्किचकुनालय मनाकुन निलाहता.

10 मनम हायिना, पिस्सिना किरिस्तुनतोनि मंदना इंचि ओर मनाहाटीं जीवा हीतोर.

11 अदुनहाटीं, मिमेट इंदके कीसेके मंतिट अल्हेने वरोंक-वरोर दैरनेम हीम्टु, वरोन-वरोर विस्वासमते निलाहट.

आकिरता पोल्लें

12-13 विस्वासुल्कुनिटा! ओर अयते मीवा नड्डुम कस्टपळसि, सामिना हर्दे मीकुन मुन्ने अर्सिं ताकिचेके कराहंतुर, ओर्क मिमेट कदर हीम्टु. ओर कियाना बेसता कबाहकुनाहाटीं पावरमते ओर्क एक्को मान-मर्यादा कीम्टु, वरोंक-वरोर बेस सांतिते मंटु, इंचि मीकु विनंति कीतन.

14 मावा विस्वासुल्कुनिटा! लंडोर्कुंक समजांचि वेहाट, वेरियानोर्कुंक दैरनेम हीम्टु, कमजोर मत्तोर्कुंक सहायम कीम्टु, अंतोरतोनि ओपकेते मंटु इंचि मोमोट मीक तेळियागोट्सि विनंति कीसेके मंतोम.

15 मीलोप्यो ओरन्ना सेड्डातनमता बदला सेड्डातनम कियकोटा हळकुंटु. गानि बस्केळक वरोंक-वरोर आनि अंतोराहाटीं गुडा बेस कियालय कोसिस कीम्टु.

16 बस्केळक कुसिते मंटु.

17 बस्केळक पारतना कीसेके मंटु.

18 अन्नि परिस्तितिने मिमेट पेनदुक दन्यवाद कीम्टु, बारित्ते मिमेट येसु किरिस्तुनलोप्यो इल्हे मंदना इंचि पेनदा इच्चा मंता.

19 पवित्र आत्माता वेलगुन पिस्सुमट.

20 पेनदा कबुरतोर पोल्लेन पास्कमट.

21 गानि अन्निटवुन परिकसा कीसि हुळाट, बव बेसतवो अवुन पीसि मंटु.

22 अन्नि तीरकुना कराब पोल्लेनाल लक्कु मंटु.

23 सांति हियना पेने कुद मीकुन पुरागा पवित्र किथियेकांटी, मावा येसु किरिस्तु सामि मर्रा वायानादाका मीवा आत्मातुन, जीवातुन, मेंदुलतुन दोसेम हिलाकोटा कापाळिकांटी.

24 मीकुन केयता पेन विस्वासमगल्लद आंदु, अद अल्हेने कीता.

25 विस्वासुल्कुनिटा! मावाहाटीं पारतना कीम्टु.

26 अंतोर विस्वासुल्क, वरोंक-वरोर कय कल्पिसि पवित्र पावरमते जोहार कीम्टु.

27 इद सिट्टिट अंतोर विस्वासुल्क केंजानाल हद्विसि हुप्सा इंचि नना सामिना अदिकारमते वेहासेक मंतन.

28 मना सामि येसु किरिस्तुना कुर्पा मीपोर्रो मन्किांटी. आमेन.

2 तेसलोनि

तेसलोनि विस्वासुल्लुकुंक पौलुसना रोंडो सिट्टि

इद सिट्टिता बारेमते गिचचो परिचयम

रासतोना पोरोलः पौलुस

रासता कालमः इसवि सन 50-54

इद सिट्टि पौलुस रासतद आंदु. पौलुस तेसलोनि सहरता विस्वासुल्लुकुंक मोदाटा सिट्टि रासता कोन्नि रोजकुना पजा, अगाटा विस्वासुल्लुकुना लोप्पो पूना परिस्तिती सुख आता. अद बतल इत्ते, “सामि मल्लिस वायाना रोजु वाता” इंचि रासतदुन ओर बच्चुंगो तीरकुना अर्ताल्लुकु तेंडालय दल्लगतुर. इच्चुर लोकुल्लुकुनद सामिना न्यायम सुख आता इंचि ओरा विचारम मत्ता. अदुनहाटीं दुनिया मुळगाना वेला दग्गेरेने मंता इंचि कबळ कियार्कोटा, ओर लंडु आसि मनुंदुर.

इसोंटा तप्पुड विचाराल्लुकु, ओरा मनसुनाल तेंडसि पोहालय पौलुस तेसलोनि सहरता विस्वासुल्लुकुंक रोंडो सिट्टि रासतोर. अल्लेने, “सामि मल्लिस वायाना रोजु वाता” इंचि इच्चुर इनुंदुर, अद पोल्ले ओर्क बेस तेळियागोम इंचि पौलुस इद सिट्टि रासतोर.

बगा बतल मंता

जोहार आनि परिचयम 1:1-2

स्तुति आनि आदेसाल्लुकु 1:3-12

किरिस्तु मर्रा वायाना बारेमते समजांचि वेहामळ 2:1-17

किरिस्तु वेहताप पिस्साना बारेमता बोदां 3:1-15

आकिरता बोदां 3:16-18

जोहार

1-2 नना पौलुस,* सिल्वानुस आनि तिमोति मोमोट इद सिट्टि मीकु तेसलोनि सहरते मंदना कलिसियातोरुंकु रासेक मंतोम. मना पेनबाबाल आनि सामि येसु किरिस्तुनाहेंदाल कुर्पा, सांति दोर्किकांटी.

तेसलोनि विस्वासुल्लुकुना विस्वासम आनि पिस्वर

3 विस्वासुल्लुकुनिटा! मीवा विस्वासम वेल्ले बेरस्सेक मंता, मिमेट वरोन-वरोर कीकुनना पावरम वेल्ले बेरस्सेक मंता. अदुनहाटीं मोमोट बस्केळ्ळक मीवा बारेमते पेनदुक दन्यवाद कियमळ गावाले. इदे बरोबर मंता.

4 अचोने आयाका मिमेट तकलिपकुन, बादन ओप्के पीसि पेनदा लोप्पो गट्टिगा विस्वासमते निल्लिस मंतिर. अदुनहाटीं मोमोट मीवा बारेमते पेनदा कलिसियाने पेदू दातनम वेहकुंचेके मंतोम.

5 इद पेनदा सत्तेम न्यायमता रुजुव आंदु. मिमेट पेनदा राज्येमते होननालायक आयागोम इंचि इवन्नि बादां अरसेक मंतिर.

6 बोर अयते मीकुन तकलिप कीतुर, दानकु बदुल पेन ओर्क तकलिप हियमळ न्यायमे आंद.

7 बस्के अयते सामि येसु ओना बलमगल्ला दूतनतोनि पोत्तना तळमिते स्वर्गमताल दिस्सानुर, अस्के तकलिपते मत्तोर्कुंक आनि माकु सांति हियानुर.

8 बोर अयते पेनदुन एरपाट किय्युर, बोर अयते मना सामि येसुना बेसता कबुरतुन पीसि ताकुर, ओर्क पेन सिक्सा हिय्यार.

9 ओर सामिना मुन्नेटाल आनि ओना ताकतता महिमाताल लक्कु आसि ओर्क बस्केळ्ळक मनना नासडेमता सिक्सा आयार.

10 बस्के अयते येसु सामि मर्रा वायानुर अस्के ओना पवित्र लोकुल्लुकुनाहेंदाल महिमा एतंतोर आनि विस्वासम कीतुर अंतोरहेंदाल ओर पेदू दातनम दोर्किचुकुंतोर. बारित्ते मोमोट वेहता गवाइतुन मिमेट विस्वासम कीतिट.

11 इदुनहाटीं, मना पेन मीकुन बताहाटीं अयते केयता अदुनलायक मिमेट मनालय, अन्नि बेसता कबाहक पूरा कियालय आनि विस्वासमतव पूरा कबाहक पेनदा ताकततोनि पूरा आयालय मोमोट मीवाहाटीं बस्केळ्ळक पारतना कीसेके मंतोम.

12 इल्ला मना पेन आनि मना सामि येसु किरिस्तुना कुर्पातुन पीसि, मीवाहेंदाल मना येसु सामिना पोरोल्लक कदर दोर्काना आनि ओनहेंदाल मीक कदर दोर्काना.

2

सेड्डा पोल्ले जर्गतां

* 1:1-2 इद सिट्टि पौलुस रासतोर, सिल्वानुस आनि तिमोति ओनतोनि नमस्कारम वेहतुर.

- 1 विस्वासुल्लुकुनिटा! इंदके मना सामि येसु किरिस्तु मर्रा वायाना बारेमते, आनि मनम जमा आसि ओनतोनि कलियाना बारेमते मीक विनंति कीसेके मंतोम.
- 2 अद बतल इत्ते, सामि मल्लिस वायाना रोजु वाता इंचि मिमेट आत्माताहेंदाल* आयि, पोल्लेताहेंदाल आयि, मावाहेंदाले सिट्टिट वाता इत्ताप आयि मीक केंजा वाते, मीवा मनसुन हीके-हेके आया हियमटु, वेरियमट.
- 3 बोरे आयिर बदे रीतुने मीकुन दोका किया हियमटु; बारित्ते मुन्ने वरोना पोल्ले वरोर केंजाकोटा आयाना कालम वायार, पजा पेनदा पोल्लेतुन विरोद कियाना नासडेमता मर्रि दिस्सानुर, दाना पजाने किरिस्तु मर्रा वायाना रोजु वायार.
- 4 आ नासडेमता मर्रि, पेन इंचि इनानवुन अन्निन, मनकालोर मोळकानवुन अन्निन विरोद कीसि, ओनद ओरे पेदूदोन इंचि वेहकुंतोर. ओर पेनदालेसी पेनदा गुळिते होंचि उदूदानुर, आनि ननाने पेनदुन इंचि वेहकुनानुर.
- 5 नना मीवातोनि मत्तस्के इव पोल्ले वेहतन, मीक मति हिल्लेना?
- 6 पेनदा पोल्लेक विरोदमते तिरियानोर ओना वेला वातारित्तेन दिस्सानुर, इंदके ओन बतल आपसेके मंतानो मीक एरपाटे मंता.
- 7 पेनदा पोल्लेतुन विरोद कियानोना मर्ममता ताकत इंदकेगुडा कबळ कीसेकेन मंता; गानि दान आपानोन पक्कक कियानादाका पेन ओन आपसेकेने मंता.
- 8 बस्के अयते पेनदा पोल्लेतुन विरोद कियानोर दिस्सानुर, अस्के येसु सामि ओना तोळदा ऊपिरते ओन हक्किसि, ओर वायानेके दिस्सना वेलगुने ओन नासडेम कियानुर.
- 9 पेनदा पोल्लेतुन विरोद कियानोर वायमळ इत्ते, देय्यमतदे उंदि कबळ आंद, ओर वासि आबदूदम पोल्लेने देय्यमतव अन्नि ताकतकुनतोनि चिन्हां, इचंन्रमता कबाहक कियानुर.
- 10 पजा कराब कबाहक कीसि नासडेम आयानोर्कुन अन्नि तीस्कुने पसांचंतोर. बारित्ते बद सत्तेमतुन अयते पावरमते ओपकुंचि मत्ते मुक्ति दोर्किस मनवळ, ओर अदुन ओप्पकुन्ना हिल्लुर.
- 11 अदुनहाटी ओर आबदूदमतुने विस्वासम किथ्यिर इंचि पेन ओरा लोप्पो गयबेत कियाना सक्त्तितुन लोहंता.
- 12 बचुदुर अयते सत्तेम पोल्लेतुन विस्वासम कियवा, कराब कबाहकुने कूस आंतुर, ओर अंतोर्क पेन सिक्साता आदेस हिय्यार.
- 13 सामिना पावरमगल्ला विस्वासुल्लुकुनिटा! मिमेट पवित्र आत्माताहेंदाल पवित्र आसि, सत्तेमते विस्वासम ईसि पिसालय पेन मीकुन मुन्नेने पेरता. अदुनहाटी माकु मीवा बारेमते पेनदुक बस्केळक दन्यवाद कियमळ गावाले.
- 14 इल्हा मिमेट मना सामि येसु किरिस्तुना महिमातुन दोर्किचुकुनना इंचि, पेन मोमोट वेहता बेसता कबुरताहेंदाल मीकुन केयता.
- 15 अदुनहाटी विस्वासुल्लुकुनिटा! गट्टिगा निल्लिस मंटु, मावा तोळदाल पेयसता पोल्लेहेंदाल, सिट्टिटाल बव रीति-रिवाजकु अयते मीक कराहतोम अवुन पीसि ताकट.
- 16 मना सामि येसु किरिस्तु आनि पेनबाबाल मनाकुन पावरम कीसि, ओना कुर्पाहेंदाल बस्केळक मनना सांति, बेसता आसे हीतोर.
- 17 मीवा हरेक बेस कबळते, हरेक पोल्लेते पेन मीकुन गट्टिगा किथ्यिकांटी, इंका मीवा मनसुने सांति हिथ्यिकांटी.

3

माहाटी पारतना कीम्टु

- 1 विस्वासुल्लुकुनिटा! मीक आकिरते वेहानद बतल इत्ते, सामिना पोल्ले मीलोप्पो पैलांचतापे, वेरेतोर लोप्पोगुडा बिराना पैलांचि पेदूदातनम दोर्कनाहाटी पारतना कीम्टु.
- 2 अल्हेने अंतोर लोकुल्लक विस्वासुल्लक आयुर, अदुनहाटी तेडा आनि दुस्ट लोकुल्लुकुनाल पेन माकुन पिसागोट्टि.
- 3 गानि सामि विस्वासमगल्लोड आंदुर; ओर मीकुन देय्यमता कयदाल कापाळसि गट्टिगा निलाहंतोर.
- 4 मोमोट आदेस हीताप मिमेट ताकसेके मंतिट. मुन्नेगुडा अल्हे ताकतिर इंचि सामिन लोप्पो माक मीवा बारेमते बरोसा मंता.
- 5 सामि मीवा मनसुकुन पेनदा पावरमते अल्हेने किरिस्तुना गट्टि ओपकेते ताकसा परांतोर.

जिम्मेदारिते कबळ किय्याना

- 6 विस्वासुल्लुकुनिटा! बोरे अयते लंडु आसि मंतुर, मोमोट वेहता रीति-रिवाज परकारम ताकसेक हिल्लुर, असोटा हरेक मनकानाल लक्कु मंटु इंचि मना सामि येसु किरिस्तुना पोरोलते मीक आदेस हीसेक मंतोम.
- 7 मोमोट मीवातोनि मत्तस्के लंडु आसि मना हिल्लोम, अदुनहाटी मालेसी बल्हा ताकाना इंचि मीक कुद एरपाटे मंता.
- 8 मोमोट बोनागागुडा पुक्कटता गाटो तिना हिल्लोम, मी लोप्पोटाल बोनेके बर्वु आयामन्नि इंचि नर्का-पिय्यल कबळ, कस्टम कीसि गाटो तित्तोम.
- 9 माक मीपोर्रो बर्वु आयाना अदिकारम हिल्ले इत्ताप आयो, गानि मिमेटगुडा मावालेसी मंदना इंचि मीक हुप्सालय मोमोट कबळ कीसि तित्तोम.
- 10 मोमोट मीवातोनि मत्तस्के, “बोर्कन्नागिंटा कबळ कियानद हिलाकोटे, ओर गाटो तिनामन्नि” इंचि आदेस हीसि मत्तोम.

* 2:2 आत्माता बविस्यवानि.

11 गानि मिहगा इच्चुर लोकुल्क लंडोर्क मंतुर, ओर बतले कबळ किय्युर, सिराप इंकावरोना जोलिक होनना कबाहक कीसेके मनंतुर इंचि मोमोट केंजतोम.

12 असोटा लोकुल्क चुपचाप कबळ कीसि ओरा पिस्वरता कमाइ कियिरकांटी, ओर्क मोमोट सामि येसु किरिस्तुना पोरोलते आदेस हीसि, बुदिदे वेहंतोम.

13 विस्वासुल्कुनिटा! मिमेट बेसता कबाहकुने नेरबळताप मनमट.

14 बोरन्नागिंटा इद सिट्टिते रासता पोल्लेन केंजसि ताकाकोटे, ओनपोरो नदर इरिट, ओनकु सिग्गु वायागोम इंचि ओनतोनि दंटा पियमट.

15 अयना ओन पगातोनलेसीं हळमट, गानि तम्मनालेसीं ओन्क वेरे वेहाट.

आकिरता पोल्लें

16 कुद सांति हियना सामि, बस्केळ्क अन्नि तीस्कुने मीक सांति हियिर, बस्केळ्क मी अंटोरतोनि मन्निरकांटी.

17 नना पौलसुन आंदुन, नावा कयदेने मीक जोहार रासेक मंतन. अन्नि सिट्टिते इद नावा आनवल आंद, नना इल्हे रासंतन.

18 मना सामि येसु किरिस्तुना कुर्पा मी अंटोरतोनि मन्निकांटी.

1 तिमोति तिमोतिकु पौलसना मोदाटा सिट्टि

इस सिट्टिता बारेमते गिचचो परिचयम

रासतोना पोरोल: पौलस

रासता कालम: इसवि सन 64

इद सिट्टि पौलस ओना मरिनसोटा तिमोतिकु रासतोर. इपीसि सहरते मनना विस्वासुल्कुन पेन हुपिस्ता हरदाल तप्सनाहाटी तप्पुड बोदा कराहनोर वेल्लेन लोकुल्क तयार आतुर. अयते आ तप्पुड बोदानाल अगटा विस्वासुल्कुन बल्हा तपिच्चना, ओर्कुन विस्वासमते बल्हा गट्टिगा किय्याना, इंका ओर अंतोरतोनि बल्हा कलियसि-मेलियसि बक्तिते मनना. इसोँटव वेल्लेन पोल्लेँ पौलस इद सिट्टिते रासि तिमोतिकु हिम्मत हीतोर.

पेन उंदे आंद. इंका पेनदाल लक्कु आता अंतोर लोकुल्कुन मर्रा पेनतोनि कल्पानोरगुडा वरारे आंदुर. ओरे मनकना रूपमते पुटता पेनदा मर्रि येसु किरिस्तु. अंतोर लोकुल्कुना पापालक मापि आयनाहाटी येसु कुद्दु कूसुनपोरो ओना जीवातुन हीतोर. इचोने आयका अंतोर विस्वासुल्क वेंरेतोरतोनि बल्हा मान-मर्यादाते मनना, पेन हुपिस्ता हर्दे बल्हा ताकाना इल्हा वेल्लेन पोल्लेँ तिमोतिकु इद सिट्टिते पौलस रासि लोहतोर.

बगा बतल मंता

जोहार आनि परिचयम 1:1-2

कलिसिया आनि अगाटा अदिकाराल्कुना बारेमते समजांचि वेहामळ 1:3-3:16

तिमोतिकु ओना कबाह्कुना बारेमते समजांचि वेहामळ 4:1-6:21

तिमोतिकु पौलसना जोहार

1 इद सिट्टि पौलसुनद आंद. मनम बोनपोरो अयते आसे पडसि मंतोम, आ किरिस्तु येसु आनि मनाकुन कापाळाना पेनदा आदेसताहेंदाल नना किरिस्तु येसुना प्रेरित* आतन.

2 विस्वासमते नावा निजम मर्रि आता तिमोतिकु इद सिट्टि रासतन. मना पेनबाबानाहेंदाल आनि मना सामि येसु किरिस्तुनहेंदाल नीकु कुर्पा, दया आनि सांति दोर्कि.

तप्पुड बोदानाल जेगर्ता मनना बारेमते

3 नना मेसिडोनिया राज्येम होननेके नीकु नना विनंति कीसि वेहतन. दाना परकारम निमे इपीसि सहरते मन्नु. निमे अगा मत्ते, बोर अयते सत्तेमकु बदुल वेरे बोदां कराहंतुर, ओर्कुन अल्हा कराहकोटा आपा.

4 पुट्टिचि वेहना कतां, वंसाल्कुना जोलीं ओर होळसियालय आदेस हीम. बारित्ते अवनहेंदाल वाद-विवादकु आंतां विस्वासमहेंदाल जर्गना पेनदा पिलानगुडा पुरागा आयो.

5 ई आदेसता उद्देसम, पवित्र गुंडेताल, मनसुना बेस पोल्लेताल आनि निजम विस्वासमताल पुट्टना पावरम आंद.

6 इचचुर लोकुल्क इवनाल तप्पिसि वट्टि पोल्लेँ वळकालय दलगतुर.

7 ओर वेहना पोल्लेना अर्तम बतलो ओर्के तेळियाकोन्ना, गट्टि विस्वासमते ओर, मूसाना नियमाल्कुना गुर्ल्लक आयाना इनकुंचंतुर.

8 मूसाना नियमकुने मत्ताप बरोबर ताकानयते, अद मंचिदे इंचि माकु एरपाटे.

9 इंका इव नियमकु नीतिमंतुल्कुनाहाटी रासमळ जर्गाहिल्ले. गानि अव अयते, नियमकुन पीसि ताकवोराहाटी, आदेसकुन पीसि ताकवोराहाटी, बक्ति कियवोर आनि पापि लोकुल्कुनाहाटी, अपवित्र आनि सत्तेमते ताकवोराहाटी, तल्लुर-बाबोन हळ्कानोराहाटी, मनकालोर्कुन हळ्कानोराहाटी,

10 बोगमतनम कियानोराहाटी, मांडसा-मांडसातोनि बोगमतनम कियानोराहाटी, मनकालोर्कुन दोर्कापीसि अम्मनोराहाटी, आबद्दम वळ्कानोराहाटी, तप्पुड गवाइ वेहानोराहाटी इंका सत्तेम पोल्लेन आबद्दम कियानोराहाटी ई मूसाना नियमकु मंतां.

11 तल्लसकुननालायक पेनदाहेंदाल वाता महिमामय बेसता कबुरतुन नना कराहना इंचि नाकु अप्पजेपमळ जर्गता.

पौलसुनपोरो पेनदा दया मंता

12 मना सामि येसु किरिस्तु नाकु बलम हीतोर अदुनहाटी नना ओन्क दन्यवाद कीतन. इंका नाकुन विस्वासम लायकतोर इन्कुंचि ओना सेवाताहाटी निलाहतोर.

* 1:1 प्रेरित इद पोरोल्क "पेन लोहचीतोर" इंचि अर्तम. येसु पन्नेड मंदितुन पेरकुत्तोर ओरे प्रेरितुल्क आंदुर.

13 मुन्ने नना बदनाम कियुंदुन, तकलिप हियुंदुन, तेंडसि पोहचि वळकुंदुन. अयना नाकु सामिना दया दोर्कता, बारित्ते नना कियानद बतलो तेळियका, अविस्वासमते अल्हा कीतन.

14 मना सामिना कुर्पा नाकु वेल्लेन दोर्कता. अचोने आयका, येसु किरिस्तु ओनगा मनना विस्वासम आनि पावरमगुडा नाकु हीतोर.

15 पापिर्कुन पिसागोटनाहाटीं येसु किरिस्तु इद दुनियाते वातोर. ई पोल्ले सत्तेम आनि पूरा ओप्कुननालायक मंता. अंतोर्कन्ना पेद्दा पापिन नना आंदुन.

16 अयनागानि येसु किरिस्तु नापोर्रो दया हुपिस्तोर. अल्हा दया हुपिचि, मुन्ने बोर अयते बस्केळक पिस्सना पिस्वर दोर्कना इंचि ओनपोर्रो विस्वासम कीतुरो, ओर्क ओना अंतेम हिलुवा सहनमतुन हुपिचनाहाटीं उंदि उदाहरनता रूपमते नावसोटा पापिन इरतोर.

17 बस्केळक मनना राजाल, बस्केने नासडेम आयवोर, बस्केने दिस्सोर असोटा मावा उंदे पेनदुक पीळि-पीळिनदाका कदर, पेदातनम दोर्कि. आमीन.

तिमोतिना जिम्मेदारि

18-19 कोको तिमोति! पेनदा कबुरतोर नीवा बारेमते मुन्ने बव पोल्लें अयते वेह्चि मत्तुरो, आ पोल्लेना परकारम, निमे नीवा विस्वासमतुन गट्टिगा पीसि, मनसुना बेस पोल्ले पीसि वरोर बेस सिपाइलेहका लडाइ कीसेके मनना इंचि नना नीकु आदेसतुन अप्पजेपसतन. बारित्ते मनसुना पोल्लेतुन हय्सका वेल्लेन मंदि लोकुलक, उंदि डोंगा रोंडु तुकडां आसोत्ताप, ओर ओरा विस्वासमतुन नासडेम कीकुत्तुर.

20 विस्वासमतुन नासडेम कीकुत्तोरव्टेताल हुमिनयुस आनि सिंकंदर ईर इव्कुर मंतुर. पेनदुन बदनाम कियाकोटा बल्हा मनना इत्ता पोल्ले करियना इंचि नना ईर्कुन देय्यम्क अप्पजेपतन.

2

मुर्ताहक-मांडसताहाटीं नियमकु

1 अन्नितकन्ना मुन्ने नना नीकु विनंति कीतन गदा, पेनदुक विनंति कियनेके, पारतना कियनेके, वरोनाहाटीं वरोर पारतना कियनेके, दन्यवाद कियनेके अंतोर लोकराहाटीं कियगोम.

2 मनम राजालोराहाटीं आनि पेद्दा-पेद्दा अदिकारिल्कुनाहाटीं पारतना कियगोम. अल्हा कीते मनम आरामते, सांतिते आनि पेनदुक नच्चना कदरगल्ला पिस्वर पिसा परीतोम.

3 इल्हा कियमळ मंचिद आंद. मनाकुन कापाळना पेनदा नदरतेगुडा इदे ओप्कुननालायक मंता.

4 लोकुलक अंतोर्कुक मुक्ति दोर्कना आनि निजमतुन एरपाट कियना इंचि पेनदा इच्चा मंता.

5 बारित्ते पेन उंदे आंद. इंका मनकन आनि पेनदुन कल्पालय नड्डुमगुडा वरोर मंतोर. ओरगुडा वरोर मनकले. ओरै किरिस्तु येसु आंदुर.

6 अंतोर लोकुलकुंक मुक्ति अस्सि हियनाहाटीं ओर सततुन कुदुवा इरसि ओनद ओर अप्पजेपकुत्तोर. मंचि वेलापोर्रो ओना गवाइ हीतोर.

7 इदे गवाइतुन वेहनाहाटीं, नाकुन प्रचार कियानोर प्रेरित इंचि पेरमळ जर्गता. इंका यहुदि आयवोर्कुंक विस्वासम आनि सत्तेमता बारेमते कराहनोर इंचि निलाहमळ जर्गता. नना निजम वेहचंतन, आबद्दम वेहासेक हिल्लेन.

8 अदुनहाटीं पारतना कियना अन्नि जेगाने मनसुने बतले होंगु-जगडम इरकोटा पवित्र कय्कु पोरो तेहचि मांडसा पारतना कियना इंचि नावा इच्चा मंता.

9-10 अल्हेने मुरताहकुना हेंदाल नना कोरानद बतल इत्ते, अव सादा-सिंपल कपडिं पोंडसि, साप मनसुने मनगोम. इंका बेस कबाहक कीसि पेनदा बेस बक्ति कियनावुनलेसीं मनगोम. गानि बंगारालक, डिस्को पूसाना दुम्मे वाटकुचि, वेल्लेन दराता कपडिं केरसि, रका-रकालकुना जेडां वाटसि सिंगारालक अरानायो. बारित्ते मुरताहकुंक अदे बेस.

11 मुरतळ सिराप सांतिते कय हिळु मंचि अन्नि करियगोम.

12 उंदि मुरतळ, मांडसक कराहमळ, ओनपोर्रो अदिकारम ताकिचमळता बारेमते, नना ओप्कुन्नोन. मुरतळ सिराप चुपचाप मनगोम.

13 बारित्ते पेन मोदाला आदामुन कीसि पज्जोताल हव्वान कीता.

14 इचोने आयका, आदाम पसांचा हिल्लोर गानि मुरतळ पसांचि पापमते अरता.

15 गानि अद ओक्कला विस्वासम, पावरम, पवित्र आनि ओप्केते पिलालक कंचेके तल्लुना जिम्मेदारि पूरा कियानयते, दानकु तप्पाकोटा मुक्ति दोर्कार.

3

कलिसियाता अदिकारिल्क बल्हा मनना?

1 ओक्कला बोरन्ना मनकल कलिसियाता पेद्दा मनकल आयना मनसु इरते, ओर तप्पाकोटा बेस कबळ कियना इनकुंतोर, इत्ता पोल्ले मात्रम निजम आंद.

2 पजा आ पेद्दा मनकना पिस्वरते बतले दोसेम मननायो. ओर उंदे मुरतटा मुय्दो आयगोम, ओर ओप्के पीसि मनानोर आयगोम, ओर विचारम कीसि ताकानोर आयगोम, अंतोर ओना कदर कियनालायक ओर मनगोम, ओर वैरेतोरकुन बेस हळकुनानोर आयगोम आनि वैरेतोरक करानालायकगुडा मनगोम.

3 इंका ओर कल्लु उनानोर, मर्लाबळानोर, जगडम कियानोर मनानाम्नि गानि मेततटा मनसुनोर मनगोम. ओन्क कोत्तना लालच मनानाम्नि.

4 ओर ओना सतता कुटुंब बारेमता अन्नि जिम्मेदारि बेस हळकुनानोर मनगोम, ओना मर्क-मियाहक ओना देकरेकते मंचेके ओना बेस कदर कियनोर मनगोम.

5 बारित्ते वरोर मनकंक ओना कुटुंबता देकरेक किय्युडे तेळियाकोटे, ओर पेनदा कलिसियाता देकरेक बल्हा किया परांतोर?

6 इंका ओर पूने-पूने विस्वासमते वातोर आयामन्नि, बारित्ते असंटोक्कु गरा वासि देय्यम्क दोर्कानसोटा सिक्साता आदेस ओन्क दोर्कार.

7 इच्चोने आयका वैरे लोकुल्लुकुना विचाराल्कगुडा ओना बारेमते बेस मनगोम. अल्हा मनाकोटे ओर सिग्गु पोळगोदुकुंकि देय्यमता कय्दुक दोर्का परांतोर.

कलिसियाता सेवक

8 कलिसियाता सेवाकुल्लुकुना अल्हेन कदरलायक मनना. ओर रोंड नाल्केनोर इत्ते चुगली कियानोर मनानाम्नि, ओर्कु कल्लु उनना अलवट मनानाम्नि, ओर तप्पु कबाहक कीसि संपादिचनोर मनानाम्नि.

9 ओर विस्वासम बारेमता मर्ममतुन मनसुना बेस पोल्ले वेहताप तेल्पिचकुंकि दान गट्टिगा पीसि मनानोर आयगोम.

10 ईरा गुनम बसंतदो तेळियनाहाटी ईरदगुडा परिकसा येतगोम. परिकसाते ओरगा बतले दोसेम दोर्काकोटे, ओर्कुन कलिसियाता सेवक इंचि कबळ किया हियना.

11 इल्हेने मुर्ताहकगुडा अंतोर कदर हियनलायक मनगोम. अवुनगा वैरेतोरकुन अपमानम कियना गुनम मनानाम्नि. गानि बेस ओप्केते अन्नि पोल्लेने विस्वासम कियनलायक अव मनगोम.

12 कलिसियाता सेवाकुंकि उंदे मुत्तो मनगोम. ओर ओना सतता मर्क-मियाहक आनि ओना संसारमतुन बेस ताकसानोर आसि मनगोम.

13 बारित्ते बोर अय्ते सेवक इंचि कबळ कीतोर ओर बेस कदर दोर्किचुकुना परांतोर. अचोने आयका किरिस्तु येसुना पोरो मनना ओना विस्वासमते ओन्क वेल्लेन दैरनेम दोर्कता.

मना विस्वासमता मर्मम

14-15 नाकु निहगा बिराना वायना आसे मंता. गानि ओक्कला नाकु वायालय आल्सेम आते, पेनदा कुटुंबते, इत्ते जीवाते मनना पेनदा कलिसियाते वरोर मनकल बल्हा मनगोम इत्ता पोल्ले नीकु एरपाट आयगोम इंचि इद सिट्टि रासेक मंतन. बारित्ते कलिसिया निजमता निटड गुंजा आनि पुनादि आंद.

16 मना बक्किता सत्तेमता मर्मम वेल्लेन पेद्देद, इव्ते बतले अनमानम हिल्ले: किरिस्तु मनकना रूपमते पुटतोर, ओनगा बतले दोसेम हिल्ले इंचि पवित्र आत्मा वेहता, पेनदा दूतांक ओर दिसतोर, ओना बारेमते दुनियाता अन्नि देसेल्लुकुना लोकुल्लुकुंकि प्रचार कियमळ जर्गता, दुनियातोर ओनपोरो विस्वासम इरतुर आनि पेनदा कदरते ओन मरा स्वर्गमते तेहामळ जर्गता.

4

तप्पुड बोदानाल जेर्गता!

1 वायना रोजकुने, इच्चुर लोकुल्लुकुंकि दोका हियना आत्माना बोदां आनि देय्यमता पोल्ले केंजसि ओरा विस्वासमतुन होळसंतुर, इंचि पवित्र आत्मा किलियर वेहंता.

2 बोरा बोदां अय्ते काचाहता सलाकिते बोळिस हासोचि मंतां, असोटा दोका हियानोर आनि आबद्दम वळकना मनकालोराहेंदाल इल्हा जर्गता.

3 मरमि आयामन्नि इंचि ओर कराहंतुर, इंका बव वस्तुक अय्ते पेन दाना विस्वासुल्लुकुनाहाटी आनि निजमतुन एरपाट कियनोराहाटीं दान्क दन्यवाद हीसि तिनालय कीता, अव कोन्नि वस्तुकुन तिनानाम्नि इंचि ओर कराहंतुर.

4 गानि पेन कीता अन्नि वस्तुक बेसतवे आंद. पेनदुक दन्यवाद कीसि तित्ते बवे वस्तुक मन्नि इननालायक मन्नों;

5 बारित्ते पेनदा पोल्ले आनि पारतना अद वस्तुन पवित्र कीता.

किरिस्तुना बेस सेवक आयगोम

6 ओक्कला निमे इव आदेसकुन विस्वासुल्लुकुंकि कराहनय्ते, निमे विस्वासम कियना बव पोल्ले आनि सत्तेम बोदानापोरो ताकतियो अवुनहेंदाल बेरसता, येसु किरिस्तुना वरोर बेस सेवक आकिन.

7 बक्ति हिल्लव अल्हेन तयार कीसि वेहना कतानाल मंट. बस्केळक बक्ति पिस्वरते मुन्नेळक ताकाना कोसिसते मंट.

8 बारित्ते मेंदुलताहाटी कियना टेरनिंगते गोडच्चेन पायदा मंता. गानि पेनदा बक्ति कीते, अव्ते अन्नि तीरकुना पायदा मंता. इंदकेटा पिस्वर आनि मुन्नेटा पिस्वरहाटीं पेन हीता पोल्ले अव्ते कलियसि मंता.

9 ई पोल्ले पुरागा ओप्कुननालायक आनि विस्वासम कियनलायक मंता.

10 इदुनाहाटीगें मनम बागा कस्टपळसेके, पोराम कीसेके मुन्नेळक ताकसेके मंतोम. बारित्ते मनम मना आसे, बस्केळक जीवाते मननद आनि अंटोर लोकुल्लुकुन कापाळना पेनदापोरो इरतोम, विसेस कीसि दान विस्वासम कियानोर्कुन पिसागोटना पेनदापोरो इरतोम.

11 इवे पोल्लें कियालय आदेस हीसि अंटोर्क करहा.

12 नीवा लेय्यातनमहेदाल बोरे नीकुन सिन्नगा ह्ळानायो. गानि वळकुमळते, ताकमळते, पावरम ह्प्समळते, विस्वासमते, पवित्र मनमळते विस्वासुल्लक नीकुन ह्ळसि करियगोम, अल्हा मन्नु.

13 नना बदवेरदाका अयते वायोनो अदवेरदाका निमे अंटोर नड्डुम दर्मसास्त्रमतुन हदवुसेके, प्रचार कीसेके, कराहसेके मन्नु.

14 पेद्रुदाल्क नीपोरो कय्क ईसि पारतना कियनेके, बविस्वयानि कियानोर वेहता आ वरम नीकु दोर्कता. अद वरमतुन निमे वाळकुन, दान मति मर्गुमा.

15 इवे पोल्लेन निमे नीवा मनसुने ईसि अवुना परकारमे ताकसेक मन. अस्के निमे बक्तिते बेस बेर्सनद अंटोर लोकुल्लुकुन दिस अरंता.

16 निमे नीवा पिस्वर बारेमते आनि निमे वेहना पोल्लेन बारेमते वेल्ले जेर्गताते मन. अल्हा मत्तिनित्ते, नीवद निमे कापाळकुंतिन, नीवा पोल्लें केजानोर्कुनगुडा कापाळतिन.

5

बोनतोनि बल्हा वळकना बारेमते कोन्नि पोल्लें

1 पेद्रुदा वयम मनकन तेराहताप वळकुमा, गानि ओन नीवा बाबाल इन्कुंचि ओन्क तेल्पिचि वेहा. सिन्नोर्कुन तम्मुर इन्कुंचि ओरतोनि व्यवहार कीम.

2 अल्हेन पेद्रुदा वयम मुर्ताहकुन यावहक इन्कुंचि आनि सिन्ना वयम मुर्ताहकुन हेलाहक इन्कुंचि पुरागा पवित्र मंचेके अवुंक तेल्पिचि वेहा.

3 बव मुर्ताहक अयते निजम मुंडामोसि मंतां, अवुना निमे कदर कीम.

4 ओक्कला बददना मुंडामोस्ता मुरतळकु मर्क-मियाहक आयि, तंगमर्क-मियाहकगिंटा मत्ते, मोदाला ओर बेस बक्तिते ताकसेके सतता कुटुंबतुन पोस कियमळ करियगोम. पजा सतता तल्लुर-बाबो ओराहाटी कीता मंचितनमता स्नम तिरिचनाहाटी, ओर्क मंचितनमतुन मलाहचि हियगोम. बारित्ते इल्हा कियमळ पेनदुक नच्चनालायक मंता.

5 बद मुरतळ अयते निजमते मुंडामोसि, बोरे दिक्कु हिलाका उंदे मनंता, अद मुरतळ दाना आसे पेनदापोरो ईसि, नर्का-पल्ही पेनदुक विनतिं, पारतनां कीसेके मनंता.

6 गानि बद मुरतळ अयते सिराप सुकमता आसेते पिसंता, अद मुरतळ पिस्सि मंचिगुडा हाता लेक्कातेन वांता.

7 इंचि बोरे तप्पुने दोर्काकोटा मननाहाटी, इव पोल्लेना बारेमतेगुडा अंटोर विस्वासुल्लुकुन आदेस हीम.

8 ओक्कला बोर्नना ओना हेडमितोर्कुन बेस ह्ळकुनाकोटे, विसेस कीसि सतता लोतोर्कुन बेस ह्ळकुनाकोटे, ओर विस्वासमता कदर कियवोर आंतोर. अचोने आयका विस्वासम कियवोक्कना एक्को कराब मनकना लेक्काते वांतोर.

9 मुंडामोस्ता मुरतटा वयसु अरवै वर्साकन्ना तक्को मनानय्ते, आ मुरतटा पोरोल मुंडामोस्ता मुरताहकुना रजिस्टरते रासानायो. अचोने आयका आ मुरतळ मुन्ने वरोने मुय्दोन मरमिं आसि मत्तद आयगोम.

10 इंका अद मुरतळ बेस कबाहकुने बेस पोरोल तरकुंचि मनगोम, मर्क-मियाहकुन पोस कीतद आयगोम, वाता हेळमितोरा सेवा कीतद आयगोम, पवित्र लोकुल्लुकुना काल्क नोरतद आयगोम, तकलिपने मत्तोर्कुंक सहायम कीतद आयगोम इंका अन्नि परिस्तितेने बेस कबाहक कियालय अप्पजेपतद आयगोम.

11 गानि लेय्यातनमते मुंडामोस्ता मुरताहकुना पोरोल अद रजिस्टरते रासमा. बारित्ते बस्के अयते अवुना मेंदुलता इच्चां एक्को आसि, किरिस्तुनापोरोटा विस्वासम तक्को आंता, अस्के अवुंक मरमिं आयाना इच्चा आंता.

12 इल्हा अव अवुना मोदाटा निरनायमताल तपिचकुंचि सिक्साता आदेस तरकुंतां.

13 अचोने आयका लोन-लोन तिरियना अलवट अर्सि लंडुंक हेडंतां. सिराप लंडुंक हेळमळे आयो, गानि हेकेटां-हीकेटां जोलीं केंजंतां, वेंरेतोरा कबाहकुने कय कुचचंतां, बव पोल्लें अयते अव वळकना आयोनो, असोटा पोल्लें वळकालय दलंतां.

14 अदुनहाटी लेय्यातनमते मुंडामोस्ता मुर्ताहक मरमिं आसि, पिलाल्कुन कंचेके संसारम कियना इंचि नावा इच्चा मंता. अल्हा कीते पगातोर्कुंक तप्पुक दोसना मोका दोर्का.

15 नना इल्हा वेहना कारनम बतल इत्ते, कोन्नि मुर्ताहक हरिं तप्सि देय्यम हरदे ताकसंतां.

16 बदन्ना विस्वासि मुरतटा लोन ओक्कला मुंडामोस्ता मुर्ताहक मत्ते, अवुंक आ लोता विस्वासि मुरतळे कुद्दु सहायम कियगोम, अवुना मोता कलिसियातोरपोरो वाटानायो. अस्के निजमते मुंडामोसि मत्ता मुरताहकुंक कलिसिया सहायम कियगोम.

17 कलिसिया ताकसानोरवेटाल बोरे अयते बेस कलिसिया ताकसंतोरो, ओन्क वेल्ले कदर हियगोम. विसेस कीसि बोरे अयते प्रचार कियालय, कराहलय कस्टपळंतोरो ओन्क रौड अंताल्क कदर दोर्कुगोम.

18 बारित्ते, “बति तिराहनेके कौदाता मुस्किरकु मूस्का बुट्टि दोहामन्नि,”* आनि “बूतिगानकु बूति दोर्कना,”* इंचि दर्मसास्त्रम वेहंता.

19 कलिसिया ताकसाना पेद्रुदा मनकना पोरो बोर्नना दोसेम दोसते, इव्वुर-मुव्वुरन्ना गवाइदार्क हिल्वद निमे अद दोसेमतुन नम्मूमा.

- 20 बस्केळक पापम कीसेक मनानोन अंटोरा मुन्ने तेरहा. अस्के कळमातोर अल्हा कियाकोंटा वेंते मनांतुर.
- 21 पेन, किरिस्तु येसु आनि पेन पेरता पेनदा दूतन मुन्ने ईर्सि नना नीकु गट्टेगा आदेस हीसेक गदा, बदे उंदि बाजुन पियाकोंटा, सिन्ना-पेद्दा इनाकोंटा निमे इव नियमकुन पीसि ताका.
- 22 कलिसियाता पेद्दा मनकल इंचि निलाहनाहाटी, बोन पोर्रेन गाबर आसि कय इरमा. वेरेतोरा पापालकुने निमे पालिगाड आयमा. इंका नीवद निमे बस्केळक पवित्र ईर्कुन.
- 23 सिराप एरे उंचेके मन्मा, नीवा पीर साप मननाहाटी, इंका वेरे बिमार्क ऊके-ऊके वायाकोंटा मननाहाटी, अस्के-अस्के अंगुर पानकम उंचेके होन.
- 24 कोन्नि लोकुल्लकुना पापालक बय्यर दिस अरंतां, न्यायम जर्गनाहाटी अबुन मुन्ने तरांतुर. गानि कोन्नि लोकुल्लकुना पापालक मात्रम पज्जोटाल दिस अरंतां.
- 25 इल्हेने बेस कबाहकगुडा बय्यर दिस अरंतां, बव बेस कबाहक दिस अरोंगों, अवगुडा वेल्ले रोजकु मक्किस मन्नों.

6

दासुल्लकुनाहाटी कोन्नि नियमकु

- 1 बोर अयते दासि कबळ कीसेके मंतुरो, ओर अंटोर ओरा मालकुल्लकुन अन्नि तीरकुना मान-मर्यादालायक इनकुनगोम. अस्केने पेनदा पोरोल आनि कराहता पोल्ले बदनाम आयाकोंटा मनता.
- 2 इंका बोर दासुल्लकुना मालकुल्लक अयते विस्वासमते मंतुर, आ दासुल्ल ओरा मालकुल्लकुन, 'ईर मना विस्वासि आंदुर' इंचि ओन सिन्नगा हळानायो. मीवा सेवाता पायदा येतानोरगुडा मीवसोंटा पावरमगल्ला विस्वासुल्ल आंदुर. इंचि ओरद इंका एक्को सेवा कियना. इसोंटव पोल्लें निमे ओर्क कराहचि गट्टे दैरनेम हीम.

आबद्दम बोदा आनि निजम दनमता आस्ति

- 3 इंका ओक्कला बोरन्ना ई पोल्लें तप्पा वेरे कराहनयते, अचोने आयाका मना सामि येसु किरिस्तुना निजम पोल्लेन पियाकोंटा, ओर वेहता बक्तितुन ओप्कुनाकोंटे,
- 4 ओर इरगा गरति निडिस मंतोर, ओन्क बतले तेळियो. असंटोर लोल्लिं आनि पोल्लेन पीसि जगडाल्लक कियना बिमार आसि मंतोर. दीनहेंदाल अयते कळक पोतमळ, जगडम, अपमानम, कराब अनमानाल्लक तयार आंता.
- 5 आनि इसोंटोरा नड्डुम बस्केळक लोल्लिं-जगडाल्लक आसेकेन मनतां. इंका इसंटोरा बुद्धि हेळसोंचि, ओर निजमताल लक्कु आतोर आंद. अदुनहाटी ओर पेनदा बक्तितुन कमाइ कियना उंदि हरीं इनकुंतुर.
- 6 पेनदा बक्ति समादानमते कियमळे पेद्दा दनम आंद.
- 7 बारित्ते मनम ई दुनियाते वायनेके बतल तरां हिल्लोम, इगोटाल होननेकेगुडा बतले ओया परोम.
- 8 अदुनहाटी मनगा तिनालय तिडि, केरालय कपडिं मत्ते, अवटेन मनम समादानम मनना.
- 9 गानि सिरमंत आंतोम इनकुनना लोकुल्लक कतरनाक परिकसाने, उरिंने, अवसरम हिल्लव वेल्लेन नुकसान कियनसोंटा इच्चाने हिरकंतुर. असोंटा इच्चं मनकालोर्कुन हेळाहचि नासडेम कीतां.
- 10 बारित्ते कोत्तन पोरोटा पावरम, अन्नि रकाल्लकुना सेड्डातनाल्लकुंक हरीं पुट्टिचंता. बचुट्टो लोकुल्ल ओरा इच्चान दोर्किचुकुननाहाटी विस्वासमताल तप्पोत्तुर आनि ओरा पिस्वरते वेल्लेन दुक्कमतुन संपादिचुकुंतुर.

तिमोतिकु पौलुसना आकिर आदेसकु

- 11 गानि निमे पेनदा बक्ति कियाना मनकन आदिन. इव अन्नि सेड्डातनाल्लकुनाल लक्कु मंचेके नीतिते, बक्तिते, विस्वासमते, पावरमते, दैरनेमते आनि सादा-सिंपल पज्जो ताका.
- 12 नीवा विस्वासमतुन दक्किचुकुनालय बेस लडाइ कीसेके मन्नु, बस्केळक पिस्सना पिस्वरतुन गट्टेगा पीसि ताका, इद पिस्वरहाटीगे नीकुन केयमळ जर्गता. ई मंचि पोल्लेतुन निमे वेल्लेन मंदि गवाइदार्कुना मुन्ने ओप्कुत्तिन.
- 13-14 अन्निटवुन जीवाते ईरना पेनदा मुन्ने आनि पुंतुस पिलातुसना मुन्ने बेस गवाइ हीता किरिस्तु येसुना मुन्ने, नना नीकु आदेस हीसेक गदा, मना सामि येसु किरिस्तु मरी वायनदाका, निमे ई आदेसतुन बदे तप्पु डागु आनि दोसेम अंटाकोंटा कापाळसेके ईरां.
- 15 राजुल्लकुना राजु, सामिल्लकुना सामि, अन्निनपोरो अदिकारम ईरना आ आसिर्वाद दोर्कता, बरोबर वेलाकु ओन मनाकु हुप्संतोर.
- 16 ओन्क बस्केने हामुर हिल्ले. मनम बोरे होना परीम असोंटा वेल्लुने ओर मनंतोर. ओन इदवेरादाका बोरे हळा हिल्लुर, बस्केने हळा पसरगुडा. अंटावुंकन्ना बलमाता आ पेनदुके बस्केळक कदर दोर्कि. आमीन.
- 17 ई दुनियाते मनना सिरमंत लोकुल्लक, गरां कियामन्नि. नासडेम आसि होनना दनम पोरो आसे ईराकोंटा, जीवाते मनना पेनदापोरो विस्वासम ईरना. आ पेने मना आनंदमहाटी गावाले मत्तव आ अन्नि बेसतवुन इरगा हीता, इंचि ओर्क आदेस हीम.

18 इचोने आयका इंका ओर्क आदेस हीम गदा, ओर बेस कबाहक कीसेक मनना, बेस कबाहक कीसे सिरमंत आयाना. मनागा मत्तदुनाल अक्सरम मत्तोंक, पंचि हियालय बस्केळक मनसुनाल तयार मनगोम.

19 इल्हा कीसेके मत्ते, मुन्नेटा पिस्वरहाटीं ओर उंदि बेस पुनादि तयार कीकुंतुर, आनि बस्केळक पिस्सना पिस्वर पिस्सेक मनंतुर.

20 तिमोति, नीकु अप्पजेपतदुन निमे कापाळकुन. बक्ति हिल्वा कराब पोल्लेनाल लक्कु मन. इंका इदे “निजम तेल्वि” इंचि वेहना आबद्दम कतानाल लक्कु मन.

21 इच्चुर लोकुल्क असोंटा पोल्लेन नम्मिसि विस्वासमताल तप्सोत्तुर. पेनदा कुर्पा बस्केळक नीतोनि मन्निकांटी.

2 तिमोति तिमोतिकु पौलसना रोंडो सिट्टे

इद सिट्टेता बारेमते गिचचो परिचयम

रासतोना पोरोल: पौलस

रासता कालम: इसवि सन 67

इद तिमोतिकु पौलस रासता रोंडो सिट्टे आंदु, पेनदा बेसता कबुरतुन वेहताहेंका ओन्क जेलुंक होनापीता. जेलुंक होचि ओर वेल्लेन कस्टाल्क बोगांचेक मंतोर. जेलते ओर हायनाल आतोर. अयनागानि ओना मरिनसोंटा तिमोति सामिना विस्वासमते इंकिचचो गट्टे पडना इंचि इद सिट्टे रासतोर.

इव आकिर रोजकु आंदु, इव रोजकुने निमे तप्पुड बोदां वेहानोरगटाल, बोगमतनम कियानोरगटाल इंका सतता सुकाल्कुनाहाटीगे आसेते मनानोरगटाल जेगर्ता मन. बारित्ते इसोंटा लोकुल्क ओर्क नचचुता पोल्लें वेहनाहाटी कराहनोर्कुने हेळाहंतुर. अदुनहाटी पेनदा सत्तेम पोल्लेतुन वेहालय निमे बस्केळ्क तयारते मन. इल्हा पौलस इद सिट्टे रासि तिमोतिकु दैरनेम हीतोर.

बगा बतल मंता

जोहार आनि परिचयम 1:1-2

स्तुति आनि किरिस्तु वेहताप पिस्सना बारेमते बोदां 1:3-2:13

तेल्पिच्चि वेहमळ आनि वेरें वेहमळ 2:14-4:5

पौलसना सतता परिस्तिति 4:6-18

आकिरता बोदां 4:19-22

1 पेनदा इच्चाताहेंदाल किरिस्तु येसुना प्रेरित आता पौलसना इद सिट्टे आंद. किरिस्तु येसुनपोरो विस्वासम इरते, बस्केळ्क पिस्सना पिस्वर दोर्कता इंचि पेन पोल्ले हीसि मलता, इदुना बारेमते वेहनाहाटी नाकुन लोहचियमळ जर्गता.

2 नावा पावरमगल्ला मरि तिमोतिकु नना रासतन. नीकु मना पेनबाबनहेंदाल, सामि किरिस्तु येसुनाहेंदाल कुर्पा, दया, सांति दोर्किंकांटी.

दन्यवाद आनि दैरनेम

3 नावा पारतनाने नीकुन बस्केळ्क मति कीसेके, ना तादो-बाबुरालेहका नना मनसुना पोल्लेते, बद पेनदद अयते सेवा कीसंतनो, अद पेनदुक दन्यवाद वेहचंतन.

4 नावाहाटी निमे पोंगागोटता कांडेरतुन मति कीसि नना नर्का-पिय्यल नीकु कलियाना इंचि इच्चा कीसंतन, इवटेन नावा आनंदम पुरागा आंता.

5 नीवा आ सत्तेम विस्वासम नाकु मति मंता. आ विस्वासम, मुन्ने नीवा काको लुइस आनि नीवा यावल युनिसनगागुडा मनुंदु, अदे विस्वासम निहगागुडा मंता इंचि नाकु बरोसा मंता.

6 इदुनहाटी नना नीकु मति कीसि हियानद बतल इत्ते, नना नीवा पोरो कय इरतस्के, पेनदाहेंदाल नीकु उंदि वरम दोर्कता. अद वरमतुन निमे बस्केळ्क एल्गिच्चि इरी.

7 बारित्ते मनाकु पेन हीता आत्मा मनाकुन पिरकिर्क किय्यका, मनालोप्पो अद बलम, पावरम आनि ओप्केतुन निहंता.

8 अदुनहाटी मना सामिना बारेमते आयि, ओनाहाटी जेलने मनना नावा बारेमते आयि वेरेतोर्क गवाइ वेहालय बस्केने सिग्गु अरमा. दानकु बदुल, बेसता कबुरतुन वेहनाहाटी पेन हीता बलमते निमे नातोनि तकलिष्क सहन कियालय तयार मन्नु.

9 पेन मनाकुन कापाळसि, दाना पवित्र पोल्लेते केयता. इदंता मना कबाहकुनहेंदाल जर्गाहिल्ले गानि सिराप ओना पिलान परकारम आनि ओना कुर्पाहेंकेन जर्गता. ई दया-मायातुन पेनबाबाल मनाकु ई दुनिया पुट्टका मुन्नेन किरिस्तु येसुनाहेंदाल हीतोर.

10 गानि इंदके इद पोल्ले, मनाकुन कापाळना किरिस्तु येसु वाताहेंका मनाकु तेळियसोत्ता. ई किरिस्ते हामुरतुन रद्द कीसि, बेसता कबुरताहेंदाल पिस्वरतुन आनि बस्केळ्क जीवाते मनानदुन पलाते अरहतोर.

11 इदे बेसता कबुरतुन प्रचार कियनाहाटी प्रेरित अल्हेन कराहनोर इंचि नाकुन निलाहमळ जर्गता.

12 इदुनाहाटीगे नना इद जेलते तकलिष्क बोगांचेक मंतन. अयनागानि नना सिग्गु अरॉन. बारित्ते नना बोनपोरो विस्वासम इरतन ओर नाकु एर्के. इंका ओर नाकु बतल अयते अप्पजेपतोर* अदुन, मल्लिस वायाना आ रोजु वायनदाका कापाळा परांतोर इंचि नाकु बरोसा मंता.

13 किरिस्तु येसुना लोप्पो मनना विस्वासम आनि पावरमताहेंदाल निमे बव सत्तेम पोल्लें अयते नाहेकेटाल केंजतिनो, अवुन पीसि वेरेतोरहाटी मन्नु.

14 मनालोप्पो मनना पवित्र आत्माता बलमतोनि, नीकु अप्पजेपता मंचितनमतुन निमे कापाळकुन.

* 1:12 बद अयते नना ओन्क अप्पजेपतनो.

- 15 आसिया राज्यमते मनानोर अंतोर नाकुन होळसि होत्तुर इत्ता पोल्ले नीकु एरपाटे. अव्टे पुगिलुस आनि हिरमुगिनेसगुडा मंतुर.
 16 नावा कय्कुंक बेडी वाटसि मंतां इंचि सिग्गु अर्काकोटा, उनेसिपुस इनानोर, नाकु ऊके-ऊके कलियसि नाकु वेल्लेन दैरनेम हीतोर. सामि ओना कुटुंबपोर्रो दया हुप्पिरकांटी.
 17 अचोने आयका ओर रोम सहरते वातस्के, नना दोर्कनदाका नाकुन मनसु तासि प्हकसेक मत्तोर.
 18 नना इपीसि सहरते मननेके, ओर नाकु वेल्लेन रकालकुना सहायम कीतोर नीकु अय्ते बेस तेळियसि मंता. सामिना मल्सि वायाना आ रोजुने, ओनपोर्रो दया हुप्सालय पेन सहायम किय्यि इंचि नना कोरसेक मंतन.

2

येसु किरिस्तुना बेस सिपाइ आयना

- 1 ना मारि तिमीति, किरिस्तु येसुनगा मनना कुर्पाते निमे बेस ताकतवर आम.
 2 वेल्लेन मंदि लोकुलकुना मुन्ने नाहेंदाल निमे केंजता पोल्लेन, बोर अय्ते वेरैतोरक कराह परांतुर, असोटा विस्वासमलायक मनानोर्कुंक अप्पजेप्पा.
 3 किरिस्तु येसुना वरोर बेस सिपाइनालेसी निमेगुडा तकलिप्क बोगांचा.
 4 लडाइहाटी पेयसता बोरे सिपाइ वट्टि सम्सारम पोल्लेने हिरकोर. बारित्ते ओन्क अद नवकरि बोर अय्ते हीतोरो ओन्क कुसि हियमळे ओना गुरि मंता.
 5 अल्हेने वरोर कुस्ति अर्नानोर नियमकुन पीसि कुस्ति अर्काकोटे ओन्क किरिटम दोर्को.
 6 कस्टपळना कास्तकारि मनकंक, पंडता पंटाता मोदाटा पाल एतना अदिकारम मंता.
 7 नना वेहना पोल्लेना बारेमते विचारम कीम, अन्नि पोल्ले तेळियानाहाटी सामि नीकु बुद्धि हियानुर.
 8 नना वेहता बेसता कबुर परकारम, दाविद राजाना वंसंमते पुटसि, हामुरताल मर्रा जीवाते तेदता येसु किरिस्तुन मतिते इर्गा.
 9 इदे बेसता कबुर वेहताहाटी नना जेलुंक होत्तन. वरोर तप्पु कीतोना कय्कुंक वाटताप नावा कय्कुंक बेडी वाटतुर. गानि पेनदा पोल्ले मात्रम बेडिने दोह्चि हिल्ले.
 10 अदुनहाटीगे नना, किरिस्तु येसुना लोप्पो दोर्कना मुक्ति पेन पेरतोरक, बस्केळक मनना दाना महिमातोनि दोर्कना इंचि बच्चुं कस्टाल्क अयना सहन कीतन.
 11 इद पोल्ले विस्वासम कियनलायक मंता, अद बतल इत्ते, ओक्कला मनम ओनतोनि हातोम इनानय्ते, ओनतोनि पिस्संतोमगुडा.
 12 मनम ओर्सकुंचेके मनानय्ते, ओनतोनि राज्येम इंका कीतोम. ओक्कला मनम ओन एरपाट किय्योन इनानय्ते, ओर इंका मनाकुन एरपाट किय्योर.
 13 मनम विस्वासमलायक मनाकोन्ना ओर मात्रम विस्वासमलायक मंनंतोर. बारित्ते ओनद ओर बस्केने एरपाट किय्योन इंचि इन्नोर.

पेन पेरता सेवाकुड

- 14 इव अन्नि पोल्ले निमे ओर्कु मति कीसि हीसेक मन्नु. इंका केंजानोर्कुन हेळाहनालायक बतले पायदा हिलुवा पोल्लेनाहाटी लोल्लिन कियामान्नि, इंचि ओर्कुन सामिना मुन्ने निलाहचि दटांचि वेहा.
 15 बस्केने सिग्गु होनाकोटा, पेनदा पोल्लेता सत्तेमतुन बरोबर कराहनोनलेसी पेन निल्लाता वरोर सेवाकुड आसि मनालय कोसिस कीम.
 16 बक्ति हिलुवा वट्टि पोल्लेनाल तप्पिचुकुन, असोटा पोल्ले लोकुलकुन हेळाहचि पेनदागटाल इंकिचो लक्कु कीतां.
 17 असोटा लोकुलकुना वळकमळ उंदि कुल्लिसि-कुल्लिसि पेद्दागा आयना पुन्नुलेहका मंतां. हुमिनयुस आनि पिलेतुस असंतोरे आंदुर.
 18 ओर इव्वुरगुडा सत्तेम हरदाल तप्पोचि, हासि मर्रा जीवाते तेदमळ आसोत्ता इंचि इंतुर. इसोटा पोल्ले वळिकसि ओर इचचुर लोकुलकुन विस्वासमतुन हेळाहचंतुर.
 19 गानि पेन दोहता पुनादि बस्केळक नित्तिसि मंता. अद पुनादिपोर्रो, “सामिक ओना लोकुलक बोर आंदुर, ओन्क एरपाटे,” आनि “सामिना पोरोल एताना हरेक मनकल, तप्पुड कबाहकुनाल लक्कु मनगोम,” इंचि सिक्का वाटसि मंता.
 20 सिरमंतुलकुना लोहकुने सिराप एंडि-बंगारमता बोळिगे मंतां इंचि आयो, अगा कट्टेतव आनि तोळितवगुडा बोळि मंतां. अव्टे एक्को इलुवातवुन पेद्दा-पेद्दा कबाहकुनेन वाळकुंतुर आनि तक्को इलुवातवुन बारे बस्केळक वाळकुंतुर.
 21 अदुनहाटी बोरन्ना मनकल इलुवा तक्कोतोर मनानय्ते, ओर पेद्दा-पेद्दा कबाहकुने वाळकुनना बोळिलेहकाटोर आयनुर. अस्के ओर पवित्र आसि ओना मालकुना कबळक ओज्जंतोर पजा अन्नि तीरकुना बेसता कबाहक किय्यालय ओर तयार मंनंतोर.
 22 लेय्यातनमते वायाना कराब इच्छानाल लक्कु मन. पवित्र मनसुने सामिक आरादना कीसेके मनानोरतोनि कलियसि नीतिते, विस्वासमते, पावरमते, सांतिते मनालय कोसिस कीम.
 23 तेल्चि तक्को अल्हेन बेकार पोल्लेनाल लक्कु मन. नीकु अय्ते एरपाटे, असोटा पोल्ले वाद-विवाद जगडालकुन पुटसंतां.
 24 इंका सामिना सेवाकुड बस्केने जगडम किय्याकोटा, अंतोरपोर्रो दया हुप्पिचानोर आयगोम, ओर कराहनालायक मनगोम, ओप्केते मनगोम.
 25 नीवा विरोदमते वळकानोर्कुंक सांत मनसुने तेळियागोट्टिस वेहा. सत्तेमता बारेमते तेल्पिचुकुननाहाटी पेन ओर्कु मार मनसु हिय्यार.

26 अस्के ओर्कु बेस तेल्चि वासि, ओरा सतता इच्चातुन दोर्किच्कुननाहाटीं देय्यमता कयदाल इळबळानुर. बारित्ते देय्यम सतता इच्चान दोर्किच्कुननाहाटीं ओर्कुन दोह्चि वाटसि इर्ता.

3

आकिर रोजकुना तकलिप्क

- 1 आकिर रोजकुने इरगा तकलिपकुना कालम वायना मंता, इद मति इर्ता.
- 2 बारित्ते अव रोजकुने मनकालोर सतता बारेमतेन विचार कीतुर, कोत्तन पावरम कीतुर, सतता बारेमते पेद्दा-पेद्दा पोल्लें वेहकुंतुर, गरति मनंतुर, बदनाम कियानोर आंतुर, तल्लुर-बाबोना पोल्ले केंजुर, दन्यवाद वेहुर, अपवित्र आंतुर,
- 3 दया-माया मन्नो, मापि कियना मनसु मन्नो, वैरेतोर अपमानम कीतुर, ओप्केते मन्नुर, ओरा जीवा नोय्यो, जिवरासिनलेहका कीतुर, बेसतदुन हय्यसुर,
- 4 पसांचंतुर, मंचि-सेड्डा विचारम किय्युर, सतता बारेमते पोंगुडतनम पोंगंतुर, पेनदा पावरमकन्ना सुकमतुने एक्को पावरम कीतुर,
- 5 पलाताल पेनदा बक्ति कीतापे दिसंतुर गानि आ बक्तिता बलमतुन मात्रम नम्मुर. इसंतोरगटाल लक्कु मन.
- 6 ई लोकुल्लुने इच्चुर इसंतोर मंतुर गदा, बव मुर्ताहक अय्ते कमजोर मनसुने पापमता मोताते रका-रकालुकुना आसेने निडिस पिस्सेक मंतां, अव मुरताहकुना लोहकुने होंचि अवुन ओराहेके कीकुंतुर.
- 7 इव मुर्ताहक बस्केळक करियसेकेन मनंतां, गानि सत्तेम बतल अव तेल्लिचकुन्नो.
- 8 यन्नेस, यंत्रेस इनानोर मूसांक अड्डम तिरियतुर. ओरालेसीगे ई मनकालोरगुडा सत्तेमकु अड्डम तिरियंतुर. ई मनकालोरा बुद्धि हेळसोंचि विस्वासमते हरि तप्सि मंतुर.
- 9 गानि ईर इंका मुन्नेळक होना पस्. बारित्ते मूसांक अड्डम तिरियता इव्वुर मनकालोर बल्हा तेल्चि तक्कोतोर इंचि अंटोर्क तेळियसि होत्ता, अल्हेन ईरा तेल्चि तक्कोतनमगुडा अंटोर्क तेळियसि होन्नार.

पौलसना आकिरता आदेस

- 10 गानि निमे नावा कराहमळतुन, ताकमळतुन, नना पिस्सना उद्देसमतुन, विस्वासमतुन, ओप्केतुन, पावरमतुन, नावा दैरनेमतुन,
- 11 नना अंताकिया, इकोनिया आनि लिसरा इनना सहरकुने बोगांच्ता तकलिप्क, नना अरता बादां, इव अन्नि नीकु एरपाटे मंतां. आयना इव अन्नि तकलिपकुनाल सामि नाकुन कापाळतोर.
- 12 किरिस्तु येसुना लोप्पो पेनदा बक्तिते ताकंतन इंचि इच्चा इर्ना अंटोर्क कस्टालक अय्ते वायानुगे.
- 13 गानि कराब कियानोर, मुळाहनोर, वैरेतोर्कुक दोका हीसेक, ओर दोकाते अरसेक इकिचो कराब आंतुर.
- 14 गानि निमे बतल करियतिनो, बतल विस्वासम कीतिनो आनि अवुन निमे बोनहेंदाल करियतिन नीकु एरपाट मंता. अवुने उंदेतिर ताकसेक मन.
- 15 अचोने आयका, निमे सिन्नास्केटाल पवित्र दर्मसास्त्रमता पोल्लेन करियतोन आदिन. अव नीकु किरिस्तु येसुनपोरों विस्वासम इरते दोर्कना मुक्तितुन दोर्किच्कुननाहाटीं बुद्धि, तेल्चि हींतां.
- 16 दर्मसास्त्रमते रासि मनना पूरा पोल्लें पेन वेहताहेंकेन रासतव आंदुं. अव पोल्लें कराहनाहाटीं, तेळियागोट्टिस वेहनाहाटीं, तप्पुन सुदरांचनाहाटीं आनि नीतिमंतुल्लक आयानाहाटीं टेरनिंग हियालय कबळक ओज्जंतां.
- 17 अद बल्हा इत्ते, दर्मसास्त्रमहेंदाल पेन दाना हरेक मनकन पुरागा दानालायक कीसि, अन्नि तीरकुना बेसता कबाहक कियनाहाटीं, ओर्कुन तयार कीता.

4

- 1 पेनदा मुन्ने आनि जीवाते मत्तोरद, हातोरद न्यायम कियना किरिस्तु येसुना मुन्ने इंका ई दुनियाते ओना मर्रा वायमळतुन आनि ओना राज्यमतुन मुन्ने इरसि नना नीकु आदेस हीतन गदा, इद दुनियाते पेनदा मुन्ने, मर्रा वासि राज्येम कियानुर अस्के जीवाते मत्तोरद आनि हातोरद न्यायम कियना येसु किरिस्तुना मुन्ने, नना नीकु दटांचि वेहानद बतल इत्ते,
- 2 पेनदा पोल्लेतुन, टाइम दोर्किना दोर्काकोन्ना प्रचार कियालय तयार मन, अन्नि तीरकुना ओप्केते ओर्कु कराहसेके, दटांच्सेके तेळियागोट्टिस वेहा.
- 3 नना इल्हा बारि वेहासेक इत्ते, बेस बोदातुन लोकुल्लक केंजुर असोटा कालम वायना मंता. ओर ओरा मनसुंक वाताप ताकंतुर, ओरां दुर्दा केळुकुं बतल अय्ते केंजमळ इस्टमो, असोटा पोल्लें कराहना गुल्लुकुन सततातानि कल्पकुंतुर.
- 4 ओर सत्तेम पोल्लेन केंजुर, तयार कीसि वेहना कतां केंजालय दांतुर.
- 5 गानि निमे बसोटा परिस्तिती वायिना, पजोळक होनाकोटा नित्तिसि मन. तकलिप्क वाते सहन कीम, बेसता कबुरतुन वेहाना नीवा कबळतुन कीसेके, निमे कियना पेनदा सेवाता कबळ पुरागा कीम.
- 6 नना अय्ते पेनदुक मोक्कु हियना पट्टुनगड्क* एवतन. दुनियातुन होळसि होनना नावा वेला दग्गेर्क एत्ता.

* 4:6 पट्टु बलि पीटम.

7 सामिना पोरोटा विस्वासम बारेमता लडाइते, नना लडाइ बेस कीतन, नना बेस वित्तुतन. नावा विस्वासमतुन नना कापाळकुत्तन.

8 नावाहाटी ईसि मत्ता नीतिता किरिटम, सत्तेमते न्यायम कियना सामि, ओर मल्लिस वातानाडु नाकु अदुन हीतोर. सिराप नाके आयो गानि, बोर-बोर अयते ओर दिस्सना रोजुन पावरमते एदुर ह्ळसेक मंतुरो, ओर्कु अंटोर्कगुडा हीतोर.

तिमोतिकु पौलुसना आकिर पोल्लें

9 बच्चोर बिराना आते अच्चोर बिराना निमे नहगा वायाना कोसिस कीम.

10 बारित्ते देमासु इनानोर ई दुनियाता पावरमते नाकुन होळसि तेसलोनि सहर होत्तोर. क्रेसेंस इनानोर गलातिया एरियाते होत्तोर आनि तीतु इनानोर दलममतिा राज्यमते होत्तोर.

11 सिराप लूकाले नातोनि मंतोर. निमे वायनेके मरकुसुन नीतोनि पीसि वा. सेवा कबळते ओर नाकु वेल्लेन सहायम कीतोर.

12 तुकिकुस इनानोन नना इपीसि सहर लोहतन.

13 त्रोआस सहरते करपुस इनानोना लोन नना नावा कोट ईसि वातन. निमे वायनेके दान पीसि वा. अल्हेने नावा पुस्तकालक, विसेस कीसि तोलतोनि तयार कीता, हुटसि मत्ता पुस्तकालकगुडा पीसि वा.

14 सिकंदर इनना कम्मरि नावाहाटी वेल्लेन कराब कबाहक कीतोर. ओर कीता कबाहकुन पीसि, सामिगुडा ओन्क अल्हे हियानुर.

15 मनम वेहता पोल्लेक ओर वेल्लेन अड्डम तिरियतोर. अदुनहाटी निमेगुडा ओनागटल जेगर्ता मन.

16 नावा न्यायम जर्गिके, नना मोट्टा मोदाटा जवाब हीतस्के, नावाहेंदाल जवाब हियालय बोरे मना हिल्लुर. अंटोर नाकुन होळसि होत्तुर. ओर अल्हा कीतदुनहाटी पेन ओर्कुन लेक्का तल्काकोटेन बेस.

17 गानि नाहेंदाल बेसता कबुर अंटोर्क एन्सि, दान यहुदि आयवोर अंटोर केंजगोम इंचि, सामि नाकु तोळ मंचेके नाकु बलम हीतोर. इल्हा नाकुन सिंहम तोळदाल कापाळतोर.

18 सामि मनना स्वर्ग राज्यमते नना होनालय, ओर नाकुन हरेक कराब कबाटाल कापाळनुर. ओनके बस्केळताहाटी पेदू दातनम दोर्कि. आमीन.

पौलुस आकिरते अंटोर्क जोहार कीतोर

19 पिरिसकिला, अकविला आनि उनेसिपुस्सना लोतोर्कुक नावा जोहार वेहा.

20 इरास्तुस इनानोर कुरेति सहरते आगतोर. तोरोपिमुस इनानोर बिमार मत्ताहाटी नना ओन मिलेतुस इनना सहरतेन होळसि वातन.

21 पीनि कालम वायाका मुन्नेन निमे इगे वायना कोसिस कीम. इबुलुस, पुदेंस, लिनुस, क्लवदिया आनि कळमातोर अंटोर दादालोर नीकु जोहार वेहचंतुर.

22 सामि नीवा आत्माकु तोळ मन्निर. सामिना कुर्पा नीकु तोळ मन्निकांटी.

तीतु तीतुंक पौलुसना सिट्टि

इद सिट्टिता बारेमते गिचचो परिचयम

रासतोना पोरोल: पौलुस

रासता कालम: इसवि सन 60

वेल्लेन देसेल्लुकुने होंचि येसु सामिना बारेमता बेसता कबुरतुन कराहलय पेन पौलुसुंक आदेस हीता. पौलुस येसुसलेमते मननेके तीतु इनना वरोर लेय्योड ओनतोनि मनुंदुर.

येसु सामि हासि मर्रा जीवाते तेदसि स्वर्गम होत्ता पजा, दग्गेर-दग्गेरा मुप्पै वर्साना पज्जो पौलुस इद सिट्टि तीतुंक रासतोर.

पौलुस आनि तीतु पेनदा बेसता कबुरतुन प्रचार कियालय केरेतु इनना सहर होत्तुर. केरेतु सहरते अंटोर विस्वासुल्लुकुं पनोर्के मत्ताहेंका ओराहाटीं पेदुदाल्लुकुन निलाहनेके बव पोल्लेना अक्सरम मंता अव अन्नि पोल्ले पौलुस इद सिट्टिते रासतोर. अचोने आयका अगा तप्पुड बोदां कराहना गुल्लकगुडा मत्तुर. ओरा बोदानाल सततुन कापाळकुंचेंके ओर कराहना बोदान बल्हा आपाना इत्ता पोल्लेंगुडा पौलुस इद सिट्टिते रासतोर.

पेनदुन विस्वासम कीता लोकुल्लुकु बल्हा आनि बद तरिकाते पिस्वर पिस्सना इत्ता पोल्लेंगुडा विस्वासुल्लुकुं कराहनाहाटीं पौलुस तीतुंक इद सिट्टिते रासतोर. पेनदा इच्चा परकारम पिस्वर पिसानयते, पेनदाहेंदाल दोर्कना बस्केळक पिस्सना पिस्वर दोर्कता इत्ता मेन पोल्ले इद पुस्तकमते पौलुस रासतोर.

बगा बतल मंता

जोहार आनि परिचयम 1:1-4

कलिसियाता अदिकारिल्लुकु 1:5-16

कलिसियाते बोन्क बद बोदा कराहना 2:1-15

बोदां आनि वेरें वेहमळ 3:1-11

आकिरता बोदां 3:12-15

पौलुस तीतुंक जोहार वेहांतोर

1 नना पौलुस, पेनदा दासुन आनि येसु किरिस्तुना प्रेरित *आंदुन. पेन पेस्ता लोकुल्लुकुना विस्वासमतुन बेसांगोटलय, ओर्क सत्तेमता बारेमते तेळियागोट्टिस वेहालय नाकुन लोहमळ जर्गता.

2 ई सत्तेम, बस्केळक पिस्सना पिस्वरता आसे पोरोर् निल्लिस मंता. बस्केने आबदूदम वळकुवा पेन इदुन हीतन इंचि वेल्लेन मुन्ने पोल्ले हीसि मत्ता.

3 बरोबर गावाले मत्ता वेलातेन पेन दाना पोल्लेन मनाकु वेहचि हुपिस्ता. इदे बेसता कबुरतुन वेहनाहाटीं मनाकुन कापाळना पेन नाकु आदेस हीसि अप्पजेपता.

4 विस्वासमते नावा समानम मनना नावा मर्रि तीतुंक इद सिट्टि नना रासेक मंतन. पेनबाबनहेंदाल आनि मनाकुन पिसागोटनोर किरिस्तु येसुनहेंदाल नीकु कुर्पा, सांति दोर्किकांटी.

केरेतु दीबेते तीतु कियना कबाहक

5 क्रेति दीबेते, बव कबाहक अयते मय्सि मंतां, अव कबाहकन सुदरांचनाहाटीं आनि नना नीकु आदेस हीता परकारम निमे हरेक सहरते पेदुदाल्लुकुन निलाहना इंचि नीकुन नना अगा होळसि वातन.

6 निलाहना पेदुदा मनकनपोरोर् बदे दोसेम मननायो, ओन्क उंदे मूत्तो मनगोम. ओना मर्क-मियाहक विस्वासुल्लुकु आसि ओर सिग्गु हिल्ला कराब कबाहक कियानोर, बोना पोल्ले केंजाकोटा मनानोर इंचि ओरापोरोर् तप्पु मनामन्नि.

7 बारित्ते आ अदिकारि पेनदा कबाटुन मुन्ने ताकसानोर आंदुर. अदुनहाटीं ओनपोरोर् बदे दोसेम मननायो, ओर जिद्दि मनकल मनामन्नि, ओर बिराना होंगुंक वायानोर आयामन्नि, ओर कल्लु उनामन्नि, जगडाल्लुकु कियामन्नि, तप्पुड कमाइ कियानोर आयामन्नि.

8 गानि आ अदिकारि हेडमितोन बेस हळकुनानोर आयगोम, बेस कियमळतुन पावरम कियानोर आयगोम, मनसुना आसेन आपिसि पीसि मनानोर आयगोम, ओर सादा-सिंपल मनागोम, पवित्र आनि सततुन आपकुंचि मनानोर आयगोम.

9 इका ओन्क कराहता सत्तेम पोल्लेतुन ओर विस्वासमते गट्टिगा पीसि मनगोम. अल्हा मत्तेने ओर लोकुल्लुकुं सत्तेम पोल्ले वेहचि ओर्क कराह परांतोर आनि एदुर वळकानोरा तोड्डिड मुच्चा परांतोर.

* 1:1 प्रेरित इद पोरोल्लुकु "पेन लोहचीतोर" इंचि अर्तम. येसु पन्नेड मंदितुन पेक्कुत्तोर ओर प्रेरितुल्लुकु आंदुर. इच्चुकुंन पेसि किरिस्तुना बारेमते वेहालय लोहचीतुकुंन प्रेरितुल्लुकु इंचि इंतुर.

10 बारित्ते विसेस कीसि कतना कीतोरव्टेताल वेल्लेटुर लोकुल्क मर्लाबळानोर, बतक ओज्जाकोन्ना वट्टिदे वळ्कानोर, दोका कियानोर वेल्लेन मंतुर.

11 ईरकुन वळ्काकोटा कियमळे गावाले. बारित्ते ईर लोकुल्क, बव पोल्लें अय्ते कराहना आयनो, अव पोल्लें कराहचि तप्पुड कमाइ कियनाहाटीं अन्नि कुटुंबाल्कुनंता पाळ कीतुर.

12 क्रेति दीबेतोर वरोर ओरा कबुरतोर, “केरेतु दीबेता लोकुल्क बस्केळ्क आबद्दम वळ्कंतुर, केडा जिवरासिनसंतोर, लंडु आनि तिडितोर,” इंचि वेहतोर.

13 ओर वेहता गवाइ निजमे आंद. अदुनहाटीं आबद्दम बोदातुन नम्मना विस्वासुल्कुंक गट्टिगा वें वेहा. अस्केन ओर सत्तेम विस्वासमते गट्टिपळांतुर.

14 यहुदिल्कुना तयार कीता वेसुडिन पोरो विस्वासम ईर्राकोटा, सत्तेमताल तप्पोत्ता मनकालोरा आदेसकुनाल लक्कु मनांतुर.

15 मनसु पवित्र मत्तोर्कुंक अन्नि वस्तुक पवित्रे मनांतां, गानि हेळसोत्ता मनसु आनि पेनदापोरो विस्वासम हिल्वोर्क मात्रम बतले पवित्र मन्नो. ओरा मनसु, मनसु वेहता पोल्ले इव रोंडगुडा हेळसोचि मनांतां.

16 पेन माकु एरपाटे इंचि ओर वेहांतुर, गानि ओरा कियना कबाहक हळते, ओर पेनदुन एरपाट किय्युर इत्तद दिस अरंता. ओर हय्सवोर, वेहता पोल्ले केंजवोर आदुर, ओर असल बदे बेस कबळ कियनालायक हिल्लुर.

2

बोन्क बद बोदा कराहना

1 निमे मात्रम बस्केळ्क सत्तेम बोदाकु ओप्पनालायक पोल्लें करहा.

2 ओक्केते, इमानदार मनमळते, सततुन आपकुनमळते, विस्वासमते, पावरमते, दैरनेमते, ओर्सकुनमळते गट्टिगा मंदालय मातरलोर्कुंक करहा.

3 अल्हेने मातरिहकुंक करहा गदा, अवुना पिस्वर पवित्र लोकुल्कुना पिस्वरलेहका मंदना. वेंरेतोर पोरो दोसेल्क दोस्साकोटा, कल्कु उनाकोटा, अव बस्केळ्क बेसता बारेमतेन कराहगोम.

4 अल्हेने अव लेय्या मुरताहकुंक, अवुना मुय्दुर्कुन, पिलाल्कुन पावरम कियाना,

5 सततुन आपकुंचि पिस्साना, पवित्र मंदना, लोतुन आवरिचकुनना, दयाता गुनम मंदना, मुय्दोना पोल्लेपोरो बेस मंदना, इंचि कराह. अल्हा कराहते, अवुनाहेंदाल पेनदा पोल्ले बदनाम आयाकोटा मनांता.

6 अल्हेने लेय्युर्कुंक जोर हीसि वेहा गदा, ओर सततुन आपकुंचि पिस्सिरकांटी.

7 बेस कबाहक कीसि निमे अन्नि पोल्लेने ओराहाटीं उंदि उदाहरनलेसीं मन्नु. नीवा कराहमळ सत्तेम आनि लोकुल्क बेस केंजनालायक मनगोम.

8 निमे कराहना बोदा इच्चोन सत्तेम मनना गदा, अव्ते बोरे तप्पु तेंडामानि आनि नीवा विरोदमते वळ्कानोर्कुंक मना बारेमते बतले तप्पु दोर्कका ओर्क सिग्गु वायगोम.

9 दासुल्कुंक करहा गदा, बस्केळ्क ओर ओरा माल्कुल्कुना पोल्लेपोरो मंदना आनि अन्नि परिस्तितेने माल्कुल्कुंक तिरियसि वळ्काकोटा, ओर्कुन कूस कियना.

10 इका माल्कुल्कुनगटाल दोंगातनम कियामानि गानि अन्नि पोल्लेने बेस विस्वासमलायक ओर मंदना. अल्हा मत्ते, मनाकुन कापाळना मना पेनदा बारेमता कराहमळतुक ओर इंचिचो कदर तरानोर आंतुर.

11 बारित्ते अंतोर लोकुल्कुंक मुक्ति हियनाहाटीं पेन दाना कुर्पातुन हुपिस्ता.

12 अद दया मनाकु, मनम पेनदुक नच्चुवा पिस्वर आनि सततुन आपकुंचि, इद दुनियाते बेस बक्तिते, सवरटा हर्दे आनि पेनदुक नच्चना पिस्वर पिसगोम, इंचि कराहंता.

13 अचोने आयका मना कदरगल्ला पेन आनि मनाकु मुक्ति हियना येसु किरिस्तु ओना महिमाते वांतोर इत्ता आ सक्कटा आसेतुन मनम एदुर हळसेक मंदना इंचेकगुडा कराहंता.

14 इका किरिस्तु मनाकुन अन्नि तीरकुना तप्पुड कबाहकुनाल तपिच्चि, बस्केळ्क बेसता कबाहके कियगोम इंचि मनसु ईराना ओना सतता लोकुल्क मनम आयगोम इंचि, मनाकुन पवित्र कियनाहाटीं ओना सतता जीवातुन हीतोर.

15 इव अन्नि पोल्लें निमे पूरा अदिकारमते दटांचि तेळियागोट्टिस वेहा, करहा. नीकुन सिन्नगा बोने हळा हियमा.

3

पिसालय मंचि हर्रि

1 राज्येम कियानोरद आनि अदिकारिल्लकुना पोल्ले केंजसि ओर वेहताप ताकना, इंचि लोकुल्कुंक मति कीसि हीम. इका कदरलायक मंदना हेरेक बेस कबळ कियालय बस्केळ्क तयार मंदना.

2 बोर्कुने बदनाम कियानायो, बोरोतोने जगडाल्क कियानायो, मेत्तटा गुनम मंदना आनि अंतोरतोनि सादा-सिंपलते कलियसि मंदना इंचि ओर्क वेहा.

3 मुन्ने मनमगुडा तेल्वि तक्कोतोरम, बोरदे पोल्ले केंजवोरम, वैरेतोर पोल्लेने मुळगुतोरम, वैरे-वैरे इच्छां आनि सुकाल्कुना गुलामगिरि कीसेके मत्तोम. इंका होंगु-पगाते निडिस मत्ता पिस्वर पिसुंदुम, कळकु पोत्तुमळ, वैरेतोर मनाकुन हय्साकोंदुर, मनमगुडा वरोंक-वरोर हय्साकोंदुम.

4 गानि मनाकुन पिसागोटना पेनबाबाल ओना बेसतनम आनि पावरमते निडिस मत्ता दयातुन मनापोर्रो हुपिच्चि,

5 मनाकुन कापाळतोर. मनम कीता नीति कबाहकुनाहेका ओर मनाकुन कापाळा हिल्लोर गानि ओना सतता दयाहेदाले मनाकुन कापाळतोर. पूना रीतुने पुट्टना एर तुंगमळहेदाल आनि पवित्र आत्मा मनाकुन पूनगा कियमळहेदाल इल्हा आता.

6 ई पवित्र आत्मातुन, मनाकुन पिसागोटना येसु किरिस्तुनाहेदाल ओर मनापोर्रो इरगा वळियतोर.

7 ओर इल्हा बारि कीतोर इत्ते, मनम ओना कुर्पाहेदाल नीतिमंतुल्क आयगोम आनि बस्केळक पिस्सना पिस्वरता आसेते मनम ओना वारसदार्क आयाना इंचि.

8 इद पोल्ले निजम आंद. आनि निमे इव पोल्लें दटांचि वेहाना इंचि नावा इच्छा मंता. निमे दटांचि वेहतेने, बोर अय्ते पेनदुन विस्वासम कीतुर, ओर जेर्गताते मंचेके बेसता कबाहक कीसेके मनांतुर. बारित्ते इव अन्नि मनकालोरहाटी बच्चोनो बेस आनि पायदता पोल्लें आंदुं.

9 गानि अर्तम हिल्ला लोल्लिनाल, वंसाल्कुना बारेमता पोल्लेनाल, जगडाल्कुनाल इंका मूसाना नियमकुना बारेमता लोल्लिनाल निमे लक्कु मन. अव बतक ओज्जानव आय्यो, अवुनाहेदाल बतल पायदा इंका वायो.

10-11 अल्हा चुगली कीसि वैरे-वैरे कियालय ह्ळानोंक, उंदि-रोंड मल्कां दटांचा. केंजाकोटे, ओर मनकल हर्रि तप्सि पापम कीसंतोर, ओनद-ओरे दोस्सि इंचि हुपिचकुंचंतोर इंचि एरपाट कीसि ओना दंटा होळसीम.

मतिते इरानालायक कोन्नि पोल्लें

12 बस्के अय्ते नना, अरतिमास इनानोन हिलाकोटे तुकिकुस इनानोन निहगा लोहकन, अस्के बल्हा कीसि अयना निमे, निकोपोलिस सहरते नाकु वासि कलियना कोसिस कीम. बारित्ते पीनि कालमते नना अग्गेन मनंतन इंचि निरनायम येततन.

13 जेनास वकील आनि अप्पुलोसुंक ओरा पय्नेमते ओर्क बतले तक्को होनाकोटा ह्ळकुंचि, ओर्कुन साल्वा कीम.

14 अवसराल्कुन दोर्किचकुननाहाटी मना लोकुल्कगुडा बेस कबाहक कीसेके मनमळ करियगोम, अल्हा कीते ओर पलम हियानोरलेहका मनांतुर.

15 नावातोनि मनानोर अंटोर नीकु जोहर वेहचंतुर, इंका विस्वासमहेदाल मनाकुन पावरम कियानोर्कुगुडा जोहर. पेनदा कुर्पा मी अंटोरतोनि मन्निकांटी.

पिलेमोन पिलेमोनक पौलसना सिट्टि

इद सिट्टिता बारेमते गिचचो परिचयम

रासताना पोरोलः पौलस

रासता कालमः इसवि सन 60

पौलस जेलने मत्तस्के इद सिट्टि रासतोर. रोम सरकारता कैदिल्लुकुना लोप्पोटाल ओनेसिमुस पोरोलतोर वरोर मत्तोर. ओर ओना मालक, इत्ते पिलेमोनागटाल वित्तिस मत्तोर. पौलस जेलने मत्तस्के ओन्कु अगा ओनेसिमुस कलियतोर, अस्के पौलस ओनकु पेनदा पोल्ले वेहचि ओन विस्वासमते तत्तोर. पिलेमोन ओना सेवक ओनेसिमुसुन माप कीसि, ओन वरोर दासुनलेसीं आयो गानि वरोर विस्वासि तम्मुनलेसीं मर्रा ओनगा ईरना इंचि पौलस पिलेमोनक इद सिट्टि रासतोर.

बगा बतल मंता

जोहार आनि परिचयम 1-3

पिलेमोनना तारिप कियमळ 4-7

ओनेसिमुसनाहाटीं विनंति कियमळ 8-22

आकिरता बोदां 23-25

जोहर

1-2 नना पौलस, किरिस्तु येसुना बारेमता बेसता कबुर वेहताहाटीं कैदिन आसि जेलने मंतन. ना तम्मुनलेसीं मनना तिमोतिनाहेंदाल ना पावरमगल्ला दंटातोर पिलेमोनक, मावा हेल्ड अपियांक, बेसता कबुर वेहानाहाटीं मावालेसीं लडाइ कियना अरकिपुसुक, अल्हेने नीवा लोते जमा आयाना कलिसियातोरक इद सिट्टि रासेक मंतन.

3 मना पेनबाबानाहेंदाल आनि सामि येसु किरिस्तुनाहेंदाल मीकु कुर्पा, सांति दोर्किकांटी.

पिलेमोनना पावरम आनि विस्वासम

4-5 पिलेमोन, सामि येसुना पोर्रोटा नीवा विस्वासम बारेमते, अल्हेने पेनदा लोकल्लुकुनपोर्रो निमे हुप्सना पावरम बारेमते नना केंजतन. अदुनहाटीं नना पारतना कियनेके बस्केळक नीकुन मति कीसि पेनदुक दन्यवाद वेहंतन.

6 येसु किरिस्तुना अन्नि बेसता पोल्लेना तेल्वि, नीकु दोर्कताहाटीं वेरतोरगुडा नी विस्वासमते पोत्तु आयागोम इंचि नना पारतना कीसेक मंतन.

7 तम्मा! निमे पेनदा लोकल्लुकुन पावरम कीसि ओरा मनसुकुंक सांति हीतिन. अदुनहाटीं नी पावरमहेंदाल नाकुगुडा वेल्लेन सुकम, सांति दोर्कता.

ओनेसिमुसनाहाटीं विनंति कियमळ

8-9 बद्द अक्सरमो अदुन कीम इंचि, किरिस्तुना पोरोल्ले नीकु वेहाना अदिकारम नाकु मंता. अयनागानि नना पौलसुन, मातरन आसि किरिस्तु येसुनाहाटीं जेलते मंचि, पावरमते नीकु विनंति कीसंतन.

10 ओनेसिमुसुनपोर्रो निमे दया हुप्सा इंचि नीकु विनंति कीसंतन. नना जेलते मननेके ओर पेनदुन विस्वासम कीसि नावा मर्री आतोर.

11 मोदाला ओर नीकु बता कबळक ओज्जाकोटा मत्तोर. गानि इंदके ओर मना इव्वुर्कगुडा कबळक ओज्जंतोर.

12 अयते नना बच्चोरो पावरम किय्याना ना मर्रिनसोटा ओनेसिमुसुन नीहेके वापस लोहचंतन

13 बेसता कबुर वेहताहाटीं नना जेलते मंतन. नीवा बदलिपोर्रो ओनेसिमुस नावा सेवा कीते बेस मनंता इनकुंचि ओन नाहगेन ईराना विचारम कीसि मत्तन,

14 गानि निमे किय्याना इसोटा बेसता कबळ कुसिते कियगोम, बल्मितोनि जर्गामन्नि इंचि नीवा पोल्ले हिल्ला नना इल्हा कियमळ नाकु बेस दल्लाहिल्ले.

15 ओनेसिमुस कोन्नि रोजकु निहागटाल लक्कु आसि मत्तोर, गानि बोर्क एरपाट! बस्केळताहाटीं नीकु दग्गेरा आयगोम इंचि अल्हा जर्गता बारे!

16 इंदकेटाल ओनेसिमुसुन दासुनलेक्काते आयो गानि, दासुकुन्ना एक्को, इत्ते नीवा दंटाता वरोर विस्वासि दादाना लेक्काते हळकुन. नना अयते ओन बच्चोरो पावरम कीतन. गानि इंदके ओर सामिन विस्वासम कीसि, नीतोनि मनंतोर, निमेगुडा ओन नाकन्ना एक्को पावरम कीम.

17 ओक्कला निमे नाकुन सेवाल्लोप्पो नीवा पालिगाड इनकुनानयते, नाकुन दग्गेरा कीकुत्ताप ओनगुडा दग्गेरा कीकुन.

18 ओर नीवद बतलन्ना नुकसान कीते, नीकु बतलन्ना बाकिगिटा मत्ते, नावा पोरोल्ले रासि ईर्रा.

19 अदुन निहचिंतन इंचि, नना पौलस, नावा सतता कयदे रासि हीसेक मंतन. अल्हा हळते निमेन नाकु बाकि मंतिन. इद नीकु वेहना अक्सरम हिल्ले.

- 20 अदुनहाटीं नावा तम्मा! सामिना पोरोलते ओनेसिमुसना बारेमता विनंतितुन ओप्कुंचि, किरिस्तुना लोप्पो नावा मनसुंकु सांति हीम.
 21 नना वेहतद निमे केजंतिन इत्ता बरोसाते इद सिट्टिट रासेक मंतन. अचोने आय्का नना वेहतादानकन्ना निमे एक्को कीतिन इंचि नाक एर्के.
 22 अल्हेने, नाहाटीं मंदालय उंदि जेगा ह्ळसि इर्ग. मिमेट किय्याना पारतनां केजसि सामि नाकुन मिहगा लोहंतोर बारे इत्ता आसे नाकु मंता.

आकिरता जोहर

- 23 किरिस्तु येसुनाहाटीं जेलने अरता एपप्रास इनानोर इग्गे नातोनि मंतोर, ओर मीकु जोहार वेहचंतोर.
 24 अल्हेने नातोनि कलियसि कबळ किय्याना मरकुस, अरिसतरकुस, देमास, लूकाल ईरगुडा नीकु जोहार वेहासेक मंतुर.
 25 मना सामि येसु किरिस्तुना कुर्पा मीवा आत्मांकु तोळ मन्निकांटी, आमीन.

इब्रि इब्रि लोकुल्लकुनाहाटी रासता सिट्टि

इद सिट्टिता बारेमते गिचचो परिचयम

येसुना सिस्स्युल्लक येसुना बारेमता बेसता कबुरतुन दुनियाते होंचि वेहतुर. अदुनहाटी वेल्लेन यहुदिल्लक येसुनपोरो विस्वासम कीतुर. पजा ओर वेंरे लोकुल्लकुनाहेंदाल वेल्लेन तकलिपकु बोगांचतुर. अस्के, आ यहुदि विस्वासुल्लक येसुनपोरोटा विस्वासमतुन होळसि मरा पळाना रीति-रिवाजकुन पीसि ताककोम इंचि विचारम कीतुर. इल्हा विचारम कियाना आ यहुदि विस्वासुल्लकुना दैरनेमतुन बेसांगोटनाहाटी, येसुना वरोर बक्तुड ओर्क ई सिट्टि रासतोर.

पडाना नियम परकारम पेनदा बद इच्चा अय्ते पुरागा आया हिल्लेनो, आ इच्चातुन येसु किरिस्तु पुरागा कीतोर इत्ता पोल्लें, इद सिट्टिते वेल्लेन उदाहरन हीसि रासि मंतां. कास कीसि इद सिट्टिते मूड पोल्लें मनाकु दोर्कतां:

- (1) येसु किरिस्तु पेनदा मरि आंदुर, ओर कुदुदु तकलिपकु बोगांचेके पेनदा इच्चातुन पुरागा कियालय तयार आतोर. ई येसु किरिस्तु इत्ते, पेनदा अन्नि दूतांकन्ना, पेनदा कबुरतोर्कन्ना, मनकालोर्कुंकन्ना बच्चोनो पेदूदोड आंदुर.
- (2) येसु किरिस्तुंकन्ना मुन्ने मत्ता पेदूदा पेर्मालोरा लोप्पोटाल, येसु वरोरे बस्केळक जीवाते मनना पेदूदा पेर्मल इंचि पेन रूजुव कीसि हुपिस्ता.
- (3) जिवरासिना मोक्कुल्लक आनि रीति-रिवाजकु मनाकुन पापमताल पिसागोट्टंतां इंचि यहुदिल्लक नम्मंदुर, गानि सिराप येसु किरिस्तु वरोरे, पापमताल, हामुरताल, हामुरता वेंरेंताल पिसागोटा परंतोर इंचि इद सिट्टिते रासतद मंता.

बगा बतुल मंता

किरिस्ते पेनदा मरि, वारसदार आनि महिमा आंदुर 1:1-3

किरिस्तु पेनदा दूतांकन्ना पेदूदोड आंदुर 1:4-2:18

किरिस्तु मूसाल आनि येहोसुंकन्ना पेदूदोड आंदुर 3:1-4:13

किरिस्तुना पेर्मलतनम अंटवुंकन्ना पेदूदेद आंद 4:14-7:28

किरिस्तुनाहेंदाल वाता करार अन्नि करासुंकन्ना पेदूदेद आंद 8:1-9:22

किरिस्तुना मोक्कु अन्नि मोक्कुल्लकुंकन्ना पेदूदेद आंद 9:23-10:39

किरिस्तु विस्वासमकन्ना पेदूदोड आंदुर 11:1-12:29

आकिरता बोदां आनि आदेसाल्लक 13:1-25

येसु किरिस्तु पेनदा मरि आंदुर

1 वेल्लेन मुन्नेटा कालमते पेन बच्चुंगो मल्लां बच्चुंगो तीरकुने पेनदा कबुरतोराहेंदाल मना तादो-बाबुरतोनि वळकता.

2 गानि ई आकिरता रोजकुने बारे, पेन दाना मरिनाहेंदाल मनातोनि वळकता. दाना मरिनाहेंदाले इद पूरा दुनियातुन तयार कीसि, ओन ई दुनियाता वारसदार इंचि निलाहता.*

3 आ मरि पेनदा महिमाता वेलगु आंदुर. इका पेनदा गुनम आनि मरिना गुनम उंदेतीर मंता. मरि ओना बलमगल्ला पोल्लेने ई दुनियातुन ताकिचचेके मंतोर. ओर मना पापाल्लुकनंता नोर्सि मनाकुन पवित्र कीतोर. पजा एत्तुने स्वर्गमते मंदना अन्निटकन्ना पेदूदा पेनदा तिना बाजुंक होंचि उदतोर.*

येसु पेनदा दूतांकन्ना पेदूदोड

4 इल्हा ओर पेनदा दूतांकन्ना वेल्ले बेस पोरोल आनि कदर दक्किचकुत्तोर.

5 बारित्ते, पेन दाना मरिना बारेमते,

“निमे नावा मरिन आदिन, इय्याला ननाने नीकुन पुटिस्तन. * इका नना ओना बाबोन आंदुन, ओर ना मरि आंदुर.”*

इंचि येसुन तप्पा बस्केने बदे दूतातुन पेन इना हिल्ले.

6 इदे आयवा, बस्के अय्ते पेन दाना तोल्लसूर मरिन बूमितगा तत्ता, अस्के, “पेनदा अन्नि दूतां ओन मोळिकें,”* इंचि इत्ता.

7 पजा पेन दाना दूताना बारेमते वेहतस्के, “अद दाना दूतन वळिलेहका आनि दाना सेवकुल्लुकुन पोत्तना तळमिलेहका कीता,”* इंचि वेहता.

8 गानि दाना मरिना बारेमते,

* 1:2 योहान 1:3 * 1:3 बजन संहिता 110:1 * 1:5 बजन संहिता 2:7 * 1:5 2 समूएल 7:14 * 1:6 बजन संहिता 97:7 * 1:7 बजन संहिता 104:4

“पेनदुना, नीवा राजगद्दे बस्केळ्ळक निल्लिस मनंता,
निमे नीतिते राज्येम कियानदुन आदिन.

9 सत्तेमतुन निमे पावरम कीतिन, सत्तेम हिल्लुवादान निमे हय्सिन.
अदुनहाटीगे नना, नीवा पेनबाबन, नीवा दंटातोरा लोप्पोटाल नीकुन पेरसि,
वेल्ले आनंदमता निय होक्सि नीवा अबिसेकम* कीतिन,”✧
इंचि पेन इत्ता.

10 इच्चोने आयका, पेन दाना मरिना बारेमते,
“सामि! मोट्टा मोदाला बूमिक पुनादि दोहतोन निमेने आदिन.
मब्बुकुन नीवा कय्ये तयार कीतिन.

11 अव अन्नि नासडेम आसि होनानुं, गानि निमे बस्केळ्ळक मनांतिन,
कपडिं पडन आसि हसोत्ताप, अव अन्नि पडानव आसि होनानुं.

12 निमे सेदूदरतुन आटमूट कीताप, अवुन आटमूट कीकिन.
अव कपडिनालेसीं बदलांचनुं, गानि निमे मात्रम बस्केळ्ळक उंदेतीर मनानोन आदिन,
नीवा कालाल्क बस्केने मारो,”✧
इंचि इत्ता.

13 मर्रा, “बदवेरदाका अय्ते नीवा पगातोरुंन नीवा काल्कुना हिळ्ळ तर्रीन अदवेरदाका,
निमे नावा तिना बाजुंक उदिदिसि मन्नु,✧ इंचि बद्दे दूतातुन बस्केने पेन इना हिल्ले.”

14 पेनदा अन्नि दूतां दाना सेवा कियाना आत्मांगे आयोंगां! बोर्क अय्ते पापाल्क मापि आसि मुक्ति दोर्कतनो ओर्कु सहायम कियानाहाटीं पेन
इवुन लोहांता.✧

2

अन्निटकन्ना मंचि मुक्ति

- 1 अदुनहाटीं मनम केंजता सत्तेम पोल्लेनाल लक्कु आयामन्नि इंचि अवुनहेके मनम बेस लक्से हियगोम.
- 2 बारित्ते, पेनदा दूतानाहेंदाल वेहता पोल्ले सत्तेम इंचि रूजुव आता,✧ अस्के आ पोल्ले परकारम कबळ कियाका तप्पु कीतोर्कु आनि ताकुवोर्कु
दग्गुता सिक्सा दोर्कता.
- 3 अय्ते इच्चोर पेदूदा मुक्तिता कबुरतेके लक्से इर्राकोटे, वायाना सिक्साताल मनम बल्हा तपिच्चुना पर्रातोम? इदुना बारेमते मोट्टा मोदाला
सामिए वेहतोर. अद कबुरतुन सामिनगटाल बोर अय्ते केंजतुरो, ओर अद कबुरतुन मनाकु तेळियागोटिसि रूजुव कीतुर.
- 4 अचोने आयका पेनगुडा चिन्हां, इचंन्रमता कबाह्क, तीराता अदूबूताल्क आनि पवित्र आत्माता वराल्क दाना इच्चा परकारम दाना बक्तुल्लुंक
हीसि, ई मुक्तिता बारेमते गवाइ हीसेक मत्ता.

येसु मनकना रूपमते मारियमळ

- 5 मुन्ने वायाना बद दुनियाता बारेमते मोमोट वेहचंतोम, आ दुनियातुन पेन दाना दूताना कय हिळ्ळ इर्रा हिल्ले.
- 6 इदुना बारेमते दर्मसास्त्रमते उंदगा बोरो वरोर गवाइ वेहासेक इल्हा इत्तोर:
“मनकल इत्ते असल बोर आंदुर, ओना बारेमते निमे इच्चोन विचारम कीसंतिन.
हिलाकोटे निमे इच्चोर पिकिर कियानाहाटीं,
असल मनकना रूपमते पुटतोर बोर आंदुर?”
- 7 निमे ओन पेनदा दूतांकन्ना गिचचो सिन्नगा कीतिन,
गानि निमे ओन्क पेदूदातनम आनि कदरता किरिटम हीसि,
निमे नीवा कय्यदा कबाह्कनपोर्री ओन्क अदिकारम हीतिन,
- 8 अन्निटतुन ओना काल्कुनगा इरतिन.”✧
इंचि इत्तोर. पेन अन्निटवुनपोर्री ओन्क अदिकारम हीता, ओना अदिकारमते हिलाकोटा बतातुने होळसा हिल्ले. गानि इंदके अन्नि ओना
अदिकारमते मत्ताप दिस्सेक हिल्ले.
- 9 अयना जेरासेपताहाटीं पेनदा दूतांकन्ना सिन्नागासि मत्ता येसुन मनम हळसंतोम. पेनदा कुर्पाहेंदाल अंतोर मनकालोरहाटीं ओर ओना जीवातुन
हीसि हामुरता रुसि हळत्तोर. हामुरतुन सहन कीताहाटीं पेन ओन्क पेदूदातनम आनि कदरता किरिटम केराहता.

* 1:9 अबिसेकम राजाल आसि राजगद्देपोर्री उपिच्चका मुन्ने ओना अबिसेकम किया पीता. ✧ 1:9 बजन संहिता 45:6-7 ✧ 1:12 बजन संहिता 102:25-27
✧ 1:13 बजन संहिता 110:1; मत्तयाल 22:44; मरकुस 12:36; लूकाल 20:42-43 ✧ 1:14 बजन संहिता 103:20-21 ✧ 2:2 गलातिया 3:19 ✧ 2:8
बजन संहिता 8:4-6

10 पेन अन्नितवुन सतताहाटीं तयार कीता आनि सतागे अन्नितवुन ताकिच्चंता. आ पेन दाना महिमाता राज्येमते वेल्लेन मंदितुन सतता मर्क-मियाहक कीसि तरांनाहाटीं, दाना सतता मरिं येसुन पेरता. मनाकु मुक्ति दोर्कगोम इंचि येसुन अद वेल्लेन तिप्पल्कुनतोनि ओन पुरागा कीता.

तम्मुर-हेलड इनालय येसु सिग्गु अर्रीर

11 मनाकुन पवित्र किय्याना येसु आनि पवित्र आतोरम मनम, वरोर बाबाना पिलाल्कुमे आंदुम. अदुनहाटीं मनाकुन तम्मुरहक-हेलाहक इंचि वेहालय येसु सिग्गु अर्रीर.

12 अदुनहाटीं,

“नावा तम्मुरहक-हेलाहक नीवा पोरोल वेहकन,
कलिसियातोरा मुन्ने नना नीकुन तल्सकुनकन,”*
इंचि ओर पेनदुन इत्ता पोल्ले दर्मसास्त्रमते रासतद मंता.

13 मर्रा,

“नना पेनदापोर्री बरोसा इर्रांतन.” अचोने आयका,
“इग्गे नना, नाकु पेन हीता पिलाल्कुनतोनि मंतन,”*
इंचि दर्मसास्त्रमते रासतद मंता.

14-15 पेनदा पिलाल्क आता मनम, मेंदुल रूपमते मत्ताहाटीं येसुगुडा हरेक पोल्लेते मनालेहका आसि वातोर. मना पिस्वरंता हामुरता वेरिं मनागा मत्ताहेंका देय्यमता अदिकारम मनापोर्री मत्ता. गानि येसु ओना हामुरताहेंदाल, देय्यमता अदिकारमतुन नासडेम कीसि, मनाकुन हामुरता वेरिताल इळबळिस्तोर.

16 पेनदा दूतांक सहायम कियालय येसु असले वायाहिल्लोर गानि अब्राहामुना वंसंमतेके सहायम कियालय वातोर.*

17 इदुनाहाटीं येसुंक अन्नि तीरकुने ओना तम्मुरहक-हेलाहकुनलेसीं रूपम येतमळ अब्सरम मत्ता. इल्हा रूपम येतते ओर पेनदा मुन्ने सेवा किय्याना वरोर दयागल्लोड आनि विस्वासमलायक पेद्दा पेर्मल आंतोर. अस्केन ओर लोकुल्कुना पापाल्कुनाहाटीं मोक्कु हिय्या परंतोर.

18 ओर कुद्दु परिक्साते अरिं तिप्पल्क बोगांचि मंतोर, अदुनहाटीं इंदके बोर अयते परिक्साते अरिं तिप्पल्क बोगांचंतुरो, ओर्कु ओर सहायम किया परंतोर.

3

येसु मूसांकन्ना पेद्दोड

1 अदुनहाटीं, पवित्र विस्वासुल्कुनिटा! मुक्तिता पालिगाहक आयालय पेन मीकुन केयता. येसुन पेन पेद्दा पेर्मल आनि प्रेरित आयालय लोहचीता इंचि मनम ओप्कुत्तोम, अयते ओना बारेमते मिमेट विचारम कीम्टु.

2 पेनदा पूरा कुटुंबमते मूसाल अन्नि कबाहकुने विस्वासमलायक मत्तोर, अल्हेने येसुगुडा ओन निल्लाता पेनदाहाटीं विस्वासमलायक मत्तोर.

3-4 हरेक लोतुन दोहानोर बोरन्ना वरोर मनकल मन्तोर, गानि अन्नि तयार कीतोर मात्रम पेने आंदु. बल्हा अयते लोतुकन्ना लोन दोहानोंक एक्को कदर मन्ता, अल्हेन येसुगुडा मूसांकन्ना एक्को कदरगल्लोड इंचि पोरोल तरकुत्तोर.

5 वायाना कालमते पेन बतल-बतल अयते वेहाना मंतानो, अवुना गवाइ लोकुल्कुंक वेहनाहाटीं मूसाल, पेनदा पूरा लोतोरगा वरोर विस्वासमलायक सेवक आसि मत्तोर.

पेनदा लोकुल्कुना आरामता बारेमते

6 गानि पेनदा विस्वासमगल्ला मरिं, किरिस्तु, पेनदा पूरा लोतोरगा अदिकारि आसि मत्तोर. मनमगिंटा मना विस्वासम आनि आसेता बारेमते आकिरदाका इरगा गट्टिगा मत्ते, मनमगुडा पेनदा लोतोरम आसि मन्तोरम.

7-8 अस्के पवित्र आत्मा दर्मसास्त्रमते इल्हा इंता:

“मिमेट इय्याला पेनदा पोल्ले केंजानयते,
पेन वेहतद मोमोट केंजोम इंचेके,
इस्त्राएल लोकुल्क बय्लि जेगातगा पेनदा पट्टु हळालय बल्हा मुजोरि कीतुरो,
अल्हा मिमेट मीवा मनसुकुने मुजोरि कियमट.

9 अगा नल्पै वर्सनदाका नना कीता कबाहकुन हळसिगुडा,
मीवा पेद्दाल्क परमेर्का कीसि नावा पट्टु हळतुर.

10 अदुनहाटीं नना आ पीळिता लोकुल्कुनपोर्री होंग पीसि,
‘ईरा मनसु बस्केळक नहागटाल तप्सोंचि लक्कु मन्ता,
ईर नावा हरदुन बस्केने एरपाट किया हिल्लुर,’

* 2:12 बजन संहिता 22:22 ☆ 2:13 यसायाह 8:17-18 * 2:16 मनम येसुन विस्वासम कीतोम इंचि, मनमगुडा अब्राहामुना वंसंमतेके आंदुम.

इंचि ओर्कुन इत्तन.

11 अदुनहाटीं नना होंगुने, 'ओर्कुन आराम दोर्कना जेगाते बस्केने होळिया हिय्योन,'

इंचि ओट्टु तिचि वेहतन."*

इंचि इत्ता.

12 विस्वासुल्कुनिटा, जेगर्ता! जीवाते मंदना पेनदापोर्रोटा विस्वासमताल लक्कु कियागोट्टनसोंटा कराब, विस्वासम हिलुवा मनसु, मीलोप्पो बोरगेन मनानायो.

13 गानि पापम मीलोप्पो वासि मीवा मनसु मुजोरि कियाकोंटा मननाहाटीं, "इय्याला" इनना वेला मनानेकेने दररोज वरोंक-वरोर दैरनेम हीसेक मंटु.

14 बारित्ते, सुस्वने मनम इर्ता बरोसातुन मना पिस्वरता आकिरदाका गट्टेगा पीसि मत्तेन, मनम किरिस्तुना पालिगाहक आंतोम.

15 दीनकन्ना मुन्ने दर्मसास्त्रमते इल्हा वेहतद मंता:

"मिमेट इय्याला पेनदा अल्किर केंजानय्ते,

पेन वेहतद मोमोट केंजोम इंचेके,

इस्त्राएल लोकुल्क बय्लि जेगातगा पेनदा पट्टु हळालय बल्हा मुजोरि कीतुरो,

अल्हा मिमेट मीवा मनसुकुने मुजोरि कियमट."*

इंचि रासि मंता.

16 पेनदा पोल्ले केंजसिगुडा दाना विरोदमते ताकतोर बोर आंदुर? मूसानतोनि कलियसि इजिप्त देसेमताल पलाते अरता आ अंतोर लोकुल्के गदा!

17 नल्पै वर्सनदाका पेन बोरा पोरो होंग पीसि मत्ता? पापम कीसि बय्लि जेगाते बोरा पीनगुल्क अय्ते अर्सि मत्तांगो, ओरा पोरेन आयोना?

18 "ओर्कुन आराम दोर्कना जेगाते बस्केने होळिया हिय्योन," इंचि पेन बोरा बारेमते ओट्टु तित्ता? दाना पोल्ले परकारम बोर अय्ते ताका हिल्लुरो, ओरा बारेमतेन गदा!

19 इल्हा ओर्कु विस्वासम हिलुवाहेंकेन, ओर आराम दोर्कना जेगाते होळिया पराहिल्लुर, इंचि मनाकु तेळियंता.

4

आराम दोर्कना जेगाते होळियमळ

1 आराम दोर्कना जेगाते होळियाना बारेमता पेन हीता पोल्ले, इदवेरदाकागुडा ताकसेके मंता. अद मना लोप्पोटाल बोनागटालन्ना तप्सोनामन्नि इंचि, मनम पेनदा वेरेंते मंदकोम.

2 बारित्ते, ई आराम दोर्कना जेगाता बारेमता बेसता कबुर इस्त्राएल लोकुल्कुंक एवताप मनकगुडा वेहमळ जर्गता. गानि ओर आ कबुरपोरो विस्वासम इरा हिल्लुर, अदुनहाटीं ओर्कु दानद बतले पायदा आयाहिल्ले.

3-4 विस्वासम कीतोरम मनम, आ आराम दोर्कना जेगाते तप्पाकोंटा होळियंतोम. बारित्ते एडोव रोजुना बारेमते इल्हा रासतद मंता:

"पेन अद कीता अन्नि कबाहकुनाल एडोव रोजुननाड आराम कीता,"

इंचि रासि मंता. अयना आ जेगातुन तयार कियाना कबळ, पेन दुनियातुन पुटिस्तस्केन पुरागा कीसि इर्ता. बारित्ते, विस्वासम ईस्वोरा बारेमते पेन होंगुने इल्हा इत्ता:

"ओर्कुन आराम दोर्कना जेगाते बस्केने होळिया हिय्योन,

इंचि ओट्टु तिचि वेहतन."* इल्हा इत्ता.

5 आनि मर्ता, "ओर्कुन आराम दोर्कना जेगाते

बस्केने होळिया हिय्योन,"

इंचि इंकुंदि मल्का इत्ता.

6 दीनकन्ना मुन्ने मना पेदूदाल्क बेसता कबुर परकारम ताकुवाहेंका ओर आराम दोर्कना जेगाते होळिया पराहिल्लुर. अयना अद आराम दोर्कना जेगाते इच्चुर लोकुल्क इंदकेगुडा होळियाना मंता.

7 अदुनहाटीं, पेन उंदि रोजु इंकुंदि रोज तयार कीसि इरता, अदुन "इय्याला" इंचि इंतुर. पेदूदाल्क हरि तप्ता वेल्लेन वर्साक, बल्हा अय्ते मुन्ने वेहताप,

"मिमेट इय्याला पेनदा पोल्ले केंजानय्ते,

इय्याला पेन वेहतद मोमोट केंजोम इंचेके,

इस्त्राएल लोकुल्क बय्लि जेगातगा पेनदा पट्टु हळालय बल्हा मुजोरि कीतुरो,

अल्हा मिमेट मीवा मनसुकुने मुजोरि कियमट,"*

इंचि दाविदना बजन संहिता पुस्तकमते पेन वेहता.

8 ओक्कला जोसुवाल ओर्कुन आराम कियाना जेगाते ओसि मत्ते इंकुंदि रोजुना बारेमते पेन मर्ना वळकाकोनवळ.

9 अदुनहाटीं पेनदा लोकुल्क आराम कियाना रोजु इंका वायानदे मंता.*

10 बल्हा अयते पेन दाना कबाह्कुन महाचि एडोव रोजु आराम कीता, अल्हेन दाना आराम कियाना जेगाते होळियानोरगुडा ओरा कबाह्कुन महाचि आराम कियानुर.*

11 इस्राएल लोकुल्क पेनदा पोल्ले परकारम ताकुवाहेंका ओर नासडेम आतुर, गानि मनम ओरालेसीं आयाकोंटा, पेनदा पोल्ले परकारम ताकसेके अद जेगाते होळियाना इरगा कोसिस कियामोम.*

12 बारित्ते पेन वेहता ई पोल्ले, जीवा मत्तद आनि बलमगल्लद आंद, अद रौडु बाजकुनाल करा-करा मनना कसेरकन्ना एक्को करा-करा मंता. अद बल्हा बोक्कानाल पूलगुन वेरे-वेरे कीता, अल्हेन आत्माताल जीवातुन वेरे कीता. इंका अद मनसुना विचाराल्कुन, अवुना उद्देसाल्कुना बारेमते बरोबर वेहा परता.

13 इद दुनियाते मनानव बतांगें पेनदा नदरताल मक्किसि हिल्लें. मनम मना बारेमते लेक्का अप्पजेप्पना पेनदा मुन्ने अन्निगुडा कुल्ला-कुल्ला मंतां.

येसु अंतोर्कन्ना पेद्दा पेर्मल

14 अंतोर्कन्ना पेद्दा पेर्मल, स्वर्गमते होत्ता पेनदा मरिं येसु, मनातोनि मंतोर. अदुनहाटीं अंतोरा मुन्ने ओप्कुत्ता मना विस्वासमतुन मनम गट्टिगा पीसि मंदकोम.

15 मना पेद्दा पेर्मल येसुंकुगुडा मनालेसीं पापम कियाना अन्नि परिकसां वातां, गानि ओर बस्केने पापमते अर्ना हिल्लोर. अदुनहाटीं ओर मना कमजोरिन, दुक्काल्कुन तेल्लिचकुंतोर.

16 अयते वट! गट्टिगा दैरेनेम कीसि मनम पेनदा दयाता राजगद्दे दग्गेर्क दाकोम. दीनहेंदाल मनाकु अक्सरम मत्तस्के, मना सहायमहाटीं ओना कुर्पा आनि दया दोर्कार.

5

पेद्दा पेर्माना कबाह्क

1 हरेक पेद्दा पेर्मन, लोकुल्क ओरा लोप्पोटाल पेर्नातुर. लोकुल्कुना पापाल्क मापि आयानाहाटीं लोकुल्कुनाहेंदाल ओर पेनदुक् मोक्कुल्क हिश्यना, सेसां* वाटाना कबळ कियालय ओन निलाहंतुर.

2 आ पेर्मलगुडा वेल्ले तीरकुने कमजोर मंतोर, अदुनहाटीं तेळियका तप्पु कीतोर्कुन, हरिं तप्पोत्तोर्कुन ओर दयाते हळा परंतोर.

3 अदुनहाटीं ओर लोकुल्कुना पापाल्क मापि आयालय मोक्कु हीताप, ओना सतता पापाल्कुनाहाटीं गुडा मोक्कु हियापीता.*

4 बल्हा अयते मोट्टा मोदाटा पेद्दा पेर्मल आयानाहाटीं पेन हास्तुन केयता, अल्हेन पेन केयवद बोरे मनकल ओनद ओरे पेद्दा पेर्माना कदरता जेगा येता परंतोर.

5 अल्हेन किरिस्तुगुडा ओनद ओर पेद्दा पेर्मल आया हिल्लोर. गानि बद पेन अयते ओन, “निमे नावा मरिन आंदिन, इय्याला ननाने नीकुन पुटिस्तन,” इंचि इत्तानो अदे पेन ओन पेद्दा पेर्मल इंचि निल्हाता.*

6 अल्हेन, “निमे मेल्लिकसेदेकुनलेह्का बस्केळताहाटीं पेद्दा पेर्मल आसि मंदकिन”* इंचि मरुदि जेगातेगुडा पेन ओन इत्ता.

7 येसु इद बूमिपोर्ना मनकना रूपमते मत्ता रोजकुने, ओन हामुरताल कापाळाना पेनबाबांक अळसि, मोत्कुंचि विनंति-पारतनां कीतोर. अस्के ओना बक्तितुन पीसि पेन ओना पारतनातुन केंजता.

8 येसु कुद्दु पेनदा मरिं आसिगुडा तिप्पल्क बोगांचेके, पोल्लेपोर्ना ताकमळ इत्ते बतल, करियतोर.

9 इल्हा, ओन्क बल्हा अयते आयाना मत्ता अल्हा पुरागा आसि, ओना पोल्लेपोर्ना ताकाना अंतोराहाटीं ओर, बस्केळताहाटीं मुक्ति हियानोर आतोर.

10 इल्हा पेन ओन मेल्लिकसेदेकुनलेह्का पेद्दा पेर्मल इंचि निलाहता.

पेनदा मनमळता बारेमता तेल्वि बेर्सीहिल्ले

11 ई मेल्लिकसेदेकुना बारेमते वेहकोम इत्ते वेल्लेन पोल्लें मंतां. गानि मिहगा केंजना मनसु हिलुवाहेंका, बेस तेळियागोट्सि वेहमळ इत्ते वेल्लेन कस्टम.

12 अल्हा हळते इदवेरदाका मिमेट गुस्ल्क आया मत्ता. गानि इदके मीके वेरे बोर्नना वासि पेन हिश्यना मुक्ति बारेमता पोल्लें मर्ना कराहना अक्सरम मंता. मिमेट इदवेरदाकागुडा पाल उनानोरालेसीं गे मंतिट, गाटो तिननालायक आया हिल्लिट.

13 बारित्ते पाल उनना हरेक पेडल, ओर पसि पेडले मन्तोर. ओन्क नीति पोल्लेना बारेमते तेळियो.

14 गानि बोर् अयते तेल्वि बेर्सि, मंचि-सेड्डातुन एरपाट कीसि अल्हा ताकतुरो, ओरे गाटो तिनानोरालेसीं आतुर.

* 4:9 उत्पत्ति 2:2-3 * 4:10 उत्पत्ति 2:2 * 4:11 2 पृ 1:10-11 * 5:1 सेसां परिकु, कोलां, जोन्नां, वंजिं इवन्निन पेनदा गद्देतगा जमा कीतुर, इदुने सेसा इंतुर. * 5:3 लैव्यवस्ता 16:6 * 5:5 बजन संहिता 2:7 * 5:6 उत्पत्ति 14:18; बजन संहिता 110:4

6

1 अस्के किरिस्तुना बारेमते सुखने करियता बोदाना बारेमते मर्ना-मर्ना वळकमळ होळसिसि, गिचचो मुन्नेळक होंचि पेद्दा बेसंतोरालेक्कते दाकोम. मरुंदि मल्का हामुरतेके ओयाना कबाहकुनाल मनसु मार्सकुन्मळ, पेनदापोरो विस्वासम इरमळ,

2 बापतिस्माता बारेमते करियमळ, तल्लापोरो कय इरमळ, हासि मर्ना जीवाते तेदमळ आनि बस्केळताहाटी मनना न्यायम बारेमते करियमळ, इसाँटा किरिस्तुना बारेमते सुखने करियता बोदाना बारेमते मीकु मर्ना-मर्ना वेहाना अक्सरम हिल्ले.

3 अयना पेनदा इच्चा मत्ते इल्हागुडा कीकोम.

विस्वासमताल पजोळक आतोर गति

4 बोर अयते पेनदुन विस्वासम कीसि पजा आ विस्वासमताल पजोळक आंतुर, ओर्कुन मनम बल्हा मर्ना मलाहकोम? बारित्ते ओर्क अयते ओरा पिस्वरते उंदि मल्का वेलगु दोर्किस मत्ता,

5 ओर अयते स्वर्गमताल दोर्कना वरालकुना रुसि हळतुर, पवित्र आत्माते पालिगाहक आतुर, इंका पेनदा बेस पोल्लेनद आनि वायना कालमता ताकतता रुसि हळतुर,

6 असंतोर पेनदा मरिन मर्ना अंतोरा मुन्ने कृसुनपोरो वेल्लाड वाटसि ओन बदनाम कीसंतुर. अदुनहाटी असंतोर्कुन पेनदा विस्वासमताल लक्कु आयानयते मर्ना मनसु मार्सकुननालायक कियमळ असल कुदरेन कुदरो.

7 विस्वासमताल पजोळक होत्ता ई लोकुलक, कराब बूमितसंतोर आंतुर. बारित्ते, बूमि दानपोरो अरता पिरदा एतुनंता उंचि, दान ऊळाना कास्तकरि मनकंक बेस पंटा हियानयते पेन दान्क आसिर्वाद हीता.

8 गानि अदे बूमि ओक्कला हाहकु, हाहकुना पोदां पुट्टिचानयते अद कबळक ओज्जाकोटा आसि पेनदा सापनेमलायक आंता. आकिरते दान बोळसि पोहमळ जर्गता.

पेन बस्केने मति मर्गो

9 अयते नावा पावरमगल्लोरिता, मोमोट इंदके इल्हा वळकसंतोम. अयना मीहेंदाल मोमोट इवुंकन्ना बेस पोल्लें आसे पडसंतोम. मिमेट कियाना कबाहकुन हळसि, मीकु निजमे मुक्ति दोर्कता इंचि माकु बरोसा मंता.

10 बारित्ते, पेन अन्यायम कियानद आयो. दाना पोरोलते मिमेट कियाना बेस कबाहकुन, दाना पवित्र लोकुलकुनपोरो मिमेट हुपिस्ता पावरमतुन आनि कीसेके मनना सहायमतुन अद बस्केने मति मर्गो.

11 मनम बदुनाहाटी अयते आसे पळसि एदुर हळसेक मंतोमो अद दोर्कनदाका, मी लोप्पोटा हरेक मनकल पुरागा गट्टि आसेते आकिरदाका कोसिस कीसेके मनना इंचि मोमोट मनसुनाल कोरसंतोम.

12 अदुनहाटी मिमेट लंडोर्क आयमट. गानि बोर लोकुलक अयते विस्वासम आनि ओप्केहेंदाल पेन हीतन इत्तादुन दक्किचकुंतुरो ओरा अळगुने अळगु वाटसि मिमेट ताकट इंचि कोरसंतोम.

पेन हीता पोल्ले

13 पेन अब्राहामुंक पोल्ले हीतस्के, ओट्टु तिनानाहाटी दानकन्ना पेद्दोड बोर हिल्लुवाहेंका अद दाना सतता ओट्टु तित्ता.

14 तिंचि, “नना नीकु तप्पाकोटा आसिर्वाद हीतन, इंका नीवा वंसमतुन वेल्लेन बेसगोट्टंतन,”* इंचि इत्ता.

15 इल्हा अब्राहाम वेल्ले ओप्केते एदुर हळतोर इंचि पेन ओन्क हीतन इंचि पोल्ले हीतद ओन्क दोर्कुता.

16 मनकालोर्क ओट्टु तिनानस्के, ओरकन्ना पेद्दोरद ओट्टु तितुर. ओरा हरेक जगडमता पैसला आ ओट्टु तिननाहेंदाले पक्का आंता.

17 पेन दाना पिलानतुन बस्केने मार्सो इत्ता संगति, अद पोल्ले हीतोर्कुंक बेस तेळियाना इंचि पेनदा इच्चा मंता. अदुनहाटी अद अल्हा ओट्टु तिंचि दाना पोल्लेता गेरांति हीता.

18 पेन हीता पोल्ले आनि ओट्टु, इव रोंडु बस्केने बदलांचो. इवुना बारेमते पेन बस्केने आबद्दम वळका पर्रो. मनम बद आसेहेके अयते होनालय पेयसतोमो, अद आसेहेके मनम इंचिचो गट्टि दैरनेमते होनना इंचि पेन अल्हा माकु रोंडु मल्कां गेरांति हीता.

19 अद आसे इत्ते मना जीवाहाटी उंदि कोय्याता कुसितसोटद आंद. अद बेस गट्टिगा आनि मेसलाकोटा पीसि मनंता. पेन मनना पवित्र जेगातगळक अद मनाकुन एव्सा पर्रता.

20 अद जेगातगा येसु मनाहाटी मनाकन्ना मुन्नेन होळियतोर. होळियसि मेल्लिकसेदेकुना रीतिते बस्केळताहाटी पेद्दा पेर्मल आतोर.

7

मेल्लिकसेदेक पेर्मल आंतुर

1 ई मेल्लिकसेदेक सालेम सहरता राजाल आनि अन्निटकन्ना पेद्दा पेनदा पेर्मल मत्तोर. अब्राहाम वेरे राजालोरतोनि लडाइ कीसि ओर्कुन गेल्लिस, मल्लिस वायनेके मेल्लिकसेदेक ओन्क कलियसि आसिर्वाद हीतोर.

* 6:14 उत्पत्ति 22:16-17

2-3 अस्के अब्राहाम लडाइते गेल्लिस तत्ता पूरा दनम-संपत्तितुन तूस कीसि, पदोव तूस मेल्लिकसेदेकुंक हीतोर. मेल्लिकसेदेक इनना पोरोल्कु अर्तम, “नीतिता राजाल” इंका इब्रानि बासाते सालेम इनना पोरोल्कु “सांति” इंचि अर्तम आंद. इत्ते ओन सुकमता राजाल इंचिगुडा इनावच्चु. मेल्लिकसेदेकुना तल्लुर-बाबो बोर आंदुर, ओना तम्मूहक-तादालोर बोर आंदुर, ओना पुट्टुकु-हामुरता बारेमतेगुडा दर्मसास्त्रमते बतले रासि हिल्ले. पेनदा मरिनलेहका ओरगुडा बस्केळताहाटीं पेर्मल आसि मनंतोर.

4 ई मेल्लिकसेदेक इत्ते बच्चोन पेद्रुदा मनकालो मनमे विचारम कियाना मंता. मना मोदोलता मनकल अब्राहाम पगातोरहेंदाल गेल्लसता बेसता मालुना पदिताल उंदि तूस ओन्क हीतोर.

5 मूसाना नियमते उंदि आदेस मंता. अद बतल इत्ते, लेवि वंसंमताल पेर्मालोर आतुर, वैरे वंसंमता लोकुल्क ओर अब्राहामुना वंसंमतोर आयिना ओरा तम्मूहक-तादालोर, ओरा कमयता पदिताल उंदि तूस पेर्मल आतोर्कु हिच्युडे गावाले.*

6 गानि मेल्लिकसेदेक लेविना वंसंमतोर आयोर. अयनागानि मेल्लिकसेदेक, बोन्क अयते पेन पोल्ले हीसि मत्ता आ अब्राहामुनाहेंदाल पदि तूसकुनाल उंदि तूस येतकुंचि ओन्क आसिर्वाद हीतोर.† † दीनहेंदाल मेल्लिकसेदेक पेद्रुदोड आंदुर.

7 इंदके पेद्रुदोड सिन्नोंक आसिर्वाद हीतोर इत्ता पोल्लेपोरीं बतले अनमानम हिल्ले.‡

8 लेविना वंसंमताल पेर्मालोर आतोर पदिताल उंदि तूस येतंतुर. गानि ओर अयते उंदि रोज हायना मनकालोर आंदुर. गानि बस्केळक पिस्सि मनना मेल्लिकसेदेकगुडा पदिताल उंदि तूस येतंतोर इंचि गवाइ वेहताप दर्मसास्त्रमते रासि मंता.

9 अल्हा हळते, पदिताल उंदि तूस येताना लेविगुडा अब्राहामुनाहेंदाल, पदिताल उंदि तूस मेल्लिकसेदेकुंक हीतोर इंचि इनावच्चु.

10 अद बल्हा इत्ते, अब्राहाम मेल्लिकसेदेकुंक कलियसि पदोव तूस हीतस्के, लेवि पुट्टा हिल्लोर, अयनागानि ओर ओना तादो-बाबो अब्राहामुना मेंदुल्ले जीवा पेळेतालेसीं मत्तोर. *

येसु मेल्लिकसेदेकुनसोंटा पेर्मले

11 मूसाना नियमते, लेविना वंसंमतोर पेर्मालोर्क आयाना इंचि रासतद मंता. अयते ओर कियाना कबाहकुनहेंदाल लोकुल्क पुरागा नीतिमंतुल्क आया पर्सि मत्ते, हास्ननसोंटोन वरोन पेर्मन पेन लोहचि मनवळ. गानि मेल्लिकसेदेकुना रीतिते वरोन पेर्माना अक्सरम बतल मत्ता?

12 बारित्ते पेर्माना कबळ मारियतस्के, मूसाना नियमगुडा मारिया पीता.

13 इवन्नि पोल्लें इंदके वैरे कानदानते पुट्टा येसुना बारेमते वेहासेक मंतां. ई कानदानते पुट्टोर बोरैगुडा मोक्कु हिच्यना जेगातगा सेवा किया हिल्लुर.

14 मना सामि यहुदाना वंसंमते पुट्टोर. ई कानदानतोर पेर्मालोर आयाना बारेमते मूसाल बग्गेन बतल रासा हिल्लोर, इंचि अंटोर्क तेळियसे मंता.*

15 गानि मेल्लिकसेदेकुनसंतोर इंकावरोर पेर्मल वांतोर इत्तस्के, इद पोल्ले इंचिचो किलियर आंता.

16 उंदि कानदानतोर पेर्मालोर आयाना, इंचि मूसाना नियमते रासतद मंता. गानि येसु आ हिसाबते पेर्मल आया हिल्लोर. ओनगा बस्केळक पिस्सि मनना बलम मंता, अदे बलमते ओर पेर्मल आतोर.

17 बारित्ते, “मेल्लिकसेदेकुना रीतिते निमे बस्केळताहाटीं पेर्मल आसि मंदकिन,” इंचि ओना बारेमते दर्मसास्त्रमते रासतद मंता.

18-19 इल्हा, मूसाना नियमते रासि मत्ता आदेसाल्क लोकुल्कन नीतिमंतुल्क किया परांहिल्ले. अद नियम कमजोर आसि बताके ओज्जाकोंटा आता इंचि, पेन दान पक्काक इरता. दाना जेगाते, पेन दानकन्ना मंचि आसेतुन इरता. इद आसेतुन पीसि मनम पेनदा दगेर्क होना परांतोम.

20-21 इंकुंदि पोल्ले बतल इत्ते, हास्नना कानदानतोर ओट्टु तिनाकोंटेन पेर्मालोर आतुर. गानि येसु पेर्मल आयानेके पेन ओन इल्हा इत्ता: “निमे बस्केळताहाटीं पेर्मल आसि मंदकिन इंचि पेन ओट्टु तित्ता, अद दाना पोल्लेतुन बस्केने मासो,” इंचि रासतद मंता. इल्हा पेन ओट्टु तित्ताहाटीं येसु पेर्मल आतोर.

22 अदुनहाटीं इंदके पेनदा मुन्नेटा पडाना करारकन्ना, पूना करार बच्चोनो बेसतद इंचि येसु गेरांटी आसि निल्लोर.

23 इंकुंदि पोल्ले बतल इत्ते, वेल्लेटोर लोकुल्क पेर्मालोर आसि मत्तुर, गानि हामुर ओर्कु हमेसाताहाटीं पेर्मल आसि मनालय अड्डम आता.

24 गानि येसुंक बस्केने हामुर हिल्ले, इंचि ओना पेर्मलतनम बस्केळताहाटीं मनंता.

25 अदुनहाटीं येसु, ओनाहेंदाल बोर अयते पेनदागा वांतुरो, ओराहाटीं विनंति कियालय ओर बस्केळक जीवातेन मनंतोर. इल्हा येसु माकुन पुरागा पिसागोटा परांतोर.

26 येसु पवित्र मत्तोर, ओनगा बतले कसूर मनाहिल्ले, ओन्क बस्केने पापम अंटा हिल्ले, पापिल्लुकुनाल लक्कु मत्तोर. अदुनहाटीं ओन स्वर्गमकन्ना एतु तेहामळ जर्गता. इसोंटा पेद्रुदा पेर्मले मनाहाटीं बेस कुदरंतोर.

27 वैरे पेद्रुदा पेर्मालोर मुन्नेन सतता पापाल्क मापि आयगोम इंचि मोक्कु हीकुंतुर आनि पज्जोटाल वैरे लोकुल्कना पापाल्क मापि आयालय मोक्कुल्क हींतुर. इल्हा ओर दिन्म कियुंदुर. गानि किरिस्तु लोकुल्कना पापाल्क मापि आयानाहाटीं उंदे मल्का ओना मेंदुल्लुन मोक्कु हीतोर. अदुनहाटीं ओन्क वैरे पेर्मालोरलेसीं कियाना अक्सरम हिल्ले.

* 7:5 लेविना बाबो याकोब आंदुर. ओनागटाले इस्राएलतोर अंतोर पुट्टुर. अब्राहाम याकोबना मातिर दादाल आंदुर. ✨ 7:5 गिनति 18:21-28 † 7:6 मेल्लिकसेदेकुना कालमते लेवि पुट्टा हिल्लोर. ✨ 7:6 उत्पत्ति 14:19-20 ‡ 7:7 मेल्लिकसेदेक वय्स्ने अब्राहामुंकन्ना पेद्रुदोड आंदुर. ✨ 7:10 उत्पत्ति 14:18-20 ✨ 7:14 उत्पत्ति 29:34-35

28 मूसाना नियम कमजोर मनकालोर्कुन पेद्दा पेर्मालोर् इंचि निलाहंता. गानि मूसाना नियमकन्ना पज्जोटा, ओट्टुनतोनि वाता आ पोल्ले, पेनदा मर्रिन पेद्दा पेर्मल इंचि निल्हाता. आ मर्रि अन्नि तीरकुने पुरागा मंतोर. ओर बस्केळताहाटी पेद्दा पेर्मल आसि मंतोर.

8

येसु मना पेद्दा पेर्मल आंदुर

1 इदवेरदाका वेहासेक वाता पोल्लेता मेन पोल्ले बतल इत्ते, स्वर्गमते अन्निटकन्ना पेद्दा पेनदा तिना बाजुंक राज्येम क्रियालय बोर अय्ते उद्दिदिसि मंतोरो, ओरे मावाहाटी पेद्दा पेर्मल आतोर.*

2 कुद्दु पेने निल्हाता अन्निटकन्ना पवित्र जेगा आनि निजम डेराते येसु सेवक आसि पेनदा सेवा कीसेके मंतोर.

3 हरेक पेद्दा पेर्माना कबळ अय्ते पेनदुक मोक्कु हियमळ, दानम वाटमळ आंद. अल्हेने मावा पेद्दा पेर्मल येसुनगागुडा मोक्कु हियालय बतलन्ना मनमळ अक्सरम मंता.

4 मूसाना नियम परकारम दानम वाटानोर भूमिपोर्गे वेल्लेन पेर्मालोर् मंतुर. अदुनहाटी येसु भूमिपोर्गे मंचि मत्ते, पेर्मलगुडा आयाकोन्नेर.

5 पेनदा डेरा निल्हाका मुन्ने, “निमे गुट्टापोर्गे नावातोनि मत्तस्के नना नीकु बद नक्से हुपिस्तनो, बरोबर अल्हेने नाहाटी डेरा निल्हा,” इंचि पेन मूसांक वेहचि मत्ता. दीना अर्तम बतल इत्ते, पोर्गे स्वर्गमते मंदना पेनदा डेराता नीडालेसीगे, इद भूमिते पेर्मालोर् सेवा क्रियाना जेगा मनंता.*

6 गानि इंदके पेनदा पूना करारते माकुन कल्पानोर येसे आंदुर. इद करार, मुन्नेटा पडाना करारकन्ना बच्चोनी बेस मंता. अद बल्हा इत्ते, पूना करारते पेन वेहता पोल्ले, मुन्नेटा पडाना करारते मत्ता पोल्लेकन्ना बच्चोनी बेस मंतां, इल्हा इद भूमिते मनना पेर्मालोर्कन्ना येसुंक वेल्ले बेस सेवा दोर्कता.

7 ओक्कला पडाना करारते बतले दोसेम हिलाकोटा मंचि मत्ते, पूना करारता अक्सरमे अर्काकोनवड.

8 गानि पेन दाना लोकुल्कुनगा दोसेल्क दिसतस्के ओर्कुन इल्हा इत्ता:

“हुळाट, नना इस्राएल राज्येमतोनि आनि यहुदिया राज्येमतोनि,
पूना करार क्रियाना रोजकु वासेकेन मंतां.

9 नना ओरा तादो-बाबुर्कुन कय पीसि इजिप्त देसेमताल पलाते तच्चि मत्तन.
अस्के ओरतोनि कीता करारलेहका इद पूना करार मन्नो.

नना ओरतोनि कीता करार परकारम ओर ताका हिल्लुर,
अदुनहाटी नना ओर्कुन लेक्का किय्योन.

10 गानि अव रोजकु दाटसोत्ता पजा,
नना इस्राएल लोकुल्कुनतोनि क्रियाना पूना करार इल्हा मनंता.

नना नावा नियमकुन ओरा मनसुल्कुने रासि, अवुन ओरा बुद्दिदेते इर्रानालायक कीतन.
नना ओरा पेनदुन आकन, ओर नावा लोकुल्क आयानुर.

11 अद वेलाते सिन्नाल्क-पेद्दाल्क अंतोरे नाकुन एरपाट कीसि मनांतुर,
अदुनहाटी, पेनदुन एरपाट कीम्ट, इंचि लोता पक्कातोर्क आयि जीवातोर्क आयि,
ओर-ओरा नाटेनोर्क वेहना अक्सरम हिल्ले.

12 बारित्ते, ओर क्रियाना तप्पुड कबाहकुन नना दयाते मापि कीकन,
ओरा पापालकुन मर्रा बस्केने मति किय्योन,”*
इंचि रासतद मंता.

13 इदुन पेन “पूना करार” इत्ताहाटी मोदाटा करार कबळ्क ओज्जाकोटा आसि पडानद आसोत्ता. अद इंदके बिराने दिसाकोटा आयार.

9

भूमिपोर्गे आरादना आनि स्वर्गमता आरादना

1 इस्राएल लोकुल्कुतोनि कीता मोदाटा करारते, पेनदुन मोळ्काना बारेमते नियमकु रासतव मत्तां. आ नियम परकारम मोळ्कानाहाटी इद भूमिते उंदि डेरा मत्ता.*

2 अद डेरा इल्हा मत्ता. आ डेराता मुन्नेटा अरति पोतसेके मनना पंतें इर्रालय उंदि दीसोडि आनि उपारमता हारि इर्रालय उंदि टेबल मनुंदु,
अद अरतुन पवित्र जेगा इंतुर.

3 दीना पज्जो इंकुंदि परदा मत्ता, अद परदाता पज्जोटा अरतुन अन्निटकन्ना पवित्र जेगा इंतुर.

* 8:1 बजन संहिता 110:1 * 8:5 निर्गमन 25:40 * 8:12 यिर्मयाह 31:31-34 * 9:1 अद डेरा मूसाना कालमते तयार कीतद आंद.

4 अद अरति गुगलेम वाटनाहाटी बंगारमतोनि तयार कीतद उंदि दूपम कुळकां† आनि करारकुना संदगु मत्ता..✧ आ करारकुना संदगु पुरागा पिच्चर बंगारमता पालिस हीसि मत्ता. आ संदगुने उंदि बंगारमता बुडिड मत्ता, अवटे ‘मन्ना’ इरसि मत्ता✧ इंका आ संदगुने हारूनना दुडुडु मत्ता, अदुंक इगुर वासि मत्ता.✧ इंका अवटे पेनदा करार्क रासि मत्ता बंडाता बल्लांगुडा मत्तां.✧

5 आ संदगुना मूताता पोरोटा बाजुन “पापालक मापि कियाना जेगा” इंतुर. महिमाता वेल्गुने निडिसि मत्ता रौंडु करूब‡ इनानवुना बोम्मां आ जेगापोरो नीडा कीसि कावेल कीसेके मनुंद. इव अन्निटवुना बारेमते तेल्लिचिचे वेहालय इंदके वेला हिल्ले.

6 इल्हा इवन्नि तयार कीता पजा, डेरालोप्पो मोळकाना जेगातगा पेर्मांलोर होंचि रोज सेवा कीसेके मनुंदुर.

7 गानि इंकुंदि परदाता पज्जोटा अरति, सिराप पेदूदा पेर्मल ओना सतता पापालकुनाहाटी आनि लोकुलक तेळियका कीता पापालकुनाहाटी मोक्कु हियालय नेत्तुर पीसि, वर्साक उंदि मल्के दांतोर.

8 इवुंता हळसि बतल अर्तम आंता इत्ते, बदवेरदाका अय्ते इसोटा मोदाटा डेरा मनंतनो, अदवेरदाका अन्निटकन्ना पवित्र जेगाते होनालय हरि कुल्ला हिल्ले, इंचि पवित्र आत्मा वेहांता.

9 ई डेरा इत्ते, इंदकेटा कालमते जर्गनदुना बारेमता उंदि चिन्ह आंद. अगा हियना मोक्कुलक, दानम वाटमळ इवंता मनकाना मनसुन पुरागा समादानम किय्यो.

10 अद बल्हा इत्ते, तिनुळ-उनुळ कियाना मोक्कुलक, पवित्र आयाना कबाहक इव नियमकु सिराप पलाताल पवित्र आयानाहाटीं कबळक ओज्जंतां. गानि पेनदा पूना करार वातस्के इव बवे बतले कबळक ओज्जो.

येसुए कुदुदु मोक्कु आयमळ

11 गानि किरिस्तु पेदूदा पेर्मल आसि, माहाटी बेसता पोल्लें पीसि वातोर. ओर इंदके स्वर्गमते मनना अन्निटवुंकन्ना पेदूदोड आनि अन्नि तीरकुने पुरागा मनना डेरतगा सेवा कियालय होळियतोर. अद मनकानाहेंदाल कीतद आयो, इत्ते अद दुनियातद आयो.

12 ओर अगा एटिना नेत्तुरो, पेय्याना नेत्तुरो पीसि होळिया हिल्लोर. गानि ओना सतता नेत्तुरतुन पोंगागोटसि, उंदे मल्का आ अन्निटकन्ना पवित्र जेगातगा होळियतोर. अदुनहेंदाल मनम अन्नि पापालकुनाल बस्केळताहाटी मुक्तितुन दोर्किचकुत्तोम.

13 मूसाना नियम परकारम, एटिं, कोंदाना नेत्तुर, कमरिस्ता पेय्याता बूळ्दि, मुट्टुने मत्तोरपोरो सल्लानय्ते अव सिराप ओरा मेंदुल्लतुन पलाताले पवित्र कीतां.

14 गानि किरिस्तुना नेत्तुर, हामुरताहेके ओयाना कबाहक कियाना मना मनसुन अवुंकन्ना बच्चोर सुदूद किय्यार! अद बल्हा इत्ते, बस्केळक मनना पेनदा पवित्र आत्माता बलमतोनि, बतले दोसेम हिल्लुवा येसु, पेनदा मुन्ने सतागा मोक्कु आतोर. बस्केळक जीवाते मंदना पेनदुन मनम मोळकाना इंचि येसु अल्हा कीतोर.

15 पडाना करारते मत्ता नियमकुन पीसि ताकुवाहेंका अस्केटा लोकुलक पापम कीसि अद करारतुन नेम्हातुर. ओर्कुन ओरा पापालकुना सिक्साताल तप्सानाहाटी किरिस्तु हासोत्तोर. इल्हा पेन अद केयता लोकुलकुन पूना करारते कल्पंता. अद केय्ति मत्तोर्कुंक, दाना बस्केळक मनना वारसान हक्कुन हीतन इंचि केय्ति पोल्ले हीतानो, ओर्क अद दोर्कता. इल्हा किरिस्तु ई पूना करारते नड्डुमतोर आतोर.

16-17 वरोर मनकल ओना बूमि-जेगां बोन्क आयाना इंचि रासंतोर, ओर हातास्केन ओर रासि इरता कायदोम सेल्लांता. ओर पिस्सि मत्ताचुं रोजकु अद कायदोम सेल्लो. पेनदा करारगुडा इल्हे मंता.

18 इंचे मरि, मोदाटा करारगुडा नेत्तुर पोंगागोट्टुवा निल्ला पराहिल्ले.

19 अदुनहाटी मूसालगुडा दर्मसास्त्रमते रासि मत्ता अन्नि आदेसकुन अंतोर लोकुलकुंक वेहतोर अस्के, कुरां-एटिना नेत्तुरतुन येते कल्पिसि, जूपा इनना पोर्काता‡ कोम्माक गोर्रिता एर्ा बूरा हुट्टिसि, दर्मसास्त्रमता पुस्तकालकुनपोरो आनि अंतोर लोकुलकुनपोरो सल्लोर.

20 पजा, “पेन मीकुन बद आदेसकुना परकारम ताकट, इंचि वेहतानो, ई नेत्तुर अदे करारतद आंद,” इंचि वेहतोर.✧

21 अल्हेने, मोळकाना डेरापोरो आनि मोळकानेके वाळकुनना अन्नि वस्तुकुन पोरोगुडा मूसाल आ नेत्तुरतुन सल्लोर.

22 मूसाना नियम परकारम हळते, दग्गेर-दग्गेरा अन्निगुडा नेत्तुर सल्लिसे सुदूद कियमळ गावाले. नेत्तुर पोंगागोट्टाकोटा पापालकुंक मापि हिल्ले.✧

येसुना हामुरताहेंदाल पापालक मापि आंतां

23 अदुनहाटी स्वर्गमते मनना वस्तुकुनालेसीं दिस्सानव मनकालोर तयार कीता ई नकलि वस्तुकुन, जिवरासिना मोक्कु हीसि पवित्र कियाना अवसरम अरता. गानि स्वर्गमते मनना वस्तुकुन पवित्र कियोगोम इत्ते, ई जिवरासिना नेत्तुरकन्ना इंका बच्चोनो बेसता मोक्कुलक हियापीता.

† 9:4 दूपम कुळका इद वेल्लेन पेदूदेद मत्ता. दूपम अय्ते पोरोटा बाजुने वाटंदुर, गानि लोप्पोगुडा सामान इर्ललय जेगा मनुंद. ✧ 9:4 निर्गमन 30:1-8 ✧ 9:4 निर्गमन 16:33-34 ✧ 9:4 गिनति 17:8-10 ✧ 9:4 निर्गमन 34:28 ‡ 9:5 रौंडु करूब इवुन इब्रानि बासाते करूबीम इंतुर. अवगुडा उंदि तीरता द्तांगे. पेन पापालकुन मापि कियाना जेगा ई संदगुना पोरोटा बाजुनेन मंता. अद बंगारमते मेत्तिसि मंता. पेर्मल पापालकुनाहाटी मोक्कु हीतस्के, नेत्तुरतुन अग्गेन पोंगागोट्टंतोर. अस्के अदुन हळसि पेन लोकुलकुना पापालक मापि कीता. § 9:19 जूपा इनना पोर्काई जूपा मरा तुलसे मरालेहका मंता. ✧ 9:20 निर्गमन 24:7-8 ✧ 9:22 लैय्वस्ता 17:11

24 बूमिपोर्रो मनकालोर कीता अन्निटकन्ना पवित्र जेगा इत्ते, स्वर्गमते मनना निजम पवित्र जेगातसोंटा उंदि पोटेवे आंद. बारित्ते, मनकालोर कीता पवित्र जेगाते किरिस्तु होळिया हिल्लोर, गानि इंदके ओर मना अंटोराहाटी सीदा स्वर्गमते होळियसि पेनदा मुन्ने विनंति कियालय निल्सि मंतोर.

25 अचोने आयका, एटा-एटा पेद्दा पेर्मल मोक्कु हियालय सतता नेत्तुर आयो गानि जिवरासिना नेत्तुर पीसि बूमिपोर्रोटा अन्निटकन्ना पवित्र जेगाते होळियंतोर. अल्हा ऊके-ऊके सतता मोक्कु हियालय किरिस्तु स्वर्गमते होना हिल्लोर.

26 ओक्कला अल्हा ऊके-ऊके मोक्कु हियमळगिंटा आसि मत्ते, दुनिया पुट्टस्केटाल इदवेरदाका बच्चुंगो मल्कां किरिस्तुंका ओना जीवा हिय्या पियवड. गानि इद युगमता आकिरते, किरिस्तु सतता मोक्कु हीसि, पापमतुन नासडेम कियानाहाटी उंदे मल्का वातोर.

27 बल्हा लोकुलक अंटोर उंदि मल्का हासि दांतुर, पजा पेन ओरा न्यायम कीता, इंचि मुन्नेन निरनायम कीसि मंता,

28 अल्हेन किरिस्तु, वेल्लेटोरा पापालकुन नासडेम कियानाहाटी उंदे मल्का ओना सतता जीवातुन मोक्कु हीतोर. ओर मसुंदि मल्का मल्सि वायना मंतोर. अय्ते ई मल्का ओर पापमतुन नासडेम कियालय आयो, गानि ओनाहाटी बच्चोने ओप्केते बस्के वांतोर इंचेके एदुर हळसेक मनानोर्कुन पिसागोटनाहाटी वायानुर.

10

1 मूसाना नियम अय्ते, मुन्ने बव बेस पोल्ले जर्गानव मंतांगो, अवुना सिराप नीडे आंद, निजम रूपम आयो. अदुनहाटी एटा-एटा पेर्मालोर, आगाकौंटा हिय्यना उंदे तीरकुना मोक्कुलक, पेनदा दग्गेर्क होनानोर्कुन पापमताल पुरागा पवित्र किया पर्रो.

2 ओक्कला अल्हा आसि मत्ते, बक्तुलकुना मनसुलकुने, “मोमोट पापिर्क” इत्ता विचारम वायाकोनवळ आनि ओर सुद्द आसि मत्ताहाटी मोक्कुलक हियमळ आपिसि मन्नेर. 3-4 गानि एटिना नेत्तुर आयि, कौंदाना नेत्तुर आयि, पापालकुन बस्केने लक्कु किया पर्रो. बारित्ते एटा-एटा ओर हिय्यना मोक्कुलक, ओर्क ओरा पापालकुन मति कीसि हीसेकेन मंतां.

किरिस्तु मनाकुन पवित्र किया परंतोर

5 अदुनहाटीगे, किरिस्तु इद दुनियाते वातस्के पेनतोनि इल्हा इत्तोर:

“निमे मोक्कुलक आयि, दानाल्क आयि कोराहिल्लिन,
गानि नाहाटी उंदि मेंदुल तयार कीतिन.

6 कमुरबोलि आयि, पापम मापि आयानाहाटी हीता मोक्कुलक आयि,
नीकुन कूस किय्यो.”

7 अस्के किरिस्तु,

“पेनदुना! दर्मसास्त्रमते नावा बारेमते रासि मत्ता परकारम,
नीवा इच्चातुन पुरागा कियालय नना वातन.”☆

इंचि इत्तोर.

8 पोर्रो वेहताप, “मोक्कुलक, दानाल्क, कमुरबोलि आनि पापम मापि आयानाहाटी हिय्यना मोक्कुलक इवन्निगुडा निमे कोराहिल्लिन इव नीकुन कूस किय्यो,” इंचि पेनतोनि वेहतोर.

9-10 अल्हा वेहचि, “पेनदुना हळा! नीवा इच्चातुन पुरागा कियालय नना वातन,” इंचि इत्तोर. पेनदा इच्चातुन पुरागा कियानाहाटी येसु किरिस्तु ओना सतता मेंदुलतुन उंदे मल्का मोक्कु हीतोर. हीसि रोंडो करारतुन सुस्व कियानाहाटी, मोदाटा करारतुन बंद कीतोर. इल्हा पेन मनाकुन पवित्र कीता.

11 मोदाटा करार परकारम, हरेक पेर्मल सेवाताहाटी ओन्क रोजु गद्दे मुन्ने निल्ले पीता आनि हीता मोक्कुलके ऊके-ऊके हियापीता. गानि अव मोक्कुलक मात्रम बस्केने पापालकुन लक्कु किया पर्रो

12 गानि किरिस्तु अय्ते मना पापालकुन लक्कु कियालय, हमेसाताहाटी उंदे मल्का ओना मेंदुलतुन मोक्कु हीतोर. हीसि पेनदा तिना बाजुंक होंचि उद्दिसेसि मंतोर.

13 इल्हा अस्केटाल, किरिस्तु ओना पगातोरकुन पेन ओना काल्क इर्राना कुत्तुललेसीं बस्के कीता इंचेके एदुर हळसेक मंतोर.☆

14 बारित्ते, पवित्र आयानाहाटी पेन वैरे कीता मनासंतोर्कुन, ओर सिराप उंदे मल्का मोक्कु आसि, हमेसाताहाटी अन्नि तीरकुने पुरागा कीतोर.

15-16 इदुना बारेमते इल्हा रासतद मंता:

“अव रोजकु दाटसि होत्ता पजा,

नना इझाएल लोकुलकुनतोनि कियाना पूना करार इल्हा मंनंता.

अद बतल इत्ते, नना नावा नियमकुन ओरा गुंडेने रासि, अवुन ओरा मनसुलकुने वाटंतन,”

इंचि पेन वेहता. इल्हा पवित्र आत्मागुडा मनाकु दर्मसास्त्रमते गवाइ वेहता.☆

17 अचोने आयाका,

“ओरा पापाल्कुन आनि ओर कीता तप्पु कबाह्कुन मर्रा बस्केने मति किय्योन,”☆

इल्हागुडा पवित्र आत्मा वेहता.

18 पेन मावा अन्नि पापाल्कुन मापि कीता अय्ते, इंका मर्रा अवुनाहाटीं मोक्कुल्क हिय्यना अब्सरमे हिल्ले.

दैरनेमते पेनदा दग्गेर्क दाकोम

19 अय्ते विस्वासुल्कुनिटा, येसु मनाहाटीं ओना नेत्तुरतुन पोंगागोटोर. अदुनहाटीं मनाकु इंदके आ पूनद, जीवाते मनना हर्री पीसि पवित्र जेगाते होनना दैरनेम वाता.

20 येसु ओना मेंदुलताहेंदाल परदातुन पक्काक कीताहाटीं, मनम पेनदागा विस्वासमते होना परंतोम.

21 अचोने आयका, येसे मना पेद्दा पेर्मल आंदुर, ओर पेनदा लोकुल्कुनपोर्री अदिकारि आंदुर.

22 अदुनहाटीं मनम सत्तेम मनसुने, पुरागा विस्वासमते, इंका मना विवेकमतुन दोसेम हिलाकोटा कियानाहाटीं मना मनसुनपोर्री किरिस्तुना नेत्तुर सल्सि, इंका मेंदुलतुन बेस साप एते नोर्सि पेनदा दग्गेर्क दाकोम.☆

23 मनाकु बद पेन अय्ते पोल्ले हीतानो अद विस्वासमगल्लद आंद. अदुनहाटीं मनम वेंरेतोर मुन्ने ओप्कुत्ता आसेताल पजोळ्क आयाकोटा, गट्टिट्टे दैरनेमते मंदकोम.

24 मनम वरोंक वरोर पावरम कियालय, बेसता कबाह्क कियालय आनि बतल-बल्हा कीते बेस इंचि वरोंक-वरोर दैरनेम हियालय विचारम कीकोम.

25 आरादनाहाटीं उंदगा जमा आयाना जेगाते वायाकोटा मनमळ इच्चुर्कु अलवट आसि मंता. गानि मनम ओरलेहका मनमन्नि. मुक्केमाता पोल्ले बतल इत्ते, येसु सामि मरुंदि मल्का वायाना रोजु दग्गेर्क वासंता, अदुनहाटीं मनम अंतोरम उंदासि, वरोंक-वरोर दैरनेम हीसेक मुन्ने अरकोम इंचि इंकिच्चो जिद्दिदते वेहासेक मंदना.

26 इव पोल्लें नना बारि रासेक इत्ते, सत्तेम इत्ते बतल मनाकु तेळियता. इल्हा सत्तेम तेळियसिगुडा तेळियवाप पापम कीसेके होत्ते, इव पापाल्कुनाहाटीं मात्रम इंका बदूदे मोक्कु हिल्ले.

27 गानि दाना बदुलते, बोर अय्ते पेनदा विरोदमते ताकतुरो ओराहाटीं पेन सिक्साता आदेस हीसि, ओर्कुन बरा-बरा पोत्तना तळमिते वाट्टिसि बूळ्दि किय्यार इत्ता, वेरियानसोंटा पोल्लें मात्रम मिगिल्लिसि मंतां.☆

28 मूसाना नियमतुन विरोद कियाना मनकाना बारेमते, इव्वुर हिलाकोटे मुव्वुर गवाइदाकुना पोल्लें केंजसि ओनापोर्री दया कियाकोटेन ओन्क हामुर सिक्सा हीतुर.☆

29 अय्ते, इंदके पेनदा मर्रिन पास्काना मनकंक, बद नेत्तुरहेंदाल अय्ते पवित्र कियमळ जर्गता आ पूना करारता नेत्तुरतुन, पवित्र आयो इंचि इनना मनकंक, कुर्पा हुप्साना पेनदा आत्मातुन पास्कानोंक, बच्चोन पेद्दा सिक्सा दोकारो, मिमेटे विचारम कीसि हुळट.

30 बारित्ते पेन इत्ता गदा,

“बदूला येताना कबळ नावद आंद, ननाने बदूला येतंतन,” आनि मर्रा,

“सामि ओना लोकुल्कुना न्यायम कीतोर,”☆

इंचि इत्ता. इद पोल्ले मनाकु एरपाटे मंता.

31 जीवाते मंदना पेनदा कय्दे दोर्कना सिक्सा इत्ते, इरगेन वेरियानाल मनंता.

32 मिमेट बेसता कबुर केंजसि पेनदा वेलगुन दोर्किच्चुत्ता आ एनकटा रोजकुन मति कीम्टु, अव रोजकुने बच्चुंगो तकलिपकु वातां, अयना मिमेट ओर्सकुत्तित.

33 बस्के-बस्के अय्ते अंतोरा मुन्ने मीकुन रोता-रोता पोल्लें इंचि बदनाम कियमळ जर्गता. इंका बस्के-बस्केनो अय्ते, इसोंटा तिप्पल्क बोगांचनोरा तोळने मिमेट निल्लिर.

34 अचोने आयका बेसता कबुर वेहताहाटीं जेलने अर्सि दुक्कमते मत्तोरु दुक्कमते मिमेट कलियतिर. मीवा संपत्तितुन दोसकुंचि ओयिना गानि मिमेट कुसिते मत्तित. बारित्ते दोसकुंचि ओतादानकन्ना बेसतद, बस्केळ्क मनानद संपत्ति पेन मीहाटीं इरता इंचि मिमेट तेल्लिचकुत्तिर.

35 पेनदापोर्रीटा मीवा विस्वासमतुन पीसि, मीकु वेल्लेन पेद्दा इनाम मंता. अदुनहाटीं बतल आयिनागानि मिमेट विस्वासमताल पजोळ्क होनमत.

36 मिमेट दैरनेमते सहन कियमळ अब्सरमे मंता, अल्हा मत्तेन मिमेट पेनदा इच्चातुन पुरागा किया परकिट आनि पेन मीकु बतल अय्ते हीतन इंचि पोल्ले हीतानो अद मीकु दोकार.

37-38 बारित्ते,

“बोर सामि वायानोर मंतोर, ओर बिरानेन वांतोर, ओर आल्सेम किय्योर.

ओर वायनादाका, नावापोर्री विस्वासम कीता नीतिमंतुल्क विस्वासमतेन पिस्संतुर.

गानि ओराव्टेताल बोरन्ना ना पोर्रीटा विस्वासमताल पजोळ्क आते, ओन नना मेच्चुकुन्नेन,”☆

इंचि दर्मसास्त्रमते पेनदा पोल्ले रासतद मंता.

39 गानि मनम अय्ते, विस्वासमताल पजोळक आसि, नासडेम आयानोर लेसीटोरम आयोम. विस्वासम कीताहाटीं मनम पेनदाहेंदाल पिसांतोम.

11

विस्वासमते पिसतोरु बांरेमते कोन्नि पोल्लें

1 विस्वासम इत्ते बतल? मनम आसे पळसि मत्तव पोल्लें मनाकु तप्पाकोंटा दोर्कानूं आनि मना कळ्ळुकुं दिस्साकोन्नागानि अव मंतां इत्ता गेरांटेप, विस्वासम आंद.

2 मना एनकटा पेद् दाल्कुनगा इसोटा विस्वासम मत्ता, अदुनहाटींगे पेन ओर्कुन मेचकुत्ता.

3 विस्वासमहेंदाले, पेन इद दुनियातुन दाना पोल्लेतोने पुटिस्ता इत्ता पोल्ले, मनम तेल्लिचकुना परंतोम. दीना अर्तम बतल इत्ते, मनाकु इंदके दिस्सानव अन्नि पोल्लें, दिसुवा पोल्लेनाहेंदाल पेन कीता, * इंचि मनाकु तेळियता.

4 विस्वासमहेंदाले आदामना मरिं आबेल, ओना दादाल काइनुंकन्ना बच्चोनी बेसता मोक्कु पेनदुक हीतोर. काइन बतल अय्ते हीतोर अदुन पेन मेचकुना हिल्ले गानि, आबेलना मोक्कुन पेन मेचकुंचि ओन नीतिमंतुड इंचि गवाइ हीता. आबेल अय्ते हातोर, गानि ओना विस्वासमहेंदाल मनम इदवेरदाकागुडा करियसेक मंतोम. *

5 विस्वासमहेंदाले हानोकुंक हामुर वायाका मुन्नेन, उंदि रोज ओर गायप आतोर. बारित्ते पेन ओन तेहाकुंचि ओता. अदुनहाटीं ओना जाळा बोनके दोर्काहिल्ले. पेन ओन स्वर्गमते ओयाका मुन्ने ओर पेनदुन कूस कीतोर इंचि ओना बांरेमते दर्मसास्त्रमते रासतद मंता. *

6 विस्वासम हिल्लवद पेनदुन बोरे कूस किया पर्स्. पेनदागा वायाना हरेक मनकल, पेन निजमते मंता आनि दान हट्टु पीसि पहकानोंक अद बेसता इनाम हीता इंचि विस्वासम किया पीता.

7 विस्वासमहेंदाले नोहाल, कम्मुड वायाना मंता इंचि पेन ओन्क वें वेहतस्के ओर कम्मुडतुन बस्केने हळा हिल्लोर गानि, पेनदा पोल्लेक कदर हीसि, कम्मुड वायाका मुन्नेन ओना कुटुंबतोर्कुन कापाळनाहाटीं पेद्दा डोंगा तयार कीतोर. इल्हा ओर दुनियातोर अंतोर तप्तर इंचि ओना विस्वासमहेंदाल पेन दुनियातोर्कुन दोसिल्लक इंचि वेहता. ओना इदे विस्वासमहेंदाल ओर, पेनदा मुन्ने नीतिमंतुल्लक आतोर लोप्पो कलियतोर. *

8 विस्वासमहेंदाले पेन अब्राहामुन, “नना नीकु हुप्साना देसेमते होन, अगाटा पूरा जेगा नीकु हीकन” इंचि इत्तस्के, बेके होनना इंचि तेळियाकोन्ना गानि तेळियवा जेगाहेके होनालय पेय्सतोर.

9 विस्वासमहेंदाले अब्राहाम, पेन ओन्क हीतन इंचि पोल्ले हीता देसेमते होंचि, पराइ देसेमतोनलेसीं डेरा वाट्टिस पिस्सेक मत्तोर. ओनतोनि ओना मरिं इसाक आनि इसाकुना मरिं याकोब, ईरगुडा अद देसेमता वारसदार्के. ओरगुडा अगा डेरां वाट्टिस पराइ देसेमतोरलेसीं पिस्सेक मत्तोर.

10 बारित्ते, कुट्टुदु पेने सारे पीसि, पुनादि दोह्चि, बस्केळताहाटीं निल्हाता सहरते मनालय ओर विस्वासमते एदुर हळसेक मत्तोर.

11 विस्वासमहेंदाले अब्राहामुंक ओना मुत्तो सारानतोनि कलियसि, मातिरतनमतेगुडा मरिंन कनाना बलम दोर्कता. बारित्ते, ओन्क संतानम हीतन इंचि बद पेन अय्ते पोल्ले हीतानो, अद पोल्ले तप्पो इंचि ओर दानपोरों विस्वासम इरतोर. * *

12 अदुनहाटीं डुग-डुग मातरल आसि हासोत्तोनलेहका मत्ता वरोंरे अब्राहामुंक पेन, मब्बुने मनना सुक्कनचचोन आनि समुद्रम ओड्डुंक मनना उस्केतचचोन, लेक्का पस्वचचो संतानमतुन हीता. *

13 पेनदापोरों विस्वासम इरतोर अंतोरगुडा दानपोरों विस्वासम इरसे हासोत्तुर. पेन हीतन इंचि पोल्ले हीतद ओर्कु दोर्काहिल्ले. गानि पेन हीतन इत्तादुन लक्कुटाले हळताप हळसि कूस आतुर. पजा मनम इद भूमिपोरों पय्नेम कीसेके वाता पराइतोरम इंचि ओप्फुत्तुर.

14 इसोटा पोल्लें बोरे अय्ते वळ्ळंतुरो, ओर ओरा सतता देसेमतुन पहकसंतुर इंचि मनाकु अर्तम आंता.

15 ओक्कला, ओर होळसि वाता देसेमता बांरेमते विचारम कीसि मत्ते, ओर्क ओरा होळसि वाता देसेम मल्लिस होनना मोका दोर्किसि मनवळ. गानि ओर होळसि वाता देसेमता विचारमते मना हिल्लुर. †

16 दाना बदुलते ओर, होळसि वाता देसेमकन्ना एक्को बेसता देसेम, इत्ते ओराहाटीं पेन स्वर्गमते तयार कीसि इरता देसेमते होनना विचारमते मत्तुर. अदुनहाटीं पेन, ‘नना ओरा पेनदुन’ इंचि इनालय सिग्गु अरों.

17 विस्वासमहेंदाले, पेन अब्राहामुना पट्टु हळतस्के, ओर ओना वरोंरे मरिं इसाकुन मोक्कु हियालय तयार आतोर. पेन हीतन इंचि मत्ता पोल्लेतुन ओर विस्वासम कीसि मत्तोर.

18 अयना, “इसाकुनाहेंदाल नीकु दोर्काना वंसंम नावा लोकुल्लक आयानुर,” इंचि पेन अब्राहामुंक मुन्नेन पोल्ले हीसि मत्ता. आयनागानि इं इसाकुने अब्राहाम, पेनदुक मोक्कु हियालय तयार आसि मत्तोर.

19 बारित्ते, पेन हासोत्तोर्कुंकगुडा जीवा अरहा परंता, इंचि ओर विस्वासम कीतोर. हातोन जीवाते तेहाचि हीतापे, पेन अब्राहामुंक ओना मरिंन हीतागुडा. *

* 11:3 उत्पत्ति 1:1; योहान 1:3; बजन संहिता 33:6; 33:9 * 11:4 उत्पत्ति 4:3-5; 4:10 * 11:5 उत्पत्ति 5:22-24 * 11:7 उत्पत्ति 6:13-22;

7:1 * 11:11 विस्वासमहेंदाले अब्राहामुना मुत्तो साराल, मातिरतनमतेगुडा नेला तप्पि मरिंन कंता. बारित्ते, दान्क संतानम हीतन इंचि बद पेन अय्ते पोल्ले हीतानो, अद पोल्ले तप्पो इंचि अद विस्वासम कीता. इल्हा कोन्नि पडाना पांडु लिपिने रासि मंता. * 11:11 उत्पत्ति 17:19; उत्पत्ति 21:1-2 * 11:12 उत्पत्ति 15:5; उत्पत्ति 22:17; उत्पत्ति 32:12 † 11:15 अब्राहाम बेबिलोन देसेमता ऊर इना नाटे पट्टोर. (उत्पत्ति 11:28) गानि कनान देसेमते वाता पज्जो, ओर ओना पट्टा देसेम बस्केने तिरियसि होना हिल्लोर. इसाक, याकोब अद देसेमताल पोरिह्कुन तत्तुर गानि अद देसेम होंचि अगा जेगा पिथ्या हिल्लुर. * 11:19 उत्पत्ति 22:1-18

- 20 विस्वासमहेंदाले इसाक, ओना याकोब, एसाव इनना इव्वुर मर्कुंक, वायाना कालमते ओर्कु बल्हा जर्गार इंचि आसिर्वाद हीतोर.✱
- 21 विस्वासमहेंदाले याकोब, जीवा होळसका मुन्ने, योसेपुना इव्वुर मर्कुन वरो-वरोन केय्से, आसिर्वाद हीतोर आनि दुड्डुना पोर्गे ऊनसि पेनदुन आरादना कीतोर.✱
- 22 विस्वासमहेंदाले योसेप, इस्राएल लोकुलक इजिप्त देसेमताल पेय्से होनानुर इंचि जीवा होळसका मुन्नेन वेहा परतोर. अचोने आयाका, अद देसेमताल पेय्से होननेके ओना बोक्कनगुडा पीसि पेय्सना इंचि आदेस हीतोर.‡
- 23 विस्वासमहेंदाले, मूसाल पुट्टस्के ओना तल्लुर-बाबो ओन मूड नेलक मक्किच्चि इरतुर. “मावा पेडल सक्कगा मंतोर” इंचि तल्लुर-बाबो तेल्लिचकुलतुर. अदुनहाटीं “इब्रितोर्क पुटता अंतोर मांडूसा पिलालकुन हक्कट” इंचि राजाल हीता अदेसुंक ओर वेरियाकौटा मत्तुर.✱
- 24 विस्वासमहेंदाले मूसाल पेददा बेर्सतस्के, पिरोन राजाना मिय्यटा मर्रिन इंचि वेहकुनालय ओप्फुना हिल्लोर.
- 25 दान्क बदुलते, पापमहेंदाल दोर्कना जेरसिपाटा सुकमते पिस्सनदानकन्ना, पेनदा लोकुलकुनतोनि कलियसि तिप्पल्क बोगांचमळे बेस इन्कुतोर.
- 26 पेनदाहेंदाल दोर्कना इनामुनाहाटीं ओर उंदितोर एदुर हळसेक मत्तोर. अदुनहाटीं ओर इजिप्त देसेमता दनम-संपत्तिकन्ना, किरिस्तुनाहाटीं अपमानम सहन कियमळतुने पेददा दनम इन्कुतोर.
- 27 विस्वासमहेंदाले, इजिप्त देसेमता राजाल होंगुंक वायिनागानि, वेरियाकौटा मूसाल इजिप्त देसेम होळसीतोर. बोर्के दिसुवा पेन ओन्क दिसताप, ओर गट्टे दैरनेमते मत्तोर.
- 28 इजिप्त लोकुलकुना तोल्सूर मर्कुन हक्कालय पेन लोहता दूता, इस्राएलतोरा मर्कुन इट्टानायो इंचि, विस्वासम कीताहाटींगे मूसाल, गोर्रता नेत्तुरतुन लोता दारसाकक होकालय वेहचि, दाटसि होनना पंडुगुन सुस्व कीतोर.
- 29 विस्वासमहेंदाले, इस्राएल लोकुलक, वत्तुता बूमिपोर्गे ताकताप, एर्ग समुद्रमते ताकसेके होनना दैरनेम कीतुर. ओरालेहकेन इजिप्त लोकुलक कियालय हळतुर अय्ते, अव्टेन मुळ्गिसि हातुर.✱
- 30 विस्वासमहेंदाले, इस्राएल लोकुलक यरिहो सहरता गूरे सुट्टु एडुं रोजकु तिरियतुर, अस्के आ गूरे कूलसि अरता.✱
- 31 विस्वासमहेंदाले, यरिहो सहरता रहाब इनना वेस्या, तेळियाकौटा जाळा कियालय वाता इस्राएलतोर्कुन दाना लोते केय्से सांतिते सहायम कीता, अदुनहाटीं पेनदा पोल्ले केंजवा लोकुलकुनतोनि दाना नासडेम पेन किया हिल्ले.✱
- 32 इंका नना बोरा-बोरा बारेमते वेहासेक मंदकन? गिदोन, बाराक, समसोन, इपताल, दाविद राजाल, सामवेलनसौटा पेनदा कबुरतोर. ईरा बारेमते वेहालय नाकु पुरसत हिल्ले.
- 33 विस्वासमहेंदाले इरव्टेताल इच्चुर लोकुलक राज्येल्क गेल्सतुर, इच्चुर लोकुलक सत्तेम कबाहक कीतुर, इच्चुर लोकुलक, पेन हीतन इंचि पोल्ले हीतदुन दोर्किचकुलतुर, इच्चुर लोकुलक सिंहाना कतराताल पलाते अरतुर.
- 34 इंचिच्चुर लोकुलक पोत्तना तडामितुन पिरहातुर, इच्चुर लोकुलक तलवारकुना अय्दरताल तपिचकुना परतुर, इंचिच्चुर बारे बलम हिल्वस्केगुडा बलमगल्लोर्क आतुर, लडाइने वीरुल्क आतुर आनि पराइ देसेमता सिपाइलकुन गेदुमसीतुर.
- 35 विस्वासमहेंदाले कोन्नि मुरताहक्क, अवुना हासोत्ता जीवातोर्क, मर्रा जीवा अर्सिं वापस दोर्कतुर.
- गानि इंचिच्चुर मात्रम पेनदापोर्गे विस्वासम इरताहाटीं देब्बां तिचि-तिचि हासोत्तुर. हासि मर्रा जीवाते तेदतस्के, पेन माकु बेसता पिस्वर हिय्यार इत्ता आसेते, इगेटा पिस्वरतुन दक्किचकुनालय पेनदुन होळसा हिल्लुर.
- 36 इंचिच्चुर्कुन बारे कारेड्डाल्क कीसेके पोट्टेने तंतुर, इंका गोलसुकुने दोह्चि जेलने वाटतुर.
- 37 सगोमतोर्कुन अय्ते बंडाने तंतुर, आरेने कोय्से तुकडां कीतुर, ओरा पट्टु हळतुर,‡ तलवारकुने कोह्किसि हक्कतुर. गरिब-कंगाल आसि दुक्कमते, एटिं-गोर्रना तोल्कु मुचकुंचि बेके-बेकेनो तिरियसेके मत्तुर. लोकुलक ओर्कुन बागेने तकलिप कीतुर.
- 38 दुनियाता लोकुलक, पेनदापोर्गे विस्वासम इरतोरालायक मना हिल्लुर. अदुनहाटीं ओर उस्के बूमिने, गुट्टानपोर्गे, पडाने, बंडा सौर्रिने मंचेके तिरियुंदुर.
- 39 ईरा अंतोरा विस्वासमतुन हळसि पेन अय्ते ओर्कुन मेचुकुत्ता. गानि पेन ओर्कु बद आसिर्वाद अय्ते हीतन इंचि पोल्ले हीसि मत्तानो, अद आसिर्वाद मात्रम ओर्कु दोर्काहिल्ले.
- 40 बारित्ते अन्निटकन्ना बेसतद उंदि पोल्ले पेन मनाहाटीं मुन्नेटाले तयार कीसि इरता. अद पोल्लेतुन मनाकु, ओर्कु उंदे मल्का दोर्काना इंचि पेन अल्हा कीता.

12

पेन मना बाबाल आंदुर

✱ 11:20 उत्पत्ति 27:27-40 ✱ 11:21 उत्पत्ति 48:8-20 ‡ 11:22 नीवा वंसमतोर नालुं नुहकुना वर्सनदाका पगातोरा कय्दा हिळ्ळ मंदानुर इंचि पेन अब्राहामुंक वेहचि मत्ता. गानि ओर्कुन तिप्पल्क कियानोर्क सिक्सा हीसि नावा लोकुलकुन अगटाल पेचाह्चि तरकन इंचि पेन वेहचि मत्ता (उत्पत्ति 15:13-14). पेनदा इदे पोल्लेतुन योसेप विस्वासम कीसि इल्हा इत्तोर (उत्पत्ति 50:24-25). ✱ 11:23 निर्गमन 1:22; 2:1-2 ✱ 11:29 निर्गमन 14:21-31 ✱ 11:30 यहोसू 6:12-23 ✱ 11:31 यहोसू 2:8-14 § 11:37 इद वचनम कोन्नि पांडु लिपिने हिल्ले.

1 इचोन मंदिता गवाइं, मब्बुनलेसीं मना सुट्ट आताप मंतां. अदुनहाटीं मनाकुन आपाना हरेक बर्वुन आनि अल्कगा पट्टुने अरहना पापमतुन होळसिसि, पेन मनाकु हुपिस्ता हरदे ओप्केते वितकोम.

2 वितनेके मना नदर येसुनपोर्रीन इरकोम. मनालोप्पो विस्वासमतुन पुट्टिचानोर आनि दान पुरागा कियानोर ओरे आंदुर. मुन्ने दोर्काना आनंदमहाटीं येसु कूसुनपोर्री जीवा हियालयगुडा तयार आतोर. अगा ओन्क जर्गता अपमानमतुनगुडा लेक्का किया हिल्लोर. इंदके ओर पेनदा राजगदूदेता तिना बाजूंक उद्दिदिसि मंतोर.✧

3 पापि लोकुल्क ओना पोर्रीटा पगाते ओन बच्चोनो तिप्पल्क-बादां कीतुर. गानि मिमेट दैरनेम होळसि विस्वासमताल पजोळ्क आयामन्नि इंचि ओर अवान्नि ओर्सकुत्तोर. मिमेट ओना बारेमते विचारम कीम्पु.

4 मिमेट पापमतोनि लळांच्नेके, उंदि पोल्ले मति इराना. अद बतल इत्ते, येसु बल्हा ओना जीवातुन हीतोर, अल्हा मीकु मीवा नेत्तुर पोंगागोट्टाना अक्सरम अर्राहिल्ले.

5-6 मीकुन अंटोर्कुन मर्क-मियाहक इन्कुचि, मीकु दैरनेम हियानाहाटीं पेन मीकु वेहता आ पोल्लेतुन पुरागेन मति मसंग्तिरा?

“नावा मर्रीना, पेन हीता टेरनिगतुन, मामुल पोल्ले इनकुन्ना.

पेन नीकुन सुद्रांचनस्के, निमे दैरनेम होळसमा, बारित्ते, पेन बोन अय्ते पावरम कीतानो ओन्क टेरनिंगगुडा हीता.

अचोने आयका, अद बोन अय्ते मर्री इंचि इंतानो, ओन्क सिक्सागुडा हीता,”

इंचि रासतद मंता.✧

7 पेन मीकुन दाना मर्क-मियाहकुनलेसीं हळंता. अदुनहाटीं मीकु बस्के अय्ते तिप्पल्क वांतां, अस्के पेन मीकुन सुद्रांचनाहाटीं टेरनिंग हीसंता इंचि अदुन ओर्सकुट्ट. बारित्ते मर्री सुद्रांचनाहाटीं ओन्क टेरनिंग हियवोर बोरन्ना बाबो मनंतोरा?

8 पेन दाना अंटोर मर्क-मियाहकुन सुद्रांचनाहाटीं टेरनिंग हीता. आ टेरनिंगगिंटा मीकु दोर्काकोंटे, मिमेट दाना निजम मर्क आथिर.

9 मनाकुन पुट्टिस्ता मना बाबुर्क अय्ते मनम सुद्रांचनाहाटीं टेरनिंग हीतुर. अदुनहाटीं मनम ओरा कदरगुडा इरतोम. अय्ते मनम बस्केळ्क पिस्सि मननाहाटीं, मना आत्मांकु बाबो आता पेनदुक मनम बच्चोन वेल्ले लोंगिस मत्ते बेस? विचारम कीम्पु.

10 मनाकुन पुट्टिस्ता बाबुर्क, कोन्नि वर्सानाहाटीं ओर्क तेळियताप, मनम सुद्रांचना इंचि टेरनिंग हीतुर. गानि पेन मना बेसताहाटीं, मनाकुन दानालेहका पवित्र कियालय टेरनिंग हीता.

11 इंदके इव टेरनिंगकु येतनेके मनाकु कुसि अनपिच्चो, दुक्कम वांता. गानि बोर अय्ते ओर्सकुंचेके टेरनिंग बेस मनसु तासि करियंतुरो, ओर्कु सत्तेम, सांतिते निडता पिस्वर दोर्कता.

12 अदुनहाटीं, अरसोत्ता मीवा कय्कुन आनि ताकत हिल्लुवा मीवा टोंगरन मजबुत कीम्पु.✧

13 मिमेट मीवा विस्वासमता हरदे सवरगा ताकाट्ट.✧ अस्के बोर अय्ते विस्वासमते कुंटि आसि मंतोरो, ओर विस्वासमते इंकिचो कुंटि आयाकोंटा गट्टि पळानुर.

विस्वासमते पिसानोर्क कोन्नि जेगर्ता

14 अंटोर मनकालोरतोनि सांतिते कलियसि पवित्र मनना कोसिस कीम्पु, अल्हा मनाकोंटे बोरे मनकल सामिनगा होना पर्रीर.

15 पेनदा कुर्पाताल वरोरगुडा तप्पोनामन्नि इंचि जेगर्ता मंटु. अल्हा तप्पोचि हेळतोर बोरन्ना मी नड्डुम मनानय्ते, ओर कळमातोर्कुन हेळाहचि, पेनदाल लक्कु कीतोर. इदुन जरा जेगर्ता हुळट.✧

16 मीवा नड्डुम बोरे व्यबिचारम कियानोर हिलाकोंटे, एसाबुनलेसीं नीति हिल्लुवा मनकल मनानमन्नि. उंदि पृताता गाटोहाटीं ओर ओना जेस्टम पालुंक विल्लुवा हिय्याकोंटा तम्मुंक अम्मुकुत्तोर.✧

17 पजा एसाबुना गति बतल आता मीक अय्ते तेळियसे मंता. वारसान हक्कुनाहाटीं बाबोनगा आसिर्वाद येतालय होत्तस्के, बाबो ओन्क आसिर्वाद हिय्या हिल्लोर. ओर अळसि-अळसि वेल्ले कोसिस कीतोर गानि ओन्क मनसु मार्सकुनालय मोका दोर्काहिल्ले.✧

18-19 इस्त्राएल लोकुल्क अय्ते कय्दे इट्टा पर्रीनाल मत्ता गुट्टातगा होत्तुर. अद गुट्टा तळमिते पोतसेके मत्ता, हिर्-हीकाटा, वळि-दुमारम, अद गुट्टातगा मत्ता. गानि मिमेट अय्ते असोटा गुट्टातगा होना हिल्लिर. अद गुट्टातगा इस्त्राएल लोकुल्क, तूताकोमता आवाज आनि पेनदा वळ्कना पेद्दा लेंगुन केंजतुर. केंजसि, “मर्री बस्केने इसोटा लेंग माकु केंजा वायामन्नि” इंचि पेनदुक विनंति कीतुर.✧

20 बारित्ते, “इद गुट्टातुन, उंदि जिवरासि इट्टिना, दान बंडाने तंचि हळ्काना,” इंचि पेन आदेस हीसि मत्ता, अद आदेसतुन ओर सहन किया पर्रीहिल्लुर.✧

21 अगा जर्गता गटना इच्चोन वेरियानाल मत्ता गदा, अदुना बारेमते मूसालगुडा, “नना इरगा वेरियसि गजा-गजा आसंतन,” इंचि इत्तोर.

✧ 12:2 बजन संहिता 110:1 ✧ 12:5-6 अय्युब 5:17; नीतिवचन 3:11-12 ✧ 12:12 यसायाह 35:3 ✧ 12:13 नीतिवचन 4:26 ✧ 12:15 व्यवस्ताविवरन 29:18 ✧ 12:16 उत्पत्ति 25:27-34 ✧ 12:17 उत्पत्ति 27:36-38 ✧ 12:18-19 निर्गमन 20:18-21; व्यवस्ताविवरन 5:23-25 ✧ 12:20 निर्गमन 19:12-13

22 गानि मिमेट अय्ते सियोन गुट्टातगा वातिट. जीवाते मनना पेनदा, स्वर्गमते मनना येस्सलेम सहर इदे आंद. कुसिते उंदगा जमा आता, लेक्का हिल्वचचोन पेनदा दूतानगा मिमेट वातिट.

23 नीतिमंतुड लोकुकुकुना आत्माना कलिसियातगा मिमेट वातिट. आ कलिसियातगा अंटोरा पोरोली रासि मंतां, अंटोर्क जेस्टम पालना अदिकारम मंता. अंटोर्कुन पेन दानतोन मनालय पुरागा कीता. दुनियाते मनना अन्निटवुना न्यायम कियाना पेनदागा मिमेट वातिट.

24 इंका पूना करारता नड्डुमतोर आता येसुनगा मिमेट वातिट. आदामना मरि आबेलना नेत्तुर इत्ते, ओना दादाना बद्दूला येतालय पेनदुन केयताप मत्ता. ✱ गानि येसुना नेत्तुर अय्ते मीवापोर्री सल्लिस मीवा पापालुकुन मापि कीम इंचि पेनदुन केयताप मंता.

25 इद दुनियाते, लोकुकुकु जेगर्ता मनालय पेन वेहतस्के, ओर पेनदा पोल्ले केंजा हिल्लुर. अदुनहाटी ओर पेन हीता सिक्साताल तपिचुकुना पराहिल्लुर. अय्ते इंदके मनम स्वर्गमताल वेहनोना पोल्लेतुन केंजाकोटे, पेन हिश्यना सिक्साताल बल्हा तपिचुकुना परातोम? अदुनहाटी जरा जेगर्ता मंतु, बोर अय्ते वळकसंतोरो ओना पोल्लेन पास्काकोटा, बेस केंजट.

26 अद कालमते पेन वळकतस्के, दाना आवाजते, बूमिअंता गजा-गजा ऊंगता. ✱ गानि इंदके, “नना सिराप बूमितुने आयो गानि, मब्बुनगुडा मसंदि मल्का गजा-गजा ऊपांतन,” इंचि पेन पोल्ले हीता. ✱

27 “मसंदि मल्का” इनना पोल्लेता अर्तम बतल इत्ते, इद दुनियाते गजा-गजा आयानव बव अय्ते मंतांगो, अव अन्नि तयार कीतव आंदुं, अदुनहाटी अव नासडेम आसि दांतां, गानि बव अय्ते गजा-गजा आयाकोटा मनंतांगो, अव बस्केळक अल्हेन मनंतां.

28 बोर कदलिच्चा पस्वसोटा राज्येम मनाकु दोर्कसेक मंता. अदुनहाटी मनम पेनदुक दन्यवाद वेहकोम. अचोने आयाका, दाना वेरि मनसुने इरिं दाना सेवा कीसेके, दान्क नच्चना आरादना कीसेके मंदकोम.

29 बारित्ते, मना पेन, बूळ्दि कीसि पोहना तळमिलेसीटद आंदु. ✱

13

पेनदुन कूस कियमळ

1 मिमेट अंटोर उंदि लोतोरलेसी वरौक-वरोर पावरम कीसेके मंतु.

2 वाता हेळमितोर बोरे आयिर, ओर्कुन बेस हळकुंतु. इल्हा इच्चुर लोकुकुकु, एरपाट कियाकोन्नागानि पेनदा दूतन बेस हळकुंतु.

3 पेनदुन विस्वासम कीताहाटी बोर अय्ते जेलने मंतुरो, ओरा मति कीतस्के, मिमेट कुद्दु ओरतोनि जेलने मत्ताप विचारम कीमटु. अल्हेने, बोर अय्ते पेनदुन विस्वासम कीताहाटी तिप्पल्क बोगांचेके मंतुरो, ओर्कुन मति कीतस्के मिमेट कुद्दु ओरतोनि तिप्पल्क बोगांचेके मत्ताप मति कीमटु.

4 मरमिन आनि मुत्तो-मुय्दोना संबंदमतुन कदर कियाना, ओर वरोनपोर्री विस्वासम कीसि बदनाम आयाकोटा मंदना. व्यबिचारम कियानोर्कुन आनि बोगमतनम कियानोर्कुन पेन न्यायम कीता, इदुन मतिते इर्राट. अदुनहाटी मुत्तो-मुय्दो वरोनपोर्री वरोर विस्वासम कीसि बदनाम आयाकोटा मंदना.

5 दनमताहाटी मिमेट आसे पडानायो. मिहगा बतल अय्ते मंता अव्टेन कूस मंतु. बारित्ते पेने कुद्दु इल्हा इत्ता:

“नना नीकुन बस्केने होळसोन, नना नीकुन बस्केने दिक्कु हिल्वोन किय्योन,” ✱
इंचि वेहता.

6 “अदुनहाटी, मनम, पेन नाकु सहायम कियानद आंद,
नना असले वेरियोन, मनकल नाकुन बतल किया परांतोर?” ✱

इंचि देरनेमते इना परातोम.

7 मीकु मोट्टा मोदाला पेनदा पोल्ले वेहता मीवा पेद्दालुकुन मति कीमटु. ओर बल्हा आकिरदाका पेनदापोर्री विस्वासम इरसि पिस्तुरो मति कीसि, अल्हेन मिमेटगुडा ताकट.

8 येसु किरिस्तु मुन्ने मत्तापे, इंदके आनि बस्केळदाकागुडा मारियाकोटा उंदेतीर मंतोर.

9 अदुनहाटी, वैरतोर वासि कराहना रका-रकालुकुना बोदां केंजसि मिमेट गयबेत आयमट. बोनके बतल पायदा वायवा, तिदाना नियमकुन पीसि तनलाळसेक मत्ते मना मनसंकु ताकत दोर्को, गानि पेनदा कुर्पातेन मनसंकु ताकत वांता.

10 मनागा उंदि इसोटा गद्दे मंता गदा, आ गद्देपोर्रीटा गाटो डेराने सेवा कियाना यहुदि याजकुलुकुन तिनना अदिकारम हिल्ले.

11 बारित्ते, पापालुकु मापि आयानाहाटी मोळकालय, पेद्दुदा पेर्मल जिवरासिना नेत्तुरतुन अय्ते अन्निटकन्ना पवित्र जेगाते ओतोर, गानि जिवरासिना मेंदुल्लुन मात्रम डेराता पलाते बोळसंतुर. ✱

12 अय्ते येसुगुडा, ओना नेत्तुरते लोकुकुकुन पवित्र कियानाहाटी येस्सलेम सहरता पलाते तिप्पल्क बोगांचि जीवा होळसतोर.

13 अदुनहाटी वटु! मनमगुडा येसुना पोरीटा अपमानमतुन मनापोर्री येतकुंचि, येसुनालेसी तिप्पल्क बोगांचालय डेराता पलाते दाकोम.

14 इद दुनियाते हमेसा मनालय मनाहाटीं बदे सहर हिल्ले. गानि वायाना कालमते मनाहाटीं तयार आयाना सहरते मनालय, आसेते मंतोम.

15 अदुनहाटीं, येसु मनाहाटीं कीतदुन मति कीसि, बस्केळक मना तोळदाल पेनदा पोरोल येतसि, पारतना-दन्यवादाळकुना मोक्कुळक हीसेक मंदकोम.

16 वेंरेतोरहाटीं बेस कियमळतुन आनि मिहगा मत्तवेटाल ओर्कु तूस हियमळतुन होळसमट. इल्हा कियमळगुडा उंदि मोक्के आंद. दीनहेंदाल पेन कूस मनंता.

17 मीवा पेद्दाल्क वेहताप मिमेट ताकट. ओर्कु लोंगिस मंटु. मीवा जीवाता कावेल कियमळे ओरा जिम्मेदारि आंद. ओर्कु मीवा बारेमते, पेनदागा लेक्का हिच्या पींता. ओर वेहताप मिमेट ताकते, ओरा कबळ ओर कुसिते कींतुर, हिलाकोंटे ओर दुक्कमते कबळ कींतुर. ओर दुक्कमते कबळ कियानयते मीकु बतल पायदा वायो.

18 माहाटीं पारतना कीसेके मंटु. अन्नि तीरकुने मोमोट निजम बतल अदे कीसेके, बेस कदरते पिस्सेक मंतोम. इंका मावा बुद्दिगुडा सत्तेम मंता इल्ता बरोसा माकु मंता.

19 अचोने आयाका, नना मीकु विनंति कीसि वेहना पोल्ले बतल इत्ते, पेन नाकुन बच्चोन बिराना आते, अचोने बिराना मिहगा लोहना इंचि पारतना कीम्टु.

20-21 सांति हिच्याना पेन दाना विचारम परकारम मिमेट कियालय, मीकु अन्नि तीरकुना बेसता पोल्लें हिच्ये. येसु किरिस्तुनाहेंदाल मीवा पिस्वरते दान्क नच्चना पोल्लें जर्गि. किरिस्तु येसुना नेत्तुरहेंदाल पेन मातोनि बस्केळक मननाहाटीं पूना करारतुन निल्लाता. इद पूना करार निल्लना इंचि पेन येसुन हामुरताल मर्रा जीवाते तेहाता. इल्हा येसु किरिस्तु मावा बेस मेहानोर आतोर. मनकालोर अंतोर बस्केळताहाटीं ओन्के कदर हिच्येर. आमीन.

आकिरता पोल्लें

22 विस्वासुळकुनिटा! मिमेट पेनदा बक्तिते इकिच्चो गट्टि पळना इंचि, इव इच्चुं पोल्लें नना इद सिट्टिते मीहाटीं रासतन. इवुन बेस सहन कीसेके केंजट इंचि नना मीकु विनंति कीसंतन.

23 मना तम्मुनसोंटा तिमोति जेलनाल पेयसता पोल्लेतुन मिमेट तेल्लिचकुंटु. ओर ओक्कला नहगा बिराना वाते, नना ओनतोनि, मीकु कलियालय वांतन.

24 मीवा लीडरकुंक आनि पेनदा अंतोर पवित्र लोक्कुंक, नावा जोहार वेहाट. इटलि देसेमते मनना विस्वासुळक मीकु जोहार वेहासेक मंतुर.

25 पेनदा कुर्पा मी अंतोरतोनि बस्केळक मन्निकांटी. आमेन.

याकोब याकोब रासता सिट्टे

इद सिट्टिता बारेमते गिचचो परिचयम

रासतोना पोरोल: याकोब

रासता कालम: इसवि सन 45-50

याकोब येसु सामिना तम्मुर आंदुर. लोकल्लक, पेनदा विस्वासुल्लुकुन तकलिप कियुंदुर. अदुनहाटी विस्वासुल्लक वेरे-वेरे देसेमते पेय्से होत्तुर. ओर्क दैरनेम हियालय याकोब इद सिट्टि रासतोर.

मीक तकलिप वायिना आनंदमते ओपकेते अदुन ओर्सकुंदुर, गरिब आथिर सिरमंत आथिर बेदबाव कियमट, इच्चाना पज्जो ताकसि पापम कियमट, विस्वासमते कबळ कीम्टु, नाल्लकेतुन आपट, पेद्विरकेम कियमट आनि विस्वासमते गट्टिगा निल्लिस मंटु इंचि विस्वासुल्लुकुन वेहतोर. बगा बतल मंता

जोहार आनि परिचयम 1:1

विस्वासम आनि बुद्धि 1:2-8

गरिबतनम आनि दनम 1:9-11

पट्टु हळमळ आनि परिकसा 1:12-18

केंजमळ आनि कियमळ 1:19-27

बेदबावम कियमळ बारेमते 2:1-13

विस्वासम आनि बेस कबाहक 2:14-26

विस्वासि आनि ओना वळकमळ 3:1-18

विस्वासि आनि दुनिया 4:1-5:6

समजांचि वेहामळ 5:7-20

जोहार

1 नना याकोबुन, पेन आनि सामि येसु किरिस्तुना सेवकुन आंदुन. वेरे-वेरे देसेल्लुकुने पैलांचि होंचि मत्ता पन्नेडु गोत्राल्लुकुनोर्कुंक* नना इद सिट्टि रासेके मंतन. मीक अंतोर्क जोहार.

परिकसां आनि आनंदम

2 नावा विस्वासुल्लुकुनिटा, बस्के अय्ते मीवापोरो तीर-तीराता परिकसां वांतां, अस्के अद मीवा पूरा आनंदमता पोल्ले इनकुंदुर.

3 बारित्ते विस्वासमता परिकसानाहेंदाले ओपके पुटंता इंचि मीक एरपाटे मंता.

4 मिमेट ओपकेतुन दाना कबळ पूरा किया हीम्टु, अस्के मिमेट विस्वासमते गट्टिगा, पुरागा आनि बवे पोल्लेने बतले तक्को हिलाकोंटा आंतिट.

5 गानि मीवा लोप्पोटाल बोनकन्ना बुद्धि तक्को मत्ते पेनदुन तल्लकट, अस्के पेन हीता. बारित्ते अद बतले तप्पु दोस्साका, तल्लकतोर अंतोर्कुंक वेल्लेने हीता.

6 गानि अनमानम कियाका विस्वासमते तल्लकमळ गावाले. अनमानम कियानोर समुद्रमते वळिक वायाना एता तळानसंतोर आंदुर.

7-8 असंतोर रोंडु तीस्कुने विचारम कियाना मनकल आंदुर, ओर बदे हर्दे गट्टिगा मन्नोर. अदुनहाटी सामिनाहेंदाल बतलन्ना दोर्कता इंचि इनकुना मन्नि.

गरिब आनि सिरमंतुड

9 गरिब विस्वासि, पेन ओनकु हीता पेदुदातनमता हेंदाल आनंदमते मंदना.

10 अल्हेन सिरमंत विस्वासि, पेन हीता सिन्नातनमता हेंदाल आनंदमते मंदना. ओर जाडि पुंगार राल्लिस होत्ताप हासि दांतोर.

11 बारित्ते पोळ्दु पेय्संता अस्के एराना एद्वि मनंता, दानहेंदाल जाडि वतसि दांता, पजा दाना पुंगाहकु राल्लिस होंचि सिंगारम हिलाकोंटा आंता. अल्हेने सिरमंत मनकलगुडा ओना कमाइ कियाना विचाराल्लुकुनेन मुळ्गिसि मंचि नासडेम आसि दांतोर.

12 बोर अय्ते परिकसां वातस्के अवुन ओर्सकुंतोर, ओर आसिर्वाद दोर्कतोर आंदुर. बारित्ते परिकसाने गट्टिगा नित्तिसि मंचि बोर अय्ते पेनदुन पावरम कीतोर, ओनकु पिस्वरता किरिटम हीतन इंचि पेन पोल्ले हीसि मत्ता, अद ओनकु हिय्यार.

13 पेन परिकसां वाया हिय्यो अल्हेन बोर्कुने परिकसाने अरहो. अदुनहाटी बोर्कन्ना परिकसां वायानय्ते, पेनदाहेंदाले परिकसां वासेक मंतां इंचि इना मन्नि.

* 1:1 पन्नेडु गोत्राल्लुकुनोर्कुंक ईर यहुदि विस्वासुल्लक आंदुर, ओर देसेमतल पलाते एक्कोते-एक्को सिरिया आनि आसिया एरियाते मंचेके मत्तुर.

- 14 गानि हरेक मनकन, ओना लालच दानहेके गुंजकुंता. पजा पसांचि, ओन परिक्साते अरहंता.
 15 आयंका आ लालच नेला तप्सि एरपूरताप, पापमतुन कनंता आनि पापम बेर्सि हामुरतुन पुटसंता.
 16 नावा पावरमगल्ला विस्वासुल्कुनिटा! मिमेट पसांचकुनमट.
 17 हरेक बेसता वरम आनि अन्निकन्ना बेसता इनाम पोर्रोटांले वांता, वेल्गुल्कुना पेनबाबानगटाल वांता, ओनालोप्पो बतले तेडा हिल्ले, ओर नीडातालेसी बदलांचानोर आयोर.
 18 ओर पुटिस्तवुन लोप्पो मोट्टा मोदाटा पलम मनमे आयागोम इत्ता ओना सतता इच्चातुन पीसि, सत्तेम पोल्लेताल मनाकुन पुटिस्तोर.

केंजमळ आनि केंजताप ताकमळ

- 19 नावा पावरमगल्ला विस्वासुल्कुनिटा, मिमेट इद पोल्ले तेल्लिचकुंटा, हरेक मनकल केंजालय बिराना तयार मंदना, वळकालय ओप्के मंदना आनि बिराना होंग वायाकोटा मंदना.
 20 बारित्ते मनकना होंग पेनदा नीति पोर्रो कबळ किय्यो.
 21 अदुनहाटी मीलोप्पो मत्ता कराब पोल्लेन आनि दुस्ट मनसुन तेंडसि पोहाचि, पेन मीवा मनसुने हीता बेसता पोल्लेतुन मिमेट पेद्रुदातनम हळकोटा पीकुंटा. बारित्ते अद मीवा आत्मान पिसागोटनाहाटी बलमतद आंद.
 22 अद पोल्ले सिराप केंजालये आयो गानि अद वेहताप ताकानोर आम्टु. अल्हा ताकाकोटे मीवद मिमेटे पसांचकुंतिर.
 23-24 बारित्ते बोर अय्ते पेनदा पोल्ले केंजसि अदुना परकारम ताकोर, आ मनकल अदूदमते मोकम हळसि पलाते होत्ता पजा बल्हा मत्तानो इंचि बिराने मसंगनसंतोर आंदुर.
 25 गानि बोर अय्ते मुक्तिता तप्पु हिल्ला नियम मत्ताप ताकंतोर आनि अदुन मरगोर, असंटोना कबळ लोप्पो पेनदा आसिर्वाद मनंता.
 26 बोरन्नागिंटा ओनद-ओर बक्तुन इनकुंतोर गानि ओना नाल्केतुन आपकुन्नोर, अय्ते ओर, ओनद-ओरे पसांचकुंचेके मंतोर. ओना बक्ति एर्तमे आंदु.
 27 बोर अय्ते दिक्कु हिल्लेवोर्कुना, मुंडामोस्तवुना तकलिप लोप्पो सहायम कीतोर, इद दुनियाता कराब कबाहकुनाल लक्कु मनंतोर, असंटोर मना पेनबाबाना मुन्ने दोसेम हिल्लेवोर पवित्र आंदुर.

2

बोनद बेदबाव कियामन्नि

- 1 नावा विस्वासुल्कुनिटा! मीवा विस्वासम मना महिमाता सामि येसु किरिस्तुनपोर्रो मंता, अदुनहाटी मीलोप्पो बेदबाव मनामन्नि.
 2 बारित्ते, वरोर मनकल बंगारमता मुद्दा, एक्को दरातव कपडिं केर्सि, इंकावरोर गरिब मनकल बोंतुल कपडिं केर्सि पारतना कियाना लोते वातुर इनकुंटा,
 3 अस्के मिमेट एक्को दराता कपडिं केर्सि वातोनहेके हळसि, “निमे इगे बेसता जेगाते उद्दा” इंचि वेहचि, गरिब मनकन, “निमे अगा नित्ता हिलाकोटे नावा काल्कुनगा उद्दा” इंचि वेहानय्ते,
 4 मिमेट मीवा लोप्पेन बेदबाव कीताप आया हिल्लिरा? इंका दुस्ट विचारमते न्यायम कीतोर आया हिल्लिरा?
 5 नावा पावरमगल्ला विस्वासुल्कुनिटा! केंजाट, ई दुनियाते बोर अय्ते गरिब मंतुर ओर्कुन विस्वासमते दनवंतुल्क कीतन इंचि, आनि दान पावरम कीतोर्कुंक दाना राज्येमते वारसदार्क कीतन इंचि, मुन्नेने पोल्ले हीसि मत्ता, अद हियालय ओर्कुन पेरता.
 6 गानि मिमेट आ गरिब मनकन अपमानम कीतिर. मीपोर्रो अदिकारम ताकिच्चेके, मीकुन कोरटते इग्गिसेक ओयानुर दनवंतुल्के गदा?
 7 किरिस्तुना कदर हियना पोरोल मीक दोर्कता, अद पोरोलतुनगुडा अपमानम कियानुर ईर दनवंतुल्क गदा?
 8 मिमेटगिंटा, “नीवद-निमे पावरम कीतापे पक्कातोर्कुनगुडा पावरम कीम,” इंचि दर्मसास्त्रमते वेहताप ताकानय्ते, मिमेट निजमे बेस कीसेक मंतिट.
 9 गानि ओक्कला मिमेट बेदबाव कियानय्ते, मिमेट पापम कीसेक मंतिट, दर्मसास्त्रम मीकुन दोसिल्ल कीता.
 10 बारित्ते बोरे आयिर दर्मसास्त्रमतव अन्नि पोल्लेन पालन कीसिगुडा उदि पोल्ले तपते, ओर अन्नि पोल्लेने दोसि आंतोर.
 11 बल्हा इत्ते, “बोगमतनम कियमट” इंचि पेन वेहता, आनि अदे पेन, “इंकावरोन हक्कमट” इंचिगुडा वेहता. निमे व्यबिचारम किया हिल्लिन गानि इंकावरोन हक्कतिन, अय्ते निमे दर्मसास्त्रमता पालन किया हिल्लिन.
 12 बोरद अय्ते पापमताल इळबळिचना नियम परकारम न्यायम आयाना मंता. मिमेट ओरालेसीगे वळकट, कबळ कीम्टु.
 13 बारित्ते बोर अय्ते दया किय्योर, न्यायम कियाना रोज पेन ओनपोर्रो दया किय्यो. दया कियानोर न्यायमतुन गेल्संतोर.

विस्वासम आनि बेसता कबाहक

- 14 नावा विस्वासुल्कुनिटा! बोरन्नागिंटा नाक विस्वासम मंता इन्कुंचि, विस्वासम परकारम कबळ कियाकोटे, अद विस्वासम बता पायदातद असंटो विस्वासम ओन पिसागोटा परंतना?
 15 बोरन्ना दादाल आयि, अक्कल आयि ओर्क केर्नालय कपडिं, तिनालय रोजता तिडि हिल्ले,

16 अस्के मिमेट ओर्कुन, “सांतिते होंटु, गरम कपडिं केरंट, पीरमेड तिंटु,” इंचि इनकिर. गानि ओरा मेंदुल्लक अक्सरम मत्तव ओर्क हिथियर, अय्ते दाना ब्रता पाय्दा?

17 अल्हेने विस्वासम मत्ताप कबळ हिलाकोटे, आ विस्वासमगुडा हातापे आंद.

18 गानि बोरन्ना, “नीकु विस्वासम मंता, नाक बेसता कबळ मंता” इंचि इत्तोर इनकुंटु. अस्के, “बेसता कबळ हिल्ला विस्वासम नाक हुप्सा, बेसता कबळताहेंदाल विस्वासम नीकु हुप्संतन” इंचि ओर इनानुर.

19 पेन उंदे मंता इंचि मिमेट विस्वासम कीतिर, बेसे आंद. गानि देय्याल्लुकुगुडा विस्वासम कीसि गजा-गजा वनकंतां.

20 अरे बुद्धिदे हिल्ला मनका! कबळ हिल्ला विस्वासम एर्तम इंचि, नीकु तेळियोना?

21 मना एनकटा बाबो अब्राहाम ओना मरिं इसाकुन मोक्कु हियालय गदूदेपोरों इरतोर, अय्ते पेन ओना कबळतुन हळसि, नीतिमंतुड इंचि ओन ओष्कृताना हिल्लेना?

22 मिमेट हळसेक मंतिट, विस्वासम ओर कीता कबाहकुनतोनि कलियसि मंता, अल्हेन विस्वासम ओना कबाहकुनाहेंदाल पूरा आता.

23 अय्ते, “अब्राहाम पेन पोरो विस्वासम कीतोर, अस्के पेन ओन नीतिमंतुड इत्ता,” इंचि दर्मसास्त्रमता पोल्ले पूरा आता. अल्हेने अब्राहाम पेनदा दंतातोर इंचि पोरोल दोर्किचुकुत्तोर.

24 अदुनहाटी मनकल सिराप विस्वासम कीतिने आयो गानि बेसता कबाहकुनालगुडा पेन ओन नीतिमंतुड कीता.

25 अल्हेने रहाब इनना वेस्यागुडा कबरूयालोर्कुन दाना लोते मक्किचि इरिं, इंकुदि हरदाल वापस लोहता. अद बेसता कबळ कीताहाटी नीति मुरतळ आता.

26 बल्हा अय्ते आत्मा हिल्ला मेंदुल हांतानो, अल्हेने कबळ हिल्ला विस्वासमगुडा हातापे.

3

नाल्के तळमितसोंटद आंद

1 नावा विस्वासुल्लुकुनिटा! मिहागटाल वेल्लेटुर कराहनोर आयमटु, बारित्ते मनम कराहनोर्कुक वेल्ले गट्टिगा न्यायम जर्गता इंचि मीक एरपाटे मंता.

2 मनम अंतोरम बच्चुंगो तप्पुक कीतोम, गानि बोर अय्ते वळकानेके उंदिगुडा तप्पु किय्योर, ओर अन्नि गुनाल्लुकुने पूरा मत्ता मनकल आंदुर आनि ओर ओना मेंदुलतुनगुडा पगमते दोहताप ईरा परांतोर.

3 गुर्रम मना कय्दे ताकागोम इंचि दाना तोड्डिते कल्लेम दोसंतोम, अस्केने दाना पूरा मेंदुलतुन तिरहा परांतोम.

4 अल्हेने डोंगन हुळाट, अव वेल्लेन पेद्दगा मनंतां, वेल्ले वळिते ताकंतां, अय्नागानि अवुन ताकसानोर सिन्ना पतवार* हेंदाल बेके इत्ते हेके तिरहा परांतोर.

5 अल्हेने मना मेंदुल्ले सिन्ना नाल्के मंता, अद पेद्दा-पेद्दा पोल्लें पोंगंता. हुळाट, सिन्ना मिन्नुरते पेद्दा केडा वेसि दांता.

6 मना नाल्केगुडा तळमितालेसी मंता. दानगा अन्नि कराब पोल्लें निंडसि मंतां. अद मना मेंदुल्ले मंचि पूरा मेंदुल्लतुन बदनाम कीसि मना पिस्वरते तडमि दोसंता. अद तडमि नरकमताल वांता.

7 बारित्ते अन्नि तीरकुना केडा जिवरासीं, पिट्टें, पुळकु आनि समुद्रमते मंदना जिवरासिन मनकल ओना कय्दे कीकुन्ना परांतोर, कीकुत्तोरगुडा.

8 गानि नाल्केतुन आपमळ बोनतोने आयापरों. अद आग्वद, कराबतद आंद. दानगा हामुरता विसम निंडसि मंता.

9 इदुनतोने मनम मना सामि पेनबाबाना स्तुति कीतोम, आनि इदुनतोने मनम पेन दाना रूपमते पुटिस्ता मनकालोर्कुन सापनेम हीतोम.

10 उंदे तोळदाल आसिर्वाद, सापनेम रोंडु पेयसंतां, नावा विस्वासुल्लुकुनिटा, इल्हा आयामन्नि.

11 बतल, उंदे ऊटाताल उनाना एर, होव्वोर एर रोंडु पेयसंतंगां?

12 नावा विस्वासुल्लुकुनिटा, अंजिर मराकु जय्तुन पंडिं हादांतंगा हिलाकोटे अंगुर वेलिक अंजिर पंडिं हादांतंगा? हादों. अल्हेने होव्वोर एता ऊटाताल, उनाना एर पेयसा परों.

देय्याल्लुकुना तेल्वि आनि पेनदा तेल्वि

13 मीलोप्पो तेल्वितोर, तेल्वितोर बोर मंतोर? ओर ओना बेसता पिस्वर हेंदाल, तेल्विते सीदा-सादा मंचि ओर कियाना कबाहकुन हुप्सना.

14 गानि मीवा मनसुने वेल्लेने कूटा-कूटा, लालचता इच्चां निंडिस मत्ते, नीवा तेल्विता बारेमते पेद्दिरकेम कीसि, सत्तेमता विरोदमते पापम कियामन्नि.

15 ई तेल्वि पोरोटाल रेय्शि वातद आयो, गानि दुनियातागटाल, मनकनगटाल आनि देय्यमतगटाल आंद.

16 बल्हा इत्ते, बगा अय्ते कूटा-कूटा आनि लालचता इच्चां मनंतंगो, अगा आपत्तिं आनि अन्नि तीरकुना कराब कबाहक मनंतां.

17 गानि पोरोटाल वायाना तेल्वि अद मोदाला अय्ते पवित्र मनंता, आयंका सांति हियानद, सीदा-सादा गुनमतद, इंकावरोना पोल्ले केंजालय तयारते मनानद, दया आनि बेसता कबाहक कियानद, अद बेदबाव कियवद, इमानदारते मनानद आंद.

* 3:4 पतवार डोंगा ताकसेक मनानेके दान हेके-हीके तिराहनाहाटी स्टेरिगतुन मेलाहते पतवार मेसलिसि डोंगा बरोबर दांता. पतवार डोंगाता हिळु एते मनंता.

18 सांतितुन वरोक-वरोर कल्पानोर्क, सांतिता विज्जाता हेंदाल नीतिता पंटा दोर्कता.

4

मनालोप्पो जगडाल्क आयाना कारनम

- 1 मीलोप्पो लडाई, जगडाल्क, आयाना कारनम बतल? मीलोप्पो मंदना कराब आसेना लडाइताहेंदाले गदा.
- 2 मिमेट इच्चा कीतिट गानि अद मीक दोर्को, अदुनहाटी मिमेट इंकावरोन हक्कंतिर. गावाले इंचि इनकुंतिर गानि अद मीक दोर्को, मिमेट लडाई, जगडाल्क कीतिर. अय्ते मीक दोर्कवा कारनम बतल इत्ते, मिमेट पेनदुन तल्कसेक हिल्लिर.
- 3 मिमेट तल्कंतिर गानि मिमेट मीवा सुकमताहाटीं कराब आसेतेन तल्कंतिर, अदुनहाटीं मीक दोर्को.
- 4 विस्वासम हिल्वोरिता! दुनियातोनि दंटा कियमळ इत्ते पेनदुक पगा आयमळ इद मीक तेळियोना? अदुनहाटीं बोर अय्ते दुनियातोनि दंटा कीतोर, ओर पेनदुक पगातोर आंतोर.
- 5 दर्मसास्त्रमते वेहता पोल्लें एर्तमे इंचि मिमेट इनकुंचतिरा? बद पवित्र आत्मातुन अय्ते पेन मनालोप्पो इरता, अद मना नुकसान आयगोम इंचि कोरंतना?
- 6 पेन अय्ते इंका एक्को कुर्पा कीता. अदुनहाटीं, “पेन पेद्दिरकेम कियानोर्कुंक विरोद कीता आनि सिन्नातनम आसि मनानोर्कुंक कुर्पा कीता,” इंचि दर्मसास्त्रमते रासि मंता.
- 7 अदुनहाटीं पेनदा पोल्लेपोर्रो ताकट, देय्यमकु एदुर तिरियट. अस्के अद मिहागटाल वित्तंता.
- 8 मिमेट पेनदुक दग्गेरा वट, अस्के पेन मीवा दग्गेरा वांता. ए पापि लोकरिता! मीवा पापाल्कुन नोर्गाट. रोंडु मनसुकुने ताकानोरिता, मीवा मनसुन साप इर्गाट.
- 9 पापि लोक्कुलुकुम इंचि दुक्कमते मंटु, अळट. मिमेट कव्वानद होळसिसि दुक्कमते मंटु, आनंदमते मनानद होळसिसि नाराजते मंटु.
- 10 सामिना मुन्ने मिमेट सिन्नातनम आसि मंटु, अस्के मीकुन पेन पोर्रोळ्क तेहांता.

तप्पु दोसना अदिकार मीक हिल्ले

- 11 विस्वासल्कुनिटा! वरोना-वरोर अपमानम कीकुनमट, बोर अय्ते ओना दंटातोन अपमानम कीतोर, ओनपोर्रो तप्पु दोसंतोर, असोटा मनकल दर्मसास्त्रमता अपमानम कीतोर, दानपोर्रो तप्पु दोसंतोर. अय्ते निमे गिंटा दर्मसास्त्रमपोर्रो तप्पु दोसते, निमे नियम परकारम ताकानोन आयिन गानि न्यायम कियानोनालेसीं आंतिन.
- 12 दर्मसास्त्रम हियानद आनि न्यायम कियानद पेन उंदे आंद. दानके पिसागोटना आनि नासडेम किय्याना ताकत मंता, गानि निमे बोन आंदिन पक्कातोनपोर्रो तप्पु दोस्सानोन?

मना पिस्वर पेनदा कय्दे मंता

- 13 केंजाट, “इय्याला हिलाकॉटे नाडि पलाना सहरते होंचि, वर्सामेड मंचि, दंदा कीसि कमांचकोम,” इंचि मिमेट इतिट.
- 14 गानि नाडि बतल आंता मीक तेळियो, मीवा पिस्वर इत्ते गळसेम दिस्सि मर्रा दिसाकॉटा आयाना मूळमतसोद आंद.
- 15 अदुनहाटीं मिमेट, “सामिना इच्चा मत्ते मनम जीवाते मंदकोम, इदो, अदो बदो उंदि कबळ कीकोम,” इंचि इनमळ गावाले.
- 16 गानि इंदके मीवा पोल्लेने मिमेट गरति मंतिर, इसोटा अन्नि तीरकुना गर्रा बेस आयो.
- 17 अदुनहाटीं बोर अय्ते बेस कबळ कियाना इंचि तेळियसिगुडा ओर कियकॉटे, ओनाहाटीं अद पापम आंद.

5

दनवंतुल्कुंक वेहमळ

- 1 दनवंतुल्कुनिटा, केंजाट! मीपोर्रो वायाना गंडाल्कुनाहाटीं वरगेयाटु, अळट.
- 2 मीवा दनम नासडेम आंता, मीवा कपडिन सेदेल पीता.
- 3 मीवा बंगारम, एंडि सिलुम पीता. अद सिलुम मीक अड्डम गवाइ वेहचि, तळमितालेसीं मीवा मेंदुलतुन नासडेम कीता. मिमेट ई आकिर युगमतेगुडा दनम जमा कीसेक मंतिर.
- 4 हुळाट! मीवा नेदे कबळ कीता बूतिनोर्कुंक मिमेट बूति हिया हिल्लिर, अद बूति मीक अड्डम वरगेयसेक मंता, बूतिनोर्कुना अळमळ स्वर्गमते मंदना बलमगल्ला सामिना केव्कुंक केंजावाता.
- 5 मिमेट ई दुनियाते अन्नि तीरकुना आरामते, सुकमते पिस्तिर आनि मिमेट हायना रोजुनाहाटीं मीवा मनसुन बल्सागोटतिर.
- 6 नीतिमंतुनपोर्रो मिमेट दोसेम दोस्सि हक्कतिरगुडा. गानि ओर मीपोर्रो मर्लाबळा हिल्लोर.

ओप्केते ताकाना

- 7 अदुनहाटीं विस्वासल्कुनिटा! सामि मर्रा वायानादाका ओप्के पीसि मंटु. बल्हा इत्ते, वरोर कास्तकरि मनकल ओना नेदा पिस्वरता पंटाहाटीं मोदाटा पिर्र आनि आकिरता पिर्र वायानादाका ओप्केते एदुर ह्ळांतोर,

8 अल्हेने सामि मल्लिस वायना वेला दग्गेरा वासि मंता. अदुनहाटीं मिमेटगुडा मीवा मनसुन गट्टिगा कीसि, ओप्केते मंटु.

9 विस्वासुल्कुनिटा! वरोनपोर्रो वरोर चुगलीं वेहमट, अल्हा वेहतिर इत्ते मी पोर्रोने दोसेम दोसमळ जर्गता. हुळाट, न्यायम कियानोर गलमातगा नित्तिसि मंतोर.

10 विस्वासुल्कुनिटा! सामिना पोरोलता बारेमते वेहता पेनदा कबुरतोर तकलिप बोंगाचिगुडा ओप्केते मत्तुर, मिमेटगुडा ओरालेसीं मंटु.

11 हुळाट! बोर अय्ते ओप्के पीसि मत्तुर, ओर्कुन आसिर्वाद दोर्कतोर इंतोम. अय्यूब* ओप्के पीसि मत्ताहेंका ओन्क पेनदाहेंदाल आसिर्वादगुडा दोर्कता इंचि मिमेट केंजतिरे. इदुनहेंदाल पेन एक्को जीवा कियानद, दया कियानद आंदु, इंचि तेळियंता.

12 गानि नावा विस्वासुल्कुनिटा! अन्निकन्ना पेद्दा पोल्ले बतल इत्ते, मिमेट स्वर्गमतद आयि, बूमितद आयि आनि बदे पोल्लेतद आयि ओट्टु तिनमत. मत्ते मंता इंट, हिलाकॉटे हिल्ले इंट. इल्हा इत्ते पेन मीक्कु सिक्साता आदेस हिद्यो.

पारतनाता ताकत

13 मीवा लोप्पोगिटा बोरन्ना दुक्कमते मत्ते ओर पारतना कियाना, आनंदमते मत्ते पेनदा स्तुति कीसेक पाटां पाराना.

14 मीवा लोप्पोगिटा बोरन्ना बिमारते मनानय्ते, कलिसियाता पेद्दाल्कुन केयाना. ओर वासि सामिना पोरोलते ओनकु निय होकसि, पारतना कियिर.

15 ओर विस्वासमते कीता पारतनाते बिमारतोर बेस आयानुर. सामि ओन बिमारताल तेहाचि निप्संतोर, ओर पापम कियिनागानि ओना पापमतुन मापि कीतोर.

16 अदुनहाटीं मिमेट वरोना मुन्ने वरोर मीवा पापाल्कुन ओप्कुंटु, वरोनाहाटीं वरोर पारतना कीम्टु, अस्के मिमेट बेस आकिट. नीति मनकना पारतनाते वेल्लेने ताकत मनंता.

17 एलियालगुडा† मनासॉटा गुनमता मनकल मत्तोर, ओर पिर्ग वायामन्नि इंचि ऊके-ऊके पारतना कीतोर, अय्ते मूडुननरा वर्सनदाका बूमिपोर्रो पिर्ग वाया हिल्ले.

18 दाना पजा, पिर्ग वायागोम इंचि मर्रा पारतना कीतोर, अस्के मब्बुनाल पिर्ग वाता आनि बूमिपोर्रो पंटा पेयसता.

19 नावा विस्वासुल्कुनिटा! मीवा लोप्पोटाल बोरन्ना सत्तेमता हरदाल तप्सि होनानय्ते, ओन इंकावरोर बोरन्ना सत्तेमता हर्दे वापस तायाना.

20 ओनकु इद तेळियना गदा, बोरन्ना सत्तेमता हरदाल तप्सि होत्ता पापि मनकन, सत्तेमता हर्दे वापस तायते ओर ओना जीवातुन हामुरताल पिसागोटतोर आनि ओना अन्नि पापाल्कुन मुच्चि हीतोर.

* 5:11 अय्यूब अय्यूब पोरोलता वरोर मनकना बारेमते पडाना नियमते रासि मंता. ओर पेनदा बेसता बक्तुड मत्तोर. † 5:17 एलियाल पडाना नियम मत्तस्के ईर पेनदा पेद्दा कबुरतोर मत्तोर.

1 पत्र पत्र रासता मोदाटा सिट्टि

इद सिट्टिटा बारेमते गिचचो परिचयम

रासतोना पोरोल: पत्र

रासता कालम: इसवि सन 65-67

रोम राज्येमते वैरे-वैरे एरियाने पैलांचि, पराय देसेमतोरालेसी मत्ता विस्वासुल्कुनाहाटी पत्र इद सिट्टि रासतोर. ओर सामिना लोप्पो विस्वासमते गट्टिगा मत्ताहाटी लोकुल्कुनहेदाल ओर्क वेल्ले तकलिपकु मत्तां, ओर दुक्कमते मत्तुर.

अदुनहाटी पत्र ओर्क दैरनेम हीसेक मंतोर. बोर अय्ते तकलिपकुन, दुक्कमतुन ओप्के पीसि ओर्सकुचेके विस्वासमते गट्टिगा मनंतुर, ओरापोर्री पेनदा दया बस्केळ्ळक मनंता. आनि सामि येसु किरिस्तु मल्लि वातस्के दाना पलम ओर्क दोर्कता, इंचि इद सिट्टिटे रासतोर.

बगा बतल मंता

जोहार आनि परिचयम 1:1-2

पेनदा मुक्तिता बारेमते मति कीसि हियमळ 1:3-12

पवित्र पिस्वर पिस्सनाहाटी बोदा 1:13-2:10

तिप्पल्क वातास्के विस्वासुल्कुना जिम्मेदारिना बारेमते पोल्लें 2:11-4:19

गर्रा हिलाकॉटा मनमळ आनि पेनदा सेवा कियमळ 5:1-11

आकिरता बोदां 5:12-14

पत्र विस्वासुल्कुंक जोहार कीतोर

1 नना पत्रुन, येसु किरिस्तुना प्रेरितुन आंदुन. रोम देसेमता पुंतुस, गलातिया, कप्पुदुकिया, आसिया आनि बितुनिया राज्येल्कुने पैलांचि होंचि, पराय देसेमतोर आसि मत्ता लोकुल्कुंक नना इद सिट्टि रासेके मंतन.

2 पेनबाबाल मीकुन मुन्नेन पेरसि निलाहतोर. अदुनहाटीगे, मिमेट येसु किरिस्तु वेहताप ताकगोम, ओना पोंगता नेत्तुरते मीवा पापालक पायसि होनगोम इंचि पवित्र आत्माताहेदाल मीकुन पवित्र कीतोर. पेनदा कुर्पा, सांति मीक इरगा दोर्किकांटी.

बस्केळ्ळक पिस्साना आसे

3 मना सामि येसु किरिस्तुना पेनबाबाना दन्यवाद आयि! ओना वेल्ले दयाताहेदाल मनाकुन पूना रीतुने पुटिचमळ जर्गता. अद बल्हा इत्ते, पेनबाबाल येसु सामिन हातोर लोप्पोटाल मर्रा तेहाचि, मनाकु उंदि पिस्वरता आसे हीतोर.

4 इंका अद बस्केने नासडेम आयवद, तप्पु हिलवद आनि कर्गुवसोंटा वारसान हक्क स्वर्गमते मीवाहाटी इर्सि मंता.

5 आकिरि रोजकुने पेन अंतोर्कुंक हुप्सालय तयार कीसि इरता मुक्ति, मीकु दोर्कनाहाटी मीवा विस्वासम परकारम पेन मीकुन दाना बलमते कापाळसि स्वर्गमते इरसंता.

6 अदुनहाटी मिमेट इरगा कूस आम्टु. इंदके मीक गडसेमताहाटी बच्चुंगो तीरकुना परिकसां सहन किया पीता.

7 नासडेम आयाना बंगारमतुन तळमिटे करगागोटसि परिकसा कीतुर. गानि आ बंगारमकन्ना बच्चोरो विल्लवाता मीवा विस्वासमतुनगुडा परिकसा एतमळ जर्गता. येसु किरिस्तु मर्रा वातस्के, मीकुन मेचकुंचि पेद्दातनम आनि कदर दोर्काना कारनम आयगोम.

8 मिमेट येसुन हळाकोन्ना गानि पावरम कीतिट; इंदके ओर दिसाकोन्ना ओन विस्वासम कीसि, पोल्लेने वेहा परवच्चोन आनंदमते आनि महिमाते निडिस मंतिर.

9 इल्हा मीवा विस्वासमता पलम इंचि मिमेट मीवा आत्मांकु मुक्ति दोर्किचेके मंतिट.

10 मीक दोर्कना मत्ता कुर्पाता बारेमते बोर पेनदा कबुरतोर अय्ते बविस्यवानि कीसि मत्तोर, ओर इदे मुक्तिता बारेमते पूसकीसेके, पहकसेक मत्तुर.

11 किरिस्तु बल्हा तकलिप वासि हायनुर, दाना पजा बल्हा ओनकु स्वर्गमते कदर दोर्कार इंचि ओरा लोप्पो मनना किरिस्तुना आत्मा मुन्नेन वेहचि मत्ता. गानि इव पोल्लें बोना बारेमते, बस्के आयनुं इंचि पेनदा कबुरतोर पहकुंदुर.

12 इव पोल्लें ओरा पायदाताहाटी आय्यो गानि मीवाहाटी इंचि पेने ओर्क तेळियागोट्सि वेहचि हुपिस्ता. इदवेरादाका बदाय्ते बेसता कबुर वेहतुर, अद स्वर्गमताल लोहचीता पवित्र आत्माहेदाले मीक वेहतुर. इव पोल्लेना बारेमते पेनदा दूतांगुडा बल्हा आंतानो इंचि हळना इचचाते मंतां.

पवित्र आम्टु

13 अदुनहाटी मिमेट बेसता बुद्दिदतानि, हुसारते मंटु. येसु किरिस्तु मर्रा मल्लि वातस्के मीक दोर्कना कुर्पाताहाटी पूरा आसेते मंटु.

14 येसु किरिस्तुना बारेमते मीक तेळियवस्के मीलोप्पो मत्ता कराब अलवटकुना जोलिक होनाकॉटा, पोल्ले वेहते केंजाना पिलाल्कुनालेसी मंटु.

15 गानि बद् पेन अय्ते मीकुन केयता, अद् पवित्र मंता. अल्हेने मिमेटगुडा मीवा ताकमळते अन्नि तीरकुने पवित्र मंटु.

16 बारित्ते दर्मसास्त्रमते, “नना पवित्र मंतन इंचि मिमेटगुडा पवित्र आम्टु,” इल्हा पेन इता.

17 हरेक मनकन सिन्ना-पेद्दा इनाकॉटा ओरा कबाहकुन ह्ळसि न्यायम कियाना पेनदुन मिमेटगिंटा “बाबा” इंचि पारतना कीते, दुनियाते मतच्चोरजेम परायतोरम इंचि वेंते ताकाटु.

18-19 मीवा तादो-बाबुरागटाल ताकसेके वाता एर्तम पिस्वरतुन, नासडेम आयाना एंडि-बंगारम इळबळिचा हिल्ले, गानि दोसेम हिल्वद, मर्का हिल्वद गोर्रे पोरिनसॉटा किरिस्तुना विलुवाता नेत्तुरताहेंदाल मिमेट इळबळतिर, इदु मीकु एरपाटे मंता.

20 दुनिया पुट्टका मुन्नेन किरिस्तुन पेन पेरता, गानि मीवाहाटीं इव आकिर रोजकुने ई दुनियाते वातोर.

21 ओनहेंदाल मिमेट पेनदापोर्री बरोसा कीतिर. पेन ओन हातोरा लोप्पोटाल मर्रा जीवाते तेहाचि, ओन्क पेद्दातनम हीता. अदुनहाटीं मीवा आसे आनि विस्वासम पेनदापोर्री मंता.

22 मिमेट सत्तेमता हरि ताकसि मीवा आत्मातुन पवित्र कीकुत्तिर. अदुनहाटीं मिमेट वरोंक-वरोर पावरम कीसेके मंतिट. अल्हेने इंदके मीलेसीं विस्वासुल्क आतोर्कुन मिमेट पूरा मनसुनाल पावरम कीम्टु.

23 इंदके मिमेट पूना पिस्वरते पुटतिर, नासडेम आयाना पेडेहेंदाल आयो, गानि बस्केन नासडेम आयवद, बस्केळक जीवाते मनना पेनदा पोल्लेताहेंदाल, पूना पिस्वरते पुटतिर.

24-25 दर्मसास्त्रम इल्हा वेहंता गदा,

“अंटोर मनकालोर जाडितालेसीं मंतुर,

ओरा अन्नि पेद्दातनाल्क पुंगाहकुनालेसीं मंतां.

जाडि वतंता, पुंगाहकु रालंतां.

गानि सामिना पोल्ले मात्रम पीळि-पीळिनदाका मनंता.” ✨

इदुने मीक बेसता कबुर इंचि वेहमळ जर्गता.

2

पेनदा लोकुल्क इत्ते जीवाते मनना बंडानसंटोर

1 पेन बच्चोर दया कियानद आंद इंचि मिमेट अय्ते एरपाट कीतिट. अदुनहाटीं अन्नि तीरकुना तप्पु कबाहक, अन्नि तीरकुना बोंकिचमळ, नडेह कियमळ, कळक पोतमळ, अन्नि तीरकुना अपमानम कियमळ इवून होळसीम्टु.

2-3 इंदके पुटता पसिबाला बल्हा पाल उन्नालय तनलाळंता, अल्हेने मिमेटगुडा बेसता पाललेसीं मनना पेनदा पोल्लेताहाटीं तनलाळट. अल्हा तनलाळते मिमेट मुक्तिहाटीं पेनदा पोल्ले परकारम बेरस्सेक दांतिट.

4 मिमेट जीवाते मंदना बंडातसॉटा किरिस्तुनगा वट, मनकालोर्क ओन हयसा हिल्लुर गानि ओर पेनदा लोप्पो पेरकुत्तोर आनि विलुवातोर आंदुर.

5 मिमेटगुडा जीवाते मंदना बंडानलेसीं पवित्र आत्माता लोन दोहचेक मंतिट. येसु किरिस्तुनाहेंदाल पवित्र आत्माता बक्तितुन मोक्कु हीताप पेनदुक ओप्पनालायक मनालय, मिमेट पवित्र पेर्मांलोरलेसीं निलाहतुर आंदिर.

6 बारित्ते दर्मसास्त्रमते पेन इल्हा इत्ता गदा:

“नना सियोनते सेंकुमूला बंडतसंटोन वरोन इरसेक मंतन,

ओन नना पेरतन, ओर वेल्ले विलुवातोर आंदुर.

ओनापोर्री बोर अय्ते विस्वासम इरतोर, ओर बस्केने सिग्गुना पाल आयोर.” ✨

7 अदुनहाटीं मिमेट विस्वासम कीतिर इंचि अद् बंडा मीक विलुवातद्, गानि बोर अय्ते अदुन विस्वासम किय्युर, ओराहाटीं दर्मसास्त्रम इल्हा वेहता गदा:

“बद् बंडातुन दोहानोर बतक ओज्जो इत्तुर,

अदे बंडा इंदके सेंकु मूलाता मोदोल बंडा आता.” ✨

8 इका दर्मसास्त्रमते इल्हा मंता गदा,

“अद् बंडा लोकुल्कुंक दलगांता, इका पर्पु बंडा ओर्कुन हिळु अरहंता.” ✨

बारित्ते, ओर पेनदा पोल्लेने ताकवाहेंके, बंडा दल्लिसि हिळु अरंतुर.

ओर हिळु अरंनाहाटींगे इल्हा निलाहमळ जर्गता.”

9 गानि मिमेट अय्ते पेन पेरकुत्ता वंसमतोर, राजुल्कनसॉटा पेर्मांलोर्क, पवित्र राज्यमतोर, पेनदा लोकुल्क आंदिर. अदुनहाटीं मिमेट दाना अद्बूतामाता कबाहकुन वेहाना इंचि मीकुन हीकटताल अद्बूतामाता वेल्गुने तत्ता.

10 मुन्ने मिमेट पेनदा लोकुल्लकगुडा मना हिल्लिर, गानि इंदके मिमेट पेनदा लोकुल्लक आतिर. मुन्ने मीपोर्रो पेनदा दया मनाहिल्ले, गानि इंदके मीवापोर्रो पेनदा दया मंता.

11 नावा पावरमगल्लोरिता, मिमेट वेरे देसेमतोर, वेरे नाटेनोर आसि मंतिर. अदुनहाटी मी आत्माकु अड्डम मनानव दुनियातां अन्नि सेड्डा आसेनाल लक्कु मंटु इंचि विनति कीसेके मंतन.

12 मिमेट अविस्वासुल्लकुना नड्डुम मंतिर इंचि बेस ताकट. ओर मीकुन कराब लोकुल्लक इंचि बदनाम कियिनागानि मीवा बेस कबाह्कुन हळसि, पेन वायाना रोजुने ओर इंका पेनदा कदर कियानुर.

अदिकारम मत्तोकुना पोल्लें केंजना

13-14 मिमेट सामिनाहाटी दुनियाते मनना अदिकारिल्लकुना कयदा हिळु मंटु. राजाल पेदुदोड इंचि ओना कयदा हिळु मंटु. अदिकारिल्लकुना पोल्ले केंजाट, बारित्ते बेसता कबळ कियानोर्कुंक मेच्छुनालय आनि कराब कियानोर्कुंक सिक्सा हियालय ओर्कुन लोहमळ जर्गता.

15 बारित्ते, मीवां बेसता कबाह्कुन हळसि, तेल्वि तक्को लोकुल्लकुना तोड्डि बंद कियाना इंचि पेनदा इच्चा मंता.

16 मिमेट बोना कयदा हिळु हिल्लवाप मना परांतिर गानि “बोना कयदा हिळु हिल्लोम” इंचि मीवा मनसुक वाताप कराब कबाह्कुने ताकमट, पेनदा सेवाकुल्लकुनलेसी ताकट.

17 अंतोरा कदर कियाना, मना दंटता विस्वासुल्लकुन पावरम कियाना. पेनदुक वेरियसि ताकना, राजाना कदर इराना.

18 जीतागाह्कुनिटा, मिमेट मीवा मालकुंक पूरा कदर हीसेक ओरा कयदा हिळु मंटु. सिराप बेसता गुनम, सादा सिंपल मत्तोरहेकेन आयो गानि कडक मनना मालकुनगा गुडा ओर वेहताप ताकट.

19 बारित्ते बोरे आयिर पेनदा लोप्पो ताकानेके तप्पु हिलाकोन्ना गानि देब्बां तिन्निना, तिप्पलक वायिना, ओप्के पीसि मनानयते अद मेच्छुनना पोल्ले आंद.

20 निमे तप्पु कीसि देब्बां तित्तिन, ओप्के पीसि मत्तिन, अयते अठ्टे नीकु बता पायदा वाता? गानि निमे ओक्कला बेसता कबाह्क कीसि देब्बां तिचि ओप्के पीसि मनानयते, पेनदुक नच्चानोन आदिन.

21 इदुनहाटीगे मीकुन पेन केयता आनि किरिस्तु मीवाहाटी तकलिप अरतोर, मिमेट इंका ओना अळगुने अळगु वाटसि ओना पज्जो तकलिप अरिं ताकना इंचि उंदि उदाहरनलेसी पेन मीकुन निलाहता.

22 ओर बतले पापम किया हिल्लोर, ओना तोळ्दाल बस्केने बोक्किचचना पोल्ले पेयसा हिल्ले.✱

23 ओन तेरहिना गानि दानकु बदुल ओर बोने तेरहा हिल्लोर. ओन बच्चोनो तकलिप कीतुर गानि दानकु बदुल ओर बोर्कुने बेदरिचा हिल्लोर, दानकु बदुल सत्तेमते न्यायम कियाना पेनदुक ओनद-ओर अप्पजेपतोर.

24 मनम पापालकुनाहाटी हासि होंचि सत्तेमताहाटी पिसागोम इंचि येसु ओना मेंदुल्लतुन कृस पोरो हीतोर. ओर तित्ता देब्बाना हेंदाल मना बिमार्क बेस आतां.

25 मुन्ने मिमेट हारि तप्ता गोरिनलेसी तिरियसेक मत्तिर. गानि इंदके मीवा जीवातुन कापाळसि कोहानोनगा मल्लिस वातिर.

3

मुत्तो-मुय्दोना ताकमळ

1-2 अल्हेने मुत्तोह्कुनिटा, मिमेट मीवा मुय्दुरा कयदा हिळु वेरेंते मंटु. ओक्कला ओर पेनदा पोल्लेते ताकाकोटे, पोल्लेनतोनि आयाकोन्ना मीवा पवित्र आनि सत्तेमते ताकानदुन हळसि विस्वासमते वायानुर.

3 मीवा केल्लुकुन तीराता जेडां वाटमळ, बंगारमता नगां केरमळ, एक्को दराता कपळिं पोंडमळ इसोटा पलाताल दिस्सना सिंगारम कियमट.

4 गानि दानकु बदुल मीवा मनसुना गुनम सादा-सिंपल, नासडेम आयवा सांत आत्माते सिंगारम कीम्टु. इसोतद पेनदा मुन्ने बच्चोनो विल्लुवातद आंद.

5 एनकटा कालमते पेनदापोर्रो आसे इराना पवित्रमाता मुर्ताह्क बेसता गुनमते सिंगारिचुंदु आनि मुय्दोना पोल्लेते ताकुंदु.

6 बल्हा अयते अब्राहामुना मुत्तो साराल ओन मालक इंचि केयुंदु, ओर वेहताप ताकुंदु, अल्हेने मिमेटगुडा बेसता कबाह्क कीसेके बदे पोल्लेक वेरियाकोटा मत्ते, दाना मियाह्क आंतिर.

7 अल्हेने मुय्दुर्कुनिटा! मीवा मुत्तोह्कुंकगुडा मी अचोने पेनदा कुर्पाता वारसान हक्क मंता. गानि अबुंक मीलेसी ताकत हिल्ले. अदुनहाटी मिमेट मुत्तोह्कुंक बेस कदर हीसि पिस्सट. अस्के मीवा पारतनाकु बतले अड्डम वायो.

येसुनाहाटी तकलिप अराना

8 आकिरते, मिमेट उंदि मनसुने वरोंक-वरोर पावरम कियमळते, उंदि लोतोरलेसी जीवा कियमळते, इंकावरोनहाटी जीवा नोयमळते, सादा-सिंपल मनमळते अंतोर उंदि आसि मंटु.

9 कराबता बदला कराबतोनि एतमट; तेराहतोर इंचि तेराहमट गानि ओर्क आसिर्वाद हीम्टु. बारित्ते मीक आसिर्वाद दोर्काना इंचि पेन मीकुन केयता.

10 दर्मसास्त्रम वेहाताप,
“बोर अयते पिस्वरतुन मेचकुंचि, बेसता रोजकु हळंतन इंतोर,
ओर ओना नाल्केताल कराब पोल्लें,
ओना पेद्विनाल आबद्दम पोल्लें वळकमळ आपापीता.

11 ओर कराब कबाहकुन होळसिसि बेसता कबाहक कियाना,
ओर सांतितुन पहकिसि दान पीसि ताकाना.

12 बारित्ते सामिना नदर नीतिमंतुलकुना पोर्रो मनंता,
ओरा पारतनातुन केव हीसि केंजंतोर, गानि दुस्टुलकुंक सामि विरोद कींतोर.”✧

13 ओक्कला मिमेट बेस कियानाहाटीगे जोसने मत्ते, मीकुन बोर हेळाहनुर?

14 ओक्कला मिमेटगिटा नीति कबाहक कियानेंके मीक कस्टाल्क वायिना, पेन मीक आसिर्वाद हिय्यार. ओर वेराहते मिमेट वेरियमट,
पेरसान आयमट.

15 गानि मीवा मनसुने किरिस्तु मावा सामि इंचि ओनकु कदर हीम्टु. येसुना पोर्रोटा मीवा आसेता बारेमते बोरन्ना मीकुन पूसकीते, मिमेट सादा-सिपल आनि मान-मर्यादाते बस्केळक वेहालय तयार मंटु.

16 गानि मिमेट किरिस्तुना लोप्पो बेस पिसमळतुन हळसि बोर अयते मीवा अपमानम कींतुर, असंटोर्क मीवा ताकमळतुन हळसि सिग्गु वायानाल मीवा विवेक बुद्दिदतुन बेस इर्सि ताकट.

17 ओक्कला बेसता कबाहक कीताहाटीगे तकलिप बोगांचमळ पेनदा इच्चा मत्ते, कराब कबाहक कीसि तकलिप बोगांचना दानकन्ना, इदे बेस.

18 बारित्ते अंतोरा पापालकुनाहाटीं किरिस्तु उंदे मल्का हातोर. मनाकुन पेनदागा ओयालय वरोर नीतिमंतुड अनीतिमंतुनाहाटीं हातोर. मेंदुलताल ओन हक्कतुर गानि आत्माते ओन जीवाते तेहमळ जर्गता.

19 ओर हातोरा आत्मानगा होंचि, दोहचि वाटताप मत्ता आत्मांकु पेनदा कबुर वेहतोर.

20 एनकटा नोहाना कालमते डोंगा तयार कियानेंके लोकुल्लक वायानुर इंचि पेन ओप्के पीसि एदुर हळसेक मत्ता, गानि लोकुल्लक पेनदा पोल्ले केंजा हिल्लुर. सिराप एनमिदि लोकुल्लक पेनदुन नम्मिसि आ कम्मळता एताल पिस्तुर.

21 आ एताल पिस्ता आनवल इत्तेने बापतिस्मा आंद. बापतिस्मा एतमळ इत्ते मेंदुलता मुर्कि होनालय आयो गानि येसु किरिस्तु हासि मर्रा जीवाते तेदताहेंदाल मनाकुन पिसागोटसि, विवेक बुद्दिदताहाटीं पेनदुन विनति कियाना करार आंद.

22 इंदके येसु किरिस्तु स्वर्गमते होंचि पेनबाबाना तिना बाजुंक उद्दतोर. अगा पेनदा दूतां, अदिकाराल्क, सक्तिं ओना कय हिळु मंतां.

4

विस्वासुल्लकुना मनमळ

1 बल्हा अयते किरिस्तु मेंदुल्ले मत्तस्के तकलिप बोगांचतोर, मिमेटगुडा ओनसोंटा मनसु इर्सि दान मीवा विस्सेलेसीं वाळकुंटु. बारित्ते, बोर अयते तकलिप बोगांचतोर, ओर पापमतुन होळसींतोर.

2 ओर वायाना रोजकुने मेंदुल्ला इच्चाना परकारम आयो गानि पेनदा इच्चा परकारम पिस्संतोर.

3 मोदाला मिमेट यहुदि आयवोरा इच्चाना परकारम बोगमतनम कियमळ, जोसते मनमळ, कल्लु उनमळ, पारिं कियमळ, रिम्मा आयमळ, नियमकु विरोदमते ताकमळ, बतक ओज्जुवा बोम्मन मोळकमळ इल्हा कियिदिर, इद वेल्लेने आता.

4 इंदके मिमेट असोंटा पेद्दा बोगमतनाल्लकुने ओरतोनि कलियसेके हिल्लिर इंचि ओर इंचत्रम आसेक मंतुर. अदुनहाटीं ओर मीकुन बदनाम कीसंतुर.

5 गानि हातोरा, पिस्तोरा न्यायम कियालय तयार मनना पेनदुक ओरा पिस्वरता लेक्का हियापीता.

6 मेंदुल्ले मत्तास्के न्यायम मनकालोरा इच्चातुन पीसि आयिनागानि, आत्मा मात्रम पेनदा इच्चा परकारम पिस्साना इंचि बोर अयते हासि मत्तुर, ओर्कगुडा बेसता कबुर वेहमळ जर्गता.

7 इंदके दुनियाते मनना अन्निटवुना आकिर रोजकु दगोरा एवतां. अदुनहाटीं मिमेट पारतना कियानेंके बेस विचारमते, तेल्विते मंटु.

8 अन्निंकन्ना पेद्दा पोल्ले बतल इत्ते, वरोंक-वरोर एक्को पावरम कीम्टु, अल्हा कीते वेल्लेने पापालकुन मापि किया परकिर.

9 बतले गुल्गाकोंटा वरोंक-वरोर हेडमितोरलेसीं बेस हळकुंटु.

10 अंटोर्क वैरे-वैरे वरम दोर्कता, अदुनहाटीं वरोंक-वरोर सेवा कियालय पेनदा तीरतीराता कुर्पा दोर्कता बेसता दिवांजिनलेसीं अदुन वाळकुंटु.

11 बोन्क अयते पेनदा पोल्ले वेहाना वरम दोर्कता, ओर पेन वेहतापे वळकना. बोर अयते सेवा कींतोर, ओर पेन हिय्यना बलमतेने कियाना. अन्नि पोल्लेने येसु किरिस्तुनाहेंदाल पेनदुके महिमा दोर्काना. महिमा आनि ताकत युगा-युगाल्लुकुनदाका पेनदादे आंद. आमीन.

12-13 नावा पावरमगल्लोरिता! मीवा परिकसा कियानाहाटीं मीवापोर्रीं तळमितसोंटा तकलिपकु वांतां, अस्के मिमेट “बस्केने जर्गवद जर्गना मंता” इंचि, परेसान आयमट्ट. गानि मोमोटगुडा किरिस्तुना दुक्कमते पोत्तु आतोम इंचि कुसिते मंटु. किरिस्तु मल्लिस वासि ओना पेद्दातनमतुन हुपिस्तस्के मिमेट वेल्ले कूस आकिट.

14 मीकुन ओक्कला बोरन्ना किरिस्तुना पोरोलताहेंदाल अपमानम कीते, मिमेट आसिर्वाद दोर्कतोरे आंदिर. बारित्ते पेनदा महिमाता आत्मा मीपोर्रीं मंता.

15 गानि मीवा लोप्पोटोर बोरे आयिर, हक्कताहेंका, दोंगातनम कीताहेंका, तप्पुड कबळ कीताहेंका, वैरेतोरा कबळते कय वाटताहेंका दुक्कम बोगांचा मन्नि.

16 ओक्कला मीलोप्पो बोरन्ना किरिस्तुनोर आताहाटीं तकलिपकु बोगांचनयते, ओर सिग्गु अर्रानायो, गानि किरिस्तुना पोरोल दोर्कताहाटीं पेनदुक महिमा हियागोम.

17 बारित्ते न्यायम कियाना वेला एवता. पेन मनातोने न्यायम सुख कीता अयते, बोर अयते पेनदा बेसता कबुरतुन केंजुर ओरा गति बतल आयार?

18 ओक्कला नीतिमंतुके मुक्ति दोर्कुळ कस्टम आयानयते, दुस्टुलक आनि पापिल्लुकुनद बतल आयार?

19 अदुनहाटीं बोर अयते पेनदा इच्चा मत्ताप तकलिप अरसेक मंतुरो, ओर बेसता कबाहक कीसेके, मनाकुन पुटिस्ता विस्वासमल्ला पेनदुक ओरा आत्मानु अप्पजेप्पना.

5

पेनदा मंदा

1 मीलोप्पो बोर अयते पेद्दाल्क मंतुर, ओरालेसीगे ननागुडा पेद्दा मनकन, किरिस्तु बोगांचता तकलिपकुना गवाइतो, ओर मल्लिस वायानस्के ओना पेद्दातनमते कलियानोन आंदुन इंचि, नना आ पेद्दाल्कुक वेहासेक मंतन.

2 मीवा जिम्मेदारिते मत्ता पेनदा मंदातुन पोस कीम्ट. इद कबळ बलमिते आयो गानि पेनदा इच्चा परकारम कुसिते कीम्ट, दोंगा कमाइताहाटीं आयो गानि मनसुनाल कीम्ट.

3 मीकु अप्पजेपता मंदापोर्रीं अदिकारम हप्साकोंटा, ओरा मुन्ने उंदि उदाहरनलेसीं मंटु.

4 इल्हा मत्तिर इत्ते अंटोर्कुकन्ना पेद्दा कोहानोर किरिस्तु वायानुर अस्के, बस्केने कळियसि होनवसोंटा पेद्दातनमता किरिटम मीकु दोर्कार.

5 अल्हेने ए लेय्युरिता! मिमेटगुडा पेद्दाल्क वेहताप ताकट, वरोंक-वरोर सेवा कियानाहाटीं सिन्नागासि मुन्ने ताकट. बारित्ते, पेन गरी कियानोर्कुक अड्डम तिरियंता,

गानि सादा-सिंपल मंचि ताकानोर्कुक कुर्पा हीता.*

6 पेन मीकुन इनकुत्ता वेला वातारिते पेद्दा कियाना इंचि मिमेट दाना बलमगल्ला कयदा हिळु सिन्नागासि मंटु.

7 पेन मीवा रंदि कीता, अदुनहाटीं मीवा अन्नि रंदि अदुनपोर्रिन होळसीम्टु.

8 मीवा पगातद पेद्दा देय्यम बोन तिनकन इंचि सिंहमतालेसीं वरगेयसेके नालुं मूलां तिरियसेक मंता, अदुनहाटीं हुसारते, तेल्चिते मंटु.

9 मिमेट विस्वासमते गट्टिगा मंचि, दान्क विरोद कीम्ट. दुनियाते मनानोर विस्वासुल्लुकुगुडा इल्हेने तकलिप बोगांचेके मंतुर इद मीक एरपाटे मंता.

10 अन्नि तीरकुना कुर्पा कियाना पेन मीकुन किरिस्तुना लोप्पो दाना बस्केळक मनना पेद्दातनमहाटीं केयता. मिमेट कोन्नि रोजकु तकलिपकु बोगांचतंका अदे पेन मीकुन दानलायक कीता, मीकु बलम हीसि निलाहंता.

11 दानादे राज्येम युगा-युगाल्लुकुनदाका मन्निकांटी, आमीन.

आकिरता जोहार

12 विस्वासमगल्ला तम्मुर इंचि नना नम्मुता सिल्वानुसना कयदे इद सिन्ना सिट्टि रासतन. इदे पेनदा निजम कुर्पा आंदु, इव्ते मिमेट गट्टिगा निल्लिस मंटु, इंचि नना मीकु इद सिट्टिते रासि तेळियागोट्टिस वेहासेक मंतन.

13 मीवा लेसीगे बेबिलोनते पेन पेरता लोकुल्लक मंतुर, ओर मीक जोहार वेहासेक मंतुर. नावा मर्रिनसंतोर मरकुसगुडा मीक जोहार वेहासेक मंतोर.

14 मिमेट वरोंक-वरोर कय कल्पिसि पवित्र पावरमते जोहार कीम्ट. बोर अयते किरिस्तुने मंतुर मी अंटोर्क सांति दोर्कि.*

2 पत्र पत्र रासता रोंडो सिट्टि

इद सिट्टिता बारेमते गिचचो परिचयम

रासतोना पोरोल: पत्र

रासता कालम: इसवि सन 67

मोदाटा सिट्टि पत्र बोर्क अथे लोहचि मत्तोर, ओर्के मरा इद रोंडो सिट्टि रासतोर. मरा बारि रासतोर इत्ते, मुन्ने लोकुकुनहेंदाल विस्वासुल्कुंक तकलिपकु वायुंदुं, गानि इंदके परिस्तिती अल्हा हिल्ले, बदलांचता. अगाटा विस्वासुल्कुना लोप्पोने तप्पुड बोदा कराहनोर पुटसि सत्तेम पोल्लेक हरि हिलाकोंटा आसेके मत्ता.

अदुनहाटीं विस्वासुल्क तप्पुड पोल्लेने अर्राकोंटा सत्तेमते, विस्वासमते गट्टिगा मंदना आनि पेनदा पोल्ले मत्ताप ताकाना इंचि पत्र इद रोंडो सिट्टि रासतोर.

बगा बतल मंता

जोहार आनि परिचयम 1:1-2

विस्वासिना दर्सनम 1:3-21

तप्पुड बोदां कराहनोर 2:1-22

किरिस्तुना आकिरता वायमळ बारेमते 3:1-18

जोहार

1 नना सिमोन पत्रुन, येसु किरिस्तुना दासुन आनि प्रेरितुन आंदुन. बोर अथे मना पेन आनि मुक्ति हियना येसु किरिस्तुना सत्तेमताहेंदाल मावालेसीं विलुवाता विस्वासम दोर्किचुकुत्तुर, ओर्क इद सिट्टि रासेके मंतन.

2 पेन आनि मना सामि येसुना तेल्विहेंदाल मीकु कुर्पा, सांति वेल्लेने बेस्सेके मन्निकांटी.

पेन मनाकु अन्नि हीता

3 मना पिस्वर आनि बक्तिताहाटीं पेन दाना ताकतताहेंदाल मनाकु बतल गावाले अव अन्नि हीता. मनम अदुन एरपाट कीताहाटीं अव मनाकु दोर्कतां. अद मनाकुन दाना महिमा आनि बेसतनमहेंदाल केयता.

4 दुनियाते मनना कराब आसेनाल पुट्टना रोता गुनमताल तपिचुकुंचि, मनम पेनदा बेस गुनमता हिस्सेदार्क आयाना इंचि अद मनाकु विलुवाता पोल्ले हीता.

5 अदुनहाटीं मिमेट अन्नि तीरकुना कोसिस कीम्टु गदा, विस्वासमते बेसता गुनाल्क, बेसता गुनाल्कुने तेल्वि,

6 तेल्विते सततुन आपकुनमळ, सततुन आपकुनमळते दैरेनेम, दैरेनेमते बक्ति.

7 बक्तिते दादल-तम्मुना कळमळ, दादल-तम्मुना कळमळते पावरम कल्पट.

8 ओक्कला इव अन्नि पोल्ले मीलोप्पो मंचि बेस्सेके होनानयते, अव मीकुन मना सामि येसु किरिस्तुना तेल्विता बारेमते एक्को हुसार, बेस कबळलायक कीतां.

9 गानि बोनगा इव गुनाल्क हिल्लेंगो ओर गुडिड आंदुर, लक्कुटा नदर हिल्वोर आंदुर. ओना पडाना पापालकुन पेन नोर्सि ओना सुद्दिकरन कीतदगुडा मति मर्गतोर.

10 अदुनहाटीं विस्वासुल्कुनिटा! पेन मीकुन केय्से पेरता इत्ता पोल्लेतुन पक्का कियालय बस्केळक आतचचोन कोसिस कीम्टु, अल्हा कीते मिमेट बस्केने विस्वासमताल अर्सि होन्निर.

11 इल्हा मिमेट मना सामि, मुक्ति हियना येसु किरिस्तुना बस्केळक मंदना राज्यमते वेल्ले कदरते होळिया परांतिट.

12 अदुनहाटींगे, इव पोल्ले मीक तेळियसि मनिना, मीकु दोर्कता सत्तेमते मिमेट गट्टिगा निल्सि मनिना, नना मीकु बस्केळक मति कीसि हीसेक मनंतन.

13 नना इद मेंदुलते मत्तचोरजेम मीक इवुन मति कीसि हीसि मीकुन हुसार कियमळे, बेस इनकुंतन.

14 बारित्ते, मना सामि येसु किरिस्तु नाकु हुपिस्ताप, नावा मेंदुलतुन बिराने होळसंतन इंचि नाकु एरपाट मंता.

15 अदुनहाटीं नना हासोत्तंकागुडा मिमेट इव पोल्लेने बस्केळक मति कियनलायक मिमेट आयगोम इंचि नना कोसिस कीसंतन.

16 बारित्ते, मना सामि येसु किरिस्तुना ताकत आनि ओना मल्सि वायाना बारेमते मोमोट मीकु वेहतस्के, तयार कीसि वेहता कतन कल्पिसि वेहा हिल्लोम. गानि मोमोट ओना पेद्दातनमता वेलगुन कळकुने हळसि वेहतोम.

17 बस्के अथे पेनबाबानाहेंदाल कदर आनि महिमा दोर्कता, अस्के आ स्वर्गमताल, “ईर नावा पावरमगल्ला मरि आंदुर, ईनतोनि नना आनंदमते मंतन,” इंचि उंदि अल्किर आ महिमाता वेल्लुनाल केंजावाता.

- 18 स्वर्गमताल वाता आ अल्किरतुन केंजतस्के, मोमोट पवित्र गुट्टापोर्रो येसुनतोनि मत्तोम.
 19 मनाकु पेनदा कबुरतोरा पोल्लेपोर्रो एक्को बरोसा अनपिस्ता. अद पोल्ले हीकटते एलगना वेळसिलेसी दिसंता. अदुनहाटी पंगातारित्ते हक्केटा सुक्का मीवा मनसुने एलगनदाका आ पोल्ले परकारम ताकते मीके बेस.
 20 दर्मसास्त्रमते मत्तव पेनदा कबुरतोरा पोल्ले ओरा सतता मनसुना विचारमतोनि रासतव आयो, इदुन मिमेट मुन्ने एरपाट कियमळ गावाले.
 21 बारित्ते बवे बविस्वयानि मनकना इच्चाताहेंदाल वाया हिल्ले, गानि पवित्र आत्माते निंडता लोकुल्ले पेनदाहेंदाल वळकुंदुर.

2

आबद्दम कराहनोर

- 1 अस्के बल्हा लोकुल्लुकुना नड्डुम आबद्दम कबुरतोर मत्तुर, अल्हेने मीवा नड्डुमगुडा आबद्दम कराहनोर मंदानुर. नासडेम कियाना नियमकुन ओर मक्किस पीसि वांतुर आनि बोर सामि अय्ते ओर्कुन अस्तोर, ओनगुडा ओर ओप्कुन्नुर. इल्हा ओरद-ओरे नासडेमतुन बिराना ओरापोर्रो तरकुंतुर.
 2 वेल्ले लोकुल्लुकु ओरा सिग्गु हिल्ला कबाह्कुन हळसि ओरालेह्केन कियानुर. ओरसंतोराहाटीगे सत्तेमता हरि बदनमा आंता.
 3 आबद्दम कराहनोर, आस्तिताहाटी तिथ्यटा पोल्ले वेहिचे मीकुन ओरा पायदाहाटी वाळकुंतुर. ओर्क हीता सिक्साता आदेस मुन्नेटाल मंता, ओरा नासडेम कूर्कसेके हिल्ले.
 4 बारित्ते, बस्के अय्ते पेनदा दूतां पापम कीतां, अस्के पेन अवुनगुडा होळसा हिल्ले. न्यायमता रोजु वायानादाका अवुन नरकमते हीकटता पोक्काने वाटसि इरता.
 5 अचोने आयाका पेन एनकटा कालमता दुनियातुनगुडा होळसा हिल्ले, अद कालमते बक्ति हिल्ला लोकुल्लुकुना दुनियापोर्रो पेद्दा कम्मुळतुन वायागोटता. गानि सत्तेमता पोल्ले वेहता नोहानतोनि एडुरकुन पिसागोटता.
 6-7 अल्हेने सदोम, गमोरा सहरकुने लोत इनानोर वरोर नीतिमंतुड मत्तोर. ओर आ सहरता दुस्ट लोकुल्लुकुना दुस्ट कबाह्कुनाहेंका वेल्ले दुक्कमते मनुंदुर. अदुनहाटी पेन ओन सिक्साताल पिसागोटसि, आ सहरकुन बळ्दि कीसि पोहता. इल्हा बोर अय्ते बक्ति हिलाका पिसंतुर ओर्कु इसोटा सिक्सा वांता इंचि उदाहरनलेसी हुपिस्ता.
 8 आ नीतिमंतुड ओरा नड्डुम मत्ताहाटी ओर कियाना रोता कबाह्क हळसि, ओरा पोल्ले केंजसि, ओना जीवाक रोज-रोज इरगा बादा अनपिच्चुंदुर.
 9 इल्हा, बक्तिगल्लोर्कुन परिकसानाल बल्हा कापाळना आनि बक्ति हिल्लोर्कुन न्यायमता रोजुनदाका सिक्साते बल्हा वाटसि इराना इत्तद सामिक तेळियसे मंता.
 10 कास कीसि, बोर अय्ते पापमते अल्हेने मेंदुलता आसेता अदिकारमते मंतुर, ओर इरगा गरि आनि जिद्दिदेते निंडसि मत्ताहेंका स्वर्गमकु संबंदिचि मत्तोर्कुनगुडा तेराहलय वेरियुर.
 11 पेनदा दूतां अय्ते ओरकन्ना एक्को ताकत, बलम मत्तव आंदुं, अयना सामिना मुन्ने ओरा बारेमते तेराहनसोटा पोल्ले वळ्किसि ओरपोर्रो दोसेम दोस्सो.
 12 गानि ईर ई लोकुल्लुकु ओर्क तेळियवा पोल्लेना बारेमते तेराहसेक मनांतुर, दोर्कापीसि हळ्कानाहाटी पुटता बुद्दि हिल्ला जिवरासिनसंतोर ईर आंदुर. अवुनालेसी ईरगुडा नासडेम आंतुर.
 13 ओरा तप्पुड कबाह्कुन पीसि ओर्कु पलम दोर्कता. पोद्दला तिनुळ-उनुळ कियमळतेन वेल्लेन कुसि मंता इनकुंतुर. ओर मीवातोनि कलियसि गाटो तिननेकेगुडा अल्हेन कीसि ओर ओरा मजां येतसेके मनंतुर. अदुनहाटी ओर मीवा नड्डुम उंदि डाग आनि कलंक आंदुर.
 14 ओरा कळ्क बोगमतनमते निंडिस मंतां. ओर पापम कियाना मन्ना पर्र. विस्वासमते गट्टिगा हिल्लोर्कुन नळेह कीसि पापमते अरहंतुर. ओरा मनसु आस्तिक अलवट आसि मंता. ओर सापनेमते मत्तोरा मर्क आंदुर,
 15 ओर सवरटा हरदाल तप्पोत्तोर आंदुर, बोअरना मरि बिलाम इननोना हरि पीतुर. बिलामुं कु कराब कबाह्कुना कूलि पसंद मत्ता.
 16 गानि ओर कीता कराब कबाह्कुनाहाटी ओनकु तेळियागोटसि वेहमळ जर्गता. वळ्का वायवा उंदि गाडदि मनकना लेंगुने आ पेनदा कबुरतोना मुर्कतनमतुन आपता.
 17 ओर एर हिल्ला कुहि आनि दुमारम तेहकुंचि ओयाना मब्बु तेर्पे आंदुर. ओराहाटी बस्केळ्क हीकट मनना उंदि जेगा तयार कीसि मंता.
 18 ओर बत्तक ओज्जुवा पोंगुळ पोल्ले वळ्कसेके मनंतुर, तप्पुड हरि ताकानोरवेट्टाल तपिचकुंचि इंदके-इंदकेने बेसता हर्दे वातोर्कुन, ओर ओरा मेंदुलता रोता आसेना हेंदाल बोगमतनमते अरहंतुर.
 19 ओर कुद्दे कराब कबाह्कुना दासुल्लुकु आसि, इंकावरोन असोटा गतिताल तेंडांतोम इंचि पोल्ले हीतुर. बारित्ते वरोर मनकन बतलय्ते गेल्लसंतोरो, ओर अदुना दासुड आसि मनंतोर.
 20 ओरगिंटा मना सामि मुक्ति हियना येसु किरिस्तुना तेल्चिता हेंदाल दुनियाता कराब कबाह्कुनाल पलाते अरतंका, मर्रा अवे कराब कबाह्कुने हिरकिसि अवुना लोपोने ताकते, ओना गति मुन्नेटा गतिकन्ना आकिरता गति वेल्ले कराब मंता.

21 बारित्ते ओर सत्तेमता हरदुन एरपाट कीसि, ओर्क हीता पवित्र आदेसताल तप्पि होनमळकन्ना, अद हरि ओर्कु तेळियका मनमळे बेस मत्ता.
 22 इद ओरा बारेमते, “नय अद कक्कुतदुन तिनालय मर्रा मल्लंता, बेस नोरता पट्टि मर्रा बुदातेन पोलीता,” इनना निजम सान्नम परकारम जर्गता.

3

येसु मर्रा वांतोर

- 1 पावरमगल्लोरिटा! इद रोंडो सिट्टि नना मीक रासतन. इव रोंडु सिट्टिने मीवा पवित्र मनसुन जेगर्ताते इर्राट इंचि नना मति कीसि हीतन.
- 2 अदुनहाटी मिमेट पवित्र पेनदा कबुरतोर मुन्नेने वेहचि मत्ता पोल्लेन अल्हेने प्रेरितुल्लुकुना हेंदाल वेहतव सामि आनि मुक्ति हियानोना आदेसकुन मति इर्रागोम.
- 3 आकिर रोजकुने मीकुन कारेड्डालक कियानोर वायानुर, वासि ओर ओरा कराब इच्चाना परकारम ताकानुर, इद पोल्ले मीक मुन्ने तेळियमळ गावाले.
- 4 इका ओर वासि, “ओर मर्रा वांतोर इंचि हीता पोल्ले बतल आता? मावा एनकटा पेदूदालक अय्ते हासोत्तुर, दुनिया पुटतस्केटाल अन्नि पोल्ले बल्हा मत्तव अल्हे मंतां,” इंचि मीकुन पूसकीतुर.
- 5 इका ओर, वेल्लेन वर्सा मुन्ने पेन दाना पोल्लेतोनि बूमितुन, मब्बुन एताल पुटिस्ता. पुट्टिचि एतुन वेरे कीसि निल्हाता, इद पोल्ले ओर्क तेळियसिगुडा मति मर्रागुत्तुर.
- 6 अद कालमता दुनिया कम्मुळते मुळगिसि एताहेंदाले नासडेम आता.
- 7 गानि इदके मनना मब्बु, बूमितुन, अदे पोल्लेते तळमितोनि नासडेम कियाना रोजुनदाका कापाळसि इरसेक मंता. बक्ति हिल्वोरा न्यायम नासडेम आयाना रोजुनदाका अल्हेन मनंता.
- 8 गानि पावरमगल्लोरिटा! सामिनगा उंदि रोजु वेय वर्सानालेसीं आनि वेय वर्सा उंदि रोजुनलेसीं मनंतां इद पोल्लेतुन मति मर्रागुत्तुर.
- 9 सामि हीता पोल्ले पूरा कियालय ओर आल्सेम कीसेक मंतोर इंचि इच्चुर इंतुर, ओर अल्हा आल्सेम कीसेक हिल्लोर. गानि बोर मनकल नासडेम आयार्कोटा, अंटोर्क ओरा मनसु मार्सकुनना मोका दोर्कना इंचि मीवा बारेमते ओर्सकुंकेके मंतोर.
- 10 गानि सामि मल्लिस वायाना रोजु दोंगानलेसीं वांता. अस्के मब्बु पेदूदा आवाजतोनि दिसार्कोटा आंता. मब्बुने मनानव अन्नि तळमिते कर्गिस दांतां आनि बूमि, बूमिपोर्रीं मत्तव अन्नि वेसि दांतां.
- 11 इवन्नि नासडेम आयाना मंता, अदुनहाटी मिमेट पवित्र अल्हेन पेनदा पिस्वरते बल्हा मंदगोम, विचारम कीम्टु.
- 12 पेन वायाना रोजुनाहाटी मिमेट एदुर हळसेक मंतिर, अद बिराना वायाना इंचि कोरसेके मंटु. अद रोजु मब्बु तळमिते वेसि नासडेम आंता आनि अचुने मत्तव अन्नि बारे तळमि दगडाकु कर्गिस दांतां.
- 13 गानि पेन हीता पोल्ले परकारम मनम पूना मब्बु, पूना बूमिताहाटी एदुर हळसेक मंतोम. अगा सत्तेमे निल्लिस मनंता.
- 14 अदुनहाटी पावरमगल्लोरिटा, मिमेट इवुनाहाटी एदुर हळसेक मंतिर, अय्ते पेनदा मुन्ने सांतिते, डाग हिलाकोटा, दोसेम हिलाकोटा मनालय कोसिस कीम्टु.
- 15 मना सामिना ओप्के पीसि मनमळ मना मुक्तिहाटीगे इंचि इनकुंटु. सामि हीता बुदुदि परकारमे मना पावरमगल्ला पौलस दादल मीक इव पोल्ले रासतोर.
- 16 इवुना बारेमते ओर ओना अन्नि सिट्टिने रासतोर. गानि अय्तेटाल इच्चुं पोल्ले तेळियालय वेल्लेन कस्टम मंतां. करियवोर, उंदि पोल्लेते निल्लिस मनवोर, वेरे दर्मसान्नमते मत्ता पोल्लेन कीताप इवुनगुडा कीतुर. अल्हा कीसि ओरा नासडेमतुन ओरे तरकुंतुर.
- 17 अदुनहाटी पावरमगल्लोरिटा! मीक इव पोल्ले मुन्नेटाले एरपाट मंतां, नीति हिल्ला लोक्कुल्लुकुना तप्पुकुने हिरकिसि, मीवा गट्टिगा निल्लिस मत्ता हरदाल तप्पिसि होनाकोटा हुसारते मंटु.
- 18 मना सामि मुक्ति हियना येसु किरिस्तुना कुर्पाते, तेल्विते मिमेट बेस्सेके होंटु. इदके बस्केळ्ळ ओन्के पेदूदातनम दोर्किकांटी, आमीन.

1 योहान योहान रासता मोदाटा सिट्टि

इद सिट्टिता बारेमते गिचचो परिचयम

रासतोना पोरोल: योहान

रासता कालम: इसवि सन 85-95

येसुना वरोर प्रेरित योहान इद सिट्टि विस्वासुल्कुनाहाटी रासतोर. अदुनहाटी ओर येसुनतोनि मत्तास्केटा ओना अनुभवमतुन इद सिट्टिते रासि वेहतोर.

येसु किरिस्तु पुरागा पेन आनि पुरागा मनकलगुडा आंदुर. ओनापोर्रो विस्वासम इरतेने, मना पापालक मापि आसि मनाकु बस्केळक पिस्साना पिस्वर दोर्कता. पडाना रीति-रिवाज्कुन पीसि मनम ताका पर्रोम, इंचि अवुनाहेंदाल मनाकु बस्केळक पिस्साना पिस्वर दोर्का पर्रो.

बोर अयते किरिस्तुनपोर्रो विस्वासम कीतुर, ओर अंटोर वर्रोक्-वरोर पावरम कीसेके बेस कलियसि मंदना, अर्तम हिलुवा नियमाल्कुन होळसिसि किरिस्तु हुपिस्ता हरदेन ताकाना. इसोटा पोल्लें इद सिट्टिते योहान रासतोर.

बगा बतल मंता

जोहार आनि परिचयम 1:1-4

वेलगु आनि हीकटा 1:5-2:29

पेनदा पिलालक आनि देय्यमता पिलालक 3:1-24

सत्तेम आनि आबद्दम 4:1-6

पावरमता कबळ बतल 4:7-21

गेलसना विस्वासम 5:1-21

पिस्वर हिय्यना पोल्ले

1 मोट्टा मोदोल्लाल बोर अयते मत्तोर, ओना बारेमते मोमोट मीकु वेहचंतोम. ओन मोमोट केंजतोम, ओन मावा कळकुने हळतोम, मंचिगा हळसि मावा कयकुने ओन इट्टोम. पिस्वर हिय्यना पोल्ले ओरे आंदुर.

2 आ बस्केळक पिस्साना पिस्वर हिय्यना पोल्ले मोदाला पेनबाबानतोनि मत्तोर. ओन पेन मनकाना रूपमते मारियागोटसि बूमिते लोहताहेंका मोमोट ओन हळतोम, इंचि गवाइ वेहांतोम. अल्हेने आ बस्केळक पिस्साना पिस्वरता बारेमता कबुर मीकु वेहांतोम.

3 मोमोट अयते पेनबाबानतोनि ओना मर्रि येसु किरिस्तुनतोनि कलियसि उंदासि पिस्सेक मंतोम, अदुनहाटी मोमोट बतल अयते हळतोम, केंजतोम, अदुना बारेमते मीकुगुडा वेहासेक मंतोम. दीनहेंदाल मिमेटगुडा मातोनि कलियसि मनम उंदासि मंदकोम.

4 मिमेट मातोनि कलियसि मावा आनंदम पुरागा आयाना इंचि मोमोट इव पोल्लें मीकु रासेक मंतोम.

पेन वेलगु आंद

5 येसुनाहेंदाल मोमोट बद कबुर अयते केंजतोमो, अदे कबुर मीकु वेहांतोम. अद बतल इत्ते, पेन वेलगु आंद, दानागा गिचचोगुडा हीकट हिल्ले.

6 ओक्कला मनम पेनतोनि कलियसि मंतोम इंचि वेहचि, हीकटते ताकानयते मनम आबद्दम वळकंतोम, सत्तेमते ताकसेक हिल्लोम.

7 गानि पेन बल्हा वेलगुने मंता, अल्हा मनमगुडा वेलगुने ताकानयते, मनम वरोनतोनि वरोर कलियसि उंदासि मत्ताप मनंतोम. अस्के पेनदा मर्रि येसुना नेत्तुर, मनाकुन मना अन्नि पापालकुनाल पुरागा बेस साप कीता.

8 ओक्कला मनमगिंटा, महगा बदे पापम हिल्ले इंचि वेहकुनानयते, मनद मनमे पसांचकुचंतोम, मनालोप्पो सत्तेम हिल्ले.

9 गानि पेन नीति आनि विस्वासमगल्लद आंद. अदुनहाटी ओक्कला मनम मना पापालकुन दाना मुन्ने ओपकुनानयते, अद मना पापालकुन मापि कीसि, मनाकुन मना अन्नि तप्पुड कबाहकुनाल बेस साप कीता.*

10 ओक्कला, “मोमोट पापम किया हिल्लोम” इंचि मनम इनानयते, मनम पेनदुन आबद्दम हिळ्ळ अरहंतोम. दाना पोल्ले मनालोप्पो हिल्ले.

2

येसु मना दंटातोर आंदुर

1 नावा पिलालकुनिटा! मिमेट पापम कियामन्नि इंचि नना इव पोल्लें मीकु रासेक मंतन. गानि ओक्कला बोरन्ना पापम कियानयते, मनाहेंदाल पेनबाबानतोनि वळकालय ओनगा वरोर सहायम कियानोर मंतोर, ओरे नीतिमंतुड येसु किरिस्तु आंदुर.

* 1:9 बजन संहिता 32:5; नीतिवचन 28:13

2 मना पापालक मापि आयाना इंचि ओर मनाहाटीं मोक्कु आतोर. ओर सिराप मना पापालक मापि आयानाहाटींगे आयो, पूरा दुनियातोर पापालक मापि आयानाहाटीं मोक्कु आतोर.

3 मनम ओक्कला ओना आदेसकुन पीसि ताकानय्ते, ओन मनम बेस तेल्लिचकुत्तोम इंचि मनाकु बरोबर तेळियंता.

4 बोर अय्ते, “नना पेनदुन तेल्लिचकुत्तन,” इंचि इंतोर, गानि दाना आदेसकुन पीसि ताकोर ओर पोंगुळ आंदुर. ओनगा सत्तेम हिल्ले.

5 गानि बोर अय्ते पेनदा पोल्लेतुन पीसि ताकंतोर, ओनगा पेनदा पावरम निजमे पुरागा आता. दीनहेंदाले, मनम वरोनतोनि वरोर कलियसि उंदासि मंतोम इत्तद तेळियसि दांता.

6 बोर अय्ते, “नना पेनतोनि कलियसि पिस्सेक मंतन,” इंचि वेहंतोरो, ओर कुद्दु किरिस्तु पिसतसोंटा पिस्वर पिसागोम.

पूना तरिकाते पडाना आदेस

7 नावा पावरमगल्लोरिता! नना इंदके मीकु पूना आदेस रासेक हिल्लेन, मोदोताल मीकु तेळियसि मत्ता पडाना आदेसे आंदु.

8 अयना नना उंदि पूना आदेसतुन मीकु रासेक मंतन. इद किरिस्तुना लोप्पो, मीलोप्पो सत्तेमते मंता. बारित्ते हीकट माय्शि होनालय आसंता, सत्तेमता वेलगु अय्ते मेसेकेन मंता.

9 बोर अय्ते, “नना वेलगुने मंतन,” इंचि वेहकुंचि, ओना दंटा विस्वासिन हय्सोर, ओर इंकागुडा हीकटतेन मंतोर.

10 बोर अय्ते ओना दादन पावरम कींतोर, ओर वेलगुने निल्लिस मंतोर. ओनगा पापमते अर्ना लायकतद बदे पोल्ले हिल्ले.

11 गानि बोर अय्ते ओना दादन हय्सोर, ओर हीकटते मंतोर. हीकटतेन पिस्सेक मंतोर. हीकटहाटीं ओना कळ्ळु दिस्साकोंटा आताहाटीं, ओर बेके होंचंतोरो ओनद ओन्के तेळियो.

12 नावा पिलाल्कुनिटा! किरिस्तुना पोरोलतेन मीकु मीवा पापालकुना मापि दोर्कुता. अदुनहाटींगे नना मीकु इव पोल्लें रासेक मंतन.

13 बाबोरिता! मोट्टा मोदोल्लाल मत्तोम मिमेट तेल्लिचकुत्तिर, इंचि नना मीकु रासेक मंतन. लेय्युरिता! मिमेट सेड्डातनमतुन* गेल्लसतिर, इंचि नना मीकु रासेक मंतन. पिलाल्कुनिटा! मिमेट पेनबाबान तेल्लिचकुत्तिर इंचि नना मीकु रासेक मंतन.

14 बाबोरिता! मोट्टा मोदोल्लाल मत्तोम मिमेट तेल्लिचकुत्तिर, इंचि नना मीकु रासेक मंतन. लेय्युरिता! मिमेट गट्टिपळतिर. पेनदा पोल्ले मीलोप्पो निल्लिस मंतंता. मिमेट सेड्डातनमतुन गेल्लसतिर, इंचि नना मीकु रासेक मंतन.

15 दुनियातुन आयि दुनियाते मनना वस्तुकुन आयि पावरम कियमट.† ओक्कला बोरन्नागिंटा दुनियातुन पावरम कियानय्ते, ओनगा पेनबाबाना पावरम हिल्ले.

16 बारित्ते दुनियाते मननव इत्ते, मेंदुल्ला इच्चा, कळ्ळुकुना इच्चा आनि पिस्वरता गर्गा इव पेनबाबानगटाल वातव आयो. इव ई दुनियातवे आंदु.

17 ई दुनिया, दुनियाताल वाता इच्चां, इव रोंडगुडा माय्शि होनानुं, गानि बोर अय्ते पेनदा पोल्लेपोरो ताकंतोरो, ओर मात्रम बस्केळ्ळक पिस्सि मनानुर.

किरिस्तुना पगातोर

18 पिलाल्कुनिटा! इद आकिरता वेला आंद, किरिस्तुना पगातोर वायानुर इंचि मिमेट केंजसि मत्तिर. अल्हेने इंदके किरिस्तुना वेल्लेटोरे पगातोर वातुर. इदुनहेंदाल, इद आकिरता वेला आंद इंचि मनाकु तेळियंता.

19 ओर लोकुल्लक मना लोप्पोटाले पेय्सतुर, गानि ओर मनोर्क आयुर. ओर निजमे मनोर्क आसि मत्ते मनातोनि मंचि मन्नेर. ओर बोरे मनोर्क आयुर इंचि मनाकु तेळियानाहाटीं ओर अल्हा पेय्शि होत्तुर.

20 गानि मीवद अय्ते पवित्र मत्तोमहेंदाल अबिसेकम आता, अदुनहाटीं मिमेट अंतोर सत्तेमतुन एरपाट कीतिर.

21 मीकु सत्तेम तेळियो इंचि नना मीकु रासा हिल्लेन. मीकु सत्तेम एरपाटे मंता, इंका सत्तेमताहेंदाल बद्दे आबद्दम पोल्ले वायो इंचिगुडा मीकु तेळियसे मंता. अदुनहाटीं नना मीकु रासतन.

22 बोर अय्ते, येसुन “किरिस्तु” इंचि ओप्कुन्नोरो, ओर असल आबद्दम वळ्ळकानोर आंदुर. ओरे किरिस्तुना पगातोर आंदुर. ओर बाबन, मरिन ओप्कुन्नोर.

23 बोर अय्ते मरिन ओप्कुन्नोर, ओर बाबोनगुडा ओप्कुन्नोर. मरिन ओप्कुनानोर बाबोनगुडा ओप्कुंतोर.

24 मोदोल्लाल मिमेट बतल अय्ते केंजतिरो, अदुन मीलोप्पो बस्केळ्ळाहाटीं इर्राट. अल्हा इर्राय्ते, मिमेट मरिं आनि बाबोनतोनि उंदासि मंदकिट.

25 किरिस्तु मनाकु बस्केळ्ळक पिस्सना पिस्वर हीतन इंचि पोल्ले हीतोर, अद इदे आंद.

26 मीकुन पसांचालय हळ्ळना लोकुल्लुकुना बारेमते नना इव पोल्लें मीकु रासेक मंतन.

27 गानि बदनतोनि अय्ते मीवा अबिसेकम आता, अद मीलोप्पो निल्लिस मंतंता. अदुनहाटीं बोर मीकु कराहना अवसरम हिल्ले. मीलोप्पो मनना अबिसेकम, मीकु अन्निटवुना बारेमते कराहंता. अद सत्तेम आंद, दाना कराहमळ आबद्दमतद आयो. अद मीकु बल्हा कराहंता, अल्हा मिमेट किरिस्तुना लोप्पो निल्लिस मंटु.

* 2:13 सेड्डातनमतुन देय्यमतुन. † 2:15 दुनियातुन आयि दुनियाते मनना वस्तुकुन आयि पावरम कियमट दीना अर्तम बतल इत्ते, इद दुनियाताहेंदाल दोर्कना सुकम, दिस्तदुनना हळ्ळसि आसे पडमळ, दुनियाते सुकम हिच्याना वस्तुनाहाटींगे तन्लाडमळ. इसोंटा पोल्लेन पावरम कियाना मनकल पेनदुन पावरम कियोर इत्ताप.

28 अदुनहाटीं नावा पिलाल्कुनिटा! मिमेट किरिस्तुने निल्सि मंटु. अल्हा मत्ते, ओर बस्के अय्ते इद बूमिटे मल्सि वायानुर अस्के, मनम वर्रे हिल्वोरम आसि ओर वातंका ओना मुन्ने सिग्गु वायाकोटा मंदा परकोम.

29 मिमेट ओक्कला किरिस्तु नीतिमंतुड इंचि तेल्लिचकुत्तोर आयानय्ते, सत्तेमता कबळ कियाना हरेक मनकल पेनदाहेंदाले पुट्टोर इंचिगुडा मीकु तेळियंता.

3

मनम पेनदा पिलाल्कुम आंदुम

1 हुळट! पेन मनाकुन बच्चोन वेल्ले पावरम कीता! अदुनहाटीं मनाकु पेनदा पिलाल्क इंचि पोरोल दोर्कता, आनि मनम आंदुमगुडा. गानि दुनियातोर पेनदुन एरपाट किय्युवाहेंका ओर मनाकुन तेल्लिचकुन्नु.

2 नावा पावरमगल्लोरिता! इंदके मनम पेनदा पिलाल्कुम आंदुम. गानि वायाना कालमते मनम बल्हा बतल मनंतोम इत्तद, इंका तेळिया हिल्ले. अय्नागानि, किरिस्तु मर्रा मल्सि वायानुर अस्के, ओर बल्हा मंतोर अल्हे ओन मनम हूळंतोम. अस्के मनमगुडा ओनालेसीगे मनंतोम इंचि माकु एरपाट मंता.

3 किरिस्तुनपोर्रे इसोटा आसे इर्रांना हरेक मनकल किरिस्तु पवित्र मत्ताप कुट्टुगुडा पवित्र कीकुंतोर.

4 पापम कियाना हरेक मनकल, दर्मसास्त्रमता विरोदमते मनंतोर. दर्मसास्त्रमता विरोदमते ताकमळ इत्तेन पापम आंद.

5 गानि पापाल्कुन लक्कु कियानाहाटींगे किरिस्तु वातोर इंचि मीकु एरपाटे मंता. ओनगा बतले पापम हिल्ले.

6 बोर अय्ते किरिस्तुना बक्किते निल्सि मनंतुर, ओर पापम कीसेके मन्नु. गानि बोर अय्ते पापम कीसेके मनांतुर, ओर किरिस्तुन हूळा हिल्लुर, ओन एरपाटगुडा किय्या हिल्लुर.

7 पिलाल्कुनिटा! मीकुन बोरे पसांचकोटा जेगर्ता मंटु. बोर अय्ते सत्तेम कबाहक कीतोर, ओर किरिस्तुनलेसी नीतिमंतुडे आंदुर.

8 पापम कीसेके मनना हरेक मनकल देय्यमता बाजुनोरे आंदुर. बारित्ते सुखनाले देय्यम पापम कीसेके वासंता. गानि देय्यमता कबाहकुन नासडेम कियानाहाटींगे पेनदा मर्रि इद दुनियाते वातोर.

9 पेनदा संतानम आतोर बोरे आयिर, ओरा लोप्पो पेनदा गुनम मनंता. अदुनहाटीं ओर पापम किय्युर. ओर पेनदा संतानम आताहाटीं, ओर पापम किय्ये पर्र.

10 इदुन पीसे, पेनदा पिलाल्क बोर आंदुर, देय्यमता पिलाल्क बोर आंदुर? इत्तद तेळियसि दांता. बोर अय्ते सत्तेमते ताकुर, ओरा दादन पावरम किय्युर, ओर पेनदा संतानम आयुर.

वरोक-वरोर पावरम कियाना

11 मनम वरोक-वरोर पावरम किय्यागोम इनना ई बोदा, मिमेट सुखनेन केंजतद आंद.

12 मनम काइनुनालेसी मननायो. ओर देय्यमता बाजुनोर आसि ओना तम्मुन हक्कतोर. ओर ओना तम्मुन बद कारनमते हक्कतोर? बारित्ते, ओना तम्मुना कबाहक नीतितव मत्तां आनि ओना कबाहक बारे तप्पुनव मत्तां.

13 विस्वासुल्कुनिटा! मीकुन दुनियातोर हय्सुर, अस्के मिमेट इचंत्रम आयमट.

14 मनम मना दंताता विस्वासुल्कुन पावरम कीतोम. अदुनहाटीं मनम हामुरताल पेय्सि पिस्वरते वातोम, इंचि मनाकु एरपाट मंता. बोर अय्ते पावरम किय्योर ओर हातोनेलेसी मंतोर.

15 बोर अय्ते ओना दादन, तम्मुन हय्सोर, ओर मनकन हक्कानसंतोर आंदुर. मनकन हक्कानोनगा बस्केळक पिस्सना पिस्वर मनो इंचि मीके अय्ते एरपाटे मंता.

16 किरिस्तु मनाहाटीं ओना सतता जीवा हीतोर. दीनाहेंदाल, पावरम इत्ते बतल मनाकु तेळियता. अदुनहाटीं मनम मना दंता विस्वासुल्कुनाहाटीं जीवा हियालय तयार मनगोम.

17 गानि बोनागन्ना वेल्लेन दनम-संपत्ति मंचि, ओना दादांको, तम्मुंको अवसरम मंता इत्तद तेळियसिगुडा ओना जीवा नोय्याकोटे, ओनगा पेनदा पावरम मंता इंचि बल्हा इनकोम?

18 अदुनहाटीं नावा पिलाल्कुनिटा! मनम मना पावरम सिराप तोळ्दा पोल्लेनेन आयो गानि, सत्तेमते बेसता कबाहक कीसि पावरम हुप्साना.

19 अल्हा कीतेन, मनम सत्तेमता बाजुनोरम इंचि मनाकु एरपाट आंता. अस्के मनम वेरियाकोटा दैरनेमते पेनदा मुन्ने नित्ता पर्रतोम.

20 मना मनसु मनापोर्रे दोसेम दोस्सिनागानि मना मनसुंका पेन बच्चोनो पेद्देद आंद, दान्क अन्नि तेळियंता.

21 पावरमगल्ला दंतातोरिता! मना मनसु मनापोर्रे दोसेम दोस्साकोटे, पेनदा मुन्ने मनम दैरनेमते मना पर्रतोम.

22 इंका दाना आदेस परकारम ताकसेके, अद कूस आयाना कबाहक कीसेके मत्ते, मनम बतल तल्किना अद मनाकु हीता.

23 दाना आदेस बतल इत्ते, मनम दाना मर्रि येसु किरिस्तुनपोर्रे विस्वासम इर्रांना आनि ओना आदेस परकारम मनम वरोक-वरोर पावरम कियाना.

24 बोर अय्ते पेनदा आदेस परकारम ताकंतोर, ओर पेनदा लोप्पो निल्सि मनंतोर, ओनालोप्पो पेन निल्सि मनंता. इल्हा, पेन मना पिस्वरते निल्सि मनंता इंचि, मनाकु हीता पवित्र आत्माहेंदाल, एरपाट आंता.

4

सत्तेमता आत्मा आनि आबद्दमता आत्मा

1 पावरमगल्लोरिता! नहगा पेनदा आत्मा मंता इनना अंटोरपोर्रो विस्वासम कियमट. मोमोट पेनदा कबुरतोरम इंचेके, तप्पुड बोदां कराहनोर वेल्लेन मंदि दुनियाते वेलियसंतुर. अदुनहाटीं बरोसा कियाका मुन्ने आ वळकानोनगा मनना आत्मां पेनदागटाल वातावेना इंचि, परिकसा कीसि हुळट.

2 पेनदा आत्मातुन मिमेट इल्हा एरपाट किय्याना; बद आत्मा अय्ते, “येसु किरिस्तु मनकना रूपमते वातोर,” इंचि ओप्कुंता, आ हरेक आत्मा पेनदाहेंदाल वातद आंद.

3 गानि बद आत्मा अय्ते, येसु मनकना रूपमते वातोर इंचि ओप्कुन्नो, अद आत्मा पेनदाहेंदाल वातद आयो. अद किरिस्तुना पगातोना आत्मा आंद. असोटा आत्मा वायाना मंता इंचि मिमेट मुन्नेन केंजसि मत्तिर, अद इंदके दुनियाते वासि मंता.

4 पिलाल्कुनिटा! मिमेट पेनदा हेंदोर आंदिर. मीलोप्पो मनना आत्मा, दुनियाते मनना आत्माकन्ना बच्चोनों पेद्देद आंद. अदुनहाटीं आ आबद्दम कबुरतोर आत्मान मिमेट गेल्सतिर.

5 आबद्दम कबुरतोर आत्मां दुनियातव आंद, अदुनहाटीं अव दुनियाता पोल्लेगे वळकंतां, दुनियातोर अबुना पोल्ले केंजंतुर.

6 गानि मनम पेनदा लोकुल्क आंदुम. पेनदुन एरपाट कियानोर, मना पोल्ले केंजंतुर. गानि पेनदुन एरपाट कियवोर, ओर मना पोल्ले केंजुर. इल्हा मनम, बद सत्तेमता आत्मा आनि बद आबद्दमता आत्मा इंचि परक एरपाट किया परंतोम.

पेन पावरम आंद

7 पावरमगल्लोरिता! पावरम पेनदाहेंदाल वातद आंद. अदुनहाटीं मनम वरोंक-वरोर पावरम कियागोम. पावरम किय्याना हरेक मनकल पेनदा संतानम आंदुर. ओर पेनदुन एरपाट कीतोर.

8 पेन पावरम आंद. अदुनहाटीं बोर अय्ते पेनदुन पावरम किय्योर, ओर पेनदुन एरपाट किय्योर.

9 दाना मर्रिनाहेंदाल मनाकु बस्केळ्क पिस्साना पिस्वर दोर्कना इंचि पेन दाना वरोरे मर्रिन, इद दुनियाते लोहता. इल्हा पेन, मनापोर्रोटा दाना पावरमतुन मनाकु हुपिस्ता.

10 मनम पेनदुन पावरम कीतोम इंचि आयो, गानि पेने मनाकुन पावरम कीता. अदुनहाटींगे, पेन दाना मर्रिन मना पापाल्क मापि आयाना इंचि मोक्कु आयालय लोहता. इदे निजम पावरम आंद.

11 पावरमगल्लोरिता! पेन मनाकुन इच्चोन पावरम कीता अय्ते, मनमगुडा वरोंक-वरोर पावरम कियगोम.

12 पेनदुन बोर बस्केन ह्ळा हिल्लुतुर. गानि मनम, वरोंक-वरोर पावरम कियानय्ते पेन मनालोप्पो मनंता आनि दाना पावरम मनालोप्पो पुरागा आंता.

13 इल्हा पेन मनालोप्पो मनंता, मनम पेनदा लोप्पो मनंतोम इंचि मनाकु एरपाट आंता. बारित्ते, पेन मनाकु दाना सतता आत्मातुन हीता.

14 दीन मनम ह्ळतोम आनि मनम दीना साक्सि मंतोम, मना पेन बाबल दुनियाता पापाल्क पायिचालय ओना मर्रिन लोहतोर.

15 बोरन्ना ओक्कला, येसुए पेनदा मर्रि इंचि ओप्कुनानय्ते, पेन ओनालोप्पो निल्सि मनंता, ओर पेनदा लोप्पो निल्सि मनंतोर.

16 पेन माकुन पावरम कीता इंचि इंदके तेलिचकुत्तोम. माकु दानपोर्रो विस्वासमगुडा मंता. पेन पावरम आंद. अदुनहाटीं बोर अय्ते पावरम कीतोर, ओर पेनदा लोप्पो मनंतोर, पेन ओनालोप्पो मनंता.

17 मनालोप्पो पेनदा पावरम पुरागा आंता. अदुनहाटीं पेन न्यायम कियाना रोजुने मनम वेरियाकोटा मना परकोम. बारित्ते किरिस्तु मत्तापे, मनमगुडा इद दुनियाते पिस्सेक मंतोम.

18 पावरमते वेरिं मन्नो. पुरागा आता पावरम, वेरितुन पोळ्गागोट्टंता. वेरिं सिक्साक संबदिस्तद आंद, अदुनहाटीं बोर अय्ते वेरियंतुरो, ओरगा इसोटा पावरम पुरागा आयापर्रो.

19 मनम पावरम कीतोम, बारित्ते मुन्ने मनाकुन पेन पावरम कीता.

20 ओक्कला बोरन्ना, “नना पेनदुन पावरम कीतन,” इंचि वेह्चि, ओना दादन हय्साकोटे, ओर आबद्दम मनकल आंदुर. बारित्ते ओर ह्ळना ओना दादाने ओर पावरम कियुवस्के, ह्ळवा पेनदुन ओर बल्हा पावरम किया परांतोर?

21 पेनदाहेंदाल मनाकु इदु आदेस दोर्कता.

बोर अय्ते पेनदुन पावरम कीतोर, ओर ओना दादानगुडा पावरम कियाना.

5

1 येसु, किरिस्तु आंदुर इंचि बोरय्ते विस्वास कीतोर, ओर पेनदा मर्रि आंतोर आनि बोरय्ते पेनतोनि पावरम कीतोर, ओर दाना मर्रिनतोनि इंका पावरम कीतोर.

2 इल्हा मनम बस्के अय्ते पेनदुन पावरम कीतोम आनि दाना आदेसकुना परकारम ताकंतोम अय्ते, अस्के एरपाट कीतोम गदा मनम पेनदा मर्कुनतोनिगुडा पावरम कीतोम.

3 पेनदा आदेसकुना परकारम ताकते, दानतोनि पावरम कीतोम इंचि एरपाट आंता. दाना आदेसकु कटिनम (वसेम आयवसोटेव) हिल्लें.

- 4 बारित्ते बोरय्ते पेनदा मर्रि आंतोर, ओर दुनियातुन गेल्संतोर आनि मना विस्वासमहेंदाले दुनियापोर्री मनाकु गेल्पु दोर्कता.
- 5 येसु पेनदा मर्रि इंचि बोरय्ते विस्वासम कीतोर, ओरे दुनियापोर्री गेल्संतोर.
- 6 मनागा एर आनि नेत्तुरतोनी वातोर, ओर येसु किरिस्तु आंदुर. सिराप एतोनि आयो, एर आनि नेत्तुरतोनी. आनि ओना साक्सि हियानद आत्मा आंदु. बारित्ते आत्मे सत्तेम आंदु.
- 7 साक्सि हियनोर मुव्वुर आंदुर.
- 8 आत्मा, एर आनि नेत्तुर आनि ईर मुव्वुरा साक्सि उंदे आंदु.
- 9 मनम मनकनाहेंदाल हीता साक्सितुन मानांचंतोम अय्ते, पेनदाहेंदाल हीता साक्सि बच्चोर पेदूदा. बद साक्सि अय्ते पेन तना मर्रिना बारेमते हीता. अदे साक्सि पेनदा साक्सि आंदु.
- 10 बोरय्ते पेनदा मर्रिनपोर्री विस्वास इरंतोर, ओर ओनालोप्पो पेनदा साक्सितुन इरंतोर. पेन इत्ता पोल्लेनपोर्री बोरय्ते विस्वास इर्रीर, ओर पेनदुन आबदूदम कीतोर. बारित्ते पेन तना मर्रिना बारेमते हीता साक्सितुन ओर विस्वास किया हिल्लोर.
- 11 पेन मनाकु बस्केळक पिस्सना पिस्वर हीता, ई पिस्वर दाना मर्रिनगा मंता. इदे पेनदा गवाइ आंद.
- 12 बोरय्ते पेनदा मर्रिन स्विकार कीतोर, ओनाकु ई पिसवर दोर्कता गानि बोनगा अय्ते पेनदा मर्रि हिल्लोर, ओनगा ई पिसवर हिल्ले.
- इंदके हामुर हिल्वा पिस्वर मनद**
- 13 पेनदापोर्री विस्वास इरनोरिटा! बस्केळक पिस्सना पिस्वर मिहगा मंता. दीन मिमेटु एरपाट कीम्टु इंचि नना मीकु इव पोल्लें रासा मंतन.
- 14 मना पेन पोर्री इदु विस्वास मंता. मनमगिंटा दाना मनसु मत्ताप तल्कानय्ते अद मनद केंजंता.
- 15 आनि मनम बतलय्ते दान तल्कंतोम अद केंजंता, इदु मनाकु एरपाट मंता. दानहाटी मनम दान बतलय्ते तल्कंतोम, अव मनाकु दोर्कतां इदिका मनाकु एरपाट मंता.
- 16 ओक्कला मना दंटा विस्वासि हामुर हिल्वा पापम कियनेके ह्ळानय्ते ओनाहाटी पारतना कियागोम. पेन ओना पापमताल पायिचंता. इत्ते बोरय्ते हामुरते होनानसोटा पापम कीतोर ओनाहाटी आयो. इसोटा पापमगुडा मनंता दाना परिनाम हामुरे. नना मीकुन इसोटा पापमताहाटी पेनदुन तल्कागोम इंचेके हिल्ले.
- 17 अन्नि कराब कबाहक पापमे आंदु. गानि अन्नि पापालक हामुरताहेके ओयों.
- 18 मनाकु एरपाट, बोरय्ते पेनदा मर्रि आतोर, ओर पापम किय्योर. पेनदा मर्रि ओना कापाळांतोर. आ देय्यम ओना बतल किया पर्री.
- 19 मनाकु एरपाट मनम पेनदा हेंदोरम आंदुम. पूरा दुनिया आ देय्यम कय्दे मंता.
- 20 गानि मनाकु एरपाट मंता, पेनदा मर्रि वासि, मनम निजम पेनदुन एरपाट कियागोम इंचि मनाकु तेल्वि हीतोर. बारित्ते मनम निजम पेनदुन एरपाट कियागोम इंचि. इत्ते, मनम पेनदा मर्रि येसु किरिस्तुनलोप्पो मंतोम. पेनबाबाले निजम पेन आंदुर आनि बस्केळक पिस्सना पिस्वर ओरे आंदुर.
- 21 पिलाल्कुनिटा! मिमेटु मूर्तिनाल लक्कु मंदु.

2 योहान योहान रासता रोंडो सिट्टि

इद सिट्टिटा बारेमते गिचचो परिचयम

रासतोना पोरोल: योहान

रासता कालम: इसवि सन 85-95

येसुन नम्मुकुत्ता विस्वासुल्लुकु बद्द सत्तेमतुन पीसि ताकाना? येसु किरिस्तु मनकना रूपमते पुट्टिस वायाहिल्लोर इंचि वेहानोर वेल्लेन मंदि मंतुर. अय्ते ओरागटाल बल्हा जेगर्ता मंदगोम? मनम कीता विस्वासमता पलम पुरागा दोर्कनदाका मुन्ने बल्हा पिस्साना? तप्पुड बोदां कराहना गुल्लुकुन एरपाट कीसि, ओरा बोदानाल लक्कु मनना. इसोंटा पोल्लेना बारेमते योहान इद सिट्टिते रासतोर.

बगा बतल मंता

जोहार आनि परिचयम 1-3

पावरम कियमळ बारेमता पोल्ले 4-6

तप्पुड बोदां कराहनोरागटाल जेगर्ता मंटु 7-11

आकिरता बोदां 12-13

वरोंक-वरोर पावरम कियमळ बारेमता पोल्ले

1-2 नना मीवा कलिसियाते बेस पोरोल होत्ता मनकन आंदुन. पेन पेरता बाई आनि दाना पिलाल्कुंक,* इद सिट्टि रासेके मंतन. नना मीकुन पावरम कीतन. नना वरोने आयो, पेनदा सत्तेमतुन तेल्लिचकुत्तोर अंतोरे मीकुन पावरम कीतुर. बारित्ते, मनम सत्तेमतुन तेल्लिचकुत्तोम. अदुनहाटी अद सत्तेम मना पिस्वरतगा निल्लिस मंता आनि बस्केळ्ळे अद मनातोनि मनंता.

3 पेनबाबानहेंदाल आनि पेनबाबाना मरि येसु किरिस्तुनहेंदाल कुर्पा, दया, सांति इव सत्तेमते आनि पावरमते बस्केळ्ळक मनातोने मन्निंकांटी.

4 पेनबाबाल मनाकु हीता आदेस परकारम, नीवा इच्चुर पिलाल्क, सत्तेमते ताकानदुन हळसि नाकु वेल्लेन कुसि आसेके मंता.

5 अय्ते बाई! नना मीकु बतल विनंति कीसेके इत्ते, मनम वरोंक-वरोर पावरम कियाना. इदु पूना आदेस इंचि नना मीकु रासेक हिल्लेन, गानि मुन्नेटाल मनगा मत्तादे आंद.

6 मिमेट सुस्वनाल बतल अय्ते केंजतिरो, अल्हेने वरोंक-वरोर पावरम कीम्टु इंचि पेन आदेस हीता. आ आदेसकुना परकारम ताकमळे पावरम कियमळ आंद.

तप्पुड बोदां कराहनोरागटाल जेगर्ता मंटु

7 येसु किरिस्तु मनकना रूपमते पुट्टिस वायाहिल्लोर इंचि वेहचि पसांचनोर वेल्लेन लोकुल्लक इद दुनियाते पेयसतुर. इसंतोरे हळ्ळा! पसांचनोर आनि किरिस्तुना पगातोरक.

8 मोमोट कीता कबाहक, मीहेंदाल एर्तम आयाकोटा हळकुंटु. कीता कबाहकुना पुरागा इनाम दोर्कानादाका जेगर्ता मंटु.

9 किरिस्तु कराहता बोदा परकारम ताकाकोटा बोर अय्ते मुन्ने-मुन्ने दांतोर, ओर पेनतोनि कलिया हिल्लोर. गानि बोर अय्ते किरिस्तु कराहता बोदा परकारम ताकंतोर, ओनतोनि पेनबाबाल, मरि इच्चुरगुडा मनांतुर.

10 ओक्कला बोरन्ना मिहगा वासि, किरिस्तु कराहता बोदा तप्पा वेरे बोदा कराहनय्ते, ओन मी लोता लोप्पो वाया हियमटु, इंका ओन्क जोहारगुडा कियमट.

11 बारित्ते, बोर अय्ते असंतोन हेरा हींतोर, ओर ओना तप्पुड कबाहकुने कलियसि मत्तोना लेक्काते वांतोर.

आकिरता जोहार

12 इंका वेल्लेन पोल्ले मीहाटी रासाना इंचि नावा मनसु मंता. गानि अकुन नना साइते कायदोमपोर्री रासोन. बारित्ते, मिहगा वासि मीकुन कलियसि, मीतोने आनि पोल्ले वळ्ळकाना इंचि मनसुने आसे पडसेक मंतन. अस्के मना कुसि इत्तदगुडा पुरागा आंता.

13 पेन पेरता मीवा अक्कना पिलाल्क,† मीकु जोहार वेहासेक मंतुर.

* 1:1-2 पेन पेरता बाई आनि दाना पिलाल्कुंक दीना अर्तम पेन पेरता कलिसियातोर. योहान इद सिट्टि इदे कलिसियाकु रासतोर. † 1:13 पेन पेरता मीवा अक्कना पिलाल्क योहान इदे कलिसियाताल इद सिट्टि रासि लोहातोर.

3 योहान योहान रासता मूडो सिट्टि

इद सिट्टिता बारेमते गिचचो परिचयम

रासतोना पोरोल: योहान

रासता कालम: इसवि सन 85-95

अद कालमते तप्पुड बोदां कराहनोर वेल्लेन मंदि वासि कलिसियातुन पाड किय्युंदुर. गानि अट्टेटाल इच्चुर सत्तेम बोदां कराहनोरगुडा मत्तुर. अय्ते कलिसियाते पेद्दा इंचि निल्ला मनकल, कलिसियाता कळमातोरुन आनि पलाताल कलिसियाते वायाना हेडमितोरुन बल्हा हळकुनना? इदुना बारेमते योहान रासतोर. तप्पुड बोदानोरुन एरपाट कीसि ओरागटाल लक्कु मनना आनि सत्तेम बोदां कराहनोरुंक सहायम कियाना, इल्हा अंतोरुनगुडा कलिसियाता पेद्दा मनकल बेस हळकुनागोम इंचि योहान इद सिट्टिते रासतोर.

बगा बतल मंता

जोहार आनि परिचयम 1-4

गयेसुंक जोहार वेहमळ 5-8

दियुतिरपेसना बारेमते 9-10

देमेतिरयुसना बारेमते 11-12

आकिरता बोदां 13-15

योहानुनाहेंदाल गयेसुंक जोहार

1 नना योहानुन, कलिसियाते बेस पोरोल होत्ता वरोन मनकन आंदुन. नना बोन अय्ते निजमते पावरम कीतन आ गयेसुंक इद सिट्टि रासेक मंतन.

2 पावरमगल्ला दंटातोना! निमे बक्तिते पेनतोनि बल्हा बेस मंचतिनो, अन्नि पोल्लेनेगुडा निमे अल्हेने मन, नीकु बदे रोगम वायाकोटा निमे बस्केळ्ळक सुकमते मनना इंचि नना पारतना कीसेके मंतन.

3 बारित्ते, गयुस निजमे सत्तेमते ताकसंतोर इंचि इच्चुर दादालोर निहागटाल वासि, नीवा बारेमते गवाइ वेहतुर. अदुन केंजसि नाकु वेल्लेन कुसि आता.

4 नावा पिलाल्क सत्तेमते ताकसेक मंतुर, इत्ता पोल्ले नाकु वेल्लेन कुसितुन हीता. दीनकु तप्पा इंका बद्दे पोल्ले केंजसि नाकु इच्चोन कुसि आयो.

5 पावरमगल्ला दंटातोना! निमे एरपाट कियवोर निहगा वायिनागानि, वाता दादालोराहाटीं निमे बतल अय्ते कीतिनो, अद निमे वेल्ले विस्वासमतोनि कीतिन.

6 ओर दादालोर नीवा पावरमता बारेमता गवाइ कलिसियाते वेहतुर. पेनदा लोकल्लुकुन बल्हा अय्ते साल्ता कीतुरो अल्हा, निमे ओरा सेवा कीसि साल्ता कियानय्ते, नीवाहाटीं इंका बेस मंता.

7 बारित्ते ओर किरिस्तुना सेवाहाटीं पेय्स्तुर आंद. विस्वासम कियवोराहेंदाल ओर बतले सहायम येतुर.

8 असोटा मनकालोरुंक मनम सहायम कीसि ओरुंकुन बेस हळना. अस्के मनमगुडा सत्तेमताहाटीं कबळ कियानोरा लेक्काते वांतोम.

दियुतिरपेस आनि देमेतिरयुस

9 नना कलिसियातोरुंक उंदि सिट्टि रासि लोहतन. गानि कलिसियाते पेद्दा आयालय हळना दियुतिरपेस इनानोर नना वेहानदुन ओप्कुंचेक हिल्लोर.

10 अचोने आयका, कलिसियाते पूनें वायाना विस्वासुल्लुकुन ओर अय्ते बेस हळोर आनि हळकुंतोम इनानोरुंकुनगुडा बेस हळा हिय्योर. इंका बोअर अय्ते बेस हळकुंतुरो ओरुंकुन कलिसियाताल पलाते पेचहांतोर. मावा बारेमते कराब-कराब पोल्ले वळ्ळंतोर, अदुनहाटीं नना बस्के अय्ते वांतन, अस्के ओना बारेमते कलिसियाते अंतोरुंक वेहांतन.

11 पावरमगल्ला दंटातोना! निमे ओनालेसीं कराबता जोलिक होन्मा, सिराप बेस बतल अदे कीसेके मन. बेसता कबाहक कियानोर पेनदा मनकल आंदुर, सेड्डा कबाहक कियानोर पेनदा मनकल आयोर.

12 देमेतिरयुसना बारेमते अंतोरुगुडा बेसतोर इंचि गवाइ वेहांतुर. पेनदा सत्तेमते ताकतोर इंचि सत्तेमता नदरतेगुडा ओर बेस मनकल आंदुर. ओर बेसतोर इंचि ननागुडा गवाइ हीतन, नावा गवाइ सत्तेम इंचि मीकु अय्ते एरपाटे मंता.

आकिरता जोहार

13 नीकु वेहालय नहगा इंका वेल्लेन पोल्ले मंतां, गानि साइतोनि ई कायदोमते रासमळ नाकु इस्टम हिल्ले.

14 बिरानेन नीकु कलियना इंचि नना आसे पडसेक मंतन. कलियतस्के, मनम मोकोम मुन्नेन वळ्ळुकुनकोम.

15 पेन बाबल हिय्यना सांति बस्केळ्ळक नीतोनि मन्निकांटी. इग्गेटा नीवा दंटागाह्क नीकु जोहार वेहासेक मंतुर. अगा मनना अंटोर दंटागाह्कुंक पोरोल येत्सि नावा जोहार वेहा.

यहूदल यहूदल रासता सिट्टि

इद सिट्टिता बारेमते गिचचो परिचयम

रासतोना पोरोल: यहूदा

रासता कालम: इसवि सन 70-80

इद पुस्तकमतुन याकोबना तम्मुर यहूदल रासतोर. येसु किरिस्तुना तम्मुरकुनाल ईर वरोर तम्मुर आंदुर.

उंदि मल्का पेनदुन विस्वासम कीता पजा पापम कियिना बतल आयो इंचि अगाटा आबदूदम कराहना गुस्लक विस्वासुलकुंक करहुंदुर. अदुनहाटी यहूदल विस्वासमतुन कापाळनाहाटी आबदूदम कराहनोरा विरोदमते इद सिट्टि रासतोर.

बगा बतल मंता

जोहार आनि परिचयम 1-2

तप्पुड बोदां कराहनोरा नासडेम बारेमते कोन्नि पोल्लें 3-16

विस्वासमते गट्टिगा मनालय केयमळ 17-23

आसिर्वाद आनि दन्यवाद 24-25

जोहर

1 नना यहूदन, येसु किरिस्तुना सेवकुन आनि याकोबुना तम्मुर आंदुन. पेनबाबाल मीकुन केयि पावरम कीतोर आनि येसु किरिस्तुना कय्दे कापाळसेक मंतोर, मी अंतोर्क नना जोहर कीतन.

2 मीक दया, सांति, पावरम वेल्लेन दोर्किकांटी.

सत्तेमतुन कापाळमळ

3 पावरमगल्लोरिता! मनाक अंतोर्क दोर्कता मुक्किता बारेमते मीकु रासाना इंचि इनकुंचेके मत्तन, गानि इंदके विस्वासमता बारेमते रासि दाना सत्तेमतुन कापाळनाहाटी मीक तेळियागोटसि वेहाना इंचि नाक अब्सरम अनपिस्ता. ई सत्तेमतुन पवित्र लोकुलकुंक बस्केळताहाटी उंदे मल्का हियमळ जर्गता.

4 बारित्ते चुपचाप इच्चुर लोकुलक मीलोप्पो होळियतुर, ओर पेनदा बक्तुलक आयुर. ओर पेनदा कुर्पातुन बिगडांचि पापमता कबाहक कियानाहाटी मना वरोरे मालक सामि येसु किरिस्तुन ओप्कुन्नुर. असंतोर्क सिक्सा आंता इंचि मोदाटाले दर्मसास्त्रमते रासि मंता.

5 मीक इवन्नि पोल्लें मोदाटाले एरपाट मंतां, अय्नागानि इव पोल्लें मीक मति कीसि हीतन इंचि इनकुंचेके मंतन. पेन दाना लोकुलकुन इजिप्त देसेमताल पेचाहता पजा बोेर अय्ते दान विस्वासम किया हिल्लुर, ओर्कुन नासडेम कीता.

6 अचोने आयाका, बवयते पेनदा दूतां अबुना अदिकारमता जेगान ईर् हिल्लें, अल्हेन अब जेगान होळसीतां, पेन अबुनगुडा न्यायम कियाना रोजुनहाटी हीकटते बस्केन नेम्मुवा गोल्लसुलकुने दोहचि इर्ता.

7 अल्हेने सदोम, गमोरा सहरतोर, अल्हेन पकापीसि मत्ता सहरकुनोर व्यबिचारम कीतुर आनि परायतोर पज्जो अर्सि मत्तुर. इद उंदि उदाहरनलेसीं, ओर बस्केळक पोत्तना तळमिते सिक्सा बोगांचेक मंतुर.

8 अल्हेने कलां* हळना लोकुलकगुडा मेंदुलतुन पापमते अरहंतुर, पेनदा अदिकारमतुन हय्सुर आनि स्वर्गमकु संबंदिचि मत्तोर्कुना अपमानम कीतुर.

9 गानि पेनदा पेद्दा दूता मिकायेलगुडा बस्के अय्ते मूसाना पीनगुना बारेमते देय्यमतोनि लोल्लि कीता, अस्के अदुन बतले अपमानम आयानसोंटा पोल्लें इना हिल्ले गानि, “पेने नीकुन तेरहिकांटी” इंचि सिराप इच्चोने इत्ता.

10 ई लोकुलकुंक बव पोल्लें अय्ते तेळियों अबुन हय्सुर, गानि बुदिदे हिल्ला जिवरासिनलेसीं बव पोल्लें अय्ते ओर्क तेळियंतां अबुनाहेंदाले ओर नासडेम आंतुर.

11 अय्यो, बच्चोर गोसा आयार! बारित्ते ओर काइन ताकता हर्दे ताकतुर, पाय्दाताहाटी बिलाम इनानोर कीता तप्पु कीतुर आनि कोरह बल्हा विरोद कीसि नासडेम आतोर, अल्हे ईरगुडा नासडेम आंतुर.

12 ईर, मिमेट कलियसि-मेलियसि तिदना बोजनालकुन हेळाहनोर आंदुर, इका मीवातोनि उद्दिदस सिग्गु हिलाकोंटा तिचि पीर निहकुंतुर. ओर वळितोनि वित्ताना मब्बुनसंतोर आंदुर. आर्किं रालाना कालमते कायां हिलाका रोंडु मल्कां हासि पीकिसि पोहता मराकुनसंतोर आंदुर.

13 ओर, समुद्रमता तडाने एतपोर्गे तेलाना कराब पोंगुरतालेसीं सिग्गु हिल्ला कबाहक कियानोर आंदुर. ओर हर्दि तप्पि तिरियना सुक्कानसंतोर आंदुर. ओराहाटी बस्केन मारवा हिर-हीकट तयार कीसि मंता.

* 1:8 कलां मनसुने इनकुनमळ गुडा कलांगे आंदुं.

14-15 आदामनगटाल एडुंगो पीळितोर हानोक इनानोर ईरा बारेमते इल्हा बविस्यवानि कीतोर, “हळा, सामि वेयकुना पवित्र लोकुकुनतोनो अंटोरा न्यायम कियालय वांतोर. ओर अंटोर बक्ति हिल्वा लोकुल्क ओर कीता अन्नि तप्पुड कबाहकुनाहाटीं अल्हेन बक्ति हिल्वा पापि लोकुल्क सामिक विरोदमते वळकतव अन्नि पोल्लेनाहाटीं ओर्क सिक्सा हियमळ जर्गता,” इंचि वेहतोर.

16 इसोंटा लोकुल्क गुल्गसेक मनानोर, नसीब बरोबर हिल्ले इनानोर, ओरा इच्चां मत्ताप ताकानोर, पेद्दिदकेम पोल्लें वळकानोर, सतता पायदाताहाटीं तिय्यटा पोल्लें वळकानोर आंदुर.

विस्वासमते गट्टिगा मनालय केयमळ

17-18 पावरमगल्लोरिता! मना सामि येसु किरिस्तुना प्रेरितुल्कु मीवातोनो मुन्नेने, “आकिर वेलाते बक्ति हिल्वा इच्चां मत्ताप ताकानोर, मीकुन सिडांचंतुर,” इंचि वेहतुर, इव पोल्लेन मिमेट मति कीम्टु.

19 ई लोकुल्क मीलोप्पो वरोनद-वरोक अर्काकोटा कीतुर, ईरा मनसुंक वाताप ताकंतुर, ईरा लोप्पो पेनदा आत्मा हिल्ले.

20 गानि पावरमगल्लोरिता! पवित्र आत्माते पारतना कीसेके वेल्ले पवित्र विस्वासमते मीवद मिमेट बेर्सेक होंटु.

21 बस्केळ्ळक मनना पिस्वरताहाटीं मना सामि येसु किरिस्तुना दयाता आसेते एदुर हळसेक पेनदा पावरमते निल्लिस मंटु.

22 बोर अयते विस्वासमतुन अनमानम कीतुर, ओरापोर्रो दया कीम्टु.

23 तळमिताल इगिस पिस्सागोटताप इच्चुर्कुन पिस्सागोटट आनि वेल्लेटोरा पोरो वेंरेंतोनो मिमेट दया कीम्टु. गानि मेंदुल्ले कियाना पापालकुन मिमेट हय्समट.

24 पेन मीकुन तप्पुळ बोदानाल हिळु अर्काकोटा कापाळसि, दाना महिमाता मुन्ने आनंदमते आनि दोसेम हिलाकोटा निल्हा परांता,

25 अद उंदे पेनदुक, मनाकु मुक्ति हियानोर सामि येसु किरिस्तुनाहेंदाल, महिमा, पेद्दातनम, ताकत, अदिकारम मुन्नेटा कालमते मत्ताप इद कालमते आनि युगा-युगालकुनदाका मन्निकांटी, आमीन.

पेन हुपिस्ता पोल्लें योहानुंक पेन हुपिस्ता पोल्लें

इद पुस्तकमता बारेमते गिचचो परिचयम

रासतोना पोगोल: योहान

रासता कालम: इसवि सन 96

इद पुस्तकम येसु सामिना वरोर सिस्युड योहान रासतोर. येसुन नम्मुताहाटी ओन पतमोस दीबिते मनना जेलने वाटतुर. ओर जेलने मननेकेन, वायाना कालमते जर्गाना पोल्लें येसु सामि ओन्कु हुपिस्तोर. अवे पोल्लेन योहान ई पुस्तकमते रासतोर.

अद कालमते लोकुल्क येसुनपोर्रो विस्वासम कीताहाटी, रोम सरकार वेल्ले तकलिप हियुंदु. गानि कस्टाल्क, तिप्पल्क अयते वायनुंगे, अयना बोर अयते आकिरदाका विस्वासमते गट्टिगा निल्सि मनांतोर, ओन्के पिस्वरता इनाम दोर्कता, इल्हा वेहचि येसु सामि आ तकलिपते मत्ता विस्वासुल्कुना विस्वासमतुन गट्टिगा कीतोर. येसु सामि मर्रा मल्सि वायानादाका बोर अयते विस्वासमते गट्टिगा मनंतुर, ओर्क पूना बूमि, पूना मब्बु, पूना येस्सलेम दोर्कता इंचि येसु सामिनाहेंदाल योहान ई पुस्तकम रासतोर.

बगा बतल मंता

जोहार आनि परिचयम 1:1-8

एडुं कलिसियानोर्क रासता सिट्टिं आनि अबुना मुक्य उदुदेसम 1:9-3:22

एडुं सिक्कां तंचि मत्ता पुस्तकम 4:1-8:5

एडुं तूताकोम्कु 8:6-11:19

मासुल तरास आनि रौंडु जिबरासिं 12:1-13:18

तीराता दर्सनाल्क 14:1-15:8

पेनदा होंगुना एडुं वार्ति 16:1-21

बेबिलोनता नासडेम आनि देय्यमता ओडुमळ 17:1-20:10

आकिरता न्यायम 20:11-15

पूना स्वर्गम, पूना बूमि, पूना येस्सलेम 21:1-22:5

आकिरता बोदां 22:6-21

योहानुंक पेन हुपिस्ता पोल्लें

1 इव पोल्लें, वायाना कालमते बिरानेन जर्गानव आंदुं, इवुन येसु किरिस्तु ओना सेवाकुल्कुंक वेहना इंचि पेन ओन्क अप्पजेपता. अस्के येसु ओना उंदि दूतातुन योहान इनना वरोन सेवाकुनगा लोहचि, ओन्क रासालय वेहतोर.

2 अस्के ओर पेनदा पोल्लेता बारेमते, येसु किरिस्तुना गवाइता बारेमते आनि ओर हळता अन्नि पोल्लेना बारेमते गवाइ वेहतोर.

3 पेनदाहेंदाल वाता ई वायाना कालमते जर्गाना पोल्लेन बोर अयते हदवंतुर, केंजांतुर आनि अव्टे रासि मत्ता परकारम ताकंतुर ओर आसिर्वाद दोर्कतोर आंदुर. बारित्ते इव पोल्लें जर्गाना वेला दग्गेर्क एवता.

योहान येसुना पोल्लेन एडुं कलिसियानोर्क वेहांतोर

4-5 आसिया राज्यमते मनना एडुं कलिसियानोर्क नना योहानुन बतल रासेक इत्ते, इंदके मनानद, मोदोलताल मत्तद आनि मुन्ने वायाना मंता आ पेनदाहेंदाल, दाना राजगदूदेता मुन्ने मनना आ एडुं आत्मानाहेंदाल इंका विस्वासमलायक गवाइ मत्ता येसु किरिस्तुनाहेंदाल मीकु कुर्पा, सांति दोर्किंकांटी. येसु हातोराव्टेताल जीवाते तेदता मोदाटा मनकल आंदुर. ओर ई बूमिपोर्रोटा राजालोरा राजाल आंदुर. मना अंटोर्कुन पावरम कियानोर आंदुर, इंका ओना नेत्तुरतुन पोंगागोटसि मनाकुन मना पापालकुनाल पायसतोर.

6 मना पेनबाबाना पेदूदातनम, अदिकारम बस्केळ्क मननाहाटी ओर मनाकुन पेनदा राज्यमतोर आनि पेर्मालोर्क कीतोर. आमीन!

7 हळ्याट, येसु किरिस्तु मब्बु तेर्पेनतोनि वासेक मंतोर. अंतोर ओन हळानुर. ओरव्टे ओन कोहकतोरगुडा मंदानुर. दुनियातोर अन्नि वंसाल्कुना लोकुल्क सातितुन तंचेके दुक्कम कियानुर. हो इल्हे आयार आमीन!

8 “ननाने अल्पा आनि ओमेगा* आंदुन. ननाने मोदाटोन, इंदके मनानोन, मर्रा वायानोन आनि अन्निटकन्ना सक्तिमंतुनगुडा ननाने आंदुन” इंचि पेन इंता.

किरिस्तुना दर्सनम

* 1:8 अल्पा आनि ओमेगा ग्रीक बासाते अल्पा सुख्वा अक्सरम आनि ओमेगा आकिरता अक्सरम आंदु.

- 9 नना योहानुन मीवा दादान आंदुन. येसु बोगांसता तिप्पल्कुने, राज्येमते आनि ओप्के पियमळते मीवातोनि दंताते मंतन. नना पेनदा पोल्ले आनि येसुना बारेमते गवाइ वेहताहाटीं पतमोस इनना दीबेतगा बंद कीसि मंतन.
- 10 सामिना रोजुननाड, इत्ते अयतारम, नना पवित्र आत्माते निडिस मत्तन. नावा पज्जो तूताकोमता आवाजनसोंटा पेद्दा आवाज केंजावाता.
- 11 “निमे बतल अयते ह्ळांतिन अदुन पुस्तकमते रासि, इपीसि, स्मुरना, पेर्गमम, तुयतीरा, सरदिस, पिलाडेलपिया आनि लोदिकिया इव एंडुं कलिसियानोर्क लोहचीम” इंचि इत्ता.
- 12 अस्के, नातोनि बोर वळ्कसेक मंतोर इंचि ह्ळालय पज्जो तिरियसि ह्ळतन अयते, नाक बंगारमता एंडुं दीसोडिं दिसतां.
- 13 अव एंडुं दीसोडिन नड्डुम वरोर मनकना रूपमते पुटोर मत्तोर. ओर पोडगु कपडि केरसि मत्तोर ओना सातिक बंगारमता पट्टा दोहचि मत्ता.
- 14 ओना तल्ला, ओना केलक तेल्ला गोरेंता बूरालेसीं, बर्पुनलेसीं तेल्लगा दिस्सेक मत्ता. ओना कळ्क तळमिता वेल्लुनलेसीं मत्तां.
- 15 ओना काल्क कोल्मिते वाटसि एर्गा आता इत्तोळलेसीं मेर्सेक मत्तां. ओना लेंग समुद्रमता वेल्लेने एता तळालेसीं मत्ता.
- 16 ओर ओना तिना कयदे एंडुं सुक्कान पीसि मत्तोर. ओना तोळ्दाल रोंडु बाजूकुंक आयदार्क मत्ता कसेरलेसीं पेय्सेक मत्ता. पिय्यल आतस्के पोळ्दु बल्हा मेर्सेता अल्हा ओना तोड्डिड मेर्सेक मत्ता.
- 17 बस्के अयते ओन नना ह्ळतन, अस्के नना हाताप आसि ओना काल्कुनगा अरतन. अस्के ओर ओना तिना कयदुन नापोरों इरसि, “निमे वेरियमा सुख आनि आकिर ननाने आंदुन, नना पिस्सि मंतन.
- 18 नना अयते हासि मत्तन गानि ह्ळा, इंदके नना बस्केळाहाटीं पिस्सि मंतन. हामुर आनि नरकमता चाबि नहागेन मंता.
- 19 निमे इदवेरादाका ह्ळता पोल्लें, बव अयते जर्गसेक मंतांगो आनि मुन्ने जर्गानव अन्नि पोल्लें रासि इर्गा.
- 20 निमे नावा तिना कयदे ह्ळता एंडुं सुक्कां आनि बंगारमता एंडुं दीसोडिना मर्ममता अर्तम इल्हा मंता; एंडुं दीसोडिं इत्ते एंडुं कलिसियां आंदु आनि एंडुं सुक्कां इत्ते, उंदि-उंदि कलिसियाता उंदि-उंदि दूता आंदु” इंचि इत्ता.

2

इपीसि कलिसियातोर्क पेनदा पोल्लें

- 1 इपीसि सहरता कलिसियाता दूताक इल्हा रासा. बोर अयते ओना तिना कयदे एंडुं सुक्कां पीसि मनांतोर, आनि बंगारमता एंडुं दीसोडिन नड्डुम तिरियंतोर इव ओना पोल्लें आंदु.
- 2 निमे कियाना कबाहक, नीवा मेहनत आनि ओप्के नाक एरपाटे. अल्हेने निमे सेड्डा लोकुल्कुन हय्सिन आनि बोर अयते “नना प्रेरित” इंचि इनकुंतुर गानि ओरा परिकसा एततस्के ओर नीकु आबद्दम वळ्कतद दिसतुर.
- 3 निमे ओप्के पीसि मनांतिन. नावा पोरोलहाटीं तकलिप अरसेक मंतिन गानि तकांचा हिल्लिन इंचि नाक एरपाटे.
- 4 गानि नीवा विरोदमते नाकु उंदि पोल्ले मंता. अद बतल इत्ते, निमे मुन्ने नाकुन बल्हा पावरम कियिदिनो अल्हा इंदके कीसेक हिल्लिन.
- 5 निमे बद परिस्तितिते अयते अरतिनो अदुन मति कीम. मनसु मार्सकुंचि मुन्ने कीता कबाहकुन मर्गा कीम. निमे गिंटा मनसु मार्सकुनाकुंटे नना वासि नी वेडसितुन अद जागाताल तेंडसि पोहातन.
- 6 अयना नी लोप्पो इद उंदि बेसता पोल्ले मंता अद बतल इत्ते, निमे निकोलिया लोकुल्कुना कबाहकुन हय्सिन, अवुन ननागुडा हय्सोन.
- 7 पवित्र आत्मा कलिसियातोर्क बतल वेहांता अदुन, केव्क मत्तोर बेस केंजिर. बोर अयते गेल्लांतोर नना ओन्क स्वर्गमते पेनदागा मनना पिस्वरता मराता पंडि तिनालय हीतन.

स्मुरनाता कलिसियातोर्क पेनदा पोल्लें

- 8 स्मुरना सहरता कलिसियाता दूताक इल्हा रासा. बोर अयते मोदोल आनि आकिर आंदुर, बोर अयते हासि मर्गा जीवाते तेदतोर ओर बतल इंतोर इत्ते,
- 9 “नीवा तिप्पल्क आनि गरिबतनम नाकु एरपाटे. (गानि निमे सिरमंतुने आंदिन) बोर अयते नीवा अपमानम कींतुर, मोमोट यहूदिल्क आंदुम इंचि इंतुर, गानि असल ओर आयुर. ओर देय्यमता दर्मसास्त्रम कराहना लोतुर आंदुर.
- 10 बव तिप्पल्क अयते नीकु वायानव मंतां अवुना बारेमते निमे वेरियमा. ह्ळाट! देय्यम मी अव्टेटाल इच्चुर लोकुल्कुन जेलने वाटंता, मीवा विस्वासमता परिकसा एतालय अल्हा जर्गार. मीकु पदि रोजकु तिप्पल्क अर्गापीता. हायाना वेला वायिनागानि मिमेट विस्वासमते गार्ट्टेगा मंडु. अस्के मीकु पिस्वरता किरिटम हीतन” इंचि इत्ता.
- 11 पवित्र आत्मा कलिसियातोर्क बतल वेहंता अदुन, केव्क मत्तोर बेस केंजिर. बोर अयते गेल्लांतोर ओन्क रोंडो हामुरताहेंदाल बतल नुकसान आयो.

पेर्गममता कलिसियातोर्क पेनदा पोल्लें

- 12 पेर्गममता सहरता कलिसियाता दूताक इल्हा रासा. बोर अयते रोंडु आयदार्कुना कसेर पीसि मनांतोर ओर बतल इंतोर इत्ते,
- 13 बगा अयते देय्यमता राजगद्दे मंता अग्गेन निमे मनांतिन इंचि नाकु एरपाटे. अयना ना पोरोलते निमे निल्लिस मंतिन. नावा विस्वासमगल्ला सेवक अतिपान मीवा नड्डुमे देय्यम मनना जेगाते हक्कतुर, अव रोजकुनेगुडा निमे नावा पोरोटा विस्वासमताल पजोळ्क होना हिल्लिन.

14 गानि नीवा विरोदमते नाकु कोन्नि पोल्लें वेहनद मंता. इझाएल लोकुल्लुकुन हिड अरहानाहाटीं बिलाम इनना कबुरतोर बालाक इनना राजांक बतल अय्ते कराहतोरो, अवुन पीसि ताकानोर मीवा नड्डुम मंतुर. बोम्मांक मोळ्ळकता वस्तुकुन तिनगोम, बोगमतनम कियगोम इंजि बिलाम करहुंदुर.

15 अल्हेने मीलोप्पो इच्चुर लोकुल्लुकुन निकोलियातुरा करहाताप ताकानुर मंतुर, ओर्कुन ननागुडा हय्सोन.

16 अदुनहाटीं मीवा मनसु मार्सकुंटु. इल्हा कियार्कोटे नना बिरानेन मिहगा वासि, ना तोळ्ळा कसेरतोने ओरतोनि लडाइ कीतन.

17 पवित्र आत्मा कलिसियातोरक बतल वेहांता अदुन, केव्व मत्तोर बेस केंजिर. बोर अय्ते गेल्सांतोर ओन्क मक्किचि इरता मन्ना आनि उंदि तेल्ला बंडा हीतन. आ बंडापोर्रो उंदि पूना पोरोल रासि मनंता अद बोन्क अय्ते दोर्कार ओन्के तेळियार.

तुयतीराता कलिसियाता दूताक पेनदा पोल्लें

18 तुयतीराता सहरता कलिसियाता दूताक इल्हा रासा. बोना कळ्ळ अय्ते पोत्तना तळमिलेसीं मंतां, काल्क कोल्मिते काचाहता इत्तोडिलेसीं मंतां आ पेनदा मरि इल्हा वेहांतोर:

19 निमे कियाना कबाहक, ना पोरोटा नीवा पावरम, विस्वासम, निमे कियाना सेवा, तिप्पल्लुकुने नीवा ओप्के, इव अन्नि नाकु तेळियसे. नीवा सुस्वना कबाहकंनना इंदकेटा कबाहक एक्को बेस मंतां.

20 गानि नी विरोदमते नाकु उंदि पोल्ले वेहानद मंता. जेजेबेल इनना मुरतळ, नना पेनदा कबुरतदुन इंचि वेहकुंचेके नावा सेवाकुल्लुकुंक, बोम्मांक मोळ्ळकता वस्तु तिनगोम, बोगमतनम कियगोम इंचि कराहचि ओर्कुन पसांचेके मंता. असोटा मुर्तादुन निमे निहगा मना हीसंतिन.

21 मनसु मार्सकुननाहाटीं नना दानकु मोका हीतन, गानि बोगमतनमताल मनसु मार्सकुनालय दाना इच्चा हिल्ले.

22 अय्ते हुळाट! नना दानु कटुल पिया गोदंतन, दानतोनि बोर अय्ते बोगमतनम कीतुर ओरगुडा असोटा कबाहकुनाल मनसु मार्सकुनाकुंटे ओर्कुन बागा तिप्पल्लुकुने अरहंतन.

23 अद कराहता पोल्लेन पीसि ताकाना दाना पिलाल्लुकुन नना हक्किसि पोहंतन. अस्के, बुद्धिदतुन आनि मनसुन एरपाट कियानोन ननाने आंदुन इंचि अन्नि कलिसियातोरक तेळियार. पजा मीकु वरो-वरोक मिमेट कीता कबाहकुन पीसि, इनाम हीतन.

24 गानि तुयतीराते अद कराहताप ताकबोर कळ्ळमतोर मिमेट बोर अय्ते विस्वासिर मंतिरो, मीक नना बतल वेहांतन इत्ते, मिमेट देय्यमता लोप्पोटा मर्ममतुन एरपाट किया हिल्लिर अदुनहाटीं नना मीपोर्रो इंका बर्बु वाटोन.

25 नना मल्लिसि वायनदाका सिराप मिहगा मनना विस्वासमतुन गट्टिगा पीसि मंतु.

26 बोर अय्ते गेल्लिसि आकिरदाका नावा कबाहकुन कीतोर ओन्क नना अन्नि दुनियाता अन्नि देसेल्लुकुना लोकुल्लुकुनपोर्रो अदिकारम हीतन.

27 कुम्मल कीता अळकन कच्चिता दुड्डुने तुकडां-तुकडां कीताप लोकुल्लुकुनपोर्रो ओर राज्येम कीतोर. बाबानाहेंदाल नाकगुडा इसोटेदे अदिकारम दोर्कता.

28 अल्हे ननागुडा ओनकु हक्केटा सुक्कातुन हीतन.

29 कलिसियातोरक पवित्र आत्मा बतल वेहांता अदुन, केव्व मत्तोर बेस केंजिरकांटी.

3

सरदिसता कलिसियातोरक पेनदा पोल्लें

1 सरदिस सहरता कलिसियाता दूताक इल्हा रासा. बोनाग अय्ते पेनदा एडुं सुक्कां आनि एडुं आत्मां मंतां ओर बतल इंतोर इत्ते, निमे कियाना कबाहक नाकु एरपाटे; नीवद निमे “जीवाते मंतन” इंचि इनकुंचंतिन गानि असल इत्ते निमे हासि मंतिन.

2 निमे तेळिव्ते मन, पेनदा मुन्ने नीवा कबाहक पुरा आताप नाक दिस्सेक हिल्ले. अदुनहाटीं, मय्यिस मत्ता कबाहकुन पुरागा कीम. मायसि होनालय आता विस्वासमतुन गट्टिगा कीम.

3 अदुनहाटीं केंजता बोदातुन निमे बल्हा ओष्कुत्तिनो अदुन मति कीम. मति कीसि अल्हे ताका आनि मनसु मार्सकुन. ओक्कला निमे जेगर्ता मनाकोटे, नना वरोर दोंगानलेसीं वांतन, नना बद वेलाक निहागा वांतन, दाना पत्तागुडा नीकु दल्गो.

4 गानि सरदिस सहरता इच्चुर विस्वासुल्क, ओरा कपडिक डाग अंटाकोटा इरताप, ओरा ताकमळ्ळतुन बेस इरतुर. ओर तेल्ला कपडिं केरताप सत्तेमते नावातोनि ताकनुर; ओर अल्हा ताकना लायक मंतुर.

5 बोर अय्ते गेल्सांतोर, ओन्क इसोटा तेल्ला कपडिं केर्समड जर्गार आनि नना ओना पोरोल्लुन पिस्वरता पुस्तकमताल तंचि पोहोन. अल्हेने नावा बाबाना मुन्ने आनि दूताना मुन्ने ओना पोरोल्लुन ओपकुंतन.

6 पवित्र आत्मा सरदिसता कलिसियातोरक बतल वेहांता अदुन, केव्व मत्तोर बेस केंजिरकांटी.

पिलदेलपियाता कलिसियातोरक पेनदा पोल्लें

7 पिलाडेलपिया सहरता कलिसियाता दूताक इल्हा रासा. बोर अय्ते पवित्र आनि सत्तेमतोर मंतोर, ओर दाविदना अदिकारता चाबि इरंतोर, ओर तेंडता तल्पुन बोरे बंद किया पर्रोर आनि ओर बंद कीता तल्पुन बोरे तेंडा पर्रोर, ओर बतल इंतोर इत्ते,

8 निमे कियाना कबाहक नाक एरपाटे, नीवा ताकत तक्को मंता गानि नावा पोल्लेता पालन कीतिन आनि नावा पोरोलतुन एतोन इंचि इना हिल्लिन. अदुनहाटीं ह्ळा! नीवा मुन्ने उंदि तल्पु कुल्ला कीसि इरतन, अदुन बोरे बंद किया पर्र.

9 ह्ळा! नना देय्यमता दर्मसास्त्रम कराहना लोता लोकुल्लुकुन निहगा वायागोटंतन, ओर “मोमोट यहुदिकं आंदुम इंचि इंतुर” ओर यहुदि आयुर गानि ओर आबद्दम वळकसेक मंतुर. नना ओर्कुन निहागा तायसि नीवा काल्क मोळका गोटांतन. अस्के नना मीकुन बच्चोन पावरम कीतिन इंचि ओर्क तेळियंता.

10 निमे ओप्के पीसि नावा पोल्लेते ताकतिन अल्हेन, केंजतिनगुडा. अदुनहाटीं ई दुनियाता लोकुल्लुकुना पट्टु ह्ळालय बतलयते परिक्सा वायाना मंता, अव्टेताल नीकुन कापाळंतन.

11 नना बिरानेन निहागा वांतन. नीवा किरिटमतुन निहागटाल बोरे गुंजा मन्नि इंचि, निहागा बतलयते विस्वासम मंता अदुन इंका गट्टिगा पीसि ताका.

12 बोरे अय्ते गेल्लांतोर, ओन नना नावा पेनदा गुळिते बस्केने पलाते पेयसाकॉटा उंदि कंबालेसीं निपसंतन. नना ओनपोरीं नावा पेनदा पोरोल, नावा पेनदागटा स्वर्गमताल हिळु वायाना पूना येस्सलेमता पोरोल आनि नावा पूना पोरोल रासंतन.

13 पवित्र आत्मा पिलदेलपियाता कलिसियातोरक बतल वेहांता अदुन, केव्क मत्तोर बेस केंजिरकांटी.

लोदिकियाता कलिसियातोरक पेनदा पोल्लें

14 लोदिकिया सहरता कलिसियाता दूताक इल्हा रासा. बोरे अय्ते आमीन इननोर, विस्वासमगल्लोड, निजम गवाइ वेहानोर, इंका पेन तयार कीता अन्निटवुने मोदोल मनकल आसि मंतोर, इव पोल्लें ओनव आंदुं.

15 निमे कियाना कबाहक नाकु एरपाटे, विस्वासमते निमे सल्लागा हिल्लिन गरम हिल्लिन. निमे सल्लागा हिलाकॉटे गरम मंचि मत्ते बेस आसि मनवळ.

16 निमे सल्लागा हिल्लिन, गरम हिल्लिन एच्चगा मंतिन. अदुनहाटीं नीकुन नना ना तोळदाल पलाते कक्कंतन

17 निमे अय्ते, “नना सिरमंतुन, नहगा अन्नि मंतां, नाकु बतल तक्को हिल्ले”, इंचि इनकुंचतिन. गानि नीकु इदु एरपाट हिल्ले गदा, निमे पेद्दा हेडसोत्तोन, गति हिल्लोन, गरिबोन, गुड्डिन, कुळकें मंतिन इंचि.

18 अदुनहाटीं, निमे विस्वासम लोप्पो निजम मत्ता मनकल आयानाहाटीं नना नीकु उंदि उपायम वेहांतन अद बतल इत्ते, तळमिते सुद्द कीता बंगारम निमे नहागटाल एता. दानहेंदाल निमे सिरमंतुन आकिन. कुळकें मत्तद ह्ळसि सिग्गु होनामन्नि इंचि केरालय तेल्ला कपडि नहागटाल एता. कळक बेस दिस्सनाहाटीं कळकुने वाटालय मत्तु अस्सा.

19 बोने-बोने अय्ते नना पावरम कीतिन, ओनकु गट्टिगा वेह्चि, सुद्रांचा गोट्टंतन. अदुनहाटीं इरगा जोसुने मंचि मनसु मार्सकुन्नु.

20 ह्ळा, नना तल्पुनगा नित्तिसि तल्पुन टोक-टोक तंतस्के; बोरे अय्ते ना लेंग केंजसि तल्पु तेंडांतोर, नना ओनगा लोप्पो दांतन, होंचि ओनतोनि कलियसि गाटो तितन, आनि ओर नातोनि तितोर.

21 बल्हा अय्ते नना गेल्लि नावा पेनबाबानतोनि ओना राजगद्देपोरीं होंचि उदतन. अल्हे बोरे अय्ते गेल्लांतोर ओन नना नातोनि नावा राजगद्देपोरीं उपसंतन.

22 पवित्र आत्मा लोदिकियाता कलिसियातोरक बतल वेहांता इत्ते, केव्क मत्तोर बेस केंजिरकांटी.

4

पेन योहानुक स्वर्गम हुपसंता

1 इव अन्नि आतस्के, स्वर्गमते उंदि तल्पु कुल्ला मत्तद नाकु दिसता. मोट्टा मोदाला नना केंजता आवाज तूताकोमता आवाजलेहका मत्ता. अदे आवाज नाकुन, “निमे इगे पोरीं वा, इव अन्नि आतस्के बव पोल्लें अय्ते जर्गानव मंतांगो अवुन हुपसंतन,” इंचि इत्ता.

2 अस्केने नना पवित्र आत्माते निडतन. नाक स्वर्गमते राजगद्देपोरीं बोरो वरोर उद्दिस मत्तद दिसतोर.

3 आ राजगद्देपोरीं बोरे अय्ते उद्दिस मत्तोर ओर यसब आनि मानिक इनना मेर्सना बंडालेसीं दिस्सेक मत्तोर. आ राजगद्देता सुट्टु मरकत इनना मेर्सना बंडानलेसीं उंदि सिंगिड दिस्सेक मत्ता.

4 राजगद्देता सुट्टु इरवै नालुं राजगद्दे मत्तां. अव राजगद्देन पोरीं इरवै नालुर एनकटा पेद्दालक तेल्ला कपडिं केरसि उद्दिस मत्तुर. ओरा तल्लानपोरीं बंगारमता किरिटाल्कु दोस्सि मत्तां.

5 आ राजगद्देताल पिडगु वाटाना वेलगु, उस्मना आवाज आनि पेद्दा लेंग पलाते पेयसेक मत्ता. राजगद्देता मुन्ने तळमितव एडुं वेडसिं पोतसेके मत्तां. अव वेडसिं इत्ते, पेनदा एडुं आत्मा आंदुं.

6 राजगद्देता मुन्ने अद्दमतसॉटा समुद्रम दिस्सेक मत्ता. आ राजगद्देता नड्डुम, सुट्टु नालुं जीवाते मत्ता जिवरासीं नित्तिसि मत्तां. अचुंक पज्जो-मुन्ने कळके कळक निडिस मत्तां.

7 मोदाटा जिवरासि सिंहमतालेसीं, रॉडो जिवरासि कोंदातलेसीं, मूडो जिवरासिता मोकोम मनकनलेसीं मत्ता. आनि नालुंगो जिवरासि गुव्वा डेगातलेसीं दिस्सेक मत्ता.

8 जीवाते मनना नालुं जिवरासिकं हारुं-हारुं रेक्कां मंतां, अवुना मेंदुलता सुट्टु, लोप्पो कळके-कळक मंतां. अव पोद्दाला नर्का पल्ही आराम कियाकोटा उंदेतीर, “निमेने पवित्र, पवित्र, पवित्र, सामि पेनबाबाल, अन्निटकन्ना सक्तिमंतुन आदिन. निमेने मुन्नेटाल मत्तिन, इंदके मतिन, मुन्नेगुडा मनांतिन” इंचि इंचेक मत्तां.

9 बस्के अयते अव नालुं जिवरासीं, राजगद्देपोरों उद्दिस मत्ता बस्केळक जीवाते मनना पेनदा स्तुति, महिमा, दन्यवाद कींतां,

10 अस्के ओर इरवै नालुर पेद्दाल्क पेनदा मुन्ने टोंगरां ऊनसि ओरा तल्लानपोरों मत्ता किरिटाल्कुन हिळु इर्सि,

11 “निमेने ई दुनियाता अन्नि वस्तुक तयार कीतिन, इव अन्नि नीवा इच्चा परकारम तयार आतां. नीवा इच्चा परकारमे मंतां, निमेने मावा पेन, मावा सामिन आदिन. महिमा, स्तुति आनि ताकत नीवदे आंदु,” इंचि इंतुर.

5

एडुं सिक्कां तंचि हट्टिसि मत्ता पुस्तकम

1 पजा आ राजगद्देपोरों उद्दिस मत्तोना तिना कय्दे नाकु उंदि पुस्तकम दिस्ता. अद लोप्पो, पलाते रोंडु पक्काने रासि मत्ता आनि दान्क एडुं सिक्कां तंचि गुंडूर्गा हट्टिसि मत्ता.

2 वेल्लेन ताकत मत्ता उंदि पेनदा दूतातुन नना अगा हळतन. पेद्दा आवाजते अद, “गुंडूर्गा हट्टिसि मत्ता पुस्तकमपोरोंटा एडुं सिक्कान नेम्हाचि, दान विच्चनालायक बोर मंतोर?” इंचि इनालय दल्लगता.

3 गानि स्वर्गमते आयि, बूमिपोरों आयि, बूमि हिळु आयि अद पुस्तकमतुन विच्चिसि दाना लोप्पो हळना लायकतोर बोरें मनाहिल्लोर.

4 अद पुस्तकमतुन विच्चिसि हळानालायक बोरें दोर्कुवाहेंका नना इरगा अळतन.

5 अस्के “निमे अळमा. हळा! आ गुंडूर्गा हट्टिसि मत्ता पुस्तकमपोरोंटा सिक्कान नेम्हाचि अदुन विच्चिसि हळानाहाटीं दाविदना वंसंमतोर, यहुदाना गोत्रमता सिंहम इंचि पोरोल होतोर वरोर, गेल्लिस मंतोर” इंचि आ पेद्दाल्कुना अवटेताल वरोर नाकुन इत्तोर.

6 अस्के आ राजगद्दे, जीवाते मनना नालुं जिवरासीं आनि पेद्दाल्कुना नड्डुम, मोक्कु हीतदुनलेसीं उंदि गोरें पोरि नित्तिसि मत्तद नना हळतन. दान्क एडुं कोहकु, एडुं कळक मत्तां. आ एडुं कळक इत्ते, पेन बूमिपोरों अन्नि दिक्कुल्लुने लोहता दाना एडुं आत्मां आंदु.

7 अद गोरें पोरि, राजगद्देपोरों उद्दिस मत्तोनागा वासि, ओना तिना कय्दे मत्ता पुस्तकमतुन तेंडकुत्ता.

8 बस्के अयते गोरें पोरि आ पुस्तकमतुन तेंडकुत्ता, अस्के आ नालुं जिवरासि आनि इरवै नालुर पेद्दाल्क गोरें पोरिना मुन्ने काल्कुनगा बोक-बोर्ले अर्सि मोळकतुर. ओर अंटोरा कय्दे उंद-उंदि टांबुरा आनि दूपमते निडिसि मत्ता बंगारमता कुळकां मत्तां. आ दूपमते निडिसि मत्ता कुळकां इत्ते, पेनदा लोकुल्लुना पारतनां आंदु.

9-10 पज्जो ओर अंटोर उंदि पूना पाटा पारालय दल्लगतुर, “निमे इद पुस्तकमतुन एतसि, दाना सिक्कान नेम्हाचि विच्चनालायक मतिन. बारित्ते, निमे मोक्कु आसि नीवा नेत्तुर कुदुवा दोस्सि हरेक जातिताल, हरेक बासानोरवटेताल, हरेक लोकुल्लुनाल आनि हरेक देसेमतोरवटेताल पेनदाहाटीं अस्कुत्तिन. निमे ओर्कुन पेनदाहाटीं दाना राज्यमतोर आनि पेर्मालोर्क कीतिन. ओर बूमिपोरों राज्येम कीतुर.”

11 पजा नना अगा हळते, आ राजगद्दे सुट्टु, अव नालुं जिवरासिना सुट्टु आनि पेद्दाल्कुना सुट्टु पेनदा वेल्लेन दूताना लेंग केंजावाता. अव दूतां लेक्कुते लाकुल्लक, कोट्टुकुने मत्तां.

12 “मन्कालोर इद गोरें पोरिन हव्विस मत्तुर गानि, संपत्ति, बुद्धि, बलम, कदर, महिमा आनि स्तुतिता लायक इदे आंद,” इल्हा अव अन्नि दूतां पेद्दा आवाजते इंचेके मत्तां.

13 अचोने आयाका स्वर्गमते, बूमिपोरों, बूमि हिळु, समुद्रम आनि अवुने मनानव अन्निगुडा, “राजगद्देपोरों उद्दुनोनद आनि गोरें पोरिनद, स्तुति, कदर, महिमा आनि बलम बस्केळताहाटीं मन्निकांटी,” इंचि इनानद नना केंजतन.

14 अस्के जीवाते मनना नालुं जिवरासीं “आमीन” इत्तां. पजा पेद्दाल्क टोंगरां ऊनसि आरादना कीतुर.

6

गोरें पोरि एडुं सिक्कान लेहमळ

1 पजा एडुं सिक्कानाल उंदि सिक्कातुन आ गोरें पोरि नेम्हाचि विच्चुता. अस्के जीवाते मत्ता आ नालुं जिवरासिनाल उंदि जिवरासि, पिडग वाटते वायानसोंटा आवाजते, “वा” इत्तद नना केंजतन.

2 अस्के अगा नाकु उंदि तेल्ला गुर्म दिसता, दानपोरों वरोर बानम पीसि उद्दिस मत्तोर. ओन्क उंदि किरिटम हियमळ जर्गता. ओर लडाई गेल्लसतोर, अय्नागानि इंका गेल्लसना इंचि पेय्सतोर.

3 गोरें पोरि रोंडो सिक्कातुन नेम्हाचि विच्चुता अस्के, जीवाते मत्ता आ नालुं जिवरासिनाल रोंडो जिवरासि, “वा” इंचि इत्तद नना केंजतन.

4 अस्के उंदि एर्गटा गुर्म पलाते पेयसानद नना हळतन. लोकुल्लक वरोक-वरोर हव्वकुनना इंचि, अद गुर्मपोरों उद्दिस मत्तोन्क, बूमिपोरोंटाल सांतिंतुन येतकुनना अदिकारम हियमळ जर्गता. ओन्क उंदि पेद्दा कसेर हियमळ जर्गता.

5 बस्के अय्ते गोर्रे पोरि मूडो सिक्कातुन नेम्हाचि विच्चुता, अस्के मूडो जिवरासि, “वा” इत्तद नना केंजतन. पजा नाकु अगा उंदि कर्रे रंगुना गुर्रम दिसता. आ गुर्रमपोर्रे उंदिदिस मत्तोना कय्दे उंदि तराजु मत्ता.

6 अच्चोटेन, जीवाते मत्ता आ नालुं जिवरासिना नड्डुमताल, “उंदि रोजुना बूतितच्चोन कोल्लताने, उंदि किलो गोहकु दोर्कता, इंका अच्चोने कोल्लताने मूड किलोना जोन्नां दोर्कता. गानि नियदुन, अंगुर पानकमतुन नासडेम कियमा,” इंचि उंदि लेंग केंजावाता.

7 गोर्रे पोरि नालुंगो सिक्कातुन नेम्हाचि विच्चुतस्के जीवाते मत्ता आ नालुं जिवरासिनाल नालुंगो जिवरासि, “वा” इत्तद नना केंजतन.

8 पजा नाकु अगा उंदि पस्पु रंगुना गुर्रम दिसता. आ गुर्रमपोर्रे उंदिदिस मत्तोना पोरोल हामुर, ओना पज्जो-पज्जो नरकम वासेक मत्ता. ओन्क बूमिता नालुं बागाल्कुनाल उंदि बागमपोर्रेटा लोकुल्कुन कसेरते, कर्वुने, बिमार्कुने आनि केडाता जिवरासिन हेंदाल नासडेम कियाना अदिकारम हियमळ जर्गता.

9 गोर्रे पोरि हेय्युंगो सिक्कातुन नेम्हाचि विच्चुतस्के, पेनदा पोल्ले लोकुल्कुं वेहताहाटीं आनि ओरा गवाइ वेहताहाटीं मोक्कु हिय्यना गद्दे हिळु हक्किसि मत्तोर्कुना आत्मान हळतन.

10 आ आत्मां पेद्दा आवाजते, “ए सामि, पवित्र आनि सत्तेम मनानोन, माकुन हक्कुता बूमिपोर्रेटा लोकुल्कुना न्यायम निमे बस्के कीतिन? ओरा न्यायम कीसि मावा नेत्तुरता बदला बस्के एतांतिन?” इंचि वरगोयालय दल्लगतां.

11 पजा ओर्क अंतोर्क तेल्ला कपडिं हीसि, “मीकुन हक्कुतापे मीवा दंटाता सेवाकुल्कुन आनि विस्वासुल्कुन हक्कना मंता, ओरा लेक्कांगुडा पुरागा आयानदाका मिमेट गळसेप आराम कीम्पु,” इंचि ओर्कु वेहतोर.

12 गोर्रे पोरि हांरुंगो सिक्कातुन नेम्हाचि विच्चुता, अस्के पेद्दा बुकंप आतद नना हळतन. अस्के पोळ्दु कर्रे गोंगोळिलेसीं कर्रेगा आनि वेळिसअंता बारे नेत्तुरलेसीं एरगा आता.

13 पेद्दा वळि दुमारम वाते तोया मराता पंडिं बल्हा हिड अर्रता, अल्हेने सुक्कां मब्बुनाल बूमिपोर्रे अरतां.

14 मब्बु उंदि कागदेम हुटताप हुटकुंचि मायसोत्ता. अल्हेने हरेक गुट्टा, दीबे अबुना जागानाल जर्गतां.

15 अस्के बूमिपोर्रेटा राजालोर, अदिकारिल्क, सायाबुल्क, सिरमंतुल्क, ताकतवर्क, दासुल्क, दासुल्क आयवोर, इल्हा अंतोर लोकुल्क गुट्टाना बुयाराल्कुने, पेद्दा बंडा सौर्रेने होंचि मकतुर.

16 मक्किसि गुट्टां आनि बंडानतोनि, “मापोर्रे अर्रिं, राजगद्देपोर्रे उंदिदिस मत्तोना नदरताल आनि गोर्रे पोरिना होंगुनाल माकुन मक्किकट.

17 बारित्ते, पेनदा होंग हूपसना कतरनाक रोजु एवता. ओरा मुन्ने बोर नित्ता परांतुर?” इंचि इनालय दल्लगतुर.

7

1,44,000 लोकुल्कुं सिक्कां तनमळ

1 इवन्नि जर्गारित्ते, बूमिता नालुं मूलांक पेनदा नालुं दूतां नित्तिसि मत्तद नना हळतन. अव बूमिपोर्रे आयि, समुद्रमते आयि आनि बवे मराकुन पोरे आयि वळितुन वायाकोंटा आपसि पीसि मत्तां.

2-3 अस्के मर्रा उंदि दूतातुन जीवाते मनना पेनदा सिक्कातुन पीसि पोळ्द पेयसनाहेंदाल पोरे वासेक मनानद हळतन. बव नालुं दूतांक अय्ते, बूमितुन आनि समुद्रमतुन नासडेम कियाना अदिकारम हीसि मत्ता, अव नालुं दूतन अद पेद्दा आवाजते, “बदवेरादाका अय्ते मौमोट पेनदा सेवाकुल्कुना कपालमपोर्रे सिक्कां तन्नोम अदवेरदाका बूमितुन आयि, समुद्रमतुन आयि, अल्हेने मराकुन आयि नासडेम कियमट” इंचि इत्ता.

4 अस्के सिक्कां तंचि मत्तोर लेक्का केंजतन अय्ते, ओर उंदि लक्सा नल्पै नालु वेय्कु मत्तुर आनि अन्टे इझाएलना हरेक वंसंमता लोकुल्क मत्तुर.

5-8 यहूदाना वंसंमताल पन्नेंड वेय्कु लोकुल्कुं सिक्का तनमळ जर्गता. स्वेनना वंसंमताल पन्नेंड वेय्कु, गादना वंसंमताल पन्नेंड वेय्कु, अस्सेरना वंसंमताल पन्नेंड वेय्कु, नप्तालिना वंसंमताल पन्नेंड वेय्कु, मनसेना वंसंमताल पन्नेंड वेय्कु, सिमोनुना वंसंमताल पन्नेंड वेय्कु, लेविना वंसंमताल पन्नेंड वेय्कु, इसाकुना वंसंमताल पन्नेंड वेय्कु, जबलुनना वंसंमताल पन्नेंड वेय्कु, योसेपना वंसंमताल पन्नेंड वेय्कु, बेजामिनना वंसंमताल पन्नेंड वेय्कु, इल्हा पन्नेंड गोत्राल्कुना लोकुल्कुं सिक्कां वाटमळ जर्गता.

राजगद्देता मुन्ने वेल्लेन लोकुल्क

9 अद आता पजा, पेनदा राजगद्दे आनि गोर्रे पोरिना मुन्ने तेल्ला कपडिं केरसि, कजूर मराता कोम्मां कय्दे पीसि हरेक जातितोर, हरेक बासातोर, हरेक लोकुल्क आनि अन्नि देसेल्कुनोर इल्हा लेक्कुते बोर लेक्का पर्स् अच्चोन मंदितुन नना हळतन.

10 ओर अंतोर पेद्दा आवाजते, “राजगद्देपोर्रे उंदिदिस मनना मना पेनबाबानगा, गोर्रे पोरिनगा मुक्ति हियना सक्ति मंता” इंचि इनालय दल्लगतुर.

11-12 अन्नि दूतां राजगद्दे सुट्टु, पेद्दाल्क आनि जीवाते मत्ता आ नालुं जिवरासिना सुट्टु नित्तिसि मत्तां. अव अन्नि दूतां राजगद्दे मुन्ने बोक्-बोर्ले अर्रिं पेनदुन आरादना कीसेके इल्हा इनालय दल्लगतां, “आमीन, स्तुति, महिमा, तेल्वि, ताकत आनि दन्यवाद बस्केळताहाटीं मावा पेनदावे आंदु, आमीन” इंचि इत्तां.

13 अस्के पेद्दाल्कुना अन्टेताल वरोर “तेल्ला कपडिं केरसि मन्नानुर ईर बोर आंदुर? ईर बगाटाल वातुर?” इंचि नाकुन पूसकीतोर.

14 अस्के, “नीकु एरपाटे महाराज,” इंचि नना ओन इतन. अस्के ओर, “ईर अंटोर वेल्ले तिप्पल्कुनाल पलाते वातोर आंदुर. ईर ईरा कपडिं गोरिं पोरिना नेत्तुरते हुक्किसि तेल्लगा कीतुर आंदुर.

15 अदुनहाटीं ईर अंटोर इंदके पेनदा राजगद्दे मुन्ने मंतुर. नर्का-पिय्यल गुळितगा मंचि दाना सेवा कीतुर. राजगद्देपोरिं उद्दिस मनानोर ईरापोरिं डेरा कीसि कापाळांतोर.

16 ईरकु इंदकेटाल बस्केने दूपा आयो, कर्वेस्सो, अचोने आयाका ईरकु पोळ्दुना एद्दिहेंदाल दगळागुडा दल्गो.

17 बारिल्ले ईर अंटोर्कुन मेहानोर, राजगद्दे नड्डुम उद्दिस मनना गोरिं पोरि आंदुर. ओर ईरकुन पिस्वरता एता उटानगा ओतोर. पेन ओरा कळ्कुना कंडेह्कुन पुरागा उसमंता,” इंचि वेहतोर.

8

एडुंगो सिक्कातुन विच्चुमळ

1 गोरिं पोरि एडुंगो सिक्कातुन नेम्हाचि विच्चुतस्के स्वर्गमते सगम गंटादाका सुम-साम आता.

2 अस्के पेनदा मुन्ने नित्तिसि मननव एडुं दूतन नना हळतन. अवुंक एडुं तूताकोम्कु हियमळ जर्गता.

3 अगा इंकुंदि पेनदा दूता गद्देतगा वासि नित्तुता. दाना कय्दे बंगारमता गुगलेम कुळका मत्ता. दान्क राजगद्दे मुन्ने मनना बंगारमता गद्देपोरिं अंटोर पेनदा लोकुल्कुना पारतनांतोनि गुगलेम वाटानाहाटीं वेल्लेन गुगलेम हियमळ जर्गता.

4 अस्के पेनदा दूताना कयदाल अद गुगलेमता पोया पेनदा लोकुल्कुना पारतनांतोनि पेनदागा एवता.

5 आ दूता दूपमता कुळकाते गद्देतगा मत्ता तळमितुन निहाचि अदुन बूमिपोरिं पोह्चीता, अदुनहेंदाल मब्बु गळ-गळा इंचेके उरमालय, मेर्सालय, बुकंप आयालय दल्गता.

एडुं दूतां तूताकोम्कु उहकमळ

6 अस्के तूताकोम पीसि मत्ता अव एडुं दूतां तूताकोम्कु उहकालय तयार आतां.

7 मोदाटा दूता तूताकोम उहकता, अस्के नेत्तुर कलियसि मत्ता बंडां आनि तळमि बूमिपोरिं अरता. अरतस्के बूमिता मूड बागाल्कुनाल उंदि बागम आनि मराकुना मूड बागाल्कुनाल उंदि बागम कर्विसोत्ता. इंका पच्चटा जाळिगुळा पुरागा वेसोत्ता.

8 रोंडो दूता तूताकोम उहकता, अस्के तळमितोनि पोतसेके मत्ता उंदि पेद्दा गुट्टातसोंटद बतलो समुद्रमते वाटमळ जर्गता. दानहेंदाल समुद्रमता मूड बागाल्कुनाल उंदि बागम नेत्तुरलेसीं आसोत्ता.

9 अदुनहेंदाल समुद्रमते जीवाते मत्ता जिवरासिना मूड बागाल्कुनाल उंदि बागम जिवरासीं हासोत्तां. आनि समुद्रमते मत्ता जहाजकुना मूड बागाल्कुनाल उंदि बागम नासडेम आता.

10 पेनदा मूडो दूता तूताकोम उहकता, अस्के मब्बुनाल डिव्ठितलेसीं पोतसेके उंदि पेद्दा सुक्का बूमिपोरिं अरता. अद सुक्का मूड बागाल्कुनाल उंदि बागम बेरेह्क आनि एता उटानपोरिं अरता.

11 अद सुक्काता पोरोल कयमुल. दानहेंदाल एता मूड बागाल्कुनाल उंदि बागम एर कयमुल आसोत्ता. अद एर उट्टाहाटीं वेल्लेन मनकालोर हासोत्तुर.

12 नालुंगो दूता तूताकोम उहकता, अस्के पोळ्दु, वेडसि आनि सुक्कां इवुना मूड बागाल्कुनाल उंदि बागम नासडेम आता. अदुनहाटीं अवुना मूड बागाल्कुनाल उंदि बागम हीकट आता. पोद्दाला-नर्कागुडा मूड बागाल्कुनाल उंदि बागम हीकट आसोत्ता.

13 पज्जो उंदि गुव्वा डेगातुन मब्बुन नड्डुमताल परियसेक वायनद हळतन अद जोरते इल्हा इनानद केंजतन: “इंदके मूड दूतां अवुना तूताकोम उहकानदे मंता, अव अवुना तूताकोम उहकतस्के बूमिपोरिं मनना अंटोर्क इरगा गोसा आयार! गोसा आयार! गोसा आयार!”

9

कपालमपोरिं सिक्का हिलवोर्कु वायना गंडाल्कु

1 पजा हेय्युंगो दूता तूताकोम उहकता, अस्के मब्बुनाल उंदि सुक्का बूमिपोरिं अरता. आ सुक्काक वेल्लेन लोत मत्ता पोक्काता चाबि हीतद नना हळतन.

2 आ सुक्का, लोत मत्ता पोक्काता तल्पुन तेंडता, अस्के पेद्दा बट्टिताल पेय्सना पोयालेह्का आ पोक्काताल पोया पेय्सता. दानहेंदाल पोळ्दु, वळि हीकट आसोत्तां.

3 आ पोयाताल गोल्लाबामा पुळ्कु पेय्सि बूमिपोरिं वातां. बूमिपोरिंटा मिच्चोर्क बसोंटा ताकत मंतनो असोंटदे ताकत अवुंक हियमळ जर्गता.

4 आ गोल्लाबामांक्कु, बूमिपोरिंटा जाळितुन आयि, बवे पच्चटा पोर्का, मराकुन आयि, नासडेम कियानायो. बोरा कपालमपोरिं अय्ते पेनदा सिक्का तंचि हिल्लेनो सिराप ओर्कुने नासडेम कियाना इंचि वेहामळ जर्गता.

5 मनकालोर्कुन हक्काना अदिकारम अय्ते अवुंक हिल्ले, गानि हेय्युं नेल्कुनदाका ओर्कुन तकलिपते अरहना अदिकारम हियमळ जर्गता. अवुनाहेंदाल आयाना तकलिप, मनकन मिचचो कस्कुते बल्हा मनंता अल्हा मत्ता.

6 अव रोजकुने लोकुल्क हामुरतुन पहकंतुर, गानि ओर्कु हामुर दोर्को. हामुर कोरांतुर गानि ओर्कु हामुर दोर्को.

7 आ गोल्लाबामां, लडाइहाटीं तयार कीता गुरांल्कुनलेसीं दिस्सेक मत्तां. अवुना तल्लानपोरो बंगारमता किरिटम दोसताप मत्ता. अवुना मोकाल्क मनकालोरा मोकाल्कुनलेसीं दिस्सेक मत्तां.

8 अवुना केल्लक मुरताहकुना केल्लकुनलेसीं मत्तां. अवुना पल्कु सिंहमता पल्कुनलेसीं मत्तां.

9 अव कच्चिता अंगिं केरसि मत्तां. अवुना रेक्काना आवाज अय्ते, लडाइ कियालय वित्तना वेल्लेन गुरांल्कुना रताल्लकुनलेसीं मत्तां.

10 अवुंक मिचचोनलेसीं तोकां, कोडिं मत्तां. मनकालोर्कुन हेय्युं नेल्कुनदाका तकलिपते अरहचि इराना ताकत, अवुना तोकाने मत्ता.

11 वेल्लेन लोत पोक्काता दूता, अवुंक राजाल आसि मत्ता. इब्रानि बासाते दान अबदोन आनि ग्रीक बासाते अपुलोन इंचि इंतुर.

12 इद मोदाटा गंडम पेय्सि होत्ता. मुन्ने इका रौंडु गंडाल्कु वायानव मंतां.

हासंगो तूताकोम उहकमळ

13 हासंगो दूता तूताकोम उहकता, अस्के पेनदा मुन्ने मत्ता बंगारमता गदूदेता नालुं कोहकुनाल उंदि लेंग नना केंजतन.

14 आ लेंग, तूताकोम पीसि मत्ता हासंगो दूतातुन, “परात इनना पेदूदा बैरटगा दोहासि मत्ता नालुं दूतन होळसीम,” इंचि इत्ता.

15 अदे वेला, अदे रोजु, अदे नेला, अदे वर्साताहाटीं होळसालय पेन अवुन तयार कीसि मत्ता. बूमिपोरोटा लोकुल्कुना मूड बागाल्कुनाल उंदि बागम लोकुल्कुन हक्कानाहाटीं आ नालुं दूतन होळसीयमळ जर्गता.

16 आ गुरांल्कुनपोरो वायना सिपाइल्क लेक्काते पुरा इरवै कोट्टुकु मत्तुर इत्तद नना केंजतन.

17 नना हळता दर्शनमते, आ गुरांल्कुनपोरो उद्विदिस मत्तोर केरता कच्चिता अंगिं, तळमितलेसीं रगारगा, नेळि पंडि रंगुलेसीं आनि गंदकम रंगुनव मत्तां. अवुना तल्लां सिंहमता तल्लानलेसीं दिस्सेक मत्तां. इका अवुना तोळदाल तळमि, पोया, गंदकम पेय्सेक मत्ता.

18 आ मूड गंडाल्कुनाहेंदाल इत्ते, गुरांल्कुना तोळदाल पेय्सना तळमि, पोया, गंदकम इवुनाहेंदाल बूमिपोरोटा मूड बागाल्कुना लोकुल्कुनाल उंदि बागम लोकुल्कुन हक्किसि पोहमळ जर्गता.

19 आ गुरांल्कुना ताकत अवुना तोड्डिने, तोकाने मत्ता. अवुना तोकांक तरास तल्लानलेसीं तल्लां मत्ताहाटीं, अव लोकुल्कुन कस्किसि ओर्कुन तिप्पल्क किय्युंद.

20 अव गंडाल्कुनाहेंदाल अचचोन तिप्पल्क वायिनागानि बोर अय्ते हाया हिल्लुरो, ओर ओरा कराब कबाहकुनाल मनसु मार्सकुन्ना हिल्लुर. ओर देय्याल्कुन इत्ते, वळका पर्खव, केंजा पर्खव, ताका पर्खव बंगारम, एंडि, रागि, बंडा, कट्टेतोनि तयार कीता बोम्मन मोळकसेकेन मत्तुर.

21 अचोने आयका लोकुल्कुन हक्कमळ, होदें कियमळ, बोगमतनाल्क कियमळ, दोंगातनाल्क कियमळ इसोटा कबाहकुनालगुडा मनसु मार्सकुन्ना हिल्लुर.

10

पेनदा दूता आनि सिन्ना पुस्तकम

1 पजा, उंदि ताकतवर दूता मब्बु तेपेंतुन मुचकुंचि स्वर्गमताल हिळ रेय्सि वायानद नना हळतन. दाना तल्लापोरो सिंगिड मत्ता. मोकोम पोळदुनलेसीं आनि काल्क तळमिता कंबालेसीं मत्तां.

2 विच्चिसि मत्तद उंदि सिन्ना पुस्तकम दाना कय्दे मत्ता. अद दाना तिना कादुन समुद्रमपोरो, आनि रोड्डा कादुन बारे बूमिपोरो इरता.

3 पजा सिंहम मोत्कुत्ताप पेदूदा आवाजते मोतकुत्ता. अस्के एडुं मल्कां उस्मताप गड्डेल इंचि आवाज वाता.

4 आ एडुं मल्कां गड्डेल इत्ता आवाज वातस्के, अवुन नना रासानदे मत्ता, अस्केने स्वर्गमताल उंदि लेंग, “एडुं मल्कां उस्मता आवाजताल केंजता पोल्लेन रासमा, अवुन मक्किचि इरा,” इंचि इत्तद नना केंजतन.

5 समुद्रमपोरो आनि बूमिपोरो काल्क इरसि नित्तिसि मत्ता दूता, स्वर्गमताहेके तिना कय हाहतद नना हळतन.

6 पजा अद दूता, बोर अय्ते स्वर्गमतुन आनि अव्टे मनना अन्निटवुन, बूमितुन आनि अव्टे मनना अन्निटवुन, समुद्रमतुन आनि अव्टे मनना अन्निटवुन तयार कीतोर, बस्केळ्क जीवाते मनना आ पेनबाबाना पोरोलते ओट्टु तिचि इल्हा इत्ता, “इका आल्सेम आयो.”

7 गानि एडुंगो दूता दाना तूताकोम बस्के अय्ते उहकारो, अस्के पेन दाना सेवाकुल्कु आता कबुरतोर्कुक वेह्चि मत्ता परकारम, दाना मर्ममता पोल्लें पुरागा आयनुं.

8 स्वर्गमताल वाता बद लेंगुन अय्ते नना केंजसि मत्तानो, अदे लेंग मर्रा नाकुन, “होन! होंचि समुद्रमपोरो आनि बूमिपोरो काल्क इरसि नित्तिसि मनना दूताता कय्दे, विच्चिसि मत्ता पुस्तकमतुन तेंडकुन,” इंचि इत्तद नना केंजतन.

9 अस्के आ दूतातगा होंचि, “नीवा कय्दे मनना अद सिन्ना पुस्तकमतुन नाकु हीम,” इंचि इत्तन. अस्के अद नाकुन, “इदे दीन पीसि तिन्नु. इद नीवा पीटुन अय्ते कयमुल कीता, गानि नीवा तोड्डुक मात्रम तेनेलेसीं तिथ्यगा दल्लांता” इंचि इत्ता.

10 अस्के आ पुस्तकमतुन दूताता कयदाल तेंडकुंचि तित्तन. तित्तस्के अय्ते ना तोड्दुक अद तेनेलेसीं तिय्यागेन दलग्ता गानि पीर मात्रम कयमुल आसोत्ता.

11 पजा आ दूता नाकुन, “मसंदि मल्ला निमे होंचि हरेक बासा वळकानोर्कुंक, राजुल्लुकुंक, वेल्लेन लोकुल्लुकुंक आनि दुनियाता अन्नि देसेल्लुकुंक, वायाना कालमते ओरपोर्री बतल जर्गानद मंतानो, अदुना बारेमते बविस्यवानि वेहा” इंचि इत्ता.

11

इव्वुर गवाइदार्क

1 पजा, कहाना पट्टितसोंटद उंदि पट्टिटि हीसि बोरो नाक इल्हा वेहतोर, “निमे तेदसि, पेनदा गुळितुन आनि गद्देतुन कहा. इंका गुळितगा बच्चोर लोकुल्लुक अय्ते आरादना कीतुर ओर्कुन लेक्का.

2 गानि गुळिता पलाते दारातुन कहामा, अद यहुदि आयवोर्कुंक हीसि मंता. पवित्र सहरतुन नल्लै रोंडु नेल्लांदाका ओर जारांतुर.

3 पजा नना नावा इव्वुर गवाइदार्कुकुंक बविस्यवानि कियाना अदिकारम हीतन, ओर पोतां हुटकुंचि पन्नेंड नुहकुना अरवै रोजकुनदाका बविस्यवानि कीतुर.”

4 आ इव्वुर गवाइदार्क इत्ते, भूमिपोर्रीटा सामिना मुन्ने नित्तिसि मनना रोंडु जय्तुन मराक आनि रोंडु दीसोडिं आंदुं.

5 ओक्कला बोरन्ना आ गवाइदार्कनपोर्री अन्यायम कियालय हळते, ओरा तोळदाल तळमि पेय्सि ओरा नुकसान कियालय हळना पगातोर्कुन बळ्दि कीसि पोहंता. अवनुना नुकसान कियालय हळानोर्कुंक तप्पाकोटा इसोटा हामुरे वायार.

6 आ गवाइदार्क बविस्यवानि कियाना रोजकुने ओक्कला पिरु वायानय्ते अदुन आपाना अदिकारम ओर्कु हीसि मत्ता. अचोने आयाका ओर्कु बस्के अनपिस्ते अस्के, एतुन नेतुरते मार्समळ आनि भूमिपोर्रीटा लोकुल्लुकुंक तीराता तकलिष्क हियना अदिकारमगुडा ओर्कु हीसि मत्ता.

7 पेनदा बारेमते ओरा गवाइ वेहामळ आतस्के, लोत पोक्काताल उंदि जिवरासि पलाते पेय्सि वासि ओरतोनि लडाइ किय्यार. लडाइ कीसि ओर्कुन गेल्लिसि हक्कार.

8 ओरा पीनगुल्लुकु आ पेद्दा सहरता हर्दे अरसि मनंतां. इगेन ओरा सामिनगुडा कूसुनपोर्री वेलाड वाट्सि मत्तुर. वैरे अर्तमते, अद सहरतुन सदोम आनि इजिप्त इंचि इंतुर.

9 म्हुननरा रोजकुनदाका अन्नि जातिनोर, हरेक बासा वळकानोर, अंतोर लोकुल्लुक, दुनियाता अन्नि देसेल्लुकुनोर ओरा पीनगुल्लुकुन हळांतुर, गानि ओर्कुन बौदा मात्रम दोस्सा हिय्युर.

10 ओर इव्वुर कबुरतोरहेंदाल भूमिपोर्री वेल्लेन तकलिष्क वासि मत्तां. अदुनहाटीं ओर हातुर इंचि भूमिपोर्रीटा लोकुल्लुक वेल्लेन कुसिते पंडगुल्लुकु कियानुर, वरोंक-वरोर इनामकु हीकुनानुर.

11 गानि म्हुननरा रोजकुना पज्जो, पेनदाहेंदाल पिस्वरता ऊपिर वासि ओरव्टे नेगता. अस्के ओर तेदसि निततुर. अस्के ओर्कुन हळता लोकुल्लुक इरगा वेरियतुर.

12 पजा स्वर्गमताल उंदि पेद्दा लेंग, “इगे पोर्री वट्टु” इंचि इत्तद ओर इव्वुर गवाइदार्क केंजतुर. केंजसि उंदि मब्बु तेपैते कलियसि ओरा पगातुर हळानेकेन स्वर्गमताहेके पोर्री होत्तुर.

13 अच्चोटेन अदे वेलाते अगा पेद्दा बुकंप आता, अद सहरता पदि बागाल्लुकुनाल उंदि बागम नासडेम आता. अद बुकंपता हेंदाल एडुं वेय्कुना लोकुल्लुक हासि होत्तुर. आनि बोर अय्ते पिस्सि मत्तुरो, ओर इरगा वेरियतुर, वेरियसि स्वर्गमते मनना पेनदा महिमा कीतुर.

14 रोंडो गंडम आसोत्ता. हुळाट! मूडो गंडम बिरानेन वासेक मंता.

एडुंगो दूता तूताकोम उह्कमळ

15 एडुंगो दूता तूताकोम उह्कता, अस्के स्वर्गमते पेद्दा आवाज केंजावाता. अद आवाज, “दुनियाता पूरा राज्येम मना सामिनद आनि ओना किरिस्तुनद आता. युगा-युगाल्लुकुनदाका ओरे राज्येम कीतोर,” इंचि इत्ता.

16 अल्हा इत्तस्के, राजगद्देन पोर्री उद्दिदिस मत्ता आ इव्वै नालुर पेद्दाल्लुकु पेनदा मुन्ने काल्लुकुनगा बोकबोर्ले अर्सि, पेनदुक आरादना कीतुर.

17 कीसि, “अन्निटकन्ना एकको सक्तिमंतुन आता मावा पेनदुना! निमे मुन्ने मत्तिन, इंदकेगुडा मतिन. इंदके निमे नीवा ताकततुन हुपिच्चि राज्येम कियालय सुख कीतिन. अदुनहाटीं मोमोट नीकु दन्यवाद कीतोम.

18 नीकुन एरपाट कियवा लोकुल्लुक नीवा विरोद कीताहाटीं नीकु होंग वाता. हातोरान्यायम कियाना वेला इंदके एव्ता. अल्हेने नीवा सेवाकुल्लुकुंक, नीवा पोल्लें वेहाना कबुरतोर्कुंक, नीवा लोकुल्लुकुंक, नीकु वेरियसि पिस्साना सिन्नाल्लुकुंक-पेद्दाल्लुकुंक इनाम हियना वेला एवता. अचोने आयाका भूमितुन नासडेम कीतोर्कुन नासडेम कियाना वेलागुडा वाता,” इंचि इत्तुर.

19 पजा स्वर्गमते मत्ता पेनदा गुळि कुल्ला आता. अय्ते अगा पेनदा करारकुना संदुग दिस्ता. अस्के इरगा मेर्समळ, उस्ममळ, पिडगु वाटमळ, बुकंम आयमळ जर्गता पजा इरगा बंडां अरतां.

12

मुरतळ आनि उंदि पेद्दा मासुल तरास

1 अद आता पजा, स्वर्गमते नाकु उंदि पेद्दा चिन्ह दिस्ता. अद बतल इत्ते, उंदि मुरतळ पोडदुन कप्पिडलेसीं पोंडसि मत्ता. दाना काल्कुना हिळु वेळसि आनि तल्लापोरो बारे पन्नेड सुक्काना किरिटम मत्ता.

2 अद मुरतळ पीटे मत्ता. मुरतटा एरपूराना वेला वासि मत्ताहेंका अद नोपिने तनलाळसेक मत्ता.

3 पजा स्वर्गमते नाकु इंकुंदि चिन्ह दिस्ता. अद बतल इत्ते, उंदि एर्राटा पेद्दा मासुल तरास मत्ता. दानकु एडुं तल्लां, पदि कोहकु मत्ता. एडुं तल्लानपोरो एडुं किरिटाल्कु मत्तां.

4 अद तरास दाना तोकाते, मब्बुने मनना सुक्काना मूड बागाल्कुनाल उंदि बागम सुक्कान इग्गिस बूमिपोरो अरहता. एर पूरालय आसि मत्ता मुरतळ, एर पूरतारित्ते, दाना पेळान मिंगनाहाटी आ तरास, मुरतटा मुन्ने होंचि नित्तिसि मत्ता.

5 अद मुरतळ वरोर मरिन कंता. ओर अन्नि राज्येल्कुनपोरो कच्चिता सलाकिलेसी कडक राज्येम कियानोर मत्तोर. गानि आ पेळान पेनदागा, दाना राजगद्देतगा ओयमळ जर्गता.

6 अस्के अद मुरतळ बय्लि जेगातेके वित्तुता. अगा दानाहाटी, पन्नेड न्हकुना अरवै रोजकुनदाका बेस हळकुननाहाटी पेन जेगा तयार कीसि मत्ता.

मासुल तरासतुन स्वर्गमताल पलाते गेदुममळ

7 पजा स्वर्गमते उंदि लडाइ आता. पेनदा मिकायेल इनना दूता, दाना दंटा दूतन पीसोंचि, मासुल तरास आनि दाना दूतानतोनि लडाइ कीता. अस्के मासुल तरासगुडा दाना दूतन पीसि मिकायेलुनतोनि लडाइ कीता.

8 गानि मासुल तरास, दाना दूतां लडाइ गेल्सा परा हिल्लें. अदुनहाटी स्वर्गमते मनालय अबुंक जेगा दोर्काहिल्ले.

9 पजा अद मासुल तरासतुन आनि दाना दूतन बूमिपोरो दोब्बिसीयमळ जर्गता. अद तरास दाना दूतनतोनि कलियसि पूरा दुनियातुन पसांचेके मंता. इद मासुल तरासुन पडाना तरास, हिलाकोटे पसांचनदु, हिलाकोटे देय्यम इंचि इंतुर.

10 पजा स्वर्गमताल उंदि पेद्दा लेंग केंजावाता. अद इल्हा मत्ता, “मा पेनदा मुन्ने मावा विस्वासुल्कुनपोरो नर्का-पिय्यल बस्केळ्ळ दोसेम दोस्सेके मनानदुन हिळु बूमिपोरो दोब्बिसीयमळ जर्गता. अदुनहाटी पेन मनाकु हियना मुक्ति, ताकत, राज्येम आनि दाना किरिस्तुना अदिकारम पलाते अरता.

11 गोरि पोरिना नेत्तुरताहेंदाल, ओर वेहता गवाइ हेंदाल देय्यमतुन गेल्सतुर. ओर्कु हामुर वायिनागानि ओर ओरा जीवाता पर्वा किया हिल्लुर.

12 अदुनहाटी स्वर्गम आनि स्वर्गमते मनानोरिता मिमेट कुसिते मंटु. गानि बूमिपोरो आनि समुद्रमते मनानोर्क मात्रम बच्चोन गोसा वायार! बारित्ते देय्यमतगा वेल्ले टाइम हिल्ले इंचि दान्क तेळियसे मंता, अदुनहाटी अद वेल्लेन होंगुने मिहगा वाता,” इंचि केंजावाता.

मुरतटुन तिप्पल्क कियमळ

13 बस्के अय्ते अद तरासतुन बूमिपोरो दोब्बिसीतुर, अस्के अद तरास आ पेळान कंता मुर्ताटुन परेसान कियालय दान पज्जो दलगता.

14 गानि दानाहाटी पेन तयार कीसि इरता जेगातगळ्ळ, अद तरासुनाल तपिचकुचि परिथिसि होनालय पेन दानकु गद्दल रेक्कानसोंटव रोंडु रेक्कां हीता. दानहेंदाल मूडुननरा वर्सनदाका अद मुरतटुन बेस हळकुन्मळ जर्गता.

15 आ मुरतळ कम्मुटे पोगिस होनना इंचि तरास दाना तोळ्दाल बैरेडतालेसी एर पेचाहता.

16 गानि बूमि आ मुरतळ्ळ सहायम कीता, तरास तेंडता एतुन अद मिंगसि वाटता.

17 इदुनहेंदाल तरासुंक मुरतळ पोरो बागा होंग वाता. अस्के तरास आ मुरतटा कळमता वंसमतोरतोनि, पेनदा आदेसकुनपोरो ताकानोरतोनि आनि येसुना गवाइ वेहानोरतोनि लडाइ कियालय होत्ता.

18 पजा अद तरास समुद्रमता उस्के पोरो होंचि नित्तुता.

13

समुद्रमताल रोंडु जिवरासी पेसमळ

1 पजा नना उंदि जिवरासि समुद्रमताल पेयसानद हळतन, दानकु पदि कोहकु, एडुं तल्लां मत्तां. कोहकुनपोरो पदि किरिटाल्कु मत्तां, तल्लानपोरो पेनदुन अपमानम कियानव पोरोलीं रासि मत्तां.

2 नना हळता जिवरासि सिर्तांगुनलेसी मत्ता, दाना काल्क एडुजुना काल्कुनालेसी मत्तां आनि दाना तोड्डिड सिंहमता तोड्डिडलेसी मत्ता. मासुल तरास दाना ताकत, दाना राजगद्दे आनि पेद्दा अदिकारम आ जिवरासिक हीता.

3 अद जिवरासिता एडुं तल्लानाल उंदि तल्लाक हायानसोंटा देब्बा दल्लिसि पुन्नु आसि मत्ता, गानि अद पुन्नु बेस आतद हळसि, दुनियातोर अंतोर इचंत्रम आसि दान पज्जो होनालय दलगतुर.

4 अद जिवरासिक मासुल तरास अदिकारम हीताहाटीं अंटोर मासुल तरासतुन मोळ्कालय दलगतुर. पजा ओर, “अद जिवरासितालेसीं बोरन्ना मंतुरा? दानतोनि बोरन्ना लडाइ किया परीतुरा?” इंचि अद जिवरासितुनगुळा मोळ्कालय दलगतुर.

5 अद जिवरासि पेदिदरकेमते आनि अपमानम कियाना पोल्ले वळ्कानाहाटीं पेन दानकु नल्पै रौडु नेल्लांदाका अदिकारम हीता.

6 पजा अद जिवरासि, पेनदुन, दाना पोरोलतुन, दाना जागातुन, अल्हेने दानतोनि स्वर्गमते मनानोर्कुनगुडा अपमानम कियालय दलगता.

7 दान्क पेनदा लोकुलकुनतोनि लडाइ कीसि ओर्कुन गेल्सानद अदिकारम हियमळ जर्गता. इच्चोने आयाका दान्क हरेक जाति, हरेक बासा, हरेक लोकुलक आनि दुनियाता अन्नि देसेलकुना लोकुलकुनपोरो अदिकारम हियमळ जर्गता.

8 बूमिपोरो मनना अंटोर इद दुनिया तयार आतागटाल, बोरा पोरोलक अयते, मोक्कु आता गोरि पोरिना पिस्वरता पुस्तकमते हिल्लेगो, ओर अद जिवरासितुन मोळ्कानुर.

9 बोर्क अयते केव्क मंता ओर बेस केंजिरकांटी.

10 जेलुंक होनना मत्तोर, जेलने अरानुर. बोर अयते कसेटे हक्कतोर, ओनगुडा कसेटेन हक्कमळ जर्गार. इदुन पीसि पेनदा लोकुलकुना विस्वासम, ओप्के दिस अरता.

बूमिताल पलाते तेंडता जिवरासि

11 पजा नना मरुंदि जिवरासितुन बूमि लोप्पोटाल पोरो वायानद हळतन, दान्क गोरि पोरिनलेसी रौडु कोहकु मत्तां. अद मासुल तरासुनलेसीं वळ्कसेक मत्ता.

12 इद जिवरासि, हायानसोंटा देब्बा दल्लिसि बेस आता मोदाटा जिवरासिता पूरा अदिकारम दाना मुन्नेने वाळकुंचि कबळ कियुंदु आनि बूमिपोरो मनना अंटोर्कुन आ मोदाटा जिवरासितुन मोळ्कानाल कियुंदु.

13 अल्हेने लोकुलक हळानेकेन स्वर्गमताल बूमिपोरो तळमि अरहुंदु, इल्हा अरहचि अद पेद्दा-पेद्दा चिन्हां हुप्सुंदु.

14 मोदाटा जिवरासिता मुन्ने इद जिवरासिक चिन्हां हुप्सना अदिकार दोर्कता, अदुनहाटीं चिन्हां हुपिच्चेक बूमिपोरो मनना लोकुलकुन, “बद जिवरासिक अयते हायानसोंटा देब्बा दल्लिसि मत्ता, अद जीवाते मंता अदुना बोम्मा कीम्टु,” इंचि बोकिचुंदु.

15 मोदाटा जिवरासिता बोम्मा वळ्कागोम इंचि बोम्माते जीवोत्रम वाटानद, आनि अदुन बोर अयते मोळ्कुर, ओर अंटोर्कुन हक्कना अदिकार दीनकु हियमळ जर्गता.

16 अचोने आयाका अद, सिन्नुर-पेद्दुर, सिरमंत-गरिब, दासुलक आयवोर, दासुलक ईर अंटोर्कुन ओरा तिना कयपोरो हिलाकोटे कपालमपोरो उंदि-उंदि सिक्का वाटागोटा.

17 अद सिक्का इत्ते जिवरासिता पोरोल हिलाकोटे दाना उंदि नंबर आंद. इल्हा सिक्का बोर्क अयते मन्नो ओनकु बतले अम्मावायो, आनि एतावायो.

18 इद पोल्ले तेळियगोम इत्ते बुद्दि गावाले. बुद्दि मत्ता मनकल जिवरासिना लेक्का कियिरकांटी. अद लेक्का वरोर मनकन हुप्संता आनि अद हारं नुह्कुना अरवै हारं आंद (666).

14

गोरि पोरि आनि 1,44,000 लोकुलक

1 मराना नना सियोन इनना गुट्टापोरो पेनदा गोरि पोरि नित्तिसि मत्तद हळतन. अगा दानतोनि उंदि लक्सा नल्पै नालुं वेय्कुना (1,44,000) मंदि मत्तुर. ओरा कपालमपोरो गोरि पोरिना आनि दाना बाबाना पोरोल रासि मत्ता

2 नना स्वर्गमताल उंदि इसोंटा आवाज केंजतन गदा, अद पोंगाना एता वेल्लेन वर्दानालेसीं आनि बागा मब्बु उस्मनालेसीं मत्ता. अद आवाज टांबुरा नेकिसते बल्हा केंजा वांतनो अल्हे केंजा वासेक मत्ता.

3 आ उंदि लक्सा नल्पै नालुं वेय्कुना मंदि राजगद्देता मुन्ने, नालुं जिवरासिना मुन्ने आनि पेद्दालकुना मुन्ने पूना पाटा पारसेके मत्तुर. बूमिपोरोटाल पेन अस्कुत्ता लोकुलकुनाल ईर तप्पा बोरे आ पाटा पारा परीहिल्लुर.

4 ईर अंटोरगुडा मरमि आयवोर, मुर्ताहकुनाल लक्कु मंचि सतातुन पवित्र इरतोर आंदुर. गोरि पोरि बगा-बगा अयते होनुंदु ईर अंटोर दाना पज्जो-पज्जो होनानोर आंदुर. ईर अंटोरगुडा पेन आनि गोरि पोरिनाहाटीं मोदाटा पलम आयगोम इंचि अस्कुत्तोर आंदुर.

5 ओरा तोळ्दाल बस्केन आबद्दम पोल्ले पेयसा हिल्ले, ओर बेकसुर लोकुलक आंदुर.

मूड दूताना आदेस

6 अद आता पजा नना पेनदा इंकुंदि दूतातुन मब्बुना नड्डुमताल परियसेक मननद हळतन, दानागा बूमिपोरो मनना अंटोर्क, हरेक जातितोर्क, हरेक बासा वळ्कानोर्क, अंटोर लोकुलकुंक आनि दुनियाता अन्नि देसेलकुना लोकुलकुंक वेहालय बस्केळ्क पिस्सना पिस्वर बारेमता बेसता कबुर मत्ता.

7 अद दूता पेद्दा आवाजते, “पेन न्यायम कियाना वेला दग्गेर्क एवता. अदुनहाटीं दानकु वेरियट्टु, दाना महिमा कीम्टु. स्वर्गमतुन, बूमितुन, समुद्रमतुन आनि एता ऊटान तयार कीता पेनदा आरादना कीम्टु” इंचि इत्ता.

8 अद आता पजा इंकुंदि दूता वासि, “नासडेम आता, नासडेम आता, पेद्दा बेबिलोन सहर नासडेम आता, अद अन्नि जातिना लोकुकुंक दाना बोगमतनमता होंग वायानसोटा कल्लु उहता” इंचि इत्ता.

9-10 पजा इंकुंदि मूडोव दूता वासि, “बोरे आयिर अद जिवरासितुन आनि दाना बोम्मातुन मोळिकसि, ओना कपालमपोरो आयि हिलाकोंटे कयपोरो आयि दाना चिन्हाता सिक्का वाटकुंतोर, ओरगुडा तालिते वळियसि मत्ता पेनदा होंगुना पिच्चर कल्लु उनानुर, उंचि पवित्र दूतन मुन्ने, गोर्रे पोरिन मुन्ने रमा-रमा पोत्तना तळमिते आनि गंदकमता सिक्साते अरानुर.

11 अल्हा ओर वेयनेके पेयसना पोया बस्केळक पोरो तेदसेकेन मनंता. बोरे अयते आ जिवरासितुन आनि दाना बोम्मातुन मोळकंतुर, दाना पोरोलता चिन्हाता सिक्का वाटकुंतुर ओर नर्का-पियल तकलिपेते मनंतुर,” इंचि इत्ता.

12 अदुनहाटी पेनदा आदेस परकारम ताकानोर आनि येसु सामिना पोरो विस्वासम कियाना पेनदा लोकुलक तिप्पलकुने ओप्के पियमळे गावाले.

13 अस्के स्वर्गमताल उंदि आवाज, “इल्हा रासा, बोरे अयते सामिन विस्वासम कीसि हातुर, ओर इंदके नसिबतोर आंदुर,” इंचि नाक केंजावाता. “हो! निजमे, ओरा कस्टमताल ओर्क आराम दोर्कता. ओर कीता कबाहक ओरतोने दांतां,” इंचि आत्मा इत्तद केंजावाता.

बूमिपोरोटा पंटातुन कोयमळ

14 पजा नना हळतस्के, नाक तेल्ला मब्बु तेर्पे दिसता. आ तेल्ला मब्बु तेर्पेपोरो मनकना रूपमते पुटतोनलेसी वरोर उद्दिदस मत्तोर. ओना तेल्लापोरो बंगारमता किरिटम आनि ओना कयदे वेल्लेन करा-करा मत्ता उंदि हेटेळ मत्ता.

15 इंका उंदि दूता पेनदा गुळिताल पेयसि, मब्बु तेर्पेपोरो उद्दिदस मत्तोन, “बूमिपोरोटा पंटा कोताक वासि अदुन कोय्याना वेला एवता अदुनहाटी निमे नीवा हेटेटे अद पंटातुन कोय्या” इंचि जोरसे वेहाता.

16 अस्के तेल्ला मब्बु तेर्पेपोरो उद्दिदस मनानोर ओना हेटेळ तिरहातोर, तिराहचि बूमिपोरोटा पंटातुन कोयमळ जर्गता.

17 अस्के पेनदा इंकुंदि दूता स्वर्गमते मनना गुळिताल पेयसता. दानागा गुडा वेल्लेन करा-करा मत्ता हेटेळ मत्ता.

18 अस्के गद्देताल पेनदा इंकुंदि दूता वाता. अद दूताक तळमिता अदिकारम हीसि मत्ता. इरगा करा-करा मत्ता हेटेळ पीसि मत्तोनु पेद्दा आवाजते, “बूमिपोरो मनना अंगुर पंडिना पंटा पंडता अदुनहाटी नीवा इरगा करा-करा मत्ता हेटेटे अंगुर गुत्ति कोय्या” इंचि इत्ता.

19 अस्के आ दूता दाना हेटेटे, बूमिपोरोटा अंगुर पंडिना गुत्ति कोय्यि, पेनदा होंगु इनना अंगुर पंडिना गानगुने वाटसीता.

20 पजा सहरता पलाते मत्ता गानगुनगा गानगु पियमळ जर्गता. अद गानगुताल नेत्तुर पोरो वाता. अद नेत्तुर इच्चोर पेयसता गदा, गुराळकुना मोसोटुन दोहाना पट्टानच्चोर एत्तु आनि मूड नुहकुना किलोमिटर पोंगसेक होत्ता.

15

पेनदा होंगुने निडता बंगारमता एडुं वाटिं

1 अस्के स्वर्गमते नना मरुदि पेद्दा इंचंनमता चिन्ह हळतन. अद बतल इत्ते, एडुं दूतानगा, एडुं गंडाल्कु मत्तां. अव आकिरता गंडाल्कु आंदुं, अव आता पजा पेनदा होंग सल्लारंता.

2 बोरे अयते आ जिवरासि, बोम्मा आनि दाना पोरोलता नंबरतोनि लडाइ कीसि गेल्लि मत्तुर, ओर अंतोर पेनदा टांबुरां पीसि आ समुद्रमता ओड्डुनपोरो नित्तिस मत्तद नना हळतन

3 पेनदा सेवाकुड मसाना पाटा आनि गोर्रे पोरिना पाटा पारसेके ओर इल्हा इनुंदुर, “ए अन्निटकन्ना एक्को सक्तिमंतुन आता मावा सामि पेनदुना, नीवा कबाहक पेद्देय आनि इंचंनमतव आंदुं, निमे बस्केळक मंदना राजान आंदिन, नीवा हरि नीतितद, आनि सत्तेमतद आंदुं,

4 हे सामि सिराप निमेने पवित्र मंतिन, असोटेस्के नीकु वेरियाकोटा, नीवा पोरोलता महिमा कियकोटा बोरे मना परीतोर? नीवा न्यायमतुन अंतोर हळतुर, अदुनहाटी दुनियाता अन्नि देसेल्लकुना लोकुलक निहगा वासि नीके मोळकानुर.”

5 अद आता पजा, गवाइता डेराता गुळितुन, स्वर्गमते कुल्ला कीसि मत्तद नना हळतन.

6 आ गुळिताल एडुं दूतां एडुं गंडाल्कुन पीसि पलाते पेयसतां, अव जगा-जगा तेल्लगा मेर्सना कपडिं केरसि मत्तां. अवुना सातिक बंगारमता पट्टां दोहाचि मत्तां.

7 अस्के आ नालुं जिवरासिनाल उंदि जिवरासि, अव एडुं दूतांक, बंगारमता एडुं वाटिं हिता. आ वाटिने युगा-युगाल्क जीवाते मंदना पेनदा होंग निडिस मत्ता.

8 अस्के अद पूरा गुळि पेनदा महिमाता वेल्गुने आनि ताकतहेंदाल पोयातोनि निडिस होत्ता. पजा आ एडुं दूताना अव एडुं गंडाल्कु पूरा मारनदाका अद गुळि लोप्पो बोरे नेंगा परीहिल्लुर.

16

एडुं गंडाल्कु

1 अस्के गुळिताल उंदि पेद्दा आवाज आ एडुं दूतनतोनि, “होन्टु! पेनदा होंगुना अव एडुं वाटिन बूमिपोरो वळियटु” इत्तद नाकु केंजावाता.

- 2 अदुनहाटीं पेनदा मोदाटा दूता होंचि, दाना वाटितुन बूमिपोर्रीं वळियसीता, अस्के अद जिवरासिता निसानि मत्तोर्कु आनि बोर अय्ते दाना बोम्मातुन मोळ्कुंदुर ओर्कु इरगा नोयाना लसा-लसा पुनकु आतां.
- 3 पेनदा रोंडो दूता दाना वाटितुन समुद्रमते वळियसीता, अस्के अद समुद्रम हाता मनकना नेत्तुरलेसीं आसोत्ता, पजा समुद्रमते मनानव अन्नि जिवरासि हासोत्तां.
- 4 पेनदा मूडोव दूता दाना वाटितुन बेरेह्कुने आनि एता ऊटान पोर्रीं वळियसीता, अस्के अव्टे मत्ता पूरा एर नेत्तुरलेसीं आसोत्ता.
- 5 एतापोर्रीं अदिकारम मत्ता पेनदा दूता इल्हा इनानद नना केंजतन, “ए पवित्र पेनदुना, निमे इंदके मंतिन, मोदालागुडा मत्तिन. निमे न्यायम कियाना पेनदुन, निमेने इवुना इल्हा न्यायम कीतिन.
- 6 बारित्ते ओर नीवा पवित्र लोकलुकुन, नीवा कबुरतोर्कुन हक्किसि ओरा नेत्तुर पोंगागोटतुर. अदुनहाटीं निमे ओर्कु उनालय नेत्तुर हीतिन, ओर इदुना लायके मंतुर,” इंचि इत्ता.
- 7 अच्चोटेन मोक्कु हिय्याना गद्देताल, “ए पेनबाबा, सामि, निमेने अन्नितकन्ना सक्तिमंतुन आता पेनदुन आंदिन. निमे कियाना न्यायमते निजम आनि सत्तेम मंता,” इंचि नाकु केंजावाता.
- 8 नालुंगो दूता दाना वाटितुन पोडदुन पोर्रीं वळियसीता, अस्के लोकलुकुन दाना दगळते कर्वगोटाना अदिकारम पोळ्दुंक हियमळ जर्गता.
- 9 कडक दगडाहेंदाल लोकलुक कर्विसोत्तुर, अस्के आ गंडालुकुन पोर्रीं अदिकारम मत्ता पेनदुन अपमानम कीतुर गानि ओर दाना महिमा कियानाहाटीं सतता पापालुकुनाल मनसु मार्सकुन्ना हिल्लुर.
- 10 पेनदा हेय्युंगो दूता दाना वाटितुन आ जिवरासिता राजगद्देपोर्रीं वळियसीता. अस्के दाना राज्यमते पुरागा हीकट आता. पजा तिप्पलुकुंक आगा पराका लोकलुक ओरा नाल्कें ओर्रे कोर्कुकुनालय दलगतुर.
- 11 ओर्क वाता तिप्पलुक, ओर्क आता पुनकुन हेंदाल स्वर्गमते मनना पेनदा अपमानम कीतुर. गानि ओर कीता पापालुकुनाल मनसु मार्सकुना हिल्लुर.
- 12 पेनदा हासंगो दूता दाना वाटितुन परात इनना पेद्दा बेरेटे वळियसीता. अस्के अद बेरेटा एर बोत्तिगा इनकिसि होत्ता, पोळ्द पेय्सना दिक्कुने मनना राजालोर्कुंक हरिं आयगोम इंचि आ दूता अल्हा कीता.
- 13 पजा नना अद मासुल तरासता तोळ्दाल, आ जिवरासिता तोळ्दाल, पेनदा आबद्दम कबुरतोना तोळ्दाल पन्नेतसोंटा मूड दुस्तात्मां पलाते पेय्सानद हळतन.
- 14 इव चिन्हां ह्युपसना देय्यालुकुना आत्मां आंदु. आत्मा अन्नितकन्ना एक्को सक्तिमंतुड आता पेनबाबानतोनि आकिरता रोजकुने लडाइ कियानाहाटीं, दुनियाता अंतोर राजालोर्कुन उंदि कियालय ओरगा होंचेके मंतां.
- 15-16 अव आत्मां आ राजालोर्कुन इन्नानि बासाते अरमिगदोन इनना जेगातगा कल्पतां. अदुनहाटीं येसु, “हुळ्हाट नना मिहगा दोंगानलेसीं वांतन, बोर अय्ते तेल्चिते मंचि, केराना कपडिन कापाळकुंतोर ओर्रे आसिर्वाद दोर्कतोर आंद. बोरे आयिर अल्हा मनाकोटे मेंदुल कुळ्कें दिस्सि लोकलुकुना मुन्ने ओनद ओर्रे सिग्गु पोगोटकुत्तोर आंतोर” इंचि वेहतोर.
- 17 पेनदा एडुंगो दूता दाना वाटितुन वळि पोर्रीं वळियसीता, अस्के स्वर्गमते मनना गुळिता राजगद्देताल पेद्दा आवाजते, “बोत्तिगा आता” इत्तद केंजावाता.
- 18 अस्के मब्बु मेसालय, गळ-गळा इंचि उरमालय दलगता, पजा इद बूमिपोर्रीं लोकलुक पुटतस्केटाल अय्ते, बस्केने आयाहिल्ले असोंटा पेद्दा बुकंप आता.
- 19 अस्के आ पेद्दा सहरता मूड तुकळां आतां. वेरे-वेरे देसेलुकुना सहरकंता कूल्सि अरतां. पेन दाना तलातला आयाना होंगुना अंगुर कल्दुन पेद्दा बेबिलोन सहरकु उहानाहाटीं अद मति मर्गाहिल्ले.
- 20 दीबें अवुना जागाताल मायसोत्तां, गुट्टां बग्गेन दिसाकोटा आतां.
- 21 मब्बुनाल एबै किलो वजन मत्ता बर्प बंडां लोकलुकुनपोर्रीं अरताहाटीं लोकलुकुंक इरगा तकलिप आसि, ओर पेनदा अपमानम कीतुर. अद तकलिप वेल्लेने कतरनाक मत्ता.

17

मुरतळ आनि एर्राटा जिवरासि

- 1 अस्के गंडालुकुना एडुं वाटिं पीसि मत्ता दूतानाल उंदि दूता नाकुन, “हिक्के वा! वेल्लेन एता जलनपोर्रीं उद्दिदिस मत्ता बोगमदान्कु दोर्काना सिक्सा बदो नीकु ह्युसंतन,
- 2 बूमिपोर्रींटा राजालोर दानतोनि बोगमतनम कीतुर, दाना बोगमतनमता कल्दुन उंचि बूमिपोर्रींटा लोकलुक रिम्मालोर आतुर.” इंचि इत्ता.
- 3 नना पवित्र आत्माते निंडतस्के, आ दूता नाकुन बय्लि जेगाते ओता. अगा पदि कोह्कु आनि एडुं तल्लां मत्ता उंदि एर्राटा जिवरासिपोर्रीं उंदि मुरतळ उद्दिदिस मत्तद नाकु दिस्ता. आ जिवरासिता मेंदुलमेड पेनदा अपमानम कियाना पोल्लेंगे रासि मत्तां.

4 अद मुरतळ नेडि पंडि रंगु आनि एर्ग रंगुना कपडिं केरसि मत्ता. इंका डिस्को पूसां, मोतीना दुम्मे वाटकुंचि मत्ता. अल्हेने दाना कयदे बंगारमता वाटिं मत्ता. अद वाटिते दाना बोगमतनम कियाना अपवित्र वस्तु आनि दाना पापालक निडिस मत्तां.

5 दाना कपालमपोर्रो, “पेद्दा बेबिलोन, बोगामोताहकुना अल्हेने ह्यसुवा वस्तुकुना तल्लुर” इंचि मर्ममते रासि मत्ता.

6 अद मुरतळ पेनदा लोकुकुना नेत्तुरतुन आनि येसु सामिना गवाइताहाटी जीवा हीतोर नेत्तुरतुन उंचि रिम्मा आतद हळसि नाकु वेल्ले इचंत्रम आता.

7 अस्के पेनदा दूता नाकुन, “निमे इचंत्रम बारि आतिन? नना इद मुरतळता आनि अद उद्दिस मत्ता पदि कोहकु आनि एडुं तल्लां मत्ता जिवरासिता मर्ममतुन वेहांतन,

8 निमे हळता जिवरासि मोदाला मत्ता गानि इंदके हिल्ले, अद वेल्लेन लोत पोक्काताल पेय्मि नासडेमते अरार. दुनिया पुटतस्केटाल बूमिपोर्रो मनानोरा बोरा पोरोलीं अयते पिस्वरता पुस्तकमते रासि हिल्ले, ओर अद जिवरासितुन हळसि, ‘इद मोदाला मत्ता, इंदके हिल्ले गानि मर्रा वायानद मंता’ इंचि इचंत्रम आयानुर.

9 इव पोल्ले तेळियगोम इत्ते तेल्वि-बुद्दि गावाले. अव एडुं तल्लां इत्ते, अद मुरतळ उद्दिस मत्ता एडुं गुट्टां आंदुं.

10 अल्हेने एडुर राजालोर इंचिगुडा दाना अर्तम आंदु. एडुर राजालोरवेटाल हेय्युर अयते अर्सात्तुर. इंदके वरोर मंतोर, इंकावरोर इदवेरदाका वायाहिल्लोर. ओर वातस्के ओन्क कोन्नि रोजकु राज्येम किय्ये पीता.

11 मोदाला मत्ता इंदके हिल्ले इत्ता जिवरासि इत्ते, एनमिदो राजाल आंदु. ओरगुडा एडुर राजालोरसंतोर गानि ओरगुडा नासडेम आयानुर.

12 निमे हळता पदि कोहकु इत्ते, ओर पदि राजालोर आंदुर. आ राजालोर इदवेरदाका राज्येम ताकसा हिल्लुर गानि ओर्कु आ जिवरासितोनि उंदि गंटादाका राज्येम ताकसना अदिकारम हियमळ जर्गता.

13 ओर अंतोर उंदि मनसु आसि ओरा ताकत, अदिकारमतुन अद जिवरासिक हीतुर.

14 ईर राजालोर गोर्रो पोरिनतोनि लडाइ कियानुर. गानि गोर्रो पोरि सामिल्लुकुना सामि, राजालोरा राजाल आताहाटी, अद दाना केयतोर, पेरतोर आनि विस्वासुल्लुकुनतोनि कलियसि आ राजालोर्कुन गेल्संता,” इंचि इत्ता.

15 अद आता पजा दूता नातोनि, “बोगामोतळ उद्दिस मत्ता बव एता जलां अयते निमे हळतिन, अव जलां इत्ते, वेरे-वेरे लोकुकुलक, वेरे-वेरे लोकुकुना मंदां, वेरे-वेरे देसेल्लुकुनोर, वेरे-वेरे बासां वळकानोर आंदुर.

16 इंका निमे हळता जिवरासि आनि दाना पदि कोहकु, आ बोगमतनम कीता मुरतटुन हैय्सों. दान दिक्कु हिल्लाकोटा कीसि दाना कपडिं हिलाकोटा कीतां. दाना मेंदुलता हळ्विन तिंचि, तळमिते वाटसीतां.

17 बारित्ते पेनदा पोल्ले पुरागा आयानदाका, ओर अंतोर राजालोर उंदि मनसु आसि ओरा राज्येमतुन जिवरासिक हियना इंचि पेने ओरा मनसुने वाटता.

18 इंका निमे हळता मुरतळ इत्ते, दुनियाता राजालोरपोर्रो राज्येम कियाना पेद्दा सहर आंदु” इंचि वेहता.

18

बेबिलोनता नासडेम

1 अद आता पजा नना उंदि पेनदा दूतातुन स्वर्गमताल हिळु रेयसेक मत्तद हळतन, आ दूताक वेल्लेने अदिकारम हीसि मत्ता. दाना महिमाता वेल्गुने बूमिअंता जग्गरा आता.

2 आ दूता पेद्दा आवाजते वरगोयसि, “हिळारता, बेबिलोन पेद्दा सहर हिळारता. इंदके अद देय्याल्क, दुस्ट आत्मां मनना जागा आता. बताके ओज्जुवव आनि ह्यसुवा पिट्टे अगा जागा पीतां.

3 बारित्ते, दाना बोगमतनमता कल्लु अन्नि देसेल्लुकुनोर उट्टुर. बूमिपोर्रोटा राजालोर दानतोनि बोगमतनम कीतुर, अद बोगमतनम कीसि कमय कीता दनमताहेंदाल बूमिपोर्रो दंदा कियाना लोकुकुलक सिरमंतुल्क आतुर” इंचि वेहता.

4 अस्के स्वर्गमताल इंकुंदि आवाज इल्हा केंजावाता गदा, “ना लोकुकुलुनिटा दाना पापमते कलियमट्टु, दानपोर्रो वायना गंडाल्लुकु मीपोर्रो वायामन्नि इत्ते दानगटाल पलाते पेय्सट.

5 दाना पापालकगुडा वेल्लेन आसि स्वर्गमदाका एवतां, पेनगुडा दाना तप्पुड कबाहकुन मति कीता.

6 अद मीतोनि बल्हा कीतनो अल्हे मिमेटगुडा दानतोनि कीम्ट, अद कीता कबाहकुनाहेंदाल दान्क रोंडु अंताल्क हीम्ट. बद वाटिते अयते अद मीकु निहाचि हीता अदे वाटिते मिमेटगुडा रोंडु अंताल्क निहाचि हीम्ट.

7 अद बल्हा अयते पेद्दिरकेमते, सुकमते मत्ता, अल्हेने दान्क तिप्पल्क, दुक्काल्क हीम्ट. बारित्ते अद दाना मनसुल्लुकुने, नना रानिन आंदुन, मुंडामोस्तादान आयोन, इंका नना बस्केने तिप्पल्कुने अर्रोन,” इंचि इनकुंता.

8 अदुनहाटीं हामुर, दुक्कम, कर्वु इवन्नि तकलिपकु उंदे रोजुने दानपोर्रो वायानुं, दाना न्यायम कियाना सामि पेनबाबाल दानकन्ना वेल्लेन बलम मत्तोर आताहाटीं अदुन तळमिते बोळिस बूळ्दि कियानुर.

9 बूमिपोर्रोटा बोर राजालोर अयते दानतोनि बोगमतनम कीसि सुकमते मत्तुर, आ राजालोर दानु वेयानद हळसि, सतता साति तंचेके अळानुर.

10 ओर दाना तकलिपकुन हळसि, वेरियसि वेल्लेन लक्कु होंचि नित्तिसि, “अय्यो पेद्दा सहर, ताकत मत्ता बेबिलोन, उंदे गंटालोप्पो नीपोर्रो पेनदा सिक्सा वासि अरता” इंचि इनानुर.

11 ई बूमिपोर्रो दंदा कियानोर, अद वेय्यनदुन हळसि, इंदके ओरा सामानतुन अस्सानोर बोरे हिल्लुर इंचि अळानुर, दुक्कम कियानुर.

12-13 अव सामान बव इत्ते, बंगारम, एंडि, डिस्को पूसां, मुच्याल्लुकु, मेत्तटा कपडिं, नेडि पंडि रंगुना कपडिं, रेसिम कपडिं, अन्नि रकाल्लुकुना गमागमा गब्बु वायाना कट्टे, एक्को दराता कट्टे, कच्चि, इत्तोडिता सामान, नुन्टा बंडाना टाइल्सुकु, अन्नि तीरकुना मसालां, मसालाते वाटाना सेक्का, दालचिनि,* मसालां, ऊदु, अत्तरनिय्युकु, अंगुर कल्लु, निय्युकु, मैदा, गोह्कु, गोडकु-कोदा, एटि-गोरे, गुराल्लुकु, रताल्लुकु, दासुल्लुकु, लोकुल्लुकुना जीवां अम्मुंदुर, गानि इंदकेटाल इवुन बोरे अस्सुर.

14 नीकु इस्टामाता पंडिं निहागटाल लक्कु होत्तां, रसि आता तिडि, नीकु सुकम दोर्कना वस्तुक नासडेम आतां. मर्रा अव निहागाटोर्क बोर्के बस्केने दोर्को.

15-17 इव वस्तुकुन अम्मिसि अद सहरताहेंदाल सिरमंतुल्लुकु आता आ दंदा कियानुर, दाना तिप्पल्लुकुन हळसि वेरियसि लक्कु होंचि, “नेडि पंडि रंगुना आनि एर्रा रंगुना कपडिं, बंगारम, डिस्को पूसां, मुच्याल्लुकुना दुम्मे वाटसि मत्ता पेद्दा सहरतुना, उंदे गंटालोप्पो नासडेम आसोत्तिन इंचि बादा पळसेके अळंतुर.” जहाजकु ताकसानुर, अव्टे उद्दिदस होनानुर, अव्टे कबळ कियानुर, अल्हेने समुद्रमताहेंदाल कोत्तां कमांचना हरेक मनकल दान नासडेम आयानद हळसि लक्कु होंचि नित्तांतुर.

18 अद सहर वेयाना पोया हळसि, “अद सहरतालेसी पेद्दा सहर बदाना मंताना?” इंचि इनानुर.

19 पजा ओर वेल्लेन दुक्कमते, ओरा तल्लनपोर्रो दुब्बा दोसकुंचि, दुक्कमते, अळसेके, वरगेयसेके, “अय्यो पेद्दा सहरतुना, समुद्रमते जहाजकु मनना हरेक मनकल नीहेंदाल सिरमंतुल्लुकु आतुर. गानि उंदे गंटालोप्पो निमे पुरागा नासडेम आतिन” इंचि इनालय दल्यंतुर.

20 “ए स्वर्गमते मनानोरिटा, पेनदा पवित्र लोकुल्लुकुनिटा, प्रेरितुल्लुकुनिटा आनि पेनदा कबुरतोरिटा, अद सहर नासडेम आताहाटी कूस आम्टु, अद सहर मीक्कन हर्रि तप्पिस्ता इंचि पेन दानक दगता सिक्सा हीता” इंचि आ पेनदा दूता वेहता.

21 अस्के वेल्लेन बलम मत्ता उंदि पेनदा दूता, जोत्तातसोटा पेद्दा बंडातुन तेहचि समुद्रमते वाटसि इल्हा इत्ता, “पेद्दा बेबिलोन सहरतुन नासडेम कियानाहाटी पेनगुडा इल्हे पोच्चंता, पजा अद मर्रा बस्केन दिस्साकोटा आयार.

22 टांबुरा नेकसानोरा, पाटा पारानोरा, तूरीला उहकानोरा, तूताकोम उहकानोरा आवाज इंदकेटाल बस्केने नीवा लोप्पो केंजा वायो. निहगा कबाहक कियानोरगुडा इंदकेटाल बस्केने दिस्सुर. जोत्ता नोराना आवाज गुडा निहगा केंजा वायो.

23 इंदकेटाल नीवा लोप्पो पंतैना वेळसि बस्केने दिस्सो. मरमिने एगराना-दुनकाना सप्पुड बस्केने केंजा वायो. बारित्ते निहगा दंदा कियाना लोकुल्लुकु पूरा बूमिपोर्रो पेद्दाल्लुकु मत्तुर, इंका निमे नीवा होदें-मंत्राल्लुकु कीसि अन्नि देसेल्लुकुनोर्कुन पसांचतिन.

24 निहगा पेनदा कबुरतोरानेत्तुर, पेनदा लोकुल्लुकुना नेत्तुर अल्हेने वेरे लोकुल्लुकुना नेत्तुर दिस्ता” इंचि वेहता.

19

स्वर्गमते पेनदा स्तुति

1 अस्के स्वर्गमते वेल्लेन मंदिलेसी पेद्दा आवाजते, “हालेलुया! मुक्ति, महिमा आनि ताकत मा पेनदा कय्देन मंता,
2 अद कियाना न्यायम सत्तेमतद आनि नीतिगल्लद आंदु, बारित्ते बेबिलोन सहर बोगमतनम कीसि पूरा दुनियातुन हेळाहता. अदुनहाटी पेन दान्क सिक्सा हीसि दाना सेवाकुल्लुकुना बदला येतता,” इंचि इनानद केंजावाता.

3 मर्रंदि मल्ला ओर, “हालेलुया! अद सहर वेय्याना पोया युगा-युगाल्लुकुनाहाटी पेय्सेकेन मनंता,” इंचि इत्तुर.

4 अस्के आ इरवै नाल्लुर एनकटा पेद्दाल्लुकु आनि आ नाल्लुं जिवरासी राजगद्देपोर्रो उद्दिदस मत्ता पेनदा काल्लुकुनगा टोंगरां ऊनसि, “आमीन हालेलुया!” इंचि मोळ्कतुर.

5 अस्के राजगद्देताल उंदि आवाज, “ए पेनदुकु वेरियसि पिस्साना दाना सेवाकुरिटा, मिमेट सिन्ना-पेद्दा बोरे आम्टु, अंतोर पेनदा स्तुति कीम्टु,” इंचि इनानद केंजावाता.

6 पजा नाकु वेल्लेन मंदितालेसी आवाज, वेल्लेन एता तळाना आवाज आनि मब्बु उस्मताप आवाज केंजावाता. अद आवाज, “हालेलुया! सामि मना पेनबाबाल वेल्लेन सक्तिमंतुड आंदुर. ओरे राज्येम ताकिचेके मंतोर.

7 गोरे पोरिना मरमिं दग्गेर्क एवतां, मरमिं आयालय मरमिना पेगिडगुडा तयारे मंता. अय्ते वटु, मनम आनंदमते, कुसिते दाना स्तुति कीकोम.

8 दान्क पौडालय साप-सुतरा तेल्लाटा आनि मेर्सना मलमल कपडिं हीतुर. आ मलमल कपडिं इत्ते, पेनदा लोकुल्लुकु कीता नीति कबाहक आंदु” इंचि वेहानद नना केंजतन.

9 पजा पेनदा दूता नाकुन, “गोरे पोरिना मरमिना गाटो तिनालय बोर्कुनय्ते केयमळ जर्गता ओरे आसिर्वाद दोर्कतोर आंदुर.” पजा, “इद पेनदा सत्तेम पोल्ले आंद, इदुन रासा,” इंचि मर्रा इत्ता.

* 18:12-13 इदु उंदि मसालाते मनना उंदि सेक्का आंदु.

10 पजा नना आ दूताता काल्क मोळकालय दाना काल्कुनपोर्रो अरतन अय्ते अद नाकुन, “निमे नाकुन मोळकमा. ननागुडा नीलेसीं, नीवा दंताता विस्वासुल्कुनलेसीं येसुना बारेमता गवाइ वेहासेके सेवा कियानोने आंदुन. निमे सिराप पेनदुने मोळका. बारित्ते येसुना बारेमता गवाइ इत्तेने बविस्यवानिता आत्मा आंदु.”

तेल्ला गुरमपोर्रो उदमळ

11 अस्के स्वर्गम कुल्ला आसि मत्तद हळतन, अगा नाकु उंदि तेल्ला गुरम दिस्ता. दानपोर्रो उद्दिदस मत्तोन, विस्वासमगल्लोड, सत्तेमतोर इंतुर. ओर नीतिते न्यायम कीसि लडाइ कीतोर.

12 ओना कळक पोत्तना तळमितालेसीं मंतां, ओना तल्लापोर्रो वेल्लेन किरिटाल्कु मत्तां. ओनापोर्रो उंदि पोरोलगुडा रासि मंता, आ पोरोलता अर्तम ओन्क् तप्पा बोर्के तेळियो

13 ओर नेत्तुरते मुळहाता कपडिं केरसि मत्तोर. ओना पोरोल “पेनदा पोल्ले” आंद.

14 स्वर्गमते मनना सिपाइल्क तेल्लगा साप-सुतरा मलमल कपडिं केरसि, तेल्ला गुराल्कुनपोर्रो उद्दिदस ओना पज्जो-पज्जो होंचेके मत्तुर.

15 अन्नि देसेल्कुनोर्कुन हळकनाहाटीं ओना तोळदाल उंदि वेल्लेन करा-करा मत्ता कसेर पलाते पेयसंता. ओर आ देसेल्कुनापोर्रो कडक राज्येम ताकसंतोर आनि अन्निटकन्ना सक्तिमंतुड पेनदा होंगुना अंगुर रसमता गानगु पोक्कातुन जारांतोर.

16 ओना कपडि आनि तोडापोर्रो, “राजालोर्कुना राजाल, सामिल्कुना सामि,” इंचि रासि मंता.

17 अस्के पोळदुनपोर्रो उंदि दूतातुन निलसि मननद नना हळतन. अद मळ्बुन पोरोर परिण्याना अन्नि पिट्टेन पेद्दा आवाजते, “वट! पेनदा गाटो तिननाहाटीं जमा आम्टु,

18 मिमेट वाते, राजालोरा हळ्विं, सिपाइल्कुना हळ्विं, अदिकारिल्कुना हळ्विं, गुराल्कुना हळ्विं, गुराल्कु ताकसानोरा हळ्विं, दासुल्कुना हळ्विं, दासुल्क आयवोरा हळ्विं, इल्हा सिन्ना-पेद्दा अन्नि लोकुल्कुना हळ्विं तिनालय मीकु दोर्कता” इंचि इत्ता.

19 अस्के अद जिवरासि, दुनियाता राजालोर आनि ओरा सिपाइल्क गुरमपोर्रो उद्दिदस मत्तोनतोनि आनि ओना सिपाइल्कुनतोनि लडाइ कियालय जमा आतद नना हळतन.

20 पजा अद जिवरासितुन आनि पेनदा आबद्दम कबुरतोन दोर्का पियमळ जर्गता. ओर कीता चिन्हाना हेंदाल, अद जिवरासिता सिक्का तंचि मत्तुर्कुन आनि दाना बोम्मातुन मोळकानोर्कुन पसांचमळ जर्गता. ओर इव्वुर्कुनगुडा गंदकमते रमारमा पोत्सेके मनना तळमि गुंडमते जीवाते मननेकेन वाटसीयमळ जर्गता.

21 कळमातोर्कुन बारे आ गुरमपोर्रो उद्दिदस मत्तोन तोळदाल पेयसता करारकरा कसेटे हळ्कमळ जर्गता. पजा पिट्टे वासि ओरा अंतोरा हळ्विन पीरमेड तित्तां.

20

वेय वर्सानाहाटीं देय्यमतुन दोहाचि इरमळ

1 पजा उंदि दूता, स्वर्गमताल हिळ्ळ रेय्से वायनद नना हळतन. दानागा वेल्लेन लोत पोक्काता तालम कय्क आनि उंदि पेद्दा गोल्सु मत्ता.

2 पजा आ दूता, बदन अय्ते इबलीस, देय्यम इंतुरो आ पळाना मासुल तरासतुन दोर्कापीसि वेय वर्सानाहाटीं दोहाचि वाटता.

3 पजा, वेय वर्सा निंडनदाका वेरे-वेरे देसेल्कुनोर्कुन बोक्किच्चा मन्नि इंचि आ दूता दान वेल्लेन लोत पोक्काते वाटसि बंद कीसि दानपोर्रो सिक्कां तंता. वेय वर्सा निंडतस्के जेरासेपताहाटीं दान होळसा पिय्यार.

4 मर्रा राजगद्दें हळतन. अबुनपोर्रो उद्दिदस मत्तोर्कुन न्यायम कियाना अदिकारम हीसि मत्ता. इंका येसुना बारेमते गवाइ वेहताहाटीं आनि पेनदा पोल्ले वेहताहाटीं बोरा तल्लां अय्ते कोयमळ जर्गता, बोरा अय्ते जिवरासितुन हिलाकोट्टे दाना बोम्मातुन मोळका हिल्लुर आनि कपालमपोर्रो हिलाकोट्टे कय्दापोर्रो दाना चिन्ह वाटकुना हिल्लुर असंतोरा आत्मान नना अगा हळतन. ओर मर्रा जीवाते तेदसि किरिस्तुनतोनि कलियसि वेय वर्सनदाका राज्येम कीतुर.

5-6 इदे मोट्टा मोदाटा हासि मर्रा जीवाते तेदमळ आंद. कळमातोर बोरा अय्ते हासि मत्तुरो, ओर इव वेय वर्सा निंडनदाका मर्रा जीवाते तेदा हिल्लुर. इल्हा मोट्टा मोदाटा मर्रा जीवाते तेदतोर बोरा अय्ते मत्तुरो ओर पवित्र आनि आसिर्वाद दोर्कतोर आंदुर. ओरपोर्रो रोंडो हामुरता ताकत कबळ किय्यो. गानि ओर पेनदा आनि किरिस्तुना पेर्मालोर आंतुर. आसि किरिस्तुनतोनि कलियसि वेय वर्सा राज्येम कीतुर.

देय्यमतुन तळमिते वाटमळ

7 वेय वर्सा आतारित्ते, दोहाचि मत्ता देय्यमतुन होळसीयमळ जर्गार.

8 अस्के आ देय्यम पलाते वासि, बूमिपोर्रो नालुं मूलाने मनना अन्नि देसेल्कुनोर्कुन इत्ते, गोग, मागोग इनना लोकुल्कुन नडेह कीसि लडाइहाटीं जमा कीता. समुद्रमता उस्केलेसीं लेक्का परवच्चोन लोकुल्क ओर मंतुर.

9 ओर पूरा बूमिअंता पैलांचि होत्तुर. पजा ओर पेनदा लोकुल्कुना डेरां आनि पेनदा पावरमगल्ला सहरता सुट्टु आतुर. गानि स्वर्गमताल तळमि हिळ्ळ रेय्से ओर्कुन नासडेम कीसि पोहता.

10 अस्के, जिवरासितुन आनि आबद्दम कबुरतोर्कुन बगा अय्ते मुन्नेन वाटतुरो, अदे गंदकमतोनि बगा-बगा पोतसेके मनना तडमिते, ओर्कुन नडेह कियाना देय्यमतुन वाटमळ जर्गता. अगा ओर नर्का-पिय्यल युगा-युगाल्कुनाहाटी तडमि मंटाते तनलाळसेक मनांतुर.

हासि मत्तोरान्यायम कियमळ

11 पजा नना, उंदि तेल्लाटा राजगद्दे आनि दानपोरो उद्दिदिस मत्तोतन हळतन. बूमि, मब्बु ओना मुन्नेटाल पेय्सि वित्तुतां. मर्रा अवुंक बगेन जेगा दोर्काहिल्ले.

12 पजा, हासि मत्ता सिन्नाल्कुन-पेद्दाल्कुन अंतोर्कुन राजगद्देता मुन्ने नित्तिसि मत्तद नना हळतन. पुस्तकाल्क विच्चिसि मत्तां. पजा इंकुंदि पुस्तकम विच्चुमळ जर्गता, अद पुस्तकम इत्ते पिस्वरता पुस्तकम आंद. पुस्तकाल्कुने रासि मत्ता पोल्लेन पोरोटाल, हासि मत्तोर कीता कबाह्कुन पीसि ओरा न्यायम कियमळ जर्गता.

13 अस्के समुद्रम, दानागा हासि मत्तोर्कुन अप्पजेपता. पातालम आनि नरकम, अवुनगा हासि मत्तोर्कुन अप्पजेपता. ओर कीता कबाह्कुन पीसि ओरा अंतोरा न्यायम कियमळ जर्गता.

14 पजा पातालमतुन आनि नरकमतुन तळमिता सेरवुने वाटमळ जर्गता. ई तळमिता सेरवु इत्ते रोंडो हामुर आंद.

15 पिस्वरता पुस्तकमते बोरा-बोरा पोरोलीं अय्ते रासि मना हिल्लेंगों, ओर्कुन अंतोर्कुन तळमिता सेरवुने वाटमळ जर्गता.

21

पूना स्वर्गम, पूना बूमि

1 पजा नना उंदि पूना स्वर्गम, उंदि पूना बूमितुन हळतन. बारिल्ले, मोदाटा स्वर्गम, मोदाटा बूमि मायम आसि होत्ता, इंका समुद्रमगुडा मनाहिल्ले.

2 अस्के, पेनदागटाल पवित्र सहर पूना येस्सलेम, स्वर्गमताल हिळु रेयानद नना हळतन. मरमिना पेडानाहाटी, मरमिना पेगिड बल्हा तयार आंता, अल्हा अद सहर दिस्सेक मत्ता.

3 पजा राजगद्देतगटाल उंदि पेद्दा लेंग इल्हा केंजावाता, “हुळाट, पेन इंदके मनकालोरा नड्डुम जेगा आता. अद ओरतोने मनंता. ओर दाना लोकुल्क आंतुर, अद कुद्दु ओरा पेन आसि ओरतोने मनंता.

4 अद ओरा कळ्ळुकुना कांडेह्कुन उस्मंता. मोदाटा पोल्लें मायसोत्तां, अदुनहाटीं ओर्कु हामुर, दुक्काल्क, बादां, तिप्पल्क मन्नों,” इंचि केंजावाता.

5 अस्के राजगद्देपोरो उद्दिदिस मत्तोर ओर, “हुळाट! नना अन्निटवुन पूनाव कीसि वाटंतन” इंचि इत्तोर. मर्रा ओर, “इव पोल्लें सत्तेम, विस्वासमलायकतव आंदुं, इवुन रासा,” इंचि नाकु वेहतोर.

6 पजा मरुंदि मल्का नाकु इल्हा वेहतोर, “इव पोल्लें पुरागा आतां. अल्पा आनि ओमेगा, मोदोल आनि आकिर ननाने आंदुन. दूपाते मत्तोर्कुंक नना पिस्वरता एता ऊटाताल एर पुक्कटते हीतन.

7 गेल्लसानोर अंतोर इव अन्निटवुना वारसदार्क आंतुर. नना ओरा पेनदुन आंतन, ओर नावा पिलाल्क आंतुर.

8 गानि वेरियानोर, विस्वासम हिल्लोर, कराब कबाह्क कियानुर, हक्कानुर, बोगमतनम कियानुर, होदें कियानुर, बोम्मन मोळ्कानुर आनि आबद्दम वळ्कानुर अंतोर, गंदकमते गबा-गबा पोतसेके मनना तळमिता सेरवुने अरानुर. इदु रोंडो हामुर आंद,” इंचि वेहतोर.

पूना येस्सलेम सहर

9 पजा, एंडुं वाटिने आकिरता एंडुं गंडाल्कुन पीसि मत्ता एंडुं दूतानाल उंदि दूता नहगा वासि, “हिक्के वा! नना नीकु मरमिना पेगिटुन, इत्ते गोरें पोरिना मुत्तोतन हुप्संतन” इंचि इत्ता.

10 अस्के आ दूता, नना पवित्र आत्माते निडिसि मन्नेके नाकुन उंदि पेद्दा एत्तु गट्टापोरो ओता. ओसि, पेनदागटाल पवित्र येस्सलेम सहर स्वर्गमताल हिळु रेयानदुन नाकु हुपिस्ता.

11 अद सहर पेनदा महिमाता वेल्गुने निडिसि मत्ताहेका दाना कांति यसब इनना वेल्लेन दाराता बंडालेसीं मेसेक मत्ता.

12 अद सहर सुट्टु उंदि पेद्दा एत्तु गुरे मत्ता. दान्क पन्नेंड गल्मां मत्तां. पन्नेंड गल्मानगा पन्नेंड दूतां मत्तां. आ गल्मनपोरो इस्त्राएल लोकुल्कुना पन्नेंड वंसाल्कुना पोरोलीं रासि मत्तां.

13 पोळ्द पेय्सनहेके मूड गल्मां, पोळ्द अर्रनहेके मूड गल्मां, दक्खिनतेके मूड गल्मां आनि उत्तरतेके मूड गल्मां मत्तां.

14 अद सहर सुट्टु मत्ता गुरे पन्नेंड पूनादिनपोरो निल्सि मत्ता. आ पन्नेंड पूनादिनपोरो गोरें पोरिना पन्नेंड प्रेरितुल्कुना पन्नेंड पोरोलीं रासि मत्तां.

15 नातोनि वळ्कता दूतातगा, अद सहरतुन, दाना गुरेन आनि दाना गल्मन कहालय, बंगारमता उंदि सलाकि मत्ता.

16 अद सहर नालुं मूलाना आकारमते दोहाचि मत्ता. अद सहरता पोडगु आनि नेर्वु समानम मत्ता. अद बंगारमता पट्टिते सहरतुन कहता, अस्के अद सहर 2,400 किलोमिटर पेय्सता. सहरता एत्तु, नेर्वु, पोळ्गु समानम मत्ता.

17 पजा आ दूता सहरता गुरेतुन कहतस्के, आ गुरे मनकना कूटाते इत्ते दूताता कूटातेगुडा नूटा नल्पै नालुं कूटां मत्ता.

18 अद गुरे यसब इनना एक्को दाराता बंडाते दोहाचि मत्ता आनि अद सहर काचुनलेसीं मेर्सना पिक्कर बंगारमते दोहाचि मत्ता.

19-20 अद सहरता पुनादि, रका-रकाल्कुना एक्को दराता बंडां वाटसि दोहाचि मत्ता. मोदाटा पुनादि यसब बंडाते, रोंडो पुनादि निलमनि बंडाते, मूडो पुनादि यमुना बंडाते, नाल्गुंगो पुनादि मरकत बंडाते, हेय्युंगो पुनादि गोमेद बंडाते, हासंगो पुनादि मानिक बंडाते, एडुंगो पुनादि पीतमनि बंडाते, एनमिदो पुनादि पेरोज बंडाते, तोम्मिदो पुनादि पुकराज बंडाते, पदो पुनादि लहसनि बंडाते, पदाकोडो पुनादि दुम्रकांत बंडाते आनि पन्नेडो पुनादि याकूत बंडाते दोहाचि मत्ता.

21 आ पन्नेड गल्मां पन्नेड मुच्याल्लुकुनतोनि तयार कीसि मत्तां. उंद-उंदि गल्मा उंद-उंदि मुच्येमतोनि दोहाचि मत्ता. सहरता हारि, काचुनलेसीं मेर्सना पिच्चर बंगारमते तयार कीसि मत्ता.

22 अद सहरते नाकु गुळि दिसा हिल्ले. बारित्ते अगाटा गुळि अन्निकन्ना सक्तिमंतुड आता पेनबाबाल आनि गोरि पोरि आंद.

23 अद सहरते वेलगु हियालय पोळ्दु, वेडसिता अवसरम हिल्ले, बारित्ते पेनदा महिमाता वेलगु अगा कांति हीता आनि गोरि पोरि दाना वेळसि आंद.

24 अन्नि देसेल्लुकुना लोकुल्लक दाना वेडसिता वेलगुने ताकानुर आनि दुनियाता राजालोर अद सहरते ओरा पेदूदातनम पीसि वायानुर.

25 अद सहरते नर्का बस्केने आयो. अदुनहाटीं दाना गल्मां बस्केळ्ळक कुल्लाले मनंता.

26 अद सहरता लोप्पो अन्नि देसेल्लुकुना लोकुल्लक ओरा पेदूदातनम आनि कदर पीसि वांतुर.

27 गोरि पोरिना पिस्वरता पुस्तकमते बोरा पोरोलीं अय्ते रासि मंतां, ओरे अद सहरते होळिया परांतुर. गानि अपवित्र लोकुल्लक, पापि कबाहक कियानुर हिलाकोटे आबदूदम वळ्ळकानुर अद सहरते होळिया परं.

22

पिस्वर हिय्यना बेरेड

1-2 अस्के पेनदा दूता नाकु सक्कगा मिटकरा मनना पिस्वरता एर हिय्यना बेरेटुन हूपिस्ता. अद बेरेड पेनदा आनि गोरि पोरिना राजगदूदेताल सुख आसि, अद सहरता पेदूदा हरदा नड्डुमताल पोंगसेक मनुंदु. अद बेरेटा ओड्डुंक रोंडु पक्काने पिस्वर हिय्यना मराक मत्तां. अव मराक वर्साता हरेक नेलाते पन्नेड तीरकुना पंडि हादसेकेन मनुंदु. दुनियाता अन्नि देसेल्लुकुना लोकुल्लक अव मराकुना आकिने बेस आयुंदुर.

3 अद सहरते वायना रोजकुने बस्केने सापनेम मन्नो. बारित्ते अगा पेनदा आनि गोरि पोरिना राजगदूदे मंता. अबुना सेवाकुल्लक पेनदा सेवा कियानुर.

4 ओर दाना मोकोम हळांतुर. ओरा कपालमपोरीं पेनदा पोरोल रासि मंता.

5 अगा हीकट बस्केने मन्नो. ओर्कु पोळ्दु, वेडसि वेलगुना अवसरम मन्नो. बारित्ते सामि पेनबाबाले ओर्कु वेलगु हियानुर. युगा-युगाल्लुकुनदाका ओरे राज्येम ताकसंतोर.

6 पजा अद पेनदा दूता नातोनि, “इदवेरादाका बतल अय्ते वेहामळ जर्गता अव पोल्ले विस्वासमलायक आनि सत्तेम पोल्ले आंद, बव पोल्ले अय्ते बिराना जर्गमळ अवसरम मंता, अव पोल्लेन दाना सेवाकुल्लक हुप्सानाहाटीं, कबुरतोर आत्मान ताकसाना पेने दाना दूतातुन लोहता,” इंचि इत्ता.

येसु किरिस्तु मर्ग वायमळ

7 इवन्नि आता पजा येसु सामि, “हुळट! नना बिरानेन वासेक मंतन. इद पुस्तकमते वेहचि मत्ता पोल्लेन परकारम बोर अय्ते ताकंतोर, ओरे आसिर्वाद दोर्कतोर आंद,” इंचि वेहतोर.

8 नना योहानुन, इव पोल्ले केंजतन, हळतन. केंजुड, हळुड आतस्के, अव पोल्ले वेहता दूताता काल्क मोळ्ळकानाहाटीं दाना काल्कनपोरीं अरतन.

9 गानि अद नाकुन, “निमे नावा काल्क मोळ्ळकमा, ननागुडा नीलेसीं, नी दंताता कबुरतोरलेसीं, इद पुस्तकमते वेहचि मत्ता पोल्लेन परकारम ताकानोरलेसीं पेनदुन मोळ्ळकानोने आंदुन. निमे सिराप पेनदुने मोळ्ळा,” इंचि इत्ता.

10 अद दूता मर्ग नातोनि, “इद पुस्तकमते वेहचि मत्ता पोल्ले निजम आयाना वेला दग्गेरा एवता, अदुनहाटीं इद पुस्तकमतुन निमे मक्किचि ईर्मा,” इंचि इत्ता.

11 “अन्यायम कीसेके मनानोर अन्यायम कीसेकेन मन्निरकांटी, हेळ्ळसोत्तोर ओर हेळ्ळसोचे मन्निरकांटी, नीतिमंतुड मत्तोर, ओर नीतिमंतुडे मन्निरकांटी, पवित्र मत्तोर, ओर पवित्र मन्निरकांटी,” इंचि इत्ता.

विस्वासुल्लुकुनाहाटीं गवाइ

12 पजा येसु सामि, “हुळट! नना बिरानेन वासेक मंतन. हरेक मनकंक ओर कीता कबाहकुन पीसि, ओन्क इनाम हीतन.

13 ननाने अल्पा, ननाने ओमेगा आंदुन. ननाने मोदाटोन, ननाने आकिर आंदुन. इंका ननाने सुख कियानोन, ननाने महानोन आंदुन.

14 बोर अय्ते ओरा कपडिं हुक्कि बेस साप कीतुर ओर आसिर्वाद दोर्कतोर आंदुर. ओर्क पिस्वर हिय्यना मराता पंडि तिनालय आनि आ गल्माताल सहरते होळियालय अदिकारम दोर्कार.

15 गानि नयकस्केल लोकुल्लक, होदेगाहकु, बोगमतनम कियानुर, हळ्ळकानुर, बोम्मांक मोळ्ळकानुर, आबदूदमतुन पावरम कियानुर, आबदूदम वळ्ळकानुर अंतोरगुडा सहरता पलातेन मनांतुर.

16 येसुन आंदुन. दाविदना वंसंमतोन ननाने आंदुन. हक्केटा मेर्सना सुक्कातुनगुडा ननाने आंदुन, इंचि इव पोल्लेना बारेमता गवाइ कलिसियातोरक वेहनाहार्टी नावा उंदि दूतातुन मिहगा लोहतन” इंचि वेहता.

17 पेनदा आत्मा आनि मरमिना पेगिड, “हिव्के वा” इंचि वेहांता. केंजानोरगुडा, “वा” इंचि इन्निरकांटी. दूपा आसि मत्तोर बोरे आयिर इद पिस्वर हियना एतुन पुक्कटते उन्ना वच्चु.

आकिरता पोल्ले

18 इद पुस्तकमते वेहिच मत्ता वायाना कालमते जर्गना पोल्लेन केंजना हरेक मनकंक इल्हा गट्टिगा वेहासेक मंतन गदा, बोरन्ना इव पोल्लेन बतलन्ना एक्को कल्पानयते, इद पुस्तकमते रासि मत्ता गंडाल्कु पेनबाबाल ओनपोर्रो वायागोटनुर.

19 अल्हेने ओक्कला बोरन्ना, इद पुस्तकमते रासि मत्ता मुन्ने जर्गना पोल्लेनाल, बदनना पोल्लेतुन तक्को किथियना, इद पुस्तकमते वेहिच मत्ता, पिस्वर हियना मरा आनि पवित्र सहरताल पेन ओना हिस्सातुन तेंडकुंता.

20 इव अन्नि पोल्लेना गवाइ हीता येसु सामि, “हो नना बिरानेन वासेक मंतन” इंचि वेहासेक मंतोर. आमीन! वा! येसु सामि वा!

21 पेनदा अंतोर लोकुल्कुनपोर्रो येसु सामिना कुर्पा मन्निकांटी! आमीन!